


Alap mo Ol Ęse, zere mo zi niban de ol ziaha-en
gu hup dena



Orya: Alap mo Ol Ęse, zere mo zi niban de ol ziaha-en gu hup
dena (New Testament)

Alap mo Ol Ęse, zere mo zi niban de ol ziaha-en gu hup dena
Orya: Alap mo Ol Ęse, zere mo zi niban de ol ziaha-en gu hup dena (New
Testament)

copyright © 2005, 2018 Wycliffe Bible Translators, Inc.

Language: (Orya)

Contributor: Pioneer Bible Translators

All rights reserved.

2020-11-30

PDF generated using Haiola and XeLaTeX on 18 Apr 2025 from source files dated 29 Jan 2022
c93f518f-565f-570c-87e7-50d54e5ff0f6

Contents

Matius	1
Markus	80
Lukas	127
Yohanis	204
Dua-blas enkam de zih hip de aisil	260
Roma	325
1 Korintus	363
2 Korintus	396
Galatia	420
Efesus	433
Pilipi	444
Kolose	452
1 Tesalonika	461
2 Tesalonika	468
1 Timotius	472
2 Timotius	483
Titus	490
Pilemon	495
Ibrani	497
Yakobus	526
1 Petrus	535
2 Petrus	546
1 Yohanis	552
2 Yohanis	561
3 Yohannis	563
Yudas	565
Hamal hap de ol	568

Yesus hup de Ol Dawemna mensa Matius ale gulkuke

Yesus mo auyan-aza mo bosem-sena an zen:

¹ Kristus Yesus, Zen teipsin zini Daud Bak mo Auyan-tane.* Zeno auyan-aza mo ausuna, zen Abraham Bak onakon de aïtbinkim kon gwesibir hanankam:

² Abraham Isaksa wë taka.
Isak hwëna Yakobsa wë taka.
Zen hwëna beyana dua-blas enkam wei-wik gulku.

Ahana bosena Yehuda,
³ zen hwëna Peres ne Zera neka wë soka- wenyä bosena Tamar hon.

Hwëna Peres zep Hezronsa wë taka.
Zen hwëna Ramsa wë taka.

⁴ Ram hwëna Aminadabsa wë taka.
Zen hwëna Nahasonsa wë taka.
Zen hwëna Salmonsa wë taka.

⁵ Salmon hwëna Boassa wë taka- Rahab hon.
Boas hwëna Obedsa wë taka- Rut hon.

Zen hwëna Isaesa wë taka.
⁶ Isai hwëna teipsin zini Daud Baksa wë taka.

Teipsin zini Daud Bak onakon hëndep in kim Israel mo auyan-azasa Babel san dep asaskam kap nulhak- zao de lowehe gwen hap, zëno mae mo bosem-sesa de aïtbinni an zen:

Daud Salomosa wë taka- Uria mo we nala Batsyeba hon.

⁷ Salomo hwëna Rehabeyamsa wë taka.

Zen hwëna Abiasa wë taka.

Abia hwëna Asa Baksa wë taka.

⁸ Zen hwëna Yosafatsa wë taka.
Hwëna Yosafat Yoramsa wë taka.

Zen hwëna Uzia Baksa wë taka.

⁹ Uzia hwëna Yotamsa wë taka.

Zen hwëna Ahas Baksa wë taka.

Ahas hwëna Hiskiasa wë taka.

¹⁰ Zen hwëna Manasyesa wë taka.

Manasye hwëna Amon Baksa wë taka.

Zen hwëna Yosia Baksa wë taka.

¹¹ Yosia hwëna nonol Yekonyasa wë taka. Zao zep hen etan oso wal zemka wei-wik gulku. Israelk de zini kim holokam Alapsa hli dak, dekam zep Babelk de jana nabare zini teipsin zini Yekonyasa zëre mae mo lang san dep nêrhak, hen Israelk de zini beya tangankam asaskam zao kang nuk.

¹² Yekonya hwëna Babelk zep Sealtiensa wë taka. Zao kim 70 tahun enkam lowehék, ki zep etan tapbla nuk.

Sealtiel hwëna Zerubabelsa zep wë taka.

¹³ Zerubabel hwëna Abihudsu zep wë taka.

Zen hwëna Elyakimsi zep wë taka.
Elyakim hwëna Azor Baksa zep wë taka.

¹⁴ Zen hwëna Zadoksa zep wë taka.

Zadok hwëna Akimsi zep wë taka.

Zen hwëna Eliudsu zep wë taka.

¹⁵ Eliud hwëna Eleazarsa zep wë taka.

Zen hwëna Matansa zep wë taka.

Matan hwëna aha zini Yakobsa zep wë taka.

¹⁶ Jakob hwëna Maria mo zini Yusupsu zep wë taka.
Maria zep Yesussu wë tak- Insa "Kristus" kum en gweblananke. †

* **1:1 1:1** Matius kim ayatnak awe Yesussu "Daud Bak mo Auyan-tane" kam gubluka, zëno dam gulsunnu Yesus mo auyan-aza en hap denaka hom. Yesus de hatan srëmnak, tîngare Yahudi zini Israelsa de ngaya tabin hip de Zini insa "Daud mo Auyan-tane" kam nen gweblak. Sap Alap mo olsa de ayang gul gwen zini zen kirekam nonol nen guk gweblak, "Teipsin zini Daud Bak mo ausu nakon sa hatala- nësa de ngaya tabin hip de Zi niye." † **1:16 1:16** Kristus zen bosesa hom. Zen Yesus mo syal hap de bose- men ki Camat ahaksa Gubernur, zen hen ki kirekam syal hap de bosena. Bosena Kristus mo enlalana, "Alap mo Dam Tasinnî, zisi de ngaya tabin hip Dena." Zen Yunani olkam de bose, hen zëno enlalana apdenak- men kirekam hen Ibrani olkam "Mesias" kam nen gweblananye.

¹⁷ Zep Abraham onakon de auyan-azasa äitbir hankam Daud osan dep beyana kitak empat-blas enkam. Hen Daud onakon de äitbir hankam Israelsa de asaskam Babelk kang gun sun dep, beyana hen empat-blas enkam. Hen dekon de etan lwan dahal zannak Kristus Yesussu de jaha gwen san dep äitbir hankam, beyana hen empat-blas enkam.

Yesussu kim Maria jaha gwekke:

¹⁸ Kristus Yesussu de jaha gwenna in, zen ausuna a kirekam mo lwakye: An zem in Maria, zen Yusup hup de golgu gweblanna. Hwëna nama de gon srëmnak zep u gwek. Hwëna Yusup hom anakan tame gu'unka, "Zen Alap mo Enho mo sasonkam u gwe'an."

¹⁹ Yusup man tangan Musa mo titi tabin ola blikip gwesik gwibirki, zep Mariasa zë-en enlala gwibi'inka, "Ëe molyë gok, sap zen malinkim u gwe'an." Zen dekam zep enlala gwe'anka, "Damnak de kira gwenkam, ki Maria mo bosena sa karek gwer. Zep sowëkam asa gwibir, 'Ëe ama emsa baes gwibi'in.' "

²⁰ Zen kim dam gulsuku, "Asa ki Mariasa baes gwibir," hwëna dekam zep ni tannak eisirkim Alap mo dam taha nakore zini gublu zaka, "Yusup, Daud Bak mo auyan-tane, bahem Mariasa de gon hap baes gwen. Sap Walasna insa u gwe'an, Zen Alap mo Enho mo sasonkam dena.

²¹ Zen zi walassa sa jaha gwer. Em Yesuskum bose ta, sap Zen in Zen sa zëre mo hli irin zini ngaya tabirizëno mae mo karek-kareksa de ngan gulsuzimdinkim."[‡]

²² An kitak Alap Zën ki syal gwibirki- zëre mo ol ayang gul gwen zini Yesaya mo alenak dikim zaun hup, mensa Zëna anakan gublukake,

²³ "Zi niban de gaing ën srëm wenam seiwiri sa u gwer, hëndep zi

walassa sa jaha gwer. Walasna in 'Immanuel'kam sa bose dal."*

Yesaya insa "Immanuel"kam gubluka, zen Ibrani olkam. Zëno enlalana, "Alap Zën nësa golëlowehe gwe'ara."

²⁴⁻²⁵ Ni tan nakon kim luweka, hëndep in kirekam Alap mo dam taha nakore zini in tonblaka, desan zep ki hëndep ang gweka. Hwëna Maria kim jaha gwe srëm gwe'ak, zen hom dekam nini apdekam la'ak. Walasna insa kim jaha gwek, Yusup dekam zep "Yesus" kum bose taka.

2

Yakla hata sezan nakon kim keis nikon de dam gulsuk gwen zini yaing gwe zakke:

¹ Yesussu kim Yerusalem mo langnak de ëna Betlehemk jaha gwek, dekam teipsinkim Herodes irik gilki. Hwëna dekam zep keis nikon de dam gulsuk gwen zini Yerusalemk yaing gwezak. Zini in Israel kore naka hom. Zëno mae mo langna yakla hata sezan san dekam.

² Zen zao zep ëtakensizik, "Yahudisa de teipsinkim irik gin hip de walasna in, endawe nër hom jaha gwek? Ëe keissië yakla hata sezan san hla la gwe'an- dekon de dam tasin hipye. Zen in zebë yaing gwezal- walasna insa de bokle kom tablan naban isrip-sri gweblan hap."

³ Teipsin zini Herodes kim kirekam salka, ausa zep hloka. Hen tingare Yerusalemk de zini kim kirekam ësaladak ausa zep ëhlondak.

⁴ Herodes dekam zep Alap mo golak de syal tan zi mo mam-mamna hen Musa mo olsa de tawa ta gwibin wenya zëbon de tagal gwen hap gwibiridaka. Zao zep takensibiridaka, "Alap mo hamal hap de ola kon, nësa de ngaya tabin hip de Teipsin

[‡] **1:21 1:21** 'Yesus'kum de bosena, zen hen Ibrani olkam enlala naban. Zëno enlalana "Bian (Alap) ngaya tabi'ira." Zep bosena in man tangan dakasti'in- men kirekam Alap mo dam taha nakore zini in hamal hap Yusup hup srip gulsublikaye. * **1:23 1:23** Yes. 7:14

Zini, Zen endawe sa an zem jaha gwer?"

⁵ Ki zep ding nulblik, "Sap diki Yerusalem mo langna Betlehemk de jaha gwen hap, sap Alap mo ol ayang gul gwen zi mo alenak man lwak,

⁶ 'Yehuda mo auyan-aza mo ëna in, Betlehem, zen ëna sap betekna- tïngare Yehuda mo langnak de ë-ë nakonye.

Hwëna lamkam zëno bosena sa tangan yawal gwera, sap ano hlil irin wenya Israelsa de zaho ta gwibin hip de Zini, Zen zëwe sa zëre mae mo ngirin klesnak jaha gwer.' "*"

⁷ Herodes kim kirekam zëbon mae salka, dekam zep yakla hata sezan nakore keis nikon de dam gulsuk gwen zini insa sowëkam gu sonebiridaka- zëbon de yaïng gwezan hap. Zao zep takensibiridaka, "Keisni in bawalkame nonol hla lak?"

⁸ Kim takensibiridasiki, ki zep gubiridaka, "Emki Betlehem san sek gwen. Zao walas tola insa dawem enkam lëblak. Zao de hla tankam, asa etan en gublu kïnzik- ëe akakim hen song gwëk, bokle kom soblan naban de hen isrip-sri gweblan hap."

⁹⁻¹⁰ Ki zep hëndep sek gwëk, ki zep hen keisni mensa yakla hata sezan san nonol hla dak, etan hla dak. Dekam tangan zep ëisrip-sri gwe'ak, sap keisni in man ngeirbirida'anka. Hëndep walas tola in zao gola ta'anka, zao en zep keisni in mo ngatanna zïlsï'inka.

¹¹ Gola iwe kim bitï gwëk, zao zep walas tola insa an zem Maria han nake'ak. Zao zep hëndep ëutuk gwe hezan naban boklena kom dablazak. Dekam zep zëre mae mo honnak de kire-kire bitï tahal zanna zëbe hap deisweblak, hëndep dekam zep zëbe hap kap dablak- emasna, ir ase dawem nabare te kilï, hen ahana obat hap de te kil dawemsa.

¹² Hwëna hla tan srëmnak Alap mes eisirkim anakan enlala sobiridaka, "Herodes osan bahem etan lwan dahan." Zep hëndep aha ora san zëre mae mo lang san dep lwan dahak.

Yusup ne Maria ne kim Yesus hun Mesir sin dep ërheya gwëkke:

¹³ Keis nikon de dam gulsuk gwen wenya in kim lwan dahak, Alap mo dam taha nakore zini ki zep eisirkim Yusup hon hata zaka. Zao zep gubluka, "Em luwen. Herodes man angkam eno nik mo walasna ansa tan hap de tëblan hap kalang gwe'ara. Walas tola insa em Mesir sin dep ërheya gwen. Zao holokam ërgwë. Etan aen asa ebon hatazal-dekam de emsa anakan guzimdin hip, 'Angkam sap esa etan ërlwa hala.' "

¹⁴ Yusup kim luwe zaka, dekam zep hëndep kam ërheya gwëk.

¹⁵ Zao zep ërgwë gwëk, hëndep Herodes tilki. Zen kitak Alap mo dwam gwibin sin ki lwak- Alap mo ol ayang gul gwen zini men kirekam Yesus hup dena hamal hap anakan ayang gulkuke,

"Ëe asa etan ëre mo Walasna Mesir kon kwang ta halzal."*

Herodes kim Betlehemk de zi walassa de tameran hap gubiridakake:

¹⁶ Herodes kim sap keis nikon de dam gulsuk gwen wenya insa kara gwibiridaka, hen anakan kim tame gulku, "Zen hom asa nen gublu kïnzï'an. Man asa ahap da guk kïnzik." Dekam tangan zep jal gwëka. Dekam zep zëre mo jana nabare zisi gubiridaka- Betlehemk hen zëno golek denak de ë-ë san de zi walassa tamerandan hap, dare tahun nakon olk san dep. Sap in kirekam keis nikon de dam gulsuk gwen zini in benna hen tahunna anakan nen gublu kïnzikke, "Nonol tanganna dekam hata seka."

* 2:6 2:6 Mik. 5:2; 2Sam. 5:2 * 2:15 2:15 Hos. 11:1

17 Zen dekam zep zauk- Alap mo ol ayang gul gwen zini Yermia Bak men desa ola anakan ayang gulkuye,

18 “Langna Rama kon gona sa wet so gwer, hen kamana sa nawa gwibir. Èe ama eisirkim Rahel Swesa hlauk. Ngein sin zen sa auyan-tane wal zemka hala-hla gwibiridal. Zen molya sēwehek, sap auyan-tane wal zemka kitak tangan sa damerasil.”*

Yusup ne Maria ne kim Yesus hun Mesir kon etan ērlwahal zakke:

19 Herodes kim tilki, Yusup ne dekam nama Mesirk ērgwē'ak. Dekam zep etan Alap mo dam taha nakore zini zēbon eisirkim hata zaka.

20 Zao zep gubluka, “Em luwen. Angkam sap esa walas om in han etan Israel san dep ērlwa hala. Sap teipsin zini men zen eno nik mo walasna insa de tan hap golēalp gwe'anka, zen mes angkam tilki.”

21 Ki zep hēndep luweka, dekam zep hēndep etan Israel san dep ērlwahak.

22 Hwēna kim etan salka, “Angkam Yerusalem mo langnak Herodes mo tanena Arkelaus Bak bi zik mo weinak teipsinkim irik gi'ira,” dekam zep hwēna desan de etan ērsong gwen hap airi'anka. Hwēna Bian zep etan eisirkim gubluka, “Galilea san ērsong gwe.” Dekam zep desan ērsong gwek.

23 Zao zep ē bosenā Nazaret ērgwē gwēk. Zen kitak Alap mo dwam gwibin sin ki lwak- men kirekam Alap mo ol ayang gul gwen zini orep zēbe hap dena ayang nul gwēkke,

“Zen Nazaret walkam sa nen gwēblal.”

* 2:18 2:18 Yer. 31:15 * 3:3 3:3 Yes. 40:3 * 3:4 3:4 2Raj. 1:8; Mal. 4:5 * 3:7 3:7 Farisikam de gubirida gwen zini, zen Yahudi zi mo aha hlikna, hen zen Yahudi mo auyan-aza mo jalse gwen olsa anakan tatete nul gwēk, “Bahem gulmurun.” Zen hen man anakan ēbolamda gwe-gwēk, “Èe en ama dawemkam Alap hon ētal gwēsī'in.” Zep zen hen man Yesusu baes nēblak- kim anakan hla dak, “Desa beyakam ang nēbla'an.” Sap Yesus Zen Farisi walsya hom. Sadukikam de gubiridan wenyā, zen hen Yahudi mo aha hlikna. Hwēna zēno mae mo tawa tabinkim, “Zini bējen tin nikon etan गया gwen.” (Kis 23:6-8)

3

Yohanis kim Yesus hup Israelsa hamal gulblukake:

(Mrk. 1:1-8; Luk. 3:1-18; Yoh. 1:19-28)

1 Zao kim lwa se'ak, dekam zep baptis ta gwibin zini Yohanis Alap mo olsa de ayang gul gwenkam kon gwesik hana'anka. Zen zi srēm nakon syal gwe'anka- Yerusalem mo aha ēnak de eik nikon. Sane tan hap kim zē zini yaing gwe-gwēk, dekam zep ola ayang gul gwizimki,

2 “Ere mae mo karek-karek nakon em ēhalen. Sap angkam Alap Zēna man kon gwesik hana'ara-teipsinkim de nēsa irik ginkimye.”

3 Yohanis zen orasa de sal tablan hap de zini men zēbe hap Yesaya Bak Alap mo olak hamal hap anakan ale gulblukake,

“Zini sa zi srēm lang nakon taken gwera,

'Haen, nēre mae mo Teipsin Zi hip nen orasa hamal ta gublun!

Hen nen dam-dam ta gublun!' ”*

4 Yohanis in Alap mo ol ayang gul gwen zini Elia Bak mo kim hen gwē gwēka, zep unta ala nakore bajuna zēno kim hen ala so gwēka. Takna hen Elia mo kim tweran sopkam denaka daul gwēka. Tembanena hen zēno kim tembane gwe-gwēka, zep ēkasna twenblanda gwēka, hen sobwal hona otde gwēka.*

5-6 Dekam zini zēbon dep beya tangan nik weyana Yordan san dep sek gwe-gwēk- tingare Yerusalem mo lang nakon, hen weyana Yordan mo alp san de ē-ē nakonye. Zēwe zen nonol zēre mae mo kirekam karek-kareksa damnak ēkira-kla gwēgwēk. Ki zep hwēna Yohanis baptis ta gwibirki.

7 Farisikam de gubirida gwen wenya hen Sadukikam de wenya* zen hen zêwe beyakam sane tan hap yaing gwe-gwek. Hwëna Yohanis kim desa hlauluda guku, dekam zep gu-gubiridaka, “Em an gwe makare enlalana! Em ema ëenlala gwe'an, ‘Asa de baptis tabinkim Alap molya asa karek tabirki.’ Hwëna em home ëhale'an. Alap mo jala kon molye ëheya-hya gwek.

8 Zen in zep, em de Alap mo jala insa goltowen srëm hap, em ere mae mo lowehen karekna insa wet gulsun- dekam de emsa anakan tame tabin hipye, ‘Zen eiwa mes ëhaler.’

9 Em bahem anakan ëkil gïl gwen, ‘Ëe an Abraham mo auyan-aza nakore nakake, zep asa molya Alap karek tabirki.’ Sap Alap maka eno mae mo weinak dep kaso-kasona ansa Abraham mo auyan-aza hap yang tabi'ira.

10 Sap Alap mo zer sonen Zini in Zen ano lure nakon hata'an zala, Zen mes hlala hohle gulu- dekam de tesya lu ta gwen hapye. Tenya men zen de eini ëtë srëm gwe'ak, desa sa ausu ennak lu tala, hëndep ki sa tïnsik gwen srëm syauk hï-hïtïnnik yal ta sera.

11 Ëe weyakamë emsa baptis ta gwibi'in- dekam de em enaka anakan golëtrë gwen hap, ‘Ëe mesë ëre mae mo karek-karek nakon ëhaler.’ Hwëna ano lun kon Zen hata'an zaka, Zen Alap mo Enhokam sa emsa baptis ta gwibiri, hen syaukkum. Zen abon onakon teipsin tanganna, zep zëno sepatu maesa de einblihan mae hap, ëe hen toton bëjënë.

12 Zen joksa zirensi'ira- dekam de lënsa lën hap. Dangnak dena, desa yunak sa bitï tala. Hwëna syaena men zen dang alp san alti'ik, desa tïnsin srëm syauk bla san dep sa yal ta sera.” †

Yohanis kim Yesussu baptis takake:

(Mrk. 1:9-11; Luk. 3:21-22)

13 Dekam zep hen Yesus Galilea kon weyana Yordan san dep song gwe zaka, zao zep Yohanissi abe ta zaka, “Asa hen emki baptis tan.”

14 Hwëna Yohanis man baes gwe'anka- Yesussu de baptis tan hap. Man zë gubluka, “Bian, diki dawemna Em de asa baptis tankam hap. Hwëna Em ba habe abon hatanan zala?- ëe de Emsa baptis tan hapye!”

15 Yesus ki zep hwëna ding gulbluka, “Em sap esa angkam Asa baptis tala. Sap zen dekam esa Alap mo dwam gwibinni kitak su kul sonera.” Ki zep hëndep baptis taka.

16 Yesus kim dekon zil he'an zaka, mumuk ennak zep nglina hlang në hanak. Yesus ki zep Alap mo Enhona hlaul guku- kim mawana ohola mo kim Zëbon dep ati gwe ine'an zaka.

17 Dekam zep hen Alap mo ola ësalsek,

“An ëre mo Tane- ëre mo dang tïnnak de tanganna. Ëe ama tangan sam gwesik gweblanan.”

4

Dowal mo kigina kim Yesussu akasiblikake:

(Mrk. 1:12-13; Luk. 4:1-13)

1 Alap mo Enhona ki zep Yesussu zi srëm lang san dep zersong gweka- zëwe dikim dowal mo kigi akasiblin hap.

2 Yaklana empat-pulu enkam Yesus tembane gwen srëmkam zëwe gwë gweka. Dekam usakna mes tangan sabak gweka.

3 Hwëna dowal mo kigina dekam zep zë gublu zaka, “Em san Alap mo Tanesa hom?- zebe usak naban gwë'araye. Kasona ansa emki gublundan- roti hap de ëjowen hap.”

† **3:12 3:12** Yohanis gandum nuban nyiru naban gulk sun de ol blaonzimdinkim gubiridaka. Zëno enlalana apdenak- lënsa de jokkam lën naye. Gandum sopna, zen san de syaena kiye.

4 Yesus ki zep hwëna ding gulbluka, "Alap mo olak man lwak,

'Zini tembane en nakon hom lowehe gwenan. Hwëna tingare Alap mo ola mensa ësane gwegwenan, zen dekon hen ki lowehe gwenan.' " "*

5 Dekam zep hwëna dowal mo kigina in Yesussu owaskam Yerusalem san dep zersong gwekëna mensa Alap orep Israelk de zi hip dam tasizimki, zëre hap de gol yawalsa de zë taun hup. Zao zep dowal mo kigina in Alap mo gol bolak drëne seka.

6 Dekon zep etan gubluka, "Em san Alap mo Tanesa hom?- ki emki heya gwe inen. Sap Alap mo olak ebe hap dena anakan lwak,

'Alap zëre mo dam taha nakore zisi sa emsa de dawem enkam kara ta gwen hap gubiridala.

Zëno mae mo taha tere san esa tëndä gwera, zep em molye ba karek maena goltoweka." *

Zep em san ema Alap mo ola insa taibli'ira? Ki emki heya gwe inen."

7 Yesus ki zep hwëna ding gulbluka, "Alap mo olak man hen lwak,

'Bian Alapsa totoresä bahem anakare hap akasiblin, "Wëhë asa mas gwebla'anka?" ' " "*

8 Hwëna etan dekon ki zep Yesussu owaskam kwatap yawal san dep zersong gweka. Dekon zep tingare auhu-kamanak de irik ginni ansa goltrëblaka- hëndep zëwe de kire-kire dawem naban.

9 Zao zep etan gubluka, "Insa ki hlauluda, ëe asa ebe hap kitak tapbla gulblul- em de hwëna bi gwibin hip. Hwëna nonol bokle kom soblan naban em asa boltere tan."

10 Yesus ki zep jala ban ding gulbluka, "Zi Golluwe Bak, em song gwen! Sap Alap mo olak man lwak, 'Bian Alap ensa em boklena kom so gweblan,

hen Desa en em blikip gwesik gweblan.' " "*

11 Hëndep ki zep dowal mo kigina in Yesussu hli ta guk halka. Hwëna Alap mo dam taha nakore zini dekam zep tembanekam mas nëblazak.

Yesus kim Galileak syala kon gwe-sibir hanakake:

(Mrk. 1:14-15; Luk. 4:14-15)

12 Yesus kim salka, "Yohanissi mes bwinak se dyaink," dekam zep Galilea san ahulsuk halka.

13 Dekam Zen hom zëre mo ëna Nazaret gwëka. Zen hwëna Kapernaumk gwë gweka- Ho Gutuna Galilea mo alpna, Zebulon ne Naftali nik mo zi ausu mo langnak.

14 Yesus insa zao gwëka, zen Alap mo dwam gwibin sin ki lwak- dekam de Yesaya Bak mo hamal hap de ol ayang gunnuk zaun hup, mensa anakan ayang gulkuke,

15 "Em in zene Zebulon ne Naftali nik mo ausu nakore zini lowe he'an,

hen Ho Gutuna Galilea mo ora alp san de wenya,

sap weyana Yordan mo men eihyanak de wenya,

hëndep Yahudi srëm zi ausu nakore zini men zen langna Galileak hen lowehe gwenan:

16 Em in zene angkam kawesinnik lowehe gwe'an,

hwëna em esa sërkam de ngatan yawalsa hla kul.

Em in zene juwen zi mo lang kawesinnik lowehe gwenan,

hwëna ebon mae onak sa ngatanna yakla nwe de hata sezan makan emsa zilsibirida zala." *

17 Zep Yesus in kim Kapernaumk gwë gweka, dekam zep zë hëndep tawa tabinkim kon gwesibir hana'anka. Man zë gubirida gweka, "Ere mae mo karek-karek nakon em ëhalen, sap Alap Zëna angkam man kon gwesik hana'ara- teipsinkim de nësa irik ginkimye."

* 4:4 4:4 Ul. 8:3 * 4:6 4:6 Mzm. 91:11-12 * 4:7 4:7 Ul. 6:16 * 4:10 4:10 Ul. 6:13 * 4:16 4:16 Yes. 9:1,2

Yesus kim hogwe tahyo gwen zini empat enkam zère hon de ang ta gwen hap kwang guluda kinikake:

(Mrk. 1:16-20; Luk. 5:1-11)

¹⁸ Yesus kim Ho Gutuna Galilea mo alp san gwè ha'anka, dekam zep zè hogwe tahyo gwen zi darena ake'anka. Ahana Simon- men desa hen "Petrus" kum nen gweblanan, oso zem Andreas han. Ho gutunak iwe hogwesa jalakam zer-tahyo'anka.

¹⁹ Yesus ki zep zè guzim zika, "Asa em ang èblan. Èe asa emsa zisi de hwèna lahyo gwen hap tawa sol."

²⁰ Dekam zep hēndep jalana insa hli koso guk halka- Yesussu dikim hwèna ang èblan hap.

²¹ Dekon kim depan zisong gweka, dekam zep etan aha zi darena ake'anka. Zen hen oso zeban zergwè'anka. Zen Yakobus ne Yohannis ne- Zebedeus Bak mo walas dare. Zen bi zik zère mo bul tahan-nak zinikin'inka, jalasa zè zioto tasibi'inka. Zao zep hen desa kirekam guzim zika.

²² Zen hen zao zep hēndep bulu insa hli kulki, hen bi zemka zèwe hli laka. Zèna dekam zep hen Yesussu ang èblaka.

Yesus kim tawa tabir song gwekake hen zi sang-sangna kim dawem tabir song gwekake:

(Luk. 6:17-19)

²³ Yesus dekam zep tūngare Galilea mo langnak de è-èna zère hon de ang ta gwen wenya in han ziamjan-bir song gweka, hen zèwe Yahudi mo but srēm gol-gol san tawa tabir song gweka. Zen Alap Zèn de irik gin hip de ol dawemkam tawa tabir song gweka, hen kirekam-kirekam zi sang-sangsa dawem tabir song gweka.

²⁴ Galilea kon kim Yesus hup de ola insa tūngare Siria mo lang san nol haladak, * dekam zep zi beyam-byana kirekam-kirekam sang-sang

karek nabare wenya nolèyaing gwe-gwezak. Sap dowal mo tilbiridanna, hen ètilsin-tilsin wenya, hen taha-tana teisya inen srēm wenya, desa kitak nolèyaing gwe-gwezak. Hen Yesus dekam zep kitak dawem ta gwibirki.

²⁵ Dekam zini beya tangan nik zep Yesussu ang nè gweblak. Ahakon Galilea korena, ahakon lang bosena Èna Dare Taha-tap korena, hen ahakon tūngare Yerusalem mo lang nakorena, hēndep ahakon weyana Yordan mo men eihya nakorena.

5

Yesus kim kwatapnak tawa tabirkike:

(Luk. 6:20-23)

¹ Yesus kim zi beyam-byana insa hlauludaka, dekam zep kwatap tek san hata seka. Zao zep zère hon de ang ta gwen wenya ban zi trana insa zigolèteinikinki,

² zao zep tawa tabi'inka,

³ "Men zen zère mae mo tahal-hana Alap en hon èblol gwe-gwenan,

zen isrip-sri gwibinnik lowehe gwe'an,

sap zen zen Alap mo irik ginni bi neibi'in.

⁴ Hen men zen angkam enlalana èdowe hana gwe'an,

zen isrip-sri gwibinnik lowehe gwe'an,

sap Alap sa zèno mae mo enlala dowe hananna insa isrip-sri hap li ta sonezimdi.

⁵ Enlala sae-sae wenya,

zen hen isrip-sri gwibinnik lowehe gwe'an,

sap Alap sa gubiridala- zen de hen okamana ansa bi gwibin hipye.

⁶ Men zen tūngare zi dikim enlala dam-dam enkam lowehe gwen hap èdwam gwe tine gwenan,

* **4:24 4:24** Siria mo langna in, zen langna Galilea kon utara san dep. Zen dekam Roma mo aha irik gin lang, hen Yahudi srēm zi ausuna zao hen lowehe gwek.

zen hen isrip-sri gwibinnik lowehe gwe'an,
 sap lamkam men zëwe enlala damdam wenyä lowehe gwe'ak,
 desa hen sa Alap gubiridala-zëwe de hen bitî gwen hapye.

⁷ Hen men zen wal bose wal zemka kwasang neibirida gwenan,
 zen hen isrip-sri gwibinnik lowehe gwe'an,
 sap kire zi hip Alap kwasang-kwasang zemka sa gol gwizimdi.*

⁸ Enho lalak wenyä,
 zen hen isrip-sri gwibinnik lowehe gwe'an,
 sap zen zen sa Alapsa nêrtower.

⁹ Hen zini men zen umlae enlalana nol halada gwenan,
 zen hen isrip-sri gwibinnik lowehe gwe'an.

Kire zini Alap sa gubiridala, 'An ère mo walas tanganna zen.'

¹⁰ Dawemsa de syal gwibinnik men desa karek da gwibirin,
 zen hen isrip-sri gwibinnik lowehe gwe'an,
 sap zen zen Alap mo irik ginni bi neibi'in.

¹¹ Hen emsa kim abe hap de jal hap lamang da gwibi'ik, hen karek da gwibi'ik, hen boton olkam blo-blo da gwibi'ik,
 em hen dekam isrip-sri gwibinnik esa lowehe gwer.

¹² Orep men zen Alap mo ola abare srëmnak ayang nul gwëk, desa hen kirekam karek da gwibik. Zep em de hen kire kareksa goltowe gwenkam, em dawemkam èisrip-sri gwe-gwen, sap ngein sin dawemna Alap mam tangan naka ebe mae hap ngatan zi mo langnak hamal gulzim'ira."

Yesus hon de ang ta gwen wenyä zen diki okamanak hi makan zen èdèrek gwen, hen pelita makan zen èngatan gwen.

* 5:7 5:7 Mat. 18:31-35

¹³ "Em an zene Abon ang ta gwe'an, em okamanak san de hina kiye. Hwëna hina blëble gwenkam, dekam tembanesa dikim dèrek gun hup dena man hom gwe-gwenan. Dèrekna in de hom gwenkam, dekam zini bëjen ba mae hap dwam gwibin. Zen dekam zalta dep de hiri gun en hap dena.

¹⁴ Hen em an okamanak san de tîngare zi hip de ngatanna kiye. Em hen dekam san de kwatap bolak de ëna kiye. Èna in kore kam de ngatanna okama kawesinnik awe man zil ine gwenan.

¹⁵ Zen zep ere mae mo ngatanna bahem aning gul gwen. Sap zini bëjen pelita ngatannak yuna utuk gul sonen. Zen diki mejanak de lonenkam- dekam de golak de lowehen wenyä in ngatannak lowehen hap.

¹⁶ Zen in zep, eno mae mo lowe henna diki tîngare zi mo nwenak kirekam zen ngatan gwe-gwendekam deka eno mae mo lowehen dawemna insa hla nul gwëk. Ki zen hen dekam sa ngatan zi mo langnak de Bian mo bosena teip nulsuk gwëblal."

Yesus kim Musa mo titi tabin ol hap dena tawa tabirkike:

¹⁷ "Asa bahem anakan kil tin, 'Zen an Musa mo titi tabin olsa de wet gulsublun hap hata zaka,' ahaksa, 'Alap mo ol ayang gul gwen zi mo olsa de wet gulsun hup.' Èe wet gulsun hup homë hatazak. Èe hwëna dawemkam de zëno ei nika ebe mae hap sul sonezindin hibë hatazak.

¹⁸ Zen in zebë eiwa denaka emsa gubirida'an: Ngli naban kama naban de aumwa hap de yaklanak jekjak nën srëmnak, dekam tîngare hamal hap de Alap mo ola sul sonen tangan nik sa lwal. Aha-ere ol-gun betek maena molya mae lwa kinik.

¹⁹ Zen in zep, men nara titi tabin ola insa aha-ere ol-gun maesa ngip gunnu, hen men zen de anakan titi da gwibi'ik, 'Ansa sap esa ngip ul

gwer,' zen Alap mo irik ginnik otde tangannak sa teinikin. Hwëna men zen de titi tabin ola in san ang ta gwe'ak, hen aha zisi desan de ang tan hap titi da gwibi'ik, zen Alap mo irik ginnik teipsin-teipsinkim sa lowehe gwer.

²⁰ Zini sap man Farisikam de gubirida gwen zisi hen Musa mo titi tabin olsa de tawa ta gwibin zisi anakan kil di gwibirin, 'Zen dawemkam Musa mo titi tabin ol san ang ta gwenan.' Hwëna zëna desan zi mo nwe ennak ang ta gwenan. In zebë emsa gubirida'an: Em de zëno mae mo kim ëk enkam Alap mo dwam gwibin sin ang ta gwenkam, ki em molye Alap mo irik ginnik bitï gwëk."

Wal bosyansa de jal gwibirida gwen srëm hap de ol:

²¹ "Ena dwan mes-eme ëtawa gwëk: Musa Bak dwan mes-am anakare ol jalse gwenna nëno mae mo auyan-aza hap ayang gulzimki,

'Zisi bahem tan. Nara zisi tanna, desa hwëna em tok hap karek tan.'*

²² Hwëna angkam Èe ama emsa gubirida'an: Men nara wal bose zemka jal gweblanna, kire zini Alap sa lamkam karek tala. Hen men nara aha zisi wakwak tanna, kire zini hen karek tan hap dena. Hen men nara wal bose zemka gublunna, 'Em in enlala joblo-topna,' kire zini zen tinsin srëm syauk bla san dep dena.

²³ "Zen in zep, em de Alap hap kire-kiresa de golblan hap enlala gwenna, hëndep em de Alap mo golak golhatankam, hwëna dekone etan enlala gwe'anam, 'O hare ano wal bosyanna man-am ëre mo karek nakon asa gil-gil gwebla'ara,'

²⁴ ki kire-kirena insa emki Alap hap de golblan srëmnak teksonnak iwe hli yun. Nonol emki wal bose om in han eno karekna insa tap ulsun. Tap ulsunnuk, dekam etan lwa halza- dekam de kire-kirena

insa enlala dawem naban Alap hap golblan hapye.

²⁵ Zen in zep, ere mo karek nakon de wal bose uk emsa gil-gil gwe-blanna, emki nabakam tap un. Tap un srëmkam, ki eno wal bosyanna in maka emsa teipsin zinik klak ta'ara. Teipsin zini in hwëna dekam maka zëre mo dam taha nakore jana zisi gubirida'ara- emsa de bwinak se tya irin hip.

²⁶ Eiwa denakaë emsa gubirida'an: Em bëjen em dekon wet son- te-alana men ki en teipsin zini in emsa gubluka, kire enkam de golblan srëmkamye."

Ëkahalo gwe-gwen srëm hap de ol:

²⁷ "Em dwan mes-eme Musa mo ol jalse gwenna ansa ësane gwe-gwëk, 'Bahem ëkahalo gwen.'*

²⁸ Hwëna angkam Èe ama emsa gubirida'an: Men nara wesya swi enlala naban ërtabinni, ki zen mes enlala nakon kahalo gwibirida.

²⁹ Emsa de ere mo aha nwe titi da gwe'anam, 'Haen, nen karekna wakinsa karatda un,' ki em nwena insa alsin nika hiri son. Sap eme dare nwe naban zigwë'anka, ki esa hëndep Asa hli tala. Ki hwëna tinsin srëm syauknuk dep sa emsa hiri daser.

³⁰ Hen kirekam, emsa de ere mo dam taha kareksa dikim gon hap titi da gwe'anam, diki dawemna em blansin. Sap eme dare taha naban zigwë'anka, ki esa Asa hli tala. Ki hwëna tinsin srëm syauknuk esa hëndep denaban gwë gwera."

Wesya de baes gwibin srëm hap de ol:

³¹ Yesus ki zep etan gubiridaka, "Em dwan mes-eme Musa mo ol jalse gwenna ansa ësane gwe-gwëk, 'Zini we zemka sap de baes gwibinkim, hwëna nonol baes gwibin hip de suratsa de anakan ale gunkum, "Èe mesë kire hap baes gwibik." **

* 5:21 5:21 Kel. 20:13; Ul. 5:17 * 5:27 5:27 Kel. 20:14; Ul. 5:18 * 5:31 5:31 Ul. 24:1

32 Hwëna angkam Ëe ama emsa gubirida'an: Men nara we zemka baes gwibinni, wenya in de kahalo gwen srëmnak, ki hwëna dekam zen mes aha zi de kahalo gun hup golgunda. Hen we baes gwibinni insa de ahanik gonkam, zen hen Alap mo nwenak kahalonak gwë gwe'ara."

Anakare hap de ol: Bahem anakan ëgu gwen, "Alap, mese ki asa hla tanda."

33 "Em dwan tawa nakake, orep Musa Bak nëno mae mo auyan-azasa ki hen anakan jalse gwibirida gweka,

'Bahem boton hap anakan ëgu gwen, "Alap, mese ki asa hla tanda."'

Hen zen man titi ta gwibirki,

'Em de banakare mae hap Bian mo bose gubin niban gu-gunnu, hëndep kire enkam emki syal gwe-gwibin. Kirekam de syal gwibin srëmkam, ki Alap mo nwenak mese karek gwera.*

34 Hwëna angkam Ëe ama emsa gubirida'an: Bahem tangan Alap mo bose gubin niban ere mae mo ola sosen gul gwen. Hen Alap zëre mo bolesa de gollëwen hap bahem hen anakan ëgu gwen, 'Nglï, mese ki asa salblanda.' Sap nglïna zen Alap zëre mo nikin gwenna zen- men dekon nësa tingan irik gi'iraye.

35 Anakan hen bahem Bian mo bolesa de gollëwen hap ëgu gwen, 'Kama, mese ki asa salblanda.' Sap zen apdenak- anakan de gun nubanye, 'Alap, mese ki asa salblanda.' Sap okamana an, zen Alap zëre mo tana ik so sone gwenna zen. Anakan hen bahem ëgu gwen, 'Ëna Yerusalem, mese ki asa hla tanda.' Sap Yerusalem, zen Teipsin Zini Alap zëre mo ë yawala zen.

36 Hen Alap zëre mo bolesa de gollëwen hap bahem hen anakan mae ëgu gwen, 'Ëre mo nol ala, mese ki asa hla tanda.' Sap eno

sosonna hom- dekam de ere mo nol alana insa aha-ere sihi mae naka anakan wet gulsun hupye, 'Ano nol alana an zen ngap-ngap gwen,' ahaksa, 'Zen kakak gwen.'

37 Diki Alap mo bolesa de gubin srëmkam em ëgu gwen, 'Ëe eiwa denakaë ton'an.' Sap em de anakan ere mo olsa sosen gul gwenkam, 'Zen ki asa salblanda,' dekam hwëna em dowal mo kigi mo dwam gwibin sine ang gwe'ara."

Hwë-hwëkam de nënaka karek ta gwibin srëm hap de ol:

(Luk. 6:29-30)

38 "Em dwan mes-eme Musa mo ol jalse gwenna ansa ësane gwe-gwek,

'Zi de wal bose zik mo nwesa tobe ënkam hai soblankam, ki zini in mo nwena emki hen hai soblan. Ahaksa ëk naka de tobe ënkam kam tablankam, ki hwëna zini in mo ëk naka emki hen kam tablan.*

39 Hwëna angkam Ëe ama emsa gubirida'an: Zi jal-jal de emsa karek tanna, bahem ere mo timsi goljalse gweblan. Emki hwëna sosok gul-blun. Emsa de zi i tranak lek tyankam, em etan eiha i trasa zitrëblan- zëwe deka hen emsa lek tyaka.

40 Emsa de ahanik teipsin zinik botonkam anakare ola ban klak tanna, 'Zen mes ano kire-kirena to-torsa kap taka,' zen men desa em de hwëna kap tablan hap dwam gwe'ara, emki hëndep kap tablan, hen dekon em etan mas-mas tablan.

41 Emsa de jana zi zëno nihin dohon-honsa de aha-ere kilometer enkam wë tablan hap tik-tik tanna, em hwëna dare kilometerkam em wë tabla song gwen.

42 Zi de emsa banakare mae hap abe tanna, em hëndep golblan. Hen zi de emsa ba maesa de bohë gulblun hap abe tanna, emki hëndep bohë gulblun. Bahem salsiblin."

Ere mo jal zisi de kwasang gwibirida gwen hap de ol:

(Luk. 6:27-28,32-36)

* 5:33 5:33 Im. 19:12; Bil. 30:2; Ul. 23:21-23

* 5:38 5:38 Kel. 21:24; Im. 24:20; Ul. 19:21

⁴³ “Musa mes dwan-am nesa anakan titi ta gwibiriki,

‘Wal bose wal en omka em kwasang gwibirida gwen.’*

Hwëna zëno olsa de tawa ta gwibin wenyä zen anakan mas nul gwenan, ‘Nëre mae hap de jal zisi sap esa husus eibirida gwer.’

⁴⁴ Hwëna angkam Èe ama emsa gubirida'an: Ere mae hap de jal zini em kwasang gwibirida gwen. Hen men zen emsa karek da gwibirin, zëbe mae hap Alapsa em abe ta gwen- Zen dikim dawemsa zëbe mae hap gol gwizimdin hipye.

⁴⁵ Sap tingare zisi de kwasang gwibirida gwenkam, zen dekam esa ngatan zi mo langnak de Bian zëre mo bi gwibiridan walaskam loweher. Sap Alap insa yaklana yang tasiki, zen zi dawem-dawem ensa hom zilbirida ine gwenda. Zen hwëna karek-karek gol gwen wenyäka hen zilbirida ine gwenda. Hen ona insa il ti gwenda, zen dawemsa de syal gwe-gwibin wenyä kip, hen kareksa de syal gwe-gwibin wenyä kip.

⁴⁶ Zep em de enaka de kwasang gwe-gweblan zi ensa etan kwasang gwibirida gwenkam, ki hwëna anakan bahem ëkil gil gwen, ‘Alap sa kire hap asa sam gwesibiridala.’ Roma mo irik ginnik dep de te-ala alal ta gwen zini sap ki kire enkam ëgwë gwenan. Zen hen karek gol gwen bose zemka hwë-hwëkam zënaka kwasang neibirida gwenan.

⁴⁷ Hen em de zisi golëtowenkam, em de ere mo wal bose wal ensa dawem ta guk gwibinkim, hwëna aha zisi hom, dekam bahem anakan ëkil gil gwen, ‘Ano bosena dekam sa Alap mo nwenak dawem gwer.’ Alapsa de tame tan srëm zini hen ki kire enkam hwë-hwëkam wal bose wal en zemka dawem da guk gwibirin.

⁴⁸ Sap nëno mae mo ngatan zi mo langnak de Bianna, zen sowehen tangankam kitak de zisi kwasang gwibirida gwenda- sap hen karek

gol gwen zi. Zep em hen kirekam em nëre mae mo Bian mo kim ëgwë gwen.”

6

Mae hap de ol: Alap hap de syala, zi dikim emsa boltere tan hap bahem gol gwen.

¹ Yesus dekam zep etan tawa tabinni ayang gulzimki, “Em de Alap mo bose hap tahalha zisi mas gwibirida gwenkam, ahaksa Alap hap de aha syal maekam, zi mo nwenak bahem golada gwen-dekam de emsa gublun hap, ‘Zen dawemna.’ Kirekam de syal gwenkam, ki hwëna ngatan zi mo langnak de Bian molya syala in hap de dawemna ebe hap golblaka.

² Zep em de tahalha zisi Bian mo bose hap mas gwibiridankam, bahem aha zisi hamal hap gugubiridan- tagal gwennak de emsa hla tan hap. Bahem but srëm golak ahaksa ëtagal gwen maenak anakan gubiridan, ‘Èe kimë mas gwibiridan hap hata'ak, em dekam terya ban asa hut lu ane guk- dekakim zi beya asa hla dak, “Zen man angkam mas gwibiridan hap hata'ara.” ’Men zen ëk enkam Alap mo nwenak dikim ësam gwesin hip de syala nol gwenan, zen kirekam ëgwë gwenan. Hwëna eiwa denakaë emsa gubirida'an: Sap desa mes zëre mae mo tahalha zisi de mas gwibirida gwen nakon boltere da gwibik, zep zëbe mae hap Bian Alap molya lamkam zëre mae mo syala in hap de dawemna golzimki.

³ Hwëna em de tahalha zisi mas gwibirida gwenkam, sowëkam emki mas gwibiridan- aha zi de emsa tawa gweblan srëmkam.

⁴ Aningkim em aha zi hip dawemna gol gwizimdin. Sap nëno mae mo ngatan zi mo langnak de Bianna, Zen zi mo aning gun syala man hlaul gwizimnira, hen Zen sa hwëna ebe mae hap dawemna gol gwizimdi.”

* 5:43 5:43 Im. 19:18

5 “Em de Alapsa gu sone gweblankam, zi mo nwenak bahem-zi de emsa hla tan hapye. Men zen kire enlala naban nen sone gweblanan, zen zi beya mo ngirin nikon nen sone gweblanan- sap but srëm golak, hen sap etagal gwen maenak. Men zen ek enkam Alap mo nwenak dikim esam gwesin hip de syala nol gwenan, zen kirekam esam gwesik gwenan. Hwëna eiwa denakaë emsa gubirida'an: Sap desa mes zëre mae mo Biansa de gu sone gweblan nakon boltere da gwibik, zep Bian Alap molya lamkam kire syal hap de dawemna golzimki.

6 Hwëna em de Alapsa gu soneblankam, gol mwanak em tin, hen lilikinni em solhlasin. Dekon em aningkim gu soneblan. Sap nëno mae mo Bian, hla ta gwen srëm Zini Alap, Zen zi mo aning gun syala man hlaul gwizimnira, hen Zen dekam sa hwëna ebe mae hap dawemna gol gwizimdi.”

Yesus kim kirekam de Biansa gu sone gweblan hap tawa tabirkike:

(Luk. 11:2-4)

7 “Em de Alapsa gu soneblankam, bahem aha-ere abena etan gollwa halasen gwen- men kirekam Alapsa de tame tan srëm wenyä egwë gwenyä. Sap zen man ekil gil gwenan, ‘Abesa de mam blalkam gollwa hala serankam, ki sa ano abena dokwak gulu.’

8 Hwëna kirekam waba hap. Zep em zëno mae mo kim bahem. Sap Bian Zen mes eno dwam gwibinni tame gulku- em de nama abe tan srëmnak.

9 “Zep em a kirekam em gu sone gweblan:

Bian, ngatan zi mo langnak de Zini, dikire eno bosena teip nulsuk gwëk.

10 Diki okamanak awe Em hen irik gin-

in kirekam hen ngatan zi mo langnak irik gi'irake.

11 Namen dep de tembanena ap golzim.

12 Ano mae mo karek-karekna ap tap gulsuk gwizim-

ëe men kirekamë hen aha zi mo karekna eititi ei gwibirin, men desa ap nol gwizimninke.

13 Asa de akasibirida gwennak bahem nwe enkam asa kara ta gwibin.

Hwëna dowal mo kigi mo taha nakon asa alal gul gwe.” *

14 Etan ki zep gubiridaka, “Men nara wal bose zik mo zëbe hap de karek golblansa eititi gwibir-blinkam, ki ngatan zi mo langnak de Bian sa hen zëno karekna eititi gwibir-blira.

15 Hwëna em de wal bose uk mo ebe hap de karek golblansa eititi gwibin srëmkam, ki Bian hen molya eno karek-karekna ep tap gulsub-luka.”

Bian hap de tembanesa elwa gwen hap de ol:

16 “Em de Biansa dikim enlala zon tasiblin naban abe ta gwen hap tembanesa elwa gwenkam, nwe-masena bahem edowe hana gwen. Sap men zen ek enkam Alap mo nwenak dikim esam gwesin hip de syala nol gwenan, zen kirekam egwë gwenan. Zen son maesa nawa gwibirin- dekam de zi anakan tawa gwibiridan hap, ‘Zen an Alap hap tembanesa elwa'an.’ Eiwa denakaë emsa gubirida'an: Sap desa mes zëre mae mo tembane lwan nakon boltere da gwibik, zep Bian Alap molya lamkam kire syal hap de dawemna golzimki.

17 Hwëna em de Biansa dikim abe tan hap tembanesa lwankam, nwe-masena em ngan tasik gwibin hen nol alana em sisir ta gwibin.

18 Bap zen aha zi emsa anakan tame tabin, ‘Zen Biansa dikim dawemkam abe tan hap tembanesa elwa'an.’ Sap nëno mae mo Bian,

* **6:13 6:13** Dekon aha zi man lun mas gulku- men kirekam gerejanak aumwa topnak egu sone gwenanye. Zen a kirekam mo: “Sap Em en sosonna hen teipsinni. Zep dikire eno bosena hëndep denaban teip nulsuk gweblak. Amin.”

hla ta gwen srëm Zini Alap, Zen zi mo aning gun syala man hlaul gwiz-immira, hen Zen dekam sa hwëna ebe mae hap dawemna gol gwiz-imdi.”

Ngatan zi mo langnak de kire-kiresa lam gun hup de ol:

(Luk. 12:33-34)

¹⁹ “Auhu-kama ennak awe bahem kire-kirena ëbeya gwen. Awe hwëna sa ëkalse gwer hen winim sa blom da gwibir, hen sowë zi sa dekam de kap tan hap eno gola insa dre dal.

²⁰ Diki dawem tanganna ngatan zi mo langnak em kang ta gwen. Zëwe molya ëkalse gwëk, hen winimni molya zë blom dabik, hen sowë zini banakan molya kap dak.

²¹ Sap men zëwe eno kire-kirena ërlwa gwenna, eno enlalana hen zëwe sa lwa gwera.”

Enho nakon de ngatan gwen hap de ol:

(Luk. 11:34-36)

²² “Nwena zen tim hip de lilikin-enho dikim ngatan gwen hap. Nwe nik de lalak nënna, dekam enhona hen ngatanna. Eno gwë hanna dekam, san de ngatan san de song gwenna.

²³ Hwëna em de nwekam men-san an-sankam hir-hir gwe naserankam, dekam bute hala seran makan esa gwë gwera. Hen eno nwe nik de hai nënkam, dekam kawesin tangannak esa gwë gwera.”*

Enlala beya gwen srëmkam de lowehe gwen hap de ol:

(Luk. 16:13; 12:22-31)

²⁴ “Zini bëjen dare teipsin zisi dawemkam babu gwizimdin. Zen hwëna aha-en naka sa dawemkam kwasang gwe-gweblala hen blikip gwesik gweblala. Aha zini insa molya. Zep em hen kirekam: Em bëjen em syala dan son- Alap mo syala ban, te-ala beya gwen hap de syala banye.

²⁵ “Zen in zep, em bahem anakan ëngalap gwe-gwen, ‘Ëe banakan asa

gwër? Ëe basa asa twin gwibir hen otde gwibir? Hen ëe basa asa ala so gwer?’ Emki ëenlala gwen: Eno gwëna zen tembane en nakon hom lwa gwenan, hen timni ala so gwen hap de en nakon hom lwa gwenan.

²⁶ Em ba hap de kirekam ëngalap gwe-gwen hap? Emki mawasa enlala gwibiridan. Zen hom ba maena eiyas nil gwenan, hen hom dan gwenan, hen zëno mae mo gudangna hom- zëwe de tarankam ba maesa kang ta gwen hapye. Hwëna zen mes ki tame nuk, ‘Ngatan zi mo langnak de Bianna ki tembanena ap gol gwizimmira.’ Zep emki hen dam gulsuk gwen, ‘Ëe Bian mo nwenak mawa betek mo kim hom.’

²⁷ Em de ere mo gwën hap ngalap gwenkam, san ha em emaka ere mo gwëna insa engka en mae langa gulsu'ura? Bëjen.

²⁸ “Zep em ba hap de anakare hap enlalana ëbeyam-bya gwen hap, ‘Ëe basa asa ala so gwer?’ Emki sap sona ok ei'i enlala gwibiridan. Zen hom syal ta gwenan, hen pakeanna hom dayal gwibirin.

²⁹ Hwëna Ëe ama emsa gubirida'an: Sap teipsin zini Salomo Bak, zen hwëna hom ok eis nwe-awes makare pakeanna akeka- desa de zëre mo te-ala beyakam teisyan hapye.

³⁰ Em in Biansa de taibliblanna tawa naka hom! Ok eis mo ehultunnu tihis tanganna, sap zen namen de ënwe-awes gwenkam, hwëna ka'an de ëjek-jak gwen. Zen sap eiwa kirekam, hwëna Alap ki desa kara ta gwibirida. Zep emki Biansa anakan taibli gweblan, ‘Zen molya asa ala so gwen hap denakim da tasiki.’

³¹ “Zep em bahem anakare hap ëngalap gwe-gwen, ‘Ëe basa asa twin gwibir hen otde gwibir? Hen ëe basa asa ala so gwer?’

³² Sap Alapsa de tame tan srëm zini zen kirekam ëngalap gwe-gwenan. Hwëna nëno mae mo

* 6:23 6:23 Tit. 1:15

ngatan zi mo langnak de Bianna, Zen anakan tawana, 'Ano wasalna an kiresa tahalha gwibi'ira.'

³³ Hwëna kitak ere mo tahalha gwibinni insa esa hla kul gwer-anakare enlala de eno mae mo en-honak bol-zaun gwenkamye, 'Diki Bian Zen nabakam nësa irik gilzin, hen ëe anik zëno dwam gwibin en san ang tak.'

³⁴ Bahem ka'an dep dena kip anakan ëngalap gwe-gwen, 'Ëe ka'an basa asa jogwaher gul?' Sap namen de tahalha hap dena, zen srën. Ka'an de tahalha hap dena, zen hen srën. Bahem ka'an de tahalha hap dena namen enlala gwibin. Dikire eno enlalana namen en dep dena kip lwak. Ngein sin dep de tahalha hap bahem ëngalap gwe-gwen."

7

Wal bose wal uk mo kareksa de hlaul gwizimdin srëm hap de ol:

(Luk. 6:37-38,41-42)

¹ Yesus dekam zep etan tawa tabinni ayang gulzimki, "Wal bose wal omka bahem gubirida gwen, 'Zen karek tan hap man dakasti'ira.' Ki hwëna Alap sa hen emsa gublula, 'Zëna hen karek tan hap man dakasti'ira.'

² Sap em men kire enkame wal bose omka karek tan hap gublu'anka, ki hwëna Alap hen kire enkam de emsa karek tan hap maka gublu'ara. Sap eme aha zisi gublu'anam, 'Zen kirekam ngip gulku,' Alap dekam sa hen emsa karatda tala- eno gwënsa de anakan hlaulblun hap, 'San ha zëna hen kirekam ngip gul gwenda?'

³ Hen em ba habe wal bose uk mo ngip gun betek tolsa hla kul gwizimnin? Hwëna ere mo ngip gun yawala em desa de oto gulsun hup ema baes ta gwenan.

⁴ Kirekam insa ëgwë gwenan, zen men kiye: Zi de wal bose zemka gublunna, 'Anik eno nwenak de te klana insa gulsuk,' hwëna zëre mo nwenak hen balok tek yawala ki

lwa'an. Desa maka nonol gulsu'ura-dekam de dawemkam wal bose zik moka hlaun hupye.

⁵ Em in Alapsa ëk enkame ang ë gweblanan. Diki nonol enaka emaka oto lasik gwibi'in. Ki esa dawemkam kara gwera-dekam de wal bose omka halen ora san zerwet son hapye."

Dawem enkam de Alap mo irik gin hip denaka tawa ta gwibin hip de ol:

⁶ "Alap onakore ol dawemna bahem lwa makare enlala zi hip waba hap tonbirida gwen. Zen sa hwëna jala ban ja-ja nul gwer hen emsa sa naptabirida gwer. Hen Alap onakore ol dawemna bahem gwe makare enlala zi hip gol gwizimdin. Ki hwëna zen sa zalta dep tanakam nyaubir."

Kirekam de Alapsa abe ta gwen hap de ol:

(Luk. 11:9-13)

⁷ "Men kiresa ena dwam gwibinni, Alapsa em abe ta tine gwen. Ki Zen sa hëndep kiresa ep gol gwizimdi. Em teibir tine gwen, dekam esa hëndep Zëbon onakon hla kul gwer. Hen orasa em tëbla tine gwen. Zen dekam sa ep zertrëblala.

⁸ Sap zini men zen abe ta gwenna, zen gul irinkim. Men zen tei gwibinni, zen hlaunkum. Hen men zen orana të gweblanna, zëbe hap zertrëblankam.

⁹ Ebon mae onakon san ha ki bi zem wasal zikhip kasona golblaka?-zen de roti hap abe tankamye.

¹⁰ Ahaksa wanyana san ha ki golblaka?-zen de hogwe hap abe tankamye.

¹¹ Em sap jal-jala, hwëna eno anakare kwasang enlalana hen ki, 'Ëe anik dawem naka ëre mo wasal hap golblak.' Nëno mae mo Bian, ngatan zi mo langnak de Zini, Zen hwëna dawem tangankam nësa kwasang gwibirida gwenda. Zep Zen hen Desa de abe ta gwenkam dawem kire-kiresa nëp gol gwizimnira."

Tingare Alap mo titi tabin ola kon, bol-zaun weny a zen tangan:

¹² “Men kirekam ena dwam gwe'ara, zi de kirekam emsa gwë gweblan hap, em hen ahasa kirekam em gweibirida gwen. Sap kirekam de enaka golélowehe gwen hap dena, zen zen ausuna- Musa mo titi tabin olak hen Alap mo ol ayang gul gwen zi mo olakye.”

Mae hap de ol: Ngatan zi mo lang san dep de orana eiwa klakatna.

(Luk. 13:24)

¹³ “Hëndep de ëngaya gwen hap de ëdwam gwenna, lilikin klakat san em biti gwen. Sap lilikin yakna hen ora dak-dakna, zen syauk bla san dep dena. Zen in zep zini desan beyakam ëgwahal gwenan.

¹⁴ Hwëna eiwa klakat tanganna-hëndep de ëngaya gwen hap de lilikinni hen oranaye. Zep zini beyakam hom orana insa dam dasik gwenan.”

Nësa de yasik tabin hip de zisi de kire nakon dam tasibin hip de ol:

(Mat. 12:33-35; Luk. 6:43-44)

¹⁵ “Bira! Botonkam de tawa ta gwibin zini sa ebon mae yaing gwe-gwezal. Ol toran nakon esa kil li gwibir, ‘An hen nëban mae apdenak- Alap mo hanan tabin walas.’ Hwëna zen in gwe tihijal-jal makarena. Zen sa emsa hit di gwibir.

¹⁶ Em zëre mae mo lowehen nakon hen syala kon esa ki dam lasik gwibir. Kwiwe dansa bëjen lemo timnik taran. Hen dokot të ngingina bëjen rambutan dankam tën.

¹⁷⁻¹⁸ Men kiye hen tenya: Zen zëre mo dan enkam ëtë gwenan. Tenya men zen twin gwibin srëm tetan dankam ëtë gwenan, zen bëjen twin gwibin tetan dankam tën. Hen tenya men zen twin gwibin tetan dankam ëtë gwenan, zen bëjen twinbin srëm tetan dankam tën.

¹⁹ Tingare tenya men zen twinbin tetan dankam ëtë srëm gwe-gwenan, zen lu tan en hap dena- desa de syauk blanak tru tasen hap.

²⁰ Zen kirekam hen- botonkam de tawa ta gwibin zini inye. Em zëre mae mo syala kon hen lowehen nakon esa ki tame la gwibir.”

Mae hap de ol: Zini men zen botonkam ëgu gwenan, “Ëe an Yesussu de ang gweblan zi,” hwëna Alap sa desa karek tabiri.

(Luk. 6:46; 13:25-27)

²¹ “Tingan men zen Asa anakan daken gweblanan, ‘Bian, Bian,’ hwëna zen molya kitak Alap mo irik ginnik bitigwek. Diki men zen zëre mo dwam gwibin sin syal ta gwenan, zen zen en sa zëre mo irik ginnik bitigwer.

²² Aumwa hap de zisi klis gunnuk, zini beya tangan nik sa Asa daken gweblal, ‘Bian, Bian, ëe ere mo bosekamë hamal hap de ola ayang ul gwizimk. Hen ëe eno bosekamë dowal-dowala olëalsa sone gwibik. Hen owas-owasna eno bosekamë syal ei gwibik.’

²³ Hwëna Ëe asa ding gulzim, ‘Em Abon dep denaka hom. An kon em hëndep sek gwen, sap em an zene karekna ol gwek.’ ”

Enlala blala ban de lowehe gwen hap de ol:

(Luk. 6:47-49)

²⁴ “Zen in zep, zini men zen ano ola ësane gwe-gwenan hen desan ang ta gwenan, zen men kiye- enlala blala bare zini men zen gola moko dawem naban taukuke.

²⁵ Kim o dil gwek, ho namwa yawala dekam zep sap desan tilzik, hen asese yala dekam zep sap ak- abla zaka, sap zëno mokona olk san de hul-hul tanna.

²⁶ Hwëna zini men zen ano ola sap ësane gwe-gwenan hwëna desan de ang tan srëmkam, zen men kiye- enlala joblo-top zini men zen moko srëmkam gola taukuke.

²⁷ Hwëna kim o dil gwek, hen ho namwa yala kim desan tilzik, hen asese yala kim taikik, dekam zep hëndep gola in mal heka, hëndep karek tangankam dreweka.”

28 Yesus kim kirekam tawa tasi-birki, zi beyam-byana in zen zë sane da'ak man tangan dengguanblak.

29 Sap zëno tawa tabinni sosen tanganna- san de teipsin zi mo tawa tabinni kiye. Musa mo olsa de tawa ta gwibin hip de zi mo tawa tabin niban apdenak hom.

8

Yesus kim sop sang-sang karek nabare zini dawem takake:

(Mrk. 1:40-45; Luk. 5:12-16)

1 Yesus kim kwatap tek nakon ati gwe zaka, zini beya tangan nik zep ang nëblazak.

2 Zao zep hen sop sang-sang karek nabare zini Yesus onak dep hata zaka, boklesa zep Yesus mo nwenak kom so zaka. Dekon zep abe ta seka, "Bian, Eme dwam gwe'anam, Em emaka asa dawem ta'ara."

3 Yesus ki zep towanblan naban ding gulbluka, * "Èe ama dwam gwe'an. Em dawem gwen." Dekam zep hëndep sop sang-sangna in kon dawem gweka.

4 Zao zep etan gulbluka, "Insa emsa dawem tanan, bahem mae ahasa tonbiridan. Diki nonol Alap mo golak de syal tan zi hip ahana kip enaka zertrëbla. Zao gulbu, 'Emki asa hla tan. Èe san ha mesë dawem gwer?' Musa Bak mo titi tabin olak men kirekam sop sang-sang karek zi de dawem gwennak dep dena lwakke, zen kirekam em syal gwibin.* Zen dekam sa tingan emsa anakan tame dal, 'Zen eiwa mes tangan dawem gweka.' "

Yesus kim Kapernaumk jana nabare zi hon de babu gwen zini dawem takake:

(Luk. 7:1-10; Yoh. 4:43-54)

5 Yesus kim Kapernaumk hata onka, ki zep zë Roma mo jana zi mo mamna Zëbon onak dep hata zaka, zao zep Yesussu mas gweblan hap abe ta gwe'anaka.

6 Man zë gulbluka, "Bian, abon de babu gwe-gwen zini golak sang-sang sabak nik gwë'ara. Zen ni ensa ta gwe'ara. Luwen maena banakan dep."

7 Yesus ki zep ding gulbluka, "Èe asa desan dawem tan hap song gwer."

8 Hwëna jana zi mo mamna in ki zep ding gulbluka, "Bahem, Bian. Èe dawem naka hom, zep èe ama saher gwe'an- em de ano golak hatan hapye. Hwëna anakan-en Em gun, 'Zi sang-sangna in zen dawem gwen,' dekam sa dawem gwer."

9 Sap èe mesë Emsa taiblëblak, 'Eno ol-gunnu bëjen kirekam lwa srëm gwen.' Sap abon onakon de teipsin zini ki. Ano otdenak dena hen ki. Èyë ère mo otdenak dena gulbu'anam, 'Em song gwen,' zen dekam maka song gwe'ara. Hen ahanakaë gulbu'anam, 'Haen,' zen hen dekam maka song gwe'an zala. Èyë ère hon de babu gwen zisi gulbu'anam, 'A desa syal gwibir,' zen dekam maka hëndep syal gwibi'ira. Èe sap teipsin tola, zep ano ol san kirekam ang ta gwenan. Hwëna Em in teipsin tanganna, zep eno ol san sa ki kirekam lwal."

10 Yesus man tangan tengguanblaka- zëbon onakore olsa de kirekam sane gwenkam. Dekam zep zi trana in zen ang nëblan da'ak desa lero gwibiridaka hen gubiridaka, "Eiwa, zini in man Asa taiblëbla'ara. Èe homë mae Israelk kirekam de sërkam Asa taiblëblan zini zertowek.

11 In zebë emsa gubirida'an: Yakla hata sezan nakon hen nikin anen nakon, Yahudi srëm zini beya tangan nik sa tagal gwer- Alap mo irik gin kon gwisibir hanan tembane yawalak de apdekam èisripsri gwen hapye, Abraham, Isak, hen Yakob mae han.

* **8:3 8:3** Musa mo titi tabin olak, sop sang-sang karek zini bëjen ènak gwën, hen but srëm golak bëjen ün, hen aha zi bëjen desa golek de tan, ahaksa towanblan. Hwëna ayatnak awe Yesus man towanblaka. * **8:4 8:4** Im. 14:1-32

¹² Hwëna Yahudi zini, zen diki zen tangan- Alap mo irik ginnik de sap bitì gwen hap de wenyaye. Desa hwëna beyakam sa kawesin sin dep yal nulin- men dekon zi mo angna yusyustin niban gona ta gwenanke, hen sang-sang hap ëkna ngalk-ngalk da gwibirinke.”

¹³ Hwëna Yesus ki zep etan jana zi mo mamna insa gubluka, “Angkam sap esa song gwera. In kirekam ena Asa taibliblala, in zep sa ki kirekam lwal.” Zëre hon de babu gwe-gwen zini in hëndep dekam zep ki dawem gweka.

Yesus kim zi beyam-byana dawem tabirkike:
(Mrk. 1:29-34; Luk. 4:38-41)

¹⁴ Yesus ki zep Petrus mo gol san song gweka. Zëwe zep Petrus mo we marena hlau'un zaka. Ewen naban nisi ta'ak.

¹⁵ Zao zep wenyä insa tahanak towanbir ineka. Ewenna in kon dekam zep hëndep sër gwek. Dekam zep hëndep luwek, hen dekam zep tembanekam mas gwe-blak.

¹⁶ Yaklana kim dum gwe heka, dekam zep zini dowal de tilbiritan zi sang-sang beyam-byana naban Yesus onak dep nolëyaing gwezak. Yesus ol-gun enkam zep dowal-dowala insa golëalsa sone gwe'anka, hen tingare zi sang-sang beyana insa dawem ta gwibi'inka.

¹⁷ In kim kirekam syal gwibirki, dekam zep zauk- zëre hap dena mensa Alap mo ol ayang gul gwen zini Yesaya Bak orep ayang gulzimkiye,

“Zen sa nëno mae mo karek-karekna hen sang-sangna mensa nihin makan wei kulsuk gwenan tonzim iri.”*

Mae hap de ol: Yesussu de ang gwe-gweblanna, zen dam-dam naka hom.

(Luk. 9:57-62)

¹⁸ Yesus kim zi beyam-byana insa anakan hlauludaka, “Zen mes Asa dot dasinin,” dekam zep zëre hon de ang ta gwen wenyaka gubiridaka, “Nen ho gutuna an mo men eihya san tablan gwe kinin.”

¹⁹ Hwëna ki zep zë Musa mo olsa de tawa ta gwibin zini Yesus hon dep hata zaka. Zao zep gublu zaka, “Bian Guru, men desane ki të gwe'anka, ëe asa Emsa ang gweblanda gwer.”

²⁰ Ki zep hwëna ding gulbluka, “Gwenya witr zem ki. Hen mawana zol zem ki. Hwëna ngatan zi mo lang nakore Zi Tanganna ano ni ta gwen gola hom.” †

²¹ Zi beyana in zen dekam ang nëblanda gwe'ak, etan ahanik zep hwëna gubluka, “Bian, ëe asa lamkam Emsa ang gweblanda gwer, hwëna nonol ë san anik lwahak. Ère mo bian de tin hyanak asa Ebon dep hatazal.”

²² Hwëna Yesus ki zep ding gulbluka, “Em angkam emki hëndep Asa ang gweblan. Eno bian de tinkim, dikire tok bose zik lo dasik.”

Yesus kim ho ngëp naban asese naban jalse gwizimkike:

(Mrk. 4:35-41; Luk. 8:22-25)

²³ Dekam zep hëndep Yesus zëre hon de ang ta gwen wenyä ban bulkum men eihya san dep golësek gweka.

²⁴ Mumuk ennak zep hwëna ho gutuna in mam enkam ngëp-ngëp gweka, hëndep bulu in dekam sek gwe'ak sop gun hup zep alp gwesii'ik. Hwëna Yesus Zëna dekam nama nisi mumukkum ta'anka.

* **8:17 8:17** Yes. 53:4 † **8:20 8:20** Yesus kim okamanak gwë gweka, Zen man Zënaka “Anak Manusia” kam gu gweblaka. Hwëna walaskam de enlalana zëwe hom. Ibrani olkam zëno enlalana “zi tangan.” Yesus mae hap kirekam Zënaka bose taka: Sap Zen man enlala gweka- mensa Daniel Bak zëbe hap dena hamal hap Dan. 7:13-14nak ale gulkuke. Sap Daniel man nwe nik de lirisin nëblankam “zi tangan” makan Yesussu ngatan zi mo langnak hla ta seka- Alap kim Desa Zen de kitak teipsibiridan hap gublukake.

²⁵ Hwëna dekam zep anakare ola ban li dak, “Bian, nënaka Em ngaya tabin! Nen an em-am angkam juwe'an!”

²⁶ Ki zep ding gulzimki, “Em ba habe ääri'an? Em an eiwa home Asa laiblibla'an.” Ki zep hëndep luweka, dekam zep asese naban ho ngëp naban jalse gwizimki. Dekam zep tangan hëndep sê nëhek.

²⁷ Zëre hon de ang ta gwen wanya in dekam zep tenggwaran naban ëguk, “Eiwa, zini an wehasa hom! Ba hap tangan asese naban ho ngëp naban betek nëblanan!”

Yesus kim dowal-dowal mo bi gwizimdin zi darena dawem sokake: (Mrk. 5:1-20; Luk. 8:26-39)

²⁸ Ho gutu men eihyanak kim golëyaing gwe naka, Gadara mo langnak, zao zep dowal beyam-bya mo bi gwizimdin zi darena Yesus onak dep apta zaka. Zi darena in zi tok lo tasik gwibin kaso-hul kaso-hulak ënda gweka. Zen sërkam de jal-jal darena, zep zini desan ëgwahal srëm gwe-gwek.

²⁹ Zen dowal beyam-byana in mo hërhen ola ban wet oso zaka, “Alap mo Tane, Em aban mae toton banaan de syal tan hap? Em san ere mo yakla yawalak de zaun srëmnak de asa karek tabin hibe hata'ara?”

³⁰ Zëno mae mo nwe kara gwen san zaho beyam-byana tembane hap kwatap tini san ëhaka'ak.

³¹ Dowal-dowala in ki zep Yesussu aberbe da gwe'ak, “Em de zi darena an kon wet so gwen hap asa gubiridankam, Em wëhë asa zaho trana wakuwe de bitì gwen hap gubirida'anka?”

³² Yesus ki zep gubiridaka, “Em sek gwen.” Dowal-dowala in dekam zep hëndep zi darena in kon wet so gwek, dekam zep hwëna zaho trana iwe bitì gwek. Zahona in dekam zep hëndep heya-hya gwenkam li san syalk ta tinek, hëndep ho gutunak zep ëkei-king gwek.

³³ Zahona in zen kara da gwibik, dekam zep ë san dep heya-hya gwek,

hen ääsil gwenak- tingan in zen ki zë owasna lwakke, zahonak hen dowal mo tilzimdin zi darenak.

³⁴ Dekam zep ëna iwe de zini kitak sek gwek- Yesussu de zertowen hap. Kim zë hla dak, zao zep blikip gwesiblin naban abe dak- Zen de nabakam zëno mae mo langna in kon song gwen hap.

9

Yesus kim taha-tana teisya inen srëm zi sang-sangna dawem takake: (Mrk. 2:1-12; Luk. 5:17-26)

¹ Ki zep Yesus bulkum lwahal zaka- zëre mo gwë gwen ëna Kapernaum sun dep. Zao zep etan zi beyam-byana tagam nëblazak.

² Dekam zep hen zi sang-sangna taha-tana teisya ine gwen srëm naka beryak de ziredan naka nërhatatak. Yesus kim anakan tame tabirki, “Eiwa, zen man tangan Asa daiblibla'an,” dekam zep zi sang-sangna insa gubluka, “Tane tol, bahem ngalap gwen. Eno karek-karekna mesë ep tap gulsublunan.”

³ Musa mo titi tabin olsa de tawa ta gwibin zini kim zë Yesussu kirekam sane da'ak, dekam zep enlala ennak donsublu'ak, “Zi bose zik mo karekna insa tap gulsublun hap gunda, zen man kil gi'ira, 'Eë an Alap han apdenak.' Kirekam insa gunda, zen Alapsa lamang tanda.”

⁴ Yesus hwëna mes zëno mae mo enlalana tame tazimki, ki zep gubiridaka, “Em in kirekame enlala ennak Asa lonsublu'an, zen ere mae mo enhosae kim karek la'an!”

⁵ Em ema ano ola husus eibir-anakan insa gublulye, ‘Eno karek-karekna mesë ep tap gulsublunan.’ Hwëna anakan de gublunkam, ‘Em luwen, hëndep song gwe,’ san esa hen etan husus eibir? Sap olgun darena in apdenak- Alap mo sosenkam de gublun ol.

⁶ Hwëna angkam Eë ama ebe mae hap goltreizim'in- em dikim Asa anakan tame tan hap, ‘Alap mes ki

ngatan zi mo lang nakore Zi Tanganna abe hap sosonna golblaka-okamanak awe dikim zi mo karek-kareksa tap gulsuk gwizimdin hip denaye.' "

Ki zep hwëna etan zi sang-sangna insa gubluka, "Em luwen. Ere mo berya insa teisya, ki gol san song gwe."

⁷ Zi lekna in dekam zep hëndep luweka, ki zep hëndep zëre mo gol san dep song gweka.

⁸ Zi beyam-byana in kim owasna insa hla nuk, dekam zep aïrïn niban Alap mo bosena teip nulsuk gwebla'ak, sap Zen dekam zëre mo soston yawalsa Yesus osan okamanak de zi hip golzim'inka.

Yesus kim Matiu'u kwang ta kïnikake:

⁹ Yesus kim dekon song gwe'anka, dekam zep Roma mo ïrik gïnnik dep de pajak te-ala alal ta gwizimdin zini asa hla ta'anka. Ano bosena Matius. Èe ère mo syal gwe-gwen teksonnakë nikin'ik. Zao zep asa gublu zaka, "Haen. Asa em ang gweblan." Èe ki zebë luwek, ki zebë hëndep ang gweblak. *

¹⁰ Yesus kim ano golak golëtembane ta'anka, dekam zep hen ahakore pajak te-ala alal tanda gwen wenyä beya enkam yaïng gwezak. Hen ahakore karek-karek gulin halasen gwen wenyä man zë hen beyakam yaïng gwezak. Ki zep hëndep apdekam Yesus mae han tembane ta'ak- hen zëre hon de ang ta gwen wenyä ban.

¹¹ Farisikam de gubirida gwen zini kim zë hla nulidazak, dekam zep Yesus hon de ang ta gwen wenyä insa nenbiridazak, "Eno mae mo guruna in ba hap tangan pajak te-ala alal tanda gwen zi niban apdekam golëtembane ta'ara?- hen

ahakore karek-kareksa de gulin halasen gwen wenyä banye! Zen in kwae nabanke!"

¹² Yesus kim kirekam salbiridaka, ki zep ding gulzimki, "Zini, sang-sang srëm wenyä, zen hom doktersa dwam në gweblanan. Zen diki zi sang-sang en dwam në gweblanan.

¹³ Ano syalsa de dam gulsun hup, diki dawemna Alap mo ola ansa emaka klis u'in, Zen kim anakan Israelsa gubiridakake,

'Èe a kirekam de lowehe gwen habë mo emsa dwam gwibirida'anye: Bol-zaun tanganna, aha zi mo karek-kareksa kwasang naban em eititi gwe-gwibin. Ere mae mo karek-karek hap de kirekiresa abe hap tru tasik gweblansa, zen abe hap bol-zaun tangan naka hom.'*

Zep Èe ansa okamanak hatazak, Èe karek-karek gulin halasen gwen wenyäka de kwang guludan habë hatazak. Men zen zënaka tim di gwibirin, 'Èe an dawem-dawemna,' Èe desa de kwang guludan hap homë hatazak."

Mae hap de ol: Yesus hon de ang ta gwen wenyä kire hap tembanena ëlwa srëm gwe-gwek.

(Mrk. 2:18-22; Luk. 5:33-39)

¹⁴ Zao kim lwa se'ak, ki zep baptis ta gwibin zini Yohanis hon de ang ta gwen wenyä Yesus hon yaïng gwezak, ki zep zë dakensiblik, "Èe ama Alapsa dikim enlala zon tasiblin naban abe ta gwen hap etan-etankam tembanena ëlwa gwenan. Farisikam de zini hen kirekam ëgwë gwenan. Hwëna ebon de ang ta gwen wenyä ba hap kirekam syal neibir srëm gwe-gwenan?"

¹⁵ Yesus ki zep ding gulzimki, "Abon de ang ta gwen wenyä kip man dakastilzim'in- an kirekam

* **9:9 9:9** Matius Yunani olkam hom anakan ale gulku, "Ano bosena Matius." Zen hwëna anakan ale gulku, "Zëno bosena Matius." Zen man zëre mo bosena bukunak awe golzabe gweka- san de aha zi hip de ale gulblunna kiye, men kirekam hen Yohanis zëre mo Ol Dawem ale gunnuk zëre mo bosena ale gul srëm gwe-gwekake. Hwëna Orya ol zi de anakan tame gun hup, "Men zen ale gulku, zen hen zëwe ang gwe-gweka," zep damkam zënaka de kira tan makan awe li nul sonok.

* **9:13 9:13** Hos. 6:6

tembanesa de ëlwan srëmkam lowehe gwe'anye. Sap zen angkam teipsin zisi de zergwën makan Asa nërgwë gwe'an. Hwëna jal zini kim de Asa jek-jak da'ak, Abon de ang ta gwen wenyä dekam molya tembane tak. Embwan hap sa baes tal." †

16 Etan ki zep kire hap gulk sun de ol blaonziminni dan mas sozimki, "Zi mo baju kwang de hul nënkam, zen bëjen deyol sop ësekam makan tazimdin. Kirekam bëjen dakastin. Sap ngan sosunkum deyol ësena in de yok gwe'ak, dekam sa baju ëpba hula in mam enkam etan kalk nër.

17 Hen kirekam, anggur ho ësesa bëjen kambing sopkam de botol ëpbanak yuren. Kirekam hom dakasti'in. Sap anggur ho ësesa de kambing sop botol ëpbanak yurenkam, anggur hona in kim de nopna tail gi'ik, kambing sopkam de botola in dekam sa kalk nër, hen anggur hona in dekam sa zalta dep hlëweher. Anggur ho ësena zen diki kambing sop botol ësenak de yurenkam dakasti'in- apdenak dikim dawemkam nolan hapye. Zep hen kirekam, Abon de ang ta gwen wenyik de etan ëpba lowehen san abarenak ang tan hap hom dakasti'in."

Yesus kim but srëm golak de mam zi mo wenam tol tokna ngaya gulkuke, hen aura gwe-gwen wenyä kim dawem gulkuke:

(Mrk. 5:21-43; Luk. 8:40-56)

18 Yesus kim nama baptis ta gwibin zini Yohanis hon de ang ta gwen wenyä ban ola golëton'anka, ki zep zë Yahudi mo but srëm golak de aha mamna hata zaka. Zao zep Yesus mo nwenak boklena kom so zaka, dekon zep gu seblaka, "Ano wenam tola nër hom tangan tilin. Hwëna nen ki song ën. Em de tahasa tehabir anenkam, zen sa etan ngaya gwer."

19 Yesus ki zep hëndep luweka, dekam zep zëre hon de ang ta gwen wenyä aban mae zini insa ziang gweblaka.

20-21 In kimë sek gwe'ak, wenyä ki zep Yesusu tahan nakon golek de tazak. Wenyä in man aura gwe-gwek. Tahunna mes dua-blas enkam altilsibik- sang-sangna in han de gollwa gwennakye. Zen man enlala gwe'ak, "Baju mae ennakë towanbla'ak, ëe dekam asa dawem gwer." Ki zep hëndep baju sihi top nakon olk ta sonek. ‡

22 Yesus ki zep hëndep tahan san lero gweka, dekam zep wenyä insa hlaulku, zao zep gubirki, "Anyan, bahem ngalap gwen. Em ema Asa taiblilala, zebe dawem gwenda." Wenyä in hëndep dekam zep ki aurana in tewesibik.

23 But srëm golak de mam zini in mo golak kim asa golëyaing gwe'anka, anakan zebë hla kulida'ak, "Zini beya nik ol mamkam gosa dabi'in, hen ahakon sulingkim sei go terya da'an."

24 Yesus ki zep zë gubirida kinzika, "Em kitak wet so gwen. Wenam tola an hom til. Zen nisi am ta'an." Zen hwëna man swrë da gwe'ak.

25 Eë kimë kitak olëalsa sonek, Zen ki zep hwëna teksonna in zao wenam tol tokna lwa'ak desan dep tilki. Taha nakon kim gul ineka, dekam zep hëndep wenam tol tokna in etan ngaya gwek, hëndep zauk.

26 In desa zë owasna kirekam syal gwibirki, dekam zep ki hëndep tingare langna iwe de ë-ë san nol haladak.

Yesus kim zi nwe dimin darena dawem sokake:

27 Yesus kim dekon etan asa golësek gweka, ora nakon zep zi nwe dimin darena ërtro kinzika. Ki zep kon laken soneblaka, "Daud Bak

† 9:15 9:15 Mensa "teipsin zisi de zergwën" kam awe li nul sonek, Yesus gulk sun de ol blaorankam "we ëse gon zisi de iye zik zergwën" kam aïsïl gwibiridaka. Dam gulsunnu apdenak: Zen dekam bëjen tembane srëmkam lowehen. ‡ 9:20-21 9:20-21 Yahudi zini zen kitak bajuna sihilhi naka alala da gwek. Emki hlaun pasal 23 mo ayat 5 mo olk kore alenak.

mo Auyan-tane, § asa Em kwasang gwizimdin.”

²⁸ Ëna iwe de golak kim asa golëbiti gwe zaka, zi nwe dimin darena in ki zep zë hen lil zika. Yesus ki zep zë takensizimki, “Em san ema Asa anakan laiblibla'ara?— ‘Zëbon sosonna ki- asa dikim dawem son hap denaye.’”

Ki zep ding ulbika, “In kirekam, Bian.”

²⁹ Ki zep nwenak anakare ola ban towanzimki, “In kirekam ena Asa laibliblala, in zep sa kirekam ebe nikip lwazim.”

³⁰ Dekam zep ki hëndep nwena kara ëka. Zao zep guzimki, “Owasna an zen ki ebon nebon lwanan, bahem aha maesa lonbiridan.”

³¹ Hwëna zen kim kon song ëka, dekam zep ki hëndep tingare langna in san ol haladaka— Yesus insa owasna kirekam syal gwibirizimkiye.

Yesus kim zi ol srëmna dawem takake:

³² Yesus kim asa etan dekon golësek gweka, dekam zep hen dowal mo bi gweblan zi ol srëmna Yesus onak dep nërhatzak.

³³ Yesus kim dowala insa zëbon onakon zersa soneka, dekam zep hëndep ola tonka. Zi beyam-byana in man tangan dengguanblak, hen man ëgu gwe'ak, “Nen homë mae Israelk awe kirekam de owasna aha-en mae hla kuk.”

³⁴ Hwëna Farisikam de gubirida gwen wenyä man ëguk, “Zen dowal mo kigi sosonna golblaka— dekam de aha dowal-dowalsa golëalsa sone gwen hap denaye.”

Yesus kim zi beyam-byana hlaulu-dankam kwasang gwibiridakake:

§ 9:27 9:27 Zi nwe dimin darena in kim Yesussu “Daud mo Auyan-tane”kam enblaka, zëno dam gulsunnu Yesus mo auyan-aza en hap denaka hom. Sap zëno hatan srëmnak, tingare Yahudi zini “Daud mo Auyan-tane”kam Israelsa de ngaya tabin hip de Zini insa nen gweblak. Sap Alap mo olsa de ayang gul gwen zini zen kirekam nonol nen guk gweblak, “Teipsin zini Daud Bak mo ausu nakon sa hatala— nësa de ngaya tabin hip de Zi niye.” Zen hen man Desa enlala në gweblak, “Zi sang-sang karekna sa hen dawem ta gwibiri, hen karekam de lowehen nakon sa hil ti sone gwibiri.” Zep zi nwe diminni in kirekam hen mes Yesussu dam lasiki.

³⁵ Yesus ki zep langna iwe de tingare ë-ë san zëre hon de ang ta gwen wenyä aban mae ziamjanbir song gweka, hen desan de but srëm gol-gol san tawa tabir song gweka. Zen Alap Zën de irik gin hip de ol dawemkam tawa tabir song gweka, hen men zen kirekam-kirekam sang-sang karek naban nollwa gwek, desa man kitak dawem tabir song gweka.

³⁶ Yesus kim zi trana insa hlauluda song gweka, Zen man tangan kwasang gwibirida gweka. Sap zen hom eiwa de orana tame da'ak, hen mes tangan ësin-sin gwek— men kiye, bi srëm zahona.

³⁷ Dekam zep abe mae en hap ola gulk sun blaonzimki, “Nga yala awe de obwagana mes mamkam bil gwera, hwëna men zen de taran hap dena dan en tangan.

³⁸ Zen in zep Nga Bi naka em abe ta gwen— Zen deka zisi nga yala awe de syal ta gwen hap lup gul sone gweka.”

10

Yesus hon de ang ta gwen wenyik mo bosem-sena an zen:
(Mrk. 3:13-19; Luk. 6:12-16)

¹ Zao kim lwa se'ak, Yesus dekam zep dua-blaskam de zëre hon ang ta gwen wenyä asa tagal gulsuku, zao zep sosonna abe mae hap golzimki— ëë dikim dowal-dowalsa golëalsa sone gwen hap, hen kirekam-kirekam sang-sang karek gollwa gwen zisi dikim dawem ta gwibin hip.

² Dua-blaskam de dam tasibin zini, ano mae mo bosem-sena, nonol Simon— mensa hen “Petrus” kum nen gweblanan, oso zem Andreas han.

Hen Zebedeus mo walas darena,
Yakobus oso zem Yohanis hin.

³ Hen Pilipus ne Bartolomeus ne,
Tomas,

hen aena, Matius. Ëe menkam Roma
mo irik ginnik debë pajak te-
alasa alal ta gwek.

Hen ahana Alpeus Bak mo tanena
Yakobus,

hen ahana Tadeus.

⁴ Hen ahana Simon- in zen nonol
Israel dikim Roma mo irik gin
nikon ezë-en gwen hap de
ëasas gwennak ang gwekake.

Hen ahana Kariot walya Yudas. In
zen sa Yesussu zergulu.

*Yesus kim zëre hon de ang ta
gwen wenyä lup gul sonekake:
(Mrk. 6:7-13; Luk. 9:1-6)*

⁵ Dua-blaskam de wenyä asa
dekam zep anakare ol zim-zim
niban lup gul soneka, "Yahudi srëm
zi mo ë-ë san bahem sek gwen.
Samaria mo ë-ë san hen bahem.

⁶ Diki Israelk de zi ensa em amjan-
bin- sap zen san de bi srëm zahona
kiye.

⁷ A kirekam lonbirida song gwek:
'Alap man angkam Zën de nësa
teipsinkim irik ginkim kon gwesibir
hana'ara.'

⁸ Zi sang-sangna dawem la gwibik.
Hen tinni ngaya la gwibik. Hen
sop sang-sang karek nabare zini
dawem la gwibik. Hen dowal-
dowala olëalsa sone gwek. Ëe asa
kire hap de sosonsa ebe mae hap to-
toresä golzim, zep em hen kirekam
totoresä mas eibirida gwek.

⁹ Te-alana bahem mae lop tan- sap
yawala, sap hen betek maena.

¹⁰ Ora san dep de tembane taiblin
honna bahem hen wëwek tan, hen
pakeanna timnik de enna kim sek
gwek. Hen sepatuna ala son enna
kim emki sek gwen. Dutena hen
bahem mae kap tan. Em in Alap
mo syalsae o'an, zep em men desae
tawa la gwibi'ik, zen zen sa ebe mae
hap tembane maena nol gwizim-
zao dikim lowehen hap denaye.

¹¹ "Em de ënak yaing gwe-
gwennak, nonol mae hap em
ëhakalsik gwen, 'Nara zi wëhë asa
ëna an kon zer in'inka?' Men zen
emsa zer irinni, zëbon en emki
gwën, hëndep dekon en emki etan
song gwen.

¹² Golak de tin nikon, nonol
anakan em ëgu kini gwen, 'Dawem.
Em Alap mo taha terenake lowe
he'an.'

¹³ Zao de Alap osan dep de hohle
gwen nik gwë'anka, ki eiwa zao esa
Alap mo taha terenak dawemkam
lowehe gwer. Kire nik de gwë srëm
gwe'anka, ki emki enbirida gukhan,
'Ëe mensa nonol emsa enbiridal,
Alap mo taha terenak de sap lowe-
hen hap dena, awe molya ki lwak.'

¹⁴ Hwëna men dekore ë nakon
emsa anakare ola ban zer irin
srëmna, 'Em ba habe awe hata'an
zala? Ëe ama emsa de salblanna
baes ta'an,' dekam em kon song
gwen. Hen ere mo tana sonsa em
zë taik-tik so gukhan- zen dekakim
anakan tame nuk, 'Zen sap Alap
onakore ol dawem naban nëbe mae
hap golhatazim zira, hwëna nen
insa ër-in srëm gwenan nëre mae
hap de kareksae kim mam ulin.'

¹⁵ Eiwa denakaë emsa gu-
birida'an: Aumwa hap de zisi klis
gunnuk, Alap ëna insa anakan sa
enlala gweblala, 'Zen orep de ëna
Sodomk de zisi ëkarek gwenkam
man kwei-kwik nuk.' Zep men
kirekam Alap orep Sodomk de zisi
zëre mae mo karek-karek hap heip
gulku, hwëna ano lup gul sonen zini
emsa de lup gul irin srëm zini, desa
aumwa hap de klis gunnuk sërkam
tangan sa karek tabiri."

*Yesus hon de ang ta gwen wenyik
de terya-tyakam lowehe gwen hap de
ol:*

(Mrk. 13:9-13; Luk. 21:12-17)

¹⁶ "Emki ëenlala gwen: Ëe domba
makare soson srëm nakaë emsa lup
gul sone'an- gwe tihï jal-jal ngirin
sin dep. Zen in zep terya-tyakam
sek gwek- men kiye, wanya de song
gwenna. Hwëna sae-sae enlalakam

em sek gwen- men kiye, mawana ohola mo enlalana.

¹⁷ Zep terya-tyakam lowehe gwek, sap emsa sa Yahudi mo but srëm gol-gol san dep dahyohal gwer. Hen zëwe de teipsin-teipsinni sa emsa de tangole gwibin hip nenbirida gwer.

¹⁸ Em an Asa de ang gwe-gweblanna, zep emsa sa pemerinta mo teipsin-teipsin zi sin dep kap nulhal gwer. Zen kirekam Alap mo dwam gwibin sin sa ki ebe mae hap lwa gwizim- em dikim zë Yahudi mo teipsin-teipsin nika hen Yahudi srëm zi mo teipsin-teipsin nika abe hap denaka tonbirida gwen hap.

¹⁹ Zep emsa de kap gulhal gwen-nak, em bahem anakare hap enlalana ëbeya gwe-gwen, 'Ëe banakarekam asa zë ding ul gwizim?' Sap men kirekam de ding gul gwizimdin hip dena, zen emsa de taken-taken gweblan ennak sa ki Alap ebe mae hap gol gwizimdi.

²⁰ Sap dekam em en molye ola lon gwibik. Hwëna ngatan zi mo langnak de Bian mo Enho sa eno mae mo ëk tihï san ding gul gwizimdi.

²¹⁻²² "Emsa sa tingare zini husus neibirida gwer, sap em an Asa de ang gwe-gweblan wenya. Zep a kirekam sa ebe mae hap lwa gwizim: Emsa ere mae mo aya-wal oso-wal tanganna sa tameran hap nolëgu gwer. Hen emsa ere mae mo bi walya sa tameran hap nolëgu gwer. Hen ere mae mo walasna sa emsa abe hap de jal hap nolëtobe gwe-gwer, hëndep tameran hap sa hen emsa nolëgu gwer. Hwëna em in zene Asa de taïbli-blannak tatem ëzauk gwe'ak, hëndep aumwa hap denak de hata'ak, em esa ëngaya gwer.

²³ Zep emsa de aha ë maenak karek tabinkim, dekon aha ë san em heya-hya gwen. Sap eiwa denakaë emsa gubirida'an: Em de tingare Israel mo ë-ësa amjanbiridankam sul sonen srëmnak, ngatan zi mo lang nakore Zi Tanganna Ëe dekam

asa lwa halzal.

²⁴⁻²⁵ "Zep gulk sun de ol blao-ranna ansa emki enlala gwe-gwibin: Sekola walasna, zen mam naka hom- guru zem onakonye. Zep guru zemka de aha zi lamang ta gwenkam, sekola walas zem insa hen sa kirekam lamang da gwibir. Sekola walasna in sa sam gwesillizen de guru zemka tana wei san zertronkamye. Hen kirekam, zi mo tana iltikinnik de babu gwe-gwen zini, zen hen mam naka hom- zëre mo zi bina in onakonye. Ëe an sap gol bi nikë awe gwë'an, hwëna Asa man lamang da gwenan, 'In dowal mo kigi mo sasonkam syal gwe-gwe'ara.' Zep em Abon de ang ta gwen wenya, Asa de tana wei san zertronkam, emsa hen kirekam sa lamang da gwibir."

Alap ensa de aïri gweblan hap de ol:

(Luk. 12:2-7)

²⁶ "Zen in zep, zi bose omka bahem aïribirida gwen. Sap karekna mensa aningkim ebe mae hap nol gwizimnin, desa sa Alap lamkam golwet sola. Hen kalangna mensa Alap aning gul gweka, desa sa hëndep tingare zini hla nul.

²⁷ Ëe mensa kam golak emsa tonbirida gwe'an, em hwëna desa yaklam neik tagal gwennak lonbirida gwek. Men desaë në-erenak emsa tonbirida gwe'an, em hwëna desa ol mam-mamkam neik tagal gwennak lonbirida gwek.

²⁸ Zi bose omka bahem aïribirida gwen, sap zen auhu-kama tim en naka damera gwenan. Hwëna zëno mae mo sosonna hom tangan- ang naka de karek tan hap denaye. Diki Alap ensa em aïri gweblan, sap Zen Zëbon en sosonna- tim niban ang naban de syauk blanak karek son hap denaye.

²⁹ "Emki mawana tainim besbe'a enlala gwibiridan. Desa zini hom te-alakam de kap gun hup dwam neibirida gwenan. Sap eiwa kirekam, hwëna zen hen aha-en

mae molya kama san zanka- nëno mae mo Bian de kirekam dwam gweblan srëmkamye.

³⁰ Hen kirekam, eno mae mo nol alana, Bian mes desa anakan tawa gwibirki, 'Beyana ki en.'

³¹ In zep ere mae mo tim hip dena bahem ëngalap gwe-gwen, sap em Alap mo nwenak mawana täinim bes-bes naban apdenak hom."

Zi beyanak de Yesus hup denaka golluwe gwen hap de ol:

(Luk. 12:8-9; 12:51-53; 14:26-27; Mrk. 9:41)

³² "Zen in zep, zini men zen aha zi hon zënaka anakan kira ta gwenna, 'Ëe an Yesussu de ang gwe-gweblanna,' kire zini Ëe asa hen ngatan zi mo langnak de ëre mo Bian hon anakan kira tal, 'Zen an hen eiwa Asa de ang gwe-gweblanna.'

³³ Hwëna men zen de Asa aha zi hon anakan nazabebela'ak, 'Ëe Yesussu de ang gwe-gweblan zisi hom,' ki Ëe hen anakan asa desa kira tal, 'Zini an Asa de ang gwe-gweblan naka hom.'

³⁴ "Bahem anakan Asa kil ti gwen, 'Zen an umlaesa de okamanak awe golhatazan hap hata zaka.' Ëe kire hap homë. Hwëna abe hap de jal hap Asa de tame tan srëm wenya sa emsa tameran hap gil-gil neibirida gwer.

³⁵ Ëe ansa hatazak, zen dekam sa ebon mae onak anakarekam lwa gwer:

'Zi walasna zen bi wal zeban sa zënaka gil-gil neibirida gwer.

Wenam tol-tolkam dena, zen an wal zeban sa zënaka gil-gil neibirida gwer.

Hen we walya, zen aebo wal zeban sa zënaka gil-gil neibirida gwer.

³⁶ Dekam ere mae mo iyena, zen zen sa ebe mae hap de jal zi hip ëjower.*

³⁷ "Men zen bi zemka dawemkam enna nolabirida gwenan, hwëna

zëno mae mo Asa de en lwablanna man lwala he'an, kirekam de zini zen hom ësam gwesi'in- Abon de ang ta gwen hapye. Hen kirekam, men zen an zemka, ahaksa walas zemka dawemkam enna nolabirida gwenan, hwëna zëno mae mo Asa de en lwablanna man lwala he'an, zen hen hom ëdakasti'in- Abon de ang ta gwen hapye.

³⁸ Hen zi de zënaka anakan sosok tan srëmna, 'Asa sap sa Yesus mo kim te-lidak sonnak makan dain,' zen hen hom Abon de ang ta gwen hap ësam gwesi'in.

³⁹ Sap men zen zëre mo auhukamanak de gwënsa anakan golairi'anka, 'Ëe babë Yesussu de ang gwe-gweblannak karekna goltowe gwen,' ki zëno gwënsa in sa jek-jak gweblal. Diki men zen Asa de ang gwe-gweblan hap zëre mo gwënsa sosok gu'unka, hëndep zao mae de tin hip, zen zen sa hëndep denaban ngaya gwera.

⁴⁰ "Men nara ano zer sonen zini emsa zer irinni, zen ki hen Ënaka zer in'ira. Hen men zen Ënaka zer irinni, zen hen Bian, men Zen Asa zer sone zaka, Desa hen zer in'ira.

⁴¹ Men nara Alap mo ol ayang gul gwen zisi zer irinni, anakare hap, 'Zen an Alap mo olsa ayang gul gwe'ara,' ki Alap sa hen enlala gweblala, 'Zen hen syal bose zem.' Zep Alap mo olsa de ayang gul gwen hap de dawemna, desa sa hen Alap zëbe hap lamkam golblala, sap zen kire zisi mas gweblaka. Hen kirekam, men zen enlala dam-dam enkam de gwë gwen zisi zer irinni, anakare hap, 'Zen Alapsa betek gwe-gweblanda,' ki Alap sa hen zëbe hap dam-damkam de gwë gwen zi hip de dawemna golblala.

⁴² Eiwa denakaë emsa gubirida'an: Men nara aha-ere ho mok mae tolsa bose srëm zi hip golblanna, anakare enlala naban, 'Zini an hen Yesussu ang gwe-gweblanda,' ki Alap sa zëbe hap hen dawemna lamkam golblala. Zen

* 10:36 10:36 Mik. 7:6

molya gulin srëm gweka.”

11

Baptis ta gwibin zini Yohanis kim zëre hon de ang ta gwen zini Yesussu de takensiblin hap lup gul sonekake: (Luk. 7:18-35)

¹ Yesus kim dua-blaskam de ang ta gwen wenya asa en tawa tasibirki, ki zep asa lup gul soneka- Zënaka de ngeirbli song gwen hap. Zëna lun zep asa golëtro song gweka, hen ol dawemkam ë-ë san tawa tabir song gweka.

² Baptis ta gwibin zini Yohanis kim bwi nakon anakan salka, “Nësa de ngaya tabin hip de Zini men, Zen angkam man ë-ë san tawa tabirida gwe'ara,” dekam zep zëre hon de ang ta gwen zini lup gul soneka-Yesussu de anakan takensiblin hap,

³ “Bian, Em an san ha Zen tangan?- men Desa anakan nen guk gweblakye, ‘Israelsa de oto gulsun hup de Zini sa hata zala.’ San ha ëe asa etan ahanaka kara ëblal?”

⁴ Yesus ki zep ding gulzimki, “Sap esa etan Yohanis osan dep lwan dahal. Mensa ki ena hla kul hen ësane gwer, desa anakan lonblak,

⁵ ‘Zi nwe dïminni man ëkara gwe-gwe'ak.

Lek-lek wenya hen man sek gwe-gwe'ak.

Sop sang-sang karek nabare wenya man hen ëdawem gwe-gwe'ak.

I mat wenya hen man ësane gwe-gwe'ak.

Tok-tokna hen man ëngaya gwe-gwe'ak.

Hen Alap onakore ol dawemkam man tahalha wenyaka tawa ta gwibi'ira.’*

⁶ Hen anakan enblak, ‘Abon onakon men zen ësyalhe srëm gwe-gwe'an, hë'ho gwibinni zen zëbon mae lwa'an.’ ”

⁷ Baptis ta gwibin zini Yohanis mo zi lup gul sonenna in kim nama ëgwa ha'ak, Yesus dekam zep

hwëna Yohanis hip dena zi beyambyana in hap srip gulsuzim'inka. Man zë gubiridaka, “Yohanis kim zi ol srëm langnak tawa ta gwibirki, em ba habe desan sek gwe-gwek? Basa de zë hlaun hup? San ha ema ëtim gul gwek?- ‘Ëe desan asyas habë sek gwe'an.’

⁸ Em ba habe desan sek gwe-gwek? San ha ema ëtim gul gwek?- ‘Ëe pakean dawem ala son nabare zisi de zë hla tan habë sek gwe'an.’ Kire hap desan bëjen. Sap kirekam de zini, zen diki teipsin zi mo ë yawalak lowehe gwenan. Zi srëm langnak bëjen.

⁹ Zep em ba habe zi srëm lang san dep sek gwe-gwek? Em sap diki Alap mo olsa de ayang gul gwizimdin hip de zisi de zë sane tan habe sek gwe-gwek. Hwëna baptis ta gwibin zini Yohanis Bak, zen Alap mo olsa de ayang gul gwen zi nikon man tangan taman kinika.

¹⁰ Sap Yohanis in zen- mensa Alap mo olak hamal hap nen guk gwe-blakye, Alap kim Tane zemka hamal hap anakan gu-gublukaye,

‘Ëe asa Emsa de ngeir gublun hap zisi zer soner-

zen de nonol ëre mo olsa ayang gul gwizimdin hip,

ebe hap dikim orasa sal ta gublun hap.’*

¹¹ Eiwa denakaë emsa gubirida'an: Okamanak de zini, sap nonol lonesen nakon hëndep angkam em an zene lowe he'an, Alap mo nwenak de ëdakastinni, hom tangan ahana-Yohanissi de kwë ta sone kinin naye. Hwëna sap kirekam, men zen angkam Alap mo irik ginnik Asa de taibliblan nakon biti gwe-gwe'an, sap bose srëm wenya, zen diki zen- Yohanissi de kwë ta sone kinin wenyaye.

¹² “In kim Yohanis syala kon gwesibir hanaka hëndep angkam, Alap zëre mo irik gin hip de sosonna mamkam Abon onakon

* 11:5 11:5 Yes. 35:5-6; 29:18-19; 61:1 * 11:10 11:10 Mal. 3:1

goltrei gwizim'ira. Hwëna nol drak-drak wenya zen man Alap mo irik ginni insa baes nei gwibi'in, zep hom gun hup easas gwe-gwe'an.

¹³ Sap Yohanis de hatan srëmnak, tïngare Alap mo ëpba ola mensa zini ano syal hap dena ayang nulz-
imnira gwek hen ale nul gwek, zen an dekam sa zëwe zaul.

¹⁴ Men kirekam Alap mo olak lwak,

'Elia Bak sa Israelsa de ngaya tabin hip de Zini insa ngeirbli zala,' hwëna baptis ta gwibin zini Yohanis, in zen- Elia mo weinak dep de zi niye. Hwëna zini hom kirekam dam dasik.

¹⁵ Em dwan i nibanke. Em esal gwen!

¹⁶ "Zep angkam de zini, em in men kiye- wasasna. Wasas tane-ne de pasarak teinikirinni, dekon de asyas bose zemka gubiridanna,

¹⁷ 'Nen isrip-sri hap de terya ban asyas tan.' Hwëna zen maka ding nulzim'in, 'Ee ama baes ta'an.' Dekam de sap etan gubiridanna, 'Ki zi toksa de gwëblan makan nen asyas tan.' Hwëna dekam hen maka ding nulzim'in, 'Ee ama kirekam hen baes ta'an.' Angkam de zini em hen kirekam. Em ema kitak Alap mo syala baes ei gwibirin.

¹⁸ Sap Alap kim baptis ta gwibin zini Yohanissi ebe mae hap zer sonezimki, zen Alap dikim sosonsa golblan hap man tembanena lwa gweka, hen angguru hom otde gweka. Hwëna em ema baes ë gweblak, hen anakane lonsuk gweblak, 'Zen dowal bi gweblaka.'

¹⁹ Ki zep hen ngatan zi mo lang nakore Zi Tanganna Asa zer sone zaka. Ee hwëna homë tembane naban angguru ban lwa gwenan. Hwëna Asa hen ema baes ë gwebla'an, hen anakane Asa lonsuk gweblanan, 'Zini insa emki hla tan! Tembane ngalap-ngalapna, hen anggur otden sosonna. Zëno wal bose walya Roma mo irik ginnik dep te-alasa alal danda gwenan,

hen ahakon enlala kwae naban!' Hwëna Alap kirekam zëre mo enlala blalkam srën-srënkam de syal ta gwen hap lup gul sone gwenda. Zep men zen de Alap mo enlala blal san kirekam ang ta'ak, zen zen sa eiwa de ora san ewet so kini gwer."

Mae hap de ol: Eëna men zen Yesussu daiblibla srëm gwe'ak, zëbon mae a kirekam sa lwal.

(Luk. 10:13-15)

²⁰ Yesus ki zep jala ban tonbiridaka- ëëna men zao sap Zëna owas-owasna beyakam syal gwe-gwibirzimki. Sap zëwe de zini zëre mae mo karek-karek nakon de ehale hap man baes ta gwek. Zen in zep gubiridaka,

²¹ "Eëna Korazim hen Betsaidak de zi, em engalap gwen, sap Alap sa emsa sërkam karek tabiri. Eë darena Tirus hen Sidonk de zini insa Bian orep heip gulku, zen maka ehalek-owas-owassa de hlal gwenkamye, an kire owassaë eno mae mo ngirinnik syal gwe-gwibi'inye. Tirus hen Sidonk de zini maka bunsu de awabin niban kaen karonsa darak dak- dekam de zënaka anakan golëtrën hap, 'Eë ama ehale'an.'

²² Hwëna angkam de ë darena, Korazim hen Betsaidak de zini, em an bëjen em ehale! Zen in zep, Alap de aumwa hap zisi klis gunkum, eno mae mo angna sa tangan sërkam karek tabiri. Hwëna ëna Sidon hen Tirusk de zi mo angna, desa de etan karek tabin hip dena sa jahalha gwer, sap zëbe mae hap hom Alap golzimki- dekam de ano owas-owas syal gwibinsi hlal gwen hap denaye.

²³ Kapernaumk de zini, em hen kirekam. Em ema ekil gi'in, 'Yesus owas-owasna beyakam nëno mae mo ënak syal gwe-gwibirida, zep nësa sa Alap ngatan zi mo lang san dep dawemkam kang gul sera.' Bëjen. Emsa hen syauk blanak sa yal gul sera. Eëna Sodomk de zini insa Alap orep timbwas tabirki, zen maka ehalek hen zëno mae mo auyan-tane walya nama

maka zë lowe he'an- zen de dekam owas-owassa hla nulinamye, men kirekamë Kapernaumk eno mae mo ngirinnik syal gwe-gwibi'inye. Hwëna em home mae halen hap ëdwam gwe-gwe'an.

²⁴ Zep aumwa hap de zisi klis gunuk, Kapernaumk de zini, eno mae mo angna Alap sa sërkam karek tabiri. Sap Alap hom ëna Sodomk de zi hip ano owas-owassa de hlal gwen hap dena golzimki. Zep desa de etan karek tabin hip dena sa ebon mae onakon lwalaher. Emsa sërkam tangan sa karek tabiri.”

Mae hap de ol: Yesus Zen Zen nëno mae mo nihinni hli tasik gwizimnira.

(Luk. 10:21-22)

²⁵ Yesus dekam zep Alap osan dep ola gu soneka, “Bian, Em in Zen ngli naban okama naban irik so'arake. Eë ama ep dawemsa golbla'an, sap Em ema ere mo irik ginsi de tame gun hup dena enlala blal wenyä kip hen sekola sul sonen wenyä kip aning gul gwizim'ira. Hwëna sekola srëm wenyä kip hen enlala betek wenyä kip ema goltrei gwizim'ira.

²⁶ In eiwa, Bian, zen kire tangankam ere mo dwam gwibin sin ki lwa'an.”

²⁷ Ki zep hwëna in zenë zë lowe he'ak asa gubiridaka, “Tingare okama de bi gwibin hip de sosonna mes kitak Bian abe hap golblaka. Zini toton bëjen Tane zem Asa tame tan. Zen diki ëre mo Bian en Asa tame ta gwe'ara. Hen ano Biansa nara dep?- tame tan naye. Zen diki A-enë tame ta gwe'an. Hen zini men zëbe mae habë dekam de ano Biansa tame tan hap dena gol gwizim'in, zen zen en angkam tame da gwe'an.”

²⁸ Ki zep etan asa gubiridaka, “Men nara sang-sangsa ahaksa

tahalhasa nihin dohon-hon yawal makan eisbinni, emki Abon onak golhatazan. Aban esa nihinni insa eirera. Em dekam esa jahalhana eisbiri.*

²⁹ Abon onak ang gwe-gwe-ekakim ano gwënsa tame gul. Sap Eë an sae-saena hen kwasangkwasangna, hen Eë molyë nihin dohon-honnak emsa kara tak. Aban de ënkam, zen dekam esa nihin jahalhakam gwë gwera.

³⁰ Sap aban de ënkam, Eë asa nihin dohon-honnak emsa mas gwe-gweblal. Hëndep em molye tangan sabak gwe-gweka, hwëna em dekam esa jahalhana eisbiri.”

12

Yesus kim Hari Sabat hap dena anakan gubiridakake, “Diki Eë an Zen tangan- Hari Sabat mo Nolaye.”

(Mrk. 2:23-28; Luk. 6:1-5)

¹ Hom holo gwe'ak aha Hari Sabatkam Yesus dekam zep zëre hon de ang ta gwen wenyä aban mae gamdum tra san golëtaman gwe'anka. Eë hwëna ama usak hap gandum danna insa kilk li-in kinï gwe'ak- desa de twenblandan hap.

² Hwëna Farisikam de gubirida gwen wenyä kim asa hla nulidak, dekam zep Yesussu nenblak, “Em san home ere hon de ang ta gwen wenyä insa hlaluda'ara? Zen in nëre mae mo titi tabin olsa ngip nu'in- kirekam de Hari Sabatnak syal gwibinkimye.”*

³ Yesus ki zep hwëna ding gulzimki, “Em bawalkam esa Alap mo ola an mo eini dam ulsul?- men kim Daud Bak zëre hon de ang ta gwen wenyä ban golëusak gwe'ankaye.

⁴ Zen kim Alap mo golak til zika, zen dekam Alap hap de roti loneblansa gol kinika. Desa zep

* **11:28 11:28** Ayatna 28 hëndep 30nak ansa Yesus “nihin”kim enlala gweblaka, zen zi mo kareksa hom enlala gwibirki. Kirekam maka nihinsi de wë tankam li nul sonek. Hwëna Yesus mensa nihinkim enlala gweblaka, tahalha, sang-sang, ahaksa hen Farisi zi mo tawa tabin donhon-honsa ki kirekam enlala gwibirki. * **12:2 12:2** Hwëna Musa sap hom jalse gwibiridaka- gandum dansa de kilk ti-in kinin hapye. Zen diki anakare enkam jalse gwibiridaka, “Ere mo gandum tranak bahem Hari Sabatkam syal ta gwen.” (Ul. 23:25)

zère hon de ang ta gwen wenyä ban zitwinbir song gweka. Hwëna sap nëno mae mo titi tabin olak man lwak: Sap Daud zëna hen zëbon de ang ta gwen wenyä, zen bëjen Alap hap de rotina insa twinbin. Zen diki Alap mo golak de syal ta gwen zi en dwin gwibirin. Sap eiwa kirekam, hwëna Daud hom Alap mo nwenak karek gweka- zen kim usak hap zitwinbirkiye. Zep hen kirekam, Abon de ang ta gwen wenyä an kim usak hap kilk di-in kinzil, zen hom ëkarek gwer.

⁵ Hen em bawalkam esa Musa mo titi tabin ola an mo eini dam ulsul? Tingare Hari Sabat jamkam Alap mo golak de syal tan zini Bian mo golak sap de syal ta gwen. Zen dekam man Hari Sabat hap de ol jalse gwenna insa syal gwenkam nulmun gwenan, hwëna dekam Alap bëjen desa husus gwibiridan, sap zen dekam zère mo golak de syalsa kim su nul sone gwenan.

⁶ Zen in zebë emsa gubirida'an: Sap sa Abon de ang ta gwen wenyä an hen kirekam Hari Sabat hap dena nulmun gwer, sap Èe an Zen, bol zaun tangan Zini. Sap Alap mo gola in Abon onakon man lwala he'an.

⁷ Sap Alap mo olak man lwak,

‘Èe a kirekam de lowehe gwen habë mo emsa dwam gwibirida'anye: Bol-zaun tanganna, aha zi mo karek-kareksa em kwasang tola ban eititi gwe-gwibin. Ere mae mo karek-karek hap de otweransa abe hap tru tasik gweblanna, zen bol-zaun tangan naka hom.’*

Eme kirekam de Alap mo ola insa dawemkam lik ei gwibi'inam, ki molye Abon de ang ta gwen wenyä ansa karek gon srëmnak jal eibiridananam.

⁸ Sap ngatan zi mo lang nakore Zi Tanganna, Èe an Zen tangan- Hari Sabat mo Nolaye. Zep anakarekam de klis gul gwizimdin hip dena, ‘Desa sap esa Hari Sabatnak syal

eibir,’ ahaksa, ‘Kirekam bahem,’ zen ano dena.”

Yesus kim zi taha sakna Hari Sabatkam dawem takake:

(Mrk. 3:1-6; Luk. 6:6-11)

⁹ Yesus kim dekon song gweka, dekam zep hwëna Yahudi mo aha but srëm golak tilki.

¹⁰ Hwëna zini zao gwe'anaka, ei-hya tahana mes sak gweblaka. Farisikam de zini men zen Yesus mo kareksa de hlaulblun hap ëalp gwe'ak, ki zep nenblak, “Em banakane Musa mo titi tabin ola dam gulsu'ura? Hari Sabatkam san ha zi sang-sangsa sap de dawem tabinkim? San ha bëjen?”

¹¹ Yesus ki zep ding gulzimki, “Eno mae mo domba zaho de ahanik Hari Sabatkam kama dwraknak dum gwe he'anam, san ha em molye dekam ër ane'anam?”

¹² Hwëna zini nen Alap mo nwenak domba naban apdenak hom. Zep nen sap esa zi sang-sangna Hari Sabatkam dawem la gwibir.”

¹³ Ki zep hwëna Yesus zi taha sakna insa gubluka, “Tahana insa emki inin gilsin.” Ki zep hëndep inin gilsiki, dekam zep hëndep dawem gweblak- men kiye, ei-hya tahana.

¹⁴ Farisikam de zini in dekam zep but srëm gola in kon wet so gwék, hwëna dekam zep Yesusu de tan hap ola aha-en nu'ik.

Mae hap de ol: Yesus Zen Alap zère mo Dam Tasinni- men kirekam Yesaya Bak hamal hap ale gulblukake.

¹⁵ Yesus kim Farisikam de zini insa anakan tame tabirki, “Zen Asa de tan hap olsa aha-en nu'in,” dekam zep kon song gweka. Hwëna zini beya tangan nik ang nëblak. Zi sang-sangna hen man ang nëblak, dekam zep zë kitak dawem tabirki.

¹⁶ Hwëna man zë jalse gwibiridaka, “Bahem aha maesa anakan gubiridan, ‘Asa Yesus dawem taka.’ ”

* 12:7 12:7 Hos. 6:6

17 Zen dekam zep zauk- Alap mo ola mensa Yesaya Bak orep Yesus hup dena anakan ayang gulkuye,

18 "An Zen tangan-
ëre mo dam tasin Zini hen zer sonen
Zi niye,

ëre mo dang tîninak de tanganna.

Ëe ama tangan sam gwesik gweblanan.

Ëre mo Enhona zëbe hap asa kitak hlë ta soneblal.

Zen Zen sa tingare zi ausu hap anakan ayang gul gwizimdi,
'Alap dam-dam enkam sa tîngan klis gulu.'

19 Zen molya darak ola gu gweka, hen ol al hap ola molya zëno ëk tîhi nakon te so gwek.

Hen ora bol san molya ol mam-mamkam ton nasen gweka.

20 Zen enlala sae-sae enna, zep Zen molya aptyo sin-sin makare wenyä zalta dep gweibirida kinika.

Hen men zëno mae mo sosonna tap gwen hap golek de gwe'an, desa molya da tasik gwibirki.

Zen kirekam sa kara ta gwibiri, hëndep Zen sa ano irik ginnî oka-manak golhatala.

21 Tingare irik gin langnak de zi ausuna
ëngaya gwen hap dena Zëbon en onak sa ëblol gwe-gwer."*

Farisikam de gubirida gwen zini kim Yesussu nenblakke, "Zen dowal mo kigi mo sosonkam syal gwe-gwe'ara."

(Mrk. 3:20-30; Luk. 11:14-23; 12:10; Luk. 6:43-45)

22 Zao kim lwa se'ak, ki zep zini Yesus onak dep dowal mo bi gweblan zi ol srëmna nërhatzak. Nwena hen man dimin nëblak. Yesus kim dawem taka, dekam zep ola tonka hen nwena kara gweka.

23 Tingare zini man tangan deng-gwanblak. Zep ëgu gwe'ak, "An san ha Zen?- Daud Bak mo Auyantane naye, mensa anakan nen guk gweblakye, 'Sa hatala.' "

24 Hwëna Farisikam de zini kim kirekam nasalbiridak, ki zep ding nulzimk, "Kirekam hom. Zëbe hap mes dowal mo kigi sosonna gol-blaka- dekam de aha dowal-dowalsa golëalsa sone gwen hap denaye."

25 Hwëna Yesus man zëno mae mo enlalana insa tame tazimki, zep gubiridaka, "Aha-ere irik gin nik de hlik-hlik gwe'anam, zën de ëeija'anam, zen molya ëtatete gwe'anam. Nabakam maka zënaka timbwas nu'in. Hen zënaka de gil-gil gwibiridan nakon de aha-ere golak dinik hliwe'anam, zen maka hëndep sekwak gwe'an.

26 Zep hen kirekam- dowal mo kigi mo irik gin niye: Aha hlikna bëjen aha hlik naka golëalsa sonen. Zep man dam gwesinin: Dowal mo kigi bëjen abe hap sosonna golblan-dekam de zëre mo irik ginnik de wenyäka karek tabin hipye. Ki hwëna zëno irik ginnî in de hlik-hlik gwenkam, bëjen tatete gwen, hwëna nabakam sa timbwas gwer.

27 Zep em insa Asa anakan en-blal, 'Zen dowal mo kigi sosonna golblaka, dekam zep dowal-dowala golëalsa sone gwe'ara,' ki hwëna em ema dekam ere mae mo aha hlikna enbirida'an, 'Zen hen dowal mo sosonkam syal ta'an.' Sap zen hen man nakasik gwibirin- dekam de dowal-dowalsa golëalsa sone gwibin hipye. Zep ere mae mo ahakorena in maka emsa anakan nenbirida'an, 'Em ema ëkarek gwer- kirekam de Yesussu tonblankamye.'

28 Hwëna Ëe Alap mo Enho mo sosonkamë dowal-dowala golëalsa sone gwenan. Zen dekon zep anakan dam gwesin, 'Alap Zën de irik gilzin hap angkam man sap kon gwisibir hana'ara, hwëna em ema desan de ang tan hap baes ta'an!'

29 Sap Ëe dowal mo kigi mo bi gwibin kire-kire dawemsaë jal zi mo kim alal ta gwebla'an. Zi jal-jal de zëre mo golsa kara ta'anam, zëbe hap de jal zini na-en molya

* 12:21 12:21 Yes. 42:1-4

tî'in zanam. Diki zini insa de nonol balk tankam hen tahalenkam, dekam zëno kire-kirena maka alal tabla'ara.

³⁰ "Zini men zen Abon onakon srën gwë hanna, zen ki Asa husus gwebla'ara. Hen zini men zen Asa mas gweblan srëmna, zen ki ano syalsa dri yu'ura.

³¹ Zen in zebë emsa gubirida'an: Tingare nwe-masekam de karek-karekna mensa zini em ulin halasen gwenan- hen sap Alapsa de lamang tanna, desa maka Zëna tap gulsuk gwizim'ira. Hwëna zëre mo Enhosa de lamang tankam, desa molya tangan tap gulsuzimki.

³² Hen ngatan zi mo lang nakore Zi Tanganna Asa de ol lamangkam gublunkam, desa maka Alap tap gulsuk gwizim'ira. Hwëna Alap mo Enhosa de lamang tankam, desa Alap molya tangan tap gulsuzimki- sap angkam de okamanak awe, hen sap lamkam de okama ësenak.

³³ "Nen tenya tën nakone tame ul gwenan. Tenya men zëno dan naka zini dwinbir srëm gwe-gwenan, zen bëjen twin gwibin tetan dankam tën. Tenya zen zëre mo dan enkam ëtë gwenan.

³⁴ Zep Farisikam de zini, em hen kirekam. Em in jal-jal tanganna-wanyana kiye! Zep eno mae mo ol toranna banakan dep?- dawem gwen naye. Men zen eno mae mo ëk tihî nakon wet so gwenan, zen zen eno mae mo enhonak suwek.

³⁵ Enho dawem-dawem wenya, zëno mae mo ëk tihî nakon dawem en nik wet so gwizimnin, sap zëno mae mo enhona mes dawem enlala enkam suweka. Hwëna enlala jal-jal wenya, zëno mae mo ëk tihî nakon karek en nik zep wet so gwizimnin, sap zëno mae mo enhona mes jal-jal enlala enkam suweka.

³⁶ Zep emki ëenlala gwen: Aumwa hap de yakla yawalak de Alap zisi klis gunnuk, tingare zini zen zëre mae mo ol toran nakon sa Alap klis gulu- sap zëno mae mo aha zisi de

tonsubirida gwen ol maena hëndep kitak.

³⁷ Sap dekam ere mae mo ol toran nakon sa Alap anakan klis gul gwera, 'Zini an karekna,' ahaksa, 'An airis.' "

Yesussu kim owassa de syal gwibir-zimdin hip abe dakke:

(Mrk. 8:11-12; Luk. 11:29-32)

³⁸ Zao kim lwa se'ak, dekam zep Musa mo olsa de tawa ta gwibin hip de zi niban Farisikam de zi niban Yesussu abe dak, "Bian guru, emki abe mae hap owassa syal gwibir-zimdin- ëe akakim emsa anakan dam lasik, 'An eiwa Alap zer soneka.' "

³⁹ Hwëna Yesus ki zep ding gulzimki, "Em angkam de zini eiwa jal-jal tanganna, hen Alapsa mese hli lak, hwëna Asae aberbe la gwe'an-owassa de ebe mae hap syal gwibir-zimdin hipye! Èe angkam aha-en mae molyë owasna ep syal gwibir-zimk. Hwëna ngein sin de yaklanak Èe asa owasna aha-en tangan ep syal gwibir-zim- men kirekam Alap mo ol ayang gul gwen zini Yunus Bak hon lwakke.

⁴⁰ Men kirekam Yunus Bak hogwe yawal ungala mwanak yaklana dan-ahan gwëka, zen kirekam sa ngatan zi mo lang nakore Zi Tanganna Abon lwal. Èe hwëna kama mwanak asa yaklana dan-ahan gwëon.

⁴¹ Alap de angkam de zini emsa klis gunnuk, dekam Niniwek de zi mo angna sa olsa de mas gun hup ëzaul. Zen dekam sa emsa anakan swrë dabir, 'Yunus Bak kim ëhalen hap de ola ban golhata zaka, ëe dekam ama ëhalek. Hwëna ebon mae onak kim ngatan zi mo lang nakore Zi Tanganna ëhalen hap de ola ban golhata zaka, em hwëna ema ëhalen hap baes ta gwëk.'

⁴² Hen kirekam, Alap de emsa klis gunnuk, selatan kore teipsinkim de wenya in, zen sa hen olsa de mas gun hup zaul- men zen orep teipsin zini Salomo Baksa duwebla zakke. Zen dekam sa anakan emsa swrë tabir, 'Èe ama langa en nakon

Salomo mo enlala blala kore olsa de sane gwen hap hatak. Hwëna ebon mae onak kim ngatan zi mo lang nakore Zi Tanganna hataka, em hwëna ema asalsik gweblak.' "

Mae hap de ol: Bera! Aha-ere dowal de totoresa wet sonkam, zen hwëna beyakam etan bitì gwe-gwenanzal.

(Luk. 11:24-26)

⁴³ "Dowal de totoresa zi nikon wet sonna, dekam gwana-gwana san sa hakalada gwera- zao de aha zi maenak tin hip. Hwëna aha maenak de tin srëmkam,

⁴⁴ dekam sa dowala in enlala gwera, 'Èe asa etan ère mo gol hli tan san dep lwahal.' Kim de lwa ha'an zaka, gola insa anakan sa hla ta zala, 'Dan en tangan nik zau'ura. Gol bina in mes tangan oto tasikì hen ngan tasikì.'

⁴⁵ Dekam sa dowala in song gwera- aha dowalsa de zëre onakon de jal-jal taman kinin tangan naka tuju enkam kwang guluda halzan hap. Deban kim de zini iwe golëbiti gwe'an zaka, zini in mo gwëna dekam sa tangan karek gweblal-nonol gwën nakonye. Zen hen kirekam zep angkam de zini eno mae mo jal-jala lwa gwe'an!"

Yesussu kim an zem oso wal zeban zitëblakke:

(Mrk. 3:31-35; Luk. 8:19-21)

⁴⁶ Yesus kim nama zi trana in han golëton'anka, an zem dekam zep oso wal zeban golëyaing gwezak. Zen è nakon èzau'uk. Man kon olsa de zertoran hap nësbla'ak.

⁴⁷ In deban mae golëton'anka ahanik zep gubluka, "Bian, emsa man eno anena oso wal oban è nakon ziësbla'anon- olsa de emsa zertoran hap."

⁴⁸ Yesus ki zep ding gulbluka, "Hwëna nonol Èe anik emsa gubiridak- ano anena hen oso-walya, zen diki a kirekam de zisi moye:"

⁴⁹ Hwëna ki zep tahakam zëre hon de ang ta gwen wenya asa zi beyana in han golëtrëka, deban guku, "Diki

an zen lowe he'an, zen zen- ano anena hen oso walyaye!

⁵⁰ Sap tingan men zen ano ngatan zi mo langnak de Bian mo dwam gwibin sin ang ta gwenan, zen diki zen tangan- ano anena, oso walya hen somol walyaye."

13

Yesus kim gandum dan hling gilsinkim ola gulk sun blaonzimkike: (Mrk. 4:1-9; Luk. 8:4-8)

¹ Yaklana inkam Yesus ki zep gola kon asa golëwet so gweka, ho gutu alpna zep nikin aneka.

² Zao zep hwëna zi beyam-byana tagal nëblazak, hëndep man zë dot dasizik. Dekam zep buluk sewe seka- dekon de nikirinkim tawa tabin hip. Zi trana in hwëna ho alp san ki èzaundak.

³ Zao zep Yesus gulk sun de ol blaon gwizimdinkim tawa ta gwibi'inka. Nonol man zë gubiridak, "Zini man orep gandum dansa de hling gilsin hip song gweka.

⁴ Kim hling gilsiki, hwëna ahakon oranak altink. Mawana ki zep zë yaing gwezak, zen zep hwëna gandum danna insa dwensiblindak.

⁵ Ahakon kaso-kasonak altink-kama bëbeknak. Gandum danna in nabakam zep sap èsip gwek, sap kamana in bëbek tanganna.

⁶ Hwëna yaklana kim sal-sal gweka, sipni in dekam zep èboneng gwek, hëndep èsasan gwek, ki zep tol hëndep juwek. Sap sana ba san dep?- olk san de èhas gwesin niye.

⁷ Hen ahakon dokot të ngi-ngi ausunak altink. Kim sap tol èsaltik, hwëna dokot të ngi-ngina in zep nabakam èblal-blal gwek. Zen zep dahalebik, hëndep eini hom tèka.

⁸ Hwëna ahakon kama dawemnak altink. Zen en dawemkam zep èsip gwek, hëndep dawemkam zep hataka, hëndep dawemkam tèka. Aha-ere timni zëno dan beyana ahakon 30 enkam, 60 enkam, hen ahakon 100 enkam."

⁹ Ola insa kim tonsuku, ki zep gubiridaka, “Em dwan i nibanke. Em esal gwen!”

Yesussu kim anakan dak-ensiblikke, “Em ba habe ola gulk sun blaon gwizimnira?”

(Mrk. 4:10-12; Luk. 8:9-10)

¹⁰ Ee zere hon de ang ta gwen wenyu ki zebë e-erenak lakensiblik, “Bian, em ba habe kirekam zi beya hap gulk sun ola blaon gwizimnira?”

¹¹ Ki zep ap ding gulzimki, “Abon de ang ta gwen wenyu ebe mae hap Alap mes golzimki- em dikim zere mo irik gin hip denaka tame gul gwen hap denaye. Hwëna aha zi hip hom kirekam golzim'ira.

¹² Sap men zen Alap mo irik gin nika de tame gun hup ehohle gwe'an, zëbe mae en hap sa etan Alap dekam de tame gun hup de enlala blala sowe henkam ing ta sone gwizimdi. Hwëna men zen ehohle gwe srëm gwe'an, zëbon mae men zen sap tame gun hup de enlalana betek enkam lwazim'ira, desa sa hwëna Alap al tazimdi.

¹³ Zen in zebë zi beyam-bya naban de golëtorankam ola gulk sun blaon gwizimnin, sap ‘zen nwekam ki sap hla nul gwenan, hwëna man egwë gwenan- san de hlaun srëmna.

Hen zen sap man esane gwe-gwenan,

hwëna san de esane gwen srëmna hen tame gun srëmna.’*

¹⁴ Zen in zep Alap mo olsa de ayang gul gwen zini Yesaya Bak orep ola anakan ayang gulzimki,

‘Alap man guku, “Zen sap sa esane gwe tine gwer,

hwëna molya tame nul gwek.

Hen sap sa karatda nul tine gwer,

hwëna anakan molya dam nulsuk gwek, ‘Kirekam sa lwal.’

¹⁵ Sap zëno mae mo enlalana mes tangan joblo-top gweka.

Zere mae mo ini mes tangan mat dasibik.

Nwena hen mes dïmin dabik.

Zen mae hap ki egwëk:

Dekam de nwekam hlaul gwen srëm hap,

ikim de esal gwen srëm hap,

hen enlalakam de tame gul gwen srëm hap,

Abon osan dikim etan lwanda halzan srëm hap.

Diki zen de etan Abon osan dep lwanda ha'an zanam, ki Ee amaka ngaya tabi'in.” ’ ’*’

¹⁶ Yesus ki zep etan abe mae en hap ayang gulzimki, “Em an isrip-sri gwibinnike lowe he'an. Sap emsa ama golëtë gwenan, zebe nwekam dawemkam hla kul gwenan hen ikim esane gwe-gwenan.

¹⁷ Emki sap eenlala gwen: Abare srëmna Alap mo olsa de ayang gul gwizimdin hip de zini hen Alapsa de betek gwe-gweblan zini beya nik sap hlaun hup sërkam edwam gwe-gwek- ano owas syal gwe-gwibinni ansa em angkam hlakul gwe'anye. Hwëna orep de zi dawem-dawemna in zen hom tangan hla nuk. Esane gwen hap hen sërkam sap edwam gwe-gwek- em ansa angkam esane gwe-gwe'anye. Hwëna zen hom mae esane gwek.”

Yesus kim gandum dan hling gilsin hip de ola insa srip gulsuz-inkike:

(Mrk. 4:13-20; Luk. 8:11-15)

¹⁸ Yesus ki zep etan asa gubiridaka, “Emki esane gwen: Angkam ama ebe mae hap gandum dan hling gilsinkim de ol blaonzimdin in sa srip gulsuzim'in.

¹⁹ Oranak de gandum dan altirinni, zen zini men zen sap Alap Zen de irik gin hip de ola esane gwe-gwenan, hwëna ola in mo eini hom tame nul gwenan. Dowal mo kigina dekam zep hata gwenan zala, insa esane gwenna, desa de zëno mae mo enhonak al gul gwizimdin hip.

²⁰ Men zen kaso-kasonak altirinni, zen ahakon men zen Alap mo

* 13:13 13:13 Yes. 6:9 * 13:15 13:15 Yes. 6:9-10

ola insa ësane gwe-gwenan. Zen nabakam zep sap enlala isrip-sri naban nulin gwenan.

²¹ Hwëna ola in bëjen zëno mae mo enhonak sa gwen, zep bëjen zë holokam lwan. Zen kim de karek maena hla nu'ik, ahaksa ol dawemna in hap de jal hap karek dabi'ik, zen hëndep dekam sa Alapsa hli dal.

²² Men zen dokot të ngi-ngi ausunak altirinni, zen zini men zen sap Alap mo ola insa ësane gwe-gwenan, hwëna angkam de okamanak awe de anakare enlala naban siri nul gwenan, 'Èe babë tahalhakam gwë gwen,' hen anakan de hole-hle gwe-gwen naban, 'Diki teala beya naban amaka gwë gwe'an.' Kirekam de enlalana in zep Alap onakare ol dawemna insa zëno mae mo enhonak hule gwenan. Zep hëndep dawemkam eini ëtë srëm gwe-gwenan.

²³ Hen men zen kama dawemnak altirinni, zen zini men zen Alap mo ola insa ësane gwe-gwenkam dawemkam lik nei gwibirin. Zen zen zep eini dawemkam ëtë gwenan. Zëno ei beyana, ahakon 30 enkam, 60 enkam, hen ahakon 100 enkam." *

Yesus kim ola gulk sun blaonzimkike- gandum nuban de endang naban aha-erenak nasaltin hip dena.

²⁴ Yesus in kim nama bulu kon tawa tabi'inka, zao zep etan zi beyam-byana in hap ola gulk sun blaonzimki, "Alap mo irik gin hip dena, zen san de zi de nganak gandum dan dawem-dawemsa hling gilsinni kiye.

²⁵ Hwëna zëno kam, tingare zi mo truwe guk hannak, dekam zep hwëna nganak iwe jal zi sowëkam endang dansa etan hling nilsik.

* **13:23 13:23** Yesus kim dansa de tèn hap dena ol aisilik awe gubiridaka, zen ei gwen, ahaksa Alapsa de taibliBlan en hap hom enlala gwibirki. Dansa de tèn mo dam gulsunnu, zen hen Alap mo ol san de dam-dam enkam lowehe gwen hap. (Mat. 5-7) Ahaksa nëno mae mo ol toran de Alap mo nwenak sam gwesik gwen hap. (Mat. 12:31-37) Ahana hen, zisi de halen ta gwibin hip. (Yoh. 15:16) Kirekam de lowe henna, zen zen Alap mo nwenak nwe-mase gwe-gwenan- san de dansa de tenna kiye.

²⁶ Gandum danna in kim ësip gwe'ak, hëndep ëeis gwe'ak, endang sipni in dekam zep hen ëblal-blal gweka.

²⁷ Zao zep hwëna nga bina in hon de syal ta gwen zini dakensiblizak, 'Bian, em dwan gandum dan dawem-dawem ensa em-am ap kap tazimki- nganak iwe de hling gilsin hipye. An hwëna ba hap zë endangna hataka?'

²⁸ "Nga bina in ki zep ding gulzimki, 'In jal zi zë sowëkam hling gilsik gik halka.'

"Hwëna ki zep etan dakensiblik, 'Bian, ëe wëhë endangna insa lamalsi'ik?'

²⁹ "Hwëna man ding gulzimki, 'Bëjen em tamalsin, ki hwëna gandumnu in han esa apdenak lamalsil.

³⁰ Sap sa endangna in han apdenak ësaltil- hëndep gamdumnu insa de taran hap denak de zau'uk. Èe asa taran hap de zini insa gubiridal, "Nonol endangna insa blom lasik, desa tagal tan naka tatak-tatak labik, desa de syauknuk tru tasin hip. Ki hwëna gandum danna insa gamdum dan kang ta gwen golak tagal lasibik." ' ' "

Gulk sun de ol blaonzimdinni an mae hap: Alap mo irik ginni, zen rica dan makan, hen ragi makan:

(Mrk. 4:30-32; Luk. 13:18-21)

³¹ Yesus ki zep etan zi beyam-byana in hap ola gulk sun blaonzimki, "Alap mo irik ginni an kirekamë ola ebe mae hap blaonzim'in: Zini man rica dansa nganak eiyas taka.

³² Rica danna in tingare tetan dan nakon, zen zen- betek tangan wenyaye. Hwëna kim ësaltil gwenan, dekam zep tingare obwaga nakon ëblal-blal gwe-gwenan,

hëndep te makan ëmam-mam gwe-gwenan. Mawana zao zep yaing gwe-gwenanzal- zëno hli-hlinak de golsa tauk gweblan hapye.”

³³ Ki zep hen etan ahana mas gulzimki, “Alap mo irik ginni, zen a kirekam moye: Zen ragi makan. Wenya man tepungna aha-ere sak naka mang-mang guk. Zao zep ragisa betekkam mas guk. Ragina in sap betek tanganna, hwëna dekam zep rotina in dawemkam hop gwëk.”

Yesus mae hap gulk sun de ol blaonzimdinkim tawa ta gwibirki:
(Mrk. 4:33-34)

³⁴ Yesus kirekam-kirekam gulk sun de ol blaonzimdinkim tawa tabirida gwëka. Zëno tawa tabinni hom- gulk sun de blaon gwizimdin srëmkamye.

³⁵ Kirekam kim tawa ta gwibirki, zen dekam zep zauk- men kirekam Alap mo ol ayang gul gwen zini Yesus hup de ola hamal hap anakan ale gulkuye,

“Ëe gulk sun de ol blaon gwizimdinkim asa aïsíl gwibirida gwer.

Hen mensa auhu-kamana ansa de yang gulsun nukon tawa neibir srëm gwëk,

zen dekam asa tawa ta gwibir.”*

Yesus kim gandum nuban endang naban de aha-erenak nasaltin hip dena insa srip gulsuzimkike:

³⁶ Yesus kim zi beyam-byana insa hli yuludaka, ki zep gol san song gwëka. Hwëna ëe zëre hon de ang ta gwen wenya ki zebë zë du këblazak, zao zebë lakensiblizak, “Bian, abe mae hap emki srip gulsuzimdin- insa gandum nuban de endang naban aha-erenak nasaltin hip dena ap gulk sun blaonzimdike.”

³⁷ Yesus ki zep ding gulzimki, “Gandum dan dawemna men Zen hling gilsiki, Zen Ëe an Zen- ngatan zi mo lang nakore Zi Tangan naye.

³⁸ Hwëna ngana, zen auhu-kama yawala an zenke. Gandum dan dawem-dawemna, zen zini men zen Alap mo irik ginnik bitì gwë'anke. Hwëna endangna, zen zini men zen dowal mo kigi hon bitì gwë'anke.

³⁹ Jal zini men zen endangna insa sowëkam eiyas ta gwenda, zen dowal mo kigi. Taran hap de za-unnu, zen Bian mo klis gun hup de yaklanak de zaun hup dena. Taran hap de zini, zen Alap mo dam taha nakore zi.

⁴⁰ “Zep in kirekam endangsa de tagal tan naka syauknuk tru ta senkam lwak, zen kirekam sa hen lwal- Bian mo klis gun hup de yaklanak de zaunkumye.

⁴¹ Dekam ngatan zi mo lang nakore Zi Tanganna Ëe asa ëre mo dam taha nakore zisi desa de tingan tagal gulsun hup gubiridal- men zen aha zisi karek san dep titi da gwibirin, hen men zen karekna syal nei gwibirinke.

⁴² Desa sa syauk bla hi-hitinnik yal nulser- men dekon zi mo angna yusyustin niban gona ta gwenanke, hen sang-sang hap ëkna ngalk-ngalk da gwibirinke.

⁴³ Hwëna zini men zen enlala dam-dam enkam lowehe gwenan, zen Alap mo irik gin kama ësenak sa zëre mae mo Bian hon lowehe gwer, hen zen zao sa yakla mo kim ëzil ane gwer. Em dwan i nibanke. Em ësal gwen!”

Dawem yawalsa de goltowen hap kim ola gulk sun blaonzimkike:

⁴⁴ “Alap mo irik ginnik de tin hip dena, zen a kirekam moye: Zini man song gwëka, zao zep aha zi mo kamanak emas yawalsa hlauku. Kama hulak lwa'ak, hen yawal tanganna. Zen zep hwëna kama hula insa ber-ber gulku. Zëna dekam zep isrip-sri naban zëre mo golak de kire-kirena kitak tangan te-ala hap lirak tabirki. Te-alana dekam zep

* 13:35 13:35 Mzm. 78:2

kamana insa golka- hēndep emas aning gunnu in han.

⁴⁵ “Alap mo irik ginnik de tin hip dena, zen hen a kirekam moye: Kire-kire beya zini man gwē gweka. Zen te-alakam kire-kirena lirak ta gwibirki. Hwēna mensa tangan dwam-dwam gwe-gwibirki, zen kaso lilingtin yawalsa.†

⁴⁶ Zen kim sērkam de dawem tangan wenyaka hlauku, zen dekam zep zēre mo golak de bi gwibin kire-kirena kitak te-ala hap lirak tabirki, dekam zep hwēna kaso lilingtin yala insa golka.”

Hogwesa de klis gun hup kim ola gulk sun blaanzimkike:

⁴⁷ “Alap Zēn de irik gin hip dena, zen hen a kirekam moye: Zini man hinak jaringkim kirekam-kirekam nwe-mase hogwesa dahyok.

⁴⁸ Hēndep kim jaringni in suwek, dekam zep zini in ho alp san dep il nilhak. Zao zep hwēna teinikirinkim hogwena insa hli nik-dan nabare hogwena srēn, ei hogwena srēn. Dawem-dawemna, zen honnak bitī dak. Karek-karekna, desa man yal dak.

⁴⁹ Zen kirekam sa hen lwal- Alap mo yakla yawalak de zaunkumye. Zēre mo dam taha nakore zini dekam sa hen yaing gwezal- dekam de dawem gol gwen zi nikon karek-karek gol gwen zisi hlil irin hipye.

⁵⁰ Zen dekam sa karek-karek gol gwen wenyā insa kals yalak de syauk blanak yal nulser- men dekon zi mo angna yusyustin niban gona ta gwenanke, hen sang-sang hap ekna ngalk-ngalk da gwibirinke.”

⁵¹ Ki zep hwēna asa takensibiridaka, “Em san mese kitak dam ulsul?- ola insa gulk sun blaon gwizim sinye.”

Ēe dekam zebē ding ulblik, “Ēe mesē, Bian.”

⁵² Ki zep hwēna etan asa gubiridaka, “Zep Alap mo olsa de tawa tabin hip de zi dawemna, zen diki

zen Alap mo irik gin hip de epba ola ban hen ano ol ēsena an han tame son. Zēno tawa tabinni dekam sa lwa gwer- san de gol bi nik de gola kon zēre mo kire-kiresa aha zi hip golētrei gwizimdinni kiye, epba ērlwa gwen wenyā ban, ēse kap tan wenyā ban.”

Yesussu kim Nazaret kon baes nēblakke:

(Mrk. 6:1-6; Luk. 4:16-30)

⁵³ Yesus kim kirekam de gulk sun ol blaon gwizimdinkim hya gwe-sibiridaka, dekam zep kon dua-blaskam de zini asa en golēlwanda halka-

⁵⁴ zēre mo ēna Nazaret san dep. Zēwe but srēm golak zep tawa tabi'inka. Zini men zen zē sane da'ak, man tangan denggwānbla'ak. Zep zē hwēna donsublu'ak, “Zini an endawe sekola gweka?- zep kil gī'ira, ‘Ēe asa tawa tabir.’ Hen owas-owassa de syal gwe-gwibin hip de sosonna endawe sa gul iri?

⁵⁵ Zen dwan gol syal gwe-gweblan zini Yusup Swe mo tane sake! An zem Maria. Oso wal zem, zen Yakobus, Yusup, Simon, hen Yudas. Zen kitak awe de zi sike!

⁵⁶ Somol wal zem awe am hen tingan lowehe gwe'an. Zep zini an ba hap kil gī'ira?- ‘Ēe asa Nazaretsa tawa ta gwibir.’ ”

⁵⁷ Sap zen mes kirekam tame dak, zep baes nēblak.

Ki zep hwēna gubiridaka, “Zini kirekam ēgwē gwenan: Men-kore men-kore ē nakon, Alap mo ol ayang gul gwen hap de zini man blikip neisibirida gwenan. Hwēna zēre mo iye, ahaksa zēre mo ē nakore nik de kirekam ayang gul gwizimdinkim, desa hom tangan blikip neisibirida gwenan.”

⁵⁸ Zen in zep Yesus zēwe owas-owasna beyakam syal gwibir-zim srēm gweka, sap zen hom daibliblak.

† 13:45 13:45 Kaso lilingtinni, desa “mutiara”kam Amber olkam li nul sone gwenan.

14

Baptis ta gwibin zini Yohanis kim dakke:

(Mrk. 6:14-29; Luk. 9:7-9)
(Ayat 1-12)

¹ Dekam Galilea mo langnak Herodes Bak teipsinkim irik gilki.

*Yesus kim lima ribukam de zi beyam-bya hap tembanena golz-
imkike:*

(Mrk. 6:30-44; Luk. 9:10-17; Yoh. 6:1-14)

²⁻⁴ Herodes Bak kim zere mo osona Pilipus mo wanya Herodiana Baksa al gulbluka, dekam zep baptis ta gwibin zini Yohanis damnak anakan jalse gweblaka, "Musa mo titi tabin ola kon, em sap diki bejen em oso uk mo wanya gon." Herodes dekam zep hwena Yohanissi de balk tan hap gubiridaka- tahalen naka de bwinak se tya irin hip.

⁵ Zen sap dekam de ze hendep tan hap dwam gwebla'anka, hwena zi beyam-byasa ze mae hap aaribirida'anka, "Zen sa hwena asa jal neblal." Sap dekam zi beyam-byana in man Yohanissi enlala ne gwebla'ak, "Zen eiwa Alap mo olsa de ayang gul gwizimdin hip de zi."

⁶ Hwena Herodes kim zenaka de jaha gweblan yaklanak tembane yawala zisyal gwibirki, Herodiana mo wenam seiwiri dekam zep ze Herodes mo nwenak zisyak- hen tingare zini men zen ze tagal gwek, zeno mae mo nwenak. Herodes zena man tangan sam gwesibirki,

⁷ zep wenam seiwiri in sa anakan gu-guk gwibi'inka, "Men desae ki ena abe gwibi'inka, zen desa asa ki hendep ebe hap golbir. Ngli naban kama naban mes asa nasalblanan."

⁸ Hwena an zem Herodiana mes hen wenam zem in sa hamal hap anakan gu-gubik, "Kire hap abe gwe." Zen in zep anakan ding gulbluk, "Ee baptis ta gwibin zini Yohanis mo nolakaë abe gwibi'ingkam de hendep ap piring niban lonebir anezan hap, dekam de ee

anakan taiblin hap, 'Eiwa mes tangan tili.' "

⁹ Herodes kim kirekam zeno abena salka, enlalana man tangan dowebla hanaka. Hwena zen mes ki kirekam zi beyam-bya mo inik etan-etankam gu-guk gwibi'inka, zep ki hendep ein gubiridaka- Yohanis mo nolsa de golbin hip, zere mo gugubinni in sa dikim sul sonen hap.

¹⁰ Dekam zep hendep zere mo jana nabare zini bwinak Yohanis mo nola nablonblin hanak.

¹¹ Desa zep hendep piring niban wenam seiwiri in hap nolbirzik. Wenam seiwiri in zep hwena an zikhip golbirhak.

¹² Yohanis zere hon de ang ta gwen wanya ki zep hwena tokna lo tasin hip nerhak. Lo tasin hyanak zep Yesus osan dep sek gwek- in zen ki ze lwak, desa de gublun hapye.

[1b] Hwena Herodes Bak kim otan Yesus mo owas syal gwe-gwibinni salka, [2] dekam zep zere mo taha tri so gweblan zini gubiridaka, "An baptis ta gwibin zini Yohanis Swe mes yap etan ngaya gweka. Zen hwena bosena Yesuskum li yul soneka. In zep zebon owas-owassa dikim syal gwe-gwibin hip de sosonna lwa'an."

*Yesus kim lima ribukam de zi beyam-bya hap tembanena golz-
imkike:*

(Mrk. 6:30-44; Luk. 9:10-17; Yoh. 6:1-14)

¹³ Yesus kim Yohanissi de tan ola in sa asa golësalka, dekam zep asa bulkum zi srëm lang san dep golësesek gweka- zao de ze-en asa golëlowehen hap. Hwena zi trana in kim kirekam nasalblak, dekam zep zere mae mo e-ena hli dandak- Yesussu dikim eik ora san hles tyablan hap.

¹⁴ Bulu kon kim asa golëatiti gwe'anka, dekam zebë zi beyam-byana in sa hla kulida kinik. Yesus hwena man tangan ze kwasang gwibiridaka. Sang-sang nabare wanya men zen ze lowe he'ak, dekam zep ze dawem tabirki.

15 Kim kam-en gwe'ak, dekam zebë enblak, "Bian, angkam man kam-en gwe'an, hen langna an tahalha tanganna. Diki dawemna zini an Emaka enbirida'an- zën de golek de ë-ëna an san te-alakam tembane hap ëhakan hap."

16 Hwëna man ap ding gulzimki, "Zen ba hap de tembane hap sek gwen hap? Amki em tembanena zëbe mae hap hen olzimk."

17 Ëe hwëna ama ding ulblik, "Kina ki zini an da-en! Nëno mae mo rotina aha-ere taha-tapkamke. Hen hogwena dan-dan en tolke. Molya sowehek."

18 Ki zep asa gubiridaka, "An san emki teisya halzan."

19 Ki zep hwëna zi beyam-byana insa gubiridaka- so trana iwe de teinikin niran hap. Zëna ki zep aha-ere taha-tapkam de rotina insa hogwe darena in han teisyaka, dekam zep ngli san de kara gwesen naban Alap hap dawemna golblaka. Ki zep hwëna rotina insa ahap tabirki, desa zep abe mae hap kap tazimki- ëe de hwëna zi beyam-byana in hap kae gwebla-zimdin hipye.

20 Kim dwenblandak, zen man tangan ëitri gwëk. Ki zebë hwëna dua-blaskam de wenya ëe tembane mosrona tagal lasik. Yuna dua-blas enkam zep ësuwek.

21 In zen dekam tembane tak, zëno beyana, zi ensa de äitbinkim, san ha lima ribu enkam mes yap- we wal walassa de äitbin srëmkamye.

Yesus kim weya tatek tahan san song gwe'an zakake:

(Mrk. 6:45-52; Yoh. 6:15-21)

22 Kimë tembane tasik, Yesus hëndep dekam zep dua-blaskam de wenya asa bulkum de Zënaka Galilea mo men eiha san dep ngeir gublun hap gubiridaka. Ëe kimë sek gwëk, ki zep hwëna zi beyam-byana insa gubiridaka- zen de hen sekwak gwen hapye.

23 Zi beyam-byana in kim hen sekwak gwe'ak, Yesus Zëna dekam

zep zë-en kwatap tek san hata seka- dekon de Alapsa gu soneblan hap. Hëndep zao zep zë-erenak kawesiblik.

24 Dekam ëe in zenë bulkum teingir gwe guk, mesë bulu ban ho gutu ngirinnik olzau'uk. Hwëna ho ngëpna man bulu insa karekkam golwale gwe song gwe'ak, sap asesena bulu in mo ngein nikon tai'inka.

25 Oho-bung gun nuban zep hwëna Yesus Zëna abon mae onak hata'an zaka- ho gutu tatek tahanna in san de song gwe zankam.

26 Hwëna ëe kimë hla la guk, ausa zebë ohlo gubluk- anakan de ëhërhen naban, "Hobwem dowala i!"

27 Hwëna nabakam zep asa gubirida kinzika, "Em ëesëwehen! Bahem äairin. Ëe an Ëe."

28 Petrus zep hwëna ding gulbluka, "Bian, sap Em eiwa Yesus, ki asa em gublu irin- ëe de emsa duweblazan hap, ho tatek tahan san de hen song gwe zankam."

29 Yesus ki zep ding gulbluka, "Haen. Emki song gwezan."

Petrus dekam zep bulu kon ati gwëka, ki zep hëndep Yesus osan dep ho gutu tahan san song gwe'anka.

30 Hwëna ho gutu yawala insa kim asesena mamkam ngëp-ngëp ta'anka, desa kim hlaulku, dekam zep zë äirin hip keing gwe'anka. Dekon zep Yesusu hërheblaka, "Bian, asa Em गया tan!"

31 Yesus hëndep dekam zep tahakam zer aneka, ki zep zë gubluka, "Eno eini mam naka hom. Em ba habe Asa taiblibla srëm gwera?"

32 Buluk kim zersewe seka, dekam zep hëndep asesena in sëwe heka.

33 Ëe dekam zebë zë boklena kom lablak, hen anakanë enblak, "Bian, Em an eiwa tangan Alap mo Tane."

Yesus kim zi sang-sang beyam-byana Genesaret dawem tabirkike:
(Mrk. 6:53-56)

³⁴ Ho gutu men eihyanak kimë yaïng gwëk, ëna Genesaret zep bulu insa lei kuk.

³⁵ Zëwe de zini kim anakan hla dak, "An Yesus am hatanda," dekam zep Yesus mo hatan ola insa nol hal-adak-tingare ëna in mo golek de ë-ë san dep. Dekam zep tingare zi sang-sangna Yesus onak dep nolëyaïng gwe-gwe'anzak.

³⁶ Zao zep abe da gwe'ak, "Bian, zi sang-sangna an wëhë baju top en mae nakon Emsa olk ta'anka?-dekakim tol dawem gwëka." Tingan men zen olk da gwe'ak, zen dekam zep hëndep ëdawem gwe-gwe'ak. *

15

Mae hap de ol: Auyan-aza mo titi ta gwibin ola ban Alap mo ola ban man ilman në gwenan.

(Mrk. 7:1-13)

¹ Aha yaklakam Farisikam de gubirida gwen wenya Musa mo olsa de tawa ta gwibin wenya ban Yerusalem kon Yesus onak dep yaïng gwëzak. Zao zep dak-ensiblizak,

² "Ebon de ang ta gwen wenya ba hap nëno mae mo auyan-aza mo ëpba ola nulmun gwe'an?-tembane dëre ta gunnuk de nonol tahasa hokam hlë tazimdin srëmkam de tembane ta gwenkamye."

³ Ki zep ding gulzimki, "Ki em hen ba habe Alap mo ol tanganna ulmun gwe'an?-hwëna auyan-aza mo ëpba ol en sane ang ta gwe'an. *

⁴ Sap Alap man guku,

'Ane-biasa em blikip gwesik gwizimdin.'
Hen anakan mas gulku,

* **14:36 14:36** "Baju top," desa Matius "baju sihi" kam ale gulku, sap Yahudi zini sihilhi nabare baju ensa alala da gwëk. Emki pasal 23 mo ayat 5nak de olk kore alesana hen karatda gun. * **15:3**

15:3 "Alap mo ol tanganna" mensa Yesus awe enlala gwibirki, zen Musa mo titi tabin ol, sap Musa Bak desa Alap onakon gul inki. Hwëna Yahudi mo auyan-azana man etan dekon titi tabin ola mas-mas nul gwëk, hen Yesus man awe anakan tawa tabirki, "Ere mae mo auyan-aza mo titi tabin ol mas-mas gulzimdin in, ahakon man Alap mo nonol ol tanganna in kon ngip gu'un." * **15:4**

15:4 Kel. 20:12; Ul. 5:16; Kel. 21:17; Im. 20:9 * **15:9 15:9** Yes. 29:13

'Men nara an-bi zemka lamang sonna, zen hëndep tok hap em karek tan.'*

⁵ Hwëna em an ema anakan tawa la gwibirin, 'Ane-bia mo ol san sap esa ang ta srëm gwe-gwer- anakan mae de lwankamye: Ane-bia de tahalha ënnak, em sap esa anakan enbirida gwer, "Angkam ëe molyë emsa mas gwizimk, sap ano te-alana an lamkam de Alap hap kap tablan habë lam ta'an." '

⁶ Ebon mae onakon, kirekam de an-bi zemka blikip gwizimdin srëm zini man sam gwesi'ira. Zep ere mae mo auyan-aza mo ëpba tawa tabinni in, zen hwëna ebe mae hap lwazim'in-san de Alap mo ol. Hwëna dekam ema Alap mo ol tanganna insa hli ku'in.

⁷ Em an eiwa ëk enkame ëgu gwenan, 'Eë an Alapsa de betek gwëblanna.' Eiwa, Yesaya Bak mo ola man ebe mae hap dakastilzim'in-zen insa Alap mo ola anakan ayang gulkuye,

⁸ 'Zini in ëk enkam Asa betek në gwëblanan,

hwëna zëno mae mo enhona Abon onakon langa tangannak.

⁹ Zen waba hap Asa boklena kom da gwëblanan,

sap zen zi zëre mae mo titi tabin olkam tawa da gwibirin-san de ano olkam de tawa tabinni kiye.' " *"

Mae hap de ol: Zini an dekon Alap mo nwenak ëkun gwe-gwenan.

(Mrk. 7:14-23)

¹⁰ Hwëna ki zep Yesus zi trana tagal gwen hap gubiridaka. Kim tagal gwëk, zao zep gubiridaka, "Emki ësane gwen ekakim tame uk.

11 Mensa ëk tihî san zini ing nul gwenan, dekon hom Alap mo nwenak ëkun gwe-gwenan. Diki men zen zi mo ëk tihî nakon wet so gwenan, zen diki dekon Alap mo nwenak ëkun gwe-gwenan."

12 Ëe zëre hon de ang ta gwen wenyâ ki zebë hwëna hyanak lakensiblik, "Bian, em san home Farisikam de zini insa tame tabiri? Zen man eno ola insa husus neibirsin- em kim kirekam srip gulsuzim siraye."

13 Hwëna man ap ding gulzimki, "Tingare nganak de otanena, ngatan zi mo langnak de Bian de eiyas gin srëm wenyâ, zen kitak tamalsin en hap dena."

14 Farisikam de gubirida gwen wenyâ insa nwe enkam emki kara ta gwibin. Zen in nwe dimin nik tawa da gwibi'in- nwe dimin nik de nwe dimin bose zemka irik ta han makan. Zi nwe dimin de nwe dimin bose zemka irik ta hanna, zen apdekam sa ho dwrak san laman anera."

15 Petrus ki zep gubluka, "Bian, kun gwen hap de ola insa gulk sun blaonnara, emki abe mae hap srip gulsuzimdin."

16 Ki zep hwëna kitak asa gubiridaka, "Ki san em hen nama home tangan tame u'in?"

17 Em san home tame ul gwenan? Men desa ëk san olgwen gwibirin, zen hëndep ulpnuk hata gwenan. Hwëna ki zebe etan ukum ana gwibirin.

18 Hwëna men zen ëk tihî nakon wet so gwenan, zen enho nakon hatase gwenan. Zen diki dekon zini Alap mo nwenak ëkun gwe-gwenan.

19 Sap zen enho nakon anakare enlala karekna hatase gwenda:

Zisi de tan hap dena,
zi nibare nik de kahalo gwen hap dena,

hen seiwirik de kahalo gwen hap dena,

sowë hap dena,

boton olsa de gol hala seran hap dena,

hen ol lamang hap denaye.

20 Kirekam-kirekam enlala karekna in, zen diki dekon zini ëkun gwe-gwenan. Taha hlë tazimdin srëmkam de tembane gwen nakon hom."

Yesus kim Yahudi srëm we mo eini hlaulbirkike:

(Mrk. 7:24-30)

21 Yesus kim langna in kon asa golësek gweka, dekam zep ë darena Tirus hen Sidon mo langnak asa golëyaing gweka.

22 Dekam zep hwëna langna iwe de Yahudi srëm wenyâ Yesus onak dep hatazak. † Lure nakon zep anakan taken sone gwebla'ak, "Bian, Daud Bak mo Auyan-tane, asa Em kwasang gwibin. Ano wenam tola dowal bi gwibirki. Man tangan karek gul gwe'ara."

23 Hwëna Yesus hom mae zëno ola ding gul gwibi'inka. Ëe zëre hon de ang ta gwen wenyâ ki zebë enblak, "Bian, wenyâ insa em jalse gwibin-dekakim song gwek. Nëno mae mo lure nakon hwëna ena gwen da'an."

24 Yesus ki zep wenyâ insa hëndep aban mae ding gulzimki, "Asa Alap Israel zi en hap zer soneka, sap zen san de bi srëm domba zahona kiye."

25 Hwëna wenyâ in dekam tangan zep Yesus mo nwenak utuk gwehen naban boklena kom soblazak, dekon zep etan abe tak, "Bian, asa mas gwibir."

26 Hwëna man ding gulbirki, "Hom sam gwesi'in- walas zikhip de tembanesa de lwa hap yal tazimdin niye."

27 Wenyâ in ki zep hwëna ding gulbluk, "Bian, sap eiwa kirekam. Hwëna lwa bi nik mo meja nakon

† 15:22 15:22 Yunani olkam Matius anakan ale gulku, langna "Kanaan we" kam. Zëno dam gulsunnu- zi ausuna men zen orep Israel mo langnak lowehe gwekke. Israel kim nolëeija gwek, dekam zep ahakore Kanaan zini in ëna Tirus hen Sidon mo lang san dep ëheya-hya gwezak. Zep wenyâ in Yahudi srëm we.

de tembane lau altirinnī, desa hen ki am lwana dwenblanda gwenan.”

²⁸ Yesus dekam zep ding gulbirki, “Anyan, eiwa em ema tangan Asa taiblibla'ara. In kire habe dwam gwe'ara, sap sa kirekam hēndep angkam lwal.”

Dekam zep ki hēndep wenya in mo wenamna in dawem gwek.

Yesus kim zi sang-sang beyam-byana dawem tabirkike:

²⁹ Yesus dekon kim asa golēsek gweka, Ho Gutuna Galilea mo alp en san zep asa golētine gweka. Dekon zebē hwēna kwatap tek tolak yaing gwesek, zao zebē teinikin'ik.

³⁰ Hwēna ki zep zi beyam-byana zi sang-sangna Zēbon dep nolēyaing gwe-gwe'anzak- lek-lekna, nwe diminnī, taha-tana ēsak gwenna, hen ol srēm mae naka. Aha sang-sang nabarena hen beya tanganna. Zen zi sang-sangna insa Yesus mo dang gwēn nakon kang nul gwe'anzak. Zao zep Yesus dawem ta gwibi'inka.

³¹ Zi trana in man tangan ētengguan gwe'ak- anakan kim zē hla nulida gwe'akye, “Ol srēm wenya zen mes ola donbirin. Taha-tana ēsak gwen wenya, zen mes ēdawem gwenan. Lek-lek wenya zen man ētē nasen'an. Hen nwe dimin wenya, zen mes ēkara gwenan.” Dekam zep Israelsa de bi gwibin Zini Alapsa boltere da'ak.

Yesus kim empat ribukam de zi beyam-byana hap tembanena golz-inkike:

(Mrk. 8:1-10)

³² Yesus ki zep zēre hon de ang ta gwen wenya asa tagal gulsuku, zao zep asa gubiridaka, “Ēe ama zi trana ansa dawemkam kwasang gwibirida'an, sap zen mes danahare yaklakam awe Asa nērgwēk, hēndep angkam zēno mae mo tembanena mes tangan tap gwizimdi. Ēe homē ki dwam gwe'an- zen de usak naban sek gwen hapye. Ki zen

sa hwēna usak hap ora san ētīlsik song gwer.”

³³ Dekam hwēna ama lakensiblik, “Nen endawe esa tembanena kap lal?- kirekam de zi beyam-byana an hapye. Langna an dwan tahalha tangan nakake.”

³⁴ Ki zep hwēna asa takensibiri-daka, “Eno mae mo rotina banaka'en?”

Ki zebē ding ulblik, “Tuju enkam. Hogwe tane-nena hen ki tol.”

³⁵ Yesus ki zep zi beyam-byana insa teinikin niran hap gubiridaka.

³⁶ Ki zep tujukam de rotina insa kap taka- hogwe tane-nena in han, ki zep Alap hap dawemna gol-blaka. Dekam zep rotina insa ahap tabirki, hen hogwena insa kwakkwak tabirki. Desa zep dua-blaskam de zini abe mae hap etan-etankam kap ta gwizim'inka. Ēe dekam zebē zi beyam-byana in hap kae ēblazimk.

³⁷ Zi trana in kim dwenblandak, kitak man tangan ēitri gwek. Ēe dua-blaskam de wenya ama dekam tembane mosrona insa tagam lak. Yu yawal-yawala tuju enkam zep ēsuwek.

³⁸ In zen tembane tak, zi ensa de aītbinni, zēno beyana empat ribu enkam- we wal walassa de aītbin srēmkamye.

³⁹ Hyanak Yesus ki zep hwēna zi beyam-byana insa sekwak gwen hap gubiridaka. Zēna ki zep bulkum asa ho gutu men eiha san dep ngeirbiridaka- langna Magadan san dep.

16

Yesussu kim owassa de syal gwibir-zimdin hip abe dakke:

(Mrk. 8:11-13; Luk. 12:54-56; Mrk. 8:14-21)

¹ Dekam zep Farisikam de zi niban Sadukikam de zi niban Yesus onak dep yaing gwezak- zao de akasiblin hap. Ki zep zē nenblak, “Emki abe mae hap ngli nakore owassa syal gwibir-zimdin- ēe akakim emsa

anakan dam lasik, 'An eiwa Alap onakon hata zaka.' "

² Ki zep ding gulzimki, "Yaklana nikin anennak de kal-kal gwenkam, dekam anakane egu gwenan, 'Langna sa sasa gwer.'

³ Hen kirekam, kaknak de okawen kakaksa hla tankam, dekam ema dam ulsuk gwenan, 'Namen sa ona il tila.' O de il ti gwen hap dena hen sasa gwen hap dena, em desa en ema dam ulsuk gwenan, hwëna owas-owasna men kirekam angkam jowe gwe'an, desa home dam ulsuk gwe'an.

⁴ Em an eiwa angkam de zini jal-jal tanganna, hen Alapsa mese hli lak, in zebe Asa abe lal- ebe mae hap de owassa syal gwibir-zimdin hipye. Hwëna Èe molyë owasna ebe mae hap syal gwibir-zimk. Diki ngein sin de yaklanak asa aha-en syal gwibir-zim: Men kirekam Alap mo ol ayang gul gwen zini Yunus Bak hon lwakke, kirekam sa etan lwal."* Kirekam kim gubiridaka, zao zep hli yuludaka.

Yesus kim gubiridakake, "Dawem. Farisi hen Sadukikam de zi mo ragisa ema ulinnink."

(Mrk. 8:14-21)

⁵ Èe zëre hon de ang ta gwen wenya kimë hen men eihyanak yaing gwenak, èe ama hwëna rotisa de lop tanna èeititi gwëk.

⁶ Hwëna dekam zep asa gwibirida'anka, "Dawem. Terya-tyakam lowehék. Farisi hen Sadukikam de zi mo ragisa ema ing ulink."*

⁷ Hwëna èe kimë kirekam asal-blak, dekam zebë ënaka lon-birida'ak, "Ragi hap in mae hap ki nësa gubiridala: Rotina insa bitì laza srëm gwerke!"

⁸ Hwëna Yesus mes asa tawa gwibiridaka- èe insa ëton'akye, ki zep asa gubiridaka, "Em ba habe

roti bitì tazan srëm hap enaka lon-birida'an? Em an home eiwakam Asa laibli gwebla'an!

⁹ Em ba hap tangane dam ulsuk srëm gwer? Em san home enlala eibi'in?- limakam de rotina mensaë lima ribukam de zi hip ahap tabir-zimkye. Dekam mosrona mensa ena tagal lak, yuna banaka'en ësuwek?

¹⁰ Hen kirekam, men dekamë tujukam de rotina empat ribukam de zi hip ahap tabir-zimk, zëwe hen tembane mosrona yu yawal-yawala banaka'en ësuwek?

¹¹ Diki em emaka dam ulsul, 'Zen roti bitì tazan srëm hap hom ki nësa gubiridala.' Hwëna Èe mae habë ki emsa gubiridal, 'Dawem. Farisi hen Sadukikam de zi mo ragisa ema ing ulink.' "

¹² Dekam zebë anakan dam ulsuk, "Hare Zen ragi tangan hap hom am ki nësa gubiridala- mensa rotisa de syal gwibinnik mas ul gwenanke. Zen diki Farisi hen Sadukikam de zi mo tawa tabin karek san de ang ta gwen srëm hap am ki nësa gubiridala."

Petrus kim Yesussu anakan kira takake, "Em in Zen- Israelsa de ngaya tabin hip de Teipsin niye, Ngaya Zini Alap mo Tane."

(Mrk. 8:27-30; Luk. 9:18-21)

¹³ Yesus kim ë bosena Kaesarea-Pilipi golek denak asa golëyaing gwëka, zao zep asa takensibiridaka, "Zi mo dam tasinkim, ngatan zi mo lang nakore Zi Tanganna Èe an nara mo weinak debë hatazak?"

¹⁴ Èe ki zebë ding ulblik, "Ahakon man emsa nen gweblanan, 'In baptis ta gwibin zini Yohanis Swe tin nikon etan ngaya gwëka. In zen hwëna Yesuskum bosena li yul soneka.' Hen ahakon man emsa nen gweblanan, 'In Elia Bak mo weinak Alap mo olsa ayang gul gwizim'ira.' Hen ahakon man emsa nen gweblanan,

* **16:4 16:4** Mat. 12:39-40; Luk. 11:29-30 * **16:6 16:6** Yahudi zi mo gulk sun de ol blaon gwizimdinkim, zen ragisa anakan enlala nei gwibik, "Zen san de zi mo karek-karekna kiye." Sap ragina roti mang-mang gunnu man hop gul gwenan. Zep zen san de zi mo karek-karek de aha zi sin dep hlimin song gwe-gwenna kiye. Emki hlaun 1Kor. 5:6-8, hen Gal. 5:9nak.

'In Yermia Bak mo weinak dep dena.' Hen ahakon man emsa enlala nē gweblanan, 'Zen diki ahanik mo weinak dep jowe zaka- orep men zen Alap mo ola ayang nul gwekke.' "

15 Ki zep etan asa takensibiridaka, "Hwēna ere mae mo Asa de dam tasinkim, Ēe an diki nara mo weinak dep dena?"

16 Simon Bak, aha bosena Petrus, ki zep ding gulbluka, "Bian, Em in Zen- Israelsa de ngaya tabin hip de Teipsin niye, Ngaya Zini Alap mo Tane."

17 Dekam zep ding gulbluka, "Simon, Yohanis Bak mo tane, em isrip-sri gwibinnike gwē gwe'ara. Sap em in zi mo dam gulsun nukore naka home kirekam kira gwenda. Hwēna ngatan zi mo langnak de Bian Zēn ki emsa enlala soblala- kirekam de dam gulsun hupye.

18 Zep Ēe ama emsa gublu'an: Em in Petrus- kaso drak-drak makare zini. † Ebon onak sa ano jematna tatem ēzauk gwer- kaso yawalak de golsa tauk anen makan. Ano jematna in sap sa Juwen Zi Bak dri yulsun hup akabiri.

19 Ēe asa ebe hap Alap mo irik ginnik dep de kuncina zerblal. Em esa Bian Alap mo enlala san ngatan zi mo lang san dep de lilikinni okamanak de zi hip gulhlusuk gwizimdi hen talusuk gwizimdi."

20 Ki zep hwēna asa jalse gwibiridaka, "Asa insa kirekam dam lasinin, aha maesa hwēna bahem anakan gubiridan, 'In Zen tangan-Israelsa de ngaya tabin hip de Teipsin niye.' "

Yesus kim nonol tanganna Zēn de kareksa goltowen hap dena hamal hap gu-gubiridakake:

(Mrk. 8:31-9:1; Luk. 9:22-27)

21 Yakлана in dekam zep Yesus kon gwisibir hanaka- zēre hon de

ang ta gwen wenya asa de damnak anakan gubirida gwen naye, "Alap mo dwam gwibin sin de syal gwibin hip, Ēe asa Yerusalem san song gwer. Zao Yahudi mo nol-nola, Alap mo golak de mam-mamna, hen Musa mo olsa de tawa ta gwibin zini sa Asa sērkam karek da gwer. Zen sa hēndep Asa dal. Hwēna yakлана dan-ahan, ki sa Bian tīn nikon etan Asa ngaya tala." ‡

22 Petrus ki zep hwēna Yesusu gubluka ora nakon de asyal hehan hap, zao zep anakan jalse gwēbla'anka, "Em bap kirekam gulu! Diki Alap Zen langa gulsun- kirekam de Emsa gwēblan hap dena in saye. Bian, diki Ebon bap zen kirekam lwan."

23 Yesus hwēna ki zep Petrusu lero gwēblaka, zao zep gubluka, "Em in dowal mo kigi! Ki lun em gwēn! Em ba habe Asa trutru gulblu'ara? Eno kirekam de enlalana in, Alap mo dwam gwibin sin denaka hom. Zen auhu-kama zi mo dena."

24 Ki zep hwēna tūngare zēre hon de ang ta gwen wenya asa gubiridaka, "Men nara Abon de ang gwēgwen hap dwam gwēna, zen diki zēre mo gwēna zen eititi gwibindekam de zēre hap de te-lidak son wē son naban Asa zertronda gwen hapye, anakare enlala naban, 'Ēe sap asa Yesus hun apdenak lil.'

25 Sap men zen de zēre mae mo auhu-kamanak de gwēna anakan nolairi gwe'ak, 'Ēe babē Yesusu de ang gwe-gweblannak karekna goltowe gwen,' ki zēno mae mo gwēna in sa jek-jak gwer. Diki men zen de zēre mae mo gwēna Asa de ang gwe-gweblan hap sosok nul gwe'ak, hēndep zao mae de tīn hip, zen zen sa hēndep denaban ēngaya gwer.

† **16:18 16:18** Petrus mo aha bosena, zēno aukuna man golek de nē'an- Yunani olkam de ol-gunnu "petra" naban. Zēno enlalana "kaso. ‡ **16:21 16:21** Yesus Yahudi mo aītbinkim "yakлана dan-ahan" kam guku. Nēno mae mo aītbinkim, Zen "zēno ka'an" kam maka guku, ahaksa, "yakлана dan-dan" kam. Sap Yesus Jumatkam tilki, hwēna Minggukam zep ngaya gwēka.

26 San ha dawemna?- em de sërkam te-ala beya gwenkam hëndep kitak de okamana ansa bi gwibinkim, hwëna dekam de ere mo gwënsa tihis gin hip. Kirekam dawem naka hom! Tinkim san ha emaka Alap hap ba maesa golbla'ara?- dekam de etan ngaya gwen hapye. Kina ki bëjen.

27 Sap molya holo gwëk, ngatan zi mo lang nakore Zi Tanganna Èe dekam asa apdekam ère mo dam taha nakore zi niban Bian mo sosonna zigolhatazal. Zen diki dekam asa hwëna tingare zi hip aha-en aha-enkam klis gul gwizim-dekam de zère mae mo syal eisi golzimdin hip.

28 Èe eiwa denakaë emsa gubirida'an: Em an zene awe lowe he'an, em molye ahakon na-en juwek, ki esa ngatan zi mo lang nakore Zi Tanganna Asa hla lase gul- Èe kimë teipsinkim de irik ginkim kon gwesik hana'akye."

17

Yesus kim aha nwe-mase gwëkake:

(Mrk. 9:2-13; Luk. 9:28-36)

1 Yaklana kim enam enkam damank, Yesus dekam zep zère hon de ang ta gwen wenya Petrus, Yakobus, hen zëno osona Yohanis mae en han zë-en kwatap yawal san dep golësek gwëka.

2 Hwëna dan-ahare zini in mo nwenak zep timni liwe heblak. Zëno nwe-masena yakla ngatan mo kim ngatan gwëblaka. Pakeanna man tangan sërkam ngap-ngap nëblak hen man nalilingtilbli'ak.

3 Mumuk ennak zep zë Musa Bak ne Elia Bak ne jo kë zaka, hen Yesus hon de ang tan dan-ahare zini in ki zep nakek- zen kim Yesus hun èraisil gwë'anka.

4 Petrus ki zep hwëna Yesussu gubluka, "Bian, man tangan sam gwesin- nen de awe lowehe gwen hapye. Zep Bian, Em de dwam

gwenkam, ki èe asa gol kluksa dan-ahan syal gwëblandal- ahana Bian ere hap, ahana Musa Bak hap, hen ahana Elia Bak hap."

5 Petrus in kim nama kirekam tonbla'anka, hwëna ngatan nabare butna ki zep ati gwëzak, hëndep zao zep wale tabirzik. Hwëna butna iwe zep ola anakan èsak,

"An ano Tane- ère mo dang tininak de tanganna. Ama tangan sam gwesik gwëblanan. Desa em sal gwëblan."

6 Dan-ahare zini in kim ola insa kirekam èsalsek, dekam zep airin hip èik gwëhek.

7 Hwëna Yesus kim zë hata zaka, anakare ola ban zep towanbirida ine zaka, "Em èluk tan. Bahem èairin."

8 Zen kim nola kap da inek, dekam hwëna Yesus Zëna en naka zep zë hla dak. Aha maena hom zao gwë'anka.

9 Kwatapna in kon kim etan golëtinja gwë'anka, zao zep gubiridaka, "In desa ki ena hla kul, etan aha maesa bahem gubiridangan- ngatan zi mo lang nakore Zi Tanganna Èe de nama tin nikon ngaya gwen srëmnakye."

10 Dekam zep hwëna dan-ahare zini in dakensiblik, "Elia Bak mesam lwa hala. Èe hwëna ama tim ul, 'Zen sa Emsa ngeirbli zala.' Sap Musa mo olsa de tawa ta gwibin hip de zini kirekam am ègu gwenan, 'Zen diki nonol Elia Bak sa etan lwahal zankam ngeirbli zala, ki sa hwëna nësa de ngaya tabin hip de Zini hata zala.' "*"

11 Yesus ki zep hwëna ding gulzimki, "In sap eiwa kirekamke. Elia zen sap kirekam-kirekamsa de nonol sul sone gun hup de zini- Israelsa de ngaya tabin hip de Zini Èe de hwëna kirenak hatazan hap.

12 Hwëna Èe ama emsa gubirida'an: Elia zen sap mes eiwa Asa ngeirbli zaka, hwëna zini hom desa tame dak. Zep hwëna zère mae mo dwam gwibin sin kirekam-kirekam

* 17:10 17:10 Mal. 4:5

karek-karek ensa nol gweblak. Hen molya holo gwék, ki sa ngatan zi mo lang nakore Zi Tanganna Asa kirekam hen nëblal."

¹³ Dan-ahare zini in dekam zep anakan dam nulsuk, "O hare Yohannis Swe am Elia mo weinak syal gwéka."

Yesus kim dowal mo tilblin wal seiwir tola dawem takake:
(Mrk. 9:14-29; Luk. 9:37-43)

¹⁴ Yesus kim etan zère hon de ang ta gwen zi dan-aharena in han zi tranak hëndep abon mae onak golëyaing gwe'an zaka, zini hen ki zep zè hata zaka, zao zep Yesussu boklena kom sobla zaka.

¹⁵ Dekon zep abe ta seka, "Bian, ano wasalna kwasang gwebla. Zen karekam tilsik-tilsik gwe-gwenda, hen sang-sangna sabak tanganna. Zen etan-etankam syauk bla mae san zannara gwenda, hen ho maenak keing gwenda-gwenda.

¹⁶ Èe mesè sap ere hon de ang ta gwen zi sin dep zersong gwezal. Hwëna man sap nakablal."

¹⁷ Yesus ki zep gubiridaka, "Eiwa, angkam de zini em ei nibarena hom tangan! Em in nol drak-drak enna. Èe san èse nakaè sap emsa golëlowehe gwék! Èe ama bae-ban mae de holokam golëlowehe gwen naye. An san emki wasalna insa zerhalzan."

¹⁸ Yesus dekam zep dowala insa jala ban zèbon onakon de wet son hap gubluka. Hëndep dowala in dekam zep kon wet soka. Wasal tola in dekam zep hëndep dawem gwéka.

¹⁹ Èe zère hon de ang ta gwen wenyà ki zebè hwëna zè-erenak du këblazak, zao zebè lakensiblik, "Bian, èe ba hap tanganè dowala insa èralsa sone srëm gwer?"

²⁰⁻²¹ Ki zep asa ding gulzimki, "Sap em home dawemkam Asa laiblibla'an. Eiwa denakaè emsa gubirida'an: Eno mae mo Asa de taibliblan de betek mae nik lwa'anam- sap rica dan betek makare nik, dekam eme kwatapsa anakan enbla'anam, 'Wakin san dep em al gwen,' zen dekam maka ki hëndep al gwe'ara. Dekam banakare maena hom- em de desa syal gwibin srëm hap denaye." *

Yesus kim etan Zënaka de karek tan hap dena tawa tabirkike:
(Mrk. 9:30-32; Luk. 9:43-45)

²² Yesus kim zère hon de ang ta gwen wenyà asa Galileak golëlowe he'anaka, zao zep etan asa gubiridaka, "Molya holo gwék ki sa ngatan zi mo lang nakore Zi Tanganna Asa jal zi mo tahanak dep tapbla dazim.

²³ Zen sa Asa dal, hwëna yaklana dan-ahan, ki sa Bian Alap etan Asa ngaya tala." Èe kimè kirekam asal-blak, ano mae mo enlalana man tangan èdowe hanak.

Yesus kim anakarekam Petrus hup goltrëblakake, "Men zen Yesus zère hon ang ta gwenan, zen Alap mo walaskam de enlala gwibiridan."

²⁴ Yesus kim aban Kapernaumk golëyaing gwéka, hwëna Alap mo golak dep de te-ala alal ta gwen zini ki zep Petrus hon yaing gwezak, zao zep dakensiblizak, "Eno mae mo guruna in wèhè Alap mo golak dep de te-alana tahun jamkam gol gwizimnira? San ha hom?" †

²⁵ Petrus ki zep ding gulzimki, "In kike."

Zen kim etan lwahal zaka- Yesus men zao gola gwè'anaka, zen de nama ol toran srëmnak Yesus zep nonol takensiblika, "Simon, eno tame gun nukon banakan? Auhukamanak awe de teipsin-teipsin wenyà, zen san ha iye zem onakon

* **17:20-21 17:20-21** In kim orep Matius mo alena ansa etan ale nul gwék, aha zi lun ayat 21na mas gulku. Zen zèwe Markus mo Ol Dawem nakore naka (Mrk. 9:29) anakan mas gulku: "Kirekam de dowala, toton banakare aha maekam bëjen zersalsonen. Zen tembane lwan naban de Alapsa abe ta gwen enkam de zersalsonen." † **17:24 17:24** Musa man Israel mo zi aususa gubiridaka-te-alana insa de Alap mo golak de syal hap ing gul gwen hap. (Kel. 30:12-16)

pajak te-alana alal danda gwenan? San ha aha zi en nakon alal danda gwenan?"

²⁶ Petrus ki zep ding gulbluka, "Zen dwan aha zi en nakon am alal danda gwenan."

Yesus ki zep ding gulbluka, "Zep Bian Alap mo walasna, nen sap esa Alap hap dena insa ing ul srëm gwe-gwër."

²⁷ Hwëna nene te-alasa olzim srëm gwe'anka, zen sa nësa husus neizim. Zep emki ho gutu san yal ta nubin hip song gwen. Hogwena mensa nonol gul ine'anka, zëno ëk mwannak esa te-ala kasona sowe henkam hlaulu- nen de desa olzimdin hip denaye. Desa emki zëbe mae hap nère nik mo bose hap golzimdin."

18

Walas betek mo kim de ëliwehen hap de ol, hen karek san dep de zertoran srëm hap de ol:

(Mrk. 9:33-37; Luk. 9:46-48; Mrk. 9:42-48; Luk. 17:1-7)

¹ Zao kim Yesus asa golëlowe he'anka, ëe dua-blaskam de wenya dekam zebë zë lakensiblizak, "Alap mo irik ginnik, abon mae onakon nara sa teipsili?"

² Yesus dekam zep walas tola haen gweblaka, ki zep ano mae mo nwenak de zaun hup gubluka,

³ ki zep hwëna asa gubiridaka, "Eiwa denakaë emsa gubirida'an: Em de ere mae mo gwënsa wet gulsun srëmkam dekam de walas bete-tek mo kim lowehen hap, em molye Alap mo irik ginnik bitë gwëk."

⁴ Zini men zen zëre mo enlalana walas betekna an mo kim betek ta'anka, zen zen sa Alap mo irik ginnik teipsili.

⁵ Hen zini men zen de ano bose hap aha zisi mas gwebla'anka- sap anakare walas tol maesa, Eë asa desa enlala gweblal, 'Zen Asa mas gwebla'ara.'

⁶ "Men nara Asa de taibliblan zisi, sap hen anakare walas betek maesa, karek san dep zertoranna, zen dikim

hwëna Asa hli tan hap, kire zini Alap sërkam tangan sa karek tala. Diki dawemna, zen maka zertoran srëmnak karekkam de tinsi hlaulku. Kaso dohon-honsa de holenak hule soneblan naban de hi tateknak keing gwen maekam, ki Alap molya karek ta'anam.

⁷ Kareksa de gon hap de enlalana eiwa ki okamanak awe hata gwizimnira, hen zini zep Asa de taibliblan nakon ëaltil gwenan. Zen zep sa lamkam tingare zi mo karek-karek hap okamana ansa Alap olo gulu. Hwëna zini men zen zi bose zemka Asa dikim hli tan hap nolëton gwenan, zen zen sa sërkam de karekna noltower.

⁸ "Emsa de ere mo aha taha ahaksa tana anakan titi da gwe'anam, 'Haen, karekna ansa nen on,' diki dawemna em blansin nika hiri son. Sap eme dare taha naban ahaksa tana naban zigwë'anka, ki esa hëndep Asa hli tala. Ki hwëna tinsin srëm syauknuk dep sa emsa hiri daser. Blansinkim ki emaka sam gwesi'ira- aha-ere taha naban ahaksa tana naban de Alap onak gwë gwen hapye.

⁹ Hen kirekam, emsa de ere mo aha nwe titi ta gwenna, 'Haen, nen karekna wakinsa karatda un,' ki em nwenana insa alsin nika hiri son. Sap eme dare nwe naban zigwë'anka, ki esa hëndep Asa hli tala. Ki hwëna tinsin srëm syauknuk esa hëndep denaban gwë gwera. Alsinkim emaka sam gwesi'ira- aha-ere nwe naban de Alap onak gwë gwen hapye.

¹⁰⁻¹¹ "Bahem Asa de taibliblan anakare walas bete-tekna anakan enlala gwibirida gwen, 'Zen aban apdenak hom.' Emki sap ëenlala gwen: Alap mo dam taha nakore zini man kire walasna aha-en ahenkam kara da gwibirin, hen walas zem in de kareksa goltowenkam,

dekam man Alapsa dang nītil gweblanan. *

¹² “Zep ansa emki ësane gwen. Em wēhē dam ulsu'uk? Ebon mae onakon, ahanik mo domba zaho de 100 enkam lowe he'anam, hwēna aha tolik de jek-jak gwebla'anam, zen banakan maka gwē'ara? Zen 99kam dena insa kwatapnak maka sonak hli yuluda'ara- dekam de jek-jak gwen zini insa tēblan hap.

¹³ Eiwa denakaë emsa gubirida'an: Zen kim de dombana insa hla ta'anika, zēno zēbe hap de isrip-srina sa tangan taman kinil. 99kam de wenyā in hap de isrip-srina sa lwalaher.

¹⁴ Zen hen kirekam- ere mae mo ngatan zi mo langnak de Bian naye. Zen hom dwam gwe'ara- aha mae nik de hēndep de ēgwē gwen san dep de ora nakon syalhen hapye, sap anakare walas betek.”

Wal bose uk de emsa karek tankam de kirekam syal gwibin hip de ol:

(Luk. 17:3)

¹⁵ “Asa de taibliblan zi bose uk de ebe hap kareksa golblanna, emki zēbon osan song gwen- dekam de zē-erenak anakan gublun hap, ‘Em ema anakan asa karek taka.’ Sowēkam em e-en tap ulsun- aha de emsa tawa gwizimdin srēm kam. Zen de emsa salblankam, anakan de emsa gublun naban, ‘Bahem ano karekna insa enlala gwibin,’ ki mese etan umlae ēnda- san de ere mo iyena kiye.

¹⁶ Hwēna zen de kirekam emsa salblan srēmna, emki ahanaka kwang tan, ahaksa dan kwang sondeban mae de tap gulsun hup. Sap Alap mo olak man lwak:

‘Bahem zini na-en karek tan- ahare zi de anakan gublunkamye, “Zen man karek gweka.” Diki zini dan, ahaksa dan-ahare zi de kirekam gublunkam, “Zen man eiwa karek

gweka,” dekam karek gwen zini insa em karek tan.’*’

Zep aha zisi em kwang son- zen de tap gunnuk ang ēn hap hen eno olsa soson un hip.

¹⁷ Hwēna emsa de karek tan zini in de nama eno mae mo olsa san srēm kam, dekam jematnak de tagal gwennak em zēno karekna insa kira gulblun. Hen zini in de etan jemat mo dwam gwibin sin ang gwen srēm kam, dekam tangan tīngare jematna em zini insa langa tasin- men kirekam Israel zini Alapsa de tame tan srēm zini neibirida gwenanke. Dekam sap esa zini insa langa lasilmen kirekam Israel zini pajak te ala alal ta gwen zisi neibirida gwenanke.

¹⁸ “Ēe eiwa denakaë emsa gubirida'an: Em Abon de bitī gwen wenyā, em esa ngatan zi mo langnak de Bian mo dwam gwibin sin okamanak de zi hip anakarekam klis ul gwizim, ‘Kirekam de ēgwēna zen Alap mo nwenak karek,’ hen ‘Kirekam de ēgwēna zen Alap mo nwenak kareksa hom.’*’

¹⁹ “Hen Ēe ama etan emsa gubirida'an: Ebon mae onakon de aha dare nik okamanak awe olsa anakan aha-en u'inam, ‘Nen kirekam esa Alapsa abe la gwera,’ ano Bian sa kirekam de abena dokwak gul gwera, hen sa kirekam syal gwe-gwibirzimdi.

²⁰ Sap em men zēwe ano bose hap dan-dan, ahaksa dan-ahare zi mae tagal gwenna, Ēe dekam hen asa eno mae mo ngirin klesnak dum gwehe gwezal.”

Wal bose zik mo kareksa de eititi gwibir-blin srēm hap de gulk sun de ol blaoran:

²¹ Petrus ki zep Yesussu takensibli zaka, “Bian, ano wal bose de abe hap etan-etankam kareksa gol gwebla'anam, beyana banakare ennak

* **18:10-11 18:10-11** Orep tangan, in kim Matius mo ola ansa etan ale nul gwek, aha zi man Lukas 19:10 nakore naka awe mas gulku. Desa zep lun ayat seblaskam naīt gwibik. Zen anakan: “Sap ngatan zi mo lang nakore Zi Tanganna Ēe kire zisi de hakalbiridan habē hatazak- men zen ora dawem nakon ësyal hekke, desa dikim ngaya tabin hip.” * **18:16 18:16** Ul. 19:15 * **18:18 18:18** Yoh. 20:23

de zaunnuk amaka eititi gwibir-bli zahe'an? San ha tuju ennak amaka golzausu'un? Dekorena molyë eititi gwibir-blik."

²² Yesus ki zep ding gulbluka, "Tuju ennak bahem. Diki 700 ennak zen hëndep zaun- emsa de karek ta tine gwen naye. †

²³ Sap Alap zëre mo irik ginni zen gulk sun de ol blaoranna an kiye: Teipsin zini man zëre mo te-alana aïtblika. Dekam te-alana mensa zëre mo taha tri so gweblan zi hip bohë tazimnira gweka, desa man etan dwam gweblaka. Ki zep gubiridaka, 'Ap etan kap lablak.'

²⁴ Dekam zep jana zi zem ahanaka nër halzak- men zëno bonna miliar-miliarkam lwablakake.

²⁵ Hwëna zen man teipsin zini insa gubluka, 'Ano te-alana hom sowe he'ara- desa de etan sowe henkam ebe hap zerblan hapye.' Dekam zep hwëna teipsin zini in jana zi zemka gubiridaka, 'Dekam balk lak. We wal walas zemka hen lahyok. Te-ala hap zëno mae mo timsi lirak labik. Zen dikire aha zi mo tana iltikinnik ëbabu gwe-gwek. Hen zëno gola hen zëwe de kire-kirena kitak te-ala hap lirak labik. Te-alana desa abe hap kap lablak- zëno bon yala insa dikim ber-ber gun hupye.'

²⁶ "Zini in kim kirekam salblaka, dekam zep teipsin zini in mo nwenak ik gwehe zaka, dekon zep anakan abe ta seka, 'Bian, sap ki asa eissibli. Eë asa kitak hëndep ep golblal.'

²⁷ Teipsin zini in dekam zep dawemkam kwasang gweblaka. Dekam zep jana zi zemka gubiridaka, 'Bahem banakan mae gwëblan.' Hen anakan gubluka, 'Eë mesë kitak eno bon yala insa ep eititi gwibir-blinan.'

²⁸ "Hwëna teipsin zini in mo gola kon kim te soka, zen hwëna dekam zep wal bose zemka zertowe'anka.

Zini in hen teipsin zini in hon de syal gwe-gwenna. Zen hwëna mes zëbon 900 ribu enkam bohë taka. Zen hwëna man tol wal bose zem insa balk taka, hen holenak jak tasiki, depan zep gubluka, 'Mensa abon te-alana bohë taka, angkam em hëndep ap zerblan.'

²⁹ Wal bose zem in sap ki zëno nwenak anakare ola ban ik gwe heka, 'Sap ki asa eissibli. Eë asa kitak hëndep ep golblal.'

³⁰ Hwëna wal bose zem in man eissinkim dep baes gweka. Zen zep hwëna jana zinik klak taka. Zen zep bwinak tak daink, hen anakan zëno ola ayang nulblik, 'Kim de te-alana etan zëbe hap golbla'anka, yaklana dekam esa wet sola.'

³¹ "Teipsin tangan zini in hon de syal ta gwen bose wal zem kim kirekam ësak, zen man tangan enlalana ëdowe hanak. Dekam zep zen teipsin tangan zini insa anakan nenblak, 'Wal bose zik desa kirekam karek ta'ara.'

³² Teipsin zini in dekam zep gubiridaka- zëre mo taha tri son zi jal-jala insa de etan kwang ta halzan hap, wal bose zem insa klak takake. Kim nër halzak, zao zep gubluka, 'Em an jal-jal tanganna! Em kime eissin hip asa abe taka, eë ama hwëna eno bon yawal tanganna insa kitak ep ngan gulsubluk.

³³ Ki em san ha bëjen em wal bose omka kirekam kwasang gweblan?- men kirekamë eë emsa kwasang gweblakye.'

³⁴ Teipsin zini in man tangan jal gweblaka, zep jana zi zemka bwinak de tak ta irin hip anakare ola ban gubiridaka, 'Emki mwin-mwankam lek-lek ta gwen- hëndep de ano te-alana mensa bohë taka ap kitak zerblak.' "

³⁵ Yesus dekam zep aïsili insa anakan ap waulsuzimki: "Ngatan zi mo langnak de ano Bianna hen kirekam sa emsa karek tabiri- em

† 18:22 18:22 Yunani olkam Yesus man anakan ding gulbluka, "70 kali 7kam de eititi gwe-gwibir-blin." Zëno beyana diki 490 enkam. Hwëna enlalana diki "Bahem aïtbir-blin- wal bose uk mo ebe hap de karek gol gweblanna in saye."

de wal bose wal uk mo kareksa enho nakon eititi gwe-gwibir-zimdin srëmkamye."

19

Yesus kim wesya de baes gwibin srëm hap dena tawa tabirkike:

(Mrk. 10:1-12)

¹ Yesus kim tawa tabinni insa hya gwesibiridaka, dekam zep asa langna Galilea kon Yerusalem mo aha lang tek san dep golëgwë halka-weyana Yordan mo men eiha san dep.

² Zini hen beya tangan nik ang nëblak, hen zao zep sang-sang nabare wenyaka dawem ta gwibirki.

³ Hwëna Farisikam de zini ki zep zë hen Yesusu de akasiblin hap yaing gwezak. Zen man zë dakensiblizak, "Em banakane Musa mo titi tabin ola dam gulsu'ura? San ha zini sap de we zemka baes gwibinkim?- banakare mae nakonye. San ha bëjen?"

⁴ Yesus ki zep ding gulzimki, "Em bawalkam esa Alap mo ola an mo eini dam ulsul?- men zen anakarekam lwakye,

'Alap nonol tanganna zi niban wenyana ban yang sosuku.'*

⁵ Hen Zen dekam anakan guku,

'Zini an-bi zemka hli sonkam-dekam de we zeban aha-en ën hapye. We-zi darena in dekam Alap mo nwenak san de aha-ere timni kiye.'*

⁶ In zebë emsa gubirida'an: Alap mo nwenak we-zi darena zen dan hom. Zen hwëna aha-en. Zen in zep, Alap mensa aha-en sonna, zi bap zen etan kles son."

⁷ Farisikam de zini in ki zep etan dakensiblik, "Ki Musa Bak ba hap anakan titi tabirki?-

'Zini we zemka sap de baes gwibinkim, hwëna nonol baes

gwibin hip de suratsa de anakan ale gunkum, "Ëe mesë kire hap baes gwibik." ' '*

⁸ Ki zep hwëna ding gulzimki, "Musa Bak in mae hap kirekam ein emsa gubiridaka: Sap em in kitak kwasang enlalana tawa naka hom. Hwëna nonol lonesen nakon, Alap sap hom kirekam dwam gweka.

⁹ Hwëna Ëe ama emsa gubirida'an: Men nara we zemka zen de kahalo gwen srëmnak baes gwibinni, hwëna ahanaka de etan gonkam, ki zini in Alap mo nwenak kahalonak gwë gwe'ara. Kahalo gwennak de baes gwibinni, desa Ëe homë jalse gwibirida'an."

¹⁰ Hwëna ëe zëre hon de ang ta gwen wenyana dekam zebë hen Yesusu enblak, "Hare orana aha-enke- Alap mo dwam gwibin sin de we zemka baes gwibin hip denaye. Kirekam de lwankam, ki zini bap zen wenyana kap ta gwen."

¹¹ Yesus ki zep asa ding gulzimki, "Hwëna kirekam de we gon srëmkam lowehe gwen hap dena, kitak de zini molya desa dwam neibik. Diki men zëbe mae en hap Alap golzim'inka, zen en sa desan ang ta gwer.

¹² Sap zini ahakon mae hap we walya kap da srëm gwe-gwenan: Timni mes ki jaha gwen nakon karek gweblak. Ahakon hwëna aha zi zëno mae mo timni eirim karek nul gwizimnin, kire nakon kap da srëm gwe-gwenan. * Ahakon hwëna Alap mo dwam gwibin sin de syal gwen hap sa we gon srëmkam lowehe gwer. Zen in zep, men nara anakan eisbinni, 'Alap mes ki kirekam asa gubluka,' zen dikire we gon srëmkam lowehe gwek."

* 19:4 19:4 Kej. 1:27; 5:2 * 19:5 19:5 Kej. 2:24 * 19:7 19:7 Ul. 24:1; Mat. 5:31 * 19:12 19:12

Mensa Yesus zi mo timsi de eirim karek gulzimdin hip dena ayatnak awe enlala gwibirki, zen men kirekam teipsin zini dekam zëre mo tana iltikinnik de zisi neibirida gwekke. Dekam teipsin zi de dwam gwenkam, zëre mo tana iltikinnik de zi wasna, desa sap de bol sikni ek sosublun- men kirekam gwe zahona neibirida gwenanke. Kire zini zep wenyana kap da srëm gwe-gwek, hen zep aha-ere enlalakam zi bina insa babu neibirida gwek.

Yesus kim walas tane-ne hap dawemna golzimkike:

(Mrk. 10:13-16; Luk. 18:15-17)

¹³ Zini ki zep walas tane-
nena Yesus onak dep kap nulhal
gwe'anzak- Zen de taha tehabirida
inen naban Alapsa anakan gu
soneblan hap, "Emki walasna an
hap dawemsa gol gwizimdin."
Hwëna zëre hon de ang tan wenyä
ëyë anakan jalse eibirida gwe'ak,
"Bahem Gurusa blos tablan."

¹⁴ Hwëna Zën zep asa gubiri-
daka, "Dikire Abon nolëyaing gwe-
gwezak. Bahem jalse gwibiridan.
Sap walasna an makare wenyä, zen
zen Alap mo irik gönni bi neibi'in."

¹⁵ Dekam zep hëndep Alapsa de
gu sone gweblan naban tahana
tehabirida ine gwe'anka. Kim hya
gwesibiridaka, ki zep kon etan asa
golësek gweka.

*Te-ala beya nabare zini kim Yesus
hon hata zakake:*

(Mrk. 10:17-31; Luk. 18:18-30)

¹⁶ Aha yaklakam ki zep zini- zise
gwen srëm nik, Yesussu takensibli
zaka, "Bian Guru, ëe banakare syal
dawemsa asa gol?- dekam de Alap
mo nwenak sërkam sam gwesin hip,
Zen dekakim hëndep de gwën hap
denaka abe hap golblaka."

¹⁷ Yesus ki zep ding gulbluka,
"Em dwan ene maka dam gulsu'ura-
Alap mo nwenak dikim 'sam gwesin
hip' denaye. Hëndep de ngaya gwen
hap de sam gwesin Zini, Zen diki
aha-en- Alap Zë-en. Hwëna em de
hëndep de ngaya gwen hap dwam
gwenna, Musa mo titi tabin ol san
em ang gwe-gwen."

¹⁸ Zini in ki zep etan takensiblika,
"Ki banakare wenyak asa ang gwe-
gwer?"

Yesus ki zep ding gulbluka, "Zen
dwan anakanke,
'Zini bahem tan.
Bahem kahalo gwen.
Bahem sowë gwen.

Zisi bahem boton hap klak tan hen
boton olsa bahem gol hala
seran.

¹⁹ Ane-biasa em blikip gwesik gwiz-
imdin.'

Hen,

'Zi bose omka em kwasang
gwibirida gwen- san de
enaka de kwasang gweblanna
kiye.' "*"

²⁰ Hwëna zini in ki zep ding gul-
bluka, "Ëe mesë kitak desan ang
gwek. Hwëna aha syala san ha ki?-
desa de syal gwibinkim de ëe ngaya
gwen hap denaye?"

²¹ Yesus ki zep gubluka, "Em de
dwam gwenna dawemkam tangan
de Alap mo nwenak sam gwesin
hip, em song gwen, ere mo kire-
kirena kitak tangan te-ala hap li-
rak tabir. Te-alana desa tahalha zi
hip kae gwebla-zim. Kirekame syal
gwibi'inika, ki ngatan zi mo langnake
hëndep de te-alasa beyakam lam
ta'ara. Ena dekam etan hataza- Asa
dikim ang gweblan hapye."

²² Kirekam kim salblaka, dekam
zep kon enlala dowe hanan naban
song gweka- mae hap: Sap zëno
kire-kirena beya tanganna.

²³ Ki zep hwëna asa gubiridaka,
"Eiwa denakaë emsa gubirida'an:
Eiwa, dam-dam naka hom- te-ala
beya zi de Alap mo irik gönnik hatan
hapye.

²⁴ Ama etan emsa gubirida'an: Te-
ala beya zi de Alap mo irik gönnik tin
hip dena, zen men kiye- unta yawal
de jaron hul betek san gönni. Kire
otweran yawala toton bëjen tin."

²⁵ Ëe kimë kirekam asalblak,
ëe ama tangan ëtenggwank. Ki
zebë eguk, "Hare eiwa kire tan-
gankamke! Ki hwëna endan nik sa
ëngaya gwer? Toton nara molya."

²⁶ Hwëna Yesus ki zep nwekam
de amjanbin niban asa gubiridaka,
"Eiwa, auhu-kama zini zëre mae
mo sasonkam bëjen zënaka ngaya
tabin. Hwëna Alap de zi hip syal

* 19:19 19:19 Kel. 20:12-16; Im. 19:18; Ul. 5:16-20

gwibir-zimdin srëm hap dena, aha-en mae hom tanganke.”

²⁷ Petrus ki zep gubluka, “Ki hwëna abe mae hap dena bankarekam sa lwal? Sap ëe mesë ëre mae mo tïngare bi gwibinni Emsa de ang gweblanda gwen hap hli kulidak. Zep ëe basa asa lamkam ulin?”

²⁸ Ki zep hwëna ding gulbluka, “Eiwa denakaë emsa gubirida'an: Ngatan zi mo lang nakore Zi Tanganna Ëe kimë okama ësenak Alap onakore ngatan nabare komal tumnak teipsinkim nikin'ik, em Abon de ang ta gwen wenya dekam esa hen ere mae hap de dua-blaskam de komal tumnak teinikin- dekon de dua-blaskam de Israel Bak onakore zi aususa irik gin hipye.

²⁹ Hen zini men zen Asa de ang gwe-gweblan hap hli nulida gwe'ak-gol zem, aya-wal oso-wal zem, somol wal zem, an-bi zem, walas zem, ahaksa nga zem- zëbe mae hap hwëna Alap sabak tangankam sa etan kiresa kap gul gwizimdi- sap iyekam de gubirida gwen wenya, gol, hen nga maena. Hen zen hëndep de ëngaya gwen hap denaka sa nulin. †

³⁰ Hwëna beyana men zen sap angkam bose naban lowehe gwe'an, zen zen sa hwëna lamkam lure san ëgwër. Hen men zen angkam bose srëm wenya lowehe gwe'an, zen zen sa hwëna lamkam ngein sin ëgwër.”

20

Anggur nganak de syal tan zi hip de gulk sun de ol blaoran:

¹ “Sap lamkam dep dena insa emsa gubiridanan, * Alap kim de kitak irik gi'inka, zen mae makan: Nga yawal mo bi nik de kak tangannak zi hip hakanna kiye- zëre mo anggur ngasa de syal gweblan hap.

² Kim ola anakan ziaha-en gulku, ‘Aha-ere yakla blalkam de syal hap,

ëe asa te-alana aha-ere-ala aha-ere-ala enkam ebe mae hap lop tazim,’ dekam zep syal tan hap sek gwek.

³ Jam sembilankam zep nga bina in etan song gweka, dekam zep ahakore zini syal srëm naka etan hlauluda'anka. Pasarak ëwal-wale gwe'ak.

⁴ Zao zep gubiridaka, ‘Em ano anggur nganak de syal tan hap sek gwen. Ëe asa ebe mae hap te-alasa ere mo syal jam enkam golzim.’

⁵ Zen hen dekam zep hëndep sek gwek. Yakla bolak denaban hen jam tigakam nga bina in kire enkam ahakore naka hen kwang guluda gwe'anka.

⁶ Jam limakam kim etan song gweka, etan dekam zep zini syal srëm naka hlauluda'anka, nama ësa nyaublu'ak. Zao zep takensibiridaka, ‘Em ba habe yakla blala an yaublu tiner- ba maesa de syal gwibin srëmkamye?’

⁷ “Zini in ki zep ding nulblik, ‘Abe mae hap hom am mae zini syal maena nolzim- zao de syal tan hapye.’

“Nga bina in ki zep gubiridaka, ‘Ki ano anggur nganak de syal tan hap em sek gwen.’

⁸ “Nga bina in dapse gwesin niban zep zëre mo irgwa tahana kore zini gubluka, ‘Dekam syal zini insa tagam gul. Zao te-alana kae gweblazim. Nonol aumwa hap de syal tan wenya kon kon gwesibir hana, hëndep aumwa hap nonol syal tan wenya kip golzim.’

⁹ Dekam zep jam limakam de syal tan wenyik nonol yaïng gwezak. Zëbe mae hap te-alana aha-ere ala enkam zep kae gweblazimki.

¹⁰ Aumwa hap zep hwëna kak tangannak de syal tan wenya yaïng gwezak. Zen man ëkil gi'ik, ‘Abe mae hap mam tolkam sa kae gweblazimdi,’ hwëna zëbe mae hap hen kire enkam kae gweblazimki.

† 19:29 19:29 “Sabak tangankam,” zen Yunani olkam “seratus kali lipatkam.” * 20:1 20:1 Ol gulk sun de blaoranna an, Yesus dekam man srip gulsuzimki- insa nër hom gubiridaka, Mat. 19:30nak.

11 Kim ki te-alana insa kap daink, dekam zep nga bina insa jala ban donbla'ak,

12 'Aumwanak in zen syal tal, zen aha-ere jam enkam syal tal. Ëe hwëna yakla langasaë syal ta tiner. Em hwëna apde enkam te-alana abe mae hap golzimdi, hwëna ëe yakla sal-sal yawalakë waba hap syal ta tiner!'

13 "Nga bina in ki zep ahanaka ding gulbluka, 'Ano wal bose, ëe homë emsa karek tabir. Ki san ha nen home ola aha-en ul?- te-alana ebe mae hap aha-ere ala enkam de golzimdin hipye, aha-ere yaklakam de syal hapye.

14 Zep ebe mae hap dena in desa emki kap ta irin, deban sek gwek. Sap emsa ëe kirekamë dwam gwibirida'an- aumwanak in zen hen mas tal zëbe mae hap hen kire enkam de kap tazimdin hip.

15 San ha ebon mae onakon ëe kirekam babë ëre mo enlalakam syal gwen- ëre mo te-alakamye? San ha ëe de aha zi hip kirekam kae-kae gwen hap em ema asa husus ëbla'an?"

16 Yesus ki zep etan asa gubiridaka, "Zen lamkam kirekam sa hen lwal: Men zen angkam bose srëm wenya ëgwë'an, zen zen sa hwëna lamkam ngein sin loweher. Hwëna men zen angkam bose naban lowehe gwe'an, zen hwëna lamkam zen sa lure san ëgwër."

Yesus kim etan anakan gubiridakake, "Asa sa dal."

(Mrk. 10:32-34; Luk. 18:31-34)

17 Yesus kim zi beyam-bya naban Yerusalem san asa golësek gwe'anaka, oranak zep dua-blaskam de zini asa en srën tagal gulsuku, zao zep asa gubiridaka,

18 "Ola ansa emki ësan: Nen an angkam Yerusalemk debe yaing gwe se'an. Zëwe ngatan zi mo lang nakore Zi Tanganna Asa sa tapbla dazim- Alap mo golak de syal tan zi mo mam-mam wenya kip, hen Musa mo olsa de tawa ta gwibin wenya

kip. Zen sa hwëna Asa de tan hap ola aha-en nul,

19 hëndep Asa sa Yahudi srëm zi mo tahanak dep tapbla dazim. Zen sa hwëna Asa lamang da gwer, hen dangole gwer. Hëndep te-lidak sonnack sa Asa makan dain. Hwëna yaklana dan-ahan, ki sa etan Alap tïn nikon Asa ngaya tala."

Yakobus ne Yohanis nik mo anena kim Yesussu abe ta zakke:

(Mrk. 10:35-45)

20 Zebedeus Bak mo wenya ki zep walas dare zem Yakobus ne Yohanis neban Yesus onak zihatagak. Yesus mo nwenak zep boklena kom sozak-dekam de abe tan srëmnak blikip gwesiblin hap.

21 Yesus ki zep zë takensibirki, "Em basae dwam gwibi'ira?- desa de ebe hap golbin hipye."

Wenya in ki zep ding gulbluk, "Ëe mae habë dwam gwe'an: Em kime teipsinkim irik gi'inka, ano walas darena an dikire hen teipsinkim eno alp nakon inikink- ahana eno dam taha nakon, ahana irgwa taha nakon."

22 Yesus ki zep gubiridaka, "Hwëna ena home tame u'in-in zebe ëabe gwenanye." Ki zep hwëna walas dare zem insa guzimki, "Karek yawala men desaë goltowe'ak, em wëhë desa de oltowen hap hen hohle ë'ara?"

Ki zep ding ulblika, "Ëe ama hen hohle ë'an."

23 Zao zep etan guzimki, "Eiwa, em hen esa tol oltowera- Ëe men kiresaë goltowe'akye. Hwëna men zen de ano irgwa taha nakon hen dam taha nakon inikin'inka, desa Ëe bëjënë dam sosun. Zëwe de inikirin hip dena, zen diki ano Bian Zëna mensa dam sosuku, zen diki zen sa zë inikiri."

24 Hwëna ëe dare taha-tapakam de ahakore ang ta gwen wenya kimë zëno nik mo abe lan ola insa ësak, ëe dekam zebë mae hap sisngin eizim'ik, "Zen bap zen de mam ën hap abe lala!"

²⁵ Dekam zep Yesus asa kitak tagal gulsuku, zao zep asa gubiridaka, "Ena dwan tawa nakake: Alapsa de tame tan srëm lang-langnak men zen teipsin-teipsinkim teinikin gwenan, zen man zëre kore naka jap nul sonenda gwenan hen nyaubirida gwenan.

²⁶ Hwëna em zëno mae mo kim bahem. Ebon mae onakon men zen mam gwen hap dwam gwe'ara, zen diki tïngare zi mo babu gwen zi makan zen gwën.

²⁷ Hen ebon mae onakon men zen teipsin hip dwam gwe'ara, zen diki tïngare zi mo tana ïltikinnik zen nikiran.

²⁸ Sap ngatan zi mo lang nakore Zi Tanganna, Èe an zi de Asa babu gweblan hap homë hatazak. Zep em hen ano tana wei san emki Asa zertro gwen. Sap Èe tïngare zi mo tana ïltikinnik de nikiran hibë hatazak- hëndep ère mo angsa de tïngare zisi dikim hil ti sonebin hip sosok tazimdin hip."

Yesus kim zi nwe dïmin darena dawem sokake:

(Mrk. 10:46-52; Luk. 18:35-43)

²⁹ Yesus kim ë yala Yerikosa asa zihli ta'anka, zini beyam-bya tangan nik zep ang nëblak.

³⁰ Hwëna zi nwe dïmin darena ora alpnak inikin'inka. Kim anakan asalka, "In Yesus man-am taman'an zala," ki zep ahërhe hana gwe'anka, "Daud Bak mo Auyan-tane, ano nik mo Teipsinnï, asa Em kwasang gwizimdin."

³¹ Zi beyam-byana in zep jalse neizimk, "Balkkam!" Hwëna zen dekam tangan zep mam tangankam ahërhe hana gwe'anka, "Daud Bak mo Auyan-tane, ano nik mo Teipsinnï, asa tol Emki kwasang gwizimdin!"

³² Yesus ki zep zausuku, ki zep takenzimki, "Em basae dwam

eibi'ira- Èe de desa ebe nikip syal gwibir-zimdin hipye?"

³³ Ki zep ding ulblika, "Bian, ëe nwesa de kara ën habë dwam ë'an."

³⁴ Yesus zao zep dawemkam kwasang gwizimki, ki zep zëno nik mo nwena insa olk sozimki. Hëndep dekam zep ki nwena kara ëka. Dekon hëndep Yesussu zep ang ëblaka.

21

Yesussu kim teipsin zi mo kim Yerusalem kon hut du ane gukke:

(Mrk. 11:1-11; Luk. 19:28-38; Yoh. 12:12-19)

¹ Yesus kim asa Yerusalemk golëgolek de gwe'anka, dekam zebë ëna Betfagek yaing gwëk- zaitun tra nabare kwatap teknak. Dekon zep dua-blaskam de zini abon mae onakon dan-dan guzimki- zen de angir gun hup.

² Zao zep aïsïl soka, "Em ëna wakin san song ën. È topnak kime li'inka, zao esa keledai wanya da tabin nika tane zeban akera. Desa abe hap leisyabla halza.

³ Zi de emsa takensizimdkim, 'Em ba habe leisya ha'ara?'- a kirekam ding ulzim, 'Bian dwam gwizim'ira. Zen sa etan nabakam teisya sone zala.' "

⁴ Zen mae hap ki kirekam lwak: Zakaria Bak mensa Alap mo ola orep ayang gulkuke- zëwe dikim zaun hup. Zen man ale gulku,

⁵ "Èna Yerusalemk de zini enbiridak, 'Eno mae mo teipsinnï man angkam ebon mae onak dep hata'ara.

Zen enlala sae-sae enna.

Zen in zep keledai tane tahannak nikin ane'ha'an zala.' " *

⁶ Zëre hon de ang ta gwen zi darena in ki zep hëndep song ëka. Hëndep Yesus men kirekam aïsïl soka, kirekam zep ki hëndep syal ëka.

* **21:5 21:5** Zakaria man Yerusalem mo aha bosena "Sion" kam ale gulku. Israel zi mo dam gulsunkum, teipsin zi de keledai tahannak nikin ane'hal zankam, zëno enlalana, "Zen umlae enlala naban hata'ara." Hwëna kuda tahannak de nikin ane'hal zankam, zëno dam gulsunnu, "Zen eijan hap hata'ara." (Yes. 62:11; Zak. 9:9)

⁷ Hëndep keledaina insa tane zem in han zep isong gwe zaka. Kim abon mae ihata zaka, keledai tanena in mo tahan dannak ëre mae mo tahan bajusa zebë kang lasek. Yesus zao zep hwëna sewe seka.

⁸ Zi trana men zen nangirblin da'ak, zëre mae mo tahan bajusa zep ora san dëre dahal gwe'ak-desan de keledaina in zersong gwen hap. Hen ahakon yera ala makare naka nublun gwe'ak, desa zep hen ora san dëre dahal gwe'ak.

⁹ Zini beya tangan nik lure nakon ang nëblan da'ak, hen beya tangan nik nangirblin da'ak. Zen zep ëtaken gwe'ak,

“Hë'ho, hë'ho! Are Daud Bak mo Auyan-tane!

An Bian mo bosekam nësa dikim otogulsun hup hata se'ara.

Hë'ho! Diki Alap Zen zëbe hap dawemsa golblan!

Hë'ho! Nen kïtak teipsin tangan Zini Alapsa boltere tan!” †

¹⁰ Yerusalemk kim hëndep Yesus hata haka, zi beyam-byana men zen ang nëblazak mam enkam zep ëisrip-sri gwëk, hëndep tingare ë yala iwe de zini dekam zep ësaladak. Ki zep ëtakensik gwe'anzak, “Zen nara hata'ara?”

¹¹ In zen ang nëblan da'ak zen zep ding nul gwizim'ik, “An Alap mo ol ayang gul gwen zini Yesus sukelangna Galilea mo ëna Nazaret wal.” Kirekam de ëton gwen ol aukuna in zep mam gwëk.

Yesus kim pasar zini Alap mo gol tëm nakon golëalsa sonekake:

(Mrk. 11:15-19; Luk. 19:45-48; Yoh. 2:13-22)

¹² Yesus kim Alap mo golak tïl zïka, dekam zep kon golëalsa soneka- men zen te-ala hap Alap hap de golblan kire-kirena lirak da

gwibik. Meja-mejana men zao tealana lirak da gwibik, hen komal-tum komal-tum maena men dekon mawa oholana lirak da gwibik, desa man yal tazimki.

¹³ Ki zep hwëna gubiridaka, “Alap mo olak man lwak,

‘Ano gola sa nen gwibir, “An Biansa dekon gu sone gweblan hap de gol.” ’

Em an hwëna

‘sowë zi mo aning gol habe li kul sone gwe'an.’ ”*

¹⁴ Hwëna ki zep zë hen zi nwe dïminni hen lekna Alap mo gola iwe Yesus onak dep yaing gwezak. Zao zep dawem tabirki.

¹⁵ Hwëna Alap mo golak de mam-mam wënya hen Musa mo olsa de tawa ta gwibin hip de wënya, zen dekam zep ëjal tak- mae hap: Zen kim Yesus mo owas syal gwib-inni insa hla nuk, hen walas tane-nena insa anakan Alap mo gola kon ëtaken gwe'akke, “Hë'ho, hë'ho! Daud Bak mo Auyan-tane!” ‡

¹⁶ Mam-mam wënya in dekam zep hwëna Yesusu dakensiblik, “Em wëhë walasna insa salbirida gwe'ara? Em balk tasin hip gubiridan.”

Ki zep hwëna ding gulzimki, “Ëe kië salbirida gwe'an. Hwëna em bawalkam esa Alap mo ola an mo eini dam ulsul?- Daud Bak kim anakan Alapsa gublukake:

‘Walas tane-ne hap hen wal baizil hip

Em mese Enaka de boltere tan hap de terya zëbe mae hap hamal tazimki.’ ” §

¹⁷ Yesus ki zep zë hli yuludaka. Ë yala in kon ki zep hëndep dua-blaskam de zini asa golësek gwëka. Ëna Betaniak zep asa golëtruweka.

† **21:9 21:9** Mensa awe “Hë'ho”kam li nul sonek, Matius “Hosana”kam ale gulku. Ibrani olkam zëno enlalana, “Emki asa ngaya tabin.” Hwëna holo gwennak zëno enlalana man liwehek, zep zëno aha enlalana anakan, “Alapsa nen isrip-sri gweblan.” Zëno enlalana zep “hë'ho” naban golek de gwe'an. (Mzm. 118:25-26) * **21:13 21:13** Yes. 56:7; Yer. 7:11 ‡ **21:15 21:15** Yesus de hatan srëmnak, Yahudi zini kirekam Israelsa de ngaya tabin hip de Zisi anakan nen guk gweblak, “Daud mo Auyan-tane”kam. § **21:16 21:16** Yunani olkam de Mzm. 8:3 kirekam lwak.

Yesus kim tenya arana heip gulkuke:

(Mrk. 11:12-14,20-24)

¹⁸ Ka'an kim kak tangannak zère hon de ang tan wenya asa etan Yerusalem san dep golèlwanda ha'an zaka, oranak zep usak gwe'anka.

¹⁹ Ki zep hwëna tenya arana hlauku. Ora alpnak zau'uk. Ki zep zëno ei nika de oran hap syal hebirki. Hwëna eini aha-en mae hom hlauku. Ala enna. Dekam zep arana insa gubirki, "Em molye eini angkam hëndep tèka." Arana in dekam zep ki hëndep boneng gwek.

²⁰ Èe kimë owasna insa hla kuk, èe ama tangan ètenggwank, hëndep èe ki zebë èguk, "Hare, tenya ara yala an mes-am kitak tangan boneng gwenan!"

²¹⁻²² Yesus ki zep asa ding gulzimki, "Èe eiwa denakaë emsa gubirida'an: Eme Alap ensa tingare enho naban anakan laïbli gwebla'ak, 'Zen sa kirekam abe hap syal gwibir-blira,' ki em hen esa sèrkam de owasna syal ei gwibir-an kirekamë tenya arana ansa gweibirinye. Kire enkam denaka molye syal ei gwibik, hwëna em esa ano syala insa kwei kul gwer. Eme dekam Alapsa abe la gwe'ak, 'Kwatap tekna an zen hinak zënaka ter sonen,' zen hëndep kirekam maka Alap ebe mae hap syal gwibir-bli'ara- em de taïblblankamye. Dekam em de ba mae hap abe tankam, em esa ulin gwer."

Yesusu kim anakan dakensiblikke, "Emsa an nara tri ta se'ara?"

(Mrk. 11:27-33; Luk. 20:1-8)

²³ Yesus kim etan Alap mo gol san dep lwahal zaka, kim zë tawa tabi'inka, Alap mo golak de syal ta gwen zi mo mam-mamna Yahudi mo nol-nola ban ki zep hen yaïng gwezak. Zao zep dakensiblik, "Emsa an nara gubluka, hen nara emsa tri

tase gwe'ara?- dekam de kirekam-kirekamna insa syal gwe-gwibin hipye."

²⁴⁻²⁵ Ki zep ding gulzimki, "Ki Èe asa hen nonol emsa takensibiridal. Baptis ta gwibin zini Yohanis Swesa san ha Alap tri ta seka? San ha zen zère en mo sosonkam ki syal gwegweka? Eme nonol ap ding ulbli'ak, ki Èe asa hen emsa gubiridal, 'Asa Zen tri ta se'ara, zebë kirekam syal gwe-gwe'an.' "

Dekam zep zë-en anakan donbi'ik, "Bèjen nen anakan ding gulblun, 'Alap tri ta seka,' ki hwëna zen sa nësä gubiridala, 'Ki em ba habe desa laïblibla srëm gwek?'

²⁶ Hwëna anakane ding ulbli'ak, 'Yohanis zen zère en mo sosonkam syal gweka,' ki hwëna zi trana an sa nësä karek dabir, sap zen Yohanissi mes-am anakan daïbliblak, 'Zen eiwa Alap mo olsa ayang gul gwizimki.' "

²⁷ Anakan zep hëndep ding nulblik, "Èe homë dam ulsu'un, 'Yohanissi zen tri tase gweka.' "

Ki zep hwëna ding gulzimki, "Ki Èe hen molyë emsa gubiridak, 'Èe an zëno syalsä gol gwe'an, hen Zen Asa tri tase gwe'ara.' "

Yesus kim Yahudi mo mam-mam wenya kip ola gulk sun anakan blaonzimkike "Em in walas de bi zik mo ol san ang gwen srëmna kiye."

²⁸ Yesus ki zep etan Yahudi mo mam-mamna in hap ayang gulzimki, "Hwëna ena banakan wëhë ola ansa dam ulsu'uk? Zini ki, zëno zi walasna dan-dan. Bi zem in ki zep oso zemka gublu zaka, 'Ano walas, em namen anggur nga syal gweblan hap em song gwen.'

²⁹ Hwëna tane zem in man ding gulbluka, 'Èe ama baes gwe'an.' Hwëna hyanak zep enlalana wet tyasiki, ki zep hëndep anggur ngana iwe de syal gwen hap song gweka.

³⁰ Hwëna bi zem in dekam zep hen aya zebon dep song gweka. Desa hen zëwe de syal hap gubluka. Zen

hwëna man sap ding gulbluka, 'Ëe asa.' Hwëna zen hom song gweka.

³¹ "Zep eno mae mo dam gul-sunkum, walas dare zem in, nara bi zik mo ol san ang gweka?"

Mam-mam wenya in ki zep ding nulblik, "oso zik."

Yesus ki zep hwëna gubiridaka, "Zep eiwa denakaë emsa gubirida'an: Anakare karek gol gwen wenya- sap pajak te-ala alal tanda gwen wenya, hen swi golak de lowehe gwen we walya, zen en hwëna man Alap mo irik ginnik angkam bitï gwe-gwe'an. Em hwëna home. Lilikin en nakone aha emsa bitï gwennak kara la sone gwibi'in."

³² Sap baptis ta gwibin zini Yohanis in zen nonol hata zaka, zen sap Bian mo dwam gwibin sin de lowe-hen hap denaka ebe mae hap goltrei gwizimki. Hwëna em home zëno ol san ang tak. Hwëna karek gol gwen wenya in, zen en man owas hap Yohanis mo ol san ang tak, hëndep ehalek. Hwëna em kime kirekam hla kulidak, em dekam home mae enlalana wet yasik- dekam mae de hen Yohanis osan ang tan hapye."

*Yesus kim ola gulk sun blaonz-
imkike- Zënaka de Yahudi zi baes
gweblan hap dena:*

(Mrk. 12:1-12; Luk. 20:9-19)

³³ "Gulk sun de ol blaoranna ansa emki ahana etan ësane gwen: Zini kama bina, zen anggur ngasa eiyas tablaka. Alp san kolkam wale tablaka. Zao zep hen kasona hul gulku- anggur danna insa de zë tanakam it ta sone gwen hap. Hen gut de gola zao zep hen tauku-dekon de ngana insa kara ta ine gwen hap. Ki zep hwëna ngana insa te-alakam nga syal gwe-gweblan zi hip bohë ta guzim halka. Zëna dekam zep aha lang san holokam de zë gwën hap song gweka.

³⁴ Anggur dan bil gwen tamlenak kim zauk, dekam zep nga bina in zëre hon de babu gwen zini dan-ahan lup gul soneka- in zen nga zem insa te-alakam bohë dak, zëbon mae

osan dep, ngana in kore te-ala hliksa de zëre hap zer soneblan hap.

³⁵ Hwëna zini in zen ngana insa bohë dak, zen hwëna man nga bi nik mo zi lup gul sonenna insa dahyok. Ahana man dangolek, ahana man tol dak, hen ahana kasokam tok hap niriblak.

³⁶ Nga bina in ki zep ahakore babu gwen zini beyakam etan kap gul soneka. Nonol lup gul sonen nakon man taman kinik. Hwëna desa kirekam tol hen neibiridak.

³⁷ Nga bina in dekam zep en-lala gweka, 'Ëre mo walas tangansa anik ki zer sonek. Desa sa blikip neisibilil.'

³⁸ Hwëna nga bohë tan zini in kim hla da guk, dekam zep anakan eguk, 'Wakin angkam zëre mo walas tangan hata'ara. Bi zik de tinkim, an zen sa hwëna ngana ansa bi gweblala. Nen tan, ekakim nën bi eblak!'

³⁹ Dekam zep hen tane zem insa balk dak. Ngana in kon ë san zep hiri dak, zao zep tol hëndep dak."

⁴⁰ Yesus ki zep takensibiridaka, "Zep anggur nga bina in de lwahal zankam, zen banakan sa gweibirida zala- nga bohë tan zini in saye?"

⁴¹ Zi trana in ki zep Yahudi mo mam-mamna in han ding nulblik, "Zen sa zi jal-jala insa timbwas tabir zira. Ki sa hwëna zëre mo taiblibiridan wenya kip anggur ngana insa bohë tazimdi- zen de bil gwen tamlenak ngana in kore te-ala hliksa zëre hap zer gweblan hap."

⁴²⁻⁴³ Yesus ki zep hwëna ding gulz-imki, "In sap eiwa. Zen in zebë hwëna emsa gubirida'an: Hë'ho gwibin langna men zëwe dep sap Alap nonol emsa kalang gwibiridaka, hwëna zëre mo taiblibiridan zi hip sa li yul sonezimdi- men zen diki zëre mo syal eini nol gweblan-ke. Hwëna em bawalkam esa Alap mo ola an mo eini dam ulsul?- 'Gol tauk gweblan wenya mensa gol tenya baes neibik, hwëna Bian Alap zep desa bolak ik gilki."

Zen diki Bian zère mo syal,
hen nëno mae mo nwenak zen owas
tangan.

[
44 Zep zini men zen de gol tenya iwe
ëtisik gwe'anzak,
zao sa hëndep ëtimbwas gwe-gwer.
Hen gol tenya in men zëbon mae de
zan ine'ak,
zen sa hëndep ëils gwer.]' " *

45 Alap mo golak de syal ta gwen
zi mo mam-manna hen Farisikam
de wenyä in kim kirekam Yesus
mo gulk sun de ol blaoranna insa
ësane gwe'ak, dekam zep anakan
dam nulsuk, "O zëno ola an nëbon
mae am t'ın."

46 Dekam zep sap balk tan hap
dwam nëbla'ak, hwëna zi beyam-
byana insa näribiridak. Sap zi
beyam-byana in Yesussu man enlala
në gwebla'ak, "An Alap mo ol ayang
gul gwen zi sike."

22

*Gulk sun de ol blaoranna an, Alap
mo irik gin kon gwesibir hanannak
de tembane yawalak de yaing gwen
hap dena:*

(Luk. 14:15-24)

1 Yesus ki zep etan Yahudi mo
mam-mam zini insa gulk sun de ol
blaonzimdinkim aïsıl gwibiridaka,

2 "Alap zère mo irik ginni, zen
gulk sun de ol blaonzimdinni an
kiye: Zen san de teipsin zi de tane
zikip de we oto gulblunnak tem-
bane yawalsa syal gwibinni.

3 Teipsin zini in hamal hap mes
nonol gubirida guku- men desa
zëna dwam gwibiridakaye, tembane
yawala iwe de ang tan hap. Tem-
banena kim sowe heka, ki zep zère
hon de ëbabu gwe-gwen zini lup
gul sonen daka- zen de zini insa
kwang guluda naseran hap. Hwëna

hamal hap de gubiridan wenyä in
man yaing gwen hap baes tak.

4 Teipsin zini in ki zep ahakore
naka etan lup gul soneka. Zen man
gubiridaka, 'Zini insa anakan en-
biridak, "Tembanena mes dë danan.
Sapi zirya hen tane-nena hanapna
tangan naka mes beyakam taiblin
dabir. Kitak mes hohle danan.
Angkam dekam de tembane yala
awe dep yaing gwezak." '

5 Hwëna men desa sap kwang nul-
idak, zen man nasalsibiridak. Zen
hwëna zère mae mo syal san dep
sekwak gwendak- ahakon nga san,
ahakon hen zère mae mo syal bete-
tek san.

6 Hen ahakorena teipsin zini in
hon de ëbabu gwe-gwen zini insa
dahyok, zao zep ol lamang naban
dangolebik, hëndep damerak.

7 Teipsin zini in kim kirekam
salka, zen man tangan jal gweka.
Dekam zep zère mo jana nabare zini
lup gul soneka- zen de hwëna desa
tameran hap, in zen damerakke, hen
zëno mae mo ësa de ang tan hap.

8 "Dekam zep etan ëbabu gwe-
gwen zini insa tagal gulsuku, zao zep
gubiridaka, 'We oto gublun tembane
yawala an mes hohle danan. Hwëna
mensa sap gu sonebiridak, zen hom
ang tan hap ëdakastik.

9 Zep emki angkam sek gwen-
ora bol yawal-yawal san. Mensa
ki olëtowe gwék, zen desa kitak
tembane yawala awe dep kwang
ulidahal gwezak.'

10 Babu zem in ki zep hëndep
sek gwék- ora-bol ora-bol san. Zini
men desa ki nolëtowe gwe'ak,
desa zep tingan kwang nulida
halzak. Ahakon dawem-dawem
naka, ahakon karek-karek naka.
Hëndep tembane yawal hap de tek-
sonna in dekam zep zikim sowehek.

11 "Hwëna teipsin zini in ki zep

* 21:44 21:44 Yahudi zini kasokam gola dauk gweblak, zep mensa Yesus awe buku Mazmuru kon guku (Mzm. 118:22-23), zen nonol lonen kaso hap dena. Hwëna Orya ol zi hip, ngirin gol tenya ban enlalana anakan apde në'an, "Bol-zaun tangan wenyä," zep kirekam li nul sonek. Tingare Alap mo ol tatakna awe, anakare kurungsu de hlaunnu [], zëno dam gulsunnu anakan, "Orep kim Alap mo ola ansa etan ale nul gwék, ahakon hom ayatna ansa ale nul gwék."

tıl zıka- in zen yaıng gwek, desa de hlauludan hap. Hwëna dekam zep ahana hla taka. Zen hom tembane yawala iwe dikim ang gwen hap de bajuna ala so'anka, hwëna totore bajusa ala soka.*

12 Zao zep takensıblıka, 'Wal bosyan, em banakan tangane awe tıl zıla?- tembane yawala awe dikim ang tan hap de baju ala son srëmkamye.' Zini in hwëna hom mae banakan mae ding gulbluka.

13 Teipsın zini in dekam zep zëre mo irgwa taha nakore zini gubiridaka, 'Dekam taha-tana tahalebirblin naka kawesın sın dep hiri lak- men dekon zi mo angna yusyustın nıban gona ta gwenanke, hen sang-sang hap ëkna ngalk-ngalk da gwibirinke.' "

14 Zao zep Yesus gulk sun de ol blaonzimdinni insa anakare ola ban golzausuku, "Sap eiwa, kıtak de kwang gulu dankam, hwëna eiwakam de hlıl irin wenya kıtak hom."

Yesus hon kim anakan de u siweblan hap yaıng gwe zakke, "Roma mo ırık gınnı wëhë ol lamangkam gubi'inka?"

(Mrk. 12:13-17; Luk. 20:18-26)

15 Dekam zep Farisikam de gubirida gwen zini zë-en nonol ola anakan aha-en nuk, "Nen banakare u siwen olkam esa taken-taken ëblal?- dekam de zëno karekkam de ding gun nukon karek tan hapye."

16 Ki zep zëre mae hon de ang ta gwen zisi hen teipsın zini Herodes mo hliknak de bıtı gwen zi niban Yesus osan dep lup nul sonek. Zen zep Yesusu nenblak, "Bian Guru, ëe mesë emsa tawa ëblak: Em in damdam enkame gwë gwenda. Alap mo dwam gwibinni dam-dam enkame tawa ta gwibirida, sap zi mo husus gwibin maena damnake gollëwen srëmkam tonbirida gwenda. Sap em zi mo bosesa home kara gul gwizimnira.

17 Zen in zebë emsa lakensıbli'an: Em banakane Musa mo tıtı tabin ola dam gulsu'ura? San ha nen sap esa Roma mo ırık gınnık dep pajak te-alana ol gwizim? San ha bap nen?"

18 Hwëna Yesus mes zëno mae mo enlala jal-jal aning tanna insa tame tazimki. Zep gubiridaka, "Em in eiwa de ora nakon mese tangan syan nahlak, zebe u siweblan hap de enlala naban kirekam Asa lakensıblinanzal.

19 Abe hap emki pajak hap de te-ala kasona insa ahanaka goltrëblan." Dekam zep ahanaka nolblak.

20 Ki zep zë takensıbiridaka, "Te-ala kasonak, an nara mo nwe-masesa zë yang dasık? Hen nara mo bosesa zë ale nuk?"

21 Ki zep ding nulblik, "Roma mo teipsın zi mo denakake."

Ki zep hwëna ding gulzimki, "Ki Roma mo teipsın zini in mo bi gwibin kire-kirena amki zëbe hap etan lop la gweblak. Hen kirekam, Alap mo bi gwibin kire-kirena, amki Alap hap lop la gweblak."

22 Kirekam de srip gulsizimdinnik kim sane da'ak, zen man tangan dengguanblak, ki zep hëndep hli dak.

Sadukikam de gubirida gwen zini kim Yesusu tin nıkon de etan ëngaya gwen hap dena dakensıblıkke:

(Mrk. 12:18-27; Luk. 20:27-40)

23 Yakłana dekam zep Sadukikam de gubirida gwen zini u siwen ola ban hen Yesus onak dep yaıng gwezak. Zen Yahudi mo aha hlikna- men zen anakan tawa da gwibirinke, "Zini bëjen tin nıkon etan ngaya gwen."

24 Zen ki zep hen dakensıblık, "Bian Guru, Musa Bak mo tıtı tabin olak a kirekam mo lwakye,

'Zi de we zemka walas wë lan srëmnak tınkım hli yunnu, zen oso zik de etan gonkam- zen de zë walassa aya zik mo weınak dep wë tan hap. Hen kirekam, oso zik de

* 22:11 22:11 Why. 19:7-8 * 22:24 22:24 Ul. 25:5-6

tinkim, aya zik de hwëna we semna insa gonkam.’*

²⁵ Orep awe zini ki, beyana tuju enkam, aha-ere ane-bianna. Zëna zi nik zep nonol wenya golka, hwëna walas wë lan srëmnak zep tilki. We nal zem insa hwëna oso zik zep etan golka.

²⁶ Zen hen walas wë lan srëmnak zep tilki. Zao hen etan dan-ahan nik etan golka. Zen hen walas wë lan srëmnak tilki. Hëndep tujukam de aya-wal oso-walya in kire enkam zep sap nol gwëk, hwëna walas ën srëm ennak zep juwe gwëk.

²⁷ Wenya in hwëna aumwa hap zep tik.

²⁸ Zep zen de etan ëngaya gwe'anam, men kirekam ahakon tawa da gwibirin, wenya insa nara mo wekam maka nenbi'in? Sap tujukam de zini in mes desa kitak nol gwëk.”

²⁹ Yesus ki zep ding gulzimki, “Em in ema ëbute gwe'an, sap em home Alap mo ola ban zëno sosen naban tame oso'an.

³⁰ Sap tin nikon de etan ëngaya gwenkam, dekam molya etan zënaka kap da gwëk- men kirekam hen Alap mo dam taha nakore zini zënaka de kap tan srëmkam lowehe gwenanke.

³¹ Hwëna em bawalkam esa Alap mo ola an mo eini dam ulsul?- tin nikon de ngaya gwen hap dena mensa gukuye. Zen man-am Yahudi zini emsa gubiridaka,

³² ‘Eë an eno auyan wal mo Alap- Abraham, Isak, hen Yakob Bak mo.’* Zep Zen tin zi mo Alapsa hom. Zen ngaya wenyik mo Alap.”

³³ Zi trana in kim Yesusu kirekam de srip gulsuzimdinnik sane da'ak, zen man tangan dengguanblak.

Yesus kim Alap mo titi tabin ola, bol-zaun tangan wenya, gubiridake:

(Mrk. 12:28-34; Luk. 10:25-28)

³⁴ Farisikam de gubirida gwen zini kim anakan ësak, “Sadukikam de gubirida gwen zini etan banakarekam dep?- Yesus mo olsa de ding gulblun naye,” dekam zep hen yaing gwezak.

³⁵ Zëno mae mo ahana, zen Musa mo titi tabin olsa de tawa ta gwib-inni. Zen zep Yesusu de akasiblin hap takensiblika,

³⁶ “Bian Guru, nëno mae mo titi tabin ola kon, bol-zaun tanganna enda zen moye?- desan de nen dawemkam ang ta gwen hapye.”

³⁷ Ki zep ding gulbluka, “Zen a zen moye:

‘Bian Alapsa em ensa lwa gweblan-tingare enho naban, enlala naban, hen tim niban.’*

³⁸ Zen zen- nonol wenya hen bol-zaun tangan wenyaye.

³⁹ Ahana hen ki- deban de apde nën makare naye. Zen a kirekam moye:

‘Zi bose omka em kwasang gwibirida gwen- san de enaka de kwasang gweblanna kiye.’*

⁴⁰ Tingare titi tabin ola mensa Musa Bak ayang gul gwizimki, hen Alap mo ola mensa aha zi ayang nul gwizimk, zen ausuna kitak dare titi tabin ola in zëwe.”

Yesus kim Zënaka dikim sap dam tasin hip dena goltreizimkike:

(Mrk. 12:35-37; Luk. 20:41-44)

⁴¹ Farisikam de zini in kim zë nama lowe he'ak, Yesus ki zep takensibiridaka,

⁴² “Eno mae mo tame gun nukon, Israelsa de ngaya tabin hip de Zi hip dena banakan? Zen nara mo auyan-tanekam sa hata zala?”

Ki zep ding nulblik, “Zen Daud Bak mo auyan-tanekam sa hata zala.”

⁴³ Ki zep hwëna ding gulzimki, “Ki hwëna Daud Bak zëna ba hap Israelsa de ngaya tabin hip de Zini insa ‘Teipsin Zi'kim gubluka?- Alap mo Enhona kim bi gweblakaye. Sap zen dekam anakan am guku,

* 22:32 22:32 Kel. 3:6 * 22:37 22:37 Ul. 6:5 * 22:39 22:39 Im. 19:18

44 'Bian Alap man ano Teipsinni gubluka,

"Ère mo dam taha nakon emki nikirin- dekon de hen teipsinkim irik gin hip.

Ki asa hwëna ebe hap de jal zini ere mo tana iltikinnik sisik gulin." *

45 Zep Daud insa Israelsa de ngaya tabin hip de Zini insa 'Teipsin Zi'kim gubluka, ki Zen banakan sa zëno auyan-tanekam hata zala?"

46 Hwëna Yesussu de ding gulblun hap man topse nëblak. Dekam etan hom mae Yesus hon takensiblin mae hap yaing gwëk. Saher hap baes tak.

23

Yesus kim jalse gwibiridakakemen zen ëk enkam Alap hap de syalsa nol gwëkke:

(Mrk. 12:38-40; Luk. 11:37-52; Luk. 20:45-47)

1 Yesus ki zep zi beyam-byana in han zëre hon de ang ta gwen wenya aban mae gubiridaka,

2 "Musa mo olsa de tawa ta gwibin hip de zi niban Farisikam de gubirida gwen zi niban, zen sap Musa mo weinak zëno ol san de lowehen hap emsa titi da gwibirin.

3 Zen in zep zëno mae mo ola in san emki ang ta gwen. Hwëna zëno mae mo lowehen san bahem ang ta gwen. Sap zen in dekam tawa da gwibirin, deban hom apde në gwenan.

4 Zep zëno mae mo emsa de titi ta gwibinni man nwe-mase gwëgwenan- san de zi de aha zi hon nihin dohon-honsa mam enkam wëwëk ta sone gwizimdinni kiye. Sap zen in dekam tawa da gwibirin, zen hwëna Musa mo titi tabin olak etan zën aha titi tabinsi mas-mas nul

gwenan, zep tangan hëndep dohon-hon gwëgwenan. Hwëna zëna hom desan ang ta gwenan.

5 "Zëno mae mo Alap hap de syala, zen hwëna kitak zi dikim hlauludan en hap syal ta gwenan. Zen in zep hen Alap mo ola bare kertas dak-dakna zëre mae mo mirenak hen tahanak bubuk dasik gwenan, hen bajuna zep blal-blalkam sihilhi da gwibirin- desa de alala ta gwen hapye. *

6 Zen zep tembane yawal-yawalak hen but srëm gol-golak ngeinnik de komal tum dawemnak de teinikirin hip ëdwam gwëgwenan.

7 Zen hen zi de tagal gwen maenak anakan de gubiridan hap ëdwam gwëgwenan, 'Dawem, bian guru.'

8 "Hwëna emsa bap zen gubirida gwen 'bian guru'kam. Sap eno mae mo Guru tanganna, Zen sap diki aha-en. Hen em diki aya-wal osowal makane lowehe gwenan.

9 Bahem auhu-kamanak awe zini 'bian'kam gubirida gwen. Sap eno mae mo Bianna aha-en- in Zen ngatan zi mo langnak gwë gwen-daye.

10 Hen bap zen emsa 'teipsin zi'kim gubirida gwen. Sap eno mae mo Teipsinni Zen aha-en. Israelsa de ngaya tabin hip de Zini Èe an Zen.

11 Hen zini men zen ebon mae onakon mam gwenna, zen diki zen gwë gwen- san de eno mae mo tana iltikinnik de babu gwëgwen zi.

12 Sap tingare zini men zen mam gwen hap ëdwam gwëgwenan, Alap sa hwëna otde tangannak kang gulu. Hwëna men zen otde tangannak lowehe gwenan, desa hwëna gut de tangannak sa kang gul sera.

13-14 "Kwasang tol, Musa mo olsa de tawa ta gwibin hip de wenya

* 22:44 22:44 Mzm. 110:1 * 23:5 23:5 Yahudi zini dekam Musa mo ol san ale nabare mire sigi makare naka mirenak hen tahanak bubuk dasik gwëk- Musa mo titi tabin ola bare naka. (Kel. 13:9; Ul. 6:6-9; 11:18) Zen hen Musa mo ol san bajuna sihilhi da gwibik. (Bil. 15:37-40; Ul. 22:12) Yesus hen kirekam de bajusa ala so gwëka. (Mat. 9:20; 14:36) Hwëna Musa mo olsa de tawa ta gwibin hip de zini hen Farisikam de zini sërkam tangan sihilhi da gwibik, hen kertasna insa dak-dak naka alala da gwëk- dekam de anakan zënaka boltere ta gwibin hip, "Èe an sërkamë Musa mo ol san ang ta gwenan." Hwëna kirekam karek. (Mat. 6:1)

hen Farisikam de gubirida gwen wenyä, em ëngalap gwen! Em karekna mam naka esa hla kul. Em in ëk enkame Bian Alapsa ang ë gweblanan. Men zen sap Alap mo nwenak dikim ësäm gwesin hip ëalp gwe-gwenan, hwëna eme zëbe mae hap orana layalsik gwizimnin- ere mae mo aha titi tabin olsa de mas-mas gul gwizimdinkim. Ena mese sap orana dam lasik, hwëna desan home ang ta gwenan. Hen men zen sap ang tan hap ëhohle gwe-gwe'an, eme hwëna zëbe mae hap layalsik gwizimnin. †

15 Kwasang tol, Musa mo olsa de tawa ta gwibin hip de wenyä hen Farisikam de wenyä, em ëngalap gwen! Em in ëk enkame Alapsa ang ë gweblanan. Em ema anakan ëgwë gwenan: Ere mae mo hliknak dep de zisi kwang guludan hap em ema men-san an-sankam ëhakalada gwenan- sap hi san, hen eik sin. Sap ebon mae osan de ang tan hap man sap baes ta gwenan. Hwëna zao de langanak aha-en aha-enkam hlauluda gwenkam, desa zebe hwëna dowal mo kigi mo walas hap li la sone gwibirin. Zen zep hëndep zëno mae mo jal-jala ere mae onakon sërkam tangan taman kini gwenan.

16-22 “Kwasang tol, em in zene Musa mo ola tawa la gwibirinke, em ëngalap gwen! Em karekna mam naka esa hla kul. Em in nwe diminni, hwëna ema tim ul gwenan, ‘Ee asa aha zisi dawem san dep olësek gwe-gwer.’‡ Em in zebe zisi anakan titi la gwibirin, ‘Nen sap esa nëre mae mo ol gu-gunsu anakan sosen ul gwer, “Ngli, mese ki asa

salblanda.” ’ Hwëna Ee ama emsa gubirida'an: Bahem nglisa, ahaksa ngatan zi mo langsa de gublun naban ere mae mo ola sosen gul gwen. Sap Alap Zen dekon nësa kitak irik gi'ira. Hen kirekam de gunkum, zen apdenak- anakan de gun nubanye, ‘Alap, mese ki asa salblanda.’ Zep em de Alap mo boresa de gollëwen hap ngli maesa kirekam gublunna, Alap dekon sa lamkam emsa anakare hap karek tala, ‘Em dekam ba habe Asa blikip gwesibli srëm gweka.’ 21 Hen anakan bahem ëgu gwen, ‘Alap mo gol, mese ki asa salblanda,’ sap zen apdenak- anakan de gun nubanye, ‘Alap, mese ki asa salblanda.’ Sap zëre mo gola, Zen zao Zëna gwë gwenda. 16b Em zebe hen karekkam tawa la gwibirin, ‘Nëre mae mo olsa de sosen gul gwen hap, bap nen anakan ëgu gwen, “Alap mo golak de emas, mese ki asa salblanda,” hwëna sap esa Alap mo gol ensa kirekam en gwibir.’ 17 Em in enlala joblo-topna hen nwe diminni! Em emaka dam ulsuk: Alap zëre mo nwenak bol-zaun tangan wenyä diki zëre mo gol. Sap zini kim emassa Alap mo golak nonne gwenan, dekam man nwe-mase gwe-gwenan, ‘An Alap zëre en hap dena.’ 18 Anakan hen ema tawa la gwibirin, ‘Bap nen anakan ëgu gwen, “Alap hap de tweran nin ang gulsublun, mese ki asa salblanda,” hwëna sap esa Bian mo golak de kals ensa kirekam en gwibir.’ 19 Em in eiwa nwe dimin tanganna! Em emaka dam ulsuk: Bian zëre mo nwenak bol-zaun tangan wenyä diki zëbe hap de kals. Sap tweran ninni insa de kalsnak iwe tru tasin

† 23:13-14 23:13-14 In kim orep Matius mo ola ansa etan ale nul gwëk, dekam aha zi Markus 12:40 nakore naka awe mas gulku. Desa zep ayat 14kam lun nait gwibik. Zen anakan: “Kwasang tol, Musa mo olsa de tawa ta gwibin hip de wenyä hen Farisikam de wenyä! Em in ëk enkame Bian Alapsa ang ë gweblanan. Em ema hen we sem-semna boton la gwibirin, ‘Ee asa tol eno zi swe mo kire-kire hli tandanna ebe hap tagal tasibir.’ Hwëna dekam zebe zëno mae mo kire-kirena sowëkam hli la-in gwenan, hëndep ema tap lasik gwizimnin. Hwëna karekna insa dikim ber-ber gun hup, em ema Alapsa but srëm gola kon mam blalkam en sone gweblanan- dekam de emsa zi kil tbin hip, ‘Zini an airis.’ Hwëna zen zep esa lamkam karekna mam tangan wenyä Alap onakon hla kul.” ‡ 23:16-22 23:16-22 Ayat 16-22na ansa de dawemkam tame gun hup, emki nonol Mat 5:33-37 naka baca gun.

hip kang ta senkam, zen dekam zep nwe-mase gwe-gwenan, 'An Alap zëre en hap dena.' 20 Zen in zep, zi de anakan zëre mo olsa sosen gunnu, 'Alap mo golak de kals, mese ki asa salblanda,' zen apdenak- anakan de gun nubanye, 'Alap mo kalsnak de tweran nin, mese ki asa salblanda.' Hen zen apdenak- anakan de gun nubanye, 'Alap, mese ki asa salblanda.' Alap dekon sa lamkam emsa anakare hap karek tala, 'Em dekam ba habe Asa blikip gwesibli srëm gweka.'

23 "Kwasang tol, Musa mo olsa de tawa ta gwibin hip de wenya hen Farisikam de wenya, em ëngalap gwen! Em karekna mam naka esa hla kul. Em in ëk enkame Bian Alapsa ang ë gweblanan. Alap mo olak men zen tangan bol-zaun gwek, desa de syal gwibin hip em ema baes ta gwenan. Hwëna banakare Alap hap de syal bete-tek enna, desa en ema syal ei gwibirin. Zep em anakane ëgwë gwenan: Banakare nganak de obwaga betek maesa de gola danna- sap kumli ala maesa, em desa sap ema Bian Alap hap de hlikna ol gweblanan. § Hwëna Alap mo olak men zen tangan bol-zaun gwek, desa home syal ei gwibirin-anakare saye:

Zisi bahem totores a karek tan.

Wal bosyansa em kwasang gwibirida gwen.

Hen mensa anakan zi bosyansa gugublunna, 'Ëe asa kirekam syal gwibir,' desa em hëndep sul sonen.

Zen diki bol-zaun tangan wenya zen- desa de nonol syal gwe-gwibin hip denaye. Hwëna syal bete-tekna insa lun em mas gul gwen.

24 Em an nwe haïna, hwëna ema tim ul gwenan, 'Ëe asa aha zisi dawem san dep olësek gwe-gwer.' Eno mae mo syala in man nwe-mase gwe-gwenan- san de mok honak de aïlsikan tok ing gwe henna kiye. Desa em ema eirsik gwenan. Hwëna wanya yawal de zë ing gwe henkam, deban hwëna ema otde gwibirin. *

25 "Kwasang tol, Musa mo olsa de tawa ta gwibin hip de wenya hen Farisikam de wenya, em ëngalap gwen! Em in ëk enkame Alapsa ang ë gweblanan. Eno mae mo lowe henna a kirekam mo nwe-mase gwe'anye: San de zi de piring-moksa ë-en nakon ngan tasik gwibinni, hwëna olk san bëjen. Ere mae mo timni hen kirekam: Em sap ema tahan sopna ngan lasik gwibirin, hwëna olk kon eno mae mo enhona mes beya gweka- kirekire beya gwen hap de enlalakam, hen ere mae en mo timsi de ngalap gwe-gwibin hip de enlalakam. Em ema desa de hen ngan tasin hip baes ta'an!

26 Farisi zi nwe haï! Em nonol ere mae mo enhosa em olk san ngan tasibin. Dekam esa tangan tim niban enho naban ëngan gweher.

27 "Kwasang tol, Musa mo olsa de tawa ta gwibin hip de wenya hen Farisikam de wenya, em ëngalap gwen! Em in ëk enkame Bian Alapsa ang ë gweblanan. Em in san de zi tok drë nwanun golsa de nwe awes tangankam taunnu kiye. Hwëna olk kon zi tok hanan ase nabarena zëwe.

28 Zep em in hen kirena. Zi de emsa hlauludankam, em dawem-dawem tanganna. Hwëna enhonak kirekam-kirekam karek enlalasae

§ 23:23 23:23 Yahudi zini man Musa mo titi tabinni Imamat 27:30nak ang ta gwek. Zen zep Alap hap "sepersepulu" kam nol gweblak. Zep 10 ribusa de gul irinni, seribu ensa de Alap hap golblan. 100 ribusa de gul irinni, dekam 10 ribusa de Alap hap golblan. Aha kire-kirena hen man Alap hap aha hlikna nol gweblak- sap nga nakore kire-kire betek. * 23:24 23:24 Wanya hap dena, Yesus "unta" kam anakan gubiridaka, "Em unta mo tim niban otde gwibirin." Untana hen sap wanyana bëjen ala gwibin, hen kire otweran nabare hona bëjen otdebin. Zep Yesus mo enlalana, "Em Alap mo bol-zaunkum de olsae eititi ei gwibirin- san de unta yawalsa de hla tan srëmna kiye. Hwëna ol bete-tek ensae syal ei gwibirin- men kiye, kumli alasa de Alap hap golblanna." Zep ayat 24 mo enlalana man ayat 23 naban apde në'an.

enne gwenan, zen in zebe zi tok ase karek makan ëju gwe'an.

29-31 “Kwasang tol, Musa mo olsa de tawa ta gwibin hip de wenya hen Farisikam de wenya, em ëngalap gwen! Em in ëk enkame Alapsa ang ë gweblanan. Em in zi tamera gwen zi mo wei-wik gun walas! Eno auyan-azana Alap mo olsa de ayang gul gwizimdin hip de zini man damera gwek. Em hwëna angkam desa de lo tasik gwibin golsae sam-sam la gwibir-zim'in, hen ëk enkame anakan ëgu gwe'an, 'Kwasang tol! Eyyë dekam hen lowe henanam, ëe molyë ëre mae mo auyan-azana insa mas eibiridananam- zen kim zi dawem-dawemna insa damera gwekye.' Hwëna kirekam de ëgunkum, ema kim anakan ëkira gwe-gwe'an, 'Eë an zen- zi tamera gwen zini in mo walas naye.'

32 Kirekam de lwankam, ki amki ere mae mo auyan-aza mo zi tamera gwen syala insa ayang uk!

33 Em jal-jal tanganna, zi tamera gwen zi mo wei-wik gun walas! Zep em toton banakan molye Alap mo jal hül gin nikon ëasendak.

34 “Zep emki ësane gwen: Sap em kirekame ëre mo olsa de ayang gul gwen zisi lamera gwenan, Eë in zep asa ebon mae osan dep etan ahakorena lup gul sone gwer. Enlala blal wenya hen ëre mo olsa de tawa ta gwibin hip de wenya, desa asa hen ebon mae osan dep lup gul sone gwer. Hwëna em esa hen desa lamera gwer, hen ahakorena esa telidak sonnak makan labirin gwer, hen ahakorena esa but srëm golak langole gwibir, hen ahakorena ë-ë san esa olëgwa halada gwer.

35 Zen in zep sa Alap angkam de zini ebe mae hap karekna sërkam golzimdi- kitak de zëno ol ayang gul gwen zisi de tamera gwen hap

de karekna, nonol lonesen nakon hëndep angkam dena. Nonol lonesen nakon kim Kaen Bak Habelsa karek gon srëmnak taka, dekon hëndep eno auyan-azana Alap mo ol ayang gul gwen hap de zini damera gwek, hëndep aumwa hap kim Berekia Bak mo tanena Zakaria Baksa dak. Zen Alapsa de aïriblan srëmkam Alap hap de tweran nin ang gulsuk gweblan kals alpnak dak.†

36 Eiwa denakaë emsa gwibirida'an: Kitak de zi tamera gwen karekna insa Alap mes lam gulku-dekam de otan ere mae hap ngëro gulzimdin hip!

37 “Yerusalemk de zi, em mese Alap mo ol ayang gul gwen zini beyakam lamera gwek, hen Alap mo lup gul sonen zini kasokame tok hap i libirida gwek. Eë ama sap emsa kwasang gwibirida gwek, zebë sap emsa Eë osan dep de tagal gulsun hup akabirida gwek- san de we ayang de tane-ne zemka si alakam obon gun makan de gweibiridan hap. Hwëna em esa baes ta gwek.

38 Yerusalemk de zi, zen in zep Alap angkam emsa da tasibi'ira.

39 Zep angkam em molye etan Asa hla la gwek. Hwëna em kime lamkam Asa hut lu ane gu'uk, zen dekam en esa Asa hla lal. Dekam hwëna anakare ola ban esa Asa hut lu ane gul,

'Hë'ho! An Bian mo bosekam nësa dikim oto gulsun hup hata se'ara.

Diki Alap Zen zëbe hap dawemsa golblan!' ”*

24

Yesus kim anakan hamal hap gwibiridakake, “Aumwa hap denak, a kirekam sa lwa song gwer.”

(Mrk. 13:1-27; Luk. 21:5-28)

† 23:35 23:35 Zakaria mensa Yesus awe enlala gweblaka, zen baptis ta gwibin zini Yohanis mo biasa hom. Zen apde bose zemka- men zen Alap mo ola de ayang gul gwizimkike. Zen diki desa orep Alap mo golak de kals alpnak dak. Yahudi zi mo Ibrani olkam de Alkitabnak, nonol tangan Habelsa aya zik taka (Kej. 4:8), hwëna zëno mae mo aumwa hap de bukunak Zakaria in desa dak. (2Taw. 24:20-22)

* 23:39 23:39 Mzm. 118:26

1 Yesus kim Alap mo gola kon wet soka, ëe zëre hon de ang ta gwen wenya ki zebë ërtro kinik. Zao zebë enblaonk, "Alap mo gol yala an wehasa hom dawem tangankam dauk! Man tangan kwa nuk."

2 Ki zep asa ding gulzimki, "Eiwa, emki gol yala ansa kara gun. Eiwa denakaë emsa gubirida'an: Zëno kaso kong ta zahenna aha-en mae molya lwak. Zen tingan tangan sa dri nulsul."

3 Yerusalem kon kim wet soka, zaitun tra nabare kwatap teknak zep nikin'inka. Ëe zëre hon de ang ta gwen wenya ki zebë zë du këblahak- zao de ë-erenak anakan takensiblin hap, "Asa en emki gubiridan: Alap mo gola insa dri yulsun hup gubiri, zen bawalkam sa ki lwal? Hen banakare owassa asa hla kul gwer?- dekam de anakan dam gulsun hupye, 'Aumwa hap de yaklana, Em de lwa halzan hap dena, angkam man tangan golek de gwe'an.'"

4 Yesus ki zep asa ding gulzimki, "Salok-salokkam lowehe gwek. Emsa mana yasik da gwibirink.

5 Sap zini beya nik sa ebon mae onak anakan ëboton gwe-gwezal, 'Ëe an Zen- Yesusye, emsa de ngaya tabin hip de Zi niye.' Hëndep zen sa zini beya tangankam yasik da gwibir.

6 Em anakare olsa esa ësane gwe-gwer, 'Zëwe man ëeija'an,' hen anakan, 'Awe hen sa ëeijazal,' hwëna em dekam bahem ëäiri gwen. Sap zen nonol kirekam sa Alap mo dwam gwibin sin lwa gwer. Hwëna dekam bahem ëkil gïl gwen, 'An aumwa hap denak mes zaul, zep ki lwa'an.'

7 Aha zi ausu nakorena aha zi ausu naban sa ëeija gwer, hen aha irik gïnni aha irik gïn niban sa ëeija gwer. Lang yala an san usak yala sa hatanda gwer, hen jïngïli mam enkam sa tailida gwera.

8 Zen kirekam sa karekna nonol lone sennak lwa gwer. Zen men kiye: We de jaha gwen hap eisbir anensa sëwehe kininna. Zen dekon sa ki hëndep sang-sangna dohonsa gwe song gwer.

9 "Emsa sa ahakon dahyo gwer, hëndep emsa sa karek da gwibir, hëndep emsa hen sa damera gwer. Tingare langnak de zini sa emsa husus neibirida gwer, sap em an Asa de ang gwe-gweblan wenya.

10 Dekam Asa de taïbliëblan nakon beya nik sa etan lwan dahal gwer, hen zen sa hwëna nama de taïbliëblan wenyaka husus neibirida gwer, hëndep tameran hap sa nolëgu gwer.

11 Dekam yasik ta gwibin hip zini beya nik sa anakare ola ban yaïng gwe-gwezal, 'Ëe an Alap mo ol-saë ebe mae hap ayang gulzim'in.' Hen zen zen sa boton san dep zini beyakam sil dïbirhal gwer.

12 Dekam jal-jal enkam sa lowehe gwer, hëndep beya nik sa kwasang enlalana eititi neibir.

13 Hwëna men zen de Asa de taïbliëblannak tatem ëzauk gwe'ak, hëndep aumwa hap de yaklanak de zau'uk, zen zen sa ëngaya gwer.

14 Hwëna Alap Zën de irik gïn hip de ol dawemna insa kim de tingare lang san nolhala da'ak, tingare zi ausu dikim ësane gwen hap, zen dekam tangan sa aumwa hap denak zaul.

15 "Ëe ol tan-tanna ansaë ebe mae hap golzim'in: Em esa teipsin zisi hla lal- Alapsa de lamang tan hap de karek yawalsa de Alap mo golak goltïl zïnnak, men kirekam orep Alap mo ol ayang gul gwen zini Daniel Bak gubiridakake. Zen dekam esa anakan tame ul, 'Angkam aumwa hap de yaklanak man zau'un.' ""*

Hwëna ëe, Matius, ama Yesus mo ola in hap emsa gubirida'an: Em in zen bukuna ansa aha zi hip baca ul gwizimk, dawem enkam srip ul-

* 24:15 24:15 Dan. 9:27; 11:31; 12:11

suk gwizimk. Yesus dekon anakan ayang gulku,

¹⁶ “Dekam Yerusalem mo langnak de zini em kwatap san dep eheya-hya gwek.

¹⁷ Dekam zini men zen de gol homan nakon lowe he'ak, zen bap zen etan gol mwa san ba maesa de gon hap bitī gwehan.

¹⁸ Hen nganak de syal tandan wenya, zen bap zen etan gol san dep lwan dahan- baju sal-sal maesa de teisyan hapye.

¹⁹ Kwasang tol, we walya u nubare wenya, hen nama de walassa momkam taizī gwibin wenya. Zen tol banakan molya easendak.

²⁰ Zep Alapsa emki anakan abe ta gwen, ‘Karek yala in bap zen o dil gwennak ahaksa Hari Sabatnak jowen.’

²¹ Kirekam abe la gwek, sap Alap kim lang yawala ansa syal gwibirki, hēndep sērkam de karek yala an de jowenkam, kirekam de lang dohon-hon gwenna hom mae jowek. Hen zēno hyanak etan molya kirekam okamanak jowek.*

²² Hwēna sap Alap man zēre mo hlil irin zisi kwasang gwibiridaka, Zen zep anakan hamal hap guku, ‘Karek yawala in bap zen tangan holo gwen. Ki hwēna zini kitak tangan sa juwer.’

²³ “Dekam zi de anakan emsa gubiridanna, ‘Nēsa de ngaya tabin hip de Zini men angkam awe gwē'ara,’ ahaksa, ‘Zēwe gwē'ara,’ em bahem taiblibirida gwen.

²⁴ Sap dekam yasik ta gwibin hip de zini beyakam sa yaing gwe-gwer, hen zen owas-owasna sērkam de tenggwanbin tangan naka sa syal nei gwibir- anakan dikim emsa boton ta gwibin hip, ‘Ēe an Zen-

emsa de ngaya tabin hip de Zi niye.’ Ahaksa anakan de emsa boton ta gwibin hip, ‘Ēe an Alap mo olsaē ep ayang gulzim'in.’ Zep hēndep Alap mo hlil irin zini hen desa de taiblibiridan hap sa hen ēalp gwesil.

²⁵ Zen in zebē kirekam de lwan srēmna hamal hap emsa tawa ta gubirin- em de desa enlala gwe-gwibin hip.

²⁶ Zep emsa de zi anakan gubirida gwenkam, ‘Nen ki hla tan. Zen zi ol srēm langna zēwe gwē'ara,’ em bahem dekam desan sek gwe-gwen. Ahaksa anakan de emsa gubiridankam, ‘Zen awe aning gwe'ara,’ em bahem taiblibirida gwen.

²⁷ Sap ngatan zi mo lang nakore Zi Tanganna, ano hata zanna, kitak ngatansa sa hla nulser- men kirekam ngli ang yala hla nulse gwenanke.

²⁸ Zep ano hatan hap dena, kitak de zini sa dam nulsul- men kirekam hen hi agohe de ēwale gwezan hap dena dam nulsuk gwenanke.” *

*Ngatan zi mo lang nakore Zi Tangan de etan lwa halzan hap de ol:
(Luk. 21:25-28; Mrk. 13:24-27)*

²⁹ “Lang dohon-honna in kim de hya gwesi'ik, zen hēndep dekam sa ‘yakla nwena kawesili.

Benna hen molya ngatan gwek.

Hen keisni sa ngli nakon ēlan nahlala.

Hen nglinak de teipsin-teipsin dowla-dowala sērkam sa ēilman gwe nasen gwer.’*

³⁰ Hēndep dekam zep sa tingare langnak de zini nglinak de owasna hla nulser- ngatan zi mo lang nakore Zi Tanganna Ēnaka de enlala gweblan hap de tan-tanna. Dekam tingare zi ausuna ngalap gosa sa tal- zen kim butnak Asa hla

* **24:21 24:21** Dan. 12:1 * **24:28 24:28** Hi agohesa de aha-erenak de wale gwe-gwennak hla tanna, zen dekam zini dam nulsuk gwenan, “Tweran tokna man zē lwa'ara. Desa de twenblan hap zē wale gwē'ara.” Zep Yesus gulk sun de ol blaorankam hi agohesa gubluka- dekam de anakan dam gulsun hup, “Yesus mo hatazan hap dena, zen hen aningkim molya lwak. Hwēna kitak sa zēno ngatanna hla nulser”- men kirekam ayat 27nak lwakke. (Luk. 17:37) * **24:29 24:29** Yes. 13:10; 34:4; Yl. 2:10 * **24:30 24:30** Dan. 7:13; Zak. 12:10-14; Why. 1:7

dase gu'ukye, Ère mo sosen naban ngatan yawala ban de ziati gwe zannak.*

³¹ Zen dekam sa sramin auku yawalsa nasalbir- Èe kimë ère mo dam taha nakore zini lup gul sone'ak, zen de ère mo hlil irin zisi tingan en tangan de tagal gulsun hupye, sap yakla hata sezan nako-rena, hëndep nikin anen nakorena, hëndep eiha-lip eiha-lip nako-rena."

Aumwa hap de yaklasa de kirekam dam gulsun hup de ol:

(Mrk. 13:28-31; Luk. 21:29-33)

³² "Zep aumwa hap de yaklasa de dam gulsunnu, zen tenya dëren nakon de langsa dam gulsun makan. Em kime tenya dërenna anakan hla kul gwenan, 'Man alsik, hen angkam man etan ala gwe'an,' zen dekame anakan tame ul gwenan, 'Angkam sasa gwen hap ki lwa'an.'

³³ Zen hen kirekam: Tingare kirekam-kirekam karek yala insa kime hla kul gwe'ak, zen dekam esa anakan dam ulsuk gwer, 'Angkam Alap Zën de kitak irik gilzin hap denak man zau'un!'

³⁴ Eiwa denakaë emsa gu-birida'an: Em an zene angkam okamanak lowe he'an, molye kitak juwek, zen dekam sa ki tingan lwal.

† ³⁵ Ngli naban kama naban sa jek-jak nër. Hwëna ano ola, zen hëndep denaban sa lwa gwer."

Mae hap de ol: Ngatan zi mo lang nakore Zi Tangan mo lwa halzan hap de yaklana, zen sowë zi mo kim sa lwal.

(Mrk. 13:32-37; Luk. 17:26-30,34-36; 12:35-48)

³⁶⁻³⁷ "Hwëna zini molya ngatan zi mo lang nakore Zi Tanganna ano lwa halzan hap dena anakan tame nuk, 'Yaklana' ahaksa 'Jamna dekam sa hata zala.' Alap mo dam

taha nakore zini hen molya. Tane zem Aena hen homë tame gu'un. Zen diki tawana Bian Zë-en. Sap ano lwa halzan hap dena, zen men kirekam orep lwak, Nuh Bak kim golëlowehe gwekake, zen kirekam sa etan lwal.

³⁸ Sap dekam ho namwa yawala in kim hata srëm gwe'ak, zini dekam tembanekam ëmen-man gwenda gwek, hen we wal zi zënaka kap da gwek. Zen kire enkam ki mumukkum lowe henda gwek, hëndep yaklana in dekam Nuh Bak bul yawala iwe we wal walas zeban golësesek gwe seka.

³⁹ Hwëna ho namwa yala in kim mumuk ennak lup gulsuk kinzi'ak, dekam zep auna ëhlok, 'Eiyë, an kirekam am lwa'an!' Èe de etan lwahal zannak zen kirekam sa hen auna ëhlol.

⁴⁰ Dekam zi dare de nganak syal ë'anaka, aha-en naka sa ère mo dam taha nakore zini neir inehal. Hwëna aha tola zëwe sa hli dal.

⁴¹ Hen we dare de lënsa ale'ak, aha-en naka sa nul inehal, hwëna aha tola zëwe sa hli nul.

⁴² Zep salok-salokkam Asa kara ë gweblak. Sap em molye anakan Asa tawa ëblak, 'Ano mae mo Teipsinni dekam sa etan lwahal zala.'

⁴³ "Emki sap ëenlala gwen: Gol bi nik de anakan tawa gwe'anam, 'Ano golak sowë zini namen mo kam sa til zila,' zen dekam molya nini ta'anam. Sowë zini in de tilzin srëm hap maka sale'ara.

⁴⁴ Zen in zep, em hen kirekam salok-salokkam lowehe gwek, sap em home tame u'in- ngatan zi mo lang nakore Zi Tanganna Èe de lwa halzan hap denaye.

⁴⁵ "Ano lwa halzan hap dena, zen mae makan: Teipsin nik de holokam langa san song gwe'anam. Zëre hon de babu gwe-gwen zini men zen de enlala blalkam gwë'anam hen

† **24:34 24:34** Yesu mo ola an, san ha mae hap?- Zënaka de taïbliBlan wenyaka de karek ta gwibin hip dena hen Yerusalemsa de dre tan hap dena. (Mat. 24:4-22; Mrk. 13:5-20; Luk. 21:5-24) Yerusalemsa tahunna tuju-pulukam dre dak. Dekam men zen Yesusu sane da'ak, hom ahakon juwe'ak. Zep zëno ola an, Zën de etan lwa halzan hap hom.

taïblïblan nik, zen zëbe hap maka syala anakan wei yul sone gublu ha'ara, 'Ano tim bwanak babu gwe-gwen bose omka em irik gïl gwe. Zëbe mae hap tembanena hen sowe henkam gol gwizim.'

⁴⁶ Teipsin zini in de mumuk ennak lwahal zankam- zen de anakan hla ta'an zanam, 'Zen dawemkam ano tim bwanak irik gïl gweka,' ki zen sa zëbe hap isrip-sri gwibin nika golblala.

⁴⁷ Eiwa denakaë emsa gubirida'an: Teipsin zini in dekam sa zëno bosena esek gul seblala, hen zëre mo kire-kiresa de kitak kara ta gwibin hip sa gublula.

⁴⁸ "Hwëna zini in de enlala nik karek gwe'anam, zen maka enlala gwe'ara, 'Ano teipsinni in na-en molya lwahal zaka.'

⁴⁹ Zen sa hwëna ahakore babu gwen bose zemka tangole gwibiri, hen teipsin zini in mo te-alakam sa ho mamaksa otde gwibin sosen zi bose zeban ziotdeblanda gwera hen golëtembane ta gwera.

⁵⁰ Ki sa hwëna mumuk ennak babu gwe-gwen zi karekna in mo tame gun srëmnak teipsin zini in hata zala.

⁵¹ Dekam sa tok hap zip so zala. Hen zëno angna dekam sa syauk blanak tak ta sera- men dekon ëk enkam de Biansa ang gwe-gweblan zi mo angna yusyustin niban gona ta gwenanke, hen sang-sang hap ëkna ngalk-ngalk da gwibirinke."

25

Gulk sun de ol blaoranna an, sepulukam de kwalbasa hap dena:

¹ "Zep Èe kimë Alap Zën de irik gin hip denaban golhata'anzak, zen gulk sun de ol blaoranna an kirekam sa lwal: San de sepulukam de kwalbasa de we oto gulblun hap de zisi pelita ngatan naban hut tu ane gun hup de ëhohle gwenna. Zen pelitana srën-srënkam deirensik.

² Hwëna sepulukam de kwalbasana in, aha-ere taha-tapakam enlala joblo-topna, hen aha-ere taha-tapakam enlala blala.

³ Sap enlala joblo-top wenyä in, zen pelita dang ennak dena kim sek gwëk. Tap gwënnak de etan yuren hap dena hom kap dak.

⁴ Enlala blal wenyä in zen en man minyakna hen kap dak- pelita dangnak dinik de tap gwënnak de etan yuren hap denaye.

⁵ Hwëna we oto gulblun hap de zini in na-en hom hata zaka. Kwalbasana in zen nësblak zep hëndep nwe-alk hap truwek.

⁶ Hwëna ngirin tatem zep takeranna te sok, 'Angkam man hata'ara-we oto gulblun hap de zi niye! Haen, nen angkam hut tu ane gun.'

⁷ "Sepulukam de kwalbasana in ki zep luk tak, hëndep pelita-pelita zemka ki zep ototo dabi'ik, hen ki zep tom-tom dak.

⁸ Hwëna enlala joblo-top wenyä in ki zep enlala blal wenyä insa nenbiridak, 'Abe mae hap em tol minyaksa betek enkam hlë-hle tazimdin, sap ano mae mo pelita-pelitana tinsin hip ëalp gwesi'in.'

⁹ "Zen hwëna man ding nulzimk, 'Bëjënë, ki hwëna ëre mae mo hen molya ësowehek. Amki toko san sek gwëk- te-alakam de zë teyisin hip.'

¹⁰ "Hwëna enlala joblo-top wenyä in kim toko san minyak teyisin hip sek gwe'ak, we oto gulblun hap de zini in ki zep hata zaka. Enlala blal wenyä in zen ëhohle gwëk, desa en dekam zep we oto gulblun hap de zini in tembane yawala iwe dep golëbiti gwëka. Lilikinni hen dekam zep nayalsikink.

¹¹ Enlala joblo-top wenyä in kim etan yaing gwëzak, dekam zep sap ëtaken gwë'ak, 'Bian, bian, abe mae hap em lilikinsi talusuzimdin.'

¹² "Hwëna zen man ding gulzimki, 'Eiwa denakaë emsa gubirida'an: Èe homë emsa tame tabi'in.'

¹³ "Èe in zebë hwëna emsa gubirida'an: Salok-salokkam em

lowehe gwen. Sap ngatan zi mo lang nakore Zi Tanganna ano etan de lwa halzan hap de yaklana em molye tawa ëblak.”

Dan-ahare babu gwen zi hip de gulk sun de ol blaoran:

(Luk. 19:11-27)

¹⁴ “Zep ano lwa halzan hap dena, zen hen gulk sun de ol blaoranna an kirekam sa lwal: Te-ala beya zini man aha lang san dep holokam de zë gwën hap song gweka. Nonol zëre hon de babu gwen zisi zep gu sonebiridaka- zëbe mae hap de zëre mo kire-kiresa hli tanda guzimhan hap, zen de dekam zëre mo timbwanak te-alasa mam tablan hap syal tan hap.

¹⁵ Te-ala beya zini in hon men zen ëbabu gwek, zëbon mae onakon dan-ahan en anakan dam tasi-birki, ‘An syal-syal tanganna zen,’ ahaksa, ‘An hen kire tola.’ Zen zep srën-srënkam zëbe mae hap kap ta guzim halka. Ahana kip emaskam de te-ala yuna aha-ere taha-tap enkam kap tablaka. Ahana kip yuna dan-dan teisyablaka. Hen ahana kip aha-ere yukam zerblaka. Zëna ki zep song gweka.

¹⁶ “In zëbe hap emaskam de te-alana aha-ere taha-tapkam de yukam kap tablaka, zen hëndep dekam zep te-alana inkam kire-kiresa lirak ta gwibirki, hëndep dekam aha-ere taha-tap yukam zep etan mas soka.

¹⁷ In zëbe hap dare yukam hen teisyablaka, zen hen kirekam kim syal gweka, dekam etan dare yukam zep mas soka.

¹⁸ Hwëna in zëbe hap aha-ere yukam zerblaka, zen kamasa hul gulku, zao zep te-alana insa aning taka.

¹⁹ “Lamkam kim zi yala in etan lwahal zaka, dekam zep etan te-alana insa de apdenak ziaïtblin hap gu sonebiridaka.

²⁰ Aha-ere taha-tapkam de yukam men zëbe hap hli tablaka, zen ki zep sepulukam de yukam kap tabla

zaka. Zao zep gubluka, ‘Bian, em sap aha-ere taha-tap yukame abe hap hli tablaka. Hwëna emki hla tan. Ëe kimë dekam syal gwe-gwek, etan yuna aha-ere taha-tapkamë mas sok.’

²¹ Zi yala in ki zep ding gulbluka, ‘In airis tangan! Em an abon de babu gwen zini dawem tanganna hen taïbliblanna. Em mese betekkam de zerblanna insa dawemkam irik taka, zep ëe asa etan ebe hap mam tangankam zerblal. Zep ano irik gilzin hap de tembane yawalak awe emki tülzin-ano alp nakon de hen isrip-sri gwegwen hap.’

²² “Ki zep hen in zëbe hap dare yukam teisyablaka hen hata zaka. Ki zep gubluka, ‘Bian, em sap abe hap dare yukame hli soblaka. Hwëna emki sap aken. Ëe hwëna dekam dare yukamë etan mas sok.’

²³ Zi yala in dekam zep ding gulbluka, ‘In airis tangan! Em an abon de babu gwen zini dawem tanganna hen taïbliblanna. Em mese betekkam de zerblanna insa dawemkam irik taka, zep ëe asa etan ebe hap mam tangankam zerblal. Zep ano irik gilzin hap de tembane yawalak awe emki tülzin-ano alp nakon de hen isrip-sri gwegwen hap.’

²⁴ “Ki zep hen men zëbe hap aha-ere yukam hli tablaka hen hata zaka. Ki zep gubluka, ‘Bian, ëe mesë emsa tame tak. Em in jal-jal enkame irik gil gwenda. Sap em in ere en mo eiyas gin nikore ei nika home tan gwenda, hwëna hen ebon de syal ta gwen wenyik mo irse gwen nakore nakae mamkam ere hap gulin gwenda.

²⁵ Ëe zebë emsa airi gweblak, zebë eno te-alana kamanak lo tasik. Te-alana in an dë.’

²⁶ “Ki zep ding gulbluka, ‘Em in abon de babu gwen zini jal-jal tanganna hen asang tamna! Ema eiwakam asa anakan tame taka: Ëe homë ëre en mo eiyas gin nukore

ei nika tan gwenan, hwëna aha mo irse gwen nakore ei nikaë gulin gwenan.

²⁷ Em de kirekam asa tame tankam, ki emaka ano te-alana insa te-ala lam ta gwen golak drë neka- aen de etan lwahal zankam de dekon ap engka en mas gulblun hapye.'

²⁸ Dekam zep ahakore babu zemka gubiridaka, 'Emki zëbon onak de te-alana insa al tablan. Hwëna men zëno yuna dare taha-tapakam lwa'ara, zëbe hap hwëna ërblak.

²⁹ Sap zini men zen ano kap tablanna kim syal-syal gwenna, zëbe hap etan beya en tangankam asa kap ta gweblal- dekam de hëndep taha-taha gweblan hap. Hwëna men zen ano kap tablan naka asang gweblanna, men zen betek en maekam nama lw- abla'anka, desa asa etan al tablal.

³⁰ Babu gwen zi karekna insa em lang kawesin sin dep hiri tan- zini men dekon yusyustin niban gona ta gwenanke, hen sang-sang hap ëkna ngalk-ngalk da gwibirinke.' "

Aumwa hap de zisi klis gun hup de ol:

³¹ "Ngatan zi mo lang nakore Zi Tanganna Ëe de teipsinkim hata zankam, ëre mo dam taha nakore zini sa tingan Asa ngirin da halzal, hëndep dekam Alap onakore ngatan nabare komal tumnak asa nikinzir.

³² Ëre mo dam taha nakore zini dekam sa tingare langnak de zini ëre onak dep tagal nulsul. Ëe dekam asa hlil- san de otweran zaho ta gwibin zi de zaho zemka hlinni kiye, kambingni srën de kang gun, dombana hen srën.

³³ Dekam dombakam de wenyasa ëre mo dam taha san de ëzaun hup gubiridal. Kambingkim de wenyasa, desa irgwa taha san de ëzaun hup asa gubiridal.

³⁴ Ki asa hwëna dam taha san dekam de ëzaun wenyasa insa gubiridal, 'Haen, nëre mae mo Bian dekakim zë dawemsa ebe mae hap

golzimki. Dekam bitï gwezak- ere mae hap de ëhamal tazimdinni awe dep, mensa orep okamana ansa de yang gulsun srëm nakon Bian ebe mae hap hamal tazimkike.

³⁵ Sap Ëe kimë usak naban gwë gwëk, eme tembanena ap ol gweblak. Kimë ho-hole gwe-gwëk, eme ap hona ol gweblak. Ëe kimë aha lang nakon hata gwezak, eme Asa gola kon eirin gwëk.

³⁶ Ëe kimë irkan gwë gwëk, eme abe hap pakeanna kap la gweblak. Hen Ëe kimë sang-sang gwe-gwëk, eme Asa sam lasik gwëk. Hen bwinak kim Asa se dyain gwëk, eme zë Asa du kë gweblak.'

³⁷ "Hwëna enlala dam-damkam de lowehe gwen zini in sa anakan Asa ding nulbir, 'Bian, ëe bawalkamë usak naban Emsa hla lak?- in dekamë tembanena ebe hap olblakye. Hen bawalkamë ho-hole gwennak Emsa hla lak?- in dekamë hona ebe hap olblakye.

³⁸ Hen ëe bawalkamë Emsa aha langna kore zi mo kim hla lak?- in dekamë gola kon Emsa eirinkye. Hen Bian, ëe bawalkamë irkan Emsa hla lak?- in dekamë pakeanna ebe hap kap lablakye.

³⁹ Hen ëe bawalkamë Emsa sang-sang naban hla lak?- hen bwinak de se tya irinnikye, in dekamë Emsa du këblakye.'

⁴⁰ "Ëe dekam asa hwëna ding gulzim, 'Eiwa denakaë emsa gubirida'an: Em kime kirekam syal ei gwibik, sap Asa de taibliblan walas kwasap mae hap, zen dekam Asae mas ë gweblak.'

⁴¹ "Ëe dekam hwëna irgwa taha san dekam de ëzaun wenyaka asa gubiridal, 'An kon em sek gwen. Em an zen- Alap onakore jalsa de hlaun hup de wenyasa. Tinsin srëm syauk bla yala wakuwe em bitï gwen- mensa Alap dowal mo kigi hap zëre mo taha tri so gweblan wenyasa ban dep hamal tazimkike.

⁴² Sap Ëe kimë usak naban gwë gwek, em home abe hap tembanena olblak. Hen Ëe kimë ho-hole naban gwë gwek, em home hona abe hap olblak.

⁴³ Ëe kimë aha lang nakon hata gwezak, em home gola kon Asa eirink. Ëe kimë irkan gwë gwek, em home abe hap pakeanna kap lablak. Hen Ëe kimë sang-sang gwe-gwek, hen bwinak kim Asa se dyain gwek, em home dekam Asa mas ëblak.'

⁴⁴ "Zen sa hwëna Asa ding nulblir, 'Bian, ëe bawalkamë usak naban emsa hla lak?- hen ho-hole gwen-nakye, hen aha lang nakon de hata zannak, hen irkan de gwënnak, hen sang-sang gwënnak, ahaksa bwinak de gwënnakye, in dekamë Emsa mas ëbla srëm gwekye.'

⁴⁵ "Hwëna Ëe dekam asa ding gulzim, 'Eiwa denakaë emsa gubirida'an: Asa de taïbliblan walas kwasap maena men desae mas eibirida srëm gwe-gwek, zen dekam Asae mas ëbla srëm gwek.'

⁴⁶ Zini in dekam sa syauk bla hihitinnik bitï gwer- hëndep denaban de zë lowehe gwen hapye. Hwëna enlala dam-dam enkam men zen lowehe gwek, zen zen sa hëndep de ëngaya gwen hap dena hla nul."

26

Yesussu de balk tan hap kim ëkalang gwekke:

(Mrk. 14:1-2; Luk. 22:1-2; Yoh. 11:45-53)

¹ Yesus kim kirekam tawa tasi-birki, ki zep zëre hon de ang ta gwen wenya insa gubiridaka,

² "Em tawana: Angkam yaklana dan- yakla yala Paskanak depye. Ngatan zi mo lang nakore Zi Tanganna Asa dekam sa nërgul- telidak sonnak dikim Asa makan ta irin hipye." *

³ Hwëna Yesus in kim kirekam gubiridaka, dekam Alap mo golak de syal tan zi mo mam-mamna hen

Yahudi mo nol-nola Alap mo golak de teipsin tangan zini Kayafas Bak mo golak tagal gwe'ak.

⁴ Zen Yesussu de sowëkam balk tan hap de olsa zë aha-en nu'ik-dekam de tan hap.

⁵ Hwëna zen man ëgu gwe'ak, "Yakla yalak awe bap nen balk tan, sap zini beya tangan nik dwam nëbla'an. Ki deban mae esa zë hwëna mamkam ëilman gwer."

Yesussu kim wenya minyak irase dawemkam nola kon hlë tablakke:

(Mrk. 14:3-9; Yoh. 12:1-8)

⁶⁻⁷ Yesus dekam zep Betaniak tembane tan hap Simon Bak mo golak asa golëbiti gweka. Simon Bak in, men zen orep kusta gwekake. Hwëna wenya dekam Yesus hup de kwasangsa goltrëblan hap hatazak. Zep te-ala mamkam de gon minyak, sërkam de irase dawem nabarena, golhatazak. Yesus kim zë asa golëtembane ta'anka, wenya in dekam zep minyakna inkam Yesussu nola kon hlë tablazak. †

⁸ Ëe zëre hon de ang ta gwen wenya kimë kirekam wenya insa hla kuk, ëe dekam zebë jakal eibik, hen anakanë zë lonsubi'ik, "Asya, zen ba hap kirekam tingan tangan hlei yul soneblanan?!"

⁹ Dawemna diki minyakna in te-ala hap de lirak gulunam, te-alana mam tangan naka maka nëp zertzimnin. Desa emaka tahalha zi hip kae ë gwebla-zim'in."

¹⁰ Yesus hwëna mes ano mae mo ola insa salka, dekam zep asa gubiridaka, "Em ba habe wenya ansa lonsubi'in? Zen man tangan sam gwesil- kirekam de Asa gwëblankamye.

¹¹ Sap tahalha wenya em desa nama esa olëlowehe tine gwer. Hwëna Asa em molye dakal hap ërgwë gwek.

¹² Insa minyak irase dawemkam Asa hlë tablanan, zen hamal hap

* **26:2 26:2** Yakla yala Paska hap de ola, emki ayat 17 mo olk kore alenak hlaun. † **26:6-7 26:6-7** Minyak nabare botola mensa golhatazak, zen hen kaso nwe-aweskam de syal gwibinni. (Mrk. 14:3)

ki Asa gwëblanan- deban de kaso hulak Asa drë nwanun hap.

¹³ Eiwa denakaë emsa gubirida'an: Tingare lang san kim Alap onakore ol dawemna nol halada gwe'ak, wenyanya ansa kirekam abe hap syal gwibir-blinan, desa hen sa aïsîl nei gwibir. Hëndep wenyanya ansa zep sa eititi neibir srëm gwer."

*Yudas kim Yesussu zergukuke:
(Mrk. 14:10-11; Luk. 22:3-6)*

¹⁴ Dua-blaskam de wenyanya ano mae mo ahana, ëna Kariot walya Yudas Bak dekam zep Alap mo golak de syal tan zi mo mam-mam san dep song gweka,

¹⁵ zao zep gubiridaka, "Ëe de ebe mae hap zerguzimdinkim, em te-alana banaka'en esa abe hap ërblal?" Dekam zep te-ala kasona tiga-pulu enkam nërblak.*

¹⁶ Dekam zep hëndep Yudas Bak in orana tēbla'anka- Yesussu dikim sowëkam balk tan hap denaye.

Yesus kim Paskanak dep de tembanena zère hon de ang ta gwen wenyanya ban golëtembane takake:

(Mrk. 14:12-21; Luk. 22:7-14,21-23; Yoh. 13:21-30)

¹⁷ Dekam yakla yala Paskanak dep man golek de gwe'ak- Alap men dekam Mesir kon Israelsa gwis gwe sonekake. Paska yaklanak kim zauk, zen dekam zep hen ëkon gwesik hanak- aha-ere minggukam de ragi srëmkam rotisa tru ta gwen naye. Dekam Yesus hon de ang ta gwen wenyanya ëe ki zebë anakan lakensiblizak, "Bian, endawe esa Paskanak dep de tembanena aban mae zitwenblala?- ëe akakim zao hamal uk." ‡

¹⁸ Ki zep asa ding gulzimki, "Yerusalem walya, zëbon osan dep em sek gwen. Zao anakan enblak,

'Bian Guru man emsa gublula, "Ano tîn hip de yaklanak mes zaul. Ëe zebë dwam gwe'an- eno golak de ëre hon de ang ta gwen wenyanya ban Paskanak dep de tembanesa zitwenblan hap." ' ' "

¹⁹ Ëe dekam zebë hëndep zëwe hamal ul guk.

²⁰⁻²¹ Kim kawesik, dekam kim Yesus asa golëtembane ta'anka, zao zep asa gubiridaka, "Eiwa denakaë emsa gubirida'an: Ebon mae onakon ahanik sa Asa zertrëra- zao de Asa balk tan hapye."

²² Kirekam kimë asalblak, dekam zebë tangan enlalana ëdowe hanak. Ëe dekam zebë aha-en aha-enkam lakensik gwebla'ak, "Bian, san ha asa tol home yap ki gublunda?"

²³ Ki zep ap ding gulzimki, "Nen an zene apdenak roti apna kolho honak os-os la ine gwe'an, ahana sa Asa zertrëra- zao de Asa balk tan hapye.

²⁴ Men kirekam Alap mo olak ngatan zi mo lang nakore Zi Tanganna abe hap dena lwak, zen hëndep kirekam asa tîl. Hwëna kwasang tol, zini men zen Asa dikim zë balk tan hap zertrë'ara, zen karekna mam tangan wenyanya sa Alap onakon hlaulu. Zen an zik de jaha gweblan srëmkam maka sam gwesik, sap dekam zen molya karekna mam tangan wenyanya insa goltowe'anam."

²⁵ Kariot walya Yudas in zen zertreizimdin hip ola ziaha-en gulku ki zep gubluka, "Guru, san ha asa tol home yap ki gublula?"

Ki zep ding gulbluka, "Eno ola sap eiwa kirekam."

Yesus kim zère mo timsi de enlala gwe-gwibin hip de tembanena nonola

* **26:15 26:15** Zak. 11:12 ‡ **26:17 26:17** Paskana zen Yahudi mo olkam enlalana "tamaran." Zen dekam de enlala gwibin hip- in kim Alap mo dam taha nakore zini Israel mo gol-gola tamankake, Mesir mo gol-gol san de tîlidan hap. Mesir mo nonol wasalna dekam zep juwek. Owasna insa de hlaukum, dekam zep Mesir mo teipsinni Israel mo zi ausu nakore zini insa gubiridaka, "Dikire sek gwëk." (Kel. 12:1-51) Ragina zen rotisa de syal gwibinnik mas nul gwenan- dekam de hop gwen hap. Musa man Yahudi zisi gubiridaka, "Paska yaklanak hen zao de minggunak, rotina dekam ragi srëmkam tru la gwëk." (Ul. 16:1-8)

golzimkike:

(Mrk. 14:22-26; Luk. 22:14-23; 1Kor. 11:23-25)

²⁶ Kimë tembane ta'ak, Yesus ki zep rotina ahanaka gul ineka, dekam zep dawemsa Alap hap rotina in hap golblaka, ki zep ahap gul guku. Desa zep abe mae hap anakare ola ban kap tazimki, "Em twenblandan. An ano timni."

²⁷ Ki zep hwëna anggur ho nabare mokna zer ineka, dekam zep etan Alap hap dawemna golblaka, ki zep hwëna abe mae hap anakare ola ban zerzimki, "Emki kitak otdebin."

²⁸ Sap an ano kala zen. Zen sa ano tim nikon wet sol- Alap mo zi niban de ol ziaha-en gun ësesa dikim sul sonen hapye. Zep zini beya tangankam sa ano kala kon Alap mo nwenak ëdakastil gwer.

²⁹ Eiwa denakaë emsa gubirida'an: Ëe molyë na-en etan anakare anggur hona otdek. Hwëna ano Bian mo irik ginnik kim de hata'ak, zen diki dekam asa etan eban mae apdenak ziotdebir."

³⁰ Ki zebë hwëna Alap hap de terya apdekam lak. Kimë lasik, ki zep asa zaitun tra nabare kwatap tek san dep golësek gweka.

Petrussu kim damnak gublukake, "Em esa Asa zabeblala."

(Mrk. 14:27-31; Luk. 22:31-34; Yoh. 13:36-38)

³¹ Zao zep zëre hon de ang ta gwen wenya asa gubiridaka, "Em namen Asa de karek tannak hla tankam kitak esa airin hip Asa hli la gukhal. Sap Alap mo olak man lwak,

'Ëe asa zaho ta gwibin zini insa karek tal.

Zaho zem dekam sa men-san an-sankam heya-hya gwer.*

³² Hwëna Bian kim de etan Asa ngaya ta'anka, Ëe asa dekam emsa Galilea san dep ngeirbiridal."

³³ Hwëna Petrus ki zep ding gulbluka, "Bian, ahakore wenya an sap sa Emsa hli dasil. Aena tangan molyë Emsa hli tak!"

³⁴ Yesus ki zep ding gulbluka, "Eiwa denakaë emsa gublu'an: Namen nonol ayang de gun srëmnak, em dekam esa anakan de Asa zabeblanna dan-ahan soblala, 'Zini in ëe homë tame ta'an.' "

³⁵ Petrus ki zep etan ding gulbluka, "Bian, ëe apdenak asa Eban lil. Ëe molyë tangan Emsa zabeblak." Ëe kitak kirekam zebë sap ëgu anek.

Yesus kim Getsemani kon Alapsa gu soneblakake:

(Mrk. 14:32-42; Luk. 22:39-46)

³⁶ Yesus kim asa Getsemanik golëyaing gweka, zao zep asa gubiridaka, "An zao teinikin guk. Ëe Alapsa ë-ere nakon gu sonebla'an."

³⁷ Hwëna Petrus hen Zebedeus mo walas darena, desa en zep gubiridaka- zen de ang gweblan hap. Hwëna zao zep enlalana dowebla hanaka, hëndep hlik gwebla hanan hap alp gwesiblika.

³⁸ Dekam zep zëre hon de dan-ahare ang ta gwen wenya insa gubiridaka, "Ano enlalana sërkam tangan dowe hananda, hëndep tin hibë alp gwesi'in. Em awe Asa ërgwëk, hen enlala naban esa loweher- Alapsa de abe ta tinen naban."

³⁹ Zëbon mae onakon kim engka en langa gwe halka, zao zep kamanak ik gwe heka, dekon zep Alapsa gu soneblaka, "Bian, karek yawala ansa Ëe goltowe'an, diki Em Abon onakon langa gulsun. Hwëna ano dwam gwibin sin bap zen lwan. Diki ere mo dwam gwibin sin zen lwan."

⁴⁰ Kim Alapsa de abe ta gwenna hya gwesiki, dekam zep etan dan-ahare zini in osan dep lwahal zaka. Hwëna ni truwennak zep hlauluda'an zaka. Petrussu zep zë gublu zaka, "Em san bëjen-em engka en mae Asa zersalen!"

⁴¹ Enlalakam lowehék. Alapsa e-en e-enkam abe la tinek. Kareknak ema altilink. Sap eno mae mo enho enna dawemsa de sap syal gwibin

* 26:31 26:31 Zak. 13:7

hip dwam gwe-gwenda, hwëna eno mae mo timni in tatete naka hom.”

⁴² Etan ki zep song gweka- dekon de etan Alapsa abe tan hap. Ki zep kon gu soneblaka, “Bian, Em san ha home ki dwam gwe'ara- karek yala ansa de Abon onakon langa gulsun hupye? Ki sap asa goltower. Hwëna diki ere mo dwam gwibin en san zen lwan.”

⁴³ Kim hya gwesikî, dekam etan ni truwennak zep hlaluda'an zaka. Sap zëno mae mo nwena man tanggan nwe-alk hap ëdohon-hon gwek.

⁴⁴ Dekam hen ki zep etan danahan naka hli yuludaka. Etan ki zep kire enkam Alapsa gu soneblaka.

⁴⁵ Etan kim lwahal zaka, dekam zep gubirida zaka, “Em san namae ni truwen hap ëdwam gwe tine'an? Emki sap ëkara gwen. Ngatan zi mo lang nakore Zi Tanganna Asa angkam man karek-karek gol gwen zi mo tahanak dep tapbla dazim'in.

⁴⁶ Dekam luk tak. Nen sek gwen. Emki hla tan. Asa de zergun hup de zini angkam man hata'ara.”

*Yesussu kim balk dakke:
(Mrk. 14:43-50; Luk. 22:47-53;
Yoh. 18:3-12)*

⁴⁷ Yesus in kim nama ton'anka, dua-blaskam de zëre hon ang ta gwen wenya ano mae mo ahana Yudas Bak dekam zep zi beyam-byanaban golëyaing gwe'anka- nëbok te tek teiredan naban, mensa Alap mo golak de mam-mamna hen Yahudi mo nol-nola nenbiridakke, Yesussu de balk tan hap.

⁴⁸ Zen mes anakan ola ziaha-en gulku, “Ëe kirekam asa ebe mae hap zertreizim: Men desaë babang ta'ak, zen zen- zini inye. Zen dekam zë hëndep balk lak.”

⁴⁹ Yudas kim golëyaing gwe'an zaka, ki zep hëndep Yesussu babang tan naban gublu zaka, “Dawem, bian guru.”

⁵⁰ Yesus ki zep ding gulbluka, “Wal bosyan, men kire hap hatanan zala, angkam dekam syal gwibir.” §

Zi beyam-byana in hëndep dekam zep balk dazak.

⁵¹ Hwëna ano mae mo wal bosena, men zenë ang ë gweblak, dekam zep nëbokna mol ineka. Dekam zep Alap mo golak de teipsin tangan zi nik de babu gwe-gwen zini sap zip soka. Hwëna ing ala en naka zep blansibli kinika.

⁵² Hwëna Yesus ki zep zëre hon de ang gwe-gwen zini insa jalse gweblaka, “Nëbokna insa em etan lil sonen. Sap men nara nëboksa darak hap gwire danna, desa nëbokkam sa damera gwer.

⁵³ Emki ëenlala gwen: Ëe ëre mo Biansa abe ta'anam, Zen maka zëre mo dam taha nakore jana zisi duablas batalyonkam lup gul sone'ara.

⁵⁴ Hwëna kirekam de lwa'anam, ki hwëna mensa Alap mo olsa de ayang gul gwen zini abe hap dena ale nul gwek molya kirekam lwa'anam.”

⁵⁵ Ki zep hwëna Yesus zi beyam-byana insa gubiridaka, “Em san Asa jal zisie hla lal?- zebe Asa de balk tan hap nëbok te tek teiredan naban yaing gwenan zalye! Ëe men yakla jamkam Alap mo golak emsa tawa ta gwibik! Dekam ba habe zë Asa balk la srëm gwek?

⁵⁶ Hwëna an desae angkam syal eibi'in, zen men desa orep Alap mo ol ayang gul gwen zini abe hap dena ale nukke. Zao dikim zaun hube kirekam syal eibi'in. Ena hwëna home tame u'in.”

Ëe zëre hon de ang ta gwen wenya dekam zebë kitak heya-hya gwenkam hli lak.

Yahudi mo teipsin sinodenak kim nërtrëkke:

(Mrk. 14:53-65; Luk. 22:54-55,63-71; Yoh. 18:13-14,19-24)

⁵⁷ Yesussu in zen balk dak, ki zep nërhak- Alap mo golak de teipsin

§ 26:50 26:50 Yunani olkam, mensa Yesus Yudassa gubluka, aha dam gulsunnu hen anakarekam: “Wal bosyan, em ba habe awe hatanan zala?”

tangan zini Kayafas Bak mo golak dep. Zëwe Musa mo olsa de tawa ta gwibin wenya hen Yahudi mo nolola mes tagal gwesik gik.

⁵⁸ Petrus zen lun sap-sap gwen dankam Yesussu ang gwebla song gweka, hëndep zen hen hata zaka-teipsin tangan zini in mo gol tëmna. Kol sonna iwe kim til zika, zao zep teipsin zini in sa de kara ta gwen hap de jana nabare zini hlauluda'anka. Zao zep hen nikin'in zaka. Zen man anakan de tawa gweblan hap dwam gwe'anka, "Banakan wëhë nëbla'ak?"

⁵⁹ Alap mo golak de mam-mam wenya hen tingare teipsin sinode-nak de wenya zen orasa dëbla'ak-dekam de Yesus hup boton ol bloblosa mam gulblun hap, dekam de tan hap.

⁶⁰ Beya nik blo-blo tan ola ban sap nolluwe gwe'ak, hwëna zëno mae mo ola in hom mae apde nek, zep bëjen dekon karek tan. Aumwa hap zep etan zi darena anakan olluweka,

⁶¹ "Zini an man guku, 'Ee asa Alap mo gol yawala ansa dri yulsul, hwëna yaklana dan-ahan ki asa hwëna owas hap etan syal gwibinkim sul soner.' "

⁶² Alap mo golak de teipsin tangan zini in ki zep luweka, ki zep Yesussu gubluka, "Em san ha molye mae ding gulzimki?- in sa eno karekna kira nul gwe'an zalye."

⁶³ Yesus hwëna balk enkam salsiblika. Ki zep etan gubluka, "Ngaya Zini Alap mo bose gubin niban emki asa gubiridan: Em san ha eiwa Zen tangan?- Alap mo Tanena, Israelsa de ngaya tabin hip de Zi niye."

⁶⁴ Yesus ki zep ding gulbluka, "In kirekame gunda, zen kirekamke. Hwëna Ee hen ama emsa gubirida'an: Em esa nabakam ngatan zi mo lang nakore Zi Tanganna Asa hla laser- Teipsin Zini Alap mo dam taha nakon de nikirinnik. Hen

dekon kimë etan lwa ha'anzak butnak esa Asa hla laser."*

⁶⁵ Alap mo golak de teipsin tangan zini in, kirekam de gunnuk kim salblaka, dekam zep baju ala son zemka Yesus hup de u sisngin hip kalk-kalk soka, deban zep guku, "Zen Alapsa lamang tanda. Nen ba hap de etan zëno kareksa de kira gulblun hap zini teibiridan hap? Nën mes em-am kitak Alapsa de lamang tannak asalblanan!

⁶⁶ Zep angkam ebon mae onakon banakan?" *

Ki zep ding nulblik, "An tok hap de karek tan hap man sam gwesira!"

⁶⁷ Dekam zep oltepkam nwe-masenak hol-hol da gwe'ak, hen deban zep dangole gwe'ak. Ahakon taha dak-dakkam itranak lek dya gwe'ak,

⁶⁸ deban dakensik gwebla'ak, "Em wëhë tame tanda? Nara emsa lek tyanda? Eme eiwa Alap mo zer sonen zi gwë'anam- Israelsa de ngaya tabin hip, ki emaka asa gubirida gwe'ara, 'Zi bosena zen asa lek tyanda.' "

Petrus kim Yesussu zabekakake: (Mrk. 14:66-72; Luk. 22:56-62; Yoh. 18:15-18,25-27)

⁶⁹ In kim kirekam lwa se'ak, Petrus dekam gol tëmna nikin'inika. Zëwe de babu gwe-gwen wenya ki zep zë hata'anzak, zao zep Petrusu gubluzak, "Em an hen zenke- men zen Galilea walya Yesus mae han apdenak ëtë gwekye."

⁷⁰ Petrus hwëna man zabeka- in zen zë lowe he'ak, zëno mae mo inik. Zep wenya in sa anakan ding gulbiriki, "Ee homë tame gu'un- in sa em gundaye."

⁷¹ Dekon hwëna kol son lilikin alpnak zep zau'un naka. Zëwe zep etan ahanik zëwe de babu gwe-gwen wenya hla tazak. Dekam zep zëwe in zen lowe he'ak desa gubiridak, "Zini an hen menkam Nazaret walya Yesus hun apdekam ë gweka."

* 26:64 26:64 Mzm. 110:1; Dan. 7:13; Mat. 24:30 de lamang tan zini desa tankam. Emki Im. 24:16nak hlaun.

* 26:66 26:66 Musa mo titi tabin ola kon, Alapsa

⁷² Petrus ki zep etan ding gulbirki, “Èe eiwa hom tanganë zini insa tame ta'an. Nglinak de Zini, mese asa salblanda.”

⁷³ Zëwe hom holo gwe'ak, dekam zep zini men zen zë èzau'uk etan Petrussu nenblazak, “Em an hen zëno mae mo ahanakake, sap eno ola in Galilea wal mo ol hanu.”

⁷⁴ Petrus dekam zep ol drakkam gu ane gwe'anka, “Èe hom tangan am zini insa tame tak. Nglinak de Zini Alap, mese ki asa salblanda!”

Kirekam kim gu gwe'anka, ayangna ahana hen dekam zep gu aneka.

⁷⁵ Hwëna Petrus dekam zep enlala gwibirki- Yesus mo ola mensa anakan gu-gublikaye, “Ayang de gun srëmnak, em dan-ahan sonkam esa Asa zabeblala.” Dekam zep hëndep wet soka. Gosa zep kon yusyustin niban gwë song gweka.

27

Pilatus Bak hap kim nërtrëblakke:
(Mrk. 15:1; Luk. 23:1-2; Yoh. 18:28-32)

¹ Kak tangannak zep tïngare Alap mo golak de syal tan zi mo mam-mamna hen Yahudi mo nol-nola ban etan tagal gwesik, hen dekam zep ola Yesussu de tan hap dena zïm-zïm nik.

² Dekam zep tahalen naka Roma mo bosekam de gubernor gwen zini Pilatus Bak osan dep nërhak.

Yudas kim zënaka tok hap buk tusuk sonekake:
(Kis. 1:18-19)

³ Yudas in zen zerguku, kim anakan sane gweka, “Hare ano zergun nukon sa dal,” dekam zep tangan enlalana dowebila hanaka. Dekam zep 30kam de te-ala kasona men dekam zerguzimki, desa Alap mo golak de mam-mam wenya kip hen Yahudi mo nol-nola kip etan zerzim halka.

⁴ Zao zep gubiridaka, “Èe mesë karek gwëk- karek gon srëm zini insa zergukye. Zep hëndep da'an.”

Hwëna zen man ding nulblik, “Asa ba habe desa etan gubiridala? Zen ere en mo syal sake.”

⁵ Yudas dekam zep te-alana insa Alap mo gol mwa san dep hiri ta inki. Zëna ki zep song gwëka, dekam zep zënaka tenya kon holenak buk tusuk soneka.

⁶ Alap mo golak de syal tan zi mo mam-mamna in ki zep te-alana insa tagal dasik, ki zep èguk, “Te-alana an, zisi de tan hap zergun te-ala, zep bëjen Alap hap ing tablan. Sap Musa mo titi tabin olak man anakan lwak, ‘Kire te-alasa bëjen Alap hap zerblan.’ ”

⁷ Zen kim te-alana in hap ola aha-en nuk, dekam zep te-alana inkam kama ngatdarak syal gwe-gwibin zi mo ngana nèk- aha lang nakon de yaïng gwe-gwezan zi tok-toksa de zë kang gulne gwen hap.

⁸ In zep hëndep angkam kamana insa nen gwibirin, “Zi Kal Kama.” *

⁹ Zen dekam zep zauk- mensa orep Yermia Bak hamal hap Alap mo ola anakan ayang gulkuye,

“Zen sa 30kam de te-ala kasosa nulin- Israel zi zëre mae mo ol aha-en gun sun de zergun te-alana in saye.

¹⁰ Dekam sa hwëna kama ngatdarak syal gwe-gwibin zi mo ngasa nër- men kirekam Alap hamal hap asa gublikake.”*

Pilatus Bak hap kim tapbla dablakke:
(Mrk. 15:2-5; Luk. 23:3-5; Yoh. 18:33-38)

¹¹ Roma mo bosekam de gubernor gwen zini Pilatus Bak onak kim nërhatatak, zao zep takensiblika, “Em an san ha eiwa zen- Yahudi mo teipsin niye?”

Ki zep ding gulbluka, “In kirekame gunda, zen kirekamke.”

* 27:8 27:8 Zen mae hap “Zi Kal Kama”kam kamana insa bose nuk: Insa “zergun te-ala”na Yudas onakon neirink (ayat 6), zëre mae mo olkam man kirekam de te-alana nen gweblak “zi kal te-ala.” Zen zep kamana insa bose nuk “Zi Kal Kama”kamye. * 27:10 27:10 Zak. 11:12-13

¹² Hwëna Alap mo golak de syal tan zi mo mam-mamna hen Yahudi mo nol-nola in dekam zep Yesus mo karekna Pilatus hup kira nul gwebla'ak, hwëna Yesus hom mae ding gul gwizim'inka.

¹³ Dekam zep Pilatus takensiblika, "Em san ini hom?- zebe ding gul gwizim srëm gwe'araye. Zëno mae mo eno kareksa de kira gul gweblanna mes-am beya gwenan."

¹⁴ Hwëna Yesus man tangan ding gulzimdin hip baes gweka. Hëndep Pilatus man tangan tenggwanblaka.

Anakan kim ëasas gwekke, "Te-lidak sonnাক makan laink!"

(Mrk. 15:6-15; Luk. 23:13-25; Yoh. 18:39-19:16)

¹⁵ Yakla yala Paska jamkam kim Israelk de zini ëtagal gwe-gwek, dekam man zëno mae mo gubernora bwinak de zini aha-en aha-enkam nëser sone gwizimk-tingare zi tra mo anakan de gun sun, "Desa ap zeser sonezim."

¹⁶ Dekam zëwe bwinak zini ki, bose teipsiblinna, Roma mo irik gin nikon dikim wet so gwen hap de asas gwe-gwen zi, bosena Barabas Bak. Zëno aha bosena hen ki Yesus mo bose naban apdenak.

¹⁷ Zep zi beyam-byana in kim Pilatus mo gol homannak tagal gwesizik, dekam zep Pilatus takensibiridaka, "Em narasae namen dwam ëbla'an?- desa de ëe ebe mae hap tapbla tazimdin hipye. San ha Barabas Baksa? San ha Yesussu?- mensa hen nen gweblananke, Israelsa de ngaya tabin hip de Zini."

¹⁸ Zen mae hap ki kirekam takensibiridaka: Sap zen mes anakan tame gulku, "Zi beyam-byana man Yesussu menkam ang në gweblak, zep Yahudi mo mam-mamna husus në gweblak, hëndep zep angkam tan hap asas nëbla'an."

¹⁹ Pilatus dekam teipsin zi hip de komal tum yalak nikin'inkazisi dekon klis gul gwen hap de komal tumnak. Zi beyana insa kim kirekam takensibiridaka, hwëna dekam zep we zik mo ola

nolhatablazak. We zem man anakan gu soneblak, "Em bahem mas gwen-karek gon srëm zini insa de karek tannakye, sap ëe eisiri namen husus gwibin tangan nakaë tal- zëbe hap denaye."

²⁰ Hwëna Pilatus kim we zik mo ola insa sane gwe'anka, hwëna dekam Alap mo golak de mam-mam wenya hen Yahudi mo nol-nola in zi beyam-byana insa nolëton gwe'ak- zen de anakan abe ta gwen hap, "Barabassa ap hil ti sonezim. Yesussu lak."

²¹ Zep kim Pilatus etan takensibiridaka, "Zi darena an kon, em narasae dwam ëbla'an?- desa de ebe mae hap zeser sonezimdin hipye."

Dekam zep ding nulblik, "Barabassa."

²² Hwëna dekam zep etan takensibiridaka, "Ki hwëna ëe banakan asa Yesussu gwëblal?- insa ahakon ena en gweblananye, Israelsa de ngaya tabin hip de Zi'kim."

Ki zep ding nulblik, "Desa te-lidak sonnacak makan laink."

²³ Dekam zep hwëna takensibiridaka, "Hwëna zen banakan karek gweka?"

Hwëna dekam tangan zep mam en tangankam ëgu ane gwe'ak, "Desa te-lidak sonnacak makan laink!"

²⁴ Pilatus dekam zep enlalana anakan topse gwibirida'anka, "Ëe an etan banakan asa zi trana ansa gweibiridal?" Hen anakan tame tabirki, "Zen ëilman gwen hap ëalp gwesin'ïn." Dekam zep zëre hon de ëbabu gwe-gwen zisi gubiridaka-hosa de golbla halzan hap. Zao zep zi beyam-byana in mo nwenak tahana ngan sosu'unka. Dekon zep gubiridaka, "Ëe homë zini ansa de tan hap de ola mas gu'un. Alap molya zëno kala abe hap ngëro gulbluka. Sap an e-ene la'an."

²⁵ Dekam zep tingare zi beyam-byana in ding nulblik, "Zëno kala zen sap sa abon mae onak ngëro gwer- hen ano mae mo auyan-aza onakye."

26 Dekam zep Pilatus Barabassa zeser sonezimki. Hwëna Yesussu zep jana nabare zi hip tapbla tazimki- zen de hwëna tangolen naka te-lidak sonnak makan ta irin hip.

Pilatus mo jana nabare zini kim Yesussu lamang da gwe'akke:

(Mrk. 15:16-21; Luk. 23:26-43; Yoh. 19:2-3)

27 Dekam zep Pilatus mo jana nabare zini Yesussu nërtilzik- zëre mae mo batalyonak de gol yalak. Zen zëre mae mo ahakorena kitak de tagal gulsun hup nenbiridak, hëndep Yesussu man dot dasizik.

28 Ki zep hëndep irkare dak, hwëna teipsin zi hip de baju kwang kal-kalsa zep ala nosoblak- teipsin zi makan zau de swrë tan hap.

29 Hen nolak de ala gulblun hap, dokot të ngi-ngisa mlin-mlin nuk-teipsin zi hip de emaskam weir gul-sublun makan. Ki zep hen dutena dam tahanak nolblak. † Zëna dekam zep botonkam zëno nwenak bok-lena kom da gweba'anzak- anakan dikim zë lamang tan hap, "Dawem, bian. Em in zen- Yahudi mo teipsin niye."

30 Zao zep oltepkam hol-hol da gwe'ak, hen dutena insa zëno tahanak etan nulink, dekam zep nolak lek dya gwe'ak.

31 Lamang tanna kim hya neisiblik, dekam zep etan baju kal-kala insa nalsiblik, dekam zep etan zëre mo bajuna ala nosoblak. Ki zep hwëna nërwet sok- dekam de te-lidak sonnak makan ta irin hip.

Te-lidak sonnak kim makan da inkke:

(Mrk. 15:22-32; Luk. 23:26-43; Yoh. 19:17-27)

32 In kim Yesussu te-lidak sonnak de makan ta irin hip nërsonng gwe'ak, oranak Kirene walya Simonsa zep nërtowe'ak. Zao zep

Yesus hup de te-lidak soblanna insa de wë soblahan hap tik-tik dak.

33 Ki zep hëndep kwatap tek bosena Golgotak yaing gwesek. Bosena in mo enlalana, "zi nol swra."

34 Zëwe zep Yesus hup anggur ho enenna nolblak- desa de otden hap. Hwëna kim sap akasibirki, dekam zep baes gwibirki.*

35 Te-lidak sonnak kim makan daink, dekam zep zëno pakeanna zëre mae hap dobe abu mo kim de zënaka dam tasik gwibinkim kae nëblandak.*

36 Zëna zao zep teinikin'ik- dekon de kara tan hap.

37 Nol bol tahan nakon ol alesa zë makan nulink- dekam de tïngare zi anakan tame gun hup, "Zen kire jal hap da'an." Zep anakan ale nuk, "An Yesus- Yahudi mo teipsinni."

38 Zen sowë zi dare naban Yesus mae han apdekam te-lidak sonnak makan dabirink- ahana Yesus mo dam taha san dekam, ahana irgwa taha san dekam.

39 Zini men zen desan taman gwe-gwe'anzak, zen nol ëwak gun nuban ol mamkam anakan lamang da kinï nasen gwe'ak,*

40 "Em an zen eme guku, 'Alap mo gola asa dri yulsul, hwëna dan-ahare yaklakam asa etan syal gwibin kim sul soner.' Ki em san Alap mo Tanesa hom?! Te-lidak sonna in kon em enaka de ngaya tan hap ati gwezan."*

41 Hen Alap mo golak de syal ta gwen zi mo mam-mam wenya hen Musa mo olsa de tawa ta gwibin hip de wenya hen Yahudi mo nol-nolkam de wenya, zen hen man Yesussu anakan lamang da gwe'ak,

42 "Zen aha zi ensa man ngaya ta gwibirki, hwëna zënaka hom tol ngaya ta'ara! Zen de eiwa Israel

† 27:29 27:29 Teipsin tangan zini dekam emaskam de mlin makare naka nolak ala nul gwek, hen teipsin zi hip de dutesa nurensik gwek. Zen zep jana nabare zini in kiresa etan botonkam syal neizimk- dekam de Yesussu swrë tan hap. * 27:34 27:34 Mzm. 69:22 * 27:35 27:35 Mzm. 22:19

* 27:39 27:39 Mzm. 22:8; 109:25 * 27:40 27:40 Mat. 26:61; Yoh. 2:19

mo teipsinkim gwë'anam, dikire te-
lidak sonna in kon ati gwezak. Ki
amaka laiblibla'an.

⁴³ Zen Alapsa taibliblaka hen man
zënaka gu gweblaka, 'Ëe an Alap
mo Tane.' Ki Alap de eiwa dwam
gweblankam, dikire ngaya tak."*

⁴⁴ Sowë zi darena insa Yesus
mae han makan dabirink, zen hen
kirekam lamang laka.

Yesus kim tilsikike:
(Mrk. 15:33-41; Luk. 23:44-49;
Yoh. 19:28-30)

⁴⁵ Yaklana kim bolak zauku,
dekam zep tingare langna owas
hap kawesik. Hëndep yakla nwna
kim dan-ahannak zauku, dekam zep
etan hleng gwék.

⁴⁶ Yesus dekam zep Ibrani olkam
ol mamkam hërheka, "Eli, Eli, lama
sabakhtani?" Nère mae mo olkam
Zen anakan hërheka, "Are ano Alap,
ano Alap, Em ba habe Asa da
tasi'ira?"*

⁴⁷ Hwëna in zen zë kara da'ak,
ahakon hom dawemkam nasalblak,
zep zënaka nenbiridak, "In Elia
Baksa hërheblanda."

⁴⁸ Dekam zep ahanik nabalba
enkam hluweka, yera jaubum
makare naka zep gol hanaka, desa
zep anggur ho enennak os gul ineka.
Desa zep te tek gwënnak de kyaon
sonen naka mipnak goltrë seblaka-
desa de kwlem gun hup.*

⁴⁹ Hwëna ahakon man nenblak,
"Dikire gwëk. Elia Bak wëhë yap
ngaya ta'an zaka?"

⁵⁰ Yesus ki zep etan ol mamkam
hërhe hanaka. Dekam zep hëndep
tilsikì.

⁵¹ Alap mo gol mwanak de kaen
lilikin glaing-glìng yawala dekam
zep owas hap kalk neisik sonek.
Jingil yawala hen dekam zep gwëka.
Hen zëwe de kaso nabare kwatap-
tek kwatap-tekna ahakon hëndep
man ehlang-hlang gwék.

⁵² Zi tok-tok kang gulne gwen kaso
lilikinni man ètalusundak, hen Alap

mo hlil irin wenya men zen orep
juwe gwék man beyakam èngaya
gwendak.

⁵³ Yesus kim tin nikon ngaya
gwëka, dekam zep zen hen zi lo
tasibin kamana in kon sek gwék,
hëndep dekam zep Yerusalemk bitì
gwezak. Zëwe zini beya nik
nolètowe gwe'ak.

⁵⁴ Jana nabare zi mo mamna
in zen apdenak zëre mo ahakore
naban zikara ta'anaka, dekam tan-
gan zep sèrkam golëairi'anaka- jingil
yala in kim gwëka, hen tingare
owas-owasna insa kim hla nukke.
Dekam zep èguk, "Zini an eiwa Alap
mo Tane!"

⁵⁵ We walya hen beya nik langa
nakan kara da'ak. Zen men
zen hëndep Galilea kon mas gwe-
gweblan hap ang nèbla song gwe
zakke.

⁵⁶ Ahana Yakobus ne Yusup nik
mo anena Maria- men zen hen zëno
nik mo ayana Yesusu wë takke,
ahana bose apde zem Magdala kore
wenya Maria, hen ahana Zebedeus
Bak mo we.*

Yesusu kim lo dasikke:
(Mrk. 15:42-47; Luk. 23:50-56;
Yoh. 19:38-42)

⁵⁷ Kim kam-en gwe'ak, dekam
zep te-ala beya zini Arimatea walya
Yusup hata zaka. Zen hen Yesusu
de ang gwe-gweblanna.

⁵⁸ Zen dekam zep Pilatus Bak osan
dep song gwëka- Yesus mo tok naka
dikim lo tasin hip de abe tan hap.
Pilatus dekam zep jana nabare zisi
gubiridaka- Yesus mo tok naka de
Yusup hup zergublun hap.

⁵⁹ Yusup dekam zep hëndep Yesus
mo tokna insa zizeryahe halka.
Kaen èse ngap-ngapkam zep zita-
haleka.

⁶⁰ Dekam zep Yusup zëre hap de
hamal gulblun kaso hulak Yesus mo
tokna insa zidre neka. Lilikinni kaso
yawalkam zep nulhlusukink. Zëna
ki zep sek gwék.

* 27:43 27:43 Mzm. 22:9
Mat. 13:55; Yoh. 19:25

* 27:46 27:46 Mzm. 22:2

* 27:48 27:48 Mzm. 69:22

* 27:56 27:56

⁶¹ In kim Yusup golësyal ta'anaka, Magdala kore wenya Maria apde bose zem Maria han dekam zao hen inikin'ik. Dangna kim kaso hula in san ëk.

Pilatus Baksa kim Yesussu de drënen kaso hulsa de jana nabare zi kara gun hup abe dakke:

⁶² Zao de yaklana dekam Hari Sabat yawal- Paska hap de yakla tangannak. Dekam zep Alap mo golak de syal ta gwen zi mo mam-mamna hen Farisikam de zi niban apdekam Pilatus osan dep sek gwëk.

⁶³ Zao zep nenblak, "Bian, ëe ama ëenlala gwer, zisi de yasik ta gwibin zini Yesus in kim nama gwë'anaka, zen man anakan gu gwëka, 'Yaklana kim de dan-ahannak zau'uk, dekam asa etan tin nikon ngaya gwer.'

⁶⁴ Zen in zebë emsa abe la'an: Emki ere mo jana nabare zisi gubiridan- zen deka dawem enkam kara nuk, in zao ir lo dasikke. Zëre hon de ang ta gwen wenyik mana zëno tok naka sowëkam nër halank. Hwëna zen dekam sa zisi ahap da gwibir, 'Zen mes etan ngaya gwëka.' Hwëna kirekam de ëboton gwenkam, zen dekam tangan sa botonna mam nulsuk song gwer."

⁶⁵ Pilatus ki zep ding gulzimki, "Jana nabare zini ansa ama ebe mae hap lup gulzim'in. Emki desan dep zon guludan- dawem en tangankam deka kara nuk."

⁶⁶ Desan kim sek gwëk, dawemkam zep Yesussu de drënen kaso lilikinni insa sip dabik. Jana zini in zëwe zep kara nul gwe'ak-zi de zëwe mae ëgolek de gwezan srëm hap.

28

*Yesus kim ngaya gwëkake:
(Mrk. 16:1-8; Luk. 24:1-12; Yoh. 20:1-10)*

¹ Hari Sabat hyanak, kak tanganak zep we darena song ëk- Magdala kore wenya Maria bose apde zem Maria han, Yesussu de drënen kaso hula insa de etan hla kun hip.

² Hwëna Alap mo dam taha nakore zini kim ngatan zi mo lang nakon ati gwe zaka, jingil yala dekam zep hëndep gwëka. Hwëna dam taha nakore zini in zep drënen kaso lilikinni insa irhi gul zuka. Zëna hwëna zao zep nikin ane'anaka.

³ Zëno nwe-masena san de ngli angna kiye, hen zëno bajuna ngap-ngap tanganna- but ngap-ngapna kiye.

⁴ Jana nabare zini in zen kaso hula insa kara nu'ik, karekkam aïrïn hip ëyal-yal gwëk, hëndep tok-tok makan zep zë altink.

⁵ Hwëna Alap mo dam taha nakore zini in ki zep wenya insa guzimki, "Bahem aïrïn. Em an Yesussue lëbla'an zala- te-lidak sonnak insa makan da inkke.

⁶ Zen awe hom. Bian Alap mes tin nikon ngaya tala- men kirekam Yesus Zëna hamal hap emsa gubirida guk gwëkake. Haen, emki sap hla kulzin- men zao sap nën nekke.

⁷ Nabakam emki olahan. Zëbon de ang ta gwen wenya anakan enbirida, 'Zen mes ngaya gwera. Angkam Zen mes emsa Galilea san dep ngeirbiridala. Em zao esa ërtower.' In sya. Asa Alap zer sone zala- ebe mae hap de kirekam ayang gulzimdin hip."

⁸ Dekam zep we darena in nabalba enkam olahak. Zen man sap aïri'ak, hwëna dawemkam hen isrip-sri ë'ak. Hlu kënkam zep song ë'ak- dekam de nabakam Yesus zëre hon de ang ta gwen wenya insa enbiridan hap.

⁹ Hwëna kim song ë'ak, zao zep mumuk ennak Yesus Zënaka zertreizimki. Zen kim anakan guzimki, "Dawem," dekam zep hëndep golek de lazak. Zao zep hëndep bokle kom osoblan naban tanana babang osoblazak, deban isrip-sri ëbla'ak.

¹⁰ Hwëna man guzimki, "Bahem aïrïn. Hwëna ano oso walkam de gubirida gwen wenyaka em anakan enbiridan- zen deka Galilea san sek gwëk. Zen zao sa Asa nërtower."

Jana nabare zini in kim Alap mo golak de syal tan zi mo mam-mamna insa anakan nenbiridakke, "Yesus mes ngaya gwera."

11 We darena in kim song ë'ak, hwëna jana nabare zini in zen drënen kaso hula insa kara nu'ik, zëbon mae onakon ahakore nik zep lwan dahak- zen de Alap mo golak de syal tan zi mo mam-mamna insa gubiridan hap, kitak in zen ki zë jowekke.

12 Alap mo golak de mam-mam wenyä in dekam zep Yahudi mo nol-nola ban ola aha-en nuk- dekam de jana nabare zini in hap te-alasa mam enkam zerzindin hip.

13 Zao zep nenbiridak, "Em anakan ëgu gwëk: 'Zen zëre hon de ang ta gwen wenyik Yesus mo tokna sowëkam nërhak- ëe kimë truwe guk hakke.'

14 Hwëna gubernor de emsa ni truwenkam salbirdankam, zen ëe asa deban dawem enkam ëraışil gwër- emsa de kire hap karek tabin srëm hapye."

15 Hëndep jana nabare zini in zep Yesus mo ngaya gwen ola insa dikim ber-ber gun hup de te-alana insa neirink. Hëndep Yahudi zini anakare olsa zep nol halasenk, "Zen eiwa zëre hon de ang ta gwen wenyik kam sowëkam nërhak." Hëndep angkam mae kirekam zep ëgu gwenan.

Yesus kim zëre hon de ang ta gwen wenyä kip Zënaka zertreiz-inkike:

(Mrk. 16:14-18; Luk. 24:36-49; Yoh. 20:19-23; Kis. 1:6-8)

16 Seblaskam de zëre hon de ang ta gwen wenyä ëe dekam zebë Galileak de kwatapna in san dep sek gwëk-men kirekam Yesus Zëna asa gubirida gwëkake.

17 Zao kimë Yesussu hla la'ak, zao zebë bokle kom tablan naban isrip-sri ëblak. Hwëna abon mae onakon aha korenak anakare enlala hataz-inkike, "An san ha auna?"

18 Hwëna Yesus dekam zep asa golek de tabir zika, zao zep asa gubiridaka, "Tingare sosonna ngatan zi mo langnak dena hen auhukamanak dena, Bian mes abe hap kitak tapbla gulbluka.

19 Zen in zep tingare lang san em sek gwen, zëwe kitak de zi ausuna Asa de ang gwëblan hap titi labir song gwëk, deban baptis la gwëbik-ëre mo Bian mo bosekam, Tane zem ano bosekam, hen Alap mo Enho mo bosekam.

20 Men desaë emsa desan de ang tan hap titi ta gwëbik, em hen desan de kitak ang tan hap tawa la gwëbik. Hen emki ansa enlala gwë-gwëbin: Aena asa emsa yakla jamkam kara tabirida gwër- hëndep aumwa hap de yaklanak de zau'uk."

Yesus hup de Ol Dawemna mensa Markus ale gulkuke

Baptis ta gwibin zini Yohanis kim Yesus hup orana hamal ta gublukake:
(*Mat. 3:1-12; Luk. 3:1-18; Yoh. 1:19-28*)

¹ Ol Dawemna an Alap mo Tanena Kristus Yesus hup dena.

² Zëno ausuna, men kirekam Alap mo ol ayang gul gwen zini Yesaya Bak Alap mo ola orep ale gulkuke. Zen mae hap denaka ale gulku: Alap kim Tane zemka hamal hap anakan gu-gublukake,

“Èe asa Emsa de ngeir gublun hap zisi zer soner-zen de nonol ère mo olsa ayang gul gwizimdin hip, ebe hap dikim orasa sal ta gublun hap.*

³ Zi zer sonenna in, zen zi srëm lang nakon sa anakan taken gwera, ‘Haen, nère mae mo Teipsin Zi hip nen orasa hamal ta gublun!

Hen nen dam-dam ta gublun!’ ”*

⁴ Yesaya in kirekam ale gulku, kirekam zep ki hëndep holo gwesik hannak Alap mo zer sonen zini in zi srëm langnak hata zaka. Zëno bosena Yohanis. Zen zëwe zini baptis ta gwibirki, hen anakan titi ta gwibirki, “Ere mae mo karek-karek nakon em èhalen. Alap dekam sa eno mae mo karek-karekna tap gul-suzimdi. Em dikim enaka anakan golëtrë gwen hap, ‘Èe ama angkam Alapsa ang gwebla'an,’ èe ki asa hwëna emsa baptis tabir.”

⁵ Dekam zini beya tangaran nik Yohanis onak dep tingare Yerusalem mo lang nakon weyana Yordan san dep sek gwe-gwek. Zëwe zep zëre mae mo kirekam karek-karekna damnak èkira-kla gwe-gwek. Ki zep hwëna baptis ta gwibirki.

* 1:2 1:2 Mal. 3:1 * 1:3 1:3 Yes. 40:3

⁶ Yohanis in Alap mo ol ayang gul gwen zini Elia Bak mo kim hen gwë gweka, zep unta ala nakore bajuna zëno kim hen ala so gweka. Takna hen Elia mo kim tweran sopkam denaka daul gweka. Tembanena hen zëno kim tembane gwe-gweka, zep èkasna twenblanda gweka, hen sobwal hona otde gweka.

⁷ Zen hen man zë anakan ton-birida gweka, “Ano lure nakon sa ahana hata zala- abon onakon de Teipsin Tangan Zi niye. Èe dawem naka hom- Zëbon onak de babu gwen hap, hen sap zëno tana maesa de ngan sosublun hapye.

⁸ Èe weyakamë emsa baptis ta gwibi'in. Zen hwëna Alap mo Enhokam sa emsa baptis ta gwibiri.”

Yohanis kim Yesussu baptis takake:

(*Mat. 3:13-17; Luk. 3:21-22*)

⁹ Zao kim lwa se'ak, Yesus hen dekam zep Galilea mo langna Nazaret kon hata zaka. Desa hen dekam zep Yohanis weyana Yordankam baptis taka.

¹⁰ Ho nakon kim etan zil he'an zaka, ki zep gulk sun ake seka. Nglina dekam zep hëndep hlang në hanak. Alap mo Enhona dekam zep hen mawana ohola mo kim Yesus onak dep ati gwe ine zaka.

¹¹ Ki zep hwëna Alap mo ola èsalsek,

“Em in ère mo Tane- ère mo dang tininak de tanganna. Èe ama tangan Emsa sam gwesik gweblanan.”

Dawal mo kigina kim Yesussu akasik gwebla'ankake:

(*Mat. 4:1-11; Luk. 4:1-13*)

¹² Alap mo Enhona dekam zep hëndep Yesussu zi srëm lang san dep zersong gweka.

¹³ Orapna empat-pulu enkam zë zë-en gwë gweka, hwëna dowal mo kigina zao zep akasik gwebla zaka. Langna iwe hen kirekam-kirekam otweran jal-jala beya tanganna. Hwëna Alap mo dam taha nakore zi zë mas në gweblak.

Yesus kim Galileak syala kon gwe-sibir hanakake:

(Mat. 4:12-22; Luk. 4:14-15; 5:1-11)

¹⁴Yohanissi kim bwinak tak daink, Yesus dekam zep langna Galilea san song gweka. Desan zep Alap onakore ol dawemkam tonbirida song gweka.

¹⁵Zen man gubirida gweka, "Alap Zën de irik gin hip dena mensa kara ei gwibik angkam mes hatal! Zen angkam man kon gwesik hana'ara-teipsinkim de nesa irik ginkimye! Zep ere mae mo karek-karek nakon em ehalen, hen Alap onakore ol dawemna ansa em taiblibin."

¹⁶Yesus kim Ho Gutuna Galilea mo alp san song gweka, zao zep hogwe tahyo gwen zi darena ake'anka- Simon Baksa oso zem Andreas han. Jalakam hogwesa lahyo'anka.

¹⁷Yesus ki zep zë guzim zika, "Asa em ang eblan. Ee asa emsa zisi de hwëna lahyo gwen hap tawa sol."

¹⁸Dekam zep hëndep jalana insa hli koso guk halka- Yesussu dikim hwëna ang eblan hap.

¹⁹Dekon kim deban engka en zisong gwe'anka, zao zep etan zi darena ake'anka- Zebedeus mo walas darena, Yakobus ne Yohanis neka. Bul mwanak zëre nik mo jalasa sam ososu'unka.

²⁰Yesus zao zep hen desa kirekam guzim zika. Zen hen dekam zep Yesussu de ang eblan hap bi zem Zebedeussu bul mwanak hli laka-hëndep zëbon de te-ala hap syal ta gwen zi niban.

Yesus kim zi nikon dowala zeralsa sonekake:

(Luk. 4:31-37)

²¹Yesus ki zep zëre hon de ang ta gwen wenya ban Kapernaumk golëyaing gweka. Hari Sabatnak kim hatak, dekam zëwe de but srëm golak zep golëbiti gweka. Dekam Zen zep kitak tawa tabirki.

²²In desa tawa tabi'inka, man tangan dengguanbla'ak. Sap zëno ola sason tanganna- san de teipsin zi mo tawa tabinni kiye. Musa mo

olsa de tawa ta gwibin hip de zi mo tawa tabin niban apdenak hom.

²³Hwëna dowal mo bi gweblan zini ki zep hen zë til zika, zao zep hërhe zaka,

²⁴"Wëo, Nazaret walya Yesus! Em aban mae ba olsa de etoran hap? Em san asa de tameran habe hata zala? Ee mesë emsa tame tal! Em in Alap mo zer sonen Zi Lalakna."

²⁵Yesus ki zep zëbon de dowala insa jala ban gubluka, "Balkkam! Zini in kon em wet son!"

²⁶Hwëna dowala in ki zep zini insa nonol mam en tangankam titikin taka, ki zep hwëna mam enkam de hërhen naban zini in kon wet soka.

²⁷Tingare zini sërkam tangan dengguanblak, zep zënaka anakan donbirida nasen'ak, "Ha! Zëno ola wehasa hom! Orep hom- kirekam de tawa tabin niye. Zëno ola sason tanganna- san de teipsin zi mo ola kiye. Zëno dowal-dowalsa de golëalsa sonenna, hëndep dekam de wet so gwenkam!"

²⁸Hëndep dekam zep nabakam Yesus hup de ola tingare Galilea mo lang san nol haladak.

Yesus kim etan zi beyam-byana dawem tabirkike:

(Mat. 8:14-17; Luk. 4:38-41)

²⁹Yesus kim zëre hon de nonol ang ta gwen wenya in han but srëm gola in kon golëwet so gwe'anka, ki zep hëndep Simon ne Andreas nik mo golak golëbiti gweka. Yakobus ne Yohanis ne hen man ang ëka.

³⁰Yesus in kim golëbiti gwe zaka, ki zep zë nenblak, "Simon mo we marena ewen naban tumnak nisi ta'an."

³¹Ki zep hëndep desan dep song gwe zaka, ki zep Simon mo marena insa taha nakon gul ineka. Ewenna in kon dekam zep hëndep sër gwëk. Wenya in dekam zep hen tembanekam mas gwibiridak.

³²Yaklana kim dum gwe he'anka, dekam zep Yesus onak dep tingare kirekam-kirekam zi sang-sangna

nolëyaing gwezak, hen dowal mo tilbiridan mae naka.

³³ Ëna iwe de zini tingan tangan zep Simon mo gol sinak tagal gwesik.

³⁴ Zao zep kirekam-kirekam sang-sang nabare zi beyam-byana insa dawem tabirki, hen dowal-dowala beya naka zersa sonebirki. Zen man dowal-dowala insa zen de olsa ëtoran hap jalse gwibiridaka, sap dowal-dowala in mes tame dak.

Yesus kim Galilea mo lang san tawa tabir song gwekake:

(Luk. 4:42-44)

³⁵ Ka'ankam hom tangan liti'ik, Yesus dekam zep luweka, hëndep ki zep gola kon zi srëm san dep song gweka. Dekon zep Biansa gu soneblaka.

³⁶ Hwëna kim nohwensiblik, Simon Bak dekam zep wal bose wal zeban lun zitebla song gweka.

³⁷ Kim zihla taka, zao zep nenblak, "Haen. Tingare zini man emsa dëbla'an."

³⁸ Hwëna man ding gulzimki, "Bëjen. Nen hëndep langna an mo aha ë-ë san dep sek gwe song gwen. Sap Ëe an kire habë hatazak- desan de hen Alap mo olsa tawa tabir song gwen hap."

³⁹ Zen in zep Yesus tingare Galilea mo lang san ziamjanbir song gweka- desan de hen zëwe de Yahudi mo but srëm gol-gol san tawa tabir song gwen hap. Zen dekam hen dowal-dowalsa zersa sone gwibirki.

Yesus kim sop sang-sang karek nabare zini dawem takake:

(Mat. 8:1-4; Luk. 5:12-16)

⁴⁰ Dekam zep hen sop sang-sang karek mo hla tan zini Yesus onak dep hata zaka, zao zep zëno nwenak boklena kom so zaka. Dekon zep abe ta seka, "Eme dwam gwe'anam, Em emaka asa dawem ta'ara."

⁴¹ Yesus hwëna man tangan zini insa dawemkam embwan gweblaka. Dekam zep towanblan naban ding gulbluka, "Ëe ama dwam gwe'an. Em dawem gwen." *

⁴² Dekam zep hëndep sop sang-sang karekna in hli tak.

⁴³ Yesus ki zep ol drakkam anakan gubluka, "Dekam song gwe."

⁴⁴ Insa emsa dawem tanan, bahem mae ahasa tonbiridan. Diki nonol Alap mo golak de syal tan zi hip ahana kip enaka zertrëbla. Zao gublu, 'Emki asa hla tan. Ëe san ha mesë dawem gwer?' Musa Bak mo titi tabin olak men kirekam sop sang-sang karek zi de dawem gwen-nak dep dena lwakke, zen kirekam em syal gwibin. Zen dekam sa tingan emsa anakan tame dal, 'Zen eiwa mes tangan dawem gweka.' **

⁴⁵ Hwëna zini in man men-san an-sankam tonbirida song gweka. Yesus zep hëndep langna iwe de ë-ënak damkam hata srëm gweka. Eiknik zep zi srëm langnak zëre hon de ang tan wenya ban golëgwë gweka. Hwëna zini man zë tingare ë-ë nakon Zëbon onak dep yaing gwe-gwezak.

2

Yesus kim taha-tana teisya inen srëm zi sang-sangna dawem takake:

(Mat. 9:1-8; Luk. 5:17-26)

¹ Zao hom tangan holo gwe'ak, Yesus ki zep Kapernaum sun dep lwa halka. Dekam zep hëndep ola anakan nol haladak, "Yesus mes etan hatanda."

² Zi beyam-byana dekam zep Zëbon onak dep tagal gwesizik, hëndep man kyang gwesik. Lilikin mae san ëzaundak. Yesus zao zep Alap mo olkam tawa tabirki.

³ In kim tonbirida'anaka, dan-nër dan-nërkam de zini dekam zep taha-tana teisya ine gwen srëm zi

* **1:41 1:41** Musa mo titi tabin olak, sop sang-sang karek zini bëjen ënak gwën, hen but srëm golak bëjen tin, hen aha zi bëjen desa golek de tan, ahaksa towanblan. Hwëna ayatnak awe Yesus man towanblaka. * **1:44 1:44** Im. 14:1-32

sang-sangna Yesus onak dep neiren halzak.

⁴ Hwëna zëwe zini beya tangan nik zë lowe he'ak, zep Yesussu ba nakon dep?– golek de tan naye. Zep hëndep gola insa gulk kon dre dasik anehak– men dekon en Yesus gwë'ankake. Desan zep berya ban nër dwanuk.

⁵ Yesus kim anakan tame tabirki, “Eiwa, zen man tangan Asa daïblïbla'an,” dekam zep zi sang-sangna insa gubluka, “Tane tol, eno karek-karekna mesë ep tap gulsublunan.”

⁶ Musa mo titi tabin olsa de tawa ta gwibin wenya men zen zë teinikin'ik, dekam zep enlala ennak donsublukak,

⁷ “Zini an zëno ola bolte-bolte tanganna! Zen bap kirekam Alapsa lamang tanda! Zi bëjen zi bose zik mo karek-karekna tap gulsublun. Diki Bian Alap bap.”

⁸ Yesus hwëna dekam zep hëndep zëno mae mo enlalana insa tame tazimki, dekam zep jalse gwibiridaka, “Em bap kirekam enlala ennak Asa lonsubluk'an!

⁹ Em ema ano ola husus eibir-anakan insa gublulye, ‘Eno karek-karekna mesë ep tap gulsublunan.’ Hwëna anakan de gublunkam, ‘Em luwen. Ere mo berya insa teisyahal,’ san esa hen etan husus eibir? Sap ol-gun darena in apdenak– Alap mo ssonkam de gublun ol.

¹⁰ Hwëna angkam Èe ama ebe mae hap goltreizim'in– em dikim Asa anakan tame tan hap, ‘Alap mes ki ngatan zi mo lang nakore Zi Tanganna abe hap sosonna golblakak-okamanak awe dikim zi mo karek-kareksa tap gulsuk gwizimdin hip denaye.’ ” * Ki zep hwëna etan zi sang-sangna insa gubluka,

¹¹ “Èe ama emsa gublu'an: Em luwen. Ere mo berya insa teisya, ki gol san song gwe.”

¹² Dekam zep hëndep luweka, ki zep hëndep ber zem insa teisyaka, ki zep hëndep tingare zi mo nwenak song gweka. Zi trana in man tangan ètenggwan. Dekam zep Alap mo bosena teip nulsuk gwebla'ak, hen man ègu gwe'ak, “Hom tangane kirekam de owasna hla kuk– an kirekam lwananye!”

Yesus kim Lewisa kwang ta kinikake:

(Mat. 9:9-13; Luk. 5:27-32)

¹³ Yesus kim etan Ho Gutuna Galilea mo alp san dep lwa ha'an zaka, zi beyam-byana zao zep Zëbon onak dep yaing gwezak. Zao zep tawa tabirki.

¹⁴ Dekon kim song gwe'anka, dekam zep Roma mo irik ginnik dep de pajak te-ala alal ta gwizimdin hip de zini Alpeus mo tanena Lewi Baksa hla ta'anka. Zen zëre mo syal gwe-gwen teksonnak nikin'inka. Zao zep gublu zaka, “Haen. Asa em ang gweblan.” Lewi dekam zep luweka, dekam zep hëndep ang gweblaka. †

¹⁵ Yesus kim Lewi mo golak golëtembane ta'anka, dekam zep hen ahakore pajak te-ala alal tanda gwen wenya beyakam yaing gwezak. Hen ahakore karek-karek gulin halasen gwen wenya, zen hen beyakam yaing gwezak. Dekam kirekam de enlala karek-karek nabare zini Yesussu beya nik sap ang në gwebla'ak. Deban mae zep apdekam golëtembane ta'anka, hen zëre hon de ang ta gwen wenya ban.

¹⁶ Hwëna Musa mo titi tabin olsa de tawa ta gwibin wenya men zen hen Farisi hon biti gwëk,

* **2:10 2:10** Yesus kim okamanak gwë gweka, Zen man Zënaka “Anak Manusia”kam gu gweblaka. Hwëna walaskam de enlalana zëwe hom. Ibrani olkam zëno enlalana “zi tangan.” Yesus mae hap kirekam Zënaka bose taka: Sap Zen man enlala gweka– mensa Daniel Bak zëbe hap dena hamal hap Dan. 7:13-14nak ale gulkuke. Sap Daniel man nwe nik de lirisin nëblankam “zi tangan” makan Yesussu ngatan zi mo langnak hla ta seka– Alap kim Desa Zen de kitak teipsibiridan hap gublukake.

† **2:14 2:14** Lewi mo aha bosena Matius.

‡ zen kim anakan hla nulidak, “Yesus Roma hap de pajak te-ala alal ta gwizimdin zi niban apdenak golëtembane ta'ara, hen ahakore karek-karek gulin halasen gwen wenyä ban,” zen dekam zep husus nëbla'ak. Dekam zep zëre hon de ang ta gwen wenyä nänbiridak, “Yesus in ba hap tangan pajak te-ala alal tanda gwen wenyä ban apdenak golëtembane ta'ara, hen karek-karek gulin halasen gwen zi nibanye! Zen in kwae nabanke!”

17 Yesus kim kirekam salbiridaka ki zep ding gulzimki, “Zini, sang-sang srëm wenyä, zen hom doktersa dwam në gweblanan. Zen diki zi sang-sang en dwam në gweblanan. Ëe an dokter makanë hatazak- zi enlala karek-kareksa de dawem san dep kwang guludan hap. Hwëna men zen zënaka tim di gwibirin, ‘Ëe an dawem-dawemna,’ Ëe desa de kwang guludan hap homë hatazak.”

Mae hap de ol: Yesus hon de ang ta gwen wenyä kire hap tembanena ëlwa srëm gwe-gwek.

(Mat. 9:14-17; Luk. 5:33-39)

18 Aha yaklanak kim zauk, baptis ta gwibin zini Yohanis hon de ang ta gwen wenyä man tembanesa ëlwak- men kirekam Yahudi zi mo auyan-azana ëgwë gwekke, Alapsa dikim enlala zon tasiblinkam abe ta gwen hap. Hen Farisikam de gubirida gwen wenyä dekam zep hen kire hap ëlwak. Ki zep hwëna zini Yesusu dakensiblizak, “Yohanis hon de ang ta gwen wenyä hen Farisikam de gubirida gwen wenyä, zen man tembanena ëlwa gwenan,

hwëna ebon de ang ta gwen wenyä ba hap ëlwa srëm gwe-gwenan?”

19 Yesus ki zep ding gulzimki, “Abon de ang ta gwen wenyä kip man dakastilzim'in- an kirekam tembanesa de ëlwan srëmkam lowehe gwe'anye. Sap zen angkam teipsin zisi de zergwën makan Asa nërgwë gwe'an. Zep Ëe kimë nama golëlowehe gwe'an, zen bëjen tembanesa ëlwan. §

20 Hwëna jal zini kim de Asa jek-jak da'ak, Abon de ang ta gwen wenyä yaklana dekam molya tembane tak. Embwan hap sa baes tal.”

21 Etan ki zep kire hap gulk sun de ol blaonzimdinni dan mas sozimki, “Zep hen kirekam, zi mo baju kwang de hul nënkam, zen bëjen deyol sop ësekam makan tazimdin. Kirekam bëjen dakastin. Sap ngan sosunkum deyol ësenä in de yok gwe'ak, dekam sa baju ëpba hula in mam enkam etan kalk nër.

22 Hen kirekam, anggur ho ësesa bëjen kambing sopkam de botol ëpbanak yuren. Kirekam hom dakasti'in. Sap anggur ho ësesa de kambing sop botol ëpbanak yurenkam, anggur hona in kim de nopna taïl gi'ik, kambing sopkam de botola in dekam sa kalk nër. Hëndep anggur ho naban kambing sop botola ban sa karek nër. Anggur ho ësenä zen diki kambing sop botol ësenak de yurenkam dakasti'in. Zep hen kirekam, Abon de ang ta gwen wenyä de etan ëpba lowehen san abarenak ang tan hap hom dakasti'in.”

Yesus kim Hari Sabat hap dena anakan gubiridakake, “Diki Ëe an

‡ **2:16 2:16** Farisikam de gubirida gwen zini, zen Yahudi zi mo aha hlikna, hen zen Yahudi mo auyan-aza mo jalse gwen olsa anakan tatete nul gwek, “Bahem gulmurun.” Zen hen man anakan ëbolamda gwe-gwek, “Ëe en ama dawemkam Alap hon ëtal gwesi'in.” Zep zen hen man Yesusu baes në gweblak- kim anakan hla da gwek, “Desa en beyakam ang në gwebla'an.” Sap Yesus Zen Farisi walsya hom. Tingare Yahudi zini man Roma hap de pajak te-ala alal ta gwizimdin hip de zini husus neibirida gwek, sap zen mamkam abe da gwibik- dekam de aha hlik naka zëre mae hap kap ta-in gwen hap. Hen Roma mo irik ginnä insa hom dwam nei gwibik, zep tingan men zen Roma hon syal ta gwek desa husus neibirida gwek. § **2:19 2:19** Mensa ayat 19 naban 20 naban “teipsin zisi de zergwën”kam awe li nul sonek, Yesus gulk sun de ol blaorankam “we ëse gon zisi de iye zik zergwën”kam aïsil gwibiridaka. Dam gulsunnu apdenak: Zen dekam bëjen tembane srëmkam lowehen.

Zen tangan- Hari Sabat mo Nolaye.”
(*Mat. 12:1-8; Luk. 6:1-5*)

²³ Aha Hari Sabatnak kim zauk-Israelk de zi mo syal tan srēm yaklanak, Yesus ki zep zère hon de ang ta gwen wenya ban gandum tra san golètaman gwe'anka. Hwëna zère hon de ang ta gwen wenya dekam zep usak hap gandum danna insa kïlk dï-in kïnï gwe'ak. *

²⁴ Hwëna Farisikam de gubirida gwen wenya kim hla nulidak, dekam zep Yesussu nenblak, “Em san home ere hon de ang ta gwen wenya insa hlauluda'ara? Zen in nère mae mo titi tabin olsa ngip nu'in- kirekam de Hari Sabatnak syal gwibinkimye.”

²⁵ Yesus ki zep hwëna ding gulzimki, “Em bawalkam esa Alap mo ola an mo eini dam ulsul?- men kim Daud Bak zère hon de ang ta gwen wenya ban golëusak gwe'ankaye.

²⁶ Abayatar Bak men dekam Alap mo golak teipsinkim irik gïlkike, Daud Bak dekam Alap mo golak tilki, zao zep Abayatar Baksa abe taka- Alap hap de roti loneblanna insa de golblan hap. Kim golblaka, desa zep zère hon de ang ta gwen wenya ban zitwinbir song gweka. Hwëna sap nëno mae mo titi tabin olak man lwak: Sap Daud zëna hen zëbon de ang ta gwen wenya, zen bëjen Alap hap de rotina insa twinbin. Zen diki Alap mo golak de syal ta gwen zi en dwin gwibirin. Sap eiwa kirekam, hwëna Daud hom Alap mo nwenak karek gweka- zen kim usak hap zitwinbirkiye. Zep hen kirekam, Abon de ang ta gwen wenya an, zen kim usak hap kïlk dï-in kïnzil, zen hom ëkarek gwer.”*

²⁷ Yesus ki zep Hari Sabat hap dena insa waulsuzimki, “Alap zini Hari Sabatsa de blikip gwibin hip hom yang tabirki. Alap mo nwenak bol-zaun tanganna, zen diki zi. Hari

Sabatna in hwëna zini emsa dikim oto tasik gwibin hip mas gulzimki.

²⁸ Zep ngatan zi mo lang nakore Zi Tanganna, Èe an Zen tangan- Hari Sabat mo Nolaye. Zep anakarekam de klis gul gwizimdin hip dena, ‘Desa sap esa Hari Sabatnak syal eibir,’ ahaksa, ‘Kirekam bahem,’ zen ano dena.”

3

Yesus kim Hari Sabatkam zi taha sakna dawem takake:
(*Mat. 12:9-14; Luk. 6:6-11*)

¹ Yesus kim zère hon de ang ta gwen wenya ban etan but srēm golak golëbiti gwe zaka, hwëna zini hen zao gwë'anka. Aha tahana mes sak gweblaka.

² Hwëna Yesus mo kareksa de hlaulblun hap de zini hen zëwe lowe he'ak. Zep kara da'ak, “Zen wëhë nëno mae mo syal tan srēm yaklana an hap dena ngip gu'unka- zisi de dawem tankamye?”

³ Yesus ki zep taha sak zini insa gubluka, “Haen, ano mae mo dang gwëna a dekon emki zauzun.”

⁴ Ki zep hwëna takensibiridaka, “Musa mo titi tabin olak, nen basa de Hari Sabatkam gol gwen? Hari Sabatkam san ha nen kareksa zi hip gol gwizimdin? San ha dawemsa nen gol gwizimdin? Hari Sabatkam san ha nen zisi ngaya ta gwibin? San ha nen tamera gwen?”

Hwëna zen man nasalsiblik.

⁵ Yesus ki zep jala ban nwekam amjanbirki, hwëna man hen kwasang gwibiridaka, sap zen nol drak-drak enna. Ki zep hwëna zi taha sakna insa gubluka, “Tahana insa emki inin gïlsin.” Ki zep hëndep inin gïlsiki, dekam zep hëndep tahana in etan dawem gweblak.

⁶ Farisikam de gubirida gwen zini in ki zep hëndep but srēm gola in

* **2:23 2:23** Tahakam de gandum dansa kïlk tï-in kïnïna, zen sowësa hom. Nëbokkam de gandum dansa taranna, zen diki zen sowë naye. Musa hom jalse gwibiridaka- gandum dansa de kïlk tï-in kïnïn hapye, hwëna zen man anakan jalse gwibiridaka, “Ere mo gandum tranak bahem Hari Sabatkam syal ta gwen.” (Ul. 23:25) * **2:26 2:26** Im. 24:9; 1Sam. 21:1-6

kon te so gwek, hëndep dekam zep Raja Herodes hon de bitī gwen zi niban tagal gwesik. Man zē olsa aha'en nu'ik- Yesussu de tan hap denaka.

Yesus kim zi trana ho gutu alpna dawem tabirkike:

⁷⁻⁸ Yesus kim zēre hon de ang ta gwen wenyā ban Ho Gutuna Galilea san golēsek gweka, zi trana lun kon zep nērtrozak- langna Galilea kore zini hen tīngare Yerusalem mo lang nakore zini. Ahakon Idumea mo lang nakon, hen weyana Yordan mo yakla hatase gwezan nakon, hen ē darena Tirus hen Sidon mo lang nakon. Zen kitak Yesus onak dep yaīng gwezak, sap zen mes zēbe hap denaēsane gwe-gwek- Zen mensa syal gwe-gwekaye.

⁹ Zini in beya tanganna. Yesus zep zēre hon de ang ta gwen wenyaka gubiridaka, “Ap bulu hamal ulblik-zēwe aka sewesek, dekon aka tawa tabik. Kama nakon Asa sa klasam dasil.”

¹⁰ Sap yaklana inkam Zen mes zi sang-sangna beyakam dawem tabirki, zen in zep hwēna ahakore zi sang-sangna atata da gwibi'inzak-dekam de Yesussu golek de tan hap hen olk tan hap.

¹¹ Hen dowal-dowal mo tīlbiridan wenyā Yesussu de hla tankam zep ēik gwehe gwe'anzak, dekon zep anakan ēhērhesē gwe'ak, “Em in Alap mo Tane.”

¹² Hwēna Yesus ki zep jala ban dowal-dowala insa gubiridaka, “Asa bahem kira tan. Balkkam em sek gwen.”

Yesus kim zini dua-blas enkam zēre hon de ang ta gwen hap dam tasibirkike:

(Mat. 10:1-4; Luk. 6:12-16)

¹³⁻¹⁴ Yesus ki zep kwatap tekna hata seka, dekon zep hwēna zini mensa dua-blas enkam Zēna dwam gwibiridaka, desa en gu sonebiri-daka. Kim yaīng gwezak, zao zep zēre hon de ang ta gwen hap anakare ola ban gubiridaka, “Ēe

ansa emsa gu sonebiridal, em eka Asa ang ē gweblak, hen emsa aka gubirida gwek- ano olsa de gol halada gwen hap.

¹⁵ Hen Ēe asa ebe mae hap ēre mo sosonsa golzim- em ekakim dowal-dowalsa olēalsa sone gwibik.”

¹⁶ Dua-blas enkam de zini in mo bosem-sena an zen:

Simon- mensa hen Yesus “Petrus” kum bose taka.

¹⁷ Hen Zebedeus mo walas darena Yakobus ne Yohanis ne. Desa hen Yesus zēre mae mo olkam “Boanerges” kam bose soka. Zēno enlalana, zēno nik mo ola jal ēnkam yawala- ngli glung makan.

¹⁸ Ahana Andreas, Pilipus, Bartolomeus,

Matius, Tomas,

Yakobus- zen Alpeus mo tane,

Tadeus,

hen ahana Simon Bak- men zen nonol Israel dikim Roma mo irik gin nikon ēzē-en gwen hap de ēsas gwennak ang gwekake,

¹⁹ hen Kariot walya Yudas Bak- men zen hëndep Yesussu zergukuke.

Musa mo tīti tabin olsa de tawa ta gwibin zini kim Yesussu nenblakke, “Zen dowal mo kigi mo sosonkam syal gwe-gwe'ara.”

(Mat. 12:22-32; Luk. 11:14-23; 12:10)

²⁰ Yesus ki zep zēre mo gwē gwen san dep lwa halka, hwēna zi trana ki zep etan yaīng gwezak, zep Yesus hëndep zēre hon de ang ta gwen wenyā ban bawalkam dep?-golētembane tan naye.

²¹ Hen ahakon dekam man Yesussu nen gwebla'ak, “Zen mes mamak gwera.” Iye zem kim kirekam ēsak, dekam zep yaīng gwezak- kwang tahan hap.

²² Hwēna Musa mo tīti tabin olsa de tawa ta gwibin zini mes hen Yerusalem kon yaīng gwezak, hen zen man anakan nen gwebla'ak, “In dowal mo kigina Beelzebul Bak bi gweblaka. In zep zēno sosonkam

syal gwe-gwe'ara- dekam de aha dowal-dowalsa zersa sone gwibin hipye.”

²³ In zep Yesus zi beyam-byana insa kwang guludan hap gubiridaka, dekam zep anakan ola gulk sun blaonzimki, “San ha dowal mo kigi mo aha hlikna maka dowal bosa zemka nolälsa sone gwibi'in? Kina ki bëjen.

²⁴ Hen kirekam, aha irik gin nik de hliwe'anam, etan zen de eijan hap, dekam irik ginni in molya etan etatete gwe'anam. Maka hëndep esekwak gwe'an.

²⁵ Hen kirekam, zënaka de gil-gil gwibiridan nakon de aha-ere golak dinik hliwe'anam, zen maka hëndep sekwak gwe'an.

²⁶ Zep hen kirekam, dowal mo kigi mo irik gin nik de hliwe'anam, etan zënaka de golëeijan hap, zen molya ehola gwe'anam. Nabakam maka hëndep denaban alti'in. Zep dowal mo kigi mo aha hlikna, zen molya zënaka nolälsa sone gwibi'inam.

²⁷ “Sap Ee dowal mo kigi mo bi gwibin kire-kire dawemsaë jal zi mo kim alal ta gwebla'an. Zi jal-jal de zëre mo golsa kara ta'anam, zëbe hap de jal zini na-en molya ti'in zanam. Diki zini insa de nonol balk tankam hen tahalengkam, dekam zëno kire-kirena maka alal tabla'ara.

²⁸ “Eiwa denakaë emsa gwibirida'an: Alap maka zi mo kirekam-kirekam karekna tingan tap gulsuk gwizim'ira, hen sap Zënaka de lamang tanna, desa hen maka tap gulsuk gwizim'ira. Diki aha-en:

²⁹ Zi de Alap mo Enhosa lamang tankam, desa Alap bëjen tangan tap gulsublun. Kirekam de karekna zen mes hëndep denaban makan gweblanan.”

³⁰ Yesus mae hap ki kirekam gwibiridaka: Insa Zënaka nenblakke, “In dowal tilblika.”

Yesussu kim an zem oso wal zeban zitëbla'akke:

(*Mat. 12:46-50; Luk. 8:19-21*)

³¹ Yesus mo anena ki zep oso wal zeban Yesussu de zertoran hap golëyaing gwezak. Zisi zep nenbiridak- zen de Yesussu gublun hap. Zëna ë nakon nësbla'ak.

³² Hwëna Zen zi ngirinnik nikin'inka. Zao zep nenblak, “Bian, eno anena oso wal oban ë nakon emsa ziësbala'anon. Zen man ëdwam gwe'an- emsa de zertowen hap.”

³³ Yesus ki zep ding gulzimki, “Hwëna nonol Ee anik emsa gwibiridak, ano anena hen oso-walya, zen diki a kirekam de zisi moye:”

³⁴ Ki zep hwëna zini men zen zëre mo alp nakon teinikin'ik, desa nwekam amjanbirki, ki zep hwëna gwibiridaka, “Diki an zen lowe he'an, zen zen- ano anena hen oso walyaye!

³⁵ Sap Alap mo ol san men zen ang ta gwenan, zen diki zen tangan- ano anena, oso walya hen somol walyaye.”

4

Yesus kim gandum dan hling gilsinkim ola gulk sun blaonzimkike: (Mat. 13:1-9; Luk. 8:4-8)

¹ Yesus kim etan Ho Gutuna Galileak tawa tabirki, zini beya tangankam tagal nëblak, hëndep man tangan dot dasik. Yesus hëndep buluk zep sewe seka, zao zep nikinkidekon de tawa tabin hip. Bulu in engka en weya ngirin sin dep esek nul kinik, hwëna zi beyam-byana in ho gutu alp san teinikin sonok.

² Zao zep Yesus gulk sun de ol blaon gwizimdinkim tawa ta gwibi'inka. Nonol man zë gwibiridaka,

³ “Ansa emki ësane gwen! Zini man orep gandum dansa de hling gilsin hip song gweka.

⁴ Kim hling gilsiki, hwëna ahakon oranak altink. Mawana ki zep zë yaing gwezak, zen zep hwëna gandum danna insa dwensiblindak.

⁵ Ahakon kaso-kasonak altink- kama bëbeknak. Gandum danna

in nabakam zep sap ësip gwek, sap kamana in bëbek tanganna.

⁶ Hwëna yaklana kim sal-sal gweka, sipni in dekam zep ëboneng gwek, hëndep ësasan gwek, ki zep tol hëndep juwek. Sap sana ba san dep?- olk san de ëhas gwesin niye.

⁷ Hen ahakon dokot të ngi-ngi ausunak altink. Kim sap tol ësaltik, hwëna dokot të ngi-ngina in zep nabakam ëblal-blal gwek. Zen zep dahalebik, hëndep eini hom tëka.

⁸ Hwëna ahakon kama dawemnak altink. Zen en dawemkam zep ësip gwek, hëndep dawemkam zep hataka, hëndep dawemkam tëka. Aha-ere timni zëno dan beyana ahakon 30 enkam, 60 enkam, hen ahakon 100 enkam."

⁹ Ola insa kim tonsuku, ki zep gubiridaka, "Em dwan i nibanke. Em ësäl gwen!"

Yesussu kim anakan dakensiblikke, "Bian, em insa gulk sun ola blaon gwizim sira, ëe homë dam ulsul."

(Mat. 13:10-17; Luk. 8:9-10)

¹⁰ Yesus kim zë-en gwë'anaka, dekam zep ahakon in zen zëno tawa tabinni insa ësane gwek, dua-blaskam de ang ta gwen wenya ban dakensiblizak, "Bian, em insa gulk sun ola blaon gwizim sira, ëe homë dam ulsul."

¹¹ Ki zep ding gulzimki, "Abon de ang ta gwen wenya ebe mae hap Alap mes golzimki- em dikim zëre mo irik gin hip denaka tame gul gwen hap denaye. Hwëna aha zi hip hom kirekam golzim'ira. Èe in zebë zëbe mae hap gulk en san ola blaon gwizimnin.

¹² Sap Alap man desa dwam gwibirida'ara- men kirekam zëre mo olak lwakke, kirekam de hëndep zëbe mae hap anakan lwa gwizimdin hip,

'Zen sap sa hla nul gwer, hwëna san de hlaun srëmna. Hen sap sa ësane gwe-gwer,

hwëna zen molya tol dam nulsuk gwek.

Diki zen de etan Abon osan dep lwanda ha'an zanam,

ki Èe amaka zëno mae mo karek-karekna tap gulsuzim'in.' ""*

Yesus kim gandum dan hling gilsin hip de ola insa srip gulsuzimkike:

(Mat. 13:18-23; Luk. 8:11-15)

¹³ Yesus ki zep gubiridaka, "Em ba hap tangane tame ul srëm gwer? Ki hen ahanakaë gulk sun blaonzim'ik, desa hen molye tame uk.

¹⁴ Zini men zen gandum danna hling gilsiki, zen san de men kiye-men zen Alap mo ola tawa da gwibirinke.

¹⁵ Gandum dan de oranak altirinni, zen zini men zen Alap mo ola ësane gwe-gwenan. Hwëna dowal mo kigina dekam zep desa de al gul gwizimdin hip zëno mae mo enhonak hata gwenan zala.

¹⁶ Hen men zen kaso-kasonak altirinni, zen ahakon men zen Alap mo ola insa ësane gwe-gwenan. Zen nabakam zep sap enlala isrip-sri naban nulin gwenan.

¹⁷ Hwëna ola in bëjen zëno mae mo enhonak sa gwen, zep bëjen zë holokam lwan. Sap zen kim de karek maena hla nu'ik, ahaksa ol dawemna in hap de jal hap karek dabi'ik, zen hëndep dekam sa Alapsa hli dal.

¹⁸ Hen kirekam, men zen dokot të ngi-ngi ausunak altirinni, zen zini men zen Alap mo ola insa sap ësane gwe-gwenan.

¹⁹ Hwëna angkam de okamanak awe de kirekam-kirekam enlala ngalap naban zë zëre mae mo enhonak siri nul gwenan-anakarekamye, 'Èe babë tahalha gwen,' hen anakan de hole-hle gwe-gwen naban, 'Diki te-ala beya naban amaka gwë gwe'an.' Kirekam de enlalana in zep Alap onakare ol dawemna insa zëno mae mo enhonak hule gwenan. Zep hëndep

* 4:12 4:12 Yes. 6:9-10

dawemkam eini ëtë srëm gwe-gwenan.

²⁰ Hwëna men zen kama dawem-nak altirinni, zen zini men zen Alap mo ola insa ësane gwe-gwenkam dawem enkam enhonak ing nul gwenan. Zen zep dawemkam eini ëtë gwenan. Zëno mae mo ei beyana, ahakon 30 enkam, 60 enkam, hen ahakon 100 enkam.” *

Yesus mo olsa dikim tame gun hup de ëhohle gwen hap de ol:

(Mat. 13:12; Luk. 8:16-18)

²¹ Etan ki zep Yesus gubiridaka, “Ano ola zen pelita makan. Zini hom pelita ngatannak yuna utuk nul sone gwenan- dekam de ngatanna insa aning gun hupye. Hen pelitana hom tum iltikinnik si nulin gwenan. Zen diki meja maenak de lonesen.

²² Hen kirekam, ola mensaë gulk sun de blaonzimdinkim zi beya hap aning gul gwizim'in, zen sa lamkam hataser. Hen ano enlala aning tanna, zen dekam sa ngatan gwera. Zen diki dekam sa zini dam nulsuk gwer.

²³ Ëe in zebë emsa anakan gubiridaka, ‘Em dwan i nibanke. Em ësäl gwen!’ ”

²⁴ Etan ki zep Yesus gubiridaka, “Zen in zep ano ola mensa ena ësane gwe-gwe'an, dawem enkam emki enhonak lone gwen. Sap ena men kire enkame tame gun hup ëhohle gwe'an, zen kire enkam sa hen Alap ebe mae hap dekam de tame gun hup de enlala blala ing ta sone gwizimdi, hen zao sa etan mam ta gwizimdi.

²⁵ Sap men zen Alap mo irik gin nika de tame gun hup ëhohle gwe'an, zëbe mae en hap sa etan Alap dekam de tame gun hup de enlala blala sowe henkam ing ta sone gwizimdi. Hwëna men zen

ëhohle gwe srëm gwe'an, zëbon mae men zen sap tame gun hup de enlalana betek enkam lwazim'ira, desa sa hwëna Alap al tazimdi.”

Gulk sun de ol blaonzimdinni an mae hap: Alap mo irik gin hip dena, zen zi mo tame gun srëmkam zi mo enhonak saltil gwenan.

²⁶ Yesus in kim nama bulu kon tawa tabi'inka, zao zep etan zi beyam-byana in hap ola gulk sun blaonzimki, “Alap mo irik gin hip dena, zen san de zi de nganak gandum dansa hling gilsinni kiye.

²⁷ Zëna dekam totoresa de gwë gwen, hwëna gandum danna in dekam sa totoresa sip gwera, hëndep saltili. Zini in sap de anakan tame gun, ‘Mes saltili,’ hwëna anakan bëjen dam gulsun, ‘Ba hap kirekam saltil gwenda?’

²⁸ Sap kama mwanak de gandum dan lwanna, zen totoresa dekam ësip gwe-gwenda, hëndep ëtim gwe-gwenda, dekam zep hëndep ëwenam gwe-gwenda, hëndep danna dekam zep ëbeya gwe-gwenda.

²⁹ Hwëna kim de bil gwe'anka, hëndep dekam sa hwëna zini in nëbokkam blom tasili. Sap dekam taran hap denak mes zaunun.”

Gulk sun de ol blaonzimdinni an mae hap: Alap mo irik ginni, zen rica dan makan.

(Mat. 13:31-32,34; Luk. 13:18-19)

³⁰ Yesus ki zep etan gubiridaka, “Ba naban esa apde osol?- dekam de Alap mo irik gin hip denaka gulk sun blaonzimdin hipye. Alap mo irik gin niban ba naban esa enlala eizim?- dekam de srip gulsuzimdin hipye.

³¹ Alap mo irik ginni zen rica dan makan. Sap tingare tetan dan nakon, rica danna, zen zen- betek tangan wenyaye.

* **4:20 4:20** Yesus kim dansa de tën hap dena ol aïsilik awe gubiridaka, zen ei gwen, ahaksa Alapsa de taïblïblan en hap hom enlala gwibirki. Dansa de tën mo dam gulsunnu, zen hen Alap mo ol san de dam-dam enkam lowehe gwen hap. (Mat. 5-7) Ahaksa nëno mae mo ol toran de Alap mo nwenak sam gwesik gwen hap. (Mat. 12:31-37) Ahana hen, zisi de halen ta gwibin hip. (Yoh. 15:16) Kirekam de lowe henna, zen zen Alap mo nwenak nwe-mase gwe-gwenan- san de dansa de tënna kiye.

32 Hwëna kim ësältil gwenan, dekam zep tîngare obwaga nakon ëblal-blal gwe-gwenan- hëndep hli-hli naban. Mawana zao zep yaïng gwe-gwenanzal- zëno hli-hlinak de golsa tauk gweblan hapye."

33 Yesus kirekam-kirekam gulk sun de blaonzimdin olkam tawa tabirida gweka. Men zao en zëno mae mo ësane gwen hap de sosonna zausuk gwizimk, dekon hom etan ayang gul gwizimki.

34 Zi beyana kim tawa ta gwibirki, Zen gulk sun de blaonzimdin enkam tawa ta gwibirki. Hwëna zëre hon de ang ta gwen wenyaka de zë-erenak tawa tabinkim, Zen man tîngan srip gulsuk gwizimki.

Yesus kim asese yawala jalse gwe-blakake:

(Mat. 8:23-27; Luk. 8:22-25)

35 Kam-en tangan zep Yesus zëre hon de ang ta gwen wenyaka gubiridaka, "Haen, nen ho gutu men eiha san gweyo gwen."

36 Dekam zep hëndep zëre hon de ang ta gwen wenya in, bulu men dekon tawa tabi'inka, zëwe sesek gwe sezak. Zi beyana insa ho gutu alpna iwe zep hli nulidak. Ahakore bulu hen lun ang ta kinik.

37 Hwëna asese yala ki zep muk ennak hataka. Ho gutuna in dekam zep mam enkam ngëp-ngëp gweka, hëndep buluk iwe suwehe kinî gwe'anzak, hëndep beya gwenen hap alp gwesi'ik.

38 Yesus Zëna bul ohwa nakon nisi ta'anka. Nola nol tri-trinak dreini neka. Zëre hon de ang ta gwen wenya ki zep li dak, zao zep nenblak, "Guru, em san nen de kitak juwen hap ema dwam gwe'ara?"

39 Yesus ki zep luweka, ki zep asesena insa gubluka, "Em zausun!" Hen ho gutuna insa gubluka, "Em hen em sëwehen!" Asesena dekam zep tap gweka. Ho gutuna in hen dekam zep tangan sëwe heka.

40 Ki zep hwëna gubiridaka, "Em bap ëairil! Em san ki nama home Asa laïbli'bla'an?"

41 Zen dekam zep sërkam ëairi'ak, ki zep zënaka nenbiridak, "Eiwa, zini an wehasa hom! Ba hap tangan asese naban ho ngëp naban betek nëblanan!"

5

Yesus kim dowal-dowal mo bi gweblan zini dawem takake:

(Mat. 8:28-34; Luk. 8:26-39)

1 Hëndep kim Ho Gutuna Galilea mo men eihtanak golëyaïng gwe naka, Gerasa mo langnak,

2-3 Yesus kim bulu kon ati gwe'anka, dekam zep hen dowal-dowal mo bi gweblan zini Zëbon osan dep song gwe'an zaka. Zen zi tok lo tasik gwibin kaso-hul kaso-hulak gwënda gweka. Dekon te so'an zaka. Tahale gwenna mes topse nëblak. Besi dokot maekam sap naka gweblak.

4 Zen kim sap besikam de dokotkam taha-tanana tatak noso gweblak, zen hwëna nonol tahanak denaka blom ta sone gweka. Hen tananak dena, tanana kim ziheir gweka, dekam zep ësom gwe hana gwëk. Sosonna sërkam tangan dowal-dowala in zëbe hap nol gweblak, zep hëndep toton nara dep?- balk tan naye.

5 Yaklam denaban kam denaban zen zi lo tasik gwibin kaso-hul kaso-hul san gwënda gweka, hen kwatap bete-teksa hërhendan naban wale tanda gweka. Zëre mo timni kaso ben-benkam kalk-kalk guluda gweka.

6 Zen kim langa nakon Yesusu hla takin zika, ki zep hluwe zaka, zëno nwenak zep boklena kom so zaka.

7-8 Yesus ki zep zëbon de dowal-dowala insa gubiridaka, "Dowal-dowal, em zëbon onakon wet so gwen!" Zini in dekam zep mam enkam hërheka, "Yesus, Teipsin Zini Alap mo Tane, Em aban toton banakan de syal ën hap? Alap mo

nwenak Emki anakan asa gublun, 'Èe molyë emsa karek tak.' "

⁹ Yesus ki zep takensiblika, "Eno bosena nara?"

Dowal-dowala in ki zep ding nulblik, "Zëno bosena Jal Zi Tra Bak, sap èe an tra tangan nikè zëbon lowe he'an."*

¹⁰ Zen man Yesussu aberbe da gwe'ak, "Asa bahem langna an kon golëalsa sonendan."

¹¹ Zëno mae mo nwe kara gwen san zahona beyam-bya tangan nik kwatap tini san tembane hap èhaka'ak.

¹² Dowal-dowala in ki zep Yesussu aberbe da'ak, "Em wëhë tol asa zaho trana wakuwe de bitì gwen hap gubirida'an?"

¹³ Yesus ki zep gubiridaka, "Dekam bitì gwék." Dekam zep dowal-dowala in zini in kon wet so gwék, dekam zep hwëna zahona iwe bitì gwék. Zaho trana in dekam zep heya-hya gwék, li san zep syalk ta tinek, hëndep ho gutunak zep èkeiking gwék. Zahona in zëno beyana tingan dua ribu enkam.

¹⁴ Zahona insa men zen kara da gwibik dekam zep zaho bi naka de gubiridan hap è san dep hen èna in mo golek denak de gol-gol san dep èhlu-hluk gwék. Zëwe de zini in kim èsak, dekam zep hëndep nolësal kinik.

¹⁵ Yesus onak kim yaing gwezak, zao zep hen dowala in desa bi nèblak desa hen hla dazak. Pakean naban zë nikin'inka. Enlalana hen mes sëwe heblaka. Dekam zep zë èairi'ak.

¹⁶ Owasna insa men zen hla nuk, zen zep hwëna ahakore wenyä insa donbiridak.

¹⁷ Kirekam kim èsak dekam zep Yesussu Zen de nabakam zëno mae mo langna in kon song gwen hap aberbe da gwe'ak.

¹⁸ Yesus kim buluk sewe seka, zini in desa dowal-dowala bi nèblak ki

zep aberbe ta'anaka, "Èe wëhë tol Emsa ang gwebla'ak?"

¹⁹ Yesus hwëna man gubluka, "Bahem. Em gol san song gwen. Ere mo iyesa tonbirida- mensa Bian Alap dawemna ebe hap mamkam gol-blalake. Anakan gubirida, 'Zen man tangan asa kwasang gweblaka.' "

²⁰ Zini in dekam zep song gwëka, hëndep Yesus insa zëre hap syal gwibir-blika desa tonbirida song gwëka- langna mensa anakan bose nukke, "Èna Dare Taha-tap" kam. Kim sane da gwék, tingare zini man tangan ètenggan gwék.

Yesus kim Yairus Bak mo wenam tol tokna ngaya gulkuke, hen aura gwe-gwen wenyä kim dawem gulkuke:

(Mat. 9:18-26; Luk. 8:40-56)

²¹ Yesus kim etan bulkum ho gutu an eiha san dep lwahal zaka, zao zep zi beyam-byana ho gutu alpnak tagal nèblak.

²² Zao zep hen zi bosena Yairus hata zaka. Zen Yahudi mo zëwe de but srëm golak de aha mamna. Zen kim Yesussu hla ta zaka, ki zep zëno nwenak ik gwehe zaka,

²³ dekon zep dawem enkam aberbe ta seka, "Bian, ano wenam tola tin hip alp gwesi'in. Em wëhë zë hata'anaka?- tahasa eka zë tehabir ane, zen dekakim tol dawem gwék. Mana tol ap tilblinank."

²⁴ Dekam zep zëno gol san dep song èka. Zini beya tangan nik ngirinnik nèblahak, hëndep man tangan ngiltitik gwenkam kyang dasik.

²⁵ Dua-blas tahunkam de karekam aura gwe-gwe wenyä dekam zep hen ang gwese ha'ak.

²⁶ Zëno te-alana mes tol tap gwëka- dokter-dokter hap de sap kap ta gwizimdinkim. Hwëna hom tol kim dawem gwe-gwék, hwëna sang-sangna man kim tangan sabak gwe-gwék.

* **5:9 5:9** Zëno bosena Yunani mo olkam "Legion." Amber olkam zëno enlalana "batalion." Roma mo jana nabare zi mo "legion" kam de gubinni, zen zini beyana empat ribu enkam. Dekon hen beyana man esek gwe kinik gwék.

²⁷ Wenya in mes beyakam Yesus hup dena sane gwe-gwek, zep zi tra ngirinnik tahan nakon golek de tazak, zao zep händep baju ennak olk ta sonek.

²⁸ Sap wenya in mes anakan taïblihlak, "Baju mae ennakë towanbla'ak, ëe dekam asa dawem gwer."

²⁹ Zen kim olk tak, händep dekam zep zëno kala in tewesibik. Dekam zep zëre mo timni anakan eisbik, "Ëe mesë dawem gwenan."

³⁰ Yesus dekam zep händep anakan eisbirki, "Zi sang-sangna mes Asa de olk tankam dawem gwenda." Dekam zep zi tra mo ngirin nikon lure san lero gweka, hen takensibirida gwe'anka, "Asa nara bajunak olk ta sonera?"

³¹ Zëre hon de ang ta gwen wenya dekam zep nenhlak, "Bian, zini an beya tangan nakake- an zen emsa dot dasilye! Ba hap de waba hap takensibirida gwen hap, 'Nara asa olk tala'?"

³² Hwëna Yesus nama ki nwekam tëblaka- men zen olk takake, desa de tawa gweblan hap.

³³ Hwëna wenya in mes zënaka anakan eisbik, "Ëe mesë dawem gwenan." Dekam zep aïrin hip yal-yala ban Yesus mo nwenak ik gwe hezak, dekon zep zëre mo sang-sang hap dena kitak ton sehlak.

³⁴ Yesus ki zep kwasang tola ban gubirki, "Anyan, em ema Asa taïblihlala, in zebe dawem gwenda. Aha-ere enlalakam song gwe. In eiwa, mese tangan dawem gwera."

³⁵ Yesus in kim nama ola ton'anka, zini dekam zep Yairus mo gola kon yaing gwezak, ki zep zë nenblazak, "Eno wenamna mes tol tilsinïn. Bian Gurusa ba hap de waba hap blos tablan hap?"

³⁶ Yesus man salsibiridaka in zen Yairus Baksa nenblazak, ki zep hwëna Yairu'u gubluka, "Bahem aïrin. Asa em taïblihlan."

³⁷ Yesus dekam hom aha zi de ang gweblan hap gubiridaka- diki

Petrus, Yakobus, oso zem Yohanis hin.

³⁸ Yairus mo golak kim yaing gwek, anakan zep hla nulida'ak, "Karekkam ena ta'an hen gona dabi'in."

³⁹ Yesus kim golak til zika, ki zep gubirida zaka, "Em ba hap ena tal hen gona tal? Wenam tola in hom til. Zen nisi am ta'an."

⁴⁰ Zen hwëna man Yesussu swrë da'ak. Yesus ki zep wet so gwen hap gubiridaka. Kim wet so gwek, dekam zep zëre hon de ang ta gwen zi dan-aharena in han hen wenam tola in mo ane-bia mae en naban golëbiti gweka- teksonna men zao wenam tol tokna in lwa'akke.

⁴¹ Ki zep wenam tol tokna insa taha nakon gul ineka, ki zep zë zëre mae mo olkam anakan gubirki, "Talita kum." Nëre mae mo olkam zëno enlalana anakan, "Timë, em luwen."

⁴² Wenam tola in dekam zep händep luwek, händep të nasen'ak. Zëno tahunna dua-blas enkam. Dekam zep sërkam tangan ëtenggwank.

⁴³ Hwëna Yesus man tangan jalse gwibiridaka, "Owasna an zen ki lwanan, bahem ahasa tonbiridan." An-bi zemka ki zep hen guzimki, "Tembanesa em olbin."

6

Yesussu kim Nazaret kon baes nëblakke:

(Mat. 13:53-58; Luk. 4:16-30)

¹ Yesus dekam zep dekon zëre hon de ang ta gwen wenya ban zëre mo ëna Nazaret san dep golëlwanda halka.

² Hari Sabatnak kim zauk, Yesus zep zëwe de but srëm golak tawa tabirki. Zi beyam-byana men zen sane da'ak man tangan denggwandabla'ak. Zep zë hwëna donsublu'ak, "Zini an endawe sekola gweka?- zep kil gi'ira, 'Ëe asa tawa tabir.' Hen owas-owassa de syal gwe-gwibin hip de sosonna endawe sa gul iri?"

³ An dwan zenke- gol syal gwe-gweblan zi niye, Maria mo tane

sake. Zëno oso walya Yakobus, Yoses, Yudas, hen Simon. Hen zëno somol walya awe am hen lowe he'an." Sap zen mes kirekam tame dak, zep baes nëblak.

⁴ Hwëna man ding gulzimki, "Zini kirekam ëgwë gwenan: Men-kore men-kore ë nakon, Alap mo ol ayang gul gwen hap de zini man blikip neisibirida gwenan. Hwëna zëre mo iye, ahaksa zëre mo ë nakore nik de kirekam ayang gul gwizimdinkim, desa hom tangan blikip neisibirida gwenan."

⁵ Zen in zep Yesus zëwe owas-owasna beyakam syal gwibir-zim srëm gwëka, sap zen hom daïbliblak. Hwëna zi sang-sang ensa zë dan en dawem tabirki-tahasa de tehabirida ine gwenkam.

⁶ Sap zëre mo ënak de zini kirekam daïblibla srëm gwëk, zep tangan tenggwanbiridaka.

Yesus kim dua-blaskam de zëre hon ang ta gwen wenya lup gul sonekake:

(Mat. 10:5-15; Luk. 9:1-6)

Ki zep hwëna ë-ë san amjanbir song gwëka hen desan tawa tabirida gwëka.

⁷ Ki zep hwëna dua-blaskam in zen ang në gweblak, desa kwang guludaka, zao zep gubiridaka, "Em dan-dan dan-dankam ë-ë san sek gwen. Èe asa ëre mo sosonsa ebe mae hap golzim- dowal-dowalsa ekakim olëalsa sone gwibik.

⁸ Bahem ba maena ora san dep lop tan. Dute ensa leirenk. Tembanena hen bahem lop tan. Honna bahem wëwek tan, hen te-ala maena bahem kap tan.

⁹ Sepatu enna amki alala lak, hen bajuna tim ennak dena kim sek gwëk.

¹⁰ Gol karek mae nakon de emsa teisya irinni, 'Haen, awe se këza,' zen zëwe en emki ën. Bahem dekon etan gol dawem san dep al ëhan.

¹¹ Hwëna men dekore ë nakon emsa anakare ola ban teisya irin srëmna, 'Em ba habe awe aptanan zala? Èe ama emsa de salzimdinni

baes ta'an,' zen dekam em hëndep dekon song ën. È topnak em tana sonsa taik-tik oso guk kinin-dekakim anakan tame nuk, 'Zen sap Alap onakore ol dawem naban nëbe mae hap olhatazim zira, hwëna nen insa lesya-in srëm gwenan nëre mae hap de kareksae kim mam ulin.' "

¹² Zen dekam zep dan-dan dan-dankam sek gwëk, hen anakan tawa dahir-song gwëk, "Ere mae mo karek-karek nakon em ëhalen."

¹³ Hen dowal-dowala beya tangan naka nolëalsa sone gwibik, hen zi sang-sangna Yesus mo bosekam de minyak zaitunkum dra tabinkim beyakam dawem da gwibik.

Baptis ta gwibin zini Yohanissi kim dakke:

(Mat. 14:1-12; Luk. 9:7-9)

(Ayat 14-29)

*Yesus kim lima ribukam de zi beyam-bya hap tembanena golz-
imkike:*

(Mrk. 6:30-44; Luk. 9:10-17; Yoh. 6:1-14)

¹⁴⁻¹⁸ Galileak de teipsin zini Herodes Bak kim zëre mo osona Pilipus mo wenya Herodiana Baksa al gulbluka, hwëna baptis ta gwibin zini Yohanis zep damnak anakan jalse gweblaka, "Musa mo titi tabin ola kon, em sap diki bëjen em oso uk mo wenya gon." Hwëna Herodes dekam zep zëre mo jana nabare zisi Yohanissi de bwinak tahalen naka tak ta irin hip gubiridaka.

¹⁹ We zem in, Herodiana Bak, zen hen man enlala ennak Yohanissi taïl gik gweblak. Zen man sap Yohanissi de tan hap enlala gwe-gwëk, hwëna Herodes de gubiridan srëm kam bëjen tan.

²⁰ Sap Herodes hen man Yohanissi aïri gweblaka, sap zen man enlala gwe-gweblaka, "Yohanis zen zini dawemna. Alap zer soneka." In zep tan hap jalse gwibirida gwëka. Herodes hen man zëno olsa de sane gwen hap dwam gwe-gwëka, hwëna hyanak zep etan zëno enlalana anakan doweb la hana gwëka,

“Ëe banakan asa gwëblal? Zini an Alap mo zer sonen nakake.”

²¹ Hwëna Herodes zënaka de jaha gweblan yaklanak kim hatak, tembane yawalsa zep syal neibik. Tingare irik ginnik de mam-mamna hen jana nabare zi mo mam-mamna, hen Galilea kore nol-nola, zen man zë yaing gwezak, zao zep apdekam tembane tak. Zen dekam zep zauk- Herodiana mo baptis ta gwibin zini Yohanissi de taïl gik gwe-blanna in dikim jowen hap denakye.

²² Tembane tanna iwe, Herodiana mo wenam seiwiri man hen tilzik, zao zep tingare zi mo nwenak zisya gwe'ak. Herodes man tangan sam gwesibirki, hen tingare zi trana in man tangan sam neisibik. Herodes ki zep wenam seiwiri insa gu-gubirki, “Men desae ki ena abe gwibi'inka, zen desa asa ki hëndep ebe hap golbir.”

²³ Zen kirekam wenam seiwiri insa tingare zi mo inik gu-guk gwibi'inka, “Nglï naban kama naban mes asa nasalblanan: Ëe asa eno abe gwibinni insa ebe hap sul sonebir, hëndep ëre mo irik gin maena asa ep hlilbir!”

²⁴ Wenam seiwiri in dekam zep an zem Herodiana de anakan taken-sibin hip te sok, “Ëe basa asa dawem kire-kirena abe gwibir?”

Dekam zep ding gulbik, “Baptis ta gwibin zini Yohanis mo nolsa de blaonin halzan hap em abe gwen-ëe akakim anakan tawa gwëk, ‘Zen eiwa mes tangan tili.’ ”

²⁵ Wenam seiwiri in ki zep nabakam Herodes osan dep lwa halzak, ki zep gubluzak, “Ëe baptis ta gwibin zini Yohanis mo nolakaë abe gwibi'in- angkam de hëndep ap piring niban awe lonebir anezan hap.”

²⁶ Herodes kim zëno abena insa salka dekam enlalana man tangan dowebila hanaka. Hwëna etan bëjen zëno abena insa wet gul-subin, sap zen mes ki zën zi tra mo inik kirekam etan-etankam gu-guk gwibi'inka.

²⁷ Dekam zep hëndep zëre mo jana nabare zini gubluka, “Em bwinak Yohanis mo nolsa ap blaonblin halzan.” Jana nabare zini in dekam zep hëndep blaonblinhal zaka.

²⁸ Piring niban zep golhal zaka, ki zep hëndep wenam seiwiri in hap golbir zika. Zen zep hwëna an zikhip golbirhak.

²⁹ Yohanis hon de ang ta gwen wanya kim ësak, dekam zep tok naka de zerhan hap yaing gwezak. Ki zep hëndep kaso hulak nënek.

[14] Hwëna zao kim lwa se'ak, dekam zep hen etan Yesus hup de ola Herodes hon hatak, sap dekam mes Yesus mo syal hap dena ë-ë san ëtawa gwëdak. Zep ahakon man ëgu gwëk, “In eiwa, Yohanis Su Tabin Swe mes yap etan ngaya gwëka. In zen hwëna bosena Yesuskum li yul soneka. In zep zëbon owas-owa'a dikim syal gwe-gwibin hip de sosonna lwa'an.”

[15] Hwëna ahakon man ëgu gwëk, “In orep de Alap mo ol ayang gul gwen zini Elia Bak mes yap- men zen Alap osan dep sewe sekake. Zen hom tilki, in zep Yesuskum hwëna jowe zaka.” Ahakon hwëna man ëgu gwëk, “Ki hom. Zen Alap ëse naka zer soneka- orep men kirekam hen lup gul sone gwëkake.”

[16] Hwëna Herodes kim salka, dekam zep guku, “Aha hom. An Yohanis Su Tabin Swe. Ëe mes-am sap zëno nolsa de blaonsublun hap gubiridak. Hwëna in zen mes yap etan ngaya gwëka!”

Yesus kim lima ribukam de zi beyam-bya hap tembanena golz-inkike:

(Mat. 14:13-21; Luk. 9:10-17; Yoh. 6:1-14)

³⁰ Dua-blaskam de zëre hon ang ta gwen wanya- mensa zëna lup gul soneka, ki zep etan Yesus onak dep lwanda halzak. Zao zep donblazak- mensa zëna syal tandak hen tawa dabiridakye.

31 Hwëna zini hen beya tangan nik yaïng gwe-gwe'anzak, hëndep Yesus zep zëre hon de ang ta gwen wenya ban golëhir-hir gwe'anka-hëndep golëtembane tan maena ba kon dep? Yesus dekam zep zëre hon de ang ta gwen wenya insa gubiridaka, "Haen, awe bëjen nen teinikirin. Nen në-en zi srëmnak de teinikirin hip sek gwen."

32 Ki zep hëndep bulkum ëgwahak- zao de zë-en lowehen hap.

33 Hwëna zi beyam-byana in mes ëgwa hannak hla nulida sonek, hen zen mes anakan tame dabik, "O an Yesus maeke!" Zep ë-ë nakon beya enkam eik ora san ëhlu-hluk gwëk, hëndep zen zep nonol yaïng gwëk.

34 Yesus kim bulu kon ati gwe'anka, ki zep zi beyam-byana insa hlauluda kinika. Zen sërkam zë kwasang gwibiridaka, sap zen bi srëm zaho makan zë lowe he'ak. Zep zë mamkam tawa tabirki.

35 In kim tawa tabi'inka, zao zep hëndep kawë'ak. Dekam zep zëre hon de ang ta gwen wenya Yesussu nenblazak, "Angkam man kawë'an, hen langna an tahalha tanganna.

36 Diki dawemna zini an emaka zen de langna awe de golek de ë-ë san te-alakam tembane hap ëhakan hap enbirida'an."

37 Hwëna Yesus ki zep ding gulzimki, "Amki em tembanena zëbe mae hap hen olzimk."

Dekam zep ding nulblik, "Asya! Nen an san te-ala beya zi! * Ëë banakan de tembanena zëbe mae hap golzimdin hip?!"

38 Yesus ki zep etan takensibiridaka, "Eno mae mo rotina banaka'en? Emki hla tandan."

Kim hla dandak, ki zep nenblak, "Rotina aha-ere taha-tap enkam. Hogwena dan-dan."

39 Ki zep hwëna zi beyam-byana insa so trana iwe de hlik-hlikkam teinikirin hip gubiridaka.

40 Dekam zep kirekam ëteinikin nirak. Ahakore hlik-hlikna 100-100kum. Ahakorena 50-50kam.

41 Yesus ki zep aha-ere taha-tapkam de rotina insa hogwe darena in han teisyaka, dekam zep ngli san de kara gwesen naban Alap hap dawemna golblaka. Ki zep hwëna rotina insa ahap tabirki, hen hogwe darena insa kwa-kwak soka. Desa zep dua-blaskam de zini in hap etan-etankam kap ta gwizim'inka- zen de hwëna zi trana in hap kae gwëblazimdin hip.

42 Zi trana in kim dwenblandak, man tangan ëitri gwëk.

43 Ki zep hwëna dua-blaskam de wenya in tembane mosrona insa tagam dak. Hëndep yuna dua-blas enkam zep ësuwëk.

44 In zen rotina insa dwenblandak, zi ensa de äitbinkim, beyana lima ribu enkam- we wal walassa de äitbin srëmkamye.

Yesus kim ho gutu tahan san song gwe'an zakake:

(Mat. 14:22-33; Yoh. 6:15-21)

45 Kim tembane tasik, dekam zep hëndep dua-blaskam de ang ta gwen wenya insa bulkum de ho gutu men eihya san sek gwen hap gubiridaka-Zënaka de ëna Betsaida san dep ngeir gublun hap. Ki zep hen zi beyam-byana insa sekwak gwen hap gubiridaka.

46 Yesus kim zi beyam-byana insa hli yuludaka, ki zep zë-en kwatap tek san hata seka- dekon de Alapsa gu soneblan hap.

47 Kim kawesik, zëre hon de ang ta gwen wenya bare bulu mes ho gutu ngirinnik zauk, hwëna Yesus Zëna nama kwatapnak gwë'anka.

48 Dekon zep anakan kara tabir ane'anka, "Asesena ngein

* **6:37 6:37** "Te-ala beya" kam, Markus man ale gulku "200 dinar." Dinara zen zëno mae mo perak tangankam de te-ala kaso. Zen dekam anakarekam: Zi de aha-ere yakla blalkam syal gwenna, zëno gajina dekam aha-ere perakkam de te-ala kasokam. Zep 200 dinara, zen te-alana mam tanganna-san de dua-ratuskum de zi mo aha-ere yaklakam de syal tan gajina kiye.

nikon mamkam taïbirida'ara, zep karekkam ho ngëpna insa bulu inkam sap nakabi'in." Zëna hwëna oho-bung gun nuban zep ho gutu tahan san de song gwe zankam gulmun nuran makan gweibiridaka.

⁴⁹⁻⁵⁰ Zen kim hla da sonek weya tahan san de song gwennak, ki zep au hloblankam ëhërhek, sap zen man kil dik, "Hobwem dowal!"

Hwëna ki zep gubirida kinzika, "Em ësäwehen! Bahem ääirin. Ëe an Ëe."

⁵¹ Ki zep hëndep zëno mae mo buluk iwe sewese zaka. Asesena in dekam zep hëndep sëwe heka. Zëre hon de ang ta gwen wenyä in man tangan sërkam dengguanblak.

⁵² Sap zen aha-ere taha-tapakam de rotina mensa ahap tabir-zimki lima ribu enkam de zi hip, zen hom owasna desa tame nuk. Zëno mae mo nola dekam nama drak-drakna, zep zëbe mae hap man tangan gwa-gwa gwizimk- desa de tame gun hupye.

Yesus kim zi sang-sang beyambyana Genesaret dawem ta gwibirikike:

(Mat. 14:34-36)

⁵³ Genesaret kim bulkum yaing gwëk, ho gutu men eihyanak,

⁵⁴ kim atiti gwëk, zëwe de zini hëndep dekam zep Yesussu tame dazak, "O an zenke."

⁵⁵ Zen dekam zep tingare langna iwe de ë-ë san gubiridan hap ëhluhluk gwe gu nusenk. Zen kim anakan nasal gwebla'ak, "Angkam Yesus zao gwë'ara," dekam zep zi sang-sangna zato naban desan dep kap nulhal gwe'anzak.

⁵⁶ Yesus men desan ki tëndä gwëka zi sang-sangna hen zëwe nolëyaing gwënda gwëk- sap ë yalak, sap ë bete-teknak, hen sap ora san de gol-gol mae san. Hen pasar maenak kang nul gwëk, dekon zep Yesussu abe da gwëk, "Bian, zi sang-sangna an wëhë baju top en mae nakon Emsa olk ta'anaka?- dekakim tol dawem gwëka." Tingan men zen

olk da gwëk, zen dekam zep hëndep ëdawem gwe-gwëk.

7

Mae hap de ol: Auyan-aza mo titi ta gwibin ola ban man Alap mo ola ban ilman në gwenan.

(Mat. 15:1-9)

¹ Aha yaklakam Farisikam de gubirida gwen wenyä Musa mo olsa de tawa ta gwibin wenyä ban Yerusalem kon Yesus onak dep yaing gwëzak.

² Hwëna zen man Yesus hon de ang ta gwen wenyä hla nulidak- auyan-aza zik mo ëpba ol san de taha hlë tazimdin srëmkam tembane tannak. Zen man dekam enlala neibiridak, "Zen an mes Alap mo nwenak ëkun gwenan."

³ Yahudi zini zen kirekam zëre mae mo orep de auyan-aza mo ëpba ol san ang ta gwenan, hwëna Farisikam de gubirida gwen wenyä, zen zen tangan sërkam desa kyangkyang nulsuk gwenan. Zen bëjen mae tembane tan- zëre mae mo auyan-aza mo ëpba ol san de kire enkam tahasa hlë tazimdin srëmkamye.

⁴ Ba maesa de pasarak gonna, zen bëjen hokam de su tabin srëmkam twinbin. Hen beya tanganna zëre mae mo ëpba ola- zen men desa tangan kyangkyang nulsuk gwenan, mok, blang, cerek, [hen tum] maesa de su tablanda gwen naye.

⁵ Musa mo olsa de tawa ta gwibin zini in Farisikam de gubirida gwen wenyä ban dekam zep Yesussu dakensiblik, "Ebon de ang ta gwen wenyä ba hap nëno mae mo auyan-aza mo ëpba ola nulmun gwe'an?- tembane dëre ta gunnuk de tahasa nonol hokam hlë tazimdin srëmkam de tembane ta gwenkamye. Zen mes Alap mo nwenak ëkun gwenan."

⁶ Ki zep ding gulzimki, "Em an eiwa ëk enkame ëgu gwenan, 'Ëe an Alapsa de betek gweblanna.' Eiwa, Yesaya Bak mo ola man ebe mae hap

dakastilzim'in- zen insa Alap mo ola anakan ayang gulkuye,

'Zini in ek enkam Asa betek ne gweblanan, hwena zeno mae mo enhona Abon onakon langa tanganak.

⁷ Zen waba hap Asa boklena kom da gweblanan, sap zen zi zere mae mo titi tabin olkam tawa da gwibirin- san de ano olkam de tawa tabinni kiye.' "*

⁸ Anakan zep waulsuzimki, "Em Alap mo ola ema eibir kini gwenan, hwena zi mo olsae kyang-kyang ulsuk gwenan."

⁹ Etan ki zep gubiridaka, "Em an eiwa tewesin tanganna, zebe Alap mo ola eibir kini gwenan, hwena auyan-aza mo epba olsae kyang-kyang ulsuk gwenan."

¹⁰ Sap Alap mes Musa Bak hap ola ansa golblaka:

'Ane-biasa em blikip gwesik gwizimdin.'

Hen anakan mas gulku,

'Men nara an-bi zemka lamang sonna, zen hendep tok hap em karek tan.'*

¹¹ Hwena em an ema anakan tawa la gwibirin, 'Ane-bia mo ol san sap esa ang ta srēm gwe-gwer- anakan mae de lwankamye: Ane-bia de tahalha ennak, em sap esa anakan enbirida gwer; "Angkam ee molye emsa mas gwizimk, sap ano te-alana an lamkam de Alap hap kap tablan habē lam ta'an."'

¹² Eno mae mo tawa tabinkim, kirekam de an bi zemka blikip gwizimdin srēm zini man sam gwesira. Zep eno mae mo tawa tabinni ema kim enbirida gwenan, 'Bahem anebiasa mas gwe-gwizimdin.'

¹³ Zep ere mae mo auyan-aza mo epba tawa tabinni insa de kyang-kyang gulsunkum, zen hwena dekam Alap mo ol tanganna insae kim hli ku'in. Hen beya tanganna-em mensa kirekam ulin halasen gwenanye."

Mae hap de ol: Zini an dekon Alap mo nwenak ekun gwe-gwenan.

(Mat. 15:10-20)

¹⁴ Yesus ki zep etan zi beyana insa tagal gwen hap gubiridaka. Kim tagal gwek zao zep gubiridaka, "Kitak Asa sane lak- ekakim tame uk.

¹⁵⁻¹⁶ Mensa ek tihī san zini ing nul gwenan, dekon hom Alap mo nwenak ekun gwe-gwenan. Diki men zen zi mo ek tihī nakon wet so gwenan, zen diki dekon Alap mo nwenak ekun gwe-gwenan." *

¹⁷ Yesus ki zep zi beyana insa hli yuludaka, ki zep golak tilki. Zere hon de ang ta gwen wenya ki zep du neblazak, zao zep dakensiblik, "Bian, kun gwen hap de ola insa gulk sun blaonnara, emki abe mae hap srip gulsuzimdin."

¹⁸ Ki zep ding gulzimki, "Em san hen home tame ul? Ki em san hen zi trana in han apdenak?- enlala joblotopna. Men desa ek san olgwen gwibirin, zini dekon bejen Alap mo nwenak kun gwen."

¹⁹ Sap zen hom enhonak til gwenan. Zen ulpnuk hata gwenan, hendep ukum zebe ana gwibirin."

Ee an Markus. Ee ama ola ansa ebe mae hap srip gulsuzim'in: Kirekam kim Yesus tawa tabirki, zeno dam gulsunnu a kirekam mo: Tingare tembanena zen Alap mo nwenak dawemna. Tembane nakon bejen Alap mo nwenak kun gwen. Dekam zep etan ayang gulzimki,

²⁰ "Diki men zen zi mo enho nakon hatase gwenan, zen diki zini dekon Alap mo nwenak ekun gwe-gwenan."

²¹ Sap zen zi mo enho nakon anakare kareksa de gon hap de enlala jal-jala hatase gwenda:

kahalo gwen hap dena,

sowē hap dena,

zisi de tan hap dena,

²² hen wesya de lirak oson hap dena,

te-alasa de hole-hle gwibin hip dena,

aha zisi de tail giblin hap dena,

* 7:7 7:7 Yes. 29:13 * 7:10 7:10 Kel. 20:12; 21:17; Im. 20:9; Ul. 5:16 * 7:15-16 7:15-16 Ahakon men zen orep Markus mo ola ansa etan ale nul gwek, ayat enam-blasna man mas nuk. Markus 4:23 nakore naka etan zao mas nuk.

hen ahak-ahak tan hap dena,
 zi bosyansa de tonsublun hap dena,
 bola-bola gwen hap dena,
 nol drak-drak gwen hap dena,
 saher srëmkam de gwë gwen hap
 dena,
 hen zi bose zemka de anakare hap
 husus gweblan hap dena, 'Zen
 en dawemsa gul iri.'

23 Tîngare kirekam-kirekam karek
 enlalana in, zen enho nakon wet so
 gwenan. Zini zen diki dekon Alap
 mo nwenak êkun gwe-gwenan."

*Yesus kim Yahudi srëm we mo eini
 hlaulbirkike:
 (Mat. 15:21-28)*

24 Yesus dekam zep langna in kon
 zëre hon de ang tan wenyä ban
 golësek gweka- ë darena Tirus hen
 Sidon mo lang san dep. Zëwe zi
 mo golak zep sowë enkam golëbiti
 gweka- zi beya de anakan tawa gwe-
 blan srëm hap, "Zen mes awe hata
 zala." Hwëna Zen toton banakan
 dep?- tawa gweblan srëmkam de
 hatan naye.

25-26 Zep Yesus hom zëwe holo
 gwe'anka, dekam zep hëndep
 wenyä Zëbon hatazak. Wenyä in
 Yahudi wesya hom. Zen Tirus mo
 lang nakorena, hen Yunani olsa de
 ton gwibinni. Zëno wenam tola
 mes dowal bi gwibirki, zep zen
 kim Yesussu anakan salblak, "Zen
 mes hatanda," dekam zep hëndep
 zëno nwenak ik gwe hezak. Dekon
 zep abe tasek, "Ano wenam tolsa
 emki dawem gun. Dowal mes tol bi
 gwibirki."

27 Ki zep ding gulbirki, "Em
 Yahudi wesya hom! Èe de emsa mas
 gwibinkim dekam sa hwëna nwe-
 mase gwer- san de Yahudi zi mo
 walas hap de tembanesa de lwa hap
 yal tazimdinni kiye."

28 Ki zep hwëna ding gulbluk, "In
 eiwa, Bian. Dikire Yahudi walas
 tembane tak. Lwana hwëna meja
 iltikinnik sa teinikinser. Men zen
 walas êk nakon alti'ik, zen desa sa
 hwëna dwenbandal. Zep em de asa

mas gwibinkim, ki Yahudi walasna
 molya ëusak gwek."

29 Yesus ki zep ding gulbirki, "Sap
 kirekame dawemkam asa ding gul-
 blunda, dowala in mes eno wenam
 tola kon wet sonda. Sap esa song
 gwera."

30 Wenyä in dekam zep gol san
 dep song gwek. Golak wenam zem
 insa anakan zep hlau'unzak, "Deyol
 dërenak sëwehen nik glang-glang
 gwe'an, hen eiwa dowala in mes
 tangan zëbon onakon wet sola."

*Yesus kim dawemkam de ol ton
 gwen srëm hen i srëm zini dawem
 takake:*

31 Yesus kim etan Tirus mo langna
 in kon zëre hon de ang ta gwen
 wenyä ban golësek gweka, dekam
 Sidon mo lang san zep tamanka,
 hëndep Ho Gutuna Galilea san
 tineka, hëndep lang bosena Èna
 Dare Taha-tap hataka.

32 Zao zep zi i srëmna hen
 dawemkam de ol ton gwen srëmna
 Yesus onak dep nërhatagak, zao
 zep Yesussu abe dazak, "Bian, emki
 tahasa de tehabla inenkam dawem
 tan."

33 Yesus dekam zep zini insa zi
 beyana in kon zë-ere san dep zer
 halka, zao zep zëre mo taha bolsa
 zini in mo inik se soblan daka. Hen
 zëre mo tahanak ol tepsa tipsiki. Ol
 tepna inkam zep zini in mo mahala
 dra tablaka.

34 Ki zep hwëna ngli san kara gwe
 seka, deban ensasana langa tasiki,
 ki zep zini insa Ibrani zëre mae mo
 olkam gubluka, "Efata." Efata mo
 enlalana, "Em yak nën."

35 Zini in mo ini hëndep dekam
 zep yak nëblak. Mahala hen dekam
 zep jahalha gweblaka. Ola dekam
 zep hëndep dawemkam tonka.

36 Etan kim zi beyana in osan dep
 zon ta zaka, zao zep jalse gwibiri-
 daka, "Èe ansa zini dawem tanan,
 etan bahem mae ëton naseran."
 Hwëna kirekam sap jalse gwibirida
 gweka, zen hwëna man kim tangan
 sërkam ëton nasen gwek.

³⁷ Tingan men zen ësane gwek, man tangan sèrkam denggwanblak. Zen man ègu gwe'ak, "Eiwa, zini an wehasa hom, in zep ki kirekam dawem tabirida gwenda. Sap i matna, zen hèndep dekam sa ki ësane gwer. Sap ol srëmna, zen hèndep dekam sa ola èton!"

8

Yesus kim empat ribukam de zi beyam-bya hap tembanena golz-inkike:

(Mat. 15:32-39)

¹ Zao hom tangan holo gwe'ak, ki zep zi beyam-byana Yesus onak dep tagal gwezak. Tembanena kim tap gwizimki, Yesus ki zep zère hon de ang ta gwen wenyaka haen gwibiridaka, zao zep gubiridaka,

² "Èe ama zi trana ansa dawemkam kwasang gwibirida'an, sap zen mes dan-ahare yaklakam awe Asa nèrgwèk, hèndep ankam zèno mae mo tembanena mes tangan tap gwizimdi.

³ Èe de usak naban de sek gwen hap gubiridankam, zen sa hwèna ora san ètilsik song gwer, sap ahakon an langa nakon yaing gwezak."

⁴ Zère hon de ang ta gwen wenyaka in ki zep ding nulblik, "Zi srëm langna awe, tembanena endawe esa ol?- dekam de zi beyam-byana ansa sul sonen hapye."

⁵ Ki zep hwèna takensibiridaka, "Eno mae mo rotina banaka'en?"

Ki zep ding nulblik, "Tuju enkam."

⁶ Yesus ki zep zi beyam-byana insa teinikin niran hap gubiridaka. Ki zep tujukam de rotina insa kap taka, dekam zep Alap hap dawemna golblaka, ki zep hwèna ahap tabirki. Desa zep zère hon de ang ta gwen wenyaka kip etan-etankam kap ta gwizim'inka- zen dikim kae gwibin hip.

⁷ Hogwe bete-tekna hen da-en zè nola'ak. Yesus etan hogwena in hap dawemsa Alap hap golblaka, ki zep

hen gubiridaka- dekam de hen kae gwibiridan hap.

⁸ Kim dwenblandak, zen man tangan èitri gwek. Mosrona kim tagam dak, yu yawal-yawala tuju enkam zep èsuwek.

⁹ In zen tembane tak beyana san ha empat ribu enkam mes yap. Yesus ki zep sekwak gwen hap gubiridaka.

¹⁰ Zèna zère hon de ang ta gwen wenyaka ban dekam zep hèndep Dalmanuta mo lang san dep bulkum golèsek gwèka.

Yesusu kim owassa de syal gwibir-zimdin hip abe dakke:

(Mat. 16:1-4)

¹¹ Farisikam de gubirida gwen zini ki zep Yesus hun de ol zerkeisa-keisa gwen hap yaing gwezak. Zen dekam de akasiblin hap anakan abe dak, "Emki ngli nakore owassa ap syal gwibir-zimdin. Zen dekam asa emsa anakan laibliblal, 'Zen eiwa Alap onakon hata zaka.' "

¹² Yesus nonol enlala dowe hanan naban zep ensasana langa tasiki, ki zep gubiridaka, "Em bap auhu-kama enlala zini ngli nakore owassa de ebe mae hap syal gwibir-zimdin hip Asa abe lal. Eiwa denakaè emsa gubirida'an: Em makare zi hip Èe bèjènè owassa syal gwibir-zimdin."

¹³ Kirekam kim gubiridaka, ki zep zè hèndep hli yuluda guk halka. Bulkum zep zère hon de ang ta gwen wenyaka ban men eihya san dep golètablan gwe kinika.

Yesus kim gubiridakake, "Dawem. Farisi hen Sadukikam de zi mo ragisa ema ulinnink."

(Mat. 16:5-12)

¹⁴ In kim bulkum sek gwek, Yesus hon de ang ta gwen wenyaka hwèna hom tembanena sowe henkam kap dak. Rotina hwèna aha-en tol ing nuk.

¹⁵ Yesus ki zep ola gulk sun blaonzimki, "Dawem. Terya-tyakam lowehék. Farisi zi mo ragisa ema ing

ulink. Hen Herodes moka ema hen ing ulink.” *

¹⁶ Zëre hon de ang ta gwen zini in hom anakan dam nulsuk, “Kire hap ki asa gubiridala,” zep hwëna zënaka donbirida'ak, “Nen home rotina bitï lazal. In zep ki nësa gubiridala.”

¹⁷ Yesus hwëna mes tawa gwibiridaka- in sa zënaka donbirida'ak, ki zep gubiridaka, “Em ba habe roti bitï tazan srëm hap enaka lonbirida'an? Em ba hap tangane tame ul srëm gwe-gwe'an?! Em in eiwa enlala joblo-topna.

¹⁸ Em dwan nwena kike. Em ba habe hla kul srëm gwe-gwe'an? Em dwan ini kike. Ba habe ëgwë gwe'an?- san de ësan srëmna.* Em san home enlala eibi'in?

¹⁹ Mensa aha-ere taha-tapakam de rotina lima ribukam de zi hip ahap tabir-zimk, dekam tembane mosrona kime tagam lasik, yuna banaka'en ësuwek?”

Ki zep ding nulblik, “Dua-blas enkam.”

²⁰ “Hen mensa empat ribukam de zi hip tuju enkam de rotina ahap tabir-zimk, dekam tembane mosrona kime tagam lasik, yu yawal-yawala banaka'en ësuwek?”

Etan ki zep ding nulblik, “Tuju enkamke.”

²¹ Dekam zep gubiridaka, “Ki em ba habe tame ul srëm gwer? Èe san rotisa de bitï tazan srëm habë emsa gubiridal.” †

Yesus kim Betsaidak zi nwe dïminni dawem takake:

²² Betsaidak kim yaing gwëk, zi nwe dïminni ki zep Yesus onak dep nër halzak, zao zep abe dazak, “Bian, emki zi nwe dïminni ansa tahasa tehabla inen- dekakim tol etan nwesa kara gwëka.”

²³ Yesus ki zep ëna in kon tahakam irik ta halka, zao zep

oltepkam nwena in sa dra soblaka, ki zep tahana nwenak tehabla ineka. Tahana in sa kim teisyasiki, ki zep hwëna takensiblika, “Em wëhë dawemkam hlauluda'ara?”

²⁴ Zini in dekam zep kara gwëka, ki zep ding gulbluka, “Kië. Èe kië zini kara tabi'in, hwëna san de te de ëtë naseranna kiye.”

²⁵ Yesus ki zep etan nwenak tahana tehabla ineka. Dekam tangan zep dawemkam kara gwen hap alp gwëka. Dekam zep hëndep nwena in etan sërkam tangan dawem nëblak, hëndep lalak tangankam kitak kara gwëka- men kiye, dïmin nëblan srëmna kim gwëkake.

²⁶ Yesus dekam zep gubluka, “Dekam gol san song gwe. Hwëna ë san bahem tamaran, ki sa anakan ëtawa gwer, ‘Zen mes dawem tala.’ ”

Petrus kim Yesusu anakan kira takake, “Bian, Em an Zen- Israelsa de gaya tabin hip de Zi niye.”

(Mat. 16:13-20; Luk. 9:18-21; Yoh. 6:66-71)

²⁷ Yesus ki zep zëre hon de ang tan wanya ban ë bosena Kaesarea-Pilipi mo golek de san de ë-ë san golësek gwëka. Oranak zep takensibiridaka, “Zi mo Asa de dam tasinkim, Èe an nara mo weinak debë hatazak?”

²⁸ Ki zep ding nulblik, “Ahakon man emsa nen gweblanan, ‘In baptis ta gwibin zini Yohanis Swe tin nikon etan ngaya gwëka. In zen hwëna Yesuskum bosena li yul soneka.’ Hen ahakon man emsa nen gweblanan, ‘In Elia Bak mo weinak Alap mo olsa ayang gul gwizim'ira.’ Hen ahakon man emsa enlala në gweblanan, ‘Zen diki ahanik mo weinak dep jowe zaka- men zen orep Alap mo ola ayang nul gwëkke.’ ”

²⁹ Ki zep etan takensibiridaka, “Hwëna ere mae mo Asa de dam

* **8:15 8:15** Yahudi zi mo gulk sun de ol blaon gwizimdinkim, zen ragisa enlala nei gwibik- zen san de zi mo karek-karekna kiye. Sap ragina, roti mang-mang gunnu man hop gul gwenan. Zep zen san de zi mo karek-karek de aha zi sin dep hlimin song gwe-gwenna kiye. Emki hlaun 1Kor. 5:6-8, hen Gal. 5:9nak. * **8:18 8:18** Yer. 5:21; Yeh. 12:2 † **8:21 8:21** Ayatnak awe Yesus mo olsa de dam gulsun hup, emki Mat. 16:12nak hlaun.

tasinkim, Ëe an diki nara mo weinak dep dena?"

Petrus zep ding gulbluka, "Bian, Em in Zen- Israelsa de ngaya tabin hip de Teipsin niye."

³⁰ Ki zep hwëna jalse gwibiridaka, "Asa insa kirekam dam lasinän, aha maesa hwëna bahem gubiridan."

Yesus kim nonol tanganna Zën de kareksa goltowen hap dena hamal hap gu-gubiridakake:

(Mat. 16:21-28; Luk. 9:22-27)

³¹ Yesus ki zep kon gwisibir hana'anka- zëre hon de ang ta gwen wenyaka de anakan tawa tabinkim, "Alap mo dwam gwibinni abe hap dena a kirekam sa lwal: Ngatan zi mo lang nakore Zi Tanganna Ëe karekna mam tangan naka asa goltower. Yahudi mo nol-nola ban, Alap mo golak de syal tan zi mo mam-mamna, hen Musa mo olsa de tawa ta gwibin zi niban sa Asa baes nëblal. Ki sa hëndep Asa dal. Hwëna yaklana dan-ahan, ki asa etan tin nikon ngaya gwer." †

³² Zen dam-dam enkam kirekam gubiridaka- zen de karekkam dam gulsun srëm hap. Petrus ki zep hwëna Yesussu ora nakon de asyal hehan hap gulbluka, zao zep anakan jalse gwebla'anka, "Em bap kirekam gulu! Kina ki bëjen kirekam lwan."

³³ Hwëna Yesus ki zep lure san ahakore zëre hon de ang ta gwen wenyaka lero gwibiridaka, ki zep zëno mae mo inik Petrussu anakan jalse gweblaka, "Em in dowal mo kigi! Ki lun em gwën. Eno kirekam de enlalana in Alap mo dwam gwibin sin denaka hom. Zen auhu-kama zi mo dena."

³⁴ Dekam zep Yesus zi trana insa hëndep zëre hon de ang ta gwen wenyaka ban haen gwibiridaka, ki zep zë gubiridaka, "Men nara Abon de ang gwe-gwen hap dwam gwenna, zen diki zëre mo gwëna zen eititi gwibin- dekam de zëre hap de

te-lidak son wë son naban Asa zertronda gwen hapye, anakare enlala naban, 'Ëe sap asa Yesus hun apdenak lil.'

³⁵ Sap men zen de zëre mae mo auhu-kamanak de gwëna anakan nolairi gwe'ak, 'Ëe babë Yesussu de ang gwe-gweblannak karekna goltowe gwen,' ki zëno mae gwëna in sa jek-jak gwer. Diki men zen Asa de ang gwe-gweblan hap hen abe hap de ol dawemsa de gol halada gwen hap zëre mae mo gwëna sosok nul gwe'ak, hëndep zao mae de tin hip, zen zen sa hëndep denaban ëngaya gwer.

³⁶ San ha dawemna?- em de sërkam te-ala beya gwenkam kitak de okamana ansa bi gwibinni, dekam de hwëna ere mo gwënsa tihis gin hip. Kirekam dawem naka hom!

³⁷ Tinkim san ha emaka te-ala beyana inkam ba maesa Alap hap golbla'ara?- dekam de etan ngaya gwen hapye. Kina ki bëjen.

³⁸ "Auhu-kamanak de zini man Alapsa hli da gwenan- dekam de dowal-dowalsa ang gwibirida nasen gwen hap, hen kirekam-kirekam kareksa dikim gulin halasen gwen hap. Hwëna Abon de ang gwe-gwen zini em de zëno mae mo ngirin nikon anakan de gunsu saher gwenna, 'Ëe Yesussu de ang gwe-gweblan zi,' ki ngatan zi mo lang nakore Zi Tanganna Ëe kimë Bian mo ngatan naban hen soson naban zëno dam taha nakore zi niban golëyaing gwe'anzak, Ëe molyë hen emsa anakan kira tak, 'Zini an eiwa Asa de ang gwe-gweblanna.' "

9

¹ Ki zep etan gubiridaka, "Eiwa denakaë emsa gubirida'an: Em an zene awe lowe he'an, em molyë ahakon na-en juwek- Alap mo yakla

† **8:31 8:31** Yesus Yahudi mo aïtbinkim "yaklana dan-ahan" kam guku. Nëno mae mo aïtbinkim, Zen "zëno ka'an" kam maka guku, ahaksa, "yaklana dan-dan" kam. Sap Yesus Jumatkam tülki, hwëna Minggukam zep ngaya gweka.

yalak de zaun srëmnakye. Em esa Asa hla lal- Ëe kimë zëre mo sosen yawala ban zëre mo bosekam de irik gin hip hata'an zakye."

Yesus kim aha nwe-mase gwekake:

(Mat. 17:1-13; Luk. 9:28-36)

² Yaklana kim enam enkam damank, Yesus dekam zep zëre hon de ang ta gwen wenyä Petrus, Yakobus, hen Yohanis mae en han zë-en kwatap yawal san dep golësek gweka. Hwëna dan-ahare zini in mo nwenak zep Yesus mo timni liwe heblak.

³ Zëno pakeanna man tangan sërkam ngap-ngap nëblak hen man nalilingtilbli'ak. Okamanak de ngap-ngap kire-kirena, men ki ogom ngap-ngapna, zen man kitak lwala he'an- zëno ngap-ngap nakonye.

⁴ Ki zep hwëna Musa Bak ne Elia Bak ne mumuk ennak jo kë zaka, hen Yesus hon de ang tan dan-ahare zini in ki zep zë nakek- zen kim Yesus hun ëraisil gwe'anka.

⁵ Petrus ki zep hwëna Yesussu totoresä gubluka, "Bian, dawem tanganna- nen de awe lowehe gwen hapye. Zep ëe asa gol kluksa dan-ahan syal ëblandal- ahana Bian ere hap, ahana Musa Bak hap, hen ahana Elia Bak hap."

⁶ Hwëna Petrus insä kirekam gubluka, hyanak zëna man saher gwibi'inka, "O ëe an ba habë kirekam gublul!" Sap zen wal bose dare zem in han man sërkam ziairi'anka.

⁷ Hwëna butna ki zep zë wale tabirzik, hen butna iwe zep ola ësak, "An ano Tane- ëre mo dang tininak de tanganna. Desa em sal gweblan."

⁸ Zen nabal-bakam zep sap men-san an-sankam ëkaratda gwendak, hwëna zi maena hom zë hla dak. Hwëna Yesus Zëna en naka zë hla dak.

⁹ Kwatapna in kon kim etan golëtine gwe'anka, zao zep gubiridaka, "In desa ki ena hla kul, etan aha maesa bahem gubiridan-

ngatan zi mo lang nakore Zi Tanganna Ëe de nama tin nikon ngaya gwen srëmnakye."

¹⁰ Zen man Yesus mo ol jalse gwibiridanna in san ang tak, hwëna zë-erenak zep zë-en anakan don gwibik, " 'Tin nikon de etan ngaya gwenna,' zen banakarekam sa lwal? Nen home dam ulsu'un."

¹¹ Dan-ahare zini in dekam zep hwëna dakensiblik, "Elia Bak mesam lwa hala. Ëe hwëna ama tim ul, 'Zen sa Emsa ngeirbli zala.' Sap Musa mo olsa de tawa ta gwibin hip de zini kirekam am ëgu gwenan, 'Zen diki nonol Elia Bak sa etan lwahal zankam ngeirbli zala, ki sa hwëna nësa de ngaya tabin hip de Zini hata zala.' "*"

¹² Yesus ki zep hwëna ding gulzimki, "In sap eiwa kirekamke. Elia zen sap kirekam-kirekamsa de nonol sul sone gun hup de zini zen-Israelsa de ngaya tabin hip de Zini Ëe de hwëna kirenak hatazan hap. Hwëna Alap mo ola ahana hen ki, kirekam de hen Abon jowen hap dena- men zen anakan lwakye,

'Ngatan zi mo lang nakore Zi Tanganna sa baes nëblal, hen karekna mam tangan naka sa goltowe gwe- era.' "*"

¹³ Hwëna ëe ama emsa gubirida'an, Elia zen sap mes eiwa Asa ngeirbli zaka, hwëna zini zëre mae mo dwam gwibin sin kirekam-kirekam karek-karek ensa nol gweblak- men kirekam hen zëbe hap dena Alap mo olak hamal hap lwakke."

Yesus kim dowal mo tilblin walas tola dawem takake:

(Mat. 17:14-21; Luk. 9:37-43)

¹⁴ Yesus kim etan zëre hon de ang ta gwen zi dan aharena in han golëlwandahal zaka- ahakore zëre hon de ang ta gwen wesyan dep, hwëna zi beyam-bya naban zep zë hla nulida'ak. Musa mo ol tawa ta gwibin wenyik zë Yesus hon de ang ta gwen wenyä in han nolëol tetek gwe'ak.

* 9:11 9:11 Mal. 4:5 * 9:12 9:12 Yes. 53:3-9

¹⁵ Hwëna Yesus Zënaka kim hla da guk, ausa zep anakare hap nohlo gubluk, "Zëna man hata'ara." Dekam zep hut tu ane gun hup ëhlu-hluk gwezak.

¹⁶ Yesus ki zep takensibiridaka, "Em ba habe ëol tetek gwesan?"

¹⁷ Hwëna zini ki zep zi trana in kon ding gulbluka, "Bian, ëe ëre mo walassaë ebon dep zer halzal. Dowal til gweblanda, zep tol ol srëm gweka.

¹⁸ Dowala in kim til gweblanda, dekam zep ëk tutum nuban kamanak zënaka zerheir isen gwenda. Èkna dekam zep hen ngalk-ngalk so gwenda, hëndep dekam zep tingare timni kyang-kyang gwe-gwenda. Èe mesë sap ere hon de ang ta gwen wenya zersa sonen hap gubiridal. Hwëna man sap nakablal."

¹⁹ Yesus ki zep gubiridaka, "Eiwa, angkam de zini em ei nibarena hom tangan! Èe san ëse nakaë sap emsa golëlowehe gwék?! Èe ama bae-ban mae de holokam golëlowehe gwen naye. An san emki walasna insa zerhalzan."

²⁰ Ki zep nër halzak. Dowala in kim Yesusu hla taka, dekam zep walasna insa yal-yal taka, ki zep hëndep kamanak zerheirki, zao zep ëk tutum nuban ololo gwe'anka.

²¹ Yesus ki zep bi zemka takensiblika, "Dowala in bawalkam kon gwesibli hanaka- kirekam de gwë gweblan naye?"

Ki zep ding gulbluka, "In beteknak ki hëndep til gweblaka.

²² Dowala in syauknuk de zerheir gwenna mes beya taka- hen honak de keing ta gwen naye. Zen kire tangankam tan hap am ki gwëbla'ara. Hwëna eno sosen de kirekam lwablankam, emki tol asa kwasang gwizimdin hen mas gwizimdin."

²³ Yesus ki zep hwëna jalse gweblaka, "Ha! Em bap kirekam Asa gublula, 'eno sosen de kirekam lwablan'kamyé? Ki em home Asa taiblibla'ara. Em de Asa taibliblankam kina ki banakare

maena man?- Èe de ebe hap syal gwibir-blin srëm hap denaye!"

²⁴ Bi zem in dekam zep hëndep ol mamkam gu aneka, "Èe sap ama Emsa taiblibla'an, hwëna sowehen tangankam homë. Emki ano Emsa de taibliblansa ap esek gul seblan!"

²⁵ Yesus kim hlauludaka, "Zini angkam man hlu-hluk gwe-gwe zankam Asa dot dasi'in," ki zep dowala insa gubluka, "I srëm hen ol srëm dowal, walasna an kon em wet son. Bahem etan tilblin."

²⁶ Dowala in ki zep hërheka, etan ki zep walasna insa karek tangankam yal-yal taka, ki zep hëndep zëbon onakon wet soka. Walasna in tok makan zep zë lwa'anka. Zi beyam-byana in dekam zep nenblak, "In mes tilida."

²⁷ Hwëna Yesus ki zep taha nakon de zer inenkam li taka. Dekam zep hëndep dawem gweka.

²⁸ Yesus kim zë-en golak gwë'anka, zëre hon de ang ta gwen wenya dekam zep zë-en du nëblazak. Zao zep dakensiblik, "Bian, ëe ba hap tanganë dowala insa ëralsa sone srëm gwer?"

²⁹ Ki zep ding gulzimki, "Kirekam de dowala, toton banakare aha maekam bëjen zersa sonen. Zen aha-en diki Alapsa de abe ta gwen enkam de zersa sonen."

Yesus kim etan Zën de tïn hip dena tonbiridakake:

(Mat. 17:22-23; Luk. 9:43b-45)

³⁰ Yesus dekam zep zëre hon de ang ta gwen wenya langna in kon golësek gweka, Galilea san zep golëtaman gweka. Zen hom dwam gweka zi de anakan tawa gweblan hap, "Yesus zëwe gwe'ara."

³¹ Sap Zen dekam dua-blaskam de wenya in ensa tawa ta gwibi'inka. Zen anakan tawa ta gwibi'inka, "Ngatan zi mo lang nakore Zi Tanganna Asa sa jal zi mo tahanak dep tapbla dazim. Zen sa hëndep Asa dal, hwëna yaklana dan-ahan ki asa etan tïn nikon ngaya gwer."

³² Hwëna zëre hon de ang ta gwen wenyä hom tame nul gwe'ak- insa kirekam tawa ta gwibi'inkaye. Hwëna takensiblin hap man näriblak.

Dua-blaskam de wenyä kim mae hap ëol gwekke, "Diki ëe amaka nëre mae onakon mam gwe'an."

(Mat. 18:1-9; Luk. 9:46-50; 17:1-2)

³³ Kapernaumk kim dua-blaskam de zini insa golëyaing gweka, golak kim golëbiti gweka, zao zep takensibiridaka, "Em oranak basae ol eibir sinzal?"

³⁴ Zen hwëna man nasalsiblik, sap oranak zen eiwa man mae hap ëol gwezak, "Diki ëe amaka nëre mae onakon mam gwe'an."

³⁵ Yesus ki zep tagal gwesin hip gubiridaka. Zëna dekam zep nikin aneka- dekon de tawa tabin hip. Ki zep gubiridaka, "Kitak ësane gwek. Zi de Alap mo irik ginnik mam gwen hap dwam gwenna, zen diki tingare zi mo babu gwen zi makan zen gwën. Zen dekam sa Alap mo nwenak mam gwera."

³⁶ Ki zep hwëna walas tola haen gweblaka, dekam zep zëno mae mo nwenak de zaun hup gubluka, zao zep babang tan naban gubiridaka,

³⁷ "Zini men zen de ano bose hap aha zisi mas gwebla'anaka- sap anakare walas tol maesa, Eë asa desa enlala gweblal, 'Zen Asa mas gwebla'ara.' Hen zi de Asa mas gweblanna, Alap men Zen Asa zer soneka, Zen sa desa hen enlala gweblala, 'Zen hen Asa dekam mas gwebla'ara.' "

³⁸ Ki zep hwëna Yohanis gubluka, "Bian Guru, ëe zisië hla lak- eno bosekam de dowalsa golëalsa sone gwennak. Eë zebë jalse ëblak, sap zen nëbon mae de ang gwe-gwen naka hom."

³⁹ Ki zep hwëna gubiridaka, "Em bap jalse ëblak, sap zi de ano bosekam owassa syal gwibinni,

kirekam de zini bëjen nabakam Asa lamang tan.

⁴⁰ Sap zini men zen nësa baes neibirida srëm gwe'an, zen zen- nëbon mae onak dep denaye.

⁴¹ Eiwa denakaë emsa gubirida'an: Zi de ano bose hap emsa mas gwibiridanna- aha-ere ho mok mae tolsa de anakare enlala naban golblankam, 'Zen Kristussu de ang gwe-gweblanna,' ki Alap sa zëbe hap hen dawemna lamkam golblala. Zen molya golbla srëm gweka.

⁴² "Men nara Asa de taibliblan zisi, sap hen anakare walas betek maesa, karek san dep zertoranna, zen dikim hwëna Asa hli tan hap, kire zini Alap sërkam tangan sa karek tala. Diki dawemna, zen maka zertoran srëmnak karekkam de tinsi hlauku. Kaso dohon-honsa de holenak hule soneblan naban de hi tateknak hiri tan maekam, ki zen molya karek san dep zertonnam, hen Alap molya karek ta'anam.

⁴³⁻⁴⁴ "Emsa de ere mo aha taha anakan titi da gwe'anam, 'Haen, karekna ansa nen on,' diki dawemna em blansin. Sap eme dare taha naban zigwë'anaka, ki esa hëndep Asa hli tala. Ki hwëna tinsin srëm syauknuk esa hëndep denaban gwë gwera. Blansinkim ki emaka sam gwesi'ira- aha-ere taha naban de Alap onak gwë gwen hapye. *

⁴⁵⁻⁴⁶ Hen kirekam, emsa de ere mo aha tana anakan titi da gwe'anam, 'Kareksa de gon hap nen song ën,' diki dawemna em blansin. Sap eme dare tana naban zigwë'anaka, ki esa hëndep Asa hli tala. Ki hwëna tinsin srëm syauknuk dep sa emsa hiri daser. Blansinkim ki emaka sam gwesi'ira- aha-ere tana naban de Alap onak gwë gwen hapye.

⁴⁷⁻⁴⁸ Hen kirekam, emsa de ere mo aha nwe titi da gwe'anam, 'Haen, nen karekna wakinsa karatda un,' ki nwenä insa em alsin. Sap eme dare nwe naban zigwë'anaka, ki esa

* **9:43-44 9:43-44** Ahakorena men zen orep Markus mo ola ansa etan ale nul gwek, ayat 44na hen 46na man mas nuk. 48naka zë etan mas nuk. 48na, zen Yesaya 66:24 naban apdenak.

hëndep Asa hli tala. Ki hwëna tinsin srëm syauknuk dep sa emsa hiri daser. Men zëwe kirekam de zini yal nulse gwenan,

'zao blëna hëndep denaban zëno mae mo timni hlok dasik gwibirin, hen zen man hëndep denaban syauk sal-sal ngirin nikon sang-sangna neis gwibirin.'*

Alsinkim emaka sam gwesi'ira- aha-ere nwe naban de Alap onak gwë gwen hap, Zen kim de kitak irik gi'inkaye."

⁴⁹ Yesus ki zep gulk sun de ol blaonzimdinni dan mas sozimki: "Zep zini tingan syauk sal-sala sa neis gwibir. Ahakon okama ennak sa neis gwibir. Hwëna ahakon, zen hëndep de tangan naban sa neis gwibir.

⁵⁰ "Em an zene Abon onak ang ta gwe'an, em okamanak san de hina kiye. Hina zen sap tembanesa de dërek gun hup dawemna. Hwëna blëble gwenkam, dekam tembanesa dikim dërek gun hup dena man hom gwe-gwenan. Hwëna em bahem hi mo kim dërekna ëhom gwen. Ki hwëna em molye aha-ere enlalakam lowehe gwëk."

10

Yesus kim wesya de baes gwibin srëm hap dena tawa tabirkike:

(Mat. 19:1-12; Luk. 16:18)

¹ Yesus dekon Yerusalem mo lang san zep zëre hon de ang ta gwen weny ban golësek gwëka, hen weyana Yordan mo men eiha san de lang san dep golëtablan kinika. Zi beyam-byana zao zep etan Zëbon dep yaing gwe-gwezak, zao zep etan tawa ta gwibirki- men kirekam gwë gwëkake.

² Farisikam de gubirida gwen zini hen man Yesussu de akasiblin hap yaing gwezak. Ki zep dakensiblik, "Em banakane Musa mo titi tabin ola dam gulsu'ura? San ha zini we

zemka sap de baes gwibinkim? San ha bëjen?"

³ Ki zep ding gulzimki, "Musa ki banakan kire hap nësa titi tabirki?"

⁴ Ki zep ding nulblik, "Zen anakan titi tabirki,

'Zini we zemka sap de baes gwibinkim, hwëna nonol baes gwibin hip de suratsa de anakan ale gunkum, "Eë mesë kire hap baes gwibik." ' '*"

⁵ Ki zep hwëna gubiridaka, "Em in kitak kwasang enlalana tawa naka hom, in zep Musa kirekam ein ebe mae hap ale gulzimki.

⁶ Hwëna diki Alap mo dwam gwibin tanganna, zen diki men kirekam okamana ansa de yang gulsun nukon lwakke,

'Alap nonol tanganna zi niban weny ban yang sosuku.'*
Hen Zen dekam anakan guku,

⁷ 'Zini an-bi zemka hli sonkam-dekam de we zeban aha-en ën hapye.

⁸ We-zi darena in dekam Alap mo nwenak san de aha-ere timni kiye.'*
In zebë emsa gubirida'an: Alap mo nwenak we-zi darena zen dan hom. Zen hwëna aha-en.

⁹ Zen in zep, Alap mensa aha-en sonna, zi bap zen etan kles son."

¹⁰ Golak kim golëbiti gwëka, zëre hon de ang ta gwen weny zao zep etan we baes gwibin hip dena insa dakensiblik.

¹¹ Yesus ki zep ding gulzimki, "Zi de we zemka baes gwibinni, hwëna ahanaka de etan gonkam, dekam Alap mo nwenak zen mes nonol we zemka yane-ne gulku, hen zëna kahalonak gwë gwe'ara.

¹² Hen kirekam, we de zi zemka baes gwëblanna, hwëna ahanaka de etan zenkam, zen hen dekam Alap mo nwenak mes zi zemka yane-ne tak. Zëna kahalonak gwë gwe'an."

* 9:47-48 9:47-48 Yes. 66:24 * 10:4 10:4 Ul. 24:1; Mat. 5:31-32 * 10:6 10:6 Kej. 1:27; 5:2

* 10:8 10:8 Kej. 2:24

Yesus kim anakan goltreizimkike, "Walasna an makare zini, zen zen Alap mo irik ginnik bitu gwe'an."

(Mat. 19:13-15; Luk. 18:15-17)

¹³ Zini dekam man walas zemka Yesus onak dep kap nulhal gwe'anzak- Zen de tahasa tehabirida ine gwen hap. Hwena zere hon de ang ta gwen wenyik anakan jalse neibirida gwe'ak, "Walasna bahem an san kap gulhal gwezan. Bahem Gurusa blostaban."

¹⁴ Hwena Zena kim hlaluludaka, ki zep anakare ola ban jal gwibirida'anka, "Em bap jalse eibiridal. Dikire walasna Abon nolayaing gwe-gwezak. Bahem jalse gwibiridan. Sap walasna an makare wanya, zen zen Alap mo irik ginni bi neibi'in."

¹⁵ Eiwa denakaä emsa gwibirida'an: Men zen de walas bete-tekna an mo kim Alapsa anakan daiblibla'ak, "Zen eiwa ano teipsinni," zen zen Alap mo irik ginnik bitu gwe'an. Men zen de kirekam daiblibla sräm gwe'ak, zen molya Alap mo irik ginnik bitu gwek."

¹⁶ Ki zep hwena walas tane-nena insa babang tabin niban tahana tehabirida ine gwe'anka- anakan de Biansa abe ta gwen naban, "Bian, walasna an hap dawemna gol gwizim."

Te-ala beya nabare zini kim Yesus hon hatakake:

(Mat. 19:16-30; Luk. 18:18-30)

¹⁷ Yesus kim etan dekon song gwe'anka, zini ki zep hwena Zebon osan dep hluwe zaka, zao zep zeno nwenak boklena kom so zaka, ki zep kon gu seblaka, "Bian Guru, em airis. Ee basa asa syal gwibir?- ee dikim hendep de gwän hap denaka gul irin hipye."

¹⁸ Ki zep ding gulbluka, "Diki airis aha-en tangan Alap Ze-en. Zep em Asa banakane enlala gwebla'ara?"

¹⁹ Em dwan mes-eme sap Musa mo titi tabin ola tawa gwibirki- men zen anakan lwakye:

'Zini bahem tan.

Bahem kahalo gwen.

Bahem sowë gwen.

Zisi bahem boton hap klak tan hen boton olsa bahem gol hala seran.

Zisi bahem lwa tasin.'

Hen,

'Ane-biasa em blikip gwesik gwizimdin.' **

²⁰ Zini in ki zep ding gulbluka, "Guru, ee beteknakë ki hendep desan ang gwe-gwek, hendep angkam namaë desan ang gwe-gwe'an."

²¹ Yesus hwena embwan naban zep hla taka, depan zep gubluka, "Hwena aha-en tangan lwa kini'an-em de desan ang gwen hap denaye: Em song gwen, ere mo kirekirena kitak tangan te-ala hap lirak tabir. Te-alana desa tahalha zi hip kae gwebla-zim. Kirekame syal gwibi'inka, ki ngatan zi mo langnake hendep de te-alasa beyakam lam ta'ara. Ena dekam etan hataza- Asa dikim ang gweblan hapye."

²² Kirekam kim salblaka, dekam zep kon enlala dowe hanan naban song gweka- mae hap: Sap zeno kirekirena beya tanganna.

²³ Yesus ki zep hwena zere hon de ang ta gwen wanya insa nwekam amjanbirki, ki zep ze gubiridaka, "Eiwa, gwa-gwa tanganna- te-ala beya zi de Alap mo irik ginnik hatan hapye!"

²⁴ Zere hon de ang ta gwen wanya in man tangan Yesus mo ola insa dengganbi'ik. Dekam zep hwena etan gubiridaka, "Ano walas, eiwa dam-dam naka hom- Alap mo irik ginnik de hatan hapye.

²⁵ Te-ala beya zi de Alap mo irik ginnik tin hip dena, zen men kiyunta yawal de jaron hul betek san tinni. Kire otweran yawala toton bejen tin."

²⁶ Kirekam de esane gwenkam, zen man etan serkam etenggwan,

* 10:19 10:19 Kel. 20:12-16; Ul. 5:16-20

dekam zep zënaka dakensibiridak, “Hare eiwa kire tangankamke! Ki hwëna endan nik sa ëngaya gwer? Toton nara molya.”

²⁷ Yesus ki zep hwëna nwekam de amjanbin niban ding gulzimki, “Eiwa, auhu-kama zini zëre mae mo ssonkam bëjen zënaka ngaya tabin. Hwëna Alap de zi hip syal gwibir-zimdin srëm hap dena, aha-en mae hom tanganke.”

²⁸ Petrus zep hwëna takensiblika, “Ki hwëna abe mae hap dena bankarekam sa lwal? Sap ëe mesë ëre mae mo tïngare bi gwibinni Emsa de ang gweblanda gwen hap hli kulidak. Zep ëe basa asa lamkam ulin?”

²⁹ Ki zep ding gulbluka, “Eiwa de tangan nakaë emsa gubirida'an: Zini men zen Asa de ang gwe-gweblan hap hen Alap mo ol dawemsa de gol halada gwen hap zëre mae mo bi gwibin kire-kirena hli nulida gwe'ak, zëbe mae hap sa Alap mam en tangankam kap ta gwizimdi. Zen mensa hli tandan naye- sap gol zem, aya-wal oso-wal zem, an-bi zem, walas zem, hen sap nga maena,

³⁰ zëbe mae hap sa Alap nama de okamanak lowehe gwennak sërkam de beya tangankam hen hë'ho gwibin tangan wenyaka etan lup gul gwizimdi- sap aya-wal oso-walkam de gubiridan wenyä, ane-biakam dena, walaskam dena, sap gola, hen nga maena. Hwëna kire zisi, zini hen sa abe hap de jal hap karek da gwibir. Hwëna Alap kim de kitak irik gïnkim kon gwesibir hana'anka, Zen dekam sa hen zëbe mae hap hëndep de ëngaya gwen hap dena golzimdi. *

³¹ Hwëna beyana men zen sap angkam bose naban lowehe gwe'an, zen zen sa hwëna lamkam lure san ëgwër. Hen men zen angkam bose srëm wenyä lowehe gwe'an, zen zen sa hwëna lamkam ngein sin ëgwër.”

Yesus kim etan anakan gubiridakake, “Asa sa dal.”

(Mat. 20:17-19; Luk. 18:31-34)

³² Yesus kim zëre hon de ang ta gwen wenyä ban Yerusalem san dep golëyaing gwe se'anka, Zëna man ngeirki. Dua-blaskam de zëre hon ang ta gwen wenyä airin hip enlala nik ëbeya gwen da'ak- mae hap, “An banakan wëhë Yesus hup de jal hap Yerusalemk lwa'ak?” Lun kon men zen hen ang tan da'ak, zen hen airin niban ang tan da'ak. Yesus ki zep dua-blaskam de wenyä in ensa engka en golësyalhe halka, zao zep zëre hap dena hamal hap anakan tonbirida'anka,

³³ “Ola ansa emki ësan: Nen angkam Yerusalem san debe yaing gwe se'an. Zëwe sa ngatan zi mo lang nakore Zi Tanganna Asa tapbla dazim- Alap mo golak de syal tan zi mo mam-mam wenyä kip, hen Musa mo olsa de tawa ta gwibin wenyä kip. Zen sa hwëna Asa de tan hap ola aha-en nul, hëndep Asa sa Yahudi srëm zi mo tahanak dep tapbla dazim.

³⁴ Zen sa hwëna Asa lamang da gwer, hen oltepkam hol-hol da gwer, hen sa Asa dangole gwer. Ki sa hëndep Asa dal. Hwëna yaklana dan-ahan, ki asa tin nikon etan ngaya gwer.”

Yakobus ne Yohanis ne kim Yesusu abe lakake:

(Mat. 20:20-28)

³⁵ Ki zep Zebedeus mo walas darena Yakobus ne Yohanis ne Yesus hon apta zaka, ki zep zë enblaka, “Bian Guru, ano nik mo enlalana man lwa'ara- em de kirekam abe nikip syal gwibir-zimdin hip.”

³⁶ Ki zep takensizimki, “Em basae dwam eibi'ira?- Eë de desa ep syal gwibir-zimdin hipye?”

³⁷ Ki zep ding ulblika, “Em kime teipsinkim irik gi'inka, ëe ama dwam ë'an- eno dam-taha irgwa-taha nakon de hen teipsinkim inikiran hip.”

* **10:30 10:30** “Sërkam de beya tangankam,” zen Yunani olkam “seratus kali lipatkam.”

38 Yesus ki zep ding gulzimki, “Hwëna ena home tame u'ira- in zebe abe ëndaye. Karek yawala men desa Ëe goltowe'ak, em wëhë desa de hen oltowen hap hohle ë'ara? Ëe men kire dohon-hon nakaë wei yu'uk, em wëhë hen desa de hen wei kun hip hohle ë'ara?”

39 Ki zep ding ulblika, “Ëe ama hen hohle ë'an.”

Zao zep etan guzimki, “Eiwa, em hen esa tol oltowera- Ëe men kire-saë goltowe'akye. Hen Ëe men kire dohon-hon nakaë wei yu'uk, em hen kire naka esa lamkam wei kuli.

40 Hwëna men zen de ano irgwa taha nakon hen dam taha nakon inikin'inka, desa Ëe bëjënë dam so-sun. Zëwe de inikirin hip dena, zen diki ano Bian Zëna mënasa dam sosuku, zen diki zen sa zë inikiri.”

41 Hwëna dare taha-tapkam de ahakore ang ta gwen wenyä in kim zëno nik mo abe lan ola insa ësak, zen man tangan sisngin neizim'ik-mae hap, “Zen bap zen de mam ën hap abe lala!”

42 Yesus ki zep tingan tagal gulsuku, zao zep gubiridaka, “Ena dwan tawa nakake, Alapsa de tame tan srëm lang-langnak men zen anakan zënaka tim di gwibirin, ‘Ëe an teipsinni,’ zen man zëre kore naka jap nul sonenda gwenan hen nyaubirida gwenan.

43 Hwëna em zëno mae mo kim bahem. Ebon mae onakon men zen mam gwen hap dwam gwe'ara, zen diki tingingare zi mo babu gwen zi makan zen gwën.

44 Hen ebon mae onakon men zen teipsin hip dwam gwe'ara, zen diki tingingare zi mo tana iltikinnik zen nikirin.

45 Sap ngatan zi mo lang nakore Zi Tanganna, Ëe an zi de Asa babu

gweblan hap homë hatazak. Zep em hen ano tana wei san emki Asa zertro gwen. Sap Ëe tingingare zi mo tana iltikinnik de nikirin hibë hatazak- hëndep ëre mo angsa de tingingare zisi dikim hil ti sonebin hip sosok tazimdin hip.”

*Yesus kim Bartimeus Bak, nwe dïmïnsï, dawem takake:
(Mat. 20:29-34; Luk. 18:35-43)*

46 Yesus kim zëre hon de ang ta gwen wenyä ban Yerikok golëyaing gweka, hen ahakore zi tra naban, dekon kim etan ëgwa ha'ak, hwëna zi nwe dïmïnnï ora alpna nikin'inka. Zëno bosena Bartimeus, Timeus Bak mo tane. Zen te-ala hap kon aberbe ta sone gwibirki.

47 Zen kim salka, “In Nazaret walya men Yesus taman'ara,” dekam zep taken soneblaka, “Yesus, Daud Bak mo Auyan-tane, asa tol kwasang gwebla.” †

48 Hwëna zi beyana in jalse nëblak, “Balkkam.” Hwëna zen mam tangankam kim taken sone gwe'anka, “Daud Bak mo Auyan-tane, asa kwasang gwebla!”

49 Yesus dekam zep zausuku, ki zep gubiridaka, “Em kwang tan.”

Kim kwang da'ak, zao zep nenblak, “Em luwen, hen emki sëwehen! Yesus man emsa gublunda- zëbon osan de song gwen hap.”

50 Zi nwe dïmïnnï in dekam zep nabal-bakam de luwesik ane kininkam deyol utuknu hiri gulin guk halka- Yesus osan dikim song gwen hap.

51 Yesus ki zep takensiblika, “Em basae dwam gwibi'ira?- Ëe de desa ebe hap syal gwibir-blin hapye.”

† 10:47 10:47 Bartimeus in kim Yesussu “Daud Bak mo Auyan-tane”kam taken soneblaka, zëno dam gulsunnu Yesus mo auyan-aza en hap denaka hom. Sap zëno hatan srëmnak, tingingare Yahudi zini “Daud mo Auyan-tane”kam Israelsa de ngaya tabin hip de Zini nen guk gweblak. Sap Alap mo olsa de ayang gul gwen zini zen kirekam nonol nen gweblak, “Teipsin zini Daud Bak mo ausu nakon sa hatala- nësa de ngaya tabin hip de Zi niye.” Zen hen man Desa enlala në gweblak, “Zi sang-sang karekna sa hen dawem ta gwibiri, hen karekkam de lowehen nakon sa hil ti sone gwibiri.” Zep zi nwe dïmïnnï in kirekam hen mes Yesussu dam tasiki.

Ki zep ding gulbluka, "Bian guru, ëe ama tangan nwesa de kara gwen hap dwam gwe'an."

⁵² Ki zep ding gulbluka, "Angkam sap esa song gwera. Em mese Asa taïblablala, in zebe dawem gwenda."

Dekam zep ki hëndep nwena kara gweka, dekam zep ora san Yesussu ang gwe sebla halka.

11

Yesussu kim teipsin zi mo kim Yerusalem kon hut du ane gukke:

(Mat. 21:1-11; Luk. 19:28-40; Yoh. 12:12-19)

¹ Yesus kim Yerusalemsa zigolek de ta'anka, nonol zaitun tra nabare kwatap teknak de ë darena Betania hen Betfagek zep golëyaing gwe'anka. Dekon zep zëre hon de ang ta gwen wenyaka dan-dan guzimki,

² "Em ëna wakin san song ën. Kime apta'an haka, zao esa hëndep keledai tanena da tablan naka hla lala- zi mo zersong gwen srëm naka. Desa hil li-in halza.

³ Zi de emsa takensizimdinkim, 'Em ba habe hil li'ara?'- a kirekam ding ulzim, 'Bian dwam gwesla'ara. Zen sa etan nabakam zer sone zala.' "

⁴ Kim song ëka, ki zep hëndep keledai tanena insa hla laka- ora alpnak da dablak, lilikin golek denak. Zao zep hëndep hil li inki.

⁵ Zini men zen zao ëzau'uk ki zep dakensizimk, "Em ba habe hil li'ara?"

⁶ Yesus men kirekam guzimki, kirekam zep ding ulzimki. Dekam zep nenzimk, "Amki."

⁷ Ki zep hëndep ërlwa halka. Kim ërhataka, keledai mo tahan dannak zëre mae mo tahan bajusa zep kang dasek. Ki zep zë hwëna Yesus sewe seka.

⁸ Hen zi beyam-byana in baju zemka ora san dëre dahak- desan de keledai tanena in Yesussu zersong gwen hap. Hen ahakon yera ala makare naka ora alp san nublun

gwe'ak, desa zep hen ora san dëre dahal gwe'ak.

⁹ Zini men zen nangeirblin da'ak hen lun ang nëblan da'ak dekam zep ëtaken gwe'ak,

"Hë'ho, hë'ho!

An Bian mo bosekam nësa dikim oto gulsun hup hata se'ara.

Hë'ho! Diki Alap Zen zëbe hap dawemsa golblan.

¹⁰ Diki Alap Zen teipsin zini Daud Bak mo Auyan-tanena ansa mas gweblan-

Zen dekamim tatetekam irik gilki.

Hë'ho! Nen kitak teipsin tangan Zini Alapsa bolterë tan!"

¹¹ Yesus kim hëndep Yerusalemk hata seka, Alap mo golak zep hëndep tilki. Zao kim amjanbiri sen'anka, hwëna man zë nabakam kawë'ak. Dekam zep kon etan dua-blaskam de ang ta gwen wenyaka ban Betania san dep golësek gweka.

Yesus kim tenya arana heip gulkuke:

(Mat. 21:18-19)

¹² Zao de yaklanak kim Betania kon etan Yerusalem san dep golëlwanda ha'an zaka, Yesus dekam zep usak gwe'anka.

¹³ Langa nakon zep tenya arana hlaul inki. Alana bu-bung tangan nik zau'uk. Dekam zep mae hap syal hebirki, "Eini wëhë." Hwëna eini aha-en mae hom hlaulku. Ala enna, sap tenya ara mo tën tamlenak hom dekam zau'uk.

¹⁴ Ki zep arana insa anakan gubirki, "Eno eini angkam hëndep molya dwinbik." Zëre hon de ang ta gwen wenyaka dekam zep nasalblak.

Yesus kim pasar zini Alap mo gol tëm nakon golëalsa sonekake:

(Mat. 21:12-17; Luk. 19:45-48; Yoh. 2:13-22)

¹⁵ Yerusalemk kim etan yaing gwëk, Yesus Zëna dekam zep etan Alap mo golak til zika. Dekam zep kon men zen Alap mo gol tëmna Alap hap de golblan kirekirena te-ala hap lirak da gwibik, desa golëalsa soneka. Meja-mejana

men zao te-alana lirak da gwibik, hen komal-tum komal-tum maena men dekon mawa oholana lirak da gwibik, desa man kitak yal tazimki.

¹⁶ Tĩngare zini dekam zep jalse gwibiridaka, "An orasa hom! Alap mo gola an san bahem ba maesa de teiredan naban taman gwe-gwezan!"

¹⁷ Ki zep zẽ hwẽna tawa tabirki, "Alap mo olak man lwak:

'Ano gola sa nen gwibir, "An tĩngare zi ausu dekon Biansa gu sone gweblan hap de gol." '

Em an hwẽna

'sowẽ zi mo aning gol habe li kul sone gwe'an.' '*

¹⁸ Alap mo golak de syal ta gwen zi mo mam-mamna hen Musa mo olsa de tawa ta gwibin wenya kim Yesus mo kirekam de gweibiridanna insa ẽsak, dekam zep tan hap orana dẽbla'ak. Hwẽna mae hap zẽ bung neisiblik, "Zi trana an sa hwẽna zerzaunkum nẽsa karek dabir." Sap zi trana in man tangan Yesus mo tawa tabinni insa sam neisibir-blik, hen man tangan denggwambik.

¹⁹ Kim kawẽ'ak, Yesus dekam zep zẽre hon de ang ta gwen wenya ban Yerusalem kon etan golẽsek gweka.

Yesus kim zẽre mo tenya ara heip gunnu in hap dena tawa tabirkike:

(Mat. 21:20-22)

²⁰ Ka'ankam kim etan kak tangan-nak ara ausuna in san golõtaman gwe'anka, dekam zep hla nuk, "Zen mes tangan hẽndep sa nakon sasan gwesikser."

²¹ Petrus dekam zep enlala gwibirki- in zen ki ir jowek, dekam zep Yesussu gubluka, "Bian, emki hlaun! Em mensa arana ir heip gulku, zen mes tangan hẽndep sasan gwer."

²² Ki zep ding gulzimki, "Alapsa em taibliblan.

²³ Eiwa denakaẽ emsa gubirida'an: Eme Alap emsa tĩngare enho naban anakan laibli gwebla'ak, 'Zen sa kirekam abe hap syal gwibir-blira,' ki em hen esa sẽrkam de owasna syal ei gwibir. Eme dekam Alapsa abe la gwe'ak, 'Kwatap tekna an zen hinak zẽnaka ter sonen,' zen hẽndep kirekam maka Alap ebe mae hap syal gwibir-zim'ira- em de taibliblankamye.

²⁴ Zen in zebẽ emsa gubirida'an: Em de ba mae hap Biansa abe ta gwenkam, anakan em taibli gweblan, 'Zen mes ap golblanda.' Zen dekam sa hẽndep ep golblala.

²⁵⁻²⁶ Hen em de Alapsa abe tan hap enlala gwenkam, zi bose omka de taib gĩbli naban bahem. Nonol em zi bose uk mo ep de karek golblanna insa eititi gwibir-blin. Ki ere mo ngatan zi mo langnak de Bian dekam sa hen eno karek-karekna ep tap gulsublula." *

Yesussu kim anakan dakensiblikke, "Emsa an nara tri ta se'ara?"

(Mat. 21:23-27; Luk. 20:1-8)

²⁷ Yesus ki zep etan Yerusalem san dep golẽlwanda halka. Alap mo gol tẽmnak kim tẽ nasen'anka, dekam zep hen Alap mo golak de syal ta gwen zi mo mam-mamna, Musa mo olsa de tawa ta gwibin wenya, hen Yahudi mo nol-nola ban Zẽbon onak dep yaing gwezak.

²⁸ Zao zep dakensiblik, "Emsa an nara gubluka, hen nara emsa tri tase gwe'ara?- dekam de kirekam-kirekamna insa syal gwe-gwibin hipye."

²⁹⁻³⁰ Ki zep ding gulzimki, "Ki Ɛe asa hen nonol emsa takensibiridal: baptis ta gwibin zini Yohanis Swesa san ha Alap tri ta seka? San ha zen zẽre en mo sasonkam ki syal gwe-gweka? Eme nonol ap ding ulbli'ak, ki Ɛe asa hen emsa gubiridal, 'Asa

* **11:17 11:17** Yes. 56:7; Yer. 7:11 * **11:25-26 11:25-26** Ayatna 26na Markus hom ale gulku. Hwẽna aha zi Matius 6:15sa etan hyanak mas gulku. Zen a kirekam moye, "Em de aha zi mo karek-kareksa eititi gwibir-blin srẽmkam, ki ere mo ngatan zi mo langnak de Bian hen molya eno karek-karekna ep tap gulsubluka."

Zen trî ta se'ara, zebë kirekam syal gwe-gwe'an.' "

³¹ Dekam zep zë-en anakan donbi'ik, "Bëjen nen anakan ding gulblun, 'Alap trî ta seka,' ki hwëna zen sa nësa gubiridala, 'Ki em ba habe desa laïblibla srëm gwëk?'

³² Hwëna anakane ding ulbli'ak, 'Yohanis zen zëre en mo sosonkam syal gwëka,' ki hwëna zi trana an sa nësa karek dabir, sap zen Yohanissi mes-am anakan daïblihlak, 'Zen eiwa Alap mo olsa ayang gul gwizimki.' "

³³ Anakan zep hëndep ding nulblik, "Ëe homë dam ulsu'un, 'Yohanissi zen trî tase gwëka.' "

Ki zep hwëna ding gulzimki, "Ki Ëe hen molyë emsa gubiridak, 'Ëe an zëno syalsaë gol gwe'an, hen Zen Asa trî tase gwe'ara.' "

12

*Yesus kim ola gulk sun blaonz-
imkike- Zënaka de Yahudi zi baes
gweblan hap dena:*

(Mat. 21:33-46; Luk. 20:9-19)

¹ Yesus ki zep gulk sun de blaonz-
imdinkim Yahudi mo mam-mamna
insa tonbiridaka, "Zini man anggur
ngasa eiyas tablaka. Alp san kolkam
wale tablaka. Zao zep hen kasona
hul gulku- anggur danna insa de
zë tanakam it ta sone gwen hap.
Hen gut de gola zao zep hen tauku-
dekon de ngana insa kara ta ine
gwen hap. Ki zep hwëna ngana insa
te-alakam nga syal gwe-gweblan zi
hip bohë ta guzim halka. Zëna
dekam zep aha lang san holokam de
zë gwën hap song gwëka.

² Angguru in kim tëka, dekam
zep zëre hon de babu gwen zisi zer
sonëka- zen de anggur dan te-ala
hliksa zëre hap zerbla halzan hap.

³ Hwëna zini in zen ngana insa
bohë dak, ki zep karekkam dan-
golek, hëndep ki zep nenblak,
'Wake, ki en lwahal!'

⁴ Anggur nga bina in ki zep etan
ahanaka zer sonëka. Desa hwëna
man dësek, kire naka zep ol lamang
naban nëralsa sonëk.

⁵ Nga bina in dekam zep etan
ahanaka zer sonëka. Desa hwëna
man nga bohë tan wenyä in dak.
Dekam zep hwëna ahakore babu
gwen zini beyakam etan lup gul
sone gwëka, hwëna zini in kire
enkam neibirida gwëk. Ahakorena
man dangole gwibik. Ahakorena
man damera gwëk.

⁶ Dekam etan nga bina in ba zisi
dep?- zer sonen naye. Dekam zep
guku, 'An angkam ëre en mo dang
tininak de tane en am gwë'ara.'
Hwëna man enlala gwëka, 'Ëe sap
asa ëre mo tane tanganna ansa zer
soner. Desa sa blikip neisiblibl.'
Desa zep aumwa hap ein tangan zer
sonëka.

⁷ Hwëna desa kim hla da guk, ki
zep nga bohë tan zini in zënaka
nenbiridak, 'Wakin angkam zëre mo
walas tangan hata'ara. Bi zik de
tinkim, an zen sa hwëna ngana
ansa bi gweblala. Nen tan, ekakim
nën bi ëblak!'

⁸ Dekam zep hëndep balk dak, zao
zep tol hëndep dak. Tokna dekam
zep ngana in kon ësan dep hiri dak.

⁹ "Zep nga bi nik mo zi lup gul so-
nenna insa kirekam neibirida gwëk,
zep zen banakan sa gweibirida zala?
Zen sa zini insa tamera zala. Ngana
insa dekam sa hwëna aha zi hip
bohë tazimdi- dekam de zen anggur
dan te-ala hliksa zëre hap zer gwe-
blan hap.

¹⁰ "Ëe in zebë emsa gubirida'an:
Em bawalkam esa Alap mo ola an
mo eini dam ulsul?—

'Gol tauk gweblan wenyä mensa gol
tenya baes neibik,
hwëna Bian Alap zep desa bolak ik
gilkî.

¹¹ Zen diki Bian zëre mo syal,

* **12:11 12:11** Yahudi zini kasokam gola dauk gweblak, zep mensa Yesus awe buku Mazmuru kon guku (Mzm. 118:22-23), zen nonol lonen kaso hap dena. Hwëna Orya ol zi hip, ngirîn gol tenya ban enlalana anakan apde në'an, "Bol-zaun tangan wenyä," zep kirekam li nul sonëk.

hen nēno mae mo nwenak zen owas tangan.' " *

¹² Yahudi mo mam-mamna in kim kirekam Yesus mo gulk sun de ol blaoranna insa ēsane gwe'ak, dekam zep anakan tame nuk, "O zēno ola an nēbon mae am tī'in." Dekam zep sap Yesusu de balk tan hap dwam nēbla'ak, hwēna zi beyam-byana insa nāiribiridak, zep zē hli dak.

Yesus hon kim anakan de u siweblan hap yaing gwe zakke, "Roma mo irik ginni wēhē ol lamangkam gubi'inka?"

(Mat. 22:15-22; Luk. 20:18-26)

¹³ Yahudi mo mam-mamna in dekam zep Farisi zini teipsin zini Herodes hon de bitī gwen zi niban Yesus osan dep lup nul sonek- zen de Yesusu u nuka siweblan hap. Zen mes anakan ola aha-en nuk, "Yesus de anakan jalse gwenkam, 'Bahem Roma mo irik ginnik dep pajak te-alana kap ta gwizimdin,' zen dekam esa Roma mo mam-mamnak klak lal."

¹⁴ Zini in dekam zep Yesus onak yaing gwezak, ki zep nenblak, "Bian Guru, ēe mesē emsa tawa ēblak: Em in dam-dam enkame gwē gwenda. Em Alap mo dwam gwibinni dam-dam enkame tawa ta gwibirida, sap ema hen zi mo husus gwibin maena damnake gollēwen srēm kam tonbirida gwenda. Sap em zi mo bosesa home kara gul gwizimnira. Zen in zebē emsa lakensibli'an: Em banakane Musa mo tītī tabin ola dam gulsu'ura? San ha nen sap esa Roma mo irik ginnik dep pajak te-alana ol gwizim? San ha bap nen?"

¹⁵ Hwēna Yesus mes tame tabirki, "An u siwen olkam ki Asa dakensiblinan." Ki zep ding gulzimki, "Em ba habe Asa balk la'an? Abe hap emki pajak hap de te-ala kasona insa ahanaka goltrēblan- Eē aka ki hlauk."

¹⁶ Dekam zep ahanaka nolblak. Ki zep hwēna gubiridaka, "Te-ala kasonak awe, an nara mo nwe-masesa

zē yang dasik? Hen nara mo bosesa zē ale nuk?"

Dekam zep ding nulblik, "Roma mo teipsin zi mo denakake."

¹⁷ Dekam zep hwēna ding gulzimki, "Ki Roma mo teipsin zini in mo bi gwibin kire-kirena amki zēbe hap etan lop la gweblak. Hen kirekam, Alap mo bi gwibin kire-kirena, amki Alap hap lop la gweblak."

Zao zep denggwānbla'ak.

Sadukikam de gubirida gwen zini kim Yesusu tin nikon de etan engaya gwen hap dena dakensiblikke:

(Mat. 22:23-33; Luk. 20:27-40)

¹⁸ Ki zep hen Sadukikam de gubirida gwen zini Yesus onak u siweblan ola ban yaing gwezak. Zen Yahudi mo aha hlikna- men zen anakan tawa da gwibirinke, "Zini bējen tin nikon etan ngaya gwen."

¹⁹ Zen ki zep hen dakensiblik, "Bian Guru, Musa Bak mo tītī tabin olak a kirekam mo lwakye,

'Zi de we zemka walas wē lan srēm nak tinkim hli yunnu, zen oso zik de etan gonkam- zen de zē walassa aya zik mo weinak dep wē tan hap. Hen kirekam, oso zik de tinkim, aya zik de hwēna we semna insa gonkam.'*

²⁰ Orep awe zini ki, beyana tuju enkam, aha-ere ane-bianna. Zēna zi nik zep nonol wenya golka, hwēna walas wē lan srēm nak zep tilki.

²¹ We nal zem insa hwēna oso zik zep etan golka. Zen hen walas wē lan srēm nak zep tilki. Zao hen etan dan-ahan nik etan golka. Zen hen walas wē lan srēm nak tilki.

²² Hēndep tujukam de aya-wal oso-walya in kire enkam zep sap nol gwek, hwēna walas ēn srēm ennak zep juwe gwek. Wenya in hwēna aumwa hap zep tik.

²³ Zep zen de etan engaya gwe'anam, men kirekam ahakon tawa da gwibirin, wenya insa nara mo wekam maka nenbi'in? Sap

* 12:19 12:19 Ul. 25:5-6

tujukam de zini in mes desa kitak nol gwek.”

²⁴ Yesus ki zep ding gulzimki, “Em in ema ebute gwe'an, sap em home Alap mo ola ban zeno sosen naban tame oso'an.

²⁵ Sap tin nikon de etan engaya gwenkam, dekam molya etan zenaka kap da gwek- men kirekam hen Alap mo dam taha nakore zini zenaka de kap tan sremkam lowehe gwenanke.

²⁶ Hwena angkam tin nikon de ngaya gwen hap dena insaä emsa gubirida'an: Em bawalkam esa Alap mo ola an mo eini dam ulsul?- Musa kim syauk nubare te tyum-tyumnu insa hlaukuke. Zao Alap man-am Musasa gubluka,

‘Ee an eno auyan wal mo Alap- Abraham, Isak, hen Yakob Bak mo.’*

²⁷ Zep Zen tin zi mo Alapsa hom. Zen ngaya wenyik mo Alap! Em in eiwa ema tangan ebute gwe'an.”

Yesus kim Alap mo titi tabin ola bol-zaun tangan wenyi gubiridake:

(Mat. 22:34-40; Luk. 10:25-28)

²⁸ Yesus kim Sadukikam de gubirida gwen zi niban kirekam gollekeisa-keisa gwe'anka, hwena Musa mo olsa de tawa ta gwibin zini ahana dekam zep hen salbla zaka. Zen kim anakan dam gulsuku, “Yesus dawem tangankam zeno mae mo ola ding gulzimmira,” zen dekam zep hen anakan takensiblika, “Tingare Musa mo titi tabin ola kon, bol-zaun tangan wenyi enda zen moye?- desan de nen dawemkam ang ta gwen hapye.”

²⁹ Yesus ki zep ding gulbluka, “Musa mo titi tabin ola kon, a zen tangan mo bol-zaun gwe'anye:

‘Israel Bak mo ausu nakore zi, em esane gwen:

Neno mae mo Teipsinni Bian Alap Ze-en. Ahana hom.

³⁰ Bian Alapsa em ensa lwa gweblan-

tingare enho naban, enlala naban, sosen naban, hen tim niban.’*

³¹ Ahana zen a kirekam moye:

‘Zi bose omka em kwasang gwibirida gwen- san de enaka de kwasang gweblanna kiye.’

Ahana etan hom tangan- titi tabin ol darena insa de kwë son naye.”*

³² Musa mo olsa de tawa ta gwibin zini in dekam zep ding gulbluka, “In eiwa tangan, bian guru!- in kirekame anakan gundaye, ‘Bian Alap Zen Zen en. Ahana hom.’

³³ Hen anakan insa gunda, ‘Alapsa de ensa lwa gweblanna, zen diki tingare enho naban, enlala naban, hen tingare sosen naban. Hen zi bosyansa nen kwasang gwibirida gwen- san de nenaka de kwasang gweblanna kiye.’ Eiwa, Alap mo titi tabin ol darena in, zen tingare neno mae mo aha titi tabin ola man tangan kwei-kwik gu'un. Sap anakarekam dena, dombasa de Alap hap tru tase gweblanna, hen aha kire-kire maesa de lop ta gweblanna, zen kitak lwala henna.”*

³⁴ Yesus kim anakan salblaka, “Zen dawem tangankam enlala blala ban Asa ding gulblunda,” dekam zep hwena ding gulbluka, “Em an angkam ema tangan Alap mo irik ginnik de tin hip golek de gwe'ara.”

Dekam etan hom mae Yesus hon takensiblin mae hap yaing gwek. Saher hap baes tak.

Yesus kim Zenaka dikim sap dam tasin hip dena goltreizimkike:

(Mat. 22:41-46; Luk. 20:41-44)

³⁵ Yesus in kim nama Alap mo gol temnak tawa tabi'inka, zao zep hen takensibiridaka, “Musa mo olsa de tawa ta gwibin zini ba hap anakan tawa da gwibirin, ‘Israelsa de ngaya tabin hip de Zini, Zen teipsin zini Daud mo auyan-tanekam sa hata zala?’

* 12:26 12:26 Kel. 3:6

* 12:30 12:30 Ul. 6:4-5

* 12:31 12:31 Im. 19:18

* 12:33 12:33 Hos. 6:6

³⁶ Hwëna Alap mo Enhona kim Daud Baksa bi gweblaka, zen dekam man-am guku,

'Bian Alap man ano Teipsinni gubluka,

"Ère mo dam taha nakon emki nikirin-
dekon de hen teipsinkim irik gin hip.

Ki asa hwëna ebe hap de jal zini ere mo tana iltikinnik sisik gulin." *

³⁷ Zep Daud insa Israelsa de ngaya tabin hip de Zini insa 'Teipsin Zi'kim gubluka, ki Zen banakan sa zëno auyan-tanekam hata zala?"

Zi trana in zen Yesussu sane dak man tangan zëno ola isrip-sri neibik.

Yesus kim anakan tawa tabirkike, "Bera, Musa mo ol tawa tabin zini in enlala kwae naban!"

(Mat. 23:1-36; Luk. 20:45-47)

³⁸ Yesus in kim zë nama tawa tabi'inka, ki zep gubiridaka, "Bera, Musa mo ol tawa ta gwibin zini in enlala kwae naban! Zëno mae mo kwaena in mana ebon mae hliminnink. Zen baju dawem-dawem alala tan naban zi nwe san zënaka nolëtrënda gwenan- zi dikim blikip gwesibirida gwen hap. Zen hen man ëdwam gwe-gwenan- dekam de aha zi tagal gwen maenak anakan gubirida gwen hap, 'Dawem, bian guru.'

³⁹ Zen hen but srëm golak ngein-
nik de komal tumnak de teinikirin hip ëdwam gwe-gwenan- hen tembane yawal maenakye.

⁴⁰ We wal sem-semna zen hen man anakan ahap da gwibirin, 'Èe asa tol eno zi swe mo kire-kire hli tandanna ebe hap tagal tasibir.' Hwëna zen sowë enlala naban mas neibirida gwenan- dekam de zëre hap mamkam hli ti irin hip. Hwëna zëre mae mo karekna insa dikim aha zi hlaulzimdin srëm hap, zep but srëm gola kon zi nwenak Alapsa mam blalkam nen sone gweblanan- dekam de zi kil tibin hip, 'Zini an airis.' Hwëna dekam zënaka de

karek tabin hip denaka kim mam nulsuk gwenan."

*We sem tahalhana kim te-ala was-
ngena Alap hap ing so sonebla zakke:
(Luk. 21:1-4)*

⁴¹ Yesus kim nama Alap mo gol tëmna nikin'inka, dangna kim Alap hap de te-ala kang ta gweblan peti san gwëka. Zen man kon kara tabi'inka- zi beyana men zen te-
alana petina iwe Alap hap biti da sone gwebla'an zakke. Te-ala beya wenyu dekam beyakam Alap hap biti da gwebla'ak.

⁴² Ki zep hwëna we sem tahalhana hen hatak. Zen dekam zep hen te-
ala kaso dare tolsa ing so sonezak-
sepulu rupia makare naka.

⁴³ Yesus ki zep zëre hon de ang ta gwen wenyaka haen gwibiridaka, zao zep gubiridaka, "Eiwa denakaë emsa gubirida'an: We sem tahalhana an mes tingare ahakore zini kwei-kwik gulun- men zen sap te-
ala mam-mamna biti da sone gwe-
san zalye.

⁴⁴ Sap ahakon in zen biti da gwe sanzal, zëre mae hap de hlikna nama beya nik erlwazim'in. Hwëna we sem tahalhana an mes tingan ing gulun- zën dikim tol sap gwën hap denaka. Angkam zëre hap dena hom tangan."

13

Yesus kim anakan hamal hap gubiridakake, "Aumwa hap denak, a kirekam sa lwa song gwer."

(Mat. 24:1-44; Luk. 21:5-33)

¹ Yesus kim Alap mo gola kon te soka, zëre hon de ang ta gwen wenyik zep ahanik gubluka, "Bian Guru, emki sap hlaun. Alap mo gol yala an wehasa hom. Man tangan kwa nuk. Hen zëno kaso kong ta zahenna nwe awes tanganna!"

² Ki zep ding gulbluka, "Eiwa, emki gol yala ansa kara gun. Zëno kaso kong ta zahenna aha-en mae

* 12:36 12:36 Mzm. 110:1

molya lwak. Zen tingan tangan sa dri nulsul.”

³ Yesus ki zep kon zère hon de ang ta gwen wenya ban za-itun tra nabare kwatap tek san dep golëyaing gwe seka. Zëna nikirinkim Alap mo gola in san zep dangna gwè ine haka. Hwëna dekam zep Petrus, Yakobus, Yohanis, hen Andreas mae golek de dazak-olsa de zë zë-en takensiblin hap.

⁴ Zao zep dakensiblik, “Asa en emki gubiridan: Alap mo gola in sa dri yulsun hup gubiri, zen bawalkam sa ki lwal? Hen banakare owassa asa hla kul gwer?— dekam de anakan dam gulsun hupye, ‘Aumwa hap de yaklanak dep angkam man golek de gwe song gwe'an.’ ”

⁵ Yesus ki zep ding gulzimki, “Salok-salokkam lowehe gwek. Emsa mana yasik da gwibirink.

⁶ Sap zini beya nik sa ebon mae onak anakan ëboton gwe-gwezal, ‘Èe an Zen- Yesusye.’ Hëndep zen sa zini beya tangankam yasik da gwibir.

⁷ Em de anakan ësane gwe-gwenkam, ‘Zëwe man ëeija'an,’ hen anakan, ‘Awe hen sa ëeijazal,’ hwëna em dekam bahem ëairi gwen. Sap zen nonol kirekam sa Alap mo dwam gwibin sin lwa gwer. Hwëna dekam bahem ëkil gil gwen, ‘An aumwa hap denak mes zaul, zep ki lwa'an.’

⁸ Aha zi ausu nakorena aha zi ausu naban sa ëeija gwer, hen aha irik ginni aha irik gin niban sa ëeija gwer. Lang yala an san jingili mam enkam sa tailida gwera, hen usak yala sa hatanda gwer. Zen kirekam sa karekna nonol lone sen-nak lwa gwer. Zen men kiye: We de jaha gwen hap eisbir anensa sëwehe kininna. Zen dekon sa ki hëndep sang-sangna dohonse gwe song gwer.

⁹ “Em terya-tyakam lowehe gwek. Sap emsa sa dahyo gwer, hen but srëm gol-gol san sa emsa lup nulhal gwer. Zao sa emsa dangole gwibir.

Hen emsa sa pemerinta mo teipsin-teipsin wenya kip anakan nolëtrei gwizim, ‘An hen ahana Yesus hon de ang gwe-gwenna.’ Hwëna zen kirekam Alap mo dwam gwibin sin sa ki ebe mae hap lwa gwizim— em dikim zë abe hap denaka ëton gwen hap.

¹⁰ An na-en molya tap gwek. Diki nonol tingare zi ausu hap sa ëngaya gwen hap de ol dawemsa nolzim halada gwer. Zen diki dekam sa aumwa hap denak zaul.

¹¹ Men dekam de emsa dahyo gwe'ak hen lup nulhal gwe'ak, em bahem anakare hap enlalana ëbeya gwe-gwen, ‘Èe banakarekam asa zë ding gulzim?’ Sap men kirekam de ding gul gwizimdin hip dena, zen emsa de taken-taken gweblan ennak sa ki Alap mo Enho ebe mae hap gol gwizimdi. Zen dekam em ding gul gwizimdin. Sap dekam Zen Alap mo Enho sa eno ëk tihï san ding gul gwizimdi.

¹²⁻¹³ Emsa sa tingare zini husus neibirida gwer, sap em an Asa de ang gwe-gweblan wenya. Zep a kirekam sa ebe mae hap lwa gwizim: Emsa ere mae mo aya-wal oso-wal tanganna sa tameran hap nolëgu gwer. Hen emsa ere mae mo bi walya sa tameran hap nolëgu gwer. Hen ere mae mo walasna sa emsa abe hap de jal hap nolëtobe gwe-gwer, hëndep tameran hap sa hen emsa nolëgu gwer. Hwëna em in zene Asa de taibliblannak tatem ëzauk gwe'ak, hëndep aumwa hap denak de hata'ak, em esa ëngaya gwer.

¹⁴ “Èe ol tan-tanna ansaë ebe mae hap golzim'in: Em esa teipsin zisi hla lal— Alapsa de lamang tan hap de karek yawalsa de Alap mo golak golti zinnak, men kirekam orep Alap mo ol ayang gul gwen zini Daniel Bak gubiridakake. Zen dekam esa anakan tame ul, ‘Angkam aumwa hap de yaklanak man zau'un.’ Dekam Yerusalem mo

* 13:14 13:14 Dan. 9:27; 11:31; 12:11

langnak de zini em kwatap san dep ëheya-hya gwek.”*

Hwëna ëe, Markus, ama Yesus mo ola in hap emsa gubirida'an: Em in zen bukuna ansa aha zi hip baca ul gwizimk, dawem enkam srip ulsuk gwizimk. Yesus dekon anakan ayang gulku,

¹⁵ “Dekam zini men zen de gol homan nakon lowe he'ak, zen bap zen etan gol mwa san ba maesa de gon hap bitì gwehan.

¹⁶ Hen nganak de syal tandan wenya, zen bap zen etan gol sandep lwan dahan- baju sal-sal maesa de teisyan hapye.

¹⁷ Kwasang tol, we walya u nubare wenya, hen nama de walassa momkam taizì gwibin wenya. Zen tol banakan molya ëasendak.

¹⁸ Zep Alapsa anakan abe la gwek, ‘Karek yala in bap zen o dil gwennak jowen.’

¹⁹ Kirekam abe la gwek, sap Alap kim ngli naban okama naban yang sosuku, hëndep sèrkam de karek yala an de jowenkam, kirekam de lang dohon-hon gwenna hom mae jowek. Hen zëno hyanak etan molya kirekam okamanak jowek.*

²⁰ Hwëna Alap man zëre mo hlil irin zisi kwasang gwibiridaka, Zen zep anakan hamal hap guku, ‘Karek yawala in bap zen tangan holo gwen. Ki hwëna zini kitak tangan sa juwer.’

²¹ “Dekam zi de anakan emsa gubiridanna, ‘Nësa de ngaya tabin hip de Zini men angkam awe gwë'ara,’ ahaksa, ‘Zëwe gwë'ara,’ em bahem taiblibirida gwen.

²² Sap dekam yasik ta gwibin hip de zini beyakam sa yaing gwe-gwer, hen zen sèrkam de owas-owasna sa syal nei gwibir- anakan dikim emsa boton ta gwibin hip, ‘Èe an Zen, emsa de ngaya tabin hip de Zi niye.’ Ahaksa anakan de emsa boton ta gwibin hip, ‘Èe an Alap mo olsaë ep ayang gulzim'in.’ Zep hëndep

Alap mo hlil irin zini hen desa de taiblibiridan hap sa hen ëalp gwesil.

²³ Zep em terya-tyakam lowehe gwek. Zen in zebè kirekam de lwan srëmnak hamal hap emsa tawa ta gubirin.”

*Ngatan zi mo lang nakore Zi Tangan de etan lwa halzan hap de ol:
(Mat. 24:29-31; Luk. 21:25-28)*

²⁴ “Lang dohon-honna in kim de hya gwesi'ik, zen hëndep dekam sa ‘yakla nwenawesilì.

Benna hen molya ngatan gwek.

²⁵ Hen keisni sa ngli nakon ëlan nahla gwer,

hen nglinak de teipsin-teipsin dowla-dowala sèrkam, sa ëilman gwe nasen gwer.’*

²⁶ Zen diki dekam sa ngatan zi mo lang nakore Zi Tanganna Asa but de zerati gwe zannak hla dase gul. Zen dekam asa ëre mo sosen naban ngatan yawala ban ziati gwezal.*

²⁷ Ki asa hwëna ëre mo dam taha nakore zini lup gul soner- zen de ëre mo hlil irin zisi tingan en tangan tagal gulsun hup, sap yakla hata sezan nakorena, hëndep nikin anen nakorena, hëndep eiha-lip eiha-lip nakorena.

²⁸ “Zep aumwa hap de yaklasa de dam gulsunnu, zen tenya dëren nakon de langsa dam gulsun makan. Em kime tenya dërenna anakan hla kul gwenan, ‘Man alsik, hen angkam man etan ala gwe'an,’ zen dekame anakan tame ul gwenan, ‘Angkam sasa gwen hap ki lwa'an.’

²⁹ Zen hen kirekam, kirekam-kirekam karek yala insa kime hla kul gwe'ak, zen dekam esa anakan dam ulsuk gwer, ‘Angkam Alap Zën de kitak irik gilzin hap denak man zau'un!’

³⁰ Eiwa denakaë emsa gubirida'an: Em an zen okamanak

* 13:19 13:19 Dan. 12:1 * 13:25 13:25 Yes. 13:10; 34:14; Yeh. 32:7; Yl. 2:10; 2:31; 3:15 * 13:26 13:26 Dan. 7:13

lowe he'an, molye kitak juwek, zen dekam sa ki tingan lwal. *

³¹ Ngli naban kama naban sa jekjak nër. Hwëna ano ola, zen hëndep denaban sa lwa gwer.

³² “Hwëna zini molya ngatan zi mo lang nakore Zi Tanganna ano lwa halzan hap dena anakan tame nuk, ‘Yaklana’ ahaksa ‘Jamna dekam sa hata zala.’ Alap mo dam taha nakore zini hen molya. Tane zem Aena homë hen tame gu'un. Zen diki tawana Bian Zë-en.

³³ Zen in zep salok-salokkam terya-tya naban Asa kara ë gweblak. Sap ngatan zi mo lang nakore Zi Tanganna ano etan de lwa halzan hap de yaklana em molye tawa ëblak.

³⁴ Zep zen mae mo kim lwa'an: San de kama bi nik de aha lang san holokam song gwenna. Zëre hon de ëbabu gwe-gwen zi hip maka syalsa anakan wei yul sone guzim ha'ara, ‘Em ano tim bwanak ansa syal gwegwibir.’ ‘Em wakinsa syal gwegwibir.’ Ora top san de kara gwegwen hap de zini, desa sa anakan gublula, ‘Em dawem enkam salok-salokkam asa kara gwe-gwebla.’

³⁵ Zep em hen kirekam salok-salokkam Asa kara ë gweblak. Sap em molye anakan Asa tawa ëblak, ‘Ano mae mo Teipsinni dekam sa etan hata zala. San ha kam-en? San ha ngirin tatem? San ha ohobunggun nuban sa, ahaksa kak tangannak?’

³⁶ Anakan em ëalp gwegwen, ‘Bap Zen asa ni truwennak hlauludazan!’

³⁷ Zep angkam en de Asa sal-

blan wenya, em ensa homë ki gubirida'an. An hwëna tingare zisië hamal hap gubirida'an: Salok-salokkam em terya-tya naban Asa kara gwe-gweblan!”

14

Yesussu de tan hap kim aningkim ola aha-en nukke:

(*Mat. 26:1-5; Luk. 22:1-2; Yoh. 11:45-53*)

¹ Yaklana dekam dan nola kini'ak-Paskanak dikim zaun hupye. Paska yaklanak kim zauk, zen dekam zep hen ëkon gwesik hanak- aha-ere minggukam de ragi srëmkam rotisa tru ta gwen naye. * Alap mo golak de syal tan zi mo mam-mamna hen Musa mo olsa de tawa ta gwibin wenya, zen hen dekam zep anakan orana dëbla'ak, “An banakarekam esa aningkim Yesussu tan hap dokwak lal?”

² Hwëna man hen ëguk, “Yakla yalak awe bap nen balk tan, sap zini beya tangan nik dwam nëbla'an. Ki deban mae esa mamkam ëilman gwer.”

Yesussu kim wenya irase dawem nabare minyakkam nola kon hlë tablakke:

(*Mat. 26:6-13; Yoh. 12:1-8*)

³ Yesus ki zep Betania san dep zëre hon de ang tan wenya ban golësek gweka. Zëwe Simon mo golak zep golëbiti gweka. Simon in, men zen orep kusta gwekake. Yesus kim golëtembane ta'anka, hwëna wenya dekam zep zëbe hap de kwasangsa goltrëblan hap hatazak. Zep te-ala mamkam de gon minyak, sërkmam de

* **13:30 13:30** Yesus mo ola an, san ha mae hap?- Zënaka de taibliëblan wenyaka de karek ta gwibin hip dena hen Yerusalem sa de dre tan hap dena (Mat. 24:4-22; Mrk. 13:5-20; Luk. 21:5-24). Yerusalem sa tahunna tuju-pulukam dre dak. Dekam men zen Yesussu sane da'ak, hom ahakon juwe'ak. Zep zëno ola an, Zën de etan lwa halzan hap hom. * **14:1 14:1** Paskana zen Yahudi mo olkam enlalana “tamaran.” Zen dekam de enlala gwibin hip- in kim Alap mo dam taha nakore zini Israel mo gol-gola tamankake, Mesir mo gol-gol san de tilidan hap. Mesir mo nonol walasna dekam zep juwek. Owasna insa de hlaukum, dekam zep Mesir mo teipsinni Israel mo zi ausu nakore zini insa gubiridaka, “Dikire sek gwék.” (Kel. 12:1-51) Ragina zen rotisa de syal gwibinnik mas nul gwenan- dekam de hop gwen hap. Musa man Yahudi zisi gubiridaka, “Paska yaklanak hen zao de minggunak, rotina ragi srëmkam tru la gwék.” (Ul. 16:1-8). † **14:3 14:3** Minyak nabare botola mensa golhatazak, zen hen kaso nwe-aweskam de syal gwibinni.

irase dawem nabarena, golhatazak. Kirekam de kaso botola bëjen matmatna ulsun. † Zep kim golek de ta'anzak, dekam zep botola insa ëk tihî nakon kam sok, dekam zep minyakna inkam Yesusu nola kon hlë tablak.

⁴ Hwëna ahakon men zen zë lowe he'ak, dekam zep husus neibi'ik, hen dekam zep donsubi'ik, "Zen ba hap minyakna insa kitak tangan zalta dep hlei yul soneblanan?"

⁵ Dawemna diki minyakna in te-ala hap de lirak gulunam, te-alana mam tangan naka maka nëp zertzimnin. ‡ Desa emaka tahalha zi hip kae ë gwebla-zim'in." Kirekam zep wenya insa jakal neibi'ik.

⁶ Hwëna Yesus dekam zep gubiridaka, "Dikire gwëk. Em ba habe wenya ansa lonsubi'in? Zen man tangan sam gwesil- kirekam de Asa gwëblankamye.

⁷ Sap tahalha wenya em desa nama esa olëlowehe tine gwer. Em de mas gwibirida gwen hap ëdwam gwe-gwenkam, em sap esa dekam mas eibirida gwer. Hwëna Asa em molye dakal hap ërgwë gwëk.*

⁸ Insa irase dawem nabare minyakkam Asa hlë tablanan, zen hamal hap ki Asa gwëblanandeban de Asa drë nwanun hap. Zen dekon etan banakan dep?- aha syal maesa de abe hap syal gwibir-blin hapye.

⁹ Eiwa denakaë emsa gubirida'an: Tingare lang san kim Alap onakore ol dawemna nol halada gwe'ak, wenya ansa kirekam abe hap syal gwibir-blinan, desa hen sa aïsîl nei gwibir. Hëndep wenya ansa zep sa eititi neibir srëm gwer."

*Yudas kim Yesusu zergukuke:
(Mat. 26:14-16; Luk. 22:3-6)*

¹⁰ Dua-blaskam de zëre hon ang ta gwen wenyik mo ahana, ëna Kariot

walya Yudas Bak dekam zep Alap mo golak de syal tan wenyik mo nol-nol san dep song gwëka- Yesusu de zëbe mae hap zerguzimdin hip.

¹¹ Salblankam man tangan sam neisiblik. Dekam zep nenblak, "Te-alasa asa ebe hap ërblal." Dekam zep hëndep Yudas Bak in orana tëbla'anka- Yesusu dikim sowëkam balk tan hap denaye.

Yesus kim Paskanak dep de tembanena zëre hon de ang ta gwen wenya ban golëtembane takake:

(Mat. 26:17-25; Luk. 22:7-14,21-23; Yoh. 13:21-30)

¹² Rotisa de rahi mas gun srëmkam tru tan hap de minggu mo nonol yaklanak kim zauk- yaklana men dekam Paskanak dep de tembane yawalak dep domba zahona Alap hap blom da gwibir-blikke, zëre hon de ang ta gwen wenya in dekam zep Yesusu dakensiblik, "Bian, endawe esa Paskanak dep de tembanena aban mae zitwenblala?- ëe akakim zao hamal uk."

¹³ Dekam zep dan-dan guzimki, "Em Yerusalem san song ën. Zëwe esa zini ërtowera- kama ngatdarakkam de weya blome gwiren halzan naban. Zen desa ang ëbla.

¹⁴ Gola men zao de tik, em hen zao lil. Zao gol bi naka enbla, 'Bian Yesus man emsa takensiblila, "Ëe teksonna enda zao asa ëre hon de ang ta gwen wenya ban Paskanak de tembanena zitwenblal?" '

¹⁵ Zen sa ebe nikip gulk de tekson yawalsa zertreizimdi. Zëwe kirekirena mes ototo da guk, hen komal tum maena sowe henna. Zao hamal ul guk."

¹⁶ Zi darena in dekam zep hëndep song ëka, zao zep hëndep oltowekamen kirekam Yesus guzimkiye. Zëwe zep hëndep tembanena hamal ul guku.

‡ 14:5 14:5 Mensa Yohanis "te-alana mam tangan" kam ale gulku, desa Yunani olkam "300 dinar" kam ale gulku. Te-alana dinara zen zëno mae mo perak tangankam de te-ala kaso, hen zen dekam anakarekam de aïtbin: Zi de aha-ere yakla blalkam syal gwenna, zëno gajina dekam aha-ere dinarkam. Zep 300 dinara, zen te-alana mam tanganna- san de tiga-ratuskum de zi mo aha-ere yaklakam de syal tan gajina kiye. * 14:7 14:7 Ul. 15:11

17 Kim kawesik, Yesus Zëna dekam zep sepulukam de ahakore zère hon ang ta gwen wenya ban golëyaing gwe zaka.

18 Kim golëtembane ta'anaka, zao zep gubiridaka, "Eiwa denakaë emsa gubirida'an: Em an zene aban értembane gwe'an, ahanik sa Asa zertrëra- zao de Asa balk tan hapye."*

19 Kirekam de gubiridannak kim nasablak, dekam zep enlalana ëdowe hanak. Dekam zep aha-en aha-enkam dakensik gwebla'ak, "San ha asa tol home yap ki gublunda?"

20 Ki zep ding gulzimki, "Nen an zene apdenak roti apna kolho honak os-os la ine gwe'an, ahana sa Asa zertrëra- zao de Asa balk tan hapye.

21 Men kirekam Alap mo olak ngatan zi mo lang nakore Zi Tanganna abe hap dena lwak, zen hëndep kirekam asa til. Hwëna kwasang tol, zini men zen Asa dikim zë balk tan hap zertrë'ara, zen sa karekna mam tangan naka Alap onakon hlaulu. Zen an zik de jaha gweban srëmkam maka sam gwesikì, sap dekam zen molya karekna mam tangan wenya insa goltowe'anam."

Yesus kim zère mo timsi de enlala gwe-gwibin hip de tembanena nonola golzimkike:

(Mat. 26:26-30; Luk. 22:15-20; 1Kor. 11:23-25)

22 Kim tembane ta'ak Yesus ki zep rotina gul ineka, ki zep Alap hap rotina in hap dawemna golblaka, ki zep ahap gul guku. Dekam zep zère hon de ang ta gwen wenya in hap anakare ola ban kap tazimki, "Em twenblandan. An ano timni."

23-24 Ki zep hwëna anggurr ho nabare mokna zer ineka, dekam zep etan Alap hap dawemna golblaka, ki zep hwëna zëbe mae hap anakare ola ban zerzimki, "An ano kala zen. Zen sa ano tim nikon wet sol- Alap mo zi niban de ol ziaha-en gun ësesa

dikim sul sonen hapye. Zep zini beya tangankam sa ano kala kon Alap mo nwenak ëdakastil gwer."* Dekam zep tingan notdebik.

25 Ki zep gubiridaka, "Eiwa denakaë emsa gubirida'an: Èe angkam na-en molyë anakare anggurr hona etan otdek. Hwëna ano Bian mo irik ginnik kim de hata'ak, zen diki dekam asa anggurr ësesa ziotdebir."

26 Ki zep hwëna Alap hap de terya dak. Kim dasik, dekam zep hwëna zaitun tra nabare kwatap tek san dep golësek gweka.

Yesus kim Petrussu damnak gublukake: "Em esa Asa zabablala."

(Mat. 26:31-35; Luk. 22:31-34; Yoh. 13:36-38)

27 Ki zep zère hon de ang ta gwen wenya insa gubiridaka, "Em namen kitak esa aïrin hip Asa hli la gukhal. Sap Alap mo olak man lwak, 'Èe asa zaho ta gwibin zini insa karek tal.

Zaho zem dekam sa men-san an-sankam heya-hya gwer.'*

28 Hwëna Bian kim de etan Asa ngaya ta'anaka, Èe asa dekam emsa Galilea san dep ngeirbiridal."

29 Petrus dekam zep ding gulbluka, "Ahakorena an sap sa heya-hya gwenkam Emsa hli dasil. Aena tangan molyë Emsa hli tak!"

30 Yesus ki zep hwëna ding gulbluka, "Eiwa denakaë emsa gublu'an: Namen ayang de gunsu dan son srëmnak, em dekam esa anakan de Asa zabablanna dan-ahan şoblala, 'Zini in èe homë tame ta'an.'"

31 Petrus dekam zep udobe naban ding gulbluka, "Bian, èe apdenak asa Eban lil. Èe molyë tangan Emsa zabablak." Ahakore wenya kirekam zep sap hen ëgu anek.

Yesus kim Getsemani kon Biansa gu soneblakake:

(Mat. 26:36-46; Luk. 22:39-46)

32 Getsemanik kim golëyaing gwe naka, zao zep gubiridaka, "Awe

* 14:18 14:18 Mzm. 41:10 * 14:23-24 14:23-24 Kel. 24:8; Yer. 31:31-34 * 14:27 14:27 Zak. 13:7

teinikin guk. Ëe ama ë-en Biansa gu sonebla'an."

³³ Hwëna Petrus, Yakobus, hen Yohanis mae ensa zep gubiridaka- zen en de ang gweblan hap. Hwëna zao zep enlalana sërkam tangan dowebla hanaka, hëndep hlik gwebla hanan hap alp gwesiblika.

³⁴ Dekam zep gubiridaka, "Ano enlalana sërkam tangan dowe hananda, hëndep tin hibë alp gwesin. Em awe Asa ërgwëk, hen enlala naban esa loweher- Alapsa de abe ta tinen naban."

³⁵ Zëbon mae onakon kim engka en langa gwe halka, zao zep kamanak ik gwe heka. Dekon zep sap karek yala insa de wei yun srëm hap Alapsa anakan abe taka,

³⁶ "Bian, toton banakare maena hom- eno syal gwibin srëm hap denaye. Karek yawala ansa Ëe goltowe'an, diki Em Abon onakon langa gulsun. Hwëna ano dwam gwibin sin bap zen lwan. Diki ere mo dwam gwibin sin zen lwan."

³⁷ Alapsa de abe ta gwenna kim hya gwesiki, dekam zep etan zi dan-aharena in osan dep lwa halka. Hwëna ni truwennak zep hlauluda zaka. Petrussu zep zë gublu zaka, "Simon, em san ema ta'ara? Em san bëjen em engka en mae Asa zersalen!"

³⁸ Ki zep etan gubiridaka, "Enlalakam lowehék. Alapsa e-en enkam abe la tinek. Kareknak ema altilink. Sap eno mae mo enho enna dawemsa de sap syal gwibin hip dwam gwe-gwenda, hwëna eno mae mo timni in tatete naka hom."

³⁹ Zëna dekam zep etan gweyokamen dekon Alapsa gu soneblaka, desan dep. Dekon zep men kirekam nonol abe taka, kirekam etan abe taka.

⁴⁰ Kim hya gwesiki, dekam etan ni truwennak zep hlauluda'an zaka. Sap zëno mae mo nwena man tangan nwe-alk hap ëdohon-hon gwëk. Kim zë jalse gwibirida zaka, balk enkam zep nasalsiblik. Banakan dep?- ding gulblun naye.

⁴¹ Dan-ahanna kim etan zëbon mae osan dep lwahal zaka, dekam zep gubirida zaka, "Em san namae ni truwen hap ëdwam gwe tine'an? In syake! Ngatan zi mo lang nakore Zi Tanganna Asa angkam man karek-karek gol gwen zi mo tahanak dep tapbla dazim'in.

⁴² Dekam luk tak! Nen sek gwen. Emki hla tan. Asa de zergun hup de zini angkam man hata'ara!"

*Yesussu kim balk dakke:
(Mat. 26:47-53; Luk. 22:47-53;
Yoh. 18:3-12)*

⁴³ Yesus in kim nama ton'anaka, Yudas, dua-blaskam de zëre hon ang ta gwen wenyik mo ahana in, dekam zep zi beyam-bya naban Yesussu de balk tan hap golëyaing gwe'anakanëbok te tek teiredan naban, mensa Alap mo golak de mam-mamna hen Yahudi mo nol-nola nenbiridakke.

⁴⁴ Zen mes hamal hap anakan gubiridaka, "Men desaë babang ta'ak, zen zen- zini inye. Zen desa balk lahak, hen dawemkam kara lak."

⁴⁵ Yudas kim golëyaing gwe'an zaka, ki zep hëndep Yesussu babang tan naban gublu zaka, "Guru."

⁴⁶ Dekam zep hëndep balk dazak.

⁴⁷ Hwëna ahana men zen zëwe zau'unika, dekam zep nëbokna mol ineka, dekam zep Alap mo golak de teipsin tangan zi nik de babu gwegwen zini sap zip soka. Hwëna ing ala en naka zep blansibli kinika.

⁴⁸ Dekam zep Yesus gubiridaka, "Em san Asa jal zisie hla lal?- zebe Asa de balk tan hap nëbok te tek teiredan naban yaing gwenan zalye!"

⁴⁹ Ëe men yakla jamkam Alap mo golak emsa tawa ta gwibik! Dekam ba habe zë Asa balk la srëm gwëk? Hwëna an desae angkam syal eibi'in, zen men desa orep Alap mo ol ayang gul gwen zini abe hap dena ale nukke. Zao dikim zaun hube kirekam syal eibi'in. Ena hwëna home tame u'in."

⁵⁰ Zëre hon de ang ta gwen wenyia in dekam zep kitak heya-hya gwenkam hli dak.

51 Ëe an Markus dekam walyak. Ëe kaen ala gun en nabanë sap ang gwebla song gwe'ak. Hwëna asa hen maka balk dak.

52 Hwëna kaen enna in kon zep sap asa irik dasik. Zao zebë hëndep hli yuk. Dekon irkan zebë heya gwek.

Yahudi mo teipsin sinodenak kim nërhatkke:

(Mat. 26:57-68; Luk. 22:54-55,63-71; Yoh. 18:13-14,19-24)

53 Yesussu ki zep nërsong gwek- Alap mo golak de teipsin tangan nik mo gol san dep. Zëwe mes Yahudi zi mo teipsin sinodenak dena kitak ëtagal gwesik gik. Zen ahakon Alap mo golak de syal tan zi mo mam-mamna, hen ahakon Yahudi mo nol-nola, hen ahakon Musa mo olsa de tawa ta gwibin hip de wenyä.

54 Petrus zen lun sap-sap gwen dankam Yesussu ang gwebla song gweka, hëndep zen hen teipsin tangan zini in mo gol tëmna hata zaka. Kol sonna iwe kim til zika, zao zep teipsin zini insa de kara ta gwen hap de jana nabare zini syauk tuwirinnik hlauluda'anka. Zen zao zep hen nikin'in zaka.

55-56 Alap mo golak de mam-mam wenyä hen tingare teipsin sinodenak de wenyä zen orasa dëbla'ak-dekam de Yesus hup boton ol blo-blosa mam gulblun hap, dekam de tan hap. Hwëna sap beya nik blo-blo tan ola ban nolluwe gwe'ak, hwëna zëno mae mo ola in hom mae apde nëk, zep dekon de karek tan hap dena hom dam nulsuk.

57 Dekam zep etan ahakore nik kire ola ban nolluwék,

58 "Zini an ëe kië asalblak. Zen man guku, 'Alap mo gola an mensa zini dauk, ëe asa dri yulsul. Hwëna yaklana dan-ahan ki asa hwëna owas hap syal gwibinkim etan sul soner- zi mo syal gwibin srëm naka.' "

59 Hwëna dekam hen nama bëjen karek tan, sap zëno mae mo ëkira-kla gwenna in hom ahanik mo ban apde në gwe'ak. Kitak man ësrën-srën gwe-gwizim'ik.

60 Alap mo golak de teipsin tangan zini in ki zep zëno mae mo ngirinnik luweka, ki zep Yesussu gubluka, "Em san ha molye mae ding gulzimki?- insa eno karekna kira nul gwe'an zalye."

61 Yesus hwëna balk enkam salsiblika.

Ki zep etan takensiblika, "Em san ha eiwa Zen tangan?- Teipsin Zini Alap mo Tane naye, Israelsa de ngaya tabin hip de Zini."

62 Dekam zep ding gulbluka, "Ëe an Zenke. Hwëna Ëe hen ama emsa gubirida'an: Em esa ngatan zi mo lang nakore Zi Tanganna Asa hla laser- Teipsin Zini Alap mo dam taha nakon de nikirinnik. Hen dekon kimë etan lwa ha'anzak, but-nak esa Asa hla laser."*

63 Dekam zep teipsin tangan zini in Yesus hup de u sisngin hip zëre mo timnik de bajuna kalk-kalk so'anka, dekon zep gubiridaka, "Nen ba hap de etan zëno kareksa de kira gulblun hap zini teibiridan hap?"

64 Nën mes em-am kitak Alapsa de lamang tannak asalblanan! Zep angkam ebon mae onakon banakan?" §

Dekam zep kitak ding nulblik, "An tok hap de karek tan hap man sam gwesi'ira!"

65 Dekam zep oltepkam nwe-masenak hol-hol da gwe'ak, hen nwena dekam zep nahaleblak. Kire naka zep lek-lek da gwe'ak, deban nen gwebla'ak, "Eme eiwa Alap mo zer sonen zi gwë'anam, emaka anakan asa gubirida gwe'ara, 'Zi bosena zen asa lek tyanda.' " Teipsin zini insa de kara ta gwen wenyä in dekam zep itra lwa soblan naka ë san dep irik dahak.

* 14:62 14:62 Mzm. 110:1; Dan. 7:13 § 14:64 14:64 Musa mo titi tabin ola kon, Alapsa de lamang tan zini, desa tankam. Emki Im. 24:16nak hlaun.

Petrus kim Yesussu zabebalakake:
(*Mat. 26:69-75; Luk. 22:56-62; Yoh. 18:25-27*)

⁶⁶ Petrus in kim nama teipsin tangan zini in mo gol temnak syauknu zituwin'inka, hwena ki zep ze teipsin zini in mo golak de babu gwe-gwen wenya hata'anzak.

⁶⁷ Syauk ngatannak kim Petrussu dawemkam nwe-masenak hla tak, ki zep ze gubluk, "Em an hen zenkemen zen Nazaret walya Yesus mae han apdenak ete gwekye."

⁶⁸ Hwena Petrus ki zep ding gulbirki, "Ee hom e mae tame gu'un-insa em gundaye." Dekam hwena kol son lilikin alpnak zep zau'un naka. [Dekam hom hleng gwe'ak, hwena ayangna ki zep hendep nonola gu aneka.]

⁶⁹ Wenya in zao zep etan Petrussu hla ta'anzak, ki zep ze etan ahakore naka gubiridak, "Zini an hen zenmen zen Yesussu ang neblanda gwekye."

⁷⁰ Hwena Petrus man etan ding gulbirki, "Ee hom."

Zao hom holo gwe'ak, ki zep etan men depan mae apdekam golzau'unuka nenblak, "Em an hen zeno mae mo ahanakake, sap em an hen Galilea wal."

⁷¹ Dekam zep Alap mo bose gubin niban anakan guku, "Ee hom tangan am zini insa tame tak- insa en gwebla'anye."

⁷² Kirekam kim guku dekam zep ayangna dan sonna gu aneka. Petrus dekam zep ola mensa Yesus anakan hamal hap gubluka enlala gwibirki, "Ayang de gusu dan son srëmnak, em dekam dan-ahan sonkam esa Asa zabebalala!" Dekam zep gona yusyustinkim mam enkam gwëka.

15

Pilatus Bak hap kim tapbla dablakke:
(*Mat. 27:1-2; Luk. 23:1-5; Yoh. 18:28-38*)

¹ Kak tangannak zep nabal-bakam kitak de teipsin sinodenak dena tagal gwesik, ki zep ola aha-en nuk. Dekam zep tahalen naka teipsin zini Pilatus osan dep nerhak- zen de hwena karek tan hap.

² Pilatus ki zep takensiblika, "Em an san ha eiwa zen- Yahudi mo teipsin niye?"

Ki zep ding gulbluka, "In kirekame gunda, zen kirekamke."

³ Alap mo golak de syal ta gwen zi mo mam-mamna dekam zep Pilatus hup Yesus mo karek-karekna deiri nul guk gwebla'ak.

⁴ Dekam zep Pilatus gubluka, "Em san bejen em ding gulzimdin? Zeno mae en mo eno kareksa de deiri gul gu zunna mes-am beya gwenan."

⁵ Hwena Yesus man tangan ding gulzimdin hip baes gweka. Hendep Pilatus man tangan tenggwanblaka.

Pilatus kim Yesussu tan hap zerguzimkike:

(*Mat. 27:15-26; Luk. 23:13-25; Yoh. 18:39-19:16*)

⁶ Dekam tahun jamkam Paska yaklanak de zaunnuk, Israel mo gubernora man bwinak de zini aha-en aha-enkam tingare zi mo ol-gun sun neser sone gwizimk- dekam de sam gwesik gweblan hap.

⁷ Dekam bwinak zini ki egwe'akmen zen Israel de Roma mo irik gin nikon dikim wet so gwen hap eilman gwenkam zini dakke. Men zen golailman gweka, ahana bosena Barabas Bak.

⁸ Yesussu mes Pilatus mo golak nerhatazak, ki zep hwena zi beyana ahakore hlikna yaing gwezak. Zen hom anakan tame nuk, "Yesussu mes hen nerhatazal." Zen hwena Pilatus de anakan abe tan hap yaing gwezak, "Em wehe etan yakla yala awe zini zeser sone'ankamen kirekam ena aha-en aha-enkam gwiswe sone gwendaye?"

⁹ Dekam zep ding gulzimki, "San ha zini an zen zenaka tim ti'ara, 'Ee an Yahudi mo teipsinni,' san ha desa asa ebe mae hap zeser sonezim?"

10 Zen mae hap ki kirekam takensibiridaka: Sap zen mes anakan tame gulku, "Zi beyam-byana man Yesusu menkam ang nē gweblak, zep Alap mo golak de syal ta gwen zi mo mam-mamna husus nē gweblak-hēndep angkam zep tan hap asas nēbla'an."

11 Hwēna Alap mo golak de syal tan zi mo mam-mamna in dekam zep zi trana insa anakan nolētonk, "Nen kitak Barabassa de zeser sonezimdin hip nen abe tan! Yesus hup bahem."

12 Dekam zep Pilatus gubiridaka, "Ki hwēna ansa ahakon ena 'Yahudi mo teipsin zi'kim en gweblanan, ēe banakan asa desa gwēblal?"

13 Zen hwēna dekam zep ētaken gwe'ak, "Desa te-lidak sonnak makan laink!"

14 Pilatus dekam zep etan gubiridaka, "Hwēna zen banakan karek gweka?"

Hwēna dekam tangan zep mam en tangankam ēgu ane gwe'ak, "Desa te-lidak sonnak makan laink! Te-lidak sonnak makan laink!"

15 Pilatus man zi trana in de zēnaka sam gwesiblin hap dwam gwe'anka, in zep hēndep zēre mae mo ol-gun sun Barabassa zeser sonezimki. Hwēna Yesusu zep jana nabare zi hip tapbla tazimki- zen de hwēna tangolen naka te-lidak sonnak makan ta irin hip.

Pilatus mo jana nabare zini kim Yesusu lamang da gwe'akke:

(Mat. 27:27-31; Yoh. 19:2-3)

16 Dekam zep Pilatus mo jana nabare zini Yesusu zēre mae mo batalyonnak de gol yalak dep nērtilzik. Hen dekam zep zēre mae mo ahakorena kitak tagal nulsuk-apdekam de zē swrē tan hap.

17 Ki zep hwēna teipsin zi hip de baju kwangna ala nosoblak- sam dan kil makare naka. Hen nolak de ala gul soneblan hap dokot tē ngi-ngisa mlin-mlin nuk- teipsin zi hip de emaskam de weir sosublun makare naka.

18-19 Deban zep hwēna lamang tan hap bokle kom tablan naban botonkam blikip neisik gwebla'ak anakare ola ban, "Dawem, bian. Em in zen- Yahudi mo teipsin niye." Dekam zep ahakon dutekam nolak lek dya gwe'ak, hen ahakon ol tepkam hol-hol da gwe'ak.

20 Kim lamang tanna hya neisiblik, bajuna insa ki zep etan nalsiblik, dekam zep zēre mo bajuna etan ala nosoblak. Ki zep hwēna nērwet sok- te-lidak sonnak dikim makan ta irin hipye.

Te-lidak sonnak kim makan da inkke:

(Mat. 27:32-44; Luk. 23:26-43; Yoh. 19:17-27)

21 Yesusu in kim te-lidak sonnak de makan ta irin hip nērsong gwe'ak, hwēna oranak zep Kirene walya Simonsa nērtowe'ak. Zen Aleksander ne Rufus nik mo bian. Yerusalem san dep etan lwa ha'an zaka. Jana nabare zini in zao zep desa tik-tik dak- Yesus hup de te-lidak soblanna insa de wē soblahan hap.

22 Yesusu in desan dep nērsong gwe'ak, bosena Golgota. Bosena in mo enlalana, "zi nol swra."

23 Zao zep te bosena mur kilī ban de blulsun anggur ho enenna nolblak. Hwēna man baes gwibirki.

24 Ki zep hwēna te-lidak sonnak makan daink, hen dekam zep

"zēno pakeanna zēre mae hap dobe abu mo kim de zēnaka dam tasik gwibinkim kae nēblandak"- men kirekam Alap mo olak hamal hap Yesus hup dena lwakke.*

25 Zen kaknak yakla nwena sembilannak te-lidak sonnak makan daink.

26 Te-lidak sonna iwe nol bol tahan nakon man ol alena makan nulink-tingare zi dekon anakan tame gun hup, "Zen kire jal hap da'an." Ola in a kirekam mo ale nukye, "An zen- Yahudi mo teipsin niye."

27 Zen sowē zi dare naban Yesus mae han apdekam te-lidak sonnak

* 15:24 15:24 Mzm. 22:19

makan dabirink- ahana Yesus mo dam taha san dekam, ahana irgwa taha san dekam. [

²⁸ Zen dekam zep zauk- Alap mo olak men kirekam Yesus hup dena hamal hap ale nukye,

“Zen sa kil dil, ‘An hen jal zi ahana.’ ”*

²⁹ Zini men zen desan taman gwe-gwe'anzak, zen nol ewak gun nuban ol mamkam anakan lamang da kini nasen gwe'ak, “Wëo, em an zen eme guku, ‘Alap mo gola asa dri yulsul, hwëna dan-ahare yaklakam asa etan syal gwibinkim sul soner.’ ”*

³⁰ Ki emki enaka de ngaya tan hap te-lidak sonna in kon ati gwezan!”

³¹ Zen kirekam hen Alap mo golak de syal tan zi mo mam-mamna Musa mo ol tawa ta gwibin zi niban hen lamang da gwe'ak. Zen anakan zënaka ol wehakam nenbirida gwe'ak, “Aha zi ensa man ngaya ta gwibirki, hwëna zënaka hom tol ngaya ta'ara!

³² Zen de tangan eiwa Israel mo teipsinkim gwë'anam, zen maka telidak sonna in kon ati gwe'an zala. Kirekam de hla tankam, ki emaka anakan laiblibla'an, ‘An eiwa Zen tangan- nësa de ngaya tabin hip de Zi niye.’ ”

Zi darena in desa hen Yesus mae han makan dabirink, zen hen man lamang laka.

Yesus kim tilsikike:
(*Mat. 27:45-56; Luk. 23:44-49; Yoh. 19:28-30*)

³³⁻³⁴ Yaklana kim bolak zauku, dekam zep tingare langna owas hap kawesik. Hëndep yakla nwna kim dan-ahannak zauku, dekam zep etan hleng gwëk. Yesus dekam zep Ibrani olkam mamkam hërheka, “Eloi, Eloi, lama sabakhtani?” Nère mae mo olkam Zen anakan hërheka, “Are ano Alap, ano Alap, Em ba habe Asa da tasi'ira?”*

* **15:28 15:28** Tingare Alap mo ol tatakna awe, anakare kurungsu de hlaunnu [], zëno dam gulsunnu anakan, “Orep kim Alap mo ola ansa etan ale nul gwëk, ahakon hom ayatna ansa ale nul gwëk.” Ayatna ansa aha zi mes yap orep tangan Yesaya 53:12 nakore naka de enlala gwibin niban mas gulku. * **15:29 15:29** Mzm. 22:8; 109:25 * **15:33-34 15:33-34** Mzm. 22:2 * **15:36 15:36** Mzm. 69:22 * **15:38 15:38** Kel. 26:31-33

³⁵ Hwëna in zen zë kara da'ak, ahakon hom dawemkam nasalblak, zep zënaka nenbiridak, “Emki sane tan. Zen Elia Baksa hërheblanda!”

³⁶ Dekam zep ahanik nabalba enkam hluweka, yera jaubum makare naka zep nabal-bakam gol hanaka. Desa zep anggur ho enennak de os gul inen naka te tek gwënnak kyaon sonoka, desa zep Yesus hup mipnak goltrë seblaka- desa de kwlem gun hup. Ki zep hwëna gubiridaka, “Nen ki kara tan. Elia Bak wëhë yap ati gwe'an zaka?- zen de te-lidak sonna an kon terahen hap.”*

³⁷ Yesus ki zep etan ol mamkam hërhe hanaka, ki zep hëndep tilsiki.

³⁸ Alap mo gol mwanak de kaen lilikin glaing-gling yawala dekam zep owas hap kalk neisik sonok.*

³⁹ Jana nabare zi mo mamna in zen apdenak zëre mo ahakore naban zikara ta'anka, dekam dangkam talsunubla'anka. Zen kim anakan Yesusu hla taka, “Zen kirekam mo tilidaye,” dekam zep gubiridaka, “Zini an eiwa Alap mo Tane.”

⁴⁰ We walya hen beya nik langa nakon kara da'ak. Zëno mae mo bosem-sena Salome, Magdala kore wanya Maria, hen bose apde zem Yakobus Betek ne Yoses nik mo anena Maria- men zen hen zëno nik mo ayana Yesusu wë takke.

⁴¹ Zen men zen Yesusu Galileak de gwënnak mas në gweblakke. Hen ahakore we walya beyanik zë ëgwë'ak- men deban mae Yesus mae han apdenak Yerusalemk yaing gwe zakke.

Yesusu kim lo dasikke:
(*Mat. 27:57-61; Yoh. 19:38-42*)

⁴²⁻⁴³ Kim kam-en gwe'ak, Arimatea walya Yusup ki zep hata zaka. Zen hen Yahudi mo teipsin sinodenak de aha mamna, hen zen man tangan Alap de kitak nabakam irik

gölzin hap hohle gwe'anka. Yesus in kim tilki, dekam Hari Jumat, yaklana men dekam Yahudi zini ka'an dep de Sabat hap etamal gwe-gwekke. † Hwëna Sabat hap de orapna dekam man tangan golek de gwe'ak. Zen in zep Yusup enlala tatete naban nabakam Pilatus osan dep song gweka- Yesus mo tok naka dikim lo tasin hip abe tan hapye.

⁴⁴ Pilatus kim anakan salka, "Yesus mes tili," man tangan tenggwanka. Sap zen mes-am tawa gweka, "Te-lidak sonnak de makan ta irin zini na-en hom juwe gwenan." Dekam zep gubiridaka, "Jana nabare zi mo mamna men zen zikara ta sara emki desa kwang tan." Kim hata zaka, dekam zep takensiblika, "San ha eiwa mes tangan tili?"

⁴⁵ Zëbon kim salka, "In eiwa mes tili," dekam zep Yusupsu gubluka, "Amki zerhal."

⁴⁶ Yusup dekam zep kaen ngap-ngap blala te-alakam golka. Ki zep hwëna Yesus mo tokna te-lidak sonna iwe zizeryahe halka. Kaen ngap-ngapna inkam zep zitahaleka. Ki zep hwëna kaso hul gun hamalak zidrë neka. Lilikinni kaso yawalkam zep zigulhlu inki.

⁴⁷ In kim ki zë golësyal ta'anka, Magdala kore wanya Maria, apde bose zem Yoses mo anena Maria han man zë kara labi'ik- in kim zidrëne'ankaye.

16

Yesus kim ngaya gwekake:

(Mat. 28:1-8; Luk. 24:1-12; Yoh. 20:1-10)

¹⁻² Hari Sabatna kim tamank, we walya Yesussu de drënen kaso hula in san dep sek gwek- Magdala kore wanya Maria, apde bose zem Yakobus mo anena Maria, hen Salome. Zen mes irase dawem nabare minyakna te-alakam lop dak. In zep

† **15:42-43 15:42-43** Yahudi mo Hari Sabatna, Jumat mo yakla dum gwehen nakon naît gwibik,

hëndep Sabtu mo yakla dum gwe hennak zausuk gwek.

* **16:8 16:9-19** Markus mo Ol Dawemna an, zëno aumwa topnak de ola, zen zën hom ale gulku. Hwëna aha zi hyanak dekam de Markus mo ola in sa sul sonen hap mas nuk.

Minggukam orap tola ban Yesus mo tok naka de minyakna inkam hlë tablandan hap sek gwek.

³ Hwëna ora san zep zënaka dak-ensibirida song gwe'ak, "Nara sa lilikin gulhlu irin kaso yawala in sa nöp irhi gulzimdi?"

⁴ Hwëna kim zë yaing gwe'ak, dekam zep hla nul kinik, "Lilikin kaso yala in mes irhi nul kinil."

⁵ Ki zep hëndep kaso hula iwe bitü gwek. Hwëna wal seiwirsi zep zë hla da'ak. Baju ngap-ngap ala son naban dam taha san dekam nikin'inka. Ausa zep zë nohloblak.

⁶ Hwëna wal sewiri in zep gubiridaka, "Bahem ääirin! Em an Nazaret walya Yesussue lëbla'an- te-lidak sonnak in sa makan da inkke. Bian Alap mes tin nikon ngaya tala! Zen awe hom. Emki sap hlaun- an zao sap nën nekye.

⁷ Dekam sek gwek. Ola ansa zëre hon de ang ta gwen wanya kip olzimhak- hen nonol tanganna Petrus hup, 'Yesus mes emsa Galilea san dep ngeirbiridala. Em zao esa értower- men kirekam Zëna emsa hamal hap gu-gubirida gwekake.' "

⁸ We walya in dekam zep au hlon hap hen ääirin hip yal-yala ban heyahya gwek. Zep hëndep oranak men desa zini nolëtowe'ak, desa donbirida srëm gwek.

MARKUS MO OLA ZAO-EN ZAUSUNUN*

Yesus kim zënaka zertrei gwizim'inkake:

(Mat. 28:9-10; Yoh. 20:11-18; Luk. 24:13-35)

[
⁹ Yesus in kim tilki, hwëna zëno ka'ankam, Minggukam, zep etan ngaya gweka. Dekam zep kak tangannak nonol tanganna Magdala kore wanya Maria onak Zënaka zertrëka. Maria in, zen men

zëbon onakon Yesus orep tujukam de dowala golëalsa sonekake.

¹⁰ Yesus kim hli yulku, Maria dekam zep song gwek- men zen Yesus hun nërgwë gwekke, desa de tonbiridan hap. Zen hwëna kwasang hap nama sei gosa dabra'ak.

¹¹ Zen kim anakan ësak, "Yesus mes ngaya gwera. Ëe kië hla tal," hwëna zen hom daïblibik.

¹² Zao hom holo gwe'ak, dekam zep etan aha nwe-masekam hwëna zi dare hap Zënaka zertreizimki. Zi darena in Yerusalem kon Yesus zëre hon de seblaskam ang ta gwen wanya ban de lowehen nakon aha ësan dep song ë'anka. Hwëna oranak zep Yesussu ërtowe'anka.

¹³ Zi darena in dekon zep etan ola halka- anakan de lonbiridan hap, "Ëe mese hen ërtowenan!" Hwëna Yesus hon de ang ta gwen wanya in desa hen hom daïblizimk.

¹⁴ Zao hom holo gwe'ak, ki zep etan seblaskam de zëre hon ang ta gwen wenyak tembane tannak Zënaka zertreizimki. Dekam zep nol drak-drak hap jal gwibiridaka, sap men zen tin hyanak hla da gwe'ak, desa de salbiridankam hom mae daïlibirida gwe'ak.

¹⁵ Ki zep hwëna gubiridaka, "Dekam sek gwek. Abe hap de ol dawemna tïngare lang san kitak de zi ausu hap olzim halada gwek.

¹⁶ Tïngare zini men zen de Asa daïbli gwebla'ak, hen zëre mae mo Asa de taïbliblanna insa de baptis gwenkam noltrë gwe'ak, zen zen sa ëngaya gwer. Hwëna Asa de taïbliblan srëm wanya, desa Alap sa karek tabiri.

¹⁷ Men zen de Asa daïbli gwebla'ak, zen zen sa hwëna owas-owasna aha zi dikim Asa taïbli gweblan hap dena syal neibir-zimnira gwer. Zen zep sa dowal-dowala ano bosekam nolëalsa sone gwibir. Hen zëre mae mo tame gun srëm olkam sa owas hap ëton gwer.

¹⁸ Zen hen sap sa wanya jal-jala tahakam deirensik gwibir. Hen zen

sap sa hasom nabare hona notde gwibir. Zen molya kim juwe gwek. Zen de zi sang-sang hap tahasa tehabirida ine gwenkam, zen dekam sa ëdawem gwe-gwer."

Yesus kim ngatan zi mo lang san dep sewe sekake:

(Luk. 24:50-53; Kis. 1:9-11)

¹⁹ Bian Yesus in kim kirekam tonbiridasiki, ki zep hwëna Alap ngatan zi mo lang san dep zer ine halka- zao de zëre mo dam taha nakon teipsinkim nikirin hip.

²⁰ Zëre hon de ang ta gwen wanya in dekam zep hwëna ol dawemna insa tïngare lang san dep nol halada gwek. In desan ki nol halada gwek, Bian Zëna man zë mas gwibirida gweka, hen sosonna owas-owassa dikim syal gwe-gwibir-zimdin hip dena man mam gul gwizimki- zëno mae mo olsa dikim taïbli gwibin hip.]

Yesus hup de Ol Dawemna mensa Lukas ale gulkuke

1-2 Dawem Bian Teopilus Bak, *

Lukas onakon:

Alap mensa orep nësa gu-gubirida gweka- zère mo Walassa de nëp zer sonezimdin hip dena, Zen mes ki hēndep nēr hom nëno mae mo ngirinnik kirekam syal gwibirki. Zēno awe de gwēn hap dena angkam aīsili an desaē kon gwisibir hana'an. Zini men zen nonol kon gwisibir hanan nakon zère mae mo nwekam hla nul gwek, zen zep aīsili ansa zi-ē zi-ē san dep nol halada gwek. Dekam zini beya nik sap dawem enkam de aīsili ansa ale gun hup ēakasik gwek.

³ Èe hwēna men zen nonola kon hla nul gwek, èe ama desa dawem enkam takensibirida gwek. Hen zen men desa ale nul gwek, èe ama desa baca gul gwek. Zen zebē hēndep anakan enlala gwibik, "Aīsili an èe asa Bian Teopilus hup dam-dam enkam ale gulblul- aha-en mae de hli yul guk kinin srēm kam."

⁴ Èe mae habē ansa ebe hap ale gulbluk: Em ekakim anakan tawa gwe, "Nonol men desa emsa tawa da gwek, zen eiwa de tanganna."

Alap mo dam taha nakore zini kim baptis ta gwibin zini Yohanissi de jaha gwen hap dena gubiridakake:

⁵ Herodes in kim teipsinkim Yerusalem mo langnak irik gilki, Alap mo golak de syal gwe-gwen zini bosena Zakaria, zen hen dekam zēwe. Zakaria, orep de Alap mo golak de syal gwe-gwen zini Abia Swe mo hliknak hen syal gwe-gweka. We zem bosena Elisabet.

* **1:1-2 1:1-2** Teopilus Bak mo bosena in enlala naban. Enlalana, "Alapsa de ensa lwa gweblan zi." San ha Lukas kire bōse nabare zi hip ale gulbluka? San ha tīngare zini men zen Alapsa enna nola gweblananke, zēbe mae hap ale gulzimki? Nen angkam tawa naka hom.

We zik mo auyan-azana hen Alap mo golak de syal ta gwen zi.

⁶ We-zi darena in man tangan Alap mo nwenak oto eisik. Hen zen aha-ere enlalakam tīngare Alap mo ol san hen tīti tabin sin ang è gwek.

⁷ Zen hwēna hom walasna wē lak. Zen Alap ki kirekam Elisabetsa enlala gwibirki. Zep hēndep walas srēm kam bogol èk.

⁸ Abia mo hliknak dinik dikim Alap mo golak syal tan hap denak kim zauk, zao de yaklanak dekam zep Zakariasa zen de syal gwen hap dam dasik.

⁹ Men kirekam Alap mo golak de syal ta gwen zini zisi dam dasik gwibirin, zen kirekam Zakariasa dam dasik. Zen mae hap dam dasik: Zen de zē-en Alap zère en hap de teksonnak tīn hip- irase dawem nabare te kilsī de zē Alap hap ang gulsublun hap.

¹⁰ In kim ki kiresa de syal gwibin hip denak zau'uk, zi beyana dekam zep eiha lip nakore tekson nakon Biansa nen sonebla'ak.

¹¹ Kim zēwe irase dawem nabare te kili insa ang gulsu'unika, ki zep hwēna Alap mo dam taha nakore zini ang gul gwen hap de meja alpnak zau'un zaka- Zakaria mo dam taha san dekam.

¹² Zakaria kim hla taka, ki zep auna hloblaka, hēndep man zē airīblaka.

¹³ Hwēna Alap mo dam taha nakore zini in ki zep gubluka, "Zakaria, bahem asa airīblan. Alap mes eno ol gu sonenna salka. We om Elisabet zi walassa sa ebe hap wē tablal. Yohaniskim bōse ta.

¹⁴ Kim de jaha gwe'ak, em dekam esa tangan sam gwesik gweblala, hēndep esa isrip-sri gwe-gweblala. Aha zi hen beya nik sa isrip-sri nē gweblal.

¹⁵ Zen Bian mo nwenak zi yawal hap sa jowera. Alap mo Enhona jaha gwen nakon sa ki hēndep bi

gweblala. Zep angguru ban ho jal-jala ban bap zen otde gwen.

¹⁶ Zen Zen sa Israelk de zini beyakam Bian osan dep kwang guludahal zala- zère mae mo Alap hon depye.

¹⁷ Hen Zen Zen sa Biansa ngeirbli zala. Zëno tahana Alap mo ol ayang gul gwen zini Elia Bak mo kim sa sosen nëblal, hen zëno enhona zëno kim sa lwablala. Hen Israelk de zini men zen iye zeban zënaka gïlgïl neibirida gwenan, zen zen sa desa siri gulsulu. Hen srë de ora san de ëgwahan wenyä, zen zen sa desa eiwa de ora san dep kwang guludahal zala. Zen kirekam sa zi beyana Bian de hata zannak dep hamal gulu.”*

¹⁸ Zakaria ki zep takensïblika, “Banakarekam asa tawa gwer?-eiwa diki lwankam. Sap ëe mesë bogol gwëk, hen ano wenyä mes-am tangan bogol gwëk.”

¹⁹ Ki zep ding gulbluka, “Ëe an Gabriel. Bian mo dang nakonë zauk gwenan. Zen zep asa emsa de ol dawemna ansa tawa tan hap zer sonera.

²⁰ Insa ki emsa gublunan, Alap sa ki hëndep kirekam ebe hap syal gwibir-blira. Hwëna em home asa taïblïblanda. Zep hëndep angkam em molye ola tonka. Em esa ol srëm gwera, hëndep mes ki lwanan.”

²¹ Kim nësbla tinek, ki zep hëndep dengguanbla'ak, “Zen ba hap kire tangankam holo gwe'an ora?”

²² Kim kon wet so zaka, zen banakan dep?- ol tonbiridanna. Taha enkam zep akan-akan gwibirida'anka, sap zen mes ol srëm gwëka. Zi beyana in dekam zep anakan tame dak, “O an nwe nik zë lirisin nëblaon.”

²³ Zakaria Bak mo Alap mo golak de syala kim tap gweblak, dekam zep zère mo gol san dep song gwëka.

²⁴ Hom holo gwe'ak, dekam zep hëndep we zem Elisabet u gwe'ak.

Dekam zep saher hap gol ennak gwë gwëk- holona benna aha-ere taha-tap enkam.

²⁵ Zen man enlala gwe-gwëk, “Nan babë tawa tabin. Dikire tïngan anakan asa tame nuk, ‘In Bian kwasang gwibirki.’ Ëe an sap bogola, hwëna ano walas wë tan srëm hap de sahera zi nwenak Bian Zën ap ngan gulsubi'ira.”

Mariasa kim Yesussu de jaha gwen hap dena hamal hap tawa gulkuke:

²⁶ Elisabet kim benna enam enkam u nuban gwë'ak, Alap ki zep zère mo dam taha nakore zini Gabriëlsa etan Galilea mo langnak de ëna Nazaret san dep zer sonëka.

²⁷ Gabriel ki zep kwalbasa lam gunnu Maria osan dep song gwëka. Zen Yusup hup de golgu gweblanna. Yusup mo auyan-azana teipsïn zini Daud onakon.

²⁸ Alap mo dam taha nakore zini in ki zep Maria hon hataka, zao zep gubir zika, “Dawem! Em Alap mo kwasang-kwasangnake gwë'ara! Bian man emsa dawem tangankam kara gul gwenda!”

²⁹ Zëno ola insa de sankam, Maria ki zep auna hlok, dekam zep zënaka enlala ennak mae hap takensïbik, “An ba hap ki kirekam asa gwibirida?”

³⁰ Hwëna ki zep etan gubirki, “Bahem äirïn, Maria, sap em ema Alap mo nwenak sam gwesï'ira.

³¹ Em esa u gwera. Zi walassa esa jaha gwera. Yesuskum bose ta. †

³² Zen sa teipsïli, hëndep dekam sa nen gweblal, ‘Alap Teipsïn Zi nik mo Tane.’ Bian Alap sa Desa gublula- Zen de Israëlsa bi gwibin hip, zère mo auyanna Daud Bak mo kim.

³³ Zen Zen sa hëndep denaban kitak Yakob mo auyan-azana irik gili. Zëno irik ginnï in molya tap gwëk.”*

* **1:17 1:17** Mal. 4:5-6; Mat. 11:14; 17:11-13 † **1:31 1:31** “Yesus”kum de bosena, zen enlala naban. Zëno enlalana, “Zisi de ngaya tabin hip de Zi.” (Mat. 1:21) * **1:33 1:33** 2Sam. 7:12-16; Yes. 7:14; 9:6-7

³⁴ Maria ki zep gubluk, “Hwëna ëe an homë zi mae naban gaïng ë'an. Ëe banakan asa walas gwer?”

³⁵ Ki zep ding gulbirki, “Alap mo Enho sa ebon ing gwehe zala, hen Alap mo sosen sa emsa bi gwibiri. Zen zep sa walas tola insa nen gweblal, ‘Zen Alap mo Tane- enho lalak enna.’

³⁶ An kirekamë emsa gubirin, zen mes ki iye om Elisabet hon kirekam lwak. Zen mes u gwek- benna angkam enam enkam. Zen sap bogola, hen zini mes anakan nenbik, ‘An Alap ki walas srëm gulku.’

³⁷ Hwëna zen angkam u nuban gwë'an. Sap Alap hap hom- banakare maena, Zen de syal gwibin srëm hap denaye.”

³⁸ Maria ki zep ding gulbluk, “Ëe an Bian mo tana ïltikïnnik de gwë gwen wesyaqe. Sap sa ki kirekam abon onak lwal- in kirekam em asa gubiridaye.” Alap mo dam taha nakore zini in ki zep hli yulku.

Maria kim Elisabetsa zïni gïkke:

³⁹ Alap mo dam taha nakore zini in kim hli yulku, holo gwehan srëmnak Maria dekam zep hen sosen tola ban Yerusalem mo kwatap lang san dep song gwek- Zakaria ne Elisabet nik mo ë san dep.

⁴⁰ Zakaria mo golak kim hatak, ki zep Elisabetsa dawem gul kinik.

⁴¹ Elisabet kim Maria mo dawemna insa salbik, ungala mwanak de walasna in dekam zep sosen gweka. Alap mo Enhona dekam zep Elisabetsa ing gwehebirkiki,

⁴² ki zep Mariasa ol mamkam gubik, “Em ene tingare we walya kon dawemna hlau'ura! Hen Alap eno walasna in hap dawemsa sa golblala.

⁴³ Ëe an betekna, hwëna em in Teipsin Zini Bian mo anee ano golak hatanda!

⁴⁴ Ëe kimë eno dawemna sal, ano ungala mwanak de walasna dekam zep isrip-sri naban sosen gwer.

⁴⁵ Ebe hap Bian hë'ho gwibin tangan naka golbi'ira, sap men zen ebon onak Bian mo ola hatak, em ema taïblibirki, hen zen kirekam sa ki lwal!”

Maria kim Alapsa terya ban isrip-sri gweblakke:

(1Sam. 2:1-10)

⁴⁶ Maria ki zep guk,

“Ëe ama Bian Alapsa boltere ta'an,

⁴⁷ hen ano enhona man isrip-sri gwebla'ara,

sap Zen Zen sa asa ngaya gulu.

⁴⁸ Zen man asa enlala gwibirki, hwëna ëe an Zëbon de babu gwegwen we- bosen srëm tola.

Hwëna angkam tingare zi ausuna hëndep denaban sa asa nen gwibir,

‘Hë'ho gwibin tanganna zen zen hlauk.’

⁴⁹ Sap sosen Zini Alap, Zen eiwa lalak tanganna,

hwëna Zen man kirekam-kirekam yawala abe hap syal gwegwibir-bi'ira.

⁵⁰ Auyan-aza nakon hëndep auyan-azana,

Zënaka de airïblan zi hip

Zen man zëre mo kwasangna gol gwizimnira.*

⁵¹ Bian men kirekam orep zëre mo sosonna goltrei gwizimki,

Zen kirekam etan angkam goltreizim'ira:

Zen orep zi zëna-zënana man sek-wak gulsuk gweka,

hen zëno mae mo kalang karekna man blaonsuk gwizimki.

⁵² Zen hen orep teipsin-teipsin wenyaka

zëre mae mo teinikin gwen nakon man yal gul sone gweka,

hwëna bosen srëm wenyaka zep kang gulse gweka.

⁵³ Usak nabare wenyaka desa man dërek-dërekna kim itri ta gwibirki.

* 1:50 1:50 Mzm. 103:17 * 1:53 1:53 Mzm. 107:9

Hwëna men zen nonol tahalha srëmkam lowehe gwek, desa man gubirida gweka, 'Usak naban sekwak gwek.'*

Hwëna angkam Alap etan kirekam nëbe mae hap syal gwibirzim'ira.

54-55 Nëno mae mo auyanna Abrahamasa hen zëno auyantane walya men kirekam gu-gubirida gweka,

Zen angkam kirekam Israelsa mas gwibirida'ara.

Zen man anakan gu-gubirida gweka, 'Ano ebe mae hap de kwasangkwasangna hëndep denaban sa lwa gwer.

Èe molyë golzausuk gwek.*

Zen desa angkam enlala gwibi'ira."

56 Maria Elisabet han san ha danahare benkam ëk, ki zep etan zëre mo ë san dep lwahak.

Baptis ta gwibin zini Yohanissi kim jaha gwekke:

57 Elisabet de jaha gwen hap denak kim zauk, zi walassa zep jaha gwek.

58 Gol golek dena hen iye zem kim anakan ësak, "Bian mes Elisabet hap kwasangna mamkam golbiri," dekam zep tagal neisibirzik, hen dekam zep zë apdekam ëisrip-sri gwek.

59 Walasna in kim mingguna ahaen gweblak, ki zep etan tagal nëblak- to mip naka dikim blaonsublun hap.* Zen man ëkël gï'ik, "An zëre mo Bian mo bosekam esa bose lal- 'Zakaria'kam."

60 Hwëna an zik zep gubiridak, "Kirekam bëjen nen bose tan! An 'Yohanis'kim esa bose lal."

61 Dekam zep dengguanbi'ik, "Iye wal om hom tanganke- kire bose naye!"

62 Ki zep tahakam Zakariasasa akanakan nëblak- anakan de takensiblin

hap, "Ena banakan de bose tan habe dwam gwebla'ara?"

63 Zakaria hom nama dekam ola ton'anka. Ki zep te hlang hap abe gweka, dekam zep zë ale gulku, "An bosena Yohanis." Dekam zep tingan dengguanblak.

64 Dekam zep hëndep ola etan tonka. Alap mo bose ensa zep ilman gul tineka.

65 Zëno gol golek denak dena dekam zep sërkam dengguanbla'ak, hen tigare Yerusalem mo kwatap lang san de lowe hendan wenyadesa man donbirida gwek.

66 Tigare zini men zen ësak, ki zep enlala ennak ëenlala gwegwe'ak, "Walasna in banakare zi hip wëhë yap jowe'anka?" Zen mae hap ki kirekam ëgu gwek: Sap Bian mo sosonna man Zëbon lwa gwe'ak.

Zakaria kim hamal hap de ola tonbiridakake:

67 Walas zemka in kim "Yohanis"kim bose dak, dekam zep Alap mo Enhona Zakariasasa bi gweblaka, dekam zep Alap onakore hamal hap de ola tonbiridaka,

68 "Bian en hap nen dawemsa golblatine gwen-Israel mo Alap hap.

Zen mes hatalazëre kore naka de kwasang gwibiridan hap,

hen dekam de dowal mo kigi mo irik gin nikon gwiswe sonen hap.

69 Zen mes nëbe mae hap Zi sosonna zer sonezimkinësa de ngaya tabin hip de Zi niye, teipsin zini Daud Bak, men zen Alap mo dwam gwibin sin ang gwegwekake,

zëno ayan-aza nakore naka. †

70 Alap mo ol ayang gul gwen zini orep tangan mes anakan ëguguk gwek,

71 'Nësa de ngaya tabin hip de Zini sa hatala-

* 1:54-55 1:54-55 Kej. 17:7; 22:17; Mzm. 111:9 Zakaria mo ola an, zen Yohani'i de enlala gweblan hap hom. Zen hwëna Yesussu enlala gweblaka, sap Yesus Zen Zen- Raja Daud mo ayan-aza nakore naye. Sap Zakaria zëna tane zem Yohanis hin, zen Harun Bak mo ausu nakorena.

* 1:59 1:59 Kej. 17:12; Im. 12:3 † 1:69 1:69

Zen de nësa jal zi mo taha nakon alal gul gwen hap.'

72 Hen anakan mes gu-gubirida gweka,

'Èe asa Ère mo ebe mae hap de ol gu-gubiridanna enlala gwibir, zep asa hëndep emsa kwasang gwibiridal.'

73 Alap mes nëno mae mo auyanna Abrahamsa anakan gu-gubluka,

74 'Emsa de tamera gwen zi mo taha nakon Èe asa emsa al gul halzal.

Zen dekam esa aïrïn srëmkam Asa betek ë gweblal.*

75 Zep nen enho lalakkam esa Alap en hon ëtal gwesil, hen zëno nwe kara gwennak esa hëndep denaban lowehe gwer."

76 Zakaria ki zep hwëna tane zikhip dena aïsïl gwenkam ayang gulku,

"Em, ano walas, emsa sa nen gweblal,

'Alap Teipsin Zi nik mo olsa de ayang gul gwizimdin hip de zini.'

Em esa Biansa ngeirblira- zëbe hap de orasa sal tablan hap,*

77 hen Bian mo hlil irin wenyaka esa anakan tawa ta gwibiri,

'Alap sa emsa eno mae mo karek-kareksa de tap gulsuz- imdinkim ngaya tabiri.'

78 Sap nëno mae mo Alapna Zen kae-kaena hen kwasang-kwasang enna.

Zen zep sa nësa de ngatan tabin hip de Zini insa zer sonera.

Zen ngatan zi mo lang nakon kaknak de yakla hata sezan mo kim sa zïlsi zila.

79 Zen dekam sa tingare zi ausuna ngatan tabir zira hen ngaya tabiri,

sap zen tingan kawesinnik lowe he'an,

hen tin hip ëairi gwenan.

Zen Zëbon onakon esa Alap han ërumlae gwer, hen zi bosyan naban ëumlae gwer."*

⁸⁰ Zakaria mo tanena Yohanis in kim mam gwe'anaka, Alap osan dep de enlalana hen dekam zep mam gwebla'anaka. Zen zi srëm langnak gwë gweka- hëndep yaklana mensa Bian Alap dam tasiblika. Zao kim hatak, zen dekam zep tingare Israelk de zi hip zënaka zertreizimki.

2

Yesusu kim jaha gwekke:

(Mat. 1:18-25)

¹ Dekam teipsin tangan zini ki, zen langna beya en tangan naka Roma kon irik gilki. Zen dekam zep tingare zisi de zëre mo irik gin nika aïtbin hip gubiridaka.*

² An nonol aïtbinni- Kirenius men kim Siria mo langnak gubernor gwekake. †

³ Tingare zini dekam zep zëre mae mo auyan-aza mo ë-ë san dep sek gwendak- zëno mae mo bosem-sesa dikim zë ale tabir-zimdin hip.

⁴⁻⁵ Yusup ne Maria ne dekam zep hen kire hap Galilea mo langnak de ëna Nazaret kon Yerusalem mo langnak de aha ëna Betlehem san dep song ëk- teipsin zini Daudsa men zao orep jaha gwekke. Sap Yusup mo auyan-azana Daud onakon. Zëbe hap de golgu gweblan weny Maria in dekam u nuban gwë'ak.

⁶⁻⁷ Betlehemk hom tangan holo ë'ak, Maria ki zep zi walassa jaha gwek- nonol walassa. Kaen hak-haknak zep tahalek, desa zep domba-sapi mo tembane ta gwen kolho makarenak drënek. Sap kitak

* **1:74 1:74** Kej. 17:7; 22:16-17; Mzm. 105:8-11 * **1:76 1:76** Yes. 40:3; Mal. 3:1 * **1:79**

1:79 Yes. 9:2; 60:1-2 * **2:1 2:1** Mae hap zënaka naïtbik: Pajak te-alasa dikim Roma mo irik ginni kip sowe henkam gol gwizimdin hip. Romak de teipsinni maekam nen gweblak, "Kaesar Agustus" kum, hwëna zen zëno bose tangansa hom. Men zen dekam irik gilki, zëno bosena Gaius Oktafius. "Kaesar" kam de gublunna, zen syal bose. Enlalana, "Teipsin zini." † **2:2 2:2** Siriasa hen Roma irik nik.

de gol-gola mes zi enkam ëbeya gwek.

Domba zaho ta gwibin zinik kim Alap mo dam tahana kore zini ëjowe zakke:

⁸ Langna iwe dekam domba zaho ta gwibin wenya man kam domba zaho zemka sonak kara dabi'ik.

⁹ Hwëna Alap mo dam taha nakore zini ki zep zëbon mae onak jowe ane zaka, hen Bian mo ngatanna man zë zilbirida anezak. Karekkam zep zë ëairi'ak.

¹⁰ Hwëna Alap mo dam taha nakore zini in ki zep gubiridaka, "Bahem ëairin, sap ëe an ol dawemsaë ebe mae hap golhatazimnizal. Ola ansa de ësankam, tingare zini sërkam tangan sa ëisrip-sri gwer.

¹¹ Namen, Daud mo ënak, wenya man jaha gwer- emsa de ngaya tabin hip de Teipsin nika, Alap mensa dam tasikike.

¹² Ol tan-tansaë ebe mae hap golzim'in: Em esa walas tolsa deyol hak-hakkam de tahalen naka hla lal. Domba mo tembane ta gwennak ta'ara. Zen dekam esa anakan dam lasil, 'An Zen.'"

¹³ Ki zep hwëna mumuk ennak ahakore Alap mo dam taha nakore zini beya en tangankam ëjowezak, ki zep zë Alapsa isrip-sri nëbla'ak,

¹⁴ "Alap Em eiwa teipsin tanganna! Eno bosena dikire kitak teip nulsuk gwelak.

Sap angkam ema okamanak de zi niban golësësek gwe'ara- ere mo nwenak men zen oto gwesi'inye."

¹⁵ Alap mo dam taha nakore zini in kim etan ngatan zi mo lang san dep sesek gwesek, zini in dekam zep ëguk, "Nen ki nabakam Betlehem san dep gweyo gwen- eka ki zë hla kuk, in desa Bian nësa gubiridandake."

¹⁶ Ki zep hëndep sek gwek. Dekam zep hëndep Yusup ne Maria neka nakek, hen walas tola insa dekam

zep hla dak- domba mo tembane ta gwen kolho makarenak de tannak.

¹⁷ In kim hla dak, dekam zep kitak donbiridak- walas tola in hap dena, men desa Alap mo dam tahana kore zini in tonbiridakaye.

¹⁸ Ola insa de ësane gwenkam, tingare zini man tangan ëtenggwanak.

¹⁹ Hwëna Maria zëna, in zen ki zë lwa gwe'ak, desa kitak enlala ennak lam gul gwe'ak hen enlala gwe-gwibi'ik.

²⁰ Zini in ki zep etan Alapsa de terya ban boltere tan naban lwan dahak. Sap tingan mensa ësane gwelak hen hla nuk, zen hëndep men kirekam Alap mo dam tahana kore zini in gubiridakake.

Yesusu kim bose dakke, hen Alap mo golak kim ërtrëkke:

²¹ Walas tola insa kim mingguna aha-en tap gwelak, dekam zep to mipna nablonsubluk, hen dekam zep "Yesus" kum bose dak- men kirekam Alap mo dam taha nakore zini Mariasa u gwen srëmnak gubirkike.

²² Musa Bak men desa nonol zi walas wë tan hap dena zëre mo titi tabin olak ale gulku, Maria ne Yusup ne man desan ang ëk. Zen nonol Maria de sasa gwesinnik dep orapna empat-pulu enkam eissik, dekam zep walas tola insa Yerusalem san ërzahek- Alap hap dikim ërtrëblan hap.*

²³ Mae hap ërtrëblak: Sap Musa mes ki zëre mo titi tabin olak anakan ale gulku,

"Tingare nonol zi walas wë tanna, zen Alap zëre hap dena. Zep emki zëre hap zertrë gwelak."*

²⁴ Zen hen man ang ëk- mawasa de dan-dan Alap hap teisyablanna, desa de Alap mo golak de syal tan zi ang sosublun hap. Sap Musa mo titi tabin olak nonol walas wë tansa de Alap hap zertrëblan hap dena kirekam hen lwak.*

* 2:22 2:22 Im. 12:1-8 * 2:23 2:23 Kel. 13:2; 13:11-15 * 2:24 2:24 Im. 12:6-8

²⁵ Dekam Yerusalemk, zini bosena Simeon. Zini in enho dam-damkam gwë gweka hen Alap hon mes tangan tal gwesikī. Zen man Alapsa Israelsa de dawem gun hup kara ta gweka, hen Alap mo Enho zergwë gweka.

²⁶ Alap mo Enhona mes hamal hap gu-gubluka, “Em molye na-en tilki- Teipsin Zini insa de hla tan srëmnakye, Ëe Mensa Israelsa de ngaya tabin hip dam tasikye.”

²⁷ Dekam zep hen Simeonsa Alap mo Enhona anakan gubluka, “Emki Alap mo golak de teksonna iwe tin.” Hwëna Maria ne Yusup ne dekam zep hen Yesussu Alap hap de zertrëblan hap ërti'inzak- Musa mo ola in san de ang ën hap.

²⁸ Simeon dekam zep hëndep walas tola insa zer inki, ki zep dawemna Alap hap golblaka,

²⁹ “Teipsin Zini Bian, angkam Eno asa de gu-guk gwe-blanna mese eiwa de guluda. Ema asa sam tanda. Zep ere hon de babu gwen zini ëe angkam

mesë auhu-kamana ansa de hli yun hup hohle gwenan.

³⁰ Sap angkam ëe mesë ëre mo nwekam hla tanan- ere mo zisi de ngaya tabin hip de Zi zer sonen naye,

³¹ men Desa Ena tingare zi dikim tame tan hap hamal takaye.

³² Zen Zen sa ngatanna golzimdi-tingare zi ausu mo enlalasa dikim ngatan tazimdin hipye.

Hen zen Zëbon onakon sa Israel mo bosena dawem gwer.”*

³³ An-bi zem man tangan lenggwan'ak- Simeon mo ola insa kim zëre nik mo walasna in hap dena sane ë'akye.

³⁴ Simeon ki zep guzimki, “Bian sa ep dawemna golzimdi.” Hen Mariasa ki zep gubirki, “Walas tola an mes Alap dam tasikī- Zen de

Israelk de zisi klis gun hup. Dawem gol gwen wenya, desa Alap zëre hap sa kang gul seblala. Hwëna karek gol gwen wenya, desa hëndep kareknak sa kang gulu. Sap An Alap mo dam tasin Zi, zep sa hen zini beya nik lamang da gwer.*

³⁵ Alap insa kirekam syal gwibi'ira, zini zen dekam sa zëre mae mo enlala aning tanna nërtrë gwer. Hwëna Maria, eno enhonak enlwan yawal sa hen nëbok ben-ben makan tasil.”

³⁶ We sem bogola Hana Bak dekam zao hen gwë'ak. Zen Alap mo hamal hap de olsa de ayang gul gwen hap de we. Zëno biana Panuel-Asyer Bak mo auyan-aza nakorena. Wenya in zi zeban tuju tahun enkam ëk,

³⁷ dekam hwëna sem nik zep zë-en holokam gwë gwëk. Hëndep in kim Yesussu ërtilzik, zëno tahuna dekam 84 enkam. Zen hom tangan Alap mo gola langa gulsuk gwëk. Yaklam denaban kam denaban zen dekon Alapsa isrip-sri gwebla tine gwëk hen gu sonebla tine gwëk-tembane lwa gwen naban.

³⁸ Zen dekam zep hen hatazak, dekam zep Alap hap dawemsa golblak. Hen men zen zë lowe he'ak, dekam zep desa anakan tonbirida'ak, “Walasna an Zen Zen sa jal zi mo irik gin nikon nësa gwiswe sonera.” ‡

³⁹ Yusup ne Maria ne in kim zë Musa mo titi tabin ola insa syal eisi-bik- nonol walas wë tan hap dena, dekam zep etan zëre nik mo ëna Nazaret san dep ërlwahak- Galilea mo langnak dep.*

⁴⁰ Walas tola in ki zep hëndep mam gwe'anka, hen sosonna mam gwebla'ak, hen enlala blala dekam zep tangan mam gwebla'anka. Hen Alap mo kwasang-kwasangna Zëbon lwa gwe'ak.

* **2:32 2:32** Yes. 42:6; 49:6; 52:10; Yoh. 8:12 * **2:34 2:34** Yes. 8:14; 1Kor. 1:23; 1Ptr. 2:7-8 ‡ **2:38 2:38** Yunani olkam Lukas Yerusalemsa de gwiswe sonen hap awe ale gulku. Yerusalem zen Israel mo ë yawal. Zep enlalana awe, tingare Israelsa de gwiswe sonen hap. * **2:39 2:39** Mat. 2:23

Yesus kim Alap mo golak gwëkake:

⁴¹ Tahunna men kiye, Yesus mo ane-biana man yakla yala Paskanak dep Yerusalem san dep yahe gwëk. §

⁴² Yesus mo tahunna kim dua-blas gwëk, ki zep etan kire san dep sek gwëk- men kirekam Israelk de zini ëgwë gwëkke.

⁴³ Kim ëhya gwesik, ki zep etan lwan dahak, hwëna Yesus man Yerusalemk gwëka. Hwëna an-bi zem hom anakan tawa ëblak, "Zen man gwëra."

⁴⁴ Zen zi beya hap tim uk, "Zen hen mes ang gwe zala." Hwëna hom. In kim song ëk, truwe guk gwennak kim kam-en yaing gwëk, dekam zep ohwensiblik. Dekam zep iye zem osan hen wal bose wal zem osan lëblak.

⁴⁵ Hwëna hom hla lak. Ka'an zep kaknak etan Yerusalem san dep olahak- zëwe de lëblan hap.

⁴⁶ Yaklana dan-ahanna kim zep hla lak. Zen Alap mo golak nikin'inka, Alap mo olsa de tawa ta gwibin wenyaka sane tabi'inka, hen man takensibirida gwe'anka.

⁴⁷ Tingare zini men zen sane da gwe'ak, zëno enlala blala man anakan dengguan gwëbla'ak, "Owas, zen en ba hap dam gulsuk gwe'ara?"

⁴⁸ An-bi zem hen man tangan zao de hla lankam lengguanblak. An zem ki zep gubluk, "Temlan, em ba habe kirekam asa gweizimki? Èe bia han ngalap nabanë emsa ahakalblal!"

⁴⁹ Ki zep ding gulbirki, "Em ba habe srën san Asa ahakalblaka? Zen emaka enlala ëka, 'Zen Bi zik mo golak gwë'ara.' "

⁵⁰ Hwëna zen hom zëno ding gulzimdinni insa tame ulblik.

⁵¹ Dekam zep etan Nazaret san dep ang gwizimki, hen dekam man zë betek gwe-gwizimki. Maria kirekam-kirekamna insa tane zikhip dena hlal gwëk, desa enlala ennak lam gul gwëk.

⁵² Yesus kim mam gwe'anka, enlala blala dekam zep hen mam gwëbla'anka. Zen man tangan Alap mo nwenak hen tingare zi mo nwenak oto gwesiki.

3

Baptis ta gwibin zini Yohanis mo ol:

(*Mat. 3:1-12; Mrk. 1:1-8; Yoh. 1:19-28*)

¹ Roma mo teipsin tangan zini Tiberius Bak, zëno irik gin tahunna kim lima-blas gwëk, Alap dekam zep syala Yohanis hip wei yul soneblaka. Dekam men zen Roma mo teipsin tangan zini in mo alp nakon irik nik, Pontius Pilatus Bak dekam Yerusalem mo langnak irik gilki,

Herodes dekam Galileak irik gilki.

Herodes mo ayana Pilipus Bak dekam Itureak hen Trakonitisk irik gilki,

hen Lisaniak Bak dekam Abilenek irik gilki.

² Alap mo golak de syal tan zi mo teipsinni dekam Hanas han Kayafas han. Hwëna dekam zep zi srëm langnak Alap mo ola Zakaria mo tanena Yohanis hon hatak.

³ Yohanis dekam zep Alap onakore olkam Yordan mo lang san kitak titi tabir song gwëka, "Ere mae mo karek-karek nakon em ëhalen. Alap dekam sa eno mae mo karek-karekna tap gulsuzimdi. Em dikim enaka anakan golëtrën hap, 'Èe ama angkam Alapsa ang gwëbla'an,' èe ki asa hwëna emsa baptis tabir."*

§ **2:41 2:41** Paskana zen Yahudi mo olkam enlalana "tamaran." Zen dekam de enlala gwibin hip-in kim Alap mo dam taha nakore zini Israel mo gol-gola tamankake, Mesir mo gol-gol san de tülidan hap. Mesir mo nonol walasna dekam zep juwek. Owasna insa de hlaukum, dekam zep Mesir mo teipsinni Israel mo zi ausu nakore zini insa gubiridaka, "Dikire sek gwëk." (Kel. 12:1-51; Ul. 16:1-8)

* **3:3 3:3** Kis. 13:24-25; 19:4

⁴Yohanis zen orasa de sal tablan hap de zini men zëbe hap Yesaya Bak Alap mo olak hamal hap anakan ale gulblukake,

“Zini sa zi srëm lang nakon taken gwerä,

‘Haen, nère mae mo Teipsin Zi hip nen orasa hamal ta gublun!

Hen nen dam-dam ta gublun!

⁵Tingare dwrak-dwraknak kamasa nen bwang gun,

hen tingare kwatapna betekna hen yawala nen talen- dekam de sësek gwen hap.

Ora gwa-gwana nen dam-dam tasin.

Tung-tungna hen nen sësek tandan.

⁶Tingare auhu-kamanak de zini esa hla lal-

Alap onakore emsa de ngaya tabin hip de Zi niye.’ ”*

⁷Zini beya tangan nik zep Yohanis hon baptis tabin hip yaing gwegwek. Hwëna Yohanis zao zep gubirida gweka, “Em an gwe makare enlalana! Em ema ëenlala gwe'an, ‘Asa de baptis tankam Alap molya asa karek tabirki.’ Hwëna em home ëhale'an. Alap mo jala kon molye ëheya-hya gwek.

⁸Zen in zep, em de Alap mo jala insa goltowen srëm hap, emsa de baptis tan srëmnak em nonol ere mae mo lowehen karekna insa wet gulsun- dekam de emsa anakan tame tabin hip, ‘Zen mes ëhaler.’ Em bahem anakan ëkil gil gwen, ‘Ëe an Abraham mo auyan-aza nakore nakake. Zep asa molya Alap karek tabirki.’ Sap Alap maka eno mae mo weinak dep kaso-kasona ansa Abraham mo auyan-aza hap yang tabi'ira.

⁹Sap Alap mo zer sonen Zini in Zen ano lure nakon hata'an zala, Zen mes hlala hohle gulu- dekam de tesya lu ta gwen hapye. Tenya men zen de eini ëtë srëm gwe'ak, desa sa ausu ennak lu tala, hëndep ki sa tinsik gwen srëm syauk hi-hitinnik yal ta sera.”

¹⁰Zen hwëna man dakensik gweblak, “Ki ëe basa asa syal eibir- ëe dikim Alap mo jala insa goltowen srëm hapye?”

¹¹Anakan zep ding gul gwizimki, “Eno baju de dan nënna, ahana kip em teisyablan- baju srëmna kip. Eno tembane de lwanna, em tahalha wenyä kip kae gwebla-zimdin.”

¹²Roma mo irik ginnik dep de pajak te-ala alal ta gwizimdin hip de zini hen man baptis tabin hip yaing gwe-gwezak. Zen man dakensik gweblak, “Bian, ëe basa asa syal eibir?”

¹³Desa man ding gul gwizimki, “Te-alana bahem mamkam alal ta gwizimdin- aha hlik naka dikim ere mae hap kap ta-in gwen hapye. Diki Roma mo teipsin zini men kire enkam de alal ta gwen hap emsa gubiridaka, zen kire enkam em alal ta gwizimdin.”

¹⁴Jana nabare wenyä man hen dakensik gweblak, “Zep abe mae hap hen banakan? Ëe hen banakan asa syal eibir?”

Yohanis man ding gul gwizimki, “Em bahem jala ban tik-tik ta gwibin- te-alasa dikim alal tazimdin hipye. Hen anakan bahem gubirida gwen, ‘Ëe asa emsa klak tal’- ep dikim te-alasa zerzimdin hipye. Ere en mo te-alakam em lowehe gwen.”

¹⁵Yohanis hon de ësane gwenkam, zep zënaka nenbirida gwe'ak, “Eiwa, nësa de ngaya tabin hip Dinik bae ki hata'an zala! San ha diki an Zen mes yap?”

¹⁶Hwëna ki zep gubiridaka, “Ëe weyakamë emsa baptis ta gwibi'in. Hwëna abon onakon de Teipsin Zini sa hata zala. Ëe dawem naka hom-dekam de Zëbon onak babu gwen mae hapye. Sap zëno tana maesa de ngan sosublun hap, ëe bëjënë. Zen

* 3:6 3:6 Yes. 40:3-5

diki Zen sa Alap mo Enhokam emsa baptis ta gwibiri, hen syaukkum.*

17 Zen joksa zirensi'ira- dekam de lënsa lën hap. Dangnak dena, desa yunak sa bitï tala. Hwëna syaena men zen dang alp san alti'ik, desa tinsin srëm syauk bla san dep sa yal ta sera." †

18 Zen kirekam-kirekam ol zim-zimsi zë mas gul gwizimki- dekam de Alap onakore ol dawem san dep titi tabin hip.

19 Hwëna zen hen Galilea mo teipsinni, Herode'a, damnak anakan jalse gweblaka, "Em bap ere mo oso mo wanya Herodianasa al gulbluka! Hen eno aha karek-karek gulin hala seranna hen beyana!"

20 Hwëna Herodes dekam zep jal gweblaka. Zen dekam zep Alap mo nwenak zëre hap de karekna etan mam gulsuku- Yohanissi kim bwinak tak ta inkiye.

Yohanis kim Yesussu baptis takake:

(Mat. 3:13-17; Mrk. 1:9-11; Luk. 9:35; Yoh. 1:32-34)

21 Hwëna bwinak kim nama day-alsik srëm gwe'ak, zi beyana insa kim baptis tabirida'anka, Yesussu hen dekam zep baptis taka. Yesus kim kon ola gu sone'anka, nglina dekam zep hlang në hanak.

22 Alap mo Enhona dekam zep mawana ohola mo nwe-masekam Zëbon onak dep ati gwe ine zaka. Ngatan zi mo lang nakon dekam zep hen ola anakan wet sohak,

"Em in ère mo Tane- ère mo dang tininak de tanganna. Èe ama tangan Emsa sam gwesik gweblanan."

An Yesus mo auyan-aza aïtbinni:
(Mat. 1:1-17)

23 Yesus kim syala kon gwisibir hana'anka, zëno gwën tahunna san ha tiga-pulukam mes yap. Zini dekam man tim di gwek, "Zëno biana Yusup," zep zëno auyan-aza mo bosem-sena, diki an zen:

Yesus mo auyanna Eli, ‡

24 Eli mo biana Matat, Matat mo biana Lewi, Lewi mo biana Malki, Malki mo biana Yanai, Yanai mo biana Yusup,

25 Yusup mo biana Matica, Matica mo biana Amos, Amos mo biana Nahum, Nahum mo biana Hesli, Hesli mo biana Nagai,

26 Nagai mo biana Maat, Maat mo biana Matica, Matica mo biana Simei, Simei mo biana Yosek, Yosek mo biana Yoda,

27 Yoda mo biana Yohanen, Yohanen mo biana Resa, Resa mo biana Zerubabel, Zerubabel mo biana Sealtiel, Sealtiel mo biana Neri,

28 Neri mo biana Malki, Malki mo biana Adi, Adi mo biana Kosam, Kosam mo biana Elmadam, Elmadam mo biana Er,

29 Er mo biana Yesua, Yesua mo biana Eliezer, Eliezer mo biana Yorim, Yorim mo biana Matat, Matat mo biana Lewi,

30 Lewi mo biana Simeon, Simeon mo biana Yehuda, Yehuda mo biana Yusup, Yusup mo biana Yonam, Yonam mo biana Elyakim,

31 Elyakim mo biana Melea, Melea mo biana Mina, Mina mo biana Matata, Matata mo biana Natan,

* **3:16 3:16** Yohanis mo ola awe srën-srënkam dam nulsuk gwenan. Syauknu, san ha men kirekam nol bol tahannak mawa mo kim èzauk ine gwe'anzak?- in kim Alap mo Enhona nonol tanganna Kristen zisi bi gwibiridakake. (Kis. 2) San ha dam gulsunnu anakan?- "Zen sa ahakon ebe mae hap Alap mo Enhosa hlë ta sone gwizimdi, hwëna ahakon syauknuk sa yal gulse gwer." Dekam enlalana man ayat 17 naban apde në'an. † **3:17 3:17** Yohanis gandum nuban nyiru naban ol gulk sun blaonzimkim gubiridaka. Zëno enlalana apdenak- lënsa de lën hap hen joksa de zirensin nibanye. ‡ **3:23 3:23** Yesus mo auyan-aza aïtbinni ansa srën-srënkam dam nulsuk gwenan. San ha Lukas Maria mo auyan-azasa ale gulku? San ha Yusup moka? Sap bosem-sena hom apde në'an- Matius mo ale naban. (Mat. 1:1-17)

Natan mo biana Daud,
³² Daud mo biana Isai,
 Isai mo biana Obed, Obed mo biana
 Boas,
 Boas mo biana Salmon, Salmon mo
 biana Nahason,
³³ Nahason mo biana Aminadab,
 Aminadab mo biana Admin, Admin
 mo biana Arni,
 Arni mo biana Hezron, Hezron mo
 biana Peres,
 Peres mo biana Yehuda,
³⁴ Yehuda mo biana Yakob,
 Yakob mo biana Isak, Isak mo biana
 Abraham,
 Abraham mo biana Tera, Tera mo
 biana Nahor,
³⁵ Nahor mo biana Serug, Serug mo
 biana Rehu,
 Rehu mo biana Peleg, Peleg mo
 biana Eber,
 Eber mo biana Salmon,
³⁶ Salmon mo biana Kenan,
 Kenan mo biana Arpaksad, Arpak-
 sad mo biana Sem,
 Sem mo biana Nuh, Nuh mo biana
 Lamek,
³⁷ Lamek mo biana Metusalah,
 Metusalah mo biana Hanok, Hanok
 mo biana Yared,
 Yared mo biana Mahalalel,
 Mahalalel mo biana Kenan,
³⁸ Kenan mo biana Enos,
 Enos mo biana Set, Set mo biana
 Adam,
 hen Adam mo biana Alap.

4

*Yesussu kim dowal mo kigina
 akasiblikake:*

(Mat. 4:1-11; Mrk. 1:12-13)

¹ Yesus in kim Yordan kon lwahal
 zaka, Alap mo Enhona dekam mes bi
 gweblaka. Dekam zep zi srëm lang
 san dep zersong gweka.

² Zëwe zep dowal mo kigina
 akasik gwebla zaka- hëndep orapna
 man empat-pulu gwek. In kim
 zë gwë gweka, Zen tembanesa lwa
 gweka. Hëndep aumwa hap denak
 usakna mes sabak gweka.

* **4:4 4:4** Buku Ulangan nakore ayatna in mo ayang gunnu: "Hwëna tïngare Alap mo ola mensa
 ësane gwe-gwenan, zen dekon hen ki lowehe gwenan." (Ul. 8:3; Mat. 4:4) * **4:8 4:8** Ul. 6:13-14

* **4:11 4:11** Mzm. 91:11-12 * **4:12 4:12** Ul. 6:16; Kel. 17:1-7

³ Zao zep dowal mo kigina in
 gublu zaka, "Em san Alap mo Tanesa
 hom?- zebe usak naban gwë'araye.
 Kasona ansa emki gubin- roti hap de
 jowen hap."

⁴ Yesus ki zep hwëna ding gul-
 bluka, "Alap mo olak man lwak,
 'Zini tembane en nakon hom
 lowehe gwenan.' " *

⁵ Dowal mo kigina in ki zep
 kon kwatap yawal san dep zer-
 song gweka, ki zep tïngare auhu-
 kamanak de irik ginni ansa
 hluwesik kïnzinnak goltrëblaka.

⁶⁻⁷ Ki zep gubluka, "Alap mes
 tïngare irik ginni insa abe hap
 golblaka, hen zëwe de kire-kire
 dawemna hëndep kitak- ëe de
 hwëna ahana kip golblan hap,
 mensa Aena enlala gwebla'akye.
 Hwëna eme bokle kom soblan na-
 ban asa boltere ta'anaka, ki ebe hap
 asa kitak golblal."

⁸ Yesus ki zep ding gulbluka, "Alap
 mo olak man lwak,
 'Bian Alap ansa em boklena kom so
 gweblan,
 hen Desa en em blikip gwesik gwe-
 blan.' " *

⁹ Hwëna ki zep kon etan owaskam
 Yerusalem san zersong gweka, Alap
 mo gol bolak zep drëne seka. Ki zep
 zë gubluka, "Em san Alap mo Tanesa
 hom?- ki emki heya gwe inen.

¹⁰ Sap Alap mo olak ebe hap dena
 anakan lwak,

'Alap zëre mo dam taha nakore
 wenyaka sa emsa de dawem
 enkam kara ta gwen hap gu-
 biridala.

¹¹ Zëno mae mo taha tere san esa
 tëndä gwera, zep em molye ba
 karek maena goltoweka.*

Zep em san ema Alap mo ola insa
 taibli'ira? Ki emki heya gwe
 inen."

¹² Yesus ki zep ding gulbluka,
 "Alap mo olak man hen ale nuk,

'Bian Alapsa totoresahem anakare hap akasiblin, "Wëhë asa mas gwebla'anaka?"' " "*

¹³ Dowal mo kigina in kim akasik gweblanna hya gwesiblika, ki zep zë hli taka, hwëna dekam zep etan de akasiblin hap eissiblika.*

Yesus kim Galileak syala kon gwisibir hanakake:

(*Mat. 4:12-17; Mrk. 1:14-15*)

¹⁴ Yesus ki zep langna Galilea san dep lwa halka, hen Alap mo Enho nakore sosonna Zëbon lwa gwek, hëndep ki zep zëbe hap de ola tingare ë-ë san ëtawa gwendak.

¹⁵ Zen dekam zep but srëm gol-gol san tawa tabirida gweka. Tingare zini man nen gweblak, "Zini in dawem tanganna."

Yesusu kim Nazaret kon baes nëblakke:

(*Mat. 13:53-58; Mrk. 6:1-6*)

¹⁶ Yesus ki zep etan Nazaret san dep lwa halka- men zëwe Zëna mam gwekake. Hari Sabatkam ki zep but srëm gol san dep song gweka- men kirekam Zëna gwë gwekake. † Ki zep zë Desa dam dasik- Zen de ngein nikon Alap mo olsa baca gulzimdin hip.

¹⁷ Alap mo ol ayang gul gwen zini Yesaya Bak mo ol tataksa zep nolblak, ki zep er gulsuku, hëndep hlauku- men desa baca gulzimdin hip dwam gwibirkike. Ki zep hëndep anakan baca gulzimki,

¹⁸ "Bian mo Enhona man asa bi gweblaka,

sap Zen mes asa dam tasiki- ol dawemsa de tahalha wenyahem kip gol gwizimdin hip,

hen bwinak de wenyaka dikim anakan tonbirida gwen hap, 'Bian sa emsa gwis gwe sonera,'

hen zi nwe dimin dikim nwe nik ëkara gwen hap,

jap gul sonen wenyik dikim luk tan hap,

¹⁹ hen ol dawemna ansa dikim anakan tonbirida gwen hap, 'Angkam mes hatanan- Bian de nësa dawem gun hup de naye.' " "*

²⁰ Yesus ki zep etan bukuna insa obon gul kinika, ki zep etan, men zen zëwe syal gwe-gweka, zëbe hap golblaka. Zëna ki zep nikin aneka. Dekam tingare zini nwna Zëbon en lwazim'inka- dekam de dawem enkam zëno tawa tabinni insa ësane gwen hap. ‡

²¹ Zen dekam zep gubiridaka, "Alap mo ola insa ësane gwenan mes ki abe hap dakastilblinan."

²² Zen man zënaka don sonebirida gwe'ak, "O zëno ola dawem tanganna, hen zini in dawem tanganna." Dekam zep tenggwanblan hap ëguk, "O san ha man zënaka kil ti'ara, 'Ëe an Alap mo dam tasin zi?' An Yusup mo tane sake!"

²³ Hwëna Yesus mes zëno mae mo enlalana tame tazimki, ki zep gubiridaka, "Ëe tawana: Ëpba gulk sun de ol blaoranna em anakan esa Asa enblal, 'Eme eiwa dokter gwe'anam, ere mo timni emaka dawem gu'ura.' Zep esa Asa anakan jakal ëblal, 'Ëe an ere mo tim makan am lowe he'an. Bahem asa da tasibin.' Zep anakan esa Asa en gweblal, 'Ëe ama ësak- em Kapernaumk owasowassae syal gwe-gwibir-zimki. Aha zi mo lang ennak bahem kirekam syal gwe-gwibin. Diki ere mo ëna awe em hen ap syal gwe-gwibir-zimdin.'

²⁴ Hwëna Ëe eiwa denakaë emsa gubirida'an: Zini hom zëre kore wal de Alap mo olsa ayang gul gwizimdin hip de zini nasal gweblanan. Zep em molye Asa asal gweblak.

²⁵ Emki ësan: Alap mo ol ayang gul gwen zini Elia Bak hen kirekam

* **4:13 4:13** Ibr. 2:18; 4:15 † **4:16 4:16** Yahudi mo Hari Sabatna, Jumat mo yakla dum gwehen nakon naït gwibik, hëndep Sabtu mo yakla dum gwe hennak zaasuk gwek. * **4:19 4:19** Yes. 61:1-2 ‡ **4:20 4:20** Yesus mae hap nikin aneka: Sap Yahudi zini nikirinkim but srëm golak srip nulsuk gwizimk. In zep Zëbon en nwna lwazim'inka.

gwëka. Zen kim gwë gwëka, ona hom il ti gwëka- holona tahunna dan-ahan, ahana ngirin ngam sonnak zauk. Tingare Israel mo langna dekam sasan gwëk, dekam zep mamkam ëusak gwëk. Dekam we wal sem-semna beya tangan nik Israelk awe ëtahalha gwëk.*

26 Hwëna Alap hom Eliasa zer soneka- awe de aha we sem maesa de mas gwibin hip. Hwëna aha zi mo langnak Sarfat de we sem san dep zer soneka- Sidon mo langnak.

27 Hen kirekam- Alap mo ol ayang gul gwen zini Elisa Bak kim gwëkaye. Dekam Israelk awe de zini beya nik sop sang-sang karek naban nollwa gwëk, hwëna hom aha-en mae dawem taka. Hwëna aha zi ausu nakore wal ensa dawem taka- Siria walya Naaman Bak ensa.**

28 Kim anakan zëno ola kon dam nulsuk, "Zen molya nèbe mae hap owasna syal gwibir-zimki," dekam zep but srëm golak de zini in sërkam jal nèblak.

29 Dekam zep luk tak, ki zep hëndep Yesussu ëna in kon irik ta hankam nërwet sok. Ëna in kwat-apnak, in zep li san de ak tasik irin hip irik da ha'ak.

30 Hwëna Yesus ki zep zëno mae mo ngirin kles san song gwëka.

Yesus kim zi nikon dowala zersa sonekake:

(Mrk. 1:21-28)

31 Ki zep Yesus tineka Galilea mo langnak de ëna Kapernaum sun dep. Hari Sabatkam zao zep tawa tabirki.

32 In desa tawa tabi'inka, man tangan dengganbla'ak. Sap zëno ola sason tanganna- san de teipsin zi mo tawa tabinni kiye.

33 But srëm golak iwe zini hen ki gwë'anka- dowal mo bi gwë-blanna. Zen ki zep mam enkam hërhe hanaka,

34 "Wëo, Nazaret walya Yesus! Em aban mae ba olsa de ëtoran hap? Em san asa de tameran habe hata

zala? Ëe mesë emsa tame tal! Em in Alap mo zer sonen Zi Lalakna."

35 Yesus ki zep zëbon de dowala insa jala ban gubluka, "Balkkam! Zini in kon em wet son!" Dowala in dekam zep zini insa zëno mae mo ngirinnik zerheir guk halka. Hëndep sang-sang maena hom hli yulbluka.

36 Tingare zini sërkam tangan dengganbla, dekam zep zënaka donbirida nasen'ak, "Ha! Zëno ola wehasa hom- sason tanganna, san de teipsin zi mo ola kiye! Zëno dowal-dowalsa de golëalsa sonna, hëndep dekam de wet so gwenkam!"

37 Hëndep dekam zep nabakam Yesus hup de ola tingare zëwe de langna in san nol haladak.

Yesus kim zi beyam-byana dawem tabirkike:

(Mat. 8:14-17; Mrk. 1:29-34)

38 Yesus kim but srëm gola in kon wet soka, ki zep Simon mo golak golëbiti gwëka. Simon mo we marena man sërkam ewek, zep Yesussu dawem gun hup abe dak.

39 Tum alp nakon zep zau'un zaka, dekon zep ewenna insa gubirki, "Wenya ansa em hli yun." Ewenna in dekam zep tapbla guk-Simon mo marena insa. Dekam zep hëndep luwek, hen tembanekam mas gwibiridak.

40 Hwëna yaklana kim dum gwe heka, dekam zep Yesus hon dep kitak men zen kirekam-kirekam sang-sang naban nolgwëk desa nolëyaing gwezak. Yesus ki zep tahasa de tehabirida ane gwenkam kitak dawem tabirki.

41 Hen dowal-dowala dekam zep zini in kon anakare hërhen naban wet so gwe-gwe'ak, "Em in Alap mo Tane!"

Hwëna Yesus ki zep jala ban jalse gwibiridaka, ki zep zë hëndep ol srëm tabirki. Sap zen mes tame dak, "An Zen- Alap mo dam tasin Zi niye, zisi de ngaya tabin hip Denaye."

* 4:25 4:25 1Raj. 17:1-18:1 * 4:27 4:27 2Raj. 5:1-15

Yesus kim tawa tabir song gwekake:

(Mrk. 1:35-39)

⁴² Yaklana kim hata se'an zaka, Yesus ki zep ëna insa hli taka, dekam zep zi srëm san dep song gweka. Kim nohwensiblik, dekam zep hëndep dëblak, hëndep ki zep hla dak. Zao zep desa de hli yuludan srëm hap nërtonk.

⁴³ Ki zep hwëna ding gulzimki, "Alap Zën de tingan irik gïlzin hap de ol dawemna an, zen tïngare ë-ë san de tawa tabirida gwen hap dena. Asa Zen kire hap zer soneka."

⁴⁴ Yesus dekam zep hwëna tïngare Yahudi mo langnak de but srëm golgol san tawa tabir song gweka.

5

Yesus kim nonol tanganna zëre hon de ang ta gwen wenya tagal gulkuke:

(Mat. 4:18-22; Mrk. 1:16-20)

¹ Aha yaklanak kim zauk, Yesus Ho Gutuna Galilea mo alpnak zau'unka. * Zi beyana ki zep zë dot dasik- Alap mo olsa dikim ësane gwen hap.

² Yesus ki zep zëwe hisglimnik bul darena akeka, hwëna buluk iwe de syal ta gwen wenya in mes atiti gwek. Zëre mae mo jaringnik men zen desyana ëtëhekke, desa kap dasi'ik.

³ Yesus ki zep aha buluk sewe seka- Simon mo buluk. Ki zep gulbuka, "Simon, bulu ansa em ata gun- engka en deka esek gwehak. Man asa dot dasi'in." Bul mwanak zep Yesus nikinki, dekon zep zi beyana insa tawa tabirki- men zen ho alp san teinikin sonekye.

⁴ Kim tawa tasibirki, Zën hom bulu in kon ati gweka, hwëna ki zep Simonsa gulbuka, "Emki tatek san dep golsong gwen. Em jaringnsi ahakore naban zitol sonen-hogwesa ekakim lahyok."

⁵ Simon ki zep ding gulbuka, "Bian, kam blal ëe ama syal ta tiner, hwëna hogwe maena homë balk ul. Hwëna mese ki asa gulbunda, ëe asa ki etan otol soner."

⁶ Kim notol sonek, beya en tangankam zep ëtëhek, hëndep jaringni in kalk-kalk gwen hap alp gwesik.

⁷ Dekam zep aha buluk de wenya kip tahana walap nulsubirida gwe'ak- zen de mas gwibiridazan hap. Kim yaïng gwezak, dekam zep apdekam nul inek. Bul darena insa kim hogwena inkam bitï dazimk, hëndep man su nek, hëndep keing nën hap alp neisi'ik.

⁸ Simon Petrus kim kirekam hlaulku, ki zep Yesus mo nwenak utuk gwehe zaka, ki zep kon gu seblaka, "Asa hli ta, Bian, sap ëe an kirekam-kirekam karek naban."

⁹ Simon in mae hap ki gulbuka, sap zen hen tïngare wal bose wal zeban man sërkam denggwablak- insa kirekam beya tangankam dahyokke.

¹⁰ Hen kirekam- Simon mo syal bosena, Zebedeus mo walas darena Yakobus ne Yohanis ne.

Yesus ki zep Simon maesa gubiridaka, "Bahem ëairin. Angkam hwëna zisi esa lahyo gwer."

¹¹ Ki zep bulu insa hisglim sin dep ata nosok, zao zep hëndep tingan hli dandak. Hwëna Yesusu zep kon ang nëblak.

Yesus kim sop sang-sang karek nabare zini dawem takake:

(Mat. 8:1-4; Mrk. 1:40-45)

¹² Aha yaklanak Yesus man aha ënak gwë'anka. Zao zini ki- sop sang-sang karek de tïngare tim sin hla tanna. Zini in kim Yesusu hla taka, ki zep zëno nwenak ik gwehe zaka, dekon zep abe ta seka, "Bian, Eme dwam gwe'anam, Em emaka asa dawem ta'ara."

* **5:1 5:1** Lukas Ho Gutuna Galilea mo aha bosekam ale gulku- "Genesaret" kam. Ho gutunak de ëna hen ki "Genesaret" kam de bose naye- ho gutuna in mo yakla dum gwehen san dekam.

13 Yesus ki zep towanblan naban ding gulbluka, † “Ēe ama dwam gwe'an. Em dawem gwen!” Dekam zep hēndep sop sang-sang karekna in hli tak.

14 Zao zep gubluka, “Insa emsa dawem tanan, bahem mae ahasa tonbiridan. Diki nonol Alap mo golak de syal tan zi hip ahana kip enaka zertrēbla. Zao gublu, ‘Emki asa hla tan. Ēe san ha mesē dawem gwer?’ Musa Bak mo titi tabin olak men kirekam sop sang-sang karek zi de dawem gwennak dep dena lwakke, zen kirekam em syal gwibin. Zen dekam sa tingan emsa anakan tame dal, ‘Zen eiwa mes tangan dawem gweka.’ ”*

15 Sap man Yesus tonbiridan hap jalse gwibirida gweka, hwēna zēre hap de ola man etan langa gwesik haladak. Ki zep zini etan beya tangan nik yaing gwe-gwezak- sane tan hap, hen sang-sang nakon de dawem ta gwibin hip.

16 Yesus dekam otan-otankam zi srēm san dep song gwe-gweka- dekon de zē-ere nakon Biansa gu sone gweblan hap.

Yesus kim taha-tana teisya inen srēm zi sang-sangna dawem takake: (Mat. 9:1-8; Mrk. 2:1-12)

17 Aha yaklakam, Yesus man zi beyasa tawa tabi'inka. Hwēna Farisikam de gubirida gwen zi niban, Musa mo titi tabin olsa de tawa ta gwibin hip de zi niban zao hen lowe he'ak. ‡ Zen tingingare ē-ē nakon mes ētagal gwek- Galilea mo lang nakon, hen tingingare Yerusalem mo lang nakon. Dekam Bian onakore sosonna, zi sang-sangsa dikim dawem ta gwibin hip dena, Yesus hon lwa'ak.

18 Dekam zep hen taha-tana teisya ine gwen srēm zi sang-sangna berya ban neiren halzak. Zen sap Yesus osan dep nēr halzak,

19 hwēna ba san dep?- Zēbon osan dep de zertilzin naye. Sap zini mes tangan kyang gwesik. Gol bol san zep nērsewek, dekon zep dre dasik anehak, desan zep berya ban Yesus osan dep nēr dwanuk.

20 Yesus kim anakan tame tabirki, “Eiwa, zen man tangan Asa daīblībla'an,” ki zep zi sang-sangna insa gubluka, “Tane tol, eno karek-karekna mesē ep tap gulsublunan.”

21 Musa mo olsa de tawa ta gwibin zi niban Farisikam de gubirida gwen zi niban enlala ennak zep anakan donsblu'ak, “Zini an zēno ola boltebolte tanganna! Zen bap kirekam Alapsa lamang tanda! Zi bējen zi bose zik mo karek-karekna tap gulsublun. Diki Bian Alap bap.”

22 Hwēna Yesus mes zēno mae mo enlalana insa tame tazimki, dekam zep gubiridaka, “Em bap kirekam enlala ennak Asa lonsblu'an!

23 Em ema ano ola husus eibir-anakan insa gublulye, ‘Eno karek-karekna mesē ep tap gulsublunan.’ Hwēna anakan de gublunkam, ‘Em luwen, hēndep song gwe,’ san esa hen etan husus eibir? Sap olgun darena in apdenak- Alap mo sosonkam de gublun ol.

24 Hwēna angkam Ēe ama ebe mae hap goltreizim'in- em dikim Asa anakan tame tan hap, ‘Alap mes ki ngatan zi mo lang nakore Zi Tanganna abe hap sosonna golblaka-okamanak awe dikim zi mo karek-kareksa tap gulsuk gwizimdin hip

† 5:13 5:13 Musa mo titi tabin olak, sop sang-sang karek zini bējen ēnak gwēn, hen but srēm golak bējen tīn, hen aha zi bējen desa golek de tan, ahaksa towanblan. Hwēna ayatnak awe Yesus man towanblaka. * 5:14 5:14 Im. 14:1-32 ‡ 5:17 5:17 Farisikam de gubirida gwen zini, zen Yahudi zi mo aha hlikna, hen zen Yahudi mo auyan-aza mo jalse gwen olsa anakan tatete nul gwek, “Bahem gulmurun.” Zen hen man anakan ēbolamda gwe-gwek, “Ēe en ama dawemkam Alap hon ētal gwesī'in.” Zep zen hen man Yesussu baes nēblak- kim anakan hla dak, “Desa beyakam ang nēbla'an.” Sap Yesus Zen Farisi walsya hom.

denaye.' " § Ki zep hwëna etan zi sang-sangna insa gubluka, "Ëe ama emsa gublu'an: Em luwen. Ere mo berya insa teisya, ki gol san song gwe."

²⁵ Hëndep ki zep zëno mae mo nwenak luweka, berya insa man einki, ki zep song gweka. Dekam Alapsa man isrip-sri gwebla song gweka.

²⁶ Tingare zini sërkam ëtenggwank, dekam zep Alap mo bosena teip nulsuk gwebla'ak, hen aïrïn nïban ëgu gwe'ak, "Namen eiwa owas hap ki kirekam lwanan!"

Yesus kim Lewisa kwang ta kinikake:

(Mat. 9:9-13; Mrk. 2:13-17)

²⁷ Yesus kim hyanak gola in kon wet so zaka, dekam zep Roma mo irik ginnik dep de pajak te-ala alal ta gwizimdin hip de zini hla ta'anka, bosena Lewi. Zen zëre mo syal gwe-gwen teksonnak nikin'inka. Yesus ki zep zë gublu zaka, "Haen. Asa em ang gweblan."

²⁸ Lewi ki zep hëndep luweka, zao zep zëre mo teksonnak de kire-kirena tingan hli tan daka, ki zep Yesusu ang gweblaka. *

²⁹ Dekam zep Lewi zëre mo golak tembane yawalsa golzimki- zao de Yesusu zertreizimdin hip. Zini beya tangan nik yaïng gwezak. Ahakore pajak te-ala alal tanda gwen zini man hen yaïng gwezak.

³⁰ Farisikam de gubirida gwen zini man zë hen hla nulidazak. Zen ë-en nakon ëzau'uk. Hom bitï gwek. Ahakore Farisikam de zini in, Musa mo titï tabin olsa de tawa tabin hip dena. Zen Yesus hon de ang ta gwen wenyaka anakan jal

neibirida'ak, "Em ba hap tangan tembane tal- pajak te-ala alal tanda gwen zi nibanye, hen aha zi enlala karek-karek naban! Zen in kwae nabanke!"

³¹ Yesus ki zep ding gulzimki, "Zini, sang-sang srëm wenyä, zen hom doktersa dwam në gweblanan. Zen diki zi sang-sang en dwam në gweblanan.

³² Ëe an dokter makanë hatazak-zi enlala karek-kareksa de dawem san dep kwang guludan hap, zen dekakim ehalek. Hwëna men zen zënaka tim di gwibirin, 'Ëe an dawem-dawemna,' Ëe desa de kwang guludan hap homë hatazak."

Mae hap de ol: Yesus hon de ang ta gwen wenyä kire hap tembanena ëlwa srëm gwek.

(Mat. 9:14-17; Mrk. 2:18-22)

³³ Zini ki zep Yesusu dakensiblik, "Yohanis hon de ang ta gwen wenyä zen etan-etankam tembanesa ëlwa gwenan- Biansa dikim enlala zon tasiblin naban abe ta gwen hapye. Farisikam de gubirida gwen wenyä hen kirekam. Hwëna ebon de ang ta gwen wenyä, zen hwëna tembanena sërkam dwenblanda gwenan, hen hona notdeblanda gwenan."

³⁴ Yesus ki zep ding gulzimki, "Abon de ang ta gwen wenyä kip man dakastilzim'in- an kirekam tembanesa de ëlwan srëmkam lowehe gwe'anye. Sap zen angkam teipsin zisi de zergwën makan Asa nërgwë gwe'an. †

³⁵ Hwëna jal zini kim de Asa jek-jak da'ak, Abon de ang ta gwen wenyä dekam molya tembane tak. Embwan hap sa baes tal."

§ **5:24 5:24** Yesus kim okamanak gwë gweka, Zen man Zënaka "Anak Manusia" kam gu gweblaka. Hwëna walaskam de enlalana zëwe hom. Ibrani olkam zëno enlalana "zi tangan." Yesus mae hap kirekam Zënaka bose taka: Sap Zen man enlala gweka- mensa Daniel Bak zëbe hap dena hamal hap Dan. 7:13-14nak ale gulkuke. Sap Daniel man nwe nik de lirisin nëblankam "zi tangan" makan Yesusu ngatan zi mo langnak hla ta seka- Alap kim Desa Zen de kitak teipsibiridan hap gublukake.

* **5:28 5:28** Lewi mo aha bosena Matius. † **5:34 5:34** Mensa ayat 34 naban 35 naban "teipsin zisi de zergwën" kam awe li nul sonek, Yesus gulk sun de ol blaorankam "we ëse gon zisi de iye zik zergwën" kam aïsïl gwibiridaka. Dam gulsunnu apdenak: Zen dekam bëjen tembane srëmkam lowehen.

³⁶ Etan ki zep kire hap gulk sun de ol blaonzimdinni dan mas sozimki, "Baju esena bejen kalk so irin- baju epba kalknak de yal irin hipye. Zini hom kirekam nei gwizimnin, sap zen dekam de hwena baju esena insa kalk son, hen epba weny in han ese kalk naban bejen nadakastin.

³⁷ Hen kirekam, anggur ho esesa bejen kambing sopkam de botol epbanak yuren. Kirekam hom dakasti'in. Sap anggur ho esesa de kambing sop botol epbanak yurenkam, anggur hona in kim de nopna tail gi'ik, kambing sopkam de botola in dekam sa kalk ner. Anggur hona in dekam sa hen hlweher.

³⁸ Anggur ho esena zen diki kambing sop botol esenak de yurenkam dakasti'in. Zep hen kirekam, Abon de ang ta gwen wenyik de etan epba lowehen san abarenak ang tan hap hom dakasti'in."

³⁹ Aumwa hap ki zep etan gulk sun ola blaonzimki: "Zi de anggur epbasa otdenna, zen bejen esena dwam gwibin. Zen sa gulu, 'Epba weny, zen zen- dawem tangan wenyaye. Zen zen tangan abe hap sam gwesibli'an.'"

6

Yesus kim Hari Sabat hap dena anakan gubiridakake, "Diki Ee an Zen tangan- Hari Sabat mo Nolaye." (Mat. 12:1-8; Mrk. 2:23-28)

¹ Aha Hari Sabatnak kim zauk-Israelk de zi mo syal tan srēm yaklanak, Yesus ki zep gandum tra san golētaman gwe'anka. Hwena zere hon de ang ta gwen weny zen gandum dansa kilk di-in kinī gwe'ak, ki zep tahakam legek da gwibi'ik-dekam de sop nik ebatralhen hap, ki zep dwenblandak.*

² Farisikam de zini kim hla nuli-dak, ki zep jalse neibiridak, "Em ba habe Musa mo titi tabin ola ngip

u'in? Kirekam em ema hwena Hari Sabatnak syal ta'an!"

³ Yesus ki zep hwena ding gulzimki, "Em bawalkam esa Alap mo ola an mo eini dam ulsul?- men kim Daud Bak zere hon de ang ta gwen weny ban golēusak gwe'ankaye.

⁴ Zen kim Alap mo golak til zika, zen dekam Alap hap de roti loneblansa gol kinika. Desa zep zere hon de ang ta gwen weny ban zitwinbir song gweka. Hwena sap neno mae mo titi tabin olak man lwak: Sap Daud zena hen zebon de ang ta gwen weny, zen bejen Alap hap de rotina insa twinbin. Zen diki Alap mo golak de syal ta gwen zi en dwin gwibirin. Sap eiwa kirekam, hwena Daud hom Alap mo nwenak karek gweka- zen kim usak hap zitwinbirkiye. Zep hen kirekam, Abon de ang ta gwen weny an kim usak hap kilk di-in kinzil, zen hom ekarek gwer."*

⁵ Ki zep Yesus waulsuzimki, "Ngatan zi mo lang nakore Zi Tanganna, Ee an Zen tangan- Hari Sabat mo Nolaye. Zep anakarekam de klis gul gwizimdin hip dena, 'Desa sap esa Hari Sabatnak syal eibir,' ahaksa, 'Kirekam bahem,' zen ano dena."

Yesus kim zi taha sakna Hari Sabatkam dawem takake:

(Mat. 12:9-14; Mrk. 3:1-6)

⁶ Aha Hari Sabatnak kim hatak, Yesus dekam etan but srēm golak tawa tabirki. Hwena zao zini ki. Dam taha nik sak gweblaka.

⁷ Hwena Musa mo titi tabin olsa de tawa ta gwibin hip de zi niban Farisikam de gubirida gwen zi niban man Yesus mo kareksa de hlaublun hap ealp gwe'ak. Zep kara da'ak, "Zen wehe neno mae mo syal tan srēm yaklana an hap dena ngip gu'unka- zisi de dawem tankamye?"

⁸ Hwena Yesus mes zeno mae mo enlalana tame tazimki, ki zep

* **6:1 6:1** Musa Bak sap hom jalse gwibiridaka- gandum dansa de kilk ti-in kinin hapye. Zen diki anakare enkam jalse gwibiridaka, "Ere mo gandum tranak bahem Hari Sabatkam syal ta gwen." (Ul. 23:25) * **6:4 6:4** 1Sam. 21:1-6; Im. 24:9

hëndep zini in zen tahana sak gwe-blaka desa gubluka, "Haen, ano mae mo dang gwënna a dekon emki zauzun."

Zini in dekam zep zë zau zuka.

⁹ Ki zep Yesus takensibiridaka, "Musa mo titi tabin olak, nen basa de Hari Sabatkam gol gwen? Hari Sabatkam san ha nen kareksa zi hip gol gwizimdin? San ha dawemsa nen gol gwizimdin? Hari Sabatkam san ha nen zisi ngaya ta gwibin? San ha nen tamera gwen?"

¹⁰ Yesus ki zep tingan nwekam amjanbirki, ki zep hwëna zi taha sakna insa gubluka, "Tahana insa emki inin gilsin."

Ki zep hëndep inin gilsiki, dekam zep hëndep tahana in etan dawem gweblak.

¹¹ Hwëna Musa mo titi tabin olsa de tawa ta gwibin zini Farisikam de zi niban man tangan Yesusu daïl gibli'ak. Dekam zep enlalasa dëbla'ak, "An banakan esa ëblal?"

Yesus kim zini dua-blas enkam zëre hon de ang ta gwen hap dam tasibirkiye:

(Mat. 10:1-4; Mrk. 3:13-19)

¹² Zao kim lwa se'ak, Yesus ki zep kwatap tekna hata seka, dekon zep kam blal Alapsa gu sone gwebla'anka.

¹³ Kim litik, ki zep zëre hon men zen beyakam ang ta gwëk, desa gu sonebiridaka, zao zep hwëna dua-blas enkam dam tasibirkiye- zen de zëre mo olsa gol halada gwen hap.

¹⁴ Ahana Simon- men desa hen Yesus "Petrus" kum bose takake,

hen oso zem, Andreas.

Ahana Yakobus, Yohanis,

Pilipus, Bartolomeus,

¹⁵ Matius, Tomas,

hen Alpeus mo tanena Yakobus,

hen Simon- men zen nonol Israel dikim Roma mo irik gin nikon ëzë-en gwen hap de ësas gwënnak ang gwëkake.

¹⁶ Ahana Yakobus mo tanena Yudas,

hen aha zini Yudas- ëna Kariot wal. Zen men zen hëndep Yesusu zergukuke.

Yesus kim zini tawa tabirkiye hen dawem tabirkiye:

(Mat. 4:23-25)

¹⁷ Yesus ki zep dua-blaskam de zini in han etan golëhut gwehe tinjaka, ki zep hëndep sëseknak golëzau zuka. Zëre hon de ang ta gwen wënya aha hlikna zëwe beya nik ëtagal gwe'ak, hen ahakore zini beya tangan nik mes yaing gwezak-sap Yerusalem kon, hen tïngare Yahudi mo lang nakon, hëndep hi alpnak de ë darena Tirus hen Sidon kon.

¹⁸ Zen Yesusu de sane tan hap hen zëre mae mo sang-sang nakon dikim ëdawem gwen hap yaing gwezak. Dowal mo tilbiritan wënya dekam zep ëdawem gwëk.

¹⁹ Dekam tïngare zini man sap Yesusu de olk tan hap ëakasik gwe'ak. Sap zëno tim nikon man sosonna wet so gwe'ak, zep zi sang-sangna dekam kitak ëdawem gwëgwe'ak.

Anakare hap de ol: "Enda zen sa hë'ho gwibinni nulin? Hen enda zen sa karekna nulin?"

(Mat. 5:1-12)

²⁰ Yesus ki zep zi beyana in zen zëre hon ang ta gwëk karatda tabi'inka, ki zep zë gubiritidaka,

"Tahalha wënya,

hë'ho gwrbinni ebon mae onak lwa'an,

sap em makare zini, zen zen Alap mo irik ginni bi neibi'in.

²¹ Angkam em in zene usak naban lowe he'an,

hë'ho gwibinni ebon mae onak lwa'an,

sap em esa lamkam ëitri gwer.

Angkam em in zene go naban lowe he'an,

hë'ho gwibinni ebon mae onak lwa'an,

sap em esa lamkam ënga-ngol gwer.*

* 6:21 6:21 Why. 7:16-17; Mzm. 126:5-6; Yes. 61:3

- 22 Hen emsa kim ngatan zi mo lang nakore Zi Tanganna abe hap de jal hap daïl gïbirida gwe'ak, hen baes neibirida gwe'ak, hen lamang da gwibi'ik, ahaksa bosena gwa-tek gwa-tek da gwibi'ik, dekam hë'ho gwibinni ebon mae onak mamkam lwa'an.*
- 23 Kirekam de emsa gweibirida gwenna, em dekam isrip-sri naban étasya gwek, sap ebe mae hap de dawemna ngatan zi mo langnak yawal tangan nik lwazim'in. Sap zini men zen angkam emsa kirekam neibirida gwe'an, auyan-aza zem hen kirekam orep Alap mo olsa de ayang gul gwen hap de zini neibirida gwek.
- 24 “Hwëna kwasang tol, em in zene angkam
te-ala naban lowehe gwe'an,
em ëngalap gwen,
sap eno hë'ho gwibinni mes lwak.
- 25 Kwasang tol, em in zene angkam
ïtri naban lowehe gwe'an,
em ëngalap gwen,
sap em in zen esa lamkam ëusak gwer.
Kwasang tol, em in zene angkam
nga-ngola ban lowehe gwe'an,
em ëngalap gwen,
sap em in zen esa lamkam gona ta tine gwer.
- 26 Kwasang tol, em in zene angkam
bose dawem naban lowehe gwe'an,
em ëngalap gwen.
Zini men zen angkam eno bosena nurensi'in, auyan-aza zem kirekam hen orep yasik tabin hip de zi mo bosem-sena nurensik gwizimk, men zen dekam anakan ëboton gwe-gwek, ‘Ëe an Alap mo olsa de ebe mae hap ayang gul gwizimdin hip de zi.’ ”

Ere mo jal zi hip de kwasangsa gol gwizimdin hip de ol:

(Mat. 5:38-48; 7:12a)

27 “Hwëna angkam em an zene asa sane la'an, an desaë ep golzim'in: Ere mae hap de jal zini em kwasang gwibirida gwen. Zen de emsa taïl gik gweblanna, zëbe mae hap hwëna dawemsa em goltrei gwizimdin.

28 Zen de emsa lamang tanna, ahaksa karek tanna, em hwëna Biansa em zëbe mae hap gu sone gweblan- Zen deka dawemsa golzimki.

29 Zi de emsa itranak tahakam lek tyanna, eihya itrasa em zitrëblanzao de hen emsa lek tyan hap. Zi de eno tahan bajusa al sonna, etan de eno olk de bajusa al soblan hap bahem jalse gweblan. Em zëbe hap alblan.*

30 Ebon de ahanik ba maesa abe gwibinni, em hëndep golblan. Ahanik de eno ba maesa al gunnu, etan bahem ebe hap de golblan hap abe tan.*

31 “Men kirekam ena dwam gwe'ara, zi de kirekam emsa gwë gweblan hap, em hen ahasa kirekam em gweibirida gwen.

32 “Em de enaka de kwasang gwe-gweblan zi ensa etan kwasang gwibirida gwenkam, ki hwëna anakan bahem ëkil gïl gwen, ‘Alap sa dekam asa sam gwesibiridala.’ Sap kareksa de gol gwen zini hen ki kire enkam kwasang neibirida gwenan- zini men zen zënaka kwasang neibirida gwenanye.

33 Hen em de dawemsa goltrei gwizimdinni men zen en ebe hap hen dawemna noltrë gweblanan, hwëna aha zi hip hom, dekam toton bahem ëkil gïl gwen, ‘Ano bosena dekam sa Alap mo nwenak dawem gwer.’ Sap kareksa de gol gwen zini hen ki kire enkam ëgwë gwenan.

34 Hen em de te-alasa bohë gul gwizimdinni men zen en ebe hap etan lop da gweblanan, hwëna aha

* 6:22 6:22 Yoh. 15:19; 16:2; 1Ptr. 4:14 * 6:29 6:29 Rom. 12:19-21 * 6:30 6:30 1Ptr. 2:21-24

zi hip hom, dekam toton bahem ëkil gil gwen, 'Ano bosena dekam sa Alap mo nwenak dawem gwer.' Sap kareksa de gol gwen zini hen ki bohë nulzimmira gwenan- karek gol gwen bose zikhipye, men zen hen kire enkam etan lop dazimmira gwenanye.

³⁵ Hwëna em jal zi omka em kwasang gwibirida gwen, hen dawemsa em goltrei gwizimdin. Em totoresna bohë gul gwizimdin, hwëna bahem lun kon etan anakan ëenlala gwe-gwen, 'Etan sa ap golblala.' Dekam sa eno bosena ngatan zi mo langnak dawem gwer, hen Teipsin Zini Alap sa emsa gublula, 'Ano ano bi gweblan walas ahana.' Sap Alap mo kwasangna zen zi dawem en hap hom. Hwëna Zen man hen kwasang gwibirida gwenda-kareksa de gol gwen zini, hen zini men zen dawemna zëbe hap nolbla srëm gwe-gwenanye.

³⁶ In zep, men kirekam Bian om zi karek-karekna enlwan gwibirida gwenda, em hen kirekam em zi bose omka enna lwabirida gwen."

Zi bose uk en mo kareksa de hlaul gwen srëm hap de ol:

(Mat. 7:1-5)

³⁷ "Bahem zi bose omka enlala gwibirida gwen, 'Zini in karekna.' Ki hwëna Alap hen sa kirekam emsa enlala gweblala, 'Zëna hen karekna.' Bahem gwibirida gwen, 'Zini in karek tan hap man dakasti'ira,' ki hwëna Alap sa kirekam hen emsa gublula. Karekna mensa aha zi ebe hap nol gwizimnin, desa em eititi gwibir-zimdin. Ki sa Alap hen eno karek-karekna ep tap gulsublula.

³⁸ Em aha zi hip dawemsa gol gwizimdin, dekam sa Alap ebe hap hen dawemna gol gweblala. Dekam taha dohon naban sa ebe hap lop ta gweblala. Lau-lau kire-kirena, Zen sa etan ebe hap inik gul sone gweblala, sa ebe hap taik-tik gilsik

sone gweblala. Ho nabare kire-kirena zen sa hëndep ësuwehe këni gwer. Aha kire-kirena zen esa taha-taha gweblala, hëndep esa dangnak yaing tahal gwera. Em de yunak aha zi hip bitï tablanna, ki Alap sa etan yunak ebe hap beya enkam bitï tablala."

³⁹ Zëwe zep Yesus ola gulk sun de blaonzimdin dan-dan mas sozimki: "Zi nwe häina bëjen nwe häi bose zemka irik tahan. Ki hwëna apdenak sa ho dwrak san laman anera.

⁴⁰ "Zi mo nwenak mam-mamna nara? San ha guru? San ha sekola walas? Zen diki guruke. Hwëna walasna in, sekola zemka kim sul sonenna, zen diki dekam sa guru zeban apde ëra.*

⁴¹ "Hen em ba habe wal bose uk mo ngip gun betek tolsa hla kul gwizimnin? Hwëna ere mo ngip gun yawala em desa de oto gulsun hup ema baes ta gwenan.

⁴² Kirekam de lwankam, em kitak men kiye: Zi de wal bose zemka gublunna, 'Anik eno nwenak de te klana insa gulsuk,' hwëna zëre mo nwenak balok tek yawala hen ki lwa'an. Zen maka desa nonol mulsu'ura- dekam de wal bose zik moka hlaun hupye. Em in Alapsa ëk enkame ang ë gweblanan. Diki nonol emaka aha-en-aha-enkam ere mae mo karek yala insa ngan ulsu'un. Ki esa dawemkam nwekam ëkara gwer- dekam de betekkam de ngip gun wal bose wal omka halen ora san golëwet so gwen hapye."

Zisi de zëre mo gwën nakon kirekam dam tasik gwibin hip de ol:

(Mat. 7:16-20; 12:33-35)

⁴³ "Men kiye hen tenya: Zen zëre mo dan enkam ëtë gwenan. Tenya men zen twin gwibin srëm tetan dankam ëtë gwenan, zen bëjen twin gwibin tetan dankam tën. Hen tenya men zen twin gwibin tetan dankam ëtë gwenan, zen bëjen twinbin srëm tetan dankam tën.

* 6:40 6:40 Mat. 10:24-25; Yoh. 13:16; 15:20

⁴⁴ Tĩngare tenya zen tèn nakon tame nul gwenan. Kwiwe dansa bëjen lemo timnik taran. Hen dokot të ngi-ngina bëjen rambutanan dankam tèn.

⁴⁵ Hen kirekam, zi enlala dawemna, zen enhonak dawemsa ing nul gwenan. Zen desa zep aha zi hip noltrei gwizimnin. Zi enlala karekna, zen enhonak kareksa ing nul gwenan. Zen hen desa zep noltrei gwizimnin. Zep men zen zi mo enhonak beya gwe-gwenan, zen zep nopna sewe gwenan- ëk tihĩ san de wet son hapye.”

Dawemkam de i-san i-san gwen hap de ol:

(Mat. 7:24-27)

⁴⁶ “Em ba habe waba hap Asa laken gweblanan?- ‘Bian, Bian’, hwëna em home ano ol san ang ta gwenan.

⁴⁷ Hwëna men zen eiwakam Abon yaing gwe-gwenanzal, hen ano ola ësal gwenan hen desan ang ta gwenan, zen men kiye-

⁴⁸ zi de golsa moko dawem naban taunnu. Zen nonola kamasa de olk en san hul-hul gun, kire drak-drak tenya eiyas tan. † Ho namwa gwenkam, gola in san de ho namwa til zinna, gola in bëjen ëwak gwen, sap zen dawemkam de moko tanna.

⁴⁹ “Hwëna men zen ano ola sap ësane gwe-gwenan, hwëna desan hom ang ta gwenan, zen men kiye-zi de golsa moko srëmkam taunnu. Ho namwa de desan til zinna, zen sa nabakam mirsik kinila, hëndep karekkam sa drewera.”

7

Yesus kim jana nabare zi hon de babu gwen zini dawem takake:

(Mat. 8:5-13; Yoh. 4:46-53)

¹ Yesus kim tawa tasibirki, ki zep Kapernaum sun dep song gweka.

² Zao Roma mo jana nabare zi mo mamna ki. Zëbon de babu gwen

zini man sërkam sang-sang gweka, hëndep tĩn hip alp gwesĩ'inka. Jana nabare zini in man tangan anakarekam ngalap gwebla'anka, “Bap zen tol tĩn.”

³ Zen kim salblaka, “Yesus awe gwë'ara,” zen dekam zep Yahudi zi mo mam-mam naka gubiridaken de Yesusu abe tan hap, Yesus de zi sang-sangna insa dawem tazan hap.

⁴ Zini in kim zëno abe naban Yesus hon yaing gwezak, dawem enkam zep anakan abe dak, “Jana nabare zi mo mamna in dawemna. Emki mas gweblan.

⁵ Zen sap aha zi wal, hwëna zen man nère korena ansa kwasang gwibirida gwenda, hen zen mes talana zerzimki- nëno mae mo but srëm golsa dikim taun hupye.”

⁶ Yesus ki zep zëbon mae onak ang gweka. Golak dep kim golëgolek de gwe'anka, jana nabare zi mo mamna in ki zep ahakore naka gubiridaka- Yesus hup dikim zëno olsa anakan ayang gulblun hap, “Zen man emsa gublula, ‘Bian, Em bahem Enaka karek tan- ano golak de hatankamye. Èe ama Em de ano golak sewen hap saher gwe'an.

⁷ In zebë baes gwer- aen de Ebon hatazan naye. Hwëna anakan-en Em gun, “Zi sang-sangna in zen dawem gwen,” dekam sa dawem gwera.

⁸ Sap ëe mesë Emsa taibliblak, “Eno ol-gunnu bëjen kirekam lwa srëm gwen.” Sap abon onakon de teipsĩn zini ki. Ano otdenak dena hen ki. Èyë ëre mo otdenak denaka gublu'anam, “Em song gwen,” zen dekam maka song gwe'ara. Hen ahanakaë gublu'anam, “Haen,” zen hen dekam maka song gwe'an zala. Èyë ëre hon de babu gwen zisi gublu'anam, “A desa syal gwibir,” zen dekam maka hëndep syal gwibi'ira. Èe sap teipsĩn tola,

† **6:48 6:48** Awe de zini, gola te drak-drakkam moko da gwibirin, zep kirekam ansa li nul sonok. Yesus mo gulk sun de ol blaonzimdinni an, Zen kasokam de moko tan hap aisil gwibiridaka, sap Israelk de zini kirekam gola dauk gweblak.

zep ano ol san kirekam ang ta gwenan. Hwëna Em in teipsin tanganna, zep eno ol san sa ki kirekam lwal.' "

⁹ Yesus man tangan tenggwan-blaka- zëbon onakore olsa de kirekam sane gwenkam. Dekam zep zi trana in zen ang nëblan da'ak, desa lero gwibiridaka hen gubiridaka, "Eiwa, zini in man Asa taïbli'ara. Èe homë mae Israëlk kirekam de sërkam Asa taïbli'aran zini zertowek."

¹⁰ Zen kim etan jana nabare zini in mo golak dep lwanda halzak, dekam zep babu gwen zini in sa hla dak, "Eiwa, zen mes tangan dawem gwenda."

Yesus kim we sem mo tanena ngaya takake:

¹¹ Zao hom holo gwe'ak, Yesus ki zep ëna Naen san dep song gweka. Zëre hon de ang ta gwen wenyä hen aha zini beya nik ang nëblak.

¹² Yesus kim ë top wet so kïninnak golek de gwe'anaka, zao zep golëtowe'anaka- zi beyana kim wal seiwir tokna berya ban drë nwanun hap nërte so'anzak. Wal seiwiri in zen tilki, zëno anena semna, hen zëno walasna ahana hom.

¹³ Bian Yesus kim we semna in sa hlauku, Zen man tangan kwasang gwibirki, ki zep gubirki, "Anyan, bahem gona gwëblan!"

¹⁴ Ki zep berya in sa golek de so zaka, ki zep olk soka. Men zen neiren ha'anzak dekam zep nërzausuk. Yesus dekam zep walas tokna in sa gubluka, "Tane tol, Èe ama emsa gublu'an, em luwen!"

¹⁵ Wal seiwir tokna in ki zep luweka, hëndep nikin'inka, dekam zep hëndep ola ton'anaka. Yesus ki zep an zemka gubirki, "An dë- eno walas naye."

¹⁶ Dekam zep tïngare zinik äirinnï hatazimzik, hen dekam zep anakan Alapsa boltere da'ak, "Alap mo olsa de ayang gul gwizimdin hip de zi yawala an mes nëno mae mo ngirinnik hata zala! Alap angkam

man kon gwisibir hana'ara- zëre mo hlil irin zisi de oto gulsunkumye!"

¹⁷ Yesus hup de ola dekam zep etan langa gwesik haladak- tïngare Yahudi mo lang san hen zëno alpnak de lang san.

Yesus hon kim baptis ta gwibin zini Yohanis hon de ang ta gwen zi darena apta zakake:

(Mat. 11:2-19)

¹⁸ Tïngan in desa ki Yesus syal gwe-gwibirki Yohanis hon de ang ta gwen wenyä dekam zep Yohanissi bwinak nen gublu hana gwek. Dekam zep hëndep etan dan-dan de aptazan hap gu soneka.

¹⁹ Desa zep guzimki- Yesusu de anakan lakensiblin hap, "Bian, Em an san ha Zen tangan?- men Desa anakan nen guk gweblakye, 'Israëlsa de oto gulsun hup de Zini sa hata zala.' San ha èe asa etan ahanaka kara ëblal?"

²⁰ Yesus hon kim apta zaka, ki zep enblaka, "Asa baptis ta gwibin zini Yohanis emsa de anakan lakensiblin hap guzimki, 'Em an san ha Zen tangane ki hata zaka? San ha èe asa ahanaka kara ëblal?' "

²¹ Dekam Yesus zi sang-sangna beya naka dawem ta gwibi'inka. Sap dowal de tilblinna, hen nwe dïminni, Zen tïngan dawem ta gwibi'inka.

²² Yesus ki zep ding gulzimki, "Sap esa etan Yohanis osan dep olahala. Mensa ki ena sane ëra hen hla kuli, desa anakan enbla,

'Zi nwe dïminni man ëkara gwe-gwe'ak.

Lek-lek wenyä hen man sek gwe-gwe'ak.

Sop sang-sang karek nabare wenyä man hen ëdawem gwe-gwe'ak.

I mat wenyä hen man ësane gwe-gwe'ak.

Tok-tokna hen man ëngaya gwe-gwe'ak.

* 7:22 7:22 Yes. 35:5-6; 61:1-2

Hen Alap onakore ol dawemkam man tahalha wenyaka tawa ta gwibi'ira.'*

23 Hen anakan enbla, 'Abon onakon men zen ësyalhe srëm gwe-gwe'an, zen hë'ho gwibinni zëbon mae lwa'an.' "

24 Baptis ta gwibin zini Yohanis hon de ang ë gwen zi darena in kim nama ëha'anka, Yesus dekam zep hwëna Yohanis hip dena zi beyambyana in hap srip gulsuzim'inka. Man zë gubiridaka, "Yohanis kim zi ol srëm langnak tawa ta gwibirki, em ba habe desan sek gwe-gwek? Basa de zë hlaun hup? San ha ema ëtim gul gwëk?- 'Ëe desan asyas habë sek gwe'an.'

25 Em ba habe desan sek gwe-gwek? San ha ema ëtim gul gwëk?- 'Ëe pakean dawem ala son nabare zisi de zë hla tan habë sek gwe'an.' Kire hap desan bëjen. Sap kirekam de zini- men zen tahalha srëmkam lowehe gwenan, zen zi srëm langnak hom. Zen diki teipsin zi mo ë yawalak lowehe gwenan. Zi srëm langnak bëjen.

26 Zep em ba habe zi srëm lang san dep sek gwe-gwek? Em sap diki Alap mo olsa de ayang gul gwizimdin hip de zisi de zë sane tan habe sek gwe-gwek. Hwëna baptis ta gwibin zini Yohanis in, zen Alap mo olsa de ayang gul gwen zi nikon man tangan taman kinika.

27 Sap Yohanis in zen- Israelsa de ngaya tabin hip de Zisi de ngeirblizan zi niye. Sap Alap man ngaya tabin hip de Zini insa hamal hap anakan gu-gubluka, 'Ëe asa Emsa de ngeir gublun hap zisi zer soner-zen de nonol ëre mo olsa ayang gul gwizimdin hip, ebe hap dikim orasa sal ta gublun hap.' "

28 Etan ki zep gubiridaka, "Eiwa, okamanak de zini, sap nonol lonesen nakon hëndep angkam em an zene lowe he'an, Alap mo nwenak

de ëdakastinni, hom tangan ahana-Yohanissi de kwë ta sone kinin naye. Hwëna sap kirekam, men zen angkam Alap mo irik ginnik Asa de taibliblan nakon biti gwe-gwe'an, sap bose srëm wenyaka, zen diki zen- Yohanissi de kwë ta sone kinin wenyaye."

29 Yesus mo ola insa de ësankam, tingare zini, hen sap Roma mo irik ginnik dep de pajak te-ala alal tanda gwen wenyaka, man ësrip-sri gwëk, "O hare Alap eiwa zëre mo dwam gwibin sin am kirekam Yohanis hon syal gwëka." Sap zen man Alap mo zëbe mae hap de dwam gwibin sin ang tak- zen kim Yohanis mo baptis tabinnik ang takye.

30 Hwëna Farisikam de zini hen Musa mo titi tabin olsa de tawa ta gwibin hip de zini, zen man Alap mo zëbe mae hap de dwam gwibinni baes neibik, sap zen man Yohanis mo baptis tabinni ja nuk.

31 Etan ki zep Yesus ola gulk sun blaonzimki, "Angkam de zini, em in men kiye- walasna.

32 Walas tane-ne de pasarak teinikirinni, dekon de asyas bose zemka gubiridanna, 'Nen isrip-sri hap de terya ban asyas tan.' Hwëna zen maka ding nulzim'in, 'Ëe ama baes ta'an.' Dekam de sap etan gubiridanna, 'Ki zi toksa de gwëblan makan nen asyas tan.' Hwëna dekam hen maka ding nulzim'in, 'Ëe ama kirekam hen baes ta'an.' Angkam de zini em hen kirekam. Em ema kitak Alap mo syala baes ei gwibirin.

33 Sap Alap kim baptis ta gwibin zini Yohanissi ebe mae hap zer sonezimki, zen Alap dikim sosonsa golblan hap man tembanena lwa gwëka, hen angguru hom otde gwëka. Hwëna em ema baes ë gwëblak, hen anakane lonsuk gwëblak, 'Zen dowal bi gwëblaka.'

34 Ki zep hen ngatan zi mo langnakore Zi Tanganna Asa zer sone zaka. Ëe hwëna homë tembane

* 7:27 7:27 Mal. 3:1; Luk. 3:2-6

naban angguru ban lwa gwenan. Hwëna Asa hen ema baes ë gwebla'an, hen anakane Asa lonsuk gweblanan, 'Zini insa emki hla tan! Tembane ngalap-ngalapna hen anggur otdebin sosonna. Zëno wal bose walya Roma mo irik ginnik dep te-alasa alal danda gwenan, hen ahakon enlala kwae naban!'

³⁵ Hwëna Alap kirekam zëre mo enlala blalkam srën-srënkam de syal ta gwen hap lup gul sone gwenda. Zep men zen de Alap mo enlala blal san kirekam ang ta'ak, zen zen sa eiwa de ora san ewet so kini gwer."

Karek gol gwen wenya kim irase dawem nabare minyakkam Yesus mo tanana hlë tazim-blikke:

³⁶ Farisi walya bosena Simon, zen man Yesussu zëno golak de golëtembane tan hap gubluka. Yesus ki zep zë golëteinikin'inka.

³⁷ Hwëna ëna iwe, kahalo soson wenya hen ki. Zen kim sak, "Yesus zëno golak tembane gwe'ara," zen dekam zep sërkam de irase dawem nabare minyak botol aban golhatazak- Yesussu dikim hlë tablan hap. *

³⁸ Zen sërkam tangan Yesus hup kwasangna goltrëblak. Nonol zen zëno tana gwë sonen nakon zau'unzak. Dekon gosa gwë'ak. Hëndep nwe go-hokam Yesus mo tanasa blëble so'ak. Zëre mo nol ala blal-blalkam zep etan sasa soblak, deban bolk-bolk soblak, dekam zep zë hwëna minyakna inkam hlë tazim-blik. †

³⁹ Simon kim hlaulku, zen ki zep enlala ennak Yesussu ton-sublu'anka, "Zini an eiwa de Alap zer sonenanam, zen maka anakan tawa gwibi'ira, 'Wenya an zen asa olk ta'an, zen kahalo sosonna.'

Maka anakan jalse gwibi'ira, 'Bahem asa olk tan.' "

⁴⁰ Yesus ki zep Simonsa gubluka, "Simon, ola sap ki- Eë de desa emsa gublun hap denaye."

Simon ki zep ding gulbluka, "In aïris, bian, sap esa asa gublula."

⁴¹ Yesus ki zep gubluka, "Zini dan te-ala beya nabare zi nik man te-alasa bohë laka, ahana lima-pulu jutakam, ahana lima jutakam. ‡

⁴² Hwëna zi darena in etan bëjen mae olblan. Te-ala beya zini in ki zep guzimki, 'Eë homë eno nik mo te-ala bohë unni insa enlala gwibi'in.' Hwëna zi darena in kon, nara wëhë te-ala beya zini insa mamkam kwasang gwebla'anka? San ha betekkam de bohë tan zini? San ha mamkam de bohë tan zini?"

⁴³ Simon ki zep ding gulbluka, "Eë ama enlala gwe'an, men zëbe hap te-alana mamkam tap tasiblika, zen zen sa sërkam kwasang gweblala."

Dekam zep Yesus gubluka, "In eiwa."

⁴⁴ Ki zep hwëna wenya insa lero gwibirki, ki zep hen Simonsa gubluka, "Wenya ansa wëhë hlaulu? Eë sap eno golakë hatal, hwëna em home hona hamal gulu- ano tanasa dikim ngan sosun hupye. Hwëna wenya an mes zëre mo nwe go hokam ano tanana ngan sosul, deban mes zëre mo nol alakam sasa sol.

⁴⁵ Em home asa babang tala- ëë kimë awe til zilye. Hwëna wenya an, Eë kimë awe hatazal, zen man ano tanana bolk-bolk so tiner.

⁴⁶ Em home ano nola minyak zaitunkam draulu- Asa de dokwak ta gun hupye. Hwëna wenya an mes irase nabare minyakkam ano tanana hlë tazim.

* **7:37 7:37** Minyak nabare botola mensa golhatazak, zen hen kaso nwe-aweskam de syal gwibinni. (Mrk. 14:3) † **7:38 7:38** Yesus kim gwëka, zini ëglang gwe kininkam tembane ta gwëk- irgwa tahasa de ik so sonenkam. Zep wenya in Yesus mo tahan nakon zauk. ‡ **7:41 7:41** Awe "lima-pulu juta" hen "lima juta" kam, Yesus Yahudi zi mo te-ala kaso hap guku- "500 dinar" hen "50 dinar" kamyë. "Dinara" zen perak tangankam de te-ala kaso. Zen aha-ere syal tan zi mo gaji makan- aha-ere yakla blalkam de syal gwen hap denaka.

⁴⁷ Zebë emsa gublu'an: Wenya an mae hap kwasangna mamkam abe hap goltrëblal: Sap zen mes anakan tame gul, 'Ano karek-karek beyana mes namen ap tap gulsubirida.' Hwëna zini men zëno mae mo betekkam de ngip gul gwensa tap gulsuzimdinni, zen betek enkam sa ap kwasangna noltrë gweblal."

⁴⁸ Yesus dekam zep wenya insa gubirki, "Eno karek-karekna mesë ep tap gulsubirin."

⁴⁹ Ahakon men zen zëwe teinikin'ik dekam zep enlala ennak Yesusu donsublu'ak, "Zëno karekna insa tap gulsubin hip gunda, zen man kil gi'ira, 'Ee an Alap han apdenak.' Kirekam insa gunda, zen Alapsa lamang tanda."

⁵⁰ Hwëna Yesus ki zep wenya insa gubirki, "Em mese Asa taïbliblanda, em zebe ngaya gwenda. Wake, amki aha-ere enlalakam song gwe."

8

An we wal bosem-sena men zen Yesusu mas në gweblakke:

¹ Zao hom holo gwe'ak, Yesus ki zep ë-ë san amjanbir song gweka. Desan Alap Zën de irik gin hip de ol dawemna goltën daka. Dua-blas enkam de zëre hon ang ta gwen wenya man ang nëblanda gwék.

² Hen we walya mensa dowal de tilbiritan nakon hen sang-sang nakon dawem tabirki man hen ang tanda gwék. Ahana Maria- mensa nen gwibik Magdala kore we. Zëbon onakon dowala tuju enkam mes golëalsa soneka.

³ Ahana Kuza Bak mo wenya Yohana. Kuza zen teipsin zini Herodes mo golak de aha mamna. Ahana Sosana, hen ahakore we walya beya nik ang ta gwék. We walya in hen man Yesus maesa zëre hon de ang ta gwen wenya ban zëre mae mo te-alakam mas neibirida gwék.

Yesus kim gandum dan hling gilsinkim ola gulk sun blaonzimkike: (Mat. 13:1-9; Mrk. 4:1-9)

⁴ Zi beyana ki zep etan Yesus hon dep zi-ë zi-ë nakon yaing gwe-gwe'anzak. Yesus ki zep zë ola gulk sun blaonzimki,

⁵ "Zini man orep gandum dansa de hling gilsin hip song gweka. Kim hling gilsiki, hwëna ahakon oranak altink. Zi zep zë nyaublunda gwék, hen ahakon mawa zë dwensiblindak.

⁶ Hen ahakon kaso-kasonak altink. Kim sap ësip gwék, hwëna ki zep tol ëboneng gwék, sap kasona in sal-sala.

⁷ Hen ahakon dokot të ngi-ngi ausunak altink. Kim sap tol ësaltik, hwëna dokot të ngi-ngina in zep nabakam ëblal-blal gwék. Zen zep dahalebik, hëndep eini hom tëka.

⁸ Hwëna ahakon hen kama dawemnak altink. Zen dawemkam zep ësip gwék, hëndep dawemkam zep hataka, hëndep dawemkam tëka. Aha-ere timni, zëno dan beyana seratus maenak zep hata gwe'ak."

Ola insa kim tonsuku, ki zep hwëna ol mamkam gubiridaka, "Em dwan i nibanke. Em ësäl gwen!"

Yesusu kim anakan nenblakke, "Bian, gulk sun de ol blaoranna insa emki ap srip gulsuzimdin."

(Mat. 13:10-17; Mrk. 4:10-12)

⁹ Dua-blaskam de zëre hon ang ta gwen wenya in ki zep nenblak, "Bian, gulk sun de ol blaoranna insa emki ap srip gulsuzimdin."

¹⁰ Yesus ki zep ding gulzimki, "Abon de ang ta gwen wenya ebe mae hap Alap mes golzimki- em dikim zëre mo irik gin hip denaka tame gul gwen hap denaye. Hwëna aha zi hip hom kirekam golzim'ira. Ee in zebë zëbe mae hap gulk en san ola blaon gwizimnin. Sap Alap man desa dwam gwibirida'aramen kirekam zëre mo olak lwakke, kirekam de hëndep zëbe mae hap anakan lwa gwizimdin hip,

'Zen sap sa hla nul gwer, hwëna san de hlaun srëmna. Hen sap sa ësane gwe-gwer, hwëna zen molya tol dam nulsuk gwek.' **

Yesus kim gandum dan hling gilsin hip de ola insa srip gulsuz-inkike:

(Mat. 13:18-23; Mrk. 4:13-20)

¹¹ "Ola insa gulk sun blaonzim, dam gulsunnu a kirekam moye: Gandum danna, zen Alap mo ol.

¹² Gandum dan de oranak altirinni, zen men kiye: Zini men zen Alap mo ola insa ësane gwe-gwenan, hwëna dowal mo kigina dekam zep hata gwenan zala- ola insa de zëno mae mo enhonak alal gul gwizimdin hip. Mae hap ki kirekam gweibirida gwenda: Zen dikim ëei gwen srëm hap, hen ëngaya gwen srëm hap.

¹³ Gandum danna men zen kasonak altirinni, zen men kiye- zini men zen sap ësane gwenkam isrip-sri naban dokwak nul gwenanke. Hwëna ola in bëjen zëno mae mo enhonak sa gwen. Zen dekam en de sap ëei gwen, hwëna kim karekna noltowe gwenan, zen dekam zep Alapsa hli da gwenan.

¹⁴ Gandum danna men zen dokot të ngi-ngi ausunak altirinni, zen men kiye- zini men zen sap ola insa ësane gwe-gwenan, hwëna enlala ngalapna man zëno mae mo enhonak ëbeya gwe-gwenan- te-ala beya gwen hap dena, hen syansyan en hap dena. Kirekam de enlalana in zep Alap onakare ol dawemna insa zëno mae mo enhonak hule gwenan, hëndep eini bëjen dawemkam bil gwen.

¹⁵ Gandum danna men zen kama dawemnak altirinni, zen san de men kiye- zi enlala dam-damna hen enho dawemna. Zen kim ola insa ësane

gwe-gwenan, zen dawemkam ing nul gwenan, hen tatem zëwe ëzauk gwenan, hëndep dawemkam eini ëtë gwenan." *

Yesus mo olsa dikim tame gun hup de ëhohle gwen hap de ol:

(Mat. 13:12; Mrk. 4:21-25)

¹⁶ "Zini hom pelita ngatannak yuna utuk nul sone gwenan-dekam de ngatanna insa aning gun hupye. Hen pelitana hom tum iltikinnik si nulin gwenan. Zen diki meja maenak nonne gwenan-dekam de ngatannak zini zi niban golëteinikirin hipye.

¹⁷ Hen kirekam, ola mensaë gulk sun de blaonzimdinkim zi beya hap aning gul gwizim'in, zen sa lamkam wet sol. Hen ano enlala aning tanna dekam sa tawa nëblal. Zen diki dekam sa zini dam nulsuk gwer.

¹⁸ Zen in zep ano ola mensa ena ësane gwe-gwe'an, dawem enkam emki enhonak lone gwen. Sap men zen Alap mo irik gin nika de tame gun hup ëhohle gwe'an, zëbe mae en hap sa etan Alap dekam de tame gun hup de enlala blala sowe henkam ing ta sone gwizimindi. Hwëna men zen ëhohle gwe srëm gwe'an, tame gun hup de enlalana men zen betek enkam nama lwazim'ira, mensa zëna enlala në gweblanan, 'Abon ki lwa'ara,' desa sa hwëna Alap al tazimindi."*

Yesussu kim an zem oso wal zeban zitëblakke:

(Mat. 12:46-50; Mrk. 3:31-35)

¹⁹ Yesus mo anena ki zep oso wal zeban Yesussu de zertoran hap golëyaing gwezak. Hwëna golek de tanna ba kon dep? Sap zi trana dekam mes ëkyang gwesik.

²⁰ Dekam zep ahanik Yesussu gubluka, "Bian, eno anena oso wal

* **8:10 8:10** Yes. 6:9-10 * **8:15 8:15** Yesus kim dansa de tën hap dena ol aïsilik awe gubiridaka, zen ei gwen, ahaksa Alapsa de taibliblan en hap hom enlala gwibirki. Dansa de tën mo dam gulsunnu, zen hen Alap mo ol san de dam-dam enkam lowehe gwen hap. (Mat. 5-7) Ahaksa nëno mae mo ol toran de Alap mo nwenak sam gwesik gwen hap. (Mat. 12:31-37) Ahana hen, zisi de halen ta gwibin hip. (Yoh. 15:16) Kirekam de lowe henna, zen zen Alap mo nwenak nwe-mase gwe-gwenan- san de dansa de tënna kiye. * **8:18 8:18** Mat. 25:20-29

oban ë nakon emsa ziësbla'anon. Man eban de zertowen hap ëdwam gwe'an."

²¹ Yesus ki zep ding gulzimki, "Tingan men zen Alap mo ola ësane gwe-gwenan hen desan ang ta gwenan, zen diki zen- ano anena hen oso walyaye."*

Yesus kim asese yawala së ta sonekake:

(Mat. 8:23-27; Mrk. 4:35-41)

²² Aha yaklakam, ki zep Yesus zëre hon de ang ta gwen wenyaka gubiridaka, "Nen ho gutu men eiha san gweyo gwen." Dekam zep hëndep bulkum sek gwëk.

²³ Yesus hwëna nisi zë taka. Mumuk ennak zep asese yawala hataka. Hona dekam zep buluk hlëwehe kïnzi gwe'ak, hëndep bulu in keing gwen hap alp gwes'ik.

²⁴ Dekam zep li dak, ki zep nen-blak, "Bian, Bian, nen an em-am angkam juwe'an!"

Yesus kim luweka, ki zep asesena insa sërkam de ho ngëpna in han jalse gwizimki. Dekam zep tangan hëndep së nëhek.

²⁵ Yesus ki zep gubiridaka, "Ki san em home Asa läibli'bla'an?"

Dekam zep aïrin niban denggwänbla'ak. Ki zep zënaka nenbiridak, "Eiwa, zini an wehasa hom! Ba hap tangan zëno jalse gwizimdin enkam asese naban ho ngëp naban nyausunun?!"

Yesus kim dowal-dowal mo bi gweblan zini dawem takake:

(Mat. 8:28-34; Mrk. 5:1-20)

²⁶ Dekon zep hëndep bulkum sek gwëk- hëndep Gerasa mo langnak, Ho Gutuna Galilea mo men eiha san.

²⁷ Yesus kim ho alpna ati gwe ineka, zao zep dowal mo bi gweblan zi niban zertowe'anka. Zen sap orep ënak gwë gwëka, hwëna dowal-dowala kim bi nëblak, dekam zep irkan gwë gwëka. Hen golak de

gwë gwen hap man baes gwe-gwëka. Hwëna zi lo tasik gwibin kaso-hul kaso-hul en san gwënda gwëka. Zini in mes tangan holo gwëka- kirekam de gwënda gwëna.

²⁸⁻²⁹ Bwi maenak sap taha-tana naka besi dokotkam de tatak soblan naka tak da-in gwëk. Hwëna dowala in hen-henkam napta gweblak, zep sosen gwenkam besi dokotna insa blom tabir inhal gwëka. Dekam zep dowala in zi srëm lang san dep nërhal gwëk. Zen kim Yesusu hla taka, ki zep hërheka, deban Yesus mo nwenak ik gwehe zaka. Yesus ki zep dowala insa gubluka, "Dowal, em zëbon onakon wet son!"

Ki zep etan mamkam hërheka, "Yesus, Teipsin Zini Alap mo Tane! Em aban toton banakan de syal ën hap? Èe ama Emsa abe ta'an: Bahem asa karek tan!"

³⁰ Yesus ki zep takensiblika, "Eno bosena nara?"

Ki zep ding gulbluka, "Ano bosena Jal Zi Tra Bak." † Zen mae hap ki kirekam ding gulbluka: Sap zëbon dowal-dowala tra tangan nik lowehe gwëk.

³¹ Dowal-dowala in ki zep Yesusu etan-etankam aberbe da'ak, "Asa bahem gubiridan- juwen zi mo bwi kawesinnik dep de atiti gwe inen hapye."

³² Zëno mae mo nwe kara gwen san zahona beya tangan nik tembane hap kwatap tïni san ëhaka'ak. Dowal-dowala in man aberbe da'ak, "Em wëhë tol asa gubirida'anka?- zaho trana wakuwe de bitï gwen hapye."

Yesus ki zep gubiridaka, "Dekam bitï gwëk."

³³ Dowal-dowala in kim zini in kon wet so gwëk, dekam zep hwëna zahona iwe bitï gwëk. Zaho trana in dekam zep heya-hya gwëk, li san zep hëndep ësyalk tak, hëndep ho gutunak zep ëkei-king gwëk.

* **8:21 8:21** Luk. 11:27-28; Yoh. 1:11-13 † **8:30 8:30** Zëno bosena Yunani mo olkam "Legion." Amber olkam zëno enlalana "batalion." Roma mo jana nabare zi mo "legion" kam de gubinni, zen zini beyana 4.000 enkam. Dekon hen beyana man esek gwe kïni gwëk.

³⁴ Zahona in sa men zen dekam kara dabi'ik, kirekam kim hla nulidak, dekam zep zaho bi naka de gubiridan hap ë san dep hen ëna in mo golek denak de gol-gol san dep ëhlu-hluk gwek.

³⁵ Zëwe de zini kim ësak, dekam zep hëndep nolësal kinik. Yesus hon kim yaing gwezak, zao zep hla dazak- zini in sa dowal-dowala tapbla dakye. Zen Yesus mo tana alp nakon pakean naban nikin'inka, hen enlalana mes sëwe heblaka. Dekam zep zë ëairi'ak.

³⁶ In zen hla nuk, zen zep ë nakon in zen yaing gwezak desa donbirida'ak, "Zini ansa kirekam dawem tala."

³⁷ Dekam zep tangan sërkam ëairik, dekam zep tingan Yesusu abe dak- Zen de nabakam dekon song gwen hap.

³⁸ Zini in desa dowal-dowala tapbla dak ki zep Yesusu aberbe ta'anka, "Ëe wëhë tol Emsa ang gwebla'ak?"

Hwëna man gubluka,

³⁹ "Em gol san song gwe hen tawa tabir- mensa Alap dawemna ebe hap mamkam golblalake." Dekam zep Yesus hli yuludaka.

Zini in ki zep song gweka, ë yala iwe de zini kitak tangan tonbirida gweka- Yesus mensa zëbe hap dawemna mamkam golblakake.

Yesus kim Yairus Bak mo wenam tol tokna ngaya gulkuke, hen aura gwe-gwen wenya kim dawem gulkuke:

(Mat. 9:18-26; Mrk. 5:21-43)

⁴⁰ Yesus kim etan lwahal zaka- Ho Gutuna Galilea mo an eihya san dep, dekam zep zi trana dawem enkam dokwak dak, sap zen man nësbla'ak.

⁴¹ Zao zep hen zi bosena Yairus hata zaka. Zen Yahudi mo zëwe de but srëm golak de aha mamna. Zen ki zep Yesus mo nwenak ik gwehe zaka, dekon zep aberbe ta seka-zëno golak de hatan hap.

⁴² Sap zëno wenam tol aha-arena man tin hip alp gwesi'ik- dua-blas tahun nik.

Yairus mo gol san kim song gwe'anka, zi trana in man ngirinnik nëblahak, hëndep man ëngilititik gwe-gwe'ak.

⁴³ Wenya hen dekam man ang gwese ha'ak. Zen dua-blas tahunkam karekkam aura gwe-gwek. Zini man sap dawem gun hup naka gwibik, hwëna hom kim mae dawem gwe-gwek.

⁴⁴ Wenya in ki zep Yesusu tahan nakon golek de tazak, zao zep baju sihi top nakon olk ta sonek. Dekam zep hëndep kala in tewesibik.

⁴⁵ Yesus ki zep takensibiridaka, "Asa an nara olk tanda?"

Tingan man ëguk, "Ëe homë." Petrus ki zep ding gulbluka, "Bian, zini an beya tangan nakake! Man-am emsa dot dasil."

⁴⁶ Hwëna Yesus ki zep gubiridaka, "Hwëna ahana man asa olk tala, sap Ëe ama anakan eisbirin, 'Zini man Asa de olk tankam dawem gwenda.'"

⁴⁷ Wenya in dekam zep enlala gwek, "O hare mes-am asa dam gulsunda!" Zen dekam zep yal-yala ban Yesus mo nwenak ik gwe hezak, dekon zep tingare zi mo ngirinnik iwe ton seblak, "Ëe dawem gwen habë dwam gwer, zebë Emsa olk tal. Ano kala dekam zep hëndep tewesinin."

⁴⁸ Yesus ki zep kwasang tola ban gubirki, "Anyan, em ema Asa taibliblala, in zebe dawem gwenda. Aha-ere enlalakam song gwe."

⁴⁹ Yesus in kim nama ola ton'anka, Yairus mo gola kon ki zep zini hata zaka, ki zep Yairu'u gublu zaka, "Eno wenamna mes tol tilsinin. Bahem etan Bian Gurusu blostablan."

⁵⁰ Hwëna Yesus kim kirekam salka, dekam zep Yairu'u gubluka, "Bahem airin. Asa em taibliblan, zen dekam sa eno wenamna ngaya gwer."

⁵¹ Golak kim golëyaing gweka, Yesus dekam hom aha zi niban de golëbiti gwen hap gubiridaka, diki Petrus, Yohanis, Yakobus, hen wenam tola in mo ane-bia ensa.

⁵² Zëwe tîngare zini wenam tola insa gosa dabi'ik, hwëna Yesus zep gubiridaka, "Gona olzausuk. Wenam tola in hom til. Zen nisi am ta'an."

⁵³ Hwëna man swrë da'ak, sap zen mes wenam tola insa tame nuk, "An mes-am tangan tilke."

⁵⁴ Hwëna Yesus wenam tola in mo aha taha naka zep teisyabir ineka, deban zep gubirki, "Timë, em luwen!"

⁵⁵ Wenam tola in mo maumnu dekam zep etan hata zaka, hëndep dekam zep luwek. An-bi zemka dekam zep tembanesa de olbin hip guzimki.

⁵⁶ Zëno ane-biana man tangan lenggwanblak. Hwëna Yesus man jalse gwizimki, "Owasna an zen ki lwanan, bahem ahasa lonbiridan."

9

Yesus kim dua-blaskam de zëre hon ang ta gwen wenya lup gul sonekake:

(Mat. 10:5-15; Mrk. 6:7-13)

¹ Yesus ki zep dua-blas enkam in zen zëre hon ang ta gwëk tagal gulsuku, ki zep zë gubiridaka, "Ëe asa ëre mo sosonsa ebe mae hap golzim- em ekakim kitak de dowaldowalsa olëalsa sone gwibik, hen zi sang-sangsa ekakim dawem labir song gwëk."

² Ki zep zë etan gubiridaka, "Dekam sek gwëk. Zi sang-sangsa dawem labir song gwëk, hen deban anakare ola ol haladak, 'Alap Zën de nësa irik gin hip denak angkam man golek de gwe'an.'

³ Bahem ba maena ora san dep lop tan- sap dutena hen hon maena bahem. Tembanena bahem hen lop tan, hen te-ala maena. Timnik de baju ala son enkam emki sek gwen.

⁴ Gol karek mae nakon de emsa zer irinni, zen zëwe en emki gwën. Bahem dekon gol dawem san dep al gwehan.

⁵ Hwëna men dekore ë nakon emsa zer irin srëmna, ki zao em tana sonna taik-tik so gukhan- zen

dekakim anakan tame nuk, 'Zen sap Alap onakore ol dawem naban nëbe mae hap golhatazim zira, hwëna nen insa ër-in srëm gwenan nëre mae hap de kareksae kim mam ulin.' "

⁶ Dua-blaskam de zini in ki zep ë-ë san zë-en zë-enkam sek gwëndak. Zen Alap onakore ol dawemsa nolhaladak, hen zi sang-sangsa dawem dabir song gwëk.

Herodes mo enlalana kim topse gweblakake:

(Mat. 14:1-12; Mrk. 6:14-29)

⁷ Dekam teipsin zini Herodes Galilea mo langnak irik gi'inka. Zen kim tîngare owas-owasna in hap dena salka, dekam zep tangan enlalana topse gwebla'anaka. Sap ahakon anakan ëgu gwe'ak, "Baptis ta gwibin zini Yohanis Swe mes etan ngaya gwëka. In zen hwëna bosena Yesuskum li yul soneka."

⁸ Hen ahakon man ëgu gwe'ak, "Elia Bak Swe mes yap etan ngatan zi mo lang nakon jowe zaka." Hen ahakon ëgu gwe'ak, "In orep men zen Alap mo ola ayang nul gwëkke, zen mes yap ahanik etan tin nikon de ngaya gwenkam bosena Yesuskum li yul sone zaka."

⁹ Herodes dekam zep hwëna guku, "Ëe mes-am gubiridak- Yohanis mo nolsa de blaonsublun hapye. Zep an hwëna nara zi zë etan jowe'an zala? Ëe mesë zini in hap de ola beyakam sane gwe-gwëk." Zen dekam zep sap dwam gwe-gwe'anaka- Yesussu de hen hla tan hapye.

*Yesus kim lima ribukam de zi beyam-bya hap tembanena golz-
imkike:*

(Mat. 14:13-21; Mrk. 6:30-44; Yoh. 6:1-14)

¹⁰ Dua-blaskam de zini in kim etan lwanda halzak, ki zep Yesussu donblazak- tîngan mensa ki zëna syal tan dakke. Dekam zep kon hwëna Zën etan golësek gwëka- ëna Betsaida mo lang san dep, zao de zë-en golëgwë inendan hap.

11 Hwëna zini kim ësak, "Yesus desan song gwenda," lun kon zep nërtrok. Yesus kim hlauludaka, ki zep haen gwibiridaka. Zao zep Alap Zën de irik gin hip denaka tawa tabirki, hen zi sang-sangsa zë dawem ta gwibi'inka.

12 Zao zep hëndep dapse gwesï'ik. Dua-blaskam de zëre hon ang ta gwen wenya in ki zep nenblazak, "Bian, langna an dwan tahalha tanggan nakake. Dawemna zi beyam-byana ansa Em gubiridan- dekamim tembane hap hen ni tan gol-gol hap ëhakalsindak."

13 Yesus hwëna man ding gulzimki, "Amki em tembanena zëbe mae hap hen olzimk."

Ki zep ding nulblik, "Nëno mae mo rotina aha-ere taha-tap enkamke, hen hogwena dan-dan en. Kina ki nëno mae mo te-alana man- dekam de tokonak tembanesa zi trana an hap lop tazimdin hipye!"

14 Sap dekam in zen zë lowe he'ak, zi enna san ha lima ribu enkam mes yap- we wal walassa de aïtbin srëmkamye.

Yesus ki zep gubiridaka, "Em gubiridan- hlik-hlikkam de teinikirin hip. Aha-ere hlikna 50-50kam de teinikink."

15 Kirekam de teinikirin hip zep nenbiridak.

16 Ki zep roti aha-ere taha-tapna insa hogwe darena in han teisyaka, dekam zep ngli san de kara gwesen naban Alap hap dawemna golblaka. Ki zep hwëna rotina insa ahap tabirki, hen hogwe darena insa kwak kwak soka. Dekam zep dua-blaskam de zini in hap etan-etankam kap ta gwizim'inka- zen dikim hwëna zi beyam-byana in hap kae gweblazimdin hip.

17 Kim dwenblandak, hëndep kitak man ëitri gwëk. Dua-blaskam de zini in dekam zep etan tembane mosrona insa tagam dasik. Yuna dua-blas enkam zep ësuwek.

Petrus kim Yesussu anakan kira takake, "Bian, Em an Zen- Israelsa

de ngaya tabin hip de Zi niye."
(*Mat. 16:13-20; Mrk. 8:27-30*)

18 Aha yaklanak, Yesus zë-en de gwën nakon Biansa abe ta'anka, hen zëre hon de ang ta gwen wenya zëwe lowe he'ak. Zao zep takensibiridaka, "Zi mo Asa de dam tasinkim, Èe an nara mo weinak debë hatazak?"

19 Ki zep ding nulblik, "Ahakon man emsa nen gweblanan, 'In baptis ta gwibin zini Yohanis Swe etan tin nikon ngaya gwëka. In zen hwëna Yesuskum bosena li yul soneka.' Hen ahakon man emsa nen gweblanan, 'In Elia Bak mo weinak Alap mo olsa ayang gul gwizim'ira.' Hen ahakon man emsa enlala në gweblanan, 'Zen diki ahakon men zen orep Alap mo ola ayang nul gwëk, zen mes yap ahanik etan ngaya gwëka. Zen hwëna bosena Yesuskum li yul soneka.' "

20 Ki zep etan takensibiridaka, "Hwëna erë mae mo Asa de dam tasinkim, Èe an diki nara mo weinak dep dena?"

Petrus zep ding gulbluka, "Bian, Em an Zen- Israelsa de ngaya tabin hip de Zi niye, Alap men Desa dam tasikiye."

21 Ki zep hwëna gubiridaka, "Insa kirekam Asa dam lasinin, aha maesa hwëna bahem gubiridan."

Yesus kim nonol tanganna Zën de kareksa goltowen hap dena hamal hap gu-gubiridakake:

(*Mat. 16:21-28; Mrk. 8:31-9:1*)

22 Etan ki zep gubiridaka, "Alap mo dwam gwibinni abe hap dena a kirekam sa lwal: Ngatan zi mo lang nakore Zi Tanganna Èe karekna mam tangan naka asa goltowe gwer. Hen Yahudi mo nol-nola, Alap mo golak de mam-mam wenya, hen Musa mo olsa de tawa ta gwibin wenya sa Asa baes nëblal, hëndep

sa Asa dal. Hwëna yaklana dan-ahan, ki sa Bian tïn nïkon etan Asa ngaya tala.” *

²³ Yesus hen man zi beyasa gu-birida gweka, “Men nara Abon de ang gwe-gwen hap dwam gwenna, zen diki zëre mo gwëna zen eititi gwibin- dekam de zëre hap de te-lidak son wë son naban Asa zertronda gwen hapye, anakare en-lala naban, ‘Ëe sap asa Yesus hun apdenak lil.’

²⁴ Sap men zen de zëre mae mo auhu-kamanak de gwëna anakan nolairi gwe'ak, ‘Ëe babë Yesusu de ang gwe-gweblannak karekna goltowe gwen,’ ki zëno mae gwëna in sa jek-jak gwer. Diki men zen Asa de ang gwe-gweblan hap zëre mae mo gwëna sosok nul gwe'ak, hëndep zao mae de tïn hip, zen zen sa hëndep denaban ëngaya gwer.

²⁵ San ha dawemna?- em de sërkam te-ala beya gwenkam hëndep kitak de okamana ansa bi gwibinkim, hwëna dekam de ere mo gwënsa tihis gïnkim. Kirekam dawem naka hom!

²⁶ Zi de anakan de gunsu saher gwenna, ‘Ëe Yesusu de ang gwe-gweblan zi,’ ki ngatan zi mo lang nakore Zi Tanganna Ëe kimë Bian mo ngatan naban hen sosen naban zëno dam taha nakore zi niban golëyaing gwe'anzak, Ëe molyë hen desa anakan kira tak, ‘Zini an eiwa Asa de ang gwe-gweblanna.’

²⁷ Eiwa denakaë emsa gu-birida'an: Em an zene awe lowe he'an, em molye ahakon na-en juwek- Alap mo yakla yalak de zaun srëmnakye. Em esa Asa hla lal- Ëe kimë zëre mo bose hap de irik gin hip hata'an zakye.”

Yesus kim aha nwe-mase gwekake:

(Mat. 17:1-8; Mrk. 9:2-8)

²⁸ Zënaka de karek tan hap dena in kim tawa tabirki, zao san ha

mingguna aha-en tamank, ki zep kwatap san dep golësek gweka- Petrus, Yohanis, hen Yakobus mae en han, Alapsa de dekon gu soneblan hap.

²⁹ Kim kon ola gu sone'anka, nwe-masena dekam zep hwëna liwe heblaka, hen pakean zem man tangan sërkam ngap-ngap nëblak hen ngli ang makan nalilingtilbli'ak.

³⁰⁻³¹ Mumuk ennak zep Musa ne Elia ne ngatan zi mo lang nakore ngatan naban oljowe zaka. Ki zep zë Yesus hun érton'anka- Zën de Yerusalemk tïn hip denaka, men kirekam Alap gu-gublukake.

³² Petrus dekam wal bose wal zeban totokkam nisi golëtruwe'anka. Mumuk ennak zep luk ta'anzak, dekam zep Yesusu hla dak- ngatan zi mo lang nakore ngatannak kim zi darena in ërzau'unka.

³³ Zi darena in kim Yesusu hli la'anka, Petrus ki zep totoresia gubluka, “Bian, dawem tangannan de awe lowehe gwen naye. Zep ëe asa gol kluksa dan-ahan syal ëblandal- ahana Bian ere hap, ahana Musa Bak hap, hen ahana Elia Bak hap.” Hwëna Petrus insa kirekam gubluka, hyanak zëna man saher gwibi'inka, “O ëe an ba habë kirekam gublul!”

³⁴ Petrus kim nama kirekam ola tonbla'anka, butna ki zep ati gwezak, hëndep man zë wale tabirzik. Dekam zep ëairi'ak.

³⁵ Ki zep hwëna butna iwe ola ësak,

“An ano Tane, ëre mo Dam Tasinni. Desa em sal gweblan.”

³⁶ Ola in kim zausuk, dekam hwëna Yesus ensa zë hla dak. Owasna insa ki zë hla nuk, zen hom mae aha maesa donbiridak- Yesus kim nama golëlowe he'ankaye.

Dawal mo tilblin wasalna kim dawem takake:

(Mat. 17:14-21; Mrk. 9:14-29)

* **9:22 9:22** Yesus Yahudi mo aïtbinkim “yaklana dan-ahan”kam guku. Nëno mae mo aïtbinkim, Zen “zëno ka'an”kam maka guku, ahaksa, “yaklana dan-dan”kam. Sap Yesus Jumatkam tilki, hwëna Minggukam zep ngaya gweka.

³⁷ Kaknak zep Yesus zère hon de ang ta gwen zi dan-aharena in han kwatapna in kon golétine gweka. Hwëna ki zep zè zi beyam-byana hla nulida'anonk. Man kon nèsbla'ak.

³⁸ Ki zep kon ahanik ol mamkam gu hanaka, "Bian, èe ama emsa abe ta'an: Ano walassa emki mas gweblan, sap ano wasalna ahana hom.

³⁹ Dowala kim til gweblanda, hëndep dekam zep hërhen naban zënaka zerheirisen gwenda- èk tutum nuban. Kire enkam ki karek tanda gwenda. Hom holokam hli ta sehal gwenda.

⁴⁰ Mesë sap ere hon de ang ta gwen wenyaka zen de dowala insa zersalsa sonen hap gubiridal. Hwëna man sap nakablal."

⁴¹ Yesus ki zep gubiridaka, "Eiwa, angkam de zini em ei nibarena hom tangan! Em in nol drak-drak enna. Èe san èse nakaë sap emsa golèlowehe gwek! Èe ama bae-ban mae de holokam golèlowehe gwen naye. An san emki wasalna insa zer halzan."

⁴² Wasalna tola in kim song gwe'an zaka, zao zep dowala in karekkam zerheirki, dekon zep yal-yal gwe se'anka. Yesus ki zep jala ban zëbon onakon de wet son hap gubluka, dekam zep hëndep dawem gweka. Ki zep hwëna bi zem insa gubluka, "An dë- eno wasalna naye. Mes dawem gwenda."

⁴³ Zi trana in man tangan ètenggwan, hen man èguk, "Eiwa, Alap mo sosonna mam tanganna!"

Yesus kim etan Zën de tìn hip dena tonbiridakake:

(Mat. 17:22-23; Mrk. 9:30-32)

In kim zini nama Yesus mo owas syal gwe-gwibin hip ètenggwan tine'ak, ki zep hwëna dua-blaskam de zini insa gubiridaka,

⁴⁴ "Ola an ing uk. Bahem awe hli yun: Ngatan zi mo lang nakore Zi Tanganna Asa sa jal zi mo tahanak dep tapbla dazim."

⁴⁵ Hwëna zère hon de ang ta gwen wenyaka in hom tame nuk. Banakan mes yap zè gweibiridaka, zep tame nul srëm gwek. Man sap tame gun hup dei gwibik, hwëna takensiblin hap man nairiblak.

Dua-blaskam de wenyaka kim mae hap èol gwekke, "Diki èe amaka nère mae onakon mam gwe'an."

(Mat. 18:1-5; Mrk. 9:33-37)

⁴⁶ Dua-blaskam de wenyaka ki zep zën mae hap èol tetek gwe'ak, "Diki èe amaka nère mae onakon mam gwe'an."

⁴⁷ Hwëna Yesus mes zëno mae mo èol gwenna insa tame gulku, zep wasalna tola zerhal zaka. Ki zep zère mo alp nakon zaun hup gubluka.

⁴⁸ Ki zep hwëna gubiridaka, "Zini men zen de ano bose hap aha zisi mas gwebla'anka- sap anakare wasalna tol maesa, Èe asa desa enlala gweblal, 'Zen Asa mas gwebla'ara.' Hen zi de Asa mas gweblanna, Alap men Zen Asa zer soneka, Zen sa zini insa enlala gweblala, 'Zen hen Asa mas gwebla'ara.' Zep zini men zen ebon mae onakon babu gwen zi mo kim lowehe gwenan, ki zen zen Alap mo nwenak èmam gwe'an."

⁴⁹ Ki zep hwëna Yohanis gubluka, "Bian, èe ama zisi hla lak- eno bosekam de dowalsalna golèalsalna sone gwennak. Èe zebè jalse èblak, sap zen nèbon mae de ang gwe-gwen naka hom."

⁵⁰ Yesus ki zep ding gulbluka, "Em bap jalse èblak, sap zini men zen emsa baes gwibiridan srëmna, zen zen- ebon mae onak dep denaye."*

Yesussu kim langna Samaria mo è nakon baes nèblakke:

⁵¹ Mes golek de gwe'ak- Yesus dikim okamana ansa hli yun hup, dekam zep Yerusalem san dep golèsek gwe'anka. Zini sap zè trutru nul gwebla'ak, "Yerusalem san bahem song gwen." Hwëna hom salbiridaka.

* 9:50 9:50 Mrk. 9:38-40

⁵² Dekam zep zini lup gul soneka-Zënaka de langna Samaria mo ë san dep ngeirblin hap, zao de zisi de takensibiridan hap, “Nara wëhë gola kon Yesussu zer in'inka?”

⁵³ Hwëna ëna iwe de zini Yesussu de zer irin hip man baes tak, sap zen mes anakan tawa nëblak, “An Yerusalem san dep song gwe'ara.” †

⁵⁴ Kirekam kim ësak, Yakobus ne Yohanis ne ki zep enblaka, “Bian, em wëhë dwam gwe'ara?- nen syauksu ngli nakon de ati gwezan hap abe gwibin- zao deka zini in ëhwasdek.”*

⁵⁵ Hwëna Yesus dekam zep lero gwizimki, ki zep jal gwizimki.

⁵⁶ Dekam zep kon aha ë san dep sek gwek.

Anakare hap de ol: Zini kire hap Yesussu ang nëbla srëm gwek.

(Mat. 8:19-22)

⁵⁷ In kim nama golëtën da'anka, zini ki zep Yesussu gublu zaka, “Bian, men desane ki të gwe'anka, ëe asa Emsa ang gweblanda gwer.”

⁵⁸ Ki zep ding gulbluka, “Gwenya witr zem ki. Hen mawana zol zem ki. Hwëna ngatan zi mo lang nakore Zi Tanganna ano ni ta gwen gola hom.”

⁵⁹ Hwëna ahanaka zep sap gubluka, “Em Asa ang gwebla.”

Hwëna zini in man ding gulbluka, “Bian, ëe asa hëndep. Ki ano bian de tinkim, nara molya drë nwanuka.”

⁶⁰ Yesus ki zep ding gulbluka, “Zen zi tokna dikire zi tok bose zik kang nulne gwek. Em hwëna dekam ola ansa anakan gol halada, ‘Angkam Alap man nësa de irik ginkim kon gwisibir hana'ara.’ ”

⁶¹ Ahana hen zini ki zep Yesussu gublu zaka, “Bian, ëe ama Emsa de ang gwe-gweblan hap dwam gwe'an. Hwëna nonol ëre mo iye osan dep anik song gwek- aumwa olsa de hli yulzimdin hip.”

⁶² Ki zep ding gulbluka, “Zi de Alap mo nganak syalsa kon gwesibir hananna, hwëna zen de lure san denaka lero gwesibir kinï gwenna, zen hom dakasti'ira- Alap mo irik ginnik de syalak de mas gwen hapye.”

10

Yesus kim zini tuju-pulu enkam dam tasibirkike:

(Mat. 10:1-14; Mrk. 6:7-11; Luk. 9:1-5)

¹ Bian Yesus ki zep etan ahakore zisi dam tasibirki- tuju-pulu enkam, ki zep gubiridaka- dan-dan dan-dankam de ë-ë san Zënaka ngeirblindan hap, Zëna men desan amjanbiridan hap kalang gwekake.

² Ki zep ola gulk sun blaonzimki, “Nga yala awe de obwagana mes mamkam bil gwera, hwëna men zen de taran hap dena dan en tangan. In zep Nga Bi naka em abe ta gwen-Zen deka zisi ngana awe de syal ta gwen hap lup gul sone gweka.

³ Dekam sek gwek. Emki ëenlala gwen: Èe domba makare sosen srëm nakaë emsa lup gul sone'an-gwe tihï jal-jal ngirin sin dep.

⁴ Dompetna bahem bitï tan. Honna hen bahem wëwek tan. Sepatuna ala son enna kim em sek gwen. Aha maena bahem kap tan. Men zao debë emsa teisy sone'an, bahem oranak yausuk song gwen-aha zi maesa de zertowenkamye.

⁵ “Men zao gola li'inka, nonol em en kinin, ‘Dawem. Em Alap mo taha terenake lowe he'an.’

⁶ Zao de Alap osan dep de hohle gwen nik gwë'anka, ki eiwa zao esa Alap mo taha terenak dawemkam lowehe gwer. Kire nik de gwën srëmkam, ki emki enbirida gukhan, ‘Èe mensa nonol emsa enbiridan,

† 9:53 9:53 Samariak de zini, zen Yahudi tangansa hom. Zen men zen orep aha zi ausu naban ësiri gwekke, zep Yahudi tangan han man zënaka ngil-ngil neibirida gwek. (Yoh. 4:9) Yesus Yerusalem san dep golësek gwe'anka, zep man dam dasik, “An Yahudi wal.” * 9:54 9:54 2Raj. 1:9-15

Alap mo taha terenak de sap lowehen hap dena, ki awe molya ki lwak.'

⁷ Men zao gola linnī, zao en em ěn. Tembanena mensa ep golzimdinni, desa en emki olgwenblandan. Sap tembanena in, zen eno nik mo tawa tabin hip de tembane. ěna iwe de nama ěnnak, dekon bahem etan aha zi mo gol dawem san dep al ěhan.

⁸ Em de ěnak aptankam, dekon de emsa dawemkam teisya irinni, mensa ep tembanena taiblin gilzimdinni, emki olgwenblandan.*

⁹ Hen zěwe de zi sang-sang ěgwěnna, emki dawem labin. Deban hen emki anakan aīsīl eibiridan, 'Alap angkam man kon gwesik hana'ara- teipsinkim de něsa irik ginkimye.'

¹⁰ Hwěna aha ěnak de aptanna, zao de zi de emsa baes gwizimdinni, ora bol san em wet oson, dekon em enbirida gukhan,

¹¹ 'Eno mae mo ěna awe de sonna men zen ano nik mo tana ulpnuk makan gwer, ěe ama desa etan taik-tik oso guk halan- em dikim anakan tame gun hup, "Alap angkam man sap kon gwesik hana'ara-teipsinkim de něsa irik ginkimye. Hwěna em ema desan de ang tan hap baes ta'an!" ' ' "

¹² Yesus ki zep waulsuzimki, "ěe ama emsa gubirida'an: Aumwa hap de zisi klis gunnuk, Alap ěna insa anakan sa enlala gweblala, 'Zen orep de ěna Sodomk de zisi ěkarek gwenkam man kwei-kwik nuk.' Zep men kirekam Alap orep Sodomk de zisi zěre mae mo karek-karek hap heip gulku, hwěna ano lup gul sonen zini emsa de lup gul irin srěm zini, desa aumwa hap de klis gunnuk sěrkam tangan sa karek tabiri."*

Mae hap de ol: ě-ěna men zen Yesussu daiblibla srěm gwe'ak,

* **10:8 10:7-8** 1Kor. 9:7-9; 9:14; 10:25-27; 1Tim. 4:3-5; 5:18 * **10:12 10:12** Kej. 19:24-28 * **10:13 10:13** Yes. 23:1-18; Yeh. 26:1-28:26; Yl. 3:4-8; Am. 1:9-10; Zak. 9:2-4 * **10:16 10:16** Mat. 10:40; Mrk. 9:37; Luk. 9:48; Yoh. 13:20

zěbon mae a kirekam sa lwal.
(Mat. 11:20-24)

¹³ "ěna Korazim hen Betsaidak de zi, em ěngalap gwen, sap Alap sa emsa sěrkam karek tabiri. ě darena Tirus hen Sidonk de zini insa Bian orep heip gulku, zen maka ěhalek- owas-owassa de hlaul gwenkamye, an kire owa'aě eno mae mo ngirinnik syal gwegwibi'inye. Tirus hen Sidonk de zini maka bunsu de awabin niban kaen karonsa darak dak- dekam de zěnaka anakan golětrěn hap, 'ěe ama ěhale'an.'*

¹⁴ Hwěna angkam de ě darena, Korazim hen Betsaidak de zini, em an bějen em ěhalen! Zen in zep, Alap de aumwa hap zisi klis gunkum, eno mae mo angna sa tangan sěrkam karek tabiri. Hwěna ěna Sidon hen Tirusk de zi mo angna, desa de etan karek tabin hip dena sa jahalha gwer, sap zěbe mae hap hom Alap golzimki- dekam de ano owas-owas syal gwibinsi hlaul gwen hap denaye.

¹⁵ Kapernaumk de zini, em hen kirekam. Em ema ěkil gi'in, 'Sap Yesus owas-owasna beyakam něno mae mo ěnak syal gwegwibirida, zep něsa sa Alap ngatan zi mo lang san dep dawemkam kang gul sera.' Bějen. Emsa hen syauk blanak sa yal gul sera, sap em home Asa laiblibla'an."

¹⁶ Ki zep zěre hon de ang ta gwen wenyaka gubiridaka, "Zini men zen emsa salbiridanna, zen hen dekam Asa nasalbla'an. Zini men zen emsa baes gwibiridanna, zen hen dekam Asa baes něbla'an. Hen zini men zen Asa baes gweblanna, zen hen Bian Alap, men Zen Asa zer sone zaka, Desa hen baes něbla'an."*

Tuju-pulukam de lup gul sonen zini in kim etan lwan dahal zakke:

¹⁷ Tuju-pulukam insa zini lup gul soneka isrip-sri tangan naban

lwanda halzak, ki zep Yesussu nen-blazak, "Bian, sap dowal-dowal maena, eno bosekamë olëalsa sone gwibik!"

¹⁸ Ki zep ding gulzimki, "Em kime kirekam syal ta'ak, Ëe ama dowal mo kigisa hla tak. Alap desa man kama san dep hiri ta ineka, dekam zep ngli ang tasik kinin makan zan zaka.*

¹⁹ Emki ësane gwen! Ëe mesë ebe mae hap sosonna golzimk- em dikim wanyasa zaubin hip hen dare-ëksa. Ëe hen mesë ebe mae hap sosonna golzimk- em dikim nëno mae mo jal zini dowal mo kigisa zauk gublu kinin hap. Zep angkam bana hom- emsa de zen karek tabin hip denaye.*

²⁰ Hwëna bahem anakan ësrip-sri gwen, 'Dowal-dowala man asa betek neibirida'an.' Diki mae hap em ësrip-sri gwen: Eno mae mo bosem-sena mes ngatan zi mo langnak ale nuk."*

*Yesus kim isrip-sri gwekake:
(Mat. 11:25-27; 13:16-17)*

²¹ Dekam zep Alap mo Enhona Yesussu isrip-srikam ing gwe heblaka, ki zep Alapsa gu soneblaka, "Bian, Em in Zen ngli naban okama naban irik so'arake. Ëe ama ep dawemsa golbla'an, sap Em ema ere mo irik ginsi de tame gun hup dena enlala blal wanya kip hen sekola sul sonen wanya kip aning gul gwizim'ira. Hwëna sekola srëm wanya kip hen enlala betek wanya kip ema goltrei gwizim'ira. In eiwa, Bian, zen kire tangankam ere mo dwam gwibin sin ki lwa'an."

²² Bian Yesus Zen hen dekam dua-blaskam de zini anakan tawa tabirki, "Tingare okamasa de bi gwibin hip de sosonna mes kitak Bian abe hap golblaka. Zini toton bëjen Tane zem Asa tame tan. Zen diki ère mo Bian en Asa tame ta gwe'ara. Hen ano Biansa nara dep?-

tame tan naye. Zen diki A enë tame ta gwe'an. Hen zini men zëbe mae habë dekam de ano Biansa tame tan hap dena gol gwizim'in, zen zen en angkam tame da gwe'an."

²³ Aha yaklakam kim zi beya naban golëlowe he'anaka, dekam zep dua-blas enkam de zini lero gwibiridaka, ki zep desa en gubiridaka, "Em hë'ho gwibinnike lowehe gwe'an, sap em ema ano syala ansa hla kul gwenan.

²⁴ Ëe ama emsa gubirida'an: Abare srëmnak Alap mo olsa de ayang gul gwizimdin hip de zini hen orep de teipsin-teipsin wanya beya nik sap hlaun hup ëdwam gwe-gwek- em an desae hla kul gwe'anye. Hwëna zen hom tol hla nul gwek. Zen man sap ësane gwen hap ëdwam gwe-gwek- em an desae ësane gwe-gwe'anye. Hwëna zen hom tol ësane gwe-gwek. Zep em hë'ho gwibinnike lowehe gwe'an."*

Gulk sun de ol blaonzimdinni an, Samaria walya in zen wal bose zemka kwasang gweblakake:

(Mat. 22:35-40; Mrk. 12:28-34)

²⁵ Musa mo titi tabin olsa de tawa ta gwibin zini ki zep Yesussu de akasiblin hap hata zaka, ki zep takensiblika, "Bian, ëe basa asa syal gwibir?- ëe dikim hëndep de gwën hap denaka gul irin hipye."

²⁶ Yesus ki zep hwëna takensiblika, "Mensa Musa zëre mo titi tabin olak ale gulku, em banakarekame desa dam gulsu'ura?"

²⁷ Zini in ki zep ding gulbluka, " 'Bian Alapsa em ensa lwa gweblan-

tingare enho naban, enlala naban, soson naban, hen tim niban.'

Ahana hen,

'Zi bose omka em kwasang gwibirida gwen- san de enaka de kwasang gweblanna kiye.' "*

* **10:18 10:18** Yes. 14:12; Why. 12:7-9 * **10:19 10:19** Mzm. 91:13; Yoh. 10:27-28; Rom. 8:28-39

* **10:20 10:20** Why. 3:5; 20:12 * **10:24 10:24** 1Ptr. 1:10-12 * **10:27 10:27** Ul. 6:5; Im. 19:18

28 Yesus ki zep ding gulbluka, "In eiwakame ding guluda. Zen kire enkam syal gwe-gwe, dekam esa hëndep denaban gwë gwera."*

29 Hwëna zini in man dwam gwe'anka- dekam de aha zi gublun hap, "Zini in eiwa aïris." In zep etan Yesussu takensiblika, "Ki ano wal bose walya endanna- ëe de desa en ensa lwabirida gwen hapye?"

30 Yesus dekam zep desa de goltrëblan hap ola gulk sun blaonblaka, "Yahudi walya man Yerusalem kon Yeriko san dep tine'anka, hwëna oranak zep te-ala hap de ëasas-asas gwe-gwen zi karek dak. Kire-kirena man kitak alal dablak- hëndep pakean mae naban, zao zep dangolek, hëndep sap-sap naka zep zë hli dak.

31 Hwëna ki zep hen Alap mo golak de syal gwe-gwen zini orana in san taman'an zaka. Zao zep zini insa hla ta zaka, hwëna alp san lë tabla ine kinika.

32 Etan ahana zini orana in desan song gwe'an zaka- Lewi Bak mo ausu nakorena. Zi ausuna in sap hen Alap mo golak de syalak mas ta gwenan, hwëna kim zini insa hla ta zaka, ki zep hen alp san lë tabla ine kinika.

33 Hwëna Samaria walya ki zep hen desan taman'an zaka. Zen sap Yahudi walsya hom,* hwëna kim zë zini insa hla ta'an zaka, mam tangankam kwasang gweblaka.

34 Ki zep golek de ta zaka, weiweina anggur hokam ngan tasibir-blin daka, hen minyakkam dra tan daka. Ki zep tahalebir-blika. Dekam zep zëre mo keledainak drëne seka, ki zep te-alakam de bohë ta gwen ni tan gol san dep zersong gweka-zëwe de etan mas gweblan hap.

35 Ka'ankam zep gol bina in hap te-alana seratus ribu enkam golblaka, hen deban gubluka, 'An dekam mas gwebla. Hen an de sowehen srëmkam, ëe asa lwahal zankam ep mas gulblul.' "

36 Yesus ki zep Musa mo olsa de tawa ta gwibin zini insa takensiblika, "Eno dam gulsunkum, zi dan-aharena in kon, nara wal bose zem makan enna lwablaka- zini in zen oranak karekna goltowekaye?"

37 Ki zep ding gulbluka, "Zini in zen kwasang tola ban mas gwe-blaka, zen zen."

Yesus ki zep ding gulbluka, "In eiwa. Zep em hen kirekam syal gwe-gwe."

Yesus kim Marta ne Maria nebon zini gwekake:

38-39 Yesus dekon kim zëre hon de ang ta gwen wenyä ban golësek gweka, ënak zep yaïng gwëk. Zao wenyä bosena Marta oso zem Maria han Yesussu zëre nik mo gola kon eirink. Maria zen Yesus mo alp nakon nikin'ik- dekon de zëno tawa tabinsi sane gwen hap.

40 Hwëna aya zem Marta man tangan syala taha-taha gwibi'ik-tembane maesa de syal gwibir-zimdinkim. Ki zep Yesussu gubluzak, "Bian, em ba habe zë Mariasa kara gu'ura? Èe an zebë a-en hwëna syala taha-taha gwibi'in. Em gubin- asa deka mas gwibirzik."

41 Bian ki zep ding gulbirki, "Marta, Marta, em ema enlalana men-san an-sankam beya gwe'ara.

42 Hwëna sap dwam gwibin tanganna aha-en. Maria mes zën dawem wenyäka iti-ti gilsil, zep Èe molyë gubik- desa de hli yun hupye."

11

Yesus kim ol gu sonenna tawa tabirkike:

(Mat. 6:9-13; 7:7-11)

1 Aha yaklakam Yesus Biansa gu soneblaka. Kim hya gwesiki, ki zep hwëna zëre hon de ang ta gwen wenyä in ahanik gubluka, "Bian, asa Emki hen ol gu sonensa tawa tabin-men kirekam baptis ta gwibin zini

* 10:28 10:28 Im. 18:5 * 10:33 10:33 Emki Luk. 9:52-53nak hlaun, hen zëwe de otde ale naban.

Yohanis Swe zère hon de ang ta gwen wenya tawa ta gwibirkike.”

² Yesus ki zep ding gulzimki, “A kirekam em ègu sone gwen:

Bian, dikire eno bosena teip nulsuk gwek.

Diki okamana awe Em hen irik gulin.

³ Abe mae hap tembanena mwinmwankam gol gwizim.

⁴ Ano mae mo karek-karekna ap tap gulsuzim,

sap karek-karekna mensa aha zi abe mae hap nol gwizimnin, èe ama desa eititi ei gwibirin.

Hen asa de akasibiridannak bahem nwe enkam asa kara ta gwibin.”

⁵ Ki zep etan Yesus ayang gulzimki, “Hwëna emki èenlala gwen: Eme ki ahanik wal bose uk mo gol san ngirin tatem song gwe'anam- zao de abe tan hap, ‘Wal bose, abe hap tol tembanena golbla.

⁶ Ano aha è nakore wal bosena nër hom ano golak tilin zala, hwëna ano tembanena hom- zèbe hap de desa golblan hapye.’

⁷ Hwëna wal bose om in maka ep ding gulblu'ara, ‘Bahem asa blostablan. Lilikinni mesë solhlasindal, hen èe ama walas naban nisi golëtruwe'an. Èe molyë luwek- ebe hap de tembanesa golblan hapye.’

⁸ “Èe ama emsa gubirida'an: Zini in sap hom anakan dwam gwe'ara, ‘Zen ano dokot. Èe anik mas gweblak,’ hwëna eme saher ing gul sonen srëmkam aberbe ta tine'anam, zen hëndep dekam maka luwe'ara. Em men desae zëbon dwam gwibi'inam, hëndep dekam maka ebe hap golbla'ara.

⁹ Zen in zebë emsa gubirida'an: Em Alapsa aberbe ta tine gwen, dekam sa ep golzimdi. Em teibir tine gwen, dekam esa hëndep hla kul. Lilikinsä em ga'ga so tine gwen, dekam sa ebe hap lilikinni talusuk gwizimdi.

¹⁰ Sap zini men zen abe gwegwenna, zen gul irinkim. Men zen tei gwibinni, zen hlaunkum. Hen men zen lilikinni ga'ga so gwenna, zèbe hap talusublunkam.

¹¹ Ere mo tane de emsa hogwe hap abe ta'anam, san ha emaka wanyana golbla'ara?

¹² Ayang sik hip de emsa abe ta'anam, san ha emaka dare èksa golbla'ara?

¹³ Em sap jal-jala, hwëna eno anakare kwasang enlalana hen ki, ‘Èe anik dawem naka ère mo walas hap golblak.’ Hen kirekam- nère mae mo Bianna ngatan zi mo langnak de Zini: Desa de abe tankam Zen dawem naka gol gwizimnira, hëndep zère mo Enhosa hen hlë ta sone gwizimnira.”

Farisikam de gubirida gwen zini kim Yesussu zi tra mo inik anakan donsublu'akke, “In dowal mo sosonkam syal gwe-gwe'ara.”

(Mat. 12:22-30; Mrk. 3:22-27)

¹⁴ Aha yaklakam, Yesus ol ton gwen srëm zi nikon dowalsa zersala soneka. Dowala in kim wet soka, zini in dekam zep ola tonka. Zi trana in zen zao lowe he'ak man tangan dengwanbla'ak.

¹⁵ Hwëna Farisikam de zini ki zep zi trana in mo inik èton'anzak, “Zèbe hap mes dowal mo kigina Beelzebul Bak sosonna golblaka, in zep zëno sosonkam aha dowal-dowala zersala sone gwibi'ira.”

¹⁶ Hen ahakon, men zen Yesussu saher tan hap dwam nèbla'ak, zao hen lowe he'ak. Zen zep abe dak, “Emki ngli nakore owassa ap syal gwibir-zimdin- èe akakim emsa dam lasik, ‘An eiwa Alap zer soneka.’ ”

¹⁷ Hwëna Yesus mes zëno mae mo enlalana tame tazimki, ki zep ola gulk sun blaonzimki, “Aha-ere irik gin nik de hlik-hlik gwe'anam, zën de èeija'anam, zen molya ètatete gwe'anam. Nabakam maka zënaka timbwas nu'in. Hen zënaka de gil-gil gwibiridan nakon de aha-ere

golak dinik hliwe'anam, zen maka hēndep sekwak gwe'an.

¹⁸ Zep hen kirekam, dowal mo kigi mo irik gin nik de hliwe'anam, etan zēnaka de golēeijan hap, zen molya ēholo gwe'anam. Zep Ēe dowal mo ssonkam homē dowal-dowala zersa sone gwibi'in- in kirekame asa lonsublu sanye.

¹⁹ Ki ahakore Farisikam de zini zen hwēna nara mo ssonkam nakasik gwibirin?- dekam de dowal-dowalsa golēalsa sonebin hipye. Zep ere mae mo ahakorena in maka emsa anakan nenbirida'an, 'Em ema ēkarek gwer- kirekam de Yesussu tonsublunkamyē.'

²⁰ Hwēna Ēe dowala Alap mo ssonkamē zersa sone gwibi'in. Zen dekon zep anakan dam gweš'in, 'Alap Zēn de irik gilzīn hap angkam man sap kon gwisibir hana'ara, hwēna em ema desan de ang tan hap baes ta'an!'

²¹ "Sap Ēe dowal mo kigi mo bi gwibin kire-kire dawemsaē jal zi mo kim alal ta gwebla'an. Zi jal-jal de zēre mo golsa kara ta'anam- gwetap tangal inen naban, zēbe hap de jal zini na-en molya tī'in zanam.

²² Zini in dekam maka zēnaka anakan enlala gwebla'ara, 'Jana ngi ben-ben hap sa asa aīriblala.' Hwēna zēno jal zi mo sson de taman kini'anam, zen maka golak tīblī'an zala, hen maka zēno jana tanena insa alal tabla'ara. Dekam sa jal zini in zēno kire-kirena alal tablala, hen dekam sa zēre korena kip kae gwebla-zimdi. Ēe hen kirekamē jal zi mo kim awe gwē'an, zebē dowal mo kigi mo irik gin nikon zisi alal gul gwe'an.

²³ Hwēna em de Asa zerzaun srēm kam, em ema aban ērdarak gwe'an. Hen em de Asa mas gweblan srēm kam, em ema ano syala tru-tru u'in."

Dowal de etan lwa halzan hap de ol:
(Mat. 12:43-45)

²⁴ Yesus ki zep tawa tabirki, "Dowal de totoresa zi nikon wet sonna, dekam gwana-gwana san sa hakalada gwera- zao de aha zi maenak tin hip. Hwēna aha maenak de tin srēm kam, dekam sa dowala in enlala gwera, 'Ēe asa etan ēre mo gol hli tan san dep lwahal.'

²⁵ Kim de lwa ha'an zaka, gola insa anakan sa hla ta zala, 'O ano ēpba gol gwē gwenna mes tangan gol bina oto tasiki hen ngan tasiki.'

²⁶ Dekam sa dowala in song gwera- aha dowalsa de zēre onakon de jal-jal taman kinin tangan naka tuju enkam kwang guluda halzan hap. Deban kim de zini iwe golēbiti gwe'an zaka, zini in mo gwēna dekam tangan sa karek gweblal-nonol gwēn nakonye."

Mae hap de ol: An zen hē'ho gwibinnik lowehe gwenan.

²⁷ Yesus kim kirekam gubiridaka, wenyā ki zep mamkam gu anek, "Wenyā men zen emsa jaha gwek hen momkam taizi gwēk, zen eiwa hē'ho gwibin nika hlauk."

²⁸ Ki zep ding gulbirki, "Sap eiwa, hwēna diki zini men zen Alap mo ola ēsane gwe-gwenan hen syal nei gwibirin, zen zen hē'ho gwibinnik lowehe gwenan!"

Mae hap de ol jalse gwen: Sap Yesussu mes owassa de syal gwibir-zimdin hip abe dak.

(Mat. 12:38-42; 16:4; Mrk. 8:12)

²⁹ Zi trana kim etan ēmas-mas gwe-gwe'anzak, ki zep etan ayang gulzimki, "Angkam de zini em eiwa jal-jal tanganna. Em hwēna owassa de ebe mae hap syal gwibir-zimdin hibe Asa aberbe la gwenan. Hwēna angkam bējēnē syal gwibir-zimdin. Diki ngein sin de yaklanak asa aha-en syal gwibir-zim: Men kirekam Yunus hon lwakke.

³⁰ In kirekam owasna ē yala Niniwek de zi hip Yunus Bak hon lwakke, orapna dan-ahan de hogwe ungala mwanak gwēnkam, ngatan zi mo lang nakore Zi Tanganna

Abon hen kirekam sa owasna lwal-
angkam de zini em de hen hlaun
hupye.

³¹ Alap de aumwa hap angkam
de zini emsa klis gunnuk, selatan
kore teipsinkim de wenya in, zen
sa hen olsa de mas gun hup zaul-
men zen orep teipsin zini Salomo
Baksa duwebla zakke. Zen dekam
sa anakan emsa swrë tabir, 'Èe
ama langa en nakon Salomo mo
enlala blala kore olsa de sane gwen
hap hatak. Hwëna ebon mae onak
kim ngatan zi mo lang nakore Zi
Tanganna hataka, em hwëna ema
asalsik gweblak.'

³² Hen kirekam, Alap de aumwa
hap angkam de zini emsa klis gun-
nuk, dekam Niniwek de zi mo angna
sa olsa de mas gun hup ëzaul. Zen
dekam sa emsa anakan swë dabir,
'Yunus Bak kim ëhalen hap de ola
ban abon mae golhataka, ëe dekam
ama ëhalek. Hwëna ebon mae onak
kim ngatan zi mo lang nakore Zi
Tanganna ëhalen hap de ola ban
golhata zaka, em hwëna ema ëhalen
hap baes tak.' "

*Enho nik de kawesik gwen srëm
hap kim ola gulk sun blaonzimkike:*

³³ Yesus Zen kirekam ola gulk sun
blaon gwizimki, "Zini hom pelita
ngatannak yuna utuk nul sone gwe-
nan- dekam de ngatanna insa aning
gun hupye. Zen diki meja maenak
nonne gwenan- dekam de ngatan-
nak zini zi niban golëteinikirin
hipye.

³⁴ Nwena zen tim hip de lilikin-
enho dikim ngatan gwen hap. Nwe
nik de lalak nënna, dekam enhona
hen ngatanna. Hwëna nwe nik
de hai nënna, enhona hen kawesin
tanganna.

³⁵ In zep nwekam dawem enkam
em ëkara gwe-gwen. Eno mae
mo ngatanna in mana kawesin hip
jowenank.

³⁶ Enlala kawesin srëmkam de
enho ngatan gwenna, eno gwëhan

san dekam ngatan en sa lwa gwer-
lampu de zil inen makan."

*Farisikam de zi hip de ol jalse
gwen:*

(Mat. 23:1-36)

³⁷ Yesus kim aisil tonbiridanna
golzausuku, Farisi walya ki zep zëno
golak de golëtembane tan hap abe
taka. Yesus ki zep golëbiti gweka-
zao de tembane tan hap.

³⁸ Farisi walya in man zë Yesussu
tenggwanbla'anka, sap Zen hom
tembane gwen hap de nonol tahasa
su tazimdin sin ang gwe'anka-
men kirekam Yahudi mo auyan-aza mo
ëpba olak lwakye.*

³⁹ Hwëna Bian Yesus zep ding
gulbluka, "Eiwa, em an Farisikam
de zini eno mae mo lowe henna
mae makan: San de zi de piring-
moksä ë-en nakon ngan tasik gwib-
inni, hwëna olk san bëjen. Ere
mae mo timni hen kirekam. Em
sap ema tahan sopna ngan lasik
gwibirin, hwëna olk kon eno mae
mo enhona mes beya gweka-
kire-kire beya gwen hap de hole-hle en-
lalakam hen jal-jal enlalakam. Em
ema desa de hen ngan tasin hip baes
ta'an!

⁴⁰ Em an eiwa enlala joblo-top tan-
ganna! Alap mes ki syal gwibirki-
tahan nakon dep dena insaye. Hen
olk kon dep dena mes syal gwibirki.
Desa hen man kara gulzim'ira.

⁴¹ In zen eno mae mo enhonak
kire-kire beya gwen hap dena
lwa'an, desa eititi eibik. Dekam
ere mae mo kire-kirena tahalha
wenyaka kim kae eibiridak. Zen
dekam sa eno mae mo timni hëndep
enho naban Alap mo nwenak ëngan
gweher.

⁴² "Farisi zi, kwasang tol! Em
ëngalap gwen, sap em karekna
mam wenyaka esa oltower. Em sap
ema nganak de kire-kire betekna
Alap hap de hlikna ol gweblanan,
hwëna Alapsa de ensa lwablanna
hen zi bose omka de dawemkam
golëlowe henna, desa ema eititi ei

* 11:38 11:38 Mrk. 7:2-4

gwibirin. Zen diki zen- bol-zaun tangan wenyaye. Zen diki nonol desa emaka syal ei gwibirin. Zao etan nganak de kire-kirena insa lun em hen mas gul gweblan.*

⁴³ Farisi zi, kwasang tol! Em ëngalap gwen, sap em karekna mam naka esa hla kul. Em but srëm gol-golak ngeinnik de komal tum dawemnak de teinikirin hibe ëdwam gwe-gwenan. Hen em ema ëdwam gwe-gwenan- zi de tagal gwen maenak anakan emsa gubirida gwen hap, 'Dawem, bian guru.'

⁴⁴ Em karekna mam naka esa hla kul. Em in men kiye- gol taublun srëmkam de zi tok drë nwanunna. Desan de zi song gwenna, dekam bëjen tame gun, 'Ëe zi tok tahan sanë zauk ane kinil.' Zep em hen kirekam. Zini man emsa tim di gwibirin, 'Zini an dawemna,' hwëna enhona ase naban."

Musa mo olsa de tawa ta gwibin zi hip de ol jalse gwen:

(*Mat. 23:1-36; Mrk. 12:38-40; Luk. 20:45-47*)

⁴⁵ Dekam zep hwëna Musa mo titi tabin olsa de tawa ta gwibin zini gubluka, "Bian, insa kirekam Farisikam de wenya jalse gwibiridala, in asae hen lamang tabirida!"

⁴⁶ Yesus ki zep hwëna ding gulbluka, "Kwasang tol, em hen Musa mo titi tabin ol tawa ta gwibin zini! Em ëngalap gwen, sap em hen karekna mam naka esa oltower. Eno mae mo tawa tabinni man nwe-mase gwe-gwenan- san de zi de aha zi hip nihin dohon-honsa mam enkam wëwek ta sone gwiziminni kiye. Sap em ema Musa mo titi tabin olak etan ere mae mo aha titi tabinsi mas-mas ul zahe gwenan, zep tangane hëndep dohon-hon la gwibirin. Ena hwëna home desan ang ta gwenan.

⁴⁷ Em ëngalap gwen, sap em karekna mam naka esa hla kul. Sap em in zi tamera gwen zi mo weiwik gun walas! Eno auyan-azana Alap mo olsa de ayang gul gwizimdin hip de zini man damera gwëk. Em hwëna angkam desa de lo tasik gwibin golsae sam-sam la gwibirzim'in.

⁴⁸ Hwëna em insa kirekam syal ta gwe'an, zen man nwe-mase gwe-gwe'an- san de auyan-aza oban de anakan enlalasa siri tanna kiye, 'Em sap esa lamera gwer. Ëe asa hwëna lo lasik gwibir.'

⁴⁹ Zen in zep Alap zëre mo enlala blalkam guku, 'Ëe asa ëre mo olsa de ayang gul gwen hap de zisi lup gul sone gwizim. Ahakon sa karek da gwibir, hen ahakorena sa damera gwer.'

⁵⁰⁻⁵¹ Zen in zep sa Alap angkam de zini ebe mae hap karekna sërkam golzimdi- kitak de zëno ol ayang gul gwen zisi de tamera gwen hap de karekna, nonol lonesen nakon hëndep angkam dena. Nonol lonesen nakon kim Kaen Bak Habelsa taka, dekon hëndep eno auyan-azana Alap mo ol ayang gul gwen hap de zini man damera gwëk, hëndep aumwa hap Zakaria Baksa Alap mo gol mwanak dak. Zen Alapsa de aïriblan srëmkam Alap hap de tweran nin ang gulsuk gwëblan kals alpna dak. Ëe ama emsa gubirida'an: Kitak de zi tamera gwen karekna insa Alap mes lam gulku- dekam de otan ere mae hap ngëro gulzimdin hip! *

⁵² "Musa mo olsa de tawa ta gwibin zini, em ëngalap gwen, sap em karekna mam naka esa hla kul! Em sap Alap mo nwenak dikim ësam gwesin hip de orana tawana, hwëna em home desan ang ta gwenan. Hen zini men zen sap desan

* **11:42 11:42** Im. 27:30 * **11:50-51 11:50-51** Zakariasa men desa Yesus awe gubluka, zen baptis ta gwibin zini Yohanis mo biasa hom enlala gweblaka. Zen hwëna apde bose zem- Alap mo olsa de ayang gul gwizimdin hip de zi. Zen diki desa orep Alap mo golak de kals alpna dak. Yahudi zi mo Ibrani olkam de Alkitabnak, nonol tangan Habelsa aya zik taka (Kej. 4:8), hwëna zëno mae mo aumwa hap de bukuna Zakariasa dak. (2Taw. 24:20-22)

de ang tan hap ödwan gwe-gwenan, hwëna eme zëbe mae hap orana layalsik gwizimnin.” †

⁵³ Hëndep dekon, in kim lwasek, dekam zep Musa mo titi tabin olsa de tawa ta gwibin hip de zi niban Farisikam de gubirida gwen zi niban zi tra mo inik Yesussu sërkam don-suk gwebla'ak. Hen dekam zep u siweblan hap dakensibli tine gwëk-

⁵⁴ anakare enlala naban, “Zëno ol-gun mae de karek gwe'ak, dekam esa klak lal.”

12

Èk enkam de syal gwe-gwen srëm hap de ol:

(Mat. 10:26,27)

¹ Dekam zini mes ribu-ribukam Yesussu tagal nëblazak hen ngirin da'ak, hëndep man zë zënaka nyaubirida gwe'ak. Dekam zep nonol zëre hon de ang ta gwen zi ensa gubiridaka, “Dawem. Ema Farisi zi mo èk enkam de tawa tabin sin ang tanank. Zëno mae mo karekna in, zen ragi makan mam gwe-gwenan. *

² Mensa zini ber-ber nul gwenan, zen sa lamkam wet sol. Mensa enlalana aning da gwenan, zen sa lamkam tame dal.

³ Em mensa angkam kawesinnik lon gwibi'in, zen hwëna lamkam yaklam sa ësane gwe-gwer. Hen mensa gol mwanak i mwa ennak lon sonebirida gwe'an, zen hwëna lamkam ënak sa ol mam-mamkam donbirisen gwer.”

Mae hap de ol: Alap ensa em aïri gweblan.

(Mat. 10:28-31)

⁴ “Wal bose wal, zi bose omka bahem aïribirida gwen, sap zen auhukama tim en naka damera gwenan. Hwëna tan hyanak bëjen emsa etan karek tan.

⁵ Hwëna Èe ama emsa gubirida'an: Diki Alap ensa em aïri gweblan. Sap zen zëno dena- tan hyanak de syauk blanak emsa tak ta irin hip denaye. Zep eiwa, zen diki Desa en em aïri gweblan.

⁶ Emki mawana tainim bes-bessa enlala gwibiridan. Desa zini hom te-alakam de kap tan hap dwam neibirida gwenan. Sap eiwa kirekam, hwëna Alap bëjen aha-en mae desa hen eititi gwibiridan.

⁷ Hen kirekam, eno mae mo nol alana, Bian Alap mes desa anakan tawa gwibirki, ‘Beyana ki en.’ In zep ere mae mo tim hip dena bahem ëngalap gwe-gwen, sap em Alap mo nwenak mawana tainim bes-bes naban apdenak hom.”

Kristussu de aha zi hon kira tan hap de ol:

(Mat. 10:32-33; 12:32; 10:19-20; Mrk. 3:29)

⁸ “Èe ama emsa gubirida'an: Zini men zen aha zi hon zënaka anakan kira ta gwenna, ‘Èe an Yesussu de ang gwe-gweblanna,’ kire zini Èe asa hen Alap mo dam taha nakore zinik anakan kira tal, ‘Zen an hen eiwa Asa de ang gwe-gweblanna.’

⁹ Hwëna zi de aha zi hon Asa anakan nazabebela'ak, ‘Èe Yesussu de ang gwe-gweblan zisi hom,’ ki Èe asa desa hen aumwa hap de zisi klis gunnuk Alap mo dam taha nakore zinik anakan kira tal, ‘Zini an Asa de ang gwe-gweblan zisi hom.’

¹⁰ Ngatan zi mo lang nakore Zi Tanganna Asa de zi lamang ta'anka, karekna insa Alap maka zëbe hap tap gulsublu'ara. Hwëna zi de Alap mo Enhosa lamang tankam, desa Alap bëjen tangan tap gulsublun.

¹¹ “Emsa sa dahyo gwer- Yahudi mo but srëm golak de mam-mam wenyä kip de golëtrei gwizimdin

† **11:52 11:52** Musa mo olsa de tawa ta gwibin zini maekam Bian osan dep de orana dayalsik gwizimk: Zen auyan-aza zik mo titi tabin ola mamkam aha zi hip wei nul sone gwizimk, hen zëre mae mo enlala nakore naka mas nul gwizimk- men kirekam ayat 46nak Yesus jalse gwibiridakake.

* **12:1 12:1** Ragina desa man betekkam rotisa de syal gwibinnik mas nul gwenan, hwëna dekam zep mamkam hop gwe-gwenan hen bwap-bwap gwe-gwenan. Rotina ragi srëmkam bëjen hop gwen. Dekam drak-drakna.

hip, hen auhu-kamanak de teipsin-teipsin wenyä kip. Anakan sa emsa nolëtrei gwizim, 'An Yesus hon de ang ta gwen zi.' Kirekam de ebon mae lwankam, dekam bahem anakare hap enlalana ëbeya gwegwen, 'Ëe banakarekam asa zë ton hen ding gulzim?'

12 Sap emsa de taken-taken gweblan ennak sa ki Alap mo Enho ebe mae hap gol gwizimdi- em de kirekam ëton gwen hap denaye."*

Yesus kim te-ala beya zi enlala joblo-top hap ola gulk sun blaonz-inkike:

13 Ki zep zi beyana in kon ahanik Yesusu gubluka, "Bian, emki ano ayasa gublun- zen de bian swe mo kire-kire hli tan dansa abe hap hli tablan hap."

14 Yesus ki zep ding gulbluka, "Asa hom ki nenblak- mam zi mo kim de bian swe uk mo kire-kiresa ep klis gulzimdin hipye."

15 Ki zep etan tïngare zi hip ayang gulzimki, "Dawem. Banakare kire-kiresa de hole gwibinni, zen zen sa emsa karek tabir. Sap eno mae mo lowe henna, zen kire-kire beya ennak hom lwa gwenan."*

16 Yesus ki zep ola gulk sun blaonz-inkiki, "Orep ki zini gwë gweka. Zëno kire-kirena beya tanganna. Zëno kamanak mulkwan maena dawemkam hata gweka."

17 Ki zep zëre en hap enlala gweka, 'Ano nga nakore kire-kire kang ta gwen gol-gola an yak-yak naka hom-dekam de ëre mo mulkwan maesa zë kang ta gwen hapye. Ëe banakan asa syal gwibir?'

18 Ki zep etan enlala gweka, 'O angkam mesë dam gulsunun. Ëe asa ëre hon de syal ta gwen wenyaka gubiridal- kire-kire kang ta gwen gol-gola ansa de wet tyasibin hip. Dekam ahasa sa mam-mamkam daublul- zëwe de kang ta gwen hap.'

19 Zen dekam asa enlala gwer, 'Ëe an hë'ho gwibin nika de goltowe gwen zi. Ëe dekam na-en molyë tahalha gwëk. Angkam sap asa sëwe henkam gwë gwer. Tembane dërek-dëreksa asa twin gwibir, hen ho dëreksa asa otde gwer, hen ëre mo gwënna asa nga-ngol gwibir.'

20 "Hwëna Alap dekam zep gubluka, 'Em enlala joblo-topna! Namen mo kam dekam Ëe asa hwëna eno angna zersil. Hwëna dekam eno kire-kirena mensa ere en hap lam taka, aha zi sa bi nëblandal.' "

21 Ki zep etan Yesus aumwa hap gubiridaka, "In kirekam sa lwa gwer- zini men zen auhu-kamanak zëre en hap kire-kirena kang da gwenanye, hwëna zen hom hëndep de gwën hap de kire-kire dikim Alap mo nwenak ëbeya gwen hap syal ta gwenan."*

Alap en hon de yaïng gwe këni gwen hap de ol:

(Mat. 6:25-34; 6:19-21)

22 Yesus ki zep hwëna dua-blaskam de zëre hon ang ta gwen wenyä in en hap ayang gulzimki, "Zen in zebë emsa gubirida'an: Bahem anakan ëngalap gwe-gwen, 'Ëe banakan asa gwër? Ëe basa asa twin gwibir? Hen ëe basa asa ala so gwer?'

23 Sap eno gwënna zen tembane en nakon hom lwa gwenan, hen timni ala so gwen hap de en nakon hom lwa gwenan.

24 Emki mawana blensa enlala gwibiridan. Zen hom ba maena eiyas nïl gwenan, hen hom dan gwenan. Hen zëno mae mo tembane kang gul gwen gola hom. Hwëna Alap ki zëbe mae hap tembanena gol gwizimnira! Zep em bahem ëngalap gwe-gwen, sap em Alap mo nwenak mawa mo kim hom.

25 Em de ere mo gwën hap ngalap gwenkam, san ha em emaka ere mo

* 12:12 12:12 Mat. 10:19-20; Mrk. 13:11; Luk. 21:14-15 * 12:15 12:15 1Tim. 6:9-10 * 12:21 12:21 Yak. 4:13-15; Mat. 6:19-21

gwënna insa engka en mae langa gulsu'ura? Bëjen.

²⁶ Em de enlala nik ëbeya gwe-gwenkam molye ere mo gwënna betek en maekam ayang ul ine gwëk. Ki ba hap de enlalana beyam-bya gwen hap?- ala son hap de kire-kire hap, hen tembane mae hapye.

²⁷ Emki sap sona ok eissi enlala gwibiridan. Zen hom syal ta gwenan, hen pakeanna hom dayal gwibirin. Hwëna Ëe ama emsa gubirida'an: Sap teipsin zini Salomo Bak, zen hwëna hom ok eis nwe-awes makare pakeanna akeka- desa de zëre mo te-ala beyakam teisyan hapye.

²⁸ Em in Biansa de taibliblanna tawa naka hom! Ok eis mo ëhultunnu tihis tanganna, sap zen namen de ënwe-awes gwenkam, hwëna ka'an de ëjek-jak gwen. Zen sap eiwa kirekam, hwëna Alap ki desa kara ta gwibirida. Zep emki Biansa anakan taibli gweblan, 'Zen molya asa ala so gwen hap denakim da tasiki.'

²⁹ "Zep bahem anakan enlalana ëbeya gwe-gwen, 'Ëe basa asa twin gwibir hen otde gwibir?' Bahem banakare mae hap ëngalap gwe-gwen.

³⁰ Sap Alapsa de tame tan srëm zini zen kirekam ëngalap gwe-gwenan. Hwëna nëno mae mo Bianna Zen anakan tawana, 'Ano walasna kire hap ëtahalha gwe'an.'

³¹ Hwëna em Alap de nabakam irik gïlzïn hap denaka em syal gwe-gwibin, ki Zen sa hen ebe mae hap eno tahalha gwibinni gol gwizimdi.

³² "Em in zen dan en Abon ang ta gwe'an, bahem ëairin, sap eno mae mo Bianna man emsa sam gwe-sibirida'ara- em de zëno irik gïnnik bitï gwen hapye.

³³ Ere mo bi gwibin kire-kirena te-ala hap em lirak tabin. Te-alana desa tahalha zi hip em kae gweblazimdin. Dekam em dakal hap de kire-kiresae lam ta'ara, hen kire-kirena in molya ep ëjek-jak gwe-

blak. Ngatan zi mo langnak em lam tan, sap zëwe sowë zi molya kap dak, hen winimni molya dwenblandak.

³⁴ Sap men zëwe eno kire-kirena ërlwa gwenna, eno enlalana hen zëwe sa lwa gwera."

Salok-salokkam de lowehe gwen hap de ol, sap Yesus sa etan lwahal zala:

(*Mat. 25:1-13; Mrk. 13:34-36; Mat. 24:43-51*)

³⁵ "Em salok-salokkam em lowehe gwen- Asa de hut tu ane gun hupye. Em zep em pakean alala tan naban hen syauk ngatan naban Asa kara gwe-gweblan.

³⁶ Men kirekam babu gwen zini mam zemka kara në gweblananke, zen de we-zi daresa de oto son nakon lwahal zannak, em hen kirekam em lowehe gwen. Mam zini in kim de hata'an zaka, lilikinsï sa ga'-ga so zala. Dekam sa hëndep dalusublul.

³⁷ Zen de babu zem insa nama de salok-salokkam de ës gweblannak hlauluda zankam, dekam sa tangan sam gwe-sibiridala. Ëe eiwa denakaë emsa gubirida'an: Mam zini in dekam sa babu gwen zi makan zënaka gwëblala. Dekam sa zën zëbe mae hap tembane dëreksa syal gwibir-zimdi. Ki sa teinikirin hip gubiridala- zao de golzimdin hip.

³⁸ Zen de ngirin anen mae hatankam, nama de salok-salokkam de ësblannak hlauluda zankam, ki zëre hon de babu gwen zini in hë'ho gwibin tangan naka sa hla nul.

³⁹ Emki sap ëenlala gwen: Gol bi nik de anakan tawa gwe'anam, 'Ano golak sowë zini namen mo kam sa til zila,' zen dekam molya nini ta'anam. Sowë zini in de tilzin srëm hap maka sale'ara.

⁴⁰ Zen in zep, em hen kirekam salok-salokkam lowehe gwëk, sap em home tame u'in- ngatan zi mo lang nakore Zi Tanganna Ëe de lwa halzan hap denaye."

⁴¹ Petrus ki zep takensiblika, "Bian, ola insa gulk sun blaonzimdi,

san ha abe mae en hap? San ha hen t̄ngare zi hip?"

⁴² Ki zep ding gulbluka, "Ebe mae hap dena, zen āsil̄i a kirekam sa lwal: Teips̄in zi nik de holokam langa san song gwe'anam, z̄ere hon de babu gwe-gwen zini men zen de enlala blalkam gw̄e'anam hen tāibliblan nik, zen z̄ebe hap maka syala anakan wei yul son̄e gublu ha'ara, 'Ano tim bwanak babu gwe-gwen bose omka em ir̄ik ḡil gwe. Z̄ebe mae hap tembanena hen sowe henkam gol gwizim.'

⁴³ Teips̄in zini in de mumuk ennak lwahal zankam, zen de anakan hla ta'an zanam, 'Zen dawemkam ano tim bwanak ir̄ik ḡil gweka,' ki zen sa z̄ebe hap isrip-sri gwibin nika golblala.

⁴⁴ Eiwa denakāe emsa gubirida'an: Teips̄in zini in dekam sa z̄eno bosena esek gul seblala, hen z̄ere mo kire-kiresa de kitak kara ta gwibin hip sa gublula.

⁴⁵ "Hw̄ena babu gwen zini in de anakan enlala gwe'anam, 'Ano teips̄inn̄i in na-en molya lwahal zaka,' zen sa hw̄ena ahakore babu gwen bose zemka tangole gwibirisap zi, sap we. Hen zi bina in mo te-alakam z̄e-en sa tembane gwegwera, hen ho mamaksa sa kim otdeblanda gwera, dekam sa h̄endep mamak gwera.

⁴⁶ Ki sa hw̄ena mumuk ennak babu gwe-gwen zi karekna in mo tame gun sr̄emnak teips̄in zini in hata zala. Dekam sa tok hap zip so zala. Hen z̄eno angna dekam sa tak ta iri- men z̄ewe Biansa de tāibliblan sr̄em wenyik mo angna lowehe gwe'anke.

⁴⁷ "Babu gwe-gwen zini men zen mam zik mo dwam gwibin sin anakan tame gunnu, 'An ano syala zen,' hw̄ena zen de z̄enaka hohle tan sr̄emkam hen syal gwibin sr̄emkam, ki mam zini in de hatankam desa sa mamkam de lek-lek tan hap gubiridala.

⁴⁸ Hw̄ena babu gwe-gwen zini men zen mam zik mo dwam

gwibinsi tame gun sr̄emna, desa betekkam de lek-lek tan hap sa gubiridala. Ebe hap de mamkam hli tablankam, zen hen aumwa hap mamkam de goltr̄eblan hap sa emsa gublula. Ep de beyakam hli tablan dankam, ki hen beyakam de goltr̄eblan hap sa emsa gublula."

Yesus kim anakan tawa tabirkike, "Abon onakon esa enaka ḡil-ḡil eibirida gwer."

(Mat. 10:34-36)

⁴⁹ "Ēe an okamanak de zisi de klis gun hub̄e hatazak. Ano klis gunnu zen syauk makan sa t̄ngare zini neisbir. Hen Ēe ama dwam gwe'an, nabakam bae ki syauknu in hiti'inam!

⁵⁰ Hw̄ena nonol Aen asa karek yawala goltower. Ēe dohon tangan nakāe eis gwibi'in- desa de goltowen hapye.

⁵¹ Bahem anakan Asa kil ti gwen, 'Zen an umlaesa de okamanak awe golhatazan hap hata zaka.' Ēe kire hap hom̄e. Hw̄ena abe hap de jal hap Asa de tame tan sr̄em wenyia sa emsa ḡil-ḡil neibirida gwer.

⁵² Zep angkam ebon mae a kirekam sa lwa song gwer: Aha-ere golak de zi aha-ere taha-tapkam lowe he'anam, hw̄ena Abon onakon esa enaka ḡil-ḡil eibirida gwer. Anakarekam sa lwa song gwer: Danahan men zen Abon ang ta sr̄em gwe-gwe'an, zen hw̄ena dan-dan dena emsa sa ḡil-ḡil nei gwizim.

⁵³ Ebon mae onakon, abe hap de jal hap walas oban esa enaka ḡil-ḡil eibirida gwer- sap zikim dena hen wekam dena, hen sap aebo wal maekam dena."

Mae hap de ol jalse gwen: Sap ngatan zi mo lang nakore Zi Tangansa hom tame dak.

(Mat. 16:2-3; 5:25-26)

⁵⁴ Yesus ki zep gubiridaka, "Yakla de kaknak sal-sal gwe zanna, dekam ema dam ulsuk gwenan, 'Sa o dil gwer.' H̄endep kirekam sa ki lwal.

55 Yakla de but-som but-som gwe zanna, dekam ema dam ulsuk gwenan, 'Sa sasa gwer.' Hëndep kirekam sa ki lwal.

56 O de il ti gwen hap dena hen sasa gwen hap dena, em desa en ema dam ulsuk gwenan. Zep em ba habe ano owas-owas syal gwe-gwibinni dam ulsuk srëm gwe-gwe'an? Em in eiwa enlala joblo-top tanganna.

57 "Em ba habe anakan dam ulsuk srëm gwe'an?– 'Diki angkam ëe amaka kirekam syal eibi'in.'

58 Eme mamkam te-ala beya zi nik bon gwe'anam, hwëna otan de desa ber-ber gun srëmkam, zen hwëna emsa de balk tahan hap maka jana nabare wenyak zergu'ura– zen de teipsin zi sin dep emsa zerhan hap. Diki dawemna, zen de nama emsa teipsin zinik zerhatan srëmnak, emki anakan de zersësek gwen hap akasiblin, 'Bahem na-en asa zertrëblan. Ëe basa asa ep golblal?– dekam de eban sësek ën hapye.' Kire srëmkam, ki zen sa hëndep teipsin zini in hap emsa zertrëblala. Hen teipsin zini in sa zëre mo jana nabare zi hip emsa zerzimdi– zen de hwëna bwinak emsa tayalsin hip.

59 Ëe ama emsa gubirida'an: Em bëjen em dekon wet sonbonna insa de tingan ber-ber gun srëmkamye."

13

Halen hap de ol:

1 Zao kim nama lowe he'ak, ki zep Yesussu donbla'ak, "Teipsin zini Pilatus man zëre mo jana nabare zisi gubiridaka– Galilea kore zisi de tameran hap. Hëndep Alap mo golak zep damerak. Maenak damerak: Zen kim dombana Alap hap blom dabir-bli'akke. Hëndep zëno mae mo kala domba kala in han zep siri nek."

* 13:4 13:4 Siloam, zen Yerusalemk de aili ho bose. † 13:6 13:6 Kwiwena, Lukas man ale gulku tenya "ara" kam.

2 Yesus ki zep ding gulzimki, "Sap Galilea kore zini in kirekam karek yawala noltowek, em san ema kil libi'in?– 'Zëno mae mo karekna man tangan taman kinik– ahakore Galilea kore zi nikonye. In zep Alap kirekam de karek tabin hip gubiridaka.'

3 Hwëna kirekam hom. Ëe ama emsa gubirida'an: Em de ëhalen srëmkam, em hen zëno mae mo kim de juwensa esa hla kul.

4 Hen kirekam, in kim delapan-blaskam de zini klibu nabare gola Siloamk kei-king gulku, em san ema desa hen kil libik?– 'Zëno mae mo karekna man tangan taman kinik– tingare ahakore Yerusalemk de lowehe gwen wanya konye. In zep Alap kirekam de karek tabin hip gubiridaka.' *

5 Hwëna kirekam hom. Em de ëhalen srëmkam, em hen zëno mae mo kim de juwensa esa hla kul."

*Yesus kim ola gulk sun blaonz-
imkike– tenya kwiwe de tën srëm hap
dena:*

6 Yesus ki zep ola gulk sun blaonz-imki, "Zini zëno anggur ngana ki. Zao hen kwiwena man saltik. Ki zep song gweka– kwiwe dansa de taran hap. Hwëna eini aha-en mae hom hlaulku. †

7 Ki zep nga syal gwe-gweblan zini insa gubluka, 'Ëe mesë tahunna dan-ahan gwëk– sap de duwe gwibir zinna. Hwëna homë mae ei niban hlaulzuk. Em lwin. Waba hap bap zen zë zaun. Ahasa neik zë etan ik ik.'

8 Hwëna ki zep nga syal gwe-gweblan zini in ding gulbluka, 'Dikire tahunna an ensa zauk. Ëe asa zëno alp nakon kamasa tri yul, zao asa te bitriskim yaing tabir.

9 Dekam wëhë ngein sin de tahunkam të'ak. "Tën srëmkam dekam neik ulek.' "

*Yesus kim Hari Sabatkam we
tahan tikna dawem gulkuke:*

10 Aha Hari Sabatnak kim zauk, dekam zep Yesus Yahudi mo aha but srëm golak tawa tabirki.

11 Zao wenya ki, dowal mes sang-sangna golbirki- tahunna delapan-blas enkam. Dam-damkam bëjen zaun. Tahanna mes tiwehek.

12 Yesus kim hlaulku ki zep takenbirki, "Anyan, haen. Ëe ama emsa sang-sangna in kon hil gil sone'an."

13 Ki zep tahana tehabir aneka, hëndep dekam zep dam-dam gwe-sek, dekam zep Alap hap dawemna golbla tine'ak.

14 Zëwe de but srëm golak de mamna ki zep jal gweblaka, sap Zen Hari Sabatkam dawem gulku. Ki zep gubiridaka, "Yaklana enam enkam-syal tan hap denaye. Zen dekam yaing gwe-gwezak- zi sang-sangsa dikim dawem ta gwibin hipye. Hari Sabatkam bahem."

15 Bian Yesus ki zep hwëna ding gulbluka, "Em Alap mo bosena ëk enkame zigwiren gwe'ara! Em kitak Hari Sabatkam sapi zahona kie hil li sone gwibirin- weyasa dikim ot-debin hipye. Keledai zahona hen kirekame eibirida gwenan.

16 An hwëna zahosa hom. An hwëna Abraham mo auyan-tane sake. Desa mes delapan-blas tahunkam dowal mo kigina huleka. Ëe sap asa Hari Sabatkam hil gil soner!"

17 Yesus insa kirekam ding gulbluka, men zen Zënaka jal nëbla'ak dekam zep tangan ësa her gwek. Hwëna tingare ahakore zini man tangan ëisrip-sri gwek- insa kirekam owas-owasna syal gwe-gwibirkike.

Gulk sun de ol blaonzimdinni an mae hap: Alap mo irik ginni, zen rica dan makan, hen ragi makan:

(Mat. 13:31-33; Mrk. 4:30-32)

18 Yesus a kirekam mo ola gulk sun blaon gwizimki, "Ba naban esa apde osol?- dekam de Alap mo irik gin hip denaka gulk sun blaonzimdin hipye. Alap mo irik gin niban ba

naban esa enlala eizim?- dekam de srip gulsuzimdin hipye.

19 Alap mo irik gin nika de srip gulsuzimdin hip, zen a kirekam moye: Zen rica dan makan. Zen sap betek tanganna, hwëna zini kim desa nganak ik nil gwenan, dekon zep ësaltil gwenan, hëndep te makan zep ëmam-mam gwe-gwenan. Mawana zao zep zëno hlinak gola dauk gweblanan."

20-21 Aha gulk sun de ol blaonzimdinni hen anakan, "Alap mo irik ginni, zen ragi makan. Wenya man tepungna aha-ere sak naka mang-mang guk. Zao zep ragisa betekkam mas guk. Ragina in sap betek tanganna, hwëna dekam zep rotina in dawemkam hop gwek."

Lilikin klakat hap de ol:

(Mat. 7:13-14,21-23)

22 Yesus kim Yerusalem san song gwe'anka, Zen man ë-ë san tawa tabir song gweka.

23 Kim zë tawa tabi'inka, ahanik zep takensiblika, "Bian, san ha zini dan en sa ëngaya gwer?"

Yesus ki zep ding gulbluka,

24 "Emki lilikin klakat san de bitü gwen hap ëalp gwen, sap zen zen-ëngaya gwen hap de ora naye. Yak zini zen desan dep denaka hom. Ëe ama emsa gubirida'an: Zini beya nik sa sap Alap mo irik gin kon gwisibir hanan tembane yala iwe dep ora yakna in san ëalp gwe-gwer. Hwëna desan molya zëwe dep bitü gwek.

25 Ang tan wenya kim de sowe he'ak, Gol Bina in dekam sa lilikinni sohlasik iri. Ë en nakon esa tol ëzaul. Sap esa ga'ga oso gwer-anakare ola ban, 'Gol Bina, abe mae hap tol Emki lilikinni ansa talusuzimdin.' Hwëna Zen sa emsa gubiridala, 'Ëe homë emsa tame tabi'in. Em in enda kore zisi mes yap?'

26 "Hwëna em esa ding ulblir, 'Hwëna ëe mesë eban értembane gwe-gwek hen em mes em-am ano mae mo ënak tawa ta gwibirki.'

27 “Hwëna Göl Bina in sa etan ding gulzimdi, ‘Ëe homë emsa tawa gwibirida'an- em enda kone yaing gwezal. Em sek gwen. Em in zene karekna ol gwenan.’

28 “Em kime anakan hla kulida'ak- Abraham, Isak, Yakob, hen tingare Alap mo olsa de ayang gul gwen zini, ‘Zen Alap mo irik ginnik lowe he'an, hwëna asa mes ë san yal nulin,’- em dekam esa yusyustin niban gona tal, hen ëkna dekam esa ngalap hap ngalk-ngalk la gwibir.

29 Sap dekam zini yakla hata sezan nakon sa yaing gwer- hen nikin anen nakon, hen eihya-lip eihya-lip nakon, Alap mo irik gin kon gwisibir hanan tembane yawalak de apdekam eisrip-sri gwen hap.

30 Hwëna emki ëenlala gwe-gwen: Men zen angkam bose srëm wenya ëgwë'an, zen zen sa hwëna lamkam ngein sin loweher. Hwëna men zen angkam bose naban lowehe gwe'an, zen hwëna lamkam zen sa lure san ëgwër.”

Yesus kim Yerusalemsa kwasang gweblakake:

(Mat. 23:37-39)

31 In kim lwa se'ak, ki zep Farisikam de zini Yesusu nenblazak, “An kon song gwe. Herodes man emsa tan hap dwam gwebla'ara.”

32 Yesus ki zep ding gulzimki, “Em sek gwen. Anakan wanya jaljala insa enblak, ‘Zen man guku, “Ëe nama dowalsa golëalsa sone gwe'an, hen zi sang-sangsa dawem ta gwibi'in. Hwëna molya holo gwek, ki asa ëre mo syala ansa tap gul soner.” ’

33 Sap Ëe molyë awe holo gwek. Sap hom dakasti'in Asa de aha ënak tankamye, sap Alap mo olsa de ayang gul gwen hap de zini zen Yerusalemk en damera gwenan.”

34 Yesus hen anakan guku, “Yerusalemk de zi, em mese Alap mo ol ayang gul gwen zini beyakam lamera gwek, hen Alap mo lup gul sonen zini kasokame i libirida

gwek- hëndep tok hap. Ëe ama sap emsa kwasang gwibirida gwek, zebë sap emsa Ëre osan dep de tagal gulsun hup akabirida gwek-san de we ayang de tane-ne zemka si alakam obon gun makan de gweibiridan hap. Hwëna em ema baes ta gwek.

35 Yerusalemk de zi, zen in zep Alap angkam emsa da tasibi'ira. Ëe ama emsa gubirida'an: Em molye na-en Asa tame lak. Hwëna kime Asa hut lu ane gu'uk, zen dekam en esa sap Asa tame lal. Dekam sap anakare ola ban esa Asa hut lu ane gul, ‘Hë'ho! An Bian mo bosekam nësa dikim oto gulsun hup hata se'ara. Diki Alap Zen zëbe hap dawemsa golblan.’ ”

14

Yesus kim sërkam de tese-tese gwen zini dawem takake:

1 Aha Hari Sabatnak kim zauk, ki zep Farisi walya teipsin tolik Yesusu gubluka- zëno golak de golëtembane tan hap. Hwëna zen mes ahakore Farisi zi niban hen Musa mo ol tawa ta gwibin zi niban ola ziaha-en gulku- zao de dawemkam Yesusu anakan karatda tan hap, “Zen wëhë nëno mae mo Hari Sabat hap denaka gulum'unka?”

2 Zen in zep sërkam de tese-tese nabare zini hen nenblak- zen de hen ang gwen hap. Hëndep zen Yesus mo dang gwën nakon zep nikin'inka.

3 Yesus ki zep hwëna kitak takensibiridaka, “Em banakane Musa mo titi tabin ola dam ulsu'un? Hari Sabatkam san ha zi sang-sangsa sap de dawem tabinkim? San ha bëjen?”

4 Hwëna man nasalsiblik. Ki zep hwëna tese-tese nabare zini insa irik tasiki, hëndep ki zep zë dawem taka. Zao zep gubluka, “Sap esa angkam song gwera.”

5 Ki zep hwëna gubiridaka, “Eno walas ahaksa sapi zaho de Hari Sabatkam aili honak dum gwe

he'anam, em san ha molye dekam er ane'anam?"

⁶ Zini in sap man Yesus mo ola in sa husus neibi'ik, hwëna hom dam nulsuk- kirekam de ding gulblun hapye.

Bosesa de betek gun hup de ol:

⁷ Nama kim tembane yala iwe lowe he'ak, Yesus ki zep hlaulu-daka, ahakon bose bete-tek nik ngein nikore komal tum dawemsa teinikirinkim alt dasibik. Ki zep zëbe mae hap ola gulk sun blaonzimki,

⁸ "Zi de we-zi daresa de oto sonnak de tembane yawala kon emsa ang gwen hap gublunkam, em bahem na-en ngeinnik de komal tum dawemna al sosun. San ha zen mes yap hen aha zisi, ebon onakon de bose nik teipsiblin naka, ang gwen hap gublula?"

⁹ Ki hwëna zen de hatankam, gol bina in sa emsa gublula, 'Em aes gwesiblin.' Hwëna em dekam saher tola ban esa lun tangan nikiri.

¹⁰ Diki em de hatankam, nonol lure tangannak em nikirin. Zen diki gol bi nik sa emsa gublula, 'Haen, ano wal bose, ngeinni an kon em hen nikirin.' Dekam eno bosena sa dawem gwer- tingare zi mo nwenakye.*

¹¹ Sap tingare zini men zen mam gwen hap edwam gwe-gwenan, Alap sa hwëna otde tangannak kang gulu. Hwëna men zen otde tangannak lowehe gwenan, desa hwëna gut de tangannak sa kang gul sera."

¹² Ki zep gol bina in sa gubluka, "Em de tembane yawalsa syal gwegwibinni, bahem dekon zi dawem emsa gubirida gwen- men kiye, wal bose wal om, iye om, oso wal om, hen sowe tane wal om, ahaksa gol golek denak de te-ala beya zisi. Ki zen sa emsa nërhwë-hwë gwer. Dekam mensae golzim'inka, kiresa sa hwëna ebe hap nol gweblal.

¹³ Diki em de tembane yawalsa syal gwegwibinni, zen tahalha zisi

em kon gubirida gwen- sap zi tim karek, sap zi lek, hen zi nwe dïmin maesa.

¹⁴ Kirekam Alap sa ebe hap hë'ho gwibin nika golblala. Sap kirekam de zini bëjen emsa zer-hwë-hwë gwen. Alap hwëna sa ebe hap dawemsa golblala- yaklana in dekam zi dawem-dawemna tin nikon luk ta'akye."

Gulk sun de ol blaoranna an, Alap mo irik gin kon gwesibir hanannak de tembane yawalak de yaing gwen hap dena:

(Mat. 22:1-10)

¹⁵ Yesus kim tonsuku, dekam zep ahanik gu aneka, "Alap mo irik gin kon gwisibir hanan tembane yawalak men zen ang ta'ak, zen hë'ho gwibin tangan naka sa hla nul!"

¹⁶ Yesus ki zep zëno ola in sa de ding gulblun hap gulk sun ola blaonzimki, "Zini ki tembanesa yawal tangankam syal gwibirki, hen zini beya tangankam hamal hap gubirida guku- tembane tanna iwe de ang tan hapye.

¹⁷ Tembanena in sa kim taiblin nïlsik, ki zep babu zemka ahanaka gubluka, 'Em anakan taken naseran, "Haen. Tembanena angkam mes de danan!"'

¹⁸ "Hwëna men desa sap hamal hap gubiridaka, zen kitak man hwëna babu zem in sa anakan nen gwebla'ak, 'Ee molye hatak.' Ahana man gubluka, 'Ee mesë ngasa zer. Ee zebë karatda tan hap song gwe'an. Anakan gublu, "Bap zen asa jakal gweblan."'

¹⁹ "Ahana hen man gubluka, 'Ee nër homë sapisa dare taha-tap enkam kap guk. Ee zebë song gwe'an- anakan de akasibiridan hap, "Wëhë apdekam syal ta'ak?" Anakan gublu, "Zen molya hataka. Man gulu, Bap zen asa jakal gweblan."'

* 14:10 14:10 Ams. 25:6-7

20 “Ahana hen man gubluka, ‘Ëe nër homë wenya gok, zep ëe molyë hatak.’

21 “Babu zem in ki zep zë-en lwa halka, ki zep tonbla zaka-men kirekam ding nul gwebla'akye. Gol bina in dekam man tangan jal gwibiridaka. Ki zep gubluka, ‘Em hëndep nabakam etan song gwen-ë yala awe de ora-ora san. Dekam kwang guluda halza- sap te-ala srëm zi, sap zi karek, zi lek, hen nwe dîmîn mae naka.’ Ki zep kwang guludahal zaka.

22 “Kim lwa halka, ki zep gublu zaka, ‘Mesë kire naka kwang guluda halanzal, hwëna komal tum jam en hom.’

23 “Ki zep etan gubluka, ‘Em etan song gwen- sap eik sin de ora betetek mae san. Desan ang tan hap wan-wan tabir song gwe- hëndep ano golak awe de ëbeya gwezak.

24 ‘Ëe ama emsa gublu'an: Mensa sap nongka hamal hap gubiridak, zen molya lun etan yaïng gwezak-tembanena ansa de akasiblindan mae hapye.’ ”

Anakare hap de ol: “Ëe wëhë Yesussu de ang gweblan hap dakasti'in?”

25 In kim sap zini beya tangan nik Yesus hon ang ta'ak, ki zep lero gwibiridan naban gubiridaka,

26 “Zini men zen an-bi zemka dawemkam enna nolabirida gwenan, hwëna zëno mae mo Asa de en lwablanna lwala henna, kirekam de zini zen bap zen Asa ang gweblan. Hen kirekam, men zen we zemka, walas zemka, ahaksa aya-wal oso-wal zemka dawemkam enna nolabirida gwenan, hwëna zëno mae mo Asa de en lwablanna lwala henna, zen hen bap zen Asa ang gweblan. Hen kirekam, zi de Abon onakon zëre mo gwënsa dawemkam ensa lwabinni, zen hen bap zen Asa ang gweblan.*

27 Hen zi de zënaka anakan sosok tan srëmna, ‘Asa sap sa Yesus mo kim te-lidak sonnak makan dain,’ zen bap zen hen Asa ang gweblan.*

28 “Ebon mae onakon ahanik de klibu nabare gol syal gweblan hap enlala gwe'anam, zen nongka maka nikin'ira- zëre mo te-alasa de aïtblin hap, mae hap, ‘Wëhë sowe he'anka?- gola ansa dikim so ta sonen hapye.’

29 Sap sowehen srëmkam, ki hwëna ei-te en naka de eiyas tannak sa te-alana topse gwerä. Dekam tïngan men zen gol ik sosunnu insa hla da'ak anakan sa swrë dal,

30 ‘Zen man tim gulku, “Ëe asa tap ta soner,” hwëna hom tol!’

31 “Hen kirekam, teipsin zi de zëno jana nabare zi sepulu ribu enkam lowe heblanna, hwëna zen de sane gwe'anka, ‘Aha teipsinni zëno jana nabare zini dua-pulu ribu enkam man emsa de hatabin hip sek gwe'anzal,’ zen maka enlala gwe'ara, ‘Ano an wëhë sowe he'ak?-deban mae de eijan hapye.’

32 Anakan de enlala gwe'anka, ‘Ano molya sowehék,’ dekam ahanaka maka zer sone'ara- zen de nama ëgolek de gwezan srëmnak, anakare ola ban, ‘Ëe basa asa ebe hap golblal- dekam de nen ëeijan srëm hapye?’

33 “Zen in zep, em hen kirekam. Em de ere mo gwënsa kitak tapbla gun srëmkam, em molye Abon osan ang gweka.

34-35 “Em an zene Abon onak ang ta gwe'an, em okamanak san de hina kiye. Hina zen sap tembanesa de dërek gun hup dawemna. Hwëna blëble gwenkam, dekam tembanesa dikim dërek gun hup dena man hom gwe-gwenan. Dërekna in de hom gwenkam, dekam zini bëjen ba mae hap dwam gwibin. Dekam zalta dep de kama san hiri gun en hap dena.* Zen in zep, em dwan i nibanke! Emki ësal gwen.”

* 14:26 14:26 Mat. 10:37-38 * 14:27 14:27 Mat. 16:24; Mrk. 8:34; Luk. 9:23 * 14:34-35 14:34-35 Mat. 5:13; Mrk. 9:50

15

Gulk sun de ol blaoranna an, domba zaho de jek-jak gwen hap dena:

(Mat. 18:12-14)

¹ Dekam karek gol gwen zini hen-henkam yaing gwe-gwezak-Yesussu de hen sane ta gwen hap. Zen ahakon Roma mo irik ginnik dep de te-ala alal tanda gwen zi.

² Hwëna Farisikam de zi niban Musa mo ol tawa ta gwibin zi niban man anakan ètonsuk gwe'ak, "Wëo, zini an ba hap enlala karek-karek zi niban golësiri gwe-gwe'ara? Hëndep man golëtembane ta gwe'ara!"

³ Dekam zep Yesus ola gulk sun blaonzimki,

⁴ "Zi de ebon mae onakon zëno domba zaho 100 enkam lowe he'anam, hwëna ahanik de jek-jak gwebla'anam, zen banakan maka gwë'ara? Zen maka 99kam dena insa so tranak hli yuluda'ara, ki maka jek-jak gwen zini insa tëbla'ara. Hla tan srëmkam molya tëblanna baes gwe'anam.

⁵ Kim de hla ta'anam, dekam isrip-sri naban maka ngairinak ziren ha'an zala.

⁶ Golak, wal bose wal zemka maka tagal gu'ura, hen gol golek de bose zemka- anakare ola ban, 'Nen èisrip-sri gwen! Ano domba zahona men zen jek-jak gwera, mesë etan hla tanan!"

⁷ Hen kirekam, ngatan zi mo langnak isrip-srina mam tanganna- aha-ere zi de zëre mo karek gol gwen nakon halenkamye. Hwëna men zen 99kam de zini èenlala gwenna, 'Èe homë halen hap dwam gwe'an. Abon hom- karek naye,' kirekam de zi hip ngatan zi mo langnak isrip-srina betek tanganna."

Gulk sun de ol blaoranna an, te-ala de jek-jak gwen hap dena:

⁸ "Hen kirekam- we de zëno te-ala dare taha-tap enkam lwabi'inam. Hwëna aha ala nik de jek-jak gwe'anam, zen dekam banakan

maka gwë'an? Zen maka pelitasa tum gu'un, ki maka gola insa teibiri seran hap jilk gilsin- hëndep de hlau'unam.

⁹ In kim hlaunnu, dekam maka we wal bose zemka tagal gulu sen'an-hen gol golek de bose zemka, anakare ola ban, 'Nen apdekam èisrip-sri gwen. Èe mesë ère mo te-ala jek-jak gwenna hlaulun.'

¹⁰ "Zen kirekam hen Alap zëre mo dam taha nakore zi niban golëisrip-sri gwe-gwenda- aha-ere zi de zëre mo karek gol gwen nakon halen naye."

Gulk sun de ol blaoranna an, walas de jek-jak gwen hap dena:

¹¹ Yesus ki zep etan ayang gulzimki, "Zini ki, zëno zi walasna dandan.

¹² Oso zik zep bi zemka gubluka, 'Bian, eno kire-kirena mensa em de tinkim èe de hli lan hap dena, abe hap de hlikna angkam ap kap tablam de tin srëmnak.' Dekam zep walas dare zem in hap hli tazimki.

¹³ "Hom holo gwe'ak, oso zem in ki zep zëre hap de hlikna insa te-ala hap lirak tabirki. Te-alana deban zep aha zi mo lang san zehas gwesiki. Zao zep twensiblikatotore kirekam karek-kareknak.

¹⁴ Kim te-alana insa tap tasiki, ki zep hwëna usak yala langna iwe hatak. Dekam zep tangan tahalha gwe'anka.

¹⁵ Ki zep syal hap hakal gweka, hëndep ahanik zep zëwe de zi gubluka, 'Ano gwe zahosa neik nganak taizi gwibir.'

¹⁶ Hwëna man tangan usakna sabak gwe'anka, sap tembane maena hom nol gweblak. Ki zep zë hole gwibi'inka- zaho hap de tembanena insa de twinbin hip.

¹⁷ "Ki zep enlala dawemna hatablaka, 'O ano bian hon de babu gwen zini, zëno tembanena dawemkam. Èe hwëna aweë usak hap tin!"

¹⁸ Èe anik bian osan dep lwhak. Hatankam asa gublul, "Bian, èe

mesë karek gwek- Alap mo nwenak hen eno nwenakye.

19 Ëe angkam dawem naka hom- eno tanekam de gublun hapye. Asa em gwëblan- men kiye, ebon de babu gwen zini.” ’

20 “Dekam zep bi zem osan dep lwa halka. Golak hom golek de gwe'anka, bi zem ki zep langa ennak hla ta guku. Zao zep dawemkam kwasang gweblaka, ki zep hluwe-blaka. Zao zep babang taka.

21 “Tane zem in ki zep gubluka, ‘Bian, ëe mesë karek gwek- Alap mo nwenak hen eno nwenakye. Ëe angkam dawem naka hom- eno tanekam de gublun hapye.’

22 “Hwëna bi zem in ki zep zëre hon de babu gwen zini tak-enbiridaka, ‘Emki nabakam ëre mo pakean sam-samsa ala soblan, hen tahanak cincinsi ala lablak, hen sepatusa ala osoblak.

23 Sapi lam tanna insa em tan. Namen tembane yawalsa esa syal eibir, hen esa isrip-sri ëblal!

24 Sap walasna an mes tïn makan gwëka, hwëna angkam mes ngaya gwera. Zen mes jek-jak gweka, hwëna namene hla lanan.’ Ki zep hëndep tembane yawala syal neibik.

25 “In kim zë kirekam lwa'ak, aya zem dekam nganak gwë'anka. Kim golak golek de gwe'an zaka, dekon zep terya sane gwe'an zaka. Dekam zep enlala gweka, ‘Ba hap sya'an?’

26 Ki zep bi zebon de babu gwen zisi ahanaka takensiblika, ‘In ba hap ki lwa'an?’

27 “Ki zep ding gulbluka, ‘Oso om mes hatala. Bia om man asa gubiridala- sapi lam tansa de tan hap. Sap zen mes etan tane zemka dawemkam zertowera.’

28 “Aya zem in dekam sërkam jal gwe'anka, hëndep golak de tïlzin hap man baes gweka. Dekam zep bi zem te sobla zaka, ki zep tïlzin hap wan-wan taka.

29 Hwëna zen jala ban ding gulbluka, ‘Ëe mesë tahunna beya gwek- ebon de syal gwe tine

gwenna, hen homë mae ebon onakon drak gwe inehak. Hwëna em home ba maena abe hap golblaka. Sap kambing maena home tol abe hap zerblaka- ëre mo wal bose walya ban dikim tembane yawalsa zisyal gwibin mae hapye.

30 Hwëna eno walas karekna in zen eno kire-kirena swi golak tap tasiki, zen kim hata zala, em hwëna sapi lam tansae tablanda!’

31 “Bi zem in ki zep ding gulbluka, ‘Emsa awe dwan-am apdenak zergwë gwenan, hen ano kire-kirena kitak ebe hap denakake.

32 Hwëna diki namen de yaklana an, zen tembane yawalsa de syal gwibin hip dena. Sap eno osona tïn makan gwëka, hwëna zen mes ngaya gwera. Zen mes jek-jak gweka, hwëna namen tole ertowera.’ ”

16

Yesus kim ola gulk sun blaonz-inkike- te-ala beya zi mo irgwa taha nakore zi enlala ahak-ahak hap dena:

1 Yesus ki zep zëre hon de ang ta gwen wenyaka gubiridaka, “Zini ki, zëno te-alana beya tanganna. Zëno irgwa taha nakore zini hen ki. Zen zen zëno kire-kirena kara ta gwibir-blika. Hwëna te-ala beya zini insa man aha zi anakan nenblak, ‘Eno irgwa taha nakore zini in man eno te-alana twen gwebla'ara.’

2 Dekam zep kwang taka, zao zep gubluka, ‘Zini man eno karekna asa don gweblanan. Em mensa ano kire-kirena kara ta gwe'ara, bukuna men zao aïtbinkim ale gul gwenda, desa em ap golblan. Em molye etan kara ta gweka. Em esa syala in kon wet sola.’

3 “Kim nama bon aït gwibin bukuna insa golbla srëm gwe'anka, ki zep enlala gweka, ‘Ëe an banakan asa gwër? Ëe asa ëre mo syal dawemna an kon wet sol. Hwëna ëe sozon naka hom- dekam de kamasa lwi gwen hapye. Hen wagam hap de

hakalassen gwenna, zen saherak asa kim ënaka drëne gwer.

⁴ O ëe mesë dam gulsunun! Ëe asa aha te-ala beya zi niban golëdokot gwer. Ëe de wet sonkam, zen sa asa zëre mae mo gola kon kwang da gwer.'

⁵ "Dekam zep irgwa taha nakore zi ahak-ahakna in sowëkam kwang guluda gweka- zini men zen te-ala beya zini in hon ëbon gwëkke. Nonol zen hata zaka, ki zep desa takensiblika, 'Em banaka'ene bon gweka- ano mam mo kire-kirena kim kap takaye?'

⁶ "Ki zep ding gulbluka, 'Tembane taiblin gin hip de minyak dremna dua-pulu enkam.'

"Dekam zep irgwa taha nakore zini in gulbluka, 'Dokot, emki nabakam ere mo bon alena ansa wet gulsun. Anakan hwëna ale gul, "Sepulu enkamë lop tak."'

⁷ "Ki zep etan aha zini hata zaka, desa ki zep takensiblika, 'Em banaka'ene bon gweka- ano mam mo gandumnu kim lop takaye?'

"Ki zep ding gulbluka, 'Gandum sakna 1.000 enkam.'

"Ki zep hwëna ding gulbluka, 'An dë- kire hap de suratna, men zao ere mo bosena ale gulkuye. Dokot, 800 enkam wet gulsuk.' Hwëna mam zem in hom anakan tame gulku, 'Zen abon de bonna totoresa wet gulsuk gwe'ara.'

⁸ "Aumwa hap kim te-ala beya zini in tame gulku, 'O zen man etan asa sërkam ahak-ahak taka,' dekam zep guku, 'Eiwa, zen nwe hleng gwen tanganna.' "

Ki zep Yesus ayang gulzimki, "Men zen auhu-kama ennak dep de enlala naban lowehe gwenan, zen hwëna dawemkam ngein sin dep anakan ëkalang gwe-gwe'an, 'Ëe kirekam asa golëdokot gwer- te-ala beya zi nibanye.' Men zen ngatan zi mo lang nakore ngatan naban lowehe gwenan, zen hom kirekam ëtewesik gwenan.

⁹ Zep Ëe ama emsa gubirida'an: Auhu-kamanak de te-alakam diki Alap han em zerdokot gwen. Eno auhu-kamanak de te-alana insa kime tinkim hli ta'anaka, Alap Zen Zen sa emsa kwang tala- hëndep de gwën hap de gola kon.

¹⁰ "Teipsin zi de babu zikhip banakare beteksa bohë gulblunna- zen de jek-jak gun srëmkam, ki hen yawal kire-kirena maka zëbe hap bohë gulblu'ara. Dekam mes taibliblaka, 'Zen aïris.' Hwëna zen de banakare betek maesa jek-jak gu'unam, ki yawal kire-kirena maka hen jek-jak gu'ura.

¹¹ Zep emsa de auhu-kamanak de kire-kire hap taibliblan srëmkam, ki hen molya Alap wakuwe emsa taibliblaka- dakal hap de ëlwa gwen kire-kire hapye.

¹² Hen bohë gulblun kire-kire hap de emsa taibliblan srëmkam, ki hen Alap molya wakuwe ebe hap lop tablaka- dakal hap de ëlwa gwen kire-kire naye, mensa sap menkam ebe hap hamal gulblukaye."

¹³ Ki zep ola gulk sun blaonzimki, "Zini bëjen dare teipsin zisi dawemkam babu gwizimdin. Zen hwëna aha-en naka sa dawemkam kwasang gwe-gweblala hen blikip gwesik gweblala. Aha zini insa molya. Zep em hen kirekam: Em bëjen em syala dan son- Alap mo syala ban, te-ala beya gwen hap de syala banye."

¹⁴ Farisikam de zini in kim Yesussu kirekam sane da'ak, dekam zep swrë da'ak, sap zen te-alasa ensa nola gweblak.

¹⁵ Yesus ki zep gubiridaka, "Em in zene ere mae mo bosena teip ulsuk gwenan- aha zi dikim emsa kil tibin hip, 'An eiwa Alap mo nwenak dawem-dawemna.' Hwëna Alap tawana eno mae mo enhona. Men desa auhu-kama zini teip nulsuk gwenan, zen Alap mo nwenak san de blë nabare kire-kirena kiye."

Musa mo titi tabin ol san de ang ta gwen hap de ol:

16 Yesus hen dekam anakan tawa tabirki, "Musa mo titi tabin ola, hen hamal hap de ola mensa Alap mo ol ayang gul gwen zini ale nul gwek, desan en de ang ta gwen hap dena, zen mes Yohanis hon zausuk. Hwëna angkam Èe an desaë Ère hon de ang ta gwen wenya ban zigol halada gwe'an, zen Alap Zën de irik gin hip de ol dawem saye. Zep Èe ama emsa gubirida'an: Zen desan em kitak ang tan.

17 Ngli naban kama naban zen maka jek-jak në'an, hwëna Musa mo titi tabin ola, sap aha-ere huruf mae, molya jek-jak gwék.

18 Zi de wesya baes gwibinni, hwëna ahanaka de etan gonkam, zen kahalo. Hen kirekam, zi de gonna zi mo we baes gwibinsi, zen hen kahalo."*

Gulk sun de ol blaonzimdinni an, te-ala beya zi niban tahalha zini Lazarus nikip dena:

19 Yesus anakarekam ola gulk sun blaonzimki, "Orep ki zini, zëno kire-kirena beya tanganna. Zëno pakeanna sërkam de dawem-dawem tanganna, hen mwin-mwankam tembane dërek-dëreksa twin gwibirki.

20 Zëwe hen ki zini, bosena Lazarus. Zen tahalha tanganna, hen kwatyal-kwatyala man timni sul soneblak. Desa man te-ala beya zini in mo te so kin gwennak dëra guk gwezak-

21 tembane lausa de dekon twen-blanda gwen hap, in zen te-ala beya zini in mo meja nakon altil gwেকে. Hen lwana man yaing gwe-gwezak- dekam de zëno kwatyal sussu kwlem gul gweblan hap.

22 Tahalha zini in ki zep tol tilki, dekam zep Alap mo dam taha nakore zini neir inehak- Abraham Bak mo dang gwën nakon de hë'ho gwibinnik drënen hap.

"Hwëna dekam zep te-ala beya zini in hen tilki, ki zep nër dwanuk.

23 Zen hwëna syauk bla sal-salak karekkam de sang-sangsa golgwë onka. Dekon zep Abrahamsa langa ennak kara ta se'anika. Lazarus zëno alp nakon nikin'inka.

24 Ki zep hërhe seblaka, 'Auyan Abraham, asa kwasang gwebla. Lazarussu gublu- zen deka honak taha bolsa os taka, dekam de ano mahalsa blëble tazan hap. Sap èe an syauk bla sal-sal kareknakë gwë'an.'

25 "Hwëna Abraham man ding gulbluka, 'Ano walas, emki enlala gwen: Em kime auhu-kamanak gwëka, em dawem ensae goltowe gweka. Hwëna Lazarus an karek ensa goltowe gweka. Zep zen mes angkam awe sam gwesili, hwëna em sang-sang nabane kareknak gwë gwe'ara.

26 Zen toton molya hata zaka, sap ngirinnik dwrakna mam tanganna. An kon bëjen in san dep ati gwe inezan, hen in kon bëjen an san dep ta gwe sezan.'

27 "Te-ala beya zini in ki zep gubluka, 'Auyan Abraham, ki emki Lazarussu ano bian mo gol san dep zer sonen.

28 Ano oso walya zao aha-ere taha-tapkam lowe he'an- zen deka zëbe mae hap ol zim-zimsi golzimki. Zen mana hen sang-sang kareksa awe ère mo kim hla nul inzak.'

29 "Hwëna Abraham ki zep ding gulbluka, 'Zëbon mae onak ki- Musa mo ol ale gunnu, hen Alap mo ol ayang gul gwen zi mo alena. Zen dikire desan ang tak.'

30 "Hwëna ki zep ding gulbluka, 'Auyan Abraham, kirekam hom sowe he'an. Diki zi zen tin nikon ngaya gwen- zen de zëbon mae hatan hap. Dekam maka ehale'an-zëre mae mo karek-karek nakonye.'

31 "Hwëna ki zep ding gulbluka, 'Zen de Musa mo olsa hen Alap mo ol ayang gul gwen hap de zi mo olsa i-san i-san gwe-gwibin srëmkam, zen hen molya étaiblik- zi de tin nikon ngaya gwen maekamyë.' "

* 16:18 16:18 Mat. 5:32; 1Kor. 7:10-11

17

Karek san dep de zertoran srëm hap de ol:

(Mat. 18:6,7; Mrk. 9:42)

¹ Yesus ki zep zëre hon de ang ta gwen wenyaka gubiridaka, "Okamanak awe de lowe henkam, banakare jal-jal hen hole-hle enlalana sa hata gwera. Hwëna zi de Asa de taïbliëlan walassa karek san dep zertoranna, zen dikim Asa hli tan hap, kire zini zen ngalap gwe-gwen. Sap Alap sa desa sërkam karek tala.

² Zen maka sam gwesikï- wal bose zemka de zertoran srëmnak de tinni, karekkam de tinsi de goltowen maekam. Kaso dohonhonsa de holenak hule soneblan naban de hi tateknak hiri tan maekam, ki molya wal bose zemka zertonnanam, hen Alap molya kire hap karek ta'anam. Eiwa, bap zen Asa de taïbliëlan walassa karek san dep zertoran- sap walas betek!

³ Zen in zep, bahem kirekam ëgwë gwen."

Zi bose uk mo kareksa de eititi gwe-gwibir-blin hap de ol:

(Mat. 18:15-22)

"Zi bose uk de ep kareksa golblanna, emki jalse gweblan. Zen de halenkam, zëno karekna insa emki eititi gwibir-blin.

⁴ Zen de emsa aha-ere yaklanak beyana tuju enkam karek ta gwenna, hwëna zen de etan emsa tuju enkam gu gwebla zanna, 'Bahem enlala gwibin. Angkam mesë halenan,' em hen dekam em hëndep eititi gwibir-blin. Bahem etan enlalanak lam gun."*

Alapsa de mamkam taïbliëlan hap de ol:

⁵ Ki zep zëre hon de ang ta gwen wenyabe abe dak, "Asa Em mas gwibiridan- ëe akakim sërkam Alapsa laïbliëlak."

⁶ Ki zep ding gulzimki, "Eno mae mo Biansa de taïbliëlan de betek mae nik lwa'anam, sap rica dan

betek makare nik, dekam eme tenya jowenna ansa gubi'inam, 'Hinak em zaunun,' dekam hëndep maka zë zau'unna."

Nen de babu gwen zi mo kim enlala betekkam lowehen hap de ol:

⁷ An ahana Yesus mo tawa tabin: "Ebon de babu gwen zi gwë'anam, zen ebe hap maka ngasa deng tya gwebla'ara, hen domba zahosa maka kara ta gwibir-bli'ara. Zen de syala kon lwahal zankam, em molye gublu'anam, 'Haen, em nongka tembane gwe.'

⁸ Zen emaka gublu'ara, 'Abe hap tembanesa nongka hamal gulblu, ki pakean dawemna ala so- dekam de tembanesa ap dëre ta gubluzan hapye. Ena lun kon neik tembane gwe.'

⁹ Sap esa gublu srëm gwera, 'Em asa sam tanda,' sap zen ere hon de babu gwe-gwen zi.

¹⁰ Em hen kirekam. Em de Alap mo ere hap de syalsa sul sonenkam, dekam emki enaka enlala betekkam gublun, 'Ba hap de ano syala kon abe hap dawemsa golblan hap? Sap ëe an Zëbon de babu gwen zi sike.' "

Yesus kim dare taha-tapakam de sop sang-sang karek nabare zi sang-sangna dawem tabirkike:

¹¹ Yesus kim Yerusalem san dep golësek gwe'anka, kim langna Galilea hen Samaria mo lang hlik sonnakk yaing gwëk,

¹² ki zep ë beteknak golëyaing gwe'anka. Zao zep zini dare taha-tap enkam golëtowe'anka- sop sang-sang karek de hlaludan naka. Zen langa nakon ëtaken gwe'ak,*

¹³ "Bian Yesus, asa kwasang gwibirida."

¹⁴ Kim hlaludaka, ki zep gubiridaka, "Em Alap mo golak de syal ta gwen zi sin dep sek gwen- zëbe mae hap de enaka golëtreizimdin hip."

* 17:4 17:4 Mat. 18:21-35 * 17:12 17:12 Im. 13:45-46

Kim kire hap sek gwe'ak, dekam zep kitak ëdawem gwek. *

¹⁵ Aha-enna kim zënaka tame taka, "O hare ëe mes-am dawem gwenan," zen dekam zep etan Yesus osan dep lwahal zaka. Ol mamkam zep Alap hap dawemna golbla song gwe'an zaka.

¹⁶ Yesus onak kim hata zaka, zëno nwenak zep ik gwehe zaka, dekon zep dawemna golblaka. Zini in sap Yahudi walsya hom. Zen Samaria wal.

¹⁷ Yesus dekam zep guku, "San ha dare taha-tapkam homë dawem tabir? An hwëna aha-ere tolik lwa halan zala.

¹⁸ Aha lang nakore zi en lwahal zala- Alap hap de dawemsa golblan hapye."

¹⁹ Yesus ki zep zini insa gubluka, "Em luwen. Sap esa song gwera. Em ema Asa taïblablala, zebe dawem gwenda."

Ngatan zi mo lang nakore Zi Tangan de lwa halzan hap de ol:

(Mat. 24:23-28,37-41)

²⁰ Aha yaklakam, ki zep Farisikam de gubirida gwen zini Yesussu dakensiblik, "Alap bawalkam sa Israel nësa irik ginkim kon gwesibir hanala?"

Ki zep ding gulzimki, "Zëno emsa de irik ginni, em molye nwekam hla kuk.*

²¹ Em molye anakan ësane gwe-gwek, 'Zen zëwe irik gi'ira,' ahaksa, 'Zen awe irik gi'ira.' Sap zëno irik ginni, zen angkam ki eno mae mo ngirinnik lwa'an."

²² Ki zep hwëna zëre hon de ang ta gwen wenyaka gubiridaka, "Em esa ngein sin anakan dwam ei gwibir, 'Diki namen de ngatan zi mo lang nakore Zi Tangan lwa ha'an zanam bap.' Hwëna em molye na-en Asa hla lak.

²³ Zini sa emsa boton da gwibir, 'Zen hale san gwë'ara,' ahaksa, 'Zen ana san gwë'ara.' Hwëna bahem zëbon mae osan ang ta gwen- Asa de waba hap hakalblan hapye.

²⁴ Sap ngatan zi mo lang nakore Zi Tanganna Èe kimë hata'ak, dekam ano tim nikon sa ngatanna wet so gwer- men kiye, ngli de mamkam ang tasik kinì gwenna. Desa kitak man hla nulse gwenan. Zen kirekam sa hen lwal- Èe de hatankamye. Molye Asa hla la srëm gwek.

²⁵ Hwëna nongka angkam de zini sa Asa baes nëblal, hëndep ki asa sërkam de karek yawala goltower.

²⁶ "Yaklana men dekam ngatan zi mo lang nakore Zi Tanganna Èe hata'ak, zen orep men kirekam lwak, Nuh Bak kim golëlowehe gwekake, zen kirekam sa etan lwal.*

²⁷ Sap zen dekam tembanekam man ëmen-man gwenda gwek, hen we-zi daresa zënaka oto da gwibik. Zen kire enkam ki totoresä mukum lowe henda gwek, hëndep ki zep yaklana in dekam Nuh Bak bul yawala iwe we wal walas zeban golësesek gwe seka. Zen ki zep hwëna ho namwa yala insa auna nohlo gubik. Zen zep kitak timbwas tabik.

²⁸ "Lot kim gwëka hen kirekam ëgwë gwek: Zen dekam tembanekam hen ëmen-man gwe-gwek, banakare maesa lirak da gwibik, ngasa deng dya gwek, hen golsa daublunda gwek.

²⁹ Hwëna ki zep yaklanak hatak, Lot dekam Sodom kon heya gweka, dekam zep auna ëhlok- Alap kim sërkam de syauk sal-sala insa hiri gulzim ineka. Hëndep tingan tangen zep ëtimbwas gwek.*

³⁰ Zen kirekam sa hen auna ëhlol- yaklana men dekamë Ènaka zertrë'akye.

* **17:14 17:14** Yesus kirekam zini insa gubiridaka, sap Musa mo olak man lwak, "Sop sang-sang karek mo hla tan zi de dawem gwenna, zen diki Alap mo golak de syal tan zi nik de zënaka zertrën, hen Alap hap de zen otweransa teisyablan." (Im. 14:1-32) * **17:20 17:20** Yoh. 3:3; 18:36 * **17:26 17:26** Kej. 6:5-8 * **17:29 17:29** Kej. 18:20-19:26

31 “Dekam zini men zen de gol homan nakon lowe he'ak, zen bap zen etan gol mwa san ba maesa de gon hap bitī gwehan. Hen nganak de syal tandan wenya, zen bap zen etan gol san dep lwan dahan.

32 Emki enlala gwibin: Lot mo wenya zen banakan gwëk?! *

33 “Sap zini men zen zëre mo auhu-kamanak de gwënsa anakan golaïri'anka, 'Ëe babë Yesussu de ang gwe-gweblannak karekna goltowe gwen,' ki zëno gwënsa in sa jek-jak gweblal. Diki men zen Asa de ang gwe-gweblan hap zëre mo gwënsa sosok gu'unika, hëndep zao mae de tīn hīp, zen zen sa hëndep denaban ngaya gwera.*

34 Emki ëenlala gwen: Ano hata zannak, dekam a kirekam sa lwal: Zi de dan-dan aha-ere tumnak la'anka, aha-en naka sa ëre mo dam taha nakore zini neir inehal. Hwëna aha tola sa hli dal.

35-36 Hen we dare de lënsa ale'ak, desa hen aha-en naka sa nul inehal. Aha tola sa hli nul.” †

37 Ki zep hwëna zëre hon de ang ta gwen wenya in dakensiblik, “Bian, kirekam de zisi de klis gun hup dena in, endawe sa ki lwal?”

Ki zep ding gulzimki, “Men kirekam zini nen gwibirin, 'Men zao tweran tokna lwanna, mawana hi agohena zao sa ëwale gwe-gwezal.' Zep hen kirekam, em de owas-owasna insa hlaunnu, dekam esa dam ulsuk gwer, 'Aumwa hap de yaklanak angkam man tangan golek de gwe'an.' ”

18

Gulk sun de ol blaonzimdinni an, nen dikim enlala nik de ëtopse gwen srëmkam Alapsa abe ta gwen hap dena:

1 Yesus ki zep ola gulk sun blaonzimki- nen de enlala nik ëtopse gwen srëmkam Alapsa abe ta gwen hap:

2 “Orep ë yalak zini ki, teipsinni. Zen hom Alapsa aïri gweblaka, hen aha zisi hom blikip gwesibirida gweka.

3 Zao hen we nala ki. Zen mwin-mwan enkam teipsin zini insa anakan abe ta gwezak, 'Asa tol mas gwibir. Zini man asa karek gul gwe'ara.'

4 “Teipsin zini in sap hom mas gwibin hip dwam gweka. Hwëna etan-etankam hata gwëk. Ki zep hëndep enlala gwëka, 'Ëe sap homë Alapsa aïri gweblanan, hen aha zisi homë blikip gwesibirida gwenan,

5 hwëna wenya an man tangan asa blostabla tine gwe'an, hëndep asa tangan blalen gwer. Diki anik mas gwibik- zini insa de gublunkam, “Bahem kirekam karek gul gwen”, abon de hata gwënsa deka kim zausuk.’ ”

6 Ki zep Bian srip gulsuzimki, “Mese ki ësane gwenan- insa ki teipsin zi karekna in enlala gwëkaye.

7 San ha Alap maka teipsin zi karek mo kim salsibirida'ara?- zëre mo hlil irin walasna men zen kam denaban yaklam denaban nen sonebla tine gwenanye. San ha Zen maka esek gul gwe'ara?- dekam de mas gwibiridan hapye. Zen kirekam bëjen.

8 Ëe ama emsa gubirida'an: Zen dekam nabakam mas gwibirida gwenda. Hwëna sap kirekam, Ëe ngatan zi mo lang nakore Zi Tangan de etan lwahal zankam, Ëe anakare enlala naban asa hatazal, 'Asa de taïbliblan wenya san ha nama tol? San ha hom tangan?' ”

Gulk sun de ol blaonzimdinni an, zi dare de Alapsa abe lan hap dena:

* 17:32 17:32 Kej. 19:26 * 17:33 17:33 Mat. 10:39; 16:25; Mrk. 8:35; Luk. 9:24; Yoh. 12:25
† 17:35-36 17:35-36 Ayat 36na awe, Lukas hom ale gulku. Zen aha zi lun mas gulku- Matius mo ale nakore naka. (Mat. 24:40) Matius man zëwe ale gulku: “Dekam zi dare de nganak syal ë'anka, aha-en naka sa ëre mo dam taha nakore zini neir inehal. Hwëna aha tola zëwe sa hli dal.” (Mat. 25:1-13; 1Tes. 4:17; Why. 14:17-20)

⁹ Aha yaklakam Yesus ki zep gulk sun de ol blaorankam tonbiridaka-zi de anakan zënaka boltere ta gwibin srëm hap denaka, “Ëe ama sërkam Alap mo nwenak dakasti'in.” Sap zen kire nakon zënaka anakan husus neibirida gwenan, “Zen aban apdenak hom.” Zen in zep gulk sun ola anakan blaonzimki,

¹⁰ “Farisi walya man Alap mo gol san song gweka- dekon de Alapsa gu soneblan hap. Hwëna zao kim gwë'anka, Roma mo irik ginnik dep de pajak te-ala alal tanda gwen zini dekam zep hen kire hap hata zaka.

¹¹ Farisi walya in dekam zep zëbon onakon langa gwesik hankam zau'unka, hen zëre en mo bosesa de mam gun hup denaka Alapsa anakan gu sonebla'anka, 'Alap, ëe ep dawemsa golbla'an, sap ëe aha zi niban apdenak hom, hen zi karekna wakin mo kim hom. Ëe te-ala hole gwibinni tawa naka hom, ahak-ahakna tawa naka hom, hen kahalo gwenna- men kirekam ahakore zini kitak ëgwë gwenanye.

¹² Ëe minggu-jamkam dare yaklakamë tembanena lwa gweblanan-Emsa dikim gu sonebla tine gwen hap. Hen ëe de dare taha-tapkam ba maesa gul irinni, ëe homë Emsa te tya sone gwenan. Ahana ama ebe hap gol gweblanan.’*

¹³ “Hwëna Roma mo irik ginnik dep de te-ala alal tanda gwen hap de zini in langa nakon zau'unka. Dekon zep ngli san de kara gwesen srëmkam huwe henkam nwe go-ho naban gu sonebla'anka, 'Are Alap, asa tol kwasang gwebla. Sap ëe an karek gulin hana gwen zi.’ ” *

¹⁴ Yesus ki zep etan gubiridaka, “Ëe ama emsa gubirida'an: Kim ola halka, te-ala alal tanda gwen zini in, zen zen en Alap mo nwenak sam gwesiki. Farisi walya in hom. Sap tingare zini men zen mam

gwen hap ëalp gwe-gwenan, Alap sa hwëna otde tangannak kang gulu. Hwëna men zen otde tangannak lowehe gwenan, desa hwëna gut denak sa kang gul sera.”

Yesus kim walas tane-ne hap dawemna golzimkike:

(Mat. 19:13-15; Mrk. 10:13-16)

¹⁵ Aha yaklakam ki zep zini walas tane-nena hen wal baizili Yesus onak dep kap nulhal gwe'anzak-Zen de tahasa tehabirida ine gwen hap. Hwëna dua-blaskam de zëre hon ang ta gwen wenya in kim hla nulidak, zen zep hwëna anakan jalse neibirida gwe'ak, “Bahem walasna an san kap gulhal gwezan. Bahem Gurusa blostaban.”

¹⁶ Yesus hwëna ki zep walas tane-nena insa haen gwibiridaka, ki zep zë gubiridaka, “Dikire walasna Abon nolëyaing gwe-gwezak. Bahem jalse gwibiridan. Sap walasna an makare wenya, zen zen Alap mo irik ginni bi neibi'in.

¹⁷ Eiwa denakaë emsa gubirida'an: Men nara walas betek mo kim Alapsa anakan daiblibla'ak, 'Zen eiwa ano teipsinni,' zen zen Alap mo irik ginnik biti gwe'an. Men zen de kirekam daiblibla srëm gwe'ak, zen molya Alap mo irik ginnik biti gwek.”

Te-ala beya nabare zini kim Yesus hon hata zakake:

(Mat. 19:16-30; Mrk. 10:17-31)

¹⁸ Aha yaklakam, ki zep Yahudi kore teipsin tola Yesus hon hata zaka, zao zep gublu zaka, “Bian Guru, em airis. Ëe basa asa syal gwibir?- ëe dikim hëndep de gwën hap denaka gul irin hipye.”

¹⁹ Ki zep ding gulbluka, “Diki airis aha-en tangan, Alap Zë-en. Zep em Asa banakane enlala gwebla'ara?

²⁰ Em dwan mes-eme sap Musa mo titi tabin ola tawa gwibirki- men zen anakan lwakye:

‘Bahem kahalo gwen.

* **18:12 18:12** Mat. 23:23-28 * **18:13 18:13** Yahudi zini zen Alapsa ngli san de kara gwesen naban abe da gwëk- taha teisya inen naban. Hwëna te-ala alal tanda gwen zini in saher hap kirekam gwë srëm gwëka.

Zisi bahem tan.
Bahem sowë gwen.
Zisi bahem boton hap klak tan.'
Hen,
'Ane-biasa em blikip gwesik gwiz-
imdin.' ”*

21 Ki zep ding gulbluka, “Kitak insae äitbirida, ëe betek nakonë ki hëndep desan ang gwek, hëndep angkam nama.”

22 Kirekam kim salblaka ki zep ding gulbluka, “Hwëna aha-en tangan lwa kin'an- em de desan ang gwen hap denaye: Em song gwen, ere mo kire-kirena kitak tangan te-ala hap lirak tabir. Te-alana desa tahalha zi hip kae gweb-la-zim. Kirekame syal gwibi'inka, ki ngatan zi mo langnake hëndep de te-alasa beyakam lam ta'ara. Ena dekam etan hataza- Asa dikim ang gweblan hapye.”

23 Zini in kim kirekam Yesussu salblaka, dekam zep tangan enlalana doweb-la hanaka, sap zëno kire-kirena beya tanganna.

24 Yesus hwëna man zë karatda taka, depan guku, “Eiwa, dam-dam naka hom- te-ala beya zi de Alap mo irik ginnik hatan hapye.

25 Te-ala beya zi de Alap mo irik ginnik hatan hap dena, zen men kiye- unta yawal de jaron hul betek san tinni. Kire otweran yawala toton bëjen tin.”

26 Men zen Yesussu kirekam sane da'ak, man dengguanblak, dekam zep dakensiblik, “Hare eiwa kire tangankamke! Ki hwëna endan nik sa ëngaya gwer? Toton nara molya.”

27 Ki zep hwëna ding gulzimki, “Eiwa, auhu-kama zini zëre mae mo ssonkam bëjen zënaka ngaya tabin. Hwëna Alap de zi hip syal gwibir-zimdin srëm hap dena, ahan mae hom tanganke.”

28 Hwëna Petrus ki zep ding gulbluka, “Ki hwëna abe mae hap dena bankarekam sa lwal? Sap ëe mesë ëre mae mo tïngare bi

gwibinni Emsa de ang gweblanda gwen hap hli kulidak. Zep ëe basa asa lamkam ulin?”

29 Yesus ki zep gubiridaka, “Eiwa denakaë emsa gubirida'an: Men zen de Alap mo irik gin hip de syal hap hli nulida gwe'ak- we wal walas zem, aya-wal oso-wal zem, an-bi zem, hen gol zem-

30 zëbe mae hap Alap sa mamkam kap gul gwizimdi. Men kiresa hli yuludanna, desa sa angkam okamanak sabakkam kap ta gwizimdi. Hwëna Zën kim de kitak irik ginkim kon gwesibir hana'anaka, Zen dekam sa hen zëbe mae hap hëndep de ëngaya gwen hap dena golzimdi.”

Yesus kim etan anakan gubiridake, “Asa sa dal.”

(Mat. 20:17-19; Mrk. 10:32-34)

31 Yesus ki zep dua-blaskam de ang ta gwen wenya insa tagal gulsuku, ki zep zë gubiridaka, “Emki ësane gwen. Nen an angkam Yerusalem san debe yaing gwe se'an. Zëwe kitak men kirekam Alap mo ol ayang gul gwen zini ale nul gwek, ngatan zi mo lang nakore Zi Tanganna abe hap dena, zen kire enkam sa ki hëndep lwal.

32 Asa sa Yahudi srëm zi mo tahanak dep tapbla dazim. Zen sa hwëna Asa lamang tan naban swrë da gwer, hen oltepkam sa Asa holhol da gwer,

33 hen zen sa Asa dangole gwer. Ki sa hëndep Asa dal. Hwëna yaklana dan-ahan, ki asa etan tin nikon ngaya gwer.”

34 Hwëna dua-blaskam de zini in, hom mae engka en mae tame nuk. Banakan mes yap zë gweibiridaka, zep anakan hom dam nulsuk, “An kire hap ki gulu.”

Yesus kim zi nwe diminni dawem takake:

(Mat. 20:29-34; Mrk. 10:46-52)

35 Yesus kim Yerikok golëyaing gwe se'an zaka, zi nwe diminni ora alpnak nikin'inka. Zen te-ala hap kon aberbe ta sone gwibirki.

* 18:20 18:20 Kel. 20:12-16; Ul. 5:16-20

36 Zen kim Yesus maesa sasak-sasakna sane ta gubi'inka, ki zep tame gulku, "O an zi beyam-bya am taman gwe'an." Dekam zep takensik soneka, "Em ba hap?"

37 Ki zep nenblak, "In Yesus taman'ara- Nazaret walya men."

38 Dekam zep taken sone gwebla'anka, "Yesus, Daud Bak mo Auyan-tane, asa tol kwasang gwebla!" †

39 Men zen teingiri da'ak ki zep jalse nēblak, "Balkkam!" Hwēna zen dekam mam enkam etan taken sone gwebla'anka, "Daud Bak mo Auyan-tane, asa tol kwasang gwebla!"

40 Yesus dekam zep zausuku, ki zep waulblu halzan hap gubiridaka. Kim nērhatzak, zao zep takensiblika,

41 "Em basae dwam gwibi'ira?- Èe de desa ebe hap syal gwibir-blin hapye."

Ki zep ding gulbluka, "Bian, èe ama nwsa de kara gwen hap dwam gwe'an."

42 Yesus ki zep gubluka, "Ki em kara gwen. Em mese asa taïblīblala, zebe dawem gwenda."

43 Dekam zep ki hēndep kara gweka, dekam zep Yesusu ang gwe sebla halka- Alap hap de dawemsa gol gweblan naban. Zi trana in kim owasna insa hla nuk, dekam zep kitak Alap mo bosena teip nul-sublu'ak.

19

Zakeus Bak kim halekake:

1 Yesus kim nama Yerusalem san dep golēsek gwe'anka, ki zep Yerikosa golētaman gwe'anka.

2 Hwēna Roma mo irik ginnik dep te-ala alal tanda gwen nik mo nola zēwe gwē gweka, bosena Zakeus. Zēno kire-kirena beya tanganna.

3 Zen man tangan Yesusu de hla tan hap dwam gwe'anka, hwēna zini

beya tanganna. Zep zen ba kon dep?- hla tan naye. Sap zini in tihis tanganna.

4 Ngein sin zep tenya aranak de sewen hap hles tyaka- dekon de tamarannak hla ta sonen hap.

5 Yesus kim te ausuna iwe hata zaka, ki zep gulk sun kara gwe seka, zao zep gu seblaka, "Zakeus Bak, em nabakam ati gwezan, sap Alap mo abe hap de dwam gwibir-blinna, Èe namen aha golak molya tak. Èe eno golak asa tal."

6 Zakeus ki zep nabal-bakam ati gwe zaka, ki zep hēndep Yesusu zēre mo gol san dep isrip-sri naban ngeirbline halka.

7 Tīngare zini kim kirekam Yesusu hla dak, dekam zep jakal nēbla'ak. Man ēguk, "Wēo, zen ba hap zi karek mo golak de tan hap gunda?!"

8 Golak kim lowe he'ak, Zakeus ki zep luweka, ki zep Yesusu gubluka, "Bian, èe ama angkam hale'an. Ano kire-kirena 50 persenkam èe asa tahalha zi hip kae gwebla-zim. Hen men zēno mae mo pajaksaē aen dikim aha hlik naka twenblan hap mamkam de ing gun hup gubirida gwek, èe asa hwēna angkam etan mamkam kap tazim: 100 ribukam de ahap tan zi hip, èe asa hwēna 400 ribukam golblal. 10 ribukam de ahap tan zi hip, 40 ribukam asa golblal."*

9 Ki zep hwēna zēno ola insa ding gulku, "Namen de yaklana awe, zini an hēndep we wal walas zeban, Alap mes ngaya tabin hip denaka golhatazimmira, sap zen hen Abraham Bak mo auyan-tane wal.

10 Sap ngatan zi mo lang nakore Zi Tanganna Èe kire zisi de hakalbiri-dan habē hatazak- men zen ora dawem nakon ēsyal hekke, desa dikim ngaya tabin hip."

† 18:38 18:38 Israelsa de ngaya tabin hip de Zini, desa "Daud mo Auyan-tane" kam nen gweblak, sap Alap mo olsa de ayang gul gwen hap de zini kirekam nen gubirida gwek, "Zen teipsin zini Daud mo ausu nakon sa saltīlī." * 19:8 19:8 Kel. 22:1; Bil. 5:6-7

Yesus kim Zënaka de baes gweblan hap de ola gulk sun blaonzimkike, hen aumwa hap de zisi klis gunnuk de zëre mae mo syal ei nika goltrëblan hap dena:

(Mat. 25:14-30)

¹¹ Yesus kim nama kirekam tonbirida'anka, Zen gulk sun de ol blaonzimdinkim ayang gulzim'inka. Sap dekam Zen mes Yerusalemk golëgolek de gwe'anka, hen dekam zini man kil di gwe'ak, "Yerusalemk kim golëyaing gwe'anka, Zen dekam sa nësa Alap mo bosekam irik gili, hen nen dekam esa Roma mo irik gin nikon wet so gwer."

¹² Ki zep gubiridaka, "Orep zini ki, bose teipsiblinna. Ki zep hwëna teipsin tangan zi nik aha lang nakon gu soneblaka- zao de bose naka etan esek gul seblan hap, lwahal zankam de zen langna iwe irik gilzin hap.

¹³ Hwëna kim teipsin tol zini in song gwe srëm gwe'anka, zen zëre hon de babu gwen zisi dare taha-tapakam kwang guludaka. Zao zep te-alana kae gwebla-zimki- seratus-juta seratus-jutakam. Zao zep gubiridaka, 'Te-alana an ano tim bwanak em dekam kire-kirena lirak la gwibik.'

¹⁴ "Hwëna zao de zini ahakon man tangan husus nëblak- zen de teipsin hipye. Zep zëna kim song gweka, dekam zep zisi kap nul sonek- zen de teipsin tangan zini insa anakan gublun hap, 'Zini in ëe homë ki dwam ëbla'an- zen de asa teipsibiridan hapye.'

¹⁵ "Hwëna zen hom zëno mae mo ol san ang gweka. Zen hwëna desa teipsin taka. Ki zep hëndep zëre mo lang san dep lwahal zaka. Hëndep dekam zep zëre hon de ëbabu gwegwen zini insa tagal gulsuku- dekam de zë anakan tawa gwibiridan hap, 'Zëno mae mo te-alakam de eini angkam banaka'en?'

¹⁶ "Nonol zen hata zaka, ki zep gubluka, 'Bian, seratus jutakam mensa ap zerblaka, angkam mes satu meliarak hataka. An zen- te-alana inye.'

¹⁷ "Ki zep gubluka, 'Airis! Em abon de babu gwen zini dawem tanganna! Em mese betekkam de zerblan naka dawemkam irik taka, zebë angkam mam naka ep we yul sonebla'an. Zep angkam em sepulukam de ësa esa irik gili.'

¹⁸ "Zao zen hata zaka ki zep gubluka, 'Bian, seratus jutakam mensa ap zerblaka, angkam mes lima-ratus jutanak zaulu.'

¹⁹ "Desa hen ki zep gubluka, 'Em ëna lima enkam esa irik gili.'

²⁰ "Ahana zen hata zaka, zen hen ki zep gublu zaka, 'Bian, eno te-alana men, a. Eë ama kaen haknak de tahalen naka ep aning tablak.

²¹ Eë ama emsa airi gweblak, sap em in jal-jal enkame irik gil gwenda. Sap em ere en mo eiyas gin nikore ei nika home tan gwenda, hwëna hen ebon de syal ta gwen wenyik mo irse gwen nakore nakae mamkam ere hap gulin gwenda.'

²² "Ki zep ding gulbluka, 'Em abon de babu gwen zini karek tanganna! Em eiwakam asa anakan tame taka: Eë jal-jalkamë irik gil gwenan, hen ëre en mo eiyas gin nikore ei nika homë tan gwenan, hwëna aha mo irse gwen nakore ei nikaë gulin gwenan. In zep ere mo ol toranna in kon asa emsa karek tal.

²³ Zep em ba habe ano te-alana insa te-ala lam ta gwen golak drëne srëm gweka? Ki zao maka etan lwahal zannak betek maekam ap mas nulblik.'

²⁴ "Zini men zen zë lowe he'ak desa zep gubiridaka, 'Te-alana insa em al tablan. Satu meliarkam men zen ap zertrëblala, zëbe hap hwëna mas lablak.'

²⁵ "Hwëna zini man zë denggan-bla'ak, ki zep nenblak, 'Asya, Bian, zëno mes-am satu meliar gweka!'

²⁶ "Ki zep ding gulzimki, 'Zini men zen ano kap tablan kim syal-syal gwenna, zëbe hap etan asa kap ta gweblal. Hwëna men zen ano kap tablan naka asang gweblanna, men zen betek en maekam nama lwabla'anka, desa asa etan al tablal.

27 Hwëna men zen ëe de teipsin hip baes tak, desa lahyo halzak- ëre mo nwenak de tameran hap.' "

Yesussu kim teipsin zi mo kim Yerusalem kon hut du ane gukke:

(Mat. 21:1-9; Mrk. 11:1-11; Yoh. 12:12-19)

28 In kim kirekam tonsuku, dekon kim Yerusalemk golëyaing gwe se'anka, Yesus Zëna ngeinnik gwëka.

29 Zaitun tra nabare kwatap tek-nak de ë darena Betania hen Betfagek kim golëyaing gwe'anka, dekon zep zëre hon de ang ta gwen wenyaka dan-dan guzimki,

30 "Em ëna wakin san song ën. Kime apta'an haka, zao esa hëndep keledai tanena da tablan naka hla lala- zi mo zersong gwen srëm naka. Desa hil li-in halza.

31 Zi de emsa takensizimdinkim, 'Em ba habe hil li'ara?'- a kirekam ding ulzim, 'Bian dwam gwebla'ara.' "

32 Zi darena in ki zep song ëka. Men kire enkam tan-tan soka, kire enkam zep ki hëndep lwak.

33 Kim hil li in'inka, keledai bina ki zep dakensizimki, "Em ba habe hil li'ara?"

34 Ki zep ding ulzimki, "Bian dwam gwebla'ara."

35 Hëndep ki zep ërlwa halka. Kim ërhataka, ki zep keledai tahan dannak zëre mae mo tahan bajuna kang dasek, zao zep hwëna Yesussu zëwe de sewesen hap mas nëblak.

36 Kim zersong gwe'anka, zi trana in dekam zep ngein sin zëre mae mo tahan bajuna ora san dëre dahak-desan de keledaina in zersong gwen hap. *

37 Yerusalemk kim ëgolek de gwe'ak- orana men dekon zaitun tra nabare kwatap tek nakon hut gwehe zaka, zi trana men zen ang nëblan da'ak dekon zep ol mamkam Alapsa isrip-sri nëbla song gwe'ak-

mae hap, mensa owas-owasna zëre mae mo nwekam hla nul gwekke.

38 Man ëtaken song gwe'ak, "Hë'ho!

An Bian mo bosekam nësa dikim tatetekam irik gin hip hata se'ara.

Diki Alap Zen zëbe hap dawemsa golblan.

An Zëbon onakon esa Alap han ërumlae gwer!

Hë'ho! Nen kitak teipsin tangan Zini Alapsa boltere tan!"

39 Hwëna Farisikam de zini zi trana iwe man zë hen ëdurum gwehek. Zen ki zep Yesussu nen-blak, "Bian, emki sap ere hon de ang ta gwen wenyansa gubiridan-dekakim balk tasik!"

40 Ki zep ding gulzimki, "Ee ama emsa gubirida'an: Zen de ëbalk tasi'ik, dekam hwëna kaso beyambyana an zen sa hwëna kirekam ëtaken gwer."

Yesus kim Yerusalem nwe go-ho gweblakake:

41 Yesus kim Yerusalem golek kon hla takin zika, dekam zep anakare ola ban nwe go-ho gwebla'anka,

42 "Kwasang tol, Yerusalem. Namen bae ki anakan tame u'in, 'Alap han de zersësek gwen hap de orana an desan.' Hwëna Alap mes ebe mae hap orana insa aning tazimki.*

43 Zen in zep, sap em Yerusalemk de zini home Asa dam lasi'in, yaklanak sa hatal- men dekam de ebe mae hap de jal zini emsa dot nulsu'ukye. Em dekam toton ba san molye heya-hya gwek. Zen sa kamasa bwang nul- eno ënak de kol sonna ansa dikim tatak gwesik kinin hapye. Desan sa emsa bitë neibiridazal.

44 Zen sa hëndep emsa kitak damerasil, hen eno mae mo gola sa lu da gwer. We wal walasna zen sa keiking nul, hëndep gol te ik gin maena

* **19:36 19:36** Orep de zini kirekam ëgwë gwek- teipsin zisi de hut tu ine gunkumye. Orep teipsin zi de kudakam song gwe zanna, zëno enlalana, eijan hap. Keledaikam de song gwe zanna, zen umlae naban de hatazan hap. * **19:42 19:42** Luk. 13:34-35

molya ëlwak. Sap em home tame uk- Alap in kim sap emsa de ngaya tabin hip hata zakaye.”

Yesus kim pasar zini Alap mo gol tēm nakon golëalsa sonekake:

(Mat. 21:12-17; Mrk. 11:15-19; Yoh. 2:13-22)

⁴⁵ Yesus ki zep Alap mo golak tīl zika. Dekon zep, men zen zē Alap hap de golblan kire-kirena lirak da gwibik, desa golëalsa soneka.

⁴⁶ Zao zep gubiridaka, “Alap mo olak man lwak,

‘Ano gola zen Ēnaka dekon gu sone gweblan hap dena.’

Em an hwëna

‘sowë zi mo aning gol habe li kul sone gwe'an.’ ”*

⁴⁷ Hwëna Zën zep zē yakla jamkam tawa ta gwibi'inka. Hwëna Alap mo golak de syal tan wenyik mo mam-mamna, Musa mo olsa de tawa ta gwibin wenyä, hen Yahudi mo nol-nola, zen dekam man Yesusu dikim tan hap orasa dëbla'ak.

⁴⁸ Hwëna hom dam dasi'ik, sap tīngare ahakore zini man Yesus mo tawa tabinni sërkam dwam neibi'ik.

20

Yesusu kim anakan dak-ensiblikke, “Emsa an nara trī ta se'ara?”

(Mat. 21:23-27; Mrk. 11:27-33)

¹ Aha yaklakam kim Yesus Alap mo golak tawa tabi'inka, dekam zep hen Alap mo golak de syal ta gwen zi mo mam-mamna, Musa mo olsa de tawa ta gwibin wenyä, hen Yahudi mo nol-nola ban yaing gwezak.

² Zao zep dakensiblik, “Emsa an nara gubluka, hen nara emsa trī tase gwe'ara?- dekam de kirekam-kirekamna insa syal gwe-gwibin hipye.”

³⁻⁴ Ki zep ding gulzimki, “Ki Ēe asa hen nonol emsa takensibiridal: Baptis ta gwibin zini Yohanis Swesa san ha Alap trī ta seka? San ha zen

zëre en mo sasonkam ki syal gwe-gweka? Eme nonol ap ding ulbli'ak, ki Ēe asa hen emsa gubiridal, ‘Asa Zen trī ta se'ara, zebë kirekam syal gwe-gwe'an.’ ”

⁵ Dekam zep zë-en anakan donbi'ik, “Bëjen nen anakan ding gulblun, ‘Alap trī ta seka,’ ki hwëna zen sa nësa gubiridala, ‘Ki em ba habe desa laiblibla srëm gwek?’

⁶ Hwëna anakane ding ulbli'ak, ‘Yohanis zen zëre en mo sasonkam syal gweka,’ ki hwëna zi trana an sa kasokam nësa nīribiridal, sap zen Yohanissi mes-am anakan daibliblak, ‘Zen eiwa Alap mo olsa ayang gul gwizimki.’ ”

⁷ Anakan zep hëndep ding nulblik, “Ēe homë dam ulsu'un, ‘Yohanissi zen trī tase gweka.’ ”

⁸ Ki zep hwëna ding gulzimki, “Zep Ēe hen molyë emsa gubiridak, ‘Ēe an zëno syalsaë gol gwe'an, hen Zen Asa trī tase gwe'ara.’ ”

Yesus kim ola gulk sun blaonz-imkike- Zënaka de Yahudi zi baes gweblan hap dena:

(Mat. 21:33-46; Mrk. 12:1-12)

⁹ Yesus ki zep ola gulk sun blaonz-imki, “Zini ki, zëno anggur ngana yawala. Zen hwëna ngana insa te-alakam bohë ta guzim halka. Zëna dekam zep aha lang san holokam de zë gwën hap song gweka.

¹⁰ Angguru in kim tēka, dekam zep zëre hon de babu gwen zisi zer soneka- zen de anggur dan te-ala hliksa zëre hap zerbla halzan hap. Hwëna zini in zen ngana insa bohë dak, zen hwëna man karekkam dangolek, deban zep nenblak, ‘Wake, ki en lwahal!’* ”

¹¹ Etan ki zep ahanaka zer soneka. Hwëna desa man nonol lamang dak, zao zep dangolek, ki zep etan ba maesa de golblan srëmkam nër sonek.

¹² Dekam etan ahanaka zep zer soneka. Desa hen man dangolek,

* 19:46 19:46 Yes. 56:7; Yer. 7:11 * 20:10 20:10 2Taw. 36:15-16

hëndep man dësek, ki zep hëndep ngana in kon hiri dak.

¹³ “Dekam zep nga bina in enlala gweka, ‘Èe banakan asa etan syal gwibir? Anik ki ère mo dang tìninak de walasna ansa zer sonek. Desa wéhë yap blikip neisibli'ak.’

¹⁴ “Hwëna kim nga bohë tan zini in hla da guk, ki zep zënaka nen-biridak, ‘Wakin angkam zère mo walas tangan hata'ara. Bi zik de tìnkim, an zen sa hwëna ngana ansa bi gweblala. Nen tan, ekakim nèn bi èblak!’

¹⁵ Ki zep hëndep ngana in kon hiri dak, zao zep tol hëndep dak.

“Zep nga bi nik mo zi lup gul sonna in sa kirekam neibirida gwek, zep zen banakan sa gweibirida zala?”

¹⁶ Zen sa tamera zala. Ngana in sa dekam sa hwëna aha zi hip bohë tazimdi- dekam de zen anggur dan te-ala hliksa zère hap zer gweblan hap.”

Ola in sa kim èsane gwek, dekam zep èguk, “Asya, kirekam bap zen lwan!”

¹⁷ Hwëna Yesus man kara tabi'inka hen sane tabi'inka. Ki zep hwëna gubiridaka, “Ki hwëna em banakane Alap mo ola ansa enlala eibi'in?- men zen anakan lwak, ‘Gol tauk gweblan wenya mensa gol tenya baes neibik, hwëna Bian Alap mes desa bolak ik gilkì.’ *

¹⁸ Zep zini men zen de gol tenya iwe ètisik gwe'anzak, zao sa hëndep ètimbwas gwe-gwer. Hen gol tenya in men zèbon mae de zan ine'ak, zen sa hëndep èils gwer.”*

Yesus hon kim anakan de u siweblan hap yaing gwe zakke, “Roma mo irik ginni wéhë ol lamangkam gubi'inka?”

(Mat. 22:15-22; Mrk. 12:13-17)

¹⁹ Yahudi mo mam-mamna in kim Yesus mo gulk sun de ol blaoranna

insa sane da'ak, dekam zep dam nulsuk, “O zëno ola an nèbon mae am tì'in.” Ki zep sap dekam de zë hëndep balk tan hap èakasik. Hwëna zen zi beyam-byana in sa hen nairibiridak, zep balk da srëm gwek.

²⁰ Dekam zep hwëna balk tan hap orana dèbla'ak. Zen in zep ahakorena lup nul sonek- zen de u siwen olkam takensik gweblan hap. Sap zen mes ola anakan niaha-en guk, “Roma mo irik gin nika de ol lamangkam gubi'inka, dekam asa enbiridazak. Zen dekam esa hwëna gubernor hon klak lal.”

²¹ In zep Yesusu nenblazak, “Bian, èe mesë emsa tame lak. Em Alap mo dwam gwibinni damdam enkame tawa ta gwibirida, sap eno tawa tabinni home wet gulsuk gwenda- dekam de zi emsa husus gweblan srëm hapye, sap mamna, sap betekna.

²² Zen in zebë emsa lakensibli'an: Em banakane Musa mo titi tabin ola dam gulsu'ura? San ha nen sap esa Roma mo irik ginnik dep pajak te-alana ol gwizim? San ha bap nen?”

²³ Hwëna Yesus mes anakan tame tabirki, “An u siwen olkam ki Asa dakensibli'an.” Ki zep gubiridaka,

²⁴ “Abe hap emki pajak hap de te-ala kasona in sa ahanaka goltrèblan.” Kim nolblak, ki zep gubiridaka, “Te-ala kasonak awe, an nara mo nwe-masesa zë yang dasik? Hen nara mo bosesa zë ale nuk?”

Ki zep ding nulblik, “Roma mo teipsin zi mo denakake.”

²⁵ Ki zep hwëna ding gulzimki, “Ki Roma mo teipsin zini in mo bi gwibin kire-kirena amki zèbe hap etan lop la gweblak. Hen kirekam, Alap mo bi gwibin kire-kirena, amki Alap hap lop la gweblak.”

²⁶ Zi beya mo inik hëndep hom zëno karekkam de ol-gunnu nasal-blak. Ki zep hëndep balk tasik, sap

* **20:17 20:17** Yahudi zini kasokam gola dauk gweblak, zep mensa Yesus awe buku Mazmuru kon guku (Mzm. 118:22-23), zen nonol lonen kaso hap dena. Hwëna Orya ol zi hip, ngirin gol tenya ban enlalana anakan apde nè'an, “Bol-zaun tangan wenya,” zep kirekam li nul sonek. * **20:18 20:18** Yes. 8:14-15

zen man zëno ding gulzimdinni insa dengguanbik.

Sadukikam de gubirida gwen zini kim Yesussu tìn nìkon de etan ëngaya gwen hap dena dakensiblikke:

(Mat. 22:23-33; Mrk. 12:18-27)

²⁷ Sadukikam de gubirida gwen zini, zëno mae mo tawa tabinkim, "Zini bëjen tìn nìkon etan ngaya gwen." Zen ki zep hen Yesus hon yaing gwezak.*

²⁸ Dekam zep u siwen enlala naban anakan dakensibli'ak, "Bian Guru, Musa Bak mo titi tabin olak a kirekam mo lwakye:

'Zi de we zemka walas wë lan srëmnak tinkim hli yunnu, zen oso zik de etan gonkam- zen de zë walassa aya zik mo weinak dep wë tan hap. Hen kirekam, oso zik de tinkim, aya zik de hwëna we semna insa gonkam.'*

²⁹ Orep awe zini ki, beyana tuju enkam, aha-ere ane-bianna. Zëna zi nik zep nonol wenya golka, hwëna walas wë lan srëmnak zep tilki.

³⁰ Zao de zi nik zep etan golka- sownal zem in saye. Zen hen walas ën srëmnak zep tilki.

³¹ Zao hen etan dan-ahan nik golka. Zen hen walas wë lan srëmnak tilki. Hëndep tujukam de aya-wal oso walya in kire enkam zep sap nol gwëk, hwëna walas ën srëm ennak zep juwe gwëk.

³² Wenya in hwëna aumwa hap zep tik.

³³ Zep zen de etan ëngaya gwe'anam, men kirekam ahakon tawa da gwibirin, wenya insa nara mo wekam maka nenbi'in? Sap tujukam de zini in mes desa kitak nol gwëk."

³⁴ Yesus ki zep ding gulzimki, "Zini okamanak de lowehe gwenkam, zen man we-zi darena zënaka kap da gwenan.

³⁵ Hwëna zini men zen etan de ëngaya gwen hap ëdakasti'ik, zen molya etan zënaka kap da gwëk.

³⁶ Zen dekam Alap mo dam taha nakore zi mo kim sa lowehe gwer, hen dekam molya etan juwe gwëk. Zen Alap mo hanan tabin walaskam sa lowehe gwer, sap Zen mes desa tìn nìkon ngaya tabirki.

³⁷ Hwëna Musa hen mes damnak anakan goltreizimki, 'Zini tìn nìkon ngaya gwenkam.' Sap zen kim syauk nubare te tyum-tyumnuk hata zaka, dekam Alap anakan am gubluka,

'Èe an eno auyan wal mo Alap- Abraham, Isak, hen Yakob Bak mo.'*

³⁸ Zep Alap Zen tìn zi mo Alapsa hom. Zen ngaya wenyik mo Alap. Sap tingan men zen juwek Zëbon onakon nama ngayana."

³⁹ Ki zep Musa mo ol tawa ta gwibin zini ahakore nik nenblak, "Bian, em dawemkame ding gwluda."

⁴⁰ Dekam zep Yesussu de takensik gweblanna baes tak, sap zen mes ësa her gwëk.

Yesus kim Zënaka dikim sap dam tasin hip dena goltreizimkike:

(Mat. 22:41-46; Mrk. 12:35-37)

⁴¹ Yesus ki zep takensibiridaka, "Zen ba hap ki zini anakan tawa da gwibirin?- 'Israelsa de ngaya tabin hip de Zini, Zen teipsin zini Daud mo auyan-tanekam sa hata zala.'

⁴² Hwëna Daud zëna man-am 'Teipsin Zi'kim gubluka- in kim buku Mazmuruk anakarekam ale gulkuye:

'Bian Alap man ano Teipsinni gubluka, "Ère mo dam taha nakon emki nikirin- dekon de hen teipsinkim irik gin hip.

⁴³ Ki asa hwëna ebe hap de jal zini ere mo tana iltikinnik sisik gulin."*

⁴⁴ Zep Daud insa Israelsa de ngaya tabin hip de Zini insa 'Teipsin Zi'kim

* 20:27 20:27 Kis. 23:6-8 * 20:28 20:28 Ul. 25:5-6 * 20:37 20:37 Kel. 3:6 * 20:43 20:43 Mzm. 110:1

gubluka, ki Zen banakan sa zëno auyan-tanekam hata zala?"

Yesus kim anakan tawa tabirkike, "Bera, Musa mo titi tabin ol tawa ta gwibin zini in enlala kwae naban!"

(Mat. 23:1-36; Mrk. 12:38-40)

⁴⁵ Zi beyam-byana in kim nama sane da'ak, ki zep dua-blaskam de wenya insa gubiridaka,

⁴⁶ "Bera, Musa mo ol tawa ta gwibin zini in enlala kwae naban! Zëno mae mo kwaena in mana ebon mae hliminnink. Zen baju dawem-dawem alala tan naban zi nwe san zënaka nolëtrënda gwenan- zi dikim blikip gwesibirida gwen hap. Zen hen man ëdwam gwe-gwenan-dekam de aha zi tagal gwen maenak anakan blikip gwesibirida gwen hap, 'Dawem, bian guru.' Zen hen but srëm golak ngeinnik de komal tumnak de teinikirin hip ëdwam gwe-gwenan- hen tembane yawal maenakye.

⁴⁷ We wal sem-semna hen anakan ahap da gwibirin, 'Ëe asa tol eno zi swe mo kire-kire hli tandanna ebe hap tagal tasibir.' Hwëna zen sowë enlala naban mas neibirida gwenan- dekam de zëre hap mamkam hli ti irin hip. Hwëna zëre mae mo karekna insa dikim aha zi hlaulz- imdin srëm hap, zep but srëm gola kon zi nwenak Alapsa mam blalkam nen sone gweblanan- dekam de zi kil tïbin hip, 'Zini an aïrïs.' Hwëna zen zënaka de karek tabin hip denaka kim mam nulsuk gwenan."

21

We sem tahalhana kim te-ala was- gena Alap hap ing so sonebla zakke: (Mrk. 12:41-44)

¹ Yesus kim nama Alap mo golak gwë'anka, ki zep kara tabi'inka- te- ala beya zini kim Alap hap te-alana bitï da sone gwebla'anzak.

² Dekam zep hen we sem tahal- hana hlaulku- zen kim hen te- alana dan tolaka Alap hap ing so sonebla'anzak.

³ Yesus dekam zep gubiridaka, "Eiwa denakaë emsa gubirida'an: We sem tahalhana an mes tingare ahakore zini kwei-kwik gulun.*

⁴ Sap ahakon in zen bitï da gwe sanzal, zëre mae hap de hlikna nama beya nik ërlwazim'in. Hwëna we sem tahalhana an mes tïngan ing gulun- zën dikim tol sap gwën hap denaka."

Yesus kim anakan hamal hap gu- biridakake, "Aumwa hap denak, a kirekam sa lwa song gwer."

(Mat. 24:1-14; Mrk. 13:1-13)

⁵ Yesus hon de ang ta gwen wenya ki zep Alap mo gola insa anakan donbi'ik, "Alap mo gola an man tangan weir gulsunkum kwa nuk, hen zëno kaso kong ta zahenna sërkam de nwe-awes tanganna. Hen mensa Alap hap kire-kirena nol gwe- blak, sërkam de dawem-dawem tan- ganna." Yesus ki zep gubiridaka,

⁶ "Yaklanak sa hatal, an desa namen kara u'in, sa dre nulsul. Hëndep zëno kaso kong ta zahenna aha-en mae molya lwak. Zen tïngan tangan sa dri nulsul."

⁷ Ki zep Yesusu dakensiblik, "Bian, zen bawalkam sa ki lwal? Hen banakare owassa asa hla kul gwer?- dekam de anakan dam gul- sun hup, 'Angkam man ki lwa'an- men kirekam hamal hap asa gu- gubiridakaye.' "

⁸ Ki zep ding gulzimki, "Salok- salokkam lowehe gwëk. Emsa mana yasik da gwibirink. Sap zini beya nik sa ebon mae onak anakan ëboton gwe-gwezal, 'Ëe an Zen- Yesusye. Angkam mes zë zaunun!' Hwëna bahem salbirida gwen.

⁹ Em de anakan ësane gwe- gwenkam, 'Zëwe man ëeija'an,' hen anakan, 'Dekon pemerinta nakon de wet so gwen hap man ësozon gwe'an,' hwëna em dekam bahem ëaïri gwen. Sap zen nonol kirekam sa Alap mo dwam gwibin sin lwa gwer. Hwëna dekam bahem ëkil gil

* 21:3 21:3 2Kor. 8:12

gwen, 'An aumwa hap denak mes zaul, zep ki lwa'an.'

¹⁰ "Aha zi ausu nakorena aha zi ausu naban sa ëeija gwer, hen aha irik ginni aha irik gin niban sa ëeija gwer.

¹¹ Lang yala an san jingili mam enkam sa tailida gwer. Usak yawala sa hatanda gwer. Hen sangsang yawal sa hlauluda song gwer. Nglinak esa owasna hla kulse gwer, dekam esa ëairi gwer.

¹² "Hwëna kirekam de lwan srëmnak, emsa sa dahyo gwer hen karek da gwibir. But srëm golak de mam-mam wenya kip sa emsa kap nulzimhal gwer, ki sa hwëna pemerinta mo bwinak emsa yal nulne gwer. Hen emsa sa pemerinta mo teipsin-teipsin wenya kip anakan nolëtrei gwizim, 'An hen ahana- Yesus hon de ang gwegwenna.'

¹³ Hwëna zen kirekam Alap mo dwam gwibin sin sa ki ebe mae hap lwa gwizim- em dikim zë abe hap denaka ëton gwen hap.

¹⁴⁻¹⁵ Aen asa ebe mae hap enlala blala ing ta sone gwizim, dekam hëndep eno mae mo jal zini molya eno mae mo ola insa nulsuk halasen gwëk. Zep emki hamal hap enlalasa anakan hohle ta gwen, 'Ëe ba hap de enlalana beya gwen hap? Zen sa zëwe de zaunkum enlala blala abe hap zerblala- ëe de kirekam ding gul gwizimdin hip denaye.'

¹⁶ Ere mae mo ane-bianna, aya-wal oso-wal om, iye wal om, hen wal bose wal om, zen sa emsa abe hap de jal hap karek tabin hip nolëgu gwer. Hëndep emsa sa ahakon damera gwer.

¹⁷ Emsa tingare zini sa husus neibirida gwer, sap em an Asa de ang gwegweblan wenya.

¹⁸ Em sap esa okamanak awe juwer, hwëna lamkam etan tim ëse naban esa luk tal.

¹⁹ Zep em Asa de taibliblannak em tatetekam ëzauk gwen. Zen dekam

esa enaka ngaya labir!"

Yesus kim hamal hap gubiridakake, "Jal zini sa Yerusalemsa dre dazal."

(Mat. 24:15-21; Mrk. 13:14-19)

²⁰ "Em kime jana nabare zini Yerusalemsa de dot tasinnik hla kulida'ak, zen dekam ëenlala gwëk, 'Yerusalemsa de dre tan hap de yaklanak mes zaunun.'

²¹ Em dekam, Yerusalem mo langnak de lowehen wenya, kwatap san dep em heya-hya gwen. Yerusalemk de lowehen wenya, emki hli tasin. Hen ë alp san de lowe hendan wenya, bahem etan ë san dep lwanda halzan.

²² Dekam men kirekam hamal hap ale nul gwëkke, kire enkam sa Alap mo jala hatazim.

²³ Kwasang tol, we walya u nubare wenya, hen nama de walassa momkam taizi gwibin wenya. Zen tol banakan molya ëasendak. Dekam langna sa tangan dohon-hon gwer- Alap mo jal de awe de zi hip hatazimdinkimye.

²⁴ Ahakon nëbokkam sa blom da gwibir. Ahakon tingare lang san dep sa dahalebirhal gwer- zao de zi mo tana iltikinnik ëbabu gwegwen hap. Dekam Yerusalemsa Yahudi srëm zi en sa nyauk gweblalhëndep yaklana de tap gwe'anka, Bian mensa ki-en zëbe mae hap aïtbir-zimkike."*

Ngatan zi mo lang nakore Zi Tangan de hatan hap de ol:

(Mat. 24:29-31; Mrk. 13:24-27)

²⁵ "Alap dekam sa tan-tanna benak, yaklanak, hen keisnik gol gwizimdi. Dekam hina sa mam en tangankam ngëp-ngëp gwegwer- auku mam naban. Okamanak de tingare langnak de zini zep sa anakare hap ëairi gwer, 'Nen an molye lowehëk.'*

²⁶ Zini hëndep kim de lang olo gwen hap dena insa neisbi'ik, airin hip sa ëtilsik gwer. Sap dekam

* **21:24 21:24** Rom. 11:25; Why. 11:2 * **21:25 21:25** Mzm. 46:1-3; Yes. 13:10; Yeh. 32:7; Yl. 2:31; 2Ptr. 3:10-12; Why. 6:12-13

nglinak de teipsin-teipsin dowa-
dowala sèrkam sa èilman gwe nasen
gwer.

²⁷ Zen diki dekam sa ngatan zi mo
lang nakore Zi Tanganna Asa but
de zerati gwe zannak hla dase gul.
Zen dekam asa ère mo sosen naban
ngatan yawala ban ziati gwezal.

²⁸ Kirekam kim de lwa'ak, zen
dekam em luk tan, ki gulk sun isrip-
sri naban èkara gwesek, sap zen
dekam emsa de ngaya tabin hip ki
lwa'an."

Langsa de dam gulsun hup de ol:
(*Mat. 24:32-35; Mrk. 13:28-31*)

²⁹ Yesus ki zep gulk sun
de ol blaonzindinkim aïsìl
gwibirida'an, "Emki èenlala
gwen- dèren, ahaksa aha te.

³⁰ Zen de alsin hyanak etan ala
gwenkam, zen dekame tame ul gwe-
nan, 'Angkam sasa gwen hap ki
lwa'an.'

³¹ Hen kirekam, owas-owasna insa
kime hla kul gwe'ak, zen dekam esa
anakan ètawa gwer, 'Angkam Alap
Zèn de kitak irik gülzin hap denak
man zau'un!' *

³² "Eiwa denakaè emsa gu-
birida'an: Em an zene angkam
lowe he'an, molye kitak juwek, zen
dekam sa ki tingan lwal. †

³³ Ngli naban kama naban sa jek-
jak nër. Hwëna ano ola, zen hëndep
denaban sa lwa gwer."

*Salok-salokkam de lowehe gwen
hap de ol:*

³⁴ "Ere mo gwënsa em kara gul
gwen- mae hap, mana eno enhona
in beya gwenanka, syan-syan en hap
de enlalakam, hen ho mamak otde
gwen en hap de enlalakam, hen ere
mo gwënsa de ngalap gwibin hip
de enlalakam. Ki hwëna aumwa

hap de yaklanak zol makarenak esa
èkyan nahlal.

³⁵ Sap yaklana dekam kirekam sa
hatazim- tingan men zen okamanak
lowehe gwenan, zèbe mae hapye.

³⁶ Zen in zep salok-salokkam
lowehe gwek- Alapsa de gu sonebla
tine gwen naban, tatetekam ekakim
èzauk. Karek yala in zen hata'an,
kire hap em abe ta sone gwen-
desa ekakim dawemkam yaubik,
hen dawemkam ekakim ngatan zi
mo lang nakore Zi Tanganna Asa
etan de hata zannak èrtowek."*

³⁷ Zao kim lwa se'ak, Yesus dekam
yaklam Alap mo golak tawa ta
gwibirki. Kam-en zep hwëna zère
hon de ang ta gwen wenya ban
zaitun tra nabare kwatap tek san
dep golèsek gwe-gweka- zao de
golètruwe gwen hap.

³⁸ Zi beyam-byana kak tangan-
nak zep Alap mo golak yaing gwe-
gwezak- Yesus mo tawa tabinni insa
de èsane gwen hap.

22

Yudas kim Yesussu zergukuke:

(*Mat. 26:1-5; 26:14-16; Mrk. 14:1-
2; 14:10-11; Yoh. 11:45-53*)

¹ Dekam yakla yala Paskanak dep
man golek de gwe'ak- Alap men
dekam Mesir kon Israelsa gwis gwe
sonekake. * Paska yaklanak kim
zauk, zen dekam zep hen èkon
gwesik hanak- aha-ere minggukam
de rasi srëmkam rotisa tru ta gwen
naye.

² Dekam Alap mo golak de syal
tan zi mo mam-mamna Musa mo ol
tawa ta gwibin zi niban, zen hwëna
aningkim Yesussu dikim tan hap
orasa dèbla'ak. Hwëna zi beyasa
naïribiridak, zep dekam balk da
srëm gwek.

* **21:31 21:31** Owas-owasna mensa enlala gwibiridaka, zen mensa ayat 25-26nak lwa'an. † **21:32 21:32** Yesus mo ola an, san ha mae hap?- Zënaka de taïbliblan wenyaka de karek ta gwibin hip dena, hen Yerusalem sa de dre tan hap dena. (Mat. 24:4-22; Mrk. 13:5-20; Luk. 21:5-24) Yerusalem sa tahunna tuju-pulukam dre dak. Dekam men zen Yesussu sane da'ak, hom ahakon juwe'ak. Zep ayatnak awe zëno ola an, Zèn de etan lwa halzan hap denaka hom. * **21:36 21:36** Rom. 13:11-14; 1Tes. 5:3; Mrk. 13:33 * **22:1 22:1** Paska mo enlalana, emki Lukas 2:41 mo otde alenak hlaun. Ragina zen rotisa de syal gwibinnik mas nul gwenan- dekam de hop gwen hap. (Ul. 16:1-8)

³ Dekam zep ëna Kariot walya Yudas Baksa dowal mo kigina ing gwe heblaka. Zen sap zëre hon de dua-blaskam ang ta gwen wenyik mo ahana.

⁴ Zen ki zep song gweka- Alap mo golak de syal tan wenyik mo nolnola ban, hen zëwe de jana nabare zi mo mam-mam naban de olša anakare hap ziaha-en gun hup, "Ëe banakan asa ebe mae hap zao de balk tan hap zertreizim?"

⁵ Zen man tangan sam neisiblik, dekam zep nenblak, "Te-alasa asa ep ërblal."

⁶ Dekam zep ding gulzimki, "Ëe asa orana tëblal- dekam de sowëkam ebe mae hap zertreizimdin hip."

Yesus kim zëre mo timsi de enlala gwe-gwibin hip de tembanena nonola golzimkike:

(Mat. 26:17-29; Mrk. 14:12-25; Yoh. 13:21-30; 1Kor. 11:23-25)

⁷ Rotisa de ragi mas gun srëmkam tru tan hap de mingguna iwe kim lwa se'ak- yaklana men dekam Paskanak dep de tembane yawalak dep domba zahona Alap hap blom da gwibir-blikke,

⁸ Yesus dekam zep hen Petrus ne Yohanis neka guzimki, "Em song ë-Paskanak dep de tembane yawalsa eka hen nëp hamal ul."

⁹ Ki zep lakensiblika, "Endawe asa hamal ul?"

¹⁰ Ki zep ding gulzimki, "Em kime ëna iwe li'inka, dekam esa zini hla la sonera- kama ngatdarakkam de weya blome gwirenhan naban. Zen desa em ërtro kinin- hëndep gola men zao de tik, em hen zao lil.

¹¹ Zao gol bi naka enbla, 'Bian Yesus man emsa takensiblila, "Ëe teksonna enda zao asa ëre hon de ang ta gwen wenyi ban Paskanak de tembanena zitwenblal?"'

¹² Zen sa ebe nikip gulk de tekson yawalsa zertreizimdi. Komal tum maena sowe henna. Zen zao hamal ul guk."

¹³ Ki zep hëndep song ëka, zao zep hëndep oltoweka- men kirekam Yesus guzimkiye. Zëwe zep hëndep tembanena hamal ul guku.

¹⁴ Kim kam-en gwëk, Yesus dekam zep dua-blaskam de wenyi ban Paskanak dep de tembanena insa zitwenbla'anika.

¹⁵ Ki zep zë gubiridaka, "Ëe ama tangan dwam gwe-gwëk- Paska tembanena ansa de eban mae zitwenblan hapye, Ëe de nama karek yawala insa goltowen srëmnak.

¹⁶ Sap Ëe ama emsa gubirida'an: Ëe na-en molyë etan auhu-kamanak Paska tembanena twinbik. Hwëna Alap kim de irik ginkim kon gwesibir hana'anika, zen diki dekam asa eiwa tangankam de Paska tembanena twinbir."

¹⁷ Yesus ki zep anggur ho nabare mokna zerka, deban Alap hap dawemsa golblaka. Zao zep gubiridaka, "An desa apdekam otdebik.

¹⁸ Ëe ama emsa gubirida'an: Ëe angkam na-en molyë anakare anggur hona etan otdek. Hwëna Alap mo irik ginnik kim de hata'ak, zen diki dekam asa etan ziotdebir."

¹⁹ Rotina ki zep hen gul ineka. Ki zep hen rotina in hap Alap hap dawemna golblaka, ki zep ahap gul guku. Desa zep anakare ola ban kap tazimki, "An ano timni- mensaë ebe mae hap sosok gulzim'inke. An kirekam em ano timbwanak syal gwe-gwibin- Asa dikim enlala gwe-gweblan hapye."

²⁰ Kim tembane tasik, ki zep anggur ho mokna etan anakare ola ban zerzimki, "An ano kala zen. Zen sa ano tim nikon wet sol- Alap mo zi niban de ol ziaha-en gun ësesa dikim sul sonen hapye.*

²¹ Hwëna Ëe ama emsa gubirida'an: Zini men zen Asa dikim zë balk tan hap zertreizim'ira, zen hen awe nikin'ira.

²² Ngatan zi mo lang nakore Zi Tanganna Ëe asa til- men kirekam ki Alap Asa gublukake. Hwëna

* 22:20 22:20 Yer. 31:31-34

kwasang tol, zini men zen Asa dikim zë balk tan hap zertreizim'ira, zen karekna mam tangan wenyaka sa goltowera!"

²³ Ki zep zë zënaka anakan dakensibirida nasen'ak, "Nëbon mae onakon in nara sa ki kirekam gwëblala?"

In kim anakare hap ëol gwekke, "Diki ëe amaka mam gwe'an!"

(Mat. 20:25-28; 23:11-12; Mrk. 9:35; 10:42-44; 1Ptr. 5:1-5; Yoh. 13:12-15)

²⁴ Hwëna dekam zep dua-blaskam de weny in ëol gwe'ak- mae hap, "Yesus de irik gi'inka, diki ëe amaka nëbon mae onakon teipsi'in."

²⁵ Ki zep zë gubiridaka, "Alapsa de tame tan srëm lang-langnak men zen teipsin-teipsinkim teinikin gwenan, zen man zëre kore naka jap nul sonenda gwenan. Hen zen man anakan de blikip gwesibirida gwen hap ëdwam gwe-gwenan, 'Bian, em in asa de sam gulsun hup de zi.'

²⁶ Hwëna em zëno mae mo kim bahem. Ebon mae onakon men zen teipsin hip dwam gwe'ara, zen diki walas betek mo kim zen gwën. Hen men zen mam gwen hap dwam gwe'ara, zen diki tingare zi mo babu gwen zi makan zen gwën.

²⁷ Ema tim ul gwenan, 'Mejanak de tembane gwen zini, zen mamna. Hwëna men zen zëbe hap tembanena hamal nul gweblanan, zen betekna.' Auhu-kamanak, eiwa, mejanak de nikiran zini zen mamna. Hwëna Eë kirekam de mam gwen hap homë hatazak. Eë hwëna babu gwen zi mo kim de mas gwibiridan habë hatazak. Zep em hen ano kim em lowehe gwen.

²⁸ "Em mese Asa ërgwënda gwek hen kara landa gwek- banakare karek maesa de goltowe gwennak.

²⁹ Zep men kirekam Bian abe hap golblaka, zëno alp nakon de irik gin hip, Eë hen kirekam asa ebe mae hap golzim- em de hen ano alp nakon irik gin hip denaye.

³⁰ Em dekam ano alp nakon esa teinikin- ano irik gin kon gwisibir hanan tembane yawalakye. Hen em dekam esa ere mae hap de dua-blaskam de komal tumnak teinikin-dekon de dua-blaskam de Israel Bak onakore zi aususa irik gin hipye."

Yesus kim Petrussu gublukake, "Em esa Asa zabëblala."

(Mat. 26:31-35; Mrk. 14:27-31; Yoh. 13:36-38)

³¹ Yesus ki zep Simonsa gubluka, "Simon, Simon, dawem! Emki Asa sane tan. Dowal mo kigina mes emsa de sërkam akasibiridan hap Alapsa abe taka.

³² Hwëna Simon, Eë mesë ebe en hap Alapsa abe tal- eno Asa de taibliblan dikim topse gwe srëm gwen hapye. Em kime Abon osan dep etan lwa ha'an zaka, ere mo wal bose walya dekam tatete tabir."

³³ Petrus ki zep ding gulbluka, "Bian, ëe mesë tangan hohle gwenan- Eban de bwi san song ën hap, hëndep Emsa de zerzaunnuk de hwëna tin hipye."

³⁴ Ki zep ding gulbluka, "Petrus, Eë ama emsa gublu'an: Namen ayang de gun srëmnak, em esa anakan de Asa zabëblanna danahan soblala, 'Zini in ëe homë tame ta'an.'"

Aumwa hap kim ol zim-zimni golzimkike:

³⁵ Ki zep takensibiridaka, "Eë kimë orep emsa lup gul sonek, hon hen te-ala srëmkam de sek gwen hap, timnik de alala tan en naban, dekam san ha ema ëtahalha gwek?"

Ki zep ding nulblik, "Eë homë ëtahalha gwek."

³⁶ Dekam zep etan gubiridaka, "Hwëna angkam, eno mae mo hon hen te-ala de lwanna, emki kap tan. Eno nëbok de lwan srëmna, emki tahan bajusa te-ala hap lirak tabin-te-alana dekam de nëboksa lop tan hap. Sap em Abone ang ta gwek, emsa hen zep sa jal neibiridal.

³⁷ Sap Eë ama emsa gubirida'an: Men zen Alap mo olak abe hap dena

lwak, 'Zi jal-jal makan sa nëblal'-zen kitak nabakam sa ki jower."*

³⁸ Ki zep ding nulblik, "Bian, emki aken. Awe nëbokna dan."

Ki zep ding gulzimki, "Sya. Otan bahem ëgun." †

Yesus kim zaitun tra nabare kwatap tek nakon Alapsa gu soneblakake:

(Mat. 26:36-46; Mrk. 14:32-42)

³⁹ Yesus ki zep Yerusalem kon zaitun tra nabare kwatap tek san dep golësek gweka- men kirekam Zëna golëgwë gwekake.

⁴⁰ Kim golëyaing gwe seka, zao zep gubiridaka, "Alapsa e-en e-enkam abe la tinek. Kareknak ema altilink."

⁴¹ Zëna kim engka en zëbon mae onakon langa gwe halka, zao zep boklena kom soka, dekon zep Alapsa gu sone gwebla'anka,

⁴² "Bian, Em de dwam gwenkam, Abon onakon langa gulsuk- karek yala in zen Abon onak dep golek de gwe'an zalye. Hwëna anò dwam gwibin sin bap zen lwan. Diki ere mo dwam gwibin sin zen lwan." [

⁴³ Alap mo dam taha nakore zini ki zep zë hata zaka, zao zep sosonna golblaka.

⁴⁴ Hwëna enlalana man sërkam tangan dowebla hanaka, dekam zep etan enlala zon tasiblin naban ola gu sonebla'anka, hëndep irse gwenna kal makare nik wet soblak.] ‡

⁴⁵ Alapsa de abe ta gwenna kim hya gwesiki, ki zep dan-ahare zini in osan dep lwahal zaka. Hwëna ni truwennak zep hlauluda'an zaka. Embwan zë mamkam hlauludak, zep truwe'ak.

⁴⁶ Zao zep gubirida zaka, "Em bap nini truwer. Em luk tan. Kareknak dikim altirin srëm hap em Alapsa abe tan."

Yesussu kim balk dakke:
(Mat. 26:47-56; Mrk. 14:43-50; Yoh. 18:1-11)
(Ayat 47-53)

⁴⁷ Yesus kim nama ola ton'anka, dua-blaskam de zini in mo ahana, Yudas, ki zep zi beyam-bya naban golëyaing gwe'an zaka. 52bA-hakon Alap mo golak de syal tan zi mo mam-mamna, hen zao de jana nabare zini, hen Yahudi mo nol-nola ban. 47bYudas ki zep zë Yesussu babang ta'an zaka.

⁴⁸ Yesus ki zep hwëna gubluka, "Yudas, em san babang tankame ngatan zi mo lang nakore Zi Tanganna Asa zergu'ura?"

⁴⁹ Hwëna seblaskam de zëre hon ang ta gwen wenya in, kim zë kirekam hla nu'ik, dekam zep dakensiblik, "Bian, san angkam nëbokkam nen tobe gwen?"

⁵⁰ Hwëna ahana dekam zep nëbokna mol ineka, dekam zep Alap mo golak de teipsin tangan zi nik de babu gwe-gwen zini sap zip soka. Hwëna dam san de ing ala en naka zep blansibli kinika.

⁵¹ Hwëna Yesus ki zep jalse gweblaka, "Bahem! In sya!" Zëna ki zep ing alana insa dawem soblan hap towanzim-blika, dekam zep hëndep dawem nëblak.

⁵² Ki zep hwëna in zen Zënaka de balk tan hap yaing gwezak gubiridaka, "Em san Asa jal zisie hla lal, zebe nëbok te tek teiredan naban yaing gwenan zalye?"

⁵³ Eë men yakla jamkam Alap mo golak emsa tawa ta gwibik! Dekam ba habe zë Asa balk la srëm gwék? Hwëna angkam lang kawesinnik awe ebe mae hap man dakastilzim'in, sap dowal mo kigi mo enlala kawesin emsa tri tasibi'ira."

Petrus kim Yesussu zabekblakake:
(Mat. 26:57-58; 26:69-75; Mrk. 14:53-54; 14:66-72; Yoh. 18:12-18;

* 22:37 22:37 Yes. 53:12; Luk. 23:33 † 22:38 22:38 Yesus insa kirekam gubiridaka, san ha nëbok tangansa de lop tan hap hom yap ki gubiridaka? San ha diki enlalasa de hohle tan hap ki gulk sun olsa blaonzimki? ‡ 22:44 22:44 Ayat 43-44na an, tawa gwizimdinni hom: San ha Lukas ale soka? San ha aha zi lun mas soka?

18:25-27)

⁵⁴ Ki zep hëndep balk dahak- Alap mo golak de syal tan zi mo teipsin zi mo gol san dep. Petrus lun sap-sap gwen da'anka.

⁵⁵ Dekam zëve de syal ta gwen wenyä gol tēmnak syauknu bla dasi'ik- desa de tuwirin hip. Petrus zao zep hen nikin'in zaka.

⁵⁶ Hwēna zëve de babu gwe-gwen we zep syauk ngatannak de nikirin-nik tame tazak. Zao zep lalak tasin hip karatda ta'ak, ki zep zē hëndep gubluk, "Zini an deban apdenak ē gweka!"

⁵⁷ Hwēna Petrus ki zep kon ding gulbirki, "Zini in ēe homē mae tame ta'an."

⁵⁸ Hom holo gwe'ak, ki zep etan ahanik tame ta zaka, zao zep gublu zaka, "Em an zen ahana!- desa de ang gwe-gweblan zi niye."

Petrus ki zep ding gulbluka, "Ēe an zen hom."

⁵⁹ Yakla nwena san ha aha-en tamanka, dekam zep ahanik ol drakkam gu ane gwe'anka, "Eiwa, zini an desa de ang gwe-gweblanna, sap zen an hen Galilea wal!" §

⁶⁰ Petrus ki zep ding gulbluka, "Ēe homē tame gu'un- in zebe ki gu gwe'araye!" Hëndep in kim nama ton'anka, ayangna ki zep gu aneka.

⁶¹ Yesus ki zep Petrussu de hla tan hap lero gweblaka. Petrus dekam zep hwēna etan enlala gwekamensa anakan gu-gublukaye, "Namen ayang de gun srēmnak, em dan-ahan sonkam esa Asa zabeblala."

⁶² Dekam zep hëndep wet soka. Gosa zep kon yusyustin niban gwē song gweka.

Yesussu kim swrē dak hen dangolekke:

(Mat. 26:67-68; Mrk. 14:65)

⁶³ Zini in zen Yesussu kara da'ak, man swrē da gwe'ak hen dangole gwe'ak.

⁶⁴ Nwe hēreblan naka zep dakensik gwebla'ak, "Eme eiwa Alap mo zer sonen zi gwē'anam, emaka anakan asa gubirida gwe'ara, 'Zi bosena zen asa lek tyanda.' "

⁶⁵ Etan kirekam-kirekam ol lamang naban swrē da gwe'ak.

Yahudi mo teipsin sinodenak kim nērtrēkke:

(Mat. 26:59-66; Mrk. 14:55-64; Yoh. 18:19-24)

⁶⁶ Kim liti'ik, Yahudi mo nolnola, Alap mo golak de syal tan zi mo mam-mamna, hen Musa mo ol tawa ta gwibin zini dekam zep tagal gwesik, ki zep hwēna Yesussu zēbon mae onak dep nēr halzak.

⁶⁷ Ki zep zē nenblak, "Dekam asa gubirida: Em an san ha eiwa Alap mo Dam Tasinni?- Israelsa de ngaya tabin hip Dena."

Ki zep ding gulzimki, "Ēe emsa gubirida'ak, em molye ētaiblik.*

⁶⁸ Hen Ēe emsa takensibirida'ak, em molye ap ding ulblik.

⁶⁹ Hwēna molya holo gwek, ngatan zi mo lang nakore Zi Tanganna Ēe dekam asa Soson Zini Alap mo dam taha nakon nikin."

⁷⁰ Ki zep dakensiblik, "Ki, em san Alap mo Tane?"

Ki zep ding gulzimki, "In eiwa denakae ēgunun."

⁷¹ Dekam zep ēguk, "Nen ba hap de ahasa takensibiridan hap? Nēn mes em-am kitak Alapsa de lamang tannak asalblanan!"

23

Pilatus Bak hap kim tapbla dablakke:

(Mat. 27:1-2; 27:11-14; Mrk. 15:1-5; Yoh. 18:28-38)

¹ Ki zep Yahudi mo sinodenak de teipsin-teipsin wenyä ēzauk, dekam zep Yesussu teipsin zini Pilatus osan dep nērhak.

² Ki zep nenblak, "Zini an ēe mesē dam lasik: Karek san dep zen zini lup gulhal gwe'ara. Zen man tawa ta

gwibirida, 'Romak de teipsin tangan zi mo dwam gwibin sin bahem ang ta gwen- pajak te-alasa de kap ta gwizimdinkimye.' Zen man hen zënaka gu gweblanda, 'Èe an Emsa de ngaya tabin hip de Zini Zen-mensa ègu-guk gwekye. Èe an Zeno mae mo Teipsin niye.' "

³ Pilatus ki zep takensiblika, "Em an san ha eiwa zen- Yahudi mo teipsin niye?"

Ki zep ding gulbluka, "In kirekame gunda, zen kirekamke."

⁴ Ki zep Pilatus Alap mo golak de mam-mam wenya hen tingare zi trana insa gubiridaka, "Èe homè zini an mo karekna hlaulblunan."

⁵ Hwëna zen dekam anakan èsas gwesikhal gwe'ak, "Zëno tawa tabinni in dekon èilman gwe song gwe-gwenan. Galilea kon ki kon gweka, hëndep Yerusalem mo langna mes sul soneka, hëndep angkam mes awe hata zala."

⁶ Pilatus kim kirekam salbiridaka, ki zep takensibiridaka, "An san Galilea wal?"

⁷ Ki zep ding nulblik, "In eiwa, Galilea wal." Dekam zep Herodes osan dep zer soneka, sap Galilea, zen Herodes mo irik ginni. Herodes zëna dekam Yerusalemk gwë'anka.

*

Herodes hon kim nërtrëkke:

⁸ Herodes man tangan Yesussu de hla tankam sam gwesiki, sap zen orep mes zëbe hap dena sane gwe-gweka. Zep man sap hla tan hap dwam gwe-gweka- hen zëno owas syal gwibinsi de hlaun hup.

⁹ In zep sap Herodes beyakam taken-taken gwe-gwebla'anka, hwëna Yesus hom tangan ding gul gwebla'anka.

¹⁰ Hwëna Alap mo golak de syal tan zi mo mam-mamna hen Musa

mo olsa de tawa ta gwibin zini men zen Yesussu nërtilzik dekam Yesus mo karek-karekna beya tangankam Herodes Bak hap ol drakkam deiri nul guk gwebla'ak.

¹¹ Dekam zep Herodes zëre mo jana nabare zi niban Yesussu ziswrë ta gwe'anka hen zilamang ta gwe'anka. Ki zep hwëna teipsin zi hip de baju dawemna ala nosoblak-deban de anakan swrë ta gwen hap, "Dawem, bian. Em in zen- Yahudi mo teipsin niye." Deban zep etan Pilatus osan dep nër sonek.

¹² Yaklana dekam zep Herodes ne Pilatus ne, orep men zen zënaka giligil ei gwizimki, etan dokot ëka.

Pilatus kim anakan tapbla tazimkike, "Amki lak."

(Mat. 27:15-26; Mrk. 15:6-15; Yoh. 18:38-19:16)

¹³ Pilatus ki zep tagal gulsuku- Alap mo golak de mam-mamna hen Yahudi mo nol-nola, hen zi trana insa,

¹⁴ ki zep zë gubiridaka, "Em ansa zini abon onak dep anakare ola ban èrhalzal, 'Zen man zisi karek san dep lup gulhal gwe'ara,' eno mae mo nwenak èe mesë sap takensik gwe-blasan, hwëna èe homè mae zëno karekna hlaulblunan- men kirekam em enblalye.

¹⁵ Hen kirekam Herodes. Zen hen hom karekna hlaulblula, sap zen totoresana etan nèbon mae osan zer sonera. Eiwa, zen hom mae karekna golka- dekam de tan hapye.

¹⁶⁻¹⁷ Zep èe asa lek-lek tan en hap gubiridal, ki asa zeser soner." †

¹⁸ Kitak de zi beyam-byana in ki zep ègu anek, "In lak! Barabassa ap hil ti sonezim!"

¹⁹ Barabas in Roma mo irik gin nikon zisi hlil in'inka, dekam zep golèilman gwenkam zisi zitaka. In zep bwinak tak daink.

* **23:7 23:7** Roma kim irik nik, Israel mo langna dua propinsi makan enlala neibik. Pilatus Yerusalem mo langsa Roma mo bose hap irik gilki. Hwëna Roma mo teipsin tangan zini Herode'a dam tasiki- Galileasa de irik gin hpye. Pilatus zen sap Roma wal, hwëna Herodes, zen Galilea mo lang nakorena. † **23:16-17 23:16-17** Orep tangan kim Lukas mo alena ansa etan ale nul gwëk, aha zi mes yap ayat 17na ansa mas gulku: Paska yaklana men kiye, Pilatus dekam man bwinak de zini gwis gwe sone gweka- tingare zi mo ol-gun sun.

²⁰ Pilatus Yesussu de zeser sonen hap sap dwam gweka, in zep sap etan kirekam ol mamkam gubiridaka.

²¹ Hwëna dekam tangan zep ol nop-nopkam ëgu ane gwe'ak, "Desa te-lidak sonnak makan laink! Te-lidak sonnak makan laink!" ‡

²² Ki zep etan dan-ahanna gubiridaka, "Hwëna zëno karekna homke!- dekam de tan hap denaye. Èe hom am aha-en mae hlaublunan! Èe asa sap'nen lek-lek tan hap gubiridal, ki asa hil ti soner."

²³ Hwëna zen ki zep ol nop-nopkam te-lidak sonnak de makan ta irin hip ëgu ane gwe'ak, hëndep dekon Pilatus hom etan zëno mae mo ola esek gulzimki.

²⁴ Ki zep hëndep zëno mae mo gun sun tapbla tazimki.

²⁵ Dekam zep hwëna zini mensa zëna abe nëblak, desa zeser sonezimki- mensa golëilman gwenkam de zi tan hap bwinak tak da inkke. Hwëna Yesussu zep zëno mae mo dwam gwibin sin dikim syal gwibin hip tapbla tazimki.

Te-lidak sonnak kim makan da inkke:

(*Mat. 27:32-44; Mrk. 15:21-32; Joh. 19:17-27*)

²⁶ Yesussu ki zep nërhak. Oranak zep Kirene walya Simonsa nërtowe'ak. Zen man Yerusalem san dep lwa ha'an zaka. Zao zep balk dak, ki zep tik-tik dak- Yesus hup de te-lidak sonna insa de hwëna Yesus zëre hon zikong gwe hendan hap.

²⁷ Zini beya nik hen ang tan da'ak. Ahakon we walya gosa dablan da'ak hen aïtin-aïtin nëbla'ak.

²⁸ Yesus ki zep we walya insa lero gwibiridaka, zao zep gubiridaka, "Yerusalem we wal, bahem Asa gona

gwëblan. Diki ere mae mo timsi em gweibin, hen walas omka em gweibiridan.

²⁹ Sap yaklanak sa hatal- zi de anakan gun hup, 'Dawem tanganna, we wal de u gwensa akasin srëmna, hen ëwalas gwen srëmna, hen momkam de walassa taizin srëmna. Sap Alap mo jala nabakam sa hatazal.'

³⁰ Dekam zini sa aïrin hip kwatapkwatapna nahërhebirida gwer, 'Asa em kei-king gun! Asa em ani-ning gun- ëe de Alap mo jala ansa hlaun srëm hap.'*

³¹ Angkam de zini em an walas mo kime angkam jala tame u'in, hwëna kire nikeki Asa ëbla'an. Hwëna zi mo jal-jala sa ta gwese zaher, hëndep sa tangan taman kinil. Hwëna zao sa Alap mo jala hatazimzir." §

³² Hen karek gol gwen zi darena man deisyak- apdekam de Yesus mae han tameran hap.

³³ Lang tek bosena Zi Nol Swrak kim yaing gwesek, zao zep jana nabare zini Yesussu te-lidak sonnak makan daink. Karek gol gwen zi darena insa hen man makan nosoink- ahana Yesus mo dam taha san dekam, ahana irgwa taha san dekam. [

³⁴ Yesus ki zep ola gu soneka, "Bian, zini an zen Asa karek daran, zëno mae mo karekna ansa tap gulsuzim, sap zen hom tame nu'in- an desa zëna syal neibi'inye."] * Jana nabare zini in ki zep hwëna zëno pakeanna dobe abu mo kim de zënaka dam tasik gwibinkim kae nëblandak.

³⁵ In kim ki zë kirekam lwa'ak, zini beya nik zë hen kara dabi'ik. Yahudi mo mam-mamna hen man zë durum gwehek. Zen hen Yesussu

‡ **23:21 23:21** Roma kim irik nil gwek, karek gol gwen zisi de tanna, desa man te-lidak sonnak makan dabirin gwek. Yesus ensa hom ki nëblak. * **23:30 23:30** Hos. 10:8; Why. 6:16 § **23:31**

23:31 Yesus awe te ësesena hen sasanna gubiridaka, hwëna enlalana man apde në'an- men kirekam Orya olkam nen gwibirin "jalsa de tame gun srëmna" hen "jalsa de tame gunnu." * **23:34 23:34** Yesus mo ola ansa emki Mzm. 22:19nak hlaun. Hwëna ola in zen Lukas zën hom yap ale gulku. Sap men zen orep zëno ola ansa etan ale nul gwek, ahakon hom ale nul gwek. In zep angkam enlala nei gwibirin, "San ha ahakore nik lun tangan mas nuk."

anakan swrë da gwe'ak, "Zen aha zi ensa ngaya ta gwibirki. Zen de eiwa Alap mo Dam Tasinni, Israelsa de Zen ngaya tabin hip, ki Zen ki angkam Zënaka ngaya tan!"*

³⁶ Ki zep hen jana nabare zini swrë da'ak. Zen anggur ho eteksa noltrë seblazak,*

³⁷ deban zep zë nen seblak, "Eme eiwa Yahudi mo teipsin zisi, emki enaka ngaya tan!"

³⁸ Te-lidak sonna iwe nol bol tahan nakon man anakarekam de alena makan nulink, "An zen- Yahudi zi mo teipsin niye."

³⁹ Aha karek gol gwen zini mensa Yesus mae han makan dabirink, zen Yesusu anakan hen lamang ta'anka, "Em san zisi de ngaya ta gwibin hip de Alap mo dam tasin Zisi hom?! Emki nënaka ngaya tabin!"

⁴⁰ Aha zi nik zep jalse gweblaka, "Em san home Alapsa airibla'ara? Nëbe mae hap mes ki lwazimnin-tameran hap denaye.

⁴¹ Hwëna nëbe nikip dena, nëre nik mo karek-karek nakon ki lwazimnin. An hwëna hom tangan karekna golka."

⁴² Ki zep Yesusu gubluka, "Asa enlala gwebla- Em de irik gin hip lwahal zankamye!"

⁴³ Ki zep ding gulbluka, "Èe ama emsa gublu'an: Namen hë'ho gwibin langnak eban esa apdekam era."

Yesus kim tilsikike:
(*Mat. 27:45-56; Mrk. 15:33-41; Yoh. 19:28-30*)

⁴⁴ Yaklana kim bolak zauku, dekam zep tingare langna owas hap kawesik. Hëndep yakla nwena kim dan-ahannak zauku, dekam zep etan hleng gwék. †

⁴⁵ Alap mo gol mwanak de kaen lilikin glaing-gling yawala dekam zep owas hap kalk neisik sonek.*

⁴⁶ Yesus ki zep hwëna ol mamkam hërhe hanaka, "Bian, Èe ère mo angna eno tahanakë drë ne'an!" Kirekam kim gu aneka, ki zep hëndep tilsiki.*

⁴⁷ Jana nabare zi mo mamna in zen zë kara ta'anka, dekam zep Alap mo bosena anakare ola ban teip gulsublu'anka, "Zini an eiwa kareksa de gol gwen srëmna."

⁴⁸ Zi beyam-byana men zen kara tan hap yaing gwezak, kim zë kirekam hla nuk, dekam zep go naban anakare enlala naban lwan dahak, "O èe ba habë ola mas gulzi dawemna insa de tan hapye!"

⁴⁹ Ahakon men zen Yesusu nergwë gwék, hen we walya men zen Galilea kon ang nëblazak, zen langa nakon èzau'uk. Dekon zep hen kara nu'ik- in zen ki zë lwa'akye.

Yesusu kim nër dwanukke:
(*Mat. 27:57-61; Mrk. 15:42-47; Yoh. 19:38-42*)

⁵⁰⁻⁵¹ Yahudi mo aha èna Arimatea walya Yusup, zen zini dawem tangganna, hen zini man desa blikip neisik gweblak. Zen man tangan Alap de kitak nabakam irik gülzin hap hohle gwe'anka. Zen sap Yahudi mo teipsin sinodenak de aha mamna, hwëna zen hom Yesusu de tan hap de ol aha-en gunnuk ola mas gulku.

⁵² Yusup ki zep Pilatus onak dep song gwëka- Yesus mo tok naka dikim lo tasin hip de abe tan hap. Dekam zep gubluka, "Amki."

⁵³ Dekam zep zizeryahe halka. Kaen ngap-ngap blalkam zep zita-haleka, ki zep hwëna kaso hul hamal gun èsenak zidre neka- aha zisi de zë drënen srëmna.

⁵⁴ Yaklana in Jumatkam, hen man kam-en gwe'ak, zep Hari Sabatnak dikim hatan hap aha-ere jam maekam hom lwa'ak. ‡

* **23:35 23:35** Mzm. 22:7-8 * **23:36 23:36** Mzm. 69:22 † **23:44 23:44** Amos 8:9 * **23:45 23:45** Kel. 26:31-33; 36:35; Ibr. 9:2-8 * **23:46 23:46** Mzm. 31:6; Kis. 7:59 ‡ **23:54 23:54** Yahudi mo Hari Sabatna, Jumat mo yakla dum gwehen nakon naît gwibik, hëndep Sabtu mo yakla dum gwe hennak zausuk gwék.

⁵⁵ We walya men zen Yesussu Galilea kon ang nëblazak, zen man Yusupsu nërtrok. Kaso hula insa man hla nuk, hen zidre nennak man kara dabi'ik.

⁵⁶ Ki zep lwan dahak, hwëna dekam zep irase dawem nabare kire-kirena hamal nuk- Yesus mo tok naka dikim dra tandan hap, hen ahakorena kaen mwa san de kang tanun hap.

Hari Sabatnak, syala dekam man nolzausuk- men kirekam Musa titi ta gwibirkike.

24

Yesus kim tin nikon ngaya gwekake:

(Mat. 28:1-10; Mrk. 16:1-8; Yoh. 20:1-10)

¹ Hari Minggukam kak tanganak, ki zep we walya in sek gwek- Yesussu men zao nen nekke, desan dep. Irase dawemna bare kire-kirena insa hamal nuk, desa man kap dak.

² Kim yaing gwek, ki zep hla nul kinik, "Lilikin hip de kaso yala insa mes irhi nul kinil."

³ Kim zë biti gwek, hwëna Bian Yesus mo tokna hom zë hla daonk.

⁴ In kim zë ezau'uk, dekam hom anakan dam nulsu'uk, "An banakarekam zë lwal?" Ki zep zë hwëna mumuk ennak zi darena zëno mae mo alpna jo kë zaka. Zëno nik mo pakeanna angtan- angtanna- san de ngli angna kiye.

⁵ Ki zep zë mamkam ääiri'ak, dekam zep kamanak ëtuk gwehek. Zi darena in zao zep enbiridaka, "Em ba habe ngaya Zini insa tin zi kang gul gwennak lëbla'an?"

⁶ Zen awe hom. Bian Alap mes tin nikon ngaya tala. Emki ënlala gwen- mensa Galileak anakan emsa tawa ta gwibirkike,

⁷ 'Ngatan zi mo lang nakore Zi Tanganna Asa sa karek gol gwen zi mo tahanak dep tapbla dazim. Zen sa Asa te-lidak sonnak makan dain.

Hwëna yaklana dan-ahan, dekam asa etan tin nikon ngaya gwer.' "*
⁸ We walya in dekam zep enlala neibik- Yesus mo tawa tabinni insa.

⁹ Kim lwan dahak, dekam zep in zen seblaskam zëre hon ang ta gwek, hen zëno mae mo ahakorena, desa kitak donbiridak.

¹⁰ In zen donbirida'ak, zëno mae mo bosem-sena, Magdala kore wenyä Maria, Yohana, hen Yakobus mo anena Maria. Ahakore we walya hen ki- in zen sek gwekye.

¹¹ Hwëna zëre hon de ang ta gwen wenyä in hom däiblibiridak. Man enlala neibiridak, "An man ëmamak gwe'an."

¹² Hwëna Petrus ki zep luweka, hëndep ki zep hluweka- men zao nennek, desan dep. Kim zë hata naka, ki zep huwe hanankam ake inki, hwëna kaen ngap-ngap enna insa zep zë hlalul inki. Ki zep enlala topse gwen naban etan lwa halka.

Yesus kim zi dare naban Emaus san dep zisong gwekake:

(Mrk. 16:12-13)

¹³ Yaklana inkam, aha zi darena men zen hen seblaskam de Yesus hon ang ta gwen wenyä ban apdekam lowe he'ak ki zep song ë'an-ka- ëna Emaus sun dep. Zen Yerusalem kon langana seblas kilometer enkam.

¹⁴⁻¹⁵ Zen man lonnara'an-ka-tingan in zen ki zë jowekke. Hwëna Yesus Zëna dekam zep teisyalahe zaka, dekon zep apdekam zisong gweka.

¹⁶ Man sap hla laka, hwëna banakan mes yap zë gweizimki, zep tame la srëm gweka.

¹⁷ Ki zep Yesus takensizimki, "Em ba olsae lonnara sara?"

Dekam zep nwe-mase dowe hanan naban yausuku.

¹⁸ Zi darena in ahana bosena Kleopas. Zen zep takensiblika, "Em san an aha-en zen mes yap?- ola ansa de san srëm naye. Kitak Yerusalemk de lowehen wenyä mes

* 24:7 24:7 Luk. 9:22; 18:31-33

ëtawa gwek- in zen ki nër hom jowekye.”

¹⁹ Dekam zep ding gulbluka, “Ba zë jowek?”

Ki zep hwëna ding ulblika, “In zen Nazaret walya Yesus hon jowekke. Zen Alap mo olsa de ayang gul gwen zi. Zëno syala man tangan sosen gwe-gwek, hen zëno ola man sam gwesik gwek- Alap mo nwenak hen tingare zi mo nwenakye.

²⁰ Hwëna nëno mae mo sinodenak de teipsin-teipsinni, hen Alap mo golak de syal tan zi mo mam-mamna dekam zep tan hap nenblak, in zep hëndep Roma mo jana nabare zini te-lidak sonnাক makan daink.

²¹ Hwëna ëe mesë enlala ë gwe-blak, ‘An zen sa Israelsa hül gil son-era!’ Tan hyanak, namen yaklana mes dan-ahan nër.

²² Hen namen kaknak ëe we wal-saë auna ohlobiridal- aban mae de Yesus hon ang ta gwen we walya. Zen yakla hata sezan naban sek gwer- men zao nër dwanukke, desan dep.

²³ Hwëna zen hom zë Yesus mo tokna hla dal. Zen zep asa nenbiridazal, ‘Ëe Alap mo dam taha nakore zisië nwe nik de ëlirisin gwenkam aker. Zen man asa enbiridala, “Yesus mes ngaya gwer.”’

²⁴ Abon mae onakon ki zep zi hwëna nolësal kinil- zën de hen hlaun hup. Ki zep zë hla nul- men kirekam we walya asa nenbirida zalye. Hwëna zen hen hom zë Yesusu hla dal.”

²⁵ Yesus ki zep ding gulzimki, “Em in enlala joblô-topna! Em bëjen em nabakam laiblibin- mensa Alap mo ol ayang gul gwen zini tawa da gwibikye.

²⁶ Zen man tawa da gwibik, ‘Alap mo dam tasin Zini, zisi de ngaya tabin hip Dena, zen nonol kareksa de goltowen. Ki sa hwëna hyanak teipsinkim nikiri.’ ”

²⁷ Ki zep tingan srip gulsuzimki- ola mensa zëre hap dena ale nul gwekye. Nonol Musa mo ol ale gun

nukon kon gwisibir hanaka, hëndep Alap mo ol ayang gul gwen zi mo alesa srip gulsuzimki.*

²⁸ Ëna men zao dep zi darena in song ë'anka, zëwe kim ëgolek de gwe'ak, hwëna Yesus dekam zep ëna insa de tamaran makan sap gweizimki.

²⁹ Hwëna man titi laka, “Bahem tamaran. Aban mae neik truwék. Angkam man kawen hap golek de gwe'an.” Zao zep ki hëndep seweka.

³⁰ Kim tembane hap teinikin anek, Yesus ki zep rotina gul ineka, ki zep Alap hap rotina in hap dawemna golblaka. Ki zep ahap gul guku, dekam zep zëbe nikip dena teisyazimki.

³¹ Hëndep dekam zep zëno nik mo nwena hleng neizimk, “O an Yesus suke!” Hwëna Zen dekam zep zëno nik mo nwe nakon aya gweka.

³² Zao zep zënaka enzimki, “Ëe ëre mo ennak ben-ben nakaë eis-birzir- in kim Zen Alap mo ola nëp oranak srip gulsuzim song gwesan zalaye.”

³³ Ki zep hëndep lu këka dekam zep kam etan Yerusalem san dep ola halka. Zao zep etan hla kulida'ankaseblas enkam de wenya insa hen ahakore naban, men deban mae zë apdenak lowe he'akke.

³⁴ Ki zep zi darena insa nen guzimk, “In eiwa, Bian Alap mes tin nikon ngaya tala! Zen mes Simon hon Zënaka zertrëra!”

³⁵ Zi darena in ki zep hen aïsíl eibirida'anka- men kirekam oranak zëbon nebon joweka, hen roti kwak gunnuk kim anakan tame laka, “An Yesus suke!”

Yesus kim aumwa hap de ol zïm-zïmni golzimkike:

(Mat. 28:16-20; Mrk. 16:14-18; Yoh. 20:19-23; Kis. 1:6-8)

³⁶ Zen kim nama kirekam lonbirida'anka, dekam zep Yesus Zëna zëno mae mo ngirinnik etan jowe zaka. Zao zep gubiridaka, “Dawem.

* 24:27 24:27 Ul. 18:14-20; Mzm. 22; Yes. 53

Em Alap mo taha terenake lowe he'an."

³⁷ Ki zep auna ehlok hen ääiri'ak. Man tim dik, "An zi au!"

³⁸ Hwëna ki zep gubiridaka, "Em ba habe ääiri'an? Bahem ätäibli srëm gwen.

³⁹ Emki taha-tananak Asa hla tan-dekam de Asa tame tan hap, 'An Zen tangan.' Asa emki olk tan-dekam eka Asa tame lak. Zi auna hom eini hen danna-an kirekam Asa hla lanan."

⁴⁰ In kim kirekam gubiridaka, ki zep zëre mo taha naban tana naban zitreizimki.

⁴¹ In kim isrip-sri hap ätäibli srëm gwe'ak hen dengwanbla'ak, ki zep takensibiridaka, "Eno mae mo tembanena awe wëe?"

⁴² Ki zep hogwe ang gun kwakna nolblak.

⁴³ Ki zep gul inki, ki zep hëndep zëno mae mo nwenak twinbi'inka.

⁴⁴ Ki zep gubiridaka, "Ëe men kimë nama emsa golëlowehe gwek, Ëe sap mesë dekam hamal hap emsa anakan gubirida gwek, 'Abe hap dena mensa kitak ale nuk, Musa mo olak, hen Alap mo ol ayang gul gwen zi mo olak, hen Mazmuruk, zen kirekam sa ki hëndep lwal.' "

⁴⁵ Kirekam kim gubiridaka, dekam zep zëno mae mo enlalana Alap mo olsa dikim tame gul gwen hap ngatan tazimki.

⁴⁶ Zao zep gubiridaka, "Alap mo olak man ale nuk, 'Tingare zisi de ngaya tabin hip de Zini, Zen nonol kareksa sa goltowera, hwëna yaklana dan-ahan ki sa etan tïn nikon ngaya gwera.'

⁴⁷ Hen man ale nuk, 'Zëno bosekam sa tingare zi ausu hap ol dawemna nolzim halada gwerzen dikim zëre mae mo karek-karek nakon ehälen hap, hen zëno mae mo karek-kareksa dikim tap gulsuk gwizimdin hipye. Nonol tangan Yerusalem kon sa kon neisibir hanal.'

⁴⁸ Em an zen-nonol gol halada gwen hap de wenyaye.

⁴⁹ Ëe asa ep zer sonezim- mensa ano Bianna emsa gu-gubirida gwekake. Ëna an en kon ësblak-hëndep Alap onakore sosonna in de ebon mae onak ing gwe he'an zaka."*

Yesus kim sewe sekake:

(Mrk. 16:19-20; Kis. 1:9-11)

⁵⁰ Aha yaklakam ki zep Yesus golësek gweka-hëndep Betania. Zao zep tahana teisya ineka, ki zep zë anakan dawemna golzimki, "Amki Alap onakore dawemna hla kul gwek."

⁵¹ In kim ki zë kirekam gweibirida'anka, ki zep zë hëndep Alap zer ine halka.

⁵² Dekam zep bokle kom soblan naban bosena teip nulsblu'ak. Dekon sërkam de isrip-sri naban zep Yerusalem san dep lwan dahak.

⁵³ Zao zep Alapsa de isrip-sri gwegweblan hap Alap mo golak henhenkam lowehe gwek.

* 24:49 24:49 Yoh. 14:16-17; 15:26; 16:7-10; Kis. 1:4-5

Yesus hup de Ol Dawemna mensa Yohanis ale gulkuke

- ¹ Ol aïsili an Kristus Yesus hup dena. Nonol lone sennak, okamana ansa de yang gulsun srëmnak, Zini in mes gwëka. Zen Alap han ë gwëka, hen Alap han man apde ëka. Zëno bosena "Alap onakore ëngaya gwen hap de Ol."
- ² Zen nonol lonesen nakon Alap han ë gwëka.
- ³ Zen Zen kitak Alap mo gun sun yang tasibirki, hen hom tangan- aha mo yang gulsun nuye.
- ⁴ Èngaya gwen hap de ausuna zen Zëbon onak. Zep zini ëngaya gwen hap dena Zëbon en nulin gwenan, dekam zep enho nakon ëngatan gwe-gwenan.
- ⁵ Zëno ngatanna in okama kawesinnik awe zil ine gwenan. Kawesinni man sap ngatanna insa husus gwe-gwibirin, hwëna ber-ber gunnu banakan dep?*
- ⁶ Ki zep hwëna Alap zini zer soneka, bosena Yohanis.
- ⁷ Zen ngatan nabare Zini in hap de olsa tïngare zi hip golngeir guzim zika- dekam de zëno ol toran nakon taibliblan hap.
- ⁸ Yohanis zen ngatansa de golzimdin hip de Zisi hom. Zen hwëna zëbe hap de olsa de zi hip ayang gul gwizimdin hip de zi.
- ⁹ Dekam tïngare zi hip de ngatansa golzimdin hip de Zini man hatan hap golek de gwe'anka.

¹⁰ Zep ëngaya gwen hap de ola bare Zini in okamanak awe orep mes gwëka.

Zen sap Zen okamanak de zisi yang tasibirki, hwëna hom tame dak.

¹¹ Zen zëre mo hlil irin zini Israel hon hata zaka, hwëna beya nik hom neirink.

¹² Hwëna men zen en daibliblak, zen en zep neirink.

Zëbe mae en hap zep dekam de Alap mo walas hap ëjowen hap dena golzimki.

¹³ Zen auhu-kama zi mo wë tan en nakon hom Alap mo walas hap ëjowek,

ahaksa zi zëre mae mo dwam gwibin nikon,

ahaksa zi mo syal gwibin nikon.

Hwëna Alap Zën zëre mo walaskam dikim ëliwehen hap kwang guludaka.

¹⁴ Zep ëngaya gwen hap de ola bare Zini in zi tangan hap jowe zaka, hëndep nëban mae golëgwë gwëka. Èe ama Desa anakan kara la gwëk, "Eiwa, zëno sosonna ngatan zi mo lang nakorena. Sosonna in Bi zem onakorena, sap Zen an Zen-zëre mo Tane aha-ere naye. Zen taibliblan tanganna hen kwasang-kwasang enna."

¹⁵ Yohanis kim hla taka, dekam zep zëbe hap dena ol mamkam anakan gubiridaka, "An Zen- asa de zertrozan Zi niye, mensaë anakan gubirida gwëkke, 'Men Zen de asa zertro'an zaka, Zen mamna. Èe an betekna. Sap asa de jaha gwen srëmnak, Zen orep mes gwëka.'" Kirekam Yohanis ol mamkam gubiridaka.

¹⁶ Alap mo Tanena in, Zen kwasang-kwasang enna, zep Zen etan-etankam nëbe mae hap dawemna gol gwizimnira.

¹⁷ Sap Alap onakore titi tabin ola, zen Musa Bak nëp ayang gulzimki. Hwëna Alap de nësa totoresa kwasang gwibirida gwen hap de ol dawemna, zen Kristus Yesus nëp

* 1:5 1:5 1Yoh. 1:1-5

golhatazim zika. Ol dawemna in, zen eiwa de tangan naye.

¹⁸ Zini hom tangan Alapsa hla dak. Hwëna zère mo dang tininak de Tanena, men Zen aha-en zère mo alpnak gwè gwenda hen apde ëka, Zen mes Bi zikhip dena nèbe mae hap ayang gulzimki. Zen hen ki Alap.

Yohanis kim orana sal ta gublu zakake:

(*Mat. 3:1-12; Mrk. 1:1-8; Luk. 3:15-17*)

¹⁹ Yohanis kim hamal hap tonbirida gweka, dekam zep Yahudi mo mam-mamna Yerusalem kon zini lup nul sonék- zen de Yohani'i takensiblin hap. Zen Alap mo golak de syal tan zisi hen Lewi Bak mo ausu nakore zisi lup nul sonék. * Kim yaing gwezak, ki zep dakensiblik, "Em san ha an Zen?- mensaë kara ë gweblananye."

²⁰ Yohanis dam-dam enkam zep zënaka kira taka, "Èe an nënaka de ngaya tabin hip de Zisi hom."

²¹ Ki zep etan dakensiblik, "Ki em nara mo weinak dep de zi? Em san ha diki Alap mo olsa de ayang gul gwizimdin hip de zini Elia Bak Swe? Hwëna angkam Yohanis mo bosekame etan hata'an zala." †

Ki zep ding gulzimki, "Èe an zëno weinak dep hom."

Ki zep etan dakensiblik, "Ki san ha em Musa mo weinak dep de Alap mo olsa ayang gul gwizimdin hip de zi?"*

Ki zep ding gulzimki, "Kirekam hom."

²² Ki zep dakensiblik, "Ki em an nara mo weinak dep dena? Em de enaka kira tan srëmkam, ki hwëna men zen asa lup nul sonék, èe banakan asa enbiridal?"

²³ Yohanis dekam zep Alap mo olsa de ayang gul gwizimdin hip de zini Yesaya Bak Swe mo ngein sin dep de ol hli yulzimdin nikon ding gulzimki, "Èe an

'zi srëm lang nakon de anakan taken gwen hap de zi,

"Haen, nère mae mo Teipsinni kip nen orasa dam-dam tablan-desan deka hata zaka."*

Ano syala kirekam."

²⁴ In zen takensiblin hap yaing gwezak, ahakon hen Farisikam de gubirida gwen zi hon de bitì gwenna. ‡

²⁵ Zen dekam zep dakensiblik, "Ki hwëna em ba habe baptis ta gwibi'ira?- sap em ngaya tabin hip de Zisi hom, hen Elia Bak Swe ne Musa Swe nik mo weinak dep de zisi hom."

* **1:19 1:19** Alap mo golak de syal ta gwen zini, desa Amber olkam "Imam" kam nenbirida gwenan. Zen zen Yerusalemk de Alap mo golak Alap hap domba-sapina tru dasik gweblak. Israel zi mo è-ènak de but srëm gol-golak, zao bëjen ba maena Alap hap tru tasik gweblan. Diki Yerusalemk de Alap mo gol ennak, zao en dep zep lup nulhal gwezak. Hen totore zini bëjen tru ta seblan. Mensa Musa aha-ere zi ausuna dam tasibirki- Harun Bak mo auyan-tane walya, zen diki zen en tru dasik gweblak. Zen hen domba-sapina in mo kala Alap hap noltrë gweblak- men kirekam Musa mo titi tabin olak lwakke, dekam de zëno mae mo karek-kareksa Alap ngan gulsuk gwizimdin hip. Zep Alap mo golak de syal ta gwen zi mo syala, zen kitak de Yahudi zisi de mas gwibirida gwen hap dena- Alap dikim zëno mae mo karek-kareksa tap gulsuk gwizimdin hip. Lewi Bak mo ausu nakore zini, zen hen Yahudi zi mo aha zi ausu, hen zëno mae mo syala, Alap mo golak de syal tan zi mo tahasa de tri so gwizimdin hip. † **1:21 1:21** Alap mo olsa de ayang gul gwizimdin hip de zini Maleaki Bak ngein sin dep denaka anakan ayang gulzimki, "Elia Bak Swe etan lamkam sa lwahal zala. Dekam Bian mo zisi de klis gun hup de yakla yawalak sa nabakam hatal." (Mal. 4:5-6)

* **1:21 1:21** Ul. 18:15-19 * **1:23 1:23** Yes. 40:3 ‡ **1:24 1:24** Farisikam de gubirida gwen zini, zen Yahudi zi mo aha hlikna, hen zen Yahudi mo auyan-aza mo jalse gwen olsa anakan tatete nul gwëk, "Bahem gulmurun." Zen hen man anakan ëbolamda gwe-gwëk, "Èe en ama dawemkam Alap hon ëtal gwesin." Zep zen hen man Yesusu baes nëblak- kim anakan hla dak, "Desa beyakam ang nëbla'an." Sap Yesus Zen Farisi walsya hom. Yohanis mo ola awe dam gulsunnu dan-dan: Ahana, "ahakon hen Farisikam de gubirida gwen zi hon de bitì gwenna," ahaksa, "In zen dakensiblik zen Farisikam de gubirida gwen zi lup nul sonék."

26 Ki zep ding gulzimki, “Èe an weyakamé baptis ta gwibi'in, hwëna eno mae mo ngirinnik ki gwë'ara-Mensa ena tame la srëm gwe'an.

27 Zen asa zertro'an zala. Hwëna èe an dawem naka hom- Zëbon onak de babu gwen hapye. Sap zëno tana maesa de ngan sosublunna, èe toton bëjënë.”

28 In kitak Betaniak ki lwak, weyana Yordan mo yakla hata sezan san de ënak. Yohanis zen zëwe baptis ta gwibirki.

Yohanis kim Yesussu hla ta gukuke:

29 Ka'ankam, ki zep Yohanis Yesussu hla ta guku, ki zep gubiridaka, “Ère wakë emki hla tan. Zen in Zen- Alap mo Domba Tane naye. § Zen Zen sa Zënaka sosok tala-tingare okamanak de zi mo karek-kareksa dikim ngan gulsuzimdin hipye.

30 Zen in Mensaë anakan emsa gubirida gwek, ‘Asa de zertrozan Zini, Zen mamna. Èe an betekna. Sap asa de jaha gwen srëmnak, Zen orep mes gwë gwëka.’

31 Èe homë menkam anakan tame ta'ak, ‘An Zen- nësa de ngaya tabin hip de Zini inye.’ Hwëna Alap asa baptis ta gwibin hip dam tasiki-dekam de Desa Israelk de zi hip zertreizimdin hip.”

32 Hen Yohanis insa hlauku zen dam-dam enkam anakan tonbiridaka, “Èe ama Alap mo Enhosa hla taser. Mawana ohola mo kim ati gwesan zala, ki zep hëndep ing gwe heblan hap Zëbon zau zula.

33 Hwëna Alap mes asa hamal hap anakan gu-gubluka, ‘A dekon esa tame tala: Men Desae hla ta'anka

ère mo Enho de Zëbon dep ati gwen-nak hen ing gwe heblannak, Zen Zen sa hwëna ère mo Enhona inkam baptis ta gwibiri.’

34 Èe hwëna namen mesë ère mo nwekam hla tal, zen in zebë damnak anakan kira gwe'an, ‘In eiwa, Zen Zen- Alap mo Tane naye.’ ”

Yesussu kim zini nonol tanganna ang nëblakke:

35 Ka'ankam etan baptis ta gwibin zini Yohanis zao gwë'anka. Èe hen zëre hon de ang è gwen zi darena zaoë è'ak. *

36 Dekon zep Yesussu tamaranak kara ta sone'anka, dekam zep etan gubiridaka, “In Zen- Alap mo Domba Tane naye.”

37 Èe kimë kirekam asalblak, dekam zebë Yesussu ang ëblak.

38 Asa kim ake guku, ki zep lero gwizimdin niban asa takensizimki, “Em basae leibi'ira?”

Ki zebë ding ulblik, “Rabi Bak, eno gwë gwenna endawe?” “Rabi”kam de ol-gunnu, zen Ibrani olkam. Zëno enlalana “guru.”

39 Dekam zep asa ding gulzimki, “Haen. En esa ki zë hla kuli.” Dekam zebë ang ëblak, hen ama zëno gwë gwenna hla kuk. Yakla nwena dekam san ha empat enkam, kam-en. Yaklana dekam zep asa zigwëka.

40 Èe in zen Yohanissi asalblak hëndep Yesussu ang ëblak, aha zini in mo bosena Andreas Bak. Andreas in, Simon, aha bosena Petrus mo oso.

41 Zen ki zep nabal-bakam aya zemka duweblaka, ki zep gubluka, “Èe mesë Mesia'a ertowenan!” “Mesias”kam de ol-gunnu, zen hen

§ 1:29 1:29 Yohanis kim Yesussu anakan gubluka, “Zen in Zen- Alap mo Domba Tane naye,” dam gulsunnu zen a kirekam mo: Yahudi zini dombasa Alap hap tru dasik gweblak- dekam de zëno mae mo karek-kareksa Alap ngan gulsuzimdin hip. Zep kim Yohanis kirekam gubluka “Alap mo Domba Tane”kam, zen man dakasti'in, sap Alap man Yesussu zerguku- domba tane makan de tingare zi mo karek-karek hap de tan hap. * 1:35 1:35 Yohanis, men zen bukuna ansa syal gwibirki, hom dankam zëre mo bosena ayat 35-40nak awe ale gulku. Hwëna zi darena in kon ahana zën mes yap, sap Yohanis kirekam zëre mo surat ale gul gwennak zëre mo bosesa golzabe gwëka. Mae hap mes yap bosa zemka ale gul srëm gwe-gwëka- dekam de aha zi zënaka enlala gweblan srëm hap, “Zen bolte-boltena.”

Ibrani olkam. Yunani olkam enlalana "Kristus," hen zëno enlalana, "Alap mo zer sonenna- Israelsa de Zen ngaya tabin hip."

⁴² Andreas ki zep Yesus osan dep kwang tahal zaka. Kim zerhata zaka, Yesus ki zep zë nwekam srap tasiki, zao zep gubluka, "Em in Simon Bak, Yohanis mo tane. Hwëna Ëe ama emsa bosa ta'an 'Kefas'kam." "Kefas"kam de bosena in, Ibrani olkam enlalana apdenak-zëre mo Yunani olkam de bosena Petrus hunye. Zëno enlalana "kaso yawal."

Yesus kim Pilipus ne Natanael neka kwang sokake:

⁴³ Ka'ankam ki zep Yesus Galilea mo lang san dep de song gwen hap dwam gwe'anka, ki zep hëndep song gweka. Zao zep Pilipus Baksa zertoweka, ki zep zë gubluka, "Em Asa ang gwebla."

⁴⁴ Pilipus in Betsaida wal, hen Andreas ne Petrus ne zao hen ë gweka.

⁴⁵ Pilipus dekam zep hwëna Natanaelsa duweblaka, ki zep zë gubluka, "Ëe mesë ertowenan- Zini mensa Musa zëre mo titi tabin olak hamal hap zëbe hap dena ale gulblukaye, hen mensa Alap mo olsa de ayang gul gwen zini nen guk gweblakye. Zen Nazaret wal, bosena Yesus, Yusup Bak mo tane."

⁴⁶ Ki zep Natanael weha ol makan ding gulbluka, "Nazaret walya san ha ki?- dawem naye."

Ki zep ding gulbluka, "Haen, en neik ki zë hla ta."

⁴⁷ Yesus onak kim zerhata'an zaka, ki zep gu-gubluka, "An Israel wal tangan. Hwëna zëbon onak homzisi de yane-ne tan hap de enlala naye."

⁴⁸ Ki zep Natanael takensiblika, "Em banakane asa tame tala?"

Ki zep ding gulbluka, "Ëe mesë emsa hla tal- Pilipus de emsa kwang tan srëmnak. Tenya ara mo ausunake nikin sira."

⁴⁹ Ki zep ding gulbluka, "Guru, Em in Alap mo Tane! Em in Israel mo teipsinni!"

⁵⁰ Yesus ki zep ding gulbluka, "Na-en tangan ba habe asa taiblibla'ara?- owas betek tola an en hapye. Sap Ëe anakare enkamë emsa gublul, 'Ëe ama emsa tenya ara ausunak hla tal.' Hwëna em etan mamkam de owassa esa kara guluda gwera- dekam tangan de dawemkam Asa taibliblan hapye."

⁵¹ Ki zep hwëna gulk sun de ol blaorankam kitak asa gubiridaka, "Eiwa tangan nakaë emsa gubirida'an: Em esa nglisa talusun nuka hla laser, hen Alap mo dam taha nakore zini ngatan zi mo lang nakore Zi Tanganna † Abon osan sa tatak gwese gwer, hen Abon osan sa atiti gwe-gwezal."

2

Ëna Kanak de we-zi dare oto sonak kim Yesus ang gwekake:

¹ Yaklana dan-ahan, dekam zep langna Galilea mo aha ëna Kanak we-zi daresa oto noso'ak. Yesus mo anena man zë ang gwek.

² Dekam zep Yesussu hen nen-blak- Zen de hen zëre hon de ang ta gwen wenyasa golëang tan hap.

³ Anggur hona kim tap gwizimki, Yesussu ki zep an zem gubluk, "Anggur hona mes tap gwizimnira."

⁴ Ki zep ding gulbiriki, "Anyan, em bap kirekam Asa gublula. Sap Ëe dikim ëre mo sosonsa goltreizimdin hip denak hom am zau'un."

⁵ An zem ki zep gola iwe de babu gwen zisi gubiridak, "Ano tanena an

† 1:51 1:51 Yesus kim okamanak gwë gweka, Zen man Zënaka "Anak Manusia"kam gu gweblaka. Hwëna walaskam de enlalana zëwe hom. Ibrani olkam zëno enlalana "zi tangan." Yesus mae hap kirekam Zënaka bosa taka: Sap Zen man enlala gweka- mensa Daniel Bak zëbe hap dena hamal hap Dan. 7:13-14nak ale gulkuke. Sap Daniel man nwe nik de lirisin nëblankam "zi tangan" makan Yesussu ngatan zi mo langnak hla ta seka- Alap kim Desa Zen de kitak teipsibiridan hap gulblukake.

de emsa ba mae hap gubiridanna, zen hēndep kire enkam syal eibik.”

⁶ Gola iwe kasokam de drem yawal-yawala ki ērlwa'ak- enam enkam, seratus liter mo dena. Zen weyasa zē hamal da gwibik- tembane tankam dikim Yahudi mo auyan-aza mo ēpba ol san tahasa su tablanda gwen hap, hen piringmoksas de zē os-os ta ine gwen hap.

⁷ Yesus ki zep gubiridaka, “Drem-dremna ansa hokam beya labik.” Dekam zep hona tutu dak, hēndep dremna in man ēsuwehe kinik.

⁸ Ki zep etan gubiridaka, “Men zen tagal gwenna awe nol gwe'arake, emki zēbe hap zeisirbli hanan.” Ki zep hēndep nyeisirblihak.

⁹ Hwēna dremnak de weyana in mes anggur ho hap ējowek. Tagal gwen hap de nol gwen zini in kim akasibirki, zen hom anakan tawa gwibi'inka, “An owas hap ki lwanan,” hwēna babu gwen zini in, zen en mes sap tame nuk. Ki zep we gon hap de zini insa kwang taka,

¹⁰ ki zep gubluka, “Tembane yawalsa de syal gwibinnik, diki anakan syal nei gwibirin: Nonol te-ala mamkam de anggur ho dēreksa de golzimdin. Hwēna kim dērek wenyas insa sowe henkam otdebinni, dekam sap de lun kon totore anggur hona golzimdin. Hwēna em an dērek wenyas ema lam gulu- lun kon de hwēna kae gwibir-zimdin hip!”

¹¹ Zen zen Yesus mo nonol owas syal gwibin niye- kim langna Galilea mo ēna Kanak nonola zēre hap dena goltreizimki. Zen zēwe zēre mo ngatan zi mo lang nakore sosonna nonola goltreizimki. Zen dekam zep

zēre hon de ang ta gwen wenyas nonol sap daibliblak.

¹² Kim hya gwesik, Yesus ki zep Kapernaum sun dep golētine gweka- an zem, oso wal zem, hen ēe zēre hon de ang ta gwen wenyas ban. Zao mingguna san ha aha-en mes yap asa golēlowe heka.

Yesus kim pasar zini Alap mo gol tēm nakon golēalsa sonekake:

(Mat. 21:12-13; Mrk. 11:15-17; Luk. 19:45,46)

¹³ In kim Yahudi mo yakla yala Paskanak* golek de gwe'ak, dekam zep Yesus Yerusalem san dep asa golēzahe gweka.

¹⁴ Alap mo gol mwanak de teksonnak ki zep zini hlauluda'an haka- men zen sapi-dombana, hen mawana te-ala hap lirak da gwibikke- dekam de aha zi desa Alap hap tru tasik gweblan hap. Hen men zen Roma mo te-ala hap Yahudi mo te-alasa lirak da gwibik, zen hen zao teinikin'ik. Meja-mejanak te-alasa naitblin da'ak. †

¹⁵ Ki zep dokot hak-haksa siri tasiki- dekam de sapi-dombana insa lek-lek tabin hip, dekam zep tingan golēalsa sonebirki. Te-ala lirak ta gwibin meja-mejana man yal tazimki, hēndep te-ala kasona man sekwak tabir-zimki.

¹⁶ In zen mawana lirak dabi'ik, desa ki zep gubiridaka, “Mawa om ansa dekam kap ul inehak. Ano Bian mo gola ansa bahem pasar hap li yul sone gwen.”

¹⁷ Ēe zēre hon de ang ta gwen wenyas, ēe dekam zebē enlala eibik-

* **2:13 2:13** Paskana zen Yahudi mo olkam enlalana “tamaran.” Zen dekam de enlala gwibin hip- in kim Alap mo dam taha nakore zini Israel mo gol-gola tamankake, Mesir mo gol-gol san de tūlidan hap. Mesir mo nonol walasna dekam zep juwek. Owasna insa de hlaunkum, dekam zep Mesir mo teipsinni Israel mo zi ausu nakore zini insa gubiridaka, “Dikire sek gwek.” (Kel. 12:1-51; Ul. 16:1-8) † **2:14 2:14** Roma dekam Yahudi mo langnak irik nik, zep zēno mae mo mwin-mwankam de te-alana, Roma mo te-ala. Hwēna Alap mo golak de syal tan zi mo mam-mamna man jalse neibirida gwek, “Roma mo te-alasa bējen Alap hap golblan.” Yahudi zini zep Roma mo te-alana lirak da gwibik- Alap mo golak de hatankamye. Hwēna zini men desa Yahudi mo ēpba te-ala hap lirak da gwibik, zen hwēna hargana man mam nul gwek- dekam de zēre mae hap aha hlik naka kap ta-in gwen hap. Hen men zen aha kire-kirena Alap mo golak lirak da gwibik, zen hen man hargana mam nul gwek.

mensa Alap mo olak anakarekam ale nukye,

“Èe Alap mo golsaë dawemkam anakan enna lwa gwibirin, ‘Bap zen zini kun gun.’

Zen in zep de jal hap sa Asa karek dal.”*

¹⁸ Yahudi mo nol-nolik zep hwëna nenblak, “Nara ebe hap golblaka?—dekam de Alap mo gola ansa wet gulsun hupye. Ki abe mae hap emki owassa syal gwibir-zimdin— èe akakim anakan emsa tawa ëblak, ‘Alap eiwa mes kirekam de syal gwe-gwibin hip dena ebe hap golblaka.’ ”

¹⁹ Ki zep ding gulzimki, “Em gola ansa dri kulsuk, hwëna Èe asa dan-ahare yaklakam etan taul.”

²⁰ Ki zep ding nulblik, “Alap mo gola ansa kim dauk, tahunna 46 enkam man-am altìsik, hwëna em ema gulu, ‘Dan-ahare yaklakam asa etan taul!’ ”

²¹ Hwëna Yesus Alap mo gol tan-gansa de dri yulsun hup hom ki gubiridaka. Zen hwëna zëre mo tim hip denaka gulk sun ola blaonzimki.

²² Zep Yesus kim tìn nìkon ngaya gweka, èe dekam zebë zëre mo ola insa enlala eibik. Dekam zebë hen Alap mo hamal hap de ol ale gun nuban Yesus mo ola ban laïblizimk.

²³ Yerusalemk kim yakla yawala Paskanak gwë gwe'anka, zini beya nik daïbliblak, sap zen man zëno owas syal gwibinsi hla nul gwe'ak.

²⁴ Hwëna Yesus hom desa anakan taïlibiridaka, “Zen eiwa Asa daïlibla'an.” Sap Zen mes kitak tame tabirki.

²⁵ Zen zi mo enlalasa Zën hla ta gwizimki, zep Desa ba hap de anakan gublun hap, “Zini in karekna,” ahaksa, “Zen dawemna.”

3

Nikodemus kim Yesussu zini takake:

¹ Aha yaklakam ki zep Farisi walya Yesussu zini ta zaka, bosena Nikodemus. Zen Yahudi zi mo aha mamna.

² Zen kam zini taka, ki zep zë gubluka, “Guru, èe mesë emsa anakan tame lak, ‘Emsa Alap zer soneka— asa de tawa ta gwibin hip.’ Sap Alap de zisi zergwën srëmkam, zen bëjen owas-owassa syal gwe-gwibin— in kirekam em syal gwe-gwibi'iraye.”

³ Yesus ki zep ding gulbluka, “Eiwa denakaë emsa gublu'an: Emsa de etan jaha gweblan srëmkam, em bëjen em Alap mo irik ginnik hatan.” *

⁴ Ki zep ding gulbluka, “Zi mamna banakan de etan jaha gweblan hap? San ha maka ki bongna etan an zik mo sopnak ing gwe he'ara?!”

⁵ Yesus ki zep ding gulbluka, “Eiwa denakaë emsa gublu'an: Zini etan de jaha gwibiridan srëmkam, hokam de jaha gwibiridanna, hen Alap mo Enhokam dena, zen molya Alap mo irik ginnik yaïng gwek.

⁶ Zi mo jaha gweblanna, zen tim en naka, hwëna Alap mo Enho nakore jaha gweblanna, zen ang hap dena.

⁷ Em ba hap de tenggwaran hap?— sap Èe ama emsa gublul, ‘Etan de emsa jaha gwibiridan srëmkam, em kitak bëjen Alap mo irik ginnik yaïng gwen.’ ”

⁸ Yesus ki zep ola gulk sun blaon-blaka, “Asesena ki totoresa taïlisen gwenda. Auku enna kie asal gweblanan, hwëna anakare tame gunnu hom, ‘Asesena in dekon jowe gwenda,’ ahaksa, ‘Desan dep song gwera.’ Zen hen ki kirekam,

* **2:17 2:17** Mzm. 69:10 * **3:3 3:3** “Etan de jaha gweblan” hap de ola awe, desa de dam gulsunnu dan-dan, zep Nikodemus Bak dam gulsuk srëm gweka. Aha dam gulsunnu, etan de an zik jaha gweblan hap dena— men kirekam Nikodemus dam gulsukuye. Yunani olkam aha dam gulsunnu hen, gulk kon de jaha gweblan. Zëno dam gulsunnu, Alap mo Enho de ing gwe heblankam de wet gwesin, zep de zini in èse jaha gwen makan nwe-mase gwen. Yesus Zen diki kirekam enlala gwibirki— ngatan zi mo lang nakon de jaha gweblansa.

Alap mo Enho nakore jaha gweblan naye.”

⁹ Nikodemus ki zep takensiblika, “Èe homë tame gu'un. Zen kirekam banakan sa jower?”

¹⁰ Yesus ki zep ding gulbluka, “Em dwan Israelk de zi mo aha guru yawal sake, zep em ba habe insa tame gul srëm gwera?”

¹¹ Eiwa denakaë emsa gublu'an: Èe ère hon de ang ta gwen wenya ban ère mae mo tame gun nuka hen nwekam de hlaun nukaë tawa la gwibirin. Hwëna em ere mae hon de ang ta gwen wenya ban em molye ulink.

¹² Èe kimë auhu-kamanak denaka emsa tawa ta gwibirin, em hwëna dekam home ano ola laibli gwibirin. Zep Èe de ngatan zi mo langnak denaka emsa tawa tabinkim, em banakan dep?– taibli bin niye. Ebe mae hap gwa-gwa tangaranna.

¹³ Sap zini hom ngatan zi mo lang san dep sesek gwesek, hen dekon hom atiti gwezak– zen de emsa tawa tabin hipye. Hwëna Èe ngatan zi mo lang nakore Zi Tanganna, Èe dekonë ati gwezak.

¹⁴ Men kirekam Musa Bak tembagakam de yang gulsun wanyana tenyak gulk makan gul inkike, sasa langnak in kim golëlowehe gwekake, † zen kirekam sa hen ngatan zi mo lang nakore Zi Tanganna Asa gulk makan dain–

¹⁵ dekakim tingan men zen Asa daibli gwebla'ak, hëndep de gwën hap denaka hla nuk.”

An Yohanis, men zen bukuna ansa syal gwibirkike, zëre mo srip gulsun ol:

¹⁶ Alap man okamanak de zisi sërkam kwasang gwibirida gweka, hëndep zep zëre mo Tane aha-arena zer sonezimki– dekakim tingan men zen Desa daibli gwebla'ak hëndep denaban juwe srëm gwek, hwëna

hëndep de ëngaya gwen hap de-naka sa hla nul.

¹⁷ Alap zëre mo Tanena in nësa de karek tabin hip hom zer soneka, hwëna dekam de Zëbon onakon nësa ngaya tabin hip.

¹⁸ Zini men zen zëre mo Tanena daibli bla'an, desa Alap hom karek tabin hip kalang gwibirida'ara. Hwëna men zen daibli bla srëm gwe'an, desa mes kareknak de kang gun hup kalang gwibiridaka, sap zen hom zëre mo Tane aha-arena daibli blak.

¹⁹ Zep a kire nakon sa Alap klis gulu: Zëre mo ngatansa de golz- indin hip de Zini mes sap okamanak hata zaka, hwëna okamanak de zini kawesinsi dwam nei gwibirin. Zen ngatan san dep de wet so gwe kinin hap man baes ta gwenan, sap zen karek-kareksa nol gwenan.

²⁰ Sap kareksa de gol gwen zini ngatansa man husus nei gwibirin. Zen bëjen ngatannak ewet so gwe kinin– zëno mae mo syal karekna insa de tame gulzindin srëm hap.

²¹ Hwëna men zen Alap mo dwam gwibin sin ang ta gwenan, zen Alap mo ngatannak ewet so kinzi gwenan, dekam zep anakan noltrë gwenan, “Ano gwëna eiwa Alap mo dwam gwibin sin lwa'an.”

Baptis ta gwibin zini Yohanis kim Yesus hup dena kira gwekake:

²² Dekon aha yaklakam, Yesus zëre hon de ang ta gwen wenya aban mae Yerusalem mo zi srëm lang san dep golësek gweka. Zao holo tolkam asa golëlowehe gweka, hen zini dekam baptis ta gwibin hip yaing gwe-gwezak.

²³⁻²⁴ Dekam baptis ta gwibin zini Yohanis Swesa nama hom bwinak tak da in'ik. Zen dekam Aenonk hen baptis ta gwibi'inka– ë yala Salim golek denak, sap zëwe hona beyana.

† **3:14 3:14** Israel mo ausu nakore zini kim wanya de hit ti gwibin nikon juwe gwe'ak, Alap dekam zep Musasa gublu'ka– dekam de yang gulsun wanyasa te ik ginnik gulk makan gul irin hip. Kim wanyana insa kara nulse gwek, dekam zep wanya mo hit tin sang-sang nakon ëdawem gwe-gwek. Emki Bil. 21:4-9nakhlaun.

Zep zini nama zëbon dep yaïng gwe-gwezak- zen de zë baptis ta gwibin hipye.

²⁵ Ki zep Yohanis hon de ang ta gwen wenya Yahudi wal bose zeban auyan-aza zik mo ëpba ola kon nërkeisa-keisa gwe'ak- mae hap: Diki a kire enkam nen taha maena su tablanda gwen- dekam de Alap mo nwenak ëkun gwen srëm hapye.*

²⁶ Ki zep etan Yohanis osan dep lwan dahak, zao zep nenblak, "Guru, zini men zen weyana Yordan mo yakla hatase zannak eban ë'anka, mensa em asa gubirida gwekake, 'Zen Zen tangan,' zen hwëna angkam zisi beyakam baptis ta gwibi'ira. Angkam zini zëbon en dep tingan gwe'an. Nëbon mae hwëna man dan-en gwe'an."

²⁷ Yohanis ki zep ding gulzimki, "Zini bëjen banakare syal maena gul irin- Alap de golblan srëmkamye.

²⁸ Ena kie asa sane la gwék- kimë anakan gu gwékye, 'Ëe an Israelsa de ngaya tabin hip de Zisi hom, hwëna ëe an Desa de ngeir gubluzan hap de zi.'

²⁹ Yesus Zen we gon hap de zini men kiye. Hwëna wenya mensa Zen go'ara, zini men zen angkam Zëbon dep bitï gwe-gwe'an, zen zen. Ëe hwëna men kiye- we gon hap de zini in mo wal bosena. Zep ëe ama sam gwesinïn- anakan de akenkam, 'Wezi darena in dawemkam ë gwe'an,' hen ëe ama isrip-sri gwe-gwenan- ano wal bosena in mo olsa de sane gwe-gwenkamye.

³⁰ Zen diki Zen sa abon onakon teipsik zahera, hwëna ëe asa dowehe tiner."

Angkon an, bukuna ansa men zen syal gwibirkike, zëno srip gulsunnu:

³¹ Zini in zen gulk kon ati gwe zaka, Zen teipsinni. Hwëna okamanak de ësaltïn zini, zëno mae mo enlalana hen ol toranna okama en hap dena. Ngatan zi mo lang

nakore Zini in man tingan kweikwik gu'ura.

³² Zen mensa Zëna zëwe hlaul gweka hen sane gwe-gweka, desa zep nësa tonbirida gwe'ara. Hwëna okamanak de zini zëno ola man hwa nulsuk gwe'an.

³³ Hwëna men zen en zëno ola nulin gwenan, zen en zep anakan eiwa nul gwenan, "Yesus Zen Alap mo Zer Sonenna."

³⁴ Alap mo zer sonen Zini, Zen eiwakam Alap mo olsa ayang gul gwenda, sap Alap zëbe hap zëre mo Enhosa kitak zerblaka.

³⁵ Bian man Tane zemka dang tïni ta gwenda, in zep Zen de tingan bi gwibin hip gubluka.

³⁶ Men nara Tane zem in sa taïbliblanna, zen mes hëndep de ëngaya gwen hap dena nulin. Hwëna Tane zemka men zen de betek nëbla srëm gwe'ak, zen molya ëngaya gwék. Zen hwëna Alap mo jalak sa hëndep denaban lowehe gwer.

4

Yesus kim Samaria wenya ban ola lon'akke:

¹ Farisikam de gubirida gwen wenya ki zep anakan ësak, "Yesus hon angkam beyakam bitï gwe-gwe'an, hen zëbon beyakam baptis ta gwibin hip sek gwe-gwe'an. Yohanis hon angkam man dan-en gwe'an."

² Hwëna Yesus Zëna hom baptis ta gwibirki. Diki zëre hon de ang ta gwen wenya ëyë baptis la gwibik.

³ Anakan kim salka, "Farisikam de zini mes kirekam emsa tawa nëblak," Zen dekam zep Yerusalem mo lang nakon asa etan Galilea mo lang san dep golësek gweka.

⁴ Orana in desanë sek gwék langna Samaria mo ngirïn kles san.

⁵ Ki zep Samaria mo ëna Sikark asa golëyaïng gweka. Dekon golekngana mensa Auyan Yakob Bak

* 3:25 3:25 Mrk. 7:1-4 * 4:5 4:5 Kej. 33:19; 48:22; Yos. 24:32

orep tangan tane zem Yusup hup zerblakaye.*

⁶ Ëna Sikark iwe hen ki, Yakob Bak Swe mo aili hona. Yesus man oranak sin gwe zaka, zep kim hata zaka, hëndep dekam zep aili ho alpna nikin ane zaka. Yaklana dekam bolak mes zauku.

⁷⁻⁸ Ëe zëre hon de ang ta gwen wenya mesë ëna iwe yaing gwesek-tembanesa de zë lop tan hap. Ki zep hwëna Sikar wenya blome naban hata'anzak- hona insa dikim zausul han hap. Yesus ki zep gubirki, "Abe hap nonol zausulblu ine."

⁹ Wenya in ki zep ding gulbluk, "Em in Yahudi wal syake, hen ëe an langna Samaria kore we. Zep em ba habe asa kirekam abe gulu?" Zen mae hap ki ding gulbluk: Sap Yahudi zini bëjen Samaria zi niban tahana golësëran-sëran gwen. *

¹⁰ Ki zep ding gulbirki, "Alap mensa angkam golzim'ira, em home tame gu'ura. Hen em home Asa tame tala. Ki emaka Asa abe tala-hëndep de ngaya gwen hap de hosa de ebe hap golbin hip. Hen Ëe amaka ebe hap golbi'in."

¹¹ Ki zep ding gulbluk, "Bian, eno blomena hom, hen aili hona an logok gwe henna. Em banakan molye zausulku- ngaya gwen hap de hona in saye.

¹² Auyan Yakob Bak tinkim aili hona ansa nëbe mae hap hli tazimki, hen zëna, walas zem hen zaho zem, zen dekore hosa notde gwibik. Em san ema enaka kil ti'ara?- 'Ëe an Yakob Bak onakon ama teipsi'in.' "

¹³ Ki zep ding gulbirki, "Zi de aili hona ansa otdë gwibinkim, zen sa etan ëho-hole gwe-gwer.

¹⁴ Hwëna mensaë gol gwizim'in, zi de desa gul irinkim, dekam bëjen etan ëho-hole gwen. Hwëna hona in zëno mae mo enho nakon sa ana gwese gwer, hëndep zep sa hëndep denaban ëngaya gwer."

¹⁵ Wenya in ki zep ding gulbluk, "Bian, abe hap hona insa golbir-ëe akakim etan ho-hole gwe srëm gwëk. Hen dekam ëe molyë awe hata gwëzak- hona ansa de zausul gwen hapye."

¹⁶ Ki zep etan ding gulbirki, "Ki zi omka em kwang ta lahan."

¹⁷ Hwëna ki zep ding gulbluk, "Ano zini hom."

Etan ki zep ding gulbirki, "Em eiwakame ding guluda,

¹⁸ sap em mese aha-ere taha-tapkam zini zersik gwëka. Hen mensa angkam zergwë'ara, home eiwakam ze'ara. Eno ding gunnu in eiwana."

¹⁹ Ki zep ding gulbluk, "Bian, angkam mesë emsa tame tanan: Em Alap mo olsa de ayang gul gwen hap de zi.

²⁰ Ano mae mo auyan-azana awe de kwatapnak yakla yawalak ëtagal gwe-gwëk- dekon de Alap hap boklesa kom ta gweblan hap. Hwëna Yahudi zini, em ema anakan tawa la gwibirin, 'Yerusalemk de Alap mo gol ennak em yakla yawalkam ëtagal gwe-gwen- dekon de Alap hap boklesa kom ta gweblan hapye.' "

²¹ Ki zep hwëna ding gulbirki, "Ano ola an desa em taiblibin: Yak-lanak sa hatal, dekam kwatapna an en kon hen Yerusalemk en kon molya Alap hap boklena kom da gweblak.

²² Em Samariak de wenya, men zëbe hap boklena kom la gweblanan, home tame la gwe'an. Hwëna ëe, Yahudi zini, mesë tame lak- men zëbe habë boklena kom la gweblananye. Sap dekam de zisi ngaya tabin hip dena, zen Yahudi hon sa ki lwal.

²³ Sap zëno yaklanak sa hatal hen angkam man lwa'an, dekam zini sa tingare enho naban hen Alap mo Enho de bi gwibiridankam Bian hap boklena kom da gweblal. Sap Bian

* **4:9 4:9** Yahudi zini Samariak de zi niban mae hap tahana nolësëran-sëran gwe srëm gwe-gwëk: Sap Samariak de wenya man aha zi ausu naban ësiri gwe-gwëk, zep Yahudi tangan zini man anakan enlala neibirida gwëk, "Zen Yahudi tangansa hom. Zen kwae naban."

Alap kirekam de zisi hakalbirida gwenda- Zënaka de boklesa kom ta gweblan hapye, sap men-kore men-kore zi ausu.

²⁴ Alap Zen enho enna, zep zi de eiwakam boklesa kom ta gwe-blanna, zen diki tingare zère mo enho naban hen Alap mo Enho de sosonsa golblan naban."

²⁵ Wenya in ki zep ding gulbluk, "Èe tawana: Nèsa de ngaya tabin hip de Zini sa hata zala, hen kim de hata'an zaka, Zen sa kitak srip gulsuk gwizimdi."

²⁶ Ki zep ding gulbiriki, "Èe an Zen- an debane lon'araye."

²⁷ In kim zè lon'ak, èe zère hon de ang ta gwen wenya dekam zebè lwanda halzak. Zao zebè Yesussu anakan lenggwanbla'anzak, "Zen wenya ban am olsa lon'an." Hwëna wenya insa homë anakan lakensibik, "Em basae Zëbon dwam gwibi'ira?" Hen Yesussu homë lakensiblik, "Em ba habe wenya in han ola lon sara?"

²⁸ Hwëna wenya in kim Yesussu kirekam salblak, blomena insa zao zep eititi gwe gubirhak, ki zep ênak gubiridahak,

²⁹ "Haen! Zini wakinsa emki hla tan. Zen ano gwënsa kitak tawa gwibiri. San ha Zen tangan mes yap- nèsa de ngaya tabin hip de Zi niye?"

³⁰ Dekam zep ëna iwe de zini du nèblazak.

³¹ In kim ki zè kirekam lwak, èe zère hon de ang ta gwen wenya, èe ama sap zè titi la gwe'ak, "Guru Bak, emki tembane gwen."

³² Hwëna Zen man ap ding gulzimki, "Ano tembanena ki- mensa em tawa eibir srëm gwe'anye."

³³ Ki zebè ënaka enbiridak, "San ha man yap aha zi tembanena nolblazal yap?"

³⁴ Ki zep ap ding gulzimki, "Ano tembanena a zen moye: Bian mo dwam gwibinsi dikim syal gwibin hip, hen syala men zep Asa zer sonekake, desa dikim sul sonen hap. Zen ano tembanena zen.

³⁵ Zini kirekam nen gwibirin, 'Eiyas tan nakon, etan benna dan- nër dan-nër, dekam sa taran hap denak zaul.' Hwëna Èe ama emsa gubirida'an: Nga yala ansa emki èr tabla naseran. Gandumnu mes ngap-ngap gwera, zep taran hap denak mes zaul. Nen taran.

³⁶ Eiyas tan hap de zini, zen mes èteingir gwe guk. Hwëna zini men zen angkam taran hap syal ta'an, zen hëndep de èlwa gwen hap de gudangnak gandumnu insa kang da gwenan, hen zèbe mae hap Alap hëndep de èlwa gwen hap de te- alasa gaji hap aïtbir gwizimnira. Zep zini men zen eiyas tanna hen men zen de taranna apdekam sa lamkam èisrip-sri gwer.

³⁷ Zep man dakastilin- men kirekam anakan nen gwibirinye, 'Ahakorena eiyas tan hap de wenya. Ahakorena zen taran hap de wenya.'

³⁸ Hwëna Èe mesë emsa dam tasi- bik- em de hwëna aha zi mo eiyas tanna insa tan gwen hap. Zep em zëno mae mo irse gwen nakone dawemsa hla kul gwe'an."

³⁹⁻⁴⁰ In zen du nèblazak, zao zep abe da gwe'ak- deban mae de zèwe golëgweisin hip. Hëndep zèwe yaklana dan zep gweisiki. Langna Samaria mo ëna Sikark de zini dekam beya nik zep Yesussu daïbliblak, sap wenya in anakan gubirida gwe'ak, "Zen ano gwënsa kitak tawa gwibiri."

⁴¹ Hwëna Zënaka de sane tan tangankam, zep etan beya tangan nik daïbliblak.

⁴² Hyanak zep wenya insa nen gwibik, "Menkam eno ol en nakonë laïblibla'ak, hwëna angkam aena hen mesë sane lak, zep mesë dam lasil, 'Eiwa, Zen okamanak de zisi de ngaya tabin hip de Zi.' "

Yesus kim mam zi mo walasna langa nakon sang-sangnak dawem takake:

(Mat. 8:5-13; Luk. 7:1-10)

⁴³ Samaria mo ëna iwe kim yaklana dan asa golëgweisiki, ki zep

kon etan zère mo langna Galilea san dep asa golësek gweka.

⁴⁴ Yesus dekam hamal hap mes asa gubiridaka, “Zini hom zère kore wal de Alap mo olsa ayang gul gwizimdin hip de zini nasal gweblanan, zep Asa hen Galileak molya daïbliblak.”*

⁴⁵ Hwëna kim asa golëyaing gweka, Galileak de zini man ki sap neirink. Zen hen mes Yerusalemk yakla yala Paskanak ang tak, hen dekam zëno owas syal gwibinni kitak kara nul gwek, zep ki neirink.

⁴⁶ Yesus ki zep asa golëlwanda halka- Galilea mo ëna Kana san dep, men zëwe Zëna nonol ho tanganna anggur ho hap li yul sonekake. Langna Galileak de aha ëna Kapernaumk zao hen ki zini gwë'anka-teipsin zini Herodes mo taha tri so gweblan nik. Hwëna zëno tanena sang-sang nik gwë'anka.

⁴⁷ Zen kim salka, “Yesus Yerusalem mo lang nakon mes hata zala,” dekam zep song gwebla zaka, zao zep abe ta zaka, “Em wëhë asa mas gwebla'anka? Kapernaum sun nen ingnen- ano tane tolsa eka dawem ta. Zen tin hip tol alp gwesi'ira.”

⁴⁸ Ki zep hwëna ding gulbluka, “Em awe de zini, karek tanganna. Em owas-owassa de syal gwibir-zimdin srëmkam bëjen em ëtäiblin.”

⁴⁹ Hwëna man gubluka, “Haen, Bian! Em de hla tan srëmkam ano tanena sa tol tili!”

⁵⁰ Ki zep hwëna ding gulbluka, “Emki song gwen. Eno tanena sa ngaya gwera.”

Zini in man Yesus mo ola insa taïlibirki, ki zep hëndep gwë halka.

⁵¹ Ora san kim nama tine'anka, dekam zep zère hon de babu gwen zi niban golëtoweka. Zao zep nen-blazak, “Eno tanena mes dawem gweka!”

⁵² Ki zep takensibiridaka, “Bawalkam dawem gweka?”

Ki zep ding nulblik, “Ir, yakla nwena aha-en, dekam ewenna tap gweblak.”

⁵³ Bi zem dekam zep enlala gweka, “O hare yakla nwena dekam am Yesus asa gubluka, ‘Eno tanena sa ngaya gwera.’” Zëna hëndep zère mo golak dena kitak dekam zep Yesussu daïbliblak.

⁵⁴ Zep in kim kirekam tane tola insa dawem taka, Zen dekam zep Yerusalem mo lang nakon de Galileak hata gwe zankam de owas syal gwibir-zimdin dan nëblak. †

5

Yesus kim Yerusalemk zi lekna dawem takake, hen zère hap de syal we yul soneblanna kim srip gulsuz-inkike:

¹ Aha yaklakam, ki zep Yesus Yerusalem san dep asa golësek gweka- Yahudi zi mo aha yakla yalak dep.

² È yala Yerusalemsa in kasokam de kolkam orep mes ki wale dak, hen zëno aha lilikinni man bose nosok “Domba zaho hap de Lilikin.” Til hannak zao ki aili ho yawala, zëno gol kluk-klukna aha-ere taha-tap enkam. Ibrani olkam aili hona insa man bose dak “Betesda”kam. *

³ Zëwe zi sang-sangna tra nik ëglang-glang gwe-gwek- sap nwe haïna, lekna, hen taha-tana teisya ine gwen srëm wenya. [Zen man zë ëkara gwe-gwek- aili hona insa dekon ngëp-ngep gwennak hla tan hap.

⁴ Sap menkam-en menkam-enkam Alap mo dam taha nakore zini man jowe ine gwe zaka, dekam zep hona insa ngëp-ngep ta gweka. Ngëp-ngep gwenkam, dekam men nara honak de talhenkam nonol gwenna, zen dekam de sang-sang nakon

* 4:44 4:44 Mat. 13:57; Mrk. 6:4; Luk. 4:24 † 4:54 4:54 Nonol owasna Galileak de hata zankam, emki hlaun Yoh. 2:1-12nak. * 5:2 5:2 Orep men zen Yohanis mo ola etan ale nul gwek, ahakon aili ho bosena insa “Betzata”kam ale da gwek.

dawem gwen- sap banakare sang-sang mae nakon.]

⁵ Zao hen ki zini, zen 38 tahun enkam sang-sang naban gwë gweka.

⁶ Yesus kim tumnak zini insa hla ta zaka, zen man tame taka, "An mes holo tangankam sang-sang gweka," ki zep takensiblika, "Em wëhë dawem gwen hap dwam gwe'ara?"

⁷ Ki zep ding gulbluka, "Bian, ëe banakan de dawem gwen hap? Asa de mas gweblan hap de zini san ki? Zep hona an de ngëp-ngëp gwenkam, ëe kimë nama song gwen hap sap akasik gwenan, dekam zep hwëna aha zi talhenkam ënonol gwe-gwenan."

⁸ Yesus ki zep gubluka, "Dekam luwe, hëndep ki ere mo ni ta gwen srë-srena insa gol san dep gul ine kinî."

⁹ Hëndep dekam zep zini in dawem gweka, ki zep srë-srena insa gul ine kinika.

Yaklana in dekam Yesus zini insa dawem taka, dekam Hari Sabat-Yahudi zi mo syal tan srëm yaklakam.

¹⁰ Hwëna Yahudi zi mo mam-mamna kim zini insa hla da sonek, ki zep zë nen soneblak, "Nëno mae mo ol jalse gwennak, Hari Sabatkam srë-srena bëjen gwirehan."

¹¹ Hwëna man ding gulzimki, "Zini men zen asa dawem tala, zen man asa gublula, 'Ere mo srë-srena insa em gol san dep gwirehan.' "

¹² Dekam zep dakensiblik, "Zen nara zi ki emsa kirekam gublula?"

¹³ Hwëna zini in hom anakan tame taka, "Zini bosena Yesus asa dawem tala," sap Yesus zi beyanak iwe aya gwe ine halka.

¹⁴ Yesus ki zep zini insa etan Alap mo gol teksonnak zertowe'anka, zao zep gubluka, "Emki sane gwen: Emsa mesë dawem tak, hwëna kareksa de gol gwenna emki baes gwen. E-baes gwe srëm gwe'anka, ki hwëna sërkam de karek tangan wenyaka esa goltowera."

¹⁵ Kirekam kim salblaka, zini in dekam zep Yahudi zi mo mam-mam

wenyaka gubiridaka, "Zini in zen asa dawem taka, zen bosena Yesus."

¹⁶ Zen dekam zep Yahudi zi mo mam-mamna Yesusu de sil-sil tanna kon neisibli hana'ak, sap Zen Hari Sabatkam zisi dawem ta gwibi'inka.

¹⁷ Hwëna Yesus ki zep gubiridaka, "Ano Bianna hom syala golzausuk gwenda. Eë hen zebë kirekam syal gwe tine gwenan."

¹⁸ Yahudi zi mo mam-mamna dekam tangan zep Yesusu de tan hap ola aha-en nuk- mae hap: Sap zëno mae mo dam gulsunkum, Zen Hari Sabat en hap denaka hom gulmun gweka. Zen hwëna Alapsa hen "Ano Bian" kam gu gweblaka. Dekam hwëna zëno ola man nwe-mase gwe-gwek, "Eë Alap han ki en."

¹⁹ Yesus ki zep Yahudi mo mam-mam wenyaka insa gubiridaka, "Eë eiwa denakaë emsa gubirida'an: Eë bëjënë ëre en mo enlalakam ba maesa syal gwibin. Hwëna mensaë ëre mo Biansa anakan kara ta gwenan, 'Bian kirekam syal gwe-gwenda,' Eë hen zebë kire enkam syal gwe-gwenan. Men kirekam Bian syal gwe-gwenda, Eë hen desan zebë ang gwe-gwenan.

²⁰ Sap ano Bianna man sërkam Asa kwasang gwe-gweblanda, zep mensa Zëna syal gwe-gwibirida, tingan zep abe hap goltrë gweblanda. Hen Zen sa etan sërkam de owassa dikim ebe mae hap syal gwe-gwibir-zimdin hip denaka abe hap gol gweblala, hëndep owasna in esa lenggwanbirida gwer.

²¹ Men kirekam ano Bian juwen zisi ngaya ta gwibirida, abe hap hen mes kire hap de sosonna gol-blaka- Eë de hen kirekam ngaya ta gwibin hip, men desa Aena dwam gwibirida'anke.

²² Hen ano Bian Zëna angkam bëjen zisi klis gun. Sap Zen mes klis gun hup dena kitak abe hap golblaka.

23 Zen mae hap kirekam abe hap golblaka: Dekam de tîngare zi Asa blikip gwesik gweblan hap- san de men kiye, ère mo Bian Zënaka de blikip gwesiblinna. Zep zini men zen Asa blikip gwesiblin srëmna, zen hen hom ano Bianna blikip neisik gweblanan- men zen Asa zer sonekaye.

24 “Èe eiwa denakaë emsa gubirida'an: Zini men zen ano ol san ang ta gwe'ak, hen ano Bian, men Zen Asa zer soneka, Desa daiblibla'ak, zen ki mes hëndep de gwën hap dena nulin. Kire zisi bëjen aumwa hap de klis gunnuk karek tabin. Sap zen mes tîn hip de orana hli dak- dekam de ëngaya gwen hap de ora san ang tan hapye.

25 Èe eiwa denakaë emsa gubirida'an: Yaklanak sa hatal hen angkam man kirekam lwa'an, dekam men zen juwen zi mo kim lowehe gwenan, zen sa Alap mo Tanena ano kwang guludan ola ësal gwer, hen men zen de Asa ang nëbla'ak, zen zen sa ëngaya gwer.

26 Sap ngaya gwen hap de ausuna Bian onak, hwëna Zen mes Tane zem abe hap golblaka- dekam de Abon onakon ëngaya gwe-gwen hap denaye.

27 Hen Zen mes zisi dikim klis gul gwen hap de sosonna abe hap golblaka, sap Èe an Zen- ngatan zi mo lang nakore Zi Tanganna.

28 “Ano tawa tabinni ansa bahem tenggwanbin. Sap yaklanak sa hatal, dekam tîngan men zen juwek ngatan zi mo lang nakore Zi Tanganna ano kwang guludahan hap de olsa sa ësane gweser.

29 Zen dekam sa zënaka de kang gulne gwen nakon luk tal. Men zen dawemna nol gwëk, desa asa ëngaya gwen hap tagal gulsul. Men zen karekna nol gwëk, desa karek tabin hip asa tagal gulsul.

30 Èe bëjënë A-en ba maesa syal gwibin. Èe de zisi klis gunkum, dekam Èe ama Bian mo Asa de gublun en san ang gwe-gwenan.

Ano zisi de klis gunnu bëjen li tabin, sap Èe homë ère mo dwam gwibin sin ang gwe-gwenan, hwëna men Zen Asa zer sonekake, zère mo dwam gwibin en sanë ang gwe-gwenan.

31 “Èe de anakan gubiridankam, ‘Èe an Zen- mensa em kara ë gweblananye,’ hwëna aha zi de ano olsa trilsen srëmka, dekam molye Asa laibliblak.

32 Hwëna ano olsa de trilsen hap de Zini ki. Zen ère mo Bian. Hen ëe tawana: Zëno Asa de trî tasen hap de ola eiwa tanganna.

33 Em ema zini baptis ta gwibin zini Yohanis osan dep lup ul sonek, hen zen dekam zep eiwakam abe hap dena damnak kira gwëka.

34 Auhu-kama zi de Asa trî tasen srëmka hen sap. Hwëna en dikim lamkam ëngaya gwen habë ki emsa enlala sobiridal.

35 Yohanis mo gwënna lampu makan lwa gwëk- san de lampu de okama kawesinnik awe zil inenna kiye. Nonol lone sennak em ema sap zëno ngatanna insa isrip-sri eibik.

36 Zep Yohanis hen man Asa trî ta seka, hwëna diki dawem tanganna, emki ano owas syal gwe-gwibinsi taibli gwibin. Bian Zen zep abe hap owas-owassa dikim syal gwe-gwibin hip de sosonna golblaka- em ekakim Asa anakan laibliblak, ‘An eiwa Bian Alap zer soneka.’

37 Ère mo Bianna men Zen Asa zer soneka, Zen man hen Asa trî ta se'ara. Hwëna em hom tangane zëno ol toranna ësane gwëk, hen home zëno nwe-masena hla lablak.

38 Alap mo ola man eno mae mo enhonak jawe guk hana gwenan, sap em home zère mo zer sonen Zini Asa laiblibla'an.

39 “Em sap Alap mo ol ale gunnu kie karatda ul gwenan, dekam zebe sap anakan ëenlala gwe-gwenan, ‘Èe asa dekon hëndep de gwën hap de orana dam lasil.’ Hwëna ol ale gunnu in, zen sap abe hap dena- Asa dikim tame tan hap!

40 Hwëna em ema baes ta gwenan- Asa de ëngaya gwen hap dena kip abe tan hapye. Ëe ki amaka ebe mae hap golzim'in.

41 "Ëe zi dikim ano bosesa mam gulblun hap homë awe hatazak.

42 Sap Ëe mesë emsa tame tabik. Eno mae mo enhonak hom- Alapsa de ensa lwablan hap denaye.

43 Ëe ëre mo Bian mo bosekamë hatazak, hwëna em home asa dokwak la'an. Hwëna auhu-kama zi de zëre en mo bosekam hata zankam, desa en ema dokwak la gwibirin.

44 Em ema ësam gwesik gwenan- hwë-hwëkam de enaka bose naka anakan teip gulsuk gwizimdinni, 'Em zini dawemna.' Hwëna em home ëalp gwe-gwenan- Aha-ere Zini Alap dikim emsa sam gwesibiridan hapye. Kirekam de zini em an banakan dep?- Asa de taïblïblan naye.

45 "Bahem Asa kil tïn, 'Zen sa Bi zikhip ano mae mo karekna goltrëblala.' Hwëna eno mae mo kareksa de Bian hap goltrëblan hap de zini, zen Musa Bak- mensa ena kil li'an, 'Alap de klis gunnuk zen zen sa asa golëzauk sonera.'

46 Em de eiwakam Musa mo olsa taïblïbinkim, ki emaka hen Asa laïblïbla'an, sap zen hen abe hap denaka ale gulku.*

47 Hwëna em ema baes ta gwenan- Musa mo ola insa de taïblïbin hipye. Zep kire zini banakan dep?- ano olsa de hen taïblïbin niye!"

6

Yesus kim lima ribukam de zi beyam-bya hap tembanena golzïmkike:

(Mat. 14:13-21; Mrk. 6:30-44; Luk. 9:10-17)

* 5:46 5:46 Kej. 3:15; Ul. 18:14-22 * 6:7 6:7 "Te-ala de mam tangan" kam, Yohanis man ale gulku "dua-ratus dinar" kam. Te-alana dinara zen zëno mae mo perak tangankam de te-ala kaso, hen zen dekam anakarekam de aïtbin: Zi de aha-ere yakla blalkam syal gwenna, zëno gajina dekam aha-ere dinarkam de golblan. Zep dua-ratus dinara, zen te-alana mam tanganna- san de dua-ratuskum de zi mo aha-ere yaklakam de syal tan gajina kiye. † 6:9 6:9 Mensa awe "roti" kam li nul sonek, desa Yohanis "barli nakore roti" kam ale gulku. Kire rotina, zen gandum nukore naka hom. Gandum nukore rotina, zen aïrïs. Barli nakorena, zen tahalha zi mo tembane.

1 Aha yaklakam, Yesus ki zep Ho Gutuna Galilea san asa bulkum golëblan kinika. Ho gutuna in mo aha bosena Tiberias.

2 Hwëna zi beyana dekam zep tanakam bul lë ta gwen san dep hles dyablak, sap zen mes zëno owas-owas syal gwibinni hla nul gwëk- zi sang-sangna kim dawem ta gwibirkike.

3 Zao zep Yesus kwatap teknak asa golësesek gwe seka, ki zep zë asa golëteinikin'inka.

4 Dekam Yahudi zi mo yakla yala Paskanak dep man golek de gwe'ak.

5 Yesus kim men-san an-sankam zi beyam-byana insa kara tabirida ine guk gwe'anka, dekam zep Pilipussu takensïblika, "Endawe esa tembanena lop lal?- dekam de zi beyam-byana ansa sul sonen hapye."

6 Zen mae hap kirekam Pilipussu takensïblika- dekam de anakan akasïblin hap, "Zen banakan wëhë Asa ding gulblu'anka?" Hwëna Yesus Zëna mes sap hamal hap anakan enlala gwëka, "Ëe kirekam de owassa asa syal gwibir-zim."

7 Pilipus dekam zep ding gulbluka, "Nëno mae mo te-ala de mam tangankam lwa'anam, dekam de tembanesa kap tankam, dekam molya hen su kul sone'anam- sap betek maekam de golëtembane tan hapye." *

8 Hwëna ki zep ëre mae mo wal bosena, Petrus mo osona Andreas Bak Yesussu gubluka,

9 "Awe ki walas tola. Zëno rotina sap ki- aha-ere taha-tap enkam, hen hogwena dan. Hwëna zen tol waba hap. An zini tra tangan nakake." †

10 Ki zep Yesus asa gubiridaka, "Teinikirin hip enbiridak." Langna in so naban. Zao zep ki teinikink.

Zi enna kim näitbik, beyana san ha lima ribu enkam mes yap- we wal walassa de äitbin srëmkam.

¹¹ Yesus ki zep rotina insa lop ta ineka, depan zep dawemsa Alap hap golblaka, ki zep hwëna zi beyana in hap dikim kae gweb-la-zimdin hip asa gubiridaka. Hogwe darena insa hen kirekam. Kim dwenblanda gwe'ak, hëndep man tangan ëitri gwek.

¹² Kim tingan ëitri gwek, ki zep asa gubiridaka, "Dekam mosrona tagam lasik. Betek en maekam bap zen zalta dep ërlwa kinin."

¹³ Sap rotina dan en hen zini tra tanganna, hwëna mosrona kimë tagam lasik, yuna dua-blas enkam zep ësuwek.

¹⁴ Zi beyana in kim owasna insa hla nuk, ki zep ëguk, "An Zenke-Alap mo olsa de ayang gul gwen hap de zer sonen zini, mensa nen kara ë gweblananye."

¹⁵ Yesus kim tame gulku, "Zen angkam man Asa de tik-tik tan hap ëalp gwe'an- dekam de zëbon mae onak teipsin hip," dekam zep kon kwatap-tek kwatap-tek san dep zë-en ahulsuk halka.

Yesus kim ho gutu tahan san song gwe'an zakake:

(Mat. 14:22-33; Mrk. 6:45-52)

¹⁶ Kim kam-en gwe'ak, ki zep ë zëre hon de ang ta gwen weny bul syap san tine gwek,

¹⁷ ki zebë kon hëndep Kapernaum sun dep etan lwan dahak. Zao zep hëndep Yesus mo hatazan srëmnak asa kawesibiridak.

¹⁸ Hwëna dekam zep asesena mamkam tai'inka. Ho gutuna in dekam zep mamkam ngëp-ngëp gweka.

¹⁹ Ëe mesë dekam hoskam bulu insa ata ul song gwe'ak- langana san ha lima ahaksa enam kilometer enkam, hwëna ki zebë Yesussu hla la guk. Ho gutu tahan san song gwe'an zaka, hëndep asa golek de tabi'in zaka. Ki zebë sërkam ëairi'ak.

²⁰ Hwëna ki zep asa gubirida kinzika, "Bahem ëairin! Ëe an Ëe."

²¹ Dekam zebë bulu in kon aha-ere enlala naban eirink. Hwëna hëndep dekam zep bulu in owas hap Kapernaumk hatak.

²² Ka'ankam, zi beyana in zen ho gutu men eihtanak lowehék dekam zep dam nulsuk, "Bulu ir aha-enke, hen Yesus hom am zëwe ang gwera-zëre hon de ang ta gwen weny kim bulu inkam sek gwerye. Yesussu man-am hli dal."

²³ Hwëna ahakore bulu, ëna Tiberias korena, dekam zep yaing gwezak- langna men zëwe ir Yesus golëtembane tan nakon dawemsa Alap hap rotina in hap golblakake.

²⁴ Kim dam nulsuk, "Yesus hen zëre hon de ang ta gwen weny hom awe lowe he'an," dekam zep bulu inkam Kapernaum sun dep sek gwek- zao de Yesussu tëblan hap.

Yesus kim gubiridakake, "Ëe an ngaya gwen hap de tembanena Zen."

²⁵ Zi beyana in kim Yesussu hla danak, zao zep dakensiblik, "Guru, em bawalkame awe hatala?"

²⁶ Ki zep ding gulzimki, "Eiwa denakaë emsa gubirida'an: Em tembane en habe asa lëbla'an, sap ir rotikame ëitri gwek. Eno mae mo anakare enlalana hom, 'Zëre mo owas-owas syal gwibin nikonë anakan dam lasi'in, "Zen an Zen-mensaë kara ë gweblananye."'

²⁷ Bahem angkam en dep de tembane hap syal ta gwen, sap zen ëbatrenkam. Diki hëndep de ëlwa gwen hap de tembane hap emki syal ta gwen. Ëe, ngatan zi mo lang nakore Zi Tanganna, Ëe amaka kirekam de tembanena insa ebe mae hap golzim'in. Sap abe hap dena mes tangan dam gwesik: Alap kire hap Asa zer soneka."

²⁸ Dekam zep dakensiblik, "Ki hwëna ëe banakan asa syal tal?- Alap dikim asa sam gwesibiridan hap, hen dekam de hëndep de tembanena insa gul irin hipye."

29 Yesus ki zep ding gulzimki, "Syala in, a desa mo Alap ebe mae hap dwam gwibir-zim'ira: Asa em anakan taibliblan, 'An Zen- nesa de ngaya tabin hip de Zini, mensa Bian zer sone zakaye.' "

30 Dekam zep ding nulblik, "Ki banakare owassa esa abe mae hap goltreizimdi? Desa de hlaunkum amaka emsa laiblibla'an. Banakarekam esa ap syal gwibir-zimdi?"

31 Musa kim sasa langnak golëgwë gweka, zen owaskam nëno mae mo auyan-aza hap tembanena bosena 'manna'sa gol gwizimki. Men kirekam Alap mo olak lwak,

'Zen ngatan zi mo lang nakore tembanesa gol gwizimki.' "

32 Ki zep ding gulzimki, "Eiwa denakaë emsa gubirida'an: Musa Bak ngatan zi mo lang nakore tembane tangansa hom gol gwizimki. Diki ano Bian, Zen angkam ngatan zi mo lang nakore tembane tangansa ebe mae hap golzim'ira.

33 Sap Alap onakore tembane tanganna, zen diki Èe an Zen tangan. Sap Èe ngatan zi mo lang nakonë ati gwezak- dekam de ëngaya gwen hap denaka okamanak de zini ebe mae hap golzimdin hip."

34 Ki zep nenblak, "Bian, tembanena in desa ap golzim tine gwe."

35 Ki zep ding gulzimki, "Èe an Zen- ëngaya gwen hap de tembane naye. Zini men zen Abon yaïng gwe-gwe'anzak molya etan ëusak gwe-gwek, hen men zen de Asa daibli gwelbla'ak zen molya etan ëho-hole gwe-gwek.

36 Hwëna men kirekamë emsa gubirida gwëk, em sap ema Asa hla la gwenan, hwëna home Asa laiblibla'an.

37 Tingare zini mensa Bian abe hap lup gulblu'ara, zen sa Abon yaïng gwe-gwezal. Men zen Abon yaïng gwe-gwe'anzak, Èe molyë desa lup gulin srëm gwe-gwek.

38 Sap Èe ëre mo dwam gwibin sin de syal gwen hap homë ngatan zi mo lang nakon hatazak. Hwëna diki Bian mo dwam gwibin en san dikim syal gwen habë hatazak.

39 Bian men Zen asa zer soneka, zëno abe hap de dwam gwibir-blinna an zen: Men desa Zëna abe hap lup gulbluka, Èe babë desa aha-en mae syauk sun dep de ora san de gwë hannak kara ta sonen. Hwëna diki aumwa hap de yaklanak asa kitak tin nikon ngaya tabir.

40 Zen zep tïngan men zen de Tane zem Asa hla da gwe'ak hen daibli gwelbla'ak, zen zen- hëndep de lowehen hap de wenyaye. Zen desa asa aumwa hap de yaklanak ngaya tabir. Ano Bian mo dwam gwibinni zen kirekam."*

41 Yahudi zi mo mam-mamna men zen hen zi beyana iwe ang ta zak, zen dekam zep donsuk gwelbla'ak-insa anakan gubiridakake, "Èe an Zen- ngatan zi mo lang nakore tembane naye."

42 Man ëgu gwe'ak, "Yesus an dwan Yusup Bak Swe mo tane sake. An-bi zemka ëe kië tawa eizimk. Zen ba hap anakan gu gwe'ara?- 'Èe ngatan zi mo lang nakonë ati gwezak.' "

43 Dekam zep gubiridaka, "Asa de tonsublunna in olzausuk.

44 Sap zini bëjen Abon totoresa hatazan- ëre mo Bian de zon tazan srëmkamye. Aumwa hap de yaklanak Èe asa desa en ngaya tabir.

45 Sap Alap mo ol ayang gul gwen zini man ale nuk,

'Alap sa tïngare zini tawa tabiri.'* Zen zep tïngan men zen Zëbon onak ësane gwe-gwenan hen dekon ëtawa gwe-gwe'ak, zen zen sa Abon yaïng gwe-gwezal.

46 "Hwëna ano ola in bahem tim gun, 'Zini Biansa nwekam hla tankam.' Diki Èe an Zen aha-en-nwekam de hla ta gwen hap de Zini, Zëna men Desa zer sonekaye.

* 6:31 6:31 Kel. 16:4; 16:15; Neh. 9:15; Mzm. 78:24-25

* 6:40 6:40 Yoh. 3:14-15

* 6:45 6:45

Yes. 54:13

47 Eiwa denakaë emsa gubirida'an: Men zen de Asa daiblibla'ak, zen mes hëndep de ëngaya gwen hap dena nulin.

48 "Ëe an Zen- ëngaya gwen hap de tembane naye.

49 Eno mae mo auyan-azana ki tembane bosena mannana sasa langnak dwenblanda gwek. Zen sap man desa dwenblanda gwek, hwëna dekam nama juwe gwek.

50 Hwëna awe ki gwë'ara- eiwakam de ngatan zi mo lang nakore tembane tangan naye. Desae olgwenbi'ik, dekam molye juwe gwek.

51 Ëe an Zen- ëngaya gwen hap de tembanena in, ngatan zi mo lang nakon de ati gwezan Zi niye. Men zen de tembanena ansa dwenbla'ak, zen zen sa hëndep denaban ëngaya gwer. Tembanena in, an zen: Ano timni- men desaë okamanak de zisi dikim ngaya tabin hip sosok gu'ukye."

52 Yesusu kim kirekam nasalblak, dekam zep zën ëol tetek gwe'ak-mae hap, "Zini in banakan sa zëre mo timni nöp golzimdi?- nen de twinbin hipye."

53 Etan ki zep gubiridaka, "Eiwa denakaë emsa gubirida'an: Eme ngatan zi mo lang nakore Zi Tanganna ano kalaka otdebir srëm gwe'ak, hen ano tim nika olgwenbir srëm gwe'ak, ki ngaya gwen hap dena hom ebon mae onakye.

54 Zi de ano tim nika twinbinni hen ano kalsa otdebinni, ki zëbon onak ki lwa'an- ëngaya gwen hap denaye. Hen desa asa ngaya gwen hap luwen tabirzir- aumwa hap de yaklanakye.

55 Sap ano timni zen eiwakam de tembane tangan. Hen ano kala zen eiwakam de hona zen- dekam de ëngaya gwen hap denaye.

56 Men nara ano tim nika twinbinni hen ano kalaka otdebinni, zen aban zeraha-en gwe'ara, hen Ëe dekam ama deban zeraha-en gwë'an.

57 "Ano Bian, Zen ngaya gwen hap de ausuna Zen. Zen Asa

zer soneka, hen Ëe Zëbon onakonë ngaya gwe'an. Zen in zep hen kirekam, zini men zen de ano tim nika dwinbi'ik, zen sa Abon onakon ëngaya gwer.

58 Zen in zep, ngatan zi mo lang nakore tembanena, zen auyan-aza mo twenblanda gwen tembane makan hom. Desa kim sap dwenblanda gwek, zen hwëna nama juwe gwek. Hwëna ngatan zi mo lang nakore tembane tangansa de twenblanna, dekam hëndep denaban esa lowehe gwer."

59 Zen Kapernaumk de but srëm golak kirekam tawa tabirki.

60 Zi beyana in zen nërtro nasen gwe'ak kim kirekam de tawa tabinik sane dak, beya nik zep ëguk, "Ola an gwa-gwa tanganna. Bëjen dam gulsun."

61 Yesus hwëna man kitak ano mae mo enlalana insa hla tazimki, ki zep asa kitak gubiridaka, "Em ema yap ano ola insa husus eibir.

62 Ki banakan esa ëenlala gwer?- em de Asa gulk sun de sewe sennak anakan kara ta sonenkam, 'Ngatan zi mo lang nakore Zi Tanganna hare man-am angkam sewe se'ara- men zao nonol gwë gwekake, desan dep.' Ki dekam banakan esa Asa enlala ëblal?

63 Alap mo Enhona, Zen Zen zi hip ëngaya gwen hap dena gol gwizimnira. Zi mo sosonna, zen waba hap. Ola insa emsa gubiridal, zen Alap mo Enho nakorena hen emsa dikim ngaya tabin hip dena.

64 Hwëna Ëe tawana: Em ahakon home Asa laiblibla'an." Yesus kirekam gubiridaka, sap Zen nonol lonesen nakon mes ki tawa gwibiridaka, "Zini an zen sa Asa daibliblal. An zen sa Asa daiblibla srëm gwer." Hen Zen mes aha zini insa tawa gwe gubluka, "An zen sa Asa zergulu."

65 Yesus dekam zep etan mas gulzimki, "Zen in zebë hen emsa gubiridak, 'Zini bëjen Abon hatazan- Bian de gublun srëmkamye.' "

Petrus kim damnak Yesusu anakan gublukake, "Em an Zen- Alap

mo zer sonen Zi niye."

⁶⁶ Dekam zi beyana in zen nërthro nasen gwe'ak, beya nik zep hli dak. Hom etan ang nëblak.

⁶⁷ Yesus dekam zep dua-blaskam de ang ta gwen wenya asa takensibiridaka, "Em san ha hen ema Asa de hli tan hap ëdwam gwe'an?"

⁶⁸ Simon insa hen nen gweblak "Petrus" kum ki zep ding gulbluka, "Ëe etan nara hon dep de sek gwen hap? Sap hëndep de ëngaya gwen hap de ola, zen Ebon en am lwa'an.

⁶⁹ Hen ëe mesë Emsa anakan laïblihlak, 'An Zen tangan- Alap mo zer sonen Zi Lalak naye.' "

⁷⁰ Yesus ki zep kitak ap ding gulzimki, "Aenë sap emsa dua-blaskam dam tasibik, hwëna ebon mae onakon ahana zen dowal mo bi gweblanna."

⁷¹ Yesus mensa enlala gweblaka, zen ëna Kariot walya Simon Bak mo tanena Yudassa. Zen sap dua-blaskam de zini ano mae mo ahana, hwëna zen ki hëndep Yesussu zer-guku.

7

Yesussu kim oso wal zem daïblihla srëm gwekke:

¹ Zao kim hya gwesik, Yesus ki zep asa Galilea mo langnak de ë-ë san ziamjanbir song gweka. Zen hom Yerusalem mo langnak de ë-ë san dekam asa ziamjanbirki, sap Yahudi mo mam-mamna dekam man tan hap orasa dëbla'ak.

² Dekam Yahudi mo yakla yalak dep man golek de gwe'ak- men dekam kluk-kluk golak lowehe gwenanke. *

³ Zep oso wal zem yasik tan ola anakan nenblak, "Em ba habe awe gwë'ara? Yerusalem mo lang san em song gwen- zao deka ere hon de ang ta gwen wenya in eno owas syal gwibinni insa kara nul gwek.

⁴ Eme anakan enaka enlala gwebla'anam, 'Dikire kitak asa tawa nëblak,' ki bahem awe en aningkim syal gwe-gwen. Em in dekam de teipsin hibe syal gwe'ara, ki emki enaka tingare zi hip zertrei gwizimdin."

⁵ Zen sap oso wal zem, hwëna zen hom anakan daïblihlak, "An Zen- nësa de ngaya tabin hip de Zi niye." In zep kirekam yasik dak.

⁶ Hwëna man ding gulzimki, "Angkam abe hap de yaklanak hom zau'un- mensa Bian abe hap dam tasiblikaye, Ëe dikim desan song gwen hapye. Hwëna em totoresa sap esa sek gwe-gwer.

⁷ Auhu-kama enlala zini zen molya emsa husus neibiridak. Hwëna Asa en man husus në gweblanan, sap Ëe ama gubirida gwenan, 'Em in kareksae ol gwenan.'

⁸ Amki e-en Yerusalem san yakla yala iwe dep zahe gwek. Ëe homë zahe'an, sap ano kire hap de yaklanak angkam hom zau'un."

⁹ Zep Zëna hom ang gweka. Zen man Galileak gwëka.

Yesus kim lun aningkim yakla yala iwe hatakake:

¹⁰ Oso wal zem in kim yakla yawala in san dep ëgwahak, hwëna Yesus Zëna lun kon zep sowëkam golëtroka- zi de tawa gweblan srëm hap.

¹¹ Yakla yawala iwe Yahudi mo mam-mamna man zë dë gwebla'ak, hen dakensibli nasen gwe'ak, "Zini in endawe gwë'ara?"

¹² Zi beyam-byana in dekam man zënaka aningkim nulsuk halasen gwe'ak. Sap ahakon man anakan sam neisik gwebla'ak, "Zini in dawem nakake." Hwëna ahakon man ëgu gwe'ak, "Dawem naka hom. Zen nësa yasik ta gwibirida."

* **7:2 7:2** Gol kluk-kluk hap de yakla yala, Yahudi zini dekam aha-ere minggukam gol kluk-kluknak lowehe gwek- dekam de auyan-aza zemka anakan enlala gwibiridan hap, "In kim Mesir kon sek gwezak, dekam anakare gol kluk-kluknak lowehe song gwezak." (Im. 23:34-36; Ul. 16:13-15)

13 Hwëna men zen kirekam sam neisiblik zen hom damnak kirekam ëgu gwe'ak, sap zen Yahudi mo mam-mam naka naïribirida gwek.

14 Yakla yawala in holona aha-ere minggu. Ngirïn ngam sonnak kim zau'uk, Yesus ki zep Alap mo golak tïl zïka, ki zep zë zi beyam-byana insa tawa tabi'inka.

15 Yahudi mo mam-mamna dekam zep anakan dengganbla'ak, "Zini an hom sekola gweka. Zen ba nakon kire tangankam tawa gweka?"

16 Yesus ki zep ding gulzimki, "Ola mensaë tawa ta gwibirin, zen ëre onakore naka hom. Zen Alap, men Zen Asa zer soneka, Zëbon onakore naka.

17 Zini men zen Alap mo dwam gwibin sin de ang tan hap ëhohle gwe-gwenan, zen sa anakan dam nulsuk gwer, 'Tawa tabinni an eiwa Alap mo dwam gwibin sin,' ahaksa, 'Desan hom.'

18 Zini men zen zëre mo enlala gwibinsi tawa da gwibirin, zen anakan ëdwam gwe-gwenan, 'Ano bosesa dekakim teip nulsuk gwek.' Hwëna men zen anakan tawa da gwibirin, 'Asa bahem boltere tan. Diki men zen asa zer sonekake, desa en em boltere tan,' kire zini zen enlalana dam-damna hen zen bëjen yasik tabin. Zep Èe an hen kirena.

19 Eiwa, Musa Bak waba tangan hap tïti tabin ola insa ebe mae hap golzimki, hwëna em ema kitak ngip ul gwenan. Em ba habe Asa tan hap kalang ëbla'an?"

20 Zi beyana in dekam zep ding nulblik, "Emsa in dowal tïlblila! Nara emsa tan hap kalang gwebla'ara?"

21 Yesus ki zep ding gulzimki, "Èe aha-ere owassaë Hari Sabatnak syal gwibik, hen em dekam ema lenggan gwibik.*

22 Hari Sabatna, zen sap nëno mae mo syal srëm hap de yakla, hwëna em dekam kie zi walas mo to mipna blom lasik gwibirin- men kirekam Musa Bak tïti tabirkike. Hwëna sap to mip blom tasibin hip dena, diki ausuna Musa hon hom. Zen diki orep de auyan-aza kirekam tïti da gwibik. †

23 Em zebe Hari Sabatnak zi walas mo to mipna blom lasik gwibirin-dekam de Musa mo tïti tabin ola insa ngip gun srëm hap. Zen in zep bahem Asa jal gweblan, sap ëe ama zi mo tingare timsi owaskam Hari Sabatkam oto gulsubluk.

24 Asa de langa nakon kara tan enkam, bahem na-en Asa anakan ti yulsuk gweblan, 'Zen man Musa mo tïti tabin olsa gulmun gwenda.' Diki enlala dam-dam enkam em abe hap dena anakan klis gul gweblan, 'Zëno syala in dawemna,' ahaksa, 'Karekna.' "

Zini kim zënaka dakensibirida nasen gwe'akke, "Yesus in diki san ha Zen mes yap?- Israelsa de ngaya tabin hip de Zi niye."

25 Ahakon Yerusalemk de zini dekam zep zënaka donbirida nasen gwe'ak, "Zini in zen- mensa nëno mae mo mam-mamna tan hap dëbla'anye.

26 Hwëna emki kara tan! Zen damnak zi beyanak tonbirida'ara, hen mam-mam wenya hom jalse nëbla'an. San ha zen mes anakan dam dasil?- 'Zen eiwa nësa de ngaya tabin hip de Zini Zen.'

27 Hwëna san ha diki Zen hom yap? Sap ngaya tabin hip de Zini in de ngatan zi mo lang nakon ati gwenan zanam, nen ki molye zëno ëna tawa ëbla'anam. Hwëna Yesus zen Nazaret wal syake."

28 Zen in zep Yesus kim Alap mo gol teksonnak tawa tabi'inka

* **7:21 7:21** Yoh. 5:1-9 † **7:22 7:22** Musa mo tïti tabin olak, zi walassa de jaha gwen hap dena man anakan lwak: "Aha-ere minggu de tamaran, dekam de to mipna blonsublun." Zep Hari Sabatkam de jaha gwennak de walasna, desa hen zao de Hari Sabatnak de to mipna blonsublun. Zen desa Musa mo ol san ki syal nei gwibik. Hwëna Musa mo aha tïti tabin olak man sap jalse gwek, "Hari Sabatnak bëjen ba maena toman maekam syal gwibin." Yahudi mo auyan-azana kim nonol Musa de gubiridan srëmnak kirekam syal neibik, emki Kej 17:9-27nak hlaun.

ol mam-mamkam tonbiridaka, “Em ema tim ul gwenan, ‘Èe zini insa ama tame la'an, hen zëno ëna kië tawa ëbla'an.’ Hwëna Èe totoresa homë ère mo enlalakam hatazak. Men Zen Asa zer soneka, Zen eiwa taïbliBlan tanganna. Hwëna em home Desa tame la gwe'an.

²⁹ Hwëna Aena kië Desa tame tak, sap Èe Zëbon onakonë hatazak, hen Asa Zen zer soneka.”

³⁰ Dekam ahakon balk tan hap sap ëakasik, hwëna hom mae banakan mae nëblak. Sap dekam kirekam de gwëblan hap de yaklana mensa Bian dam tasïblika, zëwe hom zau'uk. Zen in zep dekam balk da srëm gwëk.

³¹ Hwëna zi beyana in kon hen beya nik daïbliBlak. Zen man ëgu gwe'ak, “Nësa de ngaya tabin hip de Zi de ahanik hata'anaka, Zen banakan sa Yesus mo owas syal gwibinni ansa gulmunblula?”

³² Farisikam de gubirida gwen zini kim kirekam nasalbiridak, dekam zep apdekam Alap mo golak de syal tan zi mo mam-mam naban Alap mo golsa de kara gul gwen hap de jana nabare zini lup nul sonek- zen de Yesusu balk tan hap.

³³ Hwëna zen hen hom dekam balk dak. Yesus dekam zep zi beyana insa gubiridaka, “Èe molyë holokam eban mae golëlowehe gwëk. Nabakam asa etan lwahal- Zini men Zen Asa zer sonekake, Zëbon osan dep.

³⁴ Em dekam esa Asa lë gweblal, hwëna molye Asa hla la gwëk. Sap men zaoë dekam gwë gwe'ak, em molye desan Asa ërtrok.”

³⁵ Yahudi mo mam-mamna dekam zep zënaka dakensibirida gwe'ak, “Zini an endan lang san de song gwen hap ki gulu?- nen de zëwe hla tan srëm hapye. San ha Yunani mo lang san de song gwen hap?- men desan ahakore Yahudi zini sekwak

gwenkam lowehen da'anke, zao de Yahudi srëm zisi tawa ta gwibin hip.

³⁶ Ba hap ki gulu?- ‘Em dekam esa asa lë gweblal, hwëna molye asa hla lak. Sap men zaoë dekam gwë gwe'ak, em bëjen zao yaïng gwen.’ ”

Èngaya gwen hap de ho hap de ol:

³⁷ Yahudi mo aha-ere minggukam de yakla yala iwe, aumwa hap de yaklana, zen zen- mam tanganna. Yesus dekam zep Alap mo golak zauku, dekam zep ol mamkam tonbiridaka, “Zi de ho-hole gwenna, dikire Abon oden hap yaïng gwëgwëzak.

³⁸ Men kirekam Alap mo olak lwak, zini men zen de Asa daïbli gwebla'ak,

‘zëno mae mo enho nakon sa ngaya gwen hap de hona ana gwëse gwer.’ ”*

³⁹ Hona insa enlala gwibirki, Zen Alap mo Enhosa. Zi de Yesusu taïbliBlankam, dekam de zëbon ing gwe heblan. Hwëna in kim gubiridaka, dekam hom ing gwe hezim'inka, sap dekam Yesus hom ti'inka- Alap dikim teipsinkim drënen hapye. †

Yesusu de taïbliBlan hap kim ëhliwëkke:

⁴⁰ Zi beyana in kim kirekam nasalblak, ahakon dekam zep ëguk, “An diki Zen- Alap mo olsa de ayang gun hup de Zini, mensa Musa hamal hap gu-guk gwëblakaye.”

⁴¹ Ahakon hen man ëguk, “Zen an Zen- Israelsa de ngaya tabin hip de Zi niye.”

Hwëna ahakon man ding nulzimk, “Bëjen. Hom anakan nen guk gwëblak, ‘Zen Galilea wal hap sa jowe zala.’

⁴² Sap Alap mo olak man-am lwak, ‘Nësa de ngaya tabin hip de Zini, Zen Daud Bak mo ausu nakon sa saltïli, hen Daudsa de jaha gwëblan

* 7:38 7:38 Yes. 58:11 † 7:39 7:39 Orep, Yesus de hatazan srëmnak, Alap mo Enhona sap ki syal gwëgwëka. Hwëna dekam Zen hom holokam zisi bi gwibirida gwëka. Alap kim Yesusu teipsinkim drë neka, dekam zep Alap mo Enhona kon gwesibirida hanaka- zisi de holokam ing gwe hebirida gwenkamye.

ëna Betlehemk sa hen Desa jaha gwer.' " §

⁴³ Zen kire nakon zep ëhliwek.

⁴⁴ Ahakon sap dekam balk tan hap dwam nëbla'ak. Hwëna zen hom mae banakan mae nëblak.

⁴⁵ Alap mo golak de jana nabare zini in dekam zep etan lwanda halzak. Men zen lup nul sonek* dekam zep dakensibiridak, "Em ba habe balk la halza srëm gwer?"

⁴⁶ Hwëna man ding nulzimk, "Kire zini san ki balk da gwenan? Zëno ola dawem tanganna. Aha zi mo ol toranna hom- kire naye."

⁴⁷ Dekam zep jala ban ding nulzimk, "Asya! Emsa in hen mes yasik tabiri!

⁴⁸ San ëe kië Yahudi mo mam-mamna hen Farisikam de gubirida gwen wenyaha-en mae laïbli'bla'an?!

⁴⁹ Hwëna zi beyana an Musa mo titi tabin ola hom tame nul gwenan, zep zen kitak syauk sun dep sa sek gwer!"

⁵⁰ Hwëna Farisi walya Nikodemus Bak zao hen gwë'anaka- men zen Yesussu nonol zini takake. Zen dekam zep wal bosa wal zemka gubiridaka,

⁵¹ "Nëno mae mo titi tabin olak Musa man nëp ale gulzimki: Nen bap nen totesa zisi gublun, 'Zen karekna.' Diki nonol taken-taken gweblankam. Karekna kim hlaublunna, zen dekam de karek tan."

⁵² Hwëna man ding nulblik, "Ki san em hen Galilea wal?! Emki Alap mo olak teibin. Zao hom anakan ale nuk, 'Alap mo olsa de ayang gun hup de zini Galilea mo lang nakon sa jowe zala.' "

Kahalo gwen wenyaha kim Yesus hon nolhata zakke:

[

⁵³ Dekon kim ëhya gwesik, ki zep gol san dep sekwak gwek.

8

¹ Hwëna Yesus Zëna dekon zaitun tra nabare kwatap tek san zep asa golëzahe gweka.

² Ka'ankam orap tola ban zep etan Alap mo gol san dep asa golësek gweka. Zi trana kim etan tagal nëblazak, Yesus Zëna dekam zep nikin aneka- dekon de tawa tabin hip.

³ Farisikam de zini Musa mo olsa de tawa ta gwibin hip de zi niban ki zep hen wenyaha nolhatazak, ki zep tingare zi mo nwenak de zaun hup tik-tik nuk. Zen kahalo gwennak balk nuk.

⁴ Ki zep Yesussu nenblak, "Bian, wenyaha an kahalo gwennakë balk ul halanzal.

⁵ Nëno mae mo titi tabin olak Musa Bak man nësa gubiridaka, 'Kire wenyaha em kasokam tok hap i ti gibin.*' Hwëna eno tawa tabin nikon, kirenak de balk gun wenyaha nen banakan esa eibir?"

⁶ Zen kirekam mae hap ki dakensiblik, sap zen mes aningkim ola aha-en nuk- Yesussu dikim anakan akasiblin hap, "Zëno tawa tabin nik de Musa mo titi tabin ola ban apde nën srëmkam, ki esa karek lal." Hwëna Yesus man huwe heka, ki zep kamanak de sonnak taha bolkam ale gul gwe'anaka.

⁷ Hwëna zen dekam nama henhenkam dakensik gwebla'ak, ki zep hëndep dam-dam gwe seka, dekam zep gubiridaka, "Men zen de zënaka enlala gweblak, 'Eë homë aha-en mae karekna gok,' zen zen de nonol kasokam gwik."

⁸ Kim kirekam gubiridaka, ki zep etan sonnak de ale gun hup huwe heka.

§ 7:42 7:42 Man sap Yesussu tame dak, "An Nazaret wal syake- Galilea mo lang nakore zi." Hwëna hom anakan tawa nëblak, "Desa Betlehem jaha gwek." Eëna Betlehem in, zen hwëna Yerusalem mo langnak. Alap mo olsa de ayang gul gwen hap de zini Mika mes ki hamal hap ale gulzimki- Desa de Betlehem jaha gwen hap denaye. (Mik. 5:2; Mat. 2:4-6) * 7:45 7:45 Men zen lup nul sonek, emki Yoh. 7:32nak hlaun. * 8:5 8:5 Ul. 22:23-24

9 Kirekam kim Yesussu nasalblak, ki zep aha-en aha-enkam teso gwe-gwe'ak- hëndep kitak sekwak gwek. Bong-bongkam de wenya, nonol zen teso gwek. Hëndep Yesus ensa zep zë hli dak. We enna in nama zë zau'uk.

10 Ki zep etan dam-dam gwe seka, dekam zep gubirki, "Zini men endawe? San ha emsa de karek gun hup de wenya in mes kitak sekwak gwer?"

11 Ki zep ding gulbluk, "Mes, bian."

Ki zep hwëna gubirki, "Ëe hen homë emsa karek gu'un. Sap esa song gwer, hwëna bahem etan karekna gon."]

Yesus kim gubiridakake, "Ëe an okamana an hap de ngatanna Zen."

12 Etan kim zi beyanak asa golëgwë'anka, ki zep zë gubiridaka, "Ëe an okamana an hap de ngatanna Zen. Zini men zen de Asa ang në gwebla'ak, zëbon mae onak sa ëngaya gwen hap de ngatanna zil ine gwer. Zen molya kawesinnik lowehe gwek."

13 Farisikam de zini in zen zë hen lowe he'ak, ki zep nenblak, "Em e-en tangane ki kirekam asa gubiridanda. Diki aha zi de eno olsa tril senkam bap, ki amaka emsa laiblibla'an."

14 Ki zep ding gulzimki, "Ëe, zi de Asa tri tasen srëmkam de kirekam gubiridanna, ano ola in nama eiwa dena. Sap Ëe tawana- men dekonë hatazak hen men zao debë lwa ha'ak. Hwëna em desa tawa naka hom."

15 Em in kirekame ëgwë gwenan: Zisi nabakame enbirida gwenan, 'Em mese karek gwer.' Hwëna em in auhu-kama zi mo enlala en sane klis ul gwenan. Hwëna Ëe angkam zisi homë klis gu'un.

16 Hwëna Ëyë klis gu'unam, zen eiwakam sa ki lwal, sap Ëe A-en homë kirekam syal gwe-gwe'an. Bian men Zen Asa zer soneka, Zen aban zersyal gwe'ara.

17 Nëno mae mo titi tabin olak man lwak, 'Zi dare mo kira ën ol de apde nënna, amki laiblizimk.'*

18 Ëe an ëre hap denaka emsa gubirida'an. Ano Bianna men Zen Asa zer soneka, Zen hen man ano ola an trilse gwe'ara. Zep Ëe Debanë dan ë gwe'an."

19 Ki zep dakensiblik, "Eno bianna in endawe?"

Ki zep ding gulzimki, "Em home Asa tame la'an hen home ano Biansa tame la'an. Asae tame la'anam, ki emaka hen ano Bianna tame la'an."

20 Zen kirekam gubiridaka- Alap hap de te-ala ing gul gweblan teksonnak kim tawa tabi'inkaye. Dekam hen hom balk dak, sap kire hap de yaklanak hom dekam zau'uk.

Yesus kim etan gubiridakake, "Men zao debë song gwe'ak, em molye desan Asa ërtrok."

(Yoh. 7:34-36)

21 Etan ki zep Yesus gubiridaka, "Ëe asa song gwer. Em esa Asa lë gweblal, hëndep zao esa ere mae mo karek-karek naban oltil. Sap men zao debë song gwe'ak, em molye desan Asa ërtrok."

22 Yahudi mo mam-mam wenya men zen ësane gwe'ak dekam zep zënaka dakensibirida'ak, "San ha zen man zënaka de tan hap enlala gwe'ara?- in zep ki gunda, 'Men zao debë song gwe'ak, em molye desan asa ërtrok.'"

23 Yesus ki zep ayang gulzimki, "Em an auhu-kamana an kore zi. Ëe an gulk korena. Em in okamanak de ësaltin zi. Ëe dekore naka hom."

24 Zen in zebë emsa gubiridanan, em esa ere mae mo karek-karek naban oltil. Zen kirekam sa ebe mae hap lwazim- eme Asa laiblibla srëm gwe'akye. Sap Ëe an Zen- mensa ena kara ë gweblakye."

25 Dekam zep jala ban dakensiblik, "Zep ki em an nara mo weinak dep de zi?- zebe kirekam enaka gu gwebla'araye."

* 8:17 8:17 Ul. 17:6; 19:15

Ki zep ding gulzimki, “Men kirekamē nonol lonesen nakon emsa gubirida gwek, zen kirekamke.

²⁶ Ano ola ebe mae hap dena nama beya tanganna- dekam de eno mae mo karek-kareksa goltrei gwizimdin hip denaye. Ano Bianna Zen taïbliBlan tanganna, hen men desaë Zëbon onakon sane gwe-gwe'an, zen desaë okamanak de zini ebe mae hap ayang gul gwizim'in.”

²⁷ Zen hwëna hom zëno ol-gunnu insa anakan dam nulsubluk, “Zen ngatan zi mo langnak de Bian hap denaka ki gunda.”

²⁸ Zen in zep ki Yesus anakan gubiridaka, “Em kime ngatan zi mo lang nakore Zi Tanganna Asa gulk makan la in'ik, zen dekam esa anakan Asa dam lasil, ‘An eiwa Zenmensae kara ë gweblakye.’ Em dekam esa Asa anakan tame lal, ‘Zen hom zëre en mo bose hap ba maena syal gwibirki. Zëno tawa tabinni zen eiwa kitak Bian onakorena.’

²⁹ Bian men zen Asa zer soneka, Zen aban zersyal gwe-gwe'ara. Bian hom Asa da tasik gwenda, sap ano syala man sam gwesik gwibirida.”

³⁰ Kirekam de torannak kim sane da'ak, dekam zini beya nik zep daïbliBlak.

Yesus kim gubiridakake, “Em kime eiwa dena tame u'ik, zen dekam esa aha mo emsa de jap gul sonendan nakon ëhil gwe hanal.”

³¹ Men zen Yesusu daïbliBla'ak, ki zep desa en gubiridaka, “Eme ano ol san enlala tatete naban ang ta gwe'ak, em ki eiwa Abon de ang ta gwen zi tangan.

³² Ki esa eiwa dena tame ul gwer, hen dekam esa aha mo emsa de jap gul sonendan nakon ëhil gwe hanal.”

³³ Ki zep hwëna ahakore nik ding nulblik, “Nen an Abraham Bak mo ausu nakore zi sike. Nen home mae aha zi mo tana iltikinnik ëbabu gwek. San ki man nësa dahale gwibik. Zep em ba habe kirekam

gulu?- ‘Em esa jap gul sonendan nakon ëhil gwe hanal.’ ”

³⁴ Ki zep ding gulzimki, “Eiwa denakaë emsa gubirida'an: Men zen karekna nol gwenan, ki zen karekna in zëbon ëbabu gwe'an.*

³⁵ Zi mo tana iltikinnik de babu gwen zini, zen zi bina in mo iyesa hom. Zep zen molya hëndep zëwe gwë gweka. Hwëna tane zem, zen zëwe en sa gwë gwera, sap zen tane tangan zem.

³⁶ Zen in zep, ngatan zi mo langnak de Bian mo Tane Tangan de emsa hil ti sonebinkim, dekam esa tangan ëhil gwe hanal.

³⁷ Eë tawana: Em hen sap Abraham Bak mo auyan-tane wal. Hwëna em tan habe Asa dwam ëbla'an, sap ano ola ebon mae man jawe guk hana gwenan.

³⁸ Mensaë ëre mo Bian hon hlaul gwek, Eë desaë ebe mae hap ayang gul gwizimnin. Hwëna em ere mae mo bian mo ol sane syal ta gwenan.”

³⁹ Ki zep ding nulblik, “Eë an Abraham Bak mo walas sake.”

Ki zep ding gulzimki, “Hwëna Eme eiwa Abraham mo walas lowe he'anam, ki Abraham mo kim emaka lowehe gwe'an.

⁴⁰ Mensaë Alap hon sane gwe-gwek, Eë desaë ebe mae hap ayang gul gwizim'in, hwëna em tan habe Asa dwam ëbla'an. Abraham hom kirekam gwë gweka!

⁴¹ Em ere mae mo bian mo kime lowehe gwenan.”

Ki zep hwëna ding nulblik, “Eë an malin walassa hom! Eë an tingan Alap mo wei-wik gun walas sake.”

⁴² Hwëna dekam zep Yesus ding gulzimki, “Eme eiwa Alap mo wei-wik gun walas lowe he'anam, ki emaka Asa enna ola gwebla'an. Sap Eë an Alap onakonë hatazak, hëndep zebë angkam awe gwë'an. Eë ëre mo enlalakam homë hatazak, hwëna Zen ki Asa zer soneka.

* 8:34 8:34 2Ptr. 2:19

⁴³ Em an mae habe ano ola tame ul srēm gwe-gwenan: Sap em makare zini bëjen ano ola dokwak gun.

⁴⁴ Em an ere mae mo bianna dowal mo kigi mo wei-wik gun walas. Zen in zebe zëno dwam gwibin sin ang ta gwenan. Zen nonol lonesen nakon kirekam gwë gweka- zi tan zi. Eiwa de ola hom tangan zëbon onak, sap eiwa de ola zëbon man jawe guk hana gwenan. Zen de boton gwenna, zëbe hap man dakastilin, sap zëno enhonak boton en. Zen in zep ki gwëka, boton tam zi, hen zen tingare boton tam zi mo bian.

⁴⁵ “Hwëna Èe eiwa de en nakaë ayang gul gwizimnin, in zebe Asa laiblibla srēm gwe-gwenan.

⁴⁶ Ebon mae onakon, nara molya ano karek-kareksa anakan dam gul-subluka, ‘Em kire kareksae golka.’ Zen in zep, Èe de eiwa de en naka tawa tabinni, em ba habe Asa laiblibla srēm gwe-gwenan?

⁴⁷ Alap mo wei-wik gun walasna, zen man Alap mo ola i-san i-san nei gwibirin. Em hwëna bëjen, sap em in zëno walassa hom!”

Yesus kim anakan gubiridakake, “Ano bosenana apdenak Alap hanye.”

⁴⁸ Yahudi mo mam-mamna men zen zëwe lowe he'ak dekam zep zë lamang da'ak, “Em in eiwa Samaria wal karek hen dowal de bi gwe-blanna!” *

⁴⁹ Yesus ki zep ding gulzimki, “Èe dowala ban hom. Èe ama ère mo Bian mo bosesa de mam gulblun hap syal gwe-gwenan. Em hwëna ema Asa lamang la gwenan.

⁵⁰ Èe ère mo bosesa de mam gun hup homë syal gwe-gwe'an. Hwëna ano bosesa de mam gun hup de Zini ki- Zen ngatan zi mo langnak gwë'ara. Zen man Asa zerzauk sone gwenda.

⁵¹ An eiwa denakaë emsa gubirida'an: Men zen ano ol san enlala

tatetekam ang ta gwe'ak, zen molya hëndep denaban juwe gwëk.”

⁵² Ki zep nenblak, “Angkam eiwa mesë emsa dam lasinin: Em in dowal mo bi gweblan zi! Abraham Bak orep man tilki, hen Alap mo olsa de ayang gun hup de zini hen man juwe gwëk. Hwëna em ema gunda, ‘Men zen ano ol san ang ta gwe'ak, zen molya juwe gwëk.’

⁵³ Auyan Abraham ki tilki. Em san ema enaka kil ti'ara?- ‘Èe an Abraham onakon de teipsinni.’ Alap mo olsa de ayang gun hup de zini san ki juwe srēm gwe-gwëk! Zep em banakane enaka kil ti'ara?”

⁵⁴ Ki zep ding gulzimki, “Aen de ère mo bosesa mam gunkum, dekam eiwa, bëjen Asa taibliblan. Hwëna men Zen ano bosenana mam gul gwe'ara, Zen ère mo Bian- men Desa em en gweblananke, ‘Ano mae mo Alap'kam.

⁵⁵ Hwëna ena home tame la'an. Èe en kië tame ta'an. Èe de anakan gunkum, ‘Èe homë Alapsa tame ta'an,’ dekam ki hwëna Èe boton tam zi, men ki hen em! Hwëna Èe kië tame ta'an, deban zëno ol en sanë enlala tatetekam ang gwe-gwenan.

⁵⁶ Eno mae mo auyanna Abraham, zen man hë'ho gwëka- hamal hap kim anakan salka, ‘Èe asa ngatan zi mo lang nakore Zi Tangansa okama san dep de ati gwennak hla ta soner.’ Kirekam kim Asa hla ta soneka, man tangan sam gwesiki.”

⁵⁷ Ki zep ding nulblik, “Eno tahunna hom lima-pulunak hata'an. Em banakan de Abraham Baksa hla tan hap?”

⁵⁸ Dekam zep hwëna ding gulzimki, “Eiwa denakaë emsa gubirida'an: Abrahamsa de jaha gwen

* **8:48 8:48** Zen insa lamang tan hap “Samaria wal karek”kam nenblak, desa de srip gulsun hup de ola, emki hlaun Yoh. 4:9nak, hen zao de otde nakore alenak.

srëmnak, Ëe an Zen Tangan- Alap han de bose apde naye." †

⁵⁹ Kirekam kim nasalblak, dekam zep zi beyam-byana in kasona lop da inek- dekam de i tiblan hap. Hwëna Zen dekam zep zëno mae mo nwe nakon aning gwe ine halka, ki zep kon hëndep song gweka.

9

Yesus kim zi nwe dïminni dawem takake:

¹ Aha yaklakam kim Yesus asa golësek gweka, ki zebë zi nwe dïminni hla la'ak. Zëno nwena jaha gwennak ki hëndep dïmin nëblak.

² Ëe zëre hon de ang ta gwen weny dekam zebë Yesusu lakensiblik, "Guru, nara karek gweka?- an zep ki zini an jaha gwennak hëndep nwe dïmin gwekaye. San ha zën jaha gweblan srëmnak karek gweka? San ha an-bi zik mo karek nakon ki gwëka?"

³ Ki zep ap ding gulzimki, "Zen zi mo karek nakon hom ki gwëka. Zen an mae hap ki nwe dïmin gwekadekam de zi Alap mo sosonsa zëbon hlaun hup.

⁴ Nen nama ngatannake lowe he'an, zep angkam nama lwa'andekam de nen Alap mo syalsa gol gwen hapye, Asa men kirekam de syal gwen hap zer sonekaye. Hwëna kawesin hip de yaklanak sa hen hatal. Dekam zini toton bëjen syal gwen.

⁵ Ëe de nama okamanak gwënkam, Ëe an Zen- okamana an hap de ngatan naye."

⁶ Kirekam kim gubiridaka, ki zep ol tepna kamanak tipsiki, desa zep

son naban siri gulku. Dekam zep zini in mo nwena dra soblaka.

⁷ Ki zep hwëna gubluka, "Wake, aili hona Siloamk ngan sosuk." Aili hona in mo bosena "Siloam" zen enlala naban. Nëno mae mo olkam, "Zer Sonen." Kim zë ngan sosuku, dekam zep hëndep kara gweka, ki zep gol san dep song gweka.

⁸ Zëre mo gol golek denak de weny hen men zen mwinmwankam hla da gwëk dekam zep dengguan gwëbla'ak, "An san ha zen hom?- men zen ora alpna de nikiran nikon te-ala hap nësa aberbe ta gwibirkiye."

⁹ Ahakon man ëgu gwe'ak, "An zen." Hwëna ahakon man ëgu gwe'ak, "Zen hom. An deban nwe-masena apdenak."

Hwëna Zën zep zënaka kira ta gwe'anka, "Ëe an dwan zenke."

¹⁰ Ki zep dakensik gwëbla'ak, "Em banakane kara gwera? Nara emsa dawem tala?"

¹¹ Ki zep ding gul gwizim'inka, "Zini bosena Yesus kama blëblesa syal gwibiri, dekam zep ano nwena ap dra soblala. Ki zep hwëna asa gublula, 'Aili hona Siloamk ngan sosuk.' Kimë zë ngan sosul, dekam zebë kara gwer."

¹² Dekam zep dakensiblik, "Zini in angkam endawe gwë'ara?"

Ki zep ding gulzimki, "Ëe homë tawa gwëbla'an."

Farisikam de zini kim taken-taken nëblakke, "Em banakane nwe dïmin nikon dawem gwëka?"

¹³ Dekam zep in zen nwe dïmin nikon dawem gwëka desa Farisikam

† **8:58 8:58** Awe mensa li nul sonek, "ano bosena apdenak Alap han," zen mae hap: Sap Yunani olkam awe Yesus man anakan guku, "Saya adalah saya," ahaksa, "Ëe an Zen Tangan." Hwëna dekam ola man golek de gwëk- Alap mo Ibrani olkam de bose naban. Alap orep man zëre mo bosena Musa Bak hon kira gulku- men kirekam Ibrani olkam nen gweblanake, "Yahwe" kam. Bosena in mo enlalana, "Ëe an Zen Tangan." (Kel 3:13-15) Yahudi zini Alapsa de blikip gwesiblin hap bosena insa man nollëwe gwëk, zep "Lang Bina" enkam nen gwëblak. Desa "Tuhan" kam Indonesia olkam li nul sone gwenan. Zen in zep, kim Yesus kirekam gubiridaka, "Ëe an Zen Tangan," Yahudi zini in man tangan jal nëblak, hëndep dekam zep kasona lop da inek- dekam de i tiblan hap. Yohanis mo Ol Dawemnak awe, Yesus hen kirekam aha ayatnak Zënaka gu gwëblaka: 4:26nak ("Ëe an Zen"), 8:24nak hen 28nak, ("Ëe an Zen- mensa ena kara ë gwëblakye"), hen ahana 13:19 mo aumwa topnak.

de zi hip dikim zerteizimdin hip nêrhak.

¹⁴ Yaklana in dekam Yesus kama blëblena syal gwibirki hen dawem taka, zen Hari Sabatkam.

¹⁵ Farisikam de zini zen hen man dakensik gwebla'ak, "Em banakane kara gweka?"

Desa hen man ding gulzimki, "Zen ano nwenä kama blëblekam dra soka. Kimë ngan sosuk, dekam zebë kara gwek."

¹⁶ Farisikam de zini in ahakon dekam zep ëgu gwe'ak, "Zini in Alap mo zer sonen naka hom, sap zen Hari Sabat hap denaka ngip gul gwenda." Hwëna ahakon man ëgu gwe'ak, "Hwëna kareksa de gol gwen zini, zen bëjen owas-owasna syal gwibin- zen in kirekam syal gwe-gwibiridaye." Zen in zep ëhliwek.

¹⁷ Ki zep etan zini insa dakensiblik, "Zep ena banakane enlala gwebla'ara?- sap zen eno nwesa dawem soka."

Ki zep ding gulzimki, "Zen Alap mo olsa de ayang gul gwizimdin hip de zi sike."

¹⁸ Hwëna Yahudi mo mam-mamna in hom anakan daïblïbla'ak, "Zen menkam eiwa nwe dïminni," dekam zep an-bi zemka kwang nosok- desa de hen takensizimdin hip.

¹⁹ Ki zep dakensizimk, "Zen san eiwa eno nik mo tane? San eiwa nwe dïmin nika ki jaha gweka? Zen ki angkam banakan kara gweka?"

²⁰ Ki zep ding ulzimk, "In eiwa, ano nik mo tane sake. Eiwa, zen nwe dïmin nika ki jaha gwek."

²¹ Hwëna ëe tawa naka hom- zen banakarekam mes yap angkam kara gweka? Men zen dawem taka ëe hen homë tame la'an. Zen mes dwan-am zise gweka. Amki zëna en naka lakensik gweblak."

²² An-bi zem kirekam ding ulzimk, sap zen man Yahudi mo

mam-mamna insa anakare hap aïribirida'ak, "Zen sa nësa karek nosol." Sap Yahudi mo mam-mamna anakan mes ola aha-en nuk, "Zi de anakan gunnu, 'Yesus zen eiwa Alap mo Zer Sonenna- nësa de ngaya tabin hip,' desa esa but srëm gola kon olëalsa sone gwibir." *

²³ In zep an-bi zem in anakan ding ulzimk, "Zen mes dwan-am zise gweka. Amki zëna en naka lakensik gweblak."

²⁴ Ki zep etan zini insa tïlzïn hap nenblak, zao zep nenblak, "Emki nglïnak de Zi mo nwe kara gwennak asa eiwakam gubiridan! Sap zini in zen emsa dawem taka, ëe mesë tawa ëblak: Zen kareksa de gol gwen zi."

²⁵ Ki zep ding gulzimki, "San ha eiwa kareksa de gol gwenna? San ha hom? Ëe homë desa tawa gwebla'an. Hwëna aha-enë tawa gwibi'in: Ëe menkam nwe dïminni. Hwëna angkam ëe mesë kara gwek."

²⁶ Ki zep etan dakensiblik, "Zen banakarekam emsa gwëblaka? Banakan eno nwenä dawem soka?"

²⁷ Ki zep ding gulzimki, "Ëe mesë desa emsa tonbiridal, hwëna em ema asa asalsiblil. Em ba habe desa de etan ësane gwen hap ëdwam gwe'an? Ki san ema hen ëdwam gwe'an- zëbon de ang ta gwen hapye?"

²⁸ Dekam zep lamang tan naban nenblak, "Em in zi karekna in hon de ang gwe-gwenna! Ëe an Musa Baksa de ang gwe-gweblanna."

²⁹ Nen mese ëtawa gwek: Alap ki Musa Bak hap ola ton sone gweblaka. Hwëna Yesusu home anakan tawa ëbla'an, 'Zen trï ta se'ara.' "

³⁰ Ki zep ding gulzimki, "Hwëna an wehasa hom! Em home anakan tawa ëbla'an, 'Zen trï ta se'ara,' hwëna zen ano nwesa dïmin nën naka dawem soka."

³¹ Nen mese ëtawa gwek: Alap karek gol gwen zisi bëjen salblan.

* **9:22 9:22** Mae hap an-bi zem in aïrik: Sap but srëm gola kon de zialsa sonenkam, dekam bëjen etan aha Yahudi zi niban ba maesa lirak ta gwibin, hen aha Yahudi zisi bëjen mae golek de tabin.

Hwëna zi de Alapsa betek gwe-blanna, hen zëno dwam gwibin sin ang gwe-gwenna, desa man sal-birida gwenda.

³² Okamana ansa de yang gulsun nukon hom tangane anakan ësak, 'Zini man nwe dīmīn nika de jaha gwen zi bose zemka dawem taka.'

³³ Zini in de Alap onakon hatazan srēm kam, zen molya banakare owas maena syal gwibirinam."

³⁴ Ki zep hwëna ding nulblik, "Em in karek gol gwen naka de jaha gwenna, hwëna angkam ema tim gu'ura, 'Èe asa Yahudi mo mam-mamna ansa tawa tabir!' " Ki zep hēndep but srēm gola in kon nēralsa sonok.

Enho nakon de dīmīn gwen srēm hap de ol:

³⁵ Yesus kim salblaka, "Zini mensa mes nēralsa soner," ki zep tēblaka. Kim hla taka, zao zep takensīblīka, "Em san ema ngatan zi mo lang nakore Zi Tanganna anakan taīblībla'ara?-'Zen Alap mo Zer Sonenna.' "

³⁶ Ki zep ding gulbluka, "Aya Bak, Zen nara Zi? Tame tankam ēe amaka taīblībla'an."

³⁷ Ki zep zē gulbluka, "Em mese Desa hla tanda. Zen an Debane ola lon'nara."

³⁸ Ki zep ding gulbluka, "Bian, ēe ama Emsa taīblībla'an!" Dekam zep zē boklena kom soblaka.

³⁹ Yesus ki zep kitak asa gubiridaka, "Èe kire habē okamanak hatazak- okamana awe de zisi de anakan klis gun hup: Nwe dīmīn wenya zen sa ēkara gwer. Hwëna ēkara gwen wenya, zen sa ēnwe dīmīn gwer."

⁴⁰ Ahakon Farisikam de zini men zen zē dekam lowe he'ak hen sane da'ak, ki zep dakensīblīk, "Eno ol gulk sun de blaoranna in, san ha ema asa hen gubiridala?-'Em in nwe dīmīnī.' "

⁴¹ Ki zep ding gulzimki, "Em de eiwakam ēnwe dīmīn gwenkam, dekam molyē emsa gubirida'anam, 'Em ema ēkarek gwenan.' Hwëna

em ema ēk enkam ēgunun, 'Èe nwe dīmīn nika hom,' zen dekon zebe ēkarek gwenan."

10

Yesus kim gubiridakake, "Èe an domba zaho hap de līlīkīnnī Zen."

¹ Yesus ki zep ola gulk sun ap blaonzimki, "Eiwa denakaē emsa gubirida'an: Zini men zen domba zaho hap de kandangnak līlīkīn srēm san tīl zīnna- zen sowē zi, ahaksa zēre mo asaskam de alal gun hup de zi.

² Hwëna līlīkīn sīn de tīlzīn zini, zen zaho ta gwibin hip de zini zen.

³ Līlīkīnsī de kara son hap de zini sa zaho ta gwibin zini in hap talusublula. Zēre mo domba zahona hen zëno ola man tame nul gwenan. Zëno mae mo bosem-sena kim gubirida gwenda, dekam zep wet noso gweblanan.

⁴ Zēre en mo dena kim golēwet so gwenda, zëna dekam zep ngeirbirida gwenda. Zēre mo domba zahona man ang nē gweblanan, sap zëno ola anakan de tame gulblunkam, 'An zen ano mae mo bi naye.'

⁵ Aha zisi molya ang nēblak. Zen sa hwëna heya nēblal, sap zëno ola hom tame nulblī'an."

⁶ Yesus kim kirekam ola gulk sun blaonzimki, ēe hen homē dam ulsuk.

⁷ Ki zep etan ap srip gulsuzimki, "Eiwa denakaē emsa gubirida'an: Èe an domba zaho hap de līlīkīnnī Zen.

⁸ Nonol men zen anakare ola ban yaīng gwe-gwezak, 'Èe an emsa de zaho ta gwibin hip de zi,' zen hwëna sowē zi hen zēre mo asaskam de alal gun hup de zi. Hwëna domba zahona hom kire zisi nasalbirida gwek.

⁹ Diki Èe an Zen tangan aha-enlīlīkīn nīye. Men nara Abon osan tīl zīnna, zen zen sa ēngaya gwer. Èe asa zēbe mae hap golzim- zen dikim aha-ere enlalakam tembane

hap ehakal gwen hap denaye, banakare tésen lwa jal-jal srëm san.

¹⁰ Sowë zini zen mae hap yaing gwe-gwenanzal: Èsowë gwe-gwen hap, tamera gwen hap, hen timbwas gul gwen en hap. Hwëna Èe ngaya tabin hibë hatazak. Ano domba zahona zen dekam tangan sa tahalha srëmkam lowehe gwer."

Yesus kim gubiridakake, "Èe an domba zaho ta gwibin hip de Zi tangan."

¹¹ "Èe an domba zaho ta gwibin hip de Zi tangan. Èe zep asa ère mo angna ère mo dombasa dikim ngaya tabin hip sosok tazim.

¹² Hwëna men zen te-ala en hap zaho da gwibirin, zen zaho ta gwibin hip de zi tangansa hom, hen hom tangan bi neibirida'an. Tésen lwa jal-jalsa de hla ta gunkum, zen sa heya-hya gwenkam dombana insa hli nulida gwer. Tésen lwana in ahanaka sa hit tisili, hen ahakon dekam sa men-san ansankam ehëya-hya gwer.

¹³ Te-ala en hap de zaho ta gwibin zini, zen kirekam neibirida gwenan, sap zen hom kwasang neibirida gwenan.

¹⁴⁻¹⁵ "Èe an domba zaho ta gwibin hip de Zi tangan. Èe zep asa ère mo angna sosok tazim- ère mo domba zahosa dikim ngaya tabin hipye. Men kirekam ère mo Bian Asa tame taka, Èe hen kirekamè ère mo domba zahona tame ta gwibirin. Hen men kirekamè Biansa tame tak, ère mo domba zahona hen kirekam Asa tame da gwenan.

¹⁶ Ano aha domba zahona hen ki- men zen Israel mo langnak awe lowehe srëm gwe-gwenanye. Èe asa desa hen kwang guludal. Zen sa hen Asa nasalbla halzal. Hëndep aumwa

hap denak aha-erenak asa ère mo zaho naban golëlowehe gwer.

¹⁷ Ère mo Bianna mae hap Asa kwasang gwe-gweblanda: Sap Èe mesë ère mo angsa de sosok tazimdin hip hohle gwek, hwëna hyanak asa etan ngaya gwer.

¹⁸ Èe de Aen gun srëmkam, 'Diki Èe tìn,' dekam bëjen Asa tan. Abe hap mes ère mo Bian sosonna golblaka- dekam de ère mo angsa gublun hap, 'Angkam dekam timni hli yul. Angkam dekam etan gul ine.' Èe zebë ère mo angna ère mo dwam gwibin sin sosok tazim'in."

¹⁹ Yesus insa kirekam gubiridaka, Yahudi zini in dekam zep èol tetek gwek.

²⁰ Zen ahakon man èguk, "Zini in dowal mes bi gweblaka hen mamakna. Ba hap de desa salblan hap?"

²¹ Hwëna ahakon man èguk, "Dowala bare zini hom am kirekam de ola don gwibirin! San ha dowala bare zini ki zi nwe dìminnì dawem da gwibirin?"

²²⁻²³ Aha yaklakam Yesus Alap mo gol teksonnak të nasen gwe'anka. Teksonna in man bose nuk, "Salomo Bak mo Dena." Dekam bot-bot tamlenak, hen èe Yahudi zini dekam mesë Yerusalemk delapan-enkam de yakla yalak dep tagal gwek. Yakla yawal-yawala in mae hap: Alap mo gola kim orep sam nulsukke- desa dikim enlala gwibin hip. *

²⁴ Zao zep Yahudi mo mamamna tagal nèblazak, ki zep zë dakensiblik, "Em bawalkam esa asa dam-dam enkam ding gulzimdi? Emki eiwa de tangan naka asa gubiridan: Em an san ha Zen tangan?- Alap mo zer sonen Zini, Israelsa de ngaya tabin hip Denaye. San ha em hom?"

* **10:22-23** **10:22-23** Tahunna 161nak- Yesussu de jaha gwen srëmnak, dekam Siriak de teipsin zini zère mo jana nabare zi niban Alap mo golsa kun nulzik- dekam de Alapsa hen Yahudi zisi lamang tabin hip. Zao tahunna dan-ahan, dekam zep Yahudi zini gola insa etan Alap mo bose en hap sam nulsuk. Yahudi zini dekam zep tahun jamkam bot-bot tamlenak yakla yawal-yawalsa syal nei gwibik- desa dikim enlala gwe-gwibin hip.

25 Ki zep ding gulzimki, “Èe mesè sap emsa gubirida gwek, hwëna em home Asa laibli gweblak. Owas-owasna mensaë ère mo Bian mo bosekam syal gwe-gwibirin, zen dekon emaka anakan Asa tame la'an, ‘An Zen tangan.’

26 Em hwëna molye Asa laiblihlak, sap em ano domba zahosa hom.

27 Ère mo domba zahona zen man Asa nasal gweblanan. Èe hen ama kitak tame ta gwibirin. Zen ki Asa ang nè gweblanan.

28 Èe ama zèbe mae hap hëndep denaban dikim lowehe gwen hap denaka gol gwizim'in- zen dikim hëndep denaban juwe srëm gwen hap. Toton nara molya ano taha nakon alal gulku.

29 Ano Bian mo sosonna man taman kini'an- in zen domba zahona insa Tane zem abe hap kap gulblukaye. Desa toton nara dep?- ano nik mo taha nakon de alal gun nuye.

30 Èe an Zen- Bian han de zeraha-en gwen Zi niye.”

31 Ki zep mam-mam wenya in kasona lop da ine'ak- dekam de i tiban hap.

32 Ki zep hwëna Yesus gubiridaka, “Èe mesè eno mae mo nwenak owas-owasna beya gulzimk- men kirekam de syal gwe-gwibin hip Bian abe hap golblakaye. San ha ano aha owas nakone Asa husus èbla'an?- in zebe Asa kasokam de i tiban hap dwam èbla'anye.”

33 Ki zep ding nulblik, “Èe eno owas-owas nakon homë kasokam emsa i libla'an. Hwëna ere mo Alapsa de lamang tan nakonè emsa i libla'an. Em in totore zi tangan, hwëna ere mo gunkum em ema enaka gublula, ‘Èe an Alap.’ ”*

34 Ki zep ding gulzimki, “Alap mo èpba olak, zao man-am emsa gubiridaka,

‘Em in kitak ère mo wei-wik gun walas.’*

35 Men kirekam Alap mo olak lwak, zen hëndep kirekam sa eiwa lwal. Dekam men zèbe mae hap Alap mo ola in hatazimzik, desa Alap man gubiridaka ‘are mo wei-wik gun walas’kam.

36 Zep ba hap de Asa waba hap jal gweblan hap?- sap Èe ama sap'nen ènaka gublunan, ‘Èe an Alap mo Tane.’ Sap Asa eiwa Bian Zën ki dam tasiki hen zer soneka.

37 Ano syal de ère mo Bian mo syala ban apde nën srëm kam, ki bahem Asa taiblihan.

38 Hwëna Èe de ère mo Bian mo kim syal gwe-gwenkam, ki ano syala insa emki anakan taiblihin, ‘Owas-owasna an eiwa Alap onakorena.’ Asa de taiblihan srëm kam, hwëna owas-owas in ensa emki kirekam taiblihin. Dekam esa hëndep anakan ètawa gwer, ‘Bian eiwa Desa zergwë gwenda, hen Zen eiwa Bian han de zeraha-en gwen Zi.’ ”

39 Dekam zep sap balk tan hap alp dasik, hwëna Yesus man zèbon mae onakon aya gwe ine halka.

40 Yesus ki zep weyana Yordan mo men eiha san dep asa golèlwanda halka- men zèwe Yohanis Bak menkam baptis ta gwibi'inkake. Zao zep asa golèlowehe gweka.

41 Dekam zini beya nik zep Zèbon onak dep yaing gwe-gwezak. Zen dekam zep ègu gwe'ak, “Yohanis Bak sap hom owas-owasna syal gwe-gwibirki, hwëna kitak mensa hamal hap zini an hap dena ayang gul gwizimki, angkam an zep ki eiwa kirekam lwa'an.”

42 Zen zao zep beya tangankam Yesusu anakan daiblihlak, “An eiwa Zen tangan- nesa de ngaya tabin hip de Zi niye.”

11

Lazarussu kim tìn nikon ngaya takake:

1 Zini dekam ki, bosena Lazarus. Zen Yerusalem golek denak èna

* 10:33 10:33 Im. 24:16 * 10:34 10:34 Mzm. 82:6

Betaniak somor dare zeban zigwë gweka- Maria ne Marta ne ban.*

² Maria in zen Yesus mo tanana irase dawem nabare minyakkam ngan sosubluk, hen zëre mo nol ala blal-blalkam sasa soblak. Hwëna nama de ngan sosublun srëmnak, aya zem in dekam zep sang-sang gweka.

³ Dekam zep Yesusu anakan en soneblak, "Bian, eno dang tininak de wal bosenana man sang-sangna sabak gwe'ara."

⁴ Yesus kim salka, ki zep asa zëre hon de ang ta gwen wenya gubiridaka, "Zëno sang-sangna in tin hip denaka hom. Zen hwëna mae hap hla tak: Dekam de zë Alap mo Tanena ano ngatan zi mo lang nakore sosonsa goltreizimdin hip, hen Alap mo bosesa dekon teip gulsublun hap."

⁵ Yesus sap man Marta, Maria, hen eis zem Lazarus maesa dang tini tabirki,

⁶ hwëna kim Lazarusu kirekam salblaka, Zen hwëna man zë etan dare yaklakam asa golëgweisiki.

⁷ Ki zep hwëna asa gubiridaka, "Angkam nen etan Yerusalem mo lang san dep lwan dahan."

⁸ Hwëna ëe ama ding ulblik, "Bian guru, nër hom dekon am Emsa kasokam de i tiblan hap alp dasik, hwëna angkam ema hohol gwe'aranabakam de etan desan lwahan hap!"

⁹ Hwëna dekam zep ap gulk sun de ol blaorankam ding gulzimki, "Aha-ere yaklakam yakla nwena dua-blas jam enkam am zil gwenda. Zi de yaklam të naseranna, zen bëjen zaran, sap okamana ansa de ngatan gun hup dena dekam man zil ane gwenda.

¹⁰ Hwëna kawesinnik de të naserankam, dekam ki altil gwenan, sap dekam ngatanna hom."

¹¹ Kirekam kim asa gubiridaka, ki zep etan ola ap mas gulzimki, "Nëno mae mo wal bosenana mes ta guk halka. Èe ama li tan hap song gwe'an."

¹² Èe hwëna dekam ama ding ulblik, "Bian, zen ba hap de duweblan hap? Sap zen de sang-sang hap nisi tankam, zen zën sa totoresa luwera."

¹³ Hwëna Yesus insa ki ola gulk sun "ta guk han" kam blaonka, zëno enlalana, "Lazarus mes tilki." Hwëna ëe ama zëno ola tim uk, "Eiwa, nisi ta'ara."

¹⁴ Zën zep etan damnak asa gubiridaka, "Lazarus mes tilki.

¹⁵ Èe menkam mae habë tol ngaya tan hap duwebla srëm gwëk: Sap zen dekam sa eno mae mo Asa de taibliblanna bil gwer. Zep haen, nen duweblan."

¹⁶ Èe, Yesus hon de ang ta gwen wenya, ano mae mo ahana Tomas, men desaë asyas olkam en gweblak "dan de wë son walas" kam, zen zep asa gubiridaka, "Haen, nen ang gweblan- zao eka Bian han apdekan ertik."

Yesus kim gukuke, "Èe an Zen-juwen nakon de ngaya tabin hip de Zini."

¹⁷ Yesus kim ëna iwe asa golëyaing gwe'an zaka, zao zep nenblak, "Lazarus Bak mes tilki. Mes tol kaso hulak nënek. Angkam zëwe yaklana mes dan-nër dan-nër."

¹⁸ Èna Betania zen Yerusalem kon golek. Zëno langana dan-ahare kilometer enkam.

¹⁹ Zen in zep zë Yahudi zini beyakam Marta ne Maria neka du

* **11:1 11:1** Lazarus men zep Yohanis awe ale gulku, zen tahalha zini Lazarusu hom- men desa Yesus gulk sun de ol blaorankam aisil gweblakake, in zen tinkim Abraham Bak hon ngatan zi mo langnak hatakake. (Luk. 16:19-31) An hwëna ahana Lazarus, Yesus mo wal bosa. Yunani olkam bëjen dam gulsun, san ha Lazarus zënana, san ha Marta zëna naye? Zini beyakam man enlala neibirida gwenan, "Marta zen Lazarus mo aya. Maria zen oso zem." Lazarus mo bosenana hen enlala naban. Bosenana in mo enlalana, "Alap man nësa mas gwibirida gwenda."

neizimzik- dekam de zëno nik mo enlwansa së ta sonezimdin hipye.

²⁰ Marta kim anakan sak, "Yesus angkam man golek de gwe'an zala," dekam zep ala tablan hap song gwëk. Maria hwëna hom ang gwibik. Zen man golak gwëk.

²¹ Marta kim hla ta guk, ki zep gu gubluk, "Bian, Eme awe gwënanam, ano eisni molya tilingam."

²² Hwëna ëe tawana: Sap angkam mae de Em ba mae hap Alapsa abe ta'anam, Zen sa kirekam ebe hap golblala."

²³ Ki zep ding gulbirki, "Eno osona in sa etan ngaya gwera."

²⁴ Ki zep hwëna ding gulbluk, "Ëe tawana: Zen aumwa hap de yaklanak sa ngaya gwera- tingare ahakore wena ban."

²⁵ Yesus ki zep etan gubirki, "Ëe an Zen- juwen nakon de ngaya tabin hip de Zini. Hen hëndep de ngaya tabin hip de Zini, Ëe an Zen. Zini men zen Asa taibliblanna, zen sap sa juwe gwer, hwëna sa etan engaya gwe-gwer."

²⁶ Hen zini men zen nama de gwënnak Asa taibliblanna, zen molya hëndep denaban juwek. Em san ema Asa kirekam taiblibla'ara?"

²⁷ Ki zep ding gulbluk, "Eiwa, Bian, ëe mesë anakan Emsa taibliblak, 'Em in Alap mo zer sonen Zi tangan- okamanak de zisi de ngaya tabin hip Dena. Em an Alap mo Tane.' "

²⁸ Marta kim kirekam gubluk, zëna ki zep gol san dep lwahak, ki zep oso zem Mariasa i mwa ennak gubik, "Bian Guru mes golek de gwenan zala. Zen man emsa de goltowen hap dwam gwe'ara."

²⁹ Kirekam kim salbik, nabakam zep luwek, hëndep dekam zep ala tablak.

³⁰ Yesus hom dekam ënak hata'an naka. Zen nama dekon eiszim'inkamen zëwe Martasa goltowekake.

³¹ Yahudi zi beyana in zen Maria mo enlwansa dikim së ta sonebin hip golak lowe he'ak, zen kim nabakam de luwe ine kininnak hla

nuk, dekam zep enlala neibik, "Zen aya zemka de drënen kaso hulak de gosa gwën hap song gwe'an." Zep noltro kinik.

³² Hwëna Maria kim abon mae onak hatazak, Yesusu kim zë hla tak, ki zep zë zëno nwenak anakare ola ban ik gwe hezak, "Bian, Eme awe gwënanam, ano ayana molya tilingam."

³³ Mariasa kim go gwënnak kara gu'unka, hen men zen ang neibirzik, desa de hen aitin-aitin go tannak kara tabinkim, enhona man tangan dowebla hanaka.

³⁴ Dekam zep takensibiridaka, "Em endawe ënek?"

Ki zep ding nulblik, "Haen. En esa ki zë kaso hula insa hlaulu."

³⁵ Yesus ki zep hen gona gwë'anaka.

³⁶ Yahudi zi beyana in dekam zep ëgu gwe'ak, "Emki hla tan. Zen man sap sërkam dang tini taka."

³⁷ Hwëna ahakon man ëguk, "Zen ki am zi nwe diminni dawem taka. Ba hap Lazarus Swesa nabakam dawem taza srëm gwëka?"

³⁸ Ki zep hëndep Yesus kaso hulak iwe go gwëndan naban golëyaing gwëka. Hula insa mes kaso yawalkam mat nulsuk.

³⁹ Ki zep gubiridaka, "Kasona insa em irhi gun."

Marta ki zep ding gulbluk, "Hwëna angkam asena karek tangan nakake! Sap angkam yaklana mes-am dan-nër dan-nër nër- drënen hyanakye."

⁴⁰ Ki zep ding gulbirki, "Men kirekamë emsa gubir, em de Asa taibliblankam, em esa ki hlaulu- Alap kim de sosen zemka goltreizim'inkaye."

⁴¹ Kasona insa kim irhi nuk, ki zep ngli san kara gwe seka, ki zep Alapsa gu soneblaka, "Bian, Em Asa sam ta'ara, sap ano abena ema sal gwenda."

⁴² Ëe sap tawana: Em home Asa salsik gwëblanda. Hwëna Ëe mae habë kirekam dawemna ebe hap golblanan- zi beyana an dikim ësane gwen hap, hen zen dikim

Asa anakan taibliblan hap, 'An eiwa Alap zer soneka.' "

⁴³ Kim kirekam gu sonesiki, ki zep ol mamkam takenblaka, "Lazarus, em wet sozan."

⁴⁴ Dekam zep hēndep wet so zaka. Taha-tanana nama deyol ngap-ngapkam de tahalenna, hen aha deyola nwe-masenak. Ki zep Yesus gubiridaka, "Dekam hīl-hīl la soneblak."

Yesussu de tan hap kim ola aha-en nukke:

(*Mat. 26:1-5; Mrk. 14:1-2; Luk. 22:1-2*)

⁴⁵ Zini men zen Maria mo enl-wansa de sē ta sonebin hip zao lowe he'ak, kim owasna insa hla nuk, dekam zep beyakam Yesussu daibliblak.

⁴⁶ Hwēna ahakon kim lwan dahak, dekam zep Farisikam de gubirida gwen wenyaka nenbiridak- Yesus mo owas syal gwibinni insa.

⁴⁷ Zen zep Farisikam de zini hen Alap mo golak de syal tan zi mo mam-mamna Yahudi zi mo teipsin sinodenak dena † kwang nulidak-dekam de ēgolek de gwen hap. Zao zep ēgu gwe'ak, "Nen banakan esa ēblal? Zini in owas-owasna man beya gul gwe'ara!

⁴⁸ Nen de nwe enkam kara tankam, ki hwēna tingan desa sa daibliblal. Dekam hwēna desa sa langna ansa de teipsinkim irik gin hip dam dasil. Dekam hwēna Roma mo mam-mamna sa nēsa jal neibiridal. Ki hwēna Alap mo gol yala ansa dekam sa dri nulzir hen nēno kore naka sa damerazal."

⁴⁹ Dekam zep zini bosena Kayafas Bak, men zen tahunna inkam Alap mo golak de syal tan zi nikon teipsiki, zen zep gubiridaka, "Em in enlala joblo-topna!

⁵⁰ Diki dawemna nēbe mae hap aha-ere zi de tinni aāris- dekakim tīngare Yahudi zi juwe srēm gwēk."

⁵¹ Kayafas kim kirekam gubiridaka, zen zēre en mo enlala nakon hom ki gubiridaka. Tahunna dekam Alap mo golak de syal tan zi nikon zen teipsi'inka. Zen in zep, kim kirekam Yesussu de zersin hip sap gubiridaka, hwēna man nwe-mase gwēk- san de Alap mo olsa de anakan hamal hap ayang gulz-imdinni kiye, "Yesus sa tīngare Yahudi zisi dikim ngaya tabin hip tili."

⁵² Hwēna Yesus Zen Yahudi zi en hap hom tilki. Zen diki tīngare Alap mo hlil irin zi hip, sap Yahudi srēm zi, men zen tīngare lang san sekwak gwenkam lowe henda gwenanke, desa dikim aha-en gun hup tilki. Hwēna Kayafas Bak in kim kirekam guku, zēna gulk sun de enlalana hom dam gulsuku.

⁵³ Yaklana inkam zep Yesussu de tan hap ola zim-zim nik.

⁵⁴ Zen in zep dekam Yesus Yahudi zi mo nwe nakon langa gwesiki. Hwēna dua-blaskam de wenyasa en zep golēsek gwēka- ē bosena Efrayim san dep, zi srēm lang golek denak. Zao zep asa golēlowehe gwēka.

⁵⁵ Tahunna men kiye, kim Yahudi mo yakla yala Paskanak golek de gwē-gwēk, dekam ē-ē san de wenyasa beyakam Yerusalemk tagal gwē-gwēzak. Dekam yaklana iwe de hatan srēmna nabakam ētagal gwē-gwēzak- dekam de Alap mo golak otweran maesa de tru ta seblankam zēre mae mo karek-kareksa Alap mo nwenak ber-ber gun hup, hen hokam de nola kon zēnaka hlē tabirida gwen maekam.

⁵⁶ Zen zep zēno mae mo tagal gwen hap de yakla yala inkam Yesussu Yerusalemk dē gwēbla'ak. Hen kim Alap mo golak ētagal gwē-gwē'ak, dekam man zēnaka anakan dakensibirida gwē'ak, "San ha sa yakla yala an hap hata zala? San

† **11:47 11:47** Yahudi zi mo teipsin sinodena, zen Yahudi mo nol-nola tuju-pulu enkam. Ahakon hen Farisi hon de bitī gwen wenyasa, hen ahakon Saduki hon de bitī gwen wenyasa, hen dare hlikna in kon ahakon hen Musa mo tītī tabin olsa de tawa ta gwibin wenyak bitī gwēk.

ha molya? Em banakane enlala ëbla'an?"

⁵⁷ Hwëna Farisikam de zi niban Alap mo golak de syal tan zi mo mam-mam naban mes tingan anakan tawa dabiridak, "Yesussu de hla tankam, nabakam asa enbiri-dazak, akakim balk lak."

12

Maria kim Yesus mo tanana irase dawem nabare minyakkam hlë tazim-blikke:

(Mat. 26:6-13; Mrk. 14:3-9)

¹ Yakla yala Paskanak dikim zaun hup yaklana enam enkam lwa kini'ak, Yesus ki zep dua-blaskam de wenya asa Betania san dep golësek gweka. Lazarus mensa nër hom tìn nikon ngaya taka, zëno gwë gwenna hen zëwe.

² Zëwe de zini dekam zep tembane yawala syal neibik- Yesus hun de zë zertembane gwen hap. Marta hen man mas gwëk- tembanesa de dëre ta guk gwizimdinnik. Lazarus Yesus hun apdenak inikin'inka.

³ Maria ki zep minyak narwastu botola ban golhatazak. Minyakna in stenga litera. Zëno irasena sërkam de dawem tanganna- aha minyak naban de siri gun srëmna. Zep desa de gonna te-alana mam tangaranna. Maria ki zep minyakna inkam Yesus mo tanana hlë tazim-blik, zëre mo nol ala blal-blalkam zep hwëna sasa soblak. Gola iwe minyakna in mo irase en zep ëre guk.

⁴ Hwëna ëna Kariot walya Yudas Bak man husus gwibi'inka. Zen dua-blaskam de wenya ano mae mo ahana- men zen Yesussu zergukuke. Zen ki zep guku,

⁵ "Zen ba hap wabakam hlë tazim? Minyakna in te-ala hap de lirak gulunam te-alana mam tangan naka maka nëp zerzimmnin. * Desa emaka tahalha zi hip kae ë gwëbla-zim'in."

⁶ Yudas in hwëna tahalha zisi de kwasang gwibiridan hap hom ki guku. Zen in sowë tamna, zep ki kirekam guku. Te-alana mensa zini Yesus hup hen dua-blaskam de wenya abe mae hap kap da gwizimk, zen Yudas zirensik gweka. Hwëna zen man aha hlikna twen gwëblaka.

⁷ Hwëna Yesus man ding gulbluka, "Dikire gwëk. Zen man Asa sam tanan, sap Asa de drë nwanun hap de yaklanak mes golek de gwer.

⁸ Sap tahalha wenya em desa nama esa olëlowehe tine gwer. Hwëna Asa em molye dakal hap ërgwë gwëk."

⁹ Kim ësak, "Yesus Betaniak gwë'ara," ki zep Yahudi zini beyakam Yesussu de hla tan hap yaing gwezak. Hen zen man Lazarussu de hla tan hap ëdwam gwëk- mensa tìn nikon ngaya takake.

¹⁰ Alap mo golak de syal tan zi mo mam-mamna dekam zep Lazarussu de hen tan hap kalang nëbla'ak,

¹¹ sap zini beyakam Lazarussu de ngaya gwennak hla tankam zëbon mae onakon wet so gwë'ak- Yesussu dikim hwëna taibliblan hapye.

Yerusalem kon kim Yesussu teipsin zi mo kim hut du ane gukke:

(Mat. 21:1-11; Mrk. 11:1-11; Luk. 19:28-40)

¹² Ka'ankam, ki zep zi beyana men zen yakla yala Paska hap Yerusalemk lowe he'ak, ki zep ësak, "Yesus angkam man hata'ara."

¹³ Dekam zep yera ala makare naka nublunk- men kirekam teipsin zisi de zerhatannak ëgwë gwëkke. Zen kirekam zep ë nakon hut tu ane gun hup wet so gwëk, hen te alana inkam wam da guk gwëbla'ak- ol mamkam de anakan ëtaken song gwen naban, "Hë'ho, hë'ho!"

* **12:5 12:5** Yohanis mensa "te-ala mam tangan" kam ale gulku, zen Yunani olkam "300 dinar" kam ale gulku. Te-alana dinara zen zëno mae mo perak tangankam de te-ala kaso, hen zen dekam anakarekam de aïtbin: Zi de aha-ere yakla blalkam syal gwenna, zëno gajina dekam aha-ere dinarkam. Zep 300 dinara, zen te-alana mam tanganna- san de 300kum de zi mo aha-ere yaklakam de syal tan gajina kiye.

An Bian mo bosekam nesa dikim tatetekam irik gin hip hata se'ara.

Diki Alap Zen zēbe hap dawemsa golblan."

¹⁴ Yesus ki zep keledai tane tahanak sewe seka, zao zep nikin ine halka. An kitak man apde nek- men kirekam Alap mo epba olak lwakke,

¹⁵ "Ena Yerusalemk de zi, bahem eairin. Bira, eno mae mo teipsinni keledai tanenak de nikinhal zankam hata'ara." †

¹⁶ In zen ki zē lwak, ee zere hon de ang ta gwen wenya homē dekam dam ulsuk. Hwēna in kim Yesus zere mo ngatan zi mo lang nakore sosonna goltreizimki- tin nikon de ngaya gwenkam, zen dekam zebē dam ulsuk, "Eiyē, hare Alap mo olak kirekam am zēbe hap dena hamal hap ale nulblik. Hare ee zep am kirekam syal eibir-blik."

¹⁷⁻¹⁸ Mae hap beyakam Yesussu de hut tu ane gun hup wet so gwek: Zini men zen Lazarussu de kaso hulak takenbla irinkim ngaya tannak hla dak, zen beyakam owasna in hap de ola donbirida gwek. Zen in zep beyakam ala da gubluk.

¹⁹ Farisikam de gubirida gwen zini dekam zep zēnaka nenbiridak, "Nen waba habe anakan jalse eibirida gwenan, 'Zēbon osan bahem ang tan.' Hwēna emki sap hlauludan. Okamanak de zini angkam zēbon en etingan gwe'an!"

Yesus kim Zēn de tin hip denaka tonbiridakake:

²⁰ Men zen Yerusalemk dekam lowe he'ak, yakla yala Paskanak de ang tan hap, ahakon hen Yahudi srēm zi.

²¹ Zen dekam zep ano mae mo ahana Pilipus onak yaing gwezak, ki zep nenblak, "Bian, ee Yesussu de zertowen habē edwam gwe'an." Pilipus in, zen Betsaida wal, Galilea mo lang nakon.

²² Zen dekam zep Andrea'a gubluka, deban zep apdekam Yesussu enblaka.

²³ Yesus ki zep asa Yahudi srēm zini in han gubiridaka, "Angkam yaklanak mes tangan golek de gwer-ngatan zi mo lang nakore Zi Tanganna ano bosesa dikim Alap mam gun hup denakye.

²⁴ Eiwa denakaē emsa gubirida'an: Ee an gandum dan makan. Gandum danna kama hulak de drē nwanun srēm kam, zen bējen eini tēn. Tēn srēm kam sa lwala. Ee hen kirekam: Kama hulak de drē nwanunkam, dekam asa eini mamkam tēr.

²⁵ Hen kirekam, zini men zen zere mo okamanak de timsi anakan golinik gwenna, 'Ee babē tin,' zen sa hēndep tim niban jek-jak gwera. Hwēna men zen zere mo okamanak de timsi Asa de ang gwe-gweblan hap nolairi srēm gwe-gwe'ak, zen hēndep denaban sa lowehe gwer.*

²⁶ Hen men zen abe hap de syala nol gwe'ak, zen diki tana wei san zen Asa zertro gwen. Hēndep lamkam Ee men zaoē gwē'ak, zen hen zēwe sa yaing gwer. Men zen kirekam abe hap de syala nol gwe'ak, ano Bian sa zēbe mae hap bose dawemna golzimdi."

²⁷ Ki zep ayang gulzimki, "Ano enhona man tangan dowe hana'ara. Zep Ee banakan asa Biansa gu soneblal? San ha anakanē gu soneblan?- 'Bian, Abon onakon karek yala ansa langa gulsuk- in zen Abon onak dep golek de gwe'anye.' Hwēna kirekam bējēnē, sap Ee an kire habē hatazak- karek yala insa de goltowen hap.

²⁸ Zep Ee a kire enkam asa gu soneblal: 'Bian, diki tingare zi mo nwenak ere en mo bosesa Emki mam gun.'"

Ki zebē hwēna kitak ngatan zi mo

† **12:15 12:15** Alap mo epba ola in, Zakaria Bak ale gulku. (Zak. 9:9) Zen ena Yerusalem mo aha bosenana "Sion" kam ale gulku. Orep de zini kirekam eenlala gwe-gwek: Teipsin zi de kudakam song gwe zanna, zen eijan hap. Keledaikam de song gwe zanna, zen umlaekam de hatazan hap. * **12:25 12:25** Mrk. 8:35

lang nakore ola anakan ësalsek, “Èe mesë Ebon onakon ère mo bosena mam guk, hen etan asa kirekam mam gul.”

²⁹ Hwëna zi beyam-byana men zen zë èzau'uk ahakon man èguk, “In ngli tadrenda.” Hwëna ahakon man èguk, “Ki hom. In Alap mo dam taha nakore zi ki gublunda.”

³⁰ Yesus ki zep gubiridaka, “Ola in zen wet sonanhal, zen Èe de sane gwen hap hom. Zen hwëna em de ësane gwen hap.

³¹ Ano syala an dekam sa Alap okamanak de zi mo enlala aning tanna zerwet sozimdi- dekam de karek tabin hip. Hen angkam de irik gin zini dowal mo kigisa dekam sa tanakam holenak zaublu inera.

³² Hwëna Asa kim de okamana an kon neir ine ha'ak, zen dekam asa tingare zi ausu dikim Abon onak yaing gwezan hap de orana kles tyasizim.”

³³ Kim kirekam gubiridaka, Zen man kim anakan goltreizim'inka, “Èe an kirekam de tinsi asa hlaul.”

³⁴ Zi beyana in kon dekam zep ding nulblik, “Alap mo olak man lwak, ‘Alap mo Zi zer sonenna, Israelsa de ngaya tabin hip Dena, Zen hëndep denaban sa gwë gwera.’ Zep em ba habe anakan gulu?- ‘Ngatan zi mo lang nakore Zi Tanganna Asa sa okamana an kon neir inehal.’ Em insa ‘ngatan zi mo lang nakore Zi Tangan'kam enaka zerlëwe gwenda, hwëna èe homë dam ulsuk gwënan, ‘Em ba habe ki kirekam gu gwenda?’ ”

³⁵ Ki zep ding gulzimki, “Okamana an hap de ngatan nabare Zini, Èe an Zenë angkam kolengkam emsa golëlowe he'an. Hwëna kawesinni sa nabakam emsa jap guludal, hen dekam kawesinnik esa èbute halasen gwer.*

³⁶ Zep ngatansa de golzimdin hip de Zini Asa em taibliblan. Zen dekam esa enho nakon èngatan

gwer- dekam de èbute halasen gwen srëm hapye.”

Yahudi zini kim daiblibla srëm gwekke:

Kirekam kim gubiridaka, ki zep dua-blaskam de wenya asa golësek gweka, hen dekam zep zi beya mo ètawa gwen srëmnak asa golëlowehe gweka.

³⁷ Zen sap man owas-owasna beya gulzimki, hwëna zi beyana in hom daibliblak.

³⁸ An kitak Alap mo ol ayang gul gwen zini Yesaya Bak mo olsa dikim sul sonen hap ki kirekam lwak. Sap Yesaya mo ola Yesus hup man dakastilbli'an- zen insa anakan Alapsa gu soneblakaye:

“Bian Alap, nëno nik mo ol ayang gulzimdinni hom am daiblibi'in!

Hen owas-owasna mensa Ena ere mo taha ssonkam syal gwegwibirida, desa hen hom tame nu'in.”*

³⁹ Zen mae hap daiblibla srëm gwek: Sap Yesaya Bak hen man Alap mo ola anakan hamal hap ayang gulzimki:

⁴⁰ “Èe mesë zëno mae mo nwena dimin tabir-zimk, hen zëno mae mo enhona mesë kawesin tazimk.

Dekam molya nwekam lalak dasik, hen enhona molya èhlang gwizimk. Dekam molya Abon osan dep etan lwanda halzak.

Lwan dahal zankam ki Èe amaka ngaya tabi'in.”*

⁴¹ Yesaya mae hap kirekam Alap mo ola insa ale gulku, sap zen ngein sin Yesus mo ngatan zi mo lang nakore sosonsa hlaulku.

⁴² Hwëna ahakon man sap daibliblak- sap Yahudi mo ahakore mam-mamna. Hwëna Farisikam de zini man Yesusu de ang gweblan hap jalse neibirida gwek, zen in zep dekam damnak èkira gwe srëm gwek. Mae hap kirekam ègwë gwek, sap man anakan èairi gwek, “Asa sa

* 12:35 12:35 Yoh. 8:12 * 12:38 12:38 Yes. 53:1 * 12:40 12:40 Yes. 6:9-10

hwëna but srëm gola kon nëralsa soner.”

⁴³ Zen dawemkam zi bose zik de sam gwesibiridan hap denaka dwam nei gwibik. Zen hom dekam anakan ëenlala gwe-gwek, “Diki Alap Zën de asa sam gwesiblinna aïris.”

⁴⁴ Yesus anakan sap ki gu-birida gweka, “Zini men zen Asa taïbliblanna, zen Asa en hom taïblibla'ara, hwëna zen hen dekam ano Biansa taïblibla'ara- men Zen Asa zer sonekake.

⁴⁵ Men zen Asa hla da gwe'an, zen ki hen, men Zen Asa zer soneka, Desa hen man hla da gwe'an.*

⁴⁶ Ëe sap okamanak awe ngatansa de golzindin hibë hatazak. Zep zini men zen Asa taïbliblanna, zen sa kawesin nikon wet so gwer.

⁴⁷⁻⁴⁸ “Ëe okamanak awe karek tabin hip homë hatazak. Ëe hwëna ngaya tabin hibë hatazak. Zep men zen de Asa baes në gwebla'ak hen ano ol san de ang tan hap baes ta gwe'ak, Ëe Aen molyë desa aumwa hap de yaklanak karek tabik. Hwëna ano ola men desa zëna baes nei gwibik, zen zep sa Alap anakare ola ban karek tabiri, ‘Em ba habe desan ang ta srëm gwek?’

⁴⁹ Sap Ëe ëre mo enlala san denaka homë tonbirida gwenan. Hwëna Bian men Zen Asa zer soneka, Zen mensa ayang gul gwizimdin hip abe hap golblaka, Ëe desa enë ayang gul gwizimnin.

⁵⁰ Hen Ëe tawana: Tingan men zen Bian mo ol san ang ta gwe'ak, zen zen sa hëndep de lowehe gwen hap de oranak ewet so kinï gwer. Zen in zep, Bian men kire enkam ayang gul gwizimdin hip Asa gu gweblanda, Ëe desa enë tawa ta gwibirin.”

13

Yesus kim zëre hon de ang ta gwen zini ano mae mo tanana ngan

* 12:45 12:45 Yoh. 14:9

tasibir-zimkike:

¹ Yaklana dekam aha-en lwa kinï'anaka- yakla yawala Paskanak dikim hatan hap. Yesus dekam mes anakan tame gu'unka, “Angkam mes hatal- Ëe dikim okamana ansa hli yun hup, hen Bian osan dep dikim lwahan hap denakye.” Tingan men zenë ang ë gweblak, asa man tangan kwasang gwibirida gweka. Hëndep kim Bian osan dep etan lwa ha'anaka, kire enkam ki hëndep asa kwasang gwibirida gwe'anaka.

² Yaklana inkam, kim Yesus asa golëtembane ta'anaka, hwëna dekam dowal mo kigina mes Yudas hap Yesusu de zergun hup de enlalana ing ta soneblaka. Yudas in Kariot walya Simon mo tane.

³ Yesus dekam mes anakan tame gulku, “Bian mes tingare sosonna abe hap golblaka. Ëe sap zëre onakonë hatazak, hen angkam zëre osan debë etan lwa ha'an.”

⁴ Sap kirekam mes tame gulku, zep tembane tan nakon luweka, ki zep tahan bajuna alsiki, hen dekam zep handuknu obun tihinak da taka.

⁵ Hen ki zep hona blomenak sul soneka, dekam zep ano mae mo tanana ngan tasibir-zim'inka. Handuknu inkam zep sasa ta gwibir-zim'inka.

⁶ Kim Simon aha bosena Petrus hon hata'an zaka, ki zep zë takensiblika, “Bian, Em ba hap de ano tanana ap ngan sosublun hap?”

⁷ Ki zep ding gulbluka, “An desaë angkam syal gwibi'in, em molye angkam tame gulku. Hwëna lamkam esa tame gulu.”

⁸ Petrus ki zep gubluka, “Bëjen! Em toton bëjen Em ano tanana ap ngan sosublun!”

Dekam zep ding gulbluka, “Ëe de eno tanasa ngan sosun srëm kam, ki em ema Abon onakon wet so'ara.”

⁹ Ki zep ding gulbluka, “Bian, kirekam de lwankam, ki tana enna bahem ap ngan sosublun. Ki

hëndep taha naban nola ban ap ngan sosublu!”

¹⁰ Yesus ki zep gubluka, “Ho awan zini hom ëdwam gwe-gwenan- etan de tim niban awan hapye. Diki tanana, zen të naserankam de son nënkam. Desa man ngan sosun hup dwam nei gwizimnin. Dekam kitak de timni mes ngan gwe henan. Em kitak mese ëngan gwehek. Hwëna ebon mae onakon aha-en, zen hom ngan gwe he'ara.”

¹¹ Yesus mes anakan tame gulku, “An zen sa Asa dikim zë balk tan hap zertreizimdi,” zen in zep anakan asa gubiridaka, “Ebon mae onakon aha-en, zen hom ngan gwe he'ara.”

¹² Ano mae mo tanana kim ngan tasibinkim so ta sonebirki, ki zep tahan baju zem etan ala soka, dekam zep zëre mo nikin gwennak dep lwa halka. Dekon zep nonol asa takensibiridaka, “Mensaë ebe mae hap syal gwibir-zimnin, em wëhë tame u'in?”

¹³ Em Asa ‘guru’kam hen ‘bian’kame en gweblanan. Zen airis, sap Èe an eiwa eno mae mo kire.

¹⁴ Èe sap eiwa eno mae mo bian hen guru, hwëna Èe mesë eno mae mo tanana ngan tasibirzim. Zep em hen diki kirekam de enaka gweibirida gwen- ere mae mo tanasa de hwë-hwëkam babu gwen zi mo kim ngan tasik gwibirzimdinkimye.

¹⁵ Èe mesë Ènaka ërak makan drë nenan- em dikim hen kirekam enaka gweibirida gwen hap.

¹⁶ Eiwa denakaë emsa gubirida'an: Zi mo tana iltikinnik de babu gwen zini bëjen zëre mo zi bina insa kwë tan. Hen zini men zen aha zi mo olsa golsong gwe-gwenna, zen betekna. Men zen zer sone gwenna, zen mamna.

¹⁷ Angkam em ema anakan tame u'in, ‘Èe an betekna,’ zep em

de kirekam enaka enlala betekkam mas gwibirida gwenkam, ki esa hë'ho gwibinni hla kul gwer.

¹⁸ “Ola in desa emsa gubiridanan, zen man ebe mae hap dakastilzim'in, diki aha'en. Èe mesë kitak emsa tame tabik, hëndep zebë emsa dam tasibik. Hwëna sap kirekam, mensa orep abe hap dena Alap mo olak hamal hap ale nukke, zen kirekam sa ki hëndep lwal-anakan men zen lwak,

‘Zini men debanë zertembane gwe-gwek, zen hwëna ano jal zi hip sa jowera.’*

¹⁹ An zebë desa hamal hap emsa gubiridanan: Sap in kim jowe'ak, zen dekam esa Asa anakan laibliblal, ‘An Zen Tangan- Alap mo zer sonen Zi niye.’

²⁰ Hen Èe eiwa denakaë emsa gubirida'an: Zi de ano zer sonen zisi zer irinni, zen ki hen Ènaka zer in'ira. Hen zini men zen Ènaka zer irinni, zen hen Bian, men Zen Asa zer sone zaka, Desa hen zer innira.”

Yesus kim hamal hap gubiridakake, “Ebon mae onakon ahanik sa Asa dikim zë balk tan hap zertreizimdi.”

(Mat. 26:20-25; Mrk. 14:17-21; Luk. 22:21-23)

²¹ Yesus kim kirekam gubiridaka, dekam zep tangan enlalana dowebla hanaka, ki zep damnak asa gubiridaka, “Eiwa denakaë emsa gubirida'an: Ebon mae onakon ahanik sa Asa dikim zë balk tan hap zertreizimdi.”

²² Èe dua-blaskam de dam tasibin wenyä dekam zebë ënaka ngalap naban karatda labi'ik- mae hap: “An narasa ki gublunda?”

²³ Abon mae onakon, ahana men desa Yesus kwasang gwe-gweblaka, * zen dekam zëre mo dam taha nakon nikin'inka.

²⁴ Petrus dekam zep zëbe hap tahana wap gulsubluka, ki zep

* **13:18 13:18** Mzm. 41:10 * **13:23 13:23** Yohanis man anakan ale gul gweka, “Dam tasibin zini men desa Yesus kwasang gwe-gweblaka.” Zen Yohanis ki zëre mo bosena kirekam golzabe gweka. Zen mae hap mes yap zënaka kira ta srëm gweka- zi nwenak de zënaka bolamda tan srëm hap.

gubluka, "Emki takensiblin: Zen narasa ki kirekam gublunda?"

²⁵ Zini in ki zep golek de ta zaka, zao zep takensiblika, "Bian, narasae ki enlala gweblala?"

²⁶ Ki zep ding gulbluka, "Ee kimë rotina ansa kolho honak os gul ane'ak, men zëbe habë golbla'ak, zen zen." Ki zep roti apna insa os gul ineka, desa zep Yudas Bak hap golblaka.

²⁷ Yudas kim roti apna insa twinbirki, dowal mo kigina dekam zep hwëna ing gwe heblaka. Yesus ki zep gubluka, "Mensa ena kalang gwe'ara, nabakam syal gwibir."

²⁸ Hwëna Yesus insa kirekam gubluka, ee in zenë zë teinikin'ik ee homë dam ulsuk.

²⁹ Yudas zen zen Yesus mae han ano mae mo te-alana zirensik gweka,* zep ano wal bose walya ahakon man tim nuk, "Yesus man yap gublula- tembane maesa de yakla yala awe dep lop tan hap." Hwëna ahakon man tim nuk, "Zen te-alasa de tahalha zi hip kae gwebla-zimdin hip mes yap gulblula."

³⁰ Yudas in kim roti apna insa twinbirki, ki zep hëndep gola in kon te soka. Dekam mes kawesik.

Yesus kim titi tabin ol esena golz-inkike:

³¹ Yudas kim song gweka, Yesus ki zep asa gubiridaka, "Angkam mes zaul- ngatan zi mo lang nakore Zi Tanganna ano bosesa dikim Alap mam gun hup denakye. Hen Abon onakon sa kitak Alap mo bosena teip nulsublunda gwer.

³² Abon onakon kim de zini Alap mo bosena teip nulsublu'ak, Zen dekam sa hwëna Alap ano bosena etan dawemkam mam gulsublula-zëre onak kimë hata'akye. An nabakam sa ki lwal.

³³ Em ano dang tininak de walas, Ee molyë holokam eban mae golëlowehe gwék. Em esa Asa lë gweblal. Hwëna men kirekamë

Yahudi zisi gubirida gwék, angkam Ee hwëna emsa hen kirekamë gubirida'an: Men zao debë song gwe'an, em molye desan Asa értrok.

³⁴ "Zep angkam Ee titi tabin ol esena ansa ebe mae hap hli yulzim'in: Em enaka kwasang gwibirida gwen. Ee men kirekamë emsa kwasang gwibirida gwékke, em hen kire enkam enaka kwasang eibirida gwék.

³⁵ Kirekame kwasang naban lowehe gwe'ak, dekam sa tingare zini anakan emsa tame da gwibir, 'Zen eiwa Bian zëre hon de ang ta gwen wenya.' "

Yesus kim hamal hap Petrusu gublukake, "Em esa dan-ahan sonkam Asa zabebalala."

(Mat. 26:31-35; Mrk. 14:27-31; Luk. 22:31-34)

³⁶ Simon mensa hen nen gweblak "Petrus" kum, zen dekam zep takensiblika, "Bian, Em endan san esa song gwera?"

Ki zep ding gulbluka, "Men zao debë song gwe'an, em molye angkam Asa desan zertroka. Hwëna lamkam esa ki Asa zertrola."

³⁷ Ki zep hwëna etan takensiblika, "Bian, hwëna ee ba hap de angkam Emsa ang gwebla srëm gwen hap? Ee mesë tangan hohle gwenan- Emsa de zerzaunnuk de hwëna tin hipye."

³⁸ Ki zep hwëna ding gulbluka, "Em san eiwa tangane kirekam hohle gwe'ara?- Asa de zerzaunnuk de hwëna tin hipye. Eiwa denakaë emsa gublu'an: Ayang de gun srëmnak, em dan-ahan sonkam esa anakan Asa zabebalala, 'Zini in ee homë tame ta'an.' "

14

Yesus kim gubiridakake, "Ee an Bian osan dep de orana Zen."

¹ Yesus ki zep zëre hon de ang ta gwen wenya asa gubiridaka, "Bahem enlala nakon engalap gwen.

* 13:29 13:29 Yoh. 12:6

Alapsa em taibliblan, hen Asa emki taibliblan.

² Ano Bian mo gol yala, teksonna beyana. Hen Ëe desanë song gwe'an- em de zë lowehe gwen hap denaka dikim hamal gulzimdin hip. Kirekam de lwan srëmkam, Ëe molyë kirekam emsa gubiridananam.

³ Kimë kitak hohle gulzim'ik, dekam asa etan lwa halzal- emsa dikim zëwe dep kwang guludahan hapye, apdekam dikim emsa zëwe golëlowehe gwen hap.

⁴ Hen men zao debë song gwe'an, em orana tawana."

⁵ Tomas ki zep takensiblika, "Bian, ëe homë anakan dam ulsu'un, 'Em desan debe song gwe'ara.' Ëe banakan de orana insa tawa gweblan hap?"

⁶ Yesus ki zep ding gulbluka, "Ëe an Zen tangan- eiwa de oranaye, em dikim hëndep de gwën hap denaka hlaun hup denaye. Em de Abon osan ang gwen srëmkam, em bëjen em Bian onak hatan.

⁷ Asa de tame tankam, ki ano Biansa hen ema tame la'an. Angkam tangan esa Asa dawemkam tame lal, zebe hen Biansa tame la'an, hen mese Desa hla la gwek."

⁸ Pilipus ki zep gubluka, "Bian, ere mo Biansa abe mae hap zertreizim. Dekam asa ësam gwesil."

⁹ Ki zep ding gulbluka, "Ëe mesë sap holokam emsa golëlowehe gwek, zep Pilipus, em ba habe Asa tame ta srëm gwe'ara? Zini men zen Asa hla tanna, zen hen ano Biansa hla tanda. Zep em de Asa tame tankam, em ba hap de Asa gublun hap?- Ère mo Biansa de zertreizimdin hipye.

¹⁰ Em san home Asa taiblibla'ara?- Ëe an Zen, Bian han de zeraha-en gwen Zi niye, hen Zen aban aha-en. Ola mensaë ebe mae hap ayang gul gwizimnin, zen ëre en mo enlala nakore olsa hom. Hwëna Bian men Zen ano enhonak gwë gwenda, Zen Zen Asa zersyal gwe-gwenda.

¹¹ Ansa emsa gubirida'an, desa em taiblibin: Ëe mesë Bian han zeraha-en gwek, hen Zen mes aban zeraha-en gweka. Ano olsa de taiblibin srëmkam, ki ano owas-owas syal gwe-gwibin emsa em taibli gwibin. Zen dekam esa hëndep Asa laibliblal.

¹² Eiwa denakaë emsa gubirida'an: Zini men zen Asa taibliblanna, zen sa ano kim syal ta gwer- Ëe men kirekamë syal gwe-gwenanye. Asa de taibliblan zini, zen sa hen ano syla kwei nul gwer-banakare owassa de mamkam syal gwe-gwibinkimye. Zen mae hap sa ki lwa gwer: Sap Ëe Soson Zini Bian osan debë song gwe'an- dekon de emsa mas gwibirida gwen hap.

¹³ Em de Alapsa banakare mae hap ano bosekam abe tanna, Ëe asa desa ep syal gwe-gwibir-zim. Dekam sa zini Bian mo sosonna hla nul gwer, hen zep sa Biansa boltere da gwer.

¹⁴ Asa de banakare mae hap ëre mo bosekam abe tanna, Ëe asa ki desa ebe mae hap syal gwe-gwibir-zim."

Alap mo Enho de golëlowehe gwen hap kim gu-gubiridakake:

¹⁵ "Em de Asa emsa lwa gwe-blankam, ki esa ano ol san ang ta gwer.

¹⁶ Hen Ëe asa Biansa abe tal- Zen deka ebe mae hap Zisi Ahanaka zer sonezimki, Zen de emsa mas gwibirida gwen hap. Zen Zen sa hëndep denaban emsa golëlowehe gwera.

¹⁷ Zen Alap mo Enho. Zen Zen-eiwa de enlalasa de ing ta sone gwizimdin hip de Zi niye. Auhu-kama enlala zini, zen molya Desa neirin gwek, sap desa nwekam bëjen hla tan, hen zen bëjen Desa tame tan. Hwëna em en mese Desa tame lak, sap Zen emsa golëlowehe gwe'ara, hen Zen sa eno mae mo enhonak gwë gwera.

18 “Ëe molyë emsa kwasap walas mo kim da tasibik. Ëe asa etan emsa hlauluda gwezal.*

19 Molya holo gwëk, okamanak de zini dekam etan molya Asa hla da gwëk, hwëna em en esa Asa hla la gwer. Ëe asa etan tìn nikon ngaya gwer. Zep em hen esa ëngaya gwer.

20 Yakлана zëwe de hatankam, zen dekam esa abe hap dena anakan tame ul, ‘Zen eiwa mes Bi zeban zeraha-en gwëka. Hen eiwa nëban mae mes golëaha-en gwëka.’

21 Men zen ano ol san enlala tatete naban ang ta gwenan, zen zen Asa enna nola gweblanan. Zen kire zisi sa ano Bian kwasang gwibirida gwera- men zen kirekam Asa enna nola gweblananye. Aena hen asa kwasang gwibirida gwer, hëndep zep asa Ënaka zëbe mae hap zertrei gwizim.”

22 Hwëna ëna Kariot walya Yudas Bak mo apde bosena Yudas, zen dekam zep takensiblika, “Em bakan esa abe mae en hap Enaka zertreizimdi- okamanak de zi de Emsa hla tan srëmkamye?”

23 Ki zep ding gulbluka, “Zini men zen de Asa enna nola gwebla'ak, zen sa ano ol san enlala tatete naban ang ta gwer. Hen Bian sa desa kwasang gwibirida gwera, hen Ëe asa Bian han zëno mae mo enho nakon olëlowehe gwer.

24 Hwëna zini men zen Asa enna nolabla srëm gwe-gwenan, zen molya ano ol san ang ta gwëk. Hwëna emki ëenlala gwe-gwen: Ano ola, zen ëre onakore naka hom. Zen Bian onakorena- men Zen Asa zer sonekake.

25 “Ëe mesë nama de emsa golëlowe hennak kirekam gubiridanan.

26 Hwëna ano tim bwanak Bian sa emsa de mas gwibirida gwen hap de Zini insa ebe mae hap zer sonezimdi. Zen zëre mo Enho. Zen Zen sa hwëna emsa enlala sobirida

gwera- Ëe men desaë emsa tawa ta gwibikye. Hen Zen Zen sa eiwa de en naka ano weinak tawa tabir song gwera.

27 “Angkam Ëe ama ebe mae hap em dikim Alap mo taha tere-nak ëngalap gwen srëmkam lowehe gwen hap denaka hli yulzim'in- Aena men kirekamë ngalap gwen srëmkam gwë gwenanke. Auhukamanak awe aha zi molya kiresa ebe mae hap nolzimk. Zep bahem enlala nakon ëngalap gwen hen bahem ääirìn.

28 Em kie Asa asalblal kimë emsa gubiridal, ‘Ëe ama emsa hli yuluda'an, hwëna asa etan emsa hlauluda gwezal.’ Em de dawemkam Asa kwasang gwe-blankam, ki emaka ësam gwesil-anakan de Asa salblankamye, ‘Ëe Bian osan debë song gwe'an.’ Sap ano Bianna Zen Abon onakon teipsinnì. In zebë duwebla'an.

29 An zebë hamal hap emsa gubiridanan. Sap in kim kirekam jowe'ak, dekam esa Asa laibliblal.

30 Angkam Ëe molyë holokam eban mae kire hap de ola ziton gwibik, sap okamana ansa de irik gin zini dowal mo kigi' angkam man hata'ara. Zen Asa bëjen irik tan.

31 Ëe in zep asa Bian mo abe hap kitak de dwam gwibir-blin san ang gwer. Zen dekam sa okamanak de zini Asa anakan tame dal, ‘Zen eiwa man zëre mo Biansa ensa lwa gweblanda.’”

In kim kirekam asa tawa tabi'inka, ki zep etan asa gubiridaka, “Haen. Nen gola an kon sek gwen.”

15

Yesus kim gubiridakake, “Ëe an Zen anggur te tangan naye.”

1 Yesus ki zep etan asa tawa tabirki, “Ëe an Zen anggur te tangan naye. Em in hwëna ano hli-hlina.

* **14:18 14:18** Yesus insa “hlauluda gwezan” hap gubiridaka, zëno dam gulsunnu ahana, tìn hyanak de zënaka zertrei gwizimdin hip dena. Ahana hen Alap mo Enho de hata zan hap dena. Hen ahana, Zën de etan lwa halzan hap dena.

Ano Bianna, Zen hli-hli naka de tasyalsik gwibin hip de Zi.

² Ano hli-hli nik de ëtën srëmna, desa man blum gulsuk gwenda. Men zen ëtë gwenan, desa man ala naka hen mas-mas naka blum gulsuk gwenda- dekam de mamkam ëtë gwen hap.

³ Emsa mes ëre mo olkam tasyalsik gwibirki- dekam de dawemkam ëtë gwen hap.

⁴ Abon onak em ëmas gwirin, dekam Ëe asa eban mae golëaha-en gwer. Hlina zë-en bëjen eini tën. Diki apdenak timnik de ësaltil irinkim. Em hen kirekam. E-en molye eini ëtëk- aban de zeraha-en gwen srëmkamye.

⁵ “Ëe an anggur te. Em in hli-hlina. Zi de Abon mas gwirinni, hen Ëe de deban zeraha-en gwenna, dekam zëno danna beyana. Sap Ëe srëmkam, em bëjen ba maesa syal gwibin.

⁶ Zi de Abon mas gwirin srëmna, zen men kiye- anggur hlisa de tasyalsibinni. Zen ësasan gwenkam kire syauknuk yal tasen- zëwe de ëhwasden hap.

⁷ Em de aban zeraha-en gwenkam hen ano ol de ebon mae lwa gwenkam, dekam em basa de dwam gwibinkim, emki kire hap Alapsa abe ta gwen. Zen sa dekam ebe mae hap gol gwizimdi.

⁸ Em de dawemkam dan nik ëtë gwenkam, dekam sa aha zi ano Bian mo sosonna ebon mae onak hla nul gwer. Dekam sa hen emsa tame da gwibir, ‘Zen Abon de ang ta gwen weny.’

⁹ Men kirekam ano Bian Asa kwasang gwe-gweblanda, Ëe hen kirekamë emsa kwasang gwibirida gwenan. Ano kwasang-kwasangnak emki lowehe gwen.

¹⁰ Em de ano ol san enlala tatete naban ang ta gwenkam, dekam ano kwasang-kwasangnak esa lowehe gwer- Aena men kirekamë hen ëre mo Bian mo ol san enlala tatete naban ang gwe-gwenanke. Zep

Ëe zëno kwasang-kwasangnakë gwë gwenan.

¹¹ “Ëe mae habë kitak insa gubiridan- Abon onakore isrip-sri dekakim eno mae mo enhonak lwa gwëk. Dekam eno mae mo isrip-srina sa tangan taman kinï gwer.

¹² An zebë hen ola ansa hli yulzim'in: Enaka em kwasang gwibirida gwen- men kirekam Ëe hen emsa kwasang gwibirida gwenanke, em hen kirekam enaka kwasang eibirida gwëk.

¹³ Kwasangna taman kinin tangan weny an zen: Zi de wal bosyansa de ngaya tan hap zëre mo timsi sosok gunnu, hëndep zep de tinnï. Zen zen- sërkam de mam tangan wenyaye.

¹⁴ Em de ano ol san enlala tatete naban ang ta gwenkam, em ki eiwa ano wal bose wal tangan.

¹⁵ Angkam Ëe homë etan Abon de babu gwen zikim emsa gubirida'an. Sap kirekam ebe mae hap hom dakastilzim'in, sap babu gwen zini hom zëre mo zi bina in mo syala tame nul gwenan. In zebë hwëna angkam wal bose walkam emsa gubirida gwe'an. Sap mensaë Bian onak sane gwe-gwëk, Ëe desaë ebe mae hap ayang gul gwizimk.

¹⁶ Em home Asa dam lasik- Ëe dikim emsa bi gwibiridan hapye. Diki Ëyë emsa dam tasibik- dekam de ano olsa gol halada gwen hap, hen em dikim dan nik ëtë gwen hapye. Em insa danna ëtë gwe'an, zen hëndep de ëlwa gwen hap dena. Zen zep sa Bian eno mae mo abena dokwak gul gwera- em de ano bosekam abe ta gwenkamye.

¹⁷ Zen in zebë ebe mae hap ola ansa hli yulzim'in: Enaka kwasang eibirida gwëk.”

Zëre mo tim bwanak de zëre hon de ang ta gwen wenyaka karek tabin hip de ol:

¹⁸ “Auhu-kama enlala zini sa emsa husus neibirida gwer. Kirekam kim de ebon mae jowe gwe'ak,

zen dekam eenlala gwe-gwek, 'Ano teipsinni hen kirekam ne gweblak.'

¹⁹ Eme nama auhu-kama enlala zi niban enlala siri tankam lowehe gwe'anam, dekam zen maka emsa kwasang neibirida gwe'an. Hwena Ee mese emsa zebon mae onakon hlil inhak. Em mese zebon mae onakon wet so gwek, zen zep emsa husus neibirida gwe'an.

²⁰ Anakan mensa emsa gubirida gwek, desa emki enlala gwe-gwibin: 'Zi bina, zen mamna. Zebon de babu gwen zini, zen betekna.' Zep men kirekam ere mae mo mamna Asa ne gweblak, zen kirekam sa hen emsa neibirida gwer. Zen man Asa karek da gwek. Zep emsa hen kirekam sa karek da gwibir. Ano tawa tabin sin da-en ang ta gwek. Zep ebon mae osan kire enkam sa hen ang ta gwer.

²¹ Zen mae hap sa emsa karek da gwibir: Sap em Abon onak de weny, hen zen hom Bian, men zen Asa zer soneka, Desa tame da'an.

²² Ee de hatazan srëmkam hen tawa ta gwibin srëmkam, ki karekna molya zebon mae onak mamkam lwa'anam. Hwena angkam Ee mese tawa ta gwibik. Zep aumwa hap de zisi klis gunnuk zen banakan molya anakan eguk, 'Ee homë anakan etawa gwek, "Ee ama ekarek gwe'an."'

²³ Men nara Asa husus gweblanna, zen ki hen ano Biansa husus gwebla'ara.

²⁴ Owas-owasna men desa Ee zeno mae mo nwenak syal gwe-gwibir-zimk, aha zi hom tangan orep kirekam de owasna syal neibik. Ee de kirekam syal gwibir-zimdin srëmkam, ki karekna zebon mae onak molya mamkam lwa'anam. Hwena angkam zen mes hla nul gwek, hwena zen man Asa ere mo Bian naban husus nei gwizimk.

²⁵ Zen hwena kirekam de jowen hap mes ki lwak, sap men kirekam Alap mo olak anakan ale nukke,

'Zen man totoresasa asa husus ne gweblak,'*

zen bejen ki lwa srëm gwen.

²⁶ "Ano tim bwanak, dekam Ee asa emsa de mas gwibirida gwen hap de Zini insa zer sonezim. Zen Alap mo Enho- eiwa de enlalasa de ing ta sone gwizimdin hip de Zini. Zen Zen sa hen abe hap de ola ebe mae hap ing gul sone gwizimdi.

²⁷ Em hen dekam esa abe hap dena ol halada gwer. Sap Ee kimë Alap mo ola nonol tawa tabinkim kon gwesibir hanak, eme Asa ang e gweblak."

16

¹ "Ee mae habë hamal hap kirekam emsa gubiridanan- em ekakim Asa de taibliblan nakon ebutehal gwe srëm gwek.

² Abe hap de jal hap emsa sa but srëm gol-gola kon nolëalsa sone gwer, hen eno mae mo ahakorena sa damera gwer. Dekam in zen ki emsa neibirida gwe'ak anakan sa kil nil gwer, 'Alap man ano mae mo syala ansa sam gwesik gwibi'ira.'

³ Zen kirekam sa emsa neibirida gwer, sap zen Asa Bian han hom tame noso'an.

⁴ Hwena an zebë ki hamal hap dena insa emsa gubiridanan. Sap men dekam ki emsa kirekam neibirida gwe'ak, dekam esa eenlala gwe-gwer, 'Zen men desa hamal hap asa gubiridaka, angkam man ki lwa'an.'"

Alap mo Enho hap dena kim tawa tabirkike:

(Yoh. 14:16-18; 14:26; 15:26)

"Ee homë menkam kirekam emsa tawa ta gwibik, sap Ee dekam namaë emsa golëlowehe gwe'ak.

⁵ Sap angkam Ee ama etan lwa ha'an- men Zen Asa zer sonekake, Zebon osan dep. Hwena em home Asa lakensibli'an, 'Em enda san debe song gwe'ara?'

⁶ Hwena Ee ama emsa tame tabi'in: Asa de kirekam sane

* 15:25 15:25 Mzm. 35:19; 69:5

tankam, eno mae mo enlalana man tangan dowe hana'ara.

⁷ Hwëna eiwa denakaë emsa gubirida'an: Ëe de emsa hli yuludanna, zen ebe mae hap man tangan sam gwesizim'in. Sap Ëe de emsa hli yuludan srëmkam, ki emsa de mas gwibirida gwen hap de Zini in molya ebon mae hata zaka. Ëe de emsa hli yuludankam, Ëe asa zer sonezim.

⁸ Zen kim de hata'an zaka, Zen dekam sa tingare okamanak de zi hip eiwa dena goltrei gwizimdi-kareksa de gol gwen srëm hap dena, dam-damkam de lowehen hap dena, hen Alap de klis gun hup dena.

⁹ Sap okamanak de zini Asa de taïblïblan hap man baes ta gwenan, zep Alap mo Enhona sa zëbe mae hap anakan goltrei gwizimdi, 'Em ema dekam ëkarek gwe-gwenan.'

¹⁰ Ëe Bian osan debë song gwe'an, zep ano tim bwanak Zen sa dam-damkam de lowehen hap denaka tawa ta gwibiri.

¹¹ Alap mes dowal mo kigina karek tan hap gu-gubluka. Zep Alap mo Enho de hata zankam, Zen sa hen Alap de tingan klis gun hup denaka tawa ta gwibiri.

¹² "Ano emsa de tawa tabin hip dena sap nama blala. Hwëna angkam em molye dokwak uk.

¹³ Hwëna Alap mo Enho, Zen Zen-eiwa denaka de ayang gul gwizimdin hip de Zi niye. Zen Zen sa eiwa de oranak dep emsa golëwet so gwerä. Zen molya zëre en mo enlala san tawa ta gwibirki, hwëna men desa de Abon sane gwe-gwe'anka, Zen desa sa ebe mae hap ayang gul gwizimdi. Zen zep sa hen ngein sin dep dena hamal hap goltrei gwizimdi.

¹⁴⁻¹⁵ Tingan mensa Bian bi gwibi'ira, Ëe desa apdenakë bi eibi'in. Zen in zebë emsa gubiridal, 'Alap mo Enhona men desa de Abon sane gwe-gwe'anka, Zen desa sa ebe mae hap ayang gul gwizimdi.' Zep zëno syala kon, zini sa ano bosena

teip nulsunda gwer."

Yesus de etan ngaya gwen hap dena kim tame nul srëm gwëk, hen ol gu sonensa de dokwak gun hup kim gu-gubiridakake:

¹⁶ "Molya holo gwëk, em dekam molye etan Asa hla lak. Hwëna etan holo gwëhan srëmnak esa Asa hla lal."

¹⁷ Zëre hon de ang ta gwen wenya, ëe ahakon dekam zebë ënaka anakan lakensibirida gwe'ak, "Zëno enlalana banakan lwabla'ara? Nen home tame ul- in kim anakan gulu, 'Molya holo gwëk, em dekam molye etan Asa hla lak. Hwëna etan holo gwëhan srëmnak esa Asa hla lal.' Hen nen home tame ul- in kim anakan gulu, 'Sap Ëe Bian osan debë song gwe'an.' "

¹⁸ Ama hen anakan ënaka lakensibirida gwe'ak, "In kim anakan gulu, 'Molya holo gwëk,' dam gulsunnu banakan? Nen home dam ulsu'un."

¹⁹ Hwëna Yesus mes anakan asa tame tabirki, "Zen man Asa de takensiblin hap ëdwam gwe'an," ki zep asa takensibiridaka, "Em san teibin hibe enaka lonbirida'an?-insa anakan emsa gubiridalye, 'Molya holo gwëk, em dekam molye etan Asa hla lak. Hwëna etan holo gwëhan srëmnak esa Asa hla lal.'

²⁰ Eiwa denakaë emsa gubirida'an: Em esa aïtin-aïtin niban Asa gosa la gweblal, hwëna auhukama enlala zini sa dekam ëisripsri gwë-gwer. Em hwëna dekam enlalana esa ëdowe hanal, hwëna enlala dowe hananna in isrip-sri hap sa etan liwe hera-

²¹ men kirekam hen, we de eisbir anenna. Zen dekam enlalana man ëdowe hana gwenan. Sap dekam mes zaunun- zëno hlësgwan-hlësgwan gwen hap denakye. Hwëna kim de jaha gwe'ak, zen dekam sa sang-sangna insa eititi gwibir. Sap dekam walasna insa sa isrip-sri gweblal.

²² Em hen kirekam esa ëgwër: Angkam em enlala dowe hanan nabane lowe he'an. Hwëna em kime etan Asa hla la'ak, em dekam tangan

esa Asa isrip-sri ëblal. Isrip-srina in, zen hëndep dena. Zini bëjen kire isrip-srina ebon mae onakon gulsuzimdin.

²³ Dekam em etan molye ëdwam gwëk- Asa de srip gulsuzimdin hip takensiblin hapye.

“Eiwa denakaë emsa gubirida'an: Ano bosekam de ba mae hap Biansa abe tanna, Zen sa ebe mae hap gol gwizimdi.

²⁴ Em home menkam ano bosekam ba mae hap Biansa abe la gwëk. Hwëna angkam emki abe ta gwen. Dekam esa ulin gwer. Zen dekam tangan sa eno mae mo isrip-srina taman kinï gwer.

²⁵ “Ano ola ebe mae hap gulk sun de blaonzimdin makan mes yap lwal. Hwëna yaklanak sa hatal, dekam molyë etan gulk sun de blaonziminkim emsa tawa ta gwibik. Hwëna dam-dam enkam asa ëre mo Bian hap dena ebe mae hap srip gulsuk gwizim.

²⁶ Yaklana iwe de hatankam, em dekam molye etan Asa en gweblak- eno mae mo abesa de Bian hap ayang gul gweblan hapye. Hwëna en esa Biansa ano bosekam abe la gwer.

²⁷ Sap Bian Zëna man emsa kwasang gwibirida gwe'ara, sap em ema Asa esa ola gweblak, hen em ema Asa anakan laibliblak, ‘Zen eiwa Alap onakon hataka.’

²⁸ Ëe eiwa okamana awe dep Zëbon onakonë hatazak. In zëbë etan Zëbon osan dep lwa ha'an.”

²⁹ Ëe zëre hon de ang ta gwen wenyä dekam zëbë enblak, “Angkame dam-dam enkam asa gubiridanda- gulk sun de blaonzimdin srëmkamyë.

³⁰ Angkamë Emsa tame lanan: Em kitak tawana. Em zi mo enlalana ema tame ta gwizimnira, zep Emsa de takensiblin srëmnake ap ding gul gwizimnira. Zen in zëbë tangan

Emsa laiblibla'an, ‘Em eiwa Alap onakone hata zaka.’ ”

³¹ Dekam zep hwëna ap ding gulzimki, “San ha eiwa tangane Asa laiblibla'an?

³² Emki ësan: Angkam mes tangan golek de gwer, em dekam esa ere mae mo gol-gol san dep ësyawer. Em dekam esa Asa hli la gukhal. Hwëna ëre mo Bianna molya zë Asa da tasiki, sap Zen nama Asa zergwë gwe'ara.

³³ An kitak mesë emsa gubiridanan- aban de zeraha-en gwenkam ekakim ëngalap gwen srëmkam lowehe gwëk. Auhukamanak awe karekna mam naka esa oltowe gwer. Zep enlala tatete naban lowehe gwëk- men kirekam hen Aena enlala tatetekam de zaunkum auhu-kama mo sosonna holenak zaubir anekke.”

17

Yesus kim Biansa zëre hon de ang ta gwen wenyä kip abe takake:

¹ Yesus kim kirekam gubiridaka, Zëna ki zep ngli san kara gwe seka, ki zep Biansa gu soneblaka, “Bian, angkam yaklana mewe mes zaunun. Angkam dekam ere mo Tanena ano bosena tingare zi mo nwenak ap teip gulsublu- Ëe akakim hen ere mo bosesa zëno mae mo ngirinnik teip gulsuk gwëk.

² Sap Em mese tingare zi aususa de bi gwibiridan hap dena abe hap golblaka. Hen zen de ëngaya gwen hap dena mensa Ena abe hap lup gulbluka, Ëe asa zëbe mae en hap hëndep de lowehen hap denaka gol gwizim.”

³ Ëe, Yohanis, in zëbë hen Alapsa anakan gu sonebla'an, “Bian, an diki zen- hëndep de lowehe gwen hap denaye: Eiwa de Zini Alap Emsa de tame tanna, hen ere mo zer sonen Zini Kristus Yesusu de tame tanna. Zen ëe dekonë ëngaya gwe'an.” *

* **17:3 17:3** Ayat tigana ansa ahakon man dam nulsuk gwenan, “An Yesus mo ol.” Hwëna men zen ansa Orya olkam li nul sonek anakan dam nulsuk, “An Yohanis mo ol.”

4 “Bian, Ëe mesë eno bosena okamanak de zi mo nwenak teip gulsublunda gwek, sap Ëe zëno mae mo nwenak mesë syala sul sonek- mensa Ena abe hap wei yul soneblakaye.

5 Zep Bian, angkam Emki etan abe hap golblan- Ëe dikim eno alp nakon teipsinkim nikirin hip, nonol men kirekame okamana ansa de yang gulsun srëmnak teipsinkim inikin gwekake.

6 “Em mese okamana an kon abe hap zini hlilblink, hwëna zen bina ere tangan mo dena. Bian, Ëe mesë ebe hap dena zëbe mae hap goltrei gwizimk, hen zen angkam mes ere mo ol san ang tal.

7 Zen mes angkam anakan tame nul: Ano syala hen ola, zen kitak Ebon onakorena- mensa Ena abe hap golblakake.

8 Sap ola mensa Ena abe hap golblaka, Ëe mesë desa ayang gulzimk, hen zen mes desa dokwak nuk, hen mes tame nuk. Zen mes Asa anakan daïbliblak, ‘Zen eiwa Alap onakon hata zaka, hen Zen zer soneka.’

9 “Ëe tingare okamanak de zi hip homë Emsa abe ta'an. Hwëna men desa en Ena abe hap lup gulblukake, zëbe mae en habë Emsa abe ta'an, sap zen zen- ere mo denaye.

10 Ano bi gwibiridan weny, zen hen kitak ere mo dena. Hen ere mo bi gwibiridan weny, desa hen kitak apdekame bi eibirida'ara. Zen zep sa hen ano sosonna aha zi hip noltrei gwizim, hëndep zen hen sa ano bosena teip nulsublunda gwer.

11 Angkam Ëe ama Ebon osan dep lwa ha'anzal. Ëe homë etan okamanak awe deban mae golëlowe he'an, hwëna nëno nik mo bi eibiridan weny nama sa zao lowehe gwer. Zep Lalak Zini, Bian, nëno nik mo hlil irin zini insa emki tatetekam de Ebon en ëzauk gwen hap denaka gol gwizimdin. Zen dekam sa ëaha-en gwe-gwer- Nëna men kirekame hen aha-en ëkake.

12 Ëe kimë nama golëlowehe gwek, Ëe ama Ebon dikim tatem ëzauk gwen hap dena kim tatete ta gwibik. Hen Ëe ama dawemkam golëzauk sone gwek, zep aha-en mae homë syauk sun dep de ora san de gwë hannak kara ta sonek. Hwëna aha-en tangan syal heka. Hwëna zen insa kirekam gwëka, zen ere mo olsa dikim sul sonen hap ki lwak.*

13 “Bian, Ëe angkam ama Ebon osan dep lwa ha'anzal, an zebë nama de okamanak gwën nakon zëno mae mo inik emsa gu sonebla'an- ano isrip-srisa dekakim zëre mae mo enhonak sowe henkam neis gwibik.

14 Ola mensa Ena abe hap golblaka mesë ayang gulzimk. Hwëna auhukama enlala zini man Abon de ang ta gwen weny ansa husus neibirida gwenan, sap zen okamana awe dep denaka hom. Zen ngatan zi mo lang san dep dena. Ënaka hen kirekam husus në gweblanan, sap Ëe hen awe dep denaka hom.

15 Bian, Ëe Abon de ang ta gwen zini ansa, okamana an kon de lup gul inehan hap homë Emsa abe ta'an. Hwëna diki mae habë Emsa abe ta'an: Dowal mo kigi onakon Emki langa tasik gwibin.

16 Men kirekam Aena okamana awe dep denaka hom, zen hen kirekam. Zen zep auhukama enlala zi niban enlala siri tankam lowehe srëm gwe-gwenan.

17 Bian, eno ola zen eiwa de enna. Ere mo eiwa de ola inkam emki Abon de ang ta gwen weny ansa lalak tasibin- lalak nik dekakim ere en hon lowehe gwek.

18 Men kirekame Asa okamana an san dep zer soneka, Ëe hen kirekamë desa tingare lang san dep lup gul sone'an.

19 Zen in zebë ëre mo timni ebe hap sosok gulblu'an- desa dikim mas gwibiridan hap, zen dekakim tangan ere en hon ëtal gwesik.

* 17:12 17:12 Mzm. 41:10; Yoh. 13:18

20 “Angkam an zen lowe he'an, zèbe mae en hap homë Emsa abe ta'an. Hwëna men zen de zëno mae mo ola kon Asa daïblibla'ak, zèbe mae habë hen Emsa abe ta'an.

21 Dikire zen kitak ëaha-en gwek. Dikire zen Nësa niaha-en gwek- Nëna men kirekame enho aha-erekam ë gwendake. Zen de kirekam ëaha-en gwenkam, zen dekam tangan sa okamanak de zini Asa anakan daïblibal, ‘Zen eiwa Eme Asa zer soneka.’

22 Ëe mesë ëre mo ngatan zi mo lang nakore sosonna zèbe mae hap golzimk- men desa Ena abe hap golblakaye. Zen zep sa hen ëaha-en gwer- Nëna men kirekame hen aha-en ëkaye.

23 Asa Eme enho nakon zergwë gwenda, hwëna Ëe asa desa enho nakon golëlowehe gwer. Zen zep sa tangan ëaha-en gwer. Zen dekon zep sa hen okamanak de zini anakan tame nul gwer, ‘Zen eiwa, Eme Asa zer soneka.’ Zen zep sa hen anakan tame nul gwer, ‘Em eiwa ema Abon de ang ta gwen wenyansa kwasang gwibirida gwenda- men kirekame hen Ena Asa kwasang gwe-gweblandake.’

24 “Bian, zini men desa Ena abe hap lup gubluka, Ëe ama zen de Abon onak lowehe gwen hap dwam gwe'an- men zaoë Aena gwë gwe'akke. Zen dekam sa ano ngatan zi mo langnak de sosonna hla nul gwer- men desa Ena abe hap de kwasang hap okamana ansa de yang gulsun srëmnak golblakaye.

25 Bian, Em dam-dam enkam de klis gul gwen hap de Zini. Okamanak de zini hom Emsa tame da'an, hwëna Ëe mesë Emsa tame tak. Hen Abon de ang ta gwen wenyansa an mes hen anakan tame nuk, ‘Eme Asa zer soneka.’

26 Ëe mesë ebe hap dena zèbe mae hap goltreizimk, hen nama asa kirekam goltrei gwizim. Zen zep sa Asa enna nola gweblal- men kirekam Ena hen Asa enna lwa gwe-

blandaye. Ëe dekam asa deban mae apdekam golëaha-en gwer.”

18

Yesussu kim balk dakke:
(*Mat. 26:47-56; Mrk. 14:43-50; Luk. 22:47-53*)

1 Yesus in kim kirekam Alapsa gu soneblasiki, ki zep zëre hon de ang ta gwen wenyansa golësek gwekawe-ya tanena Kidron mo men eihsa san dep. Zao zaitun trana ki. Zao zep asa golëbiti gweka.

2 Hwëna Yudas Bak in zen zerguku, zen mes zaitun trana insa tawa gweblaka, sap Yesus etan-etankam zao asa golëtagal gwe-gweka.

3 Ki zep zë Yudas jana nabare zini golëyaing gwe zaka. Ahakon Roma mo jana nabare zi, hen ahakon Alap mo golsa de kara gul gwen jana nabare zi- mensa Farisikam de zi niban Alap mo golak de syal tan zi mo mam-mam naban lup nul sonekke. Zen jana, nëbok, hen te tek maesa deirenk, hen ahakon seipsi deirenk hen lampusa.

4 Hwëna Yesus mes kitak anakan tame gulku, “Asa kirekam sa nëblal,” zep ala ta gubiridaka, ki zep zë takensibiridaka, “Em narasae lëbla'an?”

5 Ki zep ding nulblik, “Nazaret walya Yesussu.”

Ki zep ding gulzimki, “Ëe an Zen.”

Yudas in zen zerguku, zen zë golëzau'unka.

6 Yesus kim kirekam ding gulzimki, “Ëe an Zen,” dekam zep jana nabare zini in tingan lure san ëesek gwehak, ki zep mumuk ennak owas hap boklena kom dablak. Hwëna zëna hom tame nuk- Alap insa kim kirekam gweibiridakaye.

7 Dekam zep etan takensibiridaka, “Em narasae lëbla'an?”

Ki zep etan ding nulblik, “Nazaret walya Yesussu.”

8 Dekam zep ding gulzimki, “Ëe mes-am emsa anakan gubiridanan,

‘Èe an Zenke.’ Asa en de tëblanna, dikire ahakore wenyä an sek gwek.”

⁹ Zen mae hap kirekam gubiridaka: Zère mo nër hom de Biansa de gu soneblanna insa dikim sul sonen hap. Sap Zen anakan gu soneblaka, “Èe ama dawemkam golèzauk sone gwek, zep aha-en mae homë syauk sun dep de ora san de gwë hannak kara ta sonek.”*

¹⁰ Simon, aha bosena Petrus, ki zep nèbok zemka mol ineka, dekam zep Alap mo golak de teipsin zi nik de babu gwe-gwen zini Malkussu sap zip soka. Hwëna dam san de ing ala en naka zep blansibli kinika.

¹¹ Hwëna Yesus zë gubluka, “Nèbokna insa em etan lil sonen. Em san ema anakan Asa jalse gwebla'ara?– ‘Mensa Bian syal dohon-honna ebe hap wei yul soneblaka, dikire lwak.’”

Yesussu kim Hanas Bak hap nërtrëblakke:

(Mat. 26:57-58; Mrk. 14:53-54; Luk. 22:54)

¹² Ki zep Roma mo jana nabare zi mo mamna walas zeban hen Yahudi kore jana nabare zi niban zibalk taka, hen tahana zitatak soblaka.

¹³ Zen nonol Hanas Bak osan dep nërhak, men zen nonola Alap mo golak de syal tan zi nikon teipsikike-Kayafas Bak men zëno wenamsa golkake. Hwëna Kayafas in, zen tahunna inkam Alap mo golak de syal tan zi nikon teipsiki.

¹⁴ Kayafas, zen in zen menkam Yahudi zi mo mam-mamna tame gun srëmkam anakan gubiridaka, “Diki dawemna nèbe mae hap aha-ere zi de tinnì aäris- dekakim tingare Yahudi zi juwe srëm gwek.”*

Petrus kim nonol Yesussu zabëblakake:

(Mat. 26:69-70; Mrk. 14:66-68; Luk. 22:54-57)

¹⁵ Simon, aha bosena Petrus, hen aha zini men zen Yesussu ang gwe-gweblaka* lun kon zep èrtro kinika. Hwëna aha zini in zen ang gwe-gweblaka, zen Hanas Bak mo dokot ahana. Zep kim Yesussu Hanas Bak mo gol homannak de kol sonna iwe nerti'inzak, zen en zep dekam hen til zika.

¹⁶ Hwëna Petrus ënakon zep zau'un onka- lilikin golek denakon. Aha ang gwe-gweblan zini in dekam zep etan wet soka, ki zep lilikinsi de kara so gwen hap de babu gwen wenyä ban golton'anaka, ki zep hwëna Petrus hun lil zika.

¹⁷ Lilikin kara so gwen hap de wenyä in dekam zep Petrussu takensiblik, “Em san hen ahana?– zini in hon de ang gwe-gwenna.”

Ki zep ding gulbirki, “Èe an zen hom.”

¹⁸ Langna dekam man bot-bot gwe'ak, zep zëwe de babu gwen zi niban jana nabare zi niban mes syauknu bla dasik, † hen zëwe tuwirin hip èzau'uk. Petrus dekam zep hen golek de tabir zika, zao zep hen tuwirin hip zau'un zaka.

Hanas Bak kim taken-taken gwe-blakake:

(Mat. 26:59-66; Mrk. 14:55-64; Luk. 22:66-71)

¹⁹ Alap mo golak de ëpba teipsin zini in dekam zep Yesussu mae hap denaka taken-taken gweblaka-Zëbon de ang ta gwen zi hip dena hen zëno tawa tabin hip denaka.

²⁰ Dekam zep ding gulbluka, “Èe ama damkam tingare zi nwenak tawa ta gwibik. Ano tawa tabinni kitak Alap mo golak hen but srëm gol-golak- men zëwe en Yahudi zini

* **18:9 18:9** Yoh. 17:12; Yoh. 6:39 * **18:14 18:14** Yoh. 11:49-53 * **18:15 18:15** Yohanis man anakan ale gul gweka, “Ahana men zen Yesussu ang gwe-gweblaka.” Zen mes yap ayatna awe hen zère mo bosesa golzabeka. Emki Yoh 13:23 mo otde alenak hlaun. † **18:18 18:18** Yohanis mo ale nakon man dam gwesik, syauknu insa bla dasik, zen hamal syauk debal bunsu. Desa te-alakam kap da gwek, sap kire syauknu sal-sal tanganna hen butna hom.

ëtagal gwe-gwenanke. Ëe homë aningkim ba ol maena tawa tabik.

²¹ Zep ba hap de kire hap Asa takensiblin hap? Diki men zen Asa sane da gwekke, desa emaka takensibirida'ara, sap zen tawana-mensaë tawa ta gwibikye."

²² Kirekam kim ding gulbluka, jana nabare zini ahanik zep tahakam mipna lwa soblaka, deban gulbluka, "Alap mo golak de teipsin zini san ki kirekam ding nul gweblanan?"

²³ Hwëna Yesus ki zep ding gulbluka, "Ëyë botonkam ding gulunam, dekam hwëna emaka gubiridala, 'Zen kirekam man boton gwe'ara.' Hwëna eiwakam insa ding gul, em ba habe Asa lek tyanda?"

²⁴ Hanas dekam zep gubiridaka-Alap mo golak de teipsin zini Kayafas Bak osan dep de zersong gwen hap. Yesus mo tahana dekam nama tatak soblanna.

Petrus kim etan zabeklakake:

(*Mat. 26:71-75; Mrk. 14:69-72; Luk. 22:58-62*)

²⁵ Petrus nama syauk alpna iwe zau'unka. Ki zep zë ahakore nik etan dakensiblik, "Em san ha zëbon de ang gwe-gwen naka hom?"

Ki zep ding gulzimki, "Ëe zëbon de ang gwe-gwen naka hom."

²⁶ Hanas Bak hon de babu gwen zini ahana man hen zao gwë'anaka. Zen Petrus insa ing alana blansibli kinika, zëno iye. Zen zep etan gulbluka, "Ëe Yesus hun apdenakë emsa zaitun tranak aker."

²⁷ Desa hen man ding gulbluka, "Asya, aban home." Hëndep dekam zep ayangna guku.

Pilatus Bak kim taken-taken gwe-blakake:

(*Mat. 27:1-2,11-26; Mrk. 15:1-15; Luk. 23:1-5*)

²⁸ Kak tangannak, zep Kayafas mo gola kon Yesusu nërsong gwëgubernor Pilatus mo gol san dep. Zen zen dekam Roma mo bosekam gubernor gwëka. Yahudi mo mam-mamna in hom dekam gola iwe

biti gwëk, sap Yahudi mo auyan-azana mes anakan jalse neibiridak, "Yahudi srëm zi mo golak bahem tin. Ki esa ëkun gwër." Zep hom Pilatus mo golak biti gwëk, sap zen man yaklana inkam Paskanak de tembane yawalak dep ëhohle gwë'ak.

²⁹ Ki zep Pilatus Bak wet so-biridaka, ki zep zë takensibiridaka, "Zini an banakan karek gwëka?"

³⁰ Ki zep ding nulblik, "Zen de karek gwë srëm gwenanam, ëe molyë ërhalan zanam."

³¹ Ki zep Pilatus ding gulzimki, "Ki amki ere mae mo titi tabin ola kon klis uk hen karek lak."

Hwëna ki zep ding nulblik, "Ëe amaka, hwëna Roma mo irik ginni em mese asa anakan jalse eibirida gwëk, 'Yahudi zini em e-en bëjen em zisi tok hap karek tan. Hwëna diki nonol Roma mo mam-mamna kip em zerguzimdin- zen de zëno kareksa hlaulblunkam dekakim dak.'"

³² An mae hap ki jowek: Sap Yesus mes hamal hap anakan tawa ta gwibirki, "Ëe kirekam de tinsi asa hlaul." Zep zëre mo ola insa de sul sonen hap, kirekam zep ki hëndep lwak.

³³ Pilatus ki zep etan gol mwa san dep til halka, ki zep jana nabare wenyaka gubiridaka- Yesusu de zertilzin hap. Zao zep takensiblika, "Em san ha eiwa Yahudi zi mo teipsinni?"

³⁴ Ki zep ding gulbluka, "San ha ere en mo enlalakame ki kirekam Asa takensibli'ara? San ha aha zi man emsa nenblal- kirekam de Asa takensiblin hapye?"

³⁵ Ki zep ding gulbluka, "Ëe san Yahudi wal! In dwan Yahudi bose uk am Alap mo golak de mam-mam weny ban abe hap emsa nërgublunanzal. Em banakane karek gwëka?"

³⁶ Ki zep ding gulbluka, "Ano irik ginni zen auhu-kamanak awe dep hom. Ëe de okamanak irik ginkim, dekam ano irik gin weny maka

ëeija'an- Asa de Yahudi mo mam-mam mo tahanak zerguzimdin srëm hap. Hwëna ano irik ginni okamanak awe dep hom."

³⁷ Dekam zep Pilatus etan takensiblika, "Zep ki san ha em teipsinni?"

Ki zep ding gulbluka, "In kirekame gunda, zen kirekamke. Ëe mae habë okamanak hatazak: Eiwa denaka de tawa ta gwibin hip. Eiwa de enlala nabare zini, zen man Asa i-san i-san në gweblanan."

³⁸ Dekam zep hwëna ding gulbluka, "Eiwa dena bëjen em tawa tabin, sap eiwa dena toton nara dep?- klis gunnu."

Te-lidak sonnak de makan ta irin hip kim asas nëblakke:

(*Mat. 27:15-31; Mrk. 15:6-20; Luk. 23:13-25*)

Kim kirekam guku, ki zep etan Yahudi mo mam-mam osan dep wet soka, ki zep zë kitak zi trana in han gubiridaka, "Ëe homë zini an mo karekna hlaulblunan."

³⁹ Hwëna eno mae mo gubernor-gubernora, ëe dwan yakla yala Paskanak am-am ëgwë gwenan-bwinak de zini men desa tan hap kalang neibirida gwenan, ahanaka de tïngare zi mo gublun san wet son hap zeser sonezimdin. † Zep ëe ama emsa takensibirida'an: Ëe narasa asa namen ebe mae hap hil ti sonezim? San ha zini an zen zënaka tim ti'ara, 'Ëe an Yahudi mo teipsinni,' san ha desa asa ebe mae hap zeser sonezim?"

⁴⁰ Ki zep ol mamkam ëgu ane gwe'ak, "Zini insa bëjen! Barabassa ap hil ti sonezim." Barabas in, zen asaskam de te-alasa alal ta gwizimdin hip de zi.

† **18:39 18:39** Men zen Roma mo bosekam gubernorkam irik nil gwek, zen hom mwin-mwankam totoresas bwinak de zini nuswe sone gwek. Diki Yahudi mo yakla yawala Paska ennak ki kirekam lwa gwek. Ahakon in zen bwinak lowehe gwek, zen men zen Roma mo irik gin nikon de wet son hap ëasas gwe-gwekke- Israel dikim ëzë-en gwen hap. Zep gubernor-gubernora mae hap nëser sone gwibik- Yahudi zi dikim engka en sam gwesibirida gwen hap.

19

Pilatus mo jana nabare zini kim Yesussu lamang da gwe'akke:

(*Mat. 27:27-31; Mrk. 15:15*)

¹ Pilatus ki zep jana zisi gubiridaka- Yesussu de zerhan hap, zao de mam enkam tangolen hap.

² Jana zini in dekam zep dokot të ngi-ngisa mlin-mlin nuk, desa zep nolak ala nul soneblak- teipsin zi hip de emaskam de weir sosublun makare naka. Zen hen teipsin zi hip de bajusa, sam dan kil makare naka, ala nosoblak.

³ Zëna zao zep botonkam blikip neisik gwebla'anzak- anakare swrë tan ola ban, "Dawem, bian. Em in zen- Yahudi mo teipsin niye." Kire ola ban zep nwe-mase san lek-lek da gwe'ak.

⁴ Etan kim nër halzak, Pilatus ki zep etan wet sobirida zaka, ki zep zë gubiridaka, "Emki hla tan. Ëe ama etan ep zertreizim'in- em dikim anakan ëtawa gwen hap, 'Ëe homë zëno karekna hlaulblunan.' "

⁵ Yesussu kim nërwet so'anzak, dekam nama ngi nabare dokot të weir sosun nuban hen teipsin zi hip de baju naban. Pilatus dekam zep gubiridaka, "An zen- zini inye."

⁶ Hwëna Alap mo golak de mam-mam wanya hen Alap mo golak de jana nabare zi mo mam-mamna kim hla dak, dekam zep ol mamkam ëgu ane gwe'ak, "Desa te-lidak sonnak makan laink. Te-lidak sonnak makan laink."

Pilatus ki zep hwëna ding gulzimki, "Ki amki e-en te-lidak sonnak makan laink, sap ëe homë mae karekna hlaulblul."

⁷ Hwëna Yahudi zini in dekam zep ding nulblik, "Are mae mo titi tabin olak zen eiwa tan hap dena, sap zen man zënaka gubluka, 'Ëe an Alap mo Tane.' "

8 Pilatus kim kirekam sane gwe'anka, dekam zep dawemkam airi'anka.

9 Dekam zep etan gol zebon til halka, hen dekon zep etan Yesussu de zertilzin hap gubiridaka. Kim nertilzik, zao zep takensiblika, "Em in enda kone hata zaka?" Hwena hom ding gulbluka.

10 Dekam zep gubluka, "Em san ema asa de ding gulblun hap baes gwe'ara? Ki san abon onak hom?- emsa de zeser sonen hap denaye, ahaksa emsa de te-lidak sonnak makan ta irin hip denaye."

11 Dekam zep ding gulbluka, "Alap de ebe hap golblan srëmkam, dekam eno sosonna hom- dekam de Asa banakan mae gwëblan hap denaye. Zen zep, zini men zen Asa ebe hap nergublul, zëno mae mo karekna man ebon onakon taman kini'an."

12 Pilatus kim kirekam salblaka, dekam zep wet soka, zao zep sap zi beyana insa etan gubiridaka- dekam de Yesussu zeser sonen hap. Hwena Yahudi zi mo mam-mamna in man ol mamkam anakan ëgu ane gwe'ak, "Ki san em hen Romak de teipsin tangan zi nik mo jal zi?! Yesus in man zënaka gu gwe-blaka, 'Ëe an eno mae mo teipsinni.' Kirekam de gunnu, zen nëno mae mo Romak de teipsin tangan zi nik mo jal zi. Eme zeser sone'anka, dekam man nwe-mase gwe'an: Em hen nëno mae mo Romak de teipsin tangan zi nik mo jal zi."

13 Kirekam kim salbiridaka, dekam zep Yesussu de zerwet son hap gubiridaka. Zëna dekam zep klis gun hup de komal tum yawalak nikin aneka. Homanna men zëwe nikinki, orep mes bose nuk "Kaso Homan" kam. Desa Ibrani olkam man nen gwibirin "Gabata" kam.

14 Yakla nwena dekam bolak mes zauku, hen yaklana in, Paska hap de yaklana enamna, kim Paskanak dep de kambingni damerak- dekam de ka'an aumwa hap tembane yawalsa hohle gun hup. Pilatus dekam zep

gubiridaka, "An zen, eno mae mo teipsin niye."

15 Hwena zi beyana in man etan mamkam ëgu ane gwe'ak, "Jek-jak lak! Jek-jak lak. Te-lidak sonnak makan laink."

Pilatus dekam zep takensibiridaka, "San ki ëe asa ere mae mo teipsin zini ansa te-lidak sonnak makan tain?"

Alap mo golak de mam-mam wenyä dekam zep ding nulblik, "Ano mae mo teipsin zini aha-en-Romak de teipsin tangan zi niye. Ahana hom."

16 Hëndep ki zep Pilatus te-lidak sonnak de makan ta irin hip zerguzimki. Jana nabare zini dekam zep hëndep irik dahak.

Te-lidak sonnak kim makan da inkke:

(Mat. 27:31-44; Mrk. 15:20-32; Luk. 23:26-43)

17 Yesus hup dekam zep zëre hap de te-lidak soblanna wë noso soneblak. Ki zep hëndep wë so halka, hëndep kwatap tek bosena Zi Nol Swrak zihataka. Ibrani olkam man desa nen gweblanan "Golgota" kam.

18 Zao zep te-lidak sonna iwe makan daink. Zao aha darena hen man makan nosoink- Yesus mo eiha-lip eiha-lipkam. Zënaka ngirinnik.

19 Pilatus man gubiridaka- dekam de Yesus mo te-lidak sonnak anakarekam de ol ale gunsu makan gul irin hip, "An Nazaret walya Yesus- Yahudi zi mo teipsinni."

20 Yahudi zini beyakam ol ale gunnu insa baca nul gwe'ak, sap men zëwe makan daink, zen Yerusalem kon langanak hom. Hen zen dan-ahare olkam ale nuk: Ibrani olkam, Roma mo olkam, hen Yunani olkam.

21 Alap mo golak de mam-mamna dekam zep Pilatussu nenblak, "Emki alena insa de wet gulsun hup gubiridan. Bap zen anakan lwan, 'Yahudi zi mo teipsinni.' Diki anakan de ale gun hup emaka gubiridala, 'Zini an

man zënaka gu gweblaka, “Èe an Yahudi zi mo teipsinni.” ’ ’ ’

²² Hwëna Pilatus man ding gulzimki, “Men kirekamë ale gun hup gubiridal, mes ki kire enkam ale nul. Wet gulsun hup ama baes gwe'an.”

²³ Dan-nër dan-nërkam de jana nabare zini kim Yesussu te-lidak sonnak makan da in'ik, dekam zep zëno pakeanna zëre mae hap hli-hli dak. Hwëna olk de baju blal zemka man neizim kinik. Zen dawem tanganna, yan wei maena hom, zep kalk son hap baes neizimk.

²⁴ Dekam zep zënaka nenbiridak, “Bap nen kalk son. Nen esa dobe abukam dam lasil- zen de teisyan hapye.”

Zen dekam zep tame gun srëmkam syal neibik- mensa Alap mo olak orep hamal hap anakan ale nukye,

“Zen sa ano pakeanna hli-hli dal. Hen ano bajusa de teisyan hap de zini, dobe abukam sa dam dasil.” * Kirekam mes ki hamal hap dena Alap mo olak lwak, zen zep ki kirekam hëndep tame gun srëmkam syal neibik.

²⁵ Yesus mo te-lidak son golek denak we walya hen man zë èzau'uk: An zem Maria, an zik mo osona, hen Klopas Bak mo weny- zen hen bosena Maria, hen ëna Magdala kore weny Maria.

²⁶ Yesus hon de ang ta gwen zini ahana zao hen golek zau'unka- mensa Zëna kwasang gwe- gweblakake. † Yesus kim an zemka hlaulku, hen zëre hon de ang gwe- gwen zini insa hla taka, dekam zep an zemka gubirki, “Anyan, in zen, eno tanena. Zen zen sa hwëna ano tim bwanak emsa golgwë gwera.”

²⁷ Zëre hon de ang gwe-gwen zini insa ki zep hen gubluka, “Eno anena

in zen.” Yaklana inkam zep hëndep nonola zëre mo golak golgwëka.

Yesus kim tilkike:
(Mat. 27:45-56; Mrk. 15:33-41; Luk. 23:44-49)

²⁸ Yesus kim tame gulku, “Ère mo syala kitak mesë sul sonenan,” dekam zep gu aneka- mensa hamal hap ale nukke Alap mo olak, Zën de anakan gun hup dena, “Èe ama hohole gwe'an.”* Zen Alap mo ola insa dikim hen sul sonen hap ki kirekam gu aneka.

²⁹ Zao hen ki- kama ngat- darakkam de blome betekna, anggur ho enen naban. Jana nabare zini in dekam zep yera jaubum makare naka anggur hona iwe os nul inek, desa zep te bosena hisop tek gwënkam Yesus mo mipnak dep noltrë seblak.

³⁰ Kim akasibirki dekam zep gu aneka, “Ano syala angkam mes sowe henan.” Dekam zep nola hondang gwebla hanaka, hëndep tilsiki.

³¹ In kim Yesussu te-lidak sonnak makan daink, yaklana Jumatkam. Yahudi mo mam-mamna man anakan ëdwam gwëk, “Te-lidak sonnak de zi dan-aharena in, bap zen Hari Sabatnak nama ëtëhe sonen.” Mae hap kirekam ëdwam gwëk: Sap ka'an Hari Sabat yawal- Paska hap dena. Zep Yahudi zi mo mam-mamna Pilatussu abe dak, “Emki gubiridan- dekam de te-lidak sonnak de zi mo balaka tadrebir- zindin hip, dekam de nabakam juwen hap, hen nabakam dikim lup guluhun hap.”

³² Jana nabare zini dekam zep sek gwezak, dekam zep balaka kam nosozimk- zi darena mensa Yesus mo irgwa taha nakon hen dam taha nakon makan noso inkye.

³³ Hwëna Yesus onak kim yaing gwezak, dekam zep hla dak, “Zen

* **19:24 19:24** Alap mo hamal hap de ola in, emki hlaun Mzm. 22:19nak. Ayatna awe mes “dobe abu”kam Orya olkam li nul sonek, hwëna Israel mo langnak dojena hom. Hwëna men kire tangankam dam dasik, angkam nen tawa naka hom. Zep hom husus gwe'an- dobe abukam de li yul sonen naye. † **19:26 19:26** Yohanis mensa ayatnak awe “zini mensa kwasang gwe-gweblaka”kam gubluk, zen zënaka ki zerlëweka. Emki Yoh. 13:23 mo otde alenak hlaun. * **19:28 19:28** Mzm. 22:16; 69:22

mes tili.” Zëno bala zep kam nosobla srëm gwëk.

³⁴ Hwëna ahanik zep zabanak toman nokwa tiyerkam dang gulblula heka. Desan zep kala ban ho naban nabakam su në hezak.

³⁵ Èe an zenë bukuna ansa syal gwibi'in, èe ama ère mo nwekam kara tabi'ik, in zebë ebe mae hap eiwa gulzim'in: Èe tawana, in eiwa kire tangankam lwak. Èe mae habë ebe mae hap kirekam eiwa gulzim'in: Em dikim hen Yesussu taibliblan hap.

³⁶ An kitak mae hap ki kirekam lwak: Sap zep dena man Alap mo olak hamal hap ale nuk,

“Zëre mo danna molya kam nosoblak.”*

³⁷ Alap mo hamal hap de olak anakan ki hen lwak,

“Zini in desa dang nulbli'ak, zen sa kara dal.”*

Yusup ne Nikodemus ne kim Yesussu kaso hulak ën nekake:

(Mat. 27:57-61; Mrk. 15:42-47; Luk. 23:50-56)

³⁸ Hyanak ki zep Arimatea walya Yusup Pilatus osan dep song gwëka, ki zep Yesus mo tok naka dikim lo tasïn hip abe taka. Yusup in sap Yesus hon de ang gwe-gwenna, hwëna zen aningkim ang gwe-gwëka, sap zen Yahudi mo mamam naka airibirida gwëka. Pilatus kim gubluka, “Amki,” dekam zep Yesus mo tokna zizeryahe halka.

³⁹ Nikodemus Bak man Yusupsu mas gweblaka. Nikodemus in, men zen orep Yesussu kam zini takake. Zen deban de drënen hap de irase dawem nabare kire-kiresa golhal zaka- muru ban gaharu naban de siri gun nuka. Kire-kirena in, zëno dohonna tiga-pulu empat kilogram enkam.

* **19:36 19:36** Mzm. 34:21; Kel. 12:46; Bil. 9:12
19:42 Yahudi mo Hari Sabatna, Jumat mo yakla dum gwehen nakon naït gwibik, hëndep Sabtu mo yakla dum gwe hennak zausuk gwëk. * **20:2 20:2** Yoh. 13:23

⁴⁰ Drënen hap de kaso hulak kim nërhatatak, zao zep kaen ngap-ngapkam itatak taka. Kim itatak ta'anka, irase dawem nabare kire-kirena insa man kaenna iwe nutul sone gwe'ak- deban de tahalen hap, Yahudi zini men kirekam zi tokna neibirida gwenanke.

⁴¹ Men zëwe Yesussu te-lidak sonnak makan daink, zëwe golek denak te tra nwe-awesna ki. Te trana iwe hwëna kaso hul gun ësena kimensa te-ala beya zi hip hamal nul gublukke. Hwëna men zëbe hap hamal nulblik, dekam nama hom ti'inika.

⁴² Kaso hul gunnu in golek, hen Hari Sabatnak dikim hatan hap ahare jam maekam hom lwa'ak. ‡ Zep Hari Sabatnak de syal tan srëm hap nabal-bakam aha hap de kaso hul hamal gulblunnak bohëkam idrë neka.

20

Yesus mo tokna kim kaso hulak nohwënblakke:

(Mat. 28:1-8; Mrk. 16:1-8; Luk. 24:1-12)

¹ Minggukam kak tangannak zep Magdala kore wanya Maria Yesussu de drënen kaso hul san dep song gwëk. Kim hlaul kinik, “Lilikin kaso yala in mes irhi nul kinil,”

² dekam zep Petrus osan dep hluwezak. Aha zini, Yesus hon de ang gwe-gwenna hen zao gwë'ankamen desa Yesus Zëna kwasang gwe-gweblakake.* Maria dekam zep guzimk, “Bian mo tokna mes nërhak, hen èe homë tame gu'un, ‘Endawe nënnek?’ ”

³ Dekam zep Petrus aha zini in han kaso hula in san dep hlu këka.

⁴ Hwëna aha zini in nabakam hluwëka, zep zen nonol hataka.

⁵ Zen ki zep ake irin hip huwe heka, hwëna kaen ngap-ngap enna insa zep zë hlaul inki. Hwëna zen hom til halka.

* **19:37 19:37** Zak. 12:10; Why. 1:7 ‡ **19:42**

⁶ Hwëna Petrus kim lun kon hata zaka, zen hëndep ki zep til halka. Zen hen kaen ngap-ngap blala in ensa zep zë hlaul onka.

⁷ Hen kaenna men dekam nola tatak dablak, desa hen zë hlaulku. Zen lak gun nik srën lwa'ak.

⁸ Ki zep hen aha zini men zen nonol hata zaka kaso hula iwe tilki. Zen dekam zep hen hlaulku, hëndep kim hyanak tame gulku, dekam zep Yesusu taïblablaka.

⁹ Sap menkam zi darena in hom tame ulki, hwëna kim iwe lilki, zen dekam zep dam ulsuku- mensa Alap mo hamal hap de olak zëbe hap dena anakan lwakye, "Zen tin nikon sa ngaya gwera."

¹⁰ Zen dekam zep gol san dep ola halka.

Yesus kim Zënaka Magdala weny Maria hap zertreibirkike:

(Mat. 28:9-10; Mrk. 16:9-11)

¹¹ Hwëna Magdala weny Maria nama kaso hulak iwe ë nakon gwë'ak, hen gosa kon gwë'ak. Zen ki zep go gwën naban huwehek- kaso mwa san dikim ake irin hip.

¹² Hwëna dekam zep Alap mo dam taha nakore zi darena zë akeink. Zëno nik mo pakeanna ngap-ngapna. Men zëwe Yesus mo tokna nënnek, zao inikin'inka- ahana men desan nola kim nën nekke, ahana tana san dekam.

¹³ Zen dekam zep lakensibirki, "Em ba habe gona gwë'ara?"

Dekam zep ding gulzimk, "Ano Bian mo tok naka nërhak, hen ëe homë tame gu'un, 'Endawe mes yap nënnek?'"

¹⁴ Kirekam kim guzimk, zëna ki zep tahan san lero gwëk. Dekam zep hwëna Yesusu hla tak. Zen hwëna hom anakan tame tak, "An Yesus."

¹⁵ Hwëna Yesus ki zep takensibirki, "Em ba habe gona gwë'ara? Em narasae tēbla'ara?"

Zen hwëna man kil ti'ak, "An te tra nwe awesna ansa de dam-en ta gweblan zi," zep ding gulbluk, "San eme zer halka? Ki emki asa gubin, 'Zaoë drënek,' ëe aka etan zerhak."

¹⁶ Yesus dekam zep bosena kim gubirki, "Maria."

Maria ki zep etan lero gweblan naban Ibrani olkam takenblak, "Raboni." Zëno enlalana nëno mae mo olkam, "Bian guru."

¹⁷ Ki zep gubirki, "Bahem Asa ba- bang tan, sap Eë nama homë ëre mo Bian osan dep song gwe'an. Hwëna ano oso walkam de gubirida gwen wenyaka em gubiridan, 'Zen man gulu, "Eë ëre mo Bian osan debë song gwe'an. Zen ano Bian, hen eno mae mo Bian. Zen ano Alap, hen eno mae mo Alap." ' Kirekam em gubiridan."

¹⁸ Zen dekam zep asa gubiridazak, "Eë mesë Biansa ngaya naka hla tanan!" Hen dekam zep asa tonbirida'ak- ola mensa abe mae hap de ayang gulzimdin hip gubirkiye.

Yesus kim zëre hon de ang ta gwen weny kip Zënaka zertreizimkike:

(Mat. 28:16-20; Mrk. 16:14-18; Luk. 24:36-49)

¹⁹ Mingguna in mo kam-en, ëe zëre hon de ang ta gwen weny aha-ere golakë lowe he'ak. Tingare lilikinni tayalsibin nik ërlwa'ak, sap ëe ama Yahudi zi mo mam-mam naka airibiridak. Hwëna Yesus ki zep ano mae mo ngirinnik jowe zaka, ki zep zë asa gubirida zaka, "Dawem. Em Alap mo taha terenake lowe he'an."

²⁰ Zen dekam zep abe mae hap taha zemka zitreizimki, hen zabanak de weina goltreizimki. Hla tankam ëe ama tangan ëisrip-sri gwëk.

²¹ Etan ki zep asa gubiridaka, "Em eiwa Alap mo taha terenake lowe he'an. Men kirekam Bian Asa zer soneka, Eë hen kirekamë emsa lup gul sone'an."

²² Kirekam kim asa gubiridaka, ki zep asa aha-en aha-enkam zëre mo ensasakam hop ta sonebirida gwe'anka- anakare ola ban, "Alap mo Enho Zen emsa ing gwe heblan."

²³ Zen hen Alap mo Enhona in hap man asa gubiridaka, “Em dekam esa Alap mo dwam gwibin sin tingare zi hip anakan klis ul gwizim, ‘Kirekam de karek-karek nakon de halenkam, Alap sa karekna insa tap gulsuk gwizimdi. Hwëna aha karek-karekna ansa, desa bëjen tap gulsuzimdin.’ ”*

Yesus kim Tomas Bak hap Zënaka zertrëblakake:

²⁴ Yesus kim abon mae jowe zaka, Tomas Bak, mensa nen gweblanan “dan de wë son walas”kam, zen dekam zao hom gwë'anaka.

²⁵ Hwëna kim hata zaka, ki zebë enblak, “Èe Biansa ngaya nakaë hla lal!”

Hwëna Tomas man ap ding gulzimki, “Èe aen de tahanak de paku weisa hlaulblun srëmkam hen towanzim-blin srëmkam, hen zabanak de weinak de towanblan srëmkam, èe molyë na-en taïblik.”

²⁶ Aha mingguna kim tamank, èe etan gola iwe lowe he'ak. Dekam Tomas hen zëwe gwë'anaka. Tingare lilikinni tayalsibin nik ërlwa'ak, hwëna Yesus ki zep ano mae mo ngirinnik jowe zaka. Dekon zep asa gubiridaka, “Dawem. Em Alap mo taha terenake lowe he'an.”

²⁷ Ki zep zë Toma'a gubluka, “Emki taha bolkam ano tahanak de paku weisa towanzimdin, hen emki Asa zaba weinak towanblan. Bahem taïbli srëm gwen! Emki taïblin!”

²⁸ Tomas ki zep ding gulbluka, “Are ano Teipsinni, hen ano Alap!”

²⁹ Ki zep Yesus ding gulbluka, “Em in Ènaka de hla tankame taïblinda. Hwëna men zen Asa de hla tan srëmkam ëtaïbli'an, zen hë'ho gwibinnik lowe he'an!”

Yohanis kim anakan srip gulsukuke, “Èe kire habë bukuna ansa syal gwibik.”

³⁰ Yesus owas-owasna beya naka syal gwe-gwibirki- zëre hon de ang ta gwen wenyano mae mo

nwenak. Hwëna èe homë tingan bukuna awe ale guk.

³¹ Èe mae habë bukuna ansa ale gulzimk- em dikim anakan ëtaïblin hap, “Yesus Zen eiwa nësa de ngaya tabin hip de Teipsinni, hen Zen Alap mo Tane.” Sap kirekam de Yesusu taïblblankam, zen dekam esa hëndep denaban ëngaya gwer.

21

Yesus kim tuju enkam de zëre hon ang ta gwen wenyano kip Zënaka zertreizimkike:

¹ Zao kim lwa se'ak, Yesus ki zep etan abon mae Ho Gutuna Galileak jowe zaka. Ho gutuna in mo aha bosena Tiberias. A kirekam mo zë lwakye:

² Zao kim lwa se'ak, èe Yesus hon de ang ta gwen wenyano tuju enkamë lowe he'ak- anaka-en:

Petrus,

Tomas- mensa nen gweblanan “dan de wë son walas”kam,

hen Galilea mo ëna Kana walya Natanael,

hen Zebedeus Bak mo walas darena, hen ahana dan-dan- Yesus hon de ang ë gwen wenyaye.

³ Petrus ki zep asa gubiridaka, “Èe hogwe tahyon habë song gwe'an.”

Ki zebë ding ulblik, “Èe asa ang tal.” Ki zebë bulkum sek gwëk. Hwëna kam blalë sap jalana ho gutuna iwe os ul tinek. Hwëna hogwena hom mae tëhek.

⁴ Kim hleng gwëk, Yesus dekam zep ho gutu alpnaq zau'unka, hwëna èe homë anakan tame lak, “Wakin Yesus.”

⁵ Zën zep asa gubiridaka, “Wal sei-siwir, em wëhë hogwena lahyol?”

Ki zebë ding ulblik, “Èe homë.”

⁶ Ki zep asa gubiridaka, “Dam taha san de bul alp san emki os gun. Dekam esa lahyol.” Ki zebë desan os uk, hwëna dekon zep hogwena beya enkam bitë gwëk. Etan gul inenna ama sap akabik.

* 20:23 20:23 Mat. 16:19; 18:18; 1Yoh. 5:16-17

7 Mensa Yesus kwasang gwe-gweblaka, zen zep Petrussu gubluka, "Wakin Bian!" Kirekam kim sal-blaka, ki zep tahan baju zemka ala soka. Ki zep honak heya gwe ineka.

8 Ëe ahakore wenya sangankam zebë bulkum alp san dep ërtro kinik- hogwe beyam-bya nabare jalana insa de bail song gwen naban, sap ëe homë dekam alp nakon ëlanga gwe ha'ak. San ha 100 meter enkam mes yap.

9 Kimë atiti gwe'ak, ki zebë zë hogwe auhlu gun berya akek. Syauk debala man zë auk gwe'anka. Hogwe naban roti naban zëwe nola ine'ak.

10 Yesus ki zep asa gubiridaka, "Hogwena insa lahyol emki da-en teisya halzan."

11 Petrus dekam zep buluk sewe seka, ki zep jalana insa alp san dep il gılhal zaka. Hogwena yawal-yawal en nik zë bitı gwek, beyana 153 enkam. Sap man ki zë beyakam bitı gwek, hwëna owas hap jalana in kalk në srëm gwek.

12 Yesus ki zep asa gubiridaka, "Haen, nen tembane tan." Ëe hwëna ama anakan de takensıblın hap baes tak, "Bian, em nara?" Sap ëe mesë tame lak, "An Bian sake."

13 Ki zep Yesus asa golek de tabir zika, hen rotina insa ap kae gwibir-zimki- hogwe taıblınnı in han.

14 Zep ho gutu alpnak iwe, zen dan-ahanna kim zëre hon de ang ta gwen wenya abe mae hap Zënaka zertreizimkike- tın nıkon de ngaya gwen hyanak.

Yesus kim Petrus hun ola lonkake:

15 Kim tembane tasık, Yesus ki zep Simon, aha bosena Petrussu, takensıblıka, "Yohanis Bak mo tanena Simon, em san eiwa dawemkam Asa enna lwa gwebla'ara?- wal bose wal om onakonye."

Ki zep ding gulbluka, "In kirekam, Bian, Ena tawana: Ëe ama Emsa enna lwa gweblanan."

Yesus ki zep hwëna ding gulbluka, "Ki amki ano domba zahosa kara ta gwibir."

16 Hom holo gwe'ak, etan ki zep takensıblıka, "Yohanis Bak mo tanena Simon, em san eiwa Asa enna lwa gwebla'ara?"

Ki zep etan ding gulbluka, "In kirekam, Bian, Ena tawana: Ëe ama Emsa enna lwa gweblanan."

Ki zep hwëna ding gulbluka, "Ki amki ano domba zahosa kara ta gwibir."

17 Etan ki zep dan-ahanna takensıblıka, "Yohanis Bak mo tanena Simon, em san ema Asa enna lwa gwebla'ara?"

Dan-ahanna in kim kirekam takensıblıka, enlalana dekam zep dowebła hanaka. Dekam zep ding gulbluka, "Bian, Ena kitak tawana. Ena tawana: Ëe ama Emsa enna lwa gwebla'an."

Ki zep hwëna ding gulbluka, "Ki amki ano domba zahosa kara ta gwibir."

18 Eiwa tangan nakaë emsa gublu'an: Em kime nama seiwirik gwëka, em ene pakeanna ala so gweka, hen men desan dep ena enlala gwe-gweka, em ene desan song gwe-gweka. Hwëna bogolak, em ere mo tahana esa in sosulu, hen eno tahana sa nahaler, hëndep ere mo dwam gwibin srëm san dep sa emsa nërhal."

19 Yesus mo kirekam de gublunna in, Zen anakan kim goltrëblaka, "Em kirekam esa Alap mo bosesa dikim teip gulsublun hap tilı."

Yesus ki zep etan gubluka, "Asa em zertron."

Yesus kim zëre mo kwasang gwe-gweblan zini tonblakake:

20 Petrus kim lero gweka, ki zep wal bose zemka hwëna hla taka- mensa Yesus Zëna kwasang gwe-gweblakake. Zini in men zen aumwa hap de tembane tanak Yesus zëre mo golek denakon nikin'inkake, hen in zen anakan

* 21:20 21:20 Yoh. 13:23

takensiblika, "Bian, nara sa emsa kirekam zergulu?"*

²¹ Petrus ki zep Yesussu takensiblika, "Bian, zini an zen nëno nik mo alp nakon nikin'ira, zēbe hap dena banakan sa lwal?"

²² Ki zep ding gulbluka, "Em ba hap de zēbe hap dena tawa gwen hap? Ēyē desa dwam gwebla'anam, ngaya naka de etan jap tazan hap, zen san eno syal?- kire hap denaye. Em diki Asa em zertron."

²³ Dekam zep Kristen zinik ola anakan nol halasenk, "Zini zen nenen molya tilki- Yesus de lwa halzan srēmna kye." Hwēna Yesus anakan hom guku, "Ēe ama desa kirekam dwam gwebla'an." Zen diki man gulbluka, "Ēyē desa dwam gwebla'anam, ngaya naka de etan jap tazan hap, zen san eno syal?- kire hap denaye."

²⁴ Ēe an zen- mensa Yesus kirekam gulbluka. Zen in zebē ebe mae hap bukuna ansa ale gulzimk. Ano ola an eiwa tangaranna, hen men zen aban mae lowehe gwenan, zen hen man ano ola ansa eiwa nul gwenan.

²⁵ Yesus mo syala nama beya tangankam lwa kīnī'an- ano ale gun srēm kam. Zēno syalsa de aha-en aha-enkam ale gunkum, dekam bukuna maka sēr kam ēbeya gwe'an. Okamana an molya sowehek- bukuna insa de zē kang ta gwen hapye.

Yesus mo dua-blas enkam de dam tasibin zi hip de aïsîl

¹ Dawem, Bian Teopilus Bak,*

Lukas ona kon:

Nonol mensaë ebe hap ale gulbluk, zao mesë kitak emsa aïsîl gweblak- Yesus mensa syal gwegwibirki hen tawa ta gwibirkiye, men dekon nonol syala kon gwesibir hanaka,

² hëndep Alap ngatan zi mo lang san dep zer ine halka. Hwëna zer inehan srëmnak aumwa hap de ola kim zëre mo dam tasibin zini tonbirida gwe'anka, Alap mo Enhona dekam zep dekam de tame gun hup de sosonna golzimki.

³ Karek yala insa de goltowennak kim tilki, dekon kim etan ngaya gweka, Zen empat-pulu yaklakam etan-etankam zëre hon de ang ta gwen wenyä kip Zënaka zertrei gwizim'inka. Zen hen dekam owas-owasna man syal gwegwibir-zim'inka- dekam de anakan taïblïblan hap, "Zen eiwa mes tanggan ki etan ngaya gweka." Dekam hen Alap Zën de irik gin hip denaka tawa ta gwibi'inka.

⁴ Aha yaklakam kim golëtembane gwe'anka, dekam zep gubiridaka, "Yerusalem an kon na-en bahem sek gwen. Men desaë emsa gubirida gwek, Bian de kiresa ebe mae hap zer sonezimdin hip dena, desa em kon kara gweblan.*

⁵ Sap Yohanis zen hokam baptis ta gwibirki, hwëna molya holo gwek, emsa hwëna Alap zëre mo Enhokam sa baptis ta gwibiri."

Alap kim Yesussu ngatan zi mo lang san dep zer ine halkake:

⁶ Zëre hon de ang ta gwen wenyä in kim zë nama tagam nëbla'ak, ki zep zë dakensik gwebla'ak, "Bian,

Em san ha angkam tangan esa Israelsa teipsibiridala- Roma mo irik gin nikon dikim asa gwiswe sonen hapye?"

⁷ Ki zep ding gulzimki, "Ebe mae hap hom nëre mae mo Bianna golzim'ira- em dikim hamal hap anakan ëtawa gwen hapye, 'Israel dekam sa ëzë-en gwer.'

⁸ Hwëna Alap sa ebe mae hap sosonna golzimdi- zëre mo Enhona kim de ebon mae ing gwe'ankaye. Em dekam esa abe hap dena ol halada gwer- nonol tanganna Yerusalemk awe, hen awe de langna an san, hëndep Samaria, hëndep okama topse gwenna."*

⁹ In kim ki zë kirekam tonbirida'anka, Alap ki zep zëno mae mo nwenak zer ine halka. Hëndep butna ki zep zëno mae mo nwe nakon aning ta inehak.

¹⁰ Yesus in kim sewe se'anka, zen nama ngli san ëkara gwe se'ak. Hwëna mumuk ennak zep zi darena baju ngap-ngap ala oson naban jo kë ine zaka. Zëno mae mo alp nakon yau'unka,

¹¹ ki zep zë enbiridaka, "Galileak de zi, em ba habe gulk sun ëkara gwe se'an? Yesussu in Desa zer ine hannak kara la soner, Zen in kirekam kara la sonenan, kirekam sa etan lwahal zala."

Yudas mo weinak dep kim zini dam dasikke:

¹² Zaitun tra nabare kwatap tekna in zao lowe he'ak, Yerusalem kon langana aha-ere kilometer enkam. Zen kim kon etan Yerusalem san dep lwanda halzak,

¹³ golak kim yaing gwezak, ki zep gulk de tekson san dep sesek gwekmen zëwe zëna lowehe gwekke. Zëno mae mo bosem-sena:

Petrus, Yohanis,
Yakobus, Andreas,
Pilipus, Tomas,
Bartolomeus, Matius,
hen aha zini Yakobus- zen Alpeus mo tane,

* **1:1 1:1** Luk. 1:1 * **1:4 1:4** Luk. 24:49; Yoh. 14:16-17 * **1:8 1:8** Mat. 28:19; Mrk. 16:15; Luk. 24:47-48

hen Simon. Zen men zen nonol Israel dikim Roma mo ìrik gïn nikon èzè-en gwen hap de èsas gwennak ang gwekake.

Hen ahana, Yakobus mo tanena Yudas.*

14 In zen zè lowehe gwe'ak, we walya hen ki. Ahana Yesus mo anena Maria. Yesus mo oso walya hen zao lowe he'ak. Zen kitak ahare enlala naban Alapsa nen sonebla tine gwe'ak.

15-19 18Yudas in zen Yesussu zerguku, te-alana mensa zère mo syal karekna inkam nërblak, dekam zep ngana zerka. Hwëna ngana iwe zep karekkam zanka. Usis ahlena hëndep kitak tangan teiswen nahlablak. 19Yerusalemk de weny kim tingan nasalblandak, zen dekam zep hwëna ngana insa zère mae mo olkam bose dak, "Akeldama" kam. Zëno enlalana "Zi Kal Kama."†

15In zen Yesussu de taïbliBlan weny gulk de teksonnak ètagal gwek, beyana 120 enkam. Petrus dekam zep zëno mae mo ngirìn nikon luweka, 16-17ki zep gubiridaka, "Aya-wal oso-wal, eiwa Alap mo hamal hap de ola, zen aha-en mae bëjen jowe srëm gwen. Zep Yudas Bak hap dena mensa Alap mo Enhona hamal hap Daud Bak hap golblaka, zen mes ki kirekam lwak. Sap zen nëno mae mo apde syal bose- mensa Bian hen dam tasikì, hwëna zen ki zep Yesussu de balk tan hap zon guluda zaka.*

20 Daud Bak mensa buku Mazmuruk ahana Yudas hap dena hamal hap ale gulku, zen a kirekam moye:

'Zëno gola dikire dan-en gwek,

hen bap zen zè aha zi gwën.'

Hen etan anakan mas gulku,

'Zëno syala dikire ahanik gulink.'*

* **1:13 1:13** Yakobus mo tanena Yudas, zen zen hom Yesussu zerguku. In zen zerguku, zen aha zini Yudas- ëna Kariot wal. † **1:15-19 1:19** Mat. 27:3-10 Bosena "Zi Kal Kama" hap dena, emki Mat. 27:8 mo otde alenak hlaun. * **1:15-19 1:16-17** Mzm. 41:10; 55:13-15; Yoh. 13:18 * **1:20 1:20** Mzm. 69:26; 109:8 * **2:1 2:1** Paska hyanak yaklana 50kam naït gwibik, dekam zep Pentakostanak zauk gwek. Yahudi zini dekam gandum dansa de taran hyanak Alapsa man isrip-sri nè gweblak. (Im. 23:15-21)

21-22 Zep nen esa ahanaka zisi zëno weinak dep dam lasil, dekam eka etan èdua-blas gwek- Yesus hup denaka ekakim anakan ol halada gwek, 'Zen mes tin nikon etan ngaya gweka.' Hwëna anakare zisi nen dam tasin: Men zen nonol lonesen nakon ang ta gwekke, in kim Yohannis Yesussu baptis taka, dekon Yesus mae han nèbon mae ang ta gwek, hëndep yakla in dekam nëno mae mo ngirìn klesnak zer ine halka. Zen kire naka esa dam lasil- men kiye hen nëna."

23 Dekam zep men zen zè tagal gwek zi darena dam nososuk. Ahana Matias. Aha zini Yusup. Zëno bosena dan-ahan. Zen zep hen "Barsabas" kam ahaksa "Yustus" kum nen gweblak.

24-25 Dekam zep kitak Biansa nen soneblak, "Bian, Em tìngare zi mo enhona tawana. Yudas mes zère mo syala hli yulku- dekam de song gwen hap, men kirekam Ena hamal hap dam tasikìke. Zep abe mae hap Em zi darena an kon anakan dam tasizimdin, 'An zen sa zëno weinak syal gwera.' "

26 Kim ègu sonesik, ki zep dobe abu mo kim syal neibik. Matia'a zep dam dasik.

2

Alap mo Enhona kim hatakake:

1 Yahudi mo yakla yala Pentakostanak* kim zauk, dekam tìngare Yesussu de taïbliBlan weny aha-erenak lowe he'ak.

2 Mumuk ennak zep ngli nakore asese yala nasal gubluk. Gola men zëwe lowe he'ak, zao zep hëndep tìl zika. Man zè wal-wale gweka.

3 Dekam zep zi mahal makare syauk hitin beyam-byana hla nulidak. Syauknu in hëndep zëno mae

mo nol bol tahannak zep mawa mo kim ëzauk ine gwe'anzak.

⁴ Alap mo Enhona dekam zep ing gwe hebridaka, dekam zep Alap zëre onakore ssonkam owas ola donbi'ik- zëre mae mo tame gun srëm olkam.*

⁵ Dekam Yahudi zini, dawemkam de Alapsa betek gwe-gweblan wenya, zen mes tïngare lang nakon yakla yala in hap Yerusalemk ëtagal gwesik.

⁶⁻¹¹ 9 Lang bosem-sena in dekore zi ëtagal gwek-

Partia, Media, Elam,
Mesopotamia, Kapadokia, Pontus,
Asia,

10 Prigia, Pamfilia, Mesir,
hen langna Libia mo ë yala Kirene
mo irik gin ë-ë nakon,

hen ë yala Roma kon.
11a Ahakon hen lang tekna Kreta
kon,
hen langna Arab kon.

Ahakon Yahudi mo ausu nako-
rena,
hen ahakon men zen aha zi ausu
nakore zini Yahudi hon bitï
gwekke.

⁶ Zini in kim asese aukuna insa ësak, dekam zep anakare hap ëhlu-
hluk gwezak, "An ba owas zë
lwa'an?" Zen dekam zep auna
ëhlozak: Sap zen zëre mae mo ë-
ë nakore olkam de ëtorannak Alap
mo Enho nabare wenya insa sane
dabi'inzak. ⁷ Ètenggwaran hap zep
hëndep zënaka nenbiridak, "Zini an
zen ëton'an, zen sap tïngan Galilea
kore zi. ⁸ Nen hwëna ba habe
nëre mae mo olkam de tonbinnik
sane labi'in? ^{11b} Zen hwëna owas
tangan hap am nëno mae mo olkam
Alap mo owas syal gwe-gwibinni
donbi'in!"

¹² Zen man tangan sërkam de teng-
gwanbiridan hap enlala nik topse
neibirida'ak, "An ba hap ki zë
lwa'an?"

¹³ Ahakon hwëna man swrë dabik.
Man nenbiridak, "In ho mamaksa de
mamkam otdebin hip ki ëgwër."

*Petrus kim zi trana in hap srip
gulsuzimkike:*

¹⁴ Petrus ki zep seblaskam de
wal bose wal zem in han golëluk
taka, zëna ki zep ol mam-mamkam
zi trana insa tonbiridaka: "Aha
lang nakore aya-wal oso-wal, hen
tïngare Yerusalemk awe de lowehe
gwen wenya, ëe anik srip gulsuz-
imk. Dawemkam ësane gwek.

¹⁵ Zini an ho mamakna hom not-
debir. Em bap kirekam kil libir! Sap
an nama kaknak- yakla nwena sem-
bilannak. Kire jamnak ho mamakna
hom notde gwibirin.

¹⁶ Hwëna an Alap mo ol ayang gul
gwen zini Yoel Bak mo ol gu-gun sun
ki lwanan. Zen a kirekam mo gu-
gukuye:

¹⁷ 'Alap man gu-gubirida'ara,
"Aumwa hap de yaklanak, Èe asa
ëre mo Enhosa tïngare zi hip
hlë ta sonezim.

Eno mae mo zi walasna hen wenam
tol-tola hamal hap de olsa sa
donbirida gwer.

Eno mae mo wal sei-siwiri nwena sa
ëlirisin gwe-gwizim.

Hen eno mae mo bong-bongna abe
hap dena eisirkim sa kara nul
gwer.

¹⁸ Hen sap bose srëm wenya men
zen zi nik ëbabu gwe-gwenan,
Èe asa zëbe mae hap hen ëre
mo Enhosa hlë ta sonezim-
sap wekam dena, hen sap zikim
dena.

Zen hen dekam sa hamal hap de ola
donbirida gwer.

¹⁹ Èe asa owas-owassa syal gwe-
gwibir-

nglinak hen kamanak, kalkam dena,
syaukkum dena, hen ahakon
butkam denaka.

²⁰ Yakla nwena sa kawesik gwera,
hen benna zi kal mo kim sa kal-kal
gwe-gwer.

Bian mo hatan yakla yala in de golek
de gwenkam, kirekam sa lwa
gwer.

* **2:4 2:4** Kis. 4:31; 10:44-46; 19:6; Mrk. 16:17

* **2:21 2:21** Yl. 2:28-32

21 Dekam men zen de Biansa anakan dakenbla'ak, 'Asa Emki ngaya tan,'

zen zen sa ëngaya gwer." ' '*

22 Petrus ki zep etan ayang gulzimki, "Israelk de zi, asa sane lak. Ena tawana: Nazaret walya Yesus hup Alap man owas-owasna syal gwe-gwibir-blika- em dikim anakan tame tan hap, 'An Zen tangan- Alap zëre mo zer sonen Zi niye.'

23 Hwëna Alap, zëre mo hamal hap de enlala gwibin sin ki kirekam ebe mae hap tapbla tazimki. Hëndep em dekam zebe karek gol gwen zi niban apdenak te-lidak sonnak de makan ta irinkim lak.

24 Hwëna juwen zi mo langnak kim sap ati gwe ineka, hwëna Alap dekon etan zeser soneka, dekam zep etan luwen taka. Sap Alap mo Tanena in, Zen bëjen hëndep denaban zëwe gwë gwen.

25 Yesus hup dena Daud Bak mes ki hen anakarekam guku, 'Ëe ama Biansa anakan tame tak, Zen sa asa zergwë gwera. Zen man asa dam taha nakon zerzauk sone gwe'ara, ëe zep asa tatem zauk gwer.

26 Ano enhona in zep sam gwesik gwenda, hen mipkam tërkam asa Alapsa isrip-sri gwe-gweblal.

Ëe hen ama ëre mo tim hip dena anakan taïbli gwebla'an, "Zen sa ano timni tïn hyanak ap ëse gulblula."

27 Sap asa men zao nër dwanu'ak, Alap, Em molye zë asa da tasikî. Ere mo lalak Zini ano timni zëwe molya batrek.

28 Sap em mese ngaya gwen hap de orana abe hap zertrëblaka. Zep ëe kimë eno dang gwënnak hata'ak, sërkam tangan asa isrip-sri gwe-gwer.' '*

29 Petrus ki zep ayang gulzimki, "Aya-wal oso-wal, ëe damnak emsa

nëre mae mo auyanna Daud Bak hap denaka gubirida'an: Zen mes tilki, ki zep nër dwanuk. Men zao nër dwanuk, zen nama hëndep angkam nëre mae mo ngirinnik lwa'an. Zep Daud mo ola in, batren srëm hap dena, zen zëre hap hom ki guku. Zen hwëna Auyan-tane zem Yesus hup ki gu-guku.

30 Daud in hen Alap mo olsa de ayang gul gwen hap de zi, hen Alap mes ki desa anakan gu-guk gwe-blaka, 'Eno irik ginni ere mo auyan-tane hap asa golblal.'*

31 Zen ngein sin dep nësa de ngaya tabin hip de Zi hip dena mes tame gulku, zep zëbe hap dena anakan hamal hap gu-guku, 'Alap molya Desa drë nwanunnak da tasikî, hen zëno timni molya zëwe batreblak.'

32 Zep eiwa mes tangan dam gwesinin: Yesus Zen Zen! Alap mes Desa tïn nikon etan ngaya taka. Aena mesë kitak hla lak.

33 Zen angkam Alap mo dam taha nakon teipsinkim nikin'ira, hen Alap mes zëre mo Enhona zëbe hap zerblaka. Zen in zep hen Desa abe mae hap namen an hlë ta sonez-innira- in kirekam ena asa kara labi'in hen sane labi'innye.

34-35 Sap Daud Bak zëna hom ngatan zi mo lang san dep sewe seka. Hwëna zen man Teipsin nika dan ake seka. Zep anakan guku,

'Bian Alap ano Teipsinni man gubluka,

"Ëre mo dam taha nakon emki nikirin- dekon de hen teipsinkim irik gin hip.

Ki asa hwëna ebe hap de jal zini ere mo tana iltikinnik sisik gulin." '*

36 Zen in zep, Israelk de zi, emki dam taha nakon de nikirin Zini insa tame tan. Yesusu, men Desa ena te-lidak sonnak makan la inkke, Zen Desa Alap teipsinkim drë neka. Zen in Zen- nësa de ngaya tabin hip de Zi niye!"

* 2:28 2:28 Mzm. 16:8-11 * 2:30 2:30 2Sam. 7:12 * 2:34-35 2:34-35 Mzm. 110:1

³⁷ Petrussu in kim kirekam sane da'ak, zëno ola in man tangan zëno mae mo enhonak tïsík. Dekam zep Petrussu zëre mo wal bose walya in han dakensibiridak, "Aya-wal oso-wal, ëe ki basa asa syal eibir?- Alap dikim etan asa sam gwesibiridan hapye."

³⁸ Petrus ki zep ding gulzimki, "Em ëhalek! Dekam ëe asa emsa kitak Kristus Yesus mo bosekam baptis labir. Dekam sa Alap eno mae mo karek-karekna tap gulsuzimdi. Zen dekam sa hen zëre mo Enhona ebe mae hap hlë ta sonezimdi."

³⁹ Zëre mo Enhosa de hlë ta sonezimdin hip dena mensa Alap gugubiridaka, zen hwëna nëbe mae en hap hom. Hwëna tingan men desa Alap Kristussu de taïblïblan hap dam tasibi'inka, zen hen zëbe mae hap- sap eno mae mo walas, aza-tane wal, hen sap langanak de zi ausu, hëndep lang topse gwennak dena."

⁴⁰ Kirekam-kirekam ol zim-zimkim zë tonbirida gwe'anka. Hen dekam de ëhalen hap anakan titi ta gwibi'inka, "Ëngaya gwen hap de ëdwam gwenna, karek-karek gulin hana gwen zi nikon emki ewet so gwen."

⁴¹ Men zen Petrus mo ola in kon ëhalek, desa dekam zep baptis dabik. Yaklana inkam in zen Yesussu daïblïblak, beyana san ha tiga ribu enkam mes yap.

Yesussu de taïblïblan wenya kim aha-ere enlalakam lowehe gwekke:

⁴² Men zen Yesussu daïblïblak, dekam dua-blaskam de zini in mo tawa tabinnik isrip-sri naban ëtagal gwe-gwek. Zen gol-gol san aha-ere enlala naban hen tagal gwenda gwek- dekon de Alapsa abe ta gwen hap, hen Bian Yesussu de enlala gweblan hap de rotisa twenblanda gwen hap, hen zep de anggursu otde gwibin hip.

⁴³ Dekam dua-blaskam de dam tasibin zini in owas-owasna beya tangankam syal neibirida gwek, zep

dekam kitak man dengguanbirida gwek.

⁴⁴ Zen kitak aha-erenak lowehe gwek, hen zëre mae mo kire-kirena apdekam bi nëblanda gwek.

⁴⁵ Ahakon zëre mae mo kamana hen kire-kirena te-ala hap lirak da gwibik. Te-alana desa tahalha wenya kip kap da gwizimk.

⁴⁶ Hen dekam Alap mo golak mwin-mwankam ëtagal gwe-gwek-dekon de Alapsa gu sone gweblan hap. Zëre mae mo gol-gol san hen apdekam isrip-sri naban tembane tanda gwek. Zëno mae mo enlalana dekam Alap en mo bosesa de

⁴⁷ teip gulsublun en hap lwa gwizimki. Dekam tïngare zini man sam neisibirida gwek. Hen Bian mwin-mwankam zini zëbon mae de bitï gwen hap mas-mas gul gweka- Zëna men desa ëngaya gwen hap dam tasibirkike.*

3

Petrus ne Yohanis ne kim zi lekna dawem lakake:

¹ Aha yaklakam Petrus ne Yohanis ne hen man ang ëka- men kirekam Yahudi zini ëgwë gwenanke. Sap zen kam-en Alapsa nen sone gweblanan. Zen zep hen kam-en Alap mo gol san dep song ëka- dekon de hen en soneblan hap.

² Nonol lilïkinnï, bosena Nwe-Awesna, zëwe zi lekna yakla jamkam nënne gwezak- dekon de zini, men zen Alap mo golak bitï gwe-gwek, desa te-ala hap aberbe ta gwibin hip. Zini in jaha gweblannak ki hëndep lek gweka.

³ Petrus ne Yohanis neka kim lil zïnnak ake guku, ki zep abe soka, "Ap tol te-alasa olbla."

⁴ Ki zep zë karatda la'anka. Petrus zep hwëna gubluka, "Asa emki karatda son."

⁵ Ki zep anakare enlala naban karatda so'anka, "Basa wëhë ap olbla'anka?"

⁶ Petrus ki zep etan gubluka, "Ano nik mo te-ala kasona hom

* 2:47 2:47 Kis. 4:32-35

tangan. Hwëna ëe ama emsa enbla'an: Nazaret walya Kristus Yesus mo bosekam em luwen hen song gwen."

⁷ Ki zep Petrus dam taha nakon sap luwen tan hap mas gwebla'anka. Hwëna mumuk ennak zep zini in mo tanana hëndep dek dan naban sosen nëblak.

⁸ Hetyak gwesik kininkam zep luwesik ane kinika. Ki zep hëndep Alap mo gol tekson san ertilki. Hwëna zini in nama ki isrip-sri hap hetyak-hetyak gwe naserankam të nasen'anka- Alap mo bosesa de teip gulsublun naban.

⁹ Zi beyam-byana in zen Alapsa de gu soneblan hap teksonna iwe lowe he'ak, zen kim Alap mo bosesa de teip gulsublun naban de të naseran-nak hla dak,

¹⁰ ki zep zë tame dak, "O an zi lekna men sake!- men zen mwin-mwankam nonol lilikinnik nikin gwendake!" Zao zep sèrkam tangan dengguanbla'ak, "An banakan tangan ki dawem gwenda?!"

Petrus kim zi lekna insa de dawem tan hap dena srip gulsuzimkike:

¹¹ Zini in Alap mo golak de tekson-tekson san Petrus ne Yohanis neka ki babang son naban ang gwizim nisen gwe'anka- hëndep teipsin zini Salomo Swe mo teksonnak ertilki. Tingan men zen zë lowe he'ak dekam zep tenggwaran naban hluhluk gwezak.

¹² Petrus ki zep gubiridaka, "Israël de zi, em basa lenggwanbir? Em san mae habe asa karatda labi'in?- 'Zini an zëre nik mo sosenkam ki dawem lala?' Ahaksa, san ha ema asa enlala eizim'in?- 'Zen Alap hon de tal eisin zi dare. Zep dawem lala.'

¹³ Hwëna kirekam hom. Zen nère mae mo auyan walya Abraham, Isak, hen Yakob mo Alap, Zen nëp syal gwibir-zimdi- nen dikim Yesus mo bosesa mam gun hup. Hwëna em Desa zi tan zi hibe nër hom èrguzimk. Hëndep Pilatus mo ola

ema blum ulblik- zen kim sap zeser sonen hap gublukaye.

¹⁴ Em karek gol gwen srëm enho lalak Zini Yesussu ema tan hap èrguk. Hwëna zi tan zini Barabas Baksa dikim zeser sonezimdin hibe Pilatussu asas lak.

¹⁵ Hwëna nëno mae mo èngaya gwen hap dena men zëno tahanak lwa'an, hwëna Desa ema lak. Hwëna Alap mes Desa tin nikon etan ngaya taka. Èe mesë ère mae mo nwekam hla la gwék.

¹⁶ Zini an Yesus mo bosena kim salbiri, dekam zep taibliblala. Hëndep dekam tangan zep dawem gwera- an kire naka ena hla lanan hen tame lananye.

¹⁷ "Hwëna aya-wal oso-wal, ëe tawana: Em tame gun srëmkame kirekam syal eibik. Hen nëno mae mo nol-nola hom anakan tame nuk, 'Nen kire zisie karek la'an.'*

¹⁸ Hwëna orep Alap mo ol ayang gul gwen zini mes ki anakan ègu gwék, 'Israelsa de ngaya tabin hip de Zini sa karek dal.' Zep Alap mo ola iwe dikim zaun hup, em mese kirekam tame gun srëmkam syal eibik.*

¹⁹ Zen in zep, em èhalen, ki Alap osan lwan dahak. Zen dekam sa eno mae mo karek-karekna tap gulsuzimdi.

²⁰ Hen Alap dekam sa Yesus mo enhona hlë ta sone gwizimdi-dekam de eno mae mo enhosa tatete ta gwizimdin hipye. Hen Alap sa etan Yesussu nëp zer sonezimdi. Sap Zen Zen- Israelsa de ngaya tabin hip de Zini, Bian Alap mensa dam tasikiye.

²¹ Hwëna Zen ngatan zi mo langnak sa gwë gwera- hëndep Alap de tingan oto gulsun hup de yaklanak kim de hata'ak, men kirekam Alap mo ol ayang gul gwen zini ègu-guk gwékke.

²² Sap Musa man guku,

'Nëno mae mo Bian Alap sa ere mae onakon Ahanaka dam tasiz-

* 3:17 3:17 Luk. 23:34; 1Tim. 1:13 * 3:18 3:18 Mzm. 22:1-21; Yes. 53

imdi- men kirekam hen asa zère mo olsa de ayang gul gwizimdin hip dam tasikike. Zèno ola kitak èsal gwèk.

²³ Hwèna zini men zen de Desa nasalbla srèm gwe'ak, Alap sa desa zère mo hlil irin nikon golèalsa sone gwera.*

²⁴ Musa en hom kirekam guku, hwèna kitak de ahakore Alap mo ol ayang gul gwen zini hen kirekam ègu-guk gwèk. Samuel Bak onakon ki lwasek. Zen an zen ki nër hom lwak, zen kitak zep denaka hamal hap nen gubirida gwèk.

²⁵ Hen zèno mae mo ola man apde nèk- men kirekam Alap ola nèno mae mo auyan-aza naban hen ziaha-en gul gwèkaye. Zen mes ki hèndep nër hom nèbon mae jowek- men kirekam Abrahamsa gu-gublukaye, 'Eno auyan nakon sa saltìli- kitak de okamanak de zi aususa de oto gulsun hup Denaye.*

²⁶ Zen in zep nonol ebe mae hap zer sonezimki- ebe mae hap dikim dawemsa golzimdin hip, hen emsa dikim ere mae mo karek gulin hala seran nakon halen tabin hip."

4

Petrus ne Yohanis neka kim Yahudi mo teipsin sinode san dep deisya hakke:

¹ Petrus ne Yohanis ne in kim kirekam tawa labi'inka, ki zep hen Alap mo golak de syal tan zini, zèwe de jana nabare zi mo teipsinni, hen Sadukikam de gubirida gwen zini yaing gwezak.*

² Zen zep zè jal neizim'ik, sap zen man tawa labi'inka, "Nen tin nikon esa èngaya gwer, sap Yesus ki nër hom tin nikon ngaya gwèka."

³ Zao zep hèndep balk nosok, ki zep hèndep bwinak se nosoin-kaknak de hwèna taken-taken gwizimdin hip. Sap dekam man kawè'ak.

⁴ Hwèna men zen zèno nik mo tawa labinni insa èsane gwèk, dekam beya tangankam Yesusu etan daiblìblak. Dekam Yesusu de taiblìblan wenya, zi ensa de aïtbinkim, san ha lima ribunak mes yap hatak.

⁵ Ka'ankam zep hwèna Yahudi mo teipsin sinodenak dena Yerusalemk ètagam gwèk. Teipsin sinodenak dena in, zen ahakon Yahudi mo nol-nolkam dena, bong-bongkam dena, hen Musa mo titi tabin olsa de tawa ta gwibin wenya.

⁶ Alap mo golak de syal tan zi mo teipsinni, Hanas Bak, man hen iye zemka tagal gulsuku- Kayafas, Yohanis, hen Aleksander maesa.

⁷ Ki zep hwèna Petrus ne Yohanis neka de teisya halzan hap nen-biridak. Zao zep taken-taken nei gwizim'ik, "Em nara mo bosekam hen nara mo sostonkame zi lekna ansa dawem lala?"

⁸ Petrussu ki zep Alap mo Enhona ing gwe heblaka. Zen zep ding gulzimki, "Ano mae mo teipsin-teipsinni hen bong-bongkam dena,

⁹ zi lekna ansaè mo kwasang èblalke, em in zebe namen asa taken-taken eizim'in, 'Em banakane dawem lala?'

¹⁰ Angkam desaè ebe mae hap srip gulsuzim'in- hèndep kitak Israelk de lowe gwen wenya kip: Zen Nazaret walya Kristus Yesus mo sostonkam dawem gwera- mensa ena te-lidak sonnakk makan la inkke. Hwèna Alap mes Desa tin nikon etan ngaya taka. Zen in zep tangan zini an zèno sostonkam dawem gwera.

¹¹ Yesus Zen Zen- ngirin bol Tenyaye, men kirekam Alap mo olak lwakke,

'Gol tenya men desa em gol tauk gwen wenya baes eibik,

hwèna Bian Alap zep desa bolak ik gilki.*

* 3:23 3:23 Ul. 18:15,18-19 * 3:25 3:25 Kej. 22:18 * 4:1 4:1 Sadukikam de gubiridan wenya, zen hen Yahudi mo aha hlikna- men zen anakan tawa da gwibikke, "Zini bèjen tin nikon ngaya gwen." (Kis. 23:6-8) * 4:11 4:11 Mzm. 118:22

12 Zen Zëbon en onakon esa ëngaya gwer. Sap Alap hom aha zisi dam tasi'ira- zëno bosekam de okamanak de zi ëngaya gwen hap de-naye."*

13 Kim zë nakek, ki zep zë tame nosok, "Zi darena an totore zi. Zen hom sekola ëka." Hwëna zen mae hap denggwanzim'ik, "Zen udobe naban aïsîl ë'ara." Dekam zep zë tame nosok, "O an Yesus mae han zen am apdenak ëtë gwek."

14 Hwëna zini in desa dawem laka, deban zë apdekam ërzau'unika. Zep ding nulzim srëm gwek.

15 Ki zep ë nakon de eissilî boran hap nenzimk- dekam de zë-en olsa aha-en gun hup.

16 Ki zep zë zënaka dakensibiridak, "Nen banakan esa zi darena in eizim? Sap tîngare Yerusalemk de zini mes zëno nik mo sërkam de owas syal gwibinni insa ëtawa gwendal. Hen nen banakan molye anakan ulsuk, 'Owasna in hom jowek.'

17 Hwëna dekam de langa san gol haladan srëm hap, nen esa jalse eizim: Zen bap zen etan zëno bosekam tawa la gwibin."

18 Ki zep etan lîlzîn hap nenzimk. Zao zep jalse neizimk, "Etan bahem Yesus hup dena lonbirida nasen gwen, hen zëno bosekam bahem tawa la gwibin."

19 Hwëna Petrus ne Yohanis ne ki zep ding ulzimki, "Emki dam gulsun: San ha dawemna ëe asa eno mae mo dwam gwibin sin ang ër? San ha Alap mo dwam gwibin sin asa?"

20 Sap in desaë Yesus hon sane ë gwek hen kara landa gwek, ëe molyë desa lonbirida srëm gwe-gwek."

21 Kim zë etan anakan jalse neizimk, "Em de etan kirekam lonbirida naserankam, ki asa emsa karek osol," ki zep wet oson hap nenzimk. Zen mae hap kirekam nenzimk: Zen hom dam nulsuk, "Kirekam esa karek osol." Sap tîngare zini

zëno nik mo owas syal gwibinni in hap man Alap mo bosena teip nulsubl'u'ak.

22 Sap zi lekna insa dawem laka, tahunna mes 40kam tamanblak.

Yesussu de taïblîblan wenya kim Alapsa nen soneblakke:

23 Petrus ne Yohanis neka kim tapbla nosok, dekam zep wal bose wal zebon osan dep ola halka. Zao zep lonbiridaka- in desa jalse neizimkye.

24 Zen kim ësak, dekam zep apdekam enlala zon tasîblîn naban Alapsa anakan nen soneblak, "Bian, Em ano mae mo teipsinnî. Nglîna, kamana, hen hina Eme yang tabirki, hen tîngare kirekam-kirekamna.*

25 Orep ano mae mo auyanna Daud, men zen ere mo ola ayang gul gwekake, zëbon ere mo Enhona man ing gwe heka, dekam zep anakan ayang gulzimki,

'Zen ba hap waba hap Alapsa de jal gweblan hap ëilman gwe-gwenan,

hen zi trana ba hap zereijan hap kalang në gweblanan?

26 Okamanak de teipsin-teipsin wenya

zen olsa aha-en nul gwe'an,

hen mam-mam wenya man ëtagal gwe-gwe'an-

Bian, Ere han hen ere mo dam tasin Zini in han dikim zieiijan hap.'*

27 Zen eiwa mes ki kirekam nëno mae mo ngîrinnîk lwak! Sap Herodes ne Pontius Pilatus ne ëna awe mes Yahudi srëm zi niban hen Yahudi zi niban ola iaha-en ulki- dekam de ere mo dam tasin lalak Zini Yesussu tan hapye.

28 Hwëna zen dekam ere mo dwam gwibin sin ki syal neibik- men kirekam ena hamal hap kalang gwe gukuke.

29 Zep Bian, emki enlala gwibin- insa anakan asa nenbiridalke, 'Ëe asa emsa karek labir- em de zëno bosekam tawa tabinkimye.' Hwëna

* 4:12 4:12 Yoh. 14:6; 1Tim. 2:5 * 4:24 4:24 Mzm. 146:6 * 4:26 4:26 Mzm. 2:1-2

sosonna E-en esa ki abe mae hap gol gwizimdi- ëe dikim ere mo olsa udobe naban tonbirida gwen hapye. ³⁰ Zep Emki ere mo dam tasin lalak Zini Yesus mo bosekam zi sang-sangsa dawem ta gwibin, hen owasowassa syal gwe-gwibir-zimdin-dekam deka tingan daibliblak.”

³¹ Kim nen sonesiblik, Alap ki zep gola men zao tagal gwek ewak taka. Zere mo Enhona dekam zep ing gwe hebiridaka. Zen dekam zep udobe naban Yesus hup de Alap mo ola donbirida gwek.

Zere mae mo kire-kirena kim apdekam bi neblanda gwe'akke:

³² Tingere Yesussu de taibliblan wenya dekam enlala aha-erekam lowehe gwek, hen enho aha-enkam. Zen hom zere mae mo kire-kirena zere en hap inik neblanda gwek, hwena kitak apdekam bi neblanda gwek.*

³³ Dua-blaskam de dam tasibin zinik dekam zep sosonna mam gwizimk- zen dikim anakan gol halada gwen hap, “Yesus mes etan tin nikon ngaya gweka.” Alap mo kwasang-kwasangna dekam kitak zebon mae onak lwa gwizim'ik.

³⁴ Dekam Yesussu de taibliblan wenya hom mae etahalha gwe-gwe'ak, sap dekam zini zere mae mo kamasa ahaksa gol maesa te-ala hap lirak da gwibi'ik.

³⁵ Te-alana desa zep dua-blaskam de wenya in hap kap da gwizimzik. Zen desa zep hwena tahalha wenya kip kae neblanda gwizimk.

³⁶⁻³⁷ Dekam zep hen lang tekna Siprus kore zini, Yusup, ngasa te-ala hap lirak taka. Te-alana desa zep kitak dua-blaskam de wenya in hap zerzim zika. Zini in Lewi Bak mo ausu nakorena. Dua-blaskam de wenya in man hen desa bosedak Barnabaskam. Bosena in mo enlalana, “Zi mo enlalasa de tatete ta gwizimdin hip de zi.”

5

Ananias ne Sapira ne kim Alap mo Enhona boton lakke:

¹ Ahana hen zini ki, bosena Ananias Bak. We zem bosena Sapira. Zen hen kamasa te-ala hap lirak uk.

² Hwena zen man te-alana zere nikip hli lasik. Aha hlik en naka zep Ananias dua-blaskam de wenya kip anakare ola ban zerzimki, “An tinganë ep zerzim'in.” Hwena we zeban mes kirekam de ahap labin hip ola aha-en uk.

³ Ki zep Petrus gubluka, “Ananias, em bap ere mo enhonak dowal mo kigisa kara ta'ara? Em zebe Alap mo Enhona boton tanda. Te-alana an errep ema hli tasili.

⁴ Kamana in lirak gun sremnak, zen dwan ere nik mo denakake. Hen kime lirak gulku, te-alana zen dwan hen ere nik mo denakake. Diki emaka asa gubiridala, ‘Ee aha hlik en tolakaë golzim'in.’ Hwena em an asa en home boton tabirida. Hwena Alapsae boton tanda!”

⁵ Ananias kim sane ta'anka, ki zep ze hendep tokna zanka. Kitak men zen esak, dekam zep serkam eairi'ak.

⁶ Wal sei-siwiri ki zep yaing gwezak- tok naka de tahalehan hap. Kire naka zep dre nwanun hap nerhak.

⁷ Yakla nwena san ha dan-ahan damank, ki zep hwena we zem hatazak. Zen hom tame gu'uk- in zen ki zi zebon lwakye.

⁸ Petrus ki zep takensibirki, “Emki asa gublun: San ha eiwa te-alana an zen en?”

Ki zep ding gulbluk, “In eiwa, zen en.”

⁹ Petrus dekam zep ding gulbirki, “Em bap ola aha-en ulki- Alap mo Enhosa dikim akasiblin hapye! Emki tana sasak-sasaksa sane gwe gun. Zini men zen eno zi mo tokna ner dwanunan, zen lwanda ha'anzal. Zen hen kirekam sa eno tokna nolwet sol!”

¹⁰ Zen hen mumuk ennak zep tokna zank. Wal sei-siwiri in kim

* 4:32 4:32 Kis. 2:44-47

yaïng gwe'anzak, ki zep zë we zik mo tokna hla nulzik. Desa ki zep hen zi zik mo alp nakon de lo nwanun hap nol inehak.

¹¹ Dekam tangan tïngare Yesussu de taïbliBlan wenyä hen tïngan men zen ësak dawemkam tangan ëairi'ak.

Dua-blaskam de dam tasibin wenyä kim zini beyakam dawem da gwibikke:

¹² Dua-blaskam de dam tasibin wenyä dekam zep owas-owasna beyakam zi trana in mo ngïrïnnik syal nei gwibik. Yesussu de taïbliBlan wenyä in dekam man Alap mo golak ëtagal gwe-gwek-Salomo Bak mo teksonnak.

¹³ Yesussu de taïbliBlan srëm wenyä, zen hom zë ëgolek de gwe-gwek. Zen man naïribirida gwek, hwëna man tangan hen dawemkam blikip neisibirida gwek.

¹⁴ Hwëna zao kim lwa se'ak, zao zep etan Yesussu de taïbliBlankam ëmas-mas gwe zahe'ak- sap zi, sap we.

¹⁵ Hëndep dekam zep zi sang-sangna ora san zato naban hen deyol dëre naban kang nul zahe gwek. Man ëenlala gwe-gwek, "Petrus de desan taman zankam, zëno au-au en mae nik de kwë tabir zinkam, zen dekam sa ëdawem gwer."

¹⁶ Zini beyam-bya tangan nik Yerusalem mo golek de ë-ë nakon zi sang-sangna kap nulhal gwezak-hen dowal de tïlbiridan mae naka. Zen dekam zep kitak ëdawem gwe-gwek.

Dua-blaskam de dam tasibin wenyä kim karek da gwibikke:

¹⁷ Alap mo golak de syal tan zi mo teipsinni dekam zep wal bose wal zeban zihusus gwibirida'anka. Zen kitak Saduki hon de bitï gwen wenyä. Zen mae hap zihusus gwibirida'anka: "Abon mae onakon kim hwëna beyakam wet so gwe'an."

¹⁸ Dekam zep dua-blaskam de dam tasibin wenyä insa dahyok. Ki zep bwinak yal nulnek.

¹⁹ Hwëna kam zep Alap mo dam taha nakore zi lïlikinni talusuzim niraka. Desan zep golëwet so gweka.

²⁰ Man zë gubiridaka, "Em sek gwen. Alap mo gol teksonnak ëzauk. Dekon ëngaya gwen hap de ola insa kitak lonbiridak."

²¹ Kim litik, kirekam zep ki hëndep syal neibik.

Alap mo golak de syal tan zi mo teipsinni dekam zep hen wal bose wal zeban Alap mo gola iwe aha teksonnak golëyaïng gwe zaka. Dekon zep Yahudi mo teipsin sinode-nak dena nen sone-biridak- hëndep tïngan. Zen kim yaïng gwezak, dekam zep Alap mo golak de jana nabare zini nenbiridak- bwinak de zini insa de kap gul halzan hap.

²² Zen kim bwinak yaïng gwek, hwëna hom zë hla nulidak. Kim lwan dahak, ki zep nenbiridak,

²³ "Ëe kimë zë yaïng gwenal, dekam lïlikinni kitak tayalsibiri danna. Hen lïlikin kara tabin hip dena, zao ëzaun dasan. Hwëna kimë lalusundal, ëe homë mae zë zini hla lal!"

²⁴ Kirekam kim nenbiridazak, dekam zep jana nabare zi mo mamna hen Alap mo golak de syal tan zi mo mam-mamna in enlalana anakare hap ëtopse gwe'ak, "An ki banarekam sa lwal?"

²⁵ Hwëna ki zep zë zini gubirida zaka, "Emki ësan! Em mensa zini bwinak yal ulnek, zen angkam Alap mo gola an mo aha teksonnak zi beyam-byasa tawa dabi'in!"

²⁶ Jana nabare zi mo mamna in dekam zep desan dep golësek gweka- etan de zitahyo halzan hap. Hwëna sam-sam enkam kwang nulida halzak- mae hap, "Nene jala ban kwang ulida ha'ak, ki zi trana an sa nësa kasokam mos-mos da gubir."

²⁷ Ki zep etan nolëbitï gwezak-dekam de Alap mo golak de syal tan zi mo teipsinni in taken-taken

gwibiridan hap, tîngare teipsîn-teipsîn zi mo nwenak.

²⁸ Zen man gubiridaka, “Ëe dwan mes-am ol drakkam emsa anakan jalse eibiridak, ‘Em bahem zini in mo bosekam tawa ta gwibin.’ Hwëna em mese kîtak de Yerusalemk de zini tawa la gwibik. Hen em dekam ema êkalang gwe'an- Yesussu de tan jal hap de zen hwëna asa tamerazan hap!”*

²⁹ Petrus ki zep wal bose wal zeban ziding gulku, “Nen diki Alap ensa nen betek gweblan. Zi bosyansa bap nen!

³⁰ Nëno mae mo auyan-aza mo Alap, Zen mes Yesussu tîn nikon ngaya taka- mensa ena te-lidak sonnak makan la inkke.

³¹ Hwëna Alap mes Desa zëre mo dam taha nakon de teipsîn hip drëne seka- dekon de îrik gîn hip hen ngaya tabin hip, hen Israelk de zisi dikim halen ora san dep golëwet so gwen hap, hen zëno mae mo karek-kareksa dikim tap gulsuk gwizimdin hip.

³² Asa hen mes ki dam tasibirki-dekam de ola insa gol halada gwen hap. Hen owas-owasna mensa Alap mo Enhona abe mae hap gol gwizimnira, zen ola insa dikim eiwa gul gwen hap. Zep zini men zen Zënaka betek nê gwebla'an, zëbe mae hap angkam man Alap zëre mo Enhona zer gwizim'ira.”

³³ Kirekam kim Petrussu nasal-blak, dekam zep ëjal gwe'ak, hëndep tameran hap zep enlala neibirida'ak.

³⁴ Hwëna Farisi walya bosena Gamaliel Bak zao hen gwë'anka. Zen Musa mo tîti tabin olsa de tawa ta gwibin hip de zi, hen desa zini man blikip neisik gweblak. Zen ki zep luweka, ki zep gubiridaka- dua-blaskam de wenyä insa de ë nakon golëeissîn dalaboran hap.

³⁵ Ki zep gubiridaka, “Israel mo ausu nakore zi, dawem enkam emki

anakan ëenlala gwen, ‘Kirekam asa eibiridal.’

³⁶ Sap orep zini bosena Teyudas, zen man zënaka gu gweblaka, ‘Ëe mamna,’ dekam zep zini 400 enkam ang nêblak. Hwëna kim dak, dekam zep zëbon de ang ta gwen wenyä in sekwak gwëk, hëndep dekon etan banakan mae hom lwak.

³⁷ Zëno hyanak kim sensus nuk, dekam etan Galilea walya Yudas man golëilman gwëka. Hwëna kim hen dak, zëbon de ang ta gwen wenyä dekam zep hen sekwak gwëk.

³⁸ Zen in zep, angkam an zen ki lwa'an, ëe ama emsa tîti tabi'in: Bahem banakan mae gweibiridan. Nwe enkam emki kara tabin. Sap zëno mae mo syala hen tawa tabinni, zi mo enlala san de lwa'ak, sa topse gwizim.

³⁹ Hwëna Alap mo enlala gwibin sin diki syal ta'ak, esa topse eibiridal. Nene hwëna lamera'ak, ki hwëna sa nwe-mase gwer- san de Alap han de zerilman gwenna kiye.”

Zëno ol san zep ang tak.

⁴⁰ Ki zep etan dua-blaskam de wenyä insa de golëbiti gwezan hap nenbiridak. Zao zep dangolebik. Ki zep nenbiridak, “Dekam sek gwëk. Hwëna Yesus mo bosekam bahem etan tawa ta gwibin.”

⁴¹ Zen hwëna isrip-sri naban zep kon sek gwëk. Sap Alap mes desa anakan gubiridaka, “Zen mes ëdakastik- Yesus mo bose hap de kareksa goltowen hapye.”*

⁴² Zen hwëna hom nolzausuk-anakarekam de tawa ta gwibin niye, “Yesus Zen Zen- nësa de ngaya tabin hip de Zi niye, mensa Alap gu-guk gwëkaye.” Zen yakla jamkam Alap mo gol teksonnak hen zi mo gol-gol san donbirida gwëk.

6

Kristen zi mo tahasa de trî so gwizimdin hip kim zini tuju enkam dam dasibikke:

* 5:28 5:28 Kis. 4:18; Mat. 27:25 * 5:41 5:41 Mat. 5:10-12; Yak. 1:2; 1Ptr. 4:13

¹ Dekon kim lwa se'ak, Yesussu de taibliblan wenyä dekam zep ebeya gwe song gwe'ak. Dekam Yahudi zi ausu nakore zini men zen Yunani zi mo langnak de lowehe gwenkam Ibrani ola eititi neibik, zen man jakal neibiridak- men zen nama Ibrani olkam don gwibikye. Mae hap jakal neibiridak, "Em Ibrani ol tawa wenyä ano mae mo we sememna ema ti kul sonenda gwe'an-tembanena in kim kae eibirida gwenanye."

² Dekam zep dua-blaskam de zini in tagal nulsuk, ki zep zë nenbiridak, "Aya-wal oso-wal, ëe de Alap mo olsa de tawa tabinsi golzausun hup hom dakasti'in- dekam de hwëna tembanesa kae gwibirida gwen hapye."

³ Diki dawemna zisi emki ere mae mo ngirin nikon tuju enkam dam tasibin- ere mae mo anakan de tame tabin nika, 'An enlala blala hen Alap mo Enhona ki zëbon mae onak lwa'ara.' Zëbe mae hap aka syala insa wei kul sonezimk,

⁴ ëe akakim aha syalak ëhir-hir gwe srëm gwe-gwek. Hwëna ëe dekam anakare enlala en naban asa lowehe gwer: Biansa asa en sonebla tine gwer, hen ëngaya gwen hap de olsa asa tawa labir tine gwer."

⁵ Tingan desan zep ki ang tak. Dekam zep zini dam dasibik.

Ahana Stepanus. Zen dawemkam de Yesussu taibliblan tanganna, hen Alap mo Enhona mes dawemkam ing gwe heblaka.

Ahana Pilipus, Prokorus, Nikanol, Timon, Parmenas, hen Antiokia walya Nikolas. Zen nër hom Yahudi hon til zika, hwëna dekam zep nabakam Yesussu taibliblaka.

⁶ Tujukam de zini insa kim dua-blaskam de zini in hap nolëtreizimk, dekam zep Alapsa zëbe mae hap taha tehabirida inen naban abe dak.

⁷ Dekam zep hëndep Yesus hup de Alap mo ola Israelk nolanga gwesikhal song gwek. Hen Yerusalemk dekam zep nabakam Yesussu de taibliblankam ëmasmas gwe-gwek. Hen Alap mo golak de syal tan zini dekam zep hen beya tangankam Yesussu daibliblak.

Stepanussu kim balk dakke:

⁸ Dekam Alap Stepanus hup sosonna hen kwasang-kwasangna mam tangankam gol gweblaka. Zen in zep owas-owasna zi tra mo nwenak syal gwe-gwibirki.

⁹ Hwëna Yahudi mo aha but srëm golak de wenyik zep husus nëbla'ak. In zen husus nëbla'ak, zen men zen aha lang nakon Yerusalemk yaing gwe zakke- ëna Kirene kon, Aleksandria kon, langna Kilikia kon, hen Asia kon. Zëno mae mo but srëm gola, bosena, "zi mo tana iltikinnik de teinikirin srëm zi mo dena." * Zini in man Stepanus hun nërol tetek gwe'ak,

¹⁰ hwëna zen bëjen zëno ola gulsublun. Sap Alap mo Enhona man zëbe hap enlala blala ing ta sone gweblaka.*

¹¹ In zep zen aha zi hip te-alasa nolzimk- dekam de zen boton ol bloblokam Stepanussu anakan zergun hup, "Ëe ama asalblak. Zen man Musa mo titi tabin ola ban Alap han lamang soka."

¹² Zen kire olkam zep Yahudi zi mo nol-nolik mo enlalana ben-ben dazim'ik- hen Musa mo titi tabin olsa de tawa ta gwibin zi mo, hen zi tra mo enlala naye. Dekam zep hëndep Stepanussu balk da halzak- Yahudi mo teipsin sinodenak de zertrën hapye.

¹³ Zen hen man klak tan zini insa kwang nulida halzak. Zen zep eguk, "Zini an Alap mo gol dawemna an han Musa mo titi tabin ola ban man lamang so gwenda."

* **6:9 6:9** Kirekam de but srëm gola insa bose gunkum, "zi mo tana iltikinnik de teinikirin srëm zi mo dena," dam gulsunnu, zini in nër hom zi mo tana iltikinnik de babu gwen nakon wet so gwek.

* **6:10 6:10** Luk. 21:15

14 Ëe ama anakan de torannak asalblak, 'Nazaret walya Yesus, zen sa Alap mo gola ansa dri yulsu zula. Hen Alap hap de syala mensa Musa nöp hli yulzimki, desa sa kitak wet gulsulu.' "

15 Tingan in zen teipsin sinodenak teinikin'ik, Stepanussu man karatda da'ak. Zëno nwe-masena dekam man liwe heblaka- san de Alap mo dam taha nakore zi mo nwe-masena kiye.

7

Stepanus kim sap zëre mo timni golsriwekake:

1 Alap mo golak de syal tan zi mo teipsinni dekam zep takensiblika, "In san eiwa denaka ki ëtonnan?"

2 Stepanus ki zep ding gulku, "Aya-wal oso-wal hen biankam dena, emki asa sane tan. Nëno mae mo auyanna Abraham kim nama Mesopotamia mo langnak gwë'ankake, zen kim Haran san dep al gwe srëm gwe'anka, dekam Teipsin Zini Alap man Zënaka zertrëblaka.

3 Ki zep zë gubluka, 'Em ere mo langna hen ere korena hli yuluda. Langna men desaë ep goltrëbla'ak, desan dep al gwe.'*

4 "Abraham dekam zep langna Kasdim kon Haran san dep al gweka. Bi zem kim tilki, Alap dekam zep etan langna awe dep zer sone zaka.*

5 Dekam Alap hom mae kama maena Abraham de desa bi gwibin hip golblaka, hwëna sap'nen gu-guk gweblaka, 'Langna an eno auyan-aza sa bi neibir.' Hwëna Abraham dekam hom walas gwe'anka.*

6 Zen man hen hamal hap gubluka,

'Eno auyan-azana sa zi mo lang san ëal tal. Zëwe de zini sa desa tahunna empat-ratus enkam jap nul sonenda gwer hen karek da gwibir.

* 7:3 7:3 Kej. 12:1 * 7:4 7:4 Kej. 11:31; 12:4 * 7:5 7:5 Kej. 12:7; 13:15; 15:18; 17:8 * 7:7 7:7 Kej. 15:13-14; Kel. 3:12 * 7:8 7:8 Kej. 17:9-14; 21:2-4; 25:26; 29:31-35:18 * 7:10 7:10 Kej. 37:11; 37:28; 39:2; 39:21-23; 41:37-44; Mzm. 105:20-22 * 7:12 7:12 Kej. 41:54; 42:1-5

7 Hwëna hyanak, Ëe asa zëwe de zisi karek tabir. Dekam sa eno auyan-azana langna in kon wet so gwer. Dekam sa hwëna langna awe Asa betek në gweblal, hen otwer-ansa sa abe hap tru dasik gweblal.*

8 Dekam kim Alap Abraham hap ol gu-gublun yala insa golblaka, dekam zep Abraham han ola zeraha-en gulku,

'Em de ola an san ang gwen hap, em ere mo auyan-tane walya ban to mipna ziblom tasik gwibir.'

Ki zep hwëna Abraham Isaksa wë taka. Mingguna kim aha-en tamank, dekam zep to mipna blaonsubluka. Etan Isak Yakobsa wë taka, hen Yakob dua-blas enkam wei-wik gulku- nëno mae mo zi ausu mo auyansa.*

9 "Hwëna Yakob mo walasna in oso zem Yusupsu man husus nëblak. Desa zep zi mo tana iltikinnik de babu gwe-gwen hap Mesir hip tealakam neirzimk. Hwëna Alap man zë kara ta gweka.

10 Zen zep jalom ëk tihî nakon zeser sone gweka, hen enlala blalsa zer gweblaka, hen Mesirk de teipsin zi mo nwenak dikim dawem gwen hap dena zep golblaka. Hëndep teipsin zini in dekam zep zëno alp nakon de hen teipsin hip gubluka.*

11 "Hwëna dekam zep usak yala tingare Mesir mo langnak hen Kanaank awe hatak. Dekam zep karekkam ëtahalha gwëk. Nëno mae mo auyanna dekam hen usak naban lowehe gwëk.

12 Yakob kim salka, 'Mesirk gandumnu ki,' dekam zep walas zemka lup gul soneka- dekam de zëwe tealakam lop tan hap.*

13 Etan kim tap gweka, dekam zep etan lup gul soneka. Hwëna dekam zep Yusup gubiridaka, 'Ëe an zen-Yusupye.' Mesirk de teipsin zini in

dekam zep tawa gwibiridaka, 'Hare an Yusup mo iye sake.'

14 Yusup dekam zep bi zemka gu soneblaka- we wal walas naban de kitak zère osan dep al tazan hap. Dekam beyana 75 enkam zep al tak.*

15 Yakob Mesirk zep tilki. Hen nëno mae mo orep de auyan-azana zao zep juwe gwék- hen sap Yusup zëna.

16 Zëno mae mo tok-tokna man etan Sikem san dep nolêlwandahal gwèzak- zëwe de lo tasik gwibin hip, men zao hen Abraham zënaka lo dasikke, zëna men desa ngana Sikemk walya Hemor Bak mo auyan-tane walyak te-alakam zerkake.*

17 "Abrahamsa mensa Alap gu-guk gwèblaka- zao de zaun hup kim golek de gwe'ak, dekam nëno mae mo auyan-azana mes tangan Mesirk ëbeya gwék.*

18 Dekam hwëna Mesirk aha zi teipsinkim irik gilki- Yusupsu de tame tan srëm nik.*

19 Zen nëno mae mo auyan-azasa yane-ne ta gwibirki hen jap gul sonenda gwëka, hëndep wal baizîlsî de honak yal gulne gwen hap tik-tik ta gwibirki.*

20 "Musasa dekam zep hen jaha gwék. Hwëna an-bi zem man tame lak, 'An totore walassa hom.' Zen zep golak dan-ahare ben enkam tol ërgwëk.

21 Embwan naban kim hëndep honak tak laink, hwëna teipsin zini in mo wenam zep zer inek. Zen zep zère mo walas makan hanan tak.*

22 Mesir zère mae mo enlala blalkam zep tawa dak. Zëno syala hen ol toranna dekam zep sosen gwèblak.

23 "Musa mo tahunna kim empat-pulukam altîlsiblik, dekam zep enlala gwëka, 'Ëe anik ëre kore naka hlauludak.'

24 Zen kim hlauluda'anaka, dekam zep hwëna Mesir walya Yahudi walya de tangolennak hla ta'anaka. Dekam zep hwëna Yahudi bose zem insa de sap zerzaunnuk Mesir walya insa mos ta guku.

25 Musa dekam man tim gu'unka, 'Are korena sa asa anakan tame dal, "Alap an desa dam tasi'ira-nësa dikim gwis gwe sonen hapye." ' Hwëna zen hom kirekam tame dak.

26 Ka'ankam, ki zep etan Yahudi bose zemka ake'anaka. Man tobe ë'anaka. Ki zep sap anakare ola ban kles so'anaka, 'Em an Yahudi bose omkake! Em ba habe enaka karek oso'ara?'

27 "Hwëna men zen wal bose zem insa lek-lek ta'anaka, zen zep Musasa anakare ola ban ata taka,

'Emsa nara teipsin hip gwèbluka- dekam de darak gwen zisi klis gul gwen hapye?

28 Em san asa de tan habe hen dwam gwèbla'ara- men kirekame Mesir walya ir takake?'

29 Musa kim kirekam salblaka, dekam zep enlala gwëka, 'O ano zi tanna in mes-am tingan ëtawa gwendal,' dekam zep langna Midian san dep heya gwëka. Zao zep zi mo langnak gwë gwëka. Walasna zao zep dan wë soka.*

30 "Zao kim tahunna empat-pulukam tamanblak, Alap mo dam taha nakore zini ki zep zi srëm langnak Musa hap zënaka zertrëblaka- kwatapna Sinai golek denak. Man zë nwe-mase gwëka-syauk nubare te tyum-tyumnu kiye.

31 Kim syauknu insa hlaul seka, ki zep tenggwanbi'inka. Dekam zep golek kon de hlaun hup song gwe'anaka. Hwëna dekam zep Bian mo ola anakan salka,

32 'Ëe an eno auyan wal mo Alap- Abraham, Isak, hen Yakob mo Alap.' Musa dekam zep aïrin hip yal-yal gwe'anaka, hen desan de kara gwen hap man aïri'anaka.

* 7:14 7:14 Kej. 45:1-18; 46:1-7; 46:27; 49:33 * 7:16 7:16 Kej. 23:3-16; 50:7-13; Yos. 24:32 * 7:17 7:17 Kis. 7:7 * 7:18 7:18 Kel. 1:7-8 * 7:19 7:19 Kel. 1:10-22 * 7:21 7:21 Kel. 2:1-10; Ibr. 11:23-26 * 7:29 7:29 Kel. 2:11-15; 2:21-22; 18:3-4

33 “Dekam zep Bian etan gubluka, ‘Sepatuna alsîk, sap kamana an zaoe zau'ura ère en hap dena.

34 Ano zi bi gwibiridanna, mensa Mesir karekkam jap nul sonenda gwe'an, mesè hlauludak. Hen zèno mae mo èsol-sol gwe-gwenna mesè sane gwek. An zebè dekam de hîl tî sonebin hip ati gwenanzal. Zep angkam Èe ama etan Mesir sin dep emsa zer sone'an.’

35 Musa in men desa nonol anakare ola ban baes nèblakke, ‘Emsa nara teipsîn hip gubluka- dekam de darak gwen zisi klis gul gwen hapye?’ Hwëna Alap Zen desa zer soneka- zen de teipsîn hip, hen zen de zère mo bi gwibiridan zini insa hîl tî sonebin hipye. Hen Alap mo dam taha nakore zini men zen syauk nubare te makan zënaka zertrëblaka, zen hen man mas gwe-gweblaka.*

36 Musa dekam zep Mesir kon gwiswe soneka. Dekam de taïblîblan hap owas-owassa syal gwe-gwibir-zimki- nonol Mesirk, hi bosena Kal-kalak, hen sasa langnak kim empat-pulu tahunkam golëlowehe gwekake.

37 Zen Israel Bak mo ausu nakore zini insa hamal hap anakan gubiridaka, ‘Alap sa ahanaka ere mae mo ausu nakon dam tasizimdimen kirekam hen asa dam tasîkîke, zère mo olsa de ayang gul gwizimdin hip.’*

38 Zen in kim sasa langnak golëlowehe gweka, dekam Alap mo dam taha nakore zi niban kwatapna Sinaik aïsîl è gweka, hen zen dekam zep èngaya gwen hap de ola hamal hap salka. Zen desa zep nèbe mae hap hli yulzimki.*

39 “Hwëna nëno mae mo auyanazana man desa de betek gweblan hap baes ta gwek. Zen dekam èk enkam Musasa ang nè gwebla'ak, hwëna enhonak Mesir sin de etan

lwan dahan hap de enlala en lwa gwizimki.*

40 Dekam zep Harunsu nenblak, ‘Abe mae hap em yang tabin dowal-dowalsa yang tabir-zimdinzen deka nësa etan Mesir sin dep nolëlwana dahak. Musa Bak in zen nësa sîl tîbirhal zaka, èe homè angkam anakan tame la'an, “Zao gwè'ara.” ’

41 Dekam zep yang tasîn dowala zisyal gweblaka- sapi tane nwe-mase makare naka. Ki zep otweranna dowala in hap tru da seblak, hen tembane yala zèno bose hap syal neibik. Hwëna dowala in sap zère mae mo tahakam de syal gwe-blanna.

42 Alap Zen dekam zep tahanna gweisibiridaka, ‘Amki dowal-dowalsa betek eibirida gwek- hen nglînak de keis maesa.’ Zep Alap mo ol ayang gul gwen zini mensa anakan ale nul gwek man hen dakastî'in,

‘Israelk de zi, em kime sasa langnak empat-pulu tahunkam lowehe gwek, em abe en hap home otweranna hen aha kire-kire maena ol gweblak. Em ema yang tabin dowal-dowal hap hen ol gwizimk.

43 Sap em dekam Molok Bak ne keis nibare zini Refan Bak nekae boklena kom oso gwizimk- ena mensae yang ososukke. Èe in zep asa emsa è yala Babel mo men eihya san dep yal gul.’*

44 “Hwëna angkam Alap mo gol hap denakaè emsa tonbirida'an: Musa kim sasa langnak golëgwëka Alap man gubluka, ‘Abe hap em deyolkam de golsa syal gwibirblin- men kirekamè ebe hap goltrëblakke.’ Dekam zep gola insa zisyal gwibir-blika, hen gola insa man zère mae mo lowehe naseran san zial gulusen gweka. Sap Alap man dwam gwibiridaka- gola insa de hlaunkum de anakan dam gulsuk

* 7:35 7:35 Kel. 3:1-10; 2:14 * 7:37 7:37 Ul. 18:15-18 * 7:38 7:38 Kel. 19:1-20:17; Ul. 5:1-33; 9:10 * 7:39 7:39 Bil. 14:3 * 7:43 7:43 Kel. 32:1-6; Am. 5:25-27 * 7:44 7:44 Kel. 25:9; 25:40

gwen hap, 'Alap man nësa golëlowe he'ara.*

⁴⁵ Ki zep hëndep langna an san dep nolsong gwezak- Yosua Bak kim golëeija song gwe zakaye. Alap hen dekam man Zënaka de tame tan srëm zini insa golëalsa sone gwibirki. Gola in deban ki zë hëndep nolgwë gwëk. Hëndep Daud kim teipsiki, gola insa man nama hlaul zuka.*

⁴⁶ Daud man tangan Alap mo nwenak sam gwesiki, ki zep auyan Yakob mo Alapna insa abe taka, 'Ee wëhë ebe hap gol dawemna taublu'ak?*'*

⁴⁷ Hwëna zën hom taubluka. Hwëna tane zik taubluka- teipsin zini Salomo Bak.*

⁴⁸ "Hwëna Teipsin Zini Alap, Zen hom zi mo taublunnak gwë gwenda- men kirekam Alap mo ol ayang gul gwen zini anakan gublukake,

⁴⁹ 'Nglina zen dekonë teipsinkim irik gi'in.

Okamana zen zëweë tanana ik so sone gwenan.

Zep em bëjen em abe hap gola taublun-

Eë dekon emsa golëlowehe gwen hapye.

⁵⁰ Ki san Eë homë ère mo tahakam kitak yang tabik?*'*

⁵¹ "Zep eiwa em in zi ausuna dawemkam de nol drak-drak tanganna! Em in, eiwa, nëre mae mo auyan-aza naban apdenak- san de i srëmna! Eno mae mo enhona apdenak- Alapsa de tame tan srëm zi nibanye. Em in Alap mo Enhosae èreja tine gwenan!

⁵² Emki èenlala gwen: San ha ki?- Alap mo ol ayang gul gwen zini, eno mae mo auyan-aza de karek tan srëm naye. Sap zen kitak karek tabin enna! Hëndep men zen hamal hap nenbirida gwëk, 'Emsa de ngaya tabin hip de Zi lalakna sa hata zala'- desa man hen damera

gwëk. Zen hëndep enlalana in em debane nama èrgwë'an. In zebe nër hom lalak Zini insa tan hap èrguk, hëndep lak.*

⁵³ Em sap tawana- titi tabin ola mensa Alap mo dam taha nakore zini Musa hap ayang nul gweblakye. Hwëna em toton banakan dep?- desan de ang tan naye!"

Stepanussu kim kasokam tok hap niri'blakke:

⁵⁴ Desa de tonbiridannak kim sane da'ak, dekam tangan zep sërkam u sal-sal nëbla'ak.

⁵⁵ Hwëna Alap mo Enhona dekam zep nwena lirisin soblaka, dekam zep ngli san kara gwe seka. Man dalusuhuk. Zao zep Teipsin Zini Alapsa hla ta seka. Tane Zem Yesus dam taha san dekam zau'unka.

⁵⁶ Ki zep hwëna gubiridaka, "Emki hlaun. Eë ngatan zi mo lang san kara gwe senan. Man dalusununhal. Ngatan zi mo lang nakore Zi Tanganna Alap mo dam taha nakon zau'ura."

⁵⁷ Kirekam kim nasalblak, dekam zep ini mat dasibik, hen dekam zep anakare ola ban ena ta'ak, "Zini an nen tan!" Ki zep zë hëndep nabakam dot dasik.

⁵⁸ Dekam zep hëndep ëna in kon il dihak, zao zep kasokam niri'blak. Men zen botonkam klak dak, dekam de zën nonol itiblan hap, zëre mae mo tahan bajuna wal seiwiri Saulus mo tana alpna kang dazak- zen de kara tabir-zimdin hip.*

⁵⁹ Kim niri'bla'ak, dekam zep Biansa gu soneblaka, "Bian Yesus, ano angsa emki zer irin."

⁶⁰ Dekam zep boklena kom soka, ki zep ol mamkam takenka, "Bian, ansa karekna syal neibi'in, emki tap gulsuzimdin." Kirekam kim guku, ki zep hëndep tilsiki.*

* 7:45 7:45 Yos. 3:14-17; 4:11; 18:1; 23:9 * 7:46 7:46 2Sam. 7:1-16; 1Taw. 17:1-14 * 7:47 7:47 1Raj. 6:1-38; 2Taw. 3:1-17 * 7:50 7:50 Yes. 66:1-2 * 7:52 7:52 2Taw. 36:16; Mat. 23:31 * 7:58 7:58 Bajuna in mae hap dalwesik: Dekam de sam hap i tiblan hap. * 7:60 7:60 Luk. 23:34; 23:46

8

1 Saulus man tannak kara tabi'inka, hen tan hap de ola man mas gulku.

Saulus kim Yesussu de taibliblan zisi karek ta gwibirkike:

Stepanussu in kim dak, dekon zep ki hēndep kon gwesik hanak-Yesussu de taibliblan zisi de karek ta gwibinkim. Dekam zep Yerusalem kon tingare zēwe de lang san dep heya-hya gwek, hen ahakon Samaria san heya-hya gwek. Diki dua-blaskam de zini in, zen zēwe en ki lowehék.

2 Alap hon de étal gwesin wenya ki zep Stepanussu nēr dwanuk, hen gona dawemkam dablak.

3 Hwēna Saulus man Yesussu de taibliblan zisi de timbwas tabin hip golēalp gwe-gwe'anka. Zen golgol san tahyondan hap golēhakal gweka, dekon zep bwinak dikim yal gulnen hap ziil tūbirhal gweka- sap zi, sap we.

Pilipus kim Samariak ol dawemna tonbirida gwekake:

4 Men desan ki heya-hya gwe song gwek, Yesus hup de ol dawemna desan zep ki tawa dabir song gwek.

5 Pilipus Bak * dekam zep Samaria mo aha ē san tineka. Zao zep ol dawemkam anakan tawa ta gwibirki, "Yesus Zen Zen- nēsa de ngaya tabin hip de Zini, mensa Alap gu-guk gweblakaye."

6 Zēwe de zi trana in kim sane da gwek, hen zēno owas-owas syal gwibinni kara nul gweblak, dekam zep tangan zēno tawa tabin sin ahare enlalakam ang tak.

7 Sap dowal-dowal mo bi gwibirdan zini zao beyana. Hwēna Pilipus kim zēbon mae onakon golēalsa sone gweka, hērhen naban zep kon wet so gwe-gwek. Hen zi lekna hen sap taha-tana teisyā inen srēm zi sang-sangna dekam beyakam Yesus mo bosekam dawem ta gwibirki.

* 8:5 8:5 Pilipus in, san ha dua-blaskam de wenya in mo ahana? (Kis. 1:13) San ha tujukam mensa Kristen zi mo tahasa de trī so gwizimdin hip dam dasibikke (Kis. 6:5), zēno mae mo ahana. Nen angkam home tame u'in.

8 Ēna iwe de zi mo isrip-srina dekam tangan zep mam gwizimk.

9 Ēna iwe hen ki zini bosena Simon. Zen meiyer golzauk gwen zi, hen tingare zini zēno syala man dengguan gwibik. Zēna hen man zēnaka anakan gu gweblaka, "Ano sosonna mam tanganna."

10 Hen tingare zini, sap mamna hen sap betekna, desa man nasal gweblak. Zen man nen gweblak, "Alap mes zēbe hap soson yawala golblaka."

11 Pilipus de hatan srēmna, zen desa en ang nē gweblak, sap zen man zēno owas syal gwibinni dengguan gwibik.

12 Hwēna Pilipus kim tonbirida gweka- Kristus Yesussu de taibliblankam de Alap mo irik ginnik bitī gwen hap de ol dawemna insa, zen dekam zep Yesussu daibliblak. Dekam zep hēndep baptis ta gwibirki- sap zi, sap we.

13 Simon zēna hen dekam zep Yesussu taibliblaka. Desa hen dekam zep baptis taka. Zen dekam zep Pilipussu ang gwebla nasen gwe'anka, sap zen man tangan Pilipus mo owas-owas syal gwibinni tengguan gwibirki.

14-16 Yerusalem kon kim Yesus mo dam tasibin wenya anakan ēsak, "Samariak de zini mes Alap onakore ol dawemna daiblibik, hwēna Alap mo Enhona hom ing gwe hebirida'ara," dekam zep Petrus ne Yohanis neka etan desan dep deisyā sonek. 15Zen kim aptaka, dekam zep zēbe mae hap Alapsa en soneblaka- zēre mo Enho dikim hen ing gwe hebiridan hap. 16Sap Pilipus kim Yesus mo bosekam baptis ta gwibirki, Alap mo Enhona hom dekam ing gwe hebirida'anka.

17 Hwēna Petrus ne Yohanis ne kim tahana lehabirida ineka, dekam zep Alap mo Enhona ing gwe hebiridaka.

18 Meiyer hlaul gwen zini Simon in kim hlauludaka, "Zëno nik mo taha tehabirida inenkam Alap mo Enhona ing gwe hebiridanda," dekam zep abe soka, "Ëe asa ep te-alasa golzim.

19 Abe hap sosonsa olbla- ano taha tehabirida inenkam deka hen Alap mo Enho ing gwe hebirida gweka."

20 Petrus ki zep hwëna ding gulbluka, "Ere mo te-ala naban esa syauk sun dep zersong gwera, sap em ema tim gu'ura, 'Alap mo sosonna te-alakam asa gol.'

21 Emsa hom Alap gulbluka- syala ansa de gon hapye. Sap eno enhona nama hom Alap mo nwenak dakasti'ira.

22 Karekna insa emki hli yun. Dekam Biansa abe ta gwe- Zen dekakim eno enlala jal-jala insa tap gulsubluka.

23 Sap ëe ama emsa tame ta'an: Eno enhona, sërkam de kil-kil tanganna, man emsa karek san dep da tablahal gwenda."

24 Simon ki zep ding gulbluka, "Asa Biansa de abe tankam mas gwebla- karek goltowen hap dena mensa asa gublula, zen deka abon lwa srëm gwëk."

25 Petrus ne Yohanis ne kim ol dawemna insa ëna iwe lonsubiridaka, ki zep Yerusalem san dep etan ola halka, hen Samaria mo ora san de ë-ë san man lonbirida song gweka.

Pilipus kim Etiopia kore aha teipsin zisi tawa takake:

26 Hwëna Alap mo dam taha nakore zini ki zep Pilipussu gulbluka, "Selatan san dekam em song gwen-sasa lang san de orana in san, Yerusalem kon langna Gaza san dep de ora san."

27 Ki zep hëndep song gweka. Hwëna orana in san teipsin zini lun kon hen man keretakam song gwe'an zaka- langna Etiopia mo irik ginnik de te-ala ait gweblan zi. Langna Etiopiasa dekam wenya

bosena Kandake teipsinkim irik gik. Hwëna zini in zëno alp nakon mam gweka. Hwëna zen mes Alapsa taibliblaka, zep Yahudi mo yakla yalak de ang gwen hap Yerusalem san song gweka.

28 Hwëna zen man Yerusalem kon Etiopia san dep etan lwa ha'anka. Zen zëre mo keretanak nikin ha'anka, dekon Alap mo ol ayang gul gwen zini Yesaya mo ol tataksa baca gul song gwe'anka. Keretana in zëre hon de babu gwegwen zi golsong gwe'anka.

29 Alap mo Enhona ki zep Pilipussu gulbluka, "Emki keretana in mo alp san ang gwe sehan."

30 Dekam zep hluwenkam ang gwese halka, dekam zep zini insa sane ta'an zaka- Yesaya mo ol ale gunsu de baca gul hannak. Ki zep takensiblika, "Insa baca gu'ura, ena wëhë dam gulsu'ura?"

31 Dekam zep ding gulbluka, "Ëe banakan de dam gulsun hup?-zi de abe hap srip gulsublun srëmkamye." Dekam zep Pilipussu gulbluka, "Haen, em sewe sezan. Nen apdekam song ën."

32 Pilipus in kim sane ta'anka, dekam anakan baca gu'unka, "Men kirekam Alap hap de tru tasiblin hap dombana kap nulhal gwenan,

zini insa hen kirekam sa nërhal. Dombana men kirekam ala blom tasinnik ëol srëm gwegwenan,

zen hen kirekam sa karek tannak ol srëm gwera.

33 Zen sap karek gon srëmna, hwëna dawemkam de takensiblin srëmnak sa totoresada.

Zen walas gwen srëmnak sa tilï, sap zëno gwëna nabakam sa nablonsukin."*

34 Ki zep teipsin zini in Pilipussu gulbluka, "Asa emki gublun: San ha Yesaya zëre hap ki ale gulku? San ha aha zi hip?"

35 Dekam zep Yesaya mo ol ale gunnu in kon Yesus hup denaka

* 8:33 8:33 Yes. 53:7-8

de srip gulsublunkam kon gwesibir hanaka.

³⁶⁻³⁷ Oranak kim weya tanena hla kulki, ki zep teipsin zini in gubluka, "Weyana de wakë! Angkam ba en lwa kini'an?- asa dikim baptis tan hapye."[†]

³⁸ Ki zep kereta golsong gwen zini insa golzausun hup gubluka. Dekam zep ho san dep ati ëka. Zao zep Pilipus baptis taka.

³⁹ Ho nakon kim apta se'an zaka, Alap mo Enhona dekam zep zë Pilipusu zer ine halka. Teipsin zini in hom etan dekon hla taka, hwëna isrip-sri naban zep kon song gweka.

⁴⁰ Pilipus hwëna dekam zep ëna Asdod owaskam hataka. Dekon zep hwëna hi alp san de ë-ë san ëngaya gwen hap de ol dawemkam tonbirida song gweka, hëndep Kaesareak hataka.

9

Saulus kim halekake:

¹ Saulus dekam nama Yesusu de taibliblan wenya gubirida gwe'anaka, "Ëe asa tamerak." Dekam zep Alap mo golak de teipsin zi nik song gweka,

² zao zep surat hap abe gweka-Damsik de but srëm golak de mamam wenya kip de anakare hap goltreizimdin hip, "Saulus an, aha ora san de ang tan zisi de Yerusalem san etan tahyohan hap- sap zi, sap we."

³ Damsik kim golek de gwe'an zaka, mumuk ennak zep ngli nakore serkam de ngatanna wale tazak.

⁴ Ki zep zë kama san zanka. Dekon zep hwëna ola sal seka, "Saulus, Saulus, em ba habe asa karek ta gwenda?"

⁵ Ki zep ding gulbluka, "Bian, Em an nara?"

Ki zep hwëna ding gulbluka, "Ëe an Yesus- insa em karek ta gwe'arake.

⁶ Dekam luwe. Ënak hëndep hatase. Zao sa zini ano olsa ebe hap ayang gulblula- em de desan ang gwen hapye."

⁷ In deban mae golëtë'anaka, zen ëau-hlonkam balk tasin niban hëndep ëzausuk. Zen hen sap man ola insa ësak, hwëna ba maena hom hla nuk.

⁸ Saulus ki zep luweka, hwëna nwe kara gwen hap man sap akasiki. Dekon zep Damsik sin dep irik da song gwek.

⁹ Yaklana dan-ahan nwena hom mae kara gweka, hen hom mae tembane gweka, hen ho maena hom otdeka.

¹⁰ Damsik, Yesusu de taibliblan zini ki, bosena Ananias. Desa zep nwe lirisin nëblannak Bian Yesus takenblaka, "Ananias!"

Ki zep ding gulbluka, "Ëe an dë, Bian!"

¹¹ Bian ki zep etan gubluka, "Yudas mo gol san em song gwen- ora bosena Dam-damna san. Tarsus walya Saulusu em zë duweblan. Zen dekon Asa gu sonebla'ara.

¹² Zen hen mes hamal hap emsa nwe nik de lirisin nëblankam zëbon de hatannak hla tanda. Em kime tahana tehabla inera, dekam zep nwena kara gwera."

¹³ Ananias ki zep ding gulbluka, "Bian, zini in ëe mesë beyakam sal gweblak. Zen Emsa de taibliblan zini man karek ta gwibirida. Yerusalemk mes ki gweibirida gweka,

¹⁴ zep hëndep awe hen hata zaka. Alap mo golak de syal tan zi mo teipsinni mes zëbe hap suratna golblaka- dekam de Emsa de taibliblan zisi kitak tahyohan hap denaye."

¹⁵ Hwëna Bian Yesus ki zep ding gulbluka, "Sap esa song gwera. Sap zini insa Ëe mesë dam tasik- Yahudi srëm zi mo ë-ë san de abe hap denaka golzim halada gwen hap, hen zëno mae mo teipsin-teipsin nika de

[†] 8:36-37 8:36-37 Ahakon men zen orep Lukas mo ola ansa etan ale nul gwek, ola ansa zen mas nuk: (Pilipus) ki zep ding gulbluka, "Em de tingare enho naban taibliblankam, amki." Ki zep ding gulbluka, "Ëe ama Kristus Yesusu anakan taiblibla'an, 'Zen eiwa Alap mo Tane.' "

zen abe hap denaka tonbirida gwen hap, hen sap Yahudi zisi.

16 Ëe asa hen zëbe hap anakan goltrë gweblal, 'Ano bosesa dikim ap mam gulblun hap, em karekna mam tangan naka esa goltowe gwera.' **

17 Ananias dekam zep gola in san dep song gweka, ki zep hëndep seweka. Taha tehabla inen nakon zep gubluka, "Oso Bak Saulus, Bian Yesus, men Zen oranak ebe hap Zënaka zertrëblakake, Zen asa ebon osan dep zer sone zala- em dikim etan nwesa kara gwen hap, hen Alap mo Enho dikim ebon ing gwehen hap."

18 Dekam zep mumuk ennak nwe nakon hogwe jingkir makare nik nanyanzak, dekam zep etan kara gweka. Hëndep dekam zep luweka. Ki zep hwëna Ananias Yesussu dikim ang gweblan hap baptis taka.

19 Zen kim tembane gweka, dekam zep etan sosen gweka.

Saulus kim Damsik tawa ta gwibirkike:

Saulus dekam zep Damsik Yesussu de taïbliBlan wenyä ban golëgwë'anka- mingguna san ha dan-dan.

20 Dekam zep nabakam Yahudi mo but srëm gol-gol san anakan tawa tabiri daka, "Yesus Zen eiwa Alap mo Tane."

21 Tingare zini man tangan anakan dengguan gweblak, "An san ha zen hom? Yerusalemk Yesussu de taïbliBlan zini zen dwan-am karek ta gwibirki. An san ha zen hom yap hata zaka?- zisi de etan Alap mo golak de syal tan zi mo mam-mam san dep tahyohan hapye."

22 Saulus mo tawa tabinni, sosonna man esek gwese zahe gwe'ak. Zen Alap mo ëpba ol ale gun nukorena kim anakan tawa ta gwibirki, "Yesus Zen eiwa nësa de ngaya tabin hip de Teipsinni Zen- mensa nen guk gweblakke." Hëndep zëwe de Yahudi zini enlalana man tangan topse nëblak, sap

zëno ola bëjen anakan gulsublun, "In boton."

23 Yakлана kim zë beya gwe'ak, Yahudi zini in dekam zep tan hap kalang nëbla'ak.

24 Ëna in, kasokam de kola ban. Yaklam denaban kam denaban zep ëna in mo wasnge te so kinin lilikin nikon dil gik gwebla'ak. Hwëna zëno mae mo tan hap de kalang gweblanna man ëtawa gwëk.

25 Paulussu men zen ang në gwebla'ak zep dokotkam ë san dep yu yala ban sring di sonek.*

Saulus kim etan Yerusalemk hatakake:

26 Yerusalemk kim hataka, ki zep sap akasiki- dua-blas enkam de zini in han de golësiri gwen hap. Hwëna man naïrëblak, sap zen hom anakan daïblibla'ak, "Zen eiwa eiwakam Yesussu taïblibla'ara."

27 Hwëna Barnabas zep zëbon mae onak zerhata zaka. Zen zep anakan tonbiridaka, "Saulus an oranak Yesussu hla taka, hen Bian dekam zep ola tonblaka. Zen kim Damsik gwë gweka, zen hen Yesus hup denaka zëwe udobe naban tonbirida gweka." Dekam zep Barnabas mo ola kon dua-blaskam de wenyä in anakan daïbliblak, "Zen eiwa mes hen Yesussu taïbliblaka."

28 Dekam zep dawemkam Yerusalemk apdenak nërgwë gwëk. Zen hen dekam zep udobe naban Yesus hup dena tonbirida gweka.

29 Hwëna Yesussu de taïbliBlan srëm Yahudi zini kim nërol tetek gwëk, dekam zep tan hap alp dasik. Yahudi zini in, zen men zen Yunani mo langnak de lowe henkam Yahudi ola eititi neibikke, zen zen nërol tetek gwëk.

30 Hwëna ahakore Yesussu de taïbliBlan wenyä kim ësak, dekam zep Kaesarea san dep zon dak. Hen dekon etan Tarsus sun dep zep bulkum nër sonek.

31 Dekam zep kitak de Yerusalem mo langnak de Yesussu taïbliBlan wenyä, Galileak, hen Samariak de

* 9:16 9:16 2Kor. 11:23-28 * 9:25 9:25 2Kor. 11:32-33

wenya, umlaekam lowehe gwek. Hen zini Yesussu de taïbliblankam êmas-mas gwek. Sap Alap mo Enhona man zêbe mae hap sosonsa gol gwizimki, hen Alapsa de blikip gwesiblin hap de enlalasa zer gwizimki- hen Yesus onak dikim tatem êzauk gwen hap denaka.

Petrus kim ëna Lidak Einias Baksa dawem takake:

³² Petrus dekam zep tîngare langna in san tawa tabirida gweka. Ê bosena Lidak de Yesussu taïbliblankan zini ki zep hen amjanbirki.

³³ Zao zep zini hla ta'anka, bosena Einias. Zëno taha-tanana orep mes juweblak. Tahunna delapan enkam tum ennak lwa gweka.

³⁴ Dekam zep Petrus gubluka, "Einias, Kristus Yesus emsa dawem ta'ara! Em luwen. Ere mo tumna insa em wa tasin." Hêndep dekam zep luweka.

³⁵ Tîngare ëna Lidak de zini, hen Saronk dena, desa de kirekam hla tankam zep Bian Yesussu hen daïbliblank.

Ëna Yopek kim Petrus Dorka'a dawem gulkuke:

³⁶ Ëna Yopek, wenya Yesussu de taïbliblanka dekam ki, bosena Tabita. Yunani olkam de gubinkim, Dorkas. Bosena Dorkas, zëno enlalana "rusa." Wenya in aha zi hip dawem ensa syal gwe-gwibir-zimk, hen tahalha zini man mas gwibirida gwek.

³⁷ Hwëna ki zep sang-sang gwek, hêndep tik. Tokna ngan nulsuk, ki zep gulk de teksonnak nonnek.

³⁸ Ëna Lida kon, Yope golek. Yesussu de taïbliblankan wenya kim êsak, "Petrus Lidak gwë'ara," dekam zep zi darena nenzimk, "Emki nabakam dangitilblin. Anakan enbla, 'Ëe an emsaë kwang la halan- naba tangankam dep!' "

³⁹ Hêndep kim apta zaka, ki zep hêndep zigwë halka. Kim zihataka, ki zep hêndep gulk de teksonna in san dep nêrsewek. Tîngare we

sem-semna dekam zep go naban anakare ola ban dot dasik, "Bajuna an zen tol ap tayalbir-zimk- nama kim gwë'akke."

⁴⁰ Ki zep gubiridaka, "Dekam tîngan atiti gwek." Kim atiti gwek, dekam zep bokle kom soblan naban Alapsa gu soneblaka. Kim gu sonesiki, ki zep nwe-masenak de hlaun nuban gubirki, "Tabita, em luwen." Dekam zep hêndep nwena kara gwek, hen Petrussu hla tak. Ki zep hêndep nikink.

⁴¹ Dekam zep zaun gun hup taha nakon gul ineka. Kim zauk, dekam zep kwang guludaka- Yesussu de taïbliblankan wenya hen we sem-semna in saye. Ki zep gubiridaka, "Zen mes ngaya gwenan."

⁴² Ola insa kim tîngare Yopek nolteisik, dekam zep beyakam Bian Yesussu daïbliblank.

⁴³ Zao Petrus holo tolkam zep gwëka- tweran sop sam tasik gwibin zini Simon Bak hon.

10

Kornelius mo nwena kim lirisin nëblakke:

¹ Kaesareak, jana nabare zi mo mamna ki gwë'anka- bosena Kornelius Bak. Zëno irik gin walasna seratus enkam. Zen jana nabare zini mensa nen gwibik "Langna Italia korena," zëwe kitak bitî gwek.

² Zen we wal walas zeban Alapsa dawemkam zibetek gweblaka. Zini in hen tahalha zisi man mas gwibirida gweka, hen Alapsa man gu sonebla tine gweka.

³ Hwëna aha yaklakam, yakla nwena dan-ahan, ki zep nwena lirisin nëblak. Zen eiwa de makan Alap mo dam taha nakore zisi hla ta guku. "Kornelius" kum zë gublu zaka.

⁴ Airin niban zep karatda taka, dekam zep takensiblika, "Bian, em ba hap?"

Ki zep ding gulbluka, "Eno ol gu sone gwenna hen tahalha zisi de mas gwibirida gwenna mes Alap

hon nwe-mase gwek- san de em de zêbe hap sapisa tru tase gweblanna.

⁵ Dekam zini Yope san dep lup gul sone, zini bosena Simon, hen zêno aha bosena Petrus, desa deka kwang da halzak.

⁶ Zen hi alpnaq tweran sop sam tasik gwibin zini Simon mo golak gwê'ara."

⁷ Alap mo dam taha nakore zini in kim hli taka, dekam zep zêre hon de babu gwen zi darena guzimki, hen zêre mo jana nabare zini, dawemkam de Alapsa tame tan naka gubluka- zen de yaing gwezan hap.

⁸ Zao zep aïsîl gwibirida'anqa- in zen ki zêre hon lwakye. Ki zep hêndep Yope san dep lup gul soneka.

Petrus mo nwena kim lirisin nêblakke:

⁹ Zen kim Yopek egolek de gwe'ak, Petrus dekam zep gol bol tahannak sewe seka- dekon de Alapsa gu soneblan hap. *

¹⁰ Ki zep zê hwêna usak gwe'anqa, dekam zep tembanesa de syal gwibir-blin hap abe gweka. Zen kim tembanena syal neibir-bli'ak, ki zep hwêna nwena lirisin nêblak.

¹¹ Ki zep hwêna ngli san kara gwe seka. Man dalusuhuk. Desan zep hwêna deyol ber-ber yawal makare naka sring nil sone'anhak. Top-topna man nurensihik. Ngirin en nik zep sring gwe hezak.

¹² Deyol mwana iwe zep hlaludaka- kirekam-kirekam golsriwen otweranna, tana dan-nêr dan-nêrkam dena, bik dankam de il gwehal gwenkam dena, hen mawana.

¹³ Ki zep hen ngatan zi mo lang nakore ola sal seka, "Petrus, em luwen. Emki tameran. Desa twenblanda."

¹⁴ Ki zep ding gulku, "Bian! Êe bêjênê. Êe homê mae golsriwen kire-kire kun nabarena twinbik." †

¹⁵ Dekam zep hwêna etan ola sal seka, "Mensa Bian ngan tasibirki, desa bahem gubin, 'Kun naban.' " *

¹⁶ Zen mes dan-ahan soka-kirekam de hlalul gwenna. Ki zep etan mumuk ennak ngli nakon nul inehak.

¹⁷ Petrus kim nama dam gulsun hup teibi'inka, hwêna Kornelius mo zi lup gul sonenna in hap mes Simon mo gola tan-tan dazimk, hêndep gol teso kininnak

¹⁸ zep êtakensizik, "Awe wêhê Simonkam de zi bosena gwê'ara? Zêno aha bosena Petrus."

¹⁹ Petrus kim nama dam gulsun hup teibi'inka, Alap mo Enhona ki zep gubluka, "Simon Bak, zi dan-aharena man emsa dêbla'an.

²⁰ Em ati gwen. Bahem ang gwibiridan hap enlalana anakare hap beya gwen, 'Êe an Yahudi wal. Zen Yahudi zisi hom.' Sap zini in ano lup gul sonenna."

²¹ Dekam zep ati gwe zaka, zao zep gubiridaka, "Êe an zen- em in desa lêbla'anye. Em ba habe yaing gwezal?"

²² Ki zep ding nulblik, "Jana nabare zi mo mamna, Kornelius Bak, emsa de kwang tahan hap asa ir gubiridaka. Zen enho lalakna hen Alapsa de betek gweblanna, hen Yahudi zini man desa blikip neisik gweblanan. Alap mo dam taha nakore zini mes desa emsa de kwang tahan hap gubluka- zen dikim ebon onakore olsa sane gwen hap."

²³ Petrus ki zep zao de apdekam golêtruwen hap gubiridaka.

Petrus kim Kornelius mo golak hatakake:

Ka'ankam ki zep Petrus golêsek gweka. Yope kon Yesussu de taibliblan zini man hen ang nêblak.

* **10:9 10:9** Zêno mae mo kasokam de gol-gola, gol bola dak-dakna, in zep zêwe zini sesek gwese gwek. † **10:14 10:14** Zen deyolak iwe Musa mo golsriwen otweran ensa zê hlaludaka. Desa man Yahudi zini nenbirida gwek, "Kun naban." In zep kirekam ding gulku. (Im. 11:1-47) * **10:15 10:15** Mrk. 7:15; 7:19

24 Zëno ka'an kim Kaesareak yaing gwëk, Kornelius man iye zëban golëkara gwe'anaka- hen wal bose wal zëban, men desa tagal gulsukuke.

25 Petrus kim gola iwe ti'in zaka, Kornelius ki zep zëno nwenak mae hap ik gwehe zaka, "Zini an Alap mo dam taha nakore zi makarena."

26 Hwëna Petrus ki zep gubluka, "Em luwen. Èe an hen zi tangan sake."*

27 Ola kim lon'anaka, Petrus ki zep gol mwa san tilki, ki zep zë hlauluda'an zaka, "Zi beyam-byana mes zë ètagal gwesik."

28 Ki zep zë gubiridaka, "Em mese kitak ètawa gwëk: Yahudi zi mo ol jalse gwennak man ale nuk, 'Yahudi srëm zi niban bëjen golësiri gwen.' Hwëna Alap mes ap anakan goltrëblaka, 'Èe babë aha zi aususa gubiridan, "Zen in kun naban."'

29 In kim asa kwang dak, èe zebë takensibiridan srëmkam ang gwibiridazak. Zep èe ama ki emsa takensibirida'an: Em ba habe asa en soneblak?"

30 Kornelius zën zep ding gulbluka, "Yaklana an zen dan-ahan damank, yakla nwenan an ki angkam dan-ahannak lwa'arake, èe dekam gola an kon Alapsa gu sonebla'ak. Mumuk ennak zep zini ano nwenak baju angtan-angtan naban zau'un zaka,

31 ki zep asa gubluka, 'Kornelius, Alap mes eno ol gu sonenna salka, hen man eno tahalha zisi de mas gwibirida gwenna enlala gwibi'ira.

32 Emki Yopek Simonsa gu soneblan. Zëno aha bosena hen Petrus. Zen hi alpnak twëran sop sam tasik gwibin zini Simon mo golak gwë'ara.'

33 In zebë nabakam zini emsa de kwang tan hap lup gul sonek, hen ema asa sam tanda- hata zankamye. Angkam èe mesë awe Alap mo nwenak tagam gwenan- dekam de emsa sane tan hap, kitak mensa Bian Alap

ebe hap golblakake, desa de asa tonbiridan hap."

Yahudi srëm zini kim nonol tanganna Yesussu daibliblakke:

34 Petrus ki zep gubiridaka, "Èe angkamë tame gulun: Eiwa, Alap ahakore en naka hom nwekam golëake gwenda,*

35 hwëna tingare zi ausuna man dokwak guluda gwenda- men zen Zënaka betek në gweblanan hen dawemna syal nei gwibirinye.

36 Em mese èsal gwëk- Alap mensa ol dawemna Israelk de zini anakan gu sonebiridaka, 'Tingare zi ausu mo Teipsinni Kristus Yesus mo bosekam em aban zerumlae gwen.'

37 Hen em mese èsal gwëk- in zen baptis ta gwibin zini Yohanis Swe mo hyanak tingare Yahudi mo langnak jowek, nonol tanganna Galileak.

38 Alap dekam Nazaret walya Yesus hup zëre mo Enhona hlë ta soneblaka, hen sosen zemka golblaka. Hen em mese zëbe hap dena anakan èsal gwëk, 'Zen men-san an-sankam dawemna golzimmira gwëka, hen dowal mo kigi mo hulen naka hil ti sonebirida gwëka, sap Alap man deban zersyal gwe-gwëka.'

39 Èe an zenë kara la gwëk-tingan mensa Yahudi mo langnak hen Yerusalemk syal gwe-gwibirkiye. Hwëna Yahudi zini Desa te-lidak sonnak de makan ta irinkim dak.

40 Hwëna yaklana dan-ahan, ki zep etan Alap tin nikon ngaya taka, hen dekam zep etan abe mae hap zertrei gwizimki.*

41 Èe ama deban etan tin hyanak èrtëmbane gwe-gwëk. Dekam Alap tingare zi hip hom zertrei gwizimki. Hwëna men desa en Zëna Yesus hup denaka de gol halada gwen hap dam tasibirkike, zëbe mae en hap zertrei gwizimki.

42 Yesus mes asa dam tasibirki-zëre hap de ol dawemsa dikim

* 10:26 10:26 Kis. 14:13-15; Why. 19:10
1Kor. 15:4-7

* 10:34 10:34 Ul. 10:17; Rom. 2:9-11

* 10:40 10:40

anakan tonbirida gwen hap, 'Alap mes Yesussu dam tasiki- Zen de zisi klis gun hup, men zen nama lowe he'an, hen men zen ejuwekke.'

⁴³ Tingare Alap mo ol ayang gul gwen zini hen kirekam eton gwek, 'Tingan men zen Alap mo zer sonen Zini insa anakan daiblibla'ak, "Zen eiwa Zen- asa de ngaya tan hap de Zi niye," ki Zen sa hen zeno mae mo karek-karekna tap gulsuzimdi.' **

⁴⁴ Petrus kim nama kirekam tonbirida'anka, Alap mo Enhona ki zep ing gwe hebirida zaka- tingare zini men zen esane gwe'akye.

⁴⁵ In zen Yope kon Petrus hon ang tazak, zen Yahudi hon de bitigwenna. Petrus dekam zep deban mae golëtenggwanka, "Hare eiwa, Yahudi srëm zinik Alap mo Enhona hen ing gwe henkamke- men kirekam hen nebon mae ing gwe hekaye!"

⁴⁶ Sap zen man owas olkam de Alap mo bosesa teip gulsublunnak sane dabi'ik- zere mae mo tame gun srëm olkam de tonbinnik.

Petrus dekam zep guku,

⁴⁷ "Angkam ba en zebe mae hap lwa kini'an?- zini ansa de baptis tabin hipye. Zen dwan mes-am Alap mo Enhona neir innin- men ki hen nena."

⁴⁸ Ki zep gubiridaka, "Ee asa emsa Bian Kristus Yesus mo bosesa baptis labir." Ki zep hwëna Petrus abe dak- zao de golëgwë inendan hap.*

11

Yerusalemk de zini kim anakan esakke, "Yahudi srëm zini mes hen Yesussu daibliblal."

¹ Seblas enkam de Petrus mo wal bosesa walya hen Yerusalem mo langnak de Yesussu taibliblan wenyanya ki zep anakan esak, "Yahudi srëm zini mes hen Alap onakore ol dawemna nulink."

² Zep Petrus kim Yerusalemk zaheka, dekam zep zao de Yesussu

taibliblan wenyanya anakan jakal neblak,

³ "Em ba habe Yahudi srëm zi mo gol san song gweka hen golëtembane taka?"

⁴ Petrus dekam zep nonola kon hëndep dawem enkam anakan srip gulsuzimki,

⁵ "Ee ëna Yope kon Alapsa gu sonebla'ak, dekam zep zë hwëna nwenana ap lirisin neblak. Deyol yawal makare nakaë hlauk, ngli nakon sring nil sone'anzak, hëndep abon onak zep zausuzuk.

⁶ Kimë zë olk san karatda gu'uk, zao zebë hlauludak- kirekam-kirekam golsriwen otweranna, eik nik dena, bik dankam de il gwehal gwenkam dena, hen mawa maena.

⁷ Ki zebë ola salsek, 'Petrus, em luwen. Emki tameran, desa twenblanda.'

⁸ "Hwëna ee ama ding guk, 'Ee bëjënë, Bian! Ee homë mae golsriwen kire-kire kun nabarena twinbik.'

⁹ "Ki zep ngli nakore ola in asa etan ding gulbluka, 'Mensa Bian ngan tasibirki, desa bahem gubin, "Kun naban."'

¹⁰ Hëndep ama dan-ahan sok-kirekam de hlauk gwen naye. Ki zep etan bai nil inehak.

¹¹ "Hëndep dekam zep Kaesarea kore lup gul sonen zi dan-aharena abon yaing gwezak.

¹² Alap mo Enhona dekam zep asa gubluka, 'Bahem ang gwibiridan hap enlalana beya gwen.' Zini an zen hen enamkam teinikin'in, zen hen man asa ang neblak, hen gola iwe man hen bitigwek.

¹³ Dekam zep Yahudi srëm zini in asa gubiridaka, 'Alap mo dam taha nakore zini gola awe jowe zaka, ki zep asa gubluka,

"Emki Yope san dep zisi lup gul sonen- zi bosena Simonsa de kwang tan hap. Zeno aha bosena hen Petrus.

* **10:43** **10:43** Yes. 33:24; 53:5-6; Yer. 31:34 * **10:48** **10:48** Kis. 2:38

14 Zen zen sa ebe mae hap ola ayang gulzimdi- ena hen tūngare ere mo golak de wenya kipye. Desa kime laibli'ik, zen dekam esa golēngaya gwera.” ’

15 Zen kirekam asa gubiridaka. Dekam kimē ol dawemkam de tonbiridankam kon gwesibirida hana'ak, Alap mo Enhona ki zep hēndep ing gwe hebirida zaka- men kirekam nonolak nēnaka hen ing gwe hebiridakake.

16 Dekam zebē enlala gwek- Bian Yesus men desa anakan gu-gubirida gwekaye,

‘Yohanis zen hokam baptis ta gwibirki, hwēna Alap zēre mo Enhokam sa emsa baptis ta gwibiri.’*

17 Zep Alap man dekam zēre mo Enhosa hlē ta sonezimki- men kirekam hen nēbe mae hap hlē ta sonezimkike, nen in kim nonol Bian Yesusu laibli'akke. Zep ēe banakan de Alapsa anakan jalse gwēblan hap, ‘Zēbe mae hap bahem hlē ta sonezimdin!’ ”

18 Kirekam kim sane da'ak, dekam zep jakal gwēblanna in tap gwizimk. Dekam zep hwēna Alap mo bosena anakan teip nulsu'ak, “Hare ei-wake! Sap Yahudi srēm zi, Em hen zēbe mae hap mese golzimki- dekam de ēhalen hap hen ēngaya gwen hap denaye.”

Antiokiak de zini kim Yesusu daibli'akke:

19 In kim Yesusu de taibli'akke wenyā Stepanu'u de tan hyanak karek da gwibik, dekam zep heyahya gwēndak- ahakon langna Penisia san, ahakon lang tekna Siprus sun, hen ahakon ēna Antiokia san. Zen ol dawemsa kim hēndep nol haladak- hwēna Yahudi zi en hap.*

20 Hwēna ahakon hen Siprus hen Kirene kore zi. Zen kim Antiokiak yaing gwēk, dekam zep Yahudi srēm zini hen Bian Yesus hup de ol dawemna insa donbirida'ak.

21 Dekam Alap mo sosonna zēbon mae lwa gwē'ak, zep zēno mae mo tawa tabin nikon zini beya tangankam zēre mae mo boton alap-alapsa hli nulidak- dekam de hwēna Bian Yesusu taibli'akke hap.

22 Yesusu de taibli'akke wenyā kim Yerusalem kon kirekam ēsak, dekam zep Barnaba'a Antiokia san dep nēr sonek.

23 Zen kim zē hataka, anakan zep hlauluda zaka, “Eiwa, Alap mo kwasang-kwasangna zēbon mae onak dawemkam lwa'an.” Dekam man tangan isrip-sri gwibiridaka, zep hen ol zīm-zīmni anakan golzimki, “Em tūngare enho naban Bian Yesus onak tatem ēzauk gwen.”

24 Barnabas zen zini dawem tanganna. Alap mo Enhona mes desa sērkam bi gwēblaka, hen zen Bian Yesusu mes tangan taibli'akke. In zep, zen kim tūti ta gwibirki, beyakam etan Yesusu daibli'akke gwēblak.

25 Dekon ki zep etan Tarsus sun song gwēka- Saulusu de zē tēblan hap.

26 Zao kim gaing ēka, dekam zep Antiokia san dep kwang tahal zaka. Zēwe aha-ere tahunkam zep Alap mo olkam de tawa la gwibin hip olētagal gwēnda gwēka. Dekam zep Kristusu de taibli'akke sērkam ēbeya gwēk. Hēndep dekam zep Antiokiak de taibli'akke srēm wenyā taibli'akke wenyā insa “Kristen zi”kim bōse dabik. Menkam hom kirekam nenbirida gwēk.

27 Zao kim lwa se'ak, dekam zep Alap mo Enho nakore ol ayang gul gwen hap de zini Yerusalem kon Antiokiak yaing gwēzak.

28 Ahana bosena Agabus Bak. Zēbon dekam zep Alap mo Enhona ngein sin dep de ola ing gul soneblaka. Dekam zep luwēka, desa zep anakan ayang gulzimki, “Tūngare Roma mo irik ginnik sa usak yawala hatal.” Hēndep

* 11:16 11:16 Kis. 1:5 * 11:19 11:19 Kis. 8:1-4

kirekam zep ki lwak- in kim Klaudius Bak Romasa irik gilkiye.

²⁹ Hwëna Antiokiak de Kristen zini in kim kirekam nasal-blak, dekam zep ola aha-en nuk-Yerusalem mo langnak de Kristen bose zikhip de te-alasa tagal ta gwizimdin hipye. Anakan aha-en nuk, "Men nara te-alasa beyakam gulin gwenna, zen beyakam ing ul gwek. Betekkam de gulin gwenna, zen betekkam ing ul gwek."

³⁰ Hëndep kim sowe heka, dekam zep Barnabas ne Saulus nebon onak neir sonezimk. Zen zep hwëna Yerusalem mo langnak de Kristen zi mo nol-nol hap eirzimki.

12

Herodes kim dawemkam Kristen zini karek ta gwibirkike:

¹ Zao kim lwa se'ak, dekam zep teipsin zini Herodes zëre mo jana nabare zini Kristen zisi de tahyon hap gubiridaka- zao de karek tabin hip.

² Zao zep hen Yohanis mo ayana Yakobus mo nolsa de nëbokkam blaonsublun hap gubiridaka.

³ Zen kim anakan hlauludaka, "Yahudi zini man tangan ësam gwesil- desa de tankamye," dekam zep etan Petrus de balk tan hap gubiridaka. Zen yakla yawala Paska golek denak balk dak.

⁴ Bwinak zep tak daink. Hen Herodes man jana nabare zini enam-blas enkam zen de kara ta gwen hap gubiridaka. Sap zen man kalang gwebala'anka, "Paska hyanak asa zi tra mo nwenak taken-taken gweblal."

⁵ Hwëna Petrus in kim bwinak gwë'anka, hwëna Kristen zini dekam zep enlala zon tasiblin naban Alapsa zëbe hap abe da gwe'ak.

Petrussu kim bwi nakon Alap mo dam taha nakore zini zerwet sokake:

⁶ Yaklana in dekam de taken-taken gweblan hap Herodes dwam gwebala'anka, zëno kam Petrus man jana zi dare mo ngirinnik nisi ta'anka-

besi dokotkam de da tablandan nik. Eihya topna aha jana nabare zinik bu nulsuk, aha topna aha jana nabare zinik. Lilikinni ahakore nik kara noso'ak.

⁷ Mumuk ennak zep bwina iwe Alap mo dam taha nakore zini jowe zaka, hen ngatanna dekam zep zë zilsik. Ki zep Petrus li tan hap zaba nakon towanbla ine zaka. Ki zep zë gubluka, "Nabakam luwe!" Dekam zep hëndep Petrus mo taha nakon besikam de dokotna in som nëbla hanak.

⁸ Etan ki zep gubluka, "Bajuna dekam ala so, hen sepatuna." Ki zep ala soka. Ki zep etan gubluka, "Tahan bajuna dekam hen ala so. Dekam asa ang gwebala."

⁹ Ki zep kon zerwet soka. Petrus hwëna man tim gulku, "Eisirsië ki tanan. Eiwakam homë wet sonan."

¹⁰ Nonol lilikin kara son wanya kim ulmun nuraka, etan zao de wanya ulmun nuraka, ki zep besikam de aumwa lilikin yawalak aptaka. Hwëna zen zën totoresa kitak kles neisik. Desan zep wet osoka. Bwina in kon kim engka en langa eisiki, zao zep Alap mo dam taha nakore zini in aya gweka.

¹¹ Petrus dekam zep tame gulku, "Hare ëe eiwakam am-am wet sonan. Hare Bian eiwa am zëre mo dam taha nakore zisi zer sonerasa de Herodes mo jana ngi ben-ben nakon hen Yahudi zi mo jala kon zeser sonen hapye."

¹² Kirekam kim tame gulku, ki zep Yohanis mo anena Maria mo gol san dep song gweka. Yohanis in zëno aha bosena Markus. Zao zini mes beyakam Alapsa dekon abe tan hap ëtagal gwek.

¹³ È nakore lilikinsi zep ga'ga so'an zaka. Zëwe de babu gwegwen wanya bosena Rode, zen zep te sozak.

¹⁴ Hwëna zao kim Petrus mo ola tame gulzuk, dekam zep isripsri hap lilikin talusun srëmkam lwahak- dekam de gubiridan hap, "Petrus lilikinnik zau'un ora!"

15 Hwëna man ding nulbik, “Em san ema mamak gwe'ara?” Hwëna ol drakkam kim gubirida gwe'ak, dekam zep ding nulbik, “In desa de kara ta gwen hap de Alap mo dam taha nakore zisi mes yap.”

16 Hwëna Petrus nama ki ga'ga so tineka. Hëndep kim talusublunkam hla dak, zao zep sërkam denggwandak.

17 Petrus dekam zep tahakam anakare hap akabiridaka, “Em balk tasîn.” Ki zep zë aïsîl gwibirida'anka- men kirekam Bian zerwet sokake. Ki zep hen gubiridaka, “Ola an Yakobu'u enblak, hen nère mae mo Kristen aya-wal osowalya enbiridak.” Zëna ki zep kon aha ë san dep song gweka. *

18 Kaknak zep Petrus hup de jal hap bwinak de jana nabare zini in zënaka nol kîni'ak.

19 Herodes dekam zep aha jana nabare zini gubiridaka, “Dawem enkam lëblak.” Hwëna hom hla dak. Dekam zep jana nabare zini in zen kara da'ak, desa taken-taken gwibiridaka, “Zen banakan de wet son hap? An ene ëser soner.” Dekam zep aha jana nabare zisi gubiridaka- Petrussu de kara tan wenya insa de tameran hap.

Herodes kim tîlkîke:

Herodes zëna ki zep Yerusalem mo lang nakon Kaesarea san dep song gweka- zao de hwëna gwë inendan hap.

20 Dekam ëna Tirusk de zi niban hen Sidonk de zi niban Herodes man golëgîl-gîl gwe-gwe'anka. Dekam zep zini in Herodes han dikim etan zersësek gwen hap ola aha-en nuk. Sap zëbe mae hap de tembanena Herodes mo irîk gîn lang nakon wet so gwizimki. Zen dekam hen Kaesarea san sek gwek, zëwe zep Herodes mo taha trî soblan zini Blas-tus Bak hap te-alasa nërblak. Zen zep gubiridaka, “Ëe asa emsa mas

gwibiridal.” Dekam zep zë Herodes han dikim etan zergolek de gwen hap ëabe gwek.

21 Yakana dekam de zergolek de gwen hap denak kim hatak, Herodes dekam zep teipsîn zi hip de bajusa ala soka, hen teipsîn zi hip de komal tumnak nikinki. Dekon zep zi trana insa aïsîl gwibiridaka.

22 Dekam zep Herodes mo bosesa de teip gulsublun hap ëtaken gwe'ak, “An zi mo olsa home ësane gwe'an! An aha alap mo ol!”

23 Hwëna mumuk ennak zep zë Herode'a Alap mo dam taha nakore zi ta zaka, sap zen hom Alapsa blikip gwesîblika. Diki anakan maka sane tabinkim gubiridaka, “Ëe an ahana alapsa hom.” In zep ungala nakon auhuna dwenblak, zep hëndep tîlkî.*

24 Alap onakore ëngaya gwen hap de ol dawemna dekam zep esek nul kîni song gwe'ak.

25 Barnabas ne Saulus ne kim Antiokia kore te-ala zer sonenna insa Yerusalemk eirzimki, zëna ki zep etan ola halka. Yohanis, zëno aha bosena Markus, dekon zep ang gwizimki.

13

Alap mo Enhona kim Barnabas ne Saulus neka dam sosukuke:

1 Antiokiak de Kristen zinik, zao hen ki- men zen Alap mo Enho nakore sosenkam hamal hap de olsa ayang nul gwizimkye. Zen hen Alap mo olkam tawa da gwibik. Zëno mae mo bosem-sena, Saulus, Barnabas, Simeon- in desa asyaskam bose dak “Zi Kakak”kam, hen Kirene walya Lukius, hen Menahem. Menahem in, zen teipsîn zini Herodes han beteknak asyas bose zem.

* 12:17 12:17 Petrus in desa Yakobu'u gubluka, zen Yesus mo ososa, in zen hen suratna Kristen zi hip ale gulzimkike. Zen hen dekam Kristen zisi Yerusalemk nol gwibiridaka. Herodes insa taka, zen Yesus hon de ang gwe-gwen zini Yakobu'u- Yohanis mo ayasa. * 12:23 12:23 Dan. 5:20

2 Zen kim apdenak tembane lwan naban Bian mo bosena teip nul-sublu'ak, Alap mo Enhona zao zep gubiridaka, "Barnabas ne Saulus neka em dam sosun- ano syalsa dekakim ol halada gweka."

3 Etan kim tîngare Kristen zini in tembane lwan naban Alapsa nen sone gweblak, dekam zep tahana dehazim anak. Ki zep hwëna deisya sonek.

Siprusk kim aptakake:

4 Sap zen Alap mo Enho teisya soneka, ki zep Seleukia san in neka, dekon zep bulkum lang tekna Siprus sun dep ablan kinika.

5 Siprus mo ëna Salamisk kim aptaka, zëwe dekam zep Yahudi mo but srëm gol-gol san ëngaya gwen hap de Alap onakore ol dawemkam lonbirida gwe'anka. Yohanis zëno aha bosena Markus zen man Antiokia kon ang gwizimki- zëno nik mo tahasa de tri so gwizimdin hip.

6 Zen man hëndep tîngare lang tekna insa ëramjanbir song gweka, hëndep Pafosk ërhataka. Zao zep Yahudi walya Bar-Yesussu nërtowek. Yunani olkam zëno aha bosena Elimas. Zen meiyer golzauk gwenna, hen zini man anakan yasik ta gwibirki, "Ëe an Alap mo olsaë ayang gul gwizimnin."

7 Zini in hen lang tekna iwe de gubernor hon de syal gwe-gwenna. Gubernora in enlala blala. Zëno bosena Sergius-Paulus. Zen ki zep Barnabas ne Saulus neka gu sonezimki- zen de Alap mo olsa lonblan hap.

8 Hwëna Elimas Bak zep tru-tru gulzim'inka, hen man gubernorsa alp gwebla'anka- zen de Alap mo olsa taïblibin srëm hap. Zep anakan gubluka, "Bahem salzimdin."

9 Hwëna Saulus, insa hen nen gweblak "Paulus" kum, desa dekam zep Alap mo Enhona bi gweblaka. Dekam zep Elima'a karatda ta'anka, ki zep hëndep anakan jalse gweblaka,

10 "Em an dowal mo kigi mo walas, hen tîngare enlala dawem mo jal zi! Em san molye golzausuku?- Bian osan dep de orasa de aning ta gwizimdin hip de syala in saye. Eno enhonak enlala dawemna hom, hwëna boton ta gwibin en hap dena hen yasik ta gwibin en hap dena.

11 Angkam man Bian emsa karek ta'ara- em dikim nwe nik dimin gwen hap. Hëndep em molye yakla ngatanna hla taka. Hwëna esa etan kara gwera."

Hëndep dekam zep Elimas eisbi'inka- but kakak makare naka zëno nwe san de ati gwe zannak. Dekon zep bute halka, hen zisi zen de irik ta han hap takenbiridaka.

12 Gubernur kim kirekam Elima'a hla taka, dekam zep Yesus hup de tawa tabinni insa sërkam tenggwanbirki, hëndep dekam zep Yesussu taïbliblaka.

Paulus kim Pisidia mo langnak tawa tabirkike:

13 Paulus kim lang tekna Siprus mo ëna in kon bulkum zisong gweka, ki zep Pamfilia mo langnak yaing gwék- ëna Pergak. Zao zep Yohanis, aha bosena Markus, hli so guk halka. Zen Yerusalem san dep etan heya gweka.

14 Perga kon tanakam zep song ëka- Pisidia mo langnak de aha Antiokia san dep. Zao Hari Sabatkam Yahudi mo but srëm golak hen liki.

15 Musa mo titi tabin ola hen Alap mo ol ayang gul gwen zi mo ola kim baca nulsuk, ki zep zëwe de but srëm golak de mam-mam wenya zini nenblak, "Emki sap zi darena insa anakan takensizimdin, 'Eno nik mo ol zim-zim enlala gwibinni wëhë?- desa de lonbiridan hapye.' "

16 Dekam zep Paulus luweka, ki zep tahakam anakare hap akabiridaka, "Angkam ama emsa tonbirida'an," ki zep gubiridaka, "Israel kore zi, hen Yahudi srëm zi men zene Alapsa betek ë gweblananke, asa sane lak!

17 Israel Bak mo zi ausu mo Alapna, Zen nëno mae mo auyan-azasa hlil inki hen dawemsa gol gwizimki- in kim Mesirk lowehe gwekye. Hëndep zen man tangan ebeya gwek hen esoson gwek. Ki zep hwëna dekon zëre mo soson yawalkam golëwet so gweka.

18 Dekam kim sasa langnak lowehe gwek, zen dekam kareksa etan nulin hana song gwe-gwek. Bian dekam oto gulsun hup man sap akabirida gweka.*

19 Dekam zep Kanaan mo tujukam de zi ausuna timbwas tabirki- men zen ë beyam-byana iwe lowehen dakke. Langna insa dekam zep hwëna nëno mae mo auyan-aza hap golzimki- zen de hëndep denaban bi gwibin hip.*

20 An tingan kirekam de syal gwib-inni, holona 450 tahunkam.

“Alap ki zep hwëna Israelsa de golëzauk gwen hap de zini aha-en aha-enkam kap gul gwizimki, hëndep zauk- zëre mo ol ayang gul gwen hap de zini Samuel Bak onak.*

21 Dekam zep Samuelsa abe dak, ‘Abe mae hap em teipsin zisi dam tasizimdin- men kirekam hen aha langnak dena lowehe gwenanke.’ Alap dekam zep Kis mo tanena Saulsa dam tasizimki- Benyamin mo auyan-aza nakore naka. Zen holona empat-pulu tahun enkam teipsinkim irik gilki.*

22 Desa kim ati gwen taka, dekam zep hwëna Daudsa drëne seka- zen de hwëna zëno weinak teipsinkim nikirin hip. Zen man Daudsa gubluka, ‘Èe mesë Isai mo tanena Daud onak ère mo enho makare naka hla tablal. Zen sa ère mo dwam gwibin sin tingan syal gwibiri.’*

23 “Hwëna angkam Alap mes Daud mo auyan-aza nakore naka Israelsa de ngaya tabin hip de Teipsinni

zerzimdi- men kirekam Zëna gu-guk gwekake. Bosena Yesus.

24 Yesus de hatan srëmnak, Yohannis Bak man tingingare Israelsa gubirida gweka, ‘Emki ebaptis gwendekam de enaka Alap hap anakan golëtrë gweblan hapye, “Èe ama ehale'an.” ’

25 Yohannis kim zëre mo syalsa de hli yun hup golek de gwe'anaka, zen man aumwa hap gubiridaka, ‘Eno mae mo Asa de dam tasinkim, Èe an ba habë awe syal gwe'an? Èe an mensa es gwebla'an, Zen hom. Zen hwëna man asa zertro'an zala. Èe dawem naka hom- Zëbon de babu gwen hapye, hen zëno tanasa de ngan sosublun maena èe hen bëjënë.’*

26 “Aya-wal oso-wal, Abraham mo auyan-aza nakore wenya, hen aha zi ausu nakore Alapsa de betek gwe-gweblan wenya, ëngaya gwen hap de ol dawemna an, zen kitak nëbe mae hap Alap gol sonezimki- an desaë emsa tonbirida'anye.

27 Hwëna Yerusalemk de zini, zëre mae mo teipsin-teipsin niban hom anakan tame dak, ‘An Zen- nësa de ngaya tabin hip de Zi niye.’ Zen Alap mo hamal hap de ol ayang gul gwen zi mo ola hom tame nuk- mensa Hari Sabatnak zëna baca nul tine gwenanye. Hwëna zao dikim zaun hup ki tan hap nenblak.

28 Men kirekam ahana zëbe hap dena ale gulku,

‘Zen hom sap karekna hla nulblik-dekam de tan hap denaye.’*

Hwëna Pilatussu tan hap abe da gwe'ak.

29 Tingan kim hamal hap de ola insa tame gun srëmkam syal neisibik, ki zep te-lidak son nakon hil di lahek, dekam zep zi tok drënen hap de kaso hulak nënek.

30 Hwëna Alap ki zep zë tin nikon etan ngaya taka.

* 13:18 13:18 Bil. 14:34; Ul. 1:31 * 13:19 13:19 Ul. 7:1; Yos. 14:1 * 13:20 13:20 Hak. 2:16; 1Sam. 3:20 * 13:21 13:21 1Sam. 8:5; 10:17-21 * 13:22 13:22 1Sam. 13:14; 16:12; Mzm. 89:3-4; 89:19-37 * 13:25 13:25 Yoh. 1:20,27 * 13:28 13:28 Yes. 53; Luk. 23:4; 23:14-15

31 Dekam Desa de zertowe gwenna yaklana man beya gwék- zini men deban mae Galilea kon tîn srëmnak Yerusalem san dep golësek gwe zakake. Zen angkam zen nère korena Yahudi mo langnak zëbe hap de ol dawemna nol halada gwe'an.*

32 "Zep ol dawemna mensa Alap nëno mae mo auyan-azana gugubirida gwékake, ëe an desaë angkam emsa tonbirida'an.

33 Desa mes ki Alap syal gwibirki-Tane zem Yesussu de tîn nikon nëbe mae hap ngaya tazimdinkimye. Sap Mazmur dan-dannak Daud Bak man Alap mo ola Yesus hup dena anakan hamal hap ale gulku,

'Em in ano Tane,
Ëe mesë namen damnak Ënaka anakan kira tanan, "Ëe an eno Bian." '*

34 Zen mes ki hen zëre mo Tanena in hap dena hamal hap gubluka- tîn nikon de ngaya tan hap dena, hen drë nwanunnak de batren srëm hap denaye, men kirekam zëre mo olak lwakke,

'Ëe men kirekamë Daud Baksa hamal hap gu-gubluk- ebe hap de dawemsa golblan hap dena, Ëe asa ki hëndep ebe hap golblal.'*

35 Zep a kirekam mo Daud Buku Mazmuruk Alapsa gublukaye,

'Em molye ere mo lalak Zini insa da tasikî-
drë nwanunnak de batren hapye.'*

36 "Drë nwanunnak de batren srëm hap de ola in, zen Daud zëre hap hom. Sap zen kim Alap mo dwam gwibinni nëno mae mo auyan-aza hap sul sonezimki, zen dekam zep tilki. Hen zëre mo iyena men zao kang nulne gwék, zëno tokna hen zao nënek. Zao zep batreka.

37 Hwëna batren srëm hap de Zini, Zen diki Auyan-tane zem Yesus-mensa Alap tîn nikon ngaya takake!

38-39 Zen in zep, aya-wal oso-wal, ëe ama emsa gubirida'an: Yesus

Zen Zen- nëno mae mo kareksa de tap gulsuzimdin hip de Zi niye. Sap Musa mo titi tabin ol en san de ang ta gwenkam, dekam bëjen nen karek-karek nakon ëhil gwe hanan. Diki Yesussu de anakan taibliblankam, 'Zen eiwa Zen tangan- nësa de ngaya tabin hip de Zi niye,' zen diki dekam esa karek-karek nakon ëhil gwe hanal. Hen Alap mo nwenak zen dekam esa ëdakastil.

40 Zen in zep, emki enaka dawemkam kara ta gwibin. Ebon mae mana jowenank- men kirekam Alap mo ol ayang gul gwen hap de zini Yahudi zini hamal hap anakan nen gubirida gwëkke,

41 'Em in zen Alap mo hamal hap de ol gu-guk gwenna anakan swrei kul gwenan, "Molya ki lwak,"

hwëna hlaunkum ausa esa ëhlol,
hëndep esa ëjek-jak gwer.

Emsa sap sa hamal hap tawa da gwibir,

hwëna bëjen em taiblibin-
men desaë sap eno mae mo ngirinnik angkam syal gwibi'innye.' '*

42 Paulus ne Barnabas ne kim but srëm gola insa hli ku'inka, ki zep nenzimk, "Ngein sin de Hari Sabatnak, etan kire hap denaka asa lonbirida."

43 Kim kon sekwak gwék, dekam zep Yahudi zini, hen Alapsa de betek gwëblan wenya men zen Yahudi hon bitî gwék, beya nik zep lun kon nitrok. Zao zep etan desa anakan titi labirki, "Em mese Kristussu de taibliblan nakon Alap mo kwasang gwibiridannak bitî gwer. Zep zen zao en emki tatem ëzaun."

44 Zao de Hari Sabatnak, dekam ëna iwe de zini tingan tangan de tagal gwen hap ëalp gwesik- Alap hap de ola insa dikim ësane gwen hap.

* 13:31 13:31 Kis. 1:3 * 13:33 13:33 Mzm. 2:7
16:10 * 13:41 13:41 Hab. 1:5

* 13:34 13:34 Yes. 55:3 * 13:35 13:35 Mzm.

45 Hwëna Yesussu de taïbliþlan srëm Yahudi zini kim hla nulidak, "O desa beya tangankam tagal neizim'in," dekam zep husus neizim'ik. Hen dekam zep Paulus mo tawa tabinni insa lamang nu'ik.

46 Hwëna Paulus ne Barnabas ne dekam zep udobe naban ding ulzimki, "Alap onakore ol dawemna an, zen diki nonol emsa de tawa tabin hip dakasti'in. Hwëna em ansa baes eibi'in, em dekam hen hëndep de gwën hap denakae baes eibi'in. Èe in zebë Yahudi srëm zi sin dep emsa hli yuluda'an! *

47 Sap Alap mes syala ansa abe mae hap wei yul sonezimki. Zep zëre mo olak anakan lwak,

'Èe mesë ebe mae hap Yahudi srëm zisi dikim ngatan tabin hip de syala golzimk,

hen ëngaya gwen hap de olsa dikim okama topse gwen san golzim halada gwen hap denaye.' ***

48 Yahudi srëm zini kim kirekam ësak, zen dekam zep isrip-sri naban Alap mo ola insa dokwak nuk, hëndep dekam zep tïngan men desa Alap dam tasibirki, zen de hëndep de ëgwë gwen hap denaka gul irin hip, zen dekam zep hëndep daïbliþlak.

49 Hëndep dekam zep Alap hap de ol dawemna insa tïngare langna in san nolteisik.

50 Hwëna Yahudi zini in zen husus neizim'ik, zen dekam zep Yahudi srëm bose nabare zi sin dep sek gwëk- hen bose nabare we walya in zen but srëm gola iwe bitï gwe-gwëkke, zëbon mae osan dep. Dekam zep zëno mae mo enlalana ben dyasizim'ik- dekam de zen karek son hap. Langna in kon dekam zep hëndep nialsa sonek.

51 Zen dekam zep zëno mae mo nwenak tana sonna taïk-tïk oso guk halka. Ki zep ëna Ikonium sun dep song ëka.*

52 Hwëna Antiokiak de Yesussu taïbliþlan wenya mensa hli kulidaka, zen nama Alap mo Enho nakore isrip-sri naban lowehe gwëk.

14

Ikoniumk kim aptakake:

1 Ikoniumk hen kirekam lwak. Paulus ne Barnabas ne etan Yahudi mo but srëm gol san song ëka. Zëwe zëno nik mo tawa tabinni man tangan sosen gwëk, dekam zep tangan beyakam Yesussu daïbliþlak- sap Yahudi zi, hen sap Yahudi srëm zi.

2 Hwëna ahakore Yahudi zini- men zen Yesussu de taïbliþlan hap baes tak, zen dekam zep Yahudi srëm zi mo enlalana ben dyasizimk- dekam de zen Yesussu de taïbliþlan wenya insa u sal-sal gwibiridan hap.

3 Hwëna Paulus ne Barnabas ne holokam zë ëka, hen udobe naban Bian mo nësa de kwasang gwibiridan hap de ola lonbirida gwëka. Zen Bian en hon yaïng ë kinï gwëka, zep Bian man zëbe nikip owas-owassa dikim syal ei gwibin hip dena gol gwizimki- zëno nik mo ola insa dikim sosen gul gwizimdin hip.

4 Zëwe de zini dekam zep ëhliwëk. Ahakon Yahudi zi nik ang tak. Ahakon Paulus nebon ang tak.

5 Dekam zep sap Yahudi zini hen Yahudi srëm zini zëre mae mo ëna iwe de nol-nola ban ola niaha- en guk- dekam de Paulus neka karek son hap, hen zao de kasokam i tizimdin hip.

6 Hwëna kim tame ulki, dekam zep Ikonium kon heya ëka- Likonia mo lang san dep. Zao zep hwëna ëna Listra hen Derbe mo langnak

7 ëngaya gwen hap de ol dawemna inkam tawa labirida gwëka.

Listrak hen Derbek kim ë gwëkake:

8 Listrak zi lekna ki. An zem lek naka ki hëndep jaha gwëk.

9 Zen kim Paulus mo tawa tabin- nik ang gwëka, Paulus ki zep

* 13:46 13:46 Kis. 18:6; 28:28 * 13:47 13:47 Yes. 42:6; 49:6 * 13:51 13:51 Mat. 10:14; Luk. 9:5; Kis. 18:6

karatda taka, dekam zep tame taka, "Zini an angkam man Yesussu taiblibla'ara. Zen sa zëno bosekam dawem gwerä."'

¹⁰ Ki zep ol mamkam takenblaka, "Emki zaun!" Dekam zep hëndep hetyak gwesik kininkam luwesik ane kinika, hëndep të nasen'anaka.

¹¹ Zi trana in kim hla dak, ki zep zëre mae mo olkam ëtaken gwe'ak, "An aha alap dare zi nwe-masekam nëbon mae onak ati ë ine zaka!"

¹² Dekam zep zëre mae mo yang tasin alap mo bosekam bose nosok. Barnaba'a "Zeus" kum bose dak. Paulussu "Hermes" kam bose dak, sap zëno mae mo alap-alap hap de ëpba olak Hermes zen aha alap-alap mo olsa zi hip ayang gul gwizimki.

¹³ Zëno mae mo yang tasin alapna Zeus, zëbe hap de gola ki- ë alpnak iwe. Gola iwe de syal gwe-gwen zini ki zep sapi zirya teisyahal zaka-dekam de zi tra mo nwenak Barnabas ne Paulus nikip hlik sozimdin hip. Nolak de ala sozimdin hip de desan-san weir sosunnu hen man teisyahal zaka- zëno nik mo nolak de ala so sonezimdin hip. Sap zen man tim nosok, "An ano mae mo yang sosun alap eiwakam ati ë ine zaka."

¹⁴ Hwëna anakan kim tame ulki, "An hare kirekam am asa neizim'in!"- dekam zep zëre nik mo tahan bajusa kalk-kalk oson daka, anakan dikim goltreizimdin hip, "Ëe ama eno mae mo syala insa husus eibi'in." Ki zep zi trana in mo ngirin sin hlu kë zaka, dekam zep ol mamkam laken zaka,

¹⁵ "Em ba habe kirekam asa eizim'in? Ëe an hen zi tangan sake- in ki hen em. Ëe an ebon mae onak ëngaya gwen hap de ol dawemsa de tawa labin hibë ap-tazak- em dikim boton alapsa de betek gwibirida gwensa baes tan hap, eiwa de Alap ensa dikim hwëna betek gwe-gweblan hap, men Zen ngli naban, kama naban yang so-sukuke, hina, hen tingare ensasa

gwen kire-kirena men zen zëwe lowehe gwenanke.

¹⁶ Menkam Alap nwe enkam emsa anakan kara ta gwibirki, 'Dikire zëre mae mo boton alap-alapsa betek neibirida gwëk.'

¹⁷ Hwëna Zen hen dekam ki dawemna ebe mae hap gol gwizimki- em dikim sap anakan tame tan hap, 'O hare eiwa de Alapna kike.' Zen zep ona il ti gwenda- eno mae mo obwaga dikim dawemkam hatan hap. Hen tembanena sowe henkam ep gol gwizimnira- em dikim isrip-sri naban lowehe gwen hap."

¹⁸ Kirekam sap lonbiridaka, hwëna dekam tangan man alp neizim'ik- sapi darena insa de hlik sozimdin hipye.

¹⁹ Hwëna Yahudi zini kim Antiokia hen Ikonium kon Listrak iwe yaing gwezak, dekam zep zi trana in mo enlalana wet dyasizimzik. Paulussu dekam zep kasokam niri-blak. Ëna in kon ki zep il dihak. Man kil dik, "Mes tilida."

²⁰ Hwëna zao de Yesussu taibliblan wanya kim tagam neisiblik, dekam zep luweka, dekam zep etan nertilzik. Ka'ankam zep hwëna Derbe san dep etan Barnabas han song ëka.

Nonola kim etan Antiokia san dep ola halkake:

²¹ Derbek zep hwëna ëngaya gwen hap de ol dawemkam lonbirida gwëka. Zëwe beya nik zep Yesussu daibliblak. Dekon ki zep etan amjanbiridaka- ë-ëna men desan zëna song ë zakake, Listra, Ikonium, hen Pisidiak de Antiokia san.

²² Zen dekam ëKristen gwen wanya insa etan titi labir song gwëka- dekam de Yesussu de taibliblan ennak tatem ëzauk gwen hap. Anakan tawa labir song gwëka, "Men zen kareksa de goltowe gwennak tatem ëzauk gwe'ak, zen zen sa Alap mo irik ginnik bitit gwer."

²³ Zao hen man enbirida song gweka, “Tembanesa esa ëlwa gwer, dekam eka eno mae mo nol-nolaka dam lasik gwibik.” Kim dam dasik gwibik, dekam zep Paulus ne Barnabas ne taha tehabirida inen naban Biansa anakan en sone gweblaka “Bian, zini an man Ebon ëyaing gwe kinian. Ee ere mo tahanakë hli kulida'an.”

²⁴ Pisidia mo langna kim lamanka, dekam zep Pamfilia mo langnak aptaka.

²⁵ Pergak kim ol dawemna inkam tawa lasibirki, ki zep hwëna Atalia san dep song ëka.

²⁶ Zen mes zëre nik mo syala su kul sonoka, zep Atalia kon bulkum Siria mo langnak de Antiokia san dep song ëka- men zëwe nonol zëre nikip anakare ola ban tahana de hazim anekke, “Bian, dikire ere mo kwasang-kwasangna zëbon nebon lwa gwek.”*

²⁷ Antiokiak kim aptaka, ki zep zëwe de ëKristen gwen zini tagal ulsuku, zao zep lonbiridaka- tingan mensa Alap syal gwe-gwibir-zimki, Alap men kirekam orana Yahudi srëm zi hip dam tasik gwizimkike, zen dikim hen Yesussu taibliblan hap.

²⁸ Zao holokam zep zëwe de Kristen zi niban olëlowehe gweka.

15

Yerusalemk kim ëgolek de gwekke:

¹ Ki zep zini Yahudi mo lang nakon Antiokiak yaing gwezak, zao zep hwëna ëKristen gwen wanya insa anakan tawa dabi'inzak, “Em de to mipsa blom tasibin srëmkam- men kirekam Yahudi zini Musa mo ol san ang ta gwenan, em molye ëngaya gwek.”

² Paulus ne Barnabas ne kim kirekam asalbiridaka, dekam zep zë mamkam olëol tetek gweka. Dekam zep zëwe de Kristen zini Barnabas ne Paulus neka, hëndep zëwe de

ahakore Kristen zi niban dam dasibik- zen de Yerusalemk Yesus mo dua-blaskam de dam tasibin wanya ban hen Kristen zi mo nol-nola ban anakan klis gun hup, “Ee Yahudi srëm wanya wëhë to mipna blom lasibi'ik? San ha babë?”

³ Dekam zep Antiokia kon lup nul sonok, hen in kim Penisia hen Samaria mo lang san olëtaman gweka, zen man Kristen zisi anakan lonbirida song gweka, “Yahudi srëm zini hen mes beyakam ëhalek.” Ola in man tangan isrip-sri neibik.

⁴ Kim Yerusalemk olëyaing gweka, zao de Kristen zini, hen dua-blaskam de dam tasibin wanya in, hen zëwe de Kristen zi mo nol-nola, dawem enkam zep dokwakwak nuk. Zao zep lonbiridaka- tingan mensa zëbe nikip Alap syal gwe-gwibir-zimkiye.

⁵ Farisikam de gubirida gwen wanya men zen ahakon Yesussu daibliblak ki zep luk tak, ki zep ëguk, “Yahudi srëm zini, zen diki hen Musa mo ol san de ang gwenkam zen to mipsa blom tasibin. Kire srëmkam bëjen ëngaya gwen.”

⁶ Dekam zep dua-blaskam de wanya in hen Kristen zi mo nol-nola ban ëgolek de gwek- dekam de aisil gwibin hip.

⁷ Ola kim zë beya nul song gwe'ak, Petrus ki zep luweka, ki zep gubiridaka, “Aya-wal oso-wal, ena tawana: Alap nonol ebon mae onakon asa dam tasiki- dekam de nonol Yahudi srëm zisi Kornelius Bak mo golak halen tabin hipye. Zen dekam zep Yahudi srëm zini nonol Yesus hup de ol dawemna ëtawa gwek, hëndep ano ol toran nakon zep Yesussu daibliblak.*

⁸ Dekam zep anakan dam gwesik, ‘Alap man zini ansa dokwakwak guluda.’ Sap dekam man zëre mo Enhona hlë ta sonezimki- in kirekam hen nonol nëbe mae hap hlë ta sonezimkike. Sap Zen Zen zi mo enhona tame ta gwizimnira.

* 14:26 14:26 Kis. 13:1-3 * 15:7 15:7 Kis. 10

9 Zep Zen ahakore zi ausu ensa hom nwekam golëake gwenda. Yahudi srëm zini in, zen sap to mip blom tasibin srëmna. Hwëna zen kim Yesussu daïblîblak, Alap dekam zep zëno mae mo enhona ngan tasibir-zimki- men kirekam hen nëre mae mo ngan tasibirkike.

10 Zep em ba habe angkam ëalp gwe'an?- Musa mo titi tabin olsa de nihin dohon-hon makan zëno mae mo holenak wei yul sonezimdin hipye. Nëna hen nëno mae mo auyan-azana man tangan nihin dohon-honna insa de wë-wek tan hap sap ëakasik gwëk. Hwëna banakan dep?

11 Zep bap nen kirekam gweibirida gwen! Sap Yahudi zini nen Kristus mo kwasang-kwasang en nakone ëngaya gwe'an. Yahudi srëm zini hen kirekam."*

12 Dekam zep ëbalk tasik. Ki zep hwëna Barnabas ne Paulus ne lonbiridaka- Alap men kirekam owas-owasna zëno nik mo taha san Yahudi srëm zi hip syal gwe-gwibir-zimkike.

13 Kim lonsuku, ki zep hwëna Yesus mo osona Yakobus gubiridaka, "Aya-wal oso-wal, emki asa sane tan.

14 Petrus Bak mes nësa aïsîl gwibiridala- Alap kim nonol tangan kwasangna Yahudi srëm zi hip goltreizimki, men dekam Alap nonol tanganna desa zëre hon dep lup gul inkiye.

15 Yahudi srëm zi de nëbon mae bitî gwenna, zen man tangan dakasti'in- men kirekam Alap mo ol ayang gul gwen zini ale nukke,

16 'Ëe asa lamkam etan Yahudi zisi amjanbirzin hap lwa halzal- ë yala men zao Daud orep irik gilkiike.

Men kirekam zini gol swranak etan gola dauk gwenan, zen kirekam asa zi ausuna insa etan oto tasibirzir.

Zen dekam sa etan ano irik ginnik lowehe gwer.

17 'Ëe kirekam asa syal gwibir-tingare zi ausu dekamim hen Asa de dam tasin hip dëblak.

Dekam sap Yahudi srëm zi, 'Ëe asa desa hen hlilin-

Aena men desa en dam tasibikye.

'Ëe an Bian Zënë ki kirekam gu'un,

18 hen orep mesë ki kirekam gu-guk gwëk.' " *

19 Yakobus ki zep gubiridaka, "Ano tame gun nukon, nen bap nen zëbe mae hap orana gwa-gwa ta gwiz-imdin- to mip blom tasibin srëm wanya in zen angkam Alapsa tame da'anye.

20 Hwëna surat ensa nen ale gul sonezimdin- anakan dikim titi tabin hip:

Yang tabin dowal hap de otweran blom ta gwibir-zimdinni bahem twenblanda gwen.

Hole naka de blwap-blwap tan tweran ninni bahem twenblanda gwen.

Otweran kalsa bahem otde gwibin.

Hen kahalo-kahalosa baes tak.

Kire enkam esa suratkam titi labir.*

21 Sap Musa mo titi tabin ola Hari Sabat jamkam man tingare langnak de Yahudi mo but srëm gol-golak donbirida gwëk, hëndep angkam hen nama donbirida gwe'an. Zep Yahudi srëm Kristen zini in de ahakore ol jalse gwensa ësane gwen hap ëdwam gwe-gwenna, zen sap sa Yahudi mo but srëm gol-gol san sek gwe-gwer."

Yahudi srëm Kristen zi hip in kim suratna ale nulzimkke:

22 Dekam zep dua-blaskam de Yesus mo dam tasibin zini in, zao de Kristen zi mo nol-nola ban, hen zao de tingare Kristen zi niban zini dam nososuk- zen de Paulus ne Barnabas neka Antiokia san dep ang eizimdin

* 15:11 15:11 Gal. 2:16 * 15:18 15:18 Am. 9:11-12; Yes. 45:21 * 15:20 15:20 Orya ol zini hom kirekam tweransa damera gwenan- hole naka de blwap-blwap gulblunkamye. Hwëna aha zi ki kirekam orep damera gwëk, zep Alap man kirekam dep jalse gwëka, sap dekam kala bëjen wet son. (Kej. 9:4; Kel. 34:15-17; Im. 17:10-16; 18:6-23)

hip. Zen Silas ne Yudas neka dam nososuk. Yudas, zëno aha bosena Barsabas. Zi darena in hen zëwe de Kristen zi mo nol dare.

²³ Suratna in zëbon mae zep anakare ola ban nol sonezimk,

“Suratna an Yahudi srëm Kristen zini ebe mae hap- Antiokiak de wenya, Siriak dena, hen Kilikiak de wenya kip,

dua-blaskam de Yesus mo dam tasibin wenya, hen Yerusalemk de Kristen zi mo nol-nola, hen tïngare awe de Kristen zini, abon mae onakon:

Dawem.

²⁴ Ëe ama ësak: Zini man abon mae onakon ebon mae osan dep sek gwezak. Hwëna zen kim emsa tawa da gwibik, em hwëna enlala nike anakare hap ëtopse gwek, ‘San ha ëe an Kristussu karekkamë ang ëbla'an?’ Hwëna zini in ëe homë lup ul sonek, hen ëe homë emsa de tawa tabin hip enbiridak.

²⁵ Zen in zebë zi darena dam ososuk- nëno mae mo wal bose dawem darena Barnabas ne Paulus nebon onak de ang ëzan hapye.

²⁶ Barnabas ne Paulus ne in, zen mes tangan zëre nik mo angna Bian Yesus mo bose hap sosok osoka, zep maka hëndep zëbe hap de ol gol haladannak lïlkï.

²⁷ Zini in sa karekkam emsa tawa da gwibik, zen in zebë Yudas ne Silas neka suratna an han ebon mae osan dep leisya sonek- dekam de zen suratnak awe de ola ansa eiwa un hip.

²⁸ Sap Alap mo Enhona mes abe mae hap anakan goltreizimki, ‘Bahem Bian osan dep de orana gwagwa ta gwizimdin- titi tabin olsa de beyakam wei yul sone gwiziminkimye.’ Zen in zebë jalse gwen ola da-en emsa en sonebirida'an:

²⁹ Yang tabin dowal hap de otweran blom ta gwibir-zimdinni emki baes tan.

Otweran kalsa bahem otde gwibin,

hen hole naka de blwap-blwap tan otweran ninni bahem twenblanda gwen.

Hen bahem ëkahalo gwe-gwen.

Eme desa langa ulsu'uk, em esa Alap mo nwenak ësam gwesil.

Zao en zausunun. Dawem.”

³⁰ Dan-nër dan-nër zini in ki zep hëndep Yerusalem kon Antiokia san dep ëgwahak. Kim zë yaïng gwek, dekam zep tïngare ëKristen gwen zini tagal nulsuk, zao zep suratna in sa baca nulzimk.

³¹ Zen man tangan suratna iwe de ol tan-tanna in sa sam neisibik.

³² Yudas ne Silas ne in, zen Alap mo Enho mo sosonkam de hamal hap de ol lonbirida gwenna. Zen zep tatem dikim ëzaun hup ol zimzimkim sërkam lonbirida gwe'anka.

³³⁻³⁴ Zao hom holo ëka, dekam zep etan Yerusalem san dep anakare ola ban deisya sonek, “Dikire Alap onakore dawemna ebon nebon lwa gwek.”†

³⁵ Hwëna Paulus ne Barnabas ne man zë holo ëka. Bian Yesus hup de ol dawemkam zë etan tawa la gwibirki. Aha zi man zë hen tawa da gwibik.

Paulus ne Barnabas ne kim ol tetek ëkake:

³⁶ Hom holo gwe'ak, Paulus ki zep Barnaba'a gubluka, “Nen ki etan amjanbin- men zen nëno nik mo tawa labiri dankam Bian Yesussu daïblïblakke, eka ki hla kulida song gwe, ‘Zen angkam banakan lowehen da'an?’ ”

³⁷ Barnabas man dwam gweka-Yohanis, aha bosena Markus, de hen etan ang gwizimdin hip.

³⁸ Hwëna Paulus man zen de ang gwizimdin hip baes gweka, sap zen mes nonol Pamfilia kon heya gweka. Dekam etan hom mae ang gwewizimki- aha langnak de zini kim etan tawa labir song gwekaye.

³⁹ Zen dekon zep mamkam ol tetek ëka. Ki zep kon hëndep sya këka. Barnabas Markus hun

† 15:33-34 15:33-34 Lukas kim ola ansa ale gulku, hwëna ayat 34na ansa lun kon mes yap aha zi mas nuk. Zen a kirekam mo mas nukye: “Hwëna Silas man dam gulsuku, ‘Ëe asa an san al gwezal.’ ”

bulkum lang tekna Siprus sun dep zersong gweka.

⁴⁰ Paulus Silassa zep dam tasiki-deban de dan en hap. Tingare Antiokiak de Kristen zini dekam zep zebe nikip Alapsa abe dak, "Bian, dikire ere onakore kwasang-kwasangna zebon nebon lwa gwek." Ki zep kon zersong gweka.

⁴¹ Zen Siria mo lang naban Kilikia mo lang naban zeramjanbir song gweka, hen zewe de Kristen zisi tatete labir song gweka.

16

Timotius kim Paulus ne Silas neka ang gwizimkike:

¹ Paulus dekam zep Silas han Derbe san dep song eka. Derbe kon etan Listra san dep zep ayang ulki. Zao Kristen zini ki, bosena Timotius. An zem Yahudi we. Zen hen mes Kristen gwek. Bi zem Yunani wal.

² Listrak de tingare Kristen zini hen Ikoniumk de wenyanya Timotiussu man nen gweblak, "Walasna in airis."

³ Paulus dekam zep zebon de ang gwe-gwen hap dwam gweblaka. To mipna ki zep blaonsubluka. Zen mae hap blaonsubluka- dekam de langna iwe de Yahudi zi anakare hap husus gweblan srēm hap, "Zen hom nebon mae tilki, sap zeno bianna Yunani wal."

⁴ E-e san kim namjan gwibik, zen man Yesussu de taibliblan wenyaka donbirida gwek- mensa dua-blaskam de zi niban Kristen zi mo nol-nolaban Yerusalemk aha-en nukye, zen dikim hen suratnak de jalse gwibiridan ola in san ang ta gwen hap.*

⁵ Zewe de Kristen zini Yesussu de taibliblankam zep etatete gwe zahek, hen dekam yakla jamkam zep zini etan taibliblankam emas-gwe-gwek.

Paulus kim Makedonia walya nwe lirisin neblankam hla takake:

⁶ Paulus ki zep Galatia hen Prigia mo langna ziamjanbirki. Hwena dekam Alap mo Enhona man gubiridaka, "Asia mo langna bahem amjanbin."

⁷ Misia han de lang zip sonnak kim yaing gwek, dekam zep sap eakasik- Bitinia mo lang san de amjanbin hip. Hwena Yesus mo Enhona man etan gubiridaka, "Desan hen bahem amjanbin."

⁸ Dekam zep hwena Misia mo lang san taman gwek, hendep hi alpnak de ena Troas san dep zep tine gwek.

⁹ Zao zep hwena Paulus mo nwena lirisin neblak. Zen eiwa de makan Makedonia walsya hla taka. Zen man zaunkum Paulussu anakan abe ta'anka, "Haen, emki Makedonia san song gwezan- asa de mas gwibiridan hap."

¹⁰ Hendep dekam zebē ehohle gwek- Makedonia san de sek gwen hap. Sap ee mesē dam ulsuk, "An Alap Zēn ki nesa gubiridanda- zere mo ol dawemsa dikim zewe hen tonbirida gwen hap." Ee an zen ola ansa ale guk, Lukas, ee ama hen dekam ang gwibiridak.

Ena Pilipik kim wenyanya Lidia Yesussu taibliblakke:

¹¹ Troas kon bulkum zebē dam-dam enkam Samotrake mo lang san dep sek gwek. Ka'ankam zebē hwena Makedonia mo hi alpnak de e bosena Neapolisk yaing gwek.

¹² Dekon tanakam zebē hwena Pilipi san dep sek gwek. Propinsina Makedonia in, zen Roma mo irik gin lang ahana, hen Pilipi in, zen Makedonia mo aha e yawal. Zao holo tolkamē lowehék.

¹³ Hari Sabatkam, ee dekam ena in mo ho alp nakore lilikin sine wet so gwek, sap ee ama tim uk, "Ho alpnak man yap Yahudi zini Alapsa dekon abe ta gwen hap etagal gwe-gwenan." Sap zen dekam nama hom but srēm gola dau'uk. Zao kimē teinikin'ik, we walya zen zē

* 16:4 16:4 Kis. 15:29

tagal gwek, deban mae en zebë ola olëton'ak.

¹⁴ Ahana zen zë sane gwe'ak, ëna Tiatira kore we, bosena Lidia. Zen sam dan kil makare kaensa de tealakam lirak ta gwibin hip de wemen kire kaenkam teipsin zi mo bajuna dayal gwibir-zimninke. Wenya in Alapsa de betek gweblanna. Bian zep enho naka talusbirki- dekam de Paulus mo ola kon Yesussu taibliblan hap.

¹⁵ Dekam kimë Lidiasa hen zëno golak de wenya ban kitak baptis labik, dekam zep asa gubiridak, "Em de asa anakan tame gunnu, 'Zen eiwa-eiwakam Yesussu taibliblanan,' ki ano golak emki bitigwen." Zëno ol san zebë ki hëndep ang tak.

Paulus ne Silas neka kim Pilipik bwinak se noso inkke:

¹⁶ Aha yaklakam kimë etan ho alpnak de ol ëgu sone gwenna in san dep sek gwek, ki zebë zë hwëna oranak wenya ban oltowe'ak. Wenya in zi mo tana iltikinnik de babu gwe-gwenna, hen dowala mes tilbirki, zep hlaulhlaulkum syal gwe-gwek. Zëbon zini beyakam yaing gwe-gwezak-dekam de hamal hap de ol hap taken-taken gwe-gwibin hip. Nonol in zëno mae mo tana iltikinnik babu gwe-gwek, desa abe da gwibik, "Ëe zëbon de hamal hap de olsa sane gwen habë hatanzal. An dë teala naye." Wenya insa men zen bi neibik, zen dekon zep te-alana beyakam lop da-in gwek.

¹⁷ Hwëna wenya in dekam zep Paulus mae han asa golëtro nasen gwe'ak. Anakarekam ola mamkam gu gwe'ak, "Zini an, Teipsin Zini Alap mo lup gul sonenna- zen de nëbe mae hap ëngaya gwen hap de orasa dam tasik gwizimdin hip."

¹⁸ Yaklana man beya gwek-kirekam de gweibirida gwenna. Hëndep Paulussu kim jalak zerzauk, ki zep lero gwibin niban zëbon de

dowala insa gubluka, "Kristus Yesus mo bosekam ëe ama emsa gublu'an: Em zëbon onakon wet son!" Dekam zep hëndep wet soka.

¹⁹ Zini in zen wenya insa bi neibik, kim tame nuk, "O zen de dowal srëmkam gwë'ak, nen molye te-alana zëbon onakon ulin gwek," dekam zep Paulus ne Silas neka teipsin-teipsin wenyak dikim zitrën hap pasar san dep il nosohak.

²⁰⁻²¹ Teipsin-teipsin wenya kip kim nitreizimk, zen dekam zep nenbiridak, "An Yahudi wal dare. Zëno nik mo tawa tabinni nëno mae mo ëpba lowe hensa dikim wet gulsuzimdin hip. Hwëna hom dakastilin-Roma mo irik gin zini nen de zëno ol san ang tan hapye. In zep zëno nik mo tawa tabin nikon ëna awe de zini ëilman gwe-gwe'an."

²² Zi beyam-byana dekam zep hen ëgu anek, "In eiwa!" Teipsin-teipsin wenya in dekam zep baju talwesizimdin nika de lek-lek son hap nenbiridak.

²³ Mam enkam kim lek-lek nososuk, ki zep hwëna bwinak se nosoink. Bwinak de nol gwen zi nika zep nenblak, "An dawem en tangankam kara so."

²⁴ Kirekam insa nenblak, olk de tekson tangannak zep se so inki. Zëno nik mo tanana te hlangnak zep bat nosozim anek.

²⁵ Hwëna ngirin tatem zep Alapsa abe la'anka hen terya ban isrip-sri ë gwebla'anka. Ahakore bwinak de zini man sane noso'ak.

²⁶ Mumuk ennak zep jingil yala taikki, hëndep bwina in mo moko hap de kasona man ëëwak gwek. Hëndep dekam zep bwi lilikinni in ëtalwesik. Hen mensa bwinak de zini besikam de dokotkam dahalebik, man hëndep ësom-som gwe hanak.

²⁷ Bwinak de nola in ni tan nakon zep auna hlo zaka. Kim hlaulku, "Lilikinni tingan talusundan nik ërlwa'an," dekam zep sap nëbok zemka mol ineka- zënaka dikim dang gulblun hap. Sap zen man

* 16:27 16:27 Kis. 12:18-19

tim gulku, "Mes ëheya-hya gwenan. Hare an ki hwëna asa sa dal!"*

²⁸ Hwëna Paulus ki zep ol mamkam takenblaka, "Bahem enaka tan! Ëe tingan namaë lowe he'an!"

²⁹ Dekam zep zëre hon de ëbabu gwe-gwen zisi syauk ngatan naban de golëhlu-hluk gwezan hap tak-enbiridaka. Zëna ki zep yal-yala ban Paulus ne Silas nik mo nwenak boklena kom sozim zika.

³⁰ Kim kon ziwet soka, dekam zep takensizimki, "Bian ne bian ne, ëe basa asa syal gwibir?- ëe dikim ngaya gwen hapye."

³¹ Ki zep ding ulbika, "Bian Yesussu em anakan taïbliBlan, 'Zen Zen- asa de ngaya tan hap de Zi niye,' dekam esa ngaya gwerä. Hen kirekam, eno golak de wenyaye."*

³² Dekam zep Bian Jesus hup de ol dawemna zëno golak lonbiridaka.

³³ Hëndep dekam zep kam zëno nik mo wei-weina ngan tasibir-zimki. Hëndep kam zep ki hëndep zëna hen zëre mo golak denaban tingan baptis labirki.

³⁴ Tembanena ki zep hwëna golzimki. Zëna dekam zep zëre mo golak de wenyä ban golëisrip-sri gweka, sap zen mes Alapsa daïbliBlak.

³⁵ Kim litik, ki zep teipsin-teipsin wenyä in zëre mae mo jana nabare zini bwi gol san dep lup nul sonek-zao de nol gwen zini insa de gublun hap, "Paulus ne Silas ne dikire song ëk."

³⁶ Ki zep bwinak de nola in guzimki, "Asa man nenblanzal: Em sap esa song ëra. Dawem enkam song ë."

³⁷ Hwëna Paulus ki zep jana nabare zini insa gubiridaka, "Ëe an Roma mo irik ginnik de zi dare sake. Zen hwëna takensizimdin srëmkam totoresa zi nwenak asa lek-lek nosok! Ki zep hen takensizimdin srëmkam bwinak asa se nosoink. Hwëna angkam man ëdwam gwe'an- sowëkam de asa

guzimdin hip, 'Dikire song ëk.' Kirekam ëe ama baes ë'an. Dikire zën yaing gwezak- dekam de asa hil so sonen hapye."

³⁸ Jana nabare zini in kim teipsin-teipsin wenyä insa kirekam nenbiridak, dekam kim anakan tame nuk, "O Paulus ne Silas ne, an hare Roma mo irik ginnik denakake," dekam zep ëaïri'ak. Sap Roma mo irik gin zisi bëjen totoresa karek tan. Sap zen man tim nosok, "An Yahudi en kore zi dare."

³⁹ Dekam zep zëno nik mo enlalasa de së ta sonezimdin hip yaing gwezak, ki zep anakare ola ban hil noso sonek, "Bahem asa jal eibiridan. Hwëna emki ëna an kon song ën."

⁴⁰ Kim wet osoka, ki zep Lidia mo gol san dep song ëka. Zao kim Yesussu de taïbliBlan wenyä tagal ulsuku, zao zep aumwa hap ol zim-zimni lonbiridaka. Zëna ki zep kon ëhalka.

17

Tesalonikak kim aptakake:

¹ Timotius hun kim Makedonia mo ë darena Amfipolis ne Apolonia neka ërtamanka, ki zep Tesalonikak ërhataka. Zëwe hen Yahudi mo but srëm gola ki.

² Paulus ki zep but srëm gola in san dep song gweka- men kirekam zëna gwë gwekake. Dekam dan-ahare Hari Sabatnak Alap mo ëpba ola kore naka zep klis gul gwizim'inka.

³ Zen anakan zë srip gulsuk gwizim'inka, "Alap mo ëpba olak man dam gwesik, 'Nësa de ngaya tabin hip de zëre mo zer sonen Zini, Zen nonol kareksa sa goltowera, ki sa hwëna tin nikon etan ngaya gwerä.' Ëe in zebë emsa Jesus hup dena ansa anakan tawa tabi'in: Zen eiwa Zen tangan- nësa de ngaya tabin hip de zer sonen Zi niye."

⁴ Dekam zep Paulus ne Silas neka Yahudi zini in ahakon daïblizimk hen ang neizimk. Beyakam Yunani

* 16:31 16:31 Rom. 10:9-10

kore zi ang neizimk- Alapsa men zen betek në gweblakke. Ahakon hen bose nabare we wal.

⁵ Hwëna ahakon mae hap husus neizim'ik, "Ano mae mo but srëm gola kon kim hli nül in'in." Dekam zep pasarak ë-ensa de zauk gweblan zi hip te-alasa neirzimk- zen dikim ëilman gwennak mas gwibiridan hap. In kim ëilman gwe'ak, dekam zep Yason mo gola dot dasizik- Paulus ne Silas neka dikim zi tra mo nwenak ziwet son hap.

⁶ Hwëna kim zë nohwënzimzik, Yason zënaka zep il dihak, hen ahakore Yesussu de taibliblan zi niban ëna iwe de teipsin-teipsin zi sin dep il dibirhak. Anakan zep zë boton ol blo-blokam nenbiridak, "Tingare okamanak men zen zini yasik da gwibi'in, zen mes angkam awe yaing gwezal.

⁷ Hwëna Yason an mes zini insa zëre mo gola kon lup gul inki. Zëno mae mo tawa tabinni, zen Roma mo irik gin nikon dikim wet so gwen hap titi da gwibirin, sap zen anakan tawa da gwibirin, 'Aha teipsinni kibosena Yesus.' ""*

⁸ Kirekam kim nasalbiridak, dekam zep zi trana in teipsin-teipsin wenyä in mae han ëjal gwek.

⁹ Dekam zep Yason maesa wal bose wal zeban nenbiridak, "Te-alasa nongka ap olzimk, ki neik sek gwek." Kim nolzimk, dekam zep nenbiridak, "Angkam sap esa sek gwer."

Ëna Bereyak kim aptakake:

¹⁰ Orapna kim ti'inzak, dekam zep Paulus ne Silas neka Timotius mae han ëna Bereya san dep lup nul sonek. Kim zë yaing gwek, dekam zep Yahudi mo but srëm gol san dep sek gwek.

¹¹ Zëwe de zini enlala ngatanna. Zen Tesalonikak de zi mo kim hom. Zen zep aha-ere enlalakam Paulus mo mo tawa tabinni insa nulin gwek, hen zen dekam mwin-mwankam Alap mo ëpba olsa anakare hap karatda nul gwek,

"San ha eiwa denaka nësa tonbirida gwe'ara?"

¹² Zen zep beyakam Yesussu daibliblak. Zen ahakon Yunani kore zi, hen Yunani kore bose nabare we wal.

¹³ Hwëna Tesalonikak de Yahudi zini in zen Yesussu daiblibla srëm gwek, Zen kim Paulussu anakan nasalblak, "Zen angkam Bereyak tawa ta gwibi'ira," zen dekam zep yaing gwezak, dekam zep zë hwëna zëwe de zisi olkam se dyabiridazak.

¹⁴ Dekam zep, Bereyak de zini men zen Yesussu daibliblak nabakam Paulussu hi san dep zon dak. Hwëna Silas ne Timotius ne zen nama ki zë ëka.

¹⁵ Men zen zon dak, hëndep Atenak nërhatok. Zen kim lwan dahak, zëbon mae zep Silas ne Timotius neka anakan gu sonezimki, "Nabakam de asa ërtrozak."

Paulus kim Atenak gwë gwekake:

¹⁶ Atena kon kim nama Silas ne Timotius neka eizim'inka, enlalana man tangan anakare hap dowebla hanaka, "An ba hap ëna ansa yang tabin dowal-dowal enkam al dasik?"

¹⁷ Zen in zep Yahudi mo but srëm gol san song gwe-gweka- zao dikim Yesus hup denaka Alap mo ëpba ola kon ziklis gul gwen hap. But srëm gola iwe, Yahudi srëm zi niban siri gwe-gwek. Paulus mwin-mwankam hen pasar san song gwe-gweka. Men zen zëwe ba mae hap yaing gwe-gwezak, desa zëwe zep Yesus hup de ol dawemkam tawa ta gwibirki.

¹⁸ Ëna iwe de zini ahakon Epikuros Bak mo tawa tabin sin de ang ta gwenna, hen ahakon Stoakam de gubirida gwen wenyä. Zen dekam zep Paulus hun nërkeisa-keisa gwek. Ahakon man nenblak, "Ol beyam-bya zini an man zënaka tim ti'ara, 'Ano tawa tabinni an airis!'" Hwëna ahakon man nenblak, "Zini an san ha ëse yang tabin alap san de ang ta gwen hap nësa titi tabi'ira?" Zen mae hap ki ëguk: Sap zen Yesus de tin nikon

* 17:7 17:7 Luk. 23:2; Yoh. 19:12

ngaya gwen hap denaka tawa ta gwibi'inka. *

¹⁹ Dekam zep Paulussu zère mae mo egolek de gwe-gwen kwatapan dep nersong gwek. Kwatapna in "Areopagus" kum nen gweblak. Zao zep nenblak, "Èe ama edwam gwe'an- eno tawa tabin esena insa de asa tonbiridan hap.

²⁰ Sap eno tawa tabinni ano mae mo inik au hlobin makan tangan lwa'an, zebè dawemkam de emsa sane tan hap edwam gwe'an."

²¹ Sap tingare Atenak de zini hen aha lang nakore zini men zen zewe lowehe gwek man esam gwesik gwek- ol esesa de esane gwe-gwen hap, hen kire hap de ekeisa-keisa gwe-gwen hapye.

²² Paulus ki zep luweka, ki zep gubiridaka, "Atenak de zi, èe ama emsa tame tabirin, 'Em in alap-alapsa dawemkame blikip eisibirida gwenan.'

²³ Èe kimè eno mae mo enak të nasen gwe'ak, dekam zebè eno mae mo yang tabin alap-alap hap de kire-kirena kara ta gwibi'ik. Dekam zebè hen tweran nin tru tasik gweblan hap de kalsna hlauk. Zewe ema ale uk, 'An nëno mae mo tame tan srèm alap hap dena.' Zep men zèbe hap tame tan srèmkam tru lasik gweblanan, èe ama Desa emsa tonbirida'an.

²⁴ "Alap men zen okamana ansa yang gulsuku, hen tingare kirekam-kirekamna yang tabirki, Zen Zen nglī naban kama naban bi gwizim'ira. Zen zi mo gol taublun dannak hom gwè gwenda.

²⁵ Hen Zen hom zi de banakare maesa golblan hap dwam gwewenda, sap Zen tahalha naka hom. Sap Zen Zen kitak zi hip gol

gwizimnira- angna, ensasana, hen tingare kirekam-kirekam naye.*

²⁶ Nonol lone sennak Zen ahare zi nikon tingare zi ausuna yang tabirki. Hen dekam zep zèbe mae hap okamasa de bi gwibin hip dena golzimki. Zen Zen kitak okama tek-tekna kae gwibir-zim niraka, hen Zen Zen auhu-kamanak de teipsin-teipsinni anakan dam tasik gwibirida, 'Angkam em teipsik. Angkam em ati gwen.'

²⁷ Alap mes kirekam syal gwibirki- Zènaka dikim të gweblan hap, mae hap, 'Wèhè asa nertowe'ak?' Hwèna Zen sap nèbon mae onakon langanak hom-

²⁸ men kirekam ègu gwenanke, 'Nen an zèno taha terenake lowehe gwenan hen ètè nasen gwenan. Ensasana hen Zèbon onak.' Ebon mae onakon men zen tërya ale dabik, zen hen ki anakan ègu gwek, 'Nen an kitak zèno walas.'

²⁹ "Zen in zep, nen de Alap mo walas gwenkam, nen bap nen anakan tim tin, 'Alap mo nwe-masena zen zi mo tahakam de yang tasin makarena'- men kirekam zi mo enlalakam emas nakon, ahaksa perak nakon, hen kaso nakon yang da gwibirinke.

³⁰ Orep Alap nwe enkam zè kara ta gwibirki- kirekam de Zènaka tèblannakye. Hwèna angkam zep okamanak de tingare zini gwibirida'ara, 'Angkam dekam ehalek.'

³¹ Zen mes yaklana dam tasiki-dekam de tingare zisi zère mae mo enlalasa de hla tazimdinkim klis gun hup denaye. Men Zen de klis gun hup dena, Desa hen mes dam tasiki. Hen dekam de tingare zi taibliblan hap, Alap mes tin nikon ngaya taka."

³² Hwèna tin nikon de ngaya gwen hap dena insa kim sane da'ak,

* **17:18 17:18** Epikuros Bak, zen sap zewe de walsya hom, hwèna zèno tawa tabin ola mes Atenak hatak. Zen man tawa ta gwibirki, "Nen isrip-sri enkam nen lowehe gwen- banakare jalse gwen ol mae san de ang ta gwen srèmkam." Stoakam de gubiridan wenya, zen zini bosena Zeno Bak mo tawa tabin sin ang tak. Zen man tawa ta gwibirki, "Nen diki enho tatetekam nen lowehe gwen. Anakan de enlala gwibinni aïris, 'Èe a-en asa dawem gwer. Aha zi mo tütī tabin sin ba hap de ang gwen hap?' " * **17:25 17:25** 1Raj. 8:27; Yes. 42:5; Kis. 7:48-50

ahakon dekam zep swrë da'ak. Hwëna ahakon man nenblak, "Neik etan aha yaklakam kire hap dena asa tonbirida."

³³ Paulus ki zep kon song gweka.

³⁴ Hwëna dekam ahakon man zëno ola kon Yesussu daïblïblak. Zen dekam zep zëbon ang ta gwek. Ahana bosena Dionisius. Men zen kwatapna iwe ëgolek de gwe-gwek, zen zëno mae mo aha mamna. Ahana we, zëno bosena Damaris. Ahakorena hen ki.

18

Paulus kim Akaya mo langnak de ëna Korintusk hatakake:

¹ Atena kon, ki zep Korintus sun dep song gweka.

² Zao zep Yahudi walya Akwilasa zertoweka. Zëno auyan-azana orep Pontus sun dep ëal tak, zep zëwe de wal hap joweka. We zem bosena Priskila. Zen anakarenak ake'anka, "Nër hom Italia kon aptazak." Sap Roma mo teipsinni Klaudius Bak nër hom anakan golëalsa soneka, "Yahudi zini kitak de Italia mo langna an kon sek gwek." Paulus ëse apta zannak zep duwezimki,

³ sap zëno nik mo syala apdenak-tenda gol syal gwe-gweblan hap de zi dare. Zao zep apdekam lowehe gwek hen syal ta gwek.

⁴ Hari Sabat jamkam zep Paulus Alap mo ëpba ola kore naka Yahudi mo but srëm golak ziklis gul gweka-zen dikim hen Yesussu taïblïblan hap, sap Yahudi zi, hen sap Yunani kore zi.

⁵ Silas ne Timotius ne kim langna Makedonia kon apta zaka, Paulus dekam zep tenda gol syala insa golzausuku. Dekam yakla jamkam zep Alap mo olkam Yahudi zi ensa anakan tawa ta gwibirki, "Yesus Zen Israelsa de ngaya tabin hip de Zi niye, Alap mensa gu-gubirida gwekaye."

⁶ Hwëna ahakore Yahudi zini kim nërol gwek hen lamang dak, Paulus

dekam zep bajuna anakare ola ban hlaïk-hlik so guk halka, "Ano ola ansa baes eibirin, ki em hen ema ëngaya gwen hap dena baes eibi'in! Ëe ama sap emsa de ngaya tabin hip alp gwibiridak, zep Alap molya eno mae mo kala abe hap ngëro gulbluka. Zep ëe ama angkam song gwe'an- Yahudi srëm zisi de hwëna tawa tabin hip." *

⁷ Paulus ki zep but srëm gola in kon golëwet so gweka, dekam zep hwëna zëno golek denak de golak golëbiti gweka. Gol bina in bosena Titius. Zëno aha bosena hen Yustus. Zen Yahudi srëm zi, hwëna Alapsa mes betek gweblaka. Zëno golak zep hwëna golëbiti gwe-gweka.

⁸ But srëm gola iwe de mamna, bosena Krispus Bak, zen we wal walas zeban zep Yesussu zitaïblïblaka. Hen ahakore Korintusk de lowehen wenyä beya nik hen Paulus mo ola kon Yesussu daïblïblak, dekam zep desa hen baptis dabik.*

⁹ Aha orapkam, Bian Yesus nwe lirisin soblannak Paulussu gubluka, "Bahem aïrin. Sap esa tonbirida gwera. Balkkam bahem gwë gwen.

¹⁰ Sap Ëe ama emsa zergwë gwe'an, hen zini molya emsa karek dak. Sap ëna awe de zini beyakam sa Abon onak bitï gwer."

¹¹ Paulus dekam zep zëwe Alap mo olsa de tonbirida gwen hap holokam gwëka. Tahunna aha-en tamanblak, ahana ngïrin ngam sonnak.

¹² Dekam Akayak Galio Bak gubernorkam irik gïlki. Yahudi zini dekam zep ola aha-en nuk- Paulussu de Galio Bak osan dep balk tahan hap. Kim balk dahak,

¹³ anakare ola ban zep nërtrëblak, "Zini an zisi yasik ta gwibiridannen dikim Musa mo titi tabin olsa gweibir kinin hap, dekam de hwëna zëbon osan ang tan hap. Hwëna

* **18:6 18:6** Bajuna in mae hap hlaïk-hlik so guk halka: Anakan dikim enlala sobiridan hap, "Eno mae mo karekna in dikire ere mae onak lwak." * **18:8 18:8** 1Kor. 1:14-17

dekam Alapsa molye dawemkam betek ë gweblak.”

¹⁴ Paulus kim sap nama ding gun hup enlala gwe'anka, Galio ki zep hwëna ding gulzimki, “Em san asa Yahudi walsae hla lal! Roma mo jalse gwen olsa de gweibir kinin habe klak lanan zanam, ëe amaka emsa salbirida'an.

¹⁵ Hwëna ere mae mo ëpba olak de ol-gunnu hen bosem-sena, zep ene ki klak lananzal. Zen e-en emaka tap uk. Eë ama baes gwe'an-kiresa de ep klis gulzimdin hipye.”

¹⁶ Ki zep zëre mo jana nabare zini golëalsa sonen hap gubiridaka.

¹⁷ Hwëna Yahudi srëm zini men zen zë beyakam ëzau'uk, dekam zep Yahudi mo but srëm golak de mam zini Sostenes Baksa dot dasik, zao zep hëndep dangolek. Hwëna Galio Bak nwe enkam zë kara tabi'inka.

Paulus kim langna Siriak de Antiokia san dep lwa halkake:

¹⁸ Dekam Paulus Korintusk iwe holo tolkam gwëka. Ki zep hwëna Siria mo lang san de etan lwahan hap dwam gwëka. Dekam kim zëwe de Yesussu taïbliBlan zini hli yuludaka, Akwila we zem Priskila han man ang ëblak. Song gwen hap kim golek de gwe'anka, dekam zep zëwe de hi alpnak de ëna Kengkreyak nol alana lunsuku. Mae hap lunsuku: Sap Yahudi zini kirekam ëgwë gwëk- Alap hap de anakan goltrëblan hap, “Mensa ëe emsa gugubluk, ‘Eë kiresa asa Eno bose hap syal gwibir,’ mesë sul sonenan.” †

¹⁹⁻²¹ Asia mo langnak de ëna Efesus kim bulkum zihataka, Paulus zëna ki zep Yahudi mo but srëm gol san dep song gwëka. Zëwe Alap mo ëpba ola kore naka zep ziklis gulku. Zao zep abe dak, “Em wëhë holo tolkam awe gwë'anka?” Hwëna man ding gulzimki, “Angkam molyë awe holokam gwëk. Alap mo dwam gwibin sin de kirekam lwankam, ki

asa lwa halzal.” Zëna ki zep kon etan bulkum gwë halka. Akwila ne Priskila neka zao zep hli soka.

²² Kaesareak zep ati gwëka. Dekon zep Yerusalem san dep tanakam zahëka- zëwe de Yesussu taïbliBlan wenyaka de hlauluda guluhan hap. Zëna ki zep kon Antiokia san dep hwëna lwa halka.

²³ Zao holo tolkam gwëka, ki zep Galatia hen Prigia mo langnak de ëë san amjanbir song gwëka- dekam de etan zëwe de Kristen zisi tatete tabin hip.

Apolos kim Efesusk hen Korintusk tawa ta gwibirkike:

²⁴ Zao kim lwa se'ak, ki zep Yahudi walya Apolos Efesusk hata zaka. Zëno auyan-azana Mesir mo ëna Aleksandria san dep al tak, zep zëwe de wal hap joweka. Zen mes sekolana sul sone song gwëka, zep sërkam tangan Alap mo ëpba ola tawa gwibirki.

²⁵ Zen mes beyakam Bian Yesus hup dena tame gulku, hen udobe naban anakan tawa ta gwibirki, “Nësa de ngaya tabin hip de Zini angkam hatan hap man golek de gwe'ara.” Hwëna zen hom dekam Yesus mo bosena tawa gwibi'inka, hwëna anakare ol ensa salka, “Yahudi mo langnak baptis ta gwibin zini Yohannis Swe mes zisi zëbe hap de hohle tabir-blin hap baptis ta gwibirki.”

²⁶ Zen kim udobe naban kire hap denaka but srëm golak tonbirida'anka, Priskila ne Akwila ne man zë sane la'ak. Dekam zep enblak, “Ano nik mo gol san emki ang gwen.” Zao zep dawemkam Yesus hup denaka anakan lonblak, “Yesus Zen Zen- nësa de ngaya tabin hip de Zi niye.” Dekam zep dawemkam taïbliBlaka.

²⁷ Akaya san de song gwen hap kim dwam gwe'anka, dekam zep Efesusk de Yesussu taïbliBlan weny nenblak, “In airis.” Dekam zëwe

† **18:18 18:18** Yahudi zini kim Alapsa nen guk gweblak, “Eë asa ebe hap de syalsa gol,” dekam kim nama syal nei gwibik, nol alana man lam da gwibik. Kim su nul sone gwëk, dekam zep dalansik gwibik. Yahudi zi mo Alap hap de ol gu-guk gwëblan ola emki hlaun Bil. 6:1-21nak.

de Kristen zi hip anakare hap de suratna ale nulzimk, "Zini an amki dawemkam eirink. Zëno tawa tabinni airis." Zao kim hataka, zen dawemkam zep zë mas gwibirida gweka- men zen Alap mo kwasang-kwasang nakon Yesussu daibliblakye.

²⁸ Sap zëwe zi beya mo nwenak, Apolos Yahudi zi niban dawemkam Yesus hup dena golëkeisa-keisa gwe-gweka, hëndep man topse në gweblak. Sap Apolos zen Alap mo ëpba olak denaka dawemkam anakan klis gul gwizimki, "Yesus Zen Zen- nësa de ngaya tabin hip de Zi niye, mensa Alap orep nësa gubirida gwekaye."

19

Paulus kim Efesusk gwë gwekake:

¹ Apolos kim nama Korintusk gwë'anka, Paulus dekam zep Prigia mo langna tamun song gweka, ki zep hëndep Efesusk hataka. Zao zep Apolos mo kim de Yohanis Swe mo olsa taiblibin zini golëtoweka.

² Ki zep zë takensibiridaka, "Em kime ëei gwek, emsa wëhë Alap mo Enhona ing gwe hebiridaka?"

Ki zep ding nulblik, "Hom. Ëe homë anakan ësak, 'Alap mo Enhona ki.' ""*

³ Ki zep etan takensibiridaka, "Em banakare baptis sine ang tak?"

Ki zep ding nulblik, "Ëe Yohanis mo baptis tabin sinë ang tak."

⁴ Dekam zep gubiridaka, "Baptis ta gwibin zini Yohanis, zen mae hap baptis ta gwibirki: Zi dikim Alap hap zënaka anakan golëtrë gweblan hap, 'Ëe ama angkam hale'an.' Zen dekam man hen gubirida gweka, 'In Zen asa zertro'an zala, em Desa taibliblan.' Desa de zertrozan Zini mes hata zaka. Zëno bosena Yesus."

⁵ Kirekam kim nasalblak, dekam zep Bian Yesus mo bosekam de etan baptis tabin hip abe dak.

⁶ Paulus kim baptis tabin hyanak tahana tehabirida ineka, dekam zep

Alap mo Enhona ing gwe hebiridaka, dekam zep hen owas hap zëre mae mo tame gun srëm ola donbi'ik, hen Alap mo Enho nakore hamal hap de ola donbi'ik.

⁷ Zini in tingan san ha dua-blas enkam mes yap.

⁸ Paulus zao dan-ahare benkam gwëka, dekam Yahudi mo but srëm golak til gweka. Zao zep udobe naban Alap mo ëpba ola kore naka klis gul gwizimki- anakan dikim titi tabin hip, "Em de Yesussu taibliblankam, zen dekam esa Alap mo irik ginnik biti gwer."

⁹ Hwëna ahakon man ënol drak-drak gwek, hen Yesussu de taibliblan hap man baes tak. Hen Yesus hup de ol dawemna insa man damnak lamang nul gwek. Paulus dekam zep, men zen Yesussu daibliblak, desa en hlilin halka. Balai desa makare gola, bosena Tiranus, zao zep hwëna mwin-mwan enkam golëbiti gwe-gweka. Zao zep apdekam ola ziklis gul gweka.

¹⁰ Kirekam de golëlowehe gwenak hëndep tahunna dan-dan damank, hëndep propinsi Asiak dena ol dawemna insa kitak man ësaladak- sap Yahudi zi, hen sap Yunani zi.

Skewa Bak mo walasna kim sap dowalsa de golëalsa sonen hap ëalp gwekke:

¹¹ Alap sërkam de owas-owassa Paulus mo taha san de aren zankam gol gwizimki.

¹² Da so gwen kaenna ahaksa kaen hak maena, Paulus kim desa sap'nen towanblanda gweka, desa kim zi sang-sangnak de lonebla inen hap kap dahal gwek, dekam zep ëdawem gwe-gwek. Hen dowal mo tilblin maena, dekam zep dowala in wet so gwe-gwek.

¹³ Hwëna Yesussu de taibliblan srëm Yahudi zini dekam zep sap hen dowal-dowalsa de Bian Yesus mo bosekam golëalsa sone gwen hap

* 19:2 19:2 Kis. 2:38; Rom. 8:9

ëalp gwe-gwek. Zen man dowal-dowala insa anakan nenbirida gwek, "Paulus men zëno bosekam tonbirida gwe'arake, Yesus, zëno bosekamë emsa enbla'an: Em zini an kon wet son."

¹⁴ Men zen kirekam ëgwë gwe'ak, zen Yahudi zi mo aha mam nik mo walas tuju enkam. Mam zini in mo bosena Skewa Bak. Zen hen Yerusalemk de Alap mo golak de syal ta gwen zi mo aha mamna.

¹⁵ Hwëna dowal de tilblin zisi zep ahanaka etan nakasibli'ak, hwëna zëbon de dowala in man ding gulzimki, "Ëe Yesus ne Paulus neka kië tame oso'an. Hwëna em an enda korena?"

¹⁶ Zini men desa tilblika hetyak gwesik kinzinkam zep tahyo zaka, zao zep tangolebirki, hëndep man irkare tabirki. Dekam zep gola in kon irkan wei-wei naban heya-hya gwek.

¹⁷ Efesusk de lowehe gwen wenya kim ësak, sap Yahudi zi, sap hen Yunani zi, dekam tangan zep dawemkam ëairik. Dekam Bian Yesus mo bosena man tangan blikip neisibik.

¹⁸ Men zen Yesusu daibli'ak, dekam zep tame nuk, "O ëe namaë ol karekna lam gul gwe'an. Ëe anik kira-kla gwek." Dekam zep zi beya mo nwenak zëre mae mo karek-karekna ëkira-kla gwek.

¹⁹ Hen beyana men zen ol kareksa syal nei gwibik, dekam zep ol karek nabare ol tatakna kap da halzak. Zao zep tingare zi mo nwenak tru dasik. Ol tatakna insa kap da halzak, te-alakam de lirak tabinkim, dua meliarak maka hatak.*

²⁰ Kirekam zep ki hëndep Bian hap de ol dawemna insa esek nul haladak, hen sosonna Alap mam gul gwizimki.

Ëna Efesusk de zini kim ëilman gwekke:

²¹ Hyanak kim Paulus Yerusalem san de song gwen hap kalang gweka, zen man enlala gweka, "Makedonia hen Akaya mo lang san asa amjanbir." Man gu gweka, "Yerusalem kon asa Roma san dep song gwer."

²² Ki zep zëre mo taha tri soblan zi darena, Timotius ne Erastus neka guzimki, "Ëe an kim Asiak awe nama gwë'an, em Makedonia san em song ën- zëwe de Kristen zisi de mas eibirida gwen hap." Ki zep hëndep song ëka.

²³ In kim lwa se'ak, dekam zep zini men zen Yesus hup de ol dawem san de ang tan hap baes tak Efesusk ëilman gwek.

²⁴ Sap zëwe de zini yang gulsun we dowal bosena Artimi'i betek nei gwibirin. Efesusk zëbe hap de gol yala hen ki. Zao de zini Artimis mo nwe-masekam dowal bete-teksa yang da gwibirin, hen gol bete-teksa syal nëblanda gwenan- zao de dowal betekna insa zaun ta gwibin hip. Men zen desa syal nëblanda gwenan, te-alana mamkam nulin gwenan. † Perak nakon de yang ta gwibin syala iwe de aha mamna, bosena Demetrius.

²⁵ Zen dekam zep men zen kirek-kirena dowala in hap syal nëblanda gwenan, desa tagam gulsuku. Zao zep gubiridaka, "Wal bose wal, Artimis Bak hap de syala an nen dwan dekon am te-alana mamkam ulin gwenan.

²⁶ Hwëna angkam, ena hen mese asalblak hen hla lak- zi bosena Paulussu. Zen man tawa ta gwibi'ira, 'Zi mo yang tabin alapna, zen eiwa de alapsa hom.' Hëndep kirekam de tawa ta gwibinkim, nëbon mae onakon mes mamkam hlilin halka. Awe de en naka hom

* **19:19 19:19** "Dua meliarak" awe, Lukas man ale gulku "lima-pulu ribu perakkam de te-ala kaso" kam. Aha-ere perakkam de te-ala kasona dekam, zen mae mo kim: Aha-ere zi mo gaji aha-ere yakla blalkam de syal gwenna. † **19:24 19:24** Mae hap dekon te-alana mamkam nulin gwek, sap zini man zëbon mae onakon dowal bete-teksa insa hëndep gol zeban zëre mae mo golak de lonen hap kap da gwek. Sap zen man we dowala insa blikip neisik gwibik, hen man tim nul gwek, "Desa de ëre mo golak lonenkan, ëe asa dawemsa hlalul gwer."

kirekam hlil in'ira, hwëna tîngare Asia mo langnak denaka.

²⁷ Zen de kirekam kitak sul sone'anka, nëno mae mo syala an dekam sa gutu gwer. Dekam hen Artimis Bak mo gol yawala ansa anakan sa enlala nëblal, 'An boton alap mo gol.' Hwëna angkam sap teipsin alapna Artimissi man betek nei gwibi'in- tîngare Asia mo langnak de zini hen tîngare okamanak de zi niye. Hwëna zini in mo tawa tabin nikon, zëno bose dawemsa kim karek gu'ura."

²⁸ Kirekam de torannak kim sane da'ak, dekam zep sêrkam êjal gwek. Dekam zep ol mamkam êtaken gwe'ak, "Nëno mae mo alapna Artimis zen teipsin tanganna!"

²⁹ Dekam zep hêndep ëna iwe de zini kitak ëilman gwek. Gayus ne Aristarkus neka dekam zep balk nosok- men zen Makedonia kon Paulussu ang ëbla zakaye. Ki zep hêndep ëna iwe de tagal gwe-gwen gol yawal san dep apdekam hlu-hluk gwenkam il nosohak.

³⁰ Paulus zi tra mo nwenak de tonbiridan hap sap dwam gwe'anka, hwëna Yesussu de taïbliblan wenyik jalse në gwebla'ak, "Bahem! Emsa sa zë dal."

³¹ Langna iwe de teipsin-teipsin zini, ahakon mes Paulus hun nêrdokot gwek. In zep hen nen soneblak, "Ëe ama emsa en sonebla'an: Em bahem êtagal gwe-gwen gola iwe hatan."

³² Ahakon tame gun srêmkam ol êkwahen san enkam hlu-hluk gwe-gwe'anzak. Ahakon aha jal hil gin hip ênop-nop gwe'ak, hen eiha nakon aha jal hil gin hip ênop-nop gwe'ak. Hêndep zi beyana in zao hom zënaka tame nuk, "Ëe an kire habë tagam gwer."

³³ Yahudi zini man zë hen ëdurum gwe hezak. Zen dekam zep zëno mae mo mamna Aleksander Baksa ngein sin nëblak. Dekam zep zi tra ngirin nikon ahakore nik daken gwebla'ak. San ha anakan mes yap daken gwebla'ak, "Emki anakan

gubiridan, 'Bahem Yahudi zini asa jal gwibiridan. Diki Paulussu em karek tan- hêndep zëbon de ang ta gwen wenyu ban!' " Dekam zep sap tahakam dekam de balk tasin hip akabiridaka.

³⁴ Hwëna zen hom ola gubiridaka, sap zëwe de zini mes anakan tame da'ak, "An Artimi'i de betek gwibin zisi hom. An Yahudi wal!" Dekam zep apde ennak ol mamkam êtaken gwe'ak, "Nëno mae mo alapna Artimis, zen teipsin tanganna! Nëno mae mo alapna Artimis zen teipsin tanganna!" Kirekam de êtaken gwennak hêndep yakla nwena dandan damank.

³⁵ Ëna iwe de teipsinni ahana dekam zep luweka, ki zep tahakam dekam de balk tasin hip akabiridaka. Ki zep zë gubiridaka, "Efesusk de zi, em ba habe kirekam ëna tal? Sap tîngare okamanak de zini mes anakan tame nuk, 'Efesusk de zini, zen teipsin alapna Artimi'i zao gol yawalak kara nul gwenan- Artimis mo nwe-mase nabare kasona men zao ngli nakon zan zakye.'

³⁶ Kirekam dena zini bëjen anakan gulsun, 'In boton.' Zep kirekam de lwanna, em ba habe ëilman gwe song gwer? Zep bahem banakare maena jala ban syal gwibin.

³⁷ Zini an em waba tol habe balk oso halzal. Zen hom nëno mae mo alap mo golak banakare maena sowëkam olka, hen hom mae lamang ulki.

³⁸ Demitrius Bak de syal bose zeban zisi jal gwibiridanna, zen kiresa de tap gun hup de zini kike- mensa Romak de teipsinni nëbe mae hap dam tasibir-zimki, zëno mae mo nwenak de taken-taken gwibirida gwen hapye. Zen zao emaka olsong gwe'an.

³⁹ Aha jal mae de nama lwazindinni, zen diki nëno mae mo nolik de nësa tagam gunkum bap- zao de tap gulsun hupye.

⁴⁰ Sap an zen ki namen jower, jana nabare zini maka nësa anakare hap

karek dabi'in, 'Em ba habe kirekam eïlman gwer?' Hwëna zen de nësa takensibiridankam, molye anakan ding ulinam, 'Eë kire habë eïlman gwer.' "

⁴¹ Kirekam kim tonbiridaka, ki zep sekwak gwen hap gubiridaka. Dekam zep hëndep sekwak gwek.

20

Paulus kim Makedoniak hen Akayak de Kristen zini amjanbirkike:

¹ In kim eïlman gwesik, Paulus dekam zep Yesussu de taïblïblan wenyaka tagal gulsuku. Zao zep aumwa hap de ol zim-zïmnï golzimki. Zëna dekam zep Makedonia mo lang san dep song gweka.

² Holokam zep Makedonia mo lang san tën daka- zëna men desan Alap mo ol dawemkam tawa tabirida gwekake. Zen etan desan ol zim-zïmkim Kristen zisi tatete tabirida gweka, hëndep Korintus mo langna Akayak hataka. Langna in aha bosena Yunani.

³ Zao dan-ahare benkam gwëka. Siria mo lang san de bulkum song gwen hap kim hohle gwe'anka, ki zep hwëna nenbla'ak, "Yahudi zini man emsa tan hap ora nakon dil gïbli'an." Dekam zep enlala gweka, "Tanakam asa etan Makedonia san dep lwahal."

⁴⁻⁵ Hwëna dekam zini mes jemat-jemat nakon tuju enkam dam dasibik- zen de Siria hen Yerusalem san ang gweblan hap. Eë, Lukas, Paulus hun zebë tanakam Makedonia san song ëk. Tujukam de zini in, zen en bulkum asa nangirzimk- Troask de hwëna olëgaing gwen hap. Zëno mae mo bosem-sena-

ëna Bereya walya Pirus mo tanena
Sopater,
Tesalonika wal darena, Aristarkus
hun Sekundus hun,
Derbe walya Gayus,
hen Timotius,
hen Asia mo lang nakore zi darena,
Tikikus hun Trofimus hun.

⁶ Yahudi mo minggu yala kim tamank, rotisa dikim ragi srëmkam

taïblin gïl gwen hap dena, dekam zebë Pilipi kon buluk Troas san dep ang ëk. Bulkum de song ëna, yaklana aha-ere taha-tapakam, ki zebë Troask olëgaing gwek. Zao aha-ere minggukam zebë olëlowehék.

Paulus kim aumwa hap Troask ol zim-zïmnï hli yulzimkike:

⁷ Minggu mo kam, dekam zep Yesussu de taïblïblan wenyaka tagal gwek- Yesus mo timsi dikim enlala gwibin hip de rotisa dikim twinbin hip, hen zep de anggur hosa dikim otdebin hip. Eë Lukas ama hen ang gwek. Paulus dekam mam blalkam tonbiridaka, hëndep zao zep ngirin tatem gwek. Sap zen man ka'an de hli yuludan hap kalang gwe'anka.

⁸ Gulk de teksonna men zaoë tagal gwek, syauk ngatanna beyana.

⁹ Gola in, zëno klibuna danahan. Aumwa hap de klibuna, zen zaoë tagal gwehak. Wal seiwiri bosena Yutekus, zen jendela tahanak nikinki. Paulus kim tonbirida tine'anka, wal seiwiri in zao zep hëndep ta guk halka. Kim kon balep gwesiki, dekam zep kon kama san dep zan tineka. Kim zë neir ine'ak, anakan zep hla da'ak, "Mes tili."

¹⁰ Paulus kim ati gweka, zao zep nabakam bik dan tahannak glang gwebla ineka, hëndep kyang-kyang tasiki. Ki zep gubiridaka, "Bahem enlalana ëdowe hanan. Zëno angna mes etan lwabla halan zala!"

¹¹ Ki zep etan golësesek gweka. Zao zep Yesussu de enlala gweblan hap de rotina insa zitwenblaka, hen kire hap de anggur hona ziotdebirki. Zao kim etan ola zitonbirki, zao zep hëndep golëhleng gwek. Kaknak zep hwëna Paulus zëre hon de ang ta gwen wenyaka aban mae golësek gweka.

¹² Zëwe de zini in ki zep wal seiwiri insa gol san dep nga-ngolaban nërsong gwek- anakare hap, "Zen mes ngaya gwera!"

Paulus kim aumwa hap ola Efesusk de Kristen zi mo mam-mam wenyä kip hli yulzimkike:

¹³ Ëe hen Lukas Troas kon bulkumë Paulussu angirblik- Asos kon de ësblan hap. Ëe mesë ola kirekam aha-en uk, sap Paulus man Asos san tanakam de song gwen hap dwam gwe'anka.

¹⁴ Kimë ëna Asos kon bulkum eirink, dekam zebë hwëna Mitilene san dep sek gwek. Ëna in lang tekna Lesbosnak.

¹⁵ Ka'ankam zebë kon hwëna lang tekna Kiossa lamank. Zëno ka'ankam zebë hwëna lang tekna Samos san dep tablan gwe kinik. Zao de yaklanak, ki zebë hëndep Efesus mo golek denak de ëna Miletusk yaing gwek.

¹⁶ Paulus mes ki Efesu'u de talaran hap kalang gweka, sap zen man nabakam de Yerusalemk hatan hap dwam gweka. Sap zen man enlala gwe'anka, "Ëe wëhë Pentakostana jap so'ak?" In zep Asia mo lang san de ëgweisik song gwen hap baes gweka.

¹⁷ Miletus kon zep Efesusk de Kristen zi mo nol-nola gu sonebiridaken de yaing gwezan hap.

¹⁸ Kim yaing gwezak, zao zep aumwa hap de ola anakan gubiridaka, "Aya-wal oso-wal, ena tawana: Ëe kimë Asia mo langna awe emsa golëlowehe gwek, nonol hata zankam hëndep angkam,

¹⁹ ëe Alap hon de babu gwen zi mo kimë syal gwe-gwek- enlala betekkam hen nwe go-ho naban. Ëe karekna mam nakaë goltowe gwek- Yahudi zini kim sap tan hap asa dil gik gweblak. Hwëna ëe homë kim golzausuk.

²⁰ Ena tawana: Ëe anakan de titik gwibin enlala naban homë emsa tawa ta gwibik, 'Ansa babë tawa tabin. Aha zi sa husus neibir.' Hwëna ëe mensa ena dwam ei gwibik, Kristus hon dikim ëtal gwesin hip dena, ëe desa sul so-

nenkamë zi tra mo inik emsa tawa ta gwibik- hen gol-gol san.

²¹ Sap Yahudi zi, sap Yunani zi, ëe damnakë tonbirida gwek- zen dikim ëhalen hap, hen Alap osan dep dikim lwanda halzan hap, hen zen dikim Bian Yesussu taibliblan hap.

²² "Hwëna angkam, Alap mo Enhona man asa titi ta'ara- ëe dikim Yerusalem san song gwen hap. Hen ëe homë tame gu'un, 'Basa wëhë zë goltowe'ak?'

²³ Hwëna Alap mo Enhona aha-en mes ap anakan goltrëblaka, 'Ëna men zëwe em hata gwe'anka, zao bwinak sa emsa se dyain gwer, hen kareksa esa zë goltowe gwer.'

²⁴ Hwëna ëe ëre mo gwënsa de langa gulsun hup homë enlala gwe'an. Hwëna diki abe hap insa Bian Yesu syala we yul soneblakake, desa de sul sonen habë tangan dwam gwe'an. Ano syala in zen: Tingare zisi de titi ta gwibin hip, zen dikim Alap mo kwasang hap de ol dawem san ang ta gwen hap denaye.

²⁵ "Angkam ëe tawana: Ëe men desaë Alap mo irik gin hip dena emsa tonbirida gwek, em molye etan asa hla lak.

²⁶ In zebë emsa gubirida'an: Alap molya eno mae mo kala abe hap ngëro gulbluka.

²⁷ Sap ëe homë ëre mo tawa tabinni wet gulsuk gwek- em dikim asa husus gweblan srëm hap. Ëe hwëna Alap mo dwam gwibin en san dena kimë sowe henkam emsa tawa ta gwibik.

²⁸ Dawem enkam enaka kara la gwibik- tatete enkam eka ëzauk gwek. Sap Alap mo Enhona mes emsa dam tasibirki- dekam de Yesussu de taibliblan wenyä insa taizi gwibin hipye. Zep desa dawem enkam kara la gwibik. Em in men kiye- zahosa de kara ta gwibin zini. Eno mae mo zahona in, zen Alap mo

* 20:28 20:28 1Tim. 4:16; 1Ptr. 5:2-4

hlil irin wenya- men desa Tane Zem Yesus mo kalkam lup gul inkike.*

²⁹ Ëe tawana: Ano tim bwanak tësen lwa jal-jala sa bitì gwezal- eno mae mo zahona insa de tamerazan hapye.

³⁰ Ere mae onakon sa hen ëjower-dekam de eiwa de ol aisilì insa men-man gun hup de ziniye, dekam de hwëna zisi zëre mae mo bosesa dikim mam gun hup hlil inhal gwen hap.

³¹ Zen in zep terya-tyakam lowehe gwek. Emki ëenlala gwe-gwen: Ëe dan-ahare tahunkamë nwe go-ho naban emsa titì tabir tine gwek-yaklam denaban kam denaban.

³² "Angkam ëe Alap zëre mo tahanakë emsa tapbla gulun! Alap zëre mo kwasang-kwasang hap de ol dawemna in, zen desa en em enlala gwe-gwibin. Desan de ang ta gwenkam zen dekam esa ëtatete gwer, hen dekam esa ulin- Alap mensa tìngare lalak wenya nèbe mae hap hamal gulzimkiye.

³³ Ëe homë zi mo kire-kire dawemna hole-hle gwe-gwibik- sap te-ala, sap hen pakean maekam denaye.

³⁴ Ena tawana: Ëe ëre mo tahakamë ëre mo tahalha hap syal gwe-gwek- hen abon de ang ta gwen wenyik mo tahalha hapye.

³⁵ Tìngare ano syala in, zen ërak makanë ebe mae hap ënaka anakan drëne gwizimk, 'A kirekam nen soston srëm zisi mas gwibirida gwen.' Sap ëe Bian Yesus mo olsaë anakan enlala gwe-gwibik, 'Isrip-sri gwibin tanganna, em em zi hip gol gwizimdin.

Zen de ebe hap gol gweblankam, zen isrip-sri gwibin tangan naka hom.' " *

³⁶ Kim tonsubiridaka, ki zep boklana golëkom taka, ki zep Alapsa zigu soneblaka.

³⁷ Aumwa hap sërkam zep go naban babang da gwe'ak.

³⁸ Zen mae hap gona dablak: Sap zen man gubiridaka, "Em molye etan asa hla lak." Hëndep ki zep bul sun dep zon dak.

21

Paulus kim Yerusalem san dep song gwekake:

¹ Ëe kimë Paulus mae han eire tangan naka ënaka lapblal-birinhak, ëe dekam zebë bulkum dam-dam enkam lang tekna Kos san dep sek gwek. Ka'ankam zebë hwëna lang tekna Rodosk yaing gwek, dekon zebë etan bulu inkam ëna Patara san dep sek gwek.

² Zao zebë hwëna langna Penisia san dep de bulu oltowek. Ëe zao zebë hwëna sesek gwesek. Dekon kimë sek gwek,

³ dekam zebë irgwa taha san dekam lang tekna Sipru'u hla lain guk kinik. Ëe dekam zebë Siria san dep taman gwek. Hwëna ëna Tiruskë atiti gwek, sap bulu in zaoë ang tak, zëwe dep de kire-kirena hen man- desa de zë teiswesik gik kinin hap.

⁴ Ëna zëwe de Yesussu taibliblan zi niban kimë olëgaing gwek, dekam zebë deban mae aha-ere minggukam zëwe lowehék. Zen dekam zep Alap mo Enho mo sostonkam hamal hap de ola Paulus hup ayang nulblik, "Yerusalem san bahem song gwen."

⁵ Hwëna dekon de etan sek gwen hap denak kim hatak, ki zebë kon hëndep sek gwek. Tìngare zao de Yesussu taibliblan wenya hëndep we wal walas zeban bul sun dep asa ap nul sonendak. Dekam zebë hi alpnak aumwa hap boklana kom lak, dekon zebë Biansa en soneblak.

⁶ Aumwa hap kimë zë ënaka babang labik, ëe ki zebë hëndep buluk sesek gwesek. Zen hen dekam zep gol san dep lwan dahak.

* **20:35 20:35** Yesus mo ola in aha bukunak hom ale nuk. Hwëna enlalana man Mat. 10:8b naban engka en apde në'an. Ahaksa san ha Luk. 14:12-14sa enlala gwibiriki?

7 Ëe kimë dekon sek gwek, dekam zebë ëna Tolemas yaïng gwek. Zao kimë Yesussu de taïbliþlan wenya ban ënaka tame labik, ki zep asa gol san dep kwang nulidahak. Orapna aha-en zebë zë truwek.

8 Ka'ankam kimë kon sek gwek, dekam zebë Kaesareak yaïng gwek. Zao Pilipus mo golak zebë lowehék. Pilipus in, zen Yesus hup de ol dawemsa de tawa ta gwibin zi. Zen ahana- Yerusalemk mensa tuju enkam Kristen zi mo tahasa de tri so gwizimdin hip dam dasibikke.*

9 Wenam sei-siwir zem dan-nër dan-nërkam. Hwëna Alap mo Enhona mes zëbe mae hap sosonna golzimki- hamal hap de olsa dikim ayang gul gwizimdin hip denaye.

10 Zao kimë lowe he'ak, ki zep Yerusalem mo lang nakon zini hata zaka, bosena Agabus. Zëbe hap hen Alap mo Enhona mes sosonna golblaka- hamal hap de olsa dikim ayang gul gwizimdin hip dena.*

11 Zen ki zep Paulus hun asa golek de so zaka, ki zep Paulus mo takna golka, dekam zep zëre mo taha-tanana tahalebirki. Ki zep asa gubiridaka, "Alap mo Enhona man gunda, "Tak bina ansa kirekam sa Yerusalemk de Yahudi zini dahaler, ki sa Yahudi srëm zi hip tapbla dazim.' "

12 Kirekam kimë asalþlak, ëe ki zebë zëwe de zi niban Paulussu en gwebla'ak, "Bahem Yerusalem san song gwen."

13 Hwëna zen man asa ding gulzimki, "Em ba habe nwe gohokam ano enlalana ap dowe hanan labla'an? Ëe tahalen en hap homë hohle gwe'an, hwëna Bian Yesus mo bose hap de Yerusalemk tin hïbë hen hohle gwe'an."

14 Ëe kimë anakan tame uk, "Nen molye zëno enlalana wet yasïblik," dekam zebë ëguk, "Dikire Bian Alap mo dwam gwibin sin lwak."

15 Ki zebë ëototo gwek, hëndep ki zebë Yerusalem san sek gwek.

16 Kaesarea kore Kristen zini hen man asa ang neibiridak, hëndep Manason mo golak yaïng gwek-men zëbon de lowehen hap ëkalang gwekke. Manason in Siprus wal. Zen men zen nonol tanganna Yesussu daïbliþlakke, zëno mae mo ahana.

Paulus kim Yakobus osan dep song gwekake:

17 Yerusalemk kimë yaïng gwek, zëwe Yesussu de taïbliþlan zini dawemkam asa lup nulink.

18 Ka'ankam ki zep Paulus asa Yakobus osan dep golësek gweka.* Zëwe dekam mes hen Kristen zi mo nol-nola tagal gwesik.

19 Zëwe kim Paulus dawemkam golëgaïng gweka, dekam zep kitak aïsîl gwibiridaka- mensa Yahudi srëm zi mo lang san de tën dan-nak Alap zëno syala soson gul gweblakaye.

20 Kim ësane gwe'ak, dekam zep Alap mo bosena teip nulsuk gwebla'ak. Ki zep Paulussu nenþlak, "Aya Bak, ena mese tame gulku: Yahudi zini hen mes ribu-ribukam Yesussu daïbliþlak, hen zen nama Musa mo titi tabin ol san enlala zon tasïnkim ang ta gwe'an.

21 Hwëna angkam zen mes boton ola anakan ësak, 'Paulus zen Yahudi zini, men zen Yahudi srëm zi mo lang san lowe henda gwe'an, desa anakan tawa ta gwibi'ira, "Musa mo titi tabin olsa emki tapbla gun." ' Hen anakan mes eno tawa tabinni ësak, 'Walas tane-ne mo to mipna bahem blom tasik gwibin, hen Yahudi mo ëpba lowe hensa emki baes gwibin.'

22 Zep nen banakan esa ebe hap dena syal eibir? Sap zen sa anakan ësal, 'Paulus angkam mes hata zala.'

23 Ano mae mo ol san emki ang gwen- zëno mae mo enlalasa dikim së ta sonezimdin hipye. Abon mae onakon zini dan-nër dan-nërkam.

* 21:8 21:8 Kis. 6:5; 8:5 * 21:10 21:10 Kis. 11:28 * 21:18 21:18 Yakobus in, zen Yesus mo oso. Zen Yerusalemk Kristen zisi nol gwibiridaka.

Zen mes ki Alapsa anakan nen gubluk, 'Ee kirekam de syalsaë eno bose hap o'an.' Syala desa zen hen mes su nul sonek.

²⁴ Emki depan mae Alap mo gol san golësek gwen. Ere mo te-alakam emki desa hen mas gwibiridan. Zao Alap mo golak emki te-alana insa ing ta sonen- Alap hap de syal sul sonen hap de te-alana insaye, ere hap hen zëbe mae hap. Kire hwëna emsa hokam hlë dabiridak,[†] ki nola zitalansibir. Zen dekam sa tingare zini anakan emsa tame dal, 'In man ki ahap nëblak. Paulus an nama Musa mo titi tabin ol san ang gwegwenda.'

²⁵ Hwëna ena tawana: Nen mese Yahudi srëm Kristen zi hip suratna ale ulzimk- dekam de yang tabin dowal hap de otweran blom tabir-zimdinsi baes tan hap denaye,

hen otweran kal otdebinsi, hen hole naka de blwap-blwap tan tweran ninsi de twin gwibinsi, hen kahalo-kahalosa."*

²⁶ Ka'ankam ki zep Paulus Alap mo gol san golësek gweka, dekam zep Alap mo golak de syal gwegwen zi ahanik hokam hlë tabiridaka. Ki zep zao ahakore zëwe de syal tan zisi gubiridaka, "Ano mae mo Alapsa de golek de tan hap de mingguna yaklana dekam sa tap gwer. Dekam asa otweranna zilup gul halzal- em de Alap hap desa tru ta seblan hapye."*

Paulussu kim Alap mo golak balk dakke:

²⁷ Mingguna in mo yaklana kim tap gwen hap golek de gwe'ak, dekam zep Asia kore Yahudi zi Paulussu Alap mo golak hla da'ak. Zen zep zë hëndep irik dasizik, hen tingare zi trana in mo enlalasa anakare olkam ben dyasizimk,

²⁸ "Israelk de zi, zini ansa nen karek tan! Zini an zen tingare lang san anakan yasik tabirida gwenda, 'Musa mo titi tabin ol san bahem ang tan. Yahudi zi mo lowe henna zen karekna, hen Yerusalemk de Alap mo gola in waba hap.' Zen hen mes Alap mo gol dawemna ansa kun gulku- Yahudi srëm Yunani kore zini kim golëbiti gwe zakake."

²⁹ Zen kun gun hup dena in mae hap ki eguk: Sap zen mes zën hla dak- Efesus walya Trofimius Bak han de ëna iwe lë naserannak. Zep kil dik, "Zen mes Alap mo golak awe zertil zika." Hwëna sap hom.

³⁰ Dekam zep hëndep Yerusalemk de zini kitak eilman gwe song gwek. Zini dekam zep beyakam ehluhluk gwezak. Dekam zep hëndep Paulussu Alap mo gola in kon il dihak. Lilikinni ki zep nasohlasik.

³¹ Tan hap kim sap nemë'ak, ki zep hwëna ola nabakam Roma mo jana nabare zi mo mamnak anakan nol hatak, "Tingare ëna awe de zini man eilman gwe'an!"

³² Dekam zep nabakam zëre mo irgwa taha nakore naban golëhluk gwe zaka- ahakon bose nabarena, hen sap kire srëm wenya ban. Zi trana in kim hla nulida guk, dekam zep Paulussu tangolenna nërzausuk.

³³ Jana nabare nik mo mamna in dekam zep zëre mo jana nabare zini insa gubiridaka- Paulussu de besi dokotkam eiha-taha eiha-tahakam darak tablan hap. Ki zep hwëna zini insa takensibiridaka, "Zini an nara? Banakan karek gwer?"

³⁴ Zi trana in hwëna ahakon srën jal olkam ding nulblik. Ahakon hen srën ding nulblik. Sap kirekam de eilman gwennak bëjen eiwa dena dam gulsun, in zep jana nabare zini

[†] 21:24 21:24 Yahudi zini hen ki su tabiridan makan Alap mo golak syal nei gwibik- dekam de Alap mo nwenak engan gwehen hap. (Bil. 6:13-21) * 21:25 21:25 Kis. 15:29 * 21:26 21:26 1Kor. 9:20 ‡ 21:30 21:30 Anakare enlala naban mes yap nasohlasik, "Paulus mo kal de desan bles-bles gwenkam, ki sa gola an kun gwer."

in mo mamna Paulussu de zère mae mo gol san zerhan hap gubiridaka.

³⁵ Tembokkam de blaberek kim nêrhatak, zao zep men zen tan hap sosen nêbla'ak deban mae êngiltitik gwe'ak, hêndep zao zep tan hap alp dasi'ik. Hwëna jana nabare zini in zep gulk kon nabakam neir inehak.

³⁶ Zi trana in zen sap tan hap dëra nêbla ha'anzak, dekam zep ênop-nop gwe se'ak, "In em tan! Bahem zë lam tan!"

Paulus kim zi trana insa tonbiri-dakake:

³⁷ Gol mwanak de zertin hip kim nêrgolek de gwe'ak, Paulus ki zep mam zini insa Yunani olkam gubluka, "Ëe wêhë eban ola lon'ak?"

Ki zep ding gulbluka, "Em hare Yunani ola tawa nakake!"

³⁸ Em san ki Mesir walya insa hom yap?- men zen nêr hom golëilman gwenkam empat ribukam de zini sasa lang san dep golëheya-hya gwekake."

³⁹ Ki zep ding gulbluka, "Ëe sap Yahudi wal. Hwëna ano auyan-azana ë yala Tarsus sun al tak. Zep ëe hen Roma mo propinsina Kilikia wal. Ëe wêhë ëre kore naka tonbirida'ak?"

⁴⁰ Ki zep ding gulbluka, "Sap esa." Paulus ki zep tembokkam de blabera in kon dekam de balk tasin hip tahakam akabiridaka, ki zep hwëna Ibrani olkam tonbiridaka,

22

¹ "Aya-wal oso-wal, hen bi-walkam dena, ëe anik emsa ëre mo timsi dikim golsriwen hap denaka tonbiridak."

² Zen kim anakan sane da'ak, "Zen nêre mae mo olkam am nêsa tonbirida'ara," dekam zep tangan balk tasik.

Zao zep tonbiridaka,

³ "Ëe an Yahudi wal. Asa anyan Kilikia mo langna Tarsusk jaha gwek. Hwëna ëe aweë mam gwek. Ëe zebë Farisi walya Gamaliel Bak hon tawa gwek- kire enkam de nêno mae mo auyan-aza mo titi tabin ol san

ang gwe-gwen hap denaye. Ëe hen ama dawem tangankam de Alapsa betek gweblan hap alp gwe-gwek-ena in kirekam hen angkam lowehe gwe'anke.

⁴ Yesus hup de tawa tabin sin men zen ang ta gwek, ëe zebë desa karek ta gwibik, hen bwinak sesek gulin gwek- sap we, sap zi. Hen ahakon tameran habë golëgu gwek.

⁵ Alap mo golak de teipsinni hen tingare Yahudi mo teipsin sinode-nak dena, debarenak maka emsa nenbirida'an, 'In eiwa. Hom boton gwe'ara.' Sap zen zen abe hap suratna nolblak- desa de Damsik mo but srëm golak de mam-mam wenyä kip goltreizimdin hipye. Zen sap dekam de Yesussu de taibliblan zisi an san dep tahyo halzan hap- awe de hwëna karek tabin hip.

⁶ "Yakla bolak denaban kimë Damsik golek de gwe'ak, mumuk ennak zep ngli nakore sêrkam de ngatanna asa wale tazak.

⁷ Dekam zebë kamanak zank. Dekon zebë ola salsek, 'Saulus, Saulus, em ba habe Asa karek ta gwe'ara?'

⁸ "Ki zebë ding guk, 'Bian, em nara?'

"Dekam zep ano ola insa ding gulku, 'Ëe an Nazaret walya Yesus- insa em karek ta gwe'arake.'

⁹ Mensaë golëtë'ak, zen ngatan enna insa man hla nuk. Hwëna ola in desa asa tonbla'anaka, zen hom anakan tame nuk, 'Kirekam tonblala.'

¹⁰ "Ki zebë taken seblak, 'Bian, ëe basa asa syal gwibir?'

"Ki zep asa ding gulbluka, 'Em luwen, ki hêndep Damsik hatana. Zen zao asa emsa gublul- syla mensaë ep wei yul sonebla'anye.'

¹¹ "Dekon zep asa Damsik sin dep irik da song gwek, sap ano nwena mes dawemkam de ngatanna in hap dîmin nêk.

¹² Zini bosena Ananias zen zep asa duwebla zaka. Zini in enho zon tasiblinkam Musa mo titi tabin ol san ang gwe-gweka, hen tingare

Damsik de Yahudi zini man blikip neisik gweblak.

13 Zen ano alp nakon zau'un zaka, dekon zep asa gubluka, 'Ano oso Saulus, emki etan kara gwen!' Hëndep ki zebë zini insa hla tak.

14 "Ki zep asa gubluka, 'Nëno mae mo auyan-aza mo Alapna mes emsa dam tasiki- dekam de zëno dwam gwibin sin denaka tawa gwibin hip, hen dekam de zëre mo zer sonen lalak Zini insa hla tan hap, hen zëno ol-gunsu de salblan hapye.

15 Mensa ena oranak hlaul zuka hen sane gweka, desa esa tingare zi hip golzim halada gwerâ.

16 Zep angkam em basae etan eissibi'ira? Em luwen. Èe asa emsa baptis tal, hen em kime Alapsa Yesus mo bosekam abe ta'anka, Zen dekam sa eno karek-karekna ep ngan gulsublula.'

17 "Dekon kimë etan an san dep lwa halzak, dekam kimë Alap mo gola kon gu sonebla'ak, dekam zep ano nwenâ ap lirisin nëblak.

18 Bian Yesussuë hla tak. Man asa gubluka, 'Nabakam! Angkam hëndep Yerusalemâ hli ta. Sap awe de Asa taïbliBlan srëm zini an molya eno abe hap de aïsîli dokwak nuk.'

19 "Ki zebë ding gulbluk, 'Bian, awe de zini an mes-am asa tawa nëblak: Èe ama but srëm gol-gol san song gwe-gwek- dekam de Emsa de taïbliBlan zisi tangole gwibin hip, hen bwi san dep tahyohal gwen hap.

20 Hen Stepanu'u kim ere mo bose hap de jal hap dak, èe hen dekam ama anakan ola mas guk, "Em ema sam lanan." Hen men zen da'ak, zëno mae mo tahan bajuna ëyë teirensizim'ik. Zep Bian, Emsa de taïbliBlan srëm wenya sa ano ola dokwak nul.'

21 "Ki zep Bian asa ding gulbluka, 'Molya. Em song gwen. Sap Èyë emsa Yahudi srëm zi mo lang san dep zer sone'an- zëwe de zisi de tawa tabir song gwen hap.' "

22 Nongka sap dawemkam sane da'ak, hwëna anakan kim guku,

"Yahudi srëm zisi ekakim tawa tabir song gwe," dekam zep ol alhapkam ëgu inek, "Zini an okamana an kon emki jek-jak tan! Zen de gwën hap hom dakasti'ira!"

23 In kim ol nop-nopkam ëgu anek, dekam zep hëndep zëre mae mo tahan bajuna dalwesi'ik- kasokam dikim i tïblan hap. Ahakon sonsa gulk sun yal dase gwebla'ak.

24 Dekam zep jana nabare zi mo mamna in Paulussu de zëre mae mo gol mwa san zertin hip gubiridaka-zao de dawemkam tangolen naban taken-taken gweblan hap, mae hap, "Zen ba hap kire tangankam emsa jal nëbla'an?"

25 Hwëna kim kire naka de tangolen hap dahale'ak, Paulus dekam zep Yunani olkam jana nabare zi mo mamna in mo irgwa taha nakore naka takensiblika, "San ha dawemna?- em de Roma mo irik ginnik de zisi takensiblin srëmkam tangolen naye."

26 Kirekam kim salblaka, dekam zep mam zem insa gublu hanaka, "Em basae go'ara? Zini an Roma mo irik gin nikore nakake."

27 Mam zem in ki zep song gwe zaka, zao zep takensibli zaka, "Emki asa gublun: Em san ha eiwa Roma mo irik gin nikorena?"

Ki zep ding gulbluka, "In eiwa."

28 Dekam ki zep etan ding gulbluka, "Em an sap Roma mo irik ginnik de zisi hom yap. Hwëna Roma mo irik ginnik de syal ta gwen zi hip mes yabe te-alasa mamkam golzimki- dekam de Roma mo irik ginnik de tin hip de suratsa ebe hap golblan hap."

Paulus ki zep hwëna ding gulbluka, "Kirekam hom. Ano bian swena hen Roma mo irik ginnik denakake."

29 Men zen sap taken-taken gweblan hap golek de da'anzak, dekam zep nabakam sekwak gwek. Hen mam zini in zëna dekam zep aïri'anka, sap zen mes gubiridaka-

Roma mo ïrik ginnik de zisi de totoresâ tahalen hap. *

Paulussu kim Yahudi mo teipsin sinodenak nêrtrêkke:

³⁰ Ka'ankam ki zep jana nabare zi mo mamna in dekam de anakan tawa gweblan hap dwam gwe'anka, "Yahudi zini in ba hap Paulussu de tan hap asas nêbla'an?" Dekam zep gubiridaka- Alap mo golak de syal tan zi mo mam-mamna hen Yahudi zi mo teipsin sinodenak denaka de tagal gulsun hup- zen de hwêna taken-taken gweblan hap. Desan dep zep Paulussu tahalen srêm naka zerhal zaka.

23

¹ Paulus ki zep teipsin sinodenak dena insa karatda tabirki, ki zep gubiridaka, "Aya-wal oso-wal, êe enho kles gwesin srêmkamê Alap mo dwam gwibin sin syal gwe-gwek- hêndep namen de yaklana awe."

² Alap mo golak de teipsin zini Ananias Bak kim kirekam de toran-nak salblaka, dekam zep Paulus mo alp nakon men zen êzau'uk desa mip naka de lwa soblan hap gubiridaka. Dekam zep ahanik mipna lwa soblaka.*

³ Paulus ki zep gubluka, "Alap sa hen emsa mip naka lwa tala! Zi mo nwenak em dawemna, hwêna eno enhona karekna. Em insa iwe nikin'ira- ano kareksa de dekon anakan teibin hip, 'Zen kirekam mo Musa mo titi tabin olsa gulmunku,' hwêna ena hen ema gulmun nura-asa de karek gwen srêmna lek tyan hap insa gubiridandaye."

⁴ Men zen zêno alp nakon êzau'uk, ki zep ding nulblik, "Em in Alap mo golak de teipsin zisie lamang ta'ara!"

⁵ Paulus ki zep ding gulzimki, "Aya-wal oso-wal, êe homê anakan

tame tal, 'Zen zen- Alap mo golak de teipsin niye.' Sap Alap mo olak Musa man titi tabirki, 'Ere mae mo teipsin-teipsinni bahem lamang ta gwibin.' "*"

⁶ Paulus kim zê anakan tame tabirki, "An ahakon Farisi hon de bitî gwen zi, hen ahakon Saduki hon de bitî gwen zi," dekam zep ol mamkam gubiridaka, "Aya-wal oso-wal, êe an hen Farisi wal. Ano bianna hen Farisi wal. Asa an mae habe namen taken-taken êbla'an: Sap êe ama anakan taïblik, 'Zini tin nikon ngaya gwenkam.' "

⁷ Kirekam kim nasalblak, ki zep zê zên êol gwe'ak. Dekam zep êkles gwek. Farisi srên tewehak, Saduki hen srên tewehak.

⁸ Zen mae hap êkles gwek: Sap Saduki zini man êenlala gwek, "Zini bêjen tin nikon etan ngaya gwen.

Alap mo dam taha nakore zini hen hom.

Zi mo angna hen hom."

Hwêna Farisikam de gubirida gwen zini, zen man anakan êtaïblik, "Ki."

⁹ Zao zep sêrkam êol-tetek gwek. Dekam zep Musa mo olsa de tawa ta gwibin Farisikam de zini ahakore nik êzauk. Zen zep ol mamkam ahakore wenyik mo olsa anakare olkam nablonsuzimk, "Êe homê zini an mo karekna hla kulbli'an! San ha diki zi-au ahaksa Alap mo dam taha nakore zi mes yap aïsîl gweblaka? Kirekam de lwankam, ki bana hom."

¹⁰ Sêrkam tangan kim ênop-nop gwe'ak, jana nabare zi mo mamna in dekam zep mae hap aïri'anka, "Paulussu an namen sa bai-bi dal!" Dekam zep zêre mo irgwa taha nakore wenyaka gubiridaka- Paulussu de zêno mae mo ngirinnik sosonkam al tazimdi boran hap, hen dekam de zêre mae mo lowehe gwen san dep etan zerhan hap.

* **22:29 22:29** Roma mo teipsin tangan zini dekam mes anakan jalse gwibiridaka, "Roma mo ïrik ginnik de zisi bahem totoresâ tahalen." Yahudisa sap dekam Roma hen ïrik nik, hwêna desa man anakan enlala neibirida gwek, "Zen hom eiwa tangankam Roma mo ïrik ginnik bitî gwe'an." Zep Yahudi walsya sap de totoresâ tahalen hen tangolen. * **23:2 23:2** Yoh. 18:22-23 * **23:5 23:5** Kel. 22:28

11 Dekam zep kam Bian Yesus Paulus mo alp nakon zau'un zaka, zao zep gubluka, "Enlala tatetekam gwë! Men kirekame namen abe hap dena Yerusalemk tonbiridala, zen kirekam esa hen Romak tonbirida gwera."

Yahudi zini kim anakan egukke, "Dikire nglinak de Zini asa hlauludak- ee de Paulussu tan srëmnak tembane tanna, hen ho maesa otdebin niye."

12 Ka'ankam kaknak, Yahudi zini beya nik zep Paulussu de tan hap ola aha-en nuk. Dekam zep apdekam anakan eguk, "Dikire nglinak de Zini asa hlauludak- ee de Paulussu tan srëmnak tembane tanna, hen ho maesa otdebin niye."

13 Zini in zen ki egu-guk, beyana empat-pulu nakon man tamank.

14 Zen ki zep Alap mo golak de mam-mam wenyak dep hen Yahudi mo nol-nol san dep sek gwëk, ki zep zë nenbiridak, "Eë mesë Alap mo nwenak apdekam anakan egunun, 'Dikire nglinak de Zini asa hlauludak- ee de Paulussu tan srëmnak tembane tanna, hen ho maesa otdebin niye.'

15 Zep angkam em hen teipsin sinodenak dena janana bare zi mo mamna insa en soneblak. Anakan abe lak, 'Paulussu emki abe mae hap zer sonezimdin- ee aka etan dawemkam taken-taken eblak.' Hwëna zen molya awe hata zaka, sap ee ora nakon asa tan hap lil giblil."

16 Hwëna naïmlî zem man zë sane tabi'inka, dekam zep jana nabare nik mo gol san song gwëka, zao zep Paulussu gubluka.

17 Paulus dekam zep jana nabare zi mo mamna in mo irgwa taha nakore naka gu soneblaka. Kim hata zaka, zao zep gubluka, "Wal seiwiri an emki ere mo mam osan dep zersong gwen, sap zëno ol aïsîli ki- zëbe hap denaye."

18 Dekam zep mam zem osan dep zersong gwëka.

Irgwa taha nakore zini in ki zep mam zem insa gubluka, "Bwinak de zini Paulus man asa gu soneblala- ee de walasna ansa ebon osan dep zer halzan hap. Zen man olsa eban de loran hap golsong gwe zala."

19 Mam zem in ki zep taha nakon il ti-in kinika- tewehe kininkam de zertoran hap. Ki zep zë takensiblika, "Em ba ola bane abe hap golsong gwebla zala?"

20 Ki zep ding gulbluka, "Yahudi zini mes ola aha-en nul- emsa de anakan ahap tan hap, 'Paulussu ka'an ap zer sonezim- ee aka etan teipsin sinodenak dawemkam taken-taken eblak.' Hwëna in boton.

21 Bahem zëno mae mo ol san ang gwen, sap zini ora nakon zao de tan hap dil gibli'an. Beyana mes empat-pulu nakon taman. Zen mes Alap mo nwenak anakan egu-gul, 'Dikire nglinak de Zini asa hlauludak- ee de Paulussu tan srëmnak tembane tanna, hen ho maesa otdebin niye.' Angkam zen mes ehohle gwer. Ebon onakon de ol ensa neisbi'in."

22 Mam zini in ki zep gubluka, "Angkam sap esa song gwera. Hwëna bahem aha maesa gubiridan- in desae asa gublundaye."

Paulussu kim Kaesarea san dep nër sonekke:

23 Jana nabare nik mo mamna in ki zep aha mam dare naka guzimki, "Emki 470kam jana nabare zisi hohle labin- nëbokkam de eeija gwen weny 200 enkam, janakam dep de weny hen 200kum, kuda tahan nakon de eeijan hap dena 70 enkam. Emki gubiridan- kam de sek gwen hap deka ehohle gwëk. Yakla nwen sembilankam esa egwahal- Paulussu de Kaesarea san dep zon tan hap.

24 Kudana hen ahana Paulus hup de hohle dablak- zen deka zë nikin halka, dawem enkam de nërsong gwëk, hëndep gubernor Peliks Bak hon de zon dak."

25 Zëna ki zep suratna anakan ale gulbluka,

26 “Gubernur Peliks Bak hap, men-saë blikip eisik

gweblananke,
Klaudius Lisias onakon:
Dawem.

27 Zini insa ep zer soneblak, mes Yahudi balk dak. Zen man sap tan hap alp nëbla'ak. Hwëna ëyë nabakam ëre mo walas naban zial tak, sap ëe mesë salblak, ‘Zen Roma mo irik ginnik dena.’

28 Ëe ama sap zëno kareksa de hlaulblun hap dwam gwek- in dekon ki karek tan hap asas në gwebla'akke. Ëe zebë Yahudi mo teipsin sinode san dep sap zerhak.

29 Hwëna zëno karekna in zep ki në gwebla'ak, zen Roma mo ol jalse gwen hap hom. Hwëna Yahudi zëre mae mo ol jalse gwen en hap. Zëno karekna hom- dekam de tan hap denaye, ahaksa bwinak de se tya irin hip denaye.

30 Hwëna anakan kim asa nen-blak, ‘Man tan hap dil gibli'an,’ dekam zebë nabakam ebon osan dep zer sonek. Hen in zen jal në gwebla'an, ëe ama desa gubiridak, ‘Amki neik zëno karekna gubernor hap oltrëblak.’ ”

31 In desa dam tasibirki, zen zep Paulussu kam nërsong gwek, hëndep Antipatrisk nërhatok.

32 Dekon kaknak 70kam de kuda nabare en nik zep kon nërsong gwek. 400kum de tanakam de wenya dekon zep lwan dahak.

33 Kaesareak kim nërhatok, ki zep suratna insa gubernor hap nolblak. Paulussu hen zao zep tapbla dablak.

34 Gubernur kim suratna insa karatda gulku, dekam zep Paulussu takensiblika, “Eno auyan-azana endan kon?” Ki zep ding gulbluka, “Kilikia konke.”

35 Dekam zep gubluka, “Zep eno kareksa de ap goltrëblan hap de wenya kim de yaing gwe'anzak, zen dekam asa zëno mae mo nwenak emsa taken-taken gweblal.” Dekam zep pemerinta mo gol yalak de kara ta gwen hap gubiridaka- mensa teipsin zini Herodes Swe gubernor

hen jana zi de zao lowehe gwen hap taubluzimkike.

24

Teipsin zini Peliks hip kim Paulus mo karekna noltrëblakke:

1 Yaklana kim aha-ere taha-tapkam damank, Alap mo golak de teipsin zini Ananias hen Yahudi mo nol-nola dekam zep Kaesarea san tine gwek. Roma mo ol jalse gwen klis gul gwen hap de zini hen man ang gwibiridaka. Zëno bosena Tertulus Bak. Yahudi mo mam-mamna mes desa nenblak- zen de Paulus mo kareksa gubernor hap goltrëblan hap.

2-3 Paulussu kim nër halzak, dekam zep Tertulus Peliks Baksa anakan tonblaka, “Ano mae mo teipsinni, bian gubernor- men desaë blikip eisik gwebla'anke: Eno asa de irik ginkim, ëe mesë holokam umlae enkam lowehe gwek. Em mese ere mo enlala blalkam asa oto gulsuk gweka. In zebë tingare langna awe dawemna mwin-mwankam ep ol gweblanan.

4 Hwëna holokam de desa loran srëm hap, ëe ama emsa blikip gwesiblin naban abe ta'an- ano mae mo ola ansa de sane gwen hap.

5 Zini an ëe mesë dam lasik: Zen zisi karek tabirida gwenda. Hen zëno yasik tabin nikon Yahudi zini tingare okamanak de wenya man ëilman gwenda gwenan. An hen men zen Nazaret walya men mo bosekam tawa dahirida gwe'anke, zëno mae mo mamna ahana.

6-7 Zen kim sap Alap mo golsa de kun gun hup akasiki, hwëna ama zë nabakam balk lak. [“Ëe sap ëre mae mo ol jalse gwen san de karek tan habë ki enlala ëbla'ak. Hwëna jana nabare zi mo mamna Lisias Bak, zen zep zëre mo walas naban asas tangankam zial ta halka. Dekam zep asa gubiridaka- ëe de zëno kareksa ebe hap goltrëblan hap.”]

8 Em de hen taken-taken gwe-blankam, esa ki zëre mo ola kon anakan dam tasili, ‘Eiwa, zëno

karek-karekna beya tanganna, in zep ki nē gwebla'an.' "

⁹ Yahudi zini men zen ang tazak, dekam zep zēno ola in sa anakan trī nīlblik, "In eiwa tangan."

Paulus kim zēre mo tim golsriwen hap de ola tonkake:

¹⁰ Gubernur kim Paulussu tahakam anakare hap akablaka, "Emki hwēna toran," Paulus dekam zep ding gulku, "Ēe tawana: Em mese langna awe zi mo karek-karekna holokam klis gul gweka. Zep ēe ama tangan isrip-sri gwenan- emsa de ēre mo tim golsriwen hap denaka tonblan hapye.

¹¹ Em de ano olsa taīblibin hip, em emaka hen aha zisi takensibirida'ara. Ēe mae habē Yerusalem san song gwek: Dekon de Alapsa zēre hap de gola kon gu sone gwēblan hap. Yaklana tuju enkamē zē gwēk, ki zep an san dep asa nēr halzak. Zep ēe bawalkam de zē karekna mam gun hup? Angkam hwēna awe yaklana aha-ere taha- tapkamē gwē'an.

¹² Men zen ano kareksa de ebe hap goltrēblan hap yaīng gwezak, zen hom asa hla dak- zi mo olsa de keisa gunnuk, ahaksa zi tra mo enlalasa de ben tyasizimdinnik, sap Alap mo golak, sap but srēm golak, hen sap ēna iweye.

¹³ Men desa boton ol blo-blona emsa donblanan, zen hwēna basa molya emsa anakan donblak, 'Ēe kirekam de karek gwennakē hla lak.'

¹⁴ Hwēna ēe ebon damnakē kira gwe'an: Ēe ama ēre mae mo auyan-aza mo Alapsa betek gwēweblanan- Nazaret walya Yesussu de ang gwēblankam. Men zen Desa daīblibla'an, desa man Yahudi mo mam-mamna anakan husus neibirida gwe'an, 'In yasik tabin sin ang ta'an.' Hwēna tīngan mensa Musa mo tītī tabin olak hen Alap mo

ol ayang gul gwen zi mo ola ale nuk, ēe nama desa kitak taīblibi'in.

¹⁵ Ēe ama Alapsa taīblibla'an- in kirekam hen zen lowe he'an, anakan, 'Zini tīn nikon sa ēngaya gwer- sap dawem gol gwen zi, sap hen karek gol gwen zi.'*

¹⁶ Ēe in zebē alp gwe-gwenan- enho kles gwesīn srēm kam de Alap mo nwenak gwēn hap, sap hen zi bosyan mo nwenak.

¹⁷ "Ēe kimē zi mo lang san tahun beyakam gwēndak, ki zebē etan Yerusalem san dep lwa halzak- zao de tahalha zisi te-alakam mas gwibiridan hap, hen Alap hap de domba maesa kap ta gwēblan hap.

¹⁸ Zen in kim kiresa de syal gwib- innik Alap mo gol teksonnak asa hla dak, ēe dekam kun naban homē zē gwē'ak. Hen zi tra naban homē mae zē golēkeisa-keisa gwek. Hen homē mae zē golēilman gwek.

¹⁹ Hwēna Yahudi zini men zen Asia mo lang nakon yaīng gwezak, zen zen en zē asa anakan tame dak, 'An men zen nēno mae mo lang san tēnda gwekake.' Diki zen de awe yaīng gwe'an zanam, zen de eno nwenak asa taken-taken gwēblan hap, ki maka sam gwesī'in- zen de asa ba mae hap jal gwēblankamye.

²⁰ Ahaksa bong-bongna an zen teinikin'in, zen maka emsa nen- bla'an- ano karekna men zen ap hla nulblik, in kim Yerusalemk teipsīn sinodenak asa taken-taken nēblakye.

²¹ Zēno mae mo nwenak ēe ama sap'nen ol mamkam anakan guk, 'Asa ansa namen taken-taken ēbla'an, zen mae hap: Sap ēe ama anakan taīblik, "Zini tīn nikon ngaya gwenkam." ' ' ' *'

²² Peliks Bak orep mes anakan tawa gwibiridaka, "Ahakon Nazaret walya Yesus Swesa ang nē gwē- bla'an." Zep gubiridaka, "Angkam dekam sekwak gwek. Jana nabare

* **24:15 24:15** Yoh. 5:28-29 * **24:21 24:21** Paulus kim kirekam ol mamkam gubiridaka, dekam zep zēn ēol gwek hen ēhlīwek. Mae hap ēhlīwek, "San ha zini tīn nikon etan ngaya gwenkam?" (Kis. 23:6-10)

nik mo mamna Lisias Bak de hata zankam asa klis gul.”

²³ Dekam zep zêwe de jana nabare nik mo mam naka gubluka- zen de zêre mae mo lowehe gwennak Paulussu kara ta gwen hap. † Peliks man desa gubluka, “Dikire gol mwa ennak tē nasen gwék, hen wal bose wal zem dikire tahalhanak mas nē gweblak.”

Paulus kim dare tahunkam bwinak gwékake:

²⁴ Yaklana hom beya gwe'ak, ki zep Peliks we zem Drusila han ap-tazak. We zem in Yahudi we, hwēna zēna Roma wal. Ki zep Peliks Paulussu de kwang ta halzan hap gubiridaka. Dekam zep we zeban apdenak sane la'ak- Kristussu de taïbliBlan hap dena kim klis gulzim'inkaye.

²⁵ Insa klis gulzim'inka, Alap hon dikim tal gwesin hip de- naka, zēnaka dikim zerinik gwen hap de- naka, hen Alap de lamkam klis gun hup denaka.

Peliks dekam zep aïri'anaka, dekam zep gubluka, “Zao en golzausuk. Amki asa hli so. Ee de hir-hir gwen srēmkan, asa etan emsa gu soneblal.”

²⁶ Hwēna zen man hen Paulussu anakan gu gweblaka, “Eme te-alasa mamkam ap golbla'anam, ki amaka emsa zeser sone'an.” Zep etan-etankam kire hap de olsa de loran hap gu sone gweblaka.

²⁷ Tahunna kim dan damank, Peliks dekam zep gubernora kon ati gweka. Hwēna Yahudi zi dikim sam gwesiblin hap zep Paulussu bwinak hli taka. Hwēna dekam zep zēno weinak Perkius Pestus gubernorkam irik gilki.

25

Pestus hup kim Paulus mo karekna noltrēblakke:

¹ Gubernur Pestus mo hata zannak kim yaklana dan-ahan damank, dekam zep Kaesarea kon Yerusalemsa amjanbirki.

² Zao zep Pestus mo nwenak Alap mo golak de mam-mam wenyā hen Yahudi mo nol-nola Paulus mo karekna botonkam noltrēblak. Zen man Pestussu anakan aberbe da gwe'ak,

³ “Ee de emsa sam gwesiblin hap, emki gubiridan- Paulussu de etan an san dep zer sonen hap.” Sap zen mes aningkim de ora nakon til giblin hap ehohle gwék.

⁴ Hwēna man ding gulzimki, “Paulussu zen Kaesareak am kara da'an, hen ee desan asa etan nabakam lwahal.

⁵ Zen de eiwa karek gwenkam, ki dikire eno mae mo nol-nol ahakore nik asa ang nēblak- zao deka zēno kareksa abe hap noltrēblak.”

⁶ Yerusalemk yaklana san ha dare taha-tapakam mes yap zē gwēka, ki zep kon etan Kaesarea san dep lwa halka. Ka'ankam zep klis gul gwen hap de teksonnak Paulussu dikim zē taken-taken gweblan hap tagal gulsuku. Ki zep Paulussu de zerhatazan hap gubiridaka.

⁷ Paulussu kim nērhatatak, Yahudi zini in zen Yusalem kon yaing gwezak, dekam zep dot dasizik. Zao zep olkam men-kon an-konkam nēbla'ak. Botton ol blo-blona insa kim dohon-hon nulbli'ak, hwēna anakan de ēgunnu hom, “Ee ere mo nwekamē kirekam de kareksa gonnak hla lak.”

⁸ Paulus dekam zep zēre mo tim golsriwen hap de ola anakan guku, “Ee homē Yahudi zi mo titi tabin olsa gulmunk, hen Alap mo gola homē kun guk. Roma mo teipsin zi mo jalse gwenna homē hen gulmunk.”

⁹ Hwēna Pestus man Yahudi zi de zēnaka sam gwesiblin hap dwam gwe'anaka, zep Paulussu takensiblika, “Em wēhē dwam gwe'ara?- ee de etan

† 24:23 24:23 Yunani ola kon de dam gulsunkum, jana nabare zini in, zēno irik gin walasna beyana 100 enkam.

Yerusalemk emsa taken-taken gweblan hapye, eno karekna insa ap noltrëblananke.”

¹⁰ Ki zep ding gulbluka, “Ëe an Roma mo teipsin zi mo dam taha nakore zini eno nwenakë zau'un. Zep diki em de awe asa taken-taken gweblan hap man dakastî'in. Ena dwan mes-eme tawa gwera: Ëe homë Yahudi zi hip karekna golz-ink.

¹¹ Tan hap de kareksa de ap hlaublunkam, ëe homë asa de tan hap jalse gwe'an. Hwëna Yahudi zi mo boton ol blo-blo enna in hap de asa tapbla tazimdin hip hom dakastî'in. Ëe ama abe gwe'an-Romak de teipsin tangan zi de ap tap gulblun hap!”

¹² Zëno ola insa kim Pestus Bak zëre mo irgwa taha nakore zi niban ziklis gulku, dekam zep gubluka, “En mese ki gulu. Emsa desan sa nërhal!”

Teipsin zini Agripa Baksa kim somol zeban zëre mo tim golsriwen ola tonzimkike:

¹³ Hom holo gwe'ak, ki zep teipsin zini Herodes Swe mo tanena Agripa somol zeban Kaesareak Pestussu zini lazak. Agripa, zen hen teipsinni. Somol zem in bosena Bernike.

¹⁴ Zao kim ërgwë gwe'ak, Pestus dekam zep Paulus hup dena Agripa Baksa anakan tonbla'anaka, “Zini awe man bwinak Peliks Bak hli taka.

¹⁵ Ëe kimë nër hom Yerusalemka amjanbik, Alap mo golak de mam-mam wanya hen Yahudi mo nol-nola zëno kareksa ap noltrëblak. Zen man sap tan hap asa aberbe da gwe'ak.

¹⁶ Hwëna ëe anakanë ding gulz-ink, ‘Roma ano mae mo jalse gwen olak man lwak, “Zisi bëjen totoresa jal zi hip tapbla tazimdin. Diki nonol jal zi mo nwenak de taken-taken gweblankam- zao de zen hen zëre mo tim golsriwen hap de olsa tonbiridan hap.” ’

¹⁷ Zep zen kim abon yaing gwezak, ëe homë eissik. Ka'ankam zebë

hëndep tagam gulsuk. Dekam zebë zini insa de zer halzan hap gubiridak.

¹⁸ Zëno jal zini in kim ap zëno karekna noltrëblak, hwëna tan hap de karekna zen hom ap noltrëblak-men kirekamë tim gu'ukye.

¹⁹ Zen hwëna Yahudi mo tawa tabin nikon ki nëblak, hen mae en nakon ki zini insa husus nëblak: Anakan mo gu gwendake, ‘Zi bosena Yesus, zen man tin nikon etan ngaya gweka.’

²⁰ Ëe mesë zë anakan topse gwibiridak, ‘Ëe banakarekam de kire hap dena takensibirida gwen hap?’ In zebë sap zini insa takensiblik, ‘Em wëhë dwam gwe'ara-ëe de etan Yerusalemk emsa taken-taken gweblan hapye?- eno karekna insa ap noltrëblananke.’

²¹ Hwëna zen Romak de teipsin tangan zi de tap gulblun hap abe gweka. Dekam zebë jana zisi gubiridak, ‘Ki amki awe kara lak. Roma san dep de bulu kim de song gwe'ak, dekam neik desan dep ër sonek.’ ”

²² Agripa ki zep ding gulbluka, “Ëe hen ama dwam gwe'an- zini in mo aïsîlsi de sane gwen hap.”

Pestus ki zep ding gulbluka, “Ka'an neik.”

²³ Ka'ankam zep Agripa Bak somol zem Bernike neka teipsin zi hip de terya ban dawem enkam nitilzik- ol ton gwibin hip de teksonnak iwe dep. Jana nabare nik mo mam-mamna hen ëna iwe de bose nabare wanya mes zë hen yaing gwezak. Pestus dekam zep jana nabare wanya Paulussu de zerhalzan hap gubiridaka.

²⁴ Kim nërhatzak, Pestus ki zep guku, “Teipsin zini Agripa Bak, hen tingan an zene tagal gwenanke, zini an ena mese hla lanan. Tingare Yerusalemk de Yahudi zini hen Kaesareak awe dena, zen mes asa aberbe da gwëk- ol nop-nopkam de anakan ëgu gwenkamye, ‘Zini an hom dakastî'ira- zen de okamanak gwën hapye.’

25 Hwëna ëe homë tan hap de karekna hlaulbluk. Hwëna zën kim abe gweka, Romak de teipsin tangan zi de tap gulblun hap, ëe dekam zebë desan de zer sonen hap klis guk.

26 Hwëna ëe nëno mae mo mamna insa ba olsa de suratkam anakan tawa tan hap?– ‘Zëno karekna an dë kirekam moye,’ deban de zer sonen hapye. In zebë eno mae mo nwenak de zer halzan hap gubiridananonol tanganna teipsin zini Agripa Bak ere onak, dekam eka apdenak dawemkam anakan dam ulsuk, ‘A kirekam neik nëre mae mo teipsin tanganna kip suratna ale ulblik.’

27 Sap ano enlalakam, zëno kareksa de dam gulsublun srëmkam, nen bëjen nen Roma mo teipsin tangan zi sin dep zer sonen.”

26

1 Agripa ki zep Paulussu gubluka, “Ëe ama ebe hap golbla'an- em dikim ere mo tim golsriwen hap denaka toran hap.”

Paulus ki zep tahakam akabiridaka- dekam de kon gwisibir hanan hap. Ki zep gu ineka,

2 “Teipsin zini Agripa, ëe ama tangan sam gwesinin- ëre mo tim golsriwen olsa de namen emsa tonblan hap, mensa Yahudi zini ap ola blo-blo nul gweblakke.

3 Ëe ama tangan sam gwesinin, sap em mese tangan Yahudi zi mo kirekam de lowe henna tawa gwibiridaka- hen zëno mae mo Alap hap de ol gulsuk halasen gwenna. In zebë emsa dawemkam de asa sane tan hap abe ta'an.

4 “Tingare Yahudi zini ano gwëna tawana- walasnak kimë ëre mo langnak gwëk, hëndep Yerusalemk awe kimë gwë gwëk.

5 Zen mes holokam asa kara da gwëk. Zep zen de ëdwam gwe'anam, zen maka emsa anakan nenbla'an, ‘Zen Farisi mo tawa tabin sin ang gweka.’ Tingare Yahudi nëre mae mo hlik-hlik nakon,

Farisikam de zini, zen in zen tingare Yahudi mo titi tabin sin tatetekam ang ta gwenan.

6 Zep ëe mae habë angkam awe zau'un- zao de asa taken-taken gweblan hap: Sap ëe ama Yahudi nëre mae mo auyan-aza hap de Alap mo ol gu-guk gwensa taiblibik.

7 Ol gu-guk gwenna iwe de zaun hup dena insa, Israel mo dua-blas enkam de zi ausuna man tangan kara nei gwibi'in. Zen in zep Alapsa betek në gweblanan- yaklam denaban kam denabanye. Hwëna teipsin zini Agripa Bak, ol gu-guk gwenna insaë taiblibik, in zep'nen ki hwëna Yahudi zini ol blo-blona ap mam nulblik.

8 Hwëna zini ba hap anakan ëkil gil gwe'an?– ‘Alap bëjen zini tin nikon gaya tan.’

9 “Aena hen orep anakanë kil gi'ik, ‘Dawemna, nen Nazaret walya Yesussu de taibliblan wanya esa karek la gwibir.’

10 Ëe zebë kirekam Yerusalemk gweibirida gwëk. Alap mo golak de mam-mam wenyik mo bosekam, ëe ama Yesussu de taibliblan wanya bwinak sesek gulin gwëk, hen tam-eran hap kim nenbirida gwëk, ëe ama hen ola anakan mas gul gwëk, ‘Amki lak.’

11 Ëe mesë beya guk- but srëm gol-gol san de zisi karek tabin hip hakalbirida gwenna. Hen dekam ama akasibirida gwëk, ‘Zen wëhë tik-tik tabinkim Yesussu lamang da'ak?’ Ëe ama sërkam u sal-sal gwibirida gwëk, zebë hëndep aha lang san teibirida gwëk.

12-13 “Zep ano teipsinni Agripa Bak, ëe kimë kire enlala naban Damsik sin song gwëk, Alap mo golak de mam-mam wenyik mo bosekam de surat naban, yakla bolak denaban dekam zep ngatanna ngli nakon ati gwezak, zao zep asa wale tabirzik. Yakla nwe mo ngatanna man lwala he'ara. In sërkam de ngatan tanganna.

14 Ëe tingan kamanakë altik, ki

zebë hwëna ola salsek- Ibrani olkam de anakan asa takenblanna, 'Saulus, Saulus, em ba habe asa karek ta gwenda? Zen hwëna enakae kim karek ta gwe'ara.'

15 "Ki zebë takensiblik, 'Bian, Em nara?'

"Ki zep asa ding gulbluka, 'Ëe an Yesus- em insa karek ta gwe'arake.

16 Em luwen. Ëe mesë ebe hap Ënaka zertrëblanan- em dikim abe hap de syalsa gol gwen hap, hen dekam de abe hap denaka gol halada gwen hap, in desa hlauluda, hen men desaë ebe hap goltrë gwebla'akye.

17 Ëe asa emsa Yahudi kore jal zi mo taha nakon al ta gwer- hen Yahudi srëm jal zi mo taha nakonye. Sap ëe ama emsa Yahudi srëm zi sin dep zer sone'an-

18 kawesinnik de ëbute gwen zisi ekakim ngatannak dep golëwet so gwe-gwe, hen dowal mo kigi mo tahalebin zisi ekakim hil ti sone gwibir. Zen kim de Asa daibli gwebla'ak, zen dekam asa zëno mae mo karek-karekna tap gulsuk gwizim. Zen dekam sa hen Alap mo hlil irin lalak wenyak bitì gwer.'

19 "Zen in zep, teipsin zini Agripa Bak, Alap insa nwenap ap lirisin soblaka, ëe zebë desan ang gwek.

20 In zebë tonbirida gwek- nonol tanganna Damsik, Yerusalemk, tingare Yahudi mo langnak, hëndep Yahudi srëm zi mo lang-lang san. Ëe anakanë tonbirida gwek, 'Em ëhalen, ki Alap osan dep lwan dahak. Aha zi hip em dawemsa goltrei gwizimdin- dekam de emsa anakan tame tan hapye, "Zen mes halera."'

21 Kirekam insa gol halada gwek, in zep Yahudi zini Alap mo golak asa balk dak, hëndep tan hap asa alp dasik.

22 Hwëna Alap man asa il gwehe gwebla'ara. In zebë hëndep angkam an nama zau'un hen emsa tonbirida'an- sap mam-mam weny

hen bete-tek weny. Ëe ansa emsa gubirida'an, zen hom Musa mo ola kon srën gwe'an- hen Alap mo ol ayang gul gwen zi mo ola konye.

23 Sap zen anakan hamal hap ëguguk gwek,

'Israelsa de ngaya tabin hip de Zini, Zen sa kareksa goltowera. Hen Zen Zen sa tin nikon de ngaya gwenkam nonol gwera- dekam de ëngaya gwen hap de ngatannak dep golëwet so gwen hapye, sap Yahudi zi, sap hen Yahudi srëm zi.' **

24 Kirekam kim guku, dekam zep Pestus zëno ola insa ol drakkam blaonsublu kinika, "Paulus, em in ema mamak gweka! Em insa kirekam mamkam tawa gwibirki, in zebe hëndep mamak gweka."

25 Paulus ki zep hwëna ding gulbluka, "Teipsin zini Pestus Bak, ëe homë mamak gwek. Ëe in eiwa de tangannakë tonnan, hen enlala dawemkamë tonnan.

26 Teipsin zini Agripa, zen halhalaka hom. Hen ëe tawana: Zen mes orep anakan tawa gweka, 'Yesus kirekam gwëka, hen Yahudi kirekam nëblak.' Sap in kim ki jowek, zen damnak ki lwak. Zep zëno nwenak ëe sap asa beyakam kire hap dena ton.

27 Teipsin zini Agripa, em san ema anakan taibli'ira?- 'Mensa Alap mo ol ayang gul gwen zini ale nuk, zen eiwana.' Ëe ama emsa tame ta'an: Em mese desa taibli'birki."

28 Agripa ki zep hen zëno ola blaonsublu kinika, "Em san ema asa tim ti'ara?- 'Nabakam asa desa halen tal, hëndep zen sa angkam Kristen gwera.' "

29 Paulus ki zep ding gulbluka, "Ëe ama Alapsa ebe hap abe ta gwe'an- sap angkam dep, ahaksa lamkam dep. Hwëna ebe en hap hom. Ëe anakanë abe ta gwenan, 'Bian, an zen asa sane da gwenan, zen dikire tingan ëre makan ëliwehek.' Hwëna ëe emsa de hen besi dokotkam de tahalebin hip

* 26:23 26:23 Yes. 42:6; 49:6; Luk. 24:44-47; 1Kor. 15:20

homë abe ta gwe'an- aena an kire nikë zau'unke."

³⁰ Teipsin zini Agripa, dekam zep somol zeban, hen gubernor Pestus mae han ezauk.

³¹ Ki zep wet so gwek. Zao kim apdekam zënaka donbirida'ak, zao zep eton'ak, "Zini an hom karekna golka- dekam de tan hap dena, ahaksa bwinak de se tya irin hip denaye."

³² Agripa ki zep Pestussu gubluka, "Zini an menkam emaka zeser soneka. Hwëna zën mes abe gweka-Roma mo teipsin tangannak de tap gulblun hap."

27

Paulussu kim Roma san dep nër sonekke:

¹ Kim zauk- Paulussu dikim ë yala Roma san Italia mo lang san dep zer sonen hap, dekam zep Paulussu jana nabare zi mo mam hap tapbla dablak- hëndep ahakore bwinak de wenya ban. Jana nabare zini in, bosena Yulius. Zëno irgwa taha nakore walasna seratus enkam. Zen in kitak Roma mo teipsin tangan zi mo ol golhau lu gwen wenya.

² Bwinak de zini in sa zen Adramitium kore buluk nolësesek gwesek. Bulu in langna Asia mo hi alp san de ë-ë san de zausuk song gwen hap. Makedonia mo langnak de ëna Tesalonika walya Aristarkus, zen hen man ang gweka. Eë Lukas ama hen ang gwek.

³ Ka'ankam zebë ëna Sidonk yaing gwek. Yulius ki zep Paulussu kwasang gweblaka, ki zep irgwa taha nakore zemka gubluka, "Emki Paulus hun zerati gwen- wal bose wal zik deka zëno tahalhasa hla nulblik."

⁴ Dekon kimë egwahak, hwëna asese yawalsaë ertowek. Ngein nikon taikë. Dekam zebë bulu in han asese airin hip olwale gwe song gwek. Lang tekna Siprus sun dep zebë olwale kinik.

⁵ Dekon zebë Kilikia hen Pamfilia mo langnak de hi yal san tamun

gwek, hëndep ki zebë Likia mo langnak de ëna Mirak atiti gwek.

⁶ Zao zep jana nabare nik mo mamna in Mesir mo ëna Aleksandria kore bulu goltoweka. Zen Italia mo lang san dep song gwe'ak. Zao zep hwëna asa golësesek gwe seka.

⁷ Dekon kimë sek gwek, hwëna asese habë edakal gwe song gwek. Yaklana hëndep man beya gwek. Ki zebë karek tangankam Asia mo langnak de ëna Nidusk yaing gwek. Dekon yakla nikin anen san dep de sek gwenna banakan dep? Sap asesena man tangan mam gweka. Dekam zebë lang tekna Kreta san dep egwa gwe kinik. Men zëwe Kretasa de talmarannak langna teipsik kinik, lang bosena Salmonek, desan zebë asese airin hip bulu ban olaning gwehak.

⁸ Dekon karekkam zebë eik golek de san olsong gwek, hëndep hi alpnak de ë beteknak zebë yaing gwek. Eë betekna in mo bosena, Bul Golzausuk Gwen Nwe Awes. Dekon ëna Lasea langnak hom.

⁹ Hwëna yaklana mes oranak beyakam altisik, sap benna September mes ngirinnik zauk. Dekam hi ngëp tamle. Paulus ki zep sap ol zim-zimni anakan golzimki,

¹⁰ "Wal bose wal, eë ama tame gu'un: Nen de an kon na-en sek gwenkam, nen karekna mam naka esa oltower. Nëno mae mo kirekirena hen bulu an sa ejek-jak gwer- hëndep zi niban."

¹¹ Hwëna jana nabare nik mo mamna in hom Paulus mo ol san ang gweka. Zen hwëna bul bi naban bul golsong gwe-gwen zi niban taiblizimki.

¹² Sap langna in dawem naka hom- zao de bot-bot tamlenak ben naban lowehen hapye. Dekam zep beya nik eguk, "Nen hëndep ayang gun." Zen man edwam gwe'ak-lang tekna Kreta mo eihya nakon de lowehen hap, ëna Peniks. Sap dekon hina hom mamkam ngëp gwe-gwenan.

Hi ngëpna kim mam gwekke:

¹³ Asesena kim utara san liwe heka, hen betekkam kim tai'inka, dekam zep kil nik, "Mes sëve henda. Sap esa sek gwer." Dekam zep Kreta mo alp san nolsong gwek.

¹⁴ Hwëna hom holo gwe'ak, ki zep sërkam de asese yala tai'iki- mensa nen gweblananke, "yakla hata sezan nakore asese." Zen zep ë tekna in kon asa golëhas gwesiki.

¹⁵ Dekam asesena in hap bulu in sa banakan dep?- lwan dahan hap de etan lero gunnu. Zao zebë ki ein asesena in sa anakan kara lak, "Dikire zen bulu an golsong gwek."

¹⁶ Hëndep kimë lang tek betekna Kauda golek denak asese airin hip ëaning gwehak, zao zebë bul yala in mo bul betekna karek tangankam ol ane'ak- mae hap, "Asese mana golhas gwesininka."

¹⁷ Bul betekna in sa kim gulk nuhule anak, ki zep hen bul yala in sa dokotkam nuhulek- mae hap, "Kamanak de tisik anenkam mana hi ngëp hlant sonank." Sap dekam hina men dekon lolong gwek man zao dep golek de gwe'ak- men dekon hisglimni hata sendakye. Desa "Sirtis" kim bosa nuk. Layara dekam zep betek enkam sring nil sonek- dekam de hisglim hata senna in kon asese bulu in sa gollëwen hap.

¹⁸ Hwëna dekam tangan zep asesena men-kon an-konkam sërkam asa tai'birida nasenka, hëndep ka'ankam ki zep bulsu dikim jahalha gun hup kire-kirena yal danuk.

¹⁹ Etan zao de yaklanak hen kirekam, hëndep etan bulu in mo komal tum maena hen dekam zep yal danuk- anakare enlala naban, "Kire-kirena sap sa ëjek-jak gwer. Diki zi nen ëngaya gwen."

²⁰ Hëndep yaklana man beya gwek- keis niban yakla nwe naban de aken srëmkam. Hen asesena nama ki tai' tinea. Dekam zebë ëenlala gwek, "Nen an molye ëngaya gwek."

²¹ Eë tingan dekam airin hip mesë

tembane tan srëmkam ëholo gwek. Paulus ki zep ano mae mo ngirin nikon zauku, zao zep kitak asa tonbiridaka, "Wal bosa wal, ano ol sane ang tananam, nen molye anakare karekna oltowenanam- ëe mensa sap Kretak emsa gubiridakye.

²² Hwëna angkam ëe ama emsa enlala tatetekam de lowehen hap titi tabi'in, sap nëbon mae onakon ahaen mae molya tilki. Hwëna bul enna an sa keing gwer.

²³ Eë mensa Alapsa betek gwegweblanan, zëno dam taha nakore zini kam ano alp nakon zausun zala,

²⁴ ki zep asa gublula,

'Paulus, bahem airin. Emsa sa Roma mo teipsin tangan zi mo nwenak taken-taken nëblal. Alap mes eno abena sala. Zep tingan em an zene buluk awe lowe he'an esa ëngaya gwer.'

²⁵ Zep wal bosa wal, enlala tatete enkam lowehék, sap ëe ama Alap mo abe hap de ola in sa tai'libi'in.

²⁶ Hwëna bul enna an han esa aha lang teknak olkyanher. Zao sa hëndep karek gwer."

²⁷ Orapna kim empat-blasnak zauk, asesena in nama bulu ban asa golëhas gwesininka- hi bosena Hi Ngirin san dep. Bul golsong gwen wanya in dekam zep tame nuk, "Nen angkam ema eikni golek de u'in."

²⁸ Dekam zep kaso nabare dokotna tak nulink- dekam de tatek naka akasibin hip. Dekam zep hla nuk, zëno tatekna empat-pulu meterak man golek de gwek. Hom holo gwe'ak, ki zep etan tak nulink. Dekon kim hla nuk, tatekna tiga-pulu meterak golek de gwek.

²⁹ Zen mae hap ëairi'ak, "Bul mana kaso yawal-yawalak tisik anenank." Dekam zep bul ohwa nakon kaso dohon nabare dokotna dan-nër dan-nërkam yal danuk- dekam de asese asa sangankam golësek gwen hap. Dekam zep anakan ëenlala gwe'ak, "Nabakam litil!"

³⁰ Bul golsong gwe-gwen wanya in dekam zep ahap dabik, "Eë ama

bul betekna ankam ngein nikon aha kaso dohon-honsa buk ulsu'un." Zen dekam bul betekna insa sap nol dwanu'ak, hwëna zëno mae mo enlalana, dekam de zë-en heya-hya gwen hap.

³¹ Paulus dekam zep jana nabare nik mo mamna insa walas zeban anakan gubiridaka, "Bul golsong gwe-gwen wenya an de buluk awe lowehen srëmkam, em molye golëngaya gweka."

³² Jana nabare wenya in dekam zep bul betekna in mo dokotna nablon sonek, dekam zep hi ngëp golhas gwesik.

³³ Litin hip kim golek de gwe'ak, Paulus ki zep kitak de tembane tan hap titi tabirki. Man gubiridaka, "Yaklana angkam mes empat-blas gwer, em dekam airin enkame lowehe gwék. Dekam tembane tan hap ema baes tak.

³⁴ Eë ama emsa titi tabi'in: Betek en maekam em tembane tan-ekakim étatete gwék. Em molye aha-en mae jek-jak gweka."

³⁵ Kirekam kim gubiridaka, zëna ki zep rotina golka, ki zep zëno mae mo nwenak Alap hap dawemna golblaka. Ki zep ap gul inki, hëndep twinbi'inka.

³⁶ Desa kim kirekam hla dak, dekam zep tingan enlalana étatete gwék, hen dekam zep tembane ta'ak.

³⁷ Buluk iwe, eë tingan beyana 276 enkamë lowe he'ak.

³⁸ Sowe henkam kimë tembane ta'ak, dekam zep etan gandum karonna yal danuk- bulsu dikim etan jahalha gun hup.

³⁹ Kim liti'ik, lang tekna insa hom anakan dam nulsuk, "An bosena zen." Zëwe zep kama gwaeha gwe hanna hisglim niban hla nuk. Dekam zep ola aha-en nuk, "Nen ki sap éalp gwen. Wëhë zëwe lei ku'ik?"

⁴⁰ Dekam zep kaso dohon bulsun nubare dokotna dan-nër dan-nëra insa blom da sonek- dekam de bulu in nabakam hluwen hap. Dekam mensa bulsu de dam gulsun hup de

te hlangna nuhulek, ki zep hil nil sonek- dekam de bulu insa kama gwaeha gwe hanna in san dep dam gulsun hup. Layara ki zep gulk sun er nulsuksek.

⁴¹ Hwëna bulu in mase-nola kim zep hi ngirinnik de hisglimnik tisik anek, hwëna ohwa nakon nama hisglim srëmnak. Ho ngëpna in kim ohwa nakon ëwak gulusen gwe'ak, ki zep hëndep klasak gwesik.

⁴² Jana nabare zini in dekam zep bwinak de zini insa de tameran hap ëenlala gwe'ak, sap zen anakan ëenlala gwék, "Zen de eik sin dep al ta'ak, dekon sa hëndep heya-hya gwer."

⁴³ Hwëna mam zem in Paulussu de ngaya tan hap dwam gwe'anka, zep jalse gwibiridaka. Dekam zep gubiridaka, "Al gwen tawa wenya, nonol zen de ëheya-hya gwe inek.

⁴⁴ Al gwen tawa srëm wenya, zen te hlang ahaksa bul hlang mae naban." Kirekam zep ki hëndep kitak alpnaek yaing gwe senak.

28

Maltak kim lowe hekke:

¹ Eiknik kimë yaing gwék, dekam zep zëwe de zi asa nenbiridak, "Lang tek bosena an Malta."

² Lang tekna iwe de zini in man tangan asa kwasang neibiridak. Zen syauksu ap i dazim nirak, hen dawem enkam asa lup nulink, sap ona man il ti'anka hen langna in bot-bot tanganna.

³ Paulus hwëna tesya tagam ta'anka, hwëna wanya jal-jala ban kap ta inehal zaka. Desa kim syauknuk kang ta se'anka, wanyana in dekam zep syauk sal-sal airin hip tahanak hit tik.

⁴ Zëwe de zini kim hla dak, "Paulus mo tahanak wanya të sone'an," dekam zep zënaka nenbiridak, "Zini an zi-ta gwen zisi mes yap. Zen sap mes hinak de karek nakon ngaya gwera, hwëna nëno mae mo yang tasin dowala ahana, zi mo karek-kareksa de hlaublun

hap de zini, hom ki zen de ngaya gwen hap gublula.”

⁵ Hwëna Paulus ki zep wanyana insa syauknuk dep myak gulsuku. Hwëna sang-sangna hom mae engka en mae eisbirki.*

⁶ Zëwe de zini man tim di'ak, “Zen sa hanala. Ki sa mumuk ennak tokna zara.” Hwëna kim sap zë holokam anakan kara da'ak, “Banakan mae hom gwë'ara,” dekam zep enlalana anakan wet dyasik, “O zini an hen aha alapsa mes yap.”

⁷ Lang tekna iwe de gubernora, bosena Publius. Zëno lang bi gwibinni dekon golek. Dawem enkam zep kon asa kwang guluda halka. Zen zëre mo golak dan-ahare yaklakam dawem enkam asa golëlowe heka.

⁸ Bi zem dekam u sya nabare ewen naban tumnak ta'anaka. Paulus ki zep zë duwebla zaka, ki zep Alapsa zëbe hap abe taka. Tahana kim tehabla ineka, dekam zep hëndep dawem gweka.

⁹ Kirekam kim hla dak, dekam zep lang tekna iwe de zi sang-sangna Paulus osan dep kap nulhal gwezak, zao zep kitak dawem ta gwibirki.

¹⁰ Dekam dawem enkam zep asa blikip neisibirida gwék. Dekon kimë etan sek gwe'ak, zen man ano mae mo tahalhana ap hla nulzimk.

Malta kon kimë Roma san dep sek gwékke:

¹¹ Dan-ahare benkam kimë zë lowehék, ki zebë kon hwëna Aleksandria kore buluk ang tak. Bul golsong gwe-gwe zini in Malta kon bot-bot tamle hap de dan-ahare ben de tamarannak dep neissibik. Bulu in zëno mase-nolak zëre mae mo yang tabin dowal dare mo nwe-masesa zë yang nososuk. Dowala in ahana, Kastor Bak mo nwe-masekam, ahana Poluks mo nwe-masekam.

¹² Italia mo lang tekna Silisik de ëna Sirakusak kimë yaing gwék,

zëwe dan-ahare yaklakam zebë lowehék.

¹³ Dekon kimë sek gwék, dekam zebë ëna Regiumk yaing gwék. Ka'ankam dekam zep asesena selatan nakon tai'inka. Zëno ka'ankam zebë nabakam Putiolik yaing gwék.

¹⁴ Zëwe zebë Yesussu de taibliblan zini ban olëtowék. Zen zep asa aha-ere minggukam de zëwe lowehen hap nenbiridak. Dekon hwëna tanakam zebë ë yala Roma san dep sek gwék.

¹⁵ Romak de Yesussu taibliblan wenya kim asa nasalbiridak, dekam zep oranak de ë betek dare nakon asa kara neibirida'ak. Ëna in ahana bosena Pasar Apius, ahana bosena Dan-ahare Ni Truwe Gun Gol. Paulus kim zë hlauluda kinzika, ki zep Alap hap dawemna golblaka, hen enlalana dekam zep tatete gweblaka.

Paulus kim Romak tonbirida gwékake:

¹⁶ Romak kimë yaing gwék, Paulussu ki zep nenblak, “Sap esa e-en aha golak gwë gwera. Jana nabare zini aha-en aha-enkam sa emsa kara da gwer.”

¹⁷ Yaklana kim dan-ahan damank, Paulus ki zep Yahudi mo nol-nola, men zen Romak lowehé gwék, desa tagal gulsun hup gu sonebiridaka. Zao zep gubiridaka, “Aya-wal oso-wal, ëe homë mae karekna nëre korena kip golzimk, hen nëre mae mo auyan-aza mo kirekam de lowe henna homë mae gulumk. Sap kirekam, hwëna asa Yerusalemk balk dak, ki zep Roma hap asa tapbla dazimk.

¹⁸ Yahudi mo langnak men zen Roma mo bose hap teipsinteipsinkim teinikink, zen kim asa taken-taken në gwéblak, dekam zep sap zeser sonen hap asa enlala në gwéblak. Sap zen hom tan hap de karekna ap hla nul gwéblak.

¹⁹ Hwëna Yahudi zini kim asa de zeser sonen hap jalse neibiridak, dekam zebë ein anakan abe gwék,

* 28:5 28:5 Luk. 10:19; Mrk. 16:18

'Asa Roma mo teipsîn tangan san dep ër sonek- zen deka ap tap gulbluka.' Hwëna ëe anakare enlala naban homë kirekam abe gwek, "Teipsîn tangan zini in dekakim ano kore naka karek tabirki.'

²⁰ Zen in zebë emsa tagal gulsun hup gubiridak- eban mae de golëtoran hap. Asa an mae hap besikam de dokotkam dahalek: Sap ëe ama Israel mo auyan-aza hap de Alap mo gu-gubiridan ola taïblîbik."

²¹ Ki zep ding nulblik, "Ëe homë mae nère mae mo lang nakore suratna ebe hap dena ulink. Hen nër hom mae zini hom mae dekon ebe hap dena ëtonzak.

²² Hwëna ëe ama emsa de sane tan hap ëdwam gwe'an, sap tingare langnak zini man ëgu gwenan, 'Kristen zi mo tawa tabinni karekna.' "

²³ Dekam zep ola anakan aha-en nuk, "Yaklana dekam esa Paulussu sane lal." Dekam beya tangankam zep Paulus mo gol gwë gwennak yaïng gwezak. Kaknak zep aïsîl gwibiridankam kon gwesik hanaka, hëndep zao golëkam-en gwek. Zen

Yesus de Alap mo irîk gînsî golhatazan hap denaka tonbiridaka,

hen Musa mo titi tabin ola kore naka,
hen Alap mo ol ayang gul gwen zi mo ale gun nukore naka klis gulzimki-

zen dikim hen Yesussu anakan taïblîblan hap, "Zen eiwa Alap mo zer sonenna- Israelsa de ngaya tabin hip Dena."

²⁴ Ahakon man Paulus mo ola daïblîbik. Ahakon man hwa nulsuk.

²⁵⁻²⁹ Paulus ki zep aumwa hap gubiridaka, "Eiwa, Yesaya Bak hon Alap mo Enhona ebe mae hap de olsa hamal hap ing gul soneblaka, in zep Yesayasa anakan gubluka,

²⁶ 'Ola ansa emki nol drak-drak zi ausuna in hap anakan ayang gulzindin,

"Em sap esa ësane gwe tine gwer, hwëna molye tame ul gwek.

Em sap esa nwekam karatda ul tine gwer,

hwëna molye dam ulsuk gwek."

²⁷ Sap zi ausuna an mo enlalana mes ëtop-top gwek,

ini hen mes ëmat-mat gwek,

hen nwena mes ëdimin gwek.

Kire srëmkam, ki maka nwekam hla nul gwe'an,

hen ikim maka ësal gwe'an,

hen enhona maka ëhleng gwe-gwe'an.

Ki maka Abon osan dep etan lwanda ha'anzal,

hen Ëe dekam amaka dawem tabi'in.' "*"

²⁸ Paulus ki zep waulsuzimki, "Zen in zebë emsa gubirida'an: Sap em kire tangankame ënol drak-drak gwek, Alap mes Kristen zini asa gubiridaka- ëngaya gwen hap de ol dawemna insa de Yahudi srëm zi hip golzim halada gwen hapye. Hen zen sa desa nulin gwer!" ^{25a} Men zen ësane gwe'ak, zao zep zënaka keisa-keisa dabi'ik, hëndep ki zep kon sekwak gwek.

³⁰ Paulus Romak dare tahunkam gwëka- te-alakam de bohë tan golak. Zini men zen du në gweblak, zen man kon lup gulin gweka.

³¹ Zëwe udobe naban hen tru-tru gulblun srëmkam Bian Kristus Yesussu de taïblîblankam de Alap mo irîk gînnik bitî gwen hap denaka tonbirida gweka.

* 28:25-29 28:27 Yes. 6:9-10

Paulus mo surat Romak de Kristen zi hip

[1-7] 7a] Suratna an tîngare Romak de Kristen zi hip. Alap mes emsa kwasang gwibiridaka, dekam zep hen emsa kwang guludaka- dekam de zère mo irik ginnik bitî gwen hapye.

¹ Kristus Yesus mo nganak de syal gwe-gwen zini Paulus onakon. Asa hen Alap zao dep kwang taka, dekam zep hen asa dam tasîki- zère onakore ol dawemsa dikim gol halada gwen hapye.

² Ol dawemna an Alap mes orep zère mo olsa de ayang gul gwen zini anakan gu-gubirida gweka, "Èe asa lamkam ol dawemna ebe mae hap golzim." Zen dekam zep kirekam Alap mo ëpba olak ale nuk.

³⁻⁴ Ol dawemna an, zen Alap zère mo Tanena, nëno mae mo Teipsînnî Kristus Yesus hup dena. Auhukamanak de jaha gweblan nakon, Desa man enlala nëblak, "Daud Bak mo auyan-aza nakorena." Hwëna Alap kim zère mo sosonkam tîn nîkon ngaya taka, Zen dekam zep anakan tîngare zi hip zertreizimki, "An ère mo Tane- ère han de enho apde nënna."

⁵ Hëndep Alap hen Kristus onakon asa kwasang gweblaka, zep abe hap sosonna golblaka hen asa dam tasîki- dekam de Kristus zère hap denaka Yahudi srëm zi sin dep gol halada gwen hap denaye, zen dikim hen Yesusu taïbliëblan hap hen blikip gwesiblîn hap.

⁶ Zep Romak de zini emsa hen Alap man kwang guluda'ara- dekam de Kristus mo bi gwibinnik bitî gwen hap.

⁷ Dawem! Zen in zebë ep ale gulzim'in. Nère mae mo Bian Alap ne Bian Kristus Yesus ne sa kwasang-kwasang zemka mamkam ebe mae hap ol gwizimdi. Hen nen

zère nik mo taha terenak esa lowehe gwer.

Mae hap de ol: Paulus man tangan dwam gwe'anika Romak de Kristen zisi de amjanbin hip.

⁸ Zep nonol tanganna, èe Kristus Yesus onakon Bian Alap hap dawemsaë gol gwebla'an, sap Romak de zini, eno mae mo Yesusu de taïbliëblanna mes tîngare okamanak de ë-ë san nol haladak.

⁹ Zep Alapsa de gu sone gweblankam èe homë emsa eititi gwibirida gwenan. Alap men Zëbonë tîngare enho naban syal gwe-gwe'an, zère mo Tane hap de olsa de gol halada gwenkam, dikire Zen asa hla tak- èe de ahap gwenkamye.

¹⁰ Zen in zebë etan-etankam Alapsa anakan abe ta gwenan, "Bian, Em wëhë angkam orana abe hap kles tyasiblî'anika?- èe dikim Romak de Kristen zisi amjanbiridan hapye."

¹¹ Èe orep mesë sap dwam gwegwek- eban mae de golëgaing gwen hapye, dekam de Alap mo Enho nakore sosonkam eno mae mo eisi tatete gulzimdin hip.

¹² Zen dekam esa apdekam nënaka tatete la gwibir, sap nen mese apdekam Yesusu laïbliëblak.

¹³ Zep aya-wal oso-wal, èe mesë sap beyakam kalang gwe-gwek- emsa de amjanbiridan hapye. Hwëna ama sap akasik gwek. Sap èe ama enlala gwe-gwek- ebon mae onak de hen ano syal ei lwan hap, men kirekam hen aha Yahudi srëm zi mo langnak de ë-ënak lwakke.

¹⁴ Sap abe hap mes Alap syala wei yul soneblaka- tîngare zisi de Yesus hup de olkam tonbirida gwen hap, sap nëno mae mo Yunani olsa de tame gun wenya, hen desa de tame gun srëm wenya, sap sekola ha gwen wenya, hen sap sekola gwen srëm wenya.

¹⁵ Sap Alap kirekam de syalsa abe hap wei yul soneblaka, èe in zebë tangan dwam gwe-gwe'an- ol

dawemna insa de Romak de zini emsa hen tonbirida gwen hap.

Mae hap de ol: Yesus hup de ol dawemna an, Alap mo sosonna zëwe- zisi dikim ngaya tabin hip denaye.

¹⁶ Sap ëe homë saher gwe'an- zisi de Yesus hup de ola inkam tonbirida gwen hapye. Sap nen men zene ol dawemna insa laibli'ibin, nëno mae mo ëngaya gwen hap de sosonna zëwe lwa'an- nonol tangan Yahudi zini abe mae hap dena, hen sap tingare Yahudi srëm zi hip dena.

¹⁷ Sap ol dawemna in dekam Alap zi hip goltreizim'ira, "A kirekam esa ano nwenak ëdakastil." Sap zëre mo nwenak de ëdakastin hip dena, zen diki Kristussu de taibli'iblan en nakon nëbe mae hap hata gwizimnin. Aha orana hom tangan. Zen man dakasti'in- men kirekam Alap mo olak lwakye,

"Men zen ëre mo nwenak ëdakasti'in, zen kitak Asa de taibli'iblan en nakon."*

Mae hap de ol: Alap kire karek-karek hap zini jal gwibirida gwenda.

¹⁸ Alap mes ngatan zi mo lang nakon zëre mo jala goltrei gwizimki- men zen Zënaka eititi në gweblananke, zëbe mae hap. Sap zëre mae mo kirekam-kirekam karek-karekna, zen dekam zën eiwa dena ber-ber nul gwenan, zep hëndep Alapsa tame da srëm gwe-gwenan.

¹⁹ Sap Alapsa de tame tan hap dena mes tangan dam gwesik, sap Zen mes nëno mae mo enhonak Zënaka de tame tan hap dena ing ta soneka.

²⁰ Sap Alap kim okamana ansa yang gulsuku, Zënaka de tame tan hap dena mes zëwe anakan tame nul gwek, "Alapsa bëjen nwekam hla tan, hwëna Zen hëndep denaban de sosen tangan Zini Zen. Hen Alap Zen zi mo kim hom." Zen in zep, zini nen bëjen nen anakan ëgun, "Ëe homë Alapsa tame tak."

²¹ Zep zini mes sap Alapsa tame dak, hwëna hom blikip neisik gweblanan, hen dawemna hom nol gweblanan. Hwëna zen asyas makan enlala në gweblanan, zep hëndep enho nakon ëkawesik.

²² Zen man zënaka tim di gwibirin, "Ëe an enlala blala." Hwëna sap diki enlala joblo-topna.

²³ Zen zep hëndep de gwë gwen Teipsin tangan Zini Alapsa hom boklena kom da gweblanan. Zen hwëna yang tabin alap-alapsa boklena kom dabirida gwenan- zi nwe-masekam de wenya, mawa mo nwe-masekam de wenya, hen sapi mo nwe-masekam de wenya, hen sap wanya mae mo nwe-masekam de wenya.

²⁴ Zen zep Alap nwe enkam kara ta gwibirida, "Dikire zëre mae mo hole-hle san ang tak." Zen zep ëkahalo gwe-gwenkam zëre mae mo timni kun da gwibirin hen zënaka saherak kang nul gwenan.

²⁵ Zen dekam zep eiwa de Alapsa hli da gwenan- dekam de boton san ang ta gwen hap. Hwëna yang tabin kire-kire hap zep boklena kom da gwizimnin, hen zëbe mae hap de syalsa nol gwenan. Hwëna sap diki tangan okamana ansa Zen yang gulsuku, Desa en emaka boklena kom la gweblanan. Dikire hëndep denaban Zëna en naka boltere da gwek. In eiwa tangan.

²⁶ Zen zep Alap nwe enkam kara ta gwibirida, "Dikire zëre mae mo dwam-dwam san ang tak- saherak dekakim zënaka kang nul gwek." In zep we walya zi niban de swi ën hap baes ta gwenan- men kirekam sap diki Alap gubiridakaye. Hwëna we wal bose zeban de swi ën hap ëhole-hle gwe-gwenan.

²⁷ Zep zini hen kirekam. Zen hen wenya ban de swi ën hap man baes ta gwenan- men kirekam sap Alap gubiridakaye. Zen hwëna zi bose zeban de swi ën hap ëhole-hle gwe-gwenan. Zen dekam zep zënaka

* 1:17 1:17 Hab. 2:4

saherak kang nul gwenan. Zen dekon Alap mo jala hla nul gwenan-zëre mae mo karek gol gwen jam enkamye.

²⁸ Zep zini anakan de eenlala gwenna man baes tak, "Anik Alapsa tame tak." Alap hen zep nwe enkam kara ta gwibirki, "Dikire enlala kawesinnik lowehe gwek." Zen zep hëndep Alap mo dwam gwibin srëm san karek-karek enna syal nei gwibirin.

²⁹ Zen in zep zëno mae mo enhona tïngare karek-kareksa de gon hap de enlalakam beya gweka- men kiye,
totore swi hap dena,
te-ala beya gwen hap dena,
zi bosyansa de husus gweblan hap dena,
hen aha zi mo kire-kire dawemsa de dwam gwibin hip dena,
wal bose zemka de tan hap dena,
ëdarak gwen hap dena,
hen wal bose zemka de lwa tasïn hip dena,
hen taïl gïk gweblan hap dena,
hen ahasa de tonsubirida gwen hap dena.

³⁰ Hen ahakore karek-karekna mensa nulin halasen gwenan men kiye,
Alapsa de husus gweblan,
wal bose zemka de lamang tan,
zënaka de boltere tan,
hen zëna-zëna gwen,
hen bolte-bolte gwen.

Zen hen mes ëtewesik banakare karek ësesa de enlala gwibinni,
hen an-bi zemka de betek gwiziminni tawa naka hom.

³¹ Zep hëndep enlalana ëjoblo-top gwek.
Kire zisi bëjen taïblibiridan,
hen kire zi nik kwasang enlalana hom.
Zen jal enlala enkam lowehe gwenan.

³² Zen sap mes anakan tame nuk, "Alap kirekam de karek-karek syal gwe-gwibin zini sa kareknak kang gulu." Sap eiwa kirekam, hwëna

zëna mwin-mwankam kire karekna syal nei gwibirin. Hen karek gol gwen bose zemka, zen man anakan titi da gwibirin, "Sap esa kirekam ol tine gwer."

2

Mae hap de ol: Nen bap nen ëtim gul gwen, "Alap molya nësa klis gulku."

¹ Zen in zep, aya-wal oso-wal, em bëjen em anakan ëgun, "Eë homë anakan tame uk, 'Kirekam de syal gwibinni, zen kareknak ti'in.'" Sap em ema aha zisi enbirida gwenan, "Kirekam de kareksa gon zini, nen emaka karek la'an." Hwëna em de hen kire kareksa gonkam, dekam em mese Alap mo nwenak enaka kareknak de drënen hap zergunda. Sap ena hen kirena, hwëna aha mo karek ensae hlaul gwizim'ira.

² Zep ena hen mese tame uk, "Alap de kire zisi karek tabin hip man tangan dakasti'in."

³ Hwëna em de hen zëno mae mo kim kirekam de kareksa gonkam, em san ema ëkil gi'in?- "Alap aha zi ensa sa kire hap karek tabiri. Asa molya."

⁴ Em san ema hen Alapsa asyas makan kil li gwe'an?- "Alap man sërkam nësa kwasang gwibirida gwenda, hen Zen holokam nëno mae mo karek-karekna nwe enkam nöp kara gul gwizimnira, zep ëe sap asa karekna ol tine gwer." Hwëna Zen mae hap holokam emsa kwasang gwibirida gwenda: Emsa dikim halen ora san dam tasik gwibin hip.

⁵ Hwëna em in nol drak-drakna hen ëhalen hap ema baes ta'an! Em in zebe ere mae hap de jala mam ulsuk gwenan. Zep aumwa hap de klis gunnuk, emsa tangan sa sërkam karek tabiri, sap Zen enlala damdam enkam sa tïngan nësa klis gulu.

⁶ Sap zen kirekam Alap mo ola ban dakasti'in- men zen anakan lwakye, "Alap tïngare zi hip zëre mae mo syal ei jam enkam sa golzimdi- sap

dawemsa de gol gwen zi hip dena, hen kareksa de gol gwen zi hip denaye.”*

⁷ Dekam dawemsa de syal gwibinnik men zen tatetekam anakare enlala naban èzauk gwenan, “Èe akakim hëndep denaban zère mo ngatannak bose dawem naban gwë gwëk,” zèbe mae hap hëndep de èngaya gwen hap denaka sa golzimdi.

⁸ Hwëna men zen zère mae mo tim enna ngalap nei gwibirin, hen eiwa dena dokwak nul srëm gwe-gwenan, hen jal-jal ensa syal nei gwibirin, kirekam de zini Alap sèrkam tangan sa karek tabiri.

⁹ Tìngare zini men zen kareksa syal nei gwibirin, desa Alap sèrkam de kareknak sa kang gulu. Zao sa hëndep denaban go naban lowehe gwer- sap Yahudi zi, hen sap Yahudi srëm zi.

¹⁰ Hwëna men zen dawemna syal nei gwibirin, zèbe mae hap bose dawemsa sa golzimdi, hen Alap mo ngatannak sa hë'ho naban hëndep denaban lowehe gwer- sap Yahudi zi, hen sap Yahudi srëm zi.

¹¹ Sap Alap kim de klis gu'unka, Zen molya ahakore zi ausu ensa nwekam golëakeka.

¹² Zen in zep, Yahudi srëm zi ausuna, Alap Musa mo tìtì tabin olsa de enlala gwibin srëmkam sa zère mae mo karek-karek hap karek tabiri, sap zen hom desa tame nuk. Hwëna Yahudi zi ausuna, Musa mo tìtì tabin olsa de enlala gwibinkim sa zère mae mo karek-karek hap karek tabiri, sap zen mes desan de ang ta gwen hap Alapsa nen guk gweblak.

¹³ Sap Yahudi zini nen Musa mo tìtì tabin ola insa de èsane gwe-gwen en nakon bëjen nen Alap mo nwenak èdakastin. Zen diki men zen desa kitak syal neibir tine gwenan, zen zen èdakastin.

¹⁴ Hwëna Yahudi srëm zini, zen hom sap Musa mo tìtì tabin ola insa tame nul gwenan. Hwëna zen kim totoresa desan ang ta gwenan,

dekam mes dam gwesinìn, “Alap onakore tìtì tabin ola in ki- zèno mae mo enhonakye.” Sap zèbon mae hom- Musa mo tìtì tabin ol ale gunnu inye,

¹⁵ hwëna zèno mae mo syala kon man dam gwesinìn, “Alap mes desa zèno mae mo enhonak ing gul sonezimki.” Sap zèno mae mo enhonak ki anakare enlala naye, “Kiresa de gonkam èe mesè karek gwenan,” ahaksa, “Kiresa de gonkam èe dawemsaè syal gwibi'in.”

¹⁶ Zep lamkam Alap kim de klis gu'unka, tìngare zini nèbe mae hap Alap sa nère mae mo enhonak de enlalana insa zerwet sozimdi- kire enkam de nèsa klis gun hupye. Hwëna èe men kirekamè Kristus hup de ol dawemna ol halada gwenan, zen kirekam sa lwal: Tìngare zisi de klis gun hup de Zini, Zen diki Yesus, sap Alap mes zèbe hap desa de syal gwibin hip dena golblaka.

Mae hap de ol: Yahudi zini nèbon mae onakon Yahudi srëm zini Alapsa lamang da gwenan, sap nen Musa mo tìtì tabin ola insa èk enkame urensik gwenan.

¹⁷ Angkam Yahudi zini, nère mae en habè ale gulzim'in: Sap nen ema anakan ègu gwenan, “Nen an Yahudi zi sike. Nen Musa mo tìtì tabin olsa am urensik gwenan. Zep nèsa man-am Alap sam gwesibirida gwenda.”

¹⁸ Zep nen ema Alap mo dwam gwibinni tame ul gwenan, hen ora dawemna mese dam lasik. Sap Musa mo tìtì tabin ola in zen nèsa tan-tan ta gwibirin- nen dikim dawem naban karek naban kles so gwen hapye.

¹⁹ Nen ema nènaka enbirida gwenan, “Nen an nwe dìmìn zisi de ora dawem san zon guluda gwen hap de wenyà zen, hen kawesinnik de lowehe gwen wenyaka de ngatannak golëwet so gwen hap de wenyaye.”

* 2:6 2:6 Mzm. 62:12; Ams. 24:12

²⁰ Hen ema nënaka enlala eibirida gwenan, "Nen an Alap mo olsa de tawa ta gwibin hip de wenya zen. Ahakore zi ausuna, zen kitak enlala joblo-topna- walas bete-tek makarena, nen de tawa ta gwibin en hap dena." Nen kirekame nënaka boltere la gwibirin, sap nen Alap mo olsae urensik gwenan. Hen eiwa, okamanak awe kitak de tame gun hup dena, ausuna zëwe.

²¹ Zep nen Yahudi zini aha ensae titi la gwibirin, hwëna nëna hen ba habe desan ang ta srëm gwe-gwenan? Sap nen anakane tawa la gwibirin, "Bahem ësowë gwen." Hwëna nëna hen ba habe ësowë gwe-gwenan?

²² Hen nen ema titi la gwibirin, "Bahem ëkahalo gwen." Hwëna nëna hen ba habe ëkahalo gwe-gwenan? Anakan hen ema titi la gwibirin, "Yang tabin alapna bahem ang gwibirida gwen." Hwëna nëna hen ba habe zi mo yang tabin alap hap de kire-kirena sowëkam kap la gwenan?

²³ Zep nen an Musa mo titi tabin ola insa ëk enkame boltere ul gwenan, hwëna karekna insa ulin hana gwenan, zen Alapsae kim lamang la gwenan.

²⁴ Zen in zep Alap mo olak anakarekam lwak,

"Yahudi zini eno mae mo karek-karek gulin hana gwenna, zen dekon hen aha zi Alapsa lamang da gwenan."*

²⁵ Zen in zep, nen dwan Yahudi zini to mip blonsublun en nik em-am lowe he'an, sap Musa mo olak nëbe mae hap dena kirekam am lwak. Hwëna nen de Musa mo aha titi tabin ol san ang ta gwen srëmkam, ki Alap sa nësa enlala gwibiridala, "Zen san de to mip blom tasibin srëm wenya."

²⁶ Zep hen kirekam, Yahudi srëm zini men zen sowe henkam Musa mo titi tabin ol san ang ta gwenan, desa sa Alap enlala gwibiridala, "Zen sap to mip blom tasibin

srëmna, hwëna zen san de Yahudi zi tangan."

²⁷ Zep Yahudi zini nen de Musa mo ol san ëk enkam ang ta gwenkam, hwëna Yahudi srëm zini in de dawemkam ang ta gwenkam, ki zen sa hwëna aumwa hap de klis gun-nuk nësa anakan swrë dabir, "Zëna waba hap to mip blom tasibin nik lowehe gwëk, hwëna hom Musa mo titi tabin ola in san ang ta gwëk. Hwëna ëe sap to mip blom tasibin srëm nikë lowehëk, hwëna ëe Musa mo titi tabin ol san sowe henkamë ang ta gwëk."

²⁸ Sap tim en nik de Yahudi wal gwenna, zen waba tangan hap. Sap eiwakam de to mip blonsublunna, zen tim en nakon bëjen.

²⁹ Zen diki enho nakon de liwe henkam bap. Zep kirekam de ëliwehen wenya, zen zen ënwe-mase gwe'an- san de Yahudi zi tangan. Hen kirekam de ëliwe henna, zen Alap mo Enho mo syala kon ki lwa gwenan. Nëre mae mo sosen enkam de Musa mo ol ale gun sun ang tankam toton bëjen. Enho nakon de ëliwehe gwen wenya auhu-kama zini hom desa sam neisibirida gwenan. Hwëna Alap Zëna enna man sam gwesibirida gwenda.

3

Mae hap de ol: Mensa Alap Yahudi zi ausuna gu-gubiridaka, Zen molya desa eititi gwibirki. Zen sa hëndep sul sonezimdi.

¹ Hwëna ano ola insa, Yahudi zini sa husus neibir- mae hap, "Ki san Yahudi zikim de lowe henna hen to mip blom tasibinni zen waba hap?"

² Hwëna ëe ama kirekam de ëgun wenya insa ding gulzim'in, "Zen sap waba hap hom. Zen sap dawem tanganna." Sap Alap Yahudi zini nëbe mae en hap zëre mo ëpba ola golzimki.

³ Hen ahakon sa asa dakensiblil, "Yahudi zini nen Alapsa anakane en guk gweblak, 'Ee asa Musa mo titi tabin ola insa kitak syal ei

* 2:24 2:24 Yes. 52:5; Yeh. 36:22

gwibir.' Hwëna nen home sowe henkam desan ang tak. Zep san ha Alap hen molya zëre mo nësa de gu-gubiridanna nëbe mae hap sul sonezimki?"

⁴ Zen molya sul sonezim srëm gwëka. Sap mes dam gwesik, Alap bëjen boton gwen. Hwëna tingare zini zen boton tamna. Zen zep hen Daud Bak Alapsa anakan gubluka,

"Em eiwakame zisi klis gul gwenda, hëndep tingare zini hen kirekam sa Emsa nenblal. Men nara eno klis gunnu in kon ëgunnu, 'Ëe homë kirekam ëkarek gwëk,' hwëna Em dekam esa zëno mae mo karek-karekna tingare zi hip goltreizimdi. Zen dekam sa ësa her gwer."*

Zep Alap taibliblan tanganna, zep Zen bëjen sul sonezim srëm gwen-mensa gu-gubiridan naye.

⁵⁻⁸ Hwëna Yahudi zini em bahem Alap mo ebe mae hap de gu-gubiridanna insa kareksa dikim hwëna syal gwibin hip li yul sone gwen. ^{5,7}Sap ahakore Kristen gwen srëm Yahudi zini auhu-kama enlala naban anakan yasik da gwibirin, "Ëe sap kië karekna ol gwenan, hwëna Yahudi zini abe mae hap sap. Sap ano mae mo karek gol gwenna, zen dekon aha zi Alapsa anakan tame da'an, 'Zëno ola Yahudi zi hip dena botonsa hom.' Zep ano mae mo karek nakon Alap molya asa karek tabirki, sap zini dekon Zënaka tame da gwenan, 'Zen taibliblan tanganna.'" ⁸Hwëna kirekam bahem ëenlala gwe-gwen. Sap kirekam man nwe-mase gwe'ansan de anakan de ëgu gwenna kiye, "Nen kareksa gulin hana gwen-Alap dekamim dawemsa mamkam nëp gol gwizimki." Ahakon hen anakan asa lamang da gwëk, "Paulus in man kirekam yasik ta gwibi'ira." Kirekam de asa lamang ta gwen wanya, Alap de karek tabin hip man tangan ëdakasti'in.

* **3:4 3:4** Mzm. 51:6

* **3:12 3:12** Mzm. 14:1-3; 53:1-3

* **3:13 3:13** Mzm. 5:10; 140:4

* **3:14**

3:14 Mzm. 10:7

⁶Zep Alap eiwa taibliblan tanganna, hwëna bahem dekon anakan ëkil gil gwen, "Alap Yahudi zini ano mae en mo karek-karekna nwe-enkam sa kara gul gwizimdi." Kirekam hom tangan Alap hap sam gwesibli'an, sap Zen eiwa kitak de okamanak de zisi sa klis gulu.

Mae hap de ol: Tingare zini Alap mo nwenak dawemna hom.

⁹ Zep san ha Yahudi zi en hap sa Alap dawemna golzimdi?- hwëna aha zi ausu ensa sa zëre mae mo karek-karek nakon karek tabiri. Kina ki kirekam bëjen. Diki men kirekamë nonol emsa gubiridal, zen kirekam sa lwal: Sap Yahudi zi, sap Yahudi srëm zi, zëre mae mo karek-karek nakon tingan mes kareknak de kang gun hup ëdakastik.

¹⁰ Zep zen man Alap mo ol ale gun nuban dakasti'in- anakan men zen lwan dakye,

"Auhu-kama zini Alap mo nwenak de dakastinni aha-en mae hom tangan.

¹¹ Sap aha-en mae hom- Alap mo dwam gwibinsi de tame gun nuye, hen Desa de tëblan hap de enlala nabare zi niye.

¹² Tingare zini mes Alapsa hli dak. Kire zini Alap mo nwenak ase naban.

Hen dawemsa de gol gwen zini aha-en mae hom. Eiwa, hom tangan."*

¹³ "Zëno mae mo ol torankam men zen nopna ëk tihî nakon wet so gwenan, zen san de zi tok asena kiye.

Hen ol boton-botonkam man zënaka hit di gwibirin."

"Hen zëno mae mo ëk tihî nakon in zen wet so gwenan- san de wanya mo zisi de hit tinnak de sosonna kiye."*

¹⁴ "Zëno mae mo ëk tihî nakon men zen wet so gwenan, zen zisi de karek tabin en hap dena hen lamang ta gwibin en hap dena."*

15 “Zen man tangan zisi de tam-era gwen hap äsyal-syal gwe-gwenan.”

16 “Zini men desan ëtënda gwenan, zen karek ensa zi bose zikhip nolzimmira gwenan, hëndep zep enlalana ëdowe hana gwenan.”

17 “Zen hom aha zi niban de um-laekam golëlowehen hap de orana tame dak.”*

18 Hen “Alapsa de blikip gwesiblinna mes kitak baes tak.”*

19 Zep zi de kitak Alap mo nwenak ëkarek gwen hap de Alap mo ola in, zen Yahudi zini nen hen zëwe bitï gwe'an. Nen hwëna ema ëkil gïl gwek, “Musa mo titï tabin ol san de ang ta gwenkam esa Alap mo nwenak ëdakastil.” Hwëna Alap mo aha ola in kon man tangan dam gwesinïn, “Hom tangan zini- Alap mo nwenak de zëre mo syala kon dakastin niye.” Zen hwëna mae hap titï tabin ola insa nëp golzimki: Tingare zisi dikim saherak kang gun hup- Zen kim de nësa klis gu'unkaye, sap Yahudi zi, sap Yahudi srëm zi. Dekam toton nara dep?- Alapsa de anakan gublunna, “Ano karekna hom.”

20 Zep zini toton bëjen Alap mo nwenak ëdakastin- Musa mo titï tabin ola insa de syal gwe-gwibin nikonye. Sap titï tabin ola in, zen man nësa anakan hleng sosubirida gwenan, “Em in kitak kareksae ol gwenan.”

Mae hap de ol: Nen Yesussu de taibliblan en nakone Alap mo nwenak ëdakastil gwenan.

21 Zep nen de Alap mo nwenak ëdakastin hip dena, zen Musa mo titï tabin ol san de ang ta gwenkam bëjen. Hwëna angkam Alap zëre mo nwenak de ëdakastin hip de ora ësena mes nëbe mae hap sal tazimki. Hen ora ësena in hap dena Musa mo titï tabin olak hen Alap mo olsa de ayang gul gwen zi mo olak mes hamal hap ale nuk.

22 Zep angkam Alap mo nwenak de ëdakastin hip dena, zen diki Bian Yesussu de taibliblan en nakon. Kitak men zen de Yesussu daiblibla'ak, sap Yahudi zi, hen Yahudi srëm zi, zen zen sa Alap zëre mo nwenak ëdakastil. Sap zëre mo nwenak, zi ausuna srën-srënkam hom,

23 hwëna kitak kareksa nulin halasen gwenan, hëndep zep Alap zëre onakon mes ëlanga gwesik hen kawesinnik lowehe gwenan.

24 Sap eiwa kirekam, hwëna angkam Alap zëre mo kwasangkwasang en nakon nësa zëre mo ngatan san dep golëwet so gwe'araba maesa de zëbe hap syal gwibirblin srëmkam. Zep Kristus onakon nësa gubirida'ara, “Angkam em mese ëdakastil- ëre mo nwenakye.”

25 Sap Alap mes Yesussu zer soneka- dekam de orasa nëbe mae hap kles tyasizimdin hip, nen dikim zëno kala kon zëre mo nwenak ëngan gwehen hap denaye. Zep nen de kirekam Yesussu taibliblankam, dekam nëno mae mo karek-karekna man nëp tap gulsuk gwizimmira, hen hom etan nësa jal gwibirida'ara. Zen Alap mae hap ki kirekam syal gwibirki: Dekam de zi Zënaka anakan tame tan hap, “Zen eiwa enlala dam-dam enkam klis gul gwenda.” Sap menkam Alap holokam zi mo karek-karekna nwe enkam kara gul gwizimki.

26 Hwëna angkam Kristus onakon zep Alap anakan klis gul gwizim'ira, “Men zen Yesussu daibli gwebela'an, zen zen ëre mo nwenak ëdakastil gwe'an. Men zen daiblibla srëm gwe'an, zen hom.” Kirekam de Alap klis gulzimdinni airis, sap Zen Zën zëre mo nwenak dikim ëdakastin hip de orana insa zerzimki.

27 Zep angkam nen bëjen nen nënaka anakan boltere ta gwibin, “Eë mes-am ëre mo syala kon Alap mo nwenak dakastik.” Diki tangan Alap mo nwenak de ëdakastin hip dena zen Yesussu de taibliblan en

* 3:17 3:17 Yes. 59:7-8 * 3:18 3:18 Mzm. 36:2

nakon.

²⁸ Sap nen Kristussu de taïbliḅlan en nakone ḅdakastī'in. Musa mo tīti tabin olsa de syal gwe-gwibin nikon hom. Zep nen bējen nen nēnaka anakan boltere ta gwibin, "Ēe ěre mo syala konē dakastī'in."

²⁹ Zep Yahudi zini nen bap nen ěkil gīl gwen, "Alap, Zen ano mae en mo. Aha zi ausu mo Alapsa hom." Zen hen aha zi ausu mo Alap sake!

³⁰ Sap nēno mae mo Alapna aha-en. Zen Zen Yahudi zini nēbe mae hap zēre mo nwenak dikim ḅdakastīn hīp dena Kristussu de taïbliḅlan nakon gol gwizim'ira. Hen Yahudi srēm zi hīp Zen hen kire hap dena Kristussu de taïbliḅlan nakon gol gwizim'ira.

³¹ Hwēna kirekam de lwankam, zini sa asa anakan dakensīḅlīl, "Ki san em mese Musa mo tīti tabin ola insa zalta dep tahan san gwei gubir kīnīla?" Kirekam bējen. Hwēna nen mese tīti tabin ola insa eiwa de uk, sap nen de Kristus onakon ěngaya gwen hap dena mes zēwe hamal hap ale nuk.

4

Mae hap de ol: Abraham Bak zen hen Alapsa de taïbliḅlan en nakon Alap mo nwenak dakastīlki.

¹ Zep Yahudi zini, nēno mae mo auyanna Abraham Baksa de enlala gweblankam, zen banakan gwēka?-zep Alap mo nwenak dakastīlkiye. *

² Zen de zēre mo syala kon Alap mo nwenak dakastīnkīm, zen maka anakan zēnaka boltere taka, "Ēe mesē aha zisi beya tangankam kweikwik guk." Hwēna zen bējen Alap mo nwenak kirekam zēnaka boltere tan.

³ Sap zēbe hap dena Alap mo olak anakan lwak,

* **4:1 4:1** Alap zēre mo nwenak de dakastīn hīp dena insa gubluka, zen in kim Abrahamsa hamal hap auyan-aza zeban de hē'ho gwibin tangan naka zihlaun hup dena gu-gublukake. Hwēna dekam Abraham bogolik walas srēmcam gwē'anca. Sap kirekam hwēna zen Alap mo gu-gublun ola insa man taïḅlībirki. Zen zep Alap anakan gubluka, 'Em mese ěre mo nwenak dakastīlī.' (Kej. 15:1-16; Rom. 4:13; Gal. 3:6) * **4:3 4:3** Kej. 15:6 * **4:8 4:8** Mzm. 32:1-2

"Abraham zen Alapsa taïḅlīḅlaka, zep Alap anakan gubluka, 'Em mese ěre mo nwenak dakastīlī.' "*

⁴ Zep anakarekam lwa'an: Zi de te-ala hap syal gwenkam, mam zik de te-alana insa golblankam, zen bējen anakan enlala gweḅlan, "Zen totoresa ap golḅlala." Hwēna zen sa anakan enlala gwera, "An ěre mo syala kon ap golḅlala." Zep hen kirekam, zi de Alap de dawemsa zēbe hap golḅlan hap syal gwenna, zen bējen anakan enlala gwen, "Zen totoresa abe hap golḅlaka."

⁵ Hwēna zini men zen ěsyal gwen srēmcam Alap ensa anakan daïḅlīḅla'an, "Karek gol gwen zi hīp Zen Zēn ngaya gwen hap dena totoresa Kristus onakon gol gwizimnira," zen eiwa kire zisi Alap gubirida'ara, "Zen zen ano nwenak ḅdakastī'in."

⁶ Zen in zep Daud Bak hen kirekam enlala gweka- isrip-sri gwibinnik de lowehen wenya kim hamal hap hlauluda gukuye, men desa Alap zēre hap de ba maesa syal gwibir-blin srēmcam anakan gubirida'araye, "Em ema ano nwenak ḅdakastī'in." Daud anakan gubiridaka,

⁷ "Zini men zēno mae mo karek-kareksa Alap ngan gulsuk gwizim'ira hen tap gulsuk gwizim'ira, zen isrip-sri gwibinnik lowehe gwe'an.

⁸ Hen men zēno mae mo karek-kareksa Alap aītḅir-zim srēm gwe'ara, zen hen isrip-sri gwibinnik lowehe gwe'an."*

⁹ Men zen de kirekam isrip-sri gwibinnik lowe he'ak, zen Yahudi zi en molya. Hwēna zen hen Yahudi srēm zi niban esa apdenak. Sap nen mese Abraham hap dena insa anakan tame uk, "Zen Alapsa

taibliblaka, dekon en zep Alap mo nwenak dakastilki."

10 Zep Alap kim Abrahamsa kirekam gubluka, san ha to mip blonsublun naka? San ha kire srēm naka? Zen eiwa dekam to mip blonsublun srēm nik gwē'anaka-Alap in kim kirekam gublukaye!

11 Zen hwēna hyanak to mip blonsun hup gubluka- dekam de zēnaka anakan zertrēn hap, "Ēe mesē Alapsa taibliblak- men dekam asa anakan gublukaye, 'Em mese ēre mo nwenak dakastili.'" Zen in zep Abraham Bak nwe-mase gwe'ara, zen hen to mip blonsublun srēm nik mo bian- tingan men zen Alapsa de taibliblan nakon zēre mo nwenak ēdakastil gwenanye.

12 Hen kirekam Abraham Bak zen tīngare to mip blom tasibir-zimdin nik mo Bian- men zen en Alapsa zēre mo kim daiblibla'anke, men kirekam Abraham zēna to mip blonsublun srēmna taibliblakake.

Mae hap de ol: Alap mensa Abrahamsa gu-gubluka, dawemsa de auyan-aza zikhip golzimdin hip dena, zen hwēna Alapsa de taibliblan enkam esa ulin.

13 Alap mensa Abrahamsa gu-gubluka, auyan-aza zeban de okamasa zibi gwibin hip, zen dwan Musa mo titi tabin ol de hatan srēmna kirekam gu-gubluka. Zep Abraham dekam hom desan ang gweka- dekam de Alap mo nwenak dakastin hip, hen dekam de dawemna insa golblan hapye. Zen hwēna Alapsa de taibliblan en nakon ki zēbe hap kirekam lwablak.

14 Sap anakan de lwa'anam, "Titi tabin ol en san de ang tankam esa Abraham mo walas hap ēliweher," ki Alap menkam waba hap Abrahamsa gu-gubluka- zēre mo nwenak de dakastin hip. Hen nēbe mae hap Abraham mo kim de Alapsa taibliblanna waba hap maka lwa'an.

15 Eiwa, nen bējen nen titi tabin ol san de ang ta gwen en nakon ēdakastin. Sap zini men zen desan de ang tan hap ēalp gwe-gwenan, hwēna sul sonenna toton banakan dep? Zen in zep Alap mo jal ennak lowehe tine gwenan. Diki titi tabin ola in de lwan srēmna bap. Dekam basa molye ulmun gwe'anam!

16 Zen in zep, Alapsa de taibliblanna kunci makan nēbe mae hap lwazim'in! Sap Alap man nēsa anakan dwam gwibirida gwe'ara, "Ēe mensaē Abrahamsa orep gu-gubluk, zen dikire totoresasa Yesusu de taibliblan en nakon nulin gwek." Zen eiwa nen esa ulin- sap Yahudi zini men zen Musa mo ola nama enlala nei gwibirin, hen sap Yahudi srēm zini men zen desa enlala neibir srēm gwe-gwenanye. Sap nen ema Abraham mo kim Alapsa laiblibla'an. Zen in zep Abraham Bak anakan nwe-mase gweka, "Zen tīngare Alapsa de taibliblan zini nēno mae mo bian."

17 Zen zep Alap Abrahamsa anakan gu-gubluka,

"Ēe ama emsa gublu'an- zi ausu beya mo bian hap de jowen hap."* Zep Alap mo ola in kon, Abraham man nwe-mase gwe'ara, "Zen nēno mae mo bian." Sap zen Alapsa anakan taibliblaka, "Zen Zen juwen zisi ngaya ta gwibirida, hen Zen Zen ba maena totoresasa de jowen hap ol gu anen enkam gu gwibirida."

18 Diki Abraham maka anakan enlala gweka, "An molya kirekam lwak, sap ēe we walya ban mesē tanggan bogol ēk. Zep ēe banakan dep?-walas ēn naye." Hwēna zen nama Alapsa taibliblaka- mensa anakan gu-gublukake,

"Zi ausu beyana emsa 'bian'kam sa nen gweblal." Sap Alap mes hen anakan gu-gubluka,

* 4:17 4:17 Kej. 17:5 * 4:18 4:18 Kej. 17:5; 15:5

“Eno auyan-aza tane walya sa beya gwe song gwer- san de nglinak de keis mo beyana kiye.”*

¹⁹ Abraham dekam hom mae anakan enlala gweka, “Èe banakan asa walas èr?- sap èe an tìn hìp mes-am tangan golek de gwer. Sap ano gwèn tahunna seratusnuk dep man-am golek de gwe'an. Hen Sara Bak mo wal gola mes-am yok gwibik.”

²⁰ Sap eiwa kirekam, hwëna Abraham mo Alapsa de taibliblanna hom mae sin gweblak. Hwëna man tangan tatete gweblak. Zen zep tangan Alapsa anakarekam boltere taka, “Bian, Ema asa sam taka, sap men kirekam asa gu-gubluka, Em esa kirekam ap syal gwibir-blira.”

²¹ Hen zen man tangan Alapsa anakan taibliblaka, “Men desa asa gu-guk gweblaka, zëno sosonna ki-kirekam de owas-owassa dikim abe hap syal gwe-gwibir-blin hap de-naye.”

²² Zen sèrkam tangan Alapsa taibliblaka, zen in zep zëbe hap dena Alap mo olak anakan lwak,

“Em mese ère mo nwenak dakastili.”

²³ Alap mo nwenak de dakastin hìp dena insa ale nuk, zen Abraham en hap hom.

²⁴ Zen hwëna kitak nèbe mae hap- men zene Alapsa anakan laiblibla'anke, “Zen eiwa mes Bian Yesussu tìn nikon ngaya taka.” Kirekam de taibliblanna in, nen dekone Alap mo nwenak èdakasti'in.

²⁵ Sap Alap Zen nëno mae mo karek-karek hap Yesussu tìn hìp sosok taka, hwëna ki zep etan ngaya taka- dekam de nen anakan tame gun hup, “Nen an zene Desa laiblibla'an, nen ema Alap mo nwenak èdakasti'in.”

5

Mae hap de ol: Nen mese Alap han èrumlae gwek, zebe isrip-sri naban lowehe gwe'an.

¹ Zen in zep, sap nen mese Kristussu de taibliblan nakon Alap mo

nwenak èdakastik, zen in zebe Alap han èrumlae gwe'an. Zen kitak Bian Yesus mo syala kon ki kirekam lwak.

² Sap nen mese Yesussu kirekam laibliblak, zen in zebe hen Alap mo kwasang-kwasangnak lowehe gwe'an. Nen in zebe èisrip-sri gwe-gwe'an, sap nen ema hen Alapsa anakan laiblibla'an, “Zen sa eiwa zëre mo ngatannak de lowehen hap dena nèbe mae hap golzimdi.”

³ Hen kareksa de goltowe gwen nakon zebe èisrip-sri gwe-gwenan, sap nen mese anakan tame uk, “Kareksa de goltowe gwenkam, zen dekam tangan esa Yesussu de taibliblannak de tatem èzauk gwen hap dena tame ul.”

⁴ Kareksa de goltowe gwennake tatem èzauk gwe'ak, zen dekam esa Alapsa de taibliblannak èzise gwer. Hen kirekam de èzise gwenkam, zen dekam tangan esa Alapsa de anakan taibliblanna esek ulse gwer, “Eiwa, nen esa tangan ulin- mensa Alap zëre mo walas hap de golzimdin hip gu-gubirida gwekaye.”

⁵ Sap nen mese tangan Alap mo gu-gubiridanna insa de gul irin hip laiblibik, zen zebe enlalana èdowe hana srèm gwe-gwenan. Sap nen ema nère mae mo enhonak anakan eis gwibirin, “Eiwa, Alap mo nèbe mae hap de kwasangna mam tanganna.” Kire enlalana in, zen Alap zëre mo Enho nèp ing ta sone gwiz-immira, sap nen eiwa zëre mo Enho nabane èrgwë gwenan.

⁶ Nen kime anakarenak lowe he'ak, “Toton banakan dep?- nënaka de ngaya tabin niye,” hwëna kirenak zep Kristus hataka- Alapsa de tame tan srèm zini nèbe mae hap de tìn hipye.

⁷ Zen owaskam ki lwak. Sap zini nen home nabakam nënaka tìn hìp sosok la gwibirin- dekam de aha zisi ngaya tabin hipye, sap zi dawem mae hap. Hwëna san ha emaka hen nère mae mo timni olgu'un?- wal bose dawem mae hap de tìn hipye.

⁸ Sap eiwa zini nen kirekam.

Hwëna Alap zëre mo kwasangsa sërkam tangan nèbe mae hap goltreizimki, zep hëndep karek-karek gol gwen zini nèbe mae hap Kristus tilki.

⁹ Zen in zep, mes tangan dam gwesin'in: Sap nen mese Kristus mo kala kon Alap mo nwenak ëdakastil, Kristus hen sa nësa Alap mo jala kon il gwe hebiridala.

¹⁰ Sap nen kime Alap mo gil-gil gwibiridan zi mo kim lowe he'ak, hwëna Tane zem Yesus dekam zep nèbe mae hap tilki- nësa dikim Alap golëumlae gwen hapye. Zep angkam mes tangan dam gwesin'in: Kristus sa nësa Alap mo jal hil gin nikon il gwe hebiridala. Sap Zen mes eiwa tin nikon ngaya gweka, hen Zen nama nësa de mas gwibirida gwen hap gwë'ara.*

¹¹ Sap eiwa nen mese kirekam Alap han ërumlae gwëk, zen in zebe tangan ëisrip-sri gwe-gwe'an. Zen kitak Bian Yesus onakon ki kirekam nèbe mae hap lwazimk.

Mae hap de ol: Adam Bak zen tin hip de orana zen nèbe mae hap kles tyasizimki, hwëna Kristus Zen Zen ëngaya gwen hap de orana kles tyasizimki.

¹² Zep a kirekam mo lwakye: Adam Bak kim kareknak zanka, zen dekam zep kareksa de gol gwen hap de sosonna hen kire hap de hole-hlena okamanak de zinik kitak ing gwe hebiridak, hëndep angkam zep tingare zini karekna nolada gwenan. Hëndep Adam Bak mo karekna in kon zep hen tin hip de sosonna tingare zi hip hata gwizimnin. Zen in zebe hëndep angkam juwe gwe'an, sap kitak de zini nen Adam mo kime kareksa ol gwenan.

¹³ Dekam hwëna Adam Bak mo hyanak, zini dekam sap karekna nol gwëk- Musa de hatan srëmnakye. Hwëna desa bëjen anakan gubiridan, "Zen Musa mo titi tabin olsa nulmun gwëk," sap dekam Musa

mo titi tabin ola hom okamanak hata'ak.

¹⁴ Sap eiwa kirekam, hwëna Adam Bak mo hyanak hëndep in kim Musa Bak hataka, dekam tin hip de sosonna nama okamana ansa bi gwibik. Hwëna dekam de zini sap hom Adam Bak mo kim Alap mo jalse gwen ola nulmun gwëk, hwëna ki juwe gwëk. Zen in zep Adam han Kristus hun, zen apdenak hom, hwëna tingare zini zëbon nebon onakon nulin gwenan.

¹⁵ Zen in zebe nen srën-srënkam ulin gwenan: Adam onakon zen kareksa de gol gwen hap denaka. Hwëna Yesus onakon, zen Alap onakore kwasang-kwasangsa ulin gwenan. Aha-ere zini Adam kim Alap mo jalse gwen ola gulmunku, dekon zep hëndep tingare zini juwen hap dena insa nulink. Hwëna angkam man tangan dam gwesin'in: Aha-ere Zini Kristus onakon beya tangan nik esa hen hëndep de ëgwën hap dena ulin gwer, sap Alap mo nèbe mae hap de kwasang-kwasangna Zëbon onakon man tangan taman kin'i gwenan.

¹⁶ Aha zini Adam Bak mo karek gon nakon, kitak de zini dekam zep Alap mo jalak de kang gun hup ëdakasti'in. Hwëna mensa Alap angkam syal gwibir-zim'ira, zen wehasa hom! Sap zi mo karekna kim tangan mam gwe song gwëk, dekam zep hwëna Alap Kristus onakon zëre mo nwenak dikim ëdakastin hip de orana totoresa kles tyasizimki.

¹⁷ Zep aha-ere zi mo karek nakon, zep tingare zini juwe gwenan. Hwëna tingan men zen Alap mo sërkam de kwasang-kwasang nakon zëre mo nwenak ëdakastil gwenan, zen zen zep karek gol gwen hap de sosonna in kon hen juwen hap de soson nakon wet so gwe-gwenan. Zen kitak aha-ere Zini Kristus Yesus onakon- men Zen sa hëndep denaban nësa golëlowehe gweraye.

¹⁸ Zep Alap aha-ere zi mo karek nakon zep tingare zini karek tabin

* 5:10 5:10 Ibr. 4:14-16; 7:23-28

hip gubiridaka. Hen kirekam, kim aha Zini in Alap mo dwam gwibin sin Zënaka zerguku, zep tingan men zen de Desa ang në gwebla'ak, zen sa Alap mo nwenak ëdakastil, hëndep zep sa ëngaya gwer.

¹⁹ Hen kirekam, aha-ere zini kim Alap mo jalse gwen ola insa gulmunku, zen dekam zep tingare zini Alap gubiridaka, "Zen kitak kareksa de gol gwenna." Hwëna aha Zini kim nër hom Alap mo dwam gwibin tanganna syal gwibirki, zen dekam zep Alap zëre mo nwenak dikim ëdakastin hip de orana zi beyana nëbe mae hap kles tyasizimki.

²⁰ Zep Alap mae hap titi tabin ola insa Musa hap golblaka: Dekam de zë zi zëre mae mo karek-kareksa anakan tame gun hup, "Nen eiwa beyakame karekna ol gwënan." Hwëna karekna kim tangan mam nul song gwëk, hwëna Alap mo nëbe mae hap de kwasang-kwasangna dekam hen man tangan taman kinik.

²¹ Zen in zep, men kirekam kareksa de gol gwen hap de sosonna tingare zini nësa bi gwibiridak, hëndep dekon zebe juwe gwënan, hwëna angkam Alap mo kwasang-kwasang mo soson nësa bi gwibirida'an. Zen dekon zebe hwëna Alap mo nwenak ëdakastil gwe'an, hen hëndep de lowehe gwen hap dena dekam zebe Bian Kristus Yesus onakon ulin gwe'an.

6

Kristen zini nen de anakan ëenlala gwe-gwen hap de ol: "Yesus hun Zen abanë lik, hen kim ngaya gwëka, Zen abanë ngaya ëk."

¹ Hwëna em ahakon anakan esa asa enblal, "Alap man-am nëbe mae hap Kristus onakon kwasangna mam gulsuk gwizimnira, zep nen sap esa karekna ol tine gwer."

² Hwëna kirekam bëjen! Nen mese kareksa de gol gwen hap de soson nakon juwek, zep angkam bap nen etan zëwe lowehen.

³ Em san home ansa tame u'in? Nen kime baptis tabin sin ang ta gwëk, dekam zebe nënaka Alap hap anakan olëtrë gwëblak, "Ëe ama Bian Yesus hun de zeraha-en gwen hap dwam gwe'an." Zep Zen kim tilki, zen san de nëban mae de golëjuwenna kiye.

⁴ Zep nen kime baptis tabin sin ang ta gwëk, zen dekam zebe ënwe-mase gwëk- san de Kristus mae han de apdenak kama hulak kang gul nenna kiye. Hen kirekam, Alap kim zëre mo ngatan zi mo lang nakore sosonkam Kristussu tin nikon ngaya taka, zen dekam zebe anakan hen eisbi'in- san de juwen nakon de ëngaya gwenna kiye. Nëno mae mo lowe henna dekam zep lowehen ëse san dep liwehe gwënan.

⁵ Zep insa Yesus kirekam nësa golëjuwëka, zen dekon zep dam gwësinin: Nen esa Deban etan ërngaya gwer.

⁶ Zep angkam tangan mes anakan dam gwësil, "Nëno mae mo auhukama zi mo hole-hlena mes Kristus te-lidak sonnack goltiki." Zep nen angkam mese kareksa de gol gwen hap de soson nakon wet so gwer-men zen sap nësa bi gwibiridakye, okamanak de timni an de tin makan.

⁷ Sap nen kime juwe gwënan, zen dekame kareksa de gol gwen hap de soson nakon wet so gwe-gwënan. Zep hen kirekam- nësa kim Kristus golëjuwëkaye.

⁸ Nësa eiwa mes Kristus golëjuwëka. Zen in zebe angkam anakan laiblibla'an, "Zen Zen sa asa golëlowehe gwëra."

⁹ Sap nen mese anakan tame uk, "Kristussu mes Alap tin nikon ngaya taka, zep Zen molya etan tilki." Angkam tin hip de sosonna molya etan Desa dot soblak.

¹⁰ Zen kim aha-rok'nen tilki, dekam zep kareksa de gol gwen hap de sosonna men zen tingare zini nësa bi gwibiridak, desa goltiki. Zep Zen molya etan kire hap Zënaka sosok taka, hwëna angkam Alap en

mo bosesa de mam gulblun hap gwë gwe'ara.

¹¹ Nen hen kirekam nen nënaka enlala gwibirida gwen, “Èe mesë angkam kareksa de gol gwen nakon tük, hen angkam Kristus hun de zeraha-en gwenkam Alap en mo bosesa de mam gulblun en habë gwë'an.”

¹² Etan bap zen kareksa de gol gwen hap de sosonna nëno mae mo auhu-kama timni bi gwibin- dekam de zëno hole-hle san ang ta gwen hapye.

¹³ Nen bap nen nëre mae mo timnik de hli-hlina aha-en mae dowal mo kigì mo syal san dikim ang gwen hap sosok gul gwen. Diki Alap en hap nen sosok gul gweblan. Sap nen menkam tok-tok makare nike lowehe gwëk, hwëna angkam Zen mes nësa ngaya tabirki. Zep nëno mae mo timnik de hli-hlina diki Alap en mo dwam gwibin sin dikim ang ta gwen hap nen sosok gul gwen.

¹⁴ Zen in zep, kareksa de gol gwen hap de sosonna bap zen etan nësa bi gwibiridan. Sap nen home angkam Musa mo titi tabin ola anakare enlala naban blol eibi'in, “Èe dekon asa Alap mo nwenak ëdakastil.” Hwëna angkam Kristus hun de zeraha-en gwenkame zëre onakore kwasang-kwasang ensa blol eibi'in. Zep nen mese kareksa de gol gwen hap de soson nakon ëhil gwe hanal.

Mae hap de ol: Sap nen kareksa de gol gwen hap de soson nakon mese ëhil gwe hanal, nen esa nëre mae mo timsi Alap hap sosok ulblir.

¹⁵ Hwëna kirekam insa lwa'an, ahakon anakan esa ëgul, “Nen home angkam Musa mo titi tabin olsa de syal gwe-gwibinkim Alap mo nwenak de ëdakastin hip ëalp gwe-gwenan, sap nen mese Kristus mo kwasang-kwasang nakon ba maesa de syal gwibir-blin srëmkam ëdakastik. Zep sap esa karekna ol gwer.” Hwëna kirekam bëjen.

¹⁶ Diki anakan emaka dam ulsu'un, “Èyë ère mo timsi aha zisi de ang gweblan hap sosok gu'uk, dekam èe san de zëbon de babu gwenna kiye.” Zep hen kirekam, eme ere mo timsi kareksa de gol gwen hap sosok u'ik, dekam Alapsa ema syauk bla san dep hli la'an. Diki Alap habe sosok ulbli'ak, dekam esa enho nakon ëliwehe gwer- zëre mo dwam gwibinsi dikim syal gwibin hipye.

¹⁷ Hwëna dawemsa nen Alap hap gol gweblan! Sap menkam nësa kareksa de gol gwen hap de soson bi gwibiridak. Hwëna angkam nen mese tngare enho naban ang tal-ëngaya gwen hap de ol dawemna ansa Alap nëbe mae hap golzimkiye.

¹⁸ Zep nen angkam mese Kristus onakon kareksa de gol gwen hap de soson nakon ëhil gwe hanal. Zep angkam men Zen nësa irik gi'ira, Zen Alap. Zebe enho nakon zëre mo dwam gwibinsi dikim syal gwibin hip ëdwam gwe-gwe'an.

¹⁹ Èe anik dam-dam enkam srip gulsuzimk- dekam deka auhu-kama enlala zi ano ola ansa karekkam tame nul srëm gwëk: Nen menkam nëre mae mo timni kirekam-kirekam jal-jal hen hole-hle san dikim ang ta gwen habe sosok ul tine gwëk. Hwëna angkam nëre mae mo timni Alap mo dwam gwibin en san dikim lowehen hap nen sosok gul gwen- ekakim Alap mo nwenak ëtal gwesik.

²⁰ Nësa kim kareksa de gol gwen hap dena bi gwibiridak, Kristus dekam hom nëban mae enho nakon golëgwë gwëka- dekam de nësa ora dawem san dep dam tasik gwibin hipye.

²¹ Hwëna nen waba tangan habe zëwe ëbabu gwe-gwëk! Zen in zebe angkam ësa her gwe-gwe'an- nëre mae mo lowehen ëpbana insa de enlala gwe-gwibinkimye. Sap nen dekam juwen en hap de ora sane ang ta'ak.

²² Hwëna angkam nen mese

kareksa de gol gwen hap de sosonna in kon ëhil gwe hanal, dekam zebe hwëna Alap hon ëbabu gwe-gwe'an. Hen zen waba hap hom. Zen zebe angkam Alap hon de ëtal gwesïnkim ëliwehe gwe'an, hen hëndep de gwën hap dena zen dekon esa ulin.

²³ Sap kareksa de gol gwenkam, dekam hwëna tïn hip de ora san esa ang tal. Hwëna Bian Kristus Yesus hun de zeraha-en gwenkam, dekam Alap hëndep de gwën hap dena totoresana nëbe mae hap gol gwizimnira.

7

Mae hap de ol: Nen mese Musa mo titi tabin ola kon ëhil gwe hanak.

¹ Aya-wal oso-wal, em mese Musa mo titi tabin ola tame uk. Zen in zebë emsa enlala sobirida'an: Titi tabin ola in, nen kim nama okamanak lowehe gwenan, zen dekam en dep dena. Tinkim Musa mo titi tabin ola in sa ema hli kul gwenan.

² Zen san de we-zi dare de zënaka leisyanna kiye. Titi tabin ola kon, zini in de nama gwënnak, wenya in bap zen aha zisi zen. Hwëna zi zik de tinkim, dekam titi tabin ola in hom tru-tru gulbi'in- zen de aha zisi zen hapye.

³ Wenya in de nonol zi zeban nama ënnak aha zisi zenkam, dekam emaka enbi'in, "Zen mes kahalo gwëk." Hwëna zi zik de tinkim de aha zisi zenkam, dekam bëjen anakan enlala gwibin, "Zen man kahalo gwëk." Sap dekam zen mes titi tabin ola in kon hil gwe hanak.

⁴ Zen in zep hen angkam nëbe mae hap kirekam lwa'an: Sap nësä mes Kristus te-lidak sonnäk golëjuweka, zep nen angkam mese Musa mo titi tabin ola kon ëhil gwe hanak. Hen angkam nen mese tïn nikon de ngaya gwen Zini Kristus hun ëraha-en gwer. Zep nen an angkam mese Kristus mo bi gwibiridan zi hip ëliweher- Alap mo bosesa dikim mam gun hup ekakim dawemsa syal ei gwibik.

⁵ Nen kime auhu-kama ennak de enlalakam lowehe gwëk, dekam auhu-kama tim nikore hole-hlena man tangan nësä kyang gulsuk gwëk. Dekam kim Musa mo titi tabin ola in san de ang tan hap sap ëalp gwe-gwëk, dekam tangan zep hwëna auhu-kama tim nikore hole-hlena mam gwe song gwëk. Hëndep dekam zebe ein juwen ora san ang ta gwëk.

⁶ Hwëna angkam nen mese titi tabin ola in kon ëhil gwe hanal- nen kime Kristus mae han apdekam juwekke. Zep angkam Alap zëre mo Enho nësä enho nakon titi ta gwibi'ira, zebe tingare enho naban Bian mo dwam gwibin sin ang ta gwe'an- Musa mo olsa de enlala gwibin srëmkamye.

Paulus kim kareksa de gol gwen hap de sosen naban golejia gwëkake:

⁷ Hwëna bahem ano ola kon ëkil gin, "Titi tabin ola mensa Alap Musa Bak hap golblaka, zen karekna." Zen sap karek naka hom. Hwëna ëe dekonë ëre mo karek-karekna tame guk. Zëwe kimë anakarekam sane gwe-gwëk, "Zi mo bi gwibin kirekirena bahem dwam gwe-gwibin," dekon zebë tame guk, "Hare ano dwam-dwam enlalana an kareknak am ti'in!"

⁸ Hwëna dekam zep kareksa de gol gwen hap de sosonna in ano enhonak kirekam-kirekam dwam-dwam enlalasa ap beya gul gwëblak. Sap kareksa de gol gwen hap de sosonna in, enho nakon anakan asa titi ta gwëk, "Em sap esa jalse gwen ola in sa ngip gul gwëra." Hwëna jalse gwen ola in de lwan srëmkam, ki molya ngip gun hup kirekam asa titi ta gwe'anam.

⁹ Eë kimë orep Musa mo jalse gwen ola in sa tame gul srëm gwë'ak, ëe dekam ëre mo gwënnä ama eis gwibik, "Eë dawemkamë gwë gwenan." Hwëna jalse gwen ola in sa kimë tame guk, dekam zebë anakan eisbik, "Eë an hare kareksa de gol

gwen zi sike, zep ëe hen syauk sun dep am-am gwë ha'an."

¹⁰ Zep Musa mo titi tabin ola in sap airis. Hwëna ëe ama menkam desa hen kil gi'ik, "Ee dekon asa ngaya gwer." Hwëna ëe desan kimë sap alp gwe'ak, dekam zebë tame guk, "Hare ëe an kareksa am gol gwe'an, zep ëe an hen tin hip de ora san am ang gwe-gwe'an."

¹¹ Hen kareksa de gol gwen hap de sosonna in zen abon lwa gwek, zen man anakan asa boton ta gwek, "Em sap esa titi tabin ola ansa ngip gulu. Ebe hap man sam gwesibli'an." Zen in zep hëndep ano dwam-dwamna mam gwe song gwek, hëndep holo gwennak zebë anakan tame guk, "Ee makare karek gol gwen zini toton molyë ngaya gwek."

¹² Hwëna sap tingare titi tabin ola in sa Alap nëbe mae hap golzimki, zen airis, hen nen dikim dam-dam enkam lowehe gwen hap dena. Zen Alap zëre mo dwam gwibinsi kim sap nëbe mae hap goltreizimki.

¹³ Hwëna Musa mo ola in kim asa ngip gun hup dena in sa tawa tak, zen dekam san ha asa karek san de titi tan makan gwëblak? Sap kirekam bëjen. Titi tabin ola in sap airis. Diki kareksa de gol gwen hap de sosonna men zen abon lwa gwek, zen zen titi tabin ola in sa lero gulbluk- asa dikim karek san dep titi tan makan gwë gweblan hapye, hëndep dekon de asa syauk blanak tak ta irin hip. Zep mes tangan dam gwesik: Titi tabin ola in sap airis, hwëna kareksa de gol gwen hap de sosonna in, zen zen tangan nësa karek ta gwibirin.

¹⁴ Zen in zep, Musa mo titi tabin ola in sap airis. Desa Alap zi hip golzimki, hen ëe ama sap enho en nakon sam gwesik gwibirin. Hwëna ëe de Kristussu eititi gwesibli kininkam, ano timni nama auhu-kama zi mo hole-hle enlala naban. Dekam hwëna kareksa de gol gwen hap de sosonna in etan karek san dep asa tik-tik ta gwenan-

san de ëe zëbon de babu gwen zini kiye.

¹⁵ Ee dekam ëre mo gwëna ama topse gwe-gwibirin. Sap men desan de ang gwen habë sap dwam gwe-gwenan, hwëna bëjënë desan ang gwen. Hwëna men desaë sap dwam gwibir srëm gwe-gwenan, zen hwëna desanë ein ang gwe-gwenan.

¹⁶ Zep ëe kimë anakan dam gulsuk gwenan, "Ee an kareksaë gol gwenan," dekam ëe hen ama sap anakan eiwa de gul gwenan, "Musa mo titi tabin ola in sap airis- nësa de dawem san dep titi tabin hip dena."

¹⁷ Zep Kristussu de eititi gwe-blankam, ëe aen homë karekna in sa gol gwenan. Hwëna kareksa de gol gwen hap de sosonna in zen ano timnik lwa gwenan, zen zen asa tik-tik ta gwenan- dekam de zëno dwam gwibin sin ang gwen hapye.

¹⁸ Zep ëe kimë Kristus onakore sosonsa blol gwibir srëm gwe-gwenan, dekam zebë ënaka dam tasik gwenan, "Ano auhu-kama timni an, zëno sosonna hom-dawemsa dikim syal gwibin hipye. Ee sap ama akasik gwenan, hwëna banakan dep?" Dekam hwëna ëre mo dwam gwibin srëm sanë karek in sa syal gwe-gwibirin.

¹⁹ Dekam ëe ëre mo dwam gwibin sin banakan dep?- dawemsa de syal gwibin niye. Sap kië akasik gwenan, hwëna dekam ëre mo dwam gwibin srëm sanë karek in sa syal gwe-gwibirin.

²⁰ Zep ëe de kirekam ëre mo dwam gwibin srëm san syal gwe-gwibinkim, zen eirim homë syal gwe-gwibirin. Zen hwëna kareksa de gol gwen hap de sosonna men zen abon nama lwa gwenan, zen zen asa kire hap tik-tik ta gwenan, zebë kirekam ein syal gwe-gwibirin.

²¹ Zep ëe Kristussu de eititi gwe-blankam, ama anakan dam gulsuk gwenan: Dawemsa de syal gwibin hip sap de dwam gwibin, hwëna dekam kareksaë syal gwe-gwibirin.

²² Hwëna ano enhona man tangan sap Alap onakore titi tabin ola in san de ang gwen hap syal-syal gwegwenda.

²³ Hwëna Kristus onakore sosonsa de blol gwibin srëmkam, dekam zep hwëna kareksa de gol gwen hap de soson naban ilman në gwenan. Hwëna kareksa de gol gwen hap dinik zep soson gwe-gwenan, hëndep zëbon de babu gwen makan zebë gwë gwenan.

²⁴⁻²⁵ Zep Kristussu de eititi gweblankam, dekam ama ënaka anakan dam tasik gwenan: Ano enlalana sap ki- Alap onakore titi tabin sin de ang gwe-gwen hap denaye. Hwëna auhu-kama hole-hlena hen ki ano timnik deban zep ilman në gwenan. Ëe zebë hwëna ëre mo dwam gwibin srëm san karekna gol tine gwenan. Zen in zebë ënaka topse gwe-gweblanan, “Ëe makare zi karekna, juwen ora san de ang gwe-gwenna, nara sa asa zeser sonera?– kareksa de gol gwen hap de soson nakonye.” Hwëna ëe ama dawemsa Alap hap gol gweblanan! Sap Zen mes Kristus Yesussu zer soneka- asa de Zen kareksa de gol gwen hap de sosonna in kon zeser sonen hapye!

8

Mae hap de ol: Nen kareksa de gol gwen hap de soson nakon mese Alap mo Enho mo sosonkam wet so gwëk.

¹ Zep angkam nen men zene Kristus hun ëraha-en gwe'an, Alap molya nësa anakan gubiridaka, “Zen an kareknak de kang gun hup dena.”

² Sap Kristus hun kime ëraha-en gwëk, dekam zep Alap mo Enho mo sosonna nësa kareksa de gol gwen hap de soson nakon gwiswe sonekamen zen sap juwen ora san dep nësa titi ta gwibikye. Zep Alap mo Enhona in mes nësa li ta sonebirki, nen zep esa hëndep ëngaya gwer.

³ Zep mensa sap menkam nen alp ei gwibik, Musa mo titi tabin

ol san de ang tankam de Alap mo nwenak ëdakastin hip dena, hwëna angkam mes desa Alap Zën nëbe mae hap syal gwibir-zimki. Sap menkam nësa auhu-kama tim mo hole-hle tru-tru gul gwizimk. Zen in zep hëndep Alap zëre mo Tane tanganna auhu-kama zi mo timkim zer sone zaka- Zen de kareksa de gol gwen hap de sosonna in sa te-lidak sonnack de tinkim timbwas gun hup.

⁴ Zen mae hap ki Alap kirekam syal gwibirki: Mensa sap Musa mo titi tabin ol san de ang tankam alp ei gwibikke, Alap mo dwam gwibin sin dikim sap ang tan hap, hwëna angkam desa zëre mo Enho mo sosonkam esa syal ei gwibir. Sap nen angkam mese kareksa de gol gwen hap de hole-hlena in kon ëhil gwe hanal.

⁵ Sap men zen auhu-kama zi mo hole-hle san ang ta gwenan, zëno mae mo enlalana nama kareksa de gol gwen hap de sosonna bi gwebla'an. Hwëna men zen Alap mo Enho naban nërgwë gwe'an, zëno mae mo enlalana man Alap mo Enho mo dwam gwibin sin dep liwehe gwenda.

⁶ Nëno enlalasa de auhu-kama enlala hole-hle bi gweblankam, dekam juwen ora sane ang ta gwenan. Hwëna Alap mo Enho de bi gweblankam, dekam nen mese Alap han ërumlae gwer, hen dekam ëngaya gwen hap de ora sane ang ta'an.

⁷ Eiwa, auhu-kama enlala en de nësa bi gwibiridankam, dekam nen eiwa Alap mo jal zikime ënwe-mase gwe-gwenan. Sap auhu-kama enlala hole-hle san de ang ta gwen zini, zen toton bëjen Alap mo titi tabin sin ang tan.

⁸ Hen zen bëjen Alap mo nwenak ëdakastin.

⁹ Hwëna Kristen zini emsa hom auhu-kama enlala hole-hlena bi gwibirida'an. Em de eiwa Alap mo Enho naban zergwënkam, ki eiwa emsa Alap mo Enho bi gwibirida'ara. Sap men nara Alap

mo Enho naban zergwën srëmna, ki zen hom nama Kristen gwe'ara.

¹⁰ Hwëna Kristus de kirekam eno enhonak gwënkam, eno karek gol gwen timni in sap sa til. Hwëna eno angna sa ngaya gwera, sap zen mes Kristus onakon Alap mo nwenak dakastilki.

¹¹ Zen in zep, nëno mae mo timni an eiwa juwen hap dena. Hwëna Alap mo Enhona, men Zen Kristussu tïn nikon ngaya taka, Zen de hen eno enhonak gwënkam, ki emsa sa hen Zen tim ëse naban ngaya tala.

¹² Zen in zep, aya-wal oso-wal, auhu-kama hole-hlena in nësa angkam hom tik-tik ta gwibi'in. Zep nen ba hap de zëno dwam gwibin sin ang ta gwen hap?

¹³ Em de zëno emsa de titi tabin sin nama ang ta tine gwenkam, ki em etan juwen ora sane ang ta'an. Hwëna Alap mo Enho mo sasonkame desa anakare enlala naban baes eibi'ik, "Ano auhu-kama zi mo hole-hlena in mes Yesus goltilki," ki esa ëngaya gwer.

¹⁴ Sap tïngan men zene Alap mo Enho mo titi tabin sin ang ta gwe'an, nen eiwa Alap mo hanan tabin walas!

¹⁵ Zep nen ansa Alap mo Enho naban ërgwë gwe'an, nen bap nen zi hon de ëbabu gwen zi mo kim Alapsa anakan aïri gweblan, "Asa sa husus gweblankam wet son hap gublula." Sap Alap zëre mo Enho mes nësa zëre mo walas hap li ta sonebirki. Zen in zebe Alap Zënaka enho nakon kwasang tola ban en gwebla'an "Ano Bian" kam. Nen zebe hen anakan dam ulsuk gwenan, "Alap mo walasna nen ba hap de aïriblan hap."

¹⁶ Sap angkam Alap mo Enhona anakan enhonak nësa gubirida'ara, "Em in eiwa ëre mo walas."

¹⁷ Hen sap nen angkam zëre mo walaskame lowehe gwe'an, zep nen esa lamkam dawemna apdekam bi eibir- mensa zëre mo walas hap lam gulzim'iraye. Desa Kristus mae han esa apdekam bi eibir. Sap mes dam

gwesinin: Nen de Kristus hup de jal hap kareksa goltowe gwenkam, ki dawemna hen esa zëno kim lamkam oltower.

Mae hap de ol: Nen eiwa Alap mo ngatannak esa hëndep denaban lowehe gwer.

¹⁸ Hwëna karekna mensa angkam oltowe gwe'an, ano dam gulsunkum, zen mam naka hom- nen de anakan ëenlala gwe-gwenkamye, "Ëe Alap mo walaskam dena, asa sa Zën lamkam zëre mo ngatannak hëndep denaban golëlowehe gwera- san de teipsin-teipsinni kiye."

¹⁹ Hwëna nësa de ngatanna iwe golëbiti gwen hap de yakla yala insa, nen en home ës gwebla'an. Tïngare okamana awe de kirekam-kirekamna man tangan yaklana insa nës gwebla'an- sap otwerankam dena, hen sap te maekam dena.

²⁰ Sap tïngare okamana ansa Alap mes heip gulku- in kim Adam ne Hawa ne kareknak anyankke. Zen in zep hen okamana awe de tïngare kirekam-kirekamna zëre mae mo dwam gwibin srëm san karekna noltowe gwenan- sap te, sap otweran.

²¹ Hen zen zep yakla yala insa angkam nës gwebla'an- dekam de hen desa gwiswe sonen hap, sap juwe gwen nakon hen ëbatre gwen mae nakon, in kim de Alap mo walas naban apdekam zëre mo ngatannak lowehe gwe'akye.

²² Nen tawana, tïngare Alap mo yang tabin kire-kirena angkam man sang-sangna sërkam neis gwibi'in- men kiye, we de jaha gwen hap eisbir anenna.

²³ Hen zen en hom neis gwibi'in, hwëna Kristen zini nen hen ema enhonak anakan sërkam eis gwibi'in, "Diki Alap mo yaklana in nabakam zen hatan!" Sap nen Alap mo dawem golzimdinni, nonol okamanak dep dena mese ulink- insa zëre mo Enhona nëbe mae hap ing ta sonezimkiye. Hwëna angkam namae hen sang-sangna insa eis

gwibi'in. Zen in zebe yaklana insa isrip-sri enlala naban kara ë gweblanan, sap zen dekam tangan esa Alap zère mo walas hap de hamal gulzimdinni insa bi eibir. Zen dekam sa nëno mae mo auhu-kama tim karekna ansa tim ëse hap li ta sonebiri.

²⁴ Men dekame ëKristen gwëk, zen hëndep dekon zebe yaklana insa de anakan kara gweblanna ëkon gwesik hanak, "Nen Alap mo walasna tim ëse naban esa hë'ho gwibin langnak lowehe gwer." Zep hëndep angkam nama kirekame kara ei gwibi'in. Yaklana in de hatankam, zen dekam esa ëkara gwe-gwenna insa ëzausul. Sap dekam etan basa dep?- kara gwe-gwibin niye!

²⁵ Hwëna nama de kara gweblanak, dekam nama esa enlala tatete naban ëkara gwe-gwer- anakare enlala naban, "Sap sa holo gwer, hwëna diki ëe gul irin."

²⁶ Nen kim nama embwan naban yaklana insa ës gwebla'an hen ba maesa de tahalha gwibinni, dekam Alap mo Enhona man nësa mas gwibirida gwenda. Sap nen home anakan dam ulsuk gwenan, "Ëe kirekam asa Alapsa abe tal." Hwëna nama de abe tan srëmnak Alap mo Enhona dekam zep Zën nëno mae mo enhonak de abena insa sërkam de embwan naban Alap zère hon golhata gwenda.

²⁷ Zen dekam Alap zère mo dwam gwibin en san nëbe mae hap abe ta gwenda. Hen Alap, men zen tìngare zi mo enhona tame ta gwizimnira, Zen man zère mo Enho mo nëbe mae hap de embwan nabare abena dokwak gul gwenda.

²⁸ Zep angkam mese tangan anakan tame ul: Nen mensa oltowe gwenan, dawemna ahaksa karekna, Alap hwëna desa dawem en hap nëbe mae hap li yul sone gwizimnira- nësa men desa Zëna kwang guludakake, hen Zënaka men zene embwan ë gweblananke.

²⁹ Sap Alap zère mo hlil irin wenyä nësa orep mes tame tabirki, hëndep nësa zep hamal hap kalang gwibiridaka- nen dikim zère mo Tanena Yesus makan ëliwehen hapye. Hëndep lamkam Yesus Zën sa nësa golëlowehe gwera- san de nonol wë tan walas de oso wal zeban golëlowehe gwenna kiye.

³⁰ Zep Alap eiwa orep mes nësa hlil inki, zep nësa kwang guludaka. Zen in zep zère mo kwang guludan wenyä nëbe mae hap syal gwibir-zimki- dekam de zère mo nwenak ëdakastin hìp denaye. Zep nen eiwa esa zère mo ngatannak yaing gwer.

Mae hap de ol: Toton banakan molya Alap mo kwasang nakon nësa kap nulsuk.

³¹ Zep Alap insa kirekam nëp syal gwibir-zimki, nen banakarekam esa enlala eibir? A kirekam esa: Alap de nësa kwasang gwibiridankam, toton nara molya nësa dot sobiridaka.

³² Sap Alap Tane zemka hom anakan kwasang gweblaka, "Bap Zen karekna goltowen." Hwëna nëbe mae hap de dawem hap sosok taka. Zep Zen banakan molya nëbe mae hap de hamal gulzimdinni insa sul sonezim srëm gwëka.

³³ Zep Alap mo hlil irin wenyä nësa toton nara molya anakan gwibiridaka, "Zen an kareknak de kang gun hup dena." Ki san ha Alap Zëna maka kirekam nësa gubirida'ara? Zen bëjen! Sap Zen Zen nëbe mae hap syal gwibir-zimki- nen dikim zère mo nwenak ëdakastin hìp denaye.

³⁴ San ha ahakon hen ki?- nësa de anakan gubiridan hap denaye, "Zen an kareknak de kang gun hup dena." San ha Kristus Zëna maka kirekam nësa gubirida'ara? Bëjen! Sap Zen Zen nëbe mae hap tìlki, hen nëbe mae hap tìn nìkon ngaya gwëka. Hen Zen Zen angkam Alap mo dam taha nakon teipsin tangankam nikin'ira- men dekon nëbe mae hap Alapsa abe ta gwe'araye.

Zep Zen bëjen nësa karek tabin hip gubiridan.

³⁵ Zep Kristus mo kwasang nakon, nara maka nësa kap gulsu'ura? San ha nen de kareksa goltowe gwenkam zëno dam gulsunnu?—"Kristus hom nësa kwasang gwibirida'ara." Kirekam bëjen. Zi de nësa Yesus hup de jal hap karek ta gwibinkim, dekam hen bëjen kirekam dam gulsun- ahaksa tahalha yawalsa de goltowenkam, ahaksa usak yawal, hen lang de sërkam bot-bot gwen, ahaksa tìn hip de alp gwesin. Sap sa hen nësa damera gwer. Hwëna kitak desa de goltowe gwenkam, dekam hen anakan bëjen dam gulsun, "Kristus hom nësa kwasang gwibirida'ara."

³⁶ Eiwa, nen Kristen zini kirekam de kareksae oltowe gwenan. Zen in zep Alap mo olak zini Alapsa anakan gubluka,

"Èe yakla jamkamë ere mo bose hap jalom ëk tihinak lowehe gwenan.

Èe an san de domba zahona kiyetamera gwen en hap dena."*

³⁷ Eiwa, sap nen kareksae kirekam oltowe gwenan, hwëna Kristus, men Zen nësa kwasang gwibiridaka, zëno sosenkame tatem tangan ëzauk gwenan.

³⁸ Sap èe ama tangan taibli'an: Nësa toton nara molya kap gulsuku- Kristus mo kwasang nakonye. Sap nen de juwenkam ahaksa nama de ngaya nik lowe henkam, Zen nama nësa kwasang gwibirida'ara. Alap mo dam taha nakore zini bëjen nësa zëno kwasang nakon kap gulsun. Dowal-dowala hen bëjen. Nen sap esa angkam karekna oltowe gwerhen lamkam mae. Hen dowal mo kigina sap sa nësa karek ta gwibiri. Hwëna Alap mo nëbe mae hap de kwasangna molya dekam tap gwëk.

³⁹ Sap Alap mo tingare yang tabin nikon, sap ngli bolak de lowehen wenyha hen hi mwanak de lowehen wenyha, zen toton bëjen nësa Alap mo kwasang nakon kap gulsun. Sap Alap mes Bian Kristus Yesus onakon sërkam zëre mo kwasangna nëbe mae hap goltreizimki.

9

Mae hap de ol: Yahudi zini, zen sap Alap mo hlil irin zi, hwëna zen hom kitak Yesussu daiblibla'an.

¹ Èe an Kristus zëre mo nwenakë eiwa tangan naka emsa gubirida'an, hen Alap mo Enho naban ère mo enho naban man asa anakan tri la se'ara, "Èe eiwa homë emsa boton tabi'in."

² Èe ama sërkam enho nakon dowe hana gwenan,

³ sap ère mo ausu nakore zini, Yahudi, zen hom beyakam Kristussu daiblibla'an. Zep Kristus dikire asa hla tak, èe de emsa boton tabinkimye: Èe eiwa amaka syauk blanak ënaka drëne se'an-hëndep denaban dikim Kristus onakon langa gwen hapye, ère mo ausu nakore zini insa dikim ngaya tabin hipye.

⁴ Zen sap Alap mo hlil irin zi- Israel Bak mo auyan-tane wal, mensa sap nonol Alap zëre mo hanan tabin walaskam gubirida gwëkake. Sap Alap nonol zëre mo ngatan zi mo lang nakore ngatanna zëbe mae hap goltrei gwizimki.* Hen Alap mo nonol zi niban de ol ziaha-en gunnu, zen dokwak nul gwëk.* Hëndep zao kim lwa se'ak, Musa Bak dekam zep hen titi tabin ola insa ayang gulzimki. Sap Alap nonol zëbe mae en hap anakan goltreizimki, "Syala an desa em gol gwen- Asa dikim blikip gwesik gwëblan hapye." Hen nonol tangan zëbe mae hap zëre mo gu-gubiridan ola gol gwizimki.†

* **8:36 8:36** Mzm. 44:23 * **9:4 9:4** Kel. 16:10; 33:22; 40:34; 1Raj. 8:10-11 * **9:4 9:4** Alap zini an han olsa ziaha-en gul gwëka: Nuh (Kej. 9:9), Abraham (Kej. 17:2), Musa (Kel. 24:8), hen Daud (2Sam. 23:5). † **9:4 9:4** Israëlsa de ngaya tabin hip de Zi hip dena kim nonol damkam gu-gubiridaka, zen Ul. 18:14-20nak lwa'an.

⁵ Zëno mae mo auyan-azana Abraham, Isak, hen Yakob mae man tangan sap Alap mo nwenak ëdakastik, hëndep Israelsa de ngaya tabin hip de Zini, auhu-kama zi mo enlala gweblankam, zëno mae mo ausu nakon saltilki. Zep zen ba hap daïblïbla srëm gwe'an?

Sap eiwa dena, Kristus Zen hen Alap. Hen Zen kitak teipsibirida'ara- hëndep denaban. In eiwa tangan!

Mae hap de ol: Alap mo hanan tabin walasnak de bitï gwen hap dena, zen kitak Alap mo dam tasibin nikon.

⁶ Hwëna anakan bahem ëenlala gwe-gwen, "Alap mensa Israelk de zini gu-gubirida gweka, zëre mo hanan tabin walas mo kim de lamkam golëlowehe gwen hap dena, Zen molya desa zëbe mae hap golzimki, sap zen mes Kristussu de taïblïblan hap baes tak." Kirekam bëjen. Hwëna ansa emki enlala gwibin: Kitak mensa auhu-kama zi mo wei-wik gun nukon Yahudikam nenbirida gwenan, hwëna Alap mo nwenak zen kitak Yahudi tangansa hom.

⁷ Hen kirekam, auhu-kama zi mo aïtbinkim, Abraham mo auyan-tane walkam de gubiridanna, zen hom kitak Alap mo aïtbinkim Abraham mo auyan-tane walyak bitï gwe'an. Sap Alap anakan Abrahamsa gubluka,

"Eno auyan-tanena, zen Isak onakon sa naïtbir song gwer."*

⁸ Zep zëno dam gulsunnu, Abraham mo tingare auyan-tane walya, zen hom Alap mo nwenak Abraham mo auyan-tane walkam ënwe-mase gwe'an. Hwëna ëe Yahudi zini ama ëkil gil gwenan, "Ëe an tïngan Abraham mo auyan-tane wal, zep ëe kitak Alap mo hanan tabin walas." Hwëna diki Alap mensa zëre mo hanan tabin walasnak de bitï gwen hap gubirida'ara, zen zen en bitï

gwe'an- men kirekam hen Abraham mo tanena Isaksa dam tasikike.

⁹ Sap Alap anakan Abrahamsa gubluka,

"Ngein sin de tahunkam Ëe asa lwa halzal, dekam walas naban asa Sara Baksa hlaulzul."*

¹⁰ Walasna insa gu-gubluka, zen ano mae mo auyanna Isak Baksa. Zëna zini Ismael, zen hom Alap mo gu-gublunnak tï'ira. Zep Yahudi zini angkam, zen sap kitak Isak Bak mo auyan-aza nakorena, hwëna ahakore en nik Alap mo dam tasibin nik bitï gwe'an. Ahakon hwëna Ismael Bak mo kim ëgwei kinï'an.

Hwëna Isak Bak kim Ripka Baksa golka, zen zep zi walasna dan-dan wë sok.

¹¹⁻¹² Hwëna walas ën srëmnak, Alap mes Ripka Baksa hamal hap anakan gu-gubirki, "Em desa zi walas darena wë so'anka, oso zik mo auyan-tane walya, zen zen sa ëteipsil. Hwëna aya zik mo dena, zen zëno mae mo tana ïltikinnik sa lowehe gwer." Zep Alap man nen dikim anakan dam gulsun hup dwam gweka, "Zen zëre mo kalang gwen san dawemna zi hip gol gwizimnira, hen sap karekna. Zi mo dawem nakon hom gol gwizimnira." Sap Ripka in kim Alap mo ola insa sane gwek, ungalanak de walas darena in hom banakare karek maena syal eibirki.

¹³ Zep Alap mo olak zëno walas darena in hap dena anakan lwak,

"Ëe asa Yakobsa kwasang gwe-gweblal. Esausa asa husus gwe-gweblal."*

¹⁴ Zep angkam dam gulsunnu banakan? San ha Alap man karek gweka?- kirekam zep ba maesa de syal eibin srëmnak kles sokaye. Sap diki Alap bëjen karek gwen!

¹⁵ Hwëna Zen insa kirekam hamal hap gu-guzimki, zen man hen dakasti'in- men kirekam hen Musa Baksa gublukaye,

* 9:7 9:7 Kej. 21:12 * 9:9 9:9 Kej. 18:10,14 * 9:13 9:13 Mal. 1:2-3

“Aen asa ëre mo dwam gwibin sin dam tasik gwibir- men desaë kwasang gwibirida'akye. Hen dawemsa de gol gwizimdin hip de wenya, zen hen Aen asa dam tasik gwibir.”*

¹⁶ Zep Alap mo hlil irinnik de bitì gwen hap dena, zen zi nère mae mo dwam gwibin sin hom, hen zen zi nère mae mo syal gwibinkim bëjen. Zen diki Alap zère mo kwasang-kwasang en nakon- men desa en Zëna dam tasibirkike.

¹⁷ Zen in zep hen Mesir mo teipsin zi hip dena Alap mo olak anakan lwak,

“Ëe mae en habë emsa Mesirsi de irik gin hip dam tasik: Dekam de tìngare okamanak de zi ano sosonsa tame gun hup. Ëe kimë emsa de karek tan hap de owasna syal gwe-gwibi'ik, zen dekam sa tìngare okamanak de zini Asa tawa nèblandal.”*

¹⁸ Zep man dam gwesinìn: Men desa Alap dam tasik gwibirida, Zen desa en kwasang gwibirida gwenda. Hen men desa Mesir mo teipsin zini in mo kim dam tasik gwibirida, zèbe mae hap ënol drak-drak gwen hap denaka gol gwizimnira.

¹⁹ Zep em ahakon anakan esa asa lakensiblil, “Ki Alap ba hap de zini ënol drak-drak gwen hap karek tabin hip?– sap Zen Zën am kirekam de ënol drak-drak gwen hap gubiridaka! Hen zini nen bëjen jalse gweblan!”

²⁰ Hwëna bahem kirekam Alapsa gublun! Sap em in zëno yang tabin nikake! Zep em ba hap de zëno kareksa hlaulblun hap? San ha yuna maka?– men zen ik guk, desa gubi'in, “Em bap asa yu hap ik gulku? Diki blome hap emaka.” †

²¹ Men zen ik guk, san ha zënoka hom?– anakan de kles son hap, “An yu hap asa ik gul- mwin-mwankam

de wei yul gwen hap. Ahana an blome tol hap asa ik gul.”

²² Zep zen Alap zère mokake-kirekam de nësa klis gun hup denaye, dekam de zi lamkam zère mo sèrkam de soson naban jala ban tame son hapye. Hwëna Zen næn hom desa zitreizim'ira. Hwëna nonol, men desa kareknak de kang gun hup hamal gulku, Zen desa nwe enkam de holokam kara ta gwibin hip dwam gwibirida'ara. Hyanak sa hwëna sèrkam karek tabiri.

²³ Hen kirekam, kwasang gwibiridan hap dena mensa nësa hamal gulku, nësa sap sa hen holokam kara ta gwibiri- dekam de lamkam zère mo ngatansa mam tangankam gol gwizimdin hip,

²⁴ men desa kiresa de golzimdin hip kalang gwibiridaka hëndep kwang guludaka, sap Yahudi zi, sap Yahudi srëm zi.

²⁵ Sap Yahudi srëm zi hip dena, Hosea Bak man Alap mo ola anakan ayang gulzimki,

“Men zen ano hlil irin zinik bitì gwe srëm gwek,

hwëna angkam Ëe asa desa hen gubiridal, ‘Em in hen ano hlil irin wenya.’

Men desaë menkam kwasang gwibirda srëm gwek,

hwëna Ëe asa angkam kwasang gwibirdal.

²⁶ Ë-ënak de zini men desaë gubiridak, ‘Zen in ano hlil irin zisi hom,’

hwëna desa Ëe asa gubiridal, ‘Em in Ngaya Zini Alap ëre mo walas tangan.’ ”*

²⁷ Hwëna Yahudi zi hip dena, Yesaya Bak anakan Alap mo ola tenggwaran naban ayang gulku,

“Sap eiwa, Israel Bak mo ausu nakore zini zëno beyana san de hinak de hisglimni kiye,

* 9:15 9:15 Kel. 33:19 * 9:17 9:17 Kel. 9:16; 11:9-10 † 9:20 9:20 Yes. 29:16; 45:9 Blome hen yu hap dena, Paulus kama ngatdarak nakore syal gwibin kire-kire hap ale gulku, hwëna enlalana apdenak- men kirekam Orya ol zini yu-blomena syal nei gwibirinke. * 9:26 9:26 Hos. 1:10; 2:22-23 * 9:28 9:28 Yes. 10:22-23

hwëna da-en tangan sa ëngaya gwer.

28 Sap Bian Alap nabakam sa oka-mana ansa olo gulu.”*

29 Etan Yahudi zi hip Yesaya Bak man ale gulku,

“Soson Zini Bian Alap de nësa anakan gubiridan srëmkam, ‘Dikire da-en ëngaya gwek,’ ki emaka kitak tangan ëna Sodom hen Gomorak de zi mo kim juwek.”*

Mae hap de ol: Yahudi zini hom Alap zëre onak dikim ëdakastin hip de ora ësena dam dasi'in.

30 Zep nen banakarekam esa Alap mo ola insa srip ulsul? A kirekam esa: Yahudi srëm zini, zen sap hom Alapsa dë gweblak. Zen hwëna Alapsa de taibliblan nakon ki zëre mo nwenak ëdakasti'in- Kristus hup de ol dawemna insa kim daibli gwibi'inke.

31 Hwëna Yahudi zini, zen sërkam sap zëre mae mo sosonkam Musa mo titi tabin ol san de ang tankam alp nei gwibirin- dekam de Alap mo nwenak ëdakastin hipye. Hwëna waba tolkam!

32 Ba hap waba hap? Zen sap zëre mae mo sosonkam ëalp gwe-gwenan- hwëna Alapsa de taibliblan srëmkam. Zen in zep gol tenya iwe de tanasa tang ta zankam altil gwenan-

33 men kirekam Alap mo olak lwakke,

“Èe ama gol te dawemna Yerusalemk ngirinnik ik gi'in, zi deka zëwe tana bol tang ta gwe zankam ëaltil gwek.

Zen zep sa gol tenya insa husus nei gwibir.

Hwëna men zen de gol tenya insa daibli gwibi'ik,

* 9:29 9:29 Yes. 1:9 § 9:33 9:33 Paulus man Yerusalem mo aha bosena “Sion”kam ale gulku. Paulus man Yesaya 28:16na awe ale gulku, hen zen man Yes. 8:14 naban siri gulku. Yesaya Bak “kaso moko”kam ale gulku, sap Yahudi zini kasokam gola dauk gweblak. Hwëna Orya ol zi hip, ngirin gol tenya ban enlalana man anakan apde nek, “Bol-zaun tangan wenya.” Zep “gol te”kam li nul sonek. Ngirin gol tenya insa de dam gulsunnu, Zen Kristus. * 10:5 10:5 Im. 18:5

zen molya anakan ëenlala gwe-gwek, ‘Èe an waba habë taiblibik.’ ”§

10

1 Zep aya-wal oso-wal, èe ama tangan dwam gwe'an- ano zi ausu nakore zini kitak de sap ëngaya gwen hap. Zen in zebë enlala zon tasiblin naban Alapsa aberbe ta tine gwenan.

2 Èe eiwa denakaë emsa gubirida'an: Yahudi zini in sap eiwa Alap mo syal hap syal-syal tanganna. Hwëna zëno mae mo syala in, men kirekam angkam Alap goltreizim'ira, zen diki desan maka ang ta'an.

3 Sap zen hom Alap zëre onak dikim ëdakastin hip de ora ësena dam dasi'in. Zen hwëna zëre mae mo enlala san ëpba titi tabin ol enna insa kyang-kyang nulsuk tine gwenan. Zen in zep Alap mo ora ëse zertreizimdin sin de ang tan hap baes ta gwe'an.

4 Sap Kristus mes nëbe mae hap Musa mo titi tabin ola insa sul sonezimki. Zep tingan men zene angkam Kristus ensa laiblibla'an, zen dekam zebe Alap mo nwenak ëdakasti'in- titi tabin ola insa de enlala gwibin srëmkam.

Mae hap de ol: Tingare zi ausu nakore zini, men zen en de Kristussu daiblibla'ak, zen zen sa ëngaya gwer.

5 Hwëna Alap mo nwenak de ëdakastin hip dena Musa mo olak man lwak,

“Men zen de ano titi tabin ola an san sul sonenkam ang ta gwe'ak, zen zen en sa hëndep denaban ëngaya gwer.”*

6-7 Hwëna Alap mo olak, Zënaka de taibliblankam de zëre mo nwenak ëdakastin hip dena man hen lwak, "Em home auhu-kama tim niban de ngatan zi mo lang san de tëblan hap ëdwam gwe'an.

Hen juwen zi mo lang san de tëblan hap hen home ëdwam gwe'an."*

Alap mo olak de gulk sun ol blaoranna in mo dam gulsunnu a kirekam moye: Em home ëdwam gwe'an- Kristussu de ngatan zi mo lang nakon zerati gwezan hap, ahaksa juwen zi mo lang nakon de zerta gwe sezan hap, Zen dikim ëngaya gwen hap emsa mas gwibiridan hapye. Sap Kristus ebon mae onakon langanak hom.

8 Sap em dikim ëngaya gwen hap dena, zen Kristussu de taibliblan en nakon- ëe men kirekamë ol dawemna ol halada gwenanke. Zen zep Alap mo olak anakan lwak,

"Ol dawemna in, ba hap de langa san teibin hip? Zen ere mae mo ëk tihinak hen enhonak am lwa'an."*

9 Sap em de ere mo enho nakore taibliblanna insa zi mo inik anakan kira gunnu, "Yesus Zen ano Teipsinni," hen enho nakon de anakan taibliblanna, "Desa eiwa mes Alap tin nikon ngaya taka," ki em hen esa ngaya gwer.

10 Sap em de enho nakon taibliblankam, dekam em mese Alap mo nwenak dakastilida. Hen ere mo taibliblanna insa de zi mo inik kira gunnu, dekam em mese ngaya gwenda.

11 Sap Alap mo olak man lwak,

"Men zen de Biansa daibli gwebla'ak, zen molya anakan eenlala gwe-gwek, 'Ee an waba habë taibliblak.' "*

12 Alap mo kirekam de gugubiridanna in, zen kitak de zi hip dena- sap Yahudi zi, sap hen Yahudi srëm zi. Sap zëno mae mo Bianna aha-en, hen men zen Desa

abe da gwenan, zëbe mae hap man dawemna mamkam gol gwizimnira.

13 Sap Alap mo olak anakan lwak,

"Men zen Biansa anakan abe da'ak, 'Asa em ngaya tan,' zen zen sa ëngaya gwer."*

14 Hwëna zini banakan sa abe da gwer?- zen de nama taibliblan srëmkamye. Hen banakan sa daibli gweblal?- zen de nama zëbe hap denaka ësane gwen srëmkamye. Hen zen banakan sa zëbe hap dena ësane gwe-gwer?- zi de tonbiridan srëmkamye.

15 Hen zini banakan sa ol dawemna insa zëbon mae osan dep nolsong gwe-gwer?- Alap de zisi zëbon mae osan dep lup gul sonen srëmkamye. Zen zep Alap mo olak anakan lwak,

"Zini men zen Alap mo ol dawemna golhata zanna, zen isrip-sri gweblan tanganna."*

16 Hwëna ol dawemna insa nolhalada gwenan tingare zini hom dokwak nul gwenan. Sërkam tangan Yahudi zi. Sap zen kire hap dena Yesaya Bak mo olak man dakasti'in anakan in zen lwak,

"Bian, ëe insa eno ola ayang gul gwenan, hom dokwak nul gwenan."*

17 Sap Kristussu men zen daibli gwebla'an, zen diki men zen zëbe hap de ol dawemna insa ësane gwe-gwenanke.

18 Hwëna Yahudi zi de ësane gwen hap dena banakarekam Alap mo olak lwak? San zen maka anakan ëgu gwe'an?- "Alap, bahem asa karek tan, sap ëe homë ol dawemna insa sak." Hwëna zen diki zen maka enlala hohle tan naban lowehe gwe'an, sap Alap mo olak anakan am lwak,

"Alap de kitak yang tabin hip de ola mes tingan ëtawa gwendal.

Sap keis maesa de hlauludankam zen dekam maka Alapsa tame da'an."*

* 10:6-7 10:6-7 Ul. 30:11-13 * 10:8 10:8 Ul. 30:14 * 10:11 10:11 Yes. 28:16 * 10:13 10:13 Yl. 2:32 * 10:15 10:15 Yes. 52:7; Nah. 1:1 * 10:16 10:16 Yes. 53:1 * 10:18 10:18 Mzm. 19:5

Kirekam de dam gulsunkum, ki zen maka hen Alap mo Kristus hup de hamal hap de ola insa dawemkam daïblibik.

¹⁹ Hwëna san ha Yahudi zini Kristus hup de ol dawemna hom yap tame nu'in? Zen diki nonol zen maka tame nuk, sap nonol tangan Musa Bak zëbe mae hap Alap mo ola anakan ayang gulzimki,

“Ëe asa syal gwibir- em dikim Yahudi srëm zisi sïngin gwibirida gwen hap denaye, sap Ëe asa zëbe mae hap dawemsa golzim.

Hëndep em esa Asa de tame tan srëm zi ausuna insa jal eibirida gwer.”*

²⁰ Hen Musa mo hyanak etan Alap mo ola ansa Yesaya Bak Yahudi srëm zi hip dena damnak anakan ayang gulzimki,

“Zi ausuna men zen Asa dëbla srëm gwëk, zen sa hwëna Asa dam dasil. Hen men zen Asa tame da srëm gwëk,

Ëe asa zëbe mae hap Ënaka zertreizim.”*

²¹ Hwëna Yahudi zini abe mae hap dena Yesaya Bak sap anakan ayang gulku,

“Ëe holo tangankamë sap ëre mo tahana Yahudi zisi de haen gwibiridan hap inin sosuk tine gwëk,

hwëna nol drak-drak zi ausuna in hom mae Asa nasalblak.”*

11

Mae hap de ol: Alap mo kalangna ki- Yahudi zi hip de etan dawemsa golzimdin hip denaye.

¹ Zep san ha Alap eiwa mes zëre mo nonol hlil irin zi ausuna Yahudisa gwibirida kinika? Sap kirekam

bëjen. Ëe dwan hen dekore wal syake- Abraham Bak mo auyan-tane ahana. Ëe an hen Benyamin Bak mo ausu nakon de saltin nikake.

² Alap bëjen ano ausu nakore zini insa gwibirida kinin- mensa sap nonol hlil inkiye. Em san ema Alap mo ola ansa eititi eibi'in?- men kim Elia Bak Yahudi zi aususa de husus gwibiridan hap dena Alapsa tawa takaye:

³ “Bian, zen mes ere mo olsa de ayang gul gwen hap de zini damerasik. Hen ere hap de otweran tru tase gweblan kals maena mes dre dasibir. Ëe angkam ë-en tanganë gwë'an, hen asa angkam tan hap alp dasi'in.” *

⁴ Hen em wëhë enlala eibi'in?- Alap men kirekam ding gulblukaye. Zen man ding gulbluka,

“Em e-en home gwë'ara. Ëe mesë zini da-en, tuju ribu en tolkam, ëre onak dep dam tasibik- yang tasin alapna Ba'al Bak hap de bokle kom so gweblan srëm wenyaka.”*

⁵ Zep angkam hen kirekam. Alap mes da-en zëre hap Yahudi zi ausu nakon dam tasibirki- men zen Alap zëre mo kwasang-kwasang nakon Kristussu de taïblblankam ëngaya gwe'anke.

⁶ Hen man tangan dam gwesinin: Zen de Alap mo kwasang-kwasang en nakon ëngaya gwe'ak, ki zen ba maena hom syal neibik- dekam de ëngaya gwen hap denaye. Sap zi zëre mo syala kon de ëngaya gwenkam, desa bëjen anakan gubin, “Zen Alap mo kwasang-kwasang nakon ëngaya gwëk.”

⁷ Zen in zep Yahudi zi hip dena anakan lwa'an: Alap mo nwenak dikim ëdakastin hip dena mensa sap dei gwibik, hwëna beya nik

* **10:19 10:19** Ul. 32:21 * **10:20 10:20** Yes. 65:1 * **10:21 10:21** Yes. 65:2 * **11:3 11:3** Elia Bak kim Alap mo ola ayang gul gwëka, dekam Israelk men zen teipsinkim irik gilki, bosena Ahab Bak. We zem bosena Izebel Bak. Zen yang tasin alapna Baal Bak osan dep sil libirhal gwëk- hen aha yang tasibin dowal-dowal san dep. Israelk de zini zep hëndep eiwa de Alapsa hli da gwëk, hen zëbe hap de otweran tru tase gweblan kals maena dre da gwibik. Ahakore weny men zen sap Alap mo olsa ayang nul gwizimk, desa hen man damerasik gwëk. (1Raj. 19:10-14) * **11:4 11:4** 1Raj. 19:18

hom hla nuk. Hwëna men desa en Alap nonol dam tasibirki, zen zen en hla nuk. Hwëna beya wenya kip, ënol drak-drak gwen hap denaka golzimki.

⁸ Zen man dakasti'in- Alap mo olak men zen anakan lwakye, "Alap mes desa totokkam de truwen hap gubiridaka.

Hëndep angkam zëno mae mo nwna mes dïmin tabir-zimki, hen ini mes mat tasibir-zimki."*

⁹ Hen Daud Bak kire zi hip anakan Biansa gubluka,

"Bian, dikire tahalha srëmkam lowehe gwëk- Emsa dekakim hwëna eititi në gwëblak.

Hen dikire sowe henkam lowehe gwëk- dekakim anakan tame nul srëm gwëk, 'Ëe an juwen hap de ora sanë ang ta'an.'

¹⁰ Hen dikire zëno mae mo nwna ëdïmin gwëk- dekakim ëkara gwe srëm gwëgwëk.

Dikire nihin dohon-hon naban hëndep denaban lowehe gwëk."*

¹¹⁻¹² Zep ahakon sa asa dak-ensiblil, "San ha Alap zëre mo nonol hlil irin zini in hëndep denaban mes juwen orana in san ang tak?" Kirekam hen bëjen. Zen mae hap ki Alap zëre mo nonol hlil irin zini, Yahudisa, kirekam gweibirida kinika: Dekam de zen Yahudi srëm zisi anakan hlaludan hap hen sisngin gwibiridan hap, "Zen en ba hap Alap onakore isrip-sri naban lowehe gwenan? Diki nen hen emaka Kristussu zëno mae mo kim laïblibla'an." Zep angkam Yahudi srëm zi Alap mo kwasang-kwasangnak lowehe gwë'an, sap Yahudi zini man Kristussu de kirekam taïbliblan hap baes ta'an. Hwëna lamkam kim

de etan Alap kwang guluda'an- dekam de zen hen etan zëre mo kwasang-kwasangnak kitak lowe- hen hap, zen dekam sa zen hen Kristussu daïbliblal, hen zen dekam tangan sa tingare zi mo isrip-srina taman kinil, sap zen hen dekam sa Alap onakon hë'ho gwibin nika nulin gwer.

Mae hap de ol: Yahudi srëm zini men zen angkam ëngaya gwë'an, bap zen ëbolte-bolte gwë-gwen.

¹³ Hwëna ëe Yahudi srëm zini ebe mae habë ale gulzim'in, sap Alap mes asa dam tasiki- dekam de Yahudi srëm zini ebe mae hap ol dawemna ansa golzim halada gwen hap. Hwëna syala insa Alap abe hap wei yul soneblaka, ëe mae habë desa syal-syal gwë-gwibirin hen golluwe gwenan:

¹⁴ Sap ëe ama dwam gwë-gwë'an- ëre mo zi ausu de emsa hlaludan kam anakan sisngin gwibiridan hap, "Zen en ba hap Alap onakore isrip-sri naban lowehe gwenan. Hwëna nen home." Kirekam zen hen maka dam nulsu'un, "Diki nen hen emaka Kristussu zëno mae mo kim laïblibla'an." Kirekam de lwankam, zen hen maka ëngaya gwë'an.

¹⁵ Sap Alap kim Yahudi zini baes gwibiridan makan gweibiridaka, dekam zep hwëna zëre han de zerumlae gwen hap de orana tingare okamanak de aha zi ausu hap kles tyasizimki. Zep isrip-sri gwibin tangan nik sa lwal- Alap kim de Yahudi zi niban etan golëumlae gwë'ankaye. Dekam zen sa ënwemase gwer- san de juwen nakon de etan ëngaya gwenna kiye.

¹⁶ Eiwa, kirekam sa lwal, sap auyan-aza wal zem mes Alap mo

* **11:8 11:8** Ul. 29:4; Yes. 29:10 * **11:10 11:10** Mzm. 69:23-24 † **11:16 11:16** Awe "auyan-tane wal zik de ëdakastin" hip dena, Paulus gulk sun de ol blaonzimdinni dan-dan ale soka: Ahana Alap hap de rotisa de syal gwibir-blin hap dena, ahana ik gin zaitun ausu hap dena. Roti mang-mang gungsu de akasibin hip ap gul irinni, zen de dërek gwenkam, ki kitak dërek enna. Zep mensa Paulus roti mang-mang gun hup dena ale gulku, zëno enlalana apdenak- ik gin zaitun hup de ola in hanye. Zen a kirekam moye: Yahudi mo auyan-azana Alap mo nwenak man ëdakastik, zep sa auyan-tane wal zem hen lamkam ëdakastil.

nwenak ëdakastik. Zep hen auyan-tane wal zem an sa hen hëndep ëdakastil. † Sap Yahudi zini, zen Alap mo ik gïn zaitun makan ënwe-mase gwe'an. Zaitunna in mo ausuna, zen Abraham mae. Zen man tangan Alap mo nwenak ëdakastik, zep hli-hlina in sa hen lamkam ëdakastil.

¹⁷ Hwëna Alap zëre mo ik gïn zaitunna insa, ahakore hli-hlina mes blom gulsuku- zao de hwëna zën de saltin zaitun hli-hlisa zëno tihinak eiyas gïl inen hap. Zen Yahudi srëm zini emsa kirekam eiyas gïl ineka. Zep Alap mensa Abrahamsa walas zeban gu-gubiridaka, hë'ho gwibin nika de golzimdin hip dena, zen hwëna angkam eme mamkam ulin gwe'an.

¹⁸ Zep Yahudi srëm zini em bahem anakan ëbolte-bolte gwe-gwen, "Nonol hli-hlina mes Alap blom gulsuku, hwëna asa zë eiyas gïl ineka." Emki anakan ëenlala gwe-gwen, "Ëe an dwan hli-hli en nakake. Ëe ausu naka hom."

¹⁹ Hwëna em emaka asa ding ul-bli'an, "Sap eiwa. Hwëna Alap mes nonol hli-hlina insa blom gulsuku, zao zep hwëna asa zëno tihinak eiyas gïl ineka."

²⁰ In sap eiwa kirekam. Hwëna desa Yesussu de taïbliBlan srëm hap kirekam gweibirida kinika. Em hwëna ema laïbliBlak. Zep kire hap bahem tangan ëbola-bola gwen. Diki em anakan emaka ëairi gwe'an, "Ëe babë hen zëno mae mo kim taïbliBla srëm gwen."

²¹ Sap Alap insa nonol hli-hlina Zënaka de taïbliBlan srëm hap blom gulsuku, ki Zen hen sa etan emsa blom tasibiri- em de hen zëno mae mo kim taïbliBlan srëmkamye. Molya em ensa kwasang gwibiridaka.

²² Zep man dam gwesinïn: Alap Zen man zi hip kwasangna hen jala gol gwizimnira. Men zen zëno ora ëse zertreizimdin sin de ang tan hap baes tak, zëbe mae hap mes jala goltreizimki, zep hëndep

gweibirida kinika. Hwëna em in zene angkam Kristussu blol ë gwe-bla'an, Alap zep emsa zëre mo walas makan kwasang gwibirida gwe'ara. Hwëna em de hen taïbliBlanna insa golzausunkum, emsa hen sa gweibirida kinila.

²³ Hen kirekam, Yahudi zi de etan taïbliBlan hap lwanda ha'anzak, Alap sa etan eiyas gïl inera. Sap Alap mo sosonna ki- kirekam de etan syal gwibin hip denaye.

²⁴ Sap Alap, eiwa, owas tangankam emsa syal gwibiridaka, zep emsa ik gïn srëm zaitun hli-hli mo kim zëre mo ik gïn zaitun mo hli blom gulsunnuk eiyas gïl ineka. Zep mes tangan dam gwesinïn: Zëre mo ik gïn hli-hlina insa blom gulsuku, desa de etan eiyas gïl inen hap gwa-gwa naka hom. Zëre mo weinak de etan eiyas gïl inen hap maka tangan sam gwesinïn.

Mae hap de ol: Alap tingare zi ausu nakon zini man kwasang gwibirida gwenda.

²⁵ Yahudi srëm aya-wal oso-wal, em de ëbolte-bolte gwe-gwen srëm hap, ansa emki ësane gwen! Alap mo aha kalangna mensa orep aning gul gwizimki, hwëna abe hap mes desa goltrëBlaka, hwëna angkam ëe ama ebe mae hap srip gulsuzim'in: Emsa angkam en de ëKristen gwen hap Alap gubirida'ara. Sap Yahudi zini zen hen angkam en Alap mo kalang gwe gun sun ënol drak-drak gwe-gwe'an. Hwëna Yahudi srëm zini em kime Yesussu de taïbliBlankam kitak tangan sowe he'ak, Alap men ki-en beyana dam gulsuku, zen dekam sa Alap Yahudi zini insa etan kwang guludala.

²⁶ Zen dekam sa Alap tingare Israel Bak mo ausu nakore zini in ëngaya gwen hap de ora san dep kwang guludahal zala. Sap Alap mo olak man lwak,

"Ëna Yerusalem kon sa ngaya tabin hip de Zini hata zala,

Zen Zen sa Israel Bak mo ausu nakore zini in sa etan Alap osan dep golëlwan dahal zala.

²⁷ Hen Ëe dekam asa ëre mo zi niban de ol ziaha-en gunnu in sa sul soner-

kimë zëno mae mo karek-karekna tap gulsuzim'ikye."*

²⁸ Zep angkam Yahudi zini mes Alap gweibiridaka- san de zëre mo jal zini kiye. Hwëna em Yahudi srëm zini em zebe angkam Kristus hup de ol dawemna ulin gwe'an. Hwëna Yahudi zini in nama Alap mo hlil irin nik hen lowe he'an, zep Alap mo zëbe mae hap de kwasangna nama. Sap Zen nama zëre mo ol gu-gunnu in sa enlala gwe-gwibi'ira- mensa orep auyan-aza zem Abraham, Isak, hen Yakob maesa gubirida gwekaye.

²⁹ Sap Alap mensa ëngaya gwen hap zini dam tasibirki, zëbe mae hap de enlalana in sa bëjen wet tyasin. Hen zëre mo zi hip de golzimdinni, Zen bëjen etan al gulzimdin.

³⁰ Zep Yahudi zi niban Yahudi srëm zi niban, em mese Alap mo nwenak ëlirak gwek. Orep Yahudi srëm zini em hen Alap mo jal zi mo kime lowehe gwek. Hwëna Yahudi zini in kim Kristussu de taïbliblan hap baes tak, zen dekam zep hwëna emsa kwasang gwibiridaka.

³¹ Zep angkam Yahudi zi hwëna eno mae mo weinak Alap mo jal zi kim lowe he'an, sap Alap emsa hwëna kwasang gwibiridaka. Zen kirekam Alap Zën ki eirim ënol drak-drak gwen hap gubiridaka- dekam de etan kwang guluda halzan hapye.

³² Sap Alap mes ki gubiridaka, "Dikire tingare zi ausuna nonol ënol drak-drak gwe-gwek, ki asa hwëna etan kwasang gwibirida gwer."

³³ Eiwa, nëno mae mo Alapna sërkam de dawem tanganna!

Zëno enlalana blal tanganna, hen zëno tame gunnu.

Zini nen toton banakan dep?- zëno klis gunsu de tame gun hupye, hen zëno nëbe mae hap de syalaye.

³⁴ Zen in zep Alap mo olak man lwak,

"Zini toton banakan dep?-

Bian mo enlalasa de tame tan naye. Hen Bian Zënaka toton nara dep?- titi tan naye!"

³⁵ "Hen Alap nara zi hon ba maena bohë gulku?- zep de hwëna Alap etan golblan hapye."*

³⁶ Sap tingare yang tabinni, ausuna kitak

Alap en honke.

Zen kitak Alap mo sosen en nakon ki lwa gwenan,

hen tingan Alap zëre mo bose ensa de teip gulsuk gweblan en hap ki lwa gwenan.

Dikire kitak hëndep denaban boltere da gwek! In eiwa.

12

Kristen zi de Alap mo nwenak kirekam lowehe gwen hap de ol:

¹ Zen in zep, aya-wal oso-wal, ëe ama emsa titi tabi'in: Nen nëre mae mo timni Alap en hap nen sosok gul gweblan- otweran ninsi de Alap hap de kalsnak lone seblan makan. Sap Alap tweran tangansa de tru ta seblan hap hom dwam gwe'ara. Zen diki nëno mae mo timsi dwam gwibi'ira. Nen mese anakan tame uk, "Alap mes zëre mo sërkam de kwasang-kwasang nakon Yesussu nëbe mae hap sosok tazimki," zep nen hen nen nëre mae mo timni zëbe hap sosok gul gweblan- dekam de zëno bosesa mam gulblun hap, hen dawemsa gol gweblan hap.

² Auhu-kama enlala enkam bap nen lowehe gwen. Hwëna Alap dikim nëno mae mo enhosa li ta sone gwizimdin hip nen nënaka Zëbon onak sosok ta gwibin. Zen

* **11:27 11:27** Yes. 59:20-21; Yer. 31:31-34 * **11:35 11:35** Yes. 40:13; Yer. 23:18; 1Taw. 29:14

dekam esa ëliwehe gwer- san de zi ësena kiye. Dekam esa Alap mo nëbe mae hap de dwam gwibir-zimdinni anakan dam ulsuk gwer, “An kirekam de lowe henna, zen tangan Alap zëre mo nwenak dakasti'in.”

³ Aya-wal oso-wal, Alap man sërkam asa kwasang gweblaka, zep asa dam tasiki- Kristus hup de olsa de golzim halada gwen hapye. Zen in zebë emsa kitak titi tabi'in: Sosonna mensa Alap zëre mo syal hap nëbe mae hap srën-srënkam gol gwizim'ira, dawem enkam nen gwirensin. Bap nen nënaka anakan boltere ta gwibin, “Abon Alap onakore sosonna mamna.” Diki anakare enlala betek naban nen nënaka enlala gwibirida gwen, “Ba hap tangan Alap kirekam de sosonna abe hap golblaka?- sap ëe an hen orep karek gol gwen nakake.” Zep men kirekam ena aha-en aha-enkam Alapsa anakan laibli gwebla'an, “Abe hap kire sosonsa golblaka,” zen kire enkam emki syal gwe-gwibin- hwëna enaka de boltere ta gwibin srëmkam.

⁴⁻⁵ Zep nen Kristussu de taibliblan wenyä, nen mese Deban ëraha-en gwëk- san de aha-ere timni kiye. Zi mo timni zëno hli-hlina beyana, hen hlina in mo syala srën-srënnamen ki tanana, tahana, hen ing ala maena. Zep nen hen beyana, hen zëre mo syal hap de sosonna mensa Kristus nëbe mae hap wei yul sonezimki srën-srënnä. Hwëna nen an aha-ere tim nikorena, zen in zebe nënaka mas eibirida gwenan hen kwasang eibirida gwenan.

⁶ Zep Alap mes nëbe mae hap zëre mo sërkam de kwasang-kwasang nakon srën-srënkam sosonna golzimki. Zep ebe mae hap de zëre mo Enho nakore hamal hap de olsa ayang gul gwizimdin hip denaka gol gwizimdinkim, men kire enkam ena anakan taiblibla'ara, “An Bian desa de ayang gulzimdin hip abe hap golblala,” ki emki hëndep ayang

gulzimdin.

⁷ Hen kirekam, ebe mae hap de aha zisi dikim mas gwibirida gwen hap de sosonsa gol gwizimdinkim, emki hëndep mas gwibirida gwen. Ahaksa aha zisi de Alap mo olkam tawa ta gwibin hip de sosonsa de gol gwizimdinkim, ki emki hëndep tawa ta gwibin.

⁸ Hen aha zisi dikim tatete ta gwibin hip denaka de gol gwizimdinkim, emki tatete ta gwibin. Tahalha zisi de te-alakam mas gwibirida gwen hap denaka de gol gwizimdinkim, emki isrip-sri naban mas gwibirida gwen. Hen Kristen zisi dikim nol gwibiridan hap de sosonsa de ebe mae hap gol gwizimdinkim, emki syal-syalkam nol gwibirida gwen. Hen aha zisi de kwasang gwibirida gwen hap denaka de gol gwizimdinkim, emki isrip-sri enlala naban kwasang gwibirida gwen.

⁹ Botonkam bahem aha zisi kwasang gwibirida gwen. Diki eiwa-eiwa tangankam em kwasang gwibirida gwen. Enlala jal-jalsa emki ja-ja ta gwen. Dawemsa de syal gwibin hip de enlalasa emki kyang-kyang tasik gwen.

¹⁰ Ere mo Kristen bose walya emki dawemkam kwasang gwibirida gwen- men kiye, ere mo iye tangansa de kwasang gwibiridanna. Eno bosesa de aha zi teip gulsublun hap bahem ëdwam gwe-gwen. Hwëna diki hwë-hwëkam em enaka blikip gwesibirida gwen.

¹¹ Eno mae mo enho nakon Alap hap de isrip-srina bap zen betek gwen. Hwëna Alap mo Enho nakore isrip-sri naban emki Bian hap de syalak ësyal-syal gwe-gwen.

¹² Isrip-sri naban emki anakare enlala naban lowehe gwen, “Mensa Bian nëbe mae hap hamal gulzimki eiwa nen esa ulin.” Zep kareksa de goltowennak, tatem em ëzauk gwen. Alapsa em gu sonebla tine gwen.

¹³ Kristen bose wal uk de ëtahalha gwenna, emki mas gwibirida gwen.

Hen eno mae mo tame tabin srëm zi de eno mae mo ënak yaïng gwe-gwe zankam, emki isrip-sri naban ere mae mo gola kon lup gulin gwen.

¹⁴ Zi de emsa Kristus mo bose hap karek tabinkim, Alapsa em gu sone gweblan- Zen de zëbe mae hap dawemsa golzimdin hip. Hwëna Alap de karek tabin hip bahem abetan.

¹⁵ Em de Kristen bose omka anakan salbiridankam, "Zen isrip-sri naban lowe he'an," emki hen zëno mae mo isrip-srina insa enhonak eisbin. Banakare kareksa de goltowen nakon de enlala dowe hanan naka salbiridanna, emki hen zëno mae mo enlala dowe hananna insa ere mae mo enhonak eisbin- em de hen gol towen makan.

¹⁶ Aha-ere enlalakam em lowehe gwen. Bahem anakan ëbolte-bolte gwe-gwen, "Ëe wal bosyanna wakin han apdenak hom." Hwëna bose srëm zi niban emki apdekam isrip-sri naban golëapde gwe-gwen. Bahem enaka anakan enlala gwibirida gwen, "Ëe an mes tanganë tewesik."

¹⁷ Zi de ebe mae hap kareksa golzimdinkim, em hwëna bahem zëbe mae hap karekna gol gwizimdin. Em hwëna tïngare zi mo nwenak dikim dam-dam enkam lowehe gwen hap em ëalp gwe-gwen.

¹⁸ Diki dawemna ere mae mo sosen jam en em ëalp gwe-gwendekam de tïngare aha zi niban enlala sësek enkam lowehe gwen hapye.

¹⁹ Hen aya-wal oso-wal, bahem tangan aha zi niban enaka hwëhwëkam karek ta gwibin. Diki Alap Zën sa karek ta gwibiri. Em bahem. Sap Alap mo olak man lwak,

"Ëe ama emsa gu-gubirida'an: Emsa de zi bose uk karek tabinni, Ëe asa hwëna desa karek ta gwibir. Em bahem."*

²⁰ Zep men kirekam Alap mo aha olak lwa'an, kirekam em gweibirida gwen,

"Eno jal zi de usak gwenna, tembanesa em golblan.

Hen ho-hole gwenkam, hosa em golblan.

Sap em de kirekam gwë gweblankam, dekam saherak esa drënera."*

²¹ Dowal mo kigi naban de zereijanak, bahem ësin gwe hana gwen. Hwëna dawemsa de gol gwen ennak em tatem ëzauk gwen. Zen dekam sa karek san dep de titi tan hap emsa topse gweblala.

13

Kristen zi de kirekam pemerinta mo nwenak lowehe gwen hap de ol:

¹ Pemerinta nakon men zen nësa irik nil gwenan, desa tïngan nen blikip gwesibirida gwen. Sap tïngare auhu-kamanak de teipsinteipsin weny, zen Alap dam tasik gwibirida. Zen de dam tasibin srëmkam, hom ëteipsik gwenan.

² Zen in zep, pemerinta mo titi tabin olsa de gulmurunkum, zen man nwe-mase gwe'an- Alap mo olsa de gulmurunnu kiye. Alap Zën sa hen nësa kire hap karek ta gwibiri.

³ Men zen dawemna syal nei gwibirin, zen hom pemerinta mo mam-mamna nairibirida gwenan. Diki men zen karekna syal nei gwibirin, zen man nairibirida gwenan. Zep em de dawem emsa syal gwe-gwibinkim, emsa sa sam neisik gweblal, hen airin srëmkam esa gwëgwera.

⁴ Sap pemerintanak de mam-mam weny, zen desa mes Alap nëbe mae hap de dawem hap dam tasibirki. Hwëna nen de zëno mae mo nwenak kareksa syal gwe-gwibinkim, ki nen airin niban esa lowehe gwer. Ki hwëna Alap sa desa nësa de karek tabin hip gubiridala. Sap desa mes Alap kire syal hap dam tasibirki.

⁵ Zen in zep, pemerintanak de mam-mam weny nen blikip gwesibirida gwen. Zen nësa dikim karek

* 12:19 12:19 Ul. 32:35 * 12:20 12:20 Ams. 25:21-22

tabin srëm en hap hom, hwëna nëna hen nère mae mo enhonak kirekame Alap mo dwam gwibinni eis gwibi'in.

⁶ Zen in zep, pemerinta hap em pajak hap de te-alana gol gwizimdin. Sap men zen pemerintanak irik nī'in, zen san de Alap hon de ëbabu gwe-gwen zini kiye, hen zen kitak pajak te-alana in dekon gajina nulin gwenan.

⁷⁻⁸ Zep men kirekam dakasti'in, kire enkam em gol gwizimdin. Emsa de pajak hap de te-alasa de golz-imdin hip gubiridankam, emki golz-imdin. Hen men zen blikip gwesibirida gwen hap ëdakasti'in, emki desa blikip gwesibirida gwen. Hen te-ala maesa de bohë gunnu, emki etan sul sonenkam gol gwizimdin.

Mae hap de ol: Kristen zini, nen nënaka kwasang gwibirida gwen, sap Yesus mo lwa halzan hap de yaklanak dep angkam man golek de gwe'an.

Angkam kwasang hap denakaë gulk sun blaonzim'in: Zini kim te-ala yawalsa zinik bohë nul gwenan, zen dekam ben jamkam etan nol gwizimnin. Kim su nul sone gwenan, dekam zep gol gweblanna nolzausuk gwenan. Hwëna ëe ama emsa gubirida'an: Zi bosyansa de kwasang gwibirida gwenna desa bëjen golzausun. Sap men zen zi bosyansa kwasang neibirida gwenan, zen dekam tingare Musa mo titi tabin olsa su nul sone gwenan.

⁹ Sap tingare Musa mo titi tabin ola, zëno ausuna zen kwasangnak lwa'an. Sap zi bosyansa de kwasang gweblankam, dekam wal bosyansa de karek ta gwen srëm hap de titi tabin ola insa bëjen gulmurun. Zep kwasang gweblankam bëjen kahalo tan hen sowë tan. Kwasang gweblankam hen bëjen zëno bi gwibin kire-kiresa dwam gwibin, hen bëjen tan. Zep Musa mo jalse gwen ola in, zi bosyansa de karek ta gwen srëm

hap dena, zëno ausuna aha-en- men zen hen anakan lwakye,

“Zi bose omka em kwasang gwibirida gwen- san de enaka de kwasang gweblanna kiye.”*

¹⁰ Zep nen de aha zisi kwasang gwibirida gwenkam, nen dekam bëjen desa karek tabin. Zep dekam man nwe-mase gwe-gwenan, nen hen kwasangsa de syal gwibinkim tingare Musa mo titi tabin olsa kim su kul sone gwenan.

¹¹ Kirekam de lowe henna zen hen mae hap: Sap Bian mo lwa halzan hap de yaklana angkam man tangan golek de gwe'an. Zep ni truwen makan bap nen lowehe gwen. Sap nësa dikim hëndep denaban ngaya tabin hip de yaklanak angkam mes tangan golek de gwer. Men kime Biansa laibliblak, dekam nama langanak.

¹² Sap kawesinni an zen angkam lwa'an, tap gwen hap man golek de gwe'an. Hwëna nen dikim ngatan tangannak lowehen hap de yaklana angkam man zilsī'in zala. Zep kawesinnik bap nen lowehe gwen. Kawesinnik de lowehe gwen zi mo syala bap nen gol gwen. Diki ngatannak de lowehe gwen zi mo syal ensa nen gol gwen- dowal mo kigisa dikim zereija gwen hapye.

¹³ Zep nen Kristus mo nwenak dam-dam enkam nen lowehe gwen- dekam de kitak nësa anakan tame tabin hip, “Zen eiwa ngatannak lowehe gwenan.” Syan-syan enlala enkam bap nen lowehe gwen. Hen ho mamakna bap nen mamkam otdeblanda gwen. Bap nen ëkahalo gwe-gwen. Hen nère mae mo holehle san bap nen ang ta gwen. Hen bap nen ëdarak gwe-gwen. Hen aha zi de banakare dawem maesa gul irinnik hla tankam, bap nen kire hap husus gwibirida gwen.

¹⁴ Diki Bian Kristus Yesus en hon nen nënaka sosok ta gwibin- Zen dekakim enho nakon nësa golëlowehe gweka. Hen bap nen

* **13:9 13:9** Kel. 20:13-15; 20:17; Ul. 5:17-19; 5:21; Im. 19:18

enho nakon ëkalang gwe-gwen-dekam de nère mae mo auhu-kama hole-hle san ang ta gwen hapye.

14

Mae hap de ol: Kristen zini nëno mae mo taiblibin hip dena man engka en srën-srën në'an, zep kire nakon bahem enaka husus gwibirida gwen.

¹ Ere mae mo Kristen bosena men zen nama Kristussu de taibliblannak étatete gwe srëm gwe'an, deban mae sap esa olësiri gwe-gwer. Hwëna bahem enaka anakare hap klis gul gwen hen husus gwibirida gwen, "Zen ba hap nama ëpba titi tabin ola in san ang ta gwe'an?" Ahaksa, "Zen ba hap ang ta srëm gwe-gwe'an?"

² Zep anakarekam lwa gwenan: Biansa de taibliblannak men zen étatete gwëk, zen tingare tembanena man dwin gwibirin. Hwëna men zen étatete gwe srëm gwe'an, zen bëjen tweran ninkim dena twinbin. Zen mae hap dwinbir srëm gwe-gwe'an: Sap zère mae mo enhona man anakan jalse neibirida gwenan, "Em de twinbinkim, em esa Alap mo nwenak karek gwera." *

³ Zep em men zene tingare tembanena olgwen gwibirin, em bahem, men zen dwinbir srëm gwe-gwenan, desa husus gwibirida gwen. Hen emsa men desa ere mae mo enhona jalse gwibirida gwenda, em hen bahem tweran nin twin gwibin wenyä insa anakan jalse gwibirida gwen, "Em ema tweran nin twinbinkim Alap mo nwenak ëkarek gwe-gwenan." Sap Alap mes desa hen kap gul inki.

⁴ Sap Alap hom emsa gwibirida'ara- em de ere mae mo Kristen bosa wal mo kareksa klis gul gwizimdin hipye. Zen diki Bian

zère mo dena- anakan de klis gul gwen hap denaye, "Em ema ano nwenak husus gwe'ara," ahaksa, "Em ema sam gwesi'ira." Hen Bian mo sosonna ki- dekam de eno mae mo Kristen bosena insa eiwa de ora san dep golëwet so gwen hap denaye.

⁵ Hen kirekam, ahakon man yaklana näitblinda zahe gwenan, "Bian hap dena, an diki zen tangan." Hwëna ahakon man ëgu gwenan, "Kitak de yaklana, zen Bian en hap dena." Zen diki srën-srënkam emki ere mae mo dam gulsun sun ang ta gwen.

⁶ Men zen yaklasa näit gweblanan, zen hen Biansa dikim blikip gwesiblin hap kirekam syal ta gwenan. Men zen hen näitbli srëm gwe-gwenan, zen hen Biansa kirekam blikip neisik gweblanan. Hen men zen tweran ninni dwin gwibirin, zen hen dekam Biansa blikip neisik gweblanan, sap zen tembanena in hap Bian hap dawemsa nol gweblanan. Hen men zen tweran ninni dwinbir srëm gwe-gwenan, zen hen Biansa dikim blikip gwesiblin hap kirekam ëgwë gwenan. Zep zen hen Bian hap zère mae mo tembanena in hap dawemna nol gweblanan.

⁷ Zep dare hlikna in, zen Biansa dikim blikip gwesiblin hap kirekam srën-srënkam syal ta gwenan. Zen äiris. Sap nen nën home nère mae mo auhu-kamanak de lowe henna bi eibi'in- dekam de nën dam gulsun hupye, "Ëe asa holokam gwër," ahaksa, "Nabakam asa til."

⁸ Zep nen de holokam lowehen hap dena, zen diki Bian mo tahanak lwa gwenan. Tin hip dena hen kirekam. Zep nen diki Bian de nësa sam gwesibiridan en hap nen lowehe gwen.

⁹ Sap Kristus kire hap tilki hen tin

* **14:2 14:2** Dekam ahakore Kristen zini mae hap tweran ninni dwinbir srëm gwe-gwëk: Sap Kristen srëm zini dekam yang tasibin dowal-dowal hap de blom tabir-zimdin otweran nin mosrosa pasarak lirak da gwibik. Zen zep ahakore Kristen zini kire naka de li tabin srëm hap tweran nin twinbinni baes ta gwëk. Hen ahakon, men zen Yahudi zi ausu nakon ëKristen gwëk, zen hom Yahudi mo golsriwen tweran ninni dwin gwibik- men ki gwe ninni.

nikon etan ngaya gweka: Dekam de nësa bi gwibiridan hap- sap nama men zene lowe he'an, hen men zen juwenkam teingir gwe gukke.

¹⁰ Zep em ema ëkarek gwe-gwenan- ere mae mo Kristen bose walsya de anakan jalse gwibirida gwenkamye, "Em ema kirekam Bian mo nwenak ëkarek gwe-gwenan." Hen em ba habe Kristen bose omka husus eibirida gwenan? Emki ëenlala gwen: Lamkam de Bian nësa kitak klis gul zunkam, Zen sa nësa anakan takensibirida gwera, "Em ba habe kirekam enaka karek la gwibik?"

¹¹ Sap Alap mo olak anakan lwak, "Ëe, Ngaya Zini Alap, ama emsa gubirida'an:

Eiwa, tingare zini boklesa sa ap kom da gweblal,

hen anakan sa Asa nen gweblal,

'Em in, eiwa, Alap.' ">*

¹² Zen in zep, Zen diki Alap Zën sa nësa nëre mae mo auhu-kamanak de gwën hap takensibiridala, hen Zen diki Zen sa nëno mae mo karek-karekna anakan nëp klis gulzimdi, "Em kirekame karek gweka."

Mae hap de ol: Bahem ere mae mo Kristen bose walya karek san dep de titi tan makan gweibirida gwen.

¹³ Sap nësa Bian kirekam sa klis gulu, zep nen bap nen nënaka anakan klis gul gwen, "Em ema kirekam ëkarek gwe-gwenan." Diki anakan nen nënaka alp gwibirida gwen, "Ëe babë ëre mo Kristen bosena karek san dep de titi tan makan gwëblan. Ki zen sa tol kareknak zara."

¹⁴ Ansaë an kon ebe mae hap ayang gulzim'in, desa Bian Yesus Zën abe hap golblaka: Tembanena hom tangan- dekam de Bian mo nwenak ëkun gwen hap denaye. Hwëna zi de anakan eisbinni, "Ëe asa tembanena an kon Bian mo nwenak kun gwer," ki zen bap zen twinbin. Hen Kristen bose zem bap zen twinbin hip titi tan. Sap zëbe

hap eiwa man nwe-mase gwe'an-golsriwen tembane.

¹⁵ Sap em de Kristen bose uk mo nwenak zëno golsriwen tembanesa twinbinkim, zen dekam sa zëre mo enhonak anakan eisbiri, "Abe hap sap kire tembanesa de twinbinni karek, hwëna anik ki aka-sibik." Hwëna zëno enhona sa hyanak dowebla hanala. Zep em de zëno nwenak kiresa twinbinkim, em ema karek san dep de titi tan makan gwëbla'ara, hen ki home kwasang gwebla'ara. Sap Kristus zëbe hap hen tilki. Zep bahem zëno enho nik dikim dowebla hanan hap titi tan makan gwëblan- zëno nwenak de twinbinkimye. Zen mana tol syauk sun de ora san ang gwenanka.

¹⁶ Zëno nwe srëmnak sap esa. Sap em mese tame gulku, "Kiresa de twinbinkim ëe homë karek gwe'an." Sap zini in Alap mo dwam gwibinsi srën tame gu'ura, zep bahem zëno nwenak twinbin. Ki hwëna em insa Alap mo dwam gwibinni srën tame gulku, dekon sa hwëna emsa anakan enlala gweblala, "Zen man kirekam karek gwe'ara."

¹⁷ Sap tembanena hen ba maesa de otdebin hip dena, zen Alap mo nwenak bol-zaun nuka hom. Diki nen men zene Alap mo irik ginnik lowehe gwe'an, an diki zen nëbe mae hap bol-zaun tangan wenyaye: Zëre mo Enho nakore isrip-sri naban nen nëre mae mo Kristen bose walya ban aha-ere enlalakam Alap mo dwam gwibin en san lowehe gwen.

¹⁸ Tingan men zene kirekam Kristussu ang ë gweblanan, Alap man nësa sam gwesibirida gwe'ara, hen zi bosyanna sa hen nësa sam neisibirida gwer.

¹⁹ Zen in zep, Kristen zini nen nen ëalp gwe-gwen- dekam de aha-ere enlalakam lowehe gwen hap, ekakim nënaka Kristus en hon dikim tatem ëzauk zahen hap dena kim titi la gwibik.

²⁰ Zep em bahem Alap mo zi

* 14:11 14:11 Yes. 45:23

syal gwibinsi karek ta gwibin- zëno mae mo nwenak de zëno mae mo golsriwen tembanesa twinbinkimye. Sap eiwa tingare tembanena Alap hom golsriwe'ara. Hwëna em de Kristen bose uk mo nwenak twinbinkim, hen zen de emsa de hla tankam ein mas gwenkam, ki em mese desa kareknak drë nenda. Zep em hen dekam mese karek gwenda-kirekam de gwëblankamye.

²¹ Zep tweran ninsi bahem kirenik mo nwenak twenblanda gwen. Anggur hona hen bahem desa de otdeblanda gwen srëm zi mo nwenak otdeblanda gwen. Hen ahakore nik mo golsriwen syalsa zëno mae mo nwenak bahem mae gol gwen. Ki hwëna desa esa kim karek san dep de titi tabin makan eibirida gwer.

²² Zep men kirekame Biansa tembane mae hap dena laiblibla'an, zen diki ere mae en mo enhonak em lone gwen- Alap en de emsa tawa gwibirida gwen hap. Zep men zene anakan eis gwibirin, "Èe kirekam de gwënkam, kareksa homë go'an," em isrip-sri gwibinnike lowehe gwe'an.

²³ Hwëna zi de enlala nik anakan beya gwenkam, "San ha èe twinbin? San ha babë?"- kire zini bap zen twinbin. Sap zen de twinbinkim, ki zen sa Alap mo nwenak karek gwer, sap zen hom anakan taibli'ara, "Èe de desa twinbinkim, èe homë dekam karek gwe'an."

Zep em de ba maesa anakare enlala naban syal gwibinni, "Alap hom dekam asa sam gwesibli'ara," ki em eiwa zëre mo nwenak mese karek gwenda. Sap em home ere mo syala insa anakan taibli'ira, "Alap man kire syala sam gwesibi'ira."*

15

Men zen Kristussu de taibliblannak ètatete gwe srëm gwe'an, desa de kirekam mas gwibirida gwen hap de ol.

¹⁻² Nen men zene Kristussu de taibliblannak ètatete gwek, nen

bap nen në-en de nënaka sam gwe-sibirida gwen hap syal ta gwen. Hwëna men zen ètatete gwen srëm nakon anakan nama neis gwibi'in, "Tembanena an sanë twinbin? San babë?"- zen de hen nësa sam gwe-sibirida gwen hap nen hen syal ta gwen. Hen nen mas gwibirida gwen- zen dikim hen Bian Yesussu de taibliblannak tatem èzauk zahen hapye.

³ Sap Kristus Zen hom zë-en dikim sam gwe-sin hip syal gweka- men kirekam zëbe hap dena Alap mo olak lwakke, Zen kim Alapsa anakan gublukaye,

"Alap, zini men kim Emsa lamang da gwek, Èe hwëna dekam ama eisbik- san de Asa de lamang tanna kiye."*

⁴ Tingan men zen kirekam Alap mo èpba olak ale nul gwek, zen nësa dikim tawa ta gwibin hip, hen enlala tatetesa dikim nëbe mae hap zer gwizimdin hip. Nen dekam anakare enlala naban esa tatem èzauk gwer, "Nen an Alap mo taha terenake lowehe gwe'an, hen Zen sa zëre mo ol gu-gunsu nëbe mae hap kitak sul sonezimdi."

⁵⁻⁶ Sap Zen Alap Zën kirekam de enlala tatetena zer gwizimnira, nen zebe enlalana èdowe hana srëm gwe-gwenan. Dikire Alap ebe mae hap aha-ere enlalakam dikim lowehen hap dena etan mas gul gwizimk- apdekam ekakim aha-ere enlalakam Bian Kristus Yesus mo Bian Alapsa boltere la gwek, men kirekam Kristus Yesus nësa dwam gwibirida'arake.

Mae hap de ol: Yesus Zen Yahudi zi en hap hom hata zaka, zep bap nen kire hap nënaka klis gul gwen.

⁷ Zen in zep, aya-wal oso-wal, Kristus hom nësa anakan klis gulku, "An Yahudi zi. An Yahudi srëm zi." Zep nen hen bap nen nënaka kire hap klis gul gwen. Hwëna Alap mo bose dikim teipsin hip nen nënaka

* 14:23 14:23 Yak. 4:17 * 15:3 15:3 Mzm. 69:8-10

anakan enlala gwibirida gwen, “Zen ano Kristen bose.”

⁸ Emki eenlala gwen: Kristus Yahudi zisi de babu gwibiridan makan hata zaka- Alap mo ngaya tabin hip de kalangna mensa auyan-aza zemka gu-gubirida gwekake, desa dikim sul sonezimdin hip. Zen dekon zep tangan dam gwesinän, “Alap eiwa taibliblan tanganna.”

⁹ Hwëna Kristus hen Yahudi srëm zi hip hata zaka- zen dikim hen Alap zëre mo kwasang-kwasang nakon Zënaka boltere ta gwen hap. Sap Alap mo olak Kristus mes hamal hap Alapsa anakan gubluka,

“Èe asa Yahudi srëm zi niban eno bosena ziteip gulsuk gweblal, hen tërya ban asa eno bosena zi-boltere gul gweblal.”*

¹⁰ Hen Musa Alap mo olak kire hap hen ale gulku,

“Yahudi srëm zi, em Alap mo nonol hlil irin zi niban em apdekam Alapsa isrip-sri gwe-gweblan.”*

¹¹ Etan ahana Yahudi srëm zi hip dena buku Mazmuruk anakan ale nuk,

“Tingare zi ausuna Alapsa em isrip-sri gwe-gweblan.

Hen tingare okamanak de zini Desa en boltere la gwek.”*

¹² Hen Yesaya Bak Alap mo ola anakan ale gulku,

“Daud Bak mo weinak de irik gin hip de Zini men Zen de hata'an zaka,

Zen Zen sa hen Yahudi srëm zi ausuna irik gili.

Hen zen Desa en sa ëngaya gwen hap blol në gweblal.” *

¹³ Zen in zep, sap em hen mese Bian Yesussu laibliblak, Èe in zebë Alapsa ebe mae hap abe ta gwenan- Zen de isrip-sri enlalasa ebe mae hap mamkam ing ta sone gwizimdin hip, anakare enlala naban, “Nen an eiwa Alap mo taha terenake lowehe

gwenan.” Dekam Alap mo Enhona sa emsa golëlowe gwera, hen dekam esa anakan de tame gunnu esek ulse gwer, “Alap mensa nësa gu-gubiridaka, nen eiwa esa ulin.”

Mae hap de ol: Paulus kire hap Romak de Kristen zi hip udobe naban ale gul sonezimki.

¹⁴ Zep aya-wal oso-wal, èe anakare enlala nabanë suratna ansa ebe mae hap ale gul sonezimk, “Romak de Kristen zini in dawem-dawem tanganna. Zen hen dawemsa aha zi hip hen-henkam noltrei gwizimnin. Zen hen mes Alap mo dwam gwibinni tame nuk, hen dekam aha zisi desan dep titi da gwibirin.”

¹⁵ Sap èe mesë kirekam emsa taiblibiridak, in zebë anakan enlala gwek, “Èe anik etan udobe naban suratkam enlala sobiridak, sap Alap mes ki zëre mo kwasang-kwasang nakon syala ansa abe hap wei yul soneblaka.”

¹⁶ Sap Zen eiwa mes asa dam tasiki- Kristus hup de ol dawemsa de Yahudi srëm zi mo lang-lang san golzim halada gwen hapye. Zen kim Kristussu daibli gwebla'an, Alap dekam zep zëre mo Enhokam ngan tasik gwibi'ira. Yahudi srëm zini in dekam zep zëre mae mo timni Alap en hap sosok nul gwebla'an- otweran ninsi de Alap hap de kalsnak lone seblan makanye. Alap man tangan dekam sam gwebirida gwe'ara. Ano syala zep nwe-mase gwe'an- san de Alap mo golak de syal gwe-gwen zi de otweransa tru tase gweblanna kiye. Hwëna ano syala otweran tangan hap hom. Zen hwëna dekam zini zëre mae mo timni Alap hap sosok nul gwebla'an.

¹⁷ Zep zen in zebë Alap mo nganak de ère mo syala insa Kristus onakon sam gwesik gwibi'in

¹⁸ hen boltere gul gwe'an. Sap zen ano syalsa hom. Zen Kris-

* **15:9 15:9** 2Sam. 22:50; Mzm. 18:50 * **15:10 15:10** Ul. 32:43 * **15:11 15:11** Mzm. 117:1

* **15:12 15:12** Yunani olkam, Paulus man anakan Yesaya mo ola insa ale gulku, “Isai Bak mo ausu nakon sa hata'an zaka...” Isai, zen teipsin zini Daud Bak mo Bian. (Yes. 11:10)

tus ap wei yul soneblaka- Yahudi srëm zini emsa dikim Alap osan dep zon guluda gwen hap, sap ano ola kon de Biansa taïbliblankam, hen ano banakare syal mae nakon de taïbliblankam.

¹⁹ Sap Alap mo Enhona man abe hap sosonna gol gweblanda, zen in zebë Yahudi srëm zi mo ngirinnik sërkam de owas-owasna syal gwe-gwibirin- dekam de zen hen Kristussu taïbli gweblan hapye. Kirekam de sosonna in, dekam zebë Yesus hup de ol dawemna insa ë-ë san sowe henkam anakan gol halada gwëk, "Zen Zen- nësa de ngaya tabin hip de Teipsin Zi niye." Nonol tanganna Yerusalem konë kon gwesik hanak, hëndep langna Ilirikumk golhatak.

²⁰ Sap ëe ama anakan dwam gwe-gwenan: Men zëwe Kristus mo bosena nasalbir srëm gwe'an, desan de tawa tabirida gwen hap. Sap ëe ama baes gwëk- aha mo nga syal gweblannak de otanesa eiyas gin hipye.

²¹ Zep ano kirekam de syala in, zen man dakasti'in- Alap mo olak men kirekam ale nukye,

"Zini men zen Alap mo zer sonen Zi hip de ola nulin srëm gwe'an, zen sa nulin gwer.

Hen men zen ësane gwe srëm gwe'an, zen sa ësane gwenkam hëndep tame nul."*

Paulus mo Romak de Kristen zisi de amjanbin hip de kalang ol:

²² Kirekam de langa san golzim halada gwen srëmkam, ki amaka Romak de zini emsa nabakam amjanbik. Hwëna ama hir-hir gwëk.

²³ Hwëna angkam mesë an san de langna beyakam amjanbinkim sul soner. In zebë hwëna ebon mae osan dep isrip-sri naban kalang gwe'an, sap orep mesë emsa de amjanbin hip kalang gwe-gwëk.

²⁴ Sap ëe angkam Espanyol san debë hen kalang gwe'an. Zen dekam asa hen emsa amjanbir kinzil.

Dekam asa isrip-sri naban apdenak emsa golëlowehe inendal. Dekon em neik hwëna asa Espanyol san dep de song gwennak mas ëblak.

²⁵ Hwëna angkam nonol Yerusalem san debë song gwe'an- zëwe de Kristen zi tahalha hap de te-alasa zerzimhan hap.

²⁶ Sap Makedoniak de Kristen zini hen Akayak de wenya zen mes zëre mae mo kwasang-kwasang nakon te-alana tagam dak- Yerusalemk de Kristen zi tahalhasa dikim mas gwibiridan hapye.

²⁷ Zen zëre mae mo enlala enkam ki Yerusalemk de Kristen bose zemka de te-alakam mas gwibiridan hap ola aha-en nuk. Sap kirekam man tangan zëbe mae hap sam gwe-sizim'in. Sap Yerusalemk de zini mes nonol zëbe mae hap hëndep dikim lowehe gwen hap de te-alana nër sonezimk. Zep man tangan sam gwesinin- Yahudi srëm zi de okama ennak dep de te-ala enkam mas gwibirida gwenkamye.

²⁸ Zep ëe kimë syala ansa sul sonesi'ik, te-alana insa de zerzim hankam, zen dekam asa Espanyol san dep emsa amjanbir kinzil.

²⁹ Hen ëe ama Kristussu blol gwebla'an, ëe de ebon mae onak hata zankam, Zen sa abe hap hë'ho gwibin nika golblala- desa de hwëna ebe mae hap kae gwibirizimdin hip.

³⁰ Aya-wal oso-wal, nen angkam mese apdekam Bian Yesussu eirink, hen Alap man zëre mo Enhona nen dikim nënaka hwë-hwëkam kwasang gwibirida gwen hap dena ing ta sone gwizimnira, zen in zep emki hen abe hap enlala zon tasiblin naban Alapsa abe ta gwen.

³¹ Mae hap em Alapsa abe ta gwen: Yahudi mo langnak de Bian Yesussu taïbliBlan srëm zi mo taha nakon deka asa hil ti sone gwëka, hen dekam zëwe de Kristen zini in ano syala ansa isrip-sri naban nulink.

³² Kirekam de Alap mo dwam gwibin sin lwankam, ëe isrip-sri

* 15:21 15:21 Yes. 52:15

enlala naban asa ebon mae onak hatazal, hen eban mae de lowe henkam ëe asa tangan sam gwesil.

³³ Alap men Zen zëre mo tahana nëbe mae hap deisu guzim'ira, dikire Zen emsa kitak kara ta gwibik. In eiwa tangan!

16

Paulus mo dawem gol sonen ol:

¹ An kon an, em dikim nëre mae mo somola Pebe Baksa tame gun hubë ale gulzim'in: Zen Kengkreyak de jematnak de zi mo tahasa tri so gwizimnin. Zep emki desa dawemkam gul irin,

² sap em mese apdenak deban mae Bian Yesus hun ëraha-en gwek. Emki zëno tahalhasa sul sonebin, sap zen hen mes Kristen zini beyakam mas gwibirida gwek. Asa hen ki mas gwe-gweblak.

³ Ano dawem gol sonen ola ansa ëre mo wal bose darena Priskila ne Akwila nikip ayang ulzimk. Zen aban mae apdekam Kristus mo nganak syal ta gwenan. *

⁴ Hen Kristus hup de jal hap kim sap asa da'ak, zen zen hwëna asa de ërzaunnuk lïn hip alp eisik. Hen zen dekam asa en hom kirekam mas ëblak, hwëna tingare Kristen zisi mas eibiridak. Sap asa de ngaya la srëm gwenanam, ki ahakon molya ëKristen gwe'anam. Zen zep Yahudi srëm zini men zen abon onakon ëngaya gwen hap de ol dawemna nulin gwenan, zen hen zëbe nikip dawemsa nolzim'in.

⁵ Hen ano dawem gol sonez- imdinni emki hen gubiridan- jematna men zen zëno nik mo golak tagal gwe-gwenanke, zëbe mae hap.

Hen ano dang tininak de wal bosena Epenetus Baksa enblak,

“Paulus dawem ensa ep gol soneblaka.” Sap Asia mo lang nakon, zen zen nonol Kristussu taibliblaka.

⁶ Hen kirekam Maria Baksa enbik, “Zen dawem ensa ep gol sonebirki.” Zen ebe mae hap de dawem hap mes syala dohon-hon naka gol gwek.

⁷ Hen Andronikus ne Yunia neka enzimk, “Zen dawem ensa ebe nikip gol sonezimki.” Zen ano Yahudi bose, hen zen apdekam asa bwinak ërgwë gwek. Zen Kristus mo dam sosun we-zi dare, hen ahakore dam tasibin wenya man sam neisik gwizimnin. Hen zen zen nonol abon onakon Kristussu laibliblak. Eë hwëna zëno nik mo lure nakonë taibliblak.

⁸ Ano dang tininak de wal bosena Ampliatussu hen enblak, “Paulus dawem ensa ep gol soneblaka.” Sap ëe deban mesë apdenak Bian han ëraha-en gwek.

⁹ Urbanu'u hen enblak, “Paulus dawem ensa ep gol soneblaka.” Sap ëe deban mae apdenak Kristus mo nganak syal ta gwenan. Ano dang tininak de wal bosena Stakis Baksa hen kirekam enblak.

¹⁰ Hen kirekam Apeles Bak hap ano dawem ola ayang ulblik. Sap desa kim Kristus hup de jal hap karek dak, zen hom dekam Kristussu hli taka. Zen hëndep angkam nama tatem zau'ura. Hen Aristobulus Swe hon de syal ta gwen zini enbiridak, “Paulus dawem ensa ebe mae hap gol sonezimki.” †

¹¹ Ano Yahudi bosena Herodion Baksa hen enblak, “Zen dawem ensa ebe hap gol soneblaka.” Hen Narkisus Swe hon de syal ta gwen Kristen aya-wal oso-walya enbiridak, “Zen dawem ensa ebe mae hap gol sonezimki.”

¹² Hen ano dawem gol sonen ola we darena Tripena ne Tripisa neka

* **16:3 16:3** Priskila, zen we bose. Akwila, zen zi zem. (Kis 18:2-3; 18:18; 18:26) † **16:10 16:10** “Aristobulus Swe hon de syal ta gwen zi” hip dena awe, Paulus man Yunani olkam anakan ale gulku, “Aristobulus hon de wenya.” Dekam man nwe-mase gwe'an, Paulus Aristobulus zëre hap hom dawemna gol soneblaka. San ha zen dekam mes yap tilki- men kirekam hen orep tangan de Kristen zini ale nulblikke, hen san ha dekam Kristenkam de babu zem man yap tinkim hli yuludaka? Ahaksa, san ha zëno golak de lowehe gwen wenya kip gol sonezimki?- men zen en ëKristen gwekke. Ayat 11nak Narkisus Bak hap dena hen kirekam lwa'an.

enzimk, men zen hen Kristus hup de syal dohon-honna ol gwenanke. Hen ano dang tininak de somola Persis Baksa hen kirekam enbik, sap zen hen kirekam de syal dohon-honsa gol gwek.

¹³ Hen ano dawem gol sonenna Rufus neka an zeban enzymk. Kristus man tangan sam gweka- Zen kim desa zere mo syalsa de gol gwen hap dam tasikiye. Hen an zem insa, ee ama tangan gweibik- san de ano ane tanganna kiye.

¹⁴ Hen ano dawem ol gol sonenna enbiridak- Asinkritus, Plegon, Hermes, Patrobas, hen Hermas Baksa, hen tingare aya-wal oso-walya men zen deban mae lowehe gwenan. Desa kitak enbiridak.

¹⁵ Hen ano dawem ol gol sonenna enbiridak- Pilologus Baksa, Yulia, Nereus, hen zeno somola, hen Olimpas Baksa, hen tingare Kristen gwen wanya men zen deban mae lowehe gwenan. Desa hen kitak anakan enbiridak, "Paulus ebe mae hap dawem ensa gol sonezimki."

¹⁶ Men kirekam Kristen zini etagal gwennak egwe gwenan, ansa de baca gulsun hyanak emki kwasang naban enaka tahasa golétowaran. Tingare awe de aya-wal oso-walya zen dawem ensa ebe mae hap nol sonezimk.

Aumwa hap de ol zim-zim:

¹⁷ Aya-wal oso-wal, ee etan aumwa hap ol zim-zimsi ebe mae hap mas gulzim'in: Men zen ehliwen hap emsa titi da gwibirin, desa bahem salbirida gwen. Sap zeno mae mo tawa tabinni in hom apde ne'an- men kirekam nonol emsa tawa da gwibikye. Sap zeno mae mo yasik tabinni in, dekam zep zini Kristussu de taibliblan nakon ealtil gwenan. Zep kirekam de zini langa lasik gwibik.

¹⁸ Sap kirekam de zini, zen neno mae mo Teipsin Zini Kristus mo syalsa hom no'an. Zen hwena zere mae mo dwam-dwam enlalasa dikim sul sonen hap kirekam syal

ta gwenan. Zen yasik tabin hip ol derek-derekkam ba tame gun srēm wenyaka nolēton gwenan, hēndep desan zep ang ta gwenan.

¹⁹ Hwēna emsa tingare Kristen zini mes anakan tame dabik, "Romak de Kristen zini, zen eiwa tangankam Bian osan ang ta gwe'an." Zep kirekam de emsa sane ta gwibinkim, ee ama tangan emsa isrip-sri gwibirida gwenan. Ee in zebē emsa titi tabi'in: Enlala blala ban em dawem ensa gol tine gwen. Hwēna karek gol gwensa em hwalebin.

²⁰ Alap men zen tahana nebe mae hap deisu guzim'ira, Zen sa nabakam dowal mo kigisa neno mae mo tana iltikinnik dreneranen dikim ze zaublu inen hapye. Dikire Bian Yesus onakore kwasangkwasangna eno mae mo enhonak lwa gwek.

²¹ Kristus mo nganak de syal bosena Timotius hen dawemsa ebe mae hap gol sonezimki. Hen kirekam ano Yahudi bosa walya Lukius, Yason, hen Sosipater Bak, zen hen dawem ensa ep nol sonezimk.

²² Ee, Tertius, men zene suratna ansa Paulus mo ol san ale guk, dawem ensaē hen ebe mae hap gol sonezim'in, sap ee an hen eno mae mo Kristen bosa.

²³ Gayus Bak hen dawem ensa ebe mae hap gol sonezim'ira. Ee, Paulus, angkam zeno golake gwē'an, hen awe de jematna zeno golak tagal gwe-gwenan. Ee yala awe de pemerinta mo te-ala ait gweblan zini Erastus Bak hen dawem ensa ebe mae hap gol sonezimki. Neno mae mo Kristen bosena Kwartus Bak hen kirekam.

[
²⁴ Dikire Bian Kristus Yesus mo kwasangkwasangna ebon mae onak lwa gwek. In eiwa.]

²⁵ Men kirekamē Kristus hup de ol dawemna gol halada gwenan, neno mae mo Alapna Zen sa emsa Yesussu de taibliblannak dikim tatem ezaun

hup tatete ta gwibiri. Orep Alap mo kire hap de kalangna zi hip man aning gul gwizimki.*

²⁶ Hwëna ëe zebë angkam zëno orep de ol aning gunnu insa Yahudi srëm zi sin dep golzim halada gwe'an- men kirekam hëndep de gwë gwen Zini Alap Zëna abe hap syala wei yul soneblakake, hen men kirekam orep zëre mo olsa de ayang gul gwen zini hamal hap ëgu-guk gwekke. Hëndep em Yahudi srëm zi ausuna zebe angkam Kristussu läibli gwebla'an hen ang ë gwebla'an.

²⁷ Dikire Kristus Yesus onakon Alap mo bosena hëndep denaban teip nulsuk gweblak, sap Alap Zen Zen aha-en tangan- enlala blal Zi niye. Amin.

* 16:25 16:25 Ef. 1:9-10

Paulus mo surat Korintusk de Kristen zi hip

1-2 Korintusk de Alap mo hlil irin zi hip,

Paulus onakon, hen nère mae mo wal bosena Sostenes onakon:

Dawem! Èe, Paulus, mae habè ep ale gul sonezim'in: Sap Alap zère mo dwam gwibin sin mes asa dam tasiki- Kristus hup de olsa de gol halada gwen hapye. Hen emsa mes Alap kwang guludaka- Zèn dikim emsa bi gwibiridan hap. Zep em kime Kristus hun èraha-en gwek, Zen dekam zep emsa lalak tasibirki. Zep men zen Bian Yesus hup tìngare lang nakon boklena kom dabra tine gwenan, em hen mese deban mae siri gwek. Sap Yesus in kitak nèno mae mo Teipsinni.

3 Zen diki Bian Alap ne Bian Kristus Yesus ne sa kwasang-kwasang zemka mamkam ebe mae hap ol gwizimdi. Hen nen zère nik mo taha terenak esa lowehe gwer.

Paulus kim Alap hap dawemna golblakake, sap Alap mes zèno tawa tabin nikon Korintusk de zi hip hë'ho gwibin nika gol gwizimki.

4 Èe ama Bian Alap hap dawemsa golbla tine gwenan- mae hap: Sap em ano tawa tabin nikon mese Kristus hun èraha-en gwek, zen in zep Bian Alap sosonna zère mo kwasang-kwasang nakon ebe mae hap sowenkam gol gwizim'ira.

5 Sap em kime Kristus hun èraha-en gwek, em dekam zebe ere mae mo enhonak sowehen tangankam eisbik- sap ol toran hap dena, hen enlala blal hap dena.

6 Zen dekam zebe anakan dam ulsuk, "Paulus mensa Kristus hup de ola golhata zaka, zen eiwa de tanganna."

7 Zep angkam sosonna mensa Alap mo Enhona nèbe mae hap gol

gwizimnira, em home aha-en mae tahalha eibi'in. Em in zebe isrip-sri naban Bian Yesusu ès gwebla'an- Zènaka de etan zertrè zannak de-pye. Èe in zebè Alap hap dawemna anakan gol gweblanan, "Ema asa sam ta gwe'ara."

8 Zèn sa emsa tatete ta gwibiri, hëndep zère mo lwa halzan hap de yaklanak de zaunnuk zep esa enho kles gwesin srèm nik èzaul.

9 Alap sa kirekam ebe mae hap syal gwibir-zimdi, sap Zen zère mo ol gu-gunnu man sul sone gwenda. Zen bëjen emsa eititi gwibiridan, sap Zèn emsa kwang guludaka- zère mo Tanena Bian Yesus hun dikim zergolek de gwen hapye.

Mae hap de ol jalse gwen: Em ba habe èhliwe gwenan?

10 Aya-wal oso-wal, èe Bian Yesus mo bosekamè emsa gubirida'an: Enlalasa em aha-en ta gwen- dekam de èhliwe gwen srèm hapye. Bahem enaka jakal gwibirida gwen, hwèna banakare maesa de dwam gwibinni ahaksa kalang gwibinni, nonol em enlalasa dawemkam aha-en ta gwen.

11 Sap Kloë mo iyena man asa nenblazak, "Korintusk de Kristen zini man èdarak gwe-gwenan."

12 Insa darak gwen hap dena emsa gubiridal, zen anakan de ègwè gwensa: Ahakon ema ègu gwenan, "Èe an Paulussu de ang gweblan zi." Ahakon ègu gwenan, "Èe Apolo'a de ang gweblan zi." Ahakon ègu gwenan, "Èe Petrussu de ang gweblanna." Hen ahakon ègu gwenan, "Èe Kristussu de ang gweblanna."

13 Hwèna kirekam de lwankam, ki san Kristus mo timni esa blum ul?- deban de srèn-srènkam lowe hendan hapye. Ahaksa san ha telidak sonnak ebe mae hap èyè tik? Ki san emsa ano bosekam baptis dabik?

14 Angkam èe ama sam gwesin — mae hap: Èe homè emsa baptis tabik. Èe diki Krispus ne Gayus en nekaè baptis sok.

15 Zep ebon mae onakon ahana bëjen anakan gun, "Paulus zëre mo bosekam asa baptis taka."

16 O ahakon mesë hen enlala gwibiridanan: Stepanus Baksa hen zëno golak de wenya, zen hen ëyë baptis tabik. Hwëna dekon ahakorena, ëe homë enlala gwe'an.

17 Sap Kristus asa zisi de baptis ta gwibin hip hom dam tasikî. Zen diki zëre hap de ol dawemsa de gol halada gwen hap asa dam tasikî. Hen Zen anakan asa gubluka, "Auhu-kama zi mo enlala blala bahem ëre hap de ol dawem naban siri gun. Ère hap de te-lidak soblan hap de ola, diki zen zen bol-zaun gwen." Zen mae hap ki kirekam asa gubluka: Sap zi mo ëhalen hap de sosonna, zen kitak zëre hap de te-lidak soblan ennak lwa'an.

Mae hap de ol: Kristus hup de te-lidak soblanna, zen zëwe Alap zëre mo enlala blala nëp zertreizimki.

18 Sap men zen juwen hap de ora san ang ta'an, zëbe mae hap Kristus mo te-lidak sonnack de tinnî, zen asyas ol makan lwazim'in. Hwëna nen ëngaya gwen hap de ora san de ang tan wenya, nen ema anakan tame ul gwenan, "Alap mo sosonna, zisi de ngaya tabin hip dena, zen zëwe."

19 Sap Alap mo olak man lwak, "Auhu-kama zi mo enlala blala Èe asa hom tazim. Nwe hleng gwen wenyik mo tame gunnu Èe asa jek-jak gulzim."*

20 Zep auhu-kama nakore enlala blalsa de tawa tabin hip de wenya, hen sekolasa de sul sonen wenya, hen ol gulsun-gulsun hup de ëtewesin wenya, zëno mae mo auhu-kama en nakore tame gunnu in Alap mes joblo-top gulzimki.

21 Sap Alap zëre mo enlala blalkam mes tîngare zini gubiridaka, "Em bëjen em ere mae mo enlala blala kon Asa tame tan." Zen hom kirekam dep dwam gweka. Hwëna

Zen a kirekam mo nësa angkam gubirida'ara: "Ola mensa ena 'asyas ol makan' enlala ei gwibirin, hwëna zen dekon asa emsa ngaya tabir- em de desa taïblibinkimye."

22 Hwëna Yahudi zini, zen nonol owassa de goltreizimdin hip ëabe gwe-gwenan- dekam de taïblibin hipye. Hwëna Yahudi srëm zini, zen zëre mae mo enlala blal en san de ang tan hap ëdwam gwe-gwenan.

23 Zep nëno mae mo tawa tabinni, Kristussu de te-lidak sonnack makan ta irin hip dena, Yahudi zinik man jawe guk hana gwenan. Hen Yahudi srëm zini, zen man asyas ol makan enlala nei gwibirin.

24 Hwëna nësa men desa Alap Zëna kwang guludaka, sap Yahudi zi, sap Yahudi srëm zi, nëbe mae hap Kristus hup de ola in man nwe-mase gwizim'in, "Alap mo sosonna hen enlala blala zen zëwe."

25 Zep Alap onakore enlala joblo-top makare ola in, zen hwëna auhu-kama zi mo enlala blalsa man gulmun'un. Hen Alap onakore asyas makare ola in, zëno sosonna man taman kinî'an- auhu-kama zi mo soson nakonye.

26 Aya-wal oso-wal, emki ëenlala gwen- men kim Alap emsa kwang guludakake. Dekam em auhu-kama zi mo nwenak, bose nabarena beya naka hom. Em in totore lowehen zi- soson srëmna hen enlala joblo-topna, auhu-kama zi mo nwenakye.

27 Hwëna Alap enlala joblo-top wenya emsa kwang guludaka- dekam de enlala blal wenyik ësa her gwe-gwen hap. Hen Alap soson srëm wenya emsa mes hlil inki- dekam de soson wenyik ësa her gwe-gwen hap.

28 Mensa bose nabare wenya anakan lamang da gwibirin, "Wakin totore zi- ba maesa de tame gun srëmna," hwëna desa mes Alap dam tasibirki- desa de bose nabare wenya in hap lamkam anakan golëtreizimdin hip, "An zen ano

* 1:19 1:19 Yes. 29:14

nwenak de ëdakastin wenyaye. Em hom.”

²⁹ Mae hap ki kirekam syal gwibirki: Auhu-kama zi dikim Alap zëre mo nwenak zënaka bolte-bolte ta gwibin srëm hap.

³⁰ Sap nen Alap zëre mo syal en nakone ki Kristus hun ëraha-en gwëk. Zen zep nëbe mae hap de ausu hap Desa en drë neka. Zep nëno mae mo enlala blal hap dena Zëbon. Dam-damkam hen lalakkam de Alap mo nwenak gwën hap dena hen Zëbon. Hen ëngaya gwen hap dena Zëbon en.

³¹ Zen in zep Alap mo olak anakan lwak,

“Zini diki Bian ensa zen boltere ta gwen.

Zënaka bap zen.”*

2

¹ Aya-wal oso-wal, ëe kimë ebon mae hatak- Alap onakore ol dawemkam dikim emsa tawa tabin hip, ëe homë ëre mo ola sam-sam gul gwëk- dekam de em asa enlala gweblan hap, “Zini an zëno enlalana blala.”

² Sap ëe mesë enlalana anakan hohle ta guk, “Ëe de zëbon mae gwënkam, ëe Kristus Yesus de zëbe mae hap te-lidak sonnak tin en hap denaka asa tawa ta gwibir.”

³ Ëe kimë eban mae golëlowehe gwëk, ëe dekam sin-sinni, hen airin hip ama yal-yal gwe-gwëk.

⁴ Ano tawa tabinni dekam, ëe homë ola sam-sam gul gwëk- dekam de em asa enlala gweblan hap, “Zini an zëno ola sosen tanganna- enlala blala ban.” Hwëna ëe Alap mo Enhonakë yaing gwe kinë gwëk-anakare enlala naban, “Zen Zen sa zëbe mae hap zëre mo sosonna goltrei gwizimdi- banakare owas maesa de syal gwibir-zimdinkim.” Hëndep em zebe zëno sosonna hla kuk.

* 1:31 1:31 Yer. 9:24 * 2:9 2:9 Yes. 64:4

⁵ Ëe mae habë kirekam gwëkem dikim auhu-kama nakore enlala blalsa abon hla tan srëm hap, hen desa de em taiblibin srëm hap. Hwëna aena diki anakaresa de hlaulblun habë sam gwesik, “Zen Alap mo sosen nakon syal gwe-gwenda.”

⁶ Hwëna Kristen zini nëno mae mo tawa tabinni, Kristus de nëbe mae hap te-lidak sonnak tin hip dena, zen sap enlala blala ban. Hwëna auhu-kama ennak de enlala ëlwa gwen zini bëjen enlala blala insa tame tan, sap zen Alap onakorena. Diki men zen Kristus hun de zeraha-en gwennak ëzise gwe'an, zen en sa enlala blala insa tame da gwer. Sap enlala blala men dekam tawa la gwibirin, zen auhu-kamana an kore naka hom, hen men zen angkam teipsinkim irik nil gwe'an, zen hen dekore naka hom. Zëno mae mo irik ginni in nabakam sa jek-jak gwer.

⁷ Hwëna enlala blala men dekame tawa la gwibirin, zen Alap zëre onakorena- mensa menkam zi hip aning ta gwizimkike. Hwëna Zen sap orep mes okamana ansa de yang gulsun srëmnak nësa anakan kalang gwibiridaka, “Enlala blala bare ol dawemna in san de ang tankam, zen zen sa ëre mo ngatannak yaing gwer.”

⁸ Okamana awe de teipsin-teipsin wenyha hom Alap mo enlala blal aning tanna insa tame dak. Sap zen de tame dananam, ki molya ngatan zi mo lang nakore Teipsin Zini Yesussu te-lidak sonnak makan da inninam.

⁹ Hwëna enlala blala insa de tame tan hap dena, desa mes Alap nëbe mae hap golzimki- men kirekam zëre mo olak lwakke,

“Zi mo hlaun srëmna, hen sane gwen srëmna,

hen enlala gwibin srëmna, desa mes Alap hamal gulzimki- men zen Zënaka enna nola gweblananke,

zen en de desa tame gul gwen hap.”*

¹⁰ Hwëna zen in zebe nen angkam Alap mo enlala blal aning tanna insa tame la gwenan, sap nen zëre mo Enho nabane lowehe gwenan. Sap zëre mo Enhona Zen kitak hëndep olk en san denaka tame gul gwenda-sap Alap zëre mo enlala aning tanna hëndep kitak.

¹¹ Men kirekam hen zi mo enlalana, zen diki zini in zën en de tawa gweblan. In zep hen kirekam Alap mo enlalana zen diki Alap zëre mo Enho en de tawa gweblan.

¹² Nen auhu-kamana an kore enhosa home eirink. Nen hwëna Alap zëre mo Enhosae eirink. Zen in zebe tame ul gwe'an- dawemna mensa Alap totoresa nëbe mae hap gol gwizim'ira, Kristus hun de zerahan-gwenkam.

¹³ Zep nen in dekame tawa la gwibirin, zen auhu-kama zi mo enlala blala korena kim hom. Zen Alap zëre mo Enho nakore enlala blalkame tawa la gwibirin. Zen in zep Alap zëre mo Enho naban de zergwën zi enna dam nulsuk gwenan.

¹⁴ Alap mo Enho naban de zergwën srëm zini, zen bëjen Alap mo Enho nakore enlala blala insa dokwak tan. Zëbe mae hap man nwe-mase gwe-gwizimnin- san de asyas ol. Tame gun hup ki sap ëalp gwe-gwenan, hwëna Alap mo Enho naban de zergwën srëmkam, toton bëjen tame gun.

¹⁵ Hwëna Alap mo Enho naban de zergwën zini, nen ema tingare tawa tabinni anakan klis ul gwenan, "An eiwa Alap mo Enho nakorena. An dekore naka hom." Hwëna auhu-kama enlala zi bëjen nësa anakan tame tabin, "Alap man zëno mae mo tawa tabinni sam gwesik gwibi'ira," ahaksa, "Zen hom sam gwesik gwibi'ira." Zen diki Bian Zën sa kirekam klis gulu.*

¹⁶ Zep Alap mo olak man anakan lwak, "Zini toton banakan dep?- Bian Alap mo enlalasa de tame tan naye.

Zep nen toton bëjen nen ol zim-zimsi zëbe hap golblan."*

Sap eiwa kirekam lwak, hwëna angkam Kristus mo enlalana nëbon mae onak lwa'ara!

3

Mae hap de ol: "Asa Apolos han Alap mo nganak de syal ën zi darekam em enlala gwe-gwizimdin."

¹ Aya-wal oso-wal, ëe kimë emsa golëlowehe gwëk, ëe homë dekam emsa anakan enlala gwibirida gwëk, "An kitak Alap mo Enho naban nërgwë'an. Anik olk san denaka tawa ta gwibik." Hwëna ëe ama emsa enlala gwibirida gwëk, "An nama okama naban noldokot gwe'an. Kristussu de taïbliblannak nama wal baizil makan lowe he'an."

² Ano emsa de tawa tabinni dekam wal baizilsi de momkam taizibin makan lwa gwëk. Bong hap de tembanena bëjen em twinbin. Hwëna angkam hen kire nika nama lowe he'an!

³ Sap em namae auhu-kama nakore hole-hle en san ang ta gwenan. Em namae wal bosa wal oban enaka enlala eibirida gwenan, "Zëno bosena bap zen abon onakon teipsiblin." Zen in zebe enaka husus eibirida gwenan hen ëdarak-darak gwe-gwenan. Zen in zep man dam gwesik gwenan: Eno mae mo auhu-kama nakore hole-hlena man emsa irik tabirida nasen gwenan- san de em ëKristen gwen srëm zi!

⁴ Sap anakare nakon de enaka jakal gwibirida gwenna, "Ëe an Paulussu de ang gweblan wenya," ahaksa, "Ëe an Apolo'a," dekam man dam gwesik gwe'an: Em in nama auhu-kama enlala nabane lowehe gwe'an.

⁵ Ëe dwan Apolos han apdenak-Alap mo nganak de syal ë gwen zi dare sake. Alap mes srën-srënkam abe nikip syala wei yul sonezimki, hen em dekon zebe ëei gwëk.

* 2:15 2:15 1Kor. 4:1-5 * 2:16 2:16 Yes. 40:13

⁶ Ëe an eiyas ta gwen hap de zini. Apolos zen hokam de hlë tablanda gwen hap de zini. Hwëna Alap Zën zep sipni insa gubirida gwenda, "Em ësaltin, hëndep eisi em ëtën."

⁷ Zep ëe eiyas tan hap de zini hen sap hlë tablanda gwen hap de zini, ëe mam dare naka hom. Diki mamna Bian Zë-en, sap Zen Zen syal gwe-gwibirida- dekam de eisi ëtën hap denaye.

⁸ Zep eiyas tan hap de zi niban hlë tablanda gwen hap de zi niban apdenak- teipsin niye. Alap sa zëno mae mo syal hap de dawemna lamkam golzimdi- zëre mae mo syal jam enkam.

⁹ Zep ëe apdekam ëre mo syal bosyan naban Bian mo syalsaë o'an. Em in san de Alap mo nga. Ahaksa em in san de Alap hap de golsa de ëe syal gweblanna.

¹⁰ Sap Alap zëre mo kwasang-kwasang nakon asa zer inki, ëe zebë zëre mo gola in mo mokona eiyas tak- san de ëe gol syal gwe-gweblan hap de tewesin zi. Angkam hwëna aha zi ayang da ine gwe'an. Men zen kirekam angkam syal ta gwe'an, zen dawem enkam zen syal gwe-gweblan.

¹¹ Sap ano tawa tabin nikon, em zebe tame uk, "Nëno mae mo ngirin bol te makare Zini, Zen Kristus." Zep zini toton bëjen aha tesya bolak etan ik gin- aha tawa tabinsi de zë mas gunkumye.

¹² Zep angkam zini man gol yala insa de ayang-ayang tan hap srën-srënkam ëalp gwe-gwe'an. Ahakon emaskam de syal gweblan hap, ahakon perakkam dep, hen ahakon kaso lilingtinkim dep. Hwëna ahakon hen te olsoskam de syal gweblan hap ëalp gwe-gwe'an, hen ahakon jaba alakam dep, hen ahakon endang ala sasankam dep.

¹³ Hwëna ano mae mo syal gweblan gol yala in Bian sa zëre mo klis gun hup de yakla yalak de zaunnuk akasibli zala. Zen syaukkum de ang

tankam sa akasiblila- dekam de zë hla tan hap, "San ha zëno mae mo abe hap de gol syal gweblanna an nama sa zaulu?"

¹⁴ Men zëno syal gweblan nakon de taibli srëm gwe'anka, zen zen sa dawemna nulin.

¹⁵ Hen men zëno mae mo syal gweblan nakon de syauknu in hap taibli'anka, zen molya ba maena nulink. Zëna enna sa ëngaya gwer, hwëna zëno mae mo nwe-masena san de gol zik de taiblin nakon de heya gwenna- ba maesa de golheya gwen srëmkam.

¹⁶ Em san home tame uk? Nen an dwan Alapsa dekon boklesa kom so gweblan hap de gol makanke. Alap mo Enhona kitak nëbon mae am gwë gwenda.

¹⁷ Zi de Alap mo gola insa karek gunkum, Alap sa hwëna desa karek tala. Sap gola in zen Alap Zëre en hap dena- lalakna. Hen kitak de Kristen zini nen an zen- gola inye.

¹⁸ Bahem enaka boton ta gwibin. Zi de ebon mae onakon zëre mo auhu-kama enlalasa anakan enlala gweblanna, "Ano enlalana blala," dawemna zen diki nonol okama nakore enlala blala insa zen tihis tan- dekam de hwëna eiwa de enlala blalsa zer irin hipye.

¹⁹ Sap mensa auhu-kama enlala wanya 'enlala blal'kam nen gweblanan, zen hwëna Alap mo nwenak joblo-topna. Men kirekam zëre mo olak lwak,

"Zini men zen tim nul gwenan,
'Ëe asa ëre mo nwe hleng gwen nakon
dawem gwer,'

kire zi hip man Alap zëre mae mo
nwe hleng gwenna insa li yul
sone gwizimnira-
zen de zëre mae hap hëp makan
lwazimdin hip."*

²⁰ Hen ahana man lwak,
"Okamanak mensa nenbirida gwe-
nan,

'Zini in enlala blala,'
hwëna Alap man desa enlala
gwibirida gwenda,

* 3:19 3:19 Ayb. 5:13

'Zëno mae mo enlala blala in waba hap.' **

²¹ Zep nen bap nen Kristen bosyansa anakarekam boltere ta gwibin, "Èe zëbon de ang tanna." Sap nen men zen Kristus hun ëraha-en gwek, Alap mes nëbe mae hap golzimkinen de kitak teipsin-teipsinkim lowehen hap denaye.

²² Sap ëe, Apolos, hen Petrus, ëe hen teipsin-teipsin nika hom, hwëna ëe ama Alap hon de babu gwen zi makan emsa mas eibirida gwe'an. Angkam em hen mese Kristus hun ëraha-en gwek, zep nen angkam kitak teipsin zi mo kime bi eibi'insap angkam de okamana ansa, hen ngein sin dep dena, hen sap juwen hap dena, hen ëngaya gwen hap dena.

²³ Zen mae hap ki lwa'an: Sap nen mese Kristus hun ëraha-en gwek, hen Zen mes Bian Alap han aha-en ëka.

4

Mae hap de ol: Yesus mo dam tasibin zi mo syala a kirekam mo jematnak nwe-mase gwe-gwe'anye.

¹ Zep asa Apolos han a kirekam em enlala gwe-gwizimdin, "Zen an Alap hon de babu ën zi dare," hen ano nik mo syala, a kirekam em enlala gwe-gwibin, "Ola mensa Alap orep aning gul gweka, zen in desa hwëna angkam ol halada gwe'ara."

² Bol-zaun tanganna abe nikip dena, zen syala insa de golsyalhen srëmkam ol gwen hap- dekam de Bian Zën asa anakan aken hap, "Zen taïblizimdin tanganna."

³ Zep em ahaksa aha zi de asa anakan kara ta gwenna, "Zëno syala dawemna," ahaksa "Karekna," zen abe hap bana hom. Aena hen homë ënaka anakan enlala gwe-gweblanan, "Ano syala dawemna," ahaksa "Karekna."

⁴ Ère mo ënaka de enlala gwe-blankam, ëe ama Bian mo dwam gwibin sin syal gwe-gwe'an. Hwëna

kirekam de ëe ënaka enlala gwe-blankam, dekon en bëjen anakan asa dam tasin, "Bian mo nwenak ëe eiwa dawemkamë syal gwe-gwe'an." Zen diki Bian Zën sa ano syala ap klis gulblula.

⁵ Zen in zep, bahem na-en aha zisi gubirida gwen, "Zëno syala karekna," ahaksa, "Zëno dawemna." Zen diki Bian Zën de lwahal zankam sa kirekam klis gulzimdi. Karek-karekna mensa zini aning nul gwenan, desa sa golwet sozimdi. Hen men desa enhonak kalang ei gwibirin, zen dekam sa kitak Zën goltreizimdi. Men zëno mae mo syal zëre mo nwenak sam gwesi'in, zëno mae mo bosena dekam sa hen mam gulzimdi.

⁶ Aya-wal oso-wal, ëe ansa ale gulzim- Apolos han ëre nikip dena, hwëna zen em dikim abe nikip de en naka dam gulsun hup hom. Zen em dikim kitak anakan dam gulsun hup, "Kristen zini sap bëjen Alap mo ol tatak nakon golsyalhen." Zep bap nen ahakore en naka anakan boltere ta gwibin, "Zen dawem-dawemna," hwëna dekam ahakore nakae eibirida'an, "Zen dawem-dawem tangannaka hom."

⁷ Zen nara ki emsa gubiridaka?- em de teipsin zi mo kim aha zisi klis gul gwen hapye. San ki ebe mae hap ere mae mo syal en nakon Alap dawemna gol gwizimnira?- zep de kirekam ëbola-bola gwe-gwen hapye. Zen syala kon hom. Zen Zën totoresana zëre mo kwasang-kwasang nakon gol gwizimnira, zep bap nen nënaka anakan bolte-bolte ta gwibin, "Èe ëre mo dawem nakonë gulink."

⁸ Em ema bolte-boltekam ëtim gul gwe'an, "Èe mesë tangan Alapsa hli-hli lasik. Asa ba hap de aha zi tawa tabin hip? Èe an teipsin-teipsin nikake." Em zebe asa enlala eibirida gwenan, "Ba hap de Paulus maesa etan salbiridan hap?" Hwëna eiwa eme ëteipsin-teipsin gwe'anam, aïris, sap dekam ëe ëre

* 3:20 3:20 Mzm. 94:11

mo syal bose walya ban amaka hen eno mae mo ngirin klesnak eteipsi'in!

⁹ Hwëna, eiwa, ano dam gulsunkum, Alap men Zen Yesus hup de olsa dikim gol halada gwen hap asa dam tasibirki, Zen ëmam-mam gwen hap hom asa gubiridaka. Hwëna Zen otde tangannak de teinikirin hip asa gubiridaka. Èe in zebë lowehe gwenan- san de bwinak de lowehen zi, tameran en hap de kalang gwibiridanna. Zep tingan asa nga-ngola ban kara da gwibirin- sap okamanak de wenya, hen Alap mo dam taha nakore zini.

¹⁰ Zep Kristus mo bose hap tingare zini man asa nenbirida gwenan, "Enlala joblo-topna hen sin-sinni." Hwëna em ëma enaka bolte-bolte la gwibirin, "Èe an enlala blala hen sosen tanganna." Em ema enaka kil li gwibirin, "Aha zi man asa blikip neisibirida gwenan," hwëna kirekam de lwankam, ki hwëna asa ba hap lamang da gwibirin?

¹¹ Zep hëndep angkam èe usak nabanë lowehe gwenan- hen ho-hole naban. Hen ano mae mo pakeanna kalk-kalk tola. Asa man dangole gwibirin. Hëndep zep angkam dawemkam de lowe henna banak dep?

¹² Èe ère mae mo tahalhasa dikim sul sonen hap aenë sosen tokna dei kul guk gwenan. Asa kim lamang da gwibirin, èe hwëna dekam Alapsa abe la gwenan- Zen de zëbe mae hap dawemsa golz- imdin hip. Zen kim asa karek da gwibirin, èe hwëna ama èenlala gwe-gwenan, "Dikire zen en nësa karek da gwibik."

¹³ Kim asa wakwak da gwibirin, èe hwëna ol kwasang-kwasangkamë ding ul gwizimnin. Zep aha zi mo asa de hlauludankam, èe san de okamana awe de ase nabare kire-kirena kiye- yal tan en hap dena. Kirekam zep hëndep angkam sërkam asa husus neibirida gwe'an.

¹⁴ Ansaë kirekam ep ale gulz-

imnin, zen emsa dikim saher tabin hip hom. Zen ama kim emsa enlala sobiridanan- san de ère mo walas tangansa de gubiridan makan.

¹⁵ An zebë emsa gubirida'an: Emsa de oto gulsuk gwen hap de zini sap maka sepulu ribu enkam lowe he'an, hwëna eno mae mo nonol bianna, èe an zen. Sap nonol èyë Kristus hup de ol dawemkam emsa tawa ta gwibik. Em dekam zebe hëndep Kristus hun ëraha-en gwëk. Zep em in kitak san de ano walas tangan.

¹⁶ Zen in zebë emsa gubirida'an: Em diki asa em tana wei san zertron.

¹⁷ Zen in zebë Timotiussu ebon mae osan dep zer sonek. Zen in hen ano dang tininak de walas, hen Biansa de taibliblan tanganna. Zep èe men kirekamë Kristussu tana wei san zertro'an, zen zen sa hwëna emsa enlala sobirida gwera- men kirekamë tingare jematnak tawa tabirida gwenanye.

¹⁸ Ebon mae onakon ahakon man ëbola-bola gwëk- anakan de èenlala gwenkam, "Paulus molya etan nësa amjanbirida zaka."

¹⁹ Hwëna Alap diki asa dwam gwebla'anka, ki asa emsa amjanbiridazal. Zen dekam asa bola-bola wenya insa anakan hlauludazal, "San ha zen mes eiwa asa nëräpde gwer?- Alap mo Enho nakore sosonsa de gwirensinkimye, men kirekam zëna ègu gwenan. San ha zëno mae mo ol toran en ki yawal gwizimk?"

²⁰ Sap Alap mo irik ginnik de bitì gwen wenya, nen diki Alap mo Enho nakore sosenkame lowehe gwenan. Èk enkam de ol toran nakon home.

²¹ Zep en ki dam ulsuk: Ki san èe bi zik de walas zemka tangolebin makanë emsa gweibiridazan? San ha kwasang nabare ol sin-sin nibanë golhatazan?

5

Jemat nakon de karek gol gwen zisi zersa sonebin hip de ol:

1 Ëe ama emsa tenggwan-birida'an- anakan de emsa sal-biridankam, "Zëbon mae onakon, ahana man bi zik mo we ma'a kahalo gwe-gwibirida." Sap Alapsa de tame tan srëm zini, zen hom kirekam de kareksa syal nei gwibirin!

2 Zep kirekam de lwankam, em ba habe anakan ëbola-bola gwe-gwenan, "Ëe mese sërkam Bian mo nwenak ëdakastik." Diki dawemna gosa emaka ta gwe'an! Hen zini insa emaka ere mae mo jemat nakon ëralsa sone'an.

3-5 Ëe sap ebon mae onakon lan-ganakë gwë'an, hwëna ano enlalana san de emsa de golëlowe henna kiye. Zep ëe emsa de golëgwën makanë gubirida'an, "Kirekam de karek gwen zini insa jemat nakon em Bian Yesus mo bosekam zeralsa sonen." Em kime tagal gwe'ak, ëe enlala enkam asa zë ang gwer. Dekam emki tïngare zi mo nwenak zini insa Bian Yesus mo sosonkam dowal mo kigi hap ja tablan. Mae hap emki kirekam ja tablan: Dekakim haleka. Tim en naka sap sa karek gulblula- ang en nik deka Bian mo lwa halzan hap de yaklanak de zaunnuk ngaya gweka.

6 Zep em ema tangan ëkarek gwe-gwenan- anakan de ëbola-bola gwe-gwenkamye, "Ëe Bian mo nwenak sërkamë ëdakasti'in." Mensa zini mwin-mwankam nen gwibirin, san ha mese eititi eibik?- mensa anakan ëgu gwenanye, "Ragisa de betekkam tepung mang-mang gun-nuk mas gunkum, dekam hwëna mamkam hop gwe-gwenan." Zëno aha dam gulsunnu, nen dikim karek gol gwensa hiri gun hup, sap zen man mam gwe-gwenan hen hlimin nisen gwenan.

7 Zen in zep, zi karekna insa em ragisa de hiri gun makan ere mae

onakon hiri tan. Sap em de nama deban apdekam zergwë gwenkam, em molye ëlalak gwëk. * Sap Kristus mo kala mes emsa dikim lalak tasibin hip wet sok- Paskanak dep de dombasa zip son makan kim nëno mae mo karek-karek hap dakke.

8 Zep ragi nabare syal gwibin roti ëpbana in nen hiri gun. Hwëna angkam Paskanak dep de ragi srëm roti ësena in ensa nen twenblanda gwen. Desa de dam gulsunnu, zen nëno mae mo ëpba lowehen kareksa de hiri gun hup, hwëna dekam de enho lalak enkam eiwa de ora san ang ta gwen hap.

9 Ëe mese sap nonol suratna ebe mae hap ale gul sonezimk- kahalo soson zi niban de golësiri gwe-gwen srëm hap denaye.

10 Hwëna ëe Kristen gwen srëm wenyaka homë ki enlala gwibiridak. Eiwa, Kristen gwen srëm wenyik mo syala, a kirekam moye:

swi soson,

te-ala beya gwen hap de ëhole-hle gwe-gwen,

ësowë gwe-gwen,

hen yang tasin dowal hap de boklesa kom ta gweblan.

Hwëna kirekam de Kristen gwen srëm zisi toton banakan dep?- langa tasibinni, okamana ansa de hli yun srëmnakye.

11 Diki men desaë enlala gwibiridak, em de langa tasibin hip, zen zini men zen ëgu gwenan, "Ëe mesë Kristen gwëk," hwëna zen zen anakaresa nama nulin halasen gwenan:

swi soson,

te-ala beya gwen hap de hole-hle,

hen yang tasin dowalsa de boklesa kom ta gweblan.

Ahaksa wal bose walsya de lamang ta gwibin,

* 5:7 5:7 Yahudi zini yakla yala Paskanak dikim ang tan hap, Musa mo ol san man ragina gola kon tingan yal da gwëk. Dekam zep hen Musa mo ol san zao de minggunak ragi srëmkam de roti ensa dwenblanda gwëk. (Kel. 12:14-20) Zep ragina insa man hen enlala nei gwibik, "Zen san de nëno mae mo karek-kareksa de hiri gun makan- dekam de Biansa golek de tan hap."

ahaksa ho mamaksa de otdeblanda gwen,
hen ësowë gwe-gwen.
Kire zi niban bahem mae apdekam golëtembane ta gwen.

¹²⁻¹³ Men zen Kristen zirik bitï gwe srëm gwe'an, zen diki Alap Zën sa zëno mae mo karek-karekna klis gulzimdi. Nëbe mae hap hom golzim'ira- kire zi mo kareksa de klis gul gwen hap denaye. Hwëna diki ere mae mo jematnak de ëKristen gwen wenya, zëbe mae en hap em klis gul gwizimdin. Sap Alap mo olak man lwak, "Karek gol gwen zisi em ere mae onakon golëalsa sone gwen."*

6

Mae hap de ol: Alapsa de tame tan srëm zisi bahem gublun, "Ano nik mo karekna ansa ap klis gulzim."

¹ Em ba habe anakan ëgwë gwenan?- aha nik de Kristen bose zemka gublunna, "Zen ano kirekiresa sowëkam golka," ahaksa, "Zen ano wesya kahalo gwibirki," em ba habe hwëna Alapsa de tame tan srëm teipsin zi sin dep kiresa olhal gwenan?- zëwe de tap gun hupye. Diki Alapsa de dawemkam taïblïblan wesyan dep emaka olhal gwenan- zen de tap gulzimdin hip.

² Em san home tame u'in? Alap mo hlil irin wenya nen esa lamkam okamanak de karek gol gwen zisi klis ul. Zep kirekam de lwankam, em ba habe bete-tekna insa ere mae mo ngirinnik klis ul srëm gwe-gwe'an?

³ Em san home anakan tame u'in?- "Nen dekam esa hen Alap mo dam taha nakore zini klis ul." Zep em sap esa angkam okamana awe dena klis ul gwer.

⁴ Zep ebon mae onakon de banakare karek mae jowenkam, em san esa totore zi sin dep olsong gwegwer?- men zen eno mae mo jematnak bosena lwazim srëm gwe'anke, zen de ep tap gul gwizimdin hip.

⁵ Em kirekam ema enaka saher la gwibi'in. In dwan ere mae mo jematnak kike- aha-en mae, enlala blal tolaye! Zen zen maka tap gulsuk gwizim'ira.

⁶ Hwëna em Kristen zini ere mae mo kareksa ema tingare zi mo nwenak olwet so gwenan- ëKristen gwen srëm teipsin zi sin de gol hankamye.

⁷ Kristen zini ebon mae onakon ahanik de wal bose zemka teipsin zi hon gublunna, "Zen man asa sowë taka," dekam mes dam gwesin, "Em Kristen zi mo lowehen nakon mese ëlanga gwesik." Diki dawemna emaka anakan ëenlala gwe-gwenan, "Zen sap sa kirekam asa sowë ta gwera hen karek ta gwera."

⁸ Hwëna eno mae mo enlalana anakarekam lwa gwizim'ira, "Eë sap asa hwë-hwëkam ëre mae mo Kristen bosesa karek la gwibir."

Nëre mae mo timsi de golinik gwen hap de ol- anakare enlala naban, "Ano timni an Alap mo gol."

⁹ Em san mese ëeititi gwek?- "Men zen kareksa nulin halasen gwenan, zen molya Alap mo irik ginnik bitï gwëk." Bahem enaka boton ta gwibin! Anakare zini bëjen bitï gwen:

swi enkam de ëlowehe gwen wenya,
kahalo sosen wenya,
zi bosyan han de inisin makan ëgwë gwen wenya,

hen we walya, we wal bose zeban de kirekam ëgwë gwen wenya,
hen yang tasin dowal hap de boklesa kom so gweblan wenya.

¹⁰ Hen ahakon sowë tam wenya,
te-ala beya gwen hap de hole-hle wenya,

ho mamaksa de otdeblanda gwen wenya,

aha zisi de lamang ta gwibin wenya,
hen asaskam de zi mo kire-kiresa alal ta gwen wenya.

Kirekam de wenya, zen molya Alap mo irik ginnik bitï gwëk.

* 5:12-13 5:12-13 Ul. 13:5; 17:7; 19:19; 22:21-24; 24:7

11 Orep em hen ahakon kirena. Hwëna angkam Alap mes emsa kirekam de karek-karek nakon ngan tasibirki. Zep angkam em mese ëngan gweher. Em kime Bian Yesussu laïbliblak, hen Alap mo Enhona kim emsa ing gwe hebiridaka, Zen dekam zep emsa gubiridaka, "Angkam zen mes ëdakastilëre mo nwenakye." Zep bahem etan kirekam de karekna syal gwegwibin.

12 Hwëna ebon mae onakon, ahakon sa ano ol jalse gwenna insa husus neibir. Zen anakan sa ding nul, "Nen Kristen zini sap esa banakare maesa syal ei gwibir."

* Hwëna ëe ama kire zisi ding gulzim'in, "Banakare maesa de syal gwibinkim diki nonol enaka de anakan takensibirida gwenkam aïris, 'San ha syala an Kristen zini abe hap man sam gweïbli'an? San ha dowal mo kïgï mo wan-wan tan sanë dekam ang gwe'an?– Yesussu dikim hli tan hap.'"

13 Hwëna ahakon hen sa ano jalse gwen ola insa husus neibir, zep sa anakan ëgul, "Nëno mae mo timni tembane hap man ësam gwesik gwenan, hen tim niban tembane naban esa lamkam okamanak hli kosol. Alap ang en naka sa ngaya tabiri, zep sap esa angkam nënaka de golëinik gwegwen srëmkam tembane ta gwer." Zen hwëna tembane en hap hom kirekam zënaka yasik da gwibirin. Zen hwëna a kirekam mo srip nulsuk gwenan, "Sap esa okamana awe en dep de tim niban ëswi sosen gwegwer." Hwëna eiwa dena, Alap hom timni nëbe mae hap golzimkidekam de nëre mae mo hole-hle san ang ta gwen hapye. Nëno mae mo

timni, zen Bian zëre mo dena, hen Zen man kara ta gwibirida.

14 Sap Alap mes Bian Yesussu tin nikon tim niban ngaya taka. Zen in zep sa hen nësa zëre mo sosenkam kirekam ngaya tabiri. Zep nen bap nen nëre mae mo timni karek ta gwibin.

15 Em dwan mes-eme anakan tame uk, "Ano mae mo timni an, zen Kristus mo timnik mas gwin'in." Ki san ha man sam gweï'in?– Kristus mo hlina insa de swi sosen wenyik mo tim niban aha-en son hapye. Kina ki bëjen!

16 San ha em home anakan tame u'in?– "Men nara swi sosen wenyaban swi ënna, dekam zëno nik mo timni mes aha-en nënan." Sap Alap mo olak man lwak, "Zen dekam san de aha-ere timni kiye."*

17 Diki Bian Yesus hun de zeraha-en gwenkam aïris. Dekam Bian mo Enho naban zini in mo enho naban aha-en.

18 Kahalo gwen hap de enlalasa emki langa tasin. Sap tingare ahakore karekna, zen hom timnik makan gwegwenan. Hwëna kahalo gwenkam, zen ere mae mo timsie kim karek ul gwenan.

19 Em san mese ëeititi gwek?– "Eno mae mo timni in, zen Alap zëre mo Enho mo gol sake." Sap Alap mes zëre mo Enhona eno mae mo enhonak ing ta soneka– Zen de dekon emsa golëgwë gwen hap. Zep em en home ere mae mo timni bi eibi'in. Zen Alap bi gwibi'ira.

20 Zen mes emsa kwisisa de zerzindinkim zëre mo jala kon gwiswe soneka. Zep eno mae mo timni in, zen diki Alap zëre mo bose ensa dikim teip gulsuk gweblan en hap zen lwa gwen.

* **6:12 6:12** Kim Korintusk de zini anakan ëgu gwek, "Nen Kristen zini sap esa banakare maesa syal ei gwibir," zëno mae mo enlalana san ha anakan mes yap lwa gwizimk, "Nen Kristen zini hom Yahudi mo ëpba titi tabin sin de ang ta gwen nakon ëngaya gwe'an, zep sap esa banakare maesa syal ei gwibir." Ahaksa san ha zen anakare enlala naban kirekam ëgu gwek, "Nëno mae mo timni ansa okamanak esa hli kul gwer, zep sap esa banakare maesa auhu-kama ennak dep de timkim syal ei-gwibir. Nëno mae mo enhona hom dekam karek gwe'ara." Hwëna kirekam de enlala gwenna in kitak boton. * **6:16 6:16** Kej. 2:24; Mrk. 10:6-8; Ef. 5:31

7

Paulus kim Korintusk de zi mo takensiblinna ding gulzimkike- we-zi dare de zënaka leisyan hap dena:

¹ Angkam ëe ama ep ding gulzim'in- mensa ena suratkam asa lakensiblikke, anakan insa hen ale uk,* "Sap langna angkam man tangan karek gwe'an, san ha dawemna?- nen de swi srëmkam lowehe gwen naye."

² Hwëna zep denakaë ep ding gulzim'in: Angkam kahalo hap dena man tangan mam gwe'an, zep dawemna zini wesya zen gon. Wenya hen zisi zen zen.

³ Zini we zemka bëjen swi ën srëmkam daulsuk gwen. We zem hen zi zemka bëjen da tasik gwen.

⁴ We zem zen zën hom zëre mo timni bi gwibi'in. Zen diki zi zik bi gwibi'ira. Hen zini zën hom zëre mo timni bi gwibi'ira. Zen diki we zik bi gwibi'in.

⁵ Bahem enaka da kososuk gwen- swi ën srëmkamye. Holo ën srëmkam sap esa- anakan de olsa aha-en unkimye, "Nen swi ënsa yausun- dekam de Alapsa abe la tine gwen hap." Hwëna holo tangankam bahem. Ki hwëna dowal mo kigi sa emsa karek san dep titi sola, hen dekam em molye tatem yauku.

⁶ Zep ëe homë emsa titi tabi'in, "Swi ën srëmkam em lowehe gwen," hwëna sap esa holo srëmkam kirekam ëgwë gwer- olsa de aha-en unkimye.

⁷ Ano dwam gwibin tanganna, diki ano kim emaka we gon srëmkam lowehe gwe'an. Hwëna ëe mesë tame guk, kire hap de sosonna home kitak Alap onakon ulin gwenan, sap Zen srën-srënkam nëp sosonna gol gwizimnira.

⁸ Wal sei-siwiri hen wenam sei-siwiri, hen we sem-semna, ëe ama emsa titi tabi'in: Dawem tanganna em we-gon srëm zi-zen srëmkam em

lowehe gwen- ano kim. Sap dekam em molye okama ennak de syalak ëhir-hir gwe-gwek.

⁹ Hwëna eno mae mo swi hole-hle de mam gwenkam, ki amki enaka kap la gwek. Sap e-en de gwënkam, eno swi hole-hle de enho nakon syauk mo kim hitil hana gwe'ak, zen karek tanganna. Zep dawemna wesya em gon, ahaksa zisi em zen.

¹⁰ Angkam wenya bare wenya hen zi nibare wenya kibë ayang gulzim'in: Ansaë ale gul sonezim'in, zen ëre mo enlala nakore naka hom. Zen Bian hen kirekam titi tabirki: Wenya ere mo zini bahem hli tan.*

¹¹ Zini hen ere mo wenya bahem baes gwibin. Hwëna we de zi zemka hli tanna, zen diki aha zisi de zen srëmkam zen gwë gwen, ahaksa dawem tanganna zi zem osan dep zen lwahan.

¹² Hwëna ahakon, eno mae mo we walya ahaksa zi walya hom ëKristen gwe'an. Kristus Zëna hom kire hap de ola nëp hli yulzimki. Eë zebë hwëna emsa titi tabi'in: Kristen zi de gwëna, hwëna we zik de Kristen gwen srëmkam, wenya in de nama ën hap dwam gwëna, zini in bap zen baes gwibin.

¹³ Hen kirekam, Kristen we de gwëna, hwëna zi zik de Kristen gwen srëmkam, zini in de nama ën hap dwam gwëna, zen hen bap zen baes gweblan.

¹⁴ Em ema ëkil gik, "Kristen we de gwëna, hwëna zi zik de Kristen gwen srëmna, Alap sa husus gwizimdi." Kirekam bëjen. Zen diki Alap sa Kristen wenya in kon zi zem insa anakan enlala gweblala, "Zen angkam Asa golek de ta'ara." Hen kirekam- zi en zik de Kristen gwëna. Zep zëno nik mo walasna hen Alap sa enlala gwibiridala, "An ano bi gwibiridan wenya."

¹⁵ Hwëna Kristen gwen srëm zini in de Kristen wenya emsa hli yun

* **7:1 7:1** Ayatna an mo aha dam gulsunnu, zen anakan: Angkam ëe ama ep ding gulzim'in- mensa ena suratkam asa lakensiblikke: Zini wesya de gon srëmkam hen aïris. * **7:10 7:10** Mat. 5:32; Mrk. 10:11-12; Luk. 16:18

hup dwam gwenna, bahem tru-tru gulblun. Zen dikire emsa hli yuk. Hen kirekam- Kristen srëm we de Kristen zini emsa hli tankamye. Kirekam dep Alap hom jalse gwe'ara. Sap Zen mes nësa kwang guludaka- dekam de enlala sèsekkam zère mo nwenak lowehe gwen hapye.

¹⁶ Hwëna Kristen wenya em bahem Kristen gwen srëm zi omka hli tan, sap em bëjen em anakan tame gun, "Nama de ënkam zen wëhë hale'anka?" Hen kirekam Kristen zini, bahem Kristen gwen srëm we omka hli yun.

¹⁷ Bian kim emsa kwang guludaka, em san ahakon wenya ban, ahaksa zi niban? Em san dekam to mip blaonsublun srëmna? Ahaksa em san dekam zi mo tana iltikinnik de lowe henna? Men kire nike lowehe gwëk, zen kire enkam em lowehe gwen- men kirekam dep Bian emsa dam tasibirkike. Èe kirekam de lowehen habë tingare jemat-jematsa titi ta gwibirin.

¹⁸ Zep anakarekam lwa'an: Bian kim emsa kwang guludaka, Musa mo titi tabin ol san de em to mip blaonsublun nik gwënna, ki etan bahem alp gwen- dekam de em to mip blaonsublun srëm nik gwën hapye. Hen kirekam, em de to mip blaonsublun srëm nik gwënna, em bahem ëalp gwen- dekam de blaonsublun hapye.

¹⁹ Sap to mip blaonsublun nik de gwënna, ahaksa blaonsublun srëm nik de gwënna, zen bana hom. Diki bol-zaun tanganna, Alap mo titi tabin sin em ang tan.

²⁰ Zep Bian men kim emsa kwang guludaka, dekam men kire nike lowe he'ak, zen kire en nik emki lowehe gwen.

²¹ Zep emsa kim kwang guludaka, em san ki zi mo tana iltikinnik de ëbabu gwenna? Ki bahem enlalana ëbeya gwen- wet so gwen hapye. Hwëna Alap de ebe mae hap wet so gwen hap denaka golzimdinkim, ki sap esa wet so gwer.

²² Sap zi mo tana iltikinnik de ëbabu gwen zini, desa de Bian kwang guludankam, dekam zen Bian mo nwenak san de kirenak de lowehe gwen srëm zi. Hen zi mo nwenak men zen babukam lowehe srëm gwe-gwenan, desa de Bian kwang guludankam, dekam zen man ënwe-mase gwe-gwe'an- san de Kristus hon de ëbabu gwen zi.

²³ Sap Alap mes emsa kwisisa de zerzimdinkim gwiswe soneka, zep ere mae mo timni bahem zi hon golgu gwen- zëno mae mo tana iltikinnik de etan lowehen hapye.

²⁴ Zen in zep, aya-wal oso-wal, Alap men kim emsa kwang guludaka, dekam men kire nike lowehëk, zen kire en nik em Bian mo nwe kara gwennak lowehe gwen.

Paulus kim Korintusk de zi mo takensiblinna ding gulzimkike- wenam sei-siwir wal sei-siwir hip dena:

²⁵ Mensa asa suratkam lakensiblik, wenam sei-siwir hen wal sei-siwir hip dena, èe ama ebe mae hap ding gulzim'in: Kire hap de ola Bian hen hom hli yulzimki. Hwëna Zen mes kwasang-kwasangna mamkam abe hap golblaka, hëndep syala hen mes abe hap wei yul soneblaka. In zebë ère mo dam gulsunnu ansa anakare enlala naban ale gul sonezim'in, "An aïris- taïblibin hipye."

²⁶ Sap angkam man tangan langna karek gwe'an, zep in kirekame angkam lowehe gwe'an, zen kire enkam emki sap lowehen.

²⁷ We walya bare wenya, bahem we wal omka hli yuluda gwen. We wal srëm wenya, bahem wesya de gon hap ëalp gwen- nama de langna an karek gwennakye.

²⁸ Hwëna em de we gon hap dwam gwenna, zen kareksa home go'ara. Hen kirekam, wenam seiwir de zisi zenna, zen hen kareksa hom. Hwëna em de enaka leisyankam, em okamanak de karekna esa oltowe gwera. Zep desa de goltowe gwen srëm habë kirekam emsa gubiridal.

29 Aya-wal oso-wal, ano enlalana anakan lwa'ara: Angkam aumwanak dep yaklana beya naka hom. Zep we walya bare wenya, we wal oban de hir-hiri sap esa Bian mo syal hap eititi ei gwibir. We walya hen, zi nibare wenya, zi oban de hir-hiri sap esa hen Bian mo syal hap eititi ei gwibir.

30 Hen kirekam, men zene enlala dowe hanan hap gona ta gwe'an, emki enlala dowe hananna insa eititi gweblan. Men zene auhu-kama isrip-sri hap nga-ngola ban lowehe gwe'an, emki auhu-kama enlalana insa eititi gweblan. Men zene okama ennak dep de kire-kirena te-alakam kap la gwe'an, kap ta gwen srëm makan em lowehe gwen.

31 Hen men zene okamanak de kire-kiresa bi ëblanda gwe'an, emki hwëna bi gweblandan srëm makan lowehe gwen. Sap molya holo gwek, okamana an dekam sa jek-jak gwer.

32 Ëe mae habë kirekam ebe mae hap ale gul sonezim'in- em de okama ennak dep de kire-kirenak ëhir-hir gwe naseran srëm hap. Sap we wal srëm Kristen zini, zen ëhir-hir gwen srëmkam Bian en mo syalsa nol gwenan- anakare enlala naban, "Bian dekam asa sam gwesiblika."

33 Hwëna we walya bare wenya, zen auhu-kamanak de kirekam-kirekamnak sa ëhir-hir gwe-gwer, sap zen we zik dikim sam gwesiblin hap de syalsa hen nol gwenan.

34 Hëndep zep sa zëno mae mo enlalana dare syak nër. Zi srëm we walya hen kirekam: Zen Bian mo dwam gwibin en san dep sa ëalp gwe-gwer, sap zen man ëdwam gwe-gwenan- tim niban enho naban de Bian mo nwenak lalak nën hap. Hwëna zi nibare we walya, zëno mae mo enlalana zen auhu-kama ennak de syalak ëhir-hir gwe-gwenan, sap zen zi wal zik dikim sam gwesibiridan hap ëalp gwe-gwenan.

35 Ëe ere mae mo dawem habë kirekam ale gulzim. Zen emsa

dikim jalse gwibiridansa hom. Sap ano emsa de dwam gwibiridan tangganna, diki em ëalp gwe-gwen-zi mo nwenak dikim dawemkam lowehe gwen hap, hen Bian en hon de tal gwesinkim dikim lowehe gwen hap.

36 Zep zi de we golgu gweblan nabare nik gwëna, zen de anakan eisbinkim, "Ëe de gon srëmkam, ki en tol sa gwë gwer," hen anakan de eisbinni, "Ëe ama tangan gon hap dwam gwibi'in," zen dikire gok. Zen hom dekam karek gwe'ara.

37 Hwëna ahanik de hen we golgu gweblan nik gwëna, zen de anakan enlala gwenkam, "Ëe ba hap de gon hap? Ëe Bian mo syal esa de gon habë dwam gwe'an. Ano enhona drak-drak nakake. Ëe sap asa ki en gwë gwer," kirekam zen hen man sam gwesï'ira.

38 Zep zi de we golgu gweblan zemka gonna, zen man sam gwesï'ira. Hen Alap mo nganak de syal hap de wesya gon srëmkam, zen hen man tangan sam gwesï'ira.

39 Zi nibare we walya, zen etan bëjen ahasa de zen hap enlala gwen- nama de zi zik gwënnakye. Diki zi zik de tinkim, dekam sap de ahasa zen. Hwëna Kristen gwen srëm zisi bahem.

40 Hwëna ano enlalakam, zi zen srëmkam zen maka tangan sam gwesï'in. Hen ëe ama eisbi'in: Alap mo Enhona hen kirekam enlala gwe'ara.

8

Paulus kim Korintusk de zi mo takensiblinna ding gulzimkike- yang tasibin alap-alap hap de tweran blom ta gwibir-zimdin hip dena:

¹ Mensa asa suratkam lakensiblik, yang tasibin alap-alap hap de tweran blom ta gwibir-zimdinsi de twinbin hip dena, angkam kire hap denakaë ep ding gulzim'in: Kristen zini nen anakane kil il gwenan, "Nen dwan mes em-am yang tasibin

dowal-dowal hap dena tame uk." Hwëna bap nen kire nakon ëbola-bola gwe-gwen. Diki nënaka de kwasang gwibirida gwenna, zen zen sam gwesi'in, sap zen dekame nënaka tatete la gwibirin.

² Bap nen nëre mae mo tame gunnu boltere gul gwen. Kirekam de enlalana, zen joblo-topna.

³ Diki Alapsa men zen enna nola gweblanan, zen kire wenyaka zëre mo walaskam gubirida gwenda.

⁴ Zen in zep, yang tabin alap hap de tweran blom ta gwibir-zimdinsi de twinbin hip dena, nen mes eme tame uk, "Yang tasibin alapna zen ensasa nabare naka hom." Hen anakan mese tame uk, "Eiwa de Alapna Zen aha-en tangan. Ahana hom."

⁵ Hwëna ahakore zi mo tame gunkum, alapna beyana- men zen ngatan zi mo langnak lowehe gwënan, hen men zen okamanak awe lowehe gwenanye.

⁶ Hwëna nen mese anakan dam ulsuk:

Alap Zen aha-en. Zen nëno mae mo Bian- men Zen kirekam-kirekamna kitak yang tabirkiye. Hen nëno mae mo syala kitak zëbe hap dena.

Hen Teipsin Zikim de gublunna, hen aha-en: Zen Bian Yesus. Zen zëno taha san Alap kitak yang tabirki, hen nen Zëbon onakone ëngaya gwe'an.

⁷ Hwëna nër hom de ëKristen gwen zini hom kitak kirekam dam nulsu'un. Zen man ëtim gul gwënan, "Ëe de yang tasin dowala in hap de tweran ninsi twinbinkim, dekam man nwe-mase gwe'an, 'Ëe boklesaë zëbe hap kom sobla'an.'" Zen nama dekam tim nul gwe'an, "Yang tasin dowala in mo sosonna ki." Zen hwëna dekam zep enho nakon neis gwibirin, "Ëe an mesë karek gwënan."

⁸ Hwëna eiwa de tanganna, tembane nakon Alap bëjen nësa husus gwibiridan, hen bëjen dekon nësa

isrip-sri gwibiridan. Zep kire hap de tweran ninni, sap esa olgwenblanda gwer, hen sap esa olgwenblanda srëm gwe-gwer. Zen bana hom-Alap mo nwenakye.

⁹ Zep em kirekam de tame gun wenyaka karek ta gwibin- zëno mae mo nwenak de dowal mo tembanesa twinbinkimye. Sap tame gun srëm wenyaka in de emsa de hla tankam hen kirekam tembane gwe'anka, dekam sa anakan eisbiri, "Ëe an ama Alap mo nwenak karek gwënan."

¹⁰ Zep anakan bap zen lwan: Em men zene anakan tame u'in, "Ëe sap asa yang tasin alap hap de golak tembane gwe-gwer. Abe hap bana hom," hwëna Biansa de dawemkam taibliblan srëm nik de emsa hla ta'anka, dekam sa enlala gwera, "Ëe hen sap asa zë tembane gwer."

¹¹ Hwëna zen kim hen tembane gwe'anka, dekam sa Kristussu de taibliblan nakon zara. Eno tame gunnu in san de ang gwen tola kon sa zara! Zen sap ere mo Kristen wal bose- mensa hen Kristus zëre hap de te-lidak soblan nakon ngaya takake.

¹² Hwëna em mese zëno enhona karek tablaka. Zep eme Biansa de dawemkam taibliblan srëm naka kirekam karek ta'anka, dekam em hen mese Bian mo nwenak karek gwenda.

¹³ Ëe in zebë ëre hap anakan dam gulsuk, "Ëre mo Kristen bose walsya dikim karek san dep titi tabin srëm hap, ëe amaka tweran nin twibinsi hëndep baes gwe'an. Aha zi bap zen ano gwën san de ang gwënkam kareknak zaran."

9

Mae hap de ol: Paulus isrip-sri en hap syal gwe-gweka, ba maesa dekon gulin gwen enlala srëmkam:

¹ Ki san ëe zi mo tana iltikinnik de babu gwe-gwen zi?- in zep de ëe aha zi mo dwam gwibin sin gwë gwen hapye. Ki san abe hap hom

Bian Yesus golblaka?– ëe de zëre hap de ol dawemsa gol halada gwen hap denaye. Ki san ha ëe ahakore zëre mo dam tasibin zi mo kim homë hen Zënaka hla tak? Ki san em ano syala kon home Biansa tame lak?

² Aha zi de asa gublunkam, “Paulussu Bian hom dam tasiki,” hwëna em emaka enbla'an, “In Bian dam tasiki, sap ëe an zëno syal gwibinkimë Biansa tame lak.”

³ Ënaka de kirekam gublunkam, “Em Bian mo dam tasin zisi hom,” ëe hwëna amaka ding gulzim'in:

⁴ Ki san ëe Barnabas han ëre nik mo syala kon bëjënë tembane ë gwen?– men kirekam Yesus mo ahakore dam tasibin zini ëgwë gwenanye.

⁵ Ahaksa san ha ëe Barnabas han bëjënë Kristen we dare naban itënda gwen?– men kirekam Bian mo ahakore dam tasibin zini hen Bian Yesus mo oso walya nolëtë gwenanye. Petrus zëna in kirekam hen we zemka goltënda gwenda.

⁶ Hen san ha Barnabas han ë-en tangan?– aen de tembane hap ahakal gwen naye.

⁷ San ha jana nabare zini ki eijan-nak ang gweka?– zën de tembane hap hakal gwenkamyë. San ha anggur nga syal gwe-gweblan zini ki syal gweka?– zën de zëno ei nika twinbin srëmkamyë. Hen domba zaho ta gwibin zini san ha ki zaho tabirki?– zën de dombana in mo mom kilsï otde gwen srëmkamyë. Diki sap hen ano nik mo dena-kirekam de ëre nik mo syala kon ulin gwen hap denaye!

⁸ Insa ep ale gulzim, zen okamanak de zini kirekam ëgwë gwenan– dekam de em dam gulsun hup, “Sap sa Paulus syala an kore eini twin gwibiri.” Alap mo ëpba olak kire hap dena hen ki lwa'an.

⁹ Sap Musa mo titi tabin olak man lwak,

“Sapi de gandum dansa za-ublun danaseranna– dekam de ëbwalom gwen hap, ëkna bahem

kyang sosublun. Dikire twenblan danasenk.”*

Kirekam de lwankam, ki san ha Alap sapi ensa kirekam enlala gwibiridaka?

¹⁰ Kirekam bëjen. Zen hen Yesus mo dam tasibin zini abe mae hap kirekam nwe-mase gwizim'in. Sap ngana lu tan wenyä, eiyas tan wenyä, hen taran wenyä, zen kitak man ëdwam gwe-gwenan– ngana in kore ei nika de twin gwibin hipye. Zep Bian mo nganak de syal tan wenyä ëe hen kirekam.

¹¹ Ëe Barnabas han mesë ang hap de otanena eno mae mo enhonak eiyas lak. Hwëna ankam san ha em emaka asa husus eizim'in?– ëe de okamanakdep de tembanesa ebon mae onakon ulin gwe'anamyë.

¹² Hwëna aha zi enna ki ebon mae onakon nulin gwenan. Diki nonol tanganna asa emaka mas ei gwizimnin. Zen sap ano nik mo dena– ebon mae onakon de ulin gwen hapye. Hwëna ëe homë kirekam ulin gwenan. Ëe mae habë tahalha naban anakare enlala naban totoresa ë gwenan, “Nen de ba maesa nëre nik mo syal eibin zi nikon ulin gwenkam, dekam hwëna zen sa Kristus hup de ol dawemna baes neibir.”

¹³ Hwëna ena mes em-am ëtawa gwëk: Zini men zen Alap mo golak syal ta gwenan, zen dekon hen tembanena nulin gwenan. Hen men zen tweran ninni Alap hap tru dasik gweblanan, zen hen dekon tweran ninni nulin gwenan.

¹⁴ Zen in zep hen Bian zëre mo ol dawem gol halada gwen wenyä anakan gubiridaka, “Em ere mo tawa tabin nikon esa tembanena ulin gwer.”*

¹⁵ Zep zen sap ano dena– kire nakon de tembanesa gulin gwen hap denaye. Hwëna ëe aha-en mae homë gulink. Hwëna suratna ansaë ale gulzim'in, zen anakare enlala naban hom, “Dekakim ap nol

* 9:9 9:9 Ul. 25:4 * 9:14 9:14 Mat. 10:10; Luk. 10:7

gweblak.” Sap zen dekonë isrip-sri gwe-gwenan- anakare hap, “Diki Bian sa lamkam ano syal eini ansa ap golblala.” Zep ëe ama tangan baes gwe'an- em de ba maesa ap golblankam de ano isrip-srina in tap gwen hapye.*

16 Sap ëe anakare en hap bëjënë isrip-sri gwen, “Syala men desa Bian abe hap wei yul soneblaka, ëe ama desa syal gwe-gwibirin-ëngaya gwen hap de ol dawemsa de gol halada gwenkamye.” Sap ëe de desa gol halada gwen srëmkam, Bian sa asa karek tala.

17 Eyë pegawaikam syal gwe'anam, ki maka okamanak dep de gajina ap nol gwebla'an. Hwëna Alap Zën syala insa ap wei yul soneblaka- ëe de Zëbon de babu gwen zi mo kim totoresa sul sonen hap.

18 Hwëna babu gwen zini abe hap an zen ano isrip-sri gwibin niye: “Ëe Alap mo ol dawemna totore tangansaë gol halada gwenan. Abe hap men desa maka sap syala in kon nol gwebla'an, ëe homë aha-en mae gulink.”

19 Zep ëe anakare enlala naban homë kara ta gwibirin, “Zen sa asa te-alakam mas nëblal.” Ki hwëna ano syal de nwe-mase gwen hap-san de ëe te-ala hap de syal gwe-gwen zi. Hwëna ano syala eiwa ki hen babu gwen zi mo kim nwe-mase gwe-gwenan, sap ëe ama enlala betekkam mas gwibirida gwenan-dekam de beyakam halen ora san golëwet so gwen hap.

20 Zep ëe kimë Yahudi zi niban golësyal ta gwenan, ëe dekam etan Yahudi zi mo ëpba lowehen sanë ang gwe-gwenan. Zen Musa mo titi tabin ol san de ënaka ngaya tan hap homë ang gwe-gwenan. Hwëna Yahudi zi de asa sam gwesiblin habë desan ang gwe-gwenan. Ëe mae habë kirekam gwë gwenan- dekam

de zen hen Kristussu tame tan hap.

21 Hen kirekam- Yahudi srëm zi niban de golësyal ta gwenkamye. Dekam ano gwëna san de Yahudi srëm zi- Musa mo ol san de ang gwe-gwen srëmna. Zen hen Yahudi srëm zi dikim Kristussu tame tan hap ëe ki gwë gwenan. Ëe kimë Musa mo ola in san ang gwe srëm gwe-gwenan, zen anakare enlala naban hom, “Ëe homë Alapsa betek gwebla'an.” Ëe dekam hwëna Kristus mo titi tabin ol en sanë ang gwe-gwenan.*

22 Ëe kimë hen Kristussu de taibliblannak de tatem ëzauk gwen srëm wenyä ban golëlowehe gwenan, ëe dekam hen zëno mae mo lowehen sanë ang gwe-gwenan-dekam de zen hen Kristus en onak tatem ëzauk gwen hap. Zep zini men kirekam lowe henda gwenan, ëe hen dekam zëno mae mo kimë gwë gwenan- dekam de hen zëwe denaka ngaya tabin hip. †

23 Zen kitak Alap onakore ol dawemna insa dikim langa gulsuk haladan habë kirekam syal gwe-gwibirin. Sap ano isrip-sri gwibinni zen zen tangan, hen nen dekon esa lamkam hë'ho gwibinni hla kul.

24 Em dwan mes-eme ëtawa gwëk: Asyas hap de hlu-hluk tanna, zen beya nik sa ëhlu-hluk gwer. Hwëna aha-en, men zen de nonol hata'anka, zen zen en de kire-kire dawemna gul irinkim. Zen in zep, emki hen hlu-hluk gwen makan ëgwën-anakare enlala naban, “Ëe aka kire-kire dawemsa gulink.”

25 Men zen hlu-hluk gwen hap ëhohle gwe-gwenan, zen nonol timsi misrim-sri nil gwenan, hen man zënaka dawemkam nolëinik gwe-gwenan- anakare enlala naban, “Ëe aka nonol gwëk.” Men zen ënonol gwe-gwenan, zen auhu-kamana an kore kire-kire dawem ensa nulin

* 9:15 9:15 Mat. 6:1 * 9:21 9:21 Kristus mo titi tabin ola: Yoh. 13:34-35; Yak. 2:8; Mrk. 12:28-34; Mat. 22:36-40, hen Rom. 13:8b-10nak. † 9:22 9:22 Kristussu de taibliblannak tatem zauk gwen srëm wenyäka de kirekam golëlowehe gwen hap de ola: Emki hlaun 1Kor pasal 8 mo ayat 7 nakon 13nak dep, hen Rom. 14:1-15:6.

gwenan. Nen hwëna hëndep de lwan hap de kire-kiresa de gul irin hibe ëalp gwe-gwe'an.

²⁶ Ëe in zebë dam-dam enkam de hluwen hap alp gwe-gwe'an. Ahaksa, ëe an san de tahakam de zënaka lek-lek ta gwibin asyasnak de ang gwe-gwenna. Ëe bëjënë sap desan totoresa lek tya gwen.

²⁷ Ëe zebë ëre mo timni ënaka de lek-lek ta gwenkam drak-drak gul gwenan- dekam de hëndep ëre mo timsi dawem enkam golinik gwe-gwen hapye. Ëe mae habë ënaka kirekam zerinik gwe-gwenan: Sap ëe mesë beyakam kire asyasnak dep zini kwang guludak. Hwëna Bian Alap de wasib mo kim asa gublunkam, "Em mese asyas peraturansa gulumunku. Em de asyasna an kon kire-kire dawemsa gul irin hip, eno bosena hom,"- ki ëe asa tangan saher gwer.

10

Paulus kim yang tabin alap-alap hap de boklesa kom tabirida gwen hap jalse gwibiridakake:

¹ Aya-wal oso-wal, ëe ama emsa enlala sobirida'an- nëno mae mo auyan-azana men kim Musa Bak golëwet so gwekake. Alap dekam but yawalsa golzimki- zëbe mae hap de jal zini in de zë totot gwibirida gwen hap. Hëndep Alap mo sasonkam zep hi yawala insa golëtablan gwe kinika.

² Zëbe mae hap dekam man nwe-mase gwenan: But de tahalebinni in hen hi yala insa tablan gwe kinik, san de Musa mo baptis tabinnik de ang tanna. Zëno dam gulsunnu, zen dekam mes Musa hon bitï gwëk.

³ Zen dekam kitak Alap onakore tembanesa dwenblanda gwëk,*

⁴ hen hona Zëbon onakore naka sap notde gwibik. Dekam Alap kaso yawalsa hamal gulzimki, zep dekore hosa notde gwibik, sap kaso yala in hen man ang gwibirida song gwëk-zen de ho hap ëtahalha gwe-gwen srëm hap. * Hwëna ol gulk sun de blaorankam kaso yawalkam in, Zen diki Kristus Zëna.

⁵ Nëno mae mo auyan-azana zen sap eiwa ki kirekam de owasna hla nul gwëk, hwëna Alap mo nwenak beya nik hom ëdakastik. Beya wenyä desa man husus gwibirida gwëka. Zëno mae mo tok-tok naka zep sasa lang san hli nulida guk song gwëk.

⁶ Zen Alap desa nëbe mae hap de ërak hap ki kang gulku- nen de hen zëno mae mo kim karek-kareksa hole-hle gwe-gwibin srëm hap.

⁷ Zep nen bap nen zëno mae mo kim yang tabin alap-alap hap boklena kom ta gwizimdin- men kirekam zëbe mae hap dena Alap mo olak lwakke,

"Zen yang tabin alap-alap hap de tembane yawala insa dwensiblindak, zao zep syak."*

⁸ Nen bap nen zëno mae mo kim kahalo-kahalokam lowehe gwen-men kirekam zen ëgwë gwëkye. Zen in zep yaklana dekam 23 ribu enkam juwëk.*

⁹ Hen bap nen Biansa zëno mae mo kim akasik gwëblan. Zen in zep zen ahakon wanya de hit ti gwibin nikon juwë gwëk.*

¹⁰ Nen bap nen zëno mae mo kim Biansa tonsuk gwëblan. Zen in zep desa Alap mo dam taha nakore zini heip gulku- men zen juwen hap dena irik gïl gwëndaye.*

¹¹ In zen ki zëbon mae kirekam jowë gwëk, zen angkam nëbe mae

* **10:3 10:3** Kel. 16 * **10:4 10:4** Paulus man ale gulku, "kaso yala in hen man ang gwibirida song gwëk," sap Musa man dan soka- hosa de owaskam kaso nakon golzimdinni. Hen Yahudi zini zep lun tangan aïsili insa anakan mas-mas nul song gwëk, "Nonol kasona in man ang gwibirida song gwëk- dekam de ho hap ëtahalha gwe-gwen srëm hap." Hwëna Musa mo ol ale gun tangannak, sap diki hom. (Kel. 17:6; Bil. 20:11) * **10:7 10:7** Kel. 32:6 * **10:8 10:8** Bil. 25 * **10:9 10:9** Bil. 21:5-6 * **10:10 10:10** Bil. 16:41-49

hap de ërak makan lwa'an- nen an zene angkam aumwa hap denak lowe he'anye. Zen in zep zini lun Alap mo olak de aïsili in sa ale nul gwëk- nen de desa anakan enlala gwe-gwibin hip, "Bian sa angkam kirekam hen karek tabiri- men zen kirekam karekna nol gwe'anye."

12 Bera! Bahem anakan enaka boltere ta gwibin, "Ëe an Bian onak tatemë ëzau'un." Zi de kirekam zënaka boltere tankam, zen hwëna zëno mae mo kim de kareknak zaran hap alp gwesi'ira.

13 Banakare kareksa de gon hap de enlalana men zen nësa de akasiblin hap enhonak hata gwenda, zen nëno mae mo sosen nakon hom taman kinï gwenan. Sap Alap Zen taibliblanna, zep Zen bëjen nësa de sërkam akasiblin hap dwam gwibiridan- nëno mae mo sosonsa de gulumrunnu kimye. Hwëna kareksa de gon hap de enlala de nëbon mae hatankam, Zen hen nëbe mae hap orasa zertrei gwizimniranen dikim karekna in kon wet so gwen hap. Zen dekam zebe tatem ëzauk gwenan.

14 Zen in zep, aya-wal oso-wal, yang tabin alap-alapna emki langa tasibin.

15 Nen kitak enlalana kike. En-em kles so gwen.

16 Nen kime Bian Yesus mo timsi de enlala gwibin hip de tembanena olgwen gwibirin, dekam nonol Bian hap dawemsae ol gweblanan. Dekam kime zëno kalsa de enlala gwibin hip de anggur hona otdeblanda gwenan, hen zëno timsi de enlala gwibin hip de rotina olgwenblanda gwenan, dekam zebe ënwe-mase gwe-gwenan: Nen ema Bian han ëraha-en gwe'an.

17 Nen de Bian mo timsi de enlala gwibin hip de rotisa twinbinkim, nen sap beyana, hwëna dekam man nwe-mase gwe'an- san de nëno mae mo timni aha-en. Sap nen mese aha-ere rotina in sa olgwenbik.

18 Israelk de zini hen kirekam ëgwë gwenan. Men zen Alap hap de zip soblan domba ninni dwin gwibi'in, zen en dekam zep Alap han nërumlæ gwe'an.

19 Hwëna kirekam in sa ebe mae hap ale gulzim, zen em dikim anakan enlala gwibin hip hom, "Yang tabin alap-alapna zen eiwa ensasa naban." Hen anakan homë kim emsa gubiridal, "Zëbe mae hap de tembanena, zen sosonna." Zen waba tangan hap.

20 Ëe hwëna em dikim anakan tame gun hubë kirekam ebe mae hap ale gulzim: Yang tabin alap-alap hap mensa otweranna blom da gwibir-zimnin, zen Alapsa hom kim boltere da gwenan. Zen hwëna dowal-dowalsa kim boltere da gwibirin, hen deban mae kim nolëaha-en gwe-gwe'an.

21 Zep nen bëjen nen Bian mo kalsa de enlala gwibin hip de anggur ho naban dowal hap de ho naban otdenkam siri so gwen. Hen bap nen Bian mo timsi de enlala gwibin hip de tembane naban dowal hap de tembane naban siri so gwen.

22 Ki san ha ema Bian de emsa husus gwibiridan hap ëdwam gwe'an? San ha ema tim ul gwe'an? "Bian mo sosonna hom."

23 Ahakon sa ano ola in sa nulsul-anakan de ëgunkum, "Nen Kristen zini sap esa banakare maesa syal ei gwibir." † Hwëna kire zini ëe ama ding gulzim'in, "Banakare maesa de syal gwibinkim diki nonol enaka de enhonak anakan takensibirida gwenkam airis, 'San ha dekam ëe ama ëre mo Kristen bose walsya mas gwibirida'an? San ha ano gwën san de ang tankam ahakon dekam sa Yesusu hli dal?' "

24 Bahem ere en mo timsi ngalap gwe-gwibin. Hwëna aha zisi emki hen enlala gwibirida gwen.

25 Pasarak de tweran ninni, sap esa enlala beya gwen srëmkam lop la gwer- anakan de takensibiridan

† 10:23 10:23 Ola ansa de srip gulsun hup, emki pasal 6 mo ayat 12 mo otdenak de alesa karatda gun.

srëmkamye, “An san yang tabin alap-alap hap de blom tabir-zimdin mosrona?”

²⁶ Sap Alap mo olak man lwak:

“Okamana an hen kitak zëwe de kirekam-kirekamna, zen kitak Bian mo bi gwibiridanna.”*

²⁷ Kristen srëm zi de emsa zëbon de tembane gwen hap gublunna, dwam gwenkam sap esa. Men kire tembanesa ep lop tablanna, em sap esa twenblan dala. Em bahem mae anakan de takensiblin hap enlala gwen, “An san yang tabin alap-alap hap de blom tabir-zimdin mosrona?”

²⁸⁻²⁹ Hwëna tembane tanna iwe de eno Kristen bose emsa gublunkam, “Tweran ninni an yang tabin alap-alap hap de mosrona,” ki bahem twinbin. Sap zen zëre mo enhosa ebe hap zertrëblala. Sap zen hom dawemkam enho nakon anakan tame gu'ura, “Yang tabin alap mo sosonna hom.” Zep em de zëno nwenak tembanena insa twenblan dankam, desae kim karek san dep titi ta'ara. Zen srëmkam sap emaka ahakore en naban zitwenbla'ara.

Hwëna em ahakon esa ëenlala gwer, “Aha zi ba hap de zëre mo dam gulsun nukon tembane hap asa tru-tru gulblun hap?”

³⁰ Èe de Alapsa gu soneblan naban de tembane gwenkam, ki aha zi ba hap de asa tembanena in hap husus gweblan hap? Èe dwan mes-am tembanena in hap dawemna Alap hap golblal!”

³¹ Hwëna èe a kirekamë mo kirekam de enlala gwen zi hip ding gulzim'in: Ba maesa de twinbinkim hen otdebinkim, ahaksa banakare maesa de gonna, zen Bian mo bosesa dikim tingare zi teip gulsublun hap emki syal gwe-gwibin.

³² Bahem Kristussu de taibliblannak de ètatete gwen srëm zisi karek san dep de titi tan makan gweibirida gwen- sap Yahudi zi, sap Yunani zi,

hen sap kitak de Alap mo hlil irin zi niye.

³³ Zep em ano kim em hen lowehe gwen. Èe tingare zi dikim asa sam gwesik gweblan habë alp gwe-gwenan. Èe homë ère mo tim hip dena anakan ngalap gwe-gwenan, “Èe de aha zi mo dam gulsun sun ang gwenkam, èe asa usak gwer.” Hwëna ano dwam gwibin tanganna, ano syala kon bap zen aha maena Yesusu hli tan. Diki kitak zen engaya gwen.

11

¹ Zen in zep, ano tana wei san em ang tan- aena men kirekamë Kristussu tana wei san zertro'anke.

Minggunak de bitì gwennak de kirekam ëgwë gwen hap de ol:

² Èe ama emsa sam gwesibirida'an, sap em ema asa embwan è gweblanan, hen ano tawa tabin sine ang ta gwenan- Kristen zi mo lowehen sanye.

³ Hwëna èe ama dwam gwe'an-em de anakan tame gun hup: Alap, Zen Kristus mo teipsinni. Kristus, Zen hwëna zikim dinik mo teipsinni. Hwëna zini, zen wekam dinik mo teipsinni.

⁴ Zep zi de Minggunak de tagal gwennak topi ala gun nuban Alapsa abe tankam, ahaksa Alap mo Enho nakore olsa ayang gulzimdinkim, zen kirekam zëre mo Teipsin nika blikip gwesibli srëm gwe'ara.

⁵ Hwëna we walya, zen de Minggunak de tagal gwennak kaen hakkam de nol utuk gun srëmkam Alapsa abe tanna, ahaksa Alap mo Enho nakore olsa ayang gulzimdinni, zen ki hom zëre mo zini blikip gwesibli'an. Kirekam de gwënnan in, zëno sahera man apde nè'an- nolsa de lonsun nubanye. *

* **10:26 10:26** Mzm. 24:1 * **11:5 11:5** Paulus mae kim lowehek, we walya zisi de zenkam, dekam kaen haksa nolak utuk da gwibik- dekam de zënaka anakan goltrën hap, “Èe an zi niban.”

6 We wal de nol utuk gun hup baes tanna, ki dikire nol alana blom dasibik. Hwëna blom tasibinkim ahaksa lonsunkum, zen man tangan ësaher gwe-gwenan. Zen in zep dawemna kaen haksa zen utuk ta gwibin.

7 Zikim dena, nëbe mae hap nol utuk gun hup hom dakasti'in, sap zikim dena nonol lonesen nakon Alap zëre mo nwe-masekam Adam Baksa yang tasiki. Zep zi kim dena nëno mae mo nwe-masena ngatan Zini Alap Zëna kiye, hen enlalana Alap zëre mo kiye. Hwëna we walya, zen nonol lonesen nakon zi nikon de yang gulsunnu, zep zëno mae mo nwe-masena zen zini kiye.

8 Sap zikim denaka hom wenya kon yang tasiki. Zen diki wesya zi nikon yang gulsuku.

9 Hen zini zen we mo tahasa de trï so gwibin hip hom yang tasiki. Hwëna wenya zen zi mo tahasa de trï so gweblan hap yang gulsuku.

10 Zen in zep, sap Alap mo dam taha nakore zini man nësa kara da gwibirin, zep dawemna we walya nolsa zen kaen hakkam utuk ta gwibin- anakan dikim zënaka golëtrë gwen hap, "Èe an ère mo zi mo tahasa de trï so gweblan hap dena."

11 Hwëna nen we walya ban zi niban mese apdekam Kristus hun ëraha-en gwek. Zep nen we walya ban zi niban bëjen nënaka gubirida gwen, "Èe homë emsa dwam eibirida'an."

12 Sap nonol tanganna, wenya zen zi nikon de yang gulsunnu. Hwëna zëno tahannak, zini zen we wal weiwik nul gwenan. Hwëna ausuna kitak zen Alap onakon.

13 Zep aya-wal oso wal, emki klis gun. San ha aïris- we wal de zi beya mo nwenak nol utuk gun srëmkam Alapsa gu soneblan naye?

14 Ahaksa san ha em home anakan tame uk?- "Zi de nol ala blal-blal gwenna, zen saherak zënaka drë ne'ara."

15 Hwëna we wal de nol ala blal-blal gwen hap dena, zen mes ki Alap golzimki- zen de nolsa ber-ber gun hup. Hwëna we walya, zen man hen zëre mae mo nol ala blal-blala insa boltere da gwibirin. Zen in zebë emsa gubiridal- zen de Minggunak de bitï gwennak kaen haksa nolak utuk ta gwibin hipye.

16 Hwëna ëe tawana: Ahakon sa yap ano ola ansa husus neibir. Zen in zebë aumwa hap emsa gubirida'an: Èe Kristen zini kire enkamë lowehe gwenan. Homë mae li kul sone'an.

Bian Yesus mo timsi de enlala gwibin hip de tembanenak de kirekam ang ta gwen hap de ol:

17 Hwëna angkam an desaë emsa titi tabi'in, ëe bëjënë emsa gubiridan, "Em ema ësam gwesik gwenan." Sap em kime tagal gwe-gwenan, zao karekna mamkam lwa gwenan. Dawemna man lwala he'an.

18 Nonol tanganna, ëe ama anakan sane gwe-gwek, "Zen kim tagal gwe-gwenan, zen man ëhliwe gwenan." Kire ola insa ëe ama anakan taibli'ibin, "San ha eiwa mes yap."

19 Em in anakare enlala nabane hliwek: "Aha zi dekakim asa hla nulidak, 'Hlikna an zen- eiwa denaye.'" Hwëna kirekam de ëboltebolte gwenna dawem naka hom.

20 Zep em kime tagal gwe-gwenan, hen zao kime Bian Yesus mo timsi de enlala gwibin hip de tembanena syal ei gwibirin, em hwëna ere mae mo hliwenna insae enlala ei gwibirin. Bian Yesus mo timsi home.

21 Èe ama sak, em kime nonol totore tembanena olgwenblanda gwenan, em home enaka eisbirida gwenan- apdekam de tembane tan hapye. Hwëna ahakore en nik nonol zë-en ngalap-ngalapkam dwensiblinda gwenan. Zen in zebe anakarekam ëgwë gwenan: Ahakon usak nabane nama lowehe gwenan, hwëna nonol ëitri gwen wenya zen mes ho mamak otde gwibin hip ëmamak gwek.

22 Ki san ha ere mae mo golak tembanena hom?- em zebe ngalap- ngalapkam tagal gwennak tembane ta gwenanye. Em san ki ere mae mo jematsa de saher gul gwen habe ëdwam gwe-gwe'an? Em insa kirekam ëgwë gwenan, zen jemat- nak de tahalha zisie kim saher la gwibirin. Em san ha ema ëkil gil gwenan?- "Paulus sa kirekam asa sam gwesibiridala." Hom tangan- ëe de emsa kire hap sam gwesibiri- dan hapye!

23 Sap men desa Bian Yesus zëre mo timsi de enlala gwibin hip de tembane hap dena abe hap goltrëblaka, ëe mesë sap desa ebe mae hap anakan ayang gulzik: Bian Yesusu dikim jal zi hip zertreiz- imdin hip de orapnak, Zëna ki zep rotina gul ineka.

24 Alap hap kim dawemna rotina in hap golblaka, ki zep ahap gul guku, ki zep gubiridaka,

"An ano timni- mensaë ebe mae hap sosok gulzim'inke. An kirekam em ano timbwanak syal gwe-gwibin- Asa dikim enlala gwe- gweblan hapye."

25 Kim tembane tasik hen kirekam. Zen anggur ho nabare moksa zerka, ki zep gubiridaka,

"An ano kala zen. Zen sa ano tim nikon wet sol- Alap mo zi niban de ol ziaha-en gun ësesa dikim sul sonen hapye. Kirekam kim ano tim bwanak syal ei gwibik, Asa dekon enlala ë gweblak."*

26 Zen in zep, nen kime kire hap de rotina olgwenblanda gwenan, hen kire hap de hona otde gwibirin, nen dekame Bian Yesus mo tinni anakare enlala naban oltrë gwenan, "Zen sa etan lwahal zala."

27 Zen in zep, men zen de asyas makan Yesus mo tim hip de rotina insa dwenblanda gwe'ak, hen hona insa notdeblanda gwe'ak, zen Alap mo nwenak kareknak zënaka kang nul gwe'an.

28-29 Diki nonol enlalasa nen anakan hohle ta gwen, "Ëe ama Bian han dikim zeraha-en gwen hap ang gwe'an, sap Zen mes zëre mo timni ano kareksa dikim ap ngan gulsublun hap tilki." Hwëna men zen kirekam de ëenlala gwen srëmkam ang ta gwe'ak, zen Bian de karek tabin hip zënaka nolëgu'un.

30 Zen in zep, ebon mae onakon beya nik tim sin-sinni hen sang- sangna nollwa gwenan, hëndep ahakon zep juwek.

31 Hwëna nen de nonol nëre mae mo enhosa hohle tankam, ki Bian bëjen nësa karek tabin.

32 Hwëna eiwa Bian ki nësa walas beteksa de oto tasibin makan gweibirida gwenda. Hwëna zen halen ora san dikim nësa dam tasik gwibin hip ki kirekam nësa gweibirida gwenda- nen dikim karek yawalsa goltowen srëm hap, Zen kim okamanak de karek gol gwen zini karek tabi'inkaye.

33 Zen in zep, aya-wal oso-wal, em de Bian mo timsi de enlala gwibin hip de tembane hap tagal gwenna, enaka em eisbirida gwen- tingan de tagal gwesinnik de kon gwesibir hanan hap.

34 Hen Alap de emsa husus gwibiridan srëm hap, nama de tagal gwennak de ahanik usak gwenkam, zen dikire nonol zëre mo golak tembane gwëk. Eno mae mo aha takensinni, Bian mo tim hip de tembane hap dena, ëe asa aen de hata zankam emsa tonbiridazal.

12

Mae hap de ol: Alap mo Enhona, Zen srën-srënkam de nwe-masekam de sosonsa nëbe mae hap gol gwiz- imnira.

1 Angkam mensa suratkam asa lakensiblik, Alap mo Enho nakore sosen hap dena, men desa Alap Zëna kae gwibir-zimmira gwendake, desaë ep ding gulzim'in: Ëe ama

* 11:25 11:23-25 Mat. 26:26-29; Mrk. 14:22-25; Luk. 22:14-20

dwam gwe'an em de eiwa denaka tame gun hup.

² Emki ëenlala gwen: Em kime Biansa tame la srëm gwe'ak, em dekam yang tabin alap-alapsae ang eibirida nasen gwëk- ol srëm wenyaka.

³ Ëe in zebë emsa dwam gwibirida'an- eno mae mo jematsa de aha zi tawa tabin hip yaing gwe-gwe zankam, em de dekam zëno mae mo tawa tabin nikon anakan kles so gwen hap, "Alap mo Enho de zisi zergwëna, zen bëjen anakan gun, 'Jesus zen karekna.' Hen Alap mo Enho de zergwën srëmkam, zen bëjen anakan gun, 'Jesus Zen ano teipsinni.' " *

⁴ Alap mo Enhona, Zen aha-ere nwe-masekam de sosonsa hom nëbe mae hap kae gwe-gwibir-zimnira. Hwëna ausuna sap aha-en- zëre onak.

⁵ Syala hen srën-srënkam de nwe-mase naka wei yul sone gwizimnira. Hwëna in Zen syala insa gwirensi'ira, Zen aha-en.

⁶ Banakare maesa de syal gwibin hip de sosonna, desa hen srën-srënkam gol gwizimnira- men kirekam zëbe mae hap dakastil gwizimninke. Hwëna Zen aha-ere Alap ki anakare enlalana ing ta sone gwizimnira, "Ëe anik kirekam syal gwëk."

⁷ Alap mo Enhona Zen kirekam nëbe mae hap aha-en aha-enkam sosonna kae gwe-gwibir-zimnira- nen dikim hwëna tingare Kristen zisi tatete ta gwibin hip.

⁸ Zep a kirekam mo Alap mo Enhona zi mo enhonak syal gwe-gwenda:

Ahakorena kip enlala blalsa ing ta sone gwizimnira- zen de dekam aha zisi titi ta gwibin hip.

Hen ahakorena kip Zen ba maesa de tame gun hup denaka ing ta sone gwizimnira- dekam de

zen hwëna aha zi hip ayang gul gwizimdin hip.

⁹ Alap mo Enhona in ahakorena kip sërkam dikim Alapsa taibliblan hap denaka ing ta sone gwizimnira.

Hen ahakorena kip zi sang-sangsa dikim dawem ta gwibin hip de sosonsa gol gwizimnira.

¹⁰ Ahakorena kip owas-owassa dikim syal gwe-gwibir-zimdin hip denaka gol gwizimnira.

Ahakorena kip Alap mo Enhona hamal hap de olsa dikim ayang gulzimdin hip denaka gol gwizimnira.

Ahakorena kip dam gulsuk gwen hap de sosonsa gol gwizimnira- zen dikim anakan dam gulsuk gwen hap, "Zini in mo ol toranna, zen eiwa Alap mo Enho nakorena," ahaksa, "Zëbon onakore naka hom."

Hen ahakorena kip owas olkam dikim ëtoran hap denaka ing ta sone gwizimnira.

Hen ahakore wenyaka kip, zen dikim owas ola insa zëre mae mo olkam li yul sone gwizimdin hip denaka ing ta sone gwizimnira.

¹¹ Syala in zen kirekam srën-srën gwëk, zen sap ausuna aha-en Alap mo Enho Zen ki kirekam syal gwe-gwenda. Zen sosonna zëre mo dwam gwibin sin nëbe mae hap aha-en aha-enkam kae gwe-gwibir-zimnira.

Mae hap de ol: Nen sap beyana, hwëna mese aha-ere tim makan ëgwëk.

¹² Kristus mo timni, zen nëno mae mo tim makan. Timni sap aha-en, hwëna dekon zep hli-hli gwëk.

¹³ Zen zep hen kirekam, nen kitak sap Yahudi zi, sap Yahudi srëm zi, sap tana iltikinnik de lowehe gwen wenyaka, hen kirenak de lowehe gwen srëm wenyaka,

* 12:3 12:3 1Yoh. 4:1-6; 4:20-21; 5:1-5

nen kitak mese zère mo timnik bitì gwèk- Alap kim zère mo Enhokam nèsa hlè ta sonebiridakake. Zen aha-ere Enho ki kirekam nèsa aha-en tabirki, sap nen mese kitak Alap mo Enho nakore hona ulink.

¹⁴ Sap timni bëjen aha-ere hli naban sam gwesin. Zen diki hli-hlina zen beya gwen.

¹⁵ Tanana bëjen anakan neran, "Èe ama taha hap de jo kèn hap dwam ë'an. Timni an mo tana ën hap, èe ama bae." Zen de kirekam nerankam, hwëna tanana in bëjen taha hap jo nèn, hen bëjen timni insa hli kun.

¹⁶ Hen ingalana bëjen anakan neran, "Èe ama nwe hap de jo kèn hap dwam ë'an. Timni an mo ingala ën hap, èe ama bae." Zen de kirekam nerankam, zen hwëna bëjen timni in kon nwe san dep li këhen, hen bëjen timni insa hli kun.

¹⁷ Tingare hli-hli nik de nwe en hap ëjowenkam, ki hwëna bakam de ësane gwe-gwen hap? Ahaksa ing ala hap de ëjowenkam, ki hwëna bakam de ba maena alebin hip?

¹⁸ Zen Alap Zën mes-am ki timni insa srën-srënkam de hli-hli naban yang gulsuku- men kirekam de yang gulsun hup Zëna dwam gwèkake.

¹⁹ Aha-ere hliina bëjen anakan gun, "Èe en asa tingare timni an mo syala sul sone gwer."

²⁰ Zep man sam gwesinin- hli-hlina sap beyana, hwëna timni aha-en.

²¹ Zen in zep, nwe bëjen tahasa anakan enzimdin, "Èe homë emsa dwam eizim'in." Hen nola bëjen tanana guzimdin, "Èe homë emsa dwam gwizim'in."

²² Nen de tim nikore aha hli naka enlala gwibinkim, "Zen soston tangan naka hom," zen hwëna desa ema tangan dwam ei gwibirin-dekam de gwën hapye.

²³ Hli-hlina mensa enlala ëblanda gwenan, "Zen dawem tangan naka hom," zen hwëna desa tangane dawemkam olëinik gwe-gwenan.

Hen hli-hlina men desa saher ei gwibirin, zen desa tangane dawemkam aning ul gwenan.

²⁴ Hwëna hli-hlina men zen nwekam de hlaunkum ëdawem gwèk, desa hwëna home aning gun hup enlala ei gwibirin. Zen Alap mes ki kirekam de enlala naban timni ansa yang gulsuku, "Dikire soston srëm hli-hlina dawemkam nolëinik gwe-gwèk."

²⁵ Zep timnik de hli-hlina in bëjen srën-srënkam hlik-hlik gwen. Zen hwëna hwë-hwëkam zënaka mas neibirida gwenan.

²⁶ Zen in zep, aha hli nik de sang-sang gwenkam, dekam tingare hli-hlina in sang-sangna insa man neis gwibirin. Hen em de dawemsa tahakam gul irinni ahaksa nwekam hlaunnu, tingare hli-hlina dekam man ëisrip-sri gwe-gwenan.

²⁷ Zep em in kitak Kristus mo timni, hen zëno hli-hlina.

²⁸ Alap zep srën-srënkam de syal hap Kristen zini nèsa dam tasik gwibirida:

Mam tangan wenya, zen Kristus hup de ol dawemsa de aha lang san gol halada gwen hap de wenya.

Zao de wenya, zen Alap mo Enhokam de hamal hap de olsa ayang gul gwizimdin hip de wenya.

Hen etan zao de wenya, zen Alap mo olkam de tawa ta gwibin hip de wenya.

Hwëna ahakon owas-owassa de syal gwe-gwibin hip de wenya, ahakon zi sang-sangsa de dawem ta gwibin hip de wenya, hen ahakon aha zisi de mas gwibirida gwen hap de wenya,

hen ahakon jemat mo syalsa de nol gwibin hip de wenya,

hen ahakon owas olkam de ton gwibin hip de wenya.

²⁹ Zen a dekon mo srën-srën gwèkye: Sap nen home Kristus hup de olsa dikim gol halada gwen hap de sosonna kitak ulink. Hen nen ahakon home Alap mo Enho

nakore sosonna ulink- hamal hap de olsa dikim ayang gul gwizimdin hip denaye. Hen Alap mo olkam dikim ahasa tawa ta gwibin hip de sosonna nen home kitak ulink. Hen nebon mae kitak sosonna hom-owas-owassa dikim syal gwe-gwibin hip denaye,

³⁰ hen zi sang-sangsa dikim dawem ta gwibin hip dena,

hen owas olkam dikim ton gwibin hip dena,

hen kire olsa dikim srip gulsuk gwizimdin hip denaye.

³¹ Zen in zep, em dawemkam enho nakon dwam gwe-gwibin- dekamim Alap mam tangan wenya insa ebe mae hap aha-en aha-enkam kap ta gwizimki.

Mae hap de ol: Nënaka de kwasang gwibirida gwenna, zen zen tangan- bol-zaun wenyaye.

Alap mo Enho nakore sosen kae gwe-gwibir-zimdinni, zen hen airis. Hwëna dekam de tangan sowe-hen hap, anik ebe mae hap ora dawemna ansa zertreizimk:

13

¹ Eë de men-kore men-kore olsa owas hap tawa gwibi'inam, hen Alap mo dam taha nakore zi mo olsaë tawa gwibi'inam, hwëna eë de zisi kwasang gwibirida gwen srëmkam, ki hwëna ano ol toranna in waba tangan hap- san de ngli glungna kiye, auku en naka de salblan.

² Hen kirekam, eyë tewesi'inam, Alap mo Enhokam de hamal hap de olsa ayang gul gwizimdin hip denaka, hwëna eë de zisi kwasang gwibirida gwen srëmkam, zen waba hap.

Hen eyë tewesi'inam, tingare kirekam-kirekamsa de olk san denaka kitak tame gunkum, hwëna eë de zisi kwasang gwibirida gwen srëmkam, kirekam hwëna ano tame gunnu in waba hap.

Hen eyë sërkam Alapsa taiblibla'anam, hëndep ano gublunkam de kwatap hinak keing gwe'anam, hwëna eë de zisi kwasang gwibirida gwen srëmkam, zen hen waba hap.

³ Hen eyë ëre mo bi gwibin kirekiresa kitak tahalha zi hip kap tazim'inam, hen ëre mo timsi Alap hap sosok gulblunkam Yesus hup de jal hap de ano timsi ang gulsun hup, kirekam hen waba hap- eë de aha zisi kwasang gwibirda gwen srëmkamyë.

⁴ Kwasang mo syala zen a kirekam moye:

Zen sam-samkam hen sae-saekam de zisi golëlowehe gwen.

Kwasang enlalakam, wal bosyansa de anakan hla tanna, "Zen dawemsa gul iri," zep bëjen husus gweblan.

Kwasang enlalakam, zen bëjen zënaka boltere tan,

hen bëjen bola-bola gwen,

⁵ hen aha zisi bëjen blostablan.

Kwasang enlalakam, zen bëjen zëre en mo timsi ngalap gwibin,

hen bëjen nabakam jal gwen.

Kwasang enlalakam, zëbe hap de zi kareksa golblanna, zen hwëna eititi gwibinkim.

⁶ Kwasang enlalakam, karek-karek enlala zi mo klesnak bëjen sam gwesin.

Hwëna eiwa de enlalakam de lowehen zi mo klesnak de gwënkam isrip-sri gwenkam.

⁷ Kwasang enlalakam, zen bëjen blalen gwen- aha zisi de mas gwibirida gwen naye,

hwëna zen Alapsa de taibliblannak de tatem zaun,

hen enlalakam anakan zon dasik gweblanan, "Alap sa hen

lamkam asa kwasang gwe-blala.” *

Zep kwasang enlalana, zen tatete tanganna.

⁸ Kwasang enlalana in, zen hēndep denaban sa lwa gwer. Hwēna

hamal hap de olsa de ayang gulz-
imdin hip de sosonna,

hen owas olkam de toran hap dena,
hen owaskam de ba maesa tame gun
hup dena,

zen kitak sa zausul.

⁹ Alap sap man ki nēbe mae hap tame gun hup de sosonna gol gwizimnira, hwēna nēno mae mo tame gunnu hom tangan langa gwe ha'an. Zen hen ngein sin dep denaka de hamal hap tame gun hup de sosonsa gol gwizimnira, hwēna tame gunkum home tangan su kul sone gwenan.

¹⁰ Hwēna sul sonen hap de Zini kim de hata'an zaka, zen dekam esa nen hen kitak tame gunkum su kul soner. Angkam dep de sosonna dekam sa hen zausul.

¹¹ Zen hen a kirekam moye: Ēe kimē nama betek nik gwē'ak, ano enlalana hen ol toranna dekam walas betek enlalana. Hwēna kimē zise gwēk, dekam zebē walas enlalana insa hli tak.

¹² Zep nen okamanak de lowe hēnak dawemkam de lalak gwen srēm honak de kara gun makane Alap hap dena kara ul gwe'an. Hwēna Kristus kim de hata'an zaka, zen dekam esa lalak tangannak de kara gwen makan hla la gwer, hen nēno mae mo enlalana dekam sa liwe hera. Aena hen angkam homē tangan Alapsa dawemkam hli-hli tasi'in. Hwēna zen dekam tangan asa tame tal- men kirekam hen Alap Zēna asa tame takaye.

* **13:7 13:7** Paulus mensa awe ale gulku, dam gulsunnu dan. Insa gulk Alapsa de taibliblan hap dena hen enlala zon tasiblin hap dena li nul sonek, zēno aha dam gulsunnu, zi bose zemka de hen kirekam gwebirida gwen hap. Zep a kirekam maka li nul sonek: Kwasang enlalakam, dekam men zen zēnaka kwasang neibirida gwenan, zēnaka daiblibirida gwenan, hen man zēnaka enlalakam zon dasibirida gwenan.

¹³ Zep nēbe mae hap angkam dan-
ahan bol-zaun gwizim'in- desan de
ang ta gwen hapye:

Ahana, Alapsa nen taibliblan.

Ahana, Alapsa nen anakan blol gwe-
blan, “Zen sa lamkam nēsa
ngaya tabiri.”

Hen ahana, aha zisi nen kwasang
gwibirida gwen.

Hwēna dan-ahanna in kon, bol-zaun
tanganna, aha zisi nen kwasang
gwibirida gwen.

14

*An kon an etan Alap mo Enho mo
syal hap de ol:*

¹ Zen in zep, bol-zaun tanganna
nen nēnaka de dawemkam kwasang
gwibirida gwen hap ēalp gwe-
gwen. Deban Alap mo Enho de
ebe mae hap sosonsa golzimdin hip
em dawemkam ēdwan gwe-gwen-
nonol tangan, dekam de Alap mo
Enho mo sosonkam hamal hap de
olsa ayang gul gwizimdin hip.

² Sap ebe hap de owas olsa de
ton gwen hap denaka golblankam,
dekam hwēna ahasa home kim ton-
birida gwe'ara. Dekam Alap ensae
kim ton gwebla'ara. Aha zi molya
eno ola insa tame nul gwēk, sap
em owas ola inkam olk san denakae
ton gwe'ara- Alap mo Enho mo
sosonkam.

³ Hwēna ebe hap de Alap mo
Enho hamal hap de olsa dikim ayang
gul gwizimdin hip de sosonsa gol-
blankam, dekam zisi esa kim tatete
ta gwibiri hen titi ta gwibiri, hen
isrip-sri enlalasa esa kim ing ta sone
gwizimdi.

⁴ Owas olkam men zen don
gwibirin, zen zēna en naka kim
tatete da gwibirin. Hwēna Alap
mo Enho nakore hamal hap de ola
men zen ayang nul gwizimnin, zen
tingare Kristen zisi kim tatete da
gwibirin.

5 Ëe sap ama emsa dwam gwibirida'an- em de kitak owas olkam ton gwibin hip. Hwëna dawem tangan wenya, diki Alap mo Enho nakore hamal hap de olsa em ayang gul gwizimdin. Sap kire hap de sosonna, jematsa dikim tatete tabin hip, zëno dawemna man taman kini'an- owas olsa de ton gwen hap de soson nakonye. Hwëna diki owas olsa de li yul sone gwizimdin hip dinik de ebon mae gwënkam bap. Ki äiris. Dekam emaka jematnak de zini tatete la gwibi'in.

6 Zen in zep, aya-wal oso-wal, ëe de owas ol en naban ebon mae onak golhata zankam, em dekam waba hap esa ësane gwer. Diki Alap mo Enho nakore olsa de golhata zankam- em dikim Alapsa dawemkam tame tan hap denaka, ahaksa ebe mae hap de hamal hap de olsa ayang gulzimdin hip denaka, ahaksa Alap mo Enho nakon de ba maesa tame gun hup denaka, dekam em esa ëtatete gwer.

7 Zep owas ol enkam de tonbirida gwenna, zen men kiye- ensasa srëm kire-kirena, men ki sulingni ahaksa gitara. Tawa srëm nik de gublunkam ahaksa juzimdinkim, aha zi bëjen anakan tame gun, "Tërya desa kim ta'ara."

8 Ahana hen men kiye- sraminsi de totores a gubinni. Dekam bëjen anakan tame gun, "An eijan hap dikim ëtamal gwen hap nenbirin."

9 Zep hen kirekam- owas ol en naban de golhatankam: Dekam aha zi bëjen dam gulsun. Eno ola in zalta dep sa lwal.

10 Okamanak awe, men-kore men-kore ola beyana, hen men zen ola insa bi neibiridak, zen kitak enlala naban don gwibirin.

11 Hwëna ëe de aha zi mo olsa tame gun srëmkam, ëe amaka enlala gwebla'an, "Zen ano kore wal-sya hom." Zen hen kirekam maka asa enlala gwebla'ara.

12 Zep jematnak bahem aha zi mo tame gun srëmna kim tonbirida gwen. Hwëna em ema ësam gwesi'in, sap em Alap onakore sosonsa de gulin gwen habe ëdwam gwe-gwenan. Hwëna diki dawem tanganna, Kristen zisi dikim tatete tabin hip de sosonsa de gul irin hip em hen Alapsa abe ta gwen.

13 Zen in zep, zini men zen owas olkam don gwibi'in, zen dikire Alapsa anakan abe da gwëk, "Abe hap Emki li yul sone gwizimdin hip de sosonsa mas gulblun."

14 Sap aena kimë owas olkam Alapsa abe ta gwenan, dekam ano enho enna man ang gwe-gwenda, hwëna ano enlalana hom tame gul gwenda.

15 Zen in zebë anakan dam gul-suk: Ëe sap asa enho ennak Alapsa owas olkam abe ta gwer, hwëna ano enlalana hen mahala sa hen nëre mae mo olkam abe la gwera. Hen enho nakon ëe asa owas olkam de tërya ban Alapsa isrip-sri gwe-gweblal, hwëna ano enlalana hen mahala sa hen nëre mae mo olkam isrip-sri ë gweblala- dekam de aha zisi tatete ta gwibin hipye.

16 Sap em de tagal gwennak owas ol enkam Alapsa isrip-sri gwe-gweblankam, ki hwëna ahakore wenya molya tol tame nul gwëk. Zen tame gun srëmkam eno ol gu sonenna in hap banakan dep?- anakan de ding gun nuye, "In eiwa."

17 Sap eno owas olkam de ol gu sonenna in Bian zëre en hap äiris. Hwëna wal bose wal okip, zen zalta dep dena. Sap dekam de ëtatete gwen hap dena hom dekon nulin gwenan.

18 Ëe ama dawemsa Alap hap gol gweblanan, sap ëe owas olkam de hen-henkam ton gwenkam ama kitak emsa kwei-kwik guk.

19 Hwëna Kristen zi de tagal gwen-nak, dekam ëe ama anakan enlala gwe-gwenan, "Diki dawemna zëno mae mo tame gun olkam anik tihis mae enkam tonbirida gwëk-

dekakim étatete gwek. Owas olkam de tonbiridankam, sap sa ol-gunnu beya gwer, hwëna zen waba hap.”

²⁰ Zen in zep, aya-wal oso-wal, Kristen zisi dikim tatete ta gwibin hip dena insa ebe mae hap ale gulzim, desa walas bete-tek mo kim bahem enlala gwe-gwibin. Kareksa de gon hap de enlalana, desa eiwa walas betek mo kim de enlala gwib-inni aïris. Hwëna Kristen zisi dikim tatete ta gwibin hip de enlala blala, zen diki zen zise gwen.

²¹ Men-kore men-kore olkam de tame gun srëmkam ësane gwe-gwen hap dena Alap mo olak man lwak, Israelk de zini kim anakan gubiridake,

“Bian man guku, ‘Èe asa aha zi aususa gubiridal- zen de eijan hap yaïng gwe-gwe zankam zëre mae mo olkam de nol drak-drak zi ausuna an hap ano jal gwibiridan olsa ayang gul gwizimdin hip. Zen men-kore men-kore zi mo ëk tihî nakon sa ano jal ola insa tame gun srëmkam ësane gwe-gwer, hwëna dekam Asa de salblan hap nama sa baes ta gwer.’ ”*

²² Zep ayatna an kon man dam gwesinîn: Owas olkam de tonbiridan naka de tame gun srëmkam ësane gwe-gwenna, zen Alapsa de dawemkam taïblïblan zi hip hom dakasti'in. Zen diki anakare zi hip sam gwesik gwizim'in- men zen zëre mae mo olkam de ësane gwe-gwenna ëblalen gwek, hwëna nama nol drak-drakna. Hwëna Alap mo Enho nakon de hamal hap de olsa ësane gwenna, zen Alapsa de taïblïblan zi hip man tangan sam gwesik gwenan, sap zen desan de ang tan hap mes ëhohle gwek. Hwëna Alapsa de taïblïblan srëm wenya kip hom sam gwesik gwizim'in.

²³ Hwëna aya-wal oso-wal, eno mae mo tagal gwennak de Kristen gwen srëm zi ang ta'anam, hwëna em de zao kitak owas olkam ton-

binkim, zen maka emsa kil dibi'in, “An man ëmamak gwe'an.”

²⁴ Diki dawem tanganna em de zëno mae mo tame gun olkam Alap mo Enho nakore hamal hap de olsa ayang gulzimdinkim, dekam maka zëre mae mo enhonak aha-en ahankam anakan neisbi'in, “Eiwa, ano karekna mamna.”

²⁵ Hen dekam anakarekam maka neisbi'in, “Ano karek-karekna mensaë aning gul gwenan, zen mes nolwet sonan.” Zen dekam maka bokle kom son naban Alapsa anakare ola ban boltere da'an, “Eiwa, emsa an Alap Zën golëlowehe gwe'ara!”

Kristen zi de kirekam tagal gwennak ëgwë gwen hap de ol:

²⁶ Zep aya-wal oso-wal, ëe a kirekamë mo emsa dwam gwibirida'anye: Tagal gwennak em a kirekam em ëgwë gwen:

Ahakon tërsya de da gwek.

Ahakon Alap mo olsa de tawa da gwibik.

Ahakon Alap mo Enho nakore ba maesa de tame gunsu de ayang nul gwizimk.

Ahakon owas olkam de ëton gwek.

Hen ahakon zëno mae moka de li nul sone gwizimk.

Hwëna zen kitak Kristen zisi dikim tatete tabin hip em kirekam syal ta gwen.

²⁷ Ebon mae onakon de owas olkam ëtoran hap ëdwam gwenna, beya tangankam bap zen. Diki dan, ahaksa dan-ahan man sam gwesi'in. Zen diki eissik-eissikkim zen ëtoran. Ahakon hen zen ëhohle gwen- zen de zëno mae mo owas ola insa etan srip gulsuzimdin hip.

²⁸ Owas ola insa de srip gulsuzimdin hip de sosen nabare zi de zëwe gwën srëmnak, dekam owas ola bare wenya in bap zen owas olkam ëton gwen. Kirekam de lwankam, enlala ennak em Alap en han owas ola inkam zertoran.

²⁹ Hen kirekam, Alap mo Enho nakore olsa de ayang gulzimdin hip dena, zen hen dan ahaksa dan-ahan

* 14:21 14:21 Yes. 28:11-12

zen ëton gwen. Hwëna ahakorena, zen zëno mae mo ola insa de klis gun hup zen dawemkam ësane gwegwen- anakare hap, "San ha zëno mae mo ola eiwa Alap mo Enho nakorena?"

³⁰ Hwëna men zen dekam ayang gulzimdinni- zen de nama toranak de Alap mo Enho nakore ol teinikirin wenyak hatankam, dekam toran zini in zen golzausun. In zëbon hatanna, zen dekamim hwëna desa ayang gulzimki.

³¹ Kirekam de ëgwë gwenkam, dekam sap esa kitak Alap onakore ola eissik-eissikkim ayang ul gwizim- ekakim kitak ëtawa gwëk hen ëtatete gwëk.

³² Sap olsa de ayang gulzimdin hip de sosonna mensa zi hip ing ta sone gwizimnira, zen zini in mo sosonsa bëjen kwei yul sone kinindekam dikim nabakam totoresa tonhan hapye. Hwëna zini in sa anakan dam gulsulu, "Angkam anik ayang gulzimk," ahaksa, "Anik eissik."

³³ Sap Alap hom nësa dwam gwibirida'ara- nen de tagal gwenak totoresa men-man menmankam nënaka tawa ta gwibin hipye. Sap Alap Zëna hom menman menmankam ba maesa syal gwe-gwibirida. Hwëna Alap ahare enlalakam gwë gwenda. Zep Zen man nësa hen kirekam de ëgwë gwen hap dwam gwibirida gwenda.

Men kirekam tingare jemat-jematnak ëgwë gwenan,

³⁴ we walya zen tagal gwennak balk enkam zen zë lowehen. Desa bëjen gubiridan- zen de ëtoran hapye. Zen diki zi wal zemka zen blikip gwesibiridan- men kirekam Alap mo ëpba olak lwakke.

³⁵ We wal de banakare maesa ëtawa gwen hap ëdwam gwenna, zen diki zi wal zemka zen golak takensibirida gwen. Hwëna zen de tagal gwennak ëtorankam, zen hwëna saherak kim zënaka kang nul gwenan.

³⁶ Ano ola insa de husus gwibin weny, ëe ama emsa gubirida'an:

Em bahem ëkil gin, "Alap mo ola, ausuna abon mae en onak lwa'an." Hen bahem ëtim gun, "Alap mo ola, ëe enë dawemkam tame uk."

³⁷ Ebon mae onak de Alap mo Enho naban de zergwën zi gwënkam, ahaksa sap hamal hap de olsa de ayang gul gwizimdin hip de zi, zen sa emsa anakan gubiridala, "Paulus insa nëbe mae hap ale gul sonezimki, zen eiwa Bian onakorena."

³⁸ Hwëna ahanik de anakan gunkum, "Paulus insa ep ale gul sonezimki, zen boton," zep em bahem desa hen sal gweblan, hen bahem anakan kil tin, "Zen an Alap mo Enho naban zergwë'ara."

³⁹ Zen in zep, aya-wal oso-wal, emki dawemkam ëalp gwe-gwen- Alap mo Enho nakore olsa de ayang gul gwizimdin hip. Hwëna owas olkam de ëtoran hap bahem jalse gwibirida gwen.

⁴⁰ Hwëna kitak sam-sam enkam emki syal gwe-gwibin. Men-man menmankam bahem.

15

Mae hap de ol: Kristus eiwa tangan tin nikon ngaya gwëka.

¹ Zep angkam, aya-wal oso-wal, ëe ama emsa etan enlala sobirida'an- Yesus hup de ol dawemna mensaë orep ebe mae hap ayang gul gwizimk. Em ema dawemkam ulink, in zebe angkam zëwe en tatem ëzauk gwe'an.

² Em ol dawemna in dekone ëngaya gwe'an, sap em ema dawemkam urensik gwenan. Hwëna em de ol dawemna insa tapbla gunkum, ki menkam waba habe laiblibik.

³ Ol dawemna mensa nonol asa don gweblakke, ëe hwëna desaë ebe mae hap ayang gul gwizimk. Bolzaun tangan weny zen anakan:

Kristus Zen eiwa nëno mae mo karek-karek hap tilki- men kirekam Alap mo olak zëbe hap dena lwakke.

⁴ Desa man nër dwanuk,

hwëna yaklana dan-ahan ki zep etan tïn nïkon ngaya gwëka- men kirekam zëbe hap dena Alap mo olak lwakke.

⁵ Hwëna ki zep Petrus hup Zënaka zertrëblaka,

hen etan dua-blaskam de dam tasibin zini in hap Zënaka zertreizimki.

⁶ Etan aha yaklakam Zënaka de taïbliBlan wënya kim beya enkam tagal gwëkke, limaratus nukon man tamank, zëwe zep zëbe mae hap Zënaka zertreizimki. Zini in beya tangankam nama lowe he'an. Dan en mes juwek.

⁷ Hwëna etan ki zep oso zem Yakobus hup Zënaka zertrëblaka, hen ki zep tïngare zëre hon de ang ta gwen wënya kip Zënaka zertreizimki.

⁸ Aumwa tangan hap hwëna abe hap zep Zënaka zertrëblaka. Zep ëe san de men kiye- walas de an zik mo unuk holokam gwëna, dakalkam de asa jaha gwëblan makan. Sap ëe lun tanganë taïbliBlak.

⁹ Zep ëe an zen- bose betek zi niye, tïngare Kristus mo dam tasibin zi nikonye. Hwëna ëe homë dakasti'in- kirenak de syal gwen hapye. Sap ëe ama Alap mo hlil irin wënya orep karek ta gwibik.

¹⁰ Hwëna Alap mo kwasang-kwasangna mes ki kirekam abe hap dena lwablak, zep asa hen dam tasikï- zëwe de hen syal gwe-gwen hapye. Hen Zen waba hap hom asa kirekam kwasang gwëblaka. Ahakore dam tasibin zini, ëe ama kwei-kwik guludak- dan syal-syala ban de syal gwe-gwenkamye. Hwëna ëre mo ssonkam homë ki kirekam syal gwe-gwenan. Hwëna Alap mo kwasang-kwasangna in ano enhonak sson gwe-gwenan, in zep ano syala kirekam lwa gwenan.

¹¹ Zen in zep, sap ol dawemna insa de abon onakon ësane gwëna, ahaksa Kristus mo aha dam tasibin zi nikon, zen apdenak taïlibin hip

dena. Hwëna bol-zaun tanganna, ëe in kire enkamë olzim halada gwënan. Hen em kire enkame laïbliBik.

Nen de tïn nïkon etan ëngaya gwen hap de ol:

¹² Sap ëe ebon mae osan Kristus de tïn nïkon ngaya gwen hap denakë kirekam ol halada gwëk, zep em ba habe ahakon ëgu gwe'an?- "Nen bëjen etan tïn nïkon ëngaya gwen."

¹³ Kirekam zen boton, sap Kristen zini nësa de etan tïn nïkon ngaya tabin srëmkam, zëno dam gulsunnu, ki hen Alap hom Kristussu ngaya taka.

¹⁴ Hen Kristussu de ngaya tan srëmkam, ki hwëna ëe waba habë ol dawemna insa ol halada gwënan, hen eno mae mo Kristussu de taïbliBlanna in waba tol hap.

¹⁵ Zep kirekam de lwankam, ki man dam gwësinin: Eë Alap hap dena mesë botonkam emsa tawa la gwibik. Sap ëe anakanë emsa tawa la gwibik, "Alap mes Kristussu tïn nïkon ngaya taka." Hwëna anakan de lwankam, "Zini bëjen etan tïn nïkon ëngaya gwen," ki hwëna Alap hom Kristussu ngaya taka.

¹⁶ Sap nen de tïn nïkon ëngaya gwe srëm gwe'anam, zëno enlalana hen ki, "Kristus hom tïn nïkon ngaya gwëka."

¹⁷ Zep eiwa de Kristus tïn nïkon ngaya gwe srëm gwenanam, ki em in botonsae laïbliBik, hen eno mae mo karek-karekna nama hom Alap mo nwenak tap gwe'an.

¹⁸ Zep hen Kristussu de taïbliBlannak men zen juwe gwëk, zen hen molya ngatan zi mo langnak yaïng gwëk.

¹⁹ Zep nëno mae mo Kristussu de taïbliBlan nakon de nen ngatan zi mo langnak yaïng gwe srëm gwe'anam, ki aha zi eiwakam nësa nenbirida gwenan, "Kristen zini in eiwa joblo-top tanganna."

²⁰ Hwëna Kristus Zen eiwa tangan tïn nïkon ngaya gwëka. Zen dekam nëbe mae hap orasa kles tyasizimki- nen dikim hen juwen

nakon etan lamkam engaya gwen hap. Zep neno mae mo teipsinni in nesa ngeirbiridaka- tin nikon de ngaya gwenkamye. Zen in zep nen hen kirekam esa zeno kim engaya gwer.

²¹ Sap Adam, zen aha-ere nik juwe gwen hap de orana nebe mae hap kles tyasizimki. Hen kirekam, Kristus Zen aha-ere nik nen de engaya gwen hap de orana nebe mae hap kles tyasizimki.

²² Sap zini nen kitak Adam han de zeraha-en gwen nakone juwe gwenan. Hen kirekam, tingan men zen Kristus hun neraha-en gwe'ak, zen zen sa engaya gwer.

²³ Hwena Alap mes ki yaklana dan-dan dam sosuku- dekam de tin nikon engaya gwen hap dena. Nonol yaklanak mes Kristus ngaya gwenkam ngeir guku. Hwena Zen de etan lwahal zankam, Zebon de ang ta gwen wenyanya nen hwena dekam esa engaya gwenkam ertrol.

²⁴⁻²⁶ Zen zep Kristus angkam irik gi'ira, hendep ki sa zere mo tana iltikinnik zere mo jal zini kitak sisik gulin gwera. Zen sa tingare dowal-dowala yal gulne gwera- sap nglinak de teipsin-teipsin dowal-dowala, hen okamanak de wenyanya. Aumwa hap in desa de se tya in'inka, zeno bosena Juwen Zi Bak. Dekam hyanak zini etan molya juwe gwek. Zen dekam sa aumwa hap denak zaul- kim de irik gin hip dena etan Bian Alap hap golbla'anka, Zen dikim kitak irik gin hip.

²⁷ Sap Alap mo olak anakan ngatan zi mo lang nakore Zi Tangan hap dena lwak,

“Alap mes kitak zeno tana iltikinnik sisik gul inki.”*

* **15:27 15:27** Mzm. 8:7; 110:1 * **15:29 15:29** Nonol lonesen ennak de Kristen zini ahakon kirekam egwe gwek, sap dekam anakan eenlala gwe-gwek, “Ano bian swe man tangan anakan taiblika, ‘Nesa de ngaya tabin hip de Zini sa hata zala.’ Ano bian swe maka nabakam Yesussu zer inki, hwena Yesussu de salblan srėmnak tol tilki.” Zep kirekam de zini iye swe zik mo weinak dep etan baptis tabinnik ang ta gwek. Kristen zini orep tangan mes kirekam de syal gwibinsi nolzausuk. Hwena Paulus zeno mae mo syala insa enlala sobiridaka- dekam de goltrėn hap, “Juwen nakon de etan engaya gwe srėm gwe'anam, ki zen ba hap ahakon kirekam egwe gwek.” * **15:32 15:32** Yes. 22:13

Zep zeno enlalana, Yesus de kitak irik gil gwen hap, diki aha-en: Alap Zenaka bejen irik tan. Sap Zen in Zen Yesus mo tana iltikinnik kitak sisik gul inki.

²⁸ Hwena Tane zem in Kristus, Zen kim kitak irik gi'inka, Zen dekam sa Zenaka Alap mo tana iltikinnik se tya iri- dekam de anakan dam gwesin hip, “Angkam Alap Zen kitak tangan irik gi'ira.”

²⁹ Zep nen eiwa esa juwen nakon engaya gwer. Kirekam de lwan srėmkam, ki ba hap Kristen zini ahakon eabe gwe-gwe'an- iye swe zik mo bose hap de baptis tan hap, iye swe zem in dikim lamkam ngaya gwen hapye. Eiwa de anakan lwankam, “Juwen nakon molya etan engaya gwek,” ki zen ba hap ahakon kirekam egwe gwe'an?*

³⁰ Ee Kristus hup de ol gol halada gwen wenyanya hen kirekam: Etan de engaya gwen srėmkam, ki ee hen ba habė mwin-mwan enkam Kristus mo bose hap juwen hap de karekna oltowe gwenan?

³¹ Aya-wal oso-wal, ee Paulus, ee ama eiwa mwin-mwan enkam tin hip alp gwesik gwenan. Hwena em in zen ano isrip-sri gwibiridan wenyaye, sap em mese ano syala kon nere mae mo Bianna Kristus Yesussu laibliblak. Zep ee bejenė emsa boton ta gwibin.

³² Hwena eiwa de tin nikon engaya gwen srėmkam, ki ee waba habė gwe tihı jal-jal makare zi niban Efesusk awe golėilman gwek. Eiwa de engaya gwen srėmkam, ki men kirekam eKristen gwen srėm wenyanya egu gwenan, nen hen kirekam emaka lowehe gwe'an. Sap zen man egu gwenan,

“Nen sap esa dërek-dërek enkam lowehe gwer, sap ka'an esa juwer.”*

³³ Hwëna desan de ang tan hap homë ki emsa gubiridal, sap em de karek-karek gol gwen zi niban hen boton tam zi niban ësiri gwenkam, ema zëbon mae osan ang tanank.

³⁴ Zep em insa orana li lablak, em etan lwanda halzan, hen karek gol gwensa em baes tan. Sap mes dam gwesik, em ahakon Alapsa de tame tan srëmna. Zep em emaka ësaher gwe'an, sap ebon mae onakon ahakon man tim nul gwe'an, “Zini bëjen etan tin nikon ëngaya gwen.”

Tim niban de etan juwen nakon luk tan hap de ol:

³⁵ Hwëna ebon mae onakon ahana sa asa takensiblila, “Zen banakarekam sa tin nikon luk tal?-banakare tim niban?”

³⁶ Kirekam de takensin zini zen enlala joblo-topna. Gandum danna kama hulak de drë nwanun srëmkam, zen bëjen eini tën.

³⁷ Nen kim gandum dan maena eiyas il gwenan, zen tim niban home eiyas il gwenan, hwëna dan en naka.

³⁸ Hwëna Alap zep danna in hap timni zëre mo dwam gwibin sin anakan gol gwizimnira: Gandum dan nakon zen hëndep gandum tim hip sa jower. Mulkwan dan nakon hëndep mulkwan tim hip sa jower. Zen kirekam sa hen Alap juwen nakon tim ëse naban nësa luwen tabiri.

³⁹ Okamanak de ensasa nabare kire-kirena, men ki nen zini, otweranna, mawana, hen hogwena, nëno mae mo sopna srën-srënna. Apdenak hom.

⁴⁰ Hen kirekam- nglinak de kire-kirena, hen okamana awe dena. Nglinak de kire-kirena, zëno mae mo nwe-awesna srën. Okamanak awe dena, zen hen srën.

⁴¹ Yakla nwe mo nwe-awesna srën. Ben mo hen srën, hen keis mo srën. Keisni hwëna man kon hen etan ësren-srën gwek.

⁴² Zen hen kirekam- tim niban de juwen nakon ëngaya gwen hap denaye: Dekam timni srën. Tinkim mensae batre gwen timni lo lasik gwibirin, zen san de otane dansa de ik ginni kiye. Hwëna dekon kim sip gwe'ak, zen dekam batren srëm tim hip sa jower.

⁴³ Timni mensae lo lasik gwibirin, zen ulop gwibin wenyaka hen sosen srëm wenyaka. Hwëna etan kim de luk ta'ak, dekam timni in hwëna nwe-awesna hen sosen tanganna.

⁴⁴ Mensae lo lasik gwibirin, zen auhu-kamana an kore tim nika. Hwëna timni men debane luk ta'ak, zen ngatan zi mo langnak dep dena. Zep nëno mae mo auhu-kamanak de tim de lwankam, zen dekam de dam gulsun, “Ngatan zi mo langnak dep de timni hen ki.”

⁴⁵ Zen in zep Alap mo olak nonol zini Adam Bak hap dena anakarekam lwak,

“Alap kim ensasana hop ta soneblaka, dekam zep gaya gweka.”*

Zep nen Adam onakon zebe auhu-kamanak de ëngaya gwen hap de timni ulin gwenan. Hwëna angkam Yesus hen Adam mo kim zep nwe-mase gwe'ara, sap zen Zëbon onakon esa hëndep de lowehen hap de timni ulin.

⁴⁶ Zep hen kirekam, ngatan zi mo langnak dep de timni bëjen nonol jowen. Zen in zep auhu-kamanak dep de timni nonol jowe gwenan. Hwëna lun zep ngatan zi mo langnak dep de timni jowe gwenan.

⁴⁷ Nonol zini Adamsa, zen kama nakon de yang tasinni. Hwëna zëwe de Adam makare Zini, Zen ngatan zi mo lang nakon de hata zanna.

⁴⁸ Men kirekam nonol kama nakon de yang tasin zini in mo timni lwablak, nen an hen angkam kire nike lowe he'an. Hwëna ngatan zi mo langnak kime yaing gwe'ak, zen dekam esa Yesus mo tim makan ëliweher.

* 15:45 15:45 Kej. 2:7

⁴⁹ An kirekame angkam kama nakon de yang tasin zini in mo kim lowe he'an, lamkam hen kirekam esa ngatan zi mo lang nakore Zini in mo kim lowehe gwer.

⁵⁰ Zep aya-wal owo-wal, bol-zaun tanganna an zen: Kala bare timni an han ngatan zi mo langnak bëjen nen yaing gwen- men zëwe Alap kitak irik gi'iraye. Hen batre gwen timni an han bëjen nen batre gwen srëm langnak yaing gwen.

⁵¹ Emki ësane gwen. Mensa zini orep tame nul srëm gwek, ëe ama desa angkam ebe mae hap srip gul-suzim'in: Nen kitak molye juwek, hwëna kitak esa ëliweher.

⁵² Zen mumuk ennak sa ngli ang makan lwal- kime aumwa hap de sramin aukuna insa ësane gwe'akye. Dekam juwen wenya, zen sa ëbatre gwen srëm tim niban luk tal. Hen nama de ëngaya gwen wenya, nen dekam esa kirekam hen ëliweher.

⁵³ Timni an debane juwe gwenan, zen tin srëm tim hip sa ëliweher. Hen batre gwen timni an, zen batren srëm tim hip sa ëliweher.

⁵⁴ Zep kirekam kim de lwa'ak, juwe gwen tim de tin srëm tim hip ëliwe henkam, dekam Alap mo olak men kirekam lwak, kirekam sa hëndep jower,

"Nen ëisrip-sri gwen, sap Alap mes juwen orana jek-jak taka."*

⁵⁵ "Nen angkam ba hap de tinsä aäri gwibin hip?-

sap tin hip de orana angkam hom."*

⁵⁶ Tin mo sosonna, zen nëno mae mo karek-karek nakon hata gwenan. Hwëna nëno mae mo karek-karekna mae nakon mam gwesik gwenan: Musa mo titi tabin ola kon.*

⁵⁷ Hwëna nen Alapsa nen anakan gu gweblan, "Ema asa sam tabirki," sap Zen mes Kristussu nëbe mae hap zer sonezimki- Zen de juwen orana insa jek-jak tan hap, hen ëngaya gwen

hap de orana insa de sal tazimdin hipye!

⁵⁸ Zen in zep, aya-wal oso-wal, zen zao en emki tatem ëzaun. Hen Bian en hap de syalak emki lowehe gwen. Sap ena tawana: Mensa Bian hap de syala ol gwenan, zen waba hap hom. Syala in mo eini esa lamkam hla kul.

16

*Kristen bose tahalha zi hip de te-
alasa tagal tazimdin hip de ol:*

¹ Angkam Yerusalemk de Kristen bose wal tahalha hap de te-alasa tagal tazimdin hibë ep ale gulzim'in: Men kirekamë hen langna Galatiak de jemat-jematna gu sonebiridakke, em hen kirekam syal tak.

² Minggunak kim tagal gwe-gwek, em dekam te-alana ing ul gwek- men desa minguna inkam Bian on-akon ulin gwenanke, zëno aha hlik tolaka. Bahem ëe de hata zannak de tagam tan hap ëeissin.

³ Em zisi dam lasibik- zen de te-alana insa Yerusalem san dep zerhan hapye. Eë kimë hata'anzak, dekam asa zëbe mae hap suratna ale gulzim- dekam de Yerusalemk de Kristen zi mo mam-mam nik tame tabin hipye.

⁴ Hen em de asa ang gwen hap dwam gweblankam, ki asa hen ang gwibiridal.

*Paulus mo amjanbir song gwen
hap de kalang gwen ol:*

⁵ Ano kalangna, ëe nonol Makedoniak de ë-ë san asa amjanbir, ki asa hwëna ebon mae onak hatazal.

⁶ Eë ebon mae holokam wëhë yap gwë'ak- hi ngëp tamle gwenkamye. Hwëna hi ngëp tap gwennak em emaka dekon asa mas ëbla'an- aha lang san dep de ayang gunnukye.

⁷ Eë homë ta guk kinin enkam de emsa hlauluda guk kinin hap dwam gwe'an. Diki Bian de asa kirekam dwam gweblankam, ëe ama holo tolkam de emsa golëlowehen hap dwam gwe'an.

* 15:54 15:54 Yes. 25:8 * 15:55 15:55 Hos. 13:14 * 15:56 15:56 Rom. 5:13; 7:7-25

⁸ Hwëna angkam ëe nama Efesusk awe gwë'an, hëndep Pentakostana awe sa asa jap dal.

⁹ Ëe mae habë kirekam kalang gwe'an: Sap awe Bian mes abe hap orana dawemkam kles tyasiblikadekam de zisi beyakam halen ta gwibin hip denaye. Hwëna ano syalsa de ap tru-tru gulblun hap de zini hen beyana.

¹⁰⁻¹¹ Timotius de ebon mae onak golëyaing gwe zanna, bahem anakan husus gweblan, "An nama wal seiwir sike." Dawem enkam blikip gwesiblin naban eirink, sap zen hen Bian mo nganak syal gwegwenda- men ki hen aena. Amki etan an san de golësek gwe zannak dawemkam mas ëblak- dekakim dawemkam ahakore Kristen zini in han golësek gwe zaka, sap ëe ama an kon eisbirida gwe'an.

¹² Angkam hwëna Apolos hap denakaë ep ale gulzim'in: Ëe mesë sap desa titi tak- zen de ahakore Kristen zi niban emsa ziamjanbin hip. Hwëna angkam zen hom dwam gwe'ara. Bian de zëbe hap orasa kles tyasiblinkam, dekam sa emsa ziamjanbir zira.

Aumwa hap de dawem gol sonen ol:

¹³ Salok-salokkam lowehe gwek. Hen Yesussu de taibliblan ennak em tatem ëzauk gwen. Bahem ëairi gwen. Enho drak-drakkam em lowehe gwen.

¹⁴ Tingare ere mae mo lowe henna aha zisi de kwasang gwibirida gwenkam em goltrë gwen.

¹⁵ Aya-wal oso-wal, ena mese Stepanus Baksa we wal walas zeban tame labik. Zen zen nonola langna Akaya kon ëKristen gwek, hen angkam zen tingare enho naban Bian mo syal emsa nol gwenan.

¹⁶ Zen in zebë emsa gubirida'an: Em kire zisi blikip gwesibirida gwen- hen tingan men kirekam

tingare enho naban syal ta gwenanke.

¹⁷ Ëe ama tangan sam gwesik, in kim Stepanus, Portunatus, hen Akaekus mae yaing gwezak. Ëe dekam zebë ebe mae hap de embwanna sëwehek.

¹⁸ Zen in kim yaing gwezak, zen isrip-sri gwibin olkam ano enhona ap tatete dablazak- zen men kirekam hen emsa tatete da gwibirinke. Nen diki kitak kire zisi nen blikip gwesibirida gwenmen zen kirekam ësyal-syal gwegwenanye.

¹⁹ Asia mo langnak de Kristen zini dawem emsa ebe mae hap nol sonezimk. Akwila ne Priskila ne, hen Kristen zini men zen zëno nik mo golak tagal gwe-gwenan, zen hen kwasang nabare dawem emsa ebe mae hap nol sonezimk.

²⁰ Tingare ahakore awe de aya-wal oso-walya, zen hen dawem emsa ebe mae hap nol sonezimk. Men kirekam Kristen zini ëgwë gwenan, ansa de baca gulsun hyanak emki kwasang naban enaka tahasa golëtowaran.

²¹ An kon an ëe, Paulus, ëre mo tahakamë aumwa hap ep mas gulzim'in.

²² Men zen Biansa kwasang nëbla srëm gwe-gwenan, dikire kareksa hla nuk. Hwëna Bian, nabakam hataza! *

²³ Dikire Bian Yesus mo kwasang-kwasangna ebon mae onak lwa gwek.

²⁴ Ëe ama emsa kwasang gwibirida gwenan- em in zene Bian Yesus hun ëraha-en gwekye. Dawem!

* **16:22 16:22** Insa Paulus ale gulku, "Bian, nabakam hataza," desa hom Yunani olkam ale gulku. Zen hwëna Ibrani mo mwin-mwankam de olkam anakan ale gulku, "Marana tha!"

Paulus mo surat ahana Korintusk de Kristen zi hip

¹ Korintusk de Alap mo hlil irin zi hip, hen tingare zëno propinsina Akayak de aya-wal oso-wal hap,

Yesus mo dam tasin zini Paulus onakon, hen nère mae mo osona Timotius onakon:

Dawem! Eiwa, Alap mo dwam gwibin sin ki lwak, zep Kristus asa dam tasiki- zère hap de olsa dikim gol halada gwen hapye. In zebë ebe mae hap ale gulzim'in.

² Dawem! Nère mae mo Bian Alap ne Bian Kristus Yesus ne sa kwasang-kwasang zemka mamkam ebe mae hap ol gwizimdi. Hen nen zère nik mo taha terenak esa lowehe gwer.

Mae hap de ol: Alap kirekam nëno mae mo enhona nëp tatete ta gwizimnira.

³ Nen kitak Bian Yesus mo Bian Alap hap dawemsa gol gweblan, sap Zen kwasang-kwasang enna, hen dekam de enho nakon tatete gwen hap dena, zen kitak Bian Alap en onakon nëbe mae hap hata gwizimnin. Sap nen an zëno walas.

⁴ Nen kim banakare karekna oltowe gwenan, Zen Zen nëno mae mo enhona nëp tatete ta gwizimnira. Zen mae hap kirekam nësa gweibirida gwenda: Aha zi de kareksa goltowenkam, nen de hwëna zëbe mae hap enhosa de tatete tazimdin hip de enlalasa anakan zer gwizimdin hip, "A kirekam mo Alap ano enhona ap tatete tablakaye- ëe kimë hen kirekam karekna goltowekye."

⁵ Nen mese Kristus hun ëraha-en gwëk, zep nen kime karekna zëno bosa hap oltowe gwenan, dekam san de Zën de hen kareksa goltowenna kiye. Nen sap dawemkame karekna Kristus hup de jal hap oltowe gwenan. Zen in zep hwëna Kristus hen

nëbe mae hap enhosa dikim tatete tan hap de enlalana dawemkam zer gwizimnira.

⁶ Zep ëe de ëre mo wal bosa walya ban kareksa zigoltowe gwenkam, zen mae hap: Em dikim ëtatete gwen hap hen ëngaya gwen hap. Sap Kristus kim abe mae hap enhosa de tatete tan hap de enlalana zer gwizim'inka, zen dekam asa hen ebe mae hap ayang ul gwizim- em dikim hen kire kareksa de goltowen nakon enlala nik ëtatete gwe-gwen hap.

⁷ Hwëna ëe homë anakan emsa enlala eibirida'an, "Zëno mae mo enlalana tatete naka hom." Sap mes tangan dam gwesinin: Em de hen Kristus hup de jal hap kareksa goltowe gwenkam, Zen hen sa ebe mae hap dekam de ëtatete gwen hap de enlalana zer gwizimdi.

⁸ Aya-wal oso-wal, ëe ama tangan ëdwam gwe'an- em dikim abe mae hap dena ansa ëtawa gwen hap: Ëe nër hom sërkam de kareksaë Asia mo langnak oltowe gwëk. Karekna in man sërkam tangan dohon-hon gwëk, hëndep ëe enlalana mesë anakan ëdowe hanak, "Nen an molye lowehek."

⁹ Ëe ama dekam eis gwibik, "Ëe an angkam jalom ëk tihinakë lowe he'an, hen zen angkam aisis gin hip asa alp tabi'ira!" Hwëna zen mae hap ki kirekam Alap asa gweibiridaka: Ëe dikim ëre mae mo sosonsa blol gwibin srëm hap. Zen in zep, nen diki Alap en hon nen ëblol gwëgwen, sap Zen soson tangan Zini Zen. Zëno sosonna ki- juwen nakon dikim etan ngaya tabin hip denaye.

¹⁰ Hwëna dekam zep Alap jalom ëk tihina in kon asa alal gulku, hen Zen sa etan kirekam asa alal gul gwer. Sap ëe mesë Zëbon en onak anakan ëyaing gwe kinik, "Zen Zen sa etan tin hip de karek nakon asa alal gul gwer."

¹¹ Zen kirekam sa lwa gwer- em de Alapsa de abe tankam asa mas gwibirida gwenkamye. Alap kim ol gu sonenna insa dokwak

gul gwe'anaka, dekam zini beya nik sa Alap hap dawemna anakan nol gweblal, "Bian, Em ema asa sam tabirida- kirekam de desa kwasang gwibiridankamye."

Mae hap de ol: Paulus kire hap zère mo kalangna wet gulsuku.

¹² Èe ère mo wal bose walya ban ère mae mo syala homë olsaher gwe-gwe'an. Sap ano mae mo enho nakon anakare enlalana hom wet so gwenda, "Èe kareksaë ol gwenan," ahaksa, "Èe auhu-kama enlalakamë syal ta'an." Hwëna anakare enlala en wet so gwenda, "Èe an enho lalakkamë okamanak awe syal ta gwenan- aha zisi de boton ta gwibin srëmkam." Sap Alap abe mae hap gol gwizimnira- kirekam de enho lalakkam syal ta gwen hap denaye, nonol tangan ebon mae kimë lowehe gwekke.

¹³ Ano mae mo ebe mae hap de surat-suratna hen dam-dam enna- em dikim damnak baca ta gwibin hip, hen em dikim tame gul gwen hap, ba maesa de aning gun srëmkam. Sap èe ama ëdswam gwe-gwe'an- em de dawem enkam asa tame tabin hip.

¹⁴ Sap dawemkame asa tame labir srëm gwe'ak, ki esa asa u seger la gwibir. Sul sonenkame asa tame labi'ik, ki Bian Yesus mo lwa halzan hap de yaklanak de hatankam, em esa asa isrip-sri eibiridal, hen èe asa emsa isrip-sri eibiridal.

¹⁵⁻¹⁶ Sap èe mesë desa kïtak tame guk, zen in zebë sap menkam kirekam kalang gwëk- Makedonia mo lang san de song gwenkam de emsa nonol amjanbir kïnzin hapye. Etan lwahal zankam amaka emsa amjanbir kïnzik. Dekam ano emsa de mas gwibirida zanna maka dan nëk. Hen aumwa hap Yahudi mo lang san dep emaka asa ër sonek.

¹⁷ Hwëna èe ama kalangna insa wet gulsuk. Em ahakon dekon mes yabe asa kïl lïk, "Paulus zen auhu-kama enlala naban kalang gwe-gwenda, zep anakan gu-guk

gwenda, 'Èe asa emsa amjanbir.' Hwëna kirekam bëjen."

¹⁸ Hwëna boton srëm Zini Alap mo nwenak èe ama emsa gubirida'an: Ano ola ebe mae hap kirekam hom!

¹⁹ Ahana hen ki- boton srëm Zi niye. Zen Alap mo Tanena Kristus Yesus. Èe Silas ne Timotius neban mesë zëbe hap dena ebon mae onak olhata gwëk. Em Kristus mo Zënaka de sosok tan nakon zebe anakan dam ulsuk gwenan, "Zen hom zère mo kalangna wet gulsuk gwenda."

²⁰ Sap Alap mo zi hip de ol gu-gunnu, zen kïtak Kristus hun de zeraha-en gwen nakon nëbe mae hap jowe gwizimnin. Nen in zebe Zëbon onakon Alapsa anakan boltere la gwenan, "Eiwa, Alap, ema asa sam ta gwibirida. In eiwa."

²¹ Sap Zen Alap Zën nëbon mae onak syal gwe-gwenda- dekam de nen Kristus en onak tatem ëzauk gwen hapye. Zen in zep zère mo Enhona nëbe mae hap hlë ta sonezimki.

²² Hen kim nëp hlë ta sonezimki, Zen san de Alap de nëno mae mo enhonak anakan ale gunnu kiye, "Zini an ère en mo dena." Zep angkam Alap zère mo Enhona nëno mae mo enhonak gwë gwenda. Zen in zebe hen anakan tame ul gwenan, "Mensa Alap ngein sin dep dena nësa gu-gubirida gwëka, zen eiwa kirekam sa ki lwal."

²³ Hwëna èe de emsa boton tabin srëm hap, dikire Alap asa hla tak. Èe mae habë lwa halza srëm gwëk: Ki hwëna eno mae mo karek-kareksa asa damnak wet gulzimzir. Hwëna èe ama emsa kwasang gwibiridak, zebë lwa halza srëm gwëk.

²⁴ Èe homë anakan emsa enlala eibirida gwenan, "Èe asa desa tik-tik la gwibir- ano mae mo kire enkam de taïblïbin sin de ang ta gwen hap." Hwëna nen apdenake syal ta'an- eno mae mo isrip-sri dikim hen sowehe hap. Sap nen Kristus-sue laïblïblak, in zebe ëtatete gwe-gwenan.

2

¹ Zen in zebë enlala gwëk, "Ëe babë jal gwibiridan ola ban amjanbin. Ki hwëna zen sa etan enlala nik ëdowe hanal- men kirekam nër hom ëgwëkke."

² Sap nabakam de eno mae mo karek-karekna insa dri yulzimdinkim, ëre mo enlalana maka hen dowe hanaka. Kirekam de lwankam, dekam nara zi dep?-etan abe hap isrip-sri enlalasa de zerblan naye. Ëe de kirekam emsa gweibirida zankam, em dekam bëjen em kire enlalasa abe hap zerblan.

³ Ëe kimë kirekam tame guk, dekam zebë eno mae mo karek-karekna insa de wet gulzimdin hip de suratna insa ale gul sonezimk. Sap dekam ëe ama emsa enlala gwibiridak, "Zen diki ano isrip-sri gwibiridan wenya zen. Hwëna ëe de kire olsa golhatazimdinkim, zen dekam sa enlalana ëdowe hanal." Ëe hen ama emsa kitak anakan tame tabik, "Ëe de Korintusk de zisi isrip-sri gwibiridankam, zen hen sa ano isrip-srina insa neis gwibir."

⁴ Zep ëe sërkam de enlala dowe hanan nabanë suratna insa ebe mae hap ale gulzimk. Ano enlalana hlik gwe hanan hap alp gwesiki hen nwe go-hona man beya nek. Ëe anakare hap homë ep ale gulzimk, "Dikire zëno mae mo enlala dowe hananna in mam gwizimk." Hwëna ëe mae habë ep ale gulzimk: Em dikim anakan asa tame tan hap, "Eiwa, Paulus mo nëbe mae hap de kwasangna mam tanganna."

Mae hap de ol: Zini in zen karek gwëka, emki zëno karekna insa angkam eititi gwibir-blin.

⁵ Sap nëno mae mo wal bosena in zen karek gwëka, nen dekam zebe kitak zëno karekna in kon enlalana ëdowe hanak. Ahakon mamkam neisbik, ahakon betekkam. Hwëna ano enlalana hom tangan mamkam kire hap dowe hanaka. Hwëna ëe em dikim etan zëbe hap jalsa

loneblan hap homë kirekam emsa enlala sobirida'an.

⁶ Em dekam mese ano ol san ang tak- zini insa de halen tan hap langa tasinkimye. Hëndep ebon mae onakon beya nik mes kirekam në gweblak. Zep angkam dekam ërzausuk.

⁷ Zen in zep emki angkam zëno karek-karekna insa kwasang tola ban eititi gwibir-blin, hen amki etan zini in han ërgolek de gwëk- dekam de enlala naka tatete ta gweblan hap. Kirekam de gwë gweblan srëmkam, ki zëno enlalana anakan sa tangan dowebla hanala, "Asa mes hëndep baes nëblak."

⁸ Ëe in zebë emsa titi tabi'in: Emki anakan damnak gu gweblan, "Ëe nama emsa kwasang ë gwebla'an."

⁹ Hwëna ëe mae habë menkam zini insa dikim halen tan hap de suratna insa ale gul sonezimk: Dekam de anakan emsa akasibiridan hap, "Zen wëhë tangan kitak ano ol san ang ta'ak?"

¹⁰ Ëe ama angkam zëno karekna insa eititi gwibir-bli'an. Zep emki hen eititi gwibir-blin. Hwëna zen sap diki asa hom mamkam karek taka. Hwëna ëe mae habë Kristus mo nwenak zëno karekna insa eititi gwibir-bli'an: Ebe mae hap de dawem hap.

¹¹ Ëe dowal mo kigi mo syal de ebon mae onak sosen gwen hap homë ki dwam gwe'an. Sap nen zëno syala hal-halaka hom.

Mae hap de ol: Ëe in zen Kristus mo nganak syal ta gwenan, ëe san de okamanak awe ngatan zi mo lang nakore irase dawemna kiye.

¹² Ëe kimë Troask hatak, Kristus hup de ol dawemsa de gol hal-ada gwenkam, Bian Yesus dekam zep abe hap orana kles tyasiblika- dekam de Troask de zisi beyakam Bian Yesus osan dep titi tabin hipye.

¹³ Hwëna ano enhona mae hap zë sëwehe srëm gwëka: Sap ëe homë zë nëre mae mo osona Titus Baksa zergaing gwëk. Ëe ama tangan sap

dwam gwëk- Titus onak de emsa salbiridan hap. Zebë nabakam zëwe de ëKristen gwen wenya hli yuludak-Makedonia mo lang san dikim tëbla song gwen hapye.

¹⁴ Hwëna nen diki Alap mo bosena nen teip gulsuk gweblan! Sap ëe men zenë zëre mo nganak syal ta gwenan, asa zep Alap ë-ë san tîngare zi hip anakan golëtrei gwizimnira, "Zini an zen Kristus mo soston nakon dowal mo kigisa nyaublu ine gwenan." Zep ëe kimë Kristus hup de ol dawemna ol halada gwenan, dekam zebë ënwe-mase gwegwenan- san de ngatan zi mo lang nakore irase dawemna kiye. Zini zep irasena insa nale gwibirin.

¹⁵⁻¹⁶ Alap Zëna hen zep irase dawemna asa alebirida gwendamae hap, "Zen ano Tane mo bosesa okamanak nol halada gwenan." Hwëna okamanak de zini ahakore en nik irase dawemna asa nalebirida gwenan- men zen en ëngaya gwen hap de ora san ang ta'anke. Sap zen en man ngatan zi mo lang nakore irasena insa nale gwibi'in. Hwëna men zen juwen hap de ora san ang ta gwe'an, zen man asa husus neibirida gwe'an. Sap ngatan zi mo lang nakore irase dawemna in, zëbe mae hap san de irase karekna kiye. San de zi tok ase. Eë in zebë hen ëre mae mo syala insa lenggwan gwibi'in- anakare hap, "Eë ë-en molyë kirekam syal ta'anam! Eë auhu-kama zini ë-en banakan dep?- ang hap de syala insa de sul sonen naye."

¹⁷ Hwëna ëe in zebë ëre mo wal bose walya ban aha zi mo kim syal ta srëm gwegwenan. Sap ahakon te-ala en hap Alap mo ola ëk enkam tawa da gwibirin. Eë hwëna anakarekamë ënaka enlala eibirida gwenan, "Eë an diki Alap mo nwe

kara gwennakë Kristus mo nganak syal ta'an." Eë in zebë tîngare enho naban Kristus hup de ol dawemna ol halada gwenan- men zep Alap asa dam tasibirkiye.

3

¹ Hwëna ëe de kire hap denaka ebe mae hap ale gul sonezimdinkim, dekam san ha anakan esa etan asa enbiridal?- "Zen kirekam man zënaka bën-jana dabi'in." Hwëna ëe ama emsa enlala sobirida'an: Eno mae mo ngirinnik de ano mae mo syala bahem eititi gwibin. Ahakore zini men zen namjanbiridanda gwenan, zen zënaka dikim anakan tame tabin hip de suratsa noltrei gwizimnin, "Zini an mo tawa tabinni dawemna. Sap esa asalblal." Hen ahakon emsa kirekam de surat hap abe da gwibirin- aha ënak de hwëna desa goltrei gwizimdin hip. Hwëna ëe homë kirekam de suratsa de goltreizimdin hip ëdwam gwegwenan.

²⁻³ Sap em in zene ënwe-mase gwe-gwe'an- ano mae mo surat makanye. Sap eno mae mo lowe hensana de kara gul gwizimdinkim, dekon zep tîngare zini asa hen tame da gwibirin, "Zëno mae mo Alap hap de syala zen dawemna." Zep eno mae mo lowe henna angkam, san de Kristus onakore suratna kiye-tîngare zi de zë karatda gul gwen hap. Zen tintakam de ale gunsu hom, hen kasonak de ale gunsu hom. Zen hwëna Ngaya Zini Alap Zën zëre mo Enhokam suratna insa ale gul gwenda- eno mae mo enhonakye. Hwëna Zen dekam zep hen ano mae mo enhonak ebe mae hap de kwasangna dawemkam ale gulku. *

⁴ Eë Alap mo nwe kara gwennakë kirekam ep ale gulzim, sap ëe ëre

* **3:2-3 3:2-3** Yunani olkam man dam gwesinîn: Kasonak de alena mensa Paulus awe enlala gwibiriki, zen men desa Alap Musa Bak hap dare taha-tapakam de jalse gwen ola kaso dak-daknak ale gulblukake, desa enlala gwibiriki. Zep Korintusk de zini zen titi tabin ol san de tim enkam ang ta gwenkam hom Alap mo nwenak ësam gwesik. Zen hwëna enho nakon ëliwehek, zep Alap mo dwam gwibin sin lowehe gwëk. (Yer. 31:33)

mae mo syal hap dena kitak mesë Kristus onak blöf eibik.

⁵ Ëe a en bëjënë anakan ëgun, “Ëe asa ang hap de syala ansa ol gwer.” Hwëna ano mae mo sosonna, ba maesa dikim syal gwibin hip dena, zen kitak Alap onakon hata gwenan.

⁶ Zen Zen abe mae hap sosonna gol gwizimnira- dekam de zëre mo zi niban de ol ziaha-en gun ësenä inäa golluwe gwen hap denäe. Ol ziaha-en gun ësenä in, zen ëpba titi tabin ol ale gunsu dikim syal gwibin hip denäka hom. Zen hwëna Alap mo Enho dikim ing gwe hebiridan hap dena. Sap zini men zen ëpba titi tabin ol san anakare enlala naban ang ta gwenan, “Tahakam de syala ansa de syal gwe-gwibinkim, ëe dekam asa Alap mo nwenak dakastil,” zen hwëna dekam nama juwen ora san ang ta gwe'an. Zen diki Alap mo Enho naban de zergwënkam esa ëngaya gwer.*

Mae hap de ol: Alap mo zi niban de ol ziaha-en gun ësenä, zen Musa mo titi tabin ola kon sërkam de dawem tanganna.

⁷ Zep ëpba titi tabin ola in, zen san de juwen orana kiye. Sap desan de ang tankam dekam hom Alap mo Enho nakore ngatanna nulin gwëk. Hwëna sap kirekam, zen sap hen nonol lone sennak Alap mo ngatan naban hatak- orep kim Alap Musa Bak hap kaso dak-daknak ale gulblukaye. Musa dekam holokam Alap han ë gwëka. Zep Alap onakore ngatanna zëbon onak makan gwëblak, hëndep nwe-masena zep lilingtilblika. Dekam Israel Bak mo ausu nakore zini nwe-masënak bëjen hla tan, sap man tangan yakla nwe mo kim ngatan gwëbläka. Hwëna Musa mo nwe-masënak de ngatanna in man sangankam tap gwëbla song gwëk.

⁸ Hwëna Alap inäa etan nër hom ol ziaha-en gun ësenä nëbe mae hap golzimki, zen hwëna zëre mo

Enho de ing gwe hebiridankam de ëliwehe gwen hap dena. Zep zen diki zen- nëbe mae hap de ngatanna mam tangan wenyäye, san de ngatan zi mo lang nakore ngatanna kiye.

⁹ Ëpba titi tabin ola in sap äiris, hen zen sap ngatan zi mo lang nakore ngatan naban hatak. Hwëna anakare enlala naban de desan ang ta gwënkam, “Ëe dekam en asa Alap mo nwenak ëdakastil,” dekam hwëna man nwe-masë gwë-gwenan- san de juwen ora san de nama ang tanna kiye. Sap desan en de ang tan hap kim äalp gwë-gwëk, zen hwëna dekam hom mae enho nakon ëliwehe gwëk. Hwëna angkam Alap mo ol ziaha-en gun ësenä an, zen zen tangan ngatan makan nëbe mae hap lwazim'in. Sap nen desan de ang tankame Alap mo nwenak ëdakasti'in.

¹⁰ Zep nëno mae mo nwenak, nonol ngatanna in mo sosonna mes tangan tap gwëk. Hwëna angkam de ngatanna an sërkam tangan nësa zilbir ane gwe'an.

¹¹ Sap nonol ngatanna in zen Musa Bak ensa zilbli ine gwëk, ki zep hëndep tap gwëbla song gwëk. Zep hen kirekam- ëpba titi tabin ola inye. Zëno sosonna angkam mes tap gwer. Hwëna Alap mo ol ziaha-en gun ësenä an, zëno ngatanna hëndep denaban sa nësa zilbir ane gwer.

¹² Ëe kirekamë Alap onakore ol ësenä inäa läibliëbik, ëe zebë udobe naban tingare zini Kristus hup dena kim damnak lonbirida gwenan.

¹³ Ëe Musa mo kim homë udobe srëmkam ëgwë gwenan. Zen man kaen hakkam zëre mo nwe-masëna tahale gwëka- dekam de Israel Bak mo ausu nakore zini in zëno nwe-masënak de ngatanna inäa anakan hlal gwëblan srëm hap, “Angkam man tap gwëbla song gwë'an.”

¹⁴ Hwëna zen in zep Israel mo zi ausuna ënol drak-drak gwëk,

* 3:6 3:6 Gal. 3:10-14; Rom. 8:1-8

hëndep angkam nama. Zen kim Musa mo épba ola insa baca nul gwenan, dekam hwëna man nwe-mase gwe-gwenan- san de Musa mo kaen hakna inkam de zëre mae mo nwesa tatak sonna kiye. Zen in zep hëndep angkam enlala nakon êkawesik. Hwëna Kristussu de taïblblankam, zen dekame enlala nakon êngatan gwe-gwenan- san de kaen hakna insa de nwe nakon hil gilsinni kiye.

¹⁵ Israel mo ausu nakore zini zep hëndep nama kirekam lowehe gwe'an- san de nwe diminni kiye. Musa mo alena insa sap karatda nul gwenan, hwëna zëno eini hom dam nulsuk gwenan.

¹⁶ Hwëna Musa Bak kim olsa de gu soneblan hap Biansa golek de ta gweka, zen dekam man kaen hakna insa nwe-mase nakon hil gilsik gweka. Zep hen kirekam nèbe mae hap angkam lwa gwizim'in: Men zen Bian Yesussu neirin gwenan, zen dekam zep zëno mae mo nwenak de kaen hakna ehil gwe hana gwenan. Enho nakon hen dekam zep êngatan gwe-gwenan.

¹⁷ Ngatanna in zen Bian Yesus onakon zil ine gwe'an, zen apdenak zëre mo Enho naban. Men zëbon Bian Yesus mo Enhona in ing gwe henna, zen dekam zep Musa mo épba titi tabin ola kon ehil gwe hana gwenan. Sap zen zen zini nësa hulen makan gweibirida gwenan.

¹⁸ Zep nen an angkam nwenak de kaen hak srëm nike lowehe gwe'an. Nen in zebe enho nakon Biansa dam-dam enkam kara la gwenan. Zep nëno mae mo enhonak san de Yesus zëre mo ngatan dekon litil ine gwenna kiye. Zep nëno mae mo enhona man Yesus, zëre mo Enho naban de apde nën hap wet gwesik zahe gwenda. An kitak Bian Yesus zëre mo Enho nakon ki kirekam nèbe mae hap jowe gwizimnin.

4

Mae hap de ol: Èe kire habë

enlalana ëdowe hana srëm gwe-gwenan.

¹ Zen in zep, sap Bian Alap zëre mo kwasang-kwasang nakon mes kirekam syala abe mae hap wei yul sonezimki, ëe in zebë enlala dowe hanan srëmkam syal ta tine gwenan.

² Zep men zen zëre mae mo tawa tabin karekna saher hap ber-ber nulida gwenan, ëe kirekam homë. Èe homë Alap mo ola men-man ul gwenan- dekam de zisi ëre mae osan dep wan-wan ta gwibin hipye. Èe hwëna dam-dam enkamë eiwa de enna kim hleng ososubirida gwenan- dekam de kitak de zi asa anakan tame tabin hip, "Zen dam-dam enkam Alap mo nwenak syal ta gwenan."

³ Èe zebë Alap onakore êngaya gwen hap de ol dawemna ba maesa de ber-ber gun srëmkam tawa la gwibirin. Hwëna men zen tame nul srëm gwe-gwenan, zen zen ênwe-mase gwe-gwenan- san de kaen hakkam de nwesa tatak sonna kiye. Zen men zen juwen ora san ang ta gwe'anke.

⁴ Okamana awe de boton alapna, dowal mo kigi, zen mes Yesussu de taïblblan srëm wenyik mo nwena dimin tabir-zimki- zen dikim ol dawemna in mo ngatansa enhonak eisbin srëm hap. Kirekam de gweibiridan srëmkam, zen maka Kristus mo ngatan zi mo lang nakore sosonna tame nul gwe'an. Sap Kristus Zen Alap zëre han ki en.

⁵ Zep ëe aen dikim ëmam gwen hap homë ol halada gwenan- ahakore zini men kirekam ëgwë gwenanke. Hwëna ëe Bian Yesus Zën de mam gwen en hap denakaë anakan ol halada gwenan, "Yesus Zen Teipsin Tangan Zini Zen." Hwëna zëno bosesa dikim mam gun hup ëe mesë ëgwëk- san de ebon mae de ëbabu gwen zini kiye.

⁶ Sap Alap men Zen okamana ansa de yang gulsun srëmnak guku, "Kawesinni an kon ngatanna de

jowek,” zep Zen mes hen kirekam nëno mae mo enhona ngatan tabir-zimki. Menkam nëno mae mo nwna tatak sonna hen enhona kawesinni. Hwëna angkam enho nakon nen ema Yesussu kara la gwe'an. Zen in zebe tame uk, “Kristus hun de zergwë gwenkam, nen dekame Alap mo ngatan zi mo lang nakore sosonna eis gwibi'in.”

⁷ Nëno mae mo timni, zen sap kama nakon de yang tabinni, zep dawem naka hom. Hwëna dekam de enho nakon ëngatan gwen hap dena insa Alap ing ta sonezimki, zen sërkam de dawem tangaranna zen. Nëno mae mo timni sap karekna, hwëna olk, ngatan zi mo lang nakore nik zë gwë gwenda. Zen dekam zep dam gwesik gwenan: Sosonna men dekamë syal ta gwenan, zen kitak Alap onakorena. Ère mae mo tim nikore naka hom.

⁸ Ano mae mo jal zini sap beya tanganna, hëndep zen man sap asa ngirin da gwibirin. Hwëna Alap abe mae hap sosonna gol gwizimnira, ëe zebë nama lowehe gwe'an. Anakare ngalap enlalana hen ki sap abon mae onak hata gwenda, “Èe banakan asa loweher?” Hwëna ëe dekam homë enlalana anakan ëtopse gwe-gwenan, “Alap molya asa mas gwibiridaka.”

⁹ Zen karek tabin hip sap asa alp dasik gwibirin, hwëna Alap hom asa da tasik gwibirida. Sap ki asa mosmos ta gubin hip alp dasik gwibirin. Hwëna Alap ap sosonna gol gwizimnira, zep asa timbwas dahir srëm gwe-gwe'an.

¹⁰⁻¹¹ Èe mesë Yesus hun ëraha-en gwëk, zep ëe tim niban de nama okamanak lowehe gwenkam zebë mwin-mwankam anakan eis gwibirin, “Nësa an hen Yesus mo kim karek da gwibirin, hëndep zëno kim hen nësa damera gwenan.” Hwëna sosonna men dekam Yesus etan ngaya gwëka, zen hen man ano mae mo timnik lwa gwenan. Zep ahakon asa de hlauluda gwenkam

anakan tame nul gwenan, “Zëno mae mo timni sap sin-sinni, hwëna Yesus Zen ëngaya gwen hap de sosonna gol gwizimnira.”

¹² Zep Alap mo nganak de syal ta gwen wenyä ëe insa kirekam juwen hap ëalp gwesik gwenan, hwëna em dekone ëngaya gwe'an.

¹³ Alap mo olak zini man anakan ale gulku,

“Èe Alapsaë taibliblak, zebë tonbiridak.”*

Èe hen kirekamë Alapsa laiblibla'an, zebë zëbe hap dena airin srëmkam lonbiridanda gwenan.

¹⁴ Sap ëe mesë Alapsa anakan laibliblak: Men kirekam Bian Yesussu tin nikon ngaya taka, zep nen men zene Deban ëraha-en gwëk, nësa hen kirekam sa ngaya tabiri. Zen dekam sa zëre onak dep kitak nësa tagal gulsulu.

¹⁵ Zep ëe de kareksa goltowe gwenna, zen airis. Èe ama dekam ësam gwesik gwe'an. Sap zen dekame em anakan tawa ei gwibi'in, “Alap man angkam Yesus onakon nësa kwasang gwibirida gwe'ara.” Hwëna etan beya tangan nik sa ebon mae onakon ësane gwe-gwer, hëndep zen de hen Yesussu taiblibl gweblankam, zen hen sa Alap hap dawemna nol gweblal hen bosena teip nulsuk gweblal.

¹⁶ Zen in zebë enlala dowe hanan srëmkam syal tanda gwenan. Nëno mae mo timni an sap man ësin gwe hana gwenan, hwëna Alap man nëno mae mo angna mwin-mwankam tatete ta gwizimnira.

¹⁷ Zep ëe insa awe karekna oltowe gwenan, zen jahalhana hen holo tangankam hom. Hwëna ngatan zi mo langnak zen zep sa Alap dawemna abe mae hap dohon-hon tangankam golzimdi. Zen zen-hëndep de wenyä, hen mam tangan wenyäe.

¹⁸ Zep nen home angkam en dep de ba maesa enlala ei gwibirin-

* 4:13 4:13 Mzm. 116:10

mensa okamanak awe hla kul gwenanye. Sap nwekam de hlaul gwenkam dena, zen hëndep denaka hom. Hwëna nwekam de hlaul gwen srëm wenyaya, zen diki zen-hëndep de wenyaye. Zen diki desa de dokwak gun hup nen dam-dam enkam hlu-hluk gwen.

5

Ngatan zi mo langnak de timsi de kara gwibin hip de ol:

¹ Nen mese sap ëtawa gwëk: Nëno mae mo timni an, zen san de sohlas gola kiye- bohëkam de zë okamana awe lowehe gwen hap dena. Zen gol kluk mo kim sa ëklasak gwer. Hwëna dekam nëno mae mo ngatan zi mo langnak dep de timni hen ki. Zen hëndep de gola zen- Alap mo syal gweblan zi niye. Zen zi mo syal gweblan golsa hom.

² Okama ennak dep de timni an karekna. Zen zebe sërkam ëdwam gwe-gwenan- ngatan zi mo langnak dep de timsi de baju makan ala son hapye.

³ Desa de alala tankam, dekam nëno mae mo angna molya irkare makan lowehe gwëk.

⁴ Okamanak dep de kluk gol makare tim niban de nama lowehe gwenkam, nen dekam ema anakan ëenlwan gwe-gwenan, "Awe de gwëna dohon tanganna. Diki hëndep de tim niban de gwëna aïrïs." Hwëna juwenkam nen home ëdwam gwe'an- tim srëmkam de ang en nik lowehe gwen hapye. Diki nabakam de ngatan zi mo langnak dep de timsi de ala sonna aïrïs. Dekam awe en dep de timni ansa Alap sa owas hap hëndep de ëngaya gwen hap de tim hip nëp li yul sonezimdi.

⁵ Zen Alap Zën ki kirekam dep nësa hohle tabirki. Zen in zep zëre mo Enhona nëbe mae hap ing ta sonezimki- dekam de nësa anakan hamal hap gu-gubiridan hap, "Em esa eiwa ëre mo Tane naban hëndep denaban ër gwë gwer."

⁶ Nen in zebe enlala tatetekam lowehe gwenan, sap nen mese tame uk, "Okamanak dep de tim niban de nama lowehe gwenkam, dekam nen Bian onakon nama langanak."

⁷ In zebe Biansa de anakan taïbliBlan enlala naban lowehe gwenan, "Mensa angkam hla kul srëm gwe-gwe'an, Zen desa sa lamkam nëbe mae hap golzimdi." Zep nen home nwekam de hlaul gwen wenyaya ansa dwam ei gwibi'in.

⁸ Zep nen enlala tatete nabane Biansa anakan laïbli gwebla'an, "Zen eiwa ngatan zi mo langnak dep de timni sa nëp lop tazimdi." In zebe anakan ëdwam gwe-gwenan, "Angkam de timni ansa emaka hli ku'in- dekam de hëndep de wenyaka gul irin hip- Bian zëre hon dikim gwë gwen hap denaka."

⁹ Zen in zep okamanak awe de nama lowehe gwennak, nen diki Bian de nësa sam gwesibirida gwen en hap nen ëalp gwe-gwen- men kirekam esa hen wakuwe ëalp gwerye.

¹⁰ Sap nen lamkam Kristus hon esa kitak aha-en aha-enkam yaing gwe-gwer, hen Zen dekam sa nësa takensibirida gwera, "Em banakarekam okamanak de tim niban gwë gwëka?" Dawemsa de syal gwe-gwibin wenyaya kip, dawemsa sa golzimdi. Hwëna karekna men zen syal nei gwibik, zëbe mae hap hëndep kareksa sa golzimdi.

Alap han dikim zerumlae gwen hap de ol:

¹¹ Sap ëe mesë Bian de kirekam nësa klis gun hup dena insa tame uk, zen in zebë ëe, Bian mo nganak de syal ta gwen wenyaya, Alap han dikim zerumlae gwen hap de olkam titi la gwibirin. Alap Zëna mes asa anakan tame tabirki, "Zen tingare enho naban ano nganak syal ta gwenan." Zen in zebë hen ëdwam gwe-gwe'an- em de hen kirekam asa tame ta gwibin hip.

12 Ëe ënaka de boltere tabin hip homë ki kirekam emsa gubiridal. Hwëna ëe ama ëdwam gwe'an- em dikim asa isrip-sri gwibiridan hap. Dekam aha zi de asa tonsubiridankam em emaka enbirida'an, "Paulus wal bose wal zeban Alap mo nganak zëre mae mo bosesa de mam gun hup hom golësyal ta gwe'ara. Zen tingare enho naban syal ta gwenan."

13 Zep auhu-kama enlala zini sap sa asa anakan donsubirida gwer, "Zen in mamakkam syal ta gwenan." Hwëna ano mae mo enlalana anakan lwa'ara, "Ëe sap asa zi mo nwenak saherak altil gwer, sap ëe Alap en de asa sam gwesibirida gwen en habë syal ta gwe'an." Hwëna em de anakan asa tame tabinkim, "Zen mamakkam hom syal ta'an," kirekam aïris. Sap ëe emsa de mas gwibiridan habë syal ta gwe'an.

14 Sap ëe anakare enlala nabanë syal ta gwenan, "Kristus Zen nëbe mae hap de kwasang hap te-lidak sonnak tilki." Zep zëno kwasangkwasangna man ano mae mo enhonak syal gwe-gwenan. Sap ëe hen anakanë ëtaïblik, "Kristus Zen tingare Alap mo hlil irin wenya nëbe mae hap tilki, zep Alap mo nwenak Zen dekam nësa kitak golëjuweka."

15 Zen kirekam mae hap ki lwak: Nen dikim Zëbon en onak lowehe gwen hap, nëre mae mo auhu-kama enlala san dikim lowehe gwen srëm hap. Zep Kristus mo nëbe mae hap de tinni, hen Alap kim nëbe mae hap de dawem hap tin nikon ngaya taka, nen bap nen desa asyas makan enlala gwe-gwibin.

16 Zen in zep, ëe bëjënë angkam aha zisi auhu-kama enlalakam anakan enlala gwibiridan, "Zen mamna," ahaksa, "Zen betekna." Orep ëe hen Kristussu auhu-kama enlalakam ama kil lik, "Totore zi." Hwëna angkam ano mae mo enlalana mes wet gwesiki.

17 Sap men nara Kristus hun

zeraha-en gwenna, zen dekam sa jowera- san de aha zi, ësena! Dekam ëpba enhona mes tap gwe-blaka, hwëna angkam ëse enho naban zergwë'ara.

18 Zen kitak Alap ki kirekam nëbe mae hap syal gwe-gwibir-zimnira. Orep nen sap Alap mo jal zi mo kime lowehe gwëk, hwëna Kristus onakon zep nësa golëumlae gwëka. Zen in zep hen abe mae hap syala wei yul sonezimki- zëre han dikim zerumlae gwen hap de ol dawemna insa de gol halada gwen hap denaye.

19 Ëe in zebë ol dawemna ansa ol halada gwenan,

"Alap Kristussu zer soneka- Zen de te-lidak sonnak okamanak de zi hip tin hip, Alap Zën dikim kitak nësa golëumlae gwen hap. Kristus hun de zeraha-en gwenkam, dekam Alap man nëno mae mo karek-karekna eititi gwe-gwibirida."

Ëe kirekamë ol halada gwenan, sap Alap mes ki Zën dikim golëumlae gwen hap de syala insa abe mae hap wei yul sonezimki.

20 Zep ëe an Alap mo dam tasibinni- Kristus mo bosekam de emsa kwang guludan hap dena, Alap Zën de emsa kwang guludan makan. Ëe in zebë emsa Kristus mo bosekam etan anakan titi tabi'in, "Alap han em zerumlae gwen."

21 Sap Kristus Zen sap hom karek maena golka. Hwëna Alap man gwëblaka- san de kareksa de gol gwen zini kiye, nëno mae mo karek-karekna kim kitak wei yul soneblakaye. Hen zen mae hap ki Alap kirekam syal gwibirki: Nen dikim Kristus hun de zeraha-en gwenkam zëre mo nwenak ëdakastin hip.

6

1 Sap Alap asa kirekam golësyal ta gwe'ara, ëe in zebë emsa titi labi'in: Em hen angkam mese Alap mo kwasang-kwasangna enhonak eisbik, zep desa bahem asyas makan gwei gwibin.

2 Sap men kirekam Alap mo ëpba olak lwak, Zen nama emsa angkam anakan gubirida'ara, "Em kime juwen oranak lowehe gwek, emsa de kwasang gwibiridan hap de yaklanak kim hatak, dekam zebë eno mae mo abena sak. Yaklana inkam Ëe ama ngaya tabin hip hatak."*

Zen in zep, Alap mo kwasang gwibiridan hap de yaklanak angkam mes hatanan! Angkam an ëngaya gwen hap de yaklanake lowe he'an! Zep desa bahem asyas makan gwei gwibin.

Mae hap de ol: Ol dawemsa de gol halada gwen hap de wenya, ëe dawem naban karek nabanë itowe gwenan.

3 Ëe in zebë ëalp gwe-gwe'an, "Bap zen zini ano mae mo banakare karek mae nakon Alap de kwasang gwibiridan hap de ol ësena in san ang ta srëm gwen. Alap hap de syala an, bap zen zi mo nwenak karek gwen."

4 Zep banakare maesa de goltowen nakon, ëe ama zi de anakan asa tame tabin hip ëdwam gwe-gwe'an, "An eiwa Alap hon de syal ta gwen zi." Ëe zebë dawemkam tatem ëzauk gwenan- sap totoresas de kareksa goltowennak, hen sap zi de asa karek tabinnik, hen sap jalom ëk tihinak de lowe hennak.

5 Asa mes dangole gwibik hen bwinak yal nulne gwek. Ëre mae mo tawa tabin jal hap, dekam zep zini ëilman gwe-gwenan, hen asa tameran hap alp dasik gwibirin. Tahalha naban de lowehe gwenna hen mesë dawemkam eis gwibik- sap dohon-honkam de syal ta gwenna, yaklam, hen kam blal, hen usak naban de lowehe gwen naye. Hwëna ëe namaë deban tatem ëzauk gwenan.

6-7 Sap eiwa kirekamë karekna oltowe gwenan, hwëna ëe ama

ëdwam gwe-gwe'an- tïngare zi de anakan asa tame tabin hip,

"Zëno mae mo enlalana lalak enna. Hen ba maesa de tame gun hup dena zëno mae mo enlalana blala.

Hen zen jala tawa naka hom.

Hwëna zen enlala sae-sae naban aha zisi mas neibirida gwenan.

Hen tïngare enho naban aha zisi kwasang neibirida gwenan.

Alap mo Enhona hen man zëbe mae hap sosonna gol gwizimnira.

Hen Alap mo sosonna zëbon mae onak lwa gwenan.

Zep zëno mae mo tawa tabinni eiwa tanganna."

Eiwa, Alap mo nganak de syal tan zini, ëe zebë okamanak awe lowehe gwe'an- san de Kristus mo jana nabare zini kiye. Zep eijan hap de tïngare kire-kirena mensa Alap nëbe mae hap lop ta gwizimnira, desa ama kitak kap la gwenan.*

8 Ëe kire enlala nabanë Yesussu babu ë gweblanan. Zen zep hwëna ahakon asa husus neibirida gwenan, hwëna ahakon hen man asa sam neisibirida gwenan. Ahakon ano mae mo bosena man mam nul gwenan, hen ahakon man asa lamang da gwibirin. Ëe sap eiwa de enna kimë tawa la gwibirin, hwëna ahakon man asa nenbirida gwenan, "Zen in nësa de yasik ta gwibin hip de zi."

9 Zen sap ki asa tame da gwibirin, hwëna man asa neibirida gwenan- san de tame tabin srëmna kiye. Asa man kil di gwibirin, "Mes juwek," hwëna sap namaë lowe he'an. Asa man ki sap dangole gwibirin, hwëna ëe homë kim juwe'an.

10 Enlala dowe hananna ki sap abon mae hata gwenda, hwëna nabakamë etan ëisrip-sri gwe-gwenan. Ëe sap te-ala srëmkamë lowehe gwenan, hwëna hëndep de te-alana ëyë kae ë gwebla-zim'in. Okamanak sap ano mae mo kire-kirena hom, hwëna Alap mo irik gïnnik dep de kire-kirena, zen ëyë kitak bi ëblan da'an.

* 6:2 6:2 Yes. 49:8 * 6:6-7 6:6-7 Ef. 6:10-18; 1Tes. 5:8

11 Korintusk de aya-wal oso-wal, òe mesè kirekam damnak ebe mae hap de kwasang hap ère mae mo enhona èrtreizimk.

12 Èe homè olzausu'un- emsa de kwasang gwibirida gwen naye. Hwèna em mes yabe olzausuk- asa de kwasang gwibirida gwenna.

13 Zep èe ama angkam emsa gubirida'an- ère mo walassa de gubiridan makan: Eno mae mo abe mae hap de kwasangna emki hen esek gulsen.

Kristen gwen srèm zi niban de golèsiri gwe-gwen srèm hap de ol:

14 Èe ama emsa gubirida'an: ÈKristen gwen srèm zi niban bahem golèsiri gwe-gwen. Zen mae habè ki kirekam emsa gubiridal: Sap karek gol gwen zi niban bëjen dawem gol gwen zi niban aha-ere enlalakam apdekam syal tan. Hen kawesinnik de lowehe gwen zi niban bëjen ngatannak de lowehe gwen zi niban èaha-en gwen.

15 Kristus hom dowal mo kigì naban olsa aha-en ul gwenda. Zep hen kirekam, èKristen gwen zini bëjen èKristen gwen srèm zi niban èsiri gwen.

16 Boton alap yang tasibinni hom eiwa de Zini Alap mo golak kang nul gwenan. Nèno mae mo lowe henna hen kirekam: Sap nen kitak san de Ngaya Zini Alap hap de gol- men kirekam Zèna gubiridakake:

“Èe asa zèno mae mo ngìrinnik gwè gwer,

hen Èe asa desa golèlowehe gwer.

Zen Asa en sa boklena kom noso gweblal,

hen Èe asa desa bi gwibiridal.”*

17 Zen zep nèsa hen gubirida'ara, “Enlala kawesin zi mo ngìrin nikon emki wet so gwen.

Emki desa langa tasibin.

Kun nabare kire-kirena bahem mae towanbin.

Kirekame lowehe gwe'ak, ki dekam Èe asa etan emsa golèlowehe gwer.”*

18 “Em ère mo walas hap esa èjower. Hen ‘Bian’kam esa Asa en gweblal. Soson Zini Alap Ènè ki emsa gubirida'an.”*

7

1 Zen in zep, aya-wal oso-wal, sap Alap kirekam nèsa gu-gubiridaka, zen zep nère mae mo enlala naban enho naban tingare karek-karek nakon nen lalak ta gwibin. Enho lalak enkam nen lowehe gwen, hen Alapsa bap nen asyas makan enlala gwe-gweblan.

Paulus kim Korintusk de Kristen zini isrip-sri gwibiridakake:

2 Hwèna aya-wal oso-wal, ere mae mo abe mae hap de kwasang-kwasangna emki esek gulsen. San kiè ebon mae onak zini karek lak? Ahaksa aha maena san kiè yasik lak? Hen san kiè emsa te-ala mae hap aberbe la gwibik?

3 Èe kirekam em dikim èsaher gwen hap homè ki ale gulzimanakan dikim èenlala gwen hap, “Eiwa, diki te-alasa emaka olzimk.” Sap men kirekamè emsa gubiridal, èe sèrkamè emsa kwasang eibirida gwenan. Hèndep èe de juwen maekam ahaksa nama de lowehe gwenkam, èe molyè emsa de kwasang gwibirida gwenna olzausuk.

4 Èe, Paulus, mesè emsa dawemkam anakan taiblibiridak, “Èe de zèno mae mo lowe hensa de oto gulsun hup gubiridankam, zen molya asa jal nèblak.” Hen èe namaè emsa anakan sam gwe-sibirida gwenan, “Zen ano walas dawem-dawemna.” Èe sap ère mo wal bose walya ban kareksaè zigoltowe gwenan. Hwèna emsa de enlala gwibiridankam, èe dekam

* 6:16 6:16 Im. 26:11-12; Yer. 32:38; Yeh. 37:26-27; 1Kor. 3:16-17 * 6:17 6:17 Yes. 52:11; Yeh. 20:34,41 * 6:18 6:18 2Sam. 7:8,14; 1Taw. 17:13; Yes. 43:6; Yer. 31:9

zebë enlala nakon ësëwehe gwenan, hen ano mae mo isrip-srina dekam tangan zep taman kinî gwenan.

⁵ Hwëna eiwa, ëe kimë Makedonia mo langnak yaing gwëk, dekam ano mae mo enhona hom sëwe heka. Sap ëe karekna da-en homë zë oltowe gwe'ak. Dekam zëwe de zini man asa husus neibirida gwe'ak, hen man asa karek da gwibik. Hen deban ebon mae onakore ola homë ësane gwe'ak, zebë enlala nakon ësëwehe srëm gwëk.

⁶ Hwëna enlala dowe hanan zi hip Alap enho tatetesa zer gwizimnira. Zep Titus Bak kim ebon mae onakon abon mae onak hata zaka, dekam zep ano mae mo enlalana sëwe hezimki.

⁷ Zëno hatazan en hap homë ëtatete gwëk, hwëna zen kim anakan aïsîl gwe zakake, "Korintusk de zini ano enhona dawemkam ap së da soneblak, hen zen dawemkam ëdwam gwe-gwe'an-Paulussu de etan zertowen hapye. Zen man angkam damnak anakan ëkira-kla gwe-gwenan, 'Eiwa, ëe ama Paulussu kirekam karek lak.' Hwëna zen angkam eno tahasa de trî so gweblan hap ëdwam gwe-gwe'an." Ëe kimë kirekam Titus hon emsa salbiridak, ama tangan sërkam isrip-sri gwëk.

⁸⁻⁹ Ëe nonol ama sap enlala gwe-gwe'ak, "Ëe ba habë zëno mae mo kareksa de dri yulzimdin hip de suratna insa ale gul sonezimk? Zen sa hwëna enlala nik ëdowe hanal." Sap eiwa kirekamë enlala gwe-gwe'ak, hwëna angkam mesë dam gulsul, "Ëe ama sam gwesik- kirekam de emsa jal gwibiridankamye." Ëe eno mae mo enlala dowe hananna in kon homë sam gwesî'in. Hwëna ena dekone ëhale'an. Hen angkam enlala dowe hananna in mes tap gwizimdi. Zep kirekam aïris. Ëe homë kim emsa karek tabik. Alap Zen kirekam nësa dwam gwibirida gwenda, "Zen dikire zëre mae mo enlala dowe hanan nakon ëhale gwëk."

¹⁰ Sap Alap mo dwam gwibin sin de enlala nik dowe hanankam, zen dekam zebe ëhale gwenan, hëndep zep esa ëngaya gwer. Desa bëjen gubin, "Zen karekna." Hwëna Alapsa de tame tan srëm zini zëre mae mo karek-karek gol gwen nakon sap ki enlalana ëdowe hana gwenan, hwëna dekon hom ëhale gwenan. Hwëna dekam nama juwen ora san ang ta tine gwenan. Zep auhu-kama enlalakam de dowe hananna, zen eiwa karekna.

¹¹ Em zebe ësam gwesik, sap em Alap mo dwam gwibin sine enlalana ëdowe hanak, hen zebe ëhalek. Em zebe ewet gwesin hip ëdwam gwëk.

Hen men zen ëkarek gwëk, em zebe desa anakan jal eibiridak, "Em ba habe Paulussu kirekam karek lak?"

Em zebe Alap mo jala aïribik.

Hen dekam zebe ëdwam gwëk- ëe de etan emsa amjanbin hipye.

Hen zebe ano titi tabin sin de ang tan hap ësyal-syal gwëk.

Dekam zebe anakan ola aha-en uk, "Men zen ëkarek gwëk, kirekam esa halen labir."

Dekam zebe dawemkam tingare zi mo nwenak anakan oltrëk, "Ëe homë karek gol gwen zi niban ola aha-en uk- dekam de karekna insa syal gwibin hipye."

¹² Zep suratna insaë nonol ale gulzimk, zen anakan dikim emsa klis gun hup hom, "Zen karek gwëka," ahaksa, "Zini in desa karek taka." Hwëna ëe anakare enlala nabanë ale gulzimk, "Zen kim de ano suratnak de ola an san Alap mo nwe kara gwennak ang ta'ak, dekam sa zën anakan dam nulsul, 'Nen eiwa Paulus mae mo ol san de ang tan hap ema tangan ësyal-syal gwe'an.' "

¹³ Sap em ano ol san kirekame ang tak, ano mae mo emsa de ngalap gwibiridanna dekam zebë ësëwehek. Sap em dekam Titus Bak mo enlalana mese së la soneblak. Zep zen kim ebon mae onakon hata zaka, isrip-sri naban zep ebe mae

hap dena asa aïsïl gwibirida zaka. Ëe dekam zebë hen mamkam eisrip-sri gwek.

¹⁴ In kim Titus emsa amjanbir srëm gwe'anaka, ëe ama dekam hamal hap gubluk, "Korintusk de Kristen zini in dawem- dawemna. Zen sa dawemkam eno titi tabin sin ang tal." Zep angkam ëe homë saher gwebla'an. Sap men kirekamë ebe mae hap dena Titussu gubluk, hëndep em kire enkame ëblak. Ena tawana: Ebon mae onak kimë gwë gwek, ëe homë emsa boton ta gwibik. Zep hen Titussu homë boton tak- ebe mae hap denaye.

¹⁵ Titus mo kwasangna angkam ebe mae hap dena mam tanganna, sap zen anakan emsa enlala gwibirida gwe'ara, "Zen dawem enkam asa blikip gwesiblin naban neirink, hen zen kitak ano ol san dawemkam ang ta gwek."

¹⁶ Zep angkam ëe ama tangan emsa sam gwesibirida'an, sap mes tangan dam gwesil: Em in taïlbiridan tanganna.

8

Yerusalemk de Kristen zi tahalhasa de te-alakam mas gwibiridan hap de ol:

¹ Angkam aya-wal oso-wal, ëe ama ëdwam gwe'an em de hen ansa ëtawa gwen hap: Alap zëre mo kwasang-kwasangna mamkam propinsi Makedoniak de Kristen zi mo enhonak ing gul sonezimki,

² zep hëndep zëno mae mo enhonak isrip-srina sërkam tangan mam gwek. In zep zen te-alana beya tangankam tagam dak- dekam de Yerusalemk de Kristen zi tahalhasa mas gwibiridan hapye. Hwëna zen hen sap karekna mamkam noltowe gwe'an hen tahalha tanganna.

³ Ëe eiwa denakë emsa gwibirida'an: Zen kim Bian onakore kwasang-kwasang hap beya tangankam tagam dak, zëna hwëna man tangan etan ëtahalha gwek. Ëe

sap homë desa enbiridak- te-alasa de zen hen zer sonezimdin hipye.

⁴ Hwëna zën asa nenbirida gwek, "Ëe hen ama Yerusalemk de nëre mae mo Kristen aya-wal oso-walsya de mas gwibiridan hap ëdwam gwe'an- men kirekam hen aha langnak de zini ëkalang gwe'anke."

⁵ Hwëna zen kim kire hap ola aha- en nuk, zen ein hom kirekam syal neibik. Zen nonol zëre mae mo lowe hensa kitak Bian hap anakan yaing nilblik, "Bian, ëre mae mo lowe henna kitak eno tahanakë onne se'an, sap ëe ama Yerusalemk de tahalha zisi mas gwibiridan hap ëdwam gwe'an." Hen dekam zep asa nenbiridak, "Men kirekame asa enbirida'ak, ëe asa ki desan ang tal." Zen kitak Alap mo dwam gwibin sin ki lwak. Hëndep ëe hen ama tangan lenggwanbiridak.

⁶ Ëe in zebë hen Titussu enblak- dekam de Korintusk de zini emsa etan amjanbin hipye, Yerusalemk de Kristen zi tahalhasa de kwasang gwibiridan hap de syala insa ekakim su kul sonek, ëe de ahakore naban golëyaing gwezan srëmnak. Sap Titus zen zen nonol kire hap de syal hap emsa titi tabirki. Zen zep sam gwesii'ira- zen de etan kire hap de syala insa eban mae zisul sonen hapye.

⁷ Sap em eiwa mese tangan dawemkam ëKristen gwek:

Em sërkam tangane Biansa laïbli gwebla'an.

Hen eno mae mo ol toranna sosen tanganna.

Hen eno mae mo tame gunnu mes tangan esek gweser.

Alap hap de syalsa de gon hap em hen syal-syal tanganna.

Hen em sërcame asa kwasang eibirida gwenan.

Sap em mese kirekam tangan ësam gwesik, zep angkam emki hen tahalha zisi de kwasang gwibirida gwen hap de syalak ësyal-syal gwen.

⁸ Kirekam insa ep ale gulzink, ëe anakan homë kim emsa tik-tik

tabi'in, "Em hen te-alana olzimk." Hwëna ëe ama kim emsa anakan akasibirida'an, "San ha zen hen sa Makedoniak de Kristen zi mo kim tingare enho naban tahalha zisi hen kwasang neibiridal?"

⁹ Sap em mese Bian Yesus mo kwasang-kwasangna tame uk: Zen sap nonol ngatan zi mo langnak tahalha srëmkam gwë gwëka. Hwëna nëbe mae hap de kwasang hap desa kitak hli yulku- dekam de tahalha zi mo kim awe gwë gwen hap. Zen mae hap ki kirekam gwëka: Nen dikim hen lamkam ngatan zi mo langnak zëre mo kim sowehen tangankam lowehe gwen hap.

¹⁰ Zep ëe ama ëre mo enlalasa ebe mae hap zer sonezim'in: Dawemna, mensa nonol tahunkam ena kon eisibir hanak, emki sul sonen. Tahalha zisi de mas gwibiridan hap de ëkalang gwenkam, eme ënonol gwëk, hen te-alana nonol eme sap tagam lak.

¹¹ Zep emki ere mae mo ëkalang gwenna insa sul sonen. Sap em ema ëkalang gwen hap ësyal-syal gwëk, zen in zep emki angkam de sul sonen hap ëalp gwen. Men kire enkam Alap ebe mae hap gol gwizim'ira, zëno hlik naka emki ing gul gwen- men kire enkam ena ëdwam gwe'anke.

¹² Sap em de mas gwibiridan hap ëhohle gwenkam, Alap sa emsa anakan sam gwesibiridala, "Zen man mas gwibiridan hap ëdwam gwe'an." Betekkam de ing gun zisi Zen sa anakan tawa gwibiridala, "Zini an sap man beyakam de ing gun hup dwam gwëka, hwëna basa dep?" Sap zi de tahalha gwenna, Alap molya desa enlala gwëblaka, "Zen maka mamkam ing gulu."

¹³ Eë homë anakan dwam gwe'an, "Korintusk de zini dikire ëtahalha gwëk. Yerusalemk de zini tahalha srëmkam de lowehëk." Hwëna ëe hwë-hwëkam de enaka mas gwibirida gwen habë dwam gwe'an.

¹⁴ Sap angkam em tahalha srëmkame lowehe gwe'an, zep em emaka mas eibirida'an. Hwëna aha tahunkam de zen tahalha srëmkam lowe he'ak, zen maka hwëna emsa mas neibirida'an- em de hwëna ëtahalha gwenkamye. Zep em kirekam esa enaka mas eibirida gwer.

¹⁵ Zep men kirekam Israel Bak mo zi ausu nakore zini orep tahalha srëmkam lowehe gwëk, em tingare Kristen zini kirekam esa lowehe gwer. Sap Alap mo olak anakan lwak:

"Men zen tembanena beyakam tagal dak, hwëna hyanak hom mosrona zalta dep yal dak. Hen men zen betekkam tagal dak, hwëna hyanak hom ëtahalha gwëk."*

Titus de wal bose dare zeban telalasa zitagam tan hap de ol:

¹⁶ Eë ama Alap hap dawemsa gol gwëbla'an, sap Zen mes ëre mo enho makare enlalana Titus Bak hap hen ing ta soneblaka. Zen zep ëre mo kim syal-syal gwe'ara- emsa de mas gwibirida gwen hapye.

¹⁷ Zep ëe kimë desa emsa de amjanbin hip lakensiblik, zen man tangan sam gwesikë. Sap zëna hen mes takensiblin srëmnak emsa de etan amjanbin hip kalang gwe'anaka.

¹⁸ Titus hun nëre mae mo aha oso naban sa asa ebon mae osan dep angirbirida zala. Zen hen dawemkam Kristus hup de ol dawemna tonbirida gwenda, zep desa hen man tingare jematna sam neisik gwëblanan.

¹⁹ Hen awe de jemat-jematna mes zini insa dam dasik- zen de hen asa ang gwibiridan hap, te-alana insa dikim Yerusalemk dawemkam zerhatan hap. Sap kwasang hap de syala an, zen mae habe syal ta'an: Bian mo bose dikim mam gwen hap, hen dekam de tingare zi nësa anakan tame tabin hip, "Zëwe de Kristen zini in tahalha zisi de mas gwibirida gwen hap syal-syal tanganna."

* 8:15 8:15 Kel. 16:18

²⁰ Zep zini Yerusalem san dep beya tolkam sa ang tal- dekam de tingan asa anakan taiblibiridan hap, “Zen eiwa kitak sa neirzim. Zëna molya mae nulink.”

²¹ Sap ano mae mo dwam gwenna, dam-dam enkam de syal tan hap-sap zi mo nwenak hen sap Alap mo nwenak.

²² Zi darena in hon ëe asa hen zini ahana ër soner. Ëe mesë zini insa hen dawemkam akasik gwe-blak, zebë tame la'an, “Zen hen Alap mo syal hap syal-syal tanganna.” Zëna man tangan sam gwesiki- desa de hen ang gwen hap dam tasinkimye. Sap zen man emsa taiblibirida'ara, “Korintusk de Kristen zini zen dawem-dawemna.”

²³ Titus zen ano syal bose. Ëe apdekamë deban emsa syal eibirida'an. Aha zi darena in, zen awe de jemat-jemat mo dam sosun zi dare. Zëre nik mo ën nakon tingan mes tame nosok, “Zen dawemkam Kristus mo bose hap syal ë gwenda.”

²⁴ Zen in zep, amki hen zëbe nikip kwasang-kwasangna oltrei gwizimk. Dekam sa hen awe de jemat-jematna zëbon nebon onakon anakan ësane gwer, “Men kirekam Paulus tonbirida gweka, Korintusk de Kristen zini, zen eiwa dawem-dawem tanganna.”

9

Mae hap de ol: Alap man isrip-sri naban de zëbe hap ba maesa gol gweblan zisi kwasang gwibirida gwenda.

¹ Em orep mese ësyal-syal gwek-Yerusalemk de Kristen zisi de talakam mas gwibiridan hapye. Zep suratnak awe ëe ba hap de etan ebe mae hap ola blal gulzimdin hip?

² Em dwan mes em-am ësyal-syal gwek. Zep ëe mesë eno mae mo bosena propinsi Makedoniak awe anakan mam gul gwizimk, “Propinsi Akayak de zini, ëna Korintusk, zen orep mes nonol tahunkam tahalha zisi de mas gwibiridan hap ëhohle

gwek.” Em insa kirekam ësyal-syal gwek, aha jemat-jematna dekam zep hen ëdwam gwek- enlala syal-syalkam de hen mas gwibiridan hapye.

³ Zen zep asa nonol zi danaharena insa asa de ebon mae osan ngeirblizan hap lup gul soner-anakare enlala naban, “Ëe mesë aha zisi anakan gubirida gwek, ‘Zen mes tangan ëhohle gwek.’ Hwëna ëe de deban mae golëyaing gwe zankam, babë ëhohle gwen srëmnak emsa hlauludazan.”

⁴ Sap ëe de Makedonia kore zi niban ëhohle gwen srëmnak emsa hlauluda zankam, ki hwëna ëe sërkam asa anakare hap saher gwer, “Ëe ba habë waba hap kirekam boltere ta gwibik?” Ena dekam hen esa ësaher gwer.

⁵ Zen in zebë enlala gwek- zi danaharena in de asa ngeirbiridazan hapye, em dikim dawem enkam te- alasa tagal ta gun hup, mensa ena ëgu-guk gwekke. Sap ëe de hamal ta gunnuk emsa hlauluda zankam aïris tangan. Dekam isrip-sri naban esa te-ala yawala insa eirzim. Hwëna hamal tan srëmnak de ëe yaing gwe zankam, ki sa hwëna nwe-mase gwer, “Zen ein tagam dazim'in.”

⁶ Gulk sun de ol blaoranna ansa bahem eititi gwibin:

“Betekkam de eiyas tanna, dekam betekkam esa hen eini tara. Beyakam de eiyas tanna, dekam beyakam esa tara.”*

⁷ Zep dawemna, diki ere mae mo enhonak em anakan dam gulsuk gwen, “Ëe ki en asa golzim.” Embwan gwibin niban bahem gol gwizimdin. Hen anakare enlala naban bahem, “Ëe an einë golzim'in.” Diki isrip-sri naban emki gol gwizimdin. Sap Alap isrip-sri naban de gol gwizimdin zisi man kwasang gwibirida gwenda.

⁸ Sap Alap mo sosonna ki- dekam de etan ebe mae hap tigare hë'ho gwibin nika gol gwizimdin hip denaye. Zen dekam tangan esa enlala

* 9:6 9:6 Ams. 11:24

beya gwen srëmkam kae-kaena esek ulse gwer.

⁹ Sap Alap mo olak man lwak,

“Alap tahalha zi hip totoresa gol gwizimnira hen kae gwe-gwibir-zimnira-

men kirekam zini gandum danna men-san an-sankam hling disik gwenanke.

Alap mo syal dawemna in hëndep denaban sa lwa gwer.” *

¹⁰ Zep hen kirekam, kae-kae gwen hap de syala in, zen obwaga dansa de eiyas gin makan lwa'an. Alap men Zen desa de eiyas gin hip gol gwizimnira, hëndep tarankam tembanena hen sowe henkam gol gwizimnira, zep eiwa eno mae mo kae-kae gwen hap de syala insa dan nik de mamkam tèn makan sa ep beya gul gwizimdi.

¹¹ Alap dekam sa ebe mae hap mamkam hë'ho gwibin nika gol gwizimdi, hëndep zep esa beyakam kae eibirida gwer. Hen desa de aha zi hlaunkum, dekam beya nik sa Alap hap dawemna nol gweblal.

¹² Sap em insa Kristen bose uk mo tahalhana hla kulzim'in, hwëna dekam beya nik sa hen Alap hap dawemna nol gweblal.

¹³ Sap em kime mas eibirida'ak, dekam sa emsa anakan dam da-sibir, “Eiwa, Korintusk de zini in zëno mae mo eini mes bil gwëk.” Dekam Yerusalemk de wenya Alap mo bosena sa anakan teip nulsuk gweblal, “Hë'ho Bian, zini in ëk enkam hom Kristus hup de ol dawem san ang tak. Hwëna zen eiwa i-san i-san nei gwibirin, hëndep zep dawemkam ano mae mo tahalhana ap hla nulzimk- aha zisi men kirekam hen mas neibirida gwenanke.”

* **9:9 9:9** Paulus Mzm. 112:9 nakore naka awe ale gulku. Paulus mo enlalana ayatnak awe, san ha Alap de kirekam mas gwibiridan hap dena? San ha zi bose zik de mas gwibiridan hap dena? Zep Paulus mo enlalana ayatnak awe anakan hen maka li nul sonek, “Kae-kae zini zen tahalha zi hip totoresa nol gwizimnin hen kae neibirida gwenan- men kirekam zini gandum danna men-san an-sankam hling disik gwenanke. Hwëna Alap sa zëno mae mo syal dawemna insa hëndep denaban enlala gwe-gwibiri.”

¹⁴ Zen dekam sa hen Alapsa kwasang naban ebe mae hap anakan abe da gwer, “Eiwa, Alap, Em ema tangan ere mo kwasang-kwasangna zëbe mae hap mam gulzimki. Zep Emki hë'ho gwibin nika zëbe mae hap etan gol gwizimdin.”

¹⁵ Hen dikire tingan Alap mo bosena teip nulsuk gweblak, sap Zen mes hëndep de ëngaya gwen hap dena nëbe mae hap totoresa golzimki. Zep eiwa wehasa hom-Zëbon onakore hë'ho gwibin niye!

10

Paulus kim zëre mo syala Korintusk de zi mo nwenak eiwa gulkuke:

¹ Ëe, Paulus, ama emsa titi tabi'in: Asa de husus gweblan zi sin bahem ang ta gwen. Ëe ama sak: Ebon mae onakon ahakon man asa nenblak, “Paulus in Korintusk awe de gwënkam, zen ol drak-drakkam hom nësa tonbirida gwëka. Hwëna langa nakon de suratkam nësa tawa tabinkim, dekam en ol drak-drakkam nësa gu sonebirida gwënda.” Zen in zebë angkam Kristus onakore enlala sae-saekam hen kwasang-kwasangkam

² emsa gu sonebirida'an: Men zen kirekam asa nenblak, bahem desa salbirida gwen. Ki eiwa asa ol drak-drakkam emsa tonbiridazalmen kirekamë suratnak ale gul gwenanke. Hen zen dekam esa asa tame lal, “Paulus, hare eiwa, jal-jala kake.” Zen man hen asa nenblak, “Paulus auhu-kama enlala naban syal gwe-gwënda.”

³ Sap eiwa, nen auhu-kamanake lowehe gwenan. Nen zebe dowal mo kigi naban ëreija gwe'an. Hwëna ëe auhu-kama zi mo enlala blalkam homë zereija'an.

⁴ Sap nen okamanak awe Kristus mo jana nabare zi mo kime

lowehe gwenan. Hen nëno mae mo janana, auhu-kamanak de janasa hom. Nëno mae mo janana, zen ngatan zi mo lang nakorena. Nen dekame dowal mo kigi mo iti ëna timbwas lablanda gwenan, hen yasik tabin hip de zi mo tawa tabinsi dekame timbwas ul gwenan.

⁵ Sap yasik tabin zini in bolteboltekam anakare olkam aha zisi tru-tru nulbirida gwenan, "Kristen zini in hon bahem ang ta gwen. Ki em molye Alapsa tame lak." Hwëna zëno mae mo tawa tabinsi nen ema timbwas ul gwizimnin- ngatan zi mo lang nakore janana inkam. Hen zini men zen botonkam de tawa tabin sin ang ta gwe'an, nen ema etan desa Kristus osan dep lahyohal gwe'an.

⁶ Hen em kime Kristus onak dawemkam ëtal gwesi'ik, hwëna dekon men zen etan aha ora san ang ta'ak, ëe asa desa Alap mo Enho nakore sasonkam karek tabirzir.

⁷ Zi de ebon mae onak zënaka anakan kira tanna, "Ëe an hen Paulus makarena- Kristus mo zer sonenna, emsa de hen tawa ta gwibin hip," zep zen dwan hen maka zëre mo kirekam de gun nukon anakan dam gulsuku, "Paulus hen Kristus mo zer sonen nakake, zep ëe babë husus gweblan olsa gubiridan."

⁸ Ëe eiwa ama sap etan-etankam ënaka gu gwebla'an, "Bian mes asa zëre mo nganak de syal gwe-gwen hap zer soneka," hwëna ëe molyë ëre mo kirekam de ola insa saher gwibik. Sap asa Bian eno mae mo ei nika de timbwas gulzimdin hip hom zer soneka. Hwëna eno mae mo eisi dikim mam gulzimdin hip zer soneka.

⁹ Hwëna asa anakan bahem enlala gwe-gweblan, "Paulus zëre mo surat-suratkam asa airin-airin ta gwibi'ira."

¹⁰ Sap ahakon man asa nen gweblanan, "Paulus mo surat-suratna sasonna hen ol drak-drakkam dena. Hwëna zën de hatankam zëno ola sason naka hom. Dekam hom

mae ol drak-drakkam nësa tonbirida gwenda."

¹¹ Men zen kirekam asa enlala në gwebla'an, ëe angkam bira! Zen aen de hata zankam sa asa tame dal, "Hare eiwa, Paulus ol drak-drakkam de jalse gwibiridanna hen tawa nakake- suratnak men kirekam hen ale gul gwendaye."

¹² Eiwa, men zen anakan zënaka boltere da gwibirin, "Ëe hen Paulus kiye," hwëna ëe homë ki dwam gwe'an- zëno mae mo kim de anakan ënaka boltere tan hap, "Ëe an hen deban mae apdenak." Zen man tim nul gwe'an, "Sërkam de zënaka boltere tan zini, zen eiwa mamna." Zen zep zëre mae mo hliknak de biti gwen en wenyaka anakan boltere da gwibi'in, "Em an ëre makarena." Hwëna kirekam de ëgwë gwen zini, zen enlala joblo-topna.

¹³ Hwëna men zen abe hap dakastilbli'an- desa de boltere gul gwen hap, ëe desa en asa boltere gul gwer: Ngana men desa Alap Zëna abe hap zerblaka, desa en asa boltere ta gwer. Hen desa kimë syal gweblak, ëe dekam zebë ebon mae onak ol dawemna golhatak. Hwëna aha mo ngana bëjënë bola-bolakam anakan gublun, "Zen ano nga."

¹⁴ Ëe de nonol ebon mae onak ol dawemna insa golhatazan srëmkam, ki eiwa ëe botonkam amaka ënaka boltere ta'an. Hwëna ëe mesë nonol golhatazak.

¹⁵ Zep ëe amaka ëre mo syal gweblan nganak denaka boltere tabi'in. Hwëna aha zi mo nganak de weny molyë. Hen ëe ama emsa dwam gwibirida'an: Eno mae mo ei nik de mam gwe'ak, zen dekam sa aha zi emsa de kirekam hlauluda gwenkam beyakam ëKristen gwe song gwer.

¹⁶ Kirekam de lwankam ëe amaka aha lang san dep etan ayang gu'undesan de etan ol dawemna insa eiyas gil song gwen hap. Dekam aha zi bëjen bola-bolakam asa anakan gublun, "Zen ano syal gweblan ngasa al ta'ara."

17 Sap nère mae mo syalsa de enlala gwibinni, zen diki men kirekam Alap mo olak lwak, kirekam de enlala gwibin. Sap zèwe a kirekam mo lwakye,

“Zini diki Bian ensa zen boltere ta gwen. Zënaka bap zen.”*

18 Zep zi de zënaka boltere tanna, kirekam hom dakasti'in. Diki Bian Zen gublun, “Em dawemkame ère mo nganak syal gweka,” zen ki mes eiwa sam gwesili.

11

Paulus kim enlala joblo-top zi mo kim botonkam zënaka boltere takake:

1 Bahem asa jal gweblan, sap èe انگام enlala joblo-top makanè bolte-bolte zi mo kim ale gulzim'in-men kirekam emsa de yasik tabin hip de zini zënaka boltere da gwibirinke.

2 Sap men kirekam Alap jematna emsa zère en hap inik gwibi'ira, èe hen kirekamè emsa anakan dwam gwibirida'an, “Zen dikire Bian en hon lowehe gwék.” Zep èe an men kiye- wenam tol mo bianna, zen de wenam tola insa dawem tangankam anakan kara gul gwenna, “Bap zen aha zisi ang gweblan- zi hip de gon srëmnakye.” Èe hen kirekamè emsa kara ta gwibi'in, sap èe mesè Kristussu anakan gu-gubluk, “Jematna an Ere en hap dena.”

3 Hwëna èe ama emsa anakan ngalap gwibirida'an, “Kristus onak de ètal gwesin nikon etan bap zen sap de ora san ègwahan- men kirekam Hawa wanyana in mo ol dèrek san ang gwekye.”

4 Sap yasik tabin hip de zi de ebon mae onak yaing gwenkam, em bëjen em desa jalse gwibiridan. Zen sap maka emsa anakan tawa dabi'in, “Yesus osan dep dena emki srën ang tan. Hen Alap mo Enho hap dena emki hen srën ang tan. Aha ol dawem san emki ang tan.” Kirekam de yasik ta gwibin zisi, em

hwëna aha-ere enlalakame dokwak la gwibirin. Zep sap esa ano wehakam de ènaka boltere tan ola ansa hen èsane gwer.

5 Yasik tabin hip de zini in man zënaka tim di gwibirin, “Èe an teipsin-teipsin tanganna- Paulus onakonye.” Hwëna kirekam hom.

6 Eiwa, èe homè tewesik-dawemkam de zi tranak tonbiridan hap denaye. Hwëna men kirekamè Timotius hun oltreizim tine gwék, Alapsa de tame tan hap dena, èe mesè te keisik.

7 Èe kimè Alap onakore ol dawemkam emsa tawa ta gwibik, èe homè mae emsa gubirida gwék, “Ap te-alana ol gweblak, sap èe ama emsa tawa ta gwibi'in.” Èe hwëna dekam ama gwè gwék- san de ebon mae de babu gwen zi, anakare enlala naban, “Èe sap asa zèno mae mo nwenak otdenak gwër. Zen sap sa èteipsil.” Hwëna èe insa kirekam gwék, san ha dekam eno mae mo nwenak ama karek gwék? San ha homè?

8 Ano tahalhana dekam aha lang nakore jemat-jemat ap hla nul gweblak- te-alasa de golblankamye. San ha esa asa enblal?- “Em ema karek gweka- asa de totoresana tawa ta gwibinkimye, aha lang nakore jemat-jemat mo te-alakamye.”

9 Èe kimè ebon mae de gwënnak tahalha gwék, èe homè emsa dohonhon ta gwibik- te-ala hap de emsa abe tabinkimye. Hwëna Makedonia kore aya-wal oso-walya kim zè yaing gwe-gwezak, zen zep ano tahalhana ap hla nul gweblak. Hen انگام mae èe molyè wet gwesik. Men kirekamè emsa abe tabir srëm gwék, zen kire enkam asa ebon mae syal gwe-gwer.

10 Eiwa de Zini Kristus mo nwenakè emsa gubirida'an: Èe kire enkam asa emsa gweibirida gwer, hëndep Akayak de zini em lamkam mae asa molye anakan en gweblak, “Paulus hup èe kiè te-alana olblak.”

* 10:17 10:17 Yer. 9:24

11 Ëe kimë emsa kirekam gweibirida gwenan, san ha dekam homë emsa kwasang gwibirida gwenan? Kirekam bëjen. Alap Zëna tawana: Ëe kirekam ebe mae hap de kwasang habë ki gwë gwenan!

12 Zep ëe kire enkam asa emsa gweibirida gwer- mae hap: Zini men zen zënaka anakan bolte-bolte da gwibirin, "Ëe an hen Paulus mo kimë hatazak- emsa de syal gwibin hip," zëno mae mo ëksa dikim kyang tasibir-zimdin hip. Sap zen te-ala en hap syal ta gwenan.

13 Sap kirekam de zini, zen Kristus mo dam tasibin zisi hom. Zen yasik tabin hip de zi. Zen zep bolte-boltekam ëboton gwe-gwenan, "Ëe an Kristus mo zer sonen zi."

14-15 Zen mae hap kirekam ëgwë gwenan: Sap zëno mae mo teipsinni, dowal mo kigi, zen hen kirekam bolte-bolte gwe-gwenda, "Ëe an hen Alap mo dam taha nakore zi- Alap onakore ngatan naban." Zep hen kirekam- dowal mo kigi mo zer sonen zi niye. Nen ba hap de desa tenggwanbirida gwen hap?- zen insa anakan zënaka boltere da gwibirinye, "Ëe an Kristus mo zer sonenna." Hwëna aunwa hap denak Alap sa zëbe mae hap zëre mae mo syal eini golzimdi.

16 In zebë etan emsa gubirida'an: Bahem asa anakan enlala gwe-blankam, "Paulus zen suratkam zënaka boltere taka. Zëna hen enlala joblo-topna." Hwëna em de eiwa kirekam asa enlala gweblankam, ki emki dawemkam asa zer irin. Sap enlala joblo-top zini, em ema dawemkam lup ulin gwenan. Zep asa hen kirekam. Sap ëe angkam ëre mo gwënsaë boltere gu'un.

17 Zep angkam ëe enlala joblo-top zi mo kimë ep ale gulzim'in. Sap diki Kristus mo dam tasin zini bëjen kirekam zënaka boltere tan.

18 Ebon mae onak, zini beyana auhu-kama zi mo kim de zënaka boltere ta gwibinni. Zep ëe anik hen zëno mae mo kim ënaka boltere tak.

19 Em ëe makare enlala joblo-top zisi dawemkame lup ulin gwenan, sap ena enlala blala!

20 Em zebe anakare zisi lup ulin gwenan:

Men zen emsa jap nul sonen da gwenan.

Hen men zen eno mae mo kire-kirena alal danda gwenan.

Hen totoresa de syal tan hap men zen emsa nenbirida gwenan.

Hen men zen anakan emsa nenbirida gwenan, "Ëe an mamna. Em bete-tekna."

Hen men zen emsa mipna lwa da gwibir-zimnin.

Em hwëna kire zisi dawemkame lup ulin gwenan.

21 Angkam ëe zebë saher gwe'an: Ëe Timotius hun ama eiwa sin-sin ëk, zebë emsa kirekam eibirida srëm gwe-gwek!

Zep angkam ëe sap asa ënaka boltere tal- enlala joblo-top zini in mo kimye.

22 San ha zen anakan zënaka boltere da gwibirin?- "Ëe an Ibrani wal." Hwëna ëe an sap hen Ibrani wal.

San ha zen hen anakan zënaka boltere da gwibirin?- "Ëe an Israel Bak mo ausu nakore zi." Hwëna ëe hen dekorena.

San zen Abraham mo auyan-tane wal? Ëe an hen zëno auyan-tane. Zep ëe an hen Yahudi wal tangan.

23 San zen man zënaka nenbirida gwenan?- "Ëe an Kristus mo nganak de syal ta gwen zi."

Ëe an hen zëno nganak de syal gwe-gwen zi- desa de kwei-kwik gunnu. Kirekam insa ale gulun, zen enlala joblo-topkamë mas gul!

Sërkam de syal gwe-gwenkam ëe mesë desa kwei yuludak.

Bwinak de gwënkam hen mesë desa kwei yuludak.

Kristus mo bose hap de asa tan-golenkam hen mesë sërkam kwei yuludak.

Ëe mesë tîn hîp de alp gwesînnî beya guk. Zen hom.

24 Yahudi mo but srêm gol-golak de mam-mamna mes asa ahare taha-tap nosoblak- Kristus hup de jal hap de dokot tekkam tangolen naye, men kirekam 39 enkam de lek tyankam naît gwibirinye. *

25 Roma mo îrik gînnîk de mam-mam wenya hen mes asa dan-ahan nosoblak- dop tekkam de tangolen naye.

Asa mes kasokam aha-rok'nen nîrîblak.

Hen bul yalak de ang gwe-gwenkam, hinak de keing gwen hap de alp gwesînnî mesë dan-ahan sok.

Hwëna dan-ahanna in kon, ahana zen dekam tanganë hi ngîrînnîk de gwënnâ holo gwëk- kam denaban yaklam denaban.

26 Ëe tîn hîp de alp gwesîk gwenna mesë tangan beya gwëk, sap ëe ama aha lang san song gwe-gwëk:

Ho namwana man asa karek ta gwëk.

Asaskam de te-ala alal tanda gwen zini hen man tan hap asa alp dasîk gwëk.

Yahudi zini tan hap asa kalang nê gweblak-

hen sap Yahudi srêm zi niye.

Totore zi jal-jala hen tan hap asa alp dasîk gwëk- sap ë yawal-yawalak, sap eiknik, sap hinak.

Ahakore zi jal-jala hen man asa boton da gwëk, "Ëe an eno Kristen bosa wal." Zen hwëna asa dikim zë aningkim karek tan hap ki ahap da gwëk.

27 Tahalha tangankam de gwënnak, ëe dekamë

sêrkam tangan syal gwe-gwëk.

Hen kam nini homë ta gwëk.

Usak hap ama tangan sabak gwëk, hen ho-holena.

Tembane srëmkam hen holokamë gwë gwëk.

Hen bot-bot langnak pakean sowe-hen srëmkamë gwë gwëk.

Ëe karekna desa mesë kitak mamkam eisbik.

28 Ahakore tahalhana ano aîtbîn srëmna hen ki. Hwëna deban ëe ama mwin-mwankam ëre mo nga syal gweblannak de jemat-jemat hap dohon-hon naka eis gwibirin.

29 Kristussu de taîblîblan nik de etan hli tan hap ëalp gwesînnî, ëe dekam anakanë eis gwibirin, "Zen bap zen tangan etan hli tan." Zi de karek san dep Kristen zisi zertoranna, dekam hen ama tangan enho nakon anakan ngalap gwesibirida gwenan, "Zen bap zen tangan zëno ol san ang gwen."

30 Hwëna yasik tabin hip de zini ki sap ebon mae onak anakan zënaka boltere da gwibirin, "Ëe an sosonna," zep ëe hwëna a kirekam asa ënaka boltere tal, "Ëe an sin-sin tanganna."

31 Bian Yesus mo Bian Alap, zini men zëno bosesa hëndep denaban boltere nul gwenan, zëno nwenakë emsa gu sonebirida'an. Ëe homë emsa boton tabi'in:

32 Ëe kimë ëna Damsik kon heya gwëk, dekam teipsîn zini Aretas langna iwe îrik gi'inka. Hen ëna iwe de mamna mes jana zi zemka gubiridaka- ëna in mo wasnge te so gwe-gwen lilîkîn nîkon de asa tîl gîk gweblan hapye.

33 Hwëna zëwe de ano Kristen bosa walya dekam zep ëna in mo kol son jendela nakon yu yala ban dokotkam asa ë san dep srîng dî sonehak. Ëe dekam zebë zi jal-jala in kon heya gwëk. Zep ëe an eiwa sin-sinni.

* **11:24 11:24** Yahudi zini Alap mo ëpba ol san anakarekam ang ta gwëk: Karek gwen zisi de karek tanna, Alap mo olak man lwak (Ul. 25:1-3): "40kam de lek tyanna bahem gulmurun." Desa de gulmurun srêm hap, zep 39 enkam lek dya gwëk- zi de zëno mae mo nwenak karek gwenkamye. Paulussu kim Yahudi Kristus hup de jal hap lek-lek da gwëk, zen zep 39 enkam lek dya gwëk.

12

Paulus kim zère mo nwe lirisin në gweblanna aïsìl gwibiridakake:

¹ Ènaka de boltere tanna, zen eiwa waba hap, hwëna èe asa etan ebe mae hap ayang gulzim, sap ebon mae onak zini kirekam zënaka boltere da gwibirin. Zep angkam èe ama emsa aïsìl gwibirida'an- men kirekam Bian ano nwena ap lirisin so gweblakake, zère mo enlala aning tansa dikim abe hap zertrë gweblan hap.

² Angkam tahunna mes empat-blaskam tamunk, asa dekam ngatan zi mo lang mo gulk'nen tangan san dep neir inehak. Aena angkam homë tame gu'un: San ha tim niban asa neir inehak? San ha enho en naka? Tawana aha-en Alap zë-en. *

³⁻⁴ Alap zère mo golek denak kim asa nërhatatak, dekam zep Alap zère mo enlala aning tanna ap zertrëblaka. Desa man asa jalse gweblaka- okamanak awe de toran hapye. San ha timni an hanë zë sane gwe'ak? San ha enho en nikë sane gwe'ak? Tawana aha-en Alap.

⁵ Sap abe hap mes kirekam de owasna lwablak, zep amaka ènaka boltere ta gwe'an. Hwëna èe bëjënë ènaka kire hap boltere tan. Diki anakare enkamë ènaka boltere ta gwe'an, "Èe an sin-sinni."

⁶ Hen èe sap amaka mam blalkam ènaka de boltere tanna etan ayang gu'un. Dekam molye asa anakan enbla'anam, "Paulus in enlala joblo-topna," sap ano ola botonna hom. Hwëna èe molyë etan kirekam ayang guk, sap dekam emaka asa enbla'an, "Paulus mo nwe lirisin nëblanna man beya gwëk, zep zen eiwa mamna." Diki èe ama dwam gwe'an, men kire enkam ena ano syala nwekam hla kul gwenan, hen men kire enkame ano tawa tabinni èsane gwe-gwenan, kire en

nakon emki anakan asa enlala gwe-gweblan, "Paulus zen kirena."

⁷ Èe dikim sërkam de nwe lirisin në gweblanna in hap ènaka boltere tan srëm hap, zen zep Alap sang-sang karekna abe hap golblaka. Zep ano timnik sang-sangna in ngi yawal mo kim kang ti'in. Zen dekam dowal mo kigina hen asa karek ta gwenda.

⁸ Èe mesë dan-ahan sonkam Bian Yesusu abe ta gwëk, "Bian, ngi benben makarena ansa ap mulsublu."

⁹ Hwëna man ap ding gulbluka,

"Molyë ep mulsubluk. Em sap esa ano kwasang-kwasang ensa de blol gwibin enkam gwë gwera- dawem gwen srëm maenakye. Sap zini men zen sin-sin gwen nakon Asa en blol në gweblanan, zen diki kire zi hibë sosonna mam gul gwizimnin."

Zen in zebë ènaka anakare enkam boltere ta gwenan, "Èe sin-sinni," sap dekam Kristus onakore sosonna abon onak man mam gwe-gwenan.

¹⁰ Zep èe Kristus mo bose hap de banakare maesa goltowenkam, èe ama sam gwesik gwenan.

Èe sap asa sin-sin gwer.

Asa sap sa lamang da gwer.

Karekna hen sap asa goltowe gwer.

Hen boton ol blo-blona sap sa ap mam nul gweblal.

Hen jalom èk tihinak sap asa gwë gwer.

Sap kimë tangan sërkam sin-sin gwe-gwenan, èe dekamë Kristus onakore sosonna eis gwibirin.

¹¹ Èe mesë enlala joblo-top zi mo kim ènaka boltere tak, hwëna zen eno mae mo asa de zerzaun srëm nakon èe ki ènaka gwëblak. Diki em emaka asa èrzauk gwëk- in kim yasik tabin hip de zini eno mae mo nwenak asa lamang da gwëkye. Zen man asa anakan nen gweblanan, "Paulus in betekna." Zen eiwa. Hwëna "mam-mam wenyä" in hom asa kwë da'an!

* **12:2 12:2** Yunani olkam Paulus anakan ale gulku, "Ano Kristen bosena ki, orep ngatan zi mo lang san dep neir inehak." Zen kirekam zère mo bosesa golzabeka- dekam de sërkam bolte-boltekam nwe-mase gwen srëm hap. Hwëna ayat tuju nakon mes dam gwesinän, Paulus zënaka kirekam aïsìl gweblaka.

12 Ëe kimë enlala tatetekam emsa holokam golëlowehe gwek, Alap dekam zep zëre mo sosonna abe hap gol gweblaka- desa de ebe mae hap goltrei gwizimdin hip, hen owasowassa dikim ebe mae hap syal gwe-gwibir-zimdin hip denaye. Zen dekon zep dam gwesinän, “Asa eiwa Alap dam tasiki.”

13 Zep men kirekamë aha jemat naban golëlowehe gwek, ëe kire enkamë emsa hen golëlowehe gwek, hwëna diki aha-en: Ëe homë emsa asa de te-alakam mas gweblan hap gubiridak- in kirekam ahakore zini angkam emsa nenbirida gwe'anye. Kwasang tol! Diki ëe amaka hen kirekam emsa gweibirida gwek! Ki emaka asa sam eisibli'an!

14 Ëe angkam bira! Nabakam asa dan-ahanna emsa amjanbirzir. Hwëna ëe molyë emsa te-alakam de asa mas gweblan hap gubiridak. Ëe homë eno mae mo te-alasa dwam gwibi'in. Diki ëe ama dwam gwe'an- em de tingare enho naban asa ang gwe-gweblan hap. Ëe homë emsa te-ala hap gubirida'an, sap ëe an eno mae mo biankam de gublunna. Sap walasna bi zik mo tahalhasa hom hla nul gwizimnin. Zen diki bi zik walas zik mo tahalhana hla nul gwizimnin.

15 Zep ëe ama sam gwesik gwenan- tingare ëre mo sosen naban te-ala naban de emsa mas gwibirida gwenkamye, em dikim ëngaya gwen hap de ora san dawemkam ang tan hap. Ëe insa kirekam emsa kwasang gwibirida gwenan, em hwëna ba habe asa kwasang ëbla srëm gwegwenan?

16 Hwëna ebon mae onakon mes yap ahakon anakan asa nen gweblanan, “Eiwa, Paulus damkam hom te-ala hap nësa aberbe tabirki, hwëna zen aningkim ki nëno mae mo te-alana zerka.

17 Zen zisi lup gul sone zaka-tahalha zi hip de tagal tazimdin botonkam, hwëna Paulus zën twenblaka.” Hwëna ena tawana: Kirekam de ola zen boton tangan.

18 Ëe sap eiwa Titussuë titi tak- emsa de amjanbin hip. Hen ëe nëre mae mo osona mensa dekam ama hen gubluk- zen de ang gweblan hap.† Hwëna dekam Titus zëre hap hen hom ba mae hap emsa abe tabirki. Sap ëe debanë aha-ere enho naban syal ë gwenan. Srënsrënkam hom.

19 Aya-wal oso-wal, em san ha ano suratna ansa ema enlala eibi'in?- “Paulus zëre mo bose dikim karek gwen srëm hap ki ap ale gulzimki.” Ki hom! Ëe hwëna Alap mo nwe kara gwennakë Kristus mo nganak de syal ta gwen zi mo kim ale gulzimk- em dikim Kristussu de taiblïblan ennak ëtatete gwen hap. Sap ano syala tïngan, zen kire en hap dena.

20 Sap ëe ama aïri'an, san ha anakan asa emsa hlauludazal?- “Zen hom ano ol san ang ta gwe'an.” Ahaksa san ha enlala nik esa anakare hap asa topse ëblal, “Zen ba hap kirekam asa jal gwibirida tine gwenda?” Zen in zebë aïri'an: Bap zen nama ol keisa-keisa naban lowehe gwen.

Bap zen zënaka husus gwibirida gwen.

Bap zen zënaka jal gwibirida gwen.

Bap zen ëhliwe gwen.

Bap zen zënaka lamang ta gwibin.

Bap zen boton ola gol halasen gwen.

Bap zen bolte-boltekam lowehe gwen.

Hen bap zen men-mankam lowehe gwen.

21 Ëe mae habë aïri'an: Nama de karekkam lowe hennakë emsa hlauluda'anzak, ki ëe asa sërkam tangan Alap mo nwenak saher gwer. Anakan de emsa hlauluda zankam, “Men zen nonol karekna nol gwek,

† 12:18 12:18 Kim anakan ale gulku, “nëre mae mo osona mensa,” zëno enlalana, Korintusk de zi mo tame tan Kristen bose wal. Zen san ha zi darena in mo ahana?- men zen Titussu ang ëblaka. Ahana 2Kor. 8:18-19nak ang gweblaka, hen ahana 2Kor. 8:22nak.

zen nama kire enkam lowehe gwenan," dekam ëe asa tangan nwe go-ho naban enlalana dowe hanal. Karekkam asa emsa golëtower- em de kahalo nakon ëhalen srëmkam, wesya de lirak oson nakon de ëhalen srëmkam, hen totore swi nakon de ëhalen srëmkamye.

13

Aumwa hap de ol zïm-zïm:

¹ Aya-wal oso-wal, ëe nabakam asa dan-ahanna emsa amjanbirzir. Ëe dekam zi beyanak de sane gwen nakon asa emsa klis gulzul- men kirekam Alap mo olak lwakke,

"Zini dan-dan, ahaksa dan-ahan maekam de gun srëmkam, 'Eiwa, ëe ama ëre mae mo nwekam karek gwennak hla lak,' dekam bëjen zisi karek tan."*

² Ëe kimë dan sonna emsa amjanbik, ëe dekamë anakare ol tantanna ansa ebe mae hap golzimk, "Etanë nama karek gol gwennak emsa hlauluda'anzak, ki asa emsa karek tabirzir." Angkam langa nakonë ol jalse gwenna inkam etan tïngan emsa enlala sobirida'an- sap orep men zen karekna nol gwëk, hen nër hom de karek gol gwen wënya.

³ Dekam esa asa tame lal, "O hare eiwa, Kristus ki am zëre mo ola Paulus hup ing gul sone gweblanda- zen dikim jala ban tonbirida gwen hap denaye." Zep jala ban de tonbiridan nakon esa anakan dam ulsul, "Hare eiwa, Kristus sin-sinkim hom am nëbon mae syal gwe-gwenda."

⁴ Eiwa, Kristus kim te-lidak sonnäk tilki, dekam Zen hen man nwe-mase gwëka- san de sin-sinni. Hwëna Alap mo sosonna Zëbon lwa gwenan, zep angkam ngayana gwë'ara. Ëe Kristus mo nganak de syal gwe-gwen zini hen kirekam: Ëe an hen zëno kim nwe-masena sin-sinni. Hwëna ebon mae osan de lwahal zankam, dekam sa sosonna Alap ne Kristus nebon onakon abon onak

hatal- dekam de emsa oto tasibin hip denaye.

⁵ Emki ere mae mo enhosa anakan tame ta gwibin, "Ëe san ha eiwa ama Kristussu taïblibla'an? San ha homë?" Em de eiwa taïbliblan kam, ki esa enaka anakan tame la gwibir, "Bian Yesus ki eiwa ano enhonak gwë gwenda."

⁶ Dekam esa hen asa anakan tame lal, "Paulussu eiwa Bian abon mae osan dep zer soneka."

⁷ Zep ëe ama Alapsa abe ta gwenan- em dikim nabakam ano ol san ang tan hap. Sap ëe homë anakarekam emsa dwam gwibirida'an, "Dikire ënol drak-drak gwëk, ki asa Kristus onakore sosonkam karek tabir." Diki ano dwam gwibinni, "Dikire nabakam Kristus onak ëtal gwesik." Ki hwëna ëe de hata zankam, sap sa asa etan enlala nëblal, "Paulus mo ola sin-sin enna. Zen bëjen damnak jala ban nësa tonbiridan."

⁸ Sap em de eiwakam Kristus onak ëtal gwesinkim, ki ëe molyë emsa karek tabirzik. Sap ëe desan en debë emsa titi ta gwibirin.

⁹ Zebë anakan enlala gwe-gwenan, "Ëe sap asa zi mo nwenak sin-sin gwer. Diki Korintusk de ëKristen gwen wënya zen zen tangan ëtatete gwen." Zen in zebë Alapsa anakan abe ta gwenan, "Zen dikire Kristus en onak ëtal gwesik."

¹⁰ In zebë suratna ansa nonol aen de hata zan srëmnak ebe mae hap ale gul sonezimk- anakare enlala naban, "Ëe de desa hlauludankam, ëe homë ki dwam gwe'an- Bian onakore sosonkam de jala ban karek tabin hipye. Biansa de taïbliblan nakon mana hwëna enlala dowe hanan hap lwanda halank." Sap Bian Yesus mensa sosonna abe hap gol gweblanda, zen eno mae mo ei nika dikim timbwas gun hup hom. Zen hwëna dekam de tatete gulz- imdin hip.

¹¹ Dawem, aya-wal oso-wal. Zao en zausunun. Em ëisrip-sri gwe-gwen.

* 13:1 13:1 Ul. 19:15

Kristus en onak ëtal gwesik.
Hen ano ol san ang ta gwek.
Alap mo taha terenak aha-ere en-
lalakam lowehe gwek.
Alap men Zen tahana nëbe mae hap
deisu guzim'ira, Zen sa kwasang-
kwasang naban emsa golëlowehe
gwera.

¹² Men kirekam Kristen zini
ëtagal gwennak ëgwë gwenan,
ansa de baca gulsun hyanak emki
kwasang naban enaka tahasa
golëtowaran. Tingare awe de aya-
wal oso-walya zen dawem ensa ebe
mae hap nol sonezimk.

¹³ Dikire Bian Alap ne Bian Kris-
tus Yesus nebon onakore kwasang-
kwasangna eno mae mo enhonak
lwa gwek. Hen dikire Alap mo En-
hona emsa kitak golëlowehe gwek-
aha-ere enlalakam ekakim lowehe
gwek.

Paulus mo surat propinsi Galatiak de Kristen zi hip

¹⁻² Propinsi Galatiak de Kristen zi hip,

Yesus mo dam tasin zini Paulus onakon, hen tingare aya-wal osowalya men zen angkam apdenak aban mae lowe he'anke, zëbon mae onakon:

Dawem. Aya-wal oso-wal, ëe ama dwam gwe'an em dikim anakan asa tawa gweblan hap: Asa zi hom dam dasik. Hwëna Bian Alap, men Zen Tane zem Bian Yesussu tin nikon ngaya taka, Zen Deban asa dam lasiki.

³ Nëre mae mo Bian Alap ne Bian Kristus Yesus ne sa kwasang-kwasang zemka mamkam ebe mae hap ol gwizimdi. Hen nen zëre nik mo taha terenak esa lowehe gwer.

⁴ Nëre mae mo Bian Alap mo dwam gwibin sin de syal gwibin hip, in zep Kristus nëno mae mo karek-kareksa dikim wei yun hup Zënaka zerguku- dekam de Zen nësa auhukama karekna an kon hëndep de lang san dep golësek gwen hap.

⁵ Dikire Alap mo bosesa hëndep denaban teip nulsuk gweblak. In eiwa.

Mae hap de ol: Alap onakore ol dawemna zen aha-en tangan.

⁶ Ëe ama emsa tenggwanbirida'an, sap em nabakam tangane Alapsa hli la'an- men Zen sap Kristus mo kwasang-kwasang nakon emsa kwang guludakaye! Ëe kimë Alap onakore ëngaya gwen hap de ol dawemna ebon mae osan gol halada gwek, em sap dekam desane ang tak. Hwëna angkam zi mo "ol dawem" yang gulsun ëse sane ang ta gwe'an.

⁷ Hwëna aha "ol dawem"na sap hom! Zen aha-en tangan- eiwa denaye. Hwëna zini man emsa menman da gwibirin- Kristus hup de ol dawemna insa de li yul sone naserankam.

⁸ Hwëna zi de emsa zëre mae mo ol yang gulsunkum tawa tabinkim, ano mae mo ol dawem naban de apde nën srëmna kim, dikire Alap desa kareknak kang gul gwek. Aen mae de hen aha ol dawemkam emsa tawa tabinkim, hen sap Alap mo dam taha nakore zi mae, dikire Alap kitak asa hëndep denaban karek tabik.

* **1:6 1:6** Pasal satu mo ayat enam hap de olk kore alena, zen blala, zep emki halaman 645nak karatda gun. "Ol dawem ëse" na mensa Paulus awe enlala gwibirki, zen mensa ahakore Yahudi kore Kristen zini Paulus mo tim bwanak tawa da gwibir zikke. Suratna an, zen zëno mae mo yasik tabinni insa dikim gulsuzimdin hip. Sap zen anakarekam tawa da gwibik: "Paulus in dawemkam hom emsa tawa ta gwibirki. Zen in lun kon Kristen gweka, zep zen Kristus mo dam tasin tangan naka hom. Yesus Zen Yahudi mo ausu nakon sal tilki. Zep Kristen zini Yesussu de taibliblan en nakon bëjen Alap mo nwenak ëdakastin. Diki Yahudi abon mae em to mipsa de blom tasik gwibinkim bitı gwen, hen ano mae mo aha ëpba titı tabin sin em ang ta gwen. Kirekam de ëgwën srëmka, ki em molye Alap mo nwenak ëdakastik." Kirekam de tawa tabinni dekam mes ki hen Siria mo langnak de Antiokiak hen lwak- men dekon nonol Paulus ne Barnabas neka deisya sonekye. (Kis. 15) Hwëna dekam Paulus zëna Barnabas han zao ë'anaka. Dekam zep zë mamkam Yahudi zini in han olëol tetek gweka- men zen ol ësena insa nolhal zakke, deban mae. Ki zep hyanak zëwe de Kristen zini Yerusalem san dep Paulus maesa lup nul sonek- zao de Kristen zi mo nol-nola hen Yesus mo seblaskam de dam tasibin zi mo nwenak tap gun hup. Zao kim aha-en nuk, dekam zep Yahudi srëm Kristen zini in hap anakare suratna nol sonezimk, "Paulus ne Barnabas ne, zen mes sam eisiki. Yahudi zini men zen hyanak ebon mae yaing gwezak, ëe desa homë lonbiridak. Ëe titı tabin ola dan-nër dan-nër enkamë ang ta gwen hap emsa enbirida'an." (Kis. 15:28-29) Kristen zini nëbe mae hap, zep a kirekam tangan mo bol-zaun gwe'an: Kristen gwenkam nen home Yahudi hon bitı gwe'an. Hen Alap hom nësa gubirida'ara- Musa mo titı tabin olsa dikim kitak syal gwe-gwibin hipye. Nen zebe to mipna blom lasik gwibir srëm gwe-gwenan, hwëna Kristus ensae anakare enlala naban blol ë gwebla'an, "Zëno syal en nakon asa Alap mo nwenak ëdakastil."

⁹ In kirekamë ale gulzimmnin, etan desaë ale gulzim'in: Zi de zëre mae mo ol yang gulsunkum emsa tawa tabinni, nonol ol dawem naban de apde nën srëmna kim, dikire Alap desa kareknak hëndep denaban kang gul gwek.

¹⁰ Kirekam de ale gulzimdinkim, dekam man dam gwesin'in: Ëe zi de asa sam gwesiblin hap homë syal gwe'an. Ëe hwëna Alap zë-en de asa sam gwesiblin habë syal gwe'an. Zep bëjen asa anakan enlala gweblan, "Zen man zëre mo tawa tabinsi wet gulsuk gwenda- dekam de zi sam gwesiblin hapye." Ëe de kirekam gwënkam, ki ëe homë dawemkam Kristus mo nganak syal gwe-gwe'an.

Mae hap de ol: Men kirekam Kristus Paulussu dam tasikike.

¹¹ Aya-wal oso-wal, ëe ama emsa gubirida'an: Ol dawemna men desaë emsa tonbirida gwek, zen zi hom yang nulsuk.

¹² Ëe zi nikon homë sak, hen zi hom asa tawa dak. Hwëna Bian Yesus Zën asa owas hap hleng sosubluka.

¹³ Em dwan mes-eme ano orep de gwëna ësak- men kimë Yahudi mo tawa tabin sin sërkam ang gwe-gwekye. Ëe dekam Kristen zini sërkamë karek ta gwibik, hen dawemkamë alp gwibirida gwe'ak- dekam de kitak Alap mo hlil irin zini insa timbwas gun hup.

¹⁴ Ëe ama beyakam kwei-kwik guludak- ëre han de luk tan bosyan naye, dawemkam de Yahudi mo tawa tabin sin ang gwe-gwenkam. Ëre mae mo auyan-aza mo ëpba olsaë sërkam dan syal-syala ban zaubik. †

¹⁵ Hwëna dekam zep Alap owas tangan hap asa eiwa de ora san dep kwang taka. Sap asa de jaha

gweblan srëmnak, dekam mes ki Alap anakan asa dam tasikë, "Zini an sa Yesus onakon ngaya gwera." Zen asa sërkam kwasang gweblaka, dekam zep anakan asa dam tasikë,

¹⁶ "Zini an sa ano Tanena tame tala. Dekam zen sa zëbe hap de ol dawemsa Yahudi srëm zi mo lang san golzim halada gwera." Yesus kim ap Damsik oranak Zënaka zertrëblaka, dekam ëe homë aha zisi teibiridak- asa de Yesussu dikim dawemkam taibliblan hap denaka tawa tan hapye.

¹⁷ Ëe dekam na-en homë Yerusalem san dep song gwek- dekam de Yesus mo nonol dam tasibin wenyaka duwebiridan hapye. Ëe hwëna dekam zebë hëndep Arab mo lang san song gwek. Dekon etan Damsik sin dep zebë lwa halzak.

¹⁸ Tahunna kim dan-ahan damank, ëe dekam zebë Yerusalem san dep Petrussu de zertowen hap song gwek. Zëwe orapna lima-blas enkam zebë apdekam ëk, dekon ki zebë etan song gwek.

¹⁹ Ëe homë dekam etan aha maena zertowek- zini men desa Yesus Zëna dam tasibirkiye. Hwëna Yakobus ensaë zertowek- Bian Yesus mo osona mensa.

²⁰ Eiwa denakaë emsa gubirida'an. Dikire Alap asa hla tak- ëe de boton gwenkamye.

²¹ Dekon ki zebë Siria hen Kilikia mo lang san song gwek.

²² Dekam Kristussu de taibliblan wenyaya Yahudi mo langnak nwekam hom asa hla dak.

²³ Hwëna sap'nen anakan asa nasal soneblanda gwek, "Zini men zen nësa sërkam karek ta gwibiriki angkam Yesus hup de ol dawemsa gol halada gwe'ara- men zen sap jek-jak gun hup dwam gwibi'inkaye."

²⁴ Kirekam de asa sal sone gweblankam, dekam zep Alap mo bosena teip nulsublunda gwe'ak.

† **1:14 1:14** Orya ol zi mo ëpba ola, zen ahakon ol karek hen dowal-dawal hap dena. Hwëna mensa Paulus kyang-kyang gulsuku, Yahudi mo ëpba ola, zen kirekam hom. Zen hwëna Musa mo titi tabin ol, hen Alap mo ol ayang gul gwen zi mo ol, hen mensa auyan-aza zem Alapsa de kire enkam betek gweblan hap dena mas-mas nul gwekke, desa kitak kyang-kyang gulsuku.

2

Paulus kim Yerusalemk de ol aha-en gunnuk ang gwekake:

¹ Tahunna kim empat-blas enkam damank, dekam zebë Barnabas han Yerusalemk san dep song ëk. Titus Bak hen man ang gweka.

² Alap mo Enhona man asa gubluka, "Em Yerusalemk san dep song gwen- zao de ere mo tawa tabinni insa Kristen zi mo nol-nolak kira gulzimdin hip." Kristen zi nikon men zen ëteipsik, zëbe mae en hap zebë anakan srip gulsuzimk, "Ëe kire ol dawemkamë Yahudi srëm zini tawa tabirida gwe'an." Sap dekam ëe mesë anakan ngalap gwe'ak, "Kristen zi mo nol-nola bap zen anakan asa gublun, 'Em in waba habe karekkam tawa tabirida gwe'ara.'"

³ Hwëna zen hom kirekam asa nenblak. Hen Titus, zen sap Yunani wal, hwëna dekam hom desa Yahudi mo ëpba ol san de ang gwen hap titi dak- to mipsa de blaonsublun hapye.

⁴ Zen mae hap dekam to mip blom tasibin nikon ëkeisa-keisa gwe-gwek: Sap nonol Yesussu de taïbliblan srëm Yahudi zini, zen aningkim Kristen zini nëban mae ësiri gwek- dekam de nëno mae mo lowe hensa hlaulzimdin hip. Kristus mes sap nësa hül ti sonebirki- Musa mo ëpba titi tabin ola kon. Hwëna zini in mae hap zë ësiri gwek: Dekam de anakan hlaulzimdin hip, "A kirekam mo Musa mo titi tabin ola insa nulmun gwenanye." Zen sap man ëdwam gwek- dekam de etan titi tabin ola insa nëbe mae hap nihin dohon-hon makan wei yul sonezimdin hip.

⁵ Hwëna ëe Kristen zi mo nol-nola ban engka en mae homë zëno mae mo dwam gwibin sin ang tak. Sap ëe ama anakan ëdwam gwek, "Yesus hup de ol dawem naban Yahudi mo ëpba titi tabin ola ban, bap zen siri nën. Dikire ol dawemna in Yahudi srëm zini ebe mae hap lalak enkam lwa gwizimk."

⁶ Hëndep men zen Yerusalemk de ëKristen gwen zi mo nwenak ewet so kinik, Yakobus, Petrus, hen Yohannis, zen hom asa nenblak- dekam de ano tawa tabinni insa wet gulsun hupye. Zen man ki sap zi mo nwenak ëmam-mam gwek. Hwëna ëe homë zini nwekam golëake gwenan, "Zen mamna," ahaksa, "Zen betekna." Sap Alap hom zisi nwekam anakan golëake gwenda, "Zen mes jematnak mam gweka," ahaksa, "Zen hom mam gwe'ara."

⁷ Hwëna zini in dekam anakan asa tame dak, "Eiwa, Alap mes ki Paulussu dam tasiki- zen de Yahudi srëm zisi ëngaya gwen hap de ol dawemkam tawa tabin hipye, men kirekam hen Petrussu dam tasikike, Yahudi zisi de tawa tabin hip."

⁸ Sap dekam man anakan dam gwesik: Petrussu men kirekam hen Alap dam tasikike, zen de Yahudi zisi beyakam halen ora san golëwet so gwe-gwen hap, Zen hen kirekam asa dam tasiki- ëe de hen Yahudi srëm zisi beyakam halen ora san golëwet so gwe-gwen hapye.

⁹ Men zen dekam Kristen zinik ënol gwek, zen dekam zep anakan asa dam nososuk, "Eiwa, Alap mes Kristus mo kwasang-kwasang nakon Paulus ne Barnabas nikip syala wei yul sonezimki." Zen dekam zep tahana asa nitowank- dekam de anakan asa ziaha-en gun hup, "Ëe asa Yahudi zisi syal eibir. Em Yahudi srëm zisi syal eibir."

¹⁰ Mae en hap asa abe nosok: Tahalha zisi de eititi eibirida gwen srëm hap- men desa aena hen hohle gwibi'ikke.

Paulus kim Antiokiak Petrussu dei yul gublukake:

¹¹ Hwëna Petrus kim Antiokiak hata zaka, ëe ama damnak dei yul gubluk, sap zen man karek gweka.

¹² Zen aha zi de yaing gwezan srëmnak, dekam man Yahudi srëm zi niban apdekam golëtembane ta gwe'anka. Hwëna Yakobus man Yahudi Kristen zisi Yerusalemk kon lup gul soneka. Zen kim yaing

gwezak, dekam hwëna zen hom Yahudi srëm zini etan golek de tabirki. Zen man anakan airika, "Ëyë Yahudi srëm Kristen zini an han Yahudi zini an mo nwenak golëtembane ta'ak, zen sa hwëna asa husus nëblal." *

¹³ Hëndep ahakore Yahudi zi ausu nakore Kristen zini hen Petrus mo kim ëgwëk. Hëndep aumwa hap, Barnabas Bak hen kirekam ang gweka. Zen kitak Yahudi srëm zisi langa dasibik, hwëna ëk enkam nama anakan nenbirida gwek, "Em in ano Kristen bose wal."

¹⁴ Hwëna ëe kimë tame guk, "An hom Yesus hup de ol dawem naban dakasti'in- kirekam de ësiri gwen srëmkamye," ëe dekam zebë Petrussu damnak anakan dei yul gubluk, "Em sap Yahudi wal, hwëna em kime nër hom Yahudi srëm zi niban golëtembane ta gwe'anaka, em ema Yahudi srëm zi niban golësiri gwe-gwe'anaka. Angkam hwëna ba habe Yahudi zi ensa ang gwibirida nasen'ara?- men zen ëdwam gwe-gwenan, Yahudi mo ëpba titi tabin olsa de Yahudi srëm Kristen zi hip wei yul sone gwizimdin hip."

Mae hap de ol: Nen Yesussu de taibliblan enkame ëngaya gwe'an-sap Yahudi zi, sap Yahudi srëm zi.

¹⁵ Aya-wal oso-wal, zini men zen Yahudi mo ausu nakon ësaltik, an ki hen aena, ëe homë menkam Yahudi srëm zi niban olësiri gwe-gwek. Sap emsa man Yahudi zini nenbirida gwenan, "Zen karek gulin hana gwen zi ausu."

¹⁶ Hwëna sap kirekam, ëe Yahudi zini mesë anakan dam ulsuk, "Zini toton bëjen Musa mo titi tabin ola sul sonen- dekam de Alap mo nwenak ëdakastin hipye. Nen kitak ema ngip ul gwenan." Diki angkam an kim Alap nëbe mae hap ora ësena zertreizimki, dekam zebe anakan tame u'in, "Diki Kristus Yesus ensa de taibliblankam esa

Alap mo nwenak ëdakastil gwer-ba maesa de syal gwibin srëmkam." Ëe Yahudi zini menkam ama ëkil gil gwek, "Are mae mo syal en nakon asa Alap mo nwenak ëdakastil gwer." Hwëna zini toton bëjen titi tabin ol san de ang ta gwenkam Alap mo nwenak ëdakastin.

¹⁷ Hwëna ëe de Musa mo titi tabin ola insa Yesus ensa de blol gweblan hap hli yunkum, dekam Yahudi zini anakan sa asa nenblal, "Em in mese Yahudi srëm zi hip jowera- karek gulin hana gwen zi." Zep Yahudi Kristen gwen srëm zini Yahudi Kristen zisi anakare hap husus neibirida gwenan, "Zen Kristussu de ang gwe-blankam karek gulin hana gwen zi hip kim ëjowe gwe'an." Hwëna kirekam boton!

¹⁸ Diki eiwa dena zen a kirekam mo: Nen bëjen nen Musa mo titi tabin ol san de ang ta gwenkam Alap mo nwenak ëdakastin. Zen in zebe angkam Yesus ensa blol ëbla'andekam de ëdakastin hip. Hwëna nen de etan anakan ëgunkum, "Nen etan lwan dahan- Musa mo titi tabin ola insa de hen mas gun hup," dekam mese ëkarek gwenan. Sap dekam mese Yesussu hli lanan.

¹⁹ Aena hen kimë Kristen gwe srëm gwe'ak, dekam hen ama sap Musa mo titi tabin ol san de ang gwen hap alp gwe-gwek. Hwëna dekam anakare habë enlalana dowe hana gwek, "Ëe an toton molyë dekon en ngaya gwek." In zebë angkam Yesus ensa anakan blol gwebla'an, "Zen de abe hap syal gwibir-blin srëmkam, ëe toton bëjënë ngaya gwen."*

Angkam zebë hwëna Alap mo dwam gwibin sin Yesus ensa anakan taiblibla'an, "Asa mes Deban telidak sonnak makan nosoink.

²⁰ Zep angkam ëe ë-en homë gwë'an. Hwëna Kristus ano enhonak gwë gwenda. Ano okamanak de gwëna angkam, zen Alap mo

* **2:12 2:12** Musa mo titi tabin olak hom aha zi ausu naban de apdekam tembane tan hap jalse gweka, hwëna Yahudi mo ëpba bong-bong lun jalse gwen ola insa mas nuk. * **2:19 2:19** Rom. 7:7-11

Tane ensa de taibliblan en nakon lwa'an. Sap Zen asa kwasang gwe-blaka, zep hēndep asa de ngaya tan hap Zēnaka sosok taka."

²¹ Zep ora ēsena insa Alap nēbe mae hap de kwasang-kwasang hap kles tyasizimki, bap nen dekon etan Yahudi mo titi tabin sin dep lwan dahan. Hwēna zi de anakan gunnu, "Ēe Musa mo titi tabin ol en san de ang gwe-gwenkam asa Alap mo nwenak dakastil," zen hen ki man anakan de gun nuban nwe-mase gwe'an, "Yesus Zen Zēn ki tilki."

3

Mae hap de ol: Alap mo Enhona Zen diki Yesussu de taibliblankam zinik ing gwehe gwenda. Musa mo titi tabin ol san de ang gwe-gwenkam bējen.

¹ Galatiak de zi, em in enlala joblo-top tanganna! Nara emsa kirekam gweibiridaka? Ki san ēe homē dam-dam enkam srip gulsuk gwizimk-Yesussu de te-lidak sonnak makan ta irin hip denaye!

² Emki sap ēenlala gwen: Emsa ba nakon Alap mo Enhona ing gwe hebiridaka? Kina ki Musa mo titi tabin ol san de ang ta gwen nakon. Zen diki Yesus hup de ol dawemna insa kim laiblibik, dekam am emsa ing gwe hebiridaka.

³ Em sap nonol Alap mo Enhonak ēyaing gwe kinī gwēk, hwēna angkam ema tim ul gwe'an, "Ēe asa ēre mo sosonkam Alap mo dwam gwibinni syal ei gwibir." Zep em angkam mese ēnaha gwēhak!

⁴ Emki ēenlala gwen- men kim ēKristen gwen srēm wenya Yesus hup de jal hap emsa karek da gwibikke: Alap man kire hap de dawemna ebe mae hap ngatan zi mo langnak lam gulzim'ira. Hwēna em de Yesussu hli tankam, ki waba habe zēbe hap de jal hap karekna oltowe gwēk!

⁵ Zep emki ēenlala gwen: Em bawalkame Alap mo Enho mo sosonna eisbik? Hen Alap mensa owas-owasna eno mae mo ngirinnik syal gwe-gwibirki, zen bawalkam kon gwesik hanak? San ha ēKristen gwen srēmna kime ēpba titi tabin ol san ang ta gwēkke? San ha Yesus hup de ol dawemna insa kime laiblibikke?

⁶ Emki hen Alap mo ola ansa enlala gwibin:

"Abraham zen Alapsa taibliblaka, zep Alap anakan gubluka, 'Em mese ēre mo nwenak dakastil.' "*"

⁷ Zen in zep, man dam gwesinīn: Men zen Alap mo ola daibli gwibirin, zen zen- Abraham mo wei-wik gun walas naye.

⁸ Alap orep mes ki Yahudi srēm zini ebe mae hap dena anakan kalang gwēka, "Ano olsa de taibli gwibinkim, zen dekam sa ēre mo nwenak ēdakastil gwer." In zep Abrahamsa hamal hap ol dawemna ansa gu-gubluka,

"Tingare zi ausuna hē'ho gwibinni ebon onakon sa nulin."*

⁹ Abraham zen ola insa taiblibirki, in zep Alap hē'ho gwibinni zēbe hap golblaka. Zep nen hen kirekam: Nen de Abraham mo kim Yesus hup de ol dawemna insa taiblibinkim, dekam esa hen Alap onakore hē'ho gwibinni Abraham mo kim ulin.

¹⁰ Hwēna men zen de ēenlala gwe'ak, "Ēe Musa mo titi tabin ol san de ang ta gwenkam asa Alap mo nwenak ēdakastil," hwēna kire zini Alap kareknak sa kang gulu. Sap Musa mo titi tabin olak man lwak,

"Men zen de titi tabin ola ansa aha-en mae ngip nu'ik, desa sa Alap kareknak kang gulu."*

¹¹ Sap nen kitak ema ngip ul gwenan. Zep tangan dam gwesinīn: Nen bējen titi tabin syalsa de blol gwibinkim Alap mo nwenak ēdakastin. Zen in zep hen Alap mo olak anakan lwak,

* **3:6 3:6** Kej. 15:6; Rom. 4:3 * **3:8 3:8** Kej. 12:3 * **3:10 3:10** Ul. 27:26 * **3:11 3:11** Hab. 2:4

“Men zen ëre mo nwenak ëdakastî’in, zen kitak Asa de taïbliblan en nakon.”*

12 Titî tabin ola, desa “ang tan”kam nen gwibirin. Desa “taïblibin”kim hom nen gwibirin. Zep Musa mo titî tabin olak man lwak,

“Men zen de tîngare ola an san ang ta tine gwe'ak, zen zen en sa ëngaya gwer.”*

13 Hwëna zini nen bëjen kirekam ang ta tinen. Zep Musa mo titî tabin ola kon, nësa kitak maka Alap kareknak kang gu'ura. Hwëna zen zep Alap nëbe mae hap de jal lam gulzimdinni iwe Tane zemka hwëna drë neka. Zen zep Yesussu de nëno mae mo weinak drënen hap dena Musa mo titî tabin olak hen anakan lwak,

“Men desa tenyak makan ta irinni, desa sa Alap kareknak hen drënera.”*

14 Zen zep Kristus nëno mae mo weinak tilki- nen dikim hwëna hë'ho gwibinni insa hlaun hup, Alap mensa Abrahamsa gu-guk gwe-blakake, sap Yahudi zi, sap Yahudi srëm zi. Zen kirekam Alap Zën syal gwibirki- dekam de Yesussu de taïbli gweblan nakon Alap zëre mo Enhosa zer gwizimdin hip, men kirekam Zëna gu-guk gwibirida gwekake.

Mae hap de ol: Alap mensa Abrahamsa gu-guk gweblaka, Musa hwëna bëjen hyanak wet gulsublun.

15 Aya-wal oso-wal, nëno mae mo ngirinnik ki zini aha zi niban ola aha-en nul gwenan. Zi de wal bose zeban ba mae hap olsa aha-en unni, hwëna hyanak aha zi bëjen zëno nik mo ol aha-en unni insa wet gulsuzimdin.

16 Zep Alap mo Abrahamsa de gu-gublunna in hen kirekam. Zëno

nik mo aha-en un hyanak aha zi bëjen wet gulsuzimdin. Dekam Alap Abrahamsa totoresa anakan gu-guk gweblaka,

“Ëe asa hë'ho gwibinni eno auyan hap golblal.”*

Alap mo olak hom anakan lwak, “Ere mo auyan-tane wal hap asa golzim.” Dekam enlalana beya zi hip. Hwëna Zen anakan gu-guk gweblaka, “Ere mo Auyan-tane hap asa golblal.” Enlalana Zini aha-en. Zen Kristus.

17 Zep zëno enlalana a kirekam moye: Alap nonol Abrahamsa gu-guk gweblaka, ki zep hwëna tahunna 430 enkam damank. Ki zep hwëna titî tabin ola Musa hap golblaka. Zep mensa Musa Bak hap hyanak golblaka, zen bëjen wet gulsun- mensa nonol Abrahamsa gu-guk gweblakaye.

18 Sap Alap hom anakan Abrahamsa gubluka, “Titî tabin ola an sane ang gwe-gwe'anka, ki asa hë'ho gwibinni ebe hap golblal.” Kirekam de gu-gublunanam, zen ki totoresa de golgu-guk gweblankam hom nwe-mase gwe'an. Zen ki hwëna syalsa de wei yul soneblan makan maka nwe-mase gwék. Hwëna Alap Zen kwasang-kwasangna, zep totoresa de golblan hap gu-guk gweblaka.

Mae hap de ol: Alap kire hap titî tabin olsa zi hip golzimki.

19 Kirekam insa lwak, ahakon sa hwëna ëgul, “Ki hwëna Alap ba hap titî tabin ola insa Musa hap golblaka?” Zen hwëna mae hap titî tabin ola insa mas gulzimki: Dekam de tîngare zi hip zëre mae mo karek-kareksa goltrei gwizimdin hip. Hwëna Yesus in Abraham mo Auyan-tanena mensa gu-guk gwe-blakake. Zep Alap insa titî tabin ola golzimki, zen Yesus de hatazan srëm ennak de desan ang ta gwen

* 3:12 3:12 Im. 18:5 * 3:13 3:13 Ul. 21:23 * 3:16 3:16 Insa Paulus Kej. 12:7nak dena ale gulku, zen Abraham zëre mo “sipni kore zi hip” de hë'ho gwibin nika golzimdin hip dena, ahaksa golblan hap dena. Ibrani olkam, hen Yunani olkam de li yul sonenna, bëjen anakan dam gulsun, “Sipni kore zini in, san aha-en? San beyana?” Hwëna Paulus mo tawa tabinni awe, enlalana zen aha-ere Zi hip.

hap dena. Zep titi tabin ola in bol-zaun tangan naka hom. Diki men desa nonol Abrahamsa gu-guk gweblaka, zen diki zen- bol-zaun tangan wenyaye.

Titi tabin ola in Alap Zën hom Musa hap golblaka. Zen hwëna zëre mo dam taha nakore zi ayang nul gweblak.

²⁰ Hwëna Abrahamsa kim gu-guk gweblaka, zen aha mae hom ayang nul gweblak. Zen Zën tangan gu-guk gweblaka. Zep man dam gwesin: Abrahamsa de gu-guk gweblanna in zen tangan nëbe mae hap bol-zaun gwizim'in.

²¹ Hwëna ahana maka anakan gulsu'ura, "Ki hwëna Abrahamsa de gu-gublun naban Musa mo titi tabin ola ban hom apde në'an." Hwëna kirekam hom! Zen man apde në'an. Hwëna Alap hom titi tabin ola golzimki- dekon de ëngaya gwen hap denaye. Kirekam de lwa'anam, nen emaka desan de ang ta gwenkam kitak nënaka ngaya labi'in, hen dekon emaka Alap mo nwenak ëdakasti'in.

²² Hwëna kirekam bëjen. Sap Alap mo olak man ale nuk,

"Kareksa de gol gwen hap de sosonna mes tïngare zisi tahalebik."*

Zen in zep, Alap aha-en tangan ëngaya gwen hap de orana nëbe mae hap kles tyasizimki- in kim Abrahamsa zëre mo Auyan-tane hap dena gu-guk gweblakaye. Zep men zen zëno Auyan-tanena Yesussu daibli gwebla'an, zen zen en Abraham mo auyan-tane walyak bitï gwe'an.

²³⁻²⁴ Yesussu de taibliBlan hap dena insa kime tame ul srëm gwëk, nen dekam sekola walas mo kime lowehe gwëk. Musa mo titi tabin ola in dekam nësa irik gïl gwëk, hen guru makan tawa ta gwibik- hëndep Alap de ëngaya gwen hap de ora ësenä insa kles tyasizimdinnik dep. Alap insa titi tabin ola golzimki, zen

dekam de guru makan nësa Kristus osan dep golëgwëhan hap- nen dikim Kristussu de taibliBlankam Alap mo nwenak ëdakasti'n hip.

²⁵ Zen in zep, nen kime Yesussu laibliBlan, nen dekam san de sekola nakon de ëtamat gwenna kiye. Hen dekam home etan dwam eibi'in- titi tabin ola in de nësa irik gïn hïpye.

²⁶ Nen kim Yesussu anakan laibliBlan, "Zen Zen- nësa de ngaya tabin hip de Zi niye," dekam zebe ëraha-en gwëk. Dekam zebe hen Alap zëre mo hanan tabin walas hap ëjowëk.

²⁷ Hen emsa kim Zëno bosekam baptis dabik, dekam zebe hen anakan enaka olëtrëBlan, "Ëe mesë Kristus hun zeraha-en gwëk." Zep em angkam Bian Alap mo nwenak san de Yesus Zëna kiye.

²⁸ Zep angkam nen kitak Alap mo nwenak aha-en. Zen hom nësa nwekam anakan golëake gwenda, "An Yahudi wal.

An Yunani wal.

An zi mo tana iltikinnik de babu gwen zi.

An tana iltikinnik de babu gwen srëm zi.

An zi.

An we."

Hwëna Zen aha-ere nwe-masekam anakan nësa kara ta gwibirida, "An ano Tane naban de zeraha-en gwen zi."

²⁹ Em de kirekam Kristus hun zeraha-en gwenkam, dekam em hen mese Abraham mo Auyan-tanenak bitï gwëk. Zep hë'ho gwibinni mensa Alap Abrahamsa gu-guk gweblaka, zëre mo Auyan-tane hap de golblan hap dena, ki em hen esa ulin.

4

¹ Ahaksa anakarekam: Walasna, bi zik de tinkim, dekam bi zik mo bi gwibin kire-kirena zën sa kitak bi gwibiri. Hwëna walasna in de nama betek nik gwënkam, zen iye zik mo tana iltikinnik sa gwë gwera- san de babu gwen zini kiye.

* 3:22 3:22 Rom. 3:9-19; Mzm. 14:3; 53:4

² Kim de hata'ak yaklana mensa bi swe zem dam tasiki, tahunna kim de sowe henkam altilsibli'ak, zen dekam sa bi swe zik mo kire-kire hli tan danna zen hwena bi gweblan dala. Nama de betek nik gwennak, dekam aha zi sa mam dal.

³ Nen hen ki kirekame egwek. Nen menkam walas betek mo kime lowehe gwek. Nen dekam namae auhu-kama en hap de enlala naban lowehe gwek, hen dowal-dowal nesä bi neibirida gwek. Zep nen dekam namae titi tabin olkam de nesä walas betek mo kim akan-akan gwibirida gwen hap edwam gwegwek.

⁴ Hwena yaklana mensa Bian Alap dam tasiki, zao kim hatak, dekam zep Tane zemka zer soneka. Desa dekam zep Yahudi we jaha gwek. Hendep beteknak Zen hen Musa mo titi tabin ol san ang gwe zaheka.

⁵ Zen kitak Alap mo dwam gwibin sin ki lwak- dekam de nesä Musa mo titi tabin ola kon hil ti sonebin hip, nen dikim Alap mo hanan tabin walas hap ejowen hapye.

⁶ Eiwa, nen an Alap mo hanan tabin walas. In zep Tane zik mo Enhona zer soneka- nenä mae mo enhonak de ing gwehen hapye. Zen in zebe enho nakon anakan en sone gweblanan, "Bian, ano Bian."

⁷ Zep nen angkam walas beteksa de aha zi hanan tan mo kim home lowe he'an. Nen an hwena angkam Alap onak de zise gwen walas. Zen zep esa eiwa he'ho gwibinni insa hla kul- mensa Zena anakan gugubirida gwekaye, "Ee asa kiresa ere mo walas hap golzim."

Paulus kim anakare hap ngalap gwibiridakake, "Zen ba hap etan karek san dep lwanda ha'an?"

⁸ Galatiak de zi, ee ama emsa ngalap gwibirida'an. Em ba habe Alapsa nabakam hli la'an? Em kime Alapsa tame la sräm gwe'ak, em dekam totore yang tasibin dowal-dowalsae betek eibirida gwek- san de zebon mae de ebaru gwenna kiye.

⁹ Hwena em sap mese ner hom eiwa de Alapsa tame lak. Ahaksa sap diki Alap mes ebe mae hap golzimki- dekam de Zenaka tame tan hap denaye. Zep em ba habe angkam etan auhu-kama enlala san dep lwanda ha'an?- dowal-dowal dikim etan emsa bi gwibiridan hapye. Em san ema edwam gwe'an?- zi mo yasik tabin sin de ang tankam de etan emsa totore titi tabin olkam tahalebin hipye.

¹⁰ Zep hendep angkam ema Hari Sabat san, sap yakla yawal, hen ben yawal mae hap de syal san ang ta gwe'an.

¹¹ Ki san ha ee waba habä ebe mae hap de dawem hap danna sin gwegwek?!

¹²⁻¹⁴ Aya-wal oso-wal, ee ama emsa gubirida'an: Ano kim emki lowehe gwen. Ee kimä eban mae golölowehe gwek, ee homä Yahudi zi mo kirekam de lowehen san gwë gwek. Zep angkam em bahem desan ang ta gwen. Em sap nonol dawemkame asa kwang la gwek, hen home mae asa husus e gweblak. Emki etan kirekam asa gwëblan. Em dwan tawa nakake: Ee dekam ama sang-sang gwek. In zebë nonol ebon mae gwë gwek. Hendep dekam zebë ol dawemkam emsa tonbirida gwek. Ano sang-sang habe ehir-hir gwe-gwek, hen eno mae mo syala dekon zep mam gwe-gwek. Hwena em dekam home asa husus e gweblak, hen home asa ulop e gweblak. Em hwena gola kon dawemkame asa kwang la gwek-men kiye, Alap mo dam taha nakore zisi de kwang tanna. Hen ema asa blikip eisik gweblak- san de Kristus Zen de zini gwe zanna kiye.

¹⁵ Em dekam dawemkame asa isrip-sri e gweblak. Hwena angkam home! Ee tawana: Menkam em sap ema edwam gwe-gwek- ere mae mo nwesa de abe hap teisyablan hap, ee dikim etan dawemkam kara gwe-gwen hap!

¹⁶ Hwena angkam sap ola an eiwa

de tangan nakaë ale gulzim'in, zep em ema yap asa enlala ëbla'an, "Zen ano mae mo jal zi."

¹⁷ Angkam aha zi dan syal-syala ban emsa haen-haen neibirida gwe'an, "Nen ki Musa mo titi tabin ola an san ang ta gwen." Hwëna zen enlala karek naban! Zen man em dikim abon onakon wet so gwen hap ëdwam gwe-gwe'an- dekam de zëbon mae en osan enlala syal-syala ban ang ta gwen hapye.

¹⁸ Banakare enlala dawem san de ang tan hap, em sap esa dan syal-syala ban ang ta gwer- sap ëe de iwe gwënnak, hen sap ëe de iwe gwën srëmnak. Hwëna karek san dep bahem!

¹⁹ Ano walas, ëe ama emsa dawemkam ngalap gwibirida'an. Eë ama emsa anakan kil tibik, "Zen mes-am Kristussu de taibliblannak ëtatete gwek." Hwëna angkam ema etan walas betek san dep lwanda ha'an.

²⁰ Diki angkam aen de eban mae etan golëgwënkam bap. Ki amaka samkam emsa anakan golëton'an, "Ba nakone ki ëgwë'an?" Hwëna angkam ëe ama anakare jakal enlala naban emsa topse gwibirida'an, "Zen bawalkam sa tame nul?"

Paulus kim Hagar ne Sara nebon ola gulk sun blaonzimkike:

²¹ Asa sane lak!- em in zene Musa mo titi tabin olsa de nihin dohon-hon makan wei yulsuk gwen hap ëdwam gwe'anye. Em san home aïsili ansa dam ulsuk- mensa Musa hen ale gulkuye?

²² Zen a kirekam mo: Abraham zen walasna dan wë soka. Ahana mas wenyä Hagar hon wë taka. Zen tana iltikinnik de babu gwe-gwen we. Ahana nonol we zem Sara hon wë taka. Zen tana iltikinnik de babu gwe-gwen naka hom.*

²³ Tana iltikinnik de wenyik mo walasna, Ismael, desa totoresä jaha gwek. Hwëna Sara mo dena kip, Alap man Abrahamsa gu-guk gwe-blaka, "Sara sa walassa wë tal."

Hëndep dekam zep ki bogolak owas hap Isaksa jaha gwek.

²⁴ We darena in ama ki gulk sun de ol blaoran hap guzimmn. We darena in, zen Alap mo zi niban de ol ziaha-en gun dare naban de apde son. Tana iltikinnik de wenyä Hagar mo walasna, Ismael, zëno auyantane walya zen hen tana iltikinnik sa lowehe gwer. Zen men kiye- men zen titi tabin ol san ang ta gwenan, mensa Alap kwatapna Sinaik Musa hap golblakake. Zen desa nihin dohon makan wei nulsuk tine gwenan- tana iltikinnik de zi mo kim.

²⁵ Zep Hagar Bak, zen kwatapna Sinaisa de enlala gweblan- Arab mo langnak de kwatapna insa. Zen tana iltikinnik de we, hëndep auyan-tane wal zem hen kirekam sa lowehe gwer. Hagar Baksa hen Yahudi mo ë yawala Yerusalem han de apde son. Sap Musa mo titi tabin ola in mes zëwe de zini hulek.

²⁶ Hwëna nëno mae mo anena, zen ngatan zi mo langnak de Yerusalem. Zen zëna wenyä, Sarasa de enlala gwibin. Zen tana iltikinnik de gwën wesya hom. Zep nen hen kirekam de ëgwën- banakare titi tabin ol mae de nësa tahalebin srëmkam.

²⁷ In zep Alap mo olak Sara Bak hap dena anakan ale nuk,

"Em sap walassa de wë tan srëm we, hwëna angkam esa isrip-sri gwegwera!

Em eisbir anen srëmkam gwë gweka,

hwëna angkam esa Alap hap de teryä ta gwera!

Sap eno walasna menkam hom, hwëna angkam eno walas mo beyana man tangan taman kini'an.

Tingare ahakore we wal mo walasna man lwala he'an."*

²⁸ Zep aya-wal oso-wal, nen kitak Sara mo walasna Isak mo kime lowe he'an. Zen Alap mo gu-gublun naka Sara jaha gwek. Nen hen kirekam zebe Alap mo gu-gubiridan nakon

* 4:22 4:22 Kej. 16:15; 21:2-9 * 4:27 4:27 Yes. 54:1

zëre mo hanan tabin walas hap ëjowe'an.

²⁹ Hwëna zao zep lwak: Mas wenya insa totoresa Ismaelsa wë tak, zen zep hwëna Alap mo Enhokam de wë tan zini Isaksa karek ta gweka. Zen in zep ki hëndep angkam kirekam lwa gwe'an: Men zen totore enlala san ang ta gwenan, zen zep karek da gwibirin- men zen Alap mo Enho san de ang tankam zëre mo walas hap ëjowe gwenanye.

³⁰ Zen zep Alap mo olak Abraham hap dena anakan lwak,

“Tana iltikinnik de mas wenya insa tane zeban emki zialsa sonen. Ki hwëna em de tinkim, Ismael sa eno kire-kire hli tan danna Isak han bi ëblan dala. Sap zëna wenya in mo walasna, Ishak, zen diki zen sa kitak bi gwibiri.”*

³¹ Zep aya-wal oso-wal, nen an tana iltikinnik de we mo walassa hom. Zep home Musa mo titi tabin ola nihin dohon-hon makan wei kul-suk gwenan. Nen an hwëna tana iltikinnik de gwën srëm we mo walas, sap nen Alap mo Enhosae ang ëbla'an.

5

Mae hap de ol: Titi tabin ol de emsa tahalebin srëmkam emki tatem ëzauk gwen.

¹ Kristus mes emsa ëpba titi tabin ola kon hil ti sonebirki, zep bahem etan lwan dahan- dekam de titi tabin ola in etan emsa tahalebin hipye. Tahalebin srëm nik emki tatem ëzaun.

² Emki ësane gwen! Em de ere mae mo to mipa blom tasibinkim, ëe, Paulus, ama emsa gubirida'an: Em dekam mese Kristus onakon wet so gwenan.

³ Ama etan emsa gubirida'an: Eno mae mo to mipa de blom tasibinkim, ki Alap sa emsa gubiridala, “Dikire tingare Musa mo titi tabin ola insa su nul sone gwek.”

⁴ Em dekam anakane ëalp gwe'an, “Ëe asa titi tabin ol san de ang ta

gwenkam ëre mae mo ssonkam Alap mo nwenak ëdakastil.” Hwëna dekam em Kristus mo kwasang-kwasangna ema hli ku'in!

⁵ Hwëna diki tangan Alap ensa de blol gweblankam sam gwesi'in. In zebe nen anakare enlala hohle ta gun nuban Alap mo Enhonak ëyaing gwe kini gwenan, “Zen Zen sa ano gwënna syal gwibir zahera- ëe dikim zëre mo nwenak dakastin hip denaye.”

⁶ Sap nen mese Kristus hun ëraha-en gwek- in kime laiblihlakke. Zen in zep Alap hom nësa anakan karatda ta gwibirida, “An to mip blaonsublun zi,” ahaksa, “An to mip blaonsublun srëm zi.” Hwëna diki aha-en tangan zëre mo nwenak bol-zaun gwe'an: “San ha zini an man zëno mae mo Asa de taibliblanna aha zisi de kwasang gwibirida gwenkam noltrei gwizimnin? San ha hom?”

⁷ Em sap menkam ora dawem sane ssonkam sek gwe'ak. Hwëna nara emsa isinsibiridaka?- dekam de hwëna ora srëm san ëgwa gwe kinin hapye.

⁸ Zëno mae mo tawa tabinni in, zen Alap onakore naka hom- men Zen diki emsa kwang guludakaye.

⁹ Tawa tabinni in em ema tim uk, “An betekna. Ëe sap asa desan hen ang tal.” Hwëna zen ragi makan sa ebon mae mam gwer- roti mang-mang gunsu de hop gun makan.

¹⁰ Hwëna ëe tawana: Bian ei-wakam emsa hlil inki, zep ëe ama emsa tame tabi'in: Em molye aha ora san hëndep denaban ësyalhek. Alap sa zini insa karek tala- men zen emsa men-man ta gwibi'iraye.

¹¹ Hwëna aya-wal oso-wal, ëe de nama zisi anakan tonbirida gwenkam, “Emki Yahudi mo ëpba titi tabin sin ang ta gwen- to mipa de blom tasik gwizimdinkim,” ki molya Yahudi zini asa karek da gwe'anam. Hwëna in zep asa karek da gwenan- sap ëe ama tonbirida gwenan, “Mensa Kristus nëbe mae

* 4:30 4:30 Kej. 21:9-10

hap te-lidak sonnak syal gwibir-zimki, zao en emki anakan éyaing gwe kinī gwen, 'Èe dekon en asa Alap mo nwenak dakastil.' " Yahudi zini man desa husus nei gwibirin.

¹² Men zen emsa blos dabirida gwe'an, zèbe mae hap hom sam gweš'īn- to mip ensa de blom tazizimdinkim. Diki to naban hēndep bol sik niban de kitak blom tazizimdinkim bap! Dekam maka èsam gweš'īn.

¹³ Aya-wal oso-wal, Alap mes emsa alal gulku- dekam de tītī tabin ola kon èhīl gwe hanan hap. Hwēna bahem anakan èenlala gwe-gwen, "Èe an hīl tī sonen nikē gwē'an, zep èe sap asa ère mo tim nikore hole-hle san ang gwe-gwer." Hwēna anakan emki èenlala gwe-gwen, "Èe an hīl tī sonen nikē gwē'an, zep Kristus onakore kwasang tola ban anik ère mo Kristen bose walya mas gwibirida gwek."

¹⁴ Sap Musa mo tītī tabin ola kitak ausuna ola an dekon- men zen anakan lwak,

"Zi bose omka em kwasang gwibirida gwen- san de enaka de kwasang gweblanna kiye."*

¹⁵ Hwēna em de nama enaka olkam hit ti gwibinkim, dekam ere mae mo aha-ere enlalakam de lowehen hap dena sa hom gwer!

Alap mo Enho ensa de blol gwe-gweblan hap de ol:

¹⁶ Èe ama emsa gubirida'an: Alap mo Enho ensa em anakan blol gwe-gweblan, "Zen diki Zen sa asa dam tasik sone gwer." Dekam ere mae mo tim nikore hole-hlena molya emsa golégwa gwe kinī gwek.

¹⁷ Nère mae mo tim nikore hole-hlena, zen man baes gwe-gwe'an- Alap mo Enho mo dwam gwibin sin de ang gwen hapye. Hen kirekam, Alap mo Enhona man hen baes gwe'ara- nère mae mo tim nikore hole-hle san de ang gwen hapye. Zen man nēno mae mo enhonak

īlman è gwenan, zep nen molye aha-ere enlalakam nère mae mo dwam gwibin sin syal ei gwibik.

¹⁸ Hwēna Alap mo Enho de nēsa enho nakon golégwē gwenkam, dekam èpba tītī tabin ol de nēsa golēinik gwen hap home èdwam gwe-gwe'an.

¹⁹ Nère mae mo tim nikore hole-hle san de ang ta gwenkam, dekam a kirekame mo syal ei gwibirinye:

kahalo gwen,
wesya de lirak oson,
swi hap de enlala enkam de gwē
gwen,

²⁰⁻²¹ yang tasīn alapsa de betek gwe-
blan,

zisi de hēp tyan,
wal bose zemka de husus gweblan,
èol tetek gwen,

hen nop-nop gweblan.
Ahana hen, zè-en de mam gwen hap
de enlala gwe-gwen,

aha hlik naban de aha hlik nik
ba mae hap zēnaka gīl-gīl
gwibiridan,

hen aha hlik nik de langa tasibin.
Ahana hen, zi mo kire-kiresa de
hole gwibin hen zep de husus
gweblan.

Ahaksa ere mo kire-kiresa de
inik gwibin hip de aha
zisi anakan husus gweblan,
"Mana golanka."

Ahana hen, ho mamaksa de otdeb-
landa gwen,
syan-syan en hap de enlalakam de
gwē gwen,

hen tīngare ahakore karek-karekna.
Èe ama orep emsa tawa ta gwibik,
hen etan angkam ol tan-tanna ansa
golzim'in: Zini men zen kirekam de
karekna nulin halasen gwenan, zen
toton molya Alap mo īrik gīnnik bitī
gwek.

²² Hwēna Alap mo Enho de
zergwēnkam, dekam a kirekam mo
wet so gwenanye:

kwasang enlala,
isrip-sri enlala,
umlæ enlala,
jakal-jakal srēm enlala,

* 5:14 5:14 Kel. 20:12-16; Im. 19:18; Ul. 5:16-20

zisi de mas gwibirida gwen hap de enlala,
kae-kae enlala,
aha zisi de ahap tan srëm hap de enlala,

²³ sae-sae enlala,
hen zënaka de zerinik gwen enlala. Kirekam de gwën hap dena, kina ki man Musa mo titi tabin olak jalse gwek!

²⁴ Zini men zen Kristus hun zeraha-en gwenna, zen mes zëre mae mo tim nikore hole-hlena Yesus hup de te-lidak soblannak makan nulink. Zen dekam zep anakan neis gwibirin, "Ano tim nikore hole-hlena mes Yesus goltilkä."

²⁵ Sap Alap mo Enhona Zen kirekam de ëliwehe gwen hap dena nöp gol gwizimnira, zen in zep nen diki Alap mo Enho mo dwam gwibin en san nen ang ta tine gwen.

²⁶ Zen in zep, sap nen Kristussu de blol gweblan enkame ëngaya gwe'an, nen bap nen anakan ëbola-bola gwe-gwen, "Ëe an zenë sërkam aha zisi kwei-kwik gu'un. Aha kore zini wakin, aban apdenak hom." Hen bap nen nëre mae mo Kristen bosenana anakan husus gwibirida gwen, "Zen sa hwëna jematnak abon onakon teipsili."

6

Kristen bose zemka de dam tasik sone gwibin hip de ol:

¹ Aya-wal oso-wal, ere mae mo Kristen bosesa de banakare karek mae wëwe heblanna, men zen ebon mae onakon Alap mo Enhosa de ang gwe-gweblan wenya lowe he'an, zen zen de zini insa dam dasik sonek. Hwëna enlala sae-saekam em dam tasik sonen, hen anakare enlala tatete naban, "Abon mana hen zëno karekna in hliminnink."

² Emki kirekam ere mae mo Kristen bose wal mo nihinni tensik gwizimdin. Nënaka de kirekam kwasang gwibirida gwenkam, dekam kwasang hap de Kristus mo titi tabin ola in sane ang ta gwe'an.

³ Hwëna zi de anakan enlala gwenkam, "Ëe ëre mo gwën dawem nakon asa ëre mo Kristen bose walya kwei-kwik gul, hen ëe dekam asa Alap mo nwenak mam gwer," kirekam de bolte-boltekam enlala gwenkam, zen mes zënaka boton tanda.

⁴ Diki aha zisi de enlala gwibiridan srëmkam emki ena en naka karatda ta gwibin. Kirekam esa ësam gwesil.

⁵ Sap Alap molya anakan nësa karatda tabirki, "Zini an san ha man aha zisi kwei-kwik gulku?" Zep diki ena en naka em karatda ta gwibin.

Mae hap de ol: Dawemsa de aha zi hip golzimdinni, zen men kiye-ngatan zi mo langnak de obwagasa eiyas ginni.

⁶ Men zen emsa Alap mo olkam tawa da gwibirin, emki te-alakam hen aha kire-kire maekam mas gwibirida gwen.

⁷⁻⁸ Emki ëenlala gwen: Ena men kirekame okamanak awe eiyas la'ak, zen kire enkam esa hen lamkam zëno eini hla kul. Zep anakan bahem ëkil gil gwen, "Ëe de ëre mo tim nikore hole-hle san syal gwe-gwenkam, zëno eini lamkam aha nwe-masekam asa gulin." Kirekam bahem enaka boton ta gwibin. Sap Alapsa molye boton lak! Hole-hle san de syala in mo eini hwëna syauk blanak de gwë gwensa esa hla kul. Hwëna em de Alap mo Enho mo dwam gwibin sin syal ta gwenkam, zëno eini lamkam hëndep de ëngaya gwen hap denaka esa ulin.

⁹ Zen in zep, aha zi hip de dawem gol gwizimdinni, bap nen ëblalen gwe-gwen. Sap zen lamkam dep de obwaga eiyas gin makan. Nen de ëblalen gwen srëmkam, ki lamkam esa zëno eini ulin.

¹⁰ Zen zep, nen nama de awe lowehe gwennak, nen dawemsa tingare zi hip gol gwizimdin- nonol tanganna nëre mae mo Kristen bose wal hap.

Aumwa hap de ol zim-zim:

11 Aumwa hap de alena ansa emki hlaun: Ale mam-mamkam dena an, zen ëre mo ale gunnu. *

12 Yahudi kore Kristen zini men zen emsa bolte enlala naban menman da gwibirin bahem salbirida gwen. Anakare ola bahem salbirida gwen, "ËKristen gwenkam nonol Yahudi hon em bitì gwen- Musa mo titì tabin ol san de to mipsa blom tasik gwibinkim." Hwëna zen anakare enlala aning tan naban emsa kirekam titì da gwibirin, "Nene kitak Yesus hup de te-lidak soblan ennak ëyaing gwe kinì'ak, dekam Yahudi zini sa Kristen zini nësa husus neibirida gwer."

13 Hwëna Yahudi Kristen zini in, zëno mae mo to mipna sap orep mes blom dasibir-zimk, hwëna zëna hen hom tingare Musa mo titì tabin ola insa sul nul sone gwenan. Hwëna zen em de hen zëno mae mo kim ëgwë gwen hap ëdwam gwe-gwe'an- dekam de ëKristen gwen srëm Yahudi zi hip emsa anakan golëtrei gwizimdin hip, "Zini an mes nëbon mae bitì gwer." Zen mae en hap ki emsa kirekam neibirida gwenan- dekam de Yahudi bosa zik zëno mae mo bosesa boltere gulzimdin hip.

14 Ëe hwëna homë ëre mo bosesa de boltere gun hup dwam gwe-gwe'an. Ëe hwëna Bian Yesus hup de te-lidak soblan ensa de boltere gulblun habë dwam gwe-gwe'an. Sap ëe ëre mo gwëna anakanë enlala gwe-gwibi'in, "Asa mes Yesus hun te-lidak sonnak makan nosoink. Zep ano auhu-kama tim niban holehle naban mes Yesus zitilki." Zen in zep hwëna auhu-kama enlala zini asa hom dwam në gweblanan, sap ëe homë auhu-kama mo enlala san ang gwe-gwenan.

15 Alap hom zisi anakan karatda ta gwibirida, "Zen to mip blaonsublunna," ahaksa, "Zen to mip blaon-

sublun srëmna." Diki Zen anakan karatda ta gwibirida, "Zini an san ha ëre mo Tane naban de zeraha-en gwenkam mes ëse yang tasibin makan ëliweher?"

16 Men zen kirekam ëliwehe gwenan, dikire aha-ere enlalakam de lowehe gwen hap dena hen kwasang-kwasangna zëbon mae onak lwa gwek. Tingan men zen kirekam Kristus en hon ëyaing gwe kinì gwenan, zen zen- Alap mo hlil irin tangan wenyaye. †

17 Hwëna hyanak bap zen etan zini asa anakan blos tablan, "Em home dawemkam Kristussu ang gwebla'ara." An ha ki, ano timnik wei-weina beyakam ëlwa'an- men zëwe Yesus hup de jal hap asa lek-lek da gwekye! Zen zep dam gwesi'in, "Ëe eiwa ama tana wei san zertro'an."

18 Aya-wal oso-wal, dikire Bian Kristus Yesus mo kwasang-kwasangna ebon mae onak lwa gwek. Amin.

* **6:11 6:11** Paulus mo nwena man yap hwalen-hwalen nëblak, zep ale mam-mamkam ale gulku. (Emki hlaun: Gal. 4:15nak.) Zen zep aha zi sekretaris makan zëno olsa nonol lonesen nakon hëndep 6:10nak dep ale gulbluka. Hwëna ayat 11 nakon zën ale gulku. † **6:16 6:16** "Alap mo hlil irin wenyaya," Paulus "Israel" kam awe ale gulku. Hwëna bosena in, gulk sun de enlalana kirekam.

Paulus mo surat Efesusk de Kristen zi hip

¹ Efesusk de Alap hon de étal gwesin zi hip, men zen Yesus onak tatem ézauk gwenanke,

Paulus onakon. Alap mo dwam gwibin sin ki lwak, zep Kristus Yesus asa dam tasiki- zère hap de olsa dikim gol halada gwen hapye.

² Dawem! Nère mae mo Bian Alap ne Bian Kristus Yesus ne sa kwasang-kwasang zemka mamkam ebe mae hap ol gwizimdi. Hen nen zère nik mo taha terenak esa lowehe gwer.

Mae hap de ol: Èngaya gwen hap dena, zen kitak Kristus hun de zeraha-en gwen nakon nèbe mae hap hata gwizimnin.

³ Nen Bian Alapsa boltere tan, Bian Kristus Yesus mo Biansa, sap nen mese Kristus hun èraha-en gwek. Zen zep ngatan zi mo lang nakon nèbe mae hap enho nakon dikim èngatan gwen hap dena sul sonenkam gol gwizimnira.

⁴ Sap Zen mes auhu-kamana ansa de yang gulsun srèmnak nèsa anakan dam tasibirki, “An zen sa ère mo Tane naban de zeraha-en gwenkam ère mo nwenak édakastil hen enho kles gwesin srèmkam lowehe gwer.”

⁵ Sap Zen nèsa kwasang gwibiridaka, zep nonol lonesen nakon mes ki nèsa anakan kalang gwibiridaka, “An zen sa ère mo Tanena Yesus mo syala kon ère mo hanan tabin walas hap èliwehe gwer.” Zen kitak zère mo hamal hap de kalang gwe gun sun ki lwak.

⁶ Zen in zep sa tingare zini zèno bosena teip nulsuk gweblal, sap Zen mes zère mo sèrkam de kwasang-kwasangna kirekam goltreizimki. Zère mo dang tininak de Walasna Kristus hun de zeraha-en gwenkam, Zen dekam kwasang-kwasangna

insa nèbe mae hap totoresa gol gwizimnira.

⁷ Sap nen de Kristus hun zeraha-en gwenkam, dekam nen ema okamanak de karek-karek nakon èhil gwe hana gwenan, hen nèno mae mo kirekam-kirekam karekna man nèp tap gulsuk gwizimnira. Sap Tane zik mo kala in dekam nèsa ngan tasik gwibirida- men zen telidak son nakon wet soblakke. An kitak Alap zère mo sèrkam de kwasang-kwasang nakon ki kirekam lwak,

⁸ zep totoresa nèbe mae hap kwasangna sabak gulzimki. Alap, eiwa, sèrkam de enlala blal tanganna hen kitak tame gul gwenda,

⁹⁻¹⁰ Zen in zep angkam zère mo hamal hap de kalang gwe gunnu insa goltreizim'ira. Zen desa menkam man zi hip aning gul gwizimki. Hwèna Zen hen orep mes anakan kalang gweka, “Kim de ano kalang gwen yaklanak zau'uk, dekam asa ère mo Tanena zer sonezim- zèno mae mo karek-kareksa dikim ngan gulsuzimdin hip. Zep Deban de zeraha-en gwen wenyà, desa kitak aha-erenak asa siri gulsul- sap ngatan zi mo langnak de wenyà hen okamanak de wenyà. Kristus Zèn sa kitak nol gwibiridala.”

¹¹ Mensa Alap kalang gwe guku, “Èe asa kiresa ère mo walas hap golzim,” zen hwèna kitak Kristus hun de zeraha-en gwenkam nèbe mae hap hata gwizimnin. Sap Alap nonol lonesen nakon kirekam dep nèsa kalang gwibiridaka, hen Zen kitak kirekam syal gwe-gwibi'ira- dekam dikim zère mo dwam gwibin sin kitak jowen hap. Zèno dwam gwibinni, zen an zen:

¹² Nen an zene nonol Kristussu blol èbla'an, tingare zi de nèsa hlauludankam, zen dekam sa hen Alap mo bosena teip nulsuk gweblal.

¹³ Zen in zep hèndep Alap mo kalangna ebe mae hap kirekam lwak. Em kime eiwa de ol dawemna èsane gwek, emsa de ngaya tabin

hip dena, em dekam zebe Kristussu laibliblak. Zep in kime Kristus hun kirekam ëraha-en gwek, Alap dekam zep eno mae mo enhonak aha-en aha-enkam anakan ale tabir-zimki, "Em an ano bi gweblanna." Maekam ale tabir-zimki- zëre mo Enhosa de ing ta sonezimdinkim, men kirekam sap orep gu-gubirida gwekake.

¹⁴ Alap Zen anakare gu-gubirida gun nuban zëre mo Enhona nëbe mae hap ing ta sonezimki, "Ëe asa lamkam ebe mae hap tingan sul sonezim- mensaë ëre mo bi gwibiridan walas hap kalang gwe gukye." Zep Bian Alap kim de kawesin nikon tingan gwiswe sone'anaka, zen dekam sa ki lwal. Dekam kitak Ngatan Zini Alap mo bose ensa esa teip ulsuk gweblal.

Paulus kim Efesusk de Kristen zi hip Alapsa abe takake:

¹⁵ Zen in zep, ëe kimë emsa anakan salbiridak, "Zen man Bian Yesussu daiblibla'an, hen tingare Alap hon de étal gwesin wenya man kwasang neibirida gwenan,"

¹⁶ ëe dekam zebë ebon mae onakon zausun srëmkam Alapsa anakan gu sone gweblanan, "Em asa sam ta gwenda." Zep ëe homë Alapsa de gu sone gweblankam emsa eititi gwibirida gwenan.

¹⁷ In zebë Ngatan Zini Bian Yesus mo Bian Alapsa anakan ebe mae hap abe ta tine gwenan,

"Bian, ere mo Enho nakore enlala blala ing ta sone gwizim- hen Emsa dikim dawemkam tame tan hap denaye.

¹⁸ Hen Bian, dikire zëno mae mo enhona ëngatan gwizimk- dekakim anakan tame nul gwek, 'Ëe kiresa asa Bian onakon hla kul- Zëna men zep nësa kwang guludakaye.' Hen Bian, Emki enho nakon anakan hleng sosubirida gwen, 'Kirekam-kirekam dawemna mensa Ena ngatan zi mo langnak ere mo hlil irin zi hip hamal gulzimki, zen hë'ho gwibin tanganna.' Zen dekam sa

anakan hen tame nul, 'Eiwa, nen esa lamkam ulin. Molye ulin srëm gwek.'

¹⁹ Bian, dikire hen ere mo sërkam de sosonna tame nul gwek- men desa Ena Yesussu de taibliblan wenya kip gol gwizimniraye. In eiwa."

Sërkam de sosonna in Bian Alap mes nëbe mae hap goltreizimki-

²⁰ in kim Kristussu tin nikon ngaya takake. Dekam zep hëndep Desa gulk'nen tangan drëne seka- zëre mo dam taha san dekam.

²¹ Zep eiwa teipsin tanganna, Kristus Zë-en. Desa de kwë tanna hom tangan- tingare irik gin nikon, sap hen tingare teipsin-teipsin zi nikon, sap ngatan zi mo langnak de lowehe gwen wenya kon, sap hen angkam de okamana awe de lowehe gwen wenya kon, hen sap lamkam de okama ësenak de wenya kon.

²² Zep Alap mes kitak Kristus mo tahanak kang gulku, in zep anakan gubluka,

"Em an tingare Kristen zi mo nola Zen.

²³ Kitak de Kristen zini, Zen ere mo taha-tana mo kim sa okamanak lowehe gwer- san de ere mo timni kiye."

Zen in zep Kristus zëre mo timni insa hëndep tingare okama naban sul sone gwenda.

2

Nen mese apdekam Yesus mae han tin nikon ëngaya gwek:

¹ Nen menkam tok-tok makare nike lowehe gwek, sap dekam karek ensae ulin halasen gwek, hen Alap mo dwam gwibin srëm sane lowehe gwek.

² Sap nen dekam auhu-kama zi mo enlala karek-karek sane ang ta gwek, hen dowal mo kigisae betek ë gweblak- men zen gulk de dowal-dowala irik gi'irake, men zen ëihe nasen gwenanke. Zen in zen angkam golësyal ta'ara- zini men zen Alapsa betek nëbla srëm gwe-gwe'anye.

³ Orep nen hen deban mae apdenak- auhu-kama zi mo hole-hle san de ang ta gwenna, hen nère mae mo tim nikore dwam-dwam san de ang ta gwen naye. Zep nen hen dekam Alap mo jalake lowe he'ak- in kirekam tingare ahakore zini lowehe gwe'anke.

⁴ Hwëna eiwa, Alap mo kwasang-kwasangna mam tanganna, zep nësa sèrkam kwasang gwibiridaka.

⁵ Sap menkam nen an hen nère mae mo karek-karek nakon tok-tok makare nike lowe he'ak, hwëna Alap Kristus mae han apdekan nësa ngaya tabirki- Kristussu kim tìn nikon ngaya takake. Zep nen Alap mo kwasang en nakone ki èngaya gwe'an.

⁶ Sap Yesus hun de zeraha-en gwen wenyà nësa mes Alap Deban mae juwen zi mo lang nakon kap gul aneka. Zep nen angkam san de Yesus de nësa teipsin-teipsin zi makan ngatan zi mo langnak apdenak golèteinikirinni kiye.

⁷ Zen in sa kirekam kitak syal gwibirki, zen dekam de nësa ngein sin de kama èsenak anakan golètrè gwen hap, "Em an zen ère mo kwasang-kwasang nakon de èngaya gwen wenyaye." Sèrkam de kwasangna in, zen Kristus ensa de zeraha-en gwen nakon esa ki hla kul.

⁸ Zep nen mese Alap mo kwasang-kwasang nakon èngaya gwek- in kime Yesussu laiblihlakke. Nère mae mo syala kon home èngaya gwe'an. Zen Alap totoresà nëp gol gwizim'ira.

⁹ Nen home mae ba maena syal eibik- dekam de èngaya gwen hap denaye. Zep toton nara dep?- bola-bola gwenna.

¹⁰ Nen an sap diki Alap mo syal gwibin zi. Kristus hun de zeraha-en gwenkam, dekam nen san de èse yang tabinni. Nen in zebe dawemna syal ei gwibirin- men kirekam nëbe mae hap orep kalang gwe gukuye.

Kristus onakon nen mese èaha-en gwek:

¹¹ Zep em in zene Yahudi srèm zi ausu nakon èsaltik, emki ansa enlala gwe-gwibin: Emsa man Yahudi zini nenbirida gwenan, "Zen to mip blom tasibin srèm zi." Sap Yahudi zini zen zère mae mo to mip blom tasibinni in sa boltere nul gwenan. Hwëna zen sap zère mae mo tim ennak de syal. Enhona dekam hom wet gwesik gwizim'ira.

¹² Em menkam home Kristussu tame la'ak. Dekam em home Alap mo hlil irin zini bitì gwe'ak. Zep em dekam okamanak awe Alapsa de tame tan srèm nike lowehe gwek, hen em anakane èenlala gwe-gwek, "Èngaya gwen hap dena mensa Alap zère mo hlil irin zi hip gugubiridaka, èe molyè desa ulink."

¹³ Zep em menkam Alap onakon hen zère mo hlil irin zi nikon langanake lowehe gwek. Hwëna angkam em mese Kristus hun èraha-en gwer, hen Zen mes zère mo kalkam de ngan tasibinkim Alap onak emsa zon guludaka.

¹⁴ Zep Kristus Zèn mes nësa siri gulsuku— Yahudi zi niban Yahudi srèm zi niban, hèndep Zen mes nësa zère mo timnik aha-en gulku. Sap menkam Yahudi zi niban Yahudi srèm zi niban bëjen siri gwen. Hwëna angkam jal-jala men zen lang zip son makan nësa kles sok, desa mes Kristus jek-jak gulku.

¹⁵ Maekam jek-jak gulku: Zère mo timsi de golgunkum. Zen kim tilki, Zen dekam zep Musa mo titi tabin ola kitak nëbe mae hap sul sonezimki. Zep nen de angkam etan desan ang tan hap hom dakasti'in. Menkam Yahudi zini Musa mo ola in kon anakan dam nulsuk gwek, "Yahudi srèm zini bëjen Alap mo nwenak èoto gwesin." Hwëna angkam Kristus mes dare hlikna in sa zère mo timnik aha-en gulku- san de aha-ere zi aususa de yang tabinni kiye, nen kime kitak Zère han èraha-en gwekke. Zen dekam

zep hliwenna in kon nesa umlae tabirki.

¹⁶ Zëno te-lidak sonnak de tinni in, Zen dekam nëno mae mo hliwenkam de lowe henna insa aha-en gulku- dekam de Alap onak zëre mo tim makan lowehe gwen hap. Hen nëno mae mo gîl-gîlkîm de lowe henna in dekam zep goltîlki.

¹⁷ Zen in zep Kristus aha-ere enlalakam de lowehen hap de ol dawemna ansa nëbe mae hap goltatazim zika- sap orep de Alapsa tame tan zini abe mae hap, hen sap Alapsa de tame tan srëm wenyä ebe mae hap.

¹⁸ In zep Kristus onakon, sap Yahudi zini ëe, hen sap Yahudi srëm zini em, Bian Alap onak hatankam- sap Kristus mes Alap mo Enhona kitak nëbe mae hap hlë ta sonezimki.

¹⁹ Zen in zep em Yahudi srëm zini, em angkam zi mo ënak de ëmas gwînzî zisi hom, hwëna em an hen angkam lang bi tanganna- apdekam Alap mo hlîl irin zi nibanye. Em mese lalak wenyä in han ëiye gwëk.

²⁰ Nen an san de Alap mo gol. Men zen gola in mo moko makan ënwe-mase gwe'an, zen Kristus mo dam tasibin zi, hen Alap mo Enho nakore olsa de ayang gul gwîzimdin hip de zi. Kristus Zëna, Zen ngîrîn bol tenya Zen.*

²¹ Nen de deban zeraha-en gwenkam, dekam zebe ënwe-mase gwe'an- san de Alap zëre hap de golsa de ayang tabla song gwenna kiye, zao de lalak Zini Alap Zën gwë gwen hap.

²² Yahudi srëm zini, em hen Kristus hun de zeraha-en gwenkam dekam ema hen gola iwe de gol te makan ënwe-mase gwe'an- men zëwe Alap zëre mo Enhona gwë gwe'arake.*

3

Mae hap de ol: Paulussu Alap Zën

dam tasiki- Yahudi srëm zi sin de ol dawemsa gol halada gwen hapye.

¹ Zen in zebë ëe, Paulus, bwina an kon Yahudi srëm zini ebe mae hap Alapsa abe ta gwenan. Sap asa Kristus hup de jal hap bwinak awe tak daink, sap ëe ama zëre onakore ol dawemna insa ebon mae osan dep gol halada gwëk.

² Ena mese ki anakan ësak, "Alap Zen ki zëre mo sërkam de kwasang-kwasangkam asa dam tasiki," zep ki syala insa abe hap wei yul soneblaka- emsa dikim mas gwîbirida gwen hapye.

³ Men kirekamë lure nakon suratnak awe betek enkam ale gul- Alap mo kalangna mensa menkam aning gul gwëka, desa mes ki abe hap goltrëblaka.

⁴ Suratna ansa de baca gunkum, esa ki hen dam ulsul- Kristus hup de ol aning gunnu insa, men kirekamë aena dam gulsukye.

⁵ Orep Alap Zëna hom goltrei gwîzimki, hwëna angkam zëre mo Enho goltrei gwîzim'ira- Kristus mo dam tasibin zi hip, hen zëre mo Enho nakore ol ayang gul gwen zi hip.

⁶ Zen a desa mo tîngare zi hip aning gulzimkiye: Yahudi srëm zini ol dawemna an san de hen ang tankam, zen dekam sa hen hë'ho gwîbin tanganna nulin-mensa Alap zëre mo hlîl irin zi hip golzim'inkaye. Zep angkam Yahudi zi niban Yahudi srëm zi niban aha-ere tim makane lowe he'an. Zen angkam apdenak Alap mo gu-gubiridan ola Kristus onakon nulin'in.

⁷⁻⁸ Zen zep Alap zëre mo kwasangna sërkam abe hap golblaka- ol dawemna ansa de Yahudi srëm zini ebon mae osan gol halada gwen hap de syala kim abe hap wei yul soneblakaye. Hëndep dekam zep zëre mo sosonna abon onak sërkam syal gwe-gwëk. Tîngare Alap mo îrîk gîn zi nikon, ëe an

* 2:20 2:20 Mrk. 12:10; Luk. 20:17; Kis. 4:11; 1Ptr. 2:6-8 * 2:22 2:22 1Kor. 3:10-17; 1Ptr. 2:4-5

zen tangan- otde tangannak de zi niye. Hwëna Zen ki owas hap zëre mo kwasang-kwasangkam syal yala ansa abe hap wei yul soneblaka. In zebë anakan de gol halada gwen hap syal-syal gwe-gwenan, "Kristus onakon de hë'ho gwibinni, zen sërkam de yawal tanganna, hëndep zini nen bëjen sul sonenkam tame gun."

⁹ Asa hen man dam tasiki- ëe dikim anakan tawa tabiridanda gwen hap, "Alap men Zen tingan yang tabirki, men kirekam orep kalang gwe guku, angkam man Kristus onakon goltreizim'ira."

¹⁰ Alap man orep kalang gwe guku- dekam de ngatan zi mo langnak de teipsin-teipsin wenyä kip zëre mo sërkam de enlala blalsa zertreizimdin hip. Zep hëndep angkam nësa man anakan golëtreizim'ira, "Emki hlauludan. Yahudi zi niban Yahudi srëm zi niban angkam aha-ere jematkam lowe he'an."

¹¹ Alap zëre mo nonol lonesen nakore kalangna kirekam lwak, in zep hëndep nëre mae mo Bian Yesus onakon nësa kirekam aha'en gulku.

¹² Zen zep Yesussu de taibliblankam zeraha-en gwenkam, nen dekam zebe airin srëmkam Alapsa abe la gwe'an. Sap nen ema hen anakan tame ul gwe'an, "Zen eiwa sa asa dokwak tala."

¹³ Zen in zep ëe ama emsa gubirida'an: Eë ansa jalom ëk tihinak awe gwë'an, zep bahem enlalana ëdowe hanan. Sap ëe Kristus hup de ol dawemsa de golasas gwe-gwen habë bwinak awe gwë'an. Hen em mese ola insa laiblibik, zep ëe an hen eno mae mo dawem habë zë gwë'an.

Paulus kim Alapsa abe takake-Efesusk de Kristen zi mo enhosa de tatete tazimdin hip:

¹⁴ Zen in zebë Bian Alap hap zëre mo nwenak boklena kom so gweblanan,

¹⁵ men Zëbon onak tingingare zi ausu mo ausuna lwa'anke- sap ngatan zi mo langnak de wenyä, hen sap okamanak de wenyä.

¹⁶ Eë zebë anakan abe ta gwenan, "Bian, Emki ere mo ngatan zi mo lang nakore sërkam de kae-kaena gol gwizimdin- dekamim ere mo Enho naban de zergwë gwenkam enho nakon ëtatete gwe zahek.

¹⁷ Zen man Kristussu daiblibi gweblanan, in zep dikire Zen enho nakon golëgwë gwëk. Zëno kwasang-kwasangna dikire hen dawemkam tame nuk, hen dikire zao en tatem ëzauk gwëk.

¹⁸ Bian, dikire Efesusk de wenyä hen tingingare ere mo hlil irin wenyä Yesus mo kwasang-kwasangna insa tame nuk- yakna, blala, olk san dep, hen gulk sun dep. Zen sërkam de yawal tanganna.

¹⁹ Eë sap zini ama kwasangna insa de kitak tame gun hup ëalp gwe-gwe'an, hwëna molyë kitak tangan tame uk. Hwëna Bian, dikire Kristus mo kwasangna zëno mae mo enhonak beya gwëk, hëndep zep ere mo Enho naban soston naban dikire zëno mae mo enhonak sowe henkam nola gwëk."

Eë kirekamë ebe mae hap Alapsa abe ta gwenan.

²⁰ Zep dikire kitak Alapsa boltere dak, sap zëno sostonna nëbon mae onak sërkam tangan syal gwe-gwenan. Nen sap betekame hen tame gun srëmkame zëre mo soston hap abe la gwenan, hwëna Zen mam tangankam nëp gol gwizimnira.

²¹ Dikire tingingare Kristus hun de zeraha-en gwen wenyä Bian Alap mo bosena hëndep denaban teip nulsuk gweblak- sap angkam de zeraha-en gwen wenyä, sap hen lun kore wenyä. In eiwa tangan!

4

Kristus mo tim makan de okamanak lowehe gwen hap de ol:

¹ Zen in zep, ëe Bian Yesus hup de jal hap de bwinak gwën zini ama

emsa titi tabi'in: Em Alap mo hlil irin zi mo kim lowehe gwek, sap Zen eiwa mes emsa hen hlil inki.

² Enlala betekkam hen sae-saekam lowehe gwek, hen bahem nabakam jal ta gwen. Zi mo gwensa de sin-sin gwen naka hlaulblunna, desa kwasang naban em zergwë gwen.

³ Dawemkam em ealp gwe-gwen-aha-ere enlalakam eka lowehe gwek. Sap em mese Alap mo Enho de emsa ing gwe hebiridankam enho nakon eaha-en gwek.

⁴ Sap nen angkam aha-ere tim makane lowe he'an, hen Alap mensa zëre mo Enhona zerzimki Zen aha-en.

Hen mensa Alap nësa de kwang gulu dankam gu-gubiridaka, dawemsa de lamkam golz-imdi hip dena, nen desa kitak esa hla kul.

⁵ Hen nëno mae mo Teipsinni Bian Yesus, Zen aha-en.

Hen nëno mae mo taiblibinni aha-en. Hen baptis tabinnik, nen mese kitak ang tak.

⁶ Hen nen kitak aha-ere Alapsae Biankam en gweblanan. Zen kitak nësa teipsibirida'ara, hen kitak golësyal ta'ara, hen kitak nësa nëre mae mo enho nakon golëgwë gwe'ara.

⁷ Hwëna Kristus mes zëre mo sërkam de kae-kaekam nëbe mae hap kitak sosonna srën-srënkam hli yulzimki.

⁸ Kirekam man tangan Alap mo ëpba ola ban dakasti'in, in zen anakan lwakye,
 "Zen kim teipsin hip gulk sun sewe se'anka,
 Zen zëre mo jal zini beyakam tahalebirki,
 hen dekam zep zëre korena kip hë'ho gwibin nika hli yulzimki."*

⁹ Alap mo olak insa kirekam lwak, "Zen gulk sun sewe seka," zëno dam gulsunnu, Zen nonol otde tangan

san ati gwe ineka- hëndep okamana an mo otde tangan san. *

¹⁰ In Zen ati gwe ineka, Zen mes etan ngatan zi mo langnak de teipsin tangannak dep sewe seka- dekon de tingare lang yala ansa kara gul ine gwen hap.

¹¹ Zen Zen sosonna nëbe mae hap srën-srënkam kae gwe-gwibir-zinnira.

Ahakorena kip zëre mo olsa de aha zi mo lang san gol halada gwen hap denaka gol gwiz-innira.

Ahakorena kip Alap mo Enho nakore olsa de ayang gul gwizimdin hip denaka gol gwizinnira.

Hen ahakon zisi de halen ora san dep dam tasik sone gwibin hip de wenyä.

Ahakon jemat-jematsa de nol gwibirida gwen hap de wenyä.

Hen ahakon Alap mo olkam de tawa ta gwibin hip de wenyä.

¹² Zëno mae mo syala in, zen Kristus mo timni nësa dikim syal gwibin hip hen tatete gun hup dena- Alap mo bi gwibiridan wenyä nen ekakim dawemsa Kristus mo bose hap syal ei gwibik.

¹³ Zep zëno mae mo syala, zen Kristus mo timnik de bitï gwen zini nësa dikim anakan titi ta gwibin hip dena-

Alap mo Tanesa de taibliblankam ekakim eaha-en gwek,
 hen tame tankam ekakim sowehek,
 hen zeraha-en gwennak ekakim ëzise gwek.

Zen dekam esa hëndep zëno kim lowehe gwer.

¹⁴ Zep nen bap nen walas betek mo kim auhu-kama zi mo dërek en san de yasik tabin sin ang ta nasen gwen. Sap men zen kirekam ang ta nasen gwenan, zen hi mo kim mensan an-sankam de ngëp gwe naseran makan ëgwë gwenan.

* 4:8 4:8 Mzm. 68:19 * 4:9 4:9 Paulus mo alena awe, dam gulsunnu dan-dan: Ahana, Kristus "okamana awe dep ati gwe ine zaka," ahaksa, "okamana an mo otde san dep ati gwe ineka," enlalana juwen zi mo lang san dep. (1Ptr. 3:18-20; 4:4)

15 Diki dawemna, eiwa de tangan naka nen kyang-kyang gulsuk gwen, hen deban nen nənaka kwasang gwibirida gwen- Kristus mo kim ekakim nabakam ëliwehe song gwék. Sap Zen Zen nēno mae mo nola. Nen an zēno tim makane lowe he'an.

16 Zen de nēsa golēsyal ta gwenkam, nēno mae mo lowe henna dekam san de aha-ere tim de syal gwen makan lwa gwenan. Srēn-srēnkam hom. Sap aha-ere timni, zēno sana, danna, hen kala, zen man zēnaka mas neibirida gwenan-dekam dikim timni in dawemkam mam gwen hap hen tatete gwen hap. Nen zebe nēnaka dawemkam kwasang eibirida gwenan, hen Kristus mo timni zep tatete gwe zahe gwenan.

Èse yang tabin zi makan de lowehe gwen hap de ol:

17 Zen in zebē Bian Yesus mo bosekam emsa gubirida'an: Em bahem Alapsa de tame tan srēm zi mo kim lowehe gwen. Sap kire zini enlalana mes ehāi gwék.

18 Sap zēno mae mo enhona mes kawesiki, hen ngaya gwen hap dena insa Alap gol gwizim'ira, zen desa hom tame nu'in. Sap zen zēre mae mo enho lilikinni mes Alap hap dayalsiblik, zep hēndep Alap osan de ang tan hap nola mes ēdrak-drak gwék.

19 Zen mes anakan de lik gwibinni baes tak, "An dawemsaē o'an. An kareksaē." Zēre mae mo tim nikore hole-hlesa mes anakan blol neibik, "Sap asa desan en ang ta gwer." Hen zēre mae mo timni mes sosok nuk-dekam de hole-hlesa mam gulsuk gwen hap.

20 Hwēna Kristus hup dena insa ena ësane gwék, zen kire san dep hom-

21 men kirekam sap emsa tawa da gwibikye. Hen em kime Deban ëraha-en gwék, em mese sap anakan tame lak, "Zen eiwa lalak enna."

22 Zen in zebē etan emsa gubirida'an: Emki ere mae mo ëpba lowe henna insa hole-hle naban hiri son. Zen in san de blē nabare kire-kirena kiye- ase naban. Sap ëpba lowe henna in, zen zēwe beya gwék-boton hap dena, hen swi sosen hap dena.

23 Diki eno mae mo enhona hen enlalana zen kitak èese gwen.

24 Ere mae mo lowehen ësena insa emki aha zi hip goltrei gwizimdin-baju ësesa de ala son makan. Sap Zen Alap angkam emsa èse tabi'ira-san de aha zisi de yang tasibinni kiye, hēndep zēre mo nwe-mase tangan makan, dam-dam enkam de lowehe gwen hap, hen eiwakam de zēre en onak étal gwesin hip.

25 Zen in zep, aya-wal oso-wal, boton olkam bahem tangan enaka tonbirida gwen. Kristen bose omka eiwa de ol enkam em tonbirida gwen, sap nen apdenak mese Kristus mo timnik bitī gwék.

26 Em de jal ta gwenkam, jala in bap zen karek san dep emsa kang gul gwen. Yakla nwena bap zen dum gwehen- em de nama jal gwe tinennakye.

27 Dowal mo kigi hap bahem orana kles tyasik gweblan.

28 Sowē tam wenyā, em sowēsa baes tan. Diki ere mo irse gwen en nakon em gulin gwen, hen dekam em tahalha wenyaka mas gwibirida gwen.

29 Eno mae mo ëk nakon bap zen karek-karek ola hen swi ol maena te so gwen. Diki wal bosyansa dikim tatete tabin hip de olsa em ton gwibin- men kire enkam zēbe mae hap dakastilzim'inke. Kirekam de ol aīsili zen dawemsa esa kim ol gwizim.

30 Dawem enkam lowehe gwék. Kareksa de gol gwenkam bap nen Alap mo Enhona ja-ja ta gwen. Sap Zen mes nēno mae mo enhonak anakan ale gulku, "An Alap mo bi gweblan zi." Enho mo alena in, zen dekam esa aumwa hap de yaklanak yaing gwer- men dekam tan-

gan de nësa kawesin nikon gwiswe sone'ankaye. Zep bap nen ja-ja ta gwen.

³¹ Enlala ennak de jal-jalsa em jek-jak gun. Bahem enaka u sal-sal gwibirida gwen. Bahem tangan enaka nop-nop gwibirida gwen, hen bahem enaka lamang ta gwibin. Tingare kareksa em hli yun.

³² Diki em enaka kwasang gwibirida gwen, hen sae-sae enlala enkam em lowehe gwen. Emki hwë-hwëkam wal bose wal oban ere mae mo karek-karekna eititi gwe-gwibin- men kirekam hen Alap eno mae mo karek-karekna ep eititi gwibir-zimkike. Sap Kristus Zen kire hap te-lidak sonnak tilki.

5

Ngatannak de lowehe gwen hap de ol:

¹ Sap em in Alap zëre mo dang tininak de walas, zen in zep zëre mo kim de hen lowehen hap em ëalp gwe-gwen.

² Dikire kwasang-kwasangna eno mae mo lowe hennak mam gwek-men kirekam Kristus nësa kwasang gwibiridakake, hëndep zep nëno mae mo kareksa dikim ngan gulsuz-imdin hip Zënaka zerguku. Zëno syala in, Alap man tangan sam gwe-sibirki.

³ Emsa mes Alap hlil inki, zep ebe mae hap hom dakastilzim'in- auhukama hole-hle san de etan ang ta gwen hapye. Zep kahalo hap de hole-hle naban te-ala beya gwen hap de hole-hle naban emki langa sosun. Ki hwëna emsa sa aha zi nenbiridal, "Zen Alap mo hlil irin zisi hom."

⁴ Eno mae mo ëk tihï nakon bap zen ol-wak ola wet so gwen- hen swi ol weha mae naye. Kirekam de ola hom ebe mae hap dakastilzim'in. Diki eno mae mo ëk tihï nakon anakare ol zen wet so gwen- "Bian Alap, Em asa sam ta gwibirida."

⁵ Emki ëenlala gwen, swi enlala enkam de gwën zini, kahalo sosen wenya, hen te-ala beya gwen hap de hole-hle wenya, zen molya Alap ne

Kristus nik mo irik ginnik bitï gwëk. Te-ala hap de hole-hlena in, zëno nwe-masena apdenak- yang tasin dowalsa de boklesa kom so gweblan nabanye.

⁶ Bap zen zini emsa anakan boton ta gwibin, "Alap mo jala molye kire nakon hla kuk." Hwëna karek-karekna in, dekon sa ki Alap mo sërkam de jala hatal- men zen Zënaka betek nëbla srëm gwe-gwenan, zëbe mae hap denaye.

⁷ Zep kirekam de boton tam zi niban, bahem golësiri gwe-gwen.

⁸ Sap em hen orep enho kawesin nike lowehe gwëk, hwëna angkam Bian mes enho nakon emsa ngatan tabirki. Zep angkam ngatanna in zao en em lowehe gwen.

⁹ Sap ngatanna in, dekam sa eno mae mo lowehen nakon dawemna wet so gwer- dawemsa de aha zi hip goltrei gwizimdin hip de enlala, dam-dam enkam de gwën enlala, hen eiwa de enlala naye.

¹⁰ Zen in zep em ëalp gwe-gwen- ekakim dawemkam tame ul gwëk, "An Bian mo dwam gwibinni. An zëno dwam gwibin nika hom."

¹¹ Kawesinnik de lowehe gwen zi mo syala zen waba hap. Desa emki hwaulsun. Hen anakan emki jalse gwibirida gwen, "Desan bahem ang ta gwen. Zen karekna."

¹² Sap enlala kawesin zini insa aningkim syal nei gwibirin, ol enkam de desa aïsïl gwibinkim, zen hom tangan Kristen zini nëbe mae hap dakastilzim'in.

¹³ Hwëna ngatan zi mo lang nakore ngatanna in kim nëbon mae zil ane gwenan, zen dekam zebe anakan tame ul gwenan, "Hare kirekam de syal gwibinni, zen karek sake."

¹⁴ Zen in zep terya anakarekam da gwenan,

"Men zen nini truwe'an, em luk tan. Em in zen tok-tok makan lowe he'an, em ëngaya gwen.

Sap Kristus man ebon mae onak zil ine'ara."

¹⁵ Zen in zep, ere mae mo lowe henna, emki dawem enkam kara gul gwen. Enlala joblo-top zi mo kim bahem lowehe gwen.

¹⁶ Bian de ebe mae hap dawemsa de aha zi hip goltreizimdin hip de orasa kles tyasik gwizimdinkim, desan en em ang ta gwen. Sap langna an angkam man tangan jaljala taman kinian.

¹⁷ Mamakkam bahem lowehe gwen, hwena emki enlalasa anakan langa tasik gwen, "Bian mo abe hap de dwam gwibir-blinna, diki an de kirekam moye."

¹⁸ Ho mamakna bahem mamkam otde gwibin- dekon de emamak gwe-gwen hapye. Ki hwena eno mae mo lowe henna dekon sa tangan ayang sik mo kim hai gwer. Hwena diki Alap mo Enho Zen eno mae mo enhonak suwen.

¹⁹ Alap hap de terkam em enaka tatete ta gwibin- sap zere mo ebpa ola kore terkam, sap Kristus hup de terkam, hen Alap mo Enho nakore terkam. Eirzi-Biasa de isrip-sri gwizimdin terya dikire eno mae mo enhonak beya gwek.

²⁰ Hen banakare maesa de goltowe gwenkam, emki Bian Yesus mo bosekam Alapsa anakan gu sone gweblan, "Ema asa sam tanda."

We-zi dare de kirekam zenaka igwe gwen hap de ol:

²¹ Nen apdekame Kristus mo timnik bitigwek, zen in zep nen nenaka blikip gwesibirida gwen-san de Kristus Zenaka de blikip gwesiblinna kiye.

²² We walya ere mae mo zisi em blikip gwesibirida gwen- men kirekame Bian Yesusu blikip eisik gweblananke.

²³ Sap Alap mes zi hip golzimki- zen de we walsya nol gwibiridan hap denaye, in kirekam hen Kristus hup golblakake, Zen de jemat-jematsa nol gwibiridan hap. Sap Zen Zen nola. Nen an zeno taha-tana makane lowe he'an.

²⁴ Zep jematna nen men kirekame nesa de ngaya tabin hip de Zini Kristusu blikip eisik gweblanan, we walya zen hen kirekam em zi wal omka blikip gwesibirida gwen.

²⁵ Zini we wal omka emki hen kwasang gwibirida gwen- men kirekam hen Kristus zere mo jemat yawala kwasang gwibirkike. Zen zep hendep zere mo timni golguku-

²⁶ dekam de jemat zem insa ngan gwehen tangan naka Zen bi gwibin hipye. Nen zebe baptis tabin sin ang ta gwenan. Dekam zep nwe-mase gwe-gwenan: Zen mes nesa hokam hen zere mo ol dawemkam ngan tasibirki.

²⁷ Zen mae hap ki kirekam nesa syal gwibirki: Dekam de hendep denaban zere mo we makan golgwegwen hap, serkam de nwe-awes naka. Zen zep nesa aha-en aha-enkam oto tasik gwibirida- nen dikim saher sremkam, karek mae sremkam, hen enho kles gwesin sremkam ngan gwehen nik zere han zergwe gwen hap.

²⁸ Zen in zep hen zini em kirekam em we wal omka kwasang gwibirida gwen- san de ere mo timni kiye. Sap zi de we zemka kwasang gwe-gwibinni, zen apdenak- zere mo timsi de kwasang gwibin nibanye.

²⁹ Zini nen hom tangane nere mae mo timni da kulsuk gwenan, hwena dawemkame kara ul gwenan. Zen kirekam hen Kristus jematna nesa zere mo tim makan kara gul gwenda.

³⁰ Sap jematna nen an eiwa Kristus zere mo timni.

³¹ Men kirekam Alap mo olak lwak,

"Zini an-bi zemka hli sonkam-dekam de we zeban aha-en en hapye. We-zi darena in dekam Alap mo nwenak san de aha-ere timni kiye."*

³² Alap mo ola in, zen olk san de tanganna, hwena zeno dam gulsunnu ahana, Kristus de jemat zeban aha-ere tim makan golgwen hap.

* 5:31 5:31 Kej. 2:24; Mat. 19:1-9; Mrk. 10:1-12

³³ Zen in zebë hen emsa gubirida'an: Zini we wal omka em ere mae mo tim makan kwasang gwibirida gwen. Hwëna we walya hen zi wal omka em blikip gwesibirida gwen.

6

Walas zik de an-bi zik mo ol san kirekam ang ta gwen hap de ol:

¹ Walasna, em ane-bia uk mo ol san em ang ta gwen, sap Kristen walas hap zen kirekam dakasti'in.

² Sap Alap mo olak man lwak, "Ane-biasa em blikip gwesik gwizimdin." Hen Alap mo dare taha-tapakam de jalse gwen olak, walas hap dena in srën. Sap zëno aumwa topnak anakare gu-gubiridan ola man lwa'an,

³ "Em de ane-biasa blikip gwesik gwizimdinkim, em hë'ho gwibin nika esa hla kul gwer, hen eno mae mo okamanak de gwëna sa blal gwer."*

Bi zik de walas zemka kirekam golëlowehe gwen hap de ol:

⁴ Bi walkam dena, walas omka bahem olkam hit ti gwibin. Ki sa hwëna emsa husus neibirida gwer. Diki dawemna Bian Yesus mo dwam gwibin sin em oto tasik gwibin hen tawa ta gwibin.

Tana iltikinnik de zi de kirekam lowehe gwen hap de ol:

⁵ Men zen zi mo tana iltikinnik ëbabu gwe-gwenan, emki ere mae mo zi bina in mo ol san tingare enho naban ang ta gwen- dawemkam de blikip gwesiblin naban hen airin niban, men kiye, Bian Yesus Zënaka de blikip gwesiblinna. *

⁶ Zen kirekam em lowehe gwen- sap zi bina in de zën emsa kara tabin

srëmnak, sap emsa de kara tabin-nik. Hwëna anakan em ënlala gwe-gwen, "Ëe an diki Kristus mo tana iltikinnik de gwë gwen zi. Zi mo tana iltikinnik homë. Ëe zep asa aha-ere enlalakam Bian Alap mo dwam gwibin sin zini an hon syal gwe-gwer."

⁷ Zen in zep em isrip-sri naban ere mo zi bina in mo syala gol gwen-anakare enlala naban, "Asa an Bian Yesus awe de syal gwen hap dam tasiki, zep ëe an zëno syalsaë go'an. Zini an moka homë."

⁸ Emki hen ënlala gwe-gwen, "Dawemsa de syal gwe-gwibin wenya, Bian sa zëbe mae hap dawemna golzimdi- sap tana iltikinnik de lowehen wenya kip, hen sap kirenak de lowehen srëm wenya kip."

Zi de zëre hon de babu gwen zisi kirekam golëlowehe gwen hap de ol:

⁹ Em hen zisi de bi gwibiridan wenya, dawem enkam em golëlowehe gwen- ere mae hon de ëbabu gwen zini in saye. Bahem jala ban anakan tik-tik ta gwibin, "Em de ansa nabakam syal gwibin srëmkam, ëe asa emsa lek tyal." Emki ënlala gwe-gwen, "Deban mae apdekam nëno mae mo Zi Bina hen ki- in Zen ngatan zi mo langnak gwë'araye. Hen Zen hom ahakore en naka nwekam golëake gwenda."

Mae hap de ol: Eijan hap em ëtamal gwen.

¹⁰ Zep aumwa hap ëe ama emsa gubirida'an: Bian han de zeraha-en gwen ennak nen tatem ëzauk gwen, sap zëno sosonna mam tanganna.

* **6:3 6:3** Kel. 20:12; Ul. 5:16 * **6:5 6:5** Orep tangan zini hen aha zisi karekkam jap nul sonenda gwek. Zi de tahalha hap zëre mo bon yalsa sul sonen srëmkam, desa man dahyo gwek- pasarak de hwëna aha zi hip te-ala hap lirak tabin hip. Zëno bon de sërkam yawal gwenkam, dekam we wal walas zeban dahyo gwek- desa de kitak lirak tabin hip. Men desa kirekam lirak da gwibik, zen dekam zep hwëna zi bina in mo tana iltikinnik ëbabu gwe-gwek. Dekam hom beyakam ëheya-hya gwe-gwek. Sap heya gwen naka de etan balk tankam, desa man damera gwek. Tana iltikinnik de ëbabu gwe-gwen zini, desa sap de lek-lek ta gwibin, ahaksa tamera gwen. Pemerinta hom kire hap jalse neibirida gwek. (1Tim. 6:1-2; Tit. 2:9-10)

¹¹ Sap nen angkam dowal mo kigi nabane ereija'an, hen zen mes tang eijan hap tewesiki. Zen in zep, eijan hap de kirekam-kirekamna mensa Alap nebe mae hap gol gwizimnira, desa nen kitak alala tan hen teirensin. Zen dekam esa tatem ezaul.

¹² Sap nen zi bosyan han de eijan hap home etamal gwe'an. Hwena kirekam-kirekam dowal-dowala ban de goléeijan habe etamal gwe'anmen zen angkam de lang kawesinni ansa bi neibi'inke, hen men zen ngli nakon tingare dowal-dowala teipsinkim irik ni'in halke.

¹³ Zen in zep, tingare Alap onakore eijan hap de kire-kirena insa nen teirensin hen alala tan- dekam de dawemkam neno mae mo jal zini insa goléeijan hap, zen de nesa tobe gul zunnak, hendep eijan yala in de tap gwennak eka nama tatem ezauk.

¹⁴ Zen in zep, nen tatem ezaun. Alap onakore eiwa de ola, tak makan nen darak tan. Hen anakare enlalana biti makan nen darak tan, "Alap eiwa mes abe hap golblaka- ee dikim zere mo nwenak gwen hap, san de kareksa de gol gwen srém zi."

¹⁵ Alap onakore ol dawemna, zere han dikim zerumlae gwen hap dena, zao en nen ki tatem ezaun. Zen san de eijan hap de sepatuna kiye- nen dikim tatetekam ezaun hup dena.

¹⁶ Dowal mo kigi mo gwetapna, zen syauk nuban. Zen de nebon tisin srém hap, Biansa nen anakan taibli gweblan, "Zen Zen sa asa il gwehe gweblala."

¹⁷ Eijan hap de topina, zen anakare enlala naban nen lowehe gwen, "Asa mes Yesus ngaya taka." Hen Alap mo ola, zen nebok makan nen teirensin, sap Alap mo Enho nakore sosonna, zen zewe.

¹⁸ Banakare maekam de lowehen nakon, Alapsa nen zere mo Enho nakore ssonkam gu sonebla tine gwen. Salok-salokkam nen lowehe gwen, hen Alapsa de abe ta gwenna bap nen esin gwe hana gwen. Ere

mae en hap bahem gu sone gweblan, hwena tingare langnak de Kristen zi hip em hen gu sone gweblan.

¹⁹⁻²⁰ Asa hen ol gu sonenkam bahem eititi gwe-gweblan. Sap ee ol dawem gol halada gwen jal habé jalom ek tihinak awe gwé gwe'an- Kristus hup de ol aning gunsu de Yahudi srém zi mo lang san dep gol halada gwen jal hap. Anakarekam emki gu sone gweblan, "Bian, Paulus hup enlala blaling ta sone gwebla- zen dekakim udobe naban engaya gwen hap de ol dawemsa srip gulsuk gwizimki."

Aumwa hap de ol:

²¹⁻²² Neno mae mo wal bosedawemna, Tikikus Bak, zen tatetekam Bian mo nganak syal gwe-gwenda. Zen sa emsa ekkam abe hap de ola anakan tonbirida zala, "Zen angkam kirekam bwinak gw'ara." In zebé ebon mae osan dep zer sone'an- zen de abe hap hen ano wal bosed wal hap denaka emsa tonbiridazan hap. Eno mae mo abe hap de enlala ngalapna dekam sa sewe hera.

²³ Dikire Bian Alap ne Bian Kristus Yesus nebon onakon ebe mae hap hata gwizimk- em dikim kwasangkwasang naban lowehe gwen hap dena, hen Zena en naka dikim taiblizimdin hip denaye. Sap em in zere nik mo taha terenake lowehe gwe'an.

²⁴ Dikire Alap onakore kwasangkwasangna ebon mae onak lwa gwék- hen tingan men zebon mae Bian Kristus Yesus hup de kwasangkwasangna tinsin srémkam lwa gwenanke.

Paulus mo surat Pilipik de Kristen zi hip

¹ Tīngare Pilipik de Kristus hun de zeraha-en gwen wenya kip, hen zēwe de Kristen zi mo nol-nola kip, hen Kristen zi mo tahasa de trī so gwen wenya kip,

Kristus mo nganak de syal ēn zi darena, Paulus ne Timotius ne onakon:

² Dawem! Nēre mae mo Bian Alap ne Bian Kristus Yesus ne sa kwasang-kwasangna mamkam ebe mae hap ol gwizimdi. Hen nen zēre nik mo taha terenak esa lowehe gwer.

³ Ēe, Paulus, kimē emsa enlala gwibirida gwenan, ēe dekam ama Alap hap dawemsa gol gweblanan.

⁴ Hen ēe kimē kitak ebe mae hap Alapsa abe ta gwenan, dekam isrip-sri nabanē gu sone gweblanan.

⁵ Sap em mese ano tahana trī koso gwēk- dekam de Alap onakore ol dawemsa gol halada gwen hapye, nonol lone sennak kimē ebon mae hatak, hēndep angkam namae trī koso gwenan.

⁶ Ēe kimē ebon mae onak hatak, Alap Zēna dekam zep emsa ēse yang tabin makan de li ta sonebinkim kon gwesibirida hanaka. Ēe in zebē anakan taīblībla'an: Zen sa etan kire syala eno mae mo enhonak sul sonezim zahera- hēndep Yesus mo lwa halzan hap de yaklanak de hata'ak.

⁷ In aīrīs tangan- ēe de kirekam emsa enlala gwibiridan naye. Sap em in ano dang tīninak dena. Sap em orep mese ano tahana ap trī koso gwēblak, hēndep bwinak awe de gwēnnak namae asa mas ē gwēbla'an. Sap em mese ano syala anakan dam ulsuk, "Zen Alap zēre mo kwasang-kwasang nakon wei yul soneblaka- dekam de ēngaya gwen

hap de ol dawemsa golosas gwē-gwen hap denaye."

⁸ Alap tawana: Ēe ama kitak emsa Kristus onakore kwasang-kwasang nakon enlwan gwibirida gwenan.

⁹ Zep ēe a kirekamē mo ebe mae hap Alapsa abe ta gwenanye,

"Bian, dikire zēno mae mo kwasang-kwasangna mam gwesik song gwēk, hen zen diki zen anakan tame gul gwen hen klis gul gwen, 'Ēe kirekam asa aha zi hip kwasangna oltrei gwizim.'

¹⁰ Zen diki zen ere mo dwam gwibinni anakan klis gul gwen, 'An dawemna. Hwēna an diki zen tangan dawem tangan wenyaye'-dekakim enho lalakkam hen kles gwesin srēm kam lowehe gwēk, hēndep Kristus mo lwa halzan hap de yaklanak de hata'ak.

¹¹ Sap zen hen mes Tane om Yesus hun nēraha-en gwēk, zep dikire zēbon mae onakon hen dawemna wet so gwēk. Desa de kirekam hlauludankam, zen dekam tangan sa tīngare zini ere mo bosena teip nulsublunda gwer."

Mae hap de ol: Ēe Kristus ensaē blol gwēbla'an.

¹² Aya wal oso wal, ēe ama dwam gwē'an- em dikim abe hap dena ansa ētawa gwen hap: Zen sap man ēdwam gwē-gwenan- ano ēksa de ap mat sosublun hap, zep asa karek da gwenan. Hwēna zen mes ki Alap mo dwam gwibin sin lwak- Yesus hup de ol dawemna insa dikim etan gollanga gwesik haladan hap.*

¹³ Hēndep zep tīngare Roma mo teipsin zisi de kara ta gwen hap de jana nabare zini hen awe dena kitak mes anakan asa nasalblak, "Zen Kristus hup de jal hap bwinak gwē'ara."

¹⁴ Sap eiwa, ēe bwinakē gwē gwē'an, hwēna tatemē nama zauk gwē'an. Zen dekon zep awe de Kristen zini Biansa de taīblīblannak mes etan ētatete gwēk. Hēndep zep aīrīn srēm kam etan enlala tatete

* 1:12 1:12 2Tim. 2:9

naban Yesus hup de ol dawemkam donbirida gwe'an.

15 Sap eiwa kirekam, hwëna ahakon enlala lalak naban hom Yesus hup de ol dawemna donbirida gwenan. Zen hwëna anakare enlala naban donbirida gwenan, "Paulus de nama bwinak gwënkam, ëe asa hwëna jematnak awe mam gwer, hen asa zisi beyakam ëre osan dep hlilin gwer." Hwëna ahakon hen enho dawem naban donbirida gwenan- kire enlala srëmkam.

16 Zen abe hap de kwasang tola ban donbirida gwenan. Sap zen mes anakan tame nuk, "Yesus mes Paulussu dam tasiki- dekam de zëre hap de ol dawemsa golasas gwe-gwen hapye. In zep tol hëndep bwinak gwë'ara."

17 Hwëna ahakore wenya in, zen aha-ere enlala naban hom Yesus hup de ol dawemna donbirida gwenan. Zen hwëna zëre mae mo bosesa dikim mam gun hup de enlala naban donbirida gwenan. Zëno mae mo enlalana anakan lwa gwizimmira, "Paulus mo enlala dekakim bwi nakon beya gweblaka, sap ëe an angkam ama ëmam-mam gwe'an."

18 Hwëna abe hap bana hom! Sap sa ahakon kire enlala naban Yesus hup dena donbirida gwer. Hwëna abe hap men zen tangan bol-zaun gwebla'an, diki Kristus hup dena zen langa gwesik haladan. Eë in zebë isrip-sri naban gwë gwenan. Hen ëe asa isrip-sri gwe tine gwer,

19 sap ëe tawana: Em ema abe hap Alapsa abe la gwenan, hen Yesus zëre mo Enho nakore sasonkam sa asa mas gwe-gweblala. Zen zep asa jalom ëk tihina an kon wet sol.

20 Eëna hen zebë Alap hap enlala zon tasiblin naban anakan dwam gwe-gwe'an, "Eë babë karekkam ton gwen. Hëndep dekon babë saher gwen- nonol tanganna angkam. Diki asa anakan zen enlala gwe-gweblan, 'Zen dawemkam Kristussu de taibliblannak tatem zauku, hen

zëbe hap de ol dawemna udobe naban golasas gwe-gweka.' " Dekam sa tingare zini Kristus mo bosena abon onakon teip nulsublunda gwer- sap ëe de nama gwënnak, sap hen asa de tan hyanak.*

21 Sap ëe mesë ëre mo gwënnak kitak Kristus en hon blol gwëk, hen ëe Kristus en habë gwë gwe'an. Hen ëe de tinnë aïris, sap dekam ëe Kristus hun asa aha-erenak ë gwer.*

22 Hwëna ëe de nama ngaya nik gwënkam, ëe dekam dawem enkam de Kristus mo nganak syal gwe-gwen hap asa alp gwe tine gwer. Zep angkam tin hip denaban ngaya gwen hap denaban ëe homë kles so'an.

23 Hwëna dan-dan in aïris. Hwëna aena emsa de hli yuludan hap denakaë tangan dwam gwe-gwibi'in- dekam de Kristus hun apdekam ë gwen hap. Sap zen dawem tangan wenya zen.*

24 Hwëna na-en tangan babë emsa hli yuludan. Sap em namae asa dwam ë gwebla'an- dekam de emsa mas gwibirida gwen hapye.

25 Sap ëe kirekamë tame guk, zen in zep asa nama Yesus osan dep dikim titi ta gwibin hip emsa golëlowehe gwer- eno mae mo ei nik dekakim bil gwëk, hen isrip-sri dekakim taman kini gwëk.

26 Kirekam de lwankam, ëe de hëndep etan ebon mae hata zankam, em esa tangan Kristus mo bosena teip ulsublul.

27 Zep banakare mae de abon lwankam, eno mae mo apdekam de lowehe gwenna, zen diki Kristus hup de ol dawem naban de apde në gwëk. Zep ëe de emsa amjanbinkim, ahaksa langa nakon de salbiridankam, dekam sa anakare ola wet so gwer,

"Zen nama Yesussu de taibliblannak tatem ëzauk gwe'an, sap zen aha-ere enlalakam lowehe gwenan.

* 1:20 1:20 1Ptr. 4:16 * 1:21 1:21 Gal. 2:20 * 1:23 1:23 2Kor. 5:8

Zen hen kitak engaya gwen hap de ol dawemsa de golasas gwen-nak dowal mo kigi hon de syal ta gwen zi niban eijan makan lowehe gwe'an.

²⁸ Men zen sap Yesussu de taibliblan hap jalse neibirida gwenan, zen hwena hom desa nairibirida gwenan."

Zen zep, kirekam de em zeno mae mo nwenak lowehe gwenkam, zen dekam sa anakan dam nulsuk gwer, "Alap sa desa en ngaya tabiri. Nen hwena esa juwer."

²⁹ Sap Alap in kim emsa zere mo kwasang-kwasang nakon kwang guludaka, zen Kristussu de taibliblan en hap hom. Hwena Zen hen dekam de Kristus mo bose hap kareksa goltowe gwen hap emsa kwang guludaka.*

³⁰ Zep nen apdekam Kristus mo jana zi makane karekna oltowe gwenan- in kirekame asa kara la gwek, men kimena nama emsa golelowehe gwেকে. Hen men kirekame ner hom asa asalblak, ee namae kirekam nebe mae hap de jal zi niban golaeija gwe'an.

2

Kristus mo kim de lowehe gwen hap de ol:

¹ Aya-wal oso-wal, nen kie anakan eis gwibirin:

Kristus hun de zeraha-en gwenkam, zen dekam zebe enho nakon dikim tatete gwen hap dena eis gwibirin.

Zeno kwasangna hen ki neno mae mo enhonak lwa gwenan.

Hen zeno Enhona man nesaga golelowehe gwenda, zebe aha-ere enlala naban lowehe gwenan,

hen nenaka kwasang eibirida gwenan.

² Sap nen kirekame eis gwibirin, zen in zebena emsa titi tabi'in: A kirekam lowehe gwেকে:

enlalana aha-en,

kwasangna aha-en,

enhona aha-en,

hen dwam gwibinni aha-en.

Kirekam de lowehe gwenkam, ee asa tangan emsa isrip-sri gwibirida gwer.

³ Bahem ba maesa anakare enlala naban syal gwe-gwibin, "Diki ee amaka mam gwe'an." Hen boltebolte enlalana bahem ing ta sone gwen. Hwena enlala betekkam em ere mae mo Kristen bose walya anakare enlala naban blikip gwesibirida gwen, "Zen mamna. Ee an betekna."

⁴ Bahem ere mae en mo tim en hap ealp gwe-gwen. Hwena aha zisi de mas gwibirida gwen hap em hen ealp gwe-gwen.

⁵ Emki hen ere mae mo enlalana betek ta gwibin- men kirekam hen Kristus Zenaka Alapsa de blikip gwesiblin hap betek takake.

⁶ Yesus nonol lonesen nakon kim gweka, Zen dekam Alap Zena kiye.

Hwena Zen hom desa zere en hap anakan inik gwibirki, "Diki A-enena Alap han e gwen."

⁷ Zen hwena man desa hli yulku-dekam de tingare zi mo tana iltikinnik babu gwen zi mo kim syal gwe-gwen hap.

Hendep zi tangankam zep okamanak awe hata zaka- an ki hen nen.

⁸ Dekam zep Alapsa de betek gwewen hap Zenaka tin hip sosok taka- in kim karekkam telidak sonnak de makan ta irinkim dakye.*

⁹ Zen in zep hendep Alap teipsin tangannak dre neka,

hen zeno bosena tingare ahakore bose nakon teip gulsubluka.

¹⁰ Zep zeno bosesa de salbinkim dikire tingan boklena kom da gwewlak-

sap ngatan zi mo langnak de wenya, sap okamanak de wenya, sap juwen zi mo langnak de wenya.

* 1:29 1:29 Mat. 5:11-12; Kis. 5:41; 14:22 * 2:8 2:8 Ibr. 5:8; 12:2

11 Hen dikire tingan anakan ekira gwe-gwek, "Kristus Yesus Zen eiwa teipsin tanganna!"

Sap kirekam de Yesusu boltere tankam, dekam hen Bian Alap zere mo bosesae teip ul-sublu'an. *

12 Zen in zep, aya-wal oso-wal, men kirekam Yesus Alapsa blikip gwesiblika, nen hen kirekam nen Alapsa blikip gwesik gweblan. Ee kimë nama emsa golëlowehe gwek, em dekam dawemkame ano ol san Alapsa betek ë gweblak. Zep ano tim bwanak kire enkam em betek gwebla tine gwen. Sap Alap insa kirekam owas tangankam nesa ngaya tabirki, zep nen airiblan naban zere hon dikim etal gwesin hip ealp gwe-gwen.

13 Sap Zen Zen nesa enho nakon golësyal ta gwenda- dekam de zere mo dwam gwibin sin aha-ere enlalakam ang ta gwen hapye.

14 Zep nen banakare maesa de goltowen nakon, tonsun srëmkam hen keisa-keisa srëmkam nen lowehe gwen.

15-16 Sap nen dekam aha zi mo nwenak esa ënwe-mase gwer- san de Alap mo wei-wik gun wasna kiye, enlala lalak enna hen enho kles gwesin srëmna. Zep nen kime ëngaya gwen hap de ol dawemna okama kawesinnik awe ol halada gwenan, dekam enlala kawesin zi mo nwenak esa ënwe-mase gwe-gwer- san de keis de zil anenna kiye. Zep Kristus mo lwa halzan hap de yaklanak de hatankam, ee asa isrip-sri naban zëbe hap emsa anakan golëtrëblal, "An zen- ano syal gwibinkim de Emsa taibliblan wenyaye. Ee waba hap homë dansin niban syal gwibirida gwek- men kire hap Ena asa zer sonekaye."

17 Ano emsa de syal gwibin nikon insa Yesusu dawemkam laibliblak, zep em mese ere mae mo timni zëbe hap sosok ulblik. Zep eno mae mo lowe henna in man Alap

hon nwe-mase gwe-gwe'an- san de otweransa de zëbe hap tru tasik seblanna kiye. Zep hen kirekam, asa de tankam de ano kal wet so'ak, dekam sa hen nwe-mase gwer- nëno mae mo tim sosok gublunna insa de Alap hap goltrë seblanna kiye. Zen in zebë emsa gubirida'an: Alap sa nëno mae mo syala ansa dokwak gulu! Ee in zebë isrip-sri gwe-gwe'an, hen ee ama eno mae mo kire hap de isrip-srina eis gwibi'in.

18 Zen in zebë emsa gubirida'an: Emki hen eisrip-sri gwe-gwen, hen ano isrip-srina insa emki gul irin.

Mae hap de ol: Paulus kim Timotius ne Epafroditus neka de teisyasonen hap kalang gwe'ankake.

19 Bian Yesus mo dwam gwibin sin diki lwa'ak, ee ama Timotiusu de nabakam ebon mae osan dep zer sonen hap dwam gwe'an. Zen kim de etan ebon mae onakore ol dawem naban gollwa ha'an zaka, ano enlalana dekam tangan sa oto gwesili.

20 Timotius in zen en tangan- aban de enho apde ën naye. In zep zen hen dawemkam emsa de mas gwibirida gwen hap alp gwibirida gwenda.

21 Ahakon kitak zere mae mo timsi ngalap nei gwibirin. Hwëna dekam Yesus hup de syala man eititi nei gwibirin.

22 Hwëna em mese hen desa anakan tame lak, "Zen taibliblan tanganna." Aban kimë Yesus hup de ol dawemna ol halada gwek, ee dekam ere mo wasal tangan makanë zersyal gwe-gwek.

23 Zep ee asa nabakam Timotiusu ebon mae osan dep zer sonezal-Roma mo teipsin-teipsinni kim de abe hap dena klis nu'ikye.

24 Hen ee ama Biansa anakan taiblibla'an, "Molya holo gwek, dekam sa ere hap hen orana kles tyasiblibla- dekam de emsa etan duwebiridazan hapye."

* 2:11 2:11 Ef. 1:20-21; Yes. 45:23

²⁵ Suratna an han ëe ama ein nère mae mo wal bose dawemna Epafroditussu etan ebon mae osan dep zer sone'an. Em sap desae ano tahasa de trī so gweblan hap ër sonek. Zen ano syal bose dawem, hen ëe debanë dowal mo kīgisa ëreiija gwenan.

²⁶ Zen man kitak emsa ensa lwabirda gwenda, hen enlalana anakare hap dowebila hana gwenda, "Zen kim sang-sangna asa nasalblak, zen man tangan asa ngalap nē gwebla'an."

²⁷ Eiwa, zen man tangan sang-sangna sabak gweka, hēndep tīn hīp alp gwesikī. Hwēna Alap man kwasang gweblaka, hen asa kwasang gweblaka. Sap zen de tīlinam ano enlala dowe hananna dekam tangan maka taman kinika.

²⁸ In zebē ebon mae osan dep de etan zer sonen hap dwam gwebla'an. Sap hla tankam esa tangan isrip-sri ëblal. Hen ano ebe mae hap de embwanna, hen zēbe hap dena, dekam sa sēwe hera.

²⁹ Zep emki nère mae mo wal bose dawemna in isrip-sri naban dokwak tan- Kristen zini nen men kirekame nēnaka dokwak ulida gwenanke. Kirekam de zisi emki blikip gwesibirida gwen,

³⁰ sap zen mes Kristus hon de syal gwe-gwen hap zēre mo angna sosok taka, hēndep eno mae mo bose hap de ano tahasa trī so gweblannak maka tīlki.

3

Yesus en hon de ëblol gwe-gwen hap de ol:

¹ Zep aya-wal oso-wal, aumwa hap ëe ama emsa gubirida'an: Dawem enkam Bian Yesussu isrip-sri ë gweblak. Ëe sap mesē isrip-sri hap dena suratnak awe ale gulzim, hwēna etan kire habē emsa tītī tabi'in. Sap zen dekam tangan esa ëtatete gwer.

² Hwēna terya-tyakam lowehe gwek. Lwa makare zi mana emsa

karek san dep lup nulin halank! Zen zen yasik dā gwibirin- dekam de to mip blom tasibinkim timsi karek gun hupye. Sap zen man tim nul gwenan, "Yahudi mo ëpba tītī tabin ola in san de ang tankam dekam esa Alap mo nwenak ëdakastil."

³ Hwēna em bahem desan ang ta gwen. Sap nen mese Alap mo nwenak ëdakastil. Zen hom. Sap nen an Alap zēre mo Enho ensa de blol gwe-gweblankame Alapsa betek ë gweblanan. Nen Yesus ensae anakan boltere la gwenan, "Zen diki Zen sa asa ngaya tala." Nen home anakan tim ul gwenan, "Ëe de kiresa tahakam syal gwibinkim dekam asa Alap mo nwenak dakastil." *

⁴ Hwēna orep ëe amaka Yahudi Kristen zini in mo kirekam de tawa tabin sin dan syal-syala ban ang gwe'an. Sap ëe ama sērkam tangan Yahudi mo tītī tabin ol san ang gwegwek. Zēbon mae onakon nara molya asa kwē ta'anam- aha-en mae de ngip gun srēmkamye.

⁵ Musa mo tītī tabin ol san de ang tan hap, asa de jaha gwen nakon kim mingguna aha-en tamank, dekam zep asa to mipna nablonsubluk. Ëe an Israel wal tangan, Benyamin Bak mo ausu nakorena. Ano auyan-azana tīngan Ibrani mo ausu nakore zi. Hen ëe sērkam tanganē Musa mo tītī tabin ol san ang gwegwek, hēndep zebē Farisi hon tīk.

⁶ Ëe zēno mae mo tawa tabin sin enlala syal-syala banē ang gwegwek. In zebē hēndep Kristen zini karek ta gwibik. Hēndep zini ba nakon dep?- asa gublunna, "Zen mes Musa mo tītī tabin ola gulmunku."

⁷ Hwēna mensaë sērkam orep kyang-kyang gulsuk gwek, ëe mesē desa kitak Kristus ensa dikim hwēna ang gwe-gweblan hap tapblaguk. Zen diki zen tangan- dawem wenyaye. Nonol in desanē ang gwe'ak, zen waba hap.

* 3:3 3:3 Rom. 2:28-29; Gal. 6:15

8 Yahudi mo ëpba ol ensa homë kirekam enlala gwe-gwibirin, hwëna tïngare zi mo kirekam-kirekam syal gwibinsi, zen kitak waba hap. Diki dawemna aha-en: Ano Bian Yesussu de tame tanna, zen diki zen-dawem tangan wenyaye. Desa de ang gweblan hap, zen zebë hëndep tïngan anakare enlala naban tapbla guk, "Zen san de blë nabare tembanena kiye-hiri gun en hap dena." Diki ëe ama tangan Kristus en hon de gwë gwen hap dwam gwe-gwe'an-dekam tangan de sërkam Kristussu tame tan hap,

9 hëndep Deban en tangan de zeraha-en gwen hap. Zep ëe ëre en mo sostonkam homë etan alp gwe-gwe'an-titi tabin ol san de ang gwe-gwenkam de Alap mo nwenak dakastin hipye. Hwëna Alap Zëna mes ëe dikim dakastin hip dena abe hap syal gwibir-blika-ëe kimë Kristussu taïbliblakke.

10 Zep ëe ama tangan Kristussu de anakan tame tan hap dwam gwe-gwe'an,

"Diki zëno sosonna, men dekam tin nikon ngaya gweka, abon zen hen lwa gwen.

Hen ano enlalana diki zëno kim zen hen lwa gwen-Zen in kim sap karekna goltowe gwekaye.

Diki ëe hen ëre mo angna sosok tanmen kirekam Zëna zëre mo angna tin hip sosok takake.

11 Hëndep ëe hen wëhë Yesussu tana wei san zertro song gwe'ak?-tin nikon de etan ngaya gwenkamye."

Yesussu de tana wei san zertron hap de ol:

12 Hwëna ëe homë ënaka anakan boltere ta'an, "Eë mesë tangan Yesussu hli-hli tasik," ahaksa, "Ano enhona mes tangan lalak gwera." Hwëna ëe namaë kirekam dikim gwën hap Yesussu dan syal-syala ban zertro song gwe'an. Sap zëwe

de hëndep hatan hap mes ki asa Kristus kwang taka.

13 Aya-wal oso-wal, sap eiwa, ëe nama homë tangan tal gwesi'in, hwëna ëe anakare enlala en nabanë zertron da'an,

Eë Kristus en osan anik dam gwesikhak.

Eë babë lure san de banakare maesa enlala gwibin niban zertron-ënaka de boltere tan hap de enlala, ahaksa enlala dowe hanan nabanye.

Sap ëe ngein en san debë

14 dam-dam enkam hluwe'an-dekam de nabakam hatan hap, men zëwe dep Kristus mo kwasang-kwasang nakon Alap asa kwang takake.*

15 Zep dikire hen tïngan men zen Kristussu de zeraha-en gwennak ëzise gwe'an kirekam de enlala naban lowehe gwek. Hwëna men zen de lure san lwan dahal gwe'ak, Alap sa desa etan oto tasik gwibiri.

16 Zep orana men zëwe Kristussu de zertronkam wet so gwe'ak, dekon en bahem lwan dahan. Hwëna emki dekon zertronkam ayang gun.

17 Zen zep, aya-wal oso-wal, ano mae mo kim lowehe gwek-men kirekamë Timotius mae han ënaka ebe mae hap ërak la gwibir-zimkke. Zini men zen hen ano mae mo kim lowehe gwenan, emki hen desa salbirida gwen.*

18 Sap ëe mesë emsa de gubirida gwenna beya guk, hen angkam etan nwe go-ho nabanë emsa gubirida'an: Zini beya nik zëre mae mo lowehen nakon anakare enlalana nërtrei gwizimnin, "Yesus zen waba hap te-lidak sonnak tilki."

19 Kirekam de zini zen syauk blanak dep dena! Zen hom Alapsa betek në gweblanan, hwëna zëre mae mo tim nikore hole-hlena in desa en betek neibirisen gwenan. Zen zëre mae mo lowe hensa boltere nul gwenan, hwëna zen diki maka nolsaher gwe-gwenan. Sap zëno

* 3:14 3:14 1Kor. 9:24-27 * 3:17 3:17 1Kor. 4:16; 11:1

mae mo enlalana zen auhu-kama ennak dep dena.

²⁰ Hwëna nen an ngatan zi mo langnak dep de wenyä zen. Nen in zebe enlala zon tasiblin naban nësa de ngaya tabin hip de Zini Bian Yesussu kara ë gweblanan.

²¹ Zen sa nëno mae mo auhu-kama tim sin-sinni ansa nëp wet tyasibir-zim zira- dekam de zëre mo tim makan ëliwehen hap. Nen hen dekam zëre mo kim esa ëlitiil ane gwer. Sap zëno kirekam de syal gwibin hip de sosonna man tangan taman kinik. Zen zep sa okamana ansa kitak hëndep denaban bi gwibir zira.

4

Aumwa hap de ol zim-zim:

¹ Zen in zep, aya-wal oso-wal, zen kirekam em Bian Yesussu de taibliblannak tatem ëzaun. Em ano kwasang gwibirida gwen wenyamen desaë sap hlaludan hap embwan gwibirida gwenanke. Em in zen tangan ano isrip-sri gwibiridan wenyaye.*

² Yudia ne Sintike ne, ëe ama emsa titi so'an: Aha-ere enlalakam emki ën, sap em apdekam mese Kristus hun ëraha-en gweka.

³ Hen Szigus Bak, em eiwa ano syal bose dawem. Emki we darena insa mas gwizimdin- zen dekakim enlalasa aha-en lak. Sap ëe kimë iwe syal gwe-gwek, zen ano tahasa ap tri koso gweblak- dekam de Yesus hup de ol dawemsa golluwe gwen hap. Zen Klemen Bak Swe mae han apdekam ano tahasa ap tri noso gweblak. Eë ama taibli'an: Zëno mae mo bosem-sena mes ngatan zi mo langnak hëndep de ëngaya gwen hap de wenyik mo bosemse nabare bukunak ale dabik.

⁴ Em dwan Bian mo bi gwibiridan nakake. Zen in zep em ëisrip-sri gwe tine gwen. Etan emsa gubirida'an: Em ëisrip-sri gwe tine gwen.

⁵ Dikire tingan emsa anakan hla nulida gwek, "Zëno mae mo enhona sae-sae tanganna. Jakal-jakala tawa naka hom." Zen kirekam em lowehe gwen, sap Bian Yesus man angkam hatan hap golek de gwe'ara.

⁶ Bahem banakare mae hap ëngalap gwe-gwen. Diki Alap hap em tingan anakan kira gul gweblan, "Eë ama tol kire hap tahalha gwe'an," ahaksa, "Eë kire kareksaë goltowenan." Hen deban dawemsa em golbla tine gwen.

⁷ Nen de kirekam Alap hap kitak yaing gil gweblankam, Zen dekam sa anakan dikim tame gul gwen hap de enlalana nëbe mae hap ing ta sone gwizimdi, "Nen an eiwa zëre mo taha terenake lowehe gwenan." Mensa Alap kirekam ing ta sone gwizimnira, zini desa toton bëjen tame gun- Kristus hun de zeraha-en gwen srëmkamye.

⁸ Zep aya-wal oso-wal, aumwa hap ëe ama emsa gubirida'an: Emki ere mae mo enhonak anakare enlala dawem ensa ing ta sone gwen:

Eiwa de enlala,
kwasang-kwasang enlala,
dam-dam enkam de gwën hap de enlala,
enho kles gwesin srëmkam de gwën hap de enlala,
sae-saekam de lowehe gwen hap de enlala,
hen Alap en hon dikim tal gwesin hip de enlalasa.

⁹ Mensa ëe emsa tawa ta gwibik hen ayang gul gwizimk, sap olkam ahaksa ënaka de ebe mae hap ërak tazimdinkim, zen kire enkam lowehe gwek. Dekam Alap, men Zen zëre mo tahana nëp deisu guzim'ira, Zën sa emsa golëlowehe gwera.

Paulus kim Pilipik de Kristen zi hip dawemna gol sonezimkike, sap zen mes zëno tahalhana su nul sone gweblak:

¹⁰ Eno mae mo zi lup gul sonenna kim yaing gwezak, ëe ama dekam

* 4:1 4:1 1Tes. 2:19-20

Biansa dawemkam isrip-sri gwe-blak. Sap ëe holokamë dwam gwe-gwek- dekam de ebon mae onakore olsa sane gwen hapye. Hëndep em kime nër hom asa mas ëblak, ëe dekam zebë hen emsa anakan tawa gwibiridak, “Zen nama asa kwasang në gweblanan.” Em home sap asa de kwasang gweblanna olzausuk. Hwëna ëe an langanakë gwë gwenan, zebë eno mae mo abe hap de kwasangna insa tawa gwibir srëm gwe-gwek.

¹¹ Hwëna ëe homë anakan eisbik, “Zen mes asa da dasik.” Sap ano enlalana mes tangan hohle gweka-sap banakare tahalha mae naban de gwën, hwëna dekam sowe henkam de gwën makanë eis gwibirin.

¹² Zep ëe sap de tahalha naban gwën, hen sap tahalha srëmkamye, ëe hwëna sowe henkam de gwën makanë eis gwibirin. Zep ëe mesë tangan dam gulsuk- mensa zini sërkam dei gwibirinye! Zen in zep sap banakare maesa de goltowen nakon, sap itri naban de sowe henkam gwëna, sap hen usak naban de tahalhakam gwëna, ëe nama asa sowehen enkam de gwë gwen makan eis gwibir.

¹³ Sap banakare maesa de goltowe gwenkam ëe nama asa isrip-sri naban gwë gwer, sap Kristus man abe hap sosonna insa gol gweblanda.

¹⁴ Hwëna sap kirekam, em ema tangan ësam gwesik- ano tahalhana insa de ap sul soneblankamye.

¹⁵ Hen Pilipik de zini, ena tawana: Ëe kimë ëse tak ere mae mo langna Makedoniasa hli yuk- ol dawemsa dekon etan aha lang san gol haladan hap, dekam em ene ano tahalhana ap su kul sone gweblak. Hen zini kim ano ol toran nakon Yesusu daibli gweblak, dekam hen em ene ano isrip-srina eis gwibik.

¹⁶ Hen Tesalonikak kimë tahalhakam gwë gwek, zëwe henhenkame ano tahalhana ap su kul sone gweblak.

¹⁷ Hwëna bahem asa kil tin, “An

sawe olsa ki asa gu sonebiridaka.” Bëjënë. Diki ëe ama tangan dwam gwe'an- em dikim anakan ëtawa gwen hap, “Alap sa abe mae hap dawemna mam gulsuzimdi, sap ëe ama Paulussu mas ë gweblak.”

¹⁸ Eno mae mo asa de mas gwe-gweblanna mes tangan sowehek. Zep in syake. Ëe angkam dawem enkamë gwë gwe'an, sap Epafroditus Bak mes eno mae mo abe hap de gol soneblanna golhata zaka. Eno mae mo asa de mas gwe-gweblanna in man Alap hon nwe-mase gwe-gwenan- san de otwer-ansa de zëbe hap tru tasikse gwe-blanna kiye. Alap man tangan sam gwesik gwibi'ira.

¹⁹ Zep tingare eno mae mo tahalhana sa hen nëre mae mo Bian Alap Kristus onakore sërkam de kae-kaekam sul sone gwizimdi.

²⁰ Dikire hëndep denaban Bian Alap mo bosena teip nulsublunda gwek! In eiwa tangan.

²¹ Dawem! Ano dawem gol sonenna an amki hen tingare Kristus hun de zeraha-en gwen wenya enbiridak. Eno mae mo ëKristen gwen wal bose wal om men zen aban mae lowe he'an, zen hen dawem ensa ebe mae hap nol sonezimk.

²² Hen tingare ahakore Romak de Kristus hun de zeraha-en gwen wenya kirekam hen dawem ensa ebe mae hap nol sonezimk- nonol tangan men zen Roma mo teipsin tangan zi mo golak syal ta gwenan-ke.

²³ Dikire Bian Kristus Yesus mo kwasang-kwasangna eno mae mo enhonak lwa gwek.

Paulus mo surat Kolosek de Kristen zi hip

1-2 Tingare Kolosek de Kristen zi hip— men zen enho lalakkam lowehe gwenan, hen Kristus en onak men zen tatem êzauk gwenanke,

Kristus mo dam tasîn zini Paulus onakon, hen nêre mae mo osona Timotius onakon:

Dawem! Alap mo dwam gwibin sin ki kirekam lwak, zep Kristus asa dam tasîki- zêre hap de olsa dikim gol halada gwen hapye. In zebê ebe mae hap ale gulzim'in.

Diki Alap Zên sa ebe mae hap kwasang-kwasang zemka mamkam gol gwizimdi. Hen nen zêno taha terenak esa lowehe gwer.

Paulus kim wal bose wal zeban Kolosek de Kristen zi hip Alapsa zigu soneblakake:

³ Êe êre mo wal bose walya ban kimê ebe mae hap Bian Yesus mo Biansa abe la gwenan, êe dekam dawemsaê Alap hap olbla tine gwenan.

⁴ Sap êe mesê anakan êsane gwegwek, “Kolosek de Kristen zini in mes tangan Kristussu dawemkam daïblîblak, hen zen tingare aya-wal oso-walya dawemkam kwasang neibirida gwenan.”

⁵ Em mae habe kirekam lowehe gwenan: Sap em anakare enlala nabane Alap hon ëyaïng gwe kinî gwe'an, “Ano mae mo dakal hap de gol dawemna mes ngatan zi mo langnak Alap nêp hamal tazimki.” Ngatan zi mo lang hap dena in sa, em mese êtawa gwek- in kim eiwa de ol dawemna ebon mae onak hatakke.

⁶ Ol dawemna in angkam man tingare lang san langa gwesik halada'an. Zini zep beyakam êei gwe-gwe'an- in kirekam hen ebon mae onak lwakye. Em kime ol dawemna in sa êsane gwek, em dekam zebe anakan tame uk, “Hare

Alap mo nêbe mae hap de kwasang-kwasangna eiwa kike.”

⁷ Em Epafras Bak onake êsak. Zen ano mae mo syal bose dawem tanganna. Hen zen ano mae mo weinak Kristus mo nganak iwe syal gwe-gwenda.

⁸ Zen kim awe hata zaka, zen man asa gubirida zaka, “Kolosek de Kristen zini man hen emsa Alap mo Enho nakore kwasang-kwasang naban kwasang neibirida gwenan.”

⁹ Zen in zep, êe kimê kirekam emsa asalbiridak hêndep angkam, êe homê Alapsa de ebe mae hap abe ta gwenna olzausuk gwenan. Êe anakanê Alapsa abe la gwenan,

“Bian, ere mo dwam gwibinsi de tawa gwibin hip de enlala blalsa emki zêbe mae hap dawemkam ing ta sone gwizimdin- ere mo Enho nakore enlala blalkam.

¹⁰ Dekam Kolosek de Kristen zi mo lowe henna sa Bian, ere mo nwenak dakastîl gwer, hen zen sa aha zi hip anakan noltrei gwizim, ‘Bian en hon de lowe henna, an kirekam.’ Dekam zêno mae mo lowe henna te makan sa tê gwer- dawemsa de aha zi hip goltrei gwizimdinkim. Hen Bian, dekam zêno mae mo Emsa de tame tanna sa esek gwese gwizim.

¹¹ Bian, dikire ere mo sêrkam de sosonna zêbon mae onak lwa gwek, hêndep zen sêrkam êtatete gwen- sap banakare karek maesa de goltowe gwenkam. Hen deban zen êisrip-sri gwe-gwen,

¹² hen dawemsa zen ebe hap gol gweblan. Sap Em mese zêno mae mo enhona oto tasizimki- zen dikim ngatan zi mo langnak bitî gwen hapye, hen zen dikim ere mo hlîl irin zi niban zêwe hêndep denaban lowehe gwen hapye.”

¹³ Êe kirekamê Biansa ebe mae hap abe la gwenan, sap Bian mes nêsa lang kawesin nikon hîl tîbirin halzaka- zêre mo dang tinînak de Tane mo îrik ginnik depye.

¹⁴ Tane zem in, Zen nêsa karek-karek nakon hîl tî sonebirki- men zen sap orek nêsa hulekye. Sap Zen

Zen- nëno mae mo karek-kareksa de tap gulsuk gwizimdin hip de Zi niye.

Mae hap de ol: Kristus Zen Zen-teipsin tangan Zi niye.

¹⁵ Zini nen home Alapsa nwekam hla la gwenan.

Hwëna Alap mo nonol Walasna Kristus, Zen Alap zëre mo nwe-mase naban apdenak.

In zebe Kristus onakon Alapsa anakan tame la gwenan, "Alap Zëna Zen hen kirena."

Tane zem Kristus, Zen hen Alap mo tingare yang tabin wenyik mo teipsinni.

¹⁶ Kitak de kire-kirena, zen Alap Kristus mo taha san yang tabirki-

sap ngatan zi mo langnak dena, sap okamanak dena,

sap hlauluda gwen wenyä, hen sap hlauluda gwen srëm wenyä.

Sap Alap mes Kristus de kitak bi gwibin hip kalang gweka-

sap tingare irik ginni, mamna hen betekna,

sap okamanak dena, hen sap ngatan zi mo langnak denaye.

¹⁷ Zep tingare Alap mo yang tabinni, zen ausuna Kristus.

Zen Zen kitak zëre mo ssonkam teirensik gwibirida-

yakla nwena, benna, hen hi mae naye.

Zen in zep dawemkam aha-erenak ërlwa gwenan.

Zen srëmkam maka ësekwak gwe'an.

¹⁸ Zep Kristus hun de zeraha-en gwen zini,

zen okamanak awe san de Kristus mo timni kiye.

Kristus Zëna Zen zëno mae mo nola. Zen nonol lonesen nakore Zi,

Alap zëre mo nonol Walas. Zen zep nonol tanganna tin nikon

ngaya gweka-

Zen dikim tingare ëngaya gwen wenyäka teipsibiridan hap.*

¹⁹ Sap Alap Zëna man tangan tingare enho naban de Tane

zem in hon gwë gwen hap sam gwesiki.

²⁰ Sap Alap mes kalang gweka

Zëbon onakon de tingan etan zëre han zerumlae gwen hap-

sap okamanak de lowehe gwen wenyä

hen ngatan zi mo langnak de wenyä.

Zen Tane zem in mo kalkam kitak golëumlae gweka-

men zen te-lidak son nakon nëno mae mo

karek-kareksa dikim ngan gulsuzimdin hip

wet soblakke.

²¹ Zep nen hen menkam Alap mo jal zi mo kime lowehe gwëk. Nen

dekam Alap onakon langanak, sap dekam nëno mae mo lowe henna

hen enlalana karek enna.

²² Hwëna angkam mes Kristus nësa Alap zëre hon golëyaing

gwëka, hen mes nësa golëumlae gwëka- Zen kim zi tangankam de

tim niban nëno mae mo karek-kareksa dikim ngan gulsuzimdin

hip tilkike. Zëno syala in kon zep Alap

angkam nësa anakan enlala gwibirida gwe'ara, "Zen mes tangan

ëre mo nwenak ëdakastil- san de ëkarek gwen srëm zini kiye."

²³ Zen in zep, Yesussu de taibliblan nakon bap nen ëbutahal gwen. Nen

tatem zëwe en ëzauk gwen. Hen Zëbon en nen enlalasa anakan zon

tasikin gwen, "Mensa ëngaya gwen hap dena nësa gu-gubiridaka, nen

eiwa esa ulin." Nen kire enlalasa gol moko makan eiyas tan- ekakim

ëëwak gwe srëm gwe-gwëk. Sap en home ol dawemna insa laiblibik.

Hwëna desa mes tingare lang san nol haladak, hen asa mes Bian

Jesus dam tasiki- desa de golluwe gwen hapye.

Paulus kim zëre mo syala srip gulsuzimkike:

²⁴ Zen in zep, aya-wal oso-wal, ëe ama isrip-sri gwe-gwe'an- ëe ansa

karekna goltowe gwenanye. Èe sap asa jalom ëk tihinak awe gwë gwer.

Sap ol dawemna insa nen laiblibik,

* 1:18 1:18 Ef. 1:22-23

ëe desa de golasas gwe-gwen jal habë awe gwë'an. Nen Kristen zini mese Kristus mo timnik bitï gwek, ëe zebë hen anakarekam dam gulsuk, "Ëe kimë Kristus mo bose hap karekna goltowe gwe'an, zen san de Zën de hen etan goltowenna kiye."*

25 Zep Alap asa tïngare Kristen zini emsa de mas gwibirida gwen hap dam tasikï- em in zen hen Kristus mo timnik bitï gwekke. Hen ano syala, zen emsa de sowe henkam Alap mo olkam hleng sosubirida gwen hap.

26 Ëe men dekamë emsa hleng sosubirida gwe'an, zen men desa orep tangan Alap nësa de ngaya tabin hip dena kalang gwe gukuke. Nëno mae mo auyan-azana, zen man sap desa de tame gun hup dei gwibik. Hwëna angkam Alap mes zëre mo hlil irin zini nëbe mae hap goltreizimki.

27 Hen Zen man dwam gwe'ara-tïngare zi ausu dikim anakan ëtawa gwen hap, "Zëre mo ngaya tabin hip de kalangna in, zen sërkam de hë'ho gwibin tanganna." Bol-zaun tanganna, Kristus Zen diki nëno mae mo enhonak Zen gwë gwen. Zen dekam tangane anakan tame ul gwenan, "Nen eiwa esa zëre mo ngatannak yaïng gwer."

28 Zen in zebë ëre mo wal bose walya ban Alap onakore enlala blalkam tïngare zini anakan titï la gwibirin, "Karek san dep de orana insa baes ëblak. Kristus Zen Zen-ëngaya gwen hap de ora naye." Sap ano mae mo dwam gwibinni, zen tïngare zisi de Alap zëre onak de tagal gulsunnuk anakan golëtrëblan hap, "An mes tangan Kristus hun de zeraha-en gwennak ëtatete gwek."

29 Ëe, Paulus, zen in zebë tangan tïngare ëre mo sosenkam alp gwe-gwenan. Hwëna ëre en tangan mo sosenkam homë. Hwëna Kristus abon zëre mo sërkam de sosonsa ing gul sone gwenda.

* 1:24 1:24 Kol. 1:18; 2Kor. 1:5

2

1 Aya-wal oso-wal, ëe ama em dikim ano syal hap denaka ëtawa gwen hap dwam gwe'an. Ëe syala dohon-hon tangannakë gol gwenan-Kolose hen Laodikiak de zini ebe mae hapye, hen tïngare ahakore Kristen gwen zi hip men zen hen asa hla da srëm gwe-gwenanke.

2 Ëe mae habë tïngare ëKristen gwen zini ebe mae hap alp gwe-gwenan: Em dikim enho nakon ëtatete gwen hap, hen em dikim enaka de kwasang gwibirida gwenkam ëaha-en gwen hap. Zen dekam esa sul sonenkam anakan tame ul gwer, "Alap insa nër hom zëre mo ngaya tabin hip de kalangna nëp goltreizimki, zen hë'ho gwibin tanganna. Zëno ausuna zen kitak Kristus onak."

3 Sap Alap mo enlala blala hen kalangna, mensa zini sërkam dei gwibirin, desa Kristus hun de zeraha-en gwenkame tame ul gwenan.

4 Ëe mae habë desa ebe mae hap ale gulzim: Emsa de yasik tabin hip de zi boton ora san dep sil tïbirhal srëm gwe-gwen hap. Yasik ta gwibin zini in mo ola sap zen dërek gwen, hwëna bahem desan ang ta gwen.

5 Ëe sap ebon mae homë gwë'an, hwëna ano enlalana san de eban mae de golëlowe henna kiye. Zep ëe ama tangan sam gwesik gwenan-anakan de emsa salbirida gwenkam, "Zen dawemkam lowehe gwenan, hen Kristussu de täibli-blannak tatem ëzauk gwenan."

Kirekam de täibli-blannak nakon de Kristus hun zeraha-en gwen hap de ol:

6 Nen mese anakan ëkira gwek, "Kristus Yesus, Zen eiwa ano mae mo teipsinnï," zen in zep nen ki ëalp gwe-gwen- dawemkam de Deban zeraha-en gwen hap.

7 Nen ki Yesus onak ëmas gwirin. Nëre mae mo gwënnak nen ki Kristussu gwëblan- san de ngirïn gol

tenya kiye. Desa de taibliblannak nen étatete gwe zahe gwen- men kirekam Epafras Bak emsa tawa ta gwibirkike. Deban nen ki Alap hap enho nakon dawemsa golbla tine gwen.

⁸ Dawem! Zi mana emsa zère mae mo yasik tabin sin dikim ang tan hap dahyo halank. Zen man zère mae mo tawa tabinni insa tim nul gwenan, "An enlala blala korena." Hwëna zen zi zère mae mo totore enlala yang tasin. Zëno mae mo tawa tabinni, zen auyan-aza mo ol aïsili kon, hen okamana awe de teipsin dowal-dowala korena. Kristus onakore naka hom.

⁹ Kristus sap zi tangankam hata zaka, hwëna Alap man tingare enho naban Kristus hon gwë gwenda.

¹⁰ Hwëna angkam hen kirekam Kristus nësa tingare enho naban golëgwë gwenda- nen an zene Deban ëraha-en gwekye. Zen Zen-tingare teipsin-teipsin wenya kon Teipsin Tangan naye, sap okamanak de wenya kon, hen sap gulk de wenya konye.

¹¹ Nen kime Kristus hun taibliblankam ëraha-en gwek, Zen dekam zep nëno mae mo enhonak anakan ale gulku, "An ëre mo dena." Nen dekam zebe hen enho nakon anakan eis gwibi'in, "Ano karek gol gwen timni an mes Kristus telidak sonnak goltilkï." Yahudi zini kim to mipna blom dasik gwibirin, zen tahakam tim ensa wei-wei da gwibirin. Hwëna Kristus hun de zeraha-en gwenkam, zen dekam zebe enho nakon ëliwehe gwenan.*

¹² Sap nen kime Kristussu de taibliblankam baptis gwennak ang ta gwenan, dekam man anakan nwe-mase gwe-gwenan, "Nësa hen mes Kristus mae han apdekam kang nulnek." Hen Zen kim tin nikon ngaya gweka, dekam zep hen anakan nwe-mase gwe-gwenan, "Nësa Zen dekam golëngaya gweka." Zen kirekam nëbe mae hap

lwa gwizim'in, sap nen ema anakan Alap mo sosonna laibli gwibi'in, "Zen eiwa mes Kristussu tin nikon ngaya taka."*

¹³ Orep nen Alap mo nwenak san de tok-tokna kiye. Sap nen dekam karek ensae syal ei gwibik, hen nëno mae mo enhonak dekam auhukama enlala en lwa gweka. Hwëna angkam Alap mes nësa apdekam Kristus mae han ngaya tabirki- Desa kim tin nikon ngaya takake. Zen Zëbon onakon Alap nëno mae mo karek-karekna totoresa nëp tap gulsuzimki.*

¹⁴ Menkam nëno mae mo karek-karekna man ngatan zi mo langnak bukunak naït gwibik- tokonak de bonsa de aïtbin makan. Zao hen man ale nul gwek, "Kirekam de Musa mo olsa de gulumurun zini, kirekam de karek tan." Hwëna nëno mae mo bon yala in kitak Alap hom gulku- Kristus hup de telidak sonnak de makan gul irinkim. Deban zep Yesus goltilkï.

¹⁵ Sap Kristus kim te-lidak sonnak tilki, Zen dekam zep hen dowal mo kigisa wal bose wal zeban tahalebin nika yal gul ineka- anakan dikim tingare zi hip golëtreizimdin hip, "Zëno mae mo sosonna angkam hom tangan."

¹⁶ Zen in zep, zi de anakan emsa titi ta gwibinni,

"Em ba habe golsriwen tembanena insa olgwen gwibirin?"

"Hen golsriwen hona insa ba habe otde gwibirin?"

"Alap hap de yaklana insa em ba habe ang ta srëm gwe-gwenan?"

"Ben ëse hap de tembane yawalak em ba habe ang ta srëm gwe-gwenan?"

"Hari Sabatnak hen ba habe syal ta gwenan?"-

kirekam de emsa zi titi ta gwibinni, bahem salbirida gwen.*

* 2:11 2:11 Gal. 5:24 * 2:12 2:12 Rom. 6:4 * 2:13 2:13 Ef. 2:1-5; 2:8 * 2:16 2:16 Mrk. 7:14-23; 1Tim. 4:1-5

17 Sap kirekam de golsriwenna in, zen Kristus de hatan srëmnake kirekam syal ei gwibik. Sap dekam namae kara ë gweblak. Zen in kitak san de honak de zëre mo au-ausa hla ta inenna kiye. Hwëna eiwa de tanganna, zen Kristus onake hla kul gwenan.

18 Anakan hen ki emsa yasik da gwibirin, "Alap mo dam taha nakore zi de nësa mas gwibiridan hap, tembanesa nen ki ëlwa gwendekam de blikip gwesibiridan hapye." Kirekam de zini anakan hen ki titi da gwibirin, "Ëe kirekamë eisirkim hlauk. Ano eisiri an san nen ang tan." Hwëna em bahem desan ang ta gwen. Dawem! Zen mana ngatan zi mo lang san dep de orasa ebe mae hap gwa-gwa da gwizimnink, ki hwëna em molye zëwe dep de mire sigina lop laink. Kire zini waba hap zënaka boltere da gwibirin, hwëna zëno mae mo enlalana auhu-kama en nakorena.

19 Kire zini mes Kristus onak de ëmas gwirin nikon ësyalhe hanak. Hwëna Kristus Zen diki Zen Nola. Nen an tingare Kristen zini san de zëno taha-tanana kiye. Zep Kristus mo timni, sap dan gaing nëna hen sana, zen kitak zëre mo sasonkam aha-ere timnik ësyal gwe-gwenan. Kristus mo timni in dekam zep mam gwe-gwenan- men kirekam Alap Zëna dwam gwibi'irake.*

20 Nen mese Kristus hun ëraha-en gwëk, zep Zen kim tilki, Zen nëban mae apdekam golëjuweka. Okamana awe de teipsin dowal-dowala menkam man nësa dahalebik. Hwëna Kristus kim nësa golëjuweka, nen dekam zebe zëno mae mo tahalebinni in kon ëhil gwe hanak. Zep em ba habe etan yasik tabin sin de ang tan hap ëalp gwesik gwe'an?- okama ennak dep de anakare jalse gwen san de lwan dahan hapye:

21 "Ansa bahem twin gwibin."

"Ansa tangan bahem mae akasibin." Ahaksa, "Bahem ansa olk gun."

22 Hwëna okamanak awe de tembane nwe-masena, zen twinbinkim dekam zep jek-jak gwe-gwenan. Zep ba hap de kire hap etan jalse gwen ola mas gul gwen hap?! Zen auhu-kama zi mo jalse gwen. Alap onakore naka hom.

23 Eiwa, auhu-kama zi mo jalse gwen ola insa zini man tim nul gwenan, "Nen eiwa nëre mae mo timkim de syal dohon-honna ansa syal gwe-gwibinkim esa Alap mo nwenak ëdawem gwer." Zen zep waba hap zëre mae mo timni karek da gwibirin- anakan de tim gunkum, "Ëe an dekam Alapsaë blikip gwesibli'an." Zep kirekam de yasik tabinni insa man tim nul gwenan, "An enlala blala korena." Hwëna zëno mae mo syala in waba hap! Zini men zen sap desan ang ta gwenan, hwëna zëno mae mo auhu-kama hole-hlena hom kim tap gwe-gwizimnin.

3

Anakare enlala naban de lowehe gwen hap de ol: "Ano angna zen awe hom. Zen ngatan zi mo langnak gwë'ara."

1 Zep nen mese Kristus hun de zeraha-en gwenkam zëno timnik biti gwëk. Zep man nwe-mase gwe'an: Kristus kim tilki, Zen nëban mae golëjuweka. Hen Zen kim etan ngaya gwëka, hen ngatan zi mo lang san dep kim sewe seka, nësa dekam zep hen golësesek gwe seka. Zen in zep, nen anakarekam ëenlala gwe-gwen, "Ano angna, zen awe hom gwë'ara. Zen ngatan zi mo langnak gwë'ara- men zao Kristus Alap mo dam taha nakon teipsinkim nikin'irake."

2 Zep nëno mae mo enlalana dikire gulk de lang ennak ëdohon gwëk- men zëwe hen nëno mae mo angna ëgwë gwe'anke. Okamanak awe bap zen.

3 Okamanak awe, nen tok-tok makare nike lowe he'an. Sap nëno

* 2:19 2:19 Ef. 4:15-16

mae mo angna Kristus angkam Alap zère onak golëlowehe gwe'ara- men zëwe enho aha-erekam Alap zère han ë gwe'arake.

⁴ Nëno mae mo eiwakam de angna, zen Kristus onak. Zep Alap kim de Kristussu tingare zi hip zertreizim'inka, nen hen dekam zëwe! Hen nen dekam teipsin-teipsin zi mo kim esa Kristus mo alp nakon zère mo ngatannak hen lowehe gwer.

⁵ Zen in zep, ere mae mo auhukama tim nikore hole-hlena emki gwirsik irin- anakarena, kahalo gwen hap de hole-hle, wesya de lirak oson hap de hole-hle, swi enkam de gwë gwen hap de hole-hle, aha karek maesa de gon hap de hole-hle, hen te-ala beya gwen hap de hole-hle naye.

Te-ala beya gwen hap de hole-hlena in, zëno nwe-masena apdenak- yang tasin dowalsa de boklesa kom so gweblan nabanye. Sap te-ala beya gwen hap de enlalakam de gwë gwenkam, dekam hwëna Alapsa lip sane ë gweblanan.

⁶ Zen kirekam zini karekna nulin halasen gwenan, hwëna zen dekon zep Alap mo jala okamanak de hatan hap golek de gwe'an. Zini men zen kirekam Alap mo dwam gwibin srëm san lowehe gwenan, Zen dekam sa timbwas tabir zira.

⁷ Nen hen menkam kirekame lowehe gwëk. Nësa hen dekam kirekam-kirekam hole-hlena in zen hule gwëk.

⁸ Hwëna angkam nen ki nère mae mo kirekam-kirekam hole-hlena insa hiri gun-wal bosyansa de u sal-sal gweblan, husus gweblan, lamang tan, wakwak tan, hen nop-nop gweblan mae naye.

⁹ Nère mae mo Kristen bose walya bap nen boton ta gwibin. Sap nen

mese nère mae mo ëpba kirekam-kirekam naban hole-hle naban baju ëpbasa de hiri son makan hiri osok.

¹⁰ Dekam zebe hwëna ngatan zi mo langnak dep de enlala ësena baju ëse mo kim alala lak. Nen angkam san de aha zi, ësena. Alap men Zen nësa yang tabirki, Zen man etan nësa ëse ta gwibirida- zère mo kim dikim ëliwehen hap, hen zënaka dikim hli-hli tasin hip.

¹¹ Zep nen an angkam san de ëse yang tabinni kiye. Zep kire zini zen bëjen etan zënaka anakan klis gul gwen:

"An Yahudi zi."

"An Yahudi srëm zi"

"An to mipsa de blaonsublunna."

"An kire srëmna."

"An aha zi ausu nakore zi."

"An kareksa de gol gwen zi ausu nakore zi."

"An zi mo tana iltikinnik de babu gwen zi."

"An kire srëm zi."

Sap nen an kitak Kristus hun de zeraha-en gwen zi, hen Zen angkam nëno mae mo enhonak gwë gwe'ara.

¹² Zen in zep, nen Alap mo hlil irin zi mo kim nen lowehe gwen. Sap nësa mes zère han dikim zeraha-en gwen hap ngan tasibirki. Zep nen an zen- Zëno kwasang gwibiridan wenyaye. Zep nen ki nère mae mo lowehen ësena insa pakean ëse mo kim alala ta gwen- anakarekam de lowehe gwenkam,

dawemsa hen kwasang-kwasangsa de tingare zi hip gol gwiz-indinkim,

enlala betekkam de lowehe gwenkam,

tingare zisi de sae-sae enkam golëlowehe gwenkam,

hen tatem de ëzauk gwenkam.

¹³ Jala bap nen lam gul gwen- dekam de hwë-hwëkam nënaka kareksa gol gwizimdin hipye. Hwëna nen ki hwë-hwëkam kwasang tola ban karekna insa eititi gwe-gwibin. Sap Alap mes Kristus mo kwasang-kwasang nakon nëno mae mo karek-karekna eititi gwibir-zimki, zep nen

hen diki kirekam nen eititi gwe-gwibin.

¹⁴ Hwëna bol-zaun tanganna, nënaka nen kwasang gwibirida gwen. Zen san de tak ësesa de daunnu kiye- pakean ësenä inä dikim jak sosun hup. Zen dekam tangan esa aha-ere enlalakam lowehe gwer.

¹⁵ Sap Alap mes nësa kwang guludaka- Kristus mo timnik de bitì gwenkam dikim ëaha-en gwen hapye. Zen zep Kristus onakore aha-ere enlalakam de lowehe gwen hap dena in, dikire nësa enho nakon irik gik. Deban Alap hap nen dawemsa golbla tine gwen.

¹⁶ Kristus hup de ol dawemna dikire nëno mae mo enhonak dawem enkam sa gwek. Hen tingare Kristus onakore enlala blalkam nen nënaka tawa ta gwibin, hen dawem san dep nen dekam nënaka titi ta gwibin. Hen Alapsa nen enho nakon tërya ban isrip-sri gwe-gweblan- sap Alap mo ëbpa ola kore tërkam, Kristus hup de tërkam, hen sap Alap mo Enho nakore tërkam.

¹⁷ Nëno mae mo lowe henna, sap syala hen ola, dikire Bian Yesus mo bose enä dikim teip gulsuk gweblan en hap lwa gwek. Hen deban Bian Alap hap nen dawemsa golbla tine gwen- Kristus inä dawemna nëbe mae hap gol gwizimnirake.

Aha-ere golak de Kristen zi kirekam zënaka golëlowehe gwen hap de ol:

¹⁸ We walya, emki ere mae mo zi walya blikip gweibirida gwen, sap Kristen we wal hap zen kirekam dakastilzim'in.

¹⁹ Zini, emki ere mae mo we walya kwasang gwibirida gwen. Jal-jalkam bahem golëlowehe gwen.

²⁰ Walasna, ane-bia mo ol san em ang ta gwen. Bian Alap dekam sa hen emsä sam gweibiridala.

²¹ Bi walkam dena, ere mae mo walasna bahem u sal-sal ta gwibin.

Ki hwëna enlala nik sa ëdowe hana gwer.

²² Zi mo tana iltikinnik de ëbabu gwe-gwen wenya, ere mae mo okamanak de zi bina in mo ol san em ang ta gwen- sap zen de emsä kara ta gwennak, hen sap kara tan srëmnak. Hen tingare enho naban em betek gwibirida gwen. Sap em dekam ere mo eiwakam de zi bina Bian Yesusue hen blikip eisik gweblanan.

²³ Zep banakare maesa de syal gwibinkim, tingare enho naban em anakare enlala naban syal ta gwen, "Ëe an zisi homë babu gwebla'an. Hwëna Bian Yesus mo abe hap de dwam gwibir-blinna, zen ëre mo zi bina an, zëno ëk nakon sa wet so gwer."

²⁴ Zen kire enlala naban em syal-syalkam syal ta gwen, sap ena anakan tawana, "Zen diki Bian Yesus sa ëre mo syal eini ap golblala- Zen kim zëre mo hlil irin zi hip de hamal gulzimdinni inä golzim'inkaye." Eiwa, Zen Zen en tangan emsä bi gwebla'ara.

²⁵ Hwëna emki ëenlala gwen: Men zen karekna nol gwenan, Alap sa etan zëre mae mo karek gon jam enkam karek tabiri- sap bose nabare wenya, hen sap bose srëm wenya. Alap hom ahakore en naka auhu-kama zi mo kim golëake gwenda.

4

¹ Men zen aha zisi bi neibirida gwenan, emki ere mae mo tana iltikinnik de lowehe gwen zisi enlala dam-dam enkam golëlowehe gwen, hen zëno mae mo tahalhasa emki sul sone gwizimdin. Sap ena hen mes-em ëtawa gwek, "Asa de bi gweblan Zini hen kike- men Zen ngatan zi mo langnak gwë gwendaye."

Aumwa hap de titi tabin ol:

² Alapsa em gu sonebla tine gwen. Hen salok-salokkam lowehe

gwek- ekakim anakare enlala naban lowehe gwek, "Nen ki kire hap Alapsa abe tan." Hen deban dawemsa Bian hap olbla tine gwek.

³ Abe mae hap emki hen abe ta gwen- orasa dekakim ap kles tyasik gwizimki, ee akakim Kristus hup de ol dawemsa * aha zi hip sowe henkam srip ulsuk gwizimk, ee in zep de jal hap bwinak awe gwë'anke.

⁴ Zep abe hap emki hen anakan abe ta gwen, "Zen diki dam-dam enkam zen srip gulsuk gwizimdin." Sap Kristus Zen kire hap asa dam tasiki.

⁵ Em de Kristussu de taibliblan srëm zi niban golélowe henkam, dekam enlala blala ban em golélowehe gwen. Hen Alap de ebe mae hap Kristus hup denaka dikim srip gulsuzimdin hip orasa kles tyasik gwizimdinkim, desan en em ang ta gwen.

⁶ Hen emki dawem enkam de ding gul gwizimdin hip ealp gwe-gwen. Eno mae mo ol toranna, kwasang naban zen lwa gwen, hen zen dërek gwe-gwen.

Mae hap de ol: Paulus mo wal bose walya dekam kirekam lowe he'ak.

⁷ Ee suratna ansa nëre mae mo osona Tikikus Bak honë ebe mae hap gol sonezim'in. Zen ano dang tininak de syal bose, hen zen taibliblan tanganna. Tingare abe hap de ola, zen zen sa emsa tonbirida zala.

⁸ Zen in zebë ebon mae osan zer sonek- zen de eno mae mo enlalasa së ta sonezimzin hap, zëbon onak de abe mae hap de olsa ësane gwenkam.

⁹ Kolose ere kore walya Onesimus Bak, zen hen sa ang gwebla zala. Zen hen nëno mae mo dang tininak de oso, hen taibliblan tanganna. Zi darena in zen sa kitak abe hap dena emsa anakan lonbirida zala,

"Paulussu angkam kirekam në gwebla'an."

¹⁰ Aristarkus Bak, men debanë bwinak awe ë gwe'an, dawem ensa ebe mae hap gol sonezimki. Barnabas Bak mo naïmlina Markus hen dawem ensa ep gol sonezimki. Markus hup de ola mensaë nonol emsa gu sonebiridak, zen desan em ang tan: Zen de ebon mae hata zankam, emki dawemkam dokwak tan.

¹¹ Hen Yesus Bak, aha bosena Yustus, zen hen dawem ensa ebe mae hap gol sonezimki. Yahudi zi ausu nakore ëKristen gwen danahare zini in, zen zen en ano tahana ap trï noso gweblanan- Alap mo irik gin hip de ol dawemsa de golasas gwe-gwennakye. Zen zen asa dawemkam tatete da gwenan.

¹²⁻¹³ Hen ahana Kolose ere kore walya, Epafras Bak, zen hen dawem ensa ebe mae hap gol sonezimki. Zen hen Kristus mo nganak de syal gwe-gwen zi dawem tanganna. Zen enho zon tasik gweblankam ebe mae hap Alapsa abe ta tine gwenda- em dikim Kristussu de taibliblannak tatem ezauk gwen hap, hen Alap mo dwam gwibin sin dikim ëtal gwesin hip. Zen kirekam zausun srëmkam ol gu sonenkam emsa alp gwibirida gwenda- sap Laodikiak de zini, hen Hiyerapolisk de zi.

¹⁴ Ano mae mo dokter dawemna, Lukas Bak, apdekam Demas Bak han, dawem ensa hen ebe mae hap ol sonezimki.

¹⁵ Laodikiak de ano mae mo aya- wal oso-wal hap emki hen ano mae mo dawem gol sonenna ansa ayang gulzimdin. Hëndep Nimfa Bak hap hen ayang ulbik, hen tingare Kristen zini men zen zëno golak tagal gwe-gwenanke.

¹⁶ Em kim suratna ansa tingare Kristen zi mo inik baca ulsuk, dekam hwëna Laodikia san dep ol sonek- zao de zi deka hen baca nuk. Ee mesë hen aha suratna Laodikiak

* **4:3 4:3** Mensa ayatna awe "Kristus hup de ol dawem" kam li nul sonek, Paulus "Kristus hup de ol aning gun" kum ale gulku. Desa de dam gulsun hup, emki hlaun Kol. 1:26-27, hen Kol. 2:2nak.

de Kristen zi hip gol sonezimk. Zen kim hen desa ebe mae hap ayang nul sonezim'ik, desa hen tagal gwennak baca uk.

¹⁷ Hen Arkipus Baksa anakan en-blak, "Ebe hap mensa syala Bian Yesus wei yul soneblaka, dawem enkam de sul sonek."

¹⁸ Aumwa hap de ola ansa ëre mo tahakamë ep ale gulzim'in: † Ëe, Paulus, dawem ensa ebe mae hap gol sonezim'in. Ëe ama etan emsa enlala sobirida'an: Ëe awe tahalen nikë jalom ëk tihinak gwë gwe'an!

Bian Alap mo kwasang-kwasangna dikire ebon mae onak lwa gwek!

† **4:18 4:18** Suratna an, aha zi Paulus mo olsa ale gulzimki. Hwëna aumwa hap de ol ensa, Paulus zëna ale gulku.

Paulus mo surat Tesalonikak de Kristen zi hip

¹ Suratna an kitak de Tesalonikak de Kristen zi hip, Bian Alap ne Teipsin Zini Kristus Yesus nik mo bi eibiridan wanya kip,

Paulus, Silas, hen Timotius mae onakon:

Dawem! Diki Alap Zën sa kwasang-kwasang zemka mamkam ebe mae hap gol gwizimdi. Hen nen zëno taha terenak esa lowehe gwer.

Mae hap de ol: Tesalonikak de zini dawemkam ëKristen gwëk.

²⁻³ Aya wal oso wal, ëe henhenkam ebon mae onakonë dawemna Bian Alap hap olbla tine gwenan. Eno mae mo bosem-sesa de gubin nibanë etan-etankam anakan en sone gweblanan,

“Bian, ëe dawemsa ebe hap ol gwebla'an, sap Tesalonikak de zini zëre mae mo Bian Yesusu de taibliblansa dawemkam aha zi hip noltrei gwizim'in, hen zëno mae mo kwasangna mes aha zisi de mas gwibirida gwenkam wet sozimk. Hen zen Kristus de lwahal zannak dep dawemkam kara në gwebla'an, in zep tatem ëzauk gwe'an.”

In zebë kirekam nëre mae mo Bian hap dawemna ebon mae onakon ol gweblanan.

⁴ Aya wal oso wal, ëe orep mesë anakan dam ulsuk, “Alap man emsa kwasang gwibiridaka, in zep hëndep emsa hlil inki.”

⁵ Sap ëe kimë ol dawemkam emsa tawa la gwibik, em mese dekam anakan dam ulsuk, “An totore olsa hom. An Alap mo ol, soson tanganna.”* Dekam zep hen Alap mo Enhona ebon mae ing gwe heka, in zep ola in eno mae mo enhonak dawemkam saltik. Ena hen tawana: Eë men kirekamë ebon mae onak ënaka ërak makan kang ul gwëkye.

⁶ Zep em dekam zebe Bian Yesus mo ërak san, hen ano mae mo ërakna in san ang tak. Em hen aha zi hip ere mae mo Alapsa de taibliblanna ema oltrei gwizimk. Zao zep hen emsa Desa de taibliblan srëm wenyik sërkam karek da gwibik. Sap man ki emsa neibirida gwëk, hwëna em home dekam Yesusu de ang gweblan hap baes tak. Sap Alap mo Enhona man ebon mae isrip-srina ing gul sone gwizimki, zebe ola insa dawemkam urensik gwëk.*

⁷ In zep Makedonia hen Akaya mo langnak de Kristen zini ebon mae onakon anakan hla nul gwëk, “Kristen zini diki kirekam zëre mae mo eini noltrei gwizimnin.”

⁸ Bian Yesus onakore ol dawemna insa dekam zep ebon mae onakon Makedonia hen Akaya san dep nolteisik. Hwëna desan en hom. Tingare zi-ë zi-ë san eno mae mo Alapsa de taibliblanna insa mes nolteisik. Zep ëe etan enda kore zisi asa anakan gubiridal?– “Zen mes dawemkam ëKristen gwëk.”

⁹ Sap ëe kimë desa olëtowe gwenan, zen man kitak asa anakan aïsïl neibirida gwenan, “Tesalonikak de zini dawemkam emsa dokwa-kwak nuk. Zëre mae mo ensasa srëm dowal yang tabinni dekam zep hli nulidak. Dekam zep hwëna Ngaya Zini eiwa de Alapsa betek nëblak.”

¹⁰ Zen man hen asa nenbirida gwenan, “Tesalonikak de zini dawemkam Yesusu lwahal zannak dep kara në gweblanan.”

In eiwa, aya wal oso wal, sap Alap eiwa tin nikon Tane zemka ngaya taka, zep Zen eiwa ngatan zi mo lang nakon sa nësa kwang guluda halanen de Alap mo jalsa okamana awe hlaun srëm hap. Sap Alap mo jal de okamanak hatan hap dena man tangan golek de gwe'an.

2

Mae hap de ol: Paulus mae kim

* 1:5 1:5 1Kor. 2:4-5 * 1:6 1:6 Kis. 17:5-10

Tesalonikak de lowehe gwennak ërak makan zënaka kang nul gwekke.

¹ Aya wal oso wal, ena tawana: Ëe waba hap homë ebon mae yaïng gwek.

² Ena tawana: Ëe kimë nonol Pilipik yaïng gwek, zen man tangan asa karek da gwibik hen lamang da gwibik. Eno mae mo ënak hen man sap asa jalse neibirida gwek. Sap eiwa kirekam, hwëna nëre mae mo Alap abe mae hap enlala tatetena zer gwizimki. In zebë udobe naban Alap onakore ëngaya gwen hap de ol dawemna inkam emsa lonbirida gwek.*

³ Zep ëe emsa de yasik tabin hip homë yaïng gwezak. Aha enlala aning tan naban homë yaïng gwezak-boton olsa de tawa ta gwibin hip.

⁴ Hwëna ëe an Alap mo taïblibiridan zië yaïng gwezak-ëngaya gwen hap de ol dawemsa de ebe mae hap ayang gul gwizimdin hip. Sap ëe zi de asa sam gwesibiridan hap homë syal ta gwenan. Hwëna Alap, men Zen zi mo enhona karatda ta gwibir-zimnira, Zen en de asa sam gwesibirida gwen habë syal ta gwenan.*

⁵ Ena tawana, hen Alap mo nwenakë emsa gubirida'an: Ëe ëre mae mo timsi de ngalap gwibin hip de enlala naban homë yaïng gwezak. Ëe u siwen enlala naban homë emsa anakan bën-jana la gwibik, "Ano tawa tabinkim mese ëei gwer, zep angkam kire-kiresa em ap kap tazimdin."*

⁶ Ëe ebon mae onak ëre mae mo bose dikim mam gwen hap homë syal ta gwek- sap eno mae mo nwenak, ahaksa aha zi mo nwenak.

Ëe an sap Kristus mo dam tasibin zi, zep sap amaka dekam emsa abe mae hap de ba maesa kap ta gwizimdin hip abe la gwibik. Ëe hwëna homë.

⁷ Ëe hwëna ol dawemna inkamë dawem enkam emsa laizi gwibik-

men kirekam an wal zem walas zemka momkam daizi gwibirinke.

⁸ Ëe sap Alap onakore ol dawem enkam de emsa tawa ta gwibin hibë yaïng gwezak. Hwëna ama tangan emsa kwasang eibirida gwek, hëndep zebë emsa de mas gwibiridan hap ëre mae mo timni isrip-sri naban sosok la gwibik.*

⁹ Aya-wal oso-wal, ena tawana: Ano mae mo danna te-ala hap de syalak zep hen ësin gwe-gwek- sap yaklam, sap kam. Ëe mae habë ëre mae mo syala insa ol gwek: Dekam de Alap onakore ol dawemna insa totoresa ebe mae hap gol gwizimdin hip, emsa de dohon-hon ta gwibin srëmkam.

¹⁰ Nglinak de gwë gwen Zini Alap mo nwenakë emsa gubirida'an-ena men kirekame asa kara la gwibikke: Ëe ebon mae onak enlala lalakkamë hen dam-dam enkamë lowehe gwek- enho kles gwesin srëmkam.

¹¹ Sap em tawana: Ëe bi zik de walas zemka alp gwibiridan mo kimë emsa olëlowehe gwek.

¹² Ëe zebë aha-en aha-enkam ebe mae hap ol zim-zimni ol gwizimki. Em kime karekna oltowe gwek, ëyë hwëna eno mae mo enlalana tatete la gwizimki. Hen eno mae mo lowehen dikim Alap mo nwenak dakastin hip ama emsa titi la gwibik. Sap Alap Zëna man emsa zëre mo irik ginnik dikim biti gwen hap kwang guluda'ara- hen zëre mo sérkam de ngatannak dikim lowehe gwen hap.

¹³ Ëe hen ama ebon mae onakon Alap hap dawemna mae hap olbla tine gwenan: Sap em kime abon mae onak Alap mo ola ësane gwe-gwek, em dekam zebe hëndep anakare enlala naban kyang-kyang ulsuk, "An eiwa Alap zëre mo ol. Auhu-kama zi mo olsa hom."* Sap em mese ola insa kirekam laïblibik, in zep ola in eno mae mo enhonak syal gwe-gwenan.

* 2:2 2:2 Kis. 16:19-24; 17:1-9 * 2:4 2:4 Gal. 1:10 * 2:5 2:5 Kis. 20:33-35 * 2:8 2:8 Yoh. 10:11

* 2:13 2:13 Gal. 1:11-12

14 In zep, aya-wal oso-wal, em Yahudi mo langnak de Kristen zi mo kim lowehék. In kim ahakore Yahudi ëKristen gwek, hwëna Yahudi bose zem dekam man karek da gwibik. Emsa in zep hen kirekam karek da gwibi'in- ere korena men zen ëei gwe srëm gwe'anye.

15-16 Sap Yahudi zini, zen kirekam ëgwë gwenan. Zen orep Alap mo olsa de ayang gul gwen hap de zini man damera gwek, hëndep Yesussu dak, dekam zep hen asa nëralsa sone gwibik. Zen zep hen asa angkam anakan tru-tru nul gwizimnin, "Em bahem Yahudi srëm zini ola inkam tawa ta gwibin." Zep zen in man ënwe-mase gwe'an- tïngare zi mo jal zi. Sap zen ëngaya gwen hap de ol dawemna insa man tru-tru nul gwizimnin. * Zen dekam zep zëre mae hap de karekna bwang nulsukse gwenan, hëndep angkam Alap de heip gun hup dena mes tangan golek de tabir.

Mae hap de ol: Paulus man tangan Tesalonikak de Kristen zi niban de etan golëtowen hap dwam gwe-gweka.

17-18 Aya wal oso wal, nen ein tangane ësyawek, zep ano mae mo enlalana nama ebon mae onak lwa gwe'ara. Ëe ama eis gwibi'in, "Ano mae mo walasna angkam kwasap walas mo kim lowehe gwe'an." In zebë sap etan-etankam emsa de duwebiridazan hap ëakasik gwek. Hwëna dowal mo kigi asa tru-tru gul gwizimki. Ëe an Paulus, ëe ama sap etan-etankam emsa de duwebiridazan hap akasik gwek, hëndep zebë aumwa hap Timotiussu emsa de amjanbin hip zer sonek.

19 Sap em in zen tangan- ano mae mo isrip-sri gwibiridan wenyaye. Nëno mae mo Teipsinni Yesus in kim de lwa ha'an zaka, ëe dekam asa emsa isrip-sri naban zëbe hap anakan olëtrëblal, "An zen- ano

mae mo syal gwibinkim de Emsa taibliblan wenyaye!" Ëe zep asa hwëna Yesus onak hë'ho gwibinni hla kul.*

20 Zep em in ano mae mo hë'ho gwibin wenyaya hen isrip-sri gwibiridan wenyaya zen tangan.

3

1-2 Aumwa hap ëe anakanë ëenlala gwek, "Ëe banakan asa ëgwër- Tesalonikasa de amjanbin srëmkamye?" Dekam zebë ola anakan aha-en uk, "Timotius em neik song gwe. Ëe Silas han ëna Atenak asa ër." Dekam zep hëndep nëre mae mo osona in emsa amjanbir zika. Zen hen Alap mo nganak de syal gwe-gwen zi- Kristus hup de ol dawemsa de gol halada gwen hap dena. Ëe mae habë ër sonek- zen de emsa Yesussu de taibliblannak de tatem ëzauk gwen hap dena kim titi ta gwibin hip.

3 Ëe mae habë emsa ngalap eibirida'ak, "Yesussu de taibliblan nakon mana etan lwanda halank, sap nësa man angkam karek da gwibi'in." Ena tawana: Nësa de kirekam karek ta gwibin hip dena mes ki Alap mo kalang gwe gunnuk lwak.*

4 Sap men kime apdekam lowehe gwek, ëe hen mesë dekam kirekam emsa enbirida gwek, "Nësa sa karek da gwibir." Hen ena tawana: Zen mes ki hëndep kirekam lwak.

5 Zep ëe Paulus, ëe homë enlala nakon emsa sëwe hebirida gwek, zen in zebë hëndep Timotiussu ebon mae osan dep zer sonek- dekam de emsa tawa gwibiridan hap, "San ha nama Kristussu de taibliblannak tatem ëzau'un?" Ëe ama emsa anakan ngalap gwibiridak, "Men zen nësa golëliwenda gwenda, san ha zen mes aha ora san dep sil tibir halka? Ki ëe waba habë dan-sin niban syal eibirida gwek."

* 2:15-16 2:15-16 Kis. 2:23; 9:23-29; 13:45-50; 14:2-5; 14:19; 17:5; 17:13; 18:12 * 2:19 2:19 Plp. 2:16; 4:1; 2Kor. 1:14 * 3:3 3:3 2Tim. 3:12; Kis. 14:22

Mae hap de ol: Timotius kim etan Tesalonikak de zi hip dena tonzim zikake.

⁶ Hwëna Timotius mes nër hom ebon mae onakon lwahal zaka, hen zen mes ebe mae hap de ola isrip-sri gwibin tangan naka asa anakan tonzim zika, "Zen nama Yesussu de taibliblannak tatem ëzauk gwe'an, hen zënaka man kwasang neibirida gwenan. Hen zen nama nësa zolan-zolan neibirida gwenan, hen nësa de etan golëtowen hap enlwan neibirida gwenan- nen men kirekame hen desa de hlaludan hap ëenlwan gwe-gwenanke."

⁷ In zep, aya-wal oso-wal, ëe kimë kirekam Silas han sane ëk, ëe dekam zebë enlalana oto eisik. Zep angkam ëe sap asa karekna oltowe gwer, hen zini sap sa asa karek da gwibir. Hwëna em de nama Yesussu de taibliblannak tatem ëzauk gwenkam, ëe ama tangan ësam gwesï'in.

⁸ Zep angkam enlala nakon mesë tangan ësëweher, sap em namae Bian Yesus onak tatem ëzau'un.

⁹ Zep ëe kimë Alapsa en sone gweblanan, isrip-srina ebon mae onakon zebë sërkam eis gwibirin. Ëe zebë Alapsa isrip-sri ëbla tine gwenan.

¹⁰ Zebë hen enlala zon tasiblin naban kam denaban yaklam denaban abe la tine gwenan- dekam de eban mae etan golëtowen hap, hen dekam de etan emsa dawem enkam Yesussu dikim taibliblan hap denakim titi ta gwibin hip.

Paulus kim Tesalonikak de Kristen zi hip Alapsa abe takake:

¹¹ Diki Eirzi-Bia Zën sa orana abe mae hap kles yasizimdi- emsa dikim amjanbiridan hap denaye. Ëe zebë anakan Biansa abe la tine gwenan,

¹² "Bian men kirekam Ena Tesalonikak de zi hip de kwasangna ano mae mo enhonak dohonse gul

gwizimki, Emki kirekam etan zëno mae mo enhonak syal gwe-gwenzen dekamim zënaka dawemkam kwasang neibirida gwëk, hen ëKristen srëm zi hip dekamim hen kwasangsa noltrei gwizimk.

¹³ Bian, zëno mae mo enhosa emki tatete ta gwizimdin- zen dekamim enlala kles gwesin srëmkam hen enho lalakkam lowehe gwëk, hen zen dekamim ano mae mo Teipsinni Yesussu dawemkam nërtowëk, Zen de ngatan zi mo lang nakon zëwe de wënya ban golëlwan dahal zannak."

4

Kristen zi de kirekam lowehe gwen hap de ol:

¹ Aya-wal oso-wal, ëe Kristen zi dikim Alap mo nwenak ësam gwesin hip dena mesë emsa tawa la gwibik, hëndep em mese desan ang tak. In zebë etan Teipsin Zini Yesus mo bosekam emsa titi labi'in- em dikim kire syalsa etan esek gulse gwen hap.

² Sap Kristen zi mo kirekam de lowehen hap de ola mensaë Bian Yesus mo bosekam ayang ul gwizimk, ena namae desa enlala ei gwibi'in.

³ Zep Alap mo ebe mae hap de dwam gwibinni, zen em dikim enho lalak enkam lowehe gwen hap, hen ëkahalo gwe-gwënsa dikim baes tan hap.

⁴ In zep zikim dena, em ere mae mo wanga tëbolena enho lalakkam olëinik gwe-gwëk, aha zi mo bi gwibin nika ekakim nwe enkam hla kulsuk gwëk. *

⁵ Bahem ere mae mo hole-hle san ang ta gwen- men kirekam Alapsa de tame tan srëm zini ëgwë gwënye.

⁶ Zi bose uk mo dobe jopnak bahem ake anen, hen bahem ap

* **4:4 4:4** Yunani olkam wanga tëbole hap dena "botol" kam ale nuk. Yunani olkam zen kirekam nolzabe gwëk- in kirekam hen Orya olkam wanga tëbolekam olzabe gwenanke. Hwëna Yunani olkam aha dam gulsunnu hen ki. Zen a kirekam moye: Em dawemkam we walya ban de enho lalakkam ën hap denaka tame uk- dekam de aha zi mo bi gwibin nika nwe enkam hlalsuk gwen hap. (1Kor. 6:12-20)

son. † Kire zini Bian sa kareknak kang gulu- men kirekamë hamal hap emsa enbirida gwekke.

7 Sap Alap hom nësa anakan gubiridaka, "Em kahalo sasonkam lowehe gwek." Zen diki enho lalak enkam de lowehe gwen hap nësa gubiridaka.*

8 Èe ansa emsa tawa labi'in, zen ère mae mo olsa hom. Zep men zen de ola ansa baes neibi'ik, ki zen mes Alap, men Zen zère mo Enhona zer gwizimnira, zëno ola baes gwibirida.

9 Angkam èe sap Kristen bose wal omka dikim kwasang gwibirida gwen hap denaka amaka ale ulzim'in, hwëna Alap Zën mes ki kire hap dena ebe mae hap golzimki.

10 Ere mae mo kwasangna mese ki oltrei gwizimk- tingare langna Makedoniak de ere mae mo Kristen bose wal hap. Hwëna aya-wal oso-wal, èe ama emsa titi labi'in- em de ere mae mo kwasangna insa etan esek gul kinì gwen hap.

11 Emki èalp gwe-gwen- enlala sèsekkam de lowehe gwen hap. Aha zi mo syalak bahem enaka golëngewenda gwen. Hwëna diki e-en em ere mae mo syalsa gol gwen- men kirekamë emsa enbirida gwekke.*

12 Dekam Kristen zini nëno mae mo bosena sa aha zi mo nwenak dawem gwer, hen nen dekam aha zisi molye blol eibirida gwek.

Bian Yesus de etan lwa halzan hap de ol:

13 Aya wal oso wal, èe homë em de anakan tame gun srëm hap èdwam gwe'an, "Nëno mae mo Kristen wal bose walya men zen juwenkam èteingir gwe guk, zen banakan sa ègwër?" Sap èKristen gwen srëm wenya, zen iye zik de tinkim karekkam hala-hla neibirida

gwenan, sap zen hom Yesusu enlalana anakan zon dasik gweblanan, "Zen sa desa ngaya tala." Hwëna èe homë ki èdwam gwe'an- em de hen kirekam ègwë gwen hapye.

14 Sap nen mese anakan ètaiblik, "Yesus sap mes tilki, hwëna man etan ngaya gweka." In zep nen hen anakan ètaibli'an, "Yesusu de taibliblan wenya men zen juwenkam èteingir gwe guk, Yesus kim de etan lwa ha'an zaka, Alap sa desa Yesus onak dep tagal gulsulu."

15 Èe in zebë Bian Yesus mo ola, etan de nësa tagal gulsuzun hap dena, ebe mae hap ayang gulzim'in: Yesus de etan lwahal zankam, nen an zen nama ngaya wenya lowe he'an, nen bëjen nen juwenkam de teingir gwe gun wenya insa ngatan zi mo lang san de sesek gwe senkam ngip guludan.

16 Dekam Alap mo dam taha nakore zi mo teipsin nik sa ol mamkam takenbirida zala, ki esa ngatan zi mo lang nakore sramin aukuna èsane gwer. Zen dekam sa nëno mae mo Teipsinni Yesus Zëna butnak dep ati gwe ine zala. Desa de taibliblan wenya men zen juwek, zen dekam sa nonol tim èse naban luk tal.

17 Ki sa hwëna apdekam ngaya wenya nëban mae ngli san dep lup gul ane hala- dekam de zè zère han zertowehan hapye.* Zen dekam sa zè hëndep denaban nësa golëlowehe gwera.

18 Zen in zep, emki kirekam enlalana enaka sè ta sone gwizimdin.

5

1-2 Aya wal oso wal, em mese sap Bian mo hatan hap de yaklana anakan ètawa gwek, "Zen kam de sowë zi mo kim sa nëp lwazim."*

† 4:6 4:6 Paulus mae mo langnak dobe jopna hom, hwëna Orya ol zini kirekam gulk sun ola nablon gwenan- anakare hap, "Wal bose omka bahem we walya kon yane-ne tan." * 4:7 4:7 1Ptr. 1:15-16

* 4:11 4:11 2Tes. 3:10-12 * 4:17 4:17 1Kor. 15:51-52 * 5:1-2 5:1-2 Luk. 17:24-32; 21:34-36; 2Ptr. 3:10

Zep ëe bëjënë emsa anakan gubiridan, "Yaklana dekam sa hata zala."

³ Zëno hatan hap denak kim de golek de gwe'ak, dekam zini sa ëkil gïl gwer, "Langna an aïrïs ki lwa gwe'an- umlae enkam." Hwëna zen kirenak sa mumuk ennak Alap mo langsa de karek gun hup dena hatalmen kiye, u nubare we de mumuk ennak zënaka eisbir anenna. Dekam men zen Yesussu daïblibla srëm gwëk, zen toton ba san molya easendak.

⁴ Hwëna aya wal oso wal, em kawesinnik home lowe he'an. Zep Bian de sowë zi mo kim hata zannak, em molye auna ohloblak.

⁵ Sap em kawesinnik de zisi hom. Em kitak ngatannak de zi. Nen hleng gwen srëmnak de zisi hom. Nen litinnik de zi.

⁶ Zep nen bap nen ni enna truwenda gwen- men kirekam aha zi truwenda gwenanye. Nen hwëna ënwe-alk gwen srëmkam nen lowehe gwen- kawesinnik de enlala nik ëmamak gwen srëmkam.

⁷ Sap kam zen dekam zini nini truwe gwenan, hen ho mamakna dekam notdeblanda gwenan, dekam zep ëmamak gwe-gwenan.

⁸ Hwëna nen litinnik de zi, zep nen mamak srëmkam nen lowehe gwen. Nen dowal mo kigi nabane ëreija gwenan, zep eijan hap nen nënaka wër tyasibin. Nonol tanganna Yesussu de taïbliblanna kwasang-kwasang naban desa biti makan nen darak tan. Enlala zon tasik gweblanna desa mire sigi makan nen anakare enlala naban alala tan, "Zen sa eiwa nësa ngaya tabiri." Dekam dowal mo kigi mo gwetapna sa nëbon mae ëjawe guk hana gwer.*

⁹ Sap Alap hom nësa anakan golëguku, "Dikire ëtimbwas gwëk." Hwëna nësa mes gubiridaka, "Dikire Bian Kristus Yesus hun de zeraha-en gwenkam ëngaya gwëk."

¹⁰ Sap Yesus Zen mae hap tilki:

Nen dikim apdenak zergwë gwen hap- sap nama de ngaya wenya, hen men zen ngatan zi mo lang san dep ëdane gukke.

¹¹ Zen in zep, kirekam de ol zïm-zïmkim em enaka tatete ta gwibin- men kirekam angkam enaka oto lasik gwibi'inke.

Aumwa hap de ol zïm-zïm:

¹² Aya wal oso wal, ëe ama emsa enbirida'an: Men zen eno mae mo ngirinnik Bian mo syala nol gwenan, emki blikip gwesibirida gwen- hen men zen emsa Alap mo olkam titi da gwibirinye.*

¹³ Dawem enkam blikip eisibirida gwëk, hen kwasangsa em gol gwizimdin, sap zen dan syal-syala ban emsa alp neibirida tine gwenan.

Aya wal oso wal, umlae enkam lowehe gwëk.

¹⁴ Men zen ë-enna nyauk gweblanan, desa emki anakan titi ta gwibin, "Emki hen syalak mas ta gwen. Bahem aha zi ensa blol gwibirida gwen."

Men zen Kristus hup denaka de golluwen hap ëtitik gwe-gwe'an, emki zëbe mae hap udobe naban dikim golluwe gwen hap de ol zïm-zïmsi gol gwizimdin.

Men zen Yesussu de taïbliblannak ëtatete gwe srëm gwe'an, desa emki tatete ta gwibin. Sosonkam bahem titi ta gwibin, hwëna sam-samkam em mas gwibirida gwen.

¹⁵ Wal bose wal oban bahem hwëhwëkam enaka karek ta gwibin. Diki dawemsa emki hwë-hwëkam ere mae hap gol gwizimdin- nonol tanganna ere mo Kristen bose wal hap.

¹⁶ Emki ëisrip-sri gwe tine gwen.*

¹⁷ Alapsa hen-henkam en sonebla tine gwëk.

¹⁸ Banakare maekam de lowehen nakon Alap hap dawemsa olbla tine gwëk. Sap zëno dwam gwibinni zen kirekam- Kristus mo bi gwibiridan zini nëbe mae hap denaye.

* 5:8 5:8 Ef. 6:10-18 * 5:12 5:12 Ibr. 13:17 * 5:16 5:16 Plp. 4:4

¹⁹ Alap mensa zère mo Enhona nëno mae mo enhonak ing ta soneka bahem tin tisin.*

²⁰ Zep zère mo Enhona mensa hamal hap de ola zinik ing gul sone gwizimmira, zen kim desa ayang nulzimmira gwenan, desa de ësane gwenkam em bahem hwaulsuk gwen.*

²¹ Hwëna kitak de ol ayang gunnu insa, emki anakan akasik gwibin, "San ha eiwa Alap onakorena? San ha dekore naka hom?" Dawem san dep de titi tabinni, desan amki ang ta gwek.*

²² Tingare karekna em aes gwesik gwibin.

²³ Dikire Alap, men Zen tahana nëbe mae hap deisu guzim'ira, emsa lalak tasik gwibik- sap timni, angna, hen enhona, enho kles gwesin srëmkam ekakim lowehe gwek, hëndep Bian Kristus Yesus Zën de lwahal zannak de zau'uk.

²⁴ Alap kirekam sa emsa lalak tasi-biri, sap Zen taibliblan tanganna. Zep zëno nësa de gu-gubiridan ola desa tingan sa nëp sul sone gwizimdi.*

²⁵ Aya-wal oso-wal, Biansa de abe ta gwenkam asa mas eibirida gwek.

²⁶ Men kirekam Kristen zini ëgwë gwenan, ansa de baca gulsun hyanak emki kwasang naban enaka tahasa golëtowaran.

²⁷ Ëe Bian mo nwenakë emsa gubirida'an: Suratna ansa tingare Kristen bose wal ukip baca ulzimk.

²⁸ Bian Kristus Yesus mo kwasang-kwasangna dikire ebon mae onak lwa gwek!

* 5:19 5:19 Ef. 4:30 * 5:20 5:20 1Kor. 14 * 5:21 5:21 1Yoh. 4:1 * 5:24 5:24 Plp. 1:6; 2Tes. 3:3

Paulus mo suratna ahana Tesalonikak de Kristen zi hip

¹ An suratna tîngare Tesalonikak de Kristen zi hip, Bian Alap ne Bian Kristus Yesus nik mo bi eibiridan wenyä kip,

Paulus, Silas, hen Timotius mae onakon:

² Dawem! Diki Bian Alap ne Bian Kristus Yesus ne sa kwasang-kwasang zemka mamkam ebe mae hap ol gwizimdi. Hen nen zëno nik mo taha terenak esa lowehe gwer.

Mae hap de ol: Ëe ebon mae onakonë dawemna Alap hap ol gweblanan.

³ Aya-wal oso-wal, ëe Alapsa anakanë en sone gweblanan, "Bian, Em ema asa sam ta gwibirida, sap Tesalonikak de Kristen zini dawem tangankam lowehe gwenan." Ëe in sa kirekam en sone gweblanan man dakastî'in, sap em Yesusu de taïbliblanna hen enaka de kwasang gwibirida gwenna ema esek ulse zahe gwe'an.

⁴ Zen in zebë ebe mae hap dena lonbiridanda gwenan- men san ki aena Alap mo hlil irin zini amjanbiridanda gwenanye, "Tesalonikak de Kristen zini sap kareksa noltowe gwenan, hen aha zi man sap Kristus hup de jal hap mamkam karek da gwibirin, hwëna zen nama Yesusu de taïbliblannak tatem ëzauk gwenan."

⁵ Eiwa, em in sa kirekam Alap mo irik gin hip de jal hap karekna oltowe gwe'an, hwëna zen zep mes tangan dam gwesinïn: Em zëwe de bitî gwen hap esa tangan ëdakastil. Sap Alap dam-dam enkam zisi klis gul gwenda.*

⁶ Zen zep sa hen kirekam Alap mo dam-damkam de klis gun hup dena dam gwesil- Zen kim de kareknak

kang gu'unka, zini men zen angkam emsa karek da gwibi'inye.

⁷⁻⁸ Zen dekam sa hwëna emsa dawemnak dep kang gul sera-apdekam aban mae, hen tîngan men zene zëre mo bose hap karekna oltowe gwenanke. Nëre mae mo Bian Yesus de ngatan zi mo lang nakon Alap mo dam taha nakore jana nabare zi niban golëati gwe ine zankam, zen kirekam sa lwal. Zen dekam zëre mo ngatan zi mo lang nakore syauk hitin makare ngatan naban sa golati gwe ine zala. Men zen Alapsa tame da srëm gwe-gwenan, hen men zen Yesus hup de ol dawemna i-san i-san neibir srëm gwe-gwenan, desa dekam sa zikarek tabir zira-

⁹ ëtimbwas gwen makan de hëndep denaban tinsin srëm syauk blanak kang gunkum. Desa Bian Zëre onakon langa san dep sa yal gulu. Zen dekon sa sap ëdwam gwe tine gwer- etan de sap Bian mo ngatan zi mo lang nakore sosonsa hlaun hupye.

¹⁰ Zen kitak Bian mo nësa de tagal gulsuzun hap de lwa halzan yaklanak sa kirekam lwal. Dekam Bian Yesus mo hlil irin wenyä, men Desa Zënaka de taïbliblan hap dam tasi-birki, zen zen sa zëre mo bosena teip nulsublunda gwer, hen zen dekam sa zëre mo ngatan zi mo lang nakore sosonna sërkam dengguan gwibir. Em hen zëwee bitî gwe'an, sap em mese abon mae onakon Yesusu laïbliblak.

¹¹ Zen in zebë Alapsa ebe mae hap anakan abe la tine gwenan,

"Bian, Em mese desa ere onak dep kwang guludaka, zep dikire zëno mae mo lowe henna eno nwenak dakastil gwek. Emki zëbe mae hap sosonsa sowe henkam gol gwizimdin, sap zen angkam dawemsa de tîngare zi hip goltrei gwizimdin hip ëdwam gwe-gwe'an-aha zi dekakim desa anakan dam dasik gwibik, 'Zen eiwa mes tangan dawemkam Biansa daïbliblak, zep

* 1:5 1:5 Plp. 1:29

dawemkam lowehe gwenan.'

¹² Zep Bian, zëno mae mo lowe-
hen dawemna in kon dikire aha zi
kirekam Bian Yesus mo bosena teip
nulsublunda gwek. Zen mes Kristus
hun nëraha-en gwek, zep dikire
ëKristen gwen srëm wenya desa
hen blikip neisibirida gwek. Bian,
an kitak kirekam sa ki lwa gwer, sap
Ere onakore kwasang-kwasangna
hen Bian Yesus onakore kwasang-
kwasangna abon mae onak lwa gwe-
nan."

2

*Kristus mo jal zi de nonol hatazan
hap de ol:*

¹ Aya-wal oso-wal, nëno mae mo
Bian Yesus de etan lwa halzan hap
denakaë angkam ebe mae hap ale
gulzim'in: Dekam nen esa hut tu ane
gun hup tagal gwesil.* Èe ama emsa
gubirida'an:

² Bahem nabakam enlalana
ëtopse gwen, hen bahem ëairin-
zi de anakan emsa yasik tabinkim,
"Bian Yesus mes lwahal zaka. Nen
home tol tame uk." Zen sap
sa anakan ëgu gwer, "Alap mo
Enhona kirekam abe hap ola ing gul
soneblaka." Ahaksa sap sa anakan
ëboton gwe-gwer, "Paulus kirekam
asa tonbiridaka." Ahaksa sap sa
boton ale nabare suratna ebe mae
hap anakare ola ban noltrei gwizim,
"Paulus kirekam awe ale gulku."*

³ Zi de kirekam emsa yasik ta
gwibir zinna, em bahem nabakam
ëtim gul gwen, "In eiwa, mes ki
lwak. Nen home tame uk." Sap
Yesus mo yakla yala in na-en molya
ki lwak- karek yawal de hatan
srëmnakye. Zen diki nonol zini
beya tangan nik sa Alapsa de betek
gweblanna baes tal, hen karek gol
gwen zi mo teipsinnë sa damnak
jowe zala. Zen men desa aumwa
hap denak syauk blanak tak da
ine'akke.*

* 2:1 2:1 1Tes. 4:15-17

* 2:2 2:2 2Tim. 2:18

1Yoh. 2:18; 4:3

* 2:4 2:4 Dan. 11:36; Mat. 24:15; Why. 13:5-8

* 2:7-8 2:7-8 Yes 11:4; Why

19:14-15; 19:19-21

* 2:9 2:9 Mat. 24:24; Why. 13:11-16

⁴ Zen Alap mo jal zi. Tingare
boton alap-alapna mensa zini blikip
neisibirida gwenan, hen sap eiwa
de Zini Alap Zëna, zini in sa kitak
desa anakan lamang ta gwibiri,
"Zen kitak betekna. Èe an Zen-
teipsin tangan Zi niye." Hëndep
Yerusalemk de Alap mo gol mwanak
sa nikin zira, hen dekon sa anakan
gubiridala, "Èe an Zen- Alap."*

⁵ Hwëna ëe mesë kirekam emsa
tonbirida gwek- in kimë nama emsa
golëlowehe gwekye. Hwëna san ha
ema eititi eibik?

⁶ Zep ena hen tawana: Ahana man
Zini. Zen Zen angkam jal zini in
hap orana isin tasibli'ara. Hwëna
yaklana mensa Alap jal zini in hap
dam tasiblika, zen dekam sa Aha
Zini in orana insa kles tyasiblila. Jal
zini in dekam sa damnak zënaka
zertrë zala.

⁷⁻⁸ Hwëna jal zini in mo sosonna
angkam man aningkim okamanak
syal gwe-gwe'an- dekam de zisi
kareksa dikim gol gwen hap yasik
ta gwibin hipye. Hwëna Alap
kim ora isin tasiblin hap de Zini
insa zersi'inika, jal zini in dekam
sa damnak okamanak de zi niban
golësyal tala. Hwëna zao molya
holo gwek, Bian Yesus hen dekam sa
zëre mo ngatan zi mo lang nakore
ngatan naban hata zala. Zen dekam
sa jal zini insa ol gu anen enkam
timbwas ta zala.*

⁹ Hwëna nonol jal zi yala in sa
dowal mo kigi mo sosonsa golhata
zala. Zen dekam sa sërkam de owas-
owasna syal gwe-gwibiri- dekam de
zi kil ti gwen hap, "An Zen eiwa-
Alapye."*

¹⁰ Zini men zen juwen ora san ang
ta gwenan, zen zen sa nabakam jal
zini in mo sërkam de yasik tabinni
in san ang tal, sap zen Alap onakore
eiwa de ola man nol drak-drak nei
gwibirin. De dokwak nulinam, ki
zen maka ëngaya gwe'an.

¹¹ Zen in zep Alap kire zini gubiridaka, "Zen dikire yasik tabin sin ang ta gwek." Kire zini zen desan sa ki hëndep ang tal.

¹² Zen zep hëndep aumwanak, kitak men zen eiwa de ola insa daiblibir srëm gwek, hen men zen zëre mae mo lowehen karekna dërek neisik gwibik, zen sa tingan ëtimbwaw gwer.

Mae hap de ol: Alap mes emsa ëngaya gwen hap dam tasibirki, zep tatem ëzauk.

¹³ Hwëna aya-wal oso-wal, em Bian Yesus mo kwasang gwibiridan wenya. Ëe in zebë golzausun srëmkam Alap hap dawemna anakan ol gweblanan, "Ema asa sam tabirki." Sap Zen mes okamana awe nonol lonesen nakon ëngaya gwen hap de wenya emsa anakan dam tasibirki, "An zen sa eiwa de ol san ang tal, hen ëre mo Enho de ing gwe hebiridankam sa ëlalak gwesil."*

¹⁴ In zep hëndep kirekam lwak: Ëe kimë Yesus hup de ol dawemna ebon mae onak olhatak, Bian Alap dekam zep emsa enho nakon Bian Yesus osan dep anakan kwang guludaka, "Haen. Ano Tane mo ngatan zi mo langnak de ngatannak emki lowehen."

¹⁵ Zen in zep, aya-wal oso-wal, em tatem ëzaun. Mensaë ëkkam ahaksa suratkam ebe mae hap ayang ul gwizimk, desa dawem enkam urensik gwek.

¹⁶ Ëe in zebë nëre mae mo Bian Yesus hun Bian Alap han ebe mae hap dikim dawemsa ol gwizimdin hip abe oso gwenan, sap Zen mes nësa sërkam kwasang eibiridaka. Zëno nik mo kwasang-kwasang nakon, nen in zebe enho tatetekam anakare enlala naban lowehe gwenan, "Mensa ngein sin dep dena nësa en gubiridaka, nen eiwa kirekam esa ulin."

¹⁷ Dikire Eirzi-Bia eno mae mo enhona tatete la gwizimk hen sosonna ebe mae hap ol gwizimk. Dekam

eno mae mo syala hen ola zëno nik mo nwenak sa dawemkam dakastil gwer.

3

Paulus kim gubiridakake, "Asa Alapsa de abe ta gwenkam mas eibirida gwek."

¹ Aumwa hap, aya-wal oso-wal, ëe ama emsa enbirida'an, "Asa Alapsa de abe ta gwenkam mas eibirida gwek." Anakan abe la gwek, "Bian, ere mo ol dawemna dikire nabakam nolteisindak. Hen men zen ësane gwe-gwe'an, dikire i-san i-san nei gwibik- men kirekam abon mae onak lwakke."

² Hen anakan abe la gwek, "Bian, emki Paulus maesa alal gul gwenenlala kawesin zi mo taha nakon hen nol drak-drak zi mo taha nakonye." Kirekam abe la gwek, sap zini tingan hom nëbon mae onak Bian Yesusu de taibliblankam bitë gwe'an.

³ Hwëna Bian Yesus zëre mo gugubiridanna man nëbe mae hap tingan sul sone gwizimnira. Zep Zen sa emsa tatete ta gwibiri, hen dowal mo kigë mo nwe nakon sa emsa il gwe hebirida gwer.

⁴ Hen ëe ama Biansa anakan laibli gweblanan, "Zen Zen ebon mae onak syal gwe-gwe'ara, hëndep em zebe ano mae mo titë tabin sin ang ta gwe'an, hen em esa desan en ang ta gwer."

⁵ Dikire Bian eno mae mo enhonak syal gwe-gwek- dekam de dawemkam anakan tame gun hupye, "Alap eiwa sërkam nësa kwasang gwibirida gwe'ara, hen Kristus eiwa nëno mae mo karek-kareksa de wei yun hup tatete tangankam zauk gweka."

Aha zi mo irse gwen nakore tembanesa de twin gwibin srëm hap de ol:

⁶ Aya-wal oso-wal, ëe ama emsa Bian Yesus mo bosekam titë labi'in: Eno Kristen bose de asang tam

* 2:13 2:13 Ef. 1:4; 1Ptr. 1:2

gwenna, bahem deban zersiri gwe-gwen. Sap zen hom Kristen zi mo kirekam de lowehe gwen san ang gwe'ara- men kirekamë ebe mae hap ayang ul gwizimkye.

⁷ Diki ano mae mo lowehen san emaka ang ta gwe'an! Sap ëe kimë emsa olëlowehe gwek, ëe homë kirekam easang gwe-gwek.

⁸ Eë homë mae dekam zi mo tembanena te-alakam de gon srëmkam olgwenbik. Hwëna yaklam denaban kam denaban ëe ama syal ta tine gwennak danna ësin gwe-gwek- emsa dikim dohon-hon ta gwibin srëm hapye.

⁹ Eë dwan dekam ebon mae onak guru makan am syal ta gwek, zep emaka asa tembanekam totoresa mas eibirida gwek. Hwëna ëe homë emsa kirekam titi la gwibik. Sap ëe ama anakan de ënaka ërak makan golëtrën hap ëdwam gwe-gwek, "Kristen zini an diki kirekam syal-syalkam syal ta gwenan."

¹⁰ Sap ëe dekam anakanë emsa titi la gwibik, "Zi de tembanesa dikim lop tan hap de syalak mas gwen srëmna, dikire usak naban gwëk."

¹¹ Eë mae habë kirekam ebe mae hap ale ul sonezim: Sap ëe ama ësak: Em ahakon asang tamna. Eë ensae yauk gweblanan, hen aha zi mo syalake hwëna ëngewenda gwenan.

¹² Kristus Yesus mo bosekam ëe ama kire zisi ol drakkam titi labi'in: Bahem aha zi ensa blol gwibirida gwen, hen bahem blos tabirida gwen. Diki en em hen syal ta gwen- dekam de ere mae hap de tembanesa gulin gwen hapye.*

¹³ Hen aya-wal oso-wal- men zen kirekam lowehe srëm gwe-gwenan: Dawemsa de syal gwe-gwibinni bahem ëblalen gwe-gwen.*

¹⁴ Hwëna zi de ano mae mo suratnak awe de ol san ang gwe srëm gwenna, emki olsa aha-en gun-

dekam de zini in han zersiri gwe-gwen srëm hap. Dekam wëhë saher gwe'anaka?

¹⁵ Hwëna bahem tangan kire zisi jal zi mo kim gwë gweblan, hwëna dawem san dep em titi ta gwen. Sap zen hen eno mae mo Kristen bose.

Aumwa hap de ol:

¹⁶ Diki Bian Zën sa em dikim zëre mo taha terenak ngalap gwen srëmkm de lowehe gwen hap dena gol gwizimdi- sap banakare maesa de goltowennak. Sap Zen eiwa kire hap mes zëre mo tahana nëbe mae hap deisu guzimki. Dikire Bian Zën emsa golëlowehe gwek.

¹⁷ Men kirekamë surat-suratsa de ale tabinkim gwë gwenan, aumwa hap de ola ansa ëre mo tahakamë ep ale gulzim'in: * Eë, Paulus, dawem ensaë ebe mae hap gol sonezim'in. Kire alesa de aumwa topnak hlaul gwenkam, dekam esa dam ulsuk gwer, "Eiwa, suratna an Paulus onakorena."

¹⁸ Bian Kristus Yesus mo kwasang-kwasangna dikire kitak ebon mae onak lwa gwek!

* 3:12 3:12 1Tes. 4:11 * 3:13 3:13 Gal. 6:9; 1Kor. 15:58 * 3:17 3:17 Suratna an aha zi Paulus mo olsa ale gulzimki. Zëna hwëna aumwa hap de ol ensa ale gulku- dekam de anakan tame gun hup, "An eiwa Paulus onakorena."

Paulus mo surat Timotius hup

1-2 Suratna an ëre mo tanena Timotius hup,

Kristus Yesus mo dam tasïn zini Paulus onakon:

Dawem! Asa mes dam lasikï: Alap— men zen nësa ngaya tabirkike, Kristus hun— nen men Zëbone ëyaïng gwe kinï gwe'anke. Em in eiwa ano walas. Em Yesussue taïblihlaka, zebe gwëka- san de ano tane tanganna kiye.

Nëre mae mo Bian Alap ne Bian Kristus Yesus ne sa dawemna hen kwasang-kwasang zemka mamkam ebe hap ol gweblala. Hen em zëre nik mo taha terenak esa gwë gwera.

Auyan-aza mo ëpba olsa de baes gwibin hip de ol:

3 Ëe kimë Makedonia san song gwëk, ëe dekam mesë emsa gugubluhak, "Em Efesusk em gwën." Ëe mae habë zëwe de gwën hap emsa gubluk: Zëwe de zini mensaë anakan dam tasibikke, "Zen totore olkam tawa da gwibirin," desa dikim em anakan jalse gwibirida gwen hap, "Kirekam bahem tawa ta gwibin.

4 Yahudi ere mae mo auyan-aza mo bosem-sesa de klis gul gwen-nak bahem ëhir-hir gwe-gwen- hen auyan-aza uk mo ol kokung gul zahe gwennakye." Sap auyan-aza mo ol kokung gul gwenna in san de ang tankam, waba hap sa ëkeisa-keisa gwe tine gwer, hen dekam ëngaya gwen hap de orana sa hli dal. Sap nen diki Yesussu de taïblihlan enkame ëngaya gwen hap de orana in san ang ta gwenan.*

5 Ëe mae habë kirekam emsa gublu'an: Zen dekamim zi bose

zeban zënaka kwasang neibirida gwëk. Sap zi de enlala lalakkam gwënna, hen enho kles gwesïn srëmkam, hen dawemkam de Biansa taïblihlankam, kire zini sa zi bose zemka kwasang gwibirida gwera.

6 Hwëna ahakon mes tangan ëbutehak, zen zep totore ol en san ang ta gwenan.

7 Zen kire wenyik anakan ëbolamda gwe-gwenan, "Ëe asa Musa mo titi tabin ola inkam tawa ta gwibir," hwëna men zen zëre mae mo ëk tihï nakon wet so gwenan, zëna hom desa tame nul gwenan. Hen zëna tawa naka hom- mensa ol drakkam anakan don gwibirin, "Ëe an eiwa de tangan nakaë emsa tonbirida'an."*

8 Nen tawana Musa hap insa Alap titi tabin ola gol gweblaka, zen hen aïris- nen de anakan tame gunkumye: "Alap Zen zi jal-jalsa dikim oto tasibin hip nöp golzimki."*

9 Sap Zen insa ola golzimki, zen zi dawemsa dikim oto tasibin hip hom. Zen diki anakare kareksa de gol gwen zisi dikim oto tasibin hip: jalse gwibiridan olsa de ësal gwen srëm zi,

nol drak-drak zi,

kareksa de gulin hananda gwen zi, auhu-kama ennak de enlalakam de gwë gwen zi,

Alapsa de sëre gweblan zi,

Alapsa de betek gweblan srëm zi,

bi zemka de tan zi, hen an zemka de gwin zi,

hen zi tamera gwen zi.

10 Hen ahakore zi karek-karekna zen anakare wenya:

kahalo soson wenya,

zi bosyan han de inisïn makan ëgwë gwen wenya,

boton tam zi,

zisi de te-ala hap golëgu gwen zi, *

* 1:4 1:4 Kis. 20:29-30; 1Tim. 4:7; 6:4; 2Tim. 4:4; Tit. 1:14 * 1:7 1:7 Tit. 1:10 * 1:8 1:8 Rom. 7:6-14; Gal. 3:19 * 1:10 1:10 In kim Paulus ansa ale gulku, dekam zini man zi bose zemka dahyo gwëk- desa de aha zi hip te-ala hap lirak ta gwibin hip. Insa dahyo gwëk, zen dekam zep aha zi mo tana iltikännik totoresa ëbabu gwe-gwëk. (1Tim. 6:1-2; Ef. 6:5-8; Tit. 2:9-10)

hen botonkam de zi bose zemka klak ta gwibin zi,
 hen tingare ahakore zini men zen Kristen zini neno mae mo tawa tabin sin ang ta srēm gwe-gwenanke.

11 Sap neno mae mo tawa tabinni in, zen engaya gwen hap de ol dawem san tal gwesi'in- mensa sosen tangan Zini Alap Zena abe hap golblakake, ee de desa golzim halada gwen hap. Ol dawemna in sam-sam tanganna.

Paulus kim Kristus hup dawemna golblakake:

12 Ee ama nere mo Teipsinni Yesus hup dawemsa gol gwebla'an- men Zen sosonna ap gol gweblan- dake, zere mo ngasa dikim syal gwe-gweblan hap. Zen mes asa taibliblaka, zep asa dam tasiki. Zen in zebē dawemna gol gwebla'an.

13 Ee sap hen orep Yesussu de lamang ta gwenna. Men zen nonol Yesussu daibliblak, ee ama desa karek ta gwibik hen lamang ta gwibik. Sap eiwa kirekam, hwena Yesus man asa kwasang gweblaka. Zen man anakan asa tame taka, "Zini an nama hom tol Asa taiblibla'ara, zep zere mo syala hom anakan dam gulsu'ura, 'Ee an karek- sae gol gwe'an.' "*"

14 Zep Zen man tangan mamkam asa kwasang gweblaka- Zen kim Zenaka de taibliblan hap dena abe hap golblakaye, hen zi bosyansa dikim kwasang gwibirida gwen hap dena.

15 Ola an eiwa de tanganna. Zep nen taiblibin:

"Kristus Zen karek-karek gulin halasen gwen zisi dikim ngaya tabin hip auhu-kamanak hata zaka."

Ee an hwena orep jal-jal tangan zini zen- karek gol gwen zi mo teipsin niye.

16 In zep hendep Kristus karek-karek gol gwen zi mo teipsinni asa mam tangankam kwasang

gweblaka- mae hap: Asa de tingare zi hip zertreizimdin hip, zen dikim anakan tame gun hup, "Eiwa, Kristus mo kwasang-kwasangna klis gunkum hom," hen dekam de taibliblankam hendep denaban engaya gwen hap.*

17 Dikire Teipsin Zini Alapsa hendep denaban blikip neisik gweblak hen bosena teip nulsublunda gwek!

Sap Zen Zen sa hendep denaban irik gili.

Zen molya tilki.

Auhu-kamanak de nwekam molya hla da gwek.

Ahana hom.

In eiwa tangan!

Paulus kim Timotiussu tatem dikim zauk gwen hap titi takake:

18 Tane tol Timotius, ee ama emsa gublu'an: Emki enlala gwen- ebe hap de ola mensa Alap mo Enhona hamal hap zinik ing ta sonezimkike. Zen zep hwena Alap onakore ola insa emsa aha-en aha-enkam don gwebla'ak. Zen in zep, desa bahem eititi gwibin- ekakim dowal mo kigi naban de zereijannak tatem zauk gwe.*

19 Yesussu de taibliblannak em enho kles gwesin srēm kam tatem zauk gwen. Sap ahakon mes enho kles gwesin srēm kam de lowehen hap baes tak. Zen in zep zere mae mo taibliblan nakon mes tangan hendep altink.

20 Himeneus ne Aleksander ne zen kirena. Desa mesē anakan guzimk, "Em jemat nakon wet oson. Amki dowal mo kigisa ang ebla." Ee mae habē kirekam guzimk: Dekam wēhē ahale'anka. Sap zen mes kareksa de ulin hala serankam Kristus mo bosena karek ul gweka.*

2

Mae hap de ol: Tingare Kristen zini Alapsa a kirekam de abe da gwek.

* 1:13 1:13 Kis. 8:1-3; 9:1-31; Gal. 1:15-16; 1Kor. 15:9-10 * 1:16 1:16 Luk. 19:10 * 1:18 1:18 1Tim. 4:14 * 1:20 1:20 1Kor. 5:5

1 Timotius, bol-zaun tanganna, emki tîngare Kristen zini Alapsa de abe ta tine gwen hap tîti ta gwibin. Zen tîngare zi hip zen abe ta gwen- Alap de kakim desa mas gwibirida gweka, hen dawem ta gwibirki, hen tahalhasa de kakim sul sone gwizimki. Deban dikire Alap hap dawemna nolbla tine gwék.

2 Zen dikire teipsîn-teipsîn wenyâ kip hen abe da gwék- hen tîngan men zen zëno mae mo irgwa taha nakon irik nîl gwenanke. Zen mae hap: Nen dikim aha-ere enlalakam hen umlae enkam ëgwë gwen hap, hen zen de nëno mae mo Alap mo nganak de syalsa tru-tru gul gwen srëm hap, hen aha zi dikim nësa husus gwibirida gwen srëm hap.*

3 Kirekam de abe ta gwenna, zen man nësa de ngaya tabin hip de Zini Alap mo nwenak sam gwesik gwenan.

4 Zen man sap tîngare zi de hëndep denaban ëngaya gwen hap de orasa dam tasîn hip dwam gwe'ara- hen eiwa denaka de tame gun hupye.*

5 Sap Alap Zen aha-en. Hen men Zen nësa Alap osan dep zon guluda gwe'ara, Zen hen aha-en: Zen Kristus Yesus.

6 Sap Yesus Zen mes tîngare zini nëno mae mo karek-kareksa dikim ngan gulsuzimdin hip Zënaka zerguku. Zen kirekam Alap mo kalang gwe gun sun ki lwak- dekam de tîngare zisi anakan gubiridan hap, "Ëe ama sap em de ëngaya gwen hap dwam gwe'an."

7 In zep Alap anakan asa dam tasikî, "Ëngaya gwen hap de ol dawemna ansa em Yahudi srëm wenyâ kip golzim halada gwen. Eiwa de ora san dep em tîti tabirida gwen- de kakim zen hen Yesusu daibli gweblak." Zen eiwa tangankam asa dam tasikî. Ëe bëjënë boton gwen.*

Ola an, zi hip dena hen we wal hap dena.

8 Ëe zebë dwam gwibirida'an-zikim dena, zen de kitak enho kles gwesîn srëmkam Biansa abe ta tine gwen hap. Kim de nen sone gwe-blak, jalsa de lam gun nuban bap zen, hen aha zi niban de keisa-keisa ën hap de enlala naban bap zen.

9 Hen we walya, ëe ama desa dwam gwibirida'an: Zen sap sa enho oto tasîn niban zëre mae mo timni weir nulsuk gwer, hwëna bolamda gwen enlala naban bap zen, hen zi dikim hole gwibin hip de enlala naban bap zen. Te-ala mamkam de teisyan pakeanna, hen te-ala mamkam de kap tan sasyan maena, hen emas maena, desa bap zen kire enlala naban alala ta gwen.*

10 Diki Kristen we walya, Alap mo nwenak de dawemkam wër gwenna, zen diki dawemsa zen tîngare zi hip goltrei gwizimdin. Dekam sa Alap mo nwenak ëoto gwesil- san de zënaka de weir gulsunnu kiye.*

11 Kristen zi de tagal gwennak, we walya zen diki balk enkam zen ësane gwe-gwen. Hen men zen tawa tabinni, desa zen dawemkam blikip gwesiblin.

12 Ëe homë we wal de zisi tawa ta gwibin hip gubirida'an. Hen zen bap zen zisi nol gwibirida gwen. Zen diki balk enkam zen teinikin gwen.*

13 Sap Alap nonol Adamsa yang tasikî, ki zep hwëna Hawasa yang gulsuku.

14 San ki Adamsa dowal mo kigina boton taka! Zen diki we zem Hawasa am boton gulku, dekam zep kareknak zank.

15 In zep Alap desa anakan gwibirki,

"Ebon onakon hëndep tîngare we walya ëu gwe- gwenkam Ëe asa sang-sangna mam gul gwizim, hen hlësgwan-hlësgwan naban esa ëjaha gwe-gwer."*

* 2:2 2:2 Rom. 13:1 * 2:4 2:4 2Ptr. 3:9 * 2:7 2:7 Kis. 9:15 * 2:9 2:9 1Ptr. 3:3-4 * 2:10 2:10 1Tim. 5:10 * 2:12 2:12 1Kor. 14:34 * 2:15 2:15 Kej. 3:1-6

Hwëna Alap sa hen we wal hap hëndep dikim ëngaya gwen hap dena golzimdi-
zen de Kristussu de taïbliblannak tatem ëzauk gwenkam,
wal bosyansa de kwasang gwibirida gwenkam,
hen Alap mo nwenak de enho kles gwesin srëmkam lowehe gwenkam,
hen enho oto tasin niban de zënaka wër tasik gwibinkimye.

3

Mae hap de ol: Kristen zisi de nol gwibiridan hap, a kirekam de zisi em dam tasik gwibin.

¹*Ola an eiwa de tanganna: "Men nara Kristen zisi de nol gwibiridan hap dwam gwenna, zen sap syala dawem naka dwam gwibi'ira."

²Hwëna zen diki enho kles gwesin srëm naka de dam tasinkim. We dan son zisi bëjen.

Zen diki aha zi de blikip gwesiblin naka,
hen enlala tatete naka,
hen zënaka de zerinik gwe-gwen naka,
hen zisi de lup gulin gwen naka,
hen zisi de Alap mo olkam tawa ta gwibin nika.

³Hen Kristen zisi de nol gwibiridan hap,
ho mamak otde gwen sosen zini bëjen.

Darak sosen zini hen bëjen.
Zen diki enlala sae-sae naka,
hen umlae enlala naka.
Hen te-ala hap de hole-hle gwe-gwen zisi bëjen dam tasin.

⁴Zen diki we wal walas zemka de dawemkam kara ta gwibin nika,
hen walas zemka de dawemkam titi ta gwibin nika- zen dikim zënaka i-san i-san gwe-gweblan hap hen blikip gwesik gweblan hap.

⁵Sap zi de dawemkam we wal walas zemka nol gwibiridan srëmna, kire zini bëjen dawemkam Kristen bose zemka nol gwibiridan.

⁶Nër hom de Kristen gwen zini hen bëjen. Ki hwëna sa anakan bolte-bolte gwera, "Ëe an mamna." Dowal mo kigina in kirekam bolte-bolte gwekake, zen in zep Alap hëp tyaka.

⁷Zen diki kitak de zi de sam gwesiblin naka, sap hen Kristen srëm zi zen sam gwesiblin. Hwëna sam gwesiblin srëmna, zen sa dowal mo kigi mo zolak kyan hera. Ki hwëna ahakore nik sa swrë dal.*

Mae hap de ol: Kristen zi mo tahasa de tri so gwizimdin hip de zini, a kire naka em dam tasik gwibin.

⁸Kristen zi mo tahasa de tri so gwizimdin hip de zini hen kirekam. Zen hen diki tingare zi mo sam gwesiblin naka em dam tasik gwibin.

Mahal dare syakna bëjen.
Hen ho mamak otde gwen sosen zini bëjen.

Hen te-alasa dikim gul irin hip de boton gwe-gwen zisi bëjen.

⁹Zen diki ëngaya gwen hap de ol dawemna mensa Alap nöp hil gilzimki, desa zen enho lalakkam gwirensin hen taïblibin.

¹⁰Kristen zi mo tahasa de tri so gwizimdin hip de zini na-en bahem totoresa dam tasik gwibin. Diki nonol em akasibirida gwen. Mensa hla tanna, "An airis," dekam sap esa dam lasik gwibir.

¹¹We walkam dena, Kristen zi mo tahasa de tri so gwizimdin hip de dam gulsunnu, zen hen diki tingare zi mo sam gwesibin nika em dam tasik gwibin.

* **3:1 3:1-7** Tit. 1:5-9 * **3:7 3:7** Kis. 14:23; Kis. 20:28-30 * **3:11 3:11** Paulus mo ola awe tawa naka hom: San ha Kristen zi mo tahasa de tri so gwizimdin hip de we wal hap? San ha Kristen zi mo tahasa de tri so gwizimdin hip de zini in mo we wal hap? (Rom. 16:1; Tit. 2:3-5)

Boton ol gol halasen gwenna bahem.
Zen diki enlala tatete naka
hen taiblibin nika.*

¹² An ahana Kristen zi mo tahasa
de tri so gwizimdin hip de zi hip
dena:

Zen hen we dan son zisi bëjen.

Zen hen diki we wal walas zemka
de dawemkam kara ta gwibin
nika de dam tasibin.

¹³ Zen de dawemkam Alap
mo syalak mas gwibirida
gwenkam, zen dekam sa desa
hen blikip neisibirida gwer.
Hen dekam sa Kristus hup
dena udobe naban donbirida
gwer, hen dekam molya
nasalsibirida gwek.

*Mae hap de ol: Alap mes ol aning
gunnu nëbe mae hap hül gïlzimki.*

¹⁴ Timotius Bak, suratna an ama ki
sap ep ale gulblu'an, hwëna ëe ama
tangan dwam gwe'an- nabakam de
sap emsa duweblazan hap.

¹⁵ Hwëna ëe de holo gwenkam,
zen suratna ansa de karatda
gunkum esa anakan tame gulu,
"ËKristen gwen aya-wal oso-walya,
zen diki kirekam de lowehe gwek."
Sap Ngaya Zini Alap mes eiwa de
ola nëbe mae hap hül gïlzimki. Zep
auhu-kamanak de jematna, zen men
kiye- gol tenya hen gol mokona, ola
insa de zen moko gun hup.

¹⁶ Eiwa, ol aning gunnu mensa
Alap nëp hül gïlzimki, zen dawem
tangananna. Ola in nen dikim Alap
hon ëtal gwesin hip dena. Zëno
ausuna, zen kitak Kristus Yesus
onak lwa'an:

Zen zi timkim nwe-mase gwe zaka,
Alap mo Enhona man nëp Desa
anakan zertreizimki, "An
eiwa Zen tangan."

Alap mo dam taha nakore zini man
hen kara da nasen gwek.

Hwëna ki zep Alap zëre mo ngatan-
nak dep zer ine halka.

Zëbe hap dena zi-ë zi-ë san mes nol
haladak,

hen Desa de taibliblan zini tïngare
langnak ki lowehen da'an.*

4

*Yasik tabin olsa de ja-ja gun hup
de ol:*

¹ Alap mo Enhona mes nësa
damkam anakan tawa ta guk
gwibirki,

"Ngein sin de yaklanak zini sa
Yesusu hli da gwer- dekam de
hwëna dowal onakore tawa tabin en
san ang ta gwen hap."*

² Dekam yasik tabin zini men zen de
dowal onakore ola insa nol halada
gwe'ak, zen ëk enkam sa anakan
ëgu gwer, "Ëe an Alap mo syalsaë
gol gwenan." Hwëna zëno mae mo
enhona mes tangan top-top gwiz-
imki, zep zen bëjen anakan tame
gun, "Ëe an kareksaë gol gwe'an."

³ Zëno mae mo tawa tabinni,
"Wenya bahem gon. Zini bahem
zen. Ansa bahem twinbin." Hwëna
tïngare tembane nwe-masena zen
dwan twin gwibin hip am Alap nëp
syal gwibir-zimki. Zep nen men
zene Alapsa laibli gwebla'an hen
eiwa dena tame ul gwe'an, nen sap
esa olgwenblanda gwer- Alap hap
de dawem golblan nabanye.*

⁴⁻⁵ Sap tïngan mensa twin gwibin
hip dena Alap nëp syal gwibir-zimki,
zen kitak aïris. Nen de nonol
Alap hap dawemsa golblan naban
twinbinni, dekam banakare maena
hom- nen de dekon Alap mo nwe-
nak ëkun gwen hap denaye. Zep
ba hap de aha tembane maesa baes
gwibin hip, sap Alap mo olak man
hen anakan lwak,

"Tïngare tembanena aïris. Zen
kitak ebe mae habë syal gwibir-
zimk."*

*Timotius Bak de Kristus mo
nganak kirekam syal gwe-gwen hap
de ol:*

⁶ Ano ola ankam emki Kristen
bose omka tawa ta gwibin. Dekam

* **3:16 3:16** Mrk. 16:19-20; Yoh. 1:1-14; 1Ptr. 1:12; 2Ptr. 1:19-20 * **4:1 4:1** 2Tim. 3:1-9; 2Ptr. 3:3;
1Yoh. 2:18; Yud. 18 * **4:3 4:3** Kej. 1:29; 2:24; 9:1-3; 1Kor. 7:28; Ibr. 13:4 * **4:4-5 4:4-5** Kej. 1:31;
9:3; Mrk. 7:15-19

esa gwëra, Kristus mo nganak de syal gwe-gwen zini dawem tanganna. Sap Kristus mo nganak de syal gwe-gwen zini, zen diki ei-wakam de tawa tabinnik zen zise gwen. Hwëna ëe mesë emsa tame tak: Em ema angkam zise gwe'ara.

⁷ Em bahem Alap mo ol aïsilsï de butwalen gul gwennak ang gwe-gwen- hen bong-bong mo tame gun boton ol sanye. Hwëna enaka em tatete ta gwen- em dikim Alap en hon tal gwesin hipye.*

⁸ Timsi de mïsrïm-srï gïnnï, zen aïris. Hwëna zen angkam en dep dena. Diki Alap hon dikim tal gwesin hip de enaka tatete tanna, zen dawem tanganna zen. Sap zen angkam en dep hom. Zen hwëna lamkam dep dena.

⁹ Eiwa de ola ansa emki dokwak gun hen dawemkam taïblïbin:

¹⁰ "Nen Ngaya Zini Alap ensae blol ëbla'an, sap Zen Zen tanganzisi de ngaya ta gwibin hip de Zi niye. Tingan men zen Desa kirekam daïbli gweblanan, Zen desa en sa ngaya tabiri."

Nen insa kirekam Alapsa blol ëbla'an, zen in zebe nen angkam Kristus mo nganak dan syal-syala ban syal ta gwe'an.

¹¹ Zep ano ola ankam emki tawa ta gwibin, hen dekam em titi ta gwibin- desan dekakim ang tak.

¹² Timotius, em nama home bong gwe'ara. Hwëna aha zi bap zen emsa gublun, "In nama walas. Zen tawa naka hom." Hwëna emki enaka Kristen zi hip anakan ërak ta gwizimdin,

"A kirekam de ol toran mo Kristen zi hip sam gwesik gwizimnin.

Kristen zini a kirekam nen lowehe gwen.

A kirekam nen nënaka kwasang gwibirida gwen.

Alapsa de taïblïblannak de tatem zaunnu, zen a kirekam moye.

Hen a kirekam nen enho lalakkam lowehe gwen."

Zep Timotius, emki kirekam enaka ërak makan drëne gwizimdin.*

¹³ Ëe de nama lwa halzan srëmnak, emki dan syal-syala ban Alap mo olsa baca gul gwizimdin, hen titi tabin niban em tonbirida gwen.

¹⁴ Emki enlala gwen- ebe hap kim Kristen zi mo nol-nola tahana dehabla inekke, Alap mo syalsa dikim ebe hap wei yul soneblan hap. Dekam Alap mo Enhona man zëbe mae hap hamal hap de ola golzimki- ebe hap de desa ayang gulblun hapye. Hëndep dekam zep Alap mo Enhona hen ebe hap sosonna golblaka. Zep Alap mo Enho nakore sosonna insa dawem en tangankam em gwirensin.*

¹⁵ Zep em tingare ano ol tan-tanna ansa em syal-syal gwe-gwibin- zao en de enlala lwablankam, dekam deka kitak de zi emsa hla dak, "Zen dawemkam syal gwe se'ara."

¹⁶ Dawemkam em enaka kara ta gwen. Hen men dekam tawa ta gwibir, desa dawem enkam em karatda gul gwen. Kirekam de syal gwe-gwennak em tatem zauk gwen. Dekam esa enaka ngaya tala. Hen in zen emsa sane da gwenan, desa hen esa ngaya tabiri.

5

Kristen bosyansa de kirekam golëgwë gwen hap de ol:

¹ Zi bongna bahem ol drakkam jalse gweblan, hwëna emki blikip gwesiblin naban titi tan- san de ere mo bian tangansa de titi tan makan. Ëbong gwen srëm wal bose walya, desa em gweibirida gwen- san de ere mo oso wal tanganna kiye.*

² We wal bong-bongna, desa em gweibirida gwen- san de eno ane tangan. Ahakore kitak de we walya, desa enho lalak naban em golëlowehe gwen- ere mo somol wal tangan naban de golëlowehen makan.

* 4:7 4:7 2Tim. 2:16 * 4:12 4:12 2Tim. 2:15; Tit. 2:15 * 4:14 4:14 2Tim. 1:6 * 5:1 5:1 Im. 19:32

We wal sem-semsa de kirekam golëlowehe gwen hap de ol:

³ We wal sem-semna men zen zë-en tangan lowe henda gwenan, desa emki kara ta gwibin, sap desa eiwa nara dep?- golgwën naye.*

⁴ Hwëna we semna in mo walas, abu-tane wal, ahaksa aza-tane wal de lowe henkam, desa a kirekam em titi ta gwibin, "Em mese ëKristen gwek, zen in zep em desa golgwë gwen. Sap dekam dawemsae ol gwibi'in, sap zen mes nonol emsa hanan ta gwibik." Hen anakan em titi ta gwibin, "Kirekam de em golgwë gwenkam, Alap sa emsa sam gwesibirida gwerä."

⁵ We semna men zen zë-en tangan lowehe gwenan, zen Alap ensa blol në gweblanan. Zep zen hom Alapsa de abe ta gwenna nolzausuk gwenan- yaklam denaban kam denaban. Zep kirekam de we wal sem-sem tola, emki mas gwibirida gwen.*

⁶ Hwëna we sem-semna men zen kirekam-kirekam dërekkam de ëitri gwen hap ëdwam gwe-gwenan, zen Alap mo nwenak mes juwek. Hwëna tim enna sap nama ngayana.

⁷ Zep we sem-semsa de ano ola an san dawemkam golëlowehe gwen hap emki titi ta gwibin- mae hap: Kristen zini nëno mae mo enho nik mana dekon aha zi mo nwenak kles gwesininka.

⁸ Kristen zini bap zen anakan ëgu gwen, "Ano iyekam de we semna in mo tahalhana dikire jemat en hla nul gwibik. Ëe molyë mas gwe-gwibik." Hwëna zen de zëre mo iyena insa kara ta gwibin srëmkam, nonol tangan zëre mo iye tangansa, ki zen mes karekna mam gulsunda. Dekam zëbe mae hap man nwe-mase gwizimnin- san de Kristussu de anakan zabablanna kiye, "Ëe Zëbon de ang gwe-gwen zisi hom." Sap Kristen gwen srëm zini hom kirekam ëkarek gwe-gwenan. Zep Kristen zi de kirekam mas gwibin

srëmkam, zëno karekna man tangan taman kini'an.

⁹ We sem-semna men desa tangan nara dep golëgwë gwenna, bosemse naka emki ale tabir-zimdin- Kristen zini men zen zëno mae mo tahalhana hla nul gwizimninke, zëbe mae hap de hen gol gwizimdin hip. Hwëna anakare we sem-sem mo bosem-sena bahem: Men zëno gwën tahunna 60nak hata srëm gwe'anye, ahaksa zi swe zemka de baes gwe-blän nik mo bose naye.

¹⁰ Bose naka de ale gun hup, zen diki kitak de zi mo anakan de tame gun nuka: Zen dawemsa anakan gol tine gwek:

Zëre mo walasna, hen abu-tane aza-tane walya dawemkam kara ta gwibik.

Zëre mo gola kon zini dawemkam lup gulin gwek.

Tahalha zisi man mas gwibirida gwek,

hen Kristen zi mo tahana man tri so gwizimk.

Zen kirekam de dawemsa gol gwen wenyik mo bosem-sesa em ale ta gwibir-zimdin.

¹¹ Bose naka de ale gulzimdin hip, zen diki men zen nonol anakan Yesussu nen guk gweblananke, "Ëe an angkam Ebon enë gwë'an. Ëe molyë etan zini zek." Zen in zep, bong gwen srëm we sem mo bosem-sena bahem ale tabir-zimdin. Ki hwëna etan de zi zen hap hole-hle gwe-gwenkam, zen sa hwëna zëre mae mo Yesus hup de gu-gun ola in san de ang tan hap baes tal.

¹² Hwëna zëre mae mo Bian hap de gu-gun ola in san de ang gwen srëmna, zen Alap mo nwenak karek.

¹³ Bong gwen srëm we sem-semna, zen hen man ë ensa de zauk gwe-blänkam gol-gol san ëzini'ni gwe nasen gwenan. Kire enkam hom. Hwëna zëno mae mo ol toranna hen hom sam gwesik gwenan, sap zen man aha mo boton olak mas ta nasen gwenan.*

* 5:3 5:3 Kis. 6:1-7

* 5:5 5:5 Luk. 2:37; 18:7

* 5:13 5:13 2Tes. 3:11

¹⁴ Zen in zebë bong gwen srëm we sem-semna titi ta gwibi'in, "Amki zisi kap lak. Walasna wei-wik uk. Hen ere mae mo zini dawemkam kara la gwibik- hen walasna." Ee mae habë kirekam desa gubirida'an: Kristen zini nëno mae mo jal zi de nësa lamang ta gwibin srëm hap.*

¹⁵ Sap ahakon we wal sem-semna mes tol kirekam lwan dahak, hëndep dowal mo kigisa ang nëblak.

¹⁶ Kristen we walya, zëno iye de sem nik gwënna, zen zen de mas gwe-gwibin- dekam de jematsa dohon-hon ta gwibin srëm hapye. Zen mae hap: Sap jemat mo kara ta gwibin hip de wenyä, zen diki tahalha tangan wenyäka hen iye srëm tangan wenyäka.

Kristen zi mo nol-nolaka de kirekam kara ta gwibin hip de ol:

¹⁷ Jematnak de nol gwen zini men zen dawemkam irik nil gwenan, desa tingan zen blikip gwesibirida gwen. Hen dekam de blikip gwesibirida gwen hap, emki gubirida gwen- jemat mo te-ala nakon de zëbe mae hap gol gwizimdin hip, nonol tangan men zen Alap mo ola dawemkam tawa da gwibirin, hen dekam titi da gwibirin. Zëbe mae hap sowe henkam zen gol gwizimdin.*

¹⁸ Sap Alap mo olak man lwak, "Sapi de gandum dansa zaublun danaseranna- dekam de ëbwalom gwen hap, ëkna bahem kyang so-sublun. Dikire twenblän danasenk." Alap insa ola golzimki, zen sapi en hap hom. Zen hen jematnak de nol gwen zi hip- zëbe mae hap de hen jemat mo te-ala nakon gol gwizimdin hip. Zep hen anakan ale nuk,

"Syal zini, zen dikire zëre mae mo syala kon te-alana nulin gwëk."*

¹⁹ Timotius, bahem na-en taibli gwen- ahanik de jemat mo nolaka

ebon anakan klak ta zankam, "Zen mes karek gwëka." Diki zini dan, ahaksa dan-ahan, zen de anakan klak la zankam, "Eiwa, ëe mesë ëre mo nwekam karek gwënnak hla lak," dekam amki taibli gwe.

²⁰ Kareknak de zaran zini, zen tingare zi mo nwenak em dei yul gublun- mae hap: Ahakorena dekam sa hen ëairil.

²¹ Ee ama Alap ne Kristus nik mo nwenak emsa gublu'an- hen Alap mo dam taha nakore zi mo nwenak: Ano ola an desan em ang gwe-gwen- ol blo-blo san de ang gwen srëmkam, hen ahakore en naka de nwekam golëake gwen srëmkam.

²² Jematnak de syal ta gwen hap zisi dam tasik gwibinni, na-en bahem tahana tehabirida ine gwen-syala insa dikim wei yul sone gwizimdin hipye. Em ema zëno kareksa hlil inninka. Bahem karek gol gwen zi niban golësiri gwe-gwen. Em diki enho kles gwesin srëmkam em gwë gwen.

²³⁻²⁵ Ahakore nik mo karekna, zen taken-taken gwibiridan srëmnak wet so gwenan. Hwëna ahakore nik mo karekna, sap de aning gun, hwëna karekna in lun kon sa ki zertrondal, hëndep sa wet solal. Hen kirekam, Timotius, eno Alap mo nganak de syal dawemna in sa wet sol. Hen men zen nabakam wet so srëm gwe-gwenan, zen hen bëjen hëndep aning gwen. Zen hen sa hëndep wet sol.

Timotius Bak, em tol ema sang-sang gwe-gwënda, zep bahem ho tangan enna otde gwen. Diki anggur hosa em hen betëkkam otde gwen. Eno u sang-sangna in dekam sa sër gwëra.*

6

Zi mo tana iltikinnik de babu gwe-gwen zi hip de ol:

¹ Timotius, emki hen gubiridan: Kitak men zen zi mo tana iltikinnik

* 5:14 5:14 1Kor. 7:9 * 5:17 5:17 1Kor. 9:9-11; 16:18; Plp. 2:29; Mat. 10:10 * 5:18 5:18 Ul. 25:4; Luk. 10:7 * 5:23-25 5:23 Anggur hona zen ho mamak makan, hwëna desa hen u sang-sang gwenkam obat hap notde gwibirin.

ëbabu gwe-gwenan, zen dawemkam zen zëre mae mo zi bina insa blikip gwesibirida gwen. Zi bina in de ëKristen gwen srëmna, desa hen dawem enkam zen blikip gwesibirida gwen- mae hap, zen dikim Bian Alap mo bosesa hen nëno mae mo tawa tabin niban lamang so gwen srëm hap. *

² Zëno mae mo zi bina in de ëKristen gwenna, dekam bap zen anakan ëenlala gwe-gwen, “Ëe sap asa asang gwe-gwer. Molya asa karek taka.” Diki anakan zen ëenlala gwe-gwen, “Ano zi bina an, zen ano Kristen bose. Ëe zebë kwasang gwe-gweblanan. Zep asa dawem enkam zëbon syal gwe-gwer- ëre mo Kristen bosena an dekakim dawemsa ano syala kon gulin gweka.”*

Botonkam de tawa tabin sin de ang ta gwen srëm hap de ol, hen te-ala hap de ëhole-hle gwe-gwen srëm hap de ol:

Zep Timotius, ano ola an, dekam kitak tawa ta gwibir hen titi ta gwibir.

³ Zep aha zi bap zen totore olkam tawa ta gwibin. Diki Bian Yesus mo ola ban de apde në gwenna kim zen tawa ta gwibin- hen Alap hon dikim ëtal gwesin hip denakim. Sap zini men zen aha ol aïsilkim tawa da gwibirin,

⁴ zen bolte-bolte zi, hen zen eiwa dena hom tangan tame nu'in. Kirekam de zini zen man tangan ësam gwesik gwenan- Alap mo ola kore ol-gun maesa de gulsuk halasen gwen hapye. Zen hwëna dekon zep zënaka husus neibirida gwenan, hen ëol tetek gwe-gwenan. Zen

dekon zep hen Kristen bose zeban zënaka lamang da gwibirin hen u seger da gwibirin.

⁵ Kire enlala häi zi mo tawa tabin nikon, zep hëndep Kristen zi mo ngirinnik ol keisa-keisana nolzausuk srëm gwe-gwenan. Eiwa de enlalana hom tangan- zëbon mae onakye. Kire zini man tim nul gwenan, “Ano Alap mo nganak de syala kon, ëe asa te-alana beya gwer.”

⁶ Eiwa, dawemkam de Alap hon enho nik tal gwesiblin zini, zen sap de tahalha gwen, hwëna zen sa anakan eis gwibiri, “Bian Alap sowe henkam ano tahalhana ap sul sone gweblanda.” Kire zini zen sa Alap onakon dawemna hlalulu- sap angkam hen lamkam.*

⁷ Sap nësa kim nëre mae mo an walya auhu-kamanak ëjaha gwe-gwenan, nëno kire-kirena hom. Juwenkam hen molye kire-kirena lop la gwek.

⁸ Zep nëbon mae de tembane ërlwana, hen pakean, zen syake.*

⁹ Hwëna ahakon hom kirekam dep ëdwam gwe-gwenan. Zen hwëna kire-kire beya gwen hap ëdwam gwe-gwenan. Zep zëre mae mo dwam gwibin sin de ang tankam enlala ngalap-ngalapna dekam zep tangan mam gwe-gwenan, hëndep zep enlalana ëjoblo-top gwe-gwenan, dekam zep hëndep dowal mo kigi mo zolak ëkyanhe gwenan. Zen in zep kareksa de gon hap bëjen baes tan, hëndep zep tangan ëtimbwas gwesik gwenan.

¹⁰ Sap karek-karek ausuna, zen te-alanak. In zep hëndep ahakon te-ala hole-hle nakon Yesusu de taibliblan nakon ëbutehak. Zëre mae mo enlala ngalap-ngalapna in san de ang

* **6:1 6:1** Orep tangan zini hen aha zisi karekkam jap nul sonenda gwek. Zi de tahalha hap zëre mo bon yalsa sul sonen srëmkam, desa man dahyo gwek- pasarak de hwëna aha zi hip te-ala hap lirak tabin hip. Zëno bon de sërkam yawal gwenkam, dekam we wal walas zeban dahyo gwek- desa de kitak lirak tabin hip. Men desa kirekam lirak da gwibik, zen dekam zep hwëna zi bina in mo tana iltikinnik ëbabu gwe-gwek. Dekam hom beyakam ëheya-hya gwe-gwek. Sap heya gwen naka de etan balk tankam, desa man damera gwek. Tana iltikinnik de ëbabu gwe-gwen zini, desa sap de lek-lek ta gwibin, ahaksa tamera gwen. Pemerinta hom kire hap jalse neibirida gwek. (Ef. 6:5-8; Tit. 2:9-10) * **6:2 6:2** Plm. 16 * **6:6 6:6** Plp. 4:11-12; Ibr. 13:5 * **6:8 6:8** Ams. 30:8-9

ta gwenna, zen dekam san de toman ben-benkam de enhonak zënaka dang gulblunna kiye. Hëndep zep enlalana sêrkam êdowe hana gwenan.

An Timotius hup de aumwa hap de ol tan-tan:

¹¹ Hwëna Timotius, em in Alapsa de betek gweblanna. Zep em desan bahem ang gwe-gwen. Em em alp gwe-gwen- Alap mo nwenak de dam-dam enkam gwë gwen hap, hen Zëbon de dawemkam tal gwesin hip. Kristussu de taïbliblanna em esek gulse zahe gwen- zao en de tatem zaunkum. Emki hen wal bosyansa de kwasang gwibirida gwen hap alp gwe-gwen- hen aha zisi de sae-sae enkam golêlowehe gwen hap.

¹² Em ngein en san em Yesus osan dep dam-dam enkam hluwen-ekakim hëndep de gwën hap de naka dokwak gul. Sap zen desa de dokwak gun hup Alap emsa kwang taka, hen zen kire habe zi beyanak damnak enaka anakan kira taka, "Êe ama Bian Yesussu ang gwebla'an."

¹³ Zep ëngaya gwen ausuna Alap hen Kristus Yesus, men Zen Pontius Pilatus hon damnak Zënaka kira taka, zëno nik mo nwenakë emsa titi ta'an: *

¹⁴ Ano titi tanna an san em dawemkam ang gwe tine gwen-tingare zi mo nwenak de enho kles gwesin srëmkam gwë gwenkam, hëndep Bian Yesus de lwahal zanak de zau'uk.

¹⁵ Yesus mo hatazan hap dena in molya bwal kinik. Zen sa ki hëndep lwal- sosen tangan Zini Alap zëre mo gun sun. Zen Zen en tangan teipsinni. Hen Zen tingare bose nabare zi mo Mamna, hen tingare teipsin zi mo Teipsinni.

¹⁶ Zen Zen hëndep de gwë gwen Zini. Zëno ngatannak toton nara dep?- golek de gwen naye. Desa zini hom mae hla dak, hëndep angkam

mae bëjen hla tan. Dikire Desa hëndep denaban blikip neisik gwe-blak, sap Zë-en sosonna! In eiwa tangan! *

Timotius de te-ala beya zisi kirekam titi ta gwibin hip de ol:

¹⁷ Emki te-ala beya wenyaka anakan jalse gwibirida gwen, "Bahem ëbolte-bolte gwe-gwen, hen auhu-kama ennak de kire-kire ennak bahem ëyaing gwe kinii gwen." Sap auhu-kamanak de te-ala maena zen nabakam ëjek-jak gwe-gwenan. In zep em titi ta gwibin-zen de Alap emsa yaing gwebla kinii gwen hap.* Sap Zen Zen kae-kaena nêbe mae hap mam gul gwizimnirannen dikim enlala nik êoto gwesin hipye.

¹⁸ Zep emki gubirida gwen, "Eno mae mo kire-kirena beyana, zep em em aha zisi kwei yul sonendankitak de zi hip de dawemsa goltrei gwizimdinkimye." Zep auhu-kama ennak dep de te-alakam, zen dikire ëkae-kae gwe-gwek, hen aha zisi mas neibirida gwek.

¹⁹ Zen de kirekam ëgwë gwenkam, dekam zëno mae mo ngatan zi mo langnak de te-alana sa tangan ëbeya gwer. Awe de lowe henna hen okamanak dep de te-alana, zen kitak au-au makan. Hwëna wakuwe de lowe henna hen zao de kire-kirena, zen eiwa de tangan wenyu zen.*

²⁰ Timotius Bak, Alap mensa zëre mo nganak de syal gwe-gwen hap emsa taïbliblaka, desa dawemkam kara gul gwe. Totore tawa tabinni hen kire hap de ol gulsuk-gulsuknu langa gulsuk. Men zen auhu-kama enlala en san totore ola insa tawa da gwibirin, zen hwëna man ëkil gil gwenan, "An zen- enlalasa dikim langa tasin hip denaye." Hwëna zen boton.*

²¹ Ahakon men zen desan ang tak, hwëna dekam zep Kristussu de ang gweblan nakon ëbutehak.*

* **6:13 6:13** Yoh. 18:36-37; 19:11 * **6:16 6:16** Kel. 33:20 * **6:17 6:17** Luk. 12:20-21 * **6:19 6:19** Mat. 6:20 * **6:20 6:20** 1Tim. 4:7; 2Tim. 1:14 * **6:21 6:21** 2Tim. 3:8

Em in zene suratna ansa ulin
gwe'ak, dikire Bian mo kwasang-
kwasangna kitak ebon mae onak
lwa gwek.

Paulus mo surat ahana Timotius hup

1-2 Ano dang tininak de wasalna Timotius Bak hap,

Paulus onakon:

Dawem! Zen Alap mo dwam gwibin sin ki lwak, zep kirekam Kristus asa dam tasiki- dekam de hendep de gwen hap de ol dawemsa gol halada gwen hapye, men kirekam Alap gu-gubiridakake, Kristus Yesus hon de engaya gwen hap dena.

Nere mae mo Bian Alap ne Bian Kristus Yesus ne sa kwasang-kwasang zemka mam tangankam ebe hap ol gweblala. Hen em zere nik mo taha terenak esa gwe gwer.

Timotiussu kim udobe naban dikim gwe gwen hap titi takake:

3 Em kim Kristussu taibliblaka, dekam zebe gweka- san de ere mo wasal we tan tangan. Ee in zebè ebon onakon hen-henkam Alap hap dawemna gol gweblanan, hen zebè yaklam denaban kam denaban ebe hap Biansa abe ta tine gwenan. Sap ee hen ere mo auyan-aza osane ang gwe-gwenan, in zebè alp gwe tine gwenan- enho kles gwesin sremkam de Alapsa abe ta tine gwenkamye.

4 Timotius, ee namae eno nwe go-hona enlala gwe-gwizim'in- men kime aban syak e'anka, dekam denaye. Ee in zebè tangan emsa de etan zertowen hap dwam gwe-gwe'an, sap zen dekam tangan sa ano isrip-srina taman kinil.

5 Hen ee mae habè ebon onakon Alap hap dawemna gol gweblanan: Sap ee mese eno enhona anakan tame tak, "Zen eiwa tangankam Yesussu taibliblaka. Ek enkam hom." Eno anena Yunike hen we abuna Lois Bak zen hen kirekam laibliblak, in zebe em hen zeno nik mo kim taiblibla'ara.

6 Zen in zebè emsa enlala sobla'an: Ee men dekam ep tahana tehabla inek, dekam mensa sosonna Alap ebe hap golblaka, desa em syauk mo kim bubung gul gwen.*

7 Sap Alap zere mo Enhona mensa nep zer gwizimnira, zen airinni tawa naka hom. Zen soson enna, kwasang-kwasang enna, hen zenaka de zerinik gwe-gwenna. Zep Zen de nebon mae ing gwe henkam, nen kirekam esa hen lowehe gwer.

8 Zep bahem saher gwe-gwen- Bian Yesus hup de olsa de tonbirida gwen hapye. Hen bahem anakare hap saher gwe-gwen, "Paulus bwinak gwe'ara." Sap ee Bian mo ol dawemsa de golasas gwe-gwen jal habè awe gwe'an. Sosonna mensa Alap nep gol gwizimnira, desa en em blol gwe-gwibin-anakare enlala naban, "Ee hen sap asa Bian Yesus hup de jal hap Paulus mo kim karekna goltowe gwer."*

9 Nen kirekam de enlala naban nen lowehe gwen, sap Alap mes nesa ngaya tabirki hen nesa kwang guludaka- dekam de enho lalak enkam zere en onak lowehe gwen hapye. Nen home banakare maesa syal eibik- dekam de Zen nesa ngaya tabin hip denaye. Hwena zere mo kwasang-kwasang hap ki kirekam nesa kalang gwibiridaka. Zen orep mes nesa kirekam Kristus onakon kwasang gwibirida'ankamen dekam hendep okamana ansa syal gwibir srèm gwe'ankake.*

10 Hwena Zen ner hom nep zere mo kwasang-kwasangna insa goltreizimki- nesa de ngaya tabin hip de Zini insa kim zer sonez- imkike. Sap nen menkam eine juwen zi mo ora san egwa ha'ak, hwena Yesus zep orana insa tayalsiki. Dekam zep hwena zere mo ol dawemkam nebe mae hap hendep de engaya gwen hap de orana sal tazimki.

11 Asa in zep dam tasiki hen zer

* 1:6 1:6 1Tim. 4:14 * 1:8 1:8 Rom. 1:16; 2Tim. 2:3; 2:9 * 1:9 1:9 Ef. 2:8-9; Tit. 3:4-5

soneka- dekam de ol dawemna insa gol halada gwen hap hen tawa ta gwibin hip.

¹² Ëe in zebë karekna goltowe gwenan, hëndep angkam zebë bwinak awe gwë'an. Hwëna ëe homë kire hap saher gwe-gwenan, sap ëe mesë Biansa tame tak- men Zëbonë yaïng gwe kinï gwenanye. Zep ëe tawana: Zëre mo nganak de syala men zep asa taïbliblak, Zen sa desa kara gul gwera- hëndep zëre mo lwa halzan yaklanak de hata'ak. *

¹³ Timotius Bak, eno tawa tabinni, zen diki ëre mo tawa tabin sin de ang gwëk. Dekon bahem golsyalhe gwen. Zep Kristus en osan em dam gwesikhäl gwen, dekam eno Biansa de taïbliblan hap de enlalana sa mam gwera, hen zëno kim esa aha zisi kwasang gwibirida gwera.

¹⁴ Alap mo Enhona Zen man nësa golëlowehe gwenda, zep zëno ssonkam emki dawem enkam ere mo syala insa kara gul gwen- Zen men kire hap emsa taïbliblakake.

¹⁵ Ena mese abe hap dena ansa salka: Tïngare Asiak de Kristen zini, men zen sap menkam asa bwinak du në gwëblak, zen mes asa hli dasik. Hëndep aumwa hap Pigelus Bak ne Hermogenes Bak ne asa hli laka.

¹⁶⁻¹⁷ Diki Onesiforus Bak Swe, zen en nama maka asa zergwë gwe'ara. Zen hom ano bwinak de gwënna an hap saher gwe-gweka. Hëndep zen kim Romak awe hata zaka, zen man asa të gwëbla'anka, hëndep ki zep asa hla taka. Zen man asa sam tasik gwe zaka, hen ano enlalasa ap tatete ta gwëbla zaka. Zen diki Bian sa kwasang-kwasangna zëno we wal walas hap gol gwizimdi.

¹⁸ Ena tawana: Zen hen Efesusk dawemkam ano tahana ap zitri so gwëblaka. Zep diki Bian Yesus sa zëre mo kwasang-kwasangna zëbe

hap mam gulblula- Zen de etan lwahal zankam.

2

Timotius dikim jana nabare zi mo kim tatetekam gwë gwen hap de ol:

¹ Zen zep, tane tol, emki Kristus onakore kwasang-kwasangnak tatem zaun.

² Mensa abon onak zi beya mo ngirënnik sane gwe-gweka, zen desa em hwëna aha zi hip etan ayang gul gwizimdin. Ere mo anakarekam de taïlëbiridan zi hip em ayang gul gwizimdin, "Zen sa hwëna aha zi hip etan ayang nul gwizim."

³ Anakare enlala naban emki tatem zaun: "Ëe an hen zen ahana- Kristus mo jana nabare zi niye. Ëe sap asa hen zëbe hap de jal hap karekna goltowe gwer."

⁴ Jana nabare zini zen mam zik mo gubiridan en san ang ta gwenan. Zen bëjen aha syalak ëhir-hir gwen, sap zen man mam zik dikim sam gwesibirida gwen hap ëdwam gwe-gwenan. Zep emki hen kirekam nëre mae mo Mamna Kristussu enlala gwe-gwëblan.

⁵ Men ki hen bolasa de asyas gwëwibin zini: Zen de peraturan san ang ta gwen srëmkam, zen bëjen asyas hap de hadiana insa gul irin.

⁶ Ahana hen ki: Nga syal gwëgwëblan zini, syal-syal wenya, zen zen sa lamkam ngana in kore eini dawemkam gul iri.

⁷ Ano ola ansa emki enhonak loken. Alap dekam sa ebe hap golblala- dekam de kitak tame gun hup denaye.

⁸ Em de tatem zaun hup, diki Bian Yesussu em anakan enlala gwëgwëblan: Zen teipsin zini Daud Bak onakon saltilki, hwëna Desa man dak. Hwëna Alap zep etan tin nikon ngaya taka- ëe men kirekamë zëbe hap de ol dawemna gol halada gwenanke.

* **1:12 1:12** Ayat 12 mo aumwa topnak awe, zëno dam gulsunnu dan-dan. Ahana anakan: Zep ëe tawana: Ëre mo enhona mensaë zëno tahanak drënek, Zen sa desa kara ta gwera- hëndep zëre mo lwa halzan yaklanak de hata'ak. (Mzm. 37:5)

9 Ëe in hen zebë angkam jal zi makan bwinak awe karekkam gwë gwenan. Hwëna Alap onakore ol dawemsa bëjen bwinak mat gulsun. Zen wet sonkam.*

10 Hwëna ëe an zebë anakare enlala hohle tan naban gwë gwenan, “Ëe sap asa karekna goltowe gwer. Diki mensa Bian Alap Kristus onakon de ëngaya gwen hap dam tasi-birki, zen dikire kitak Bian zëre mo sërkam de ngatannak yaing gwek-zao deka hëndep denaban lowehe gwek.”*

11 Zep nen dikim tatem yaun hup, Kristen zini nëno mae mo kirekam de taiblibinni ansa nen enlala ei gwibin:

“Kristus sa nësa hëndep denaban golëlowehe gwera- nen de anakan ëenlala gwe-gwenkamye, ‘Yesus kim tilki, Zen abanë lik.’

12 Nen de tatem ëzaunkum, nen esa lamkam Yesus zëre mae han irik il gwer.

Hwëna nen de zi mo inik Yesussu anakan zabebblankam, ‘Ëe an Zëbon de ang gwe-gwen zisi hom,’ ki hwëna Zen hen sa nësa gubiridala, ‘Zen Asa de ang gwe-gweblan zisi hom.’*

13 Nene Yesussu de taibliblan nakon etan ësin gwe hana'ak, hwëna Yesus nama sa zëre mo nësa de gu-gubiridan ola syal gwe-gwibir-zimdi. Sap Zen hom wet gwesik gwenda. Zën sa nësa etan tatete ta gwibiri.”*

Kristus mo nganak de dawemkam syal gwe-gwen hap de ol:

14 Emki Kristen zisi anakan enlala sobirida gwen, “Ëe Bian Alap mo nwenakë emsa titi tabi'in: Bahem Alap mo olak de ol-gunsu keisa-keisa gwe-gwibin.” Kirekam em titi ta gwibin, sap kirekam de keisa-keisa gwibinni, zen waba hap. Sap zen kire nakon zëre mae mo Biansa de taibliblan nakon ëaltil gwenan.*

15 Dawemkam emki alp gwe-gwen- dekam de Alap emsa anakan sam gwesik gweblan hap, “Zen dawem enkam ano nganak syal gwe-gwe'ara.” Dam-dam enkam em Alap onakore ol dawemkam tawa ta gwibin. Dekam em molye zëre mo nwe kara gwennak saher gweka.

16 Auhu-kama enlala zi mo totore tawa tabinsi emki langa gulsun. Sap kire ol san de ang tankam, dekam zini Alapsa man langa dasik gwenan.

17 Kirekam de tawa tabinni, zen men kiye- kwae yala. Himeneus ne Piletus ne zen kirekam de kwae naban.

18 Zen mes eiwa de ola kon olsyal heka- anakan de yasik la gwibinkim: “Kristus molya emsa juwen nakon ngaya tabirki, sap zisi de kirekam juwen nakon ngaya tabin hip dena mes lwak.” Zëno nik mo ol san de ang tankam, zep hëndep ahakon Kristussu de taibliblan nakon etan lwan dahak.

19 Hwëna nen de zë tatem ëzauk gwen hap dena, Alap mes ngirin gol te makan Kristussu nëbe mae hap ik tizimki. Zëbon onakon zebe anakan dam ulsuk gwenan, “Bian mes zëre mo hlil irin wenyana nëno mae mo bosem-sena kitak tawa gwibiridaka,”* Ahana dam gulsunnu hen anakan, “Men zen ëgu gwenan, ‘Ëe an Biansa de ang gwe-gweblanna,’ hwëna karek gol gwensa zen baes tan.”

20 Men kiye, te-ala beya zi mo golak de piringni: Ahakon emaskam dena hen perakkam dena. Hwëna ahakon hen ki totore piringni- kama ngatdarakkam dena hen tenya korena. Totore piringni, zen mwin-mwankam dep dena. Hwëna dawem-dawem wenyana, zen tembane yawal ennak dep dena.

21 Zep hen kirekam, men nara zëre mo enhosa kirekam-kirekam karek nakon lalak tanna, zen sa Alap mo

* 2:9 2:9 Plp. 1:12-14

* 2:10 2:10 Kol. 1:24

* 2:12 2:12 Mat. 10:33; Luk. 12:9; 1Ptr. 4:13-14

* 2:13 2:13 Rom. 3:3-4; Bil. 23:19

* 2:14 2:14 Tit. 3:9; 1Tim. 4:7

* 2:19 2:19 Bil. 16:5; Yoh.

10:3-5; 10:14-16; 10:27

nwenak gwëra- san de emaskam de piringni kiye. Bian sa desa sam gwesiblila, hen syal dawemsa sa zep wei yul soneblala, sap zen kire hap mes hohle gweka.

²² Zen in zep, Timotius Bak, emki wal sei-siwir mo hole-hle enlalana langa tasik gwen. Hwëna a kire orasa em të gweblan:

Dekam de dam-dam enkam gwë gwen hap dena,
Biansa dikim dawemkam taibliblan hap dena,
dekam de aha zisi kwasang gwibirida gwen hap dena,
hen aha-ere enlalakam de lowehe gwen hap dena.

Sap tingare zini men zen enho zon tasiblin naban Bian Yesussu betek në gweblanan, zen kirekam lowehe gwenan.

²³ Enlala joblo-top zi mo ëkeisa-keisa gwe-gwen san em bahem ang gwe-gwen. Zen waba hap. Ena tawana: Zen dekon zini ëdarak gwe-gwenan.

²⁴ Hwëna Bian mo nganak de syal ta gwen zini, nen bap nen ëdarak gwe-gwen, hen bap nen nabakam jal ta gwen. Nen diki enlala sae-sae naban nen eiwa de enna kim tawa ta gwibin.

²⁵ Zini men zen nëbon mae onakon ëdrak gwe inehal gwenan, nen hwëna ol sin-sinkim nen etan eiwa de ora san dep titi ta gwibin. San ha dekam Alap sa zëbe mae hap dekam de ëhalen hap dena golzimdi- hen eiwa de ora san dikim etan lwanda han hap denaye.

²⁶ Zen eiwa mes dowal mo kigi mo zolak ëkyanhek, in zep zëno dwam gwibin sin ang ta gwenan. Hwëna nen de kirekam mas gwibirida gwenkam, Alap wëhë golzim'inca?- dekam de enlala mamakna insa tapbla tan hap denaye.

3

Aumwa hap de yaklanak dep de ol zim-zim:

* 3:1 3:1 1Tim. 4:1 * 3:5 3:5 Mat. 7:15; 7:21; Tit. 1:16

¹ Hwëna ansa emki enlala gwe-gwibin: Aumwa hap de yaklana an zen angkam lwa se'an, dekam okamana an sërkam tangan sa karek gwe zaher.*

² Sap dekam zini beyakam sa anakan lowehe gwer:

zëre en mo timsi de ngalap gwe-gwibin,
te-alasa de ensa lwa gweblan,
zëre en mo boresa de mam gul gwen,
sërkam de zëna-zëna gwe-gwen,
aha zisi de lamang ta gwibin,
an-bi zemka bëjen betek gwizimdin,
Alapsa bëjen enlala gwe-gweblan,
wal bose zemka bëjen anakan gublun, "Ema tol asa sam tala."

³⁻⁴ Hen bëjen kwasang gwibiridan, zi bosyan hap de jalsa lam gul gweblan,

boton ol gol halada gwen,
wal bosyansa de golëgu gwen,
darak soson,
zënaka bëjen zerinik gwen,
dawem enlalasa bëjen zer irin,
bolte-bolte enlala enkam de gwë gwen,

totore-totorekam de gwë gwen,
syan-syan enkam de lowehe gwen,
hwëna Alapsa bëjen enna lwablan.

⁵ Kire zini zen ëk enkam anakan ëgu gwenan, "Ëe an Kristen zi." Hwëna zen man baes ta gwenan- Alap de zëre mo sosonkam zëno mae mo lowe hensa li yul sone gwizimdin hipye. Zep kirekam de zisi emki langa tasik gwibin.*

⁶ Ahakon hen we walsya gol-gol san aningkim yasik da gwibirin. Zen anakare we walsya karek san dep titi da gwibirin:

enlala sin-sin wenya,
enlala hole-hle beya wenya,
hen kirekam-kirekam karek hap de enlala ëdowe hanan wenya.

⁷ Kirekam de we walya man ësam gwesik gwenan- ol ësesa de ësane gwe-gwen hapye. Hwëna zen bëjen

anakan klis gun, “An eiwa dena. An boton.”

⁸ Men kirekam orep Yanes Bak ne Yambres Bak ne * Musasa tru-tru ul gweblaka, zep yasik tabin hip de zini in hen kirekam angkam eiwa de tawa tabin nik tru-tru nul gwe'an. Zen mes enlala nakon ëhai gwek. Zen mes tangan Kristen zi mo taïblibin nikon ëlanga gwesik, hwëna totore tawa tabinsi daïbli gwibirin.

⁹ Hwëna kire zisi molya holokam ang neibirida gwek. Sap nabakam sa anakan dam dasik gwibir, “An enlalana joblo-topna,”– men kirekam hen orep de auyan-azana zi darena insa dam nosusukke.

Timotius de kirekam Alap hon tal gwesin hip de ol:

¹⁰ Hwëna Timotius Bak, em ano tawa tabinni tawana– hen ano gwëna, hen ano dwam gwibinni dekam de enho kles gwesin srëmkam gwë gwen hap denaye. Hen em mese asa anakan tame taka, “Zen Biansa de taïbliblannak tatem zauk gwenda.

Wal bose wal zemka de kwasang gwibirida gwen hap alp gwe-gwenda,

hen nabakam hom jal gwe-gwenda.”

¹¹ Asa kim Yesussu de taïbliblan srëm wenyä ëna Antiokiak, Ikoni-umk, hen Listrak karek da gwek, dekam em hen zëwe gwë'anaka.* Zep em mese dekam asa anakarekam kara ta gweka, “Zen sap kareksa goltowe gwenda, hwëna nama tatetekam zauk gwenda.” Hëndep dekam man Bian tingare abe hap de jal zi mo taha nakon asa zeser sone gweka.

¹² Asa en molya kirekam në gwe-blak. Hwëna tingan men zen Kristus hon de ëtal gwesin hip ëdwam gwe-gwe'an, desa hen kirekam sa karek da gwibir.

¹³ Hwëna enlala karek zini hen yasik tabin hip de zini sa etan zëre mae mo karek-karekna esek nulse zahe gwer. Zen sap aha zisi yasik da gwibirin, hwëna zëna hen hom anakan tame nul gwenan, “Hare ëe an syauk sun dep am gwë ha'an.”

¹⁴ Zep tane tol, men desa emsa tawa da gwek, em mese hëndep dawemkam taïblibirki. Zep zen zëwe en tatem zauk. Sap ëe in zen emsa tawa la gwek, em mese dawemkam asa tame tabirki.

¹⁵ Em betek nakone Alap mo ola tame gulku. Alap mo ola, zen dekon zep enlala blala hata gwenda, dekam zep zini ëngaya gwen hap de orana dam dasik gwenan– Kristussu de taïbliblankam.

¹⁶ Sap Alap mo ola mensa ale nuk, zen kitak Alap zëre mo Enho nakore naka. Hen zen dawem tanganna– dekam de tawa ta gwibin hip, oto tasik gwibin hip, halen ta gwibin hip, hen ora dawem san dikim dam tasik sone gwibin hipye.*

¹⁷ Alap mo nganak de syal ta gwen zini, nen de desa enhonak lone gwenkam, dekam esa anakan tame ul gwer, “Ëe kirekam asa syal gwe-gwer.” Hen banakare maesa de goltowe gwenkam, dekam nëno mae mo enlala blala sa sowehe gwera.

4

¹ Timotius Bak, ëe ola ansa Alap mo nwenakë ebe hap hli yulblu'an– hen Kristus Yesus mo nwenak, men Zen sa zëre mo irik ginsä golhata zalake. Zen sa dekam juwen wenyaka hen nama de ëngaya gwen wenyaka klis gul zula. Zep Timotius Bak, Eirzi-Bia yawal mo nwenak ëe ama emsa gublu'an:

² Alap mo olsa em tonbirida tine gwen– sap sane gwen hap de ëdwam gwennak, sap ëdwam gwen srëmnak. Emki dekam oto

* **3:8 3:8** Yanes Bak ne Yambres Bak neka, Yahudi zini kirekam bose nosok Mesirk de meiyer golzauk gwen zi darena– men zen Musasa tru-tru ul gweblakake. (Kel. 7:11; 7:22; 9:11) * **3:11 3:11** Kis. 13:14-52; 14:1-20 * **3:16 3:16** Rom. 15:4; Ibr. 4:12

tasik gwibin, hen udobe naban jalse gwibirida gwen, hen titi ta gwibin, hen ol sin-sinkim em dawemkam tawa ta gwibin.

³ Sap molya holo gwek, dekam sa zini anakarekam lowehe gwer:

Eiwa de tawa tabinsi de esane gwenna sa baes tal,

hwena zen guru-guru esesa sa beyakam deibirida gwer.

Desa sa hwena nenbirida gwer, "Asa ere mae mo dwam gwibin en san tawa la gwibik." Zep sa hendep zere mae mo hole-hle en san tawa da gwibir.

⁴ Zen dekam sa hwena eiwa de olsa de esane gwe-gwen hap zeno mae mo ini emat-mat gwizim.

Hwena auyan-aza zik mo epba olsa sa srën li nul sone gwer-dekam de zere mae mo dwam gwibin derek san dep syan nahlan hap.

⁵ Hwena Timotius Bak, emki enaka kara ta gwen. Kareksa de goltowe gwennak tatem em zauk gwen. Yesus mo bosesa de salbin srëm zi sin dep emki engaya gwen hap de ol dawemsa golzim halada gwen. Em Alap mo nganak de syal gwe-gwen zi, zep syala insa dawem enkam em sul sonen.

⁶ Sap ee nabakam asa emsa hli tal, hen ano kala nabakam sa wet solmen kiye, dombasa de Alap hap zip soblanna.

⁷ Ee mesë ere mo syala sul sonek. Ee jana zi mo kimë Yesus hup de ol dawemna golasas gwe-gwek. Yesusu de taibliblan nakon homë mae syalhek.

⁸ Ee insa kirekam tatem zauk gwek, zep angkam abe hap de mire sigina Bian man ap Golkara gwebla'ara. Yesus Zen dam-dam enkam de klis gun hup de Zini Zen. Zen kim de nesa klis gu'un zaka, Zen dekam sa abe hap golblala. Abe en hap molya golblaka, hwena tingan men zen zere mo lwa halzan hap de yaklana anakan enlala në gwebla'anke, "Diki nabakam zen ki lwan," Zen zebe mae en hap sa kap tazimdi.

Paulus kim syal betekna Timotius hup golblakake:

⁹ Emki dawemkam alp gwen-dekam de nabakam asa duweblazan hap.

¹⁰ Sap Demas Bak mes asa hli ta guk halka. Zen auhu-kamana ansa ensa lwa gwibi'ira, hendep zep Tesalonika san dep heya gweka. Ee mesë Kreskes Baksa Galatia san dep zer sonek. Hen Titus Baksa Dalmatia san debë zer sonek.

¹¹ Lukas Bak en hanë nama ë'an. Markusu kwang ta kinzi. Sap zen airis- ano tahasa de tri son hapye.*

¹² Ee mesë Tikikus Baksa Efesus sun dep zer sonek. †

¹³ Song gwe zankam, Troask ano baju sal-sala teisya kinzi. Karpus Bak mo golakë hli sok. Hen ano bukuna lop ta kinzi- nonol tangan dawem-dawem wenyaka. ‡

¹⁴ Tembaga nakon de kire-kire yang ta gwibin hip de zini in, Aleksander Bak, § zen mes asa dawemkam karek taka. Hwena zen sa Bian onakon hlau.

* **4:11 4:11** Markus in san ha zeno aha bosena Yohanis? Zen san ha men zen nonol ol dawemsa de goltën dannak Paulus ne Barnabas neka heya gwenkam hli so guk halkake? (Kis. 12:12; 12:25; 13:13; 15:37-39) † **4:12 4:12** Paulus mae hap mes yap Tikiku'u zer soneka: Timotius mo weinak dep de Efesusk syal gwen hap. ‡ **4:13 4:13** Insa "dawem-dawem wenyaka" kam ale gulku, Yunani olkam "tweran sopkam de buku" kam ale gulku. Kire bukuna zeno kitak de halamanna tweran sop en nakorena. Desa te-ala mamkam kap da gwek. Zep san ha totore bukusa hom enlala gweblan daka, hwena Alap mo ola bare naka mes yap. Aha dam gulsunnu hen: San ha bukuna in zere mo tahakam de ale nabare naka? § **4:14 4:14** San ha Aleksander in, men zebe hap denaka hen Nonol Timotiusnuk ale gulkuke? (1Tim. 1:19-20nak) Ahana "Aleksander" kam de bosena Kis. 19:33-34nak. Aleksander in mae hap mes yap Paulus mo tawa tabinni husus gwe-gwibirki: Sap zen tembaga nakon yang tabin dowal-dowalsa yang ta gwibirki- te-alakam de lirak ta gwibin hip.

15 Em hen em terya-tya gweblan, sap zen sêrkam nëno mae mo tawa tabinsi husus gwe-gwibi'ira.

16 Pemerinta mo mam-mamna kim nonol asa taken-taken nëblak, dekam zini hom tangan asa nêrzauk sonek. Tîngan man asa hli da gukhak. Dikire Alap zëno mae mo karekna insa tap gulsuzimk.

17 Hwëna Bian Zën zep asa golek de ta zaka, hen sosonna ap golblakadekam de zëre hap de ol dawemna insa sowe henkam Yahudi srëm zini insa tonbiridan hapye. Bian dekam zep asa zëno mae mo jana ngi nakon zeser soneka- ëe dikim etan ëngaya gwen hap de ol dawemna insa tîngare Yahudi srëm zi hip golluwe gwizimdin hipye.

18 Zep Bian Yesus sa tîngare zi mo jala kon asa hil ti sone gwera, hëndep Zen sa asa drëne sera- zëre mo irik ginnik de gwë gwen hapye. Dikire zëre mo bosena teip nulsuk gweblak- hëndep denaban! In eiwa.

19 Priskila ne Akwila neka guzim, hen Onesiforus mo golak men zen lowehe gwenan, desa kitak anakan gubirida, "Paulus dawem ensa ep gol sonezimki."

20 Erastus Bak Korintusk gwëka. Hwëna Trofimus Bak man sang-sang gwëka, zebë Miletusk hli tak. *

21 Bahem dakal gwen, ki hwëna hi ngëp tamle gwennak esa song gwe zala. Yubelus Bak, Pudes, Linus, hen Klaudia Bak dawem ensa ebe hap nol soneblak. Hen kirekam- tîngare awe de aya-wal oso wal omye.

22 Dikire Bian emsa zergwë gwëk. Hen kitak em in zen iwe lowe he'an, dikire Bian mo kwasang-kwasangna ebon mae onak lwa gwëk.

* **4:20 4:20** Erastus hup de ola emki Kis. 19:22 hen Rom. 16:23nak hlaun. Trofimus hup dena, emki Kis. 20:4 hen 21:29nak hlaun.

Paulus mo surat Titus hup

¹ Suratna an ëre mo tanena Titus Bak hap,

Alap mo nganak de syal gwe-gwen zini hen Kristus Yesus mo dam tasin zini Paulus onakon:

Dawem! Eirzi-Bia mae hap asa dam lasiki: Ëe dikim Alap mo hlil irin zisi Kristussu de taibliblannak de tatem ëzauk gwen hap dena kim titi tabirida gwen hap, hen zen dikim eiwakam de tawa tabinsi tame gun hup, hëndep Alap en onak dikim dawemkam étal gwesin hip.

² Sap Alap man dwam gwekannen dikim anakan dam gulsuk gwen hap, “Ëe eiwa asa ki hëndep de gwën hap dena oltower.” Sap boton srëm Zini Alap Zen mes ëngaya gwen hap dena insa okamana ansa de yang gulsun srëmnak nësa gugubiridaka.

³ Yaklana mensa nësa de ngaya tabin hip de Zini Alap dam tasiki, zao kim nër hom zauk, Zen dekam zep zëre mo orep de ol gu-gunnu insa abe mae hap goltreizimki. Zen dekam zep hen ëngaya gwen hap de ol dawem gol halada gwen hap de syala abe hap wei yul soneblaka.

⁴ Titus, em an eiwa ano tane, sap nen apdenak mese Kristussu laibliblaka.

Nëre mae mo Bian Alap ne nësa de ngaya tabin hip de Zini Kristus Yesus ne sa kwasang-kwasang zemka mamkam ebe hap ol gwe-blala. Hen em zëno nik mo taha terenak esa gwë gwera.

*Paulus kim Titussu anakan enlala soblakake, “Ëe emsa Kristen zi mo nol-nolaka dikim dam tasibin hibë Kretak hli tak.”**

⁵ Ëe mae habë Kretak emsa hli tak: Kirekam-kirekam syala men zen nama lwa kinī'ak, desa de em sul sonen hap. Nonol tangan ëe

ama emsa gubluk- Kristen zi mo nol-nolaka de ë-ë san dam tasibiridan dan hap.

⁶ Kristen zisi de nol gwibiridan hap de dam tasinni, zen diki tingare zi zen anakan tame tan, “Zen enho kles gwesin srëmna.”

Hen nol gwen hap de dam tasinni, we dan son zisi bëjen.

Zen diki walas zem hen Kristussu zen taibliblan.

Anakare zisi bahem nol gwen hap dam tasibin: Zëno walassa de aha zi anakan gubirida gwenna, “Zëno walasna in kareksa nol gwenan,” ahaksa, “Zëno walasna in hom bi zik mo ol san ang ta gwenan.” Kirekam de walas zik ëgwë gwenna, ki bëjen bi zemka Kristen zisi de nol gwibiridan hap dam tasin.

⁷ Kristen zisi de nol gwibin zini, zen dwan Alap mo nganak de syal gwe-gwen hapke. Zep zen diki zi mo nwenak de enho kles gwesin srëm naka de dam tasinkim. Zen zep anakare zisi bëjen dam tasibin:

bola-bola zi,

jal soson zi,

ho mamaksa de hole-hle gwe-gwibin zi,

darak soson zi,

hen te-alasa dikim gul irin hip de boton gwe-gwen zi.

⁸ Hwëna anakare naka emki teibirida gwen:

enlala tatetena,

enho lalakna,

enlala dam-damna,

dawem ensa de dwam gwe-gwibinni,

hen dawemkam de zëre mo gola kon zisi lup gulin gwen naka.

⁹ Nol gwen zini, zen diki eiwa de olsa zen dawemkam gwirensik gwen-nen men kirekam taiblibin hip dena tawa la gwibirinke. Zen dekam sa aha zisi eiwa desan dep titi da gwibir. Hen zini men zen ola insa baes nei gwibi'in, desa sa anakan

* 1:4 1:5-9 1Tim. 3:2-7

oto dasik gwibir, "Em kire nakone esyal he'an."

¹⁰ Sap angkam zini beyakam hliwen hap edwam gwe-gwe'an. Zen aha zisi zere mae mo totore olkam yasik da gwibi'in. Dawemkam Yahudi mo ausu nakore zi- men zen Yahudi srēm ēKristen gwen wenyā to mip blom tasibin hip titi da gwibi'inke.

¹¹ Kire zini zen zi beyasa kim totore olkam ahak-ahak da gwibi'insap zi, sap we, hen sap walas. Hwēna dekam zep hen zere mae mo tawa tabin karekna in hap telasa de golzimdin hip aberbe da gwibirin. Kire zini mip naka nen mat tasik gwibir-zimdin.

¹² Eiwa, lang tekna Kreta iwe de zini, zen karek-karek tanganna. Orep zere kore wal bongna ki, enlala blala. Zen man zere korena kip anakan ale gulku, "Kretak de zi ausuna an boton tamna, hen asang tamna, hen tembane ngalapngalapna- gwe makarena."

¹³ Zēno ola in, zen eiwa de tanganna. Zen in zep udobe naban em jalse gwibirida gwen- dekakim Yesus ensa de taibliblannak etal gwesik.

¹⁴ Zep Kretak de Kristen zini, zen bap zen angkam Yahudi mo epba ol kokung gul gwen san ang ta gwen. Sap dekam hwēna Alap mo ol tanganna man hli nul gwenan- zi mo totore titi tabin ol san dikim hwēna ang ta gwen hap.*

¹⁵ Sap enho lalak zini, zen banakare dawem maesa de okamanak hlaunnu, zen bejen hole gwibin. Kire zi hip okamanak awe hom tang- dekon de zen Alap mo nwenak ekun gwen hap denaye. Hwēna enho karek zi hip hen Kristussu de taibliblan srēm wenyā kip, banakare dawem maesa de hlaunnu, zen hwēna hole-hle enlala san dep li nul sone gwenan. Kire zini bejen banakare maena enlala lalakkam enlala gwibin, sap zēno mae mo

enlalana hēndep enho naban mes tangan ekawesik.*

¹⁶ Kire zini zen ek enkam anakan egu gwenan, "Ee mesē Alapsa tame tak." Hwēna zere mae mo kirekam- kirekam syal karekna in, dekon zep hwēna nwe-mase gwe-gwe'an- san de anakan de egu gwenna kiye, "Alap hom." Kire nol drak-drak zi jal-jala, zen toton banakan dep?- dawemsa de syal gwibin niye.*

2

Paulus kim Titussu anakan enlala soblakake, "A kirekam em dawem san dep titi ta gwibin."

¹ Hwēna Titus Bak, em eiwa de ol enkam em tawa ta gwibin. Bahem engka en mae golwet son. Zep a kirekam titi ta gwibir:

² Zi bong-bong hap, ol zim- zimsi em gol gwizimdin- zen dikim tingare zi mo nwenak anakarekam lowehe gwen hap:

enlala tatetekam,
enlala dam-dankam,
Kristussu de serkam taibliblankam,
ahasa de kwasang gwibirida
gwenkam,
hen kareksa de goltowe gwennak de
tatem ezauk gwenkam.

³ Bong-bong we wal hap, hen kirekam em ol zim-zimsi gol gwizimdin: Zēno mae mo lowe henna, zen diki Alapsa de betek gweblan zi mo lowehen naban zen apde nen. Zen bap zen ahasa tonsibirida gwen. Ho mamaksa bap zen hole gwe-gwibin. Zen diki ebong gwen srēm wenyāka dawem enna kim zen tawa ta gwibin.

⁴ Zen zep sa hwēna anakan tawa da gwibir, "A kirekam em zi wal okip kwasangna goltrei gwizimdin," hen "Walas omka a kirekam em kwasang gwibirida gwen."

⁵ Zen dekam sa hen anakare san dep titi da gwibir:
enlala tatetekam de gwē gwen hap
dena,

* **1:14 1:14** 1Tim. 4:7 * **1:15 1:15** Mat. 6:22-23; Luk. 11:34-36; 1Tim. 4:2 * **1:16 1:16** 2Tim. 3:5; 1Yoh. 1:6; 2:4

hen enho lalakkam de gwë gwen hap dena,
zëre mae mo golak de syal-syalkam syal ta gwen hap dena,
zi zemka de dawemkam betek gwe-gweblan hap dena,
hen tîngare zi hip de kwasangsa goltrei gwizimdin hip dena.

Kirekam de dawemkam lowehe gwenkam, dekam aha zi molya Kristus hup de ol dawemna anakan lamang nuk, "Desan de ang tankam, dekam zini karekkam lowehe gwenan."

⁶ Hen zise gwen srëm zini, desa hen enlala tatetekam dikim lowehe gwen hap em titi ta gwibin.

⁷ Titus, tîngare ere mo gwënsa em ërak makan zëbe mae hap anakan lone gwizimdin, "Kristen zini a kirekam mo lowehe gwenanye." Enlala dam-dam enkam tawa ta gwibir- anakare enlala naban, "Ëe totore olsa homë tawa tabi'in."*

⁸ Enlala blala ban em eiwa de enna kim tawa ta gwibin. Dekam nëno mae mo tawa tabinsi molya aha zi anakan hwa nulsuk gwek, "In karekna." Dekam nëno mae mo jal zini anakare hap sa hen ësa her gwe-gwer, "Zëno mae mo tawa tabinni banakan dep?- husus gwibin niye."*

⁹ Men zen zi mo tana ïltikïnnik ëbabu gwe-gwenan, zen diki zëre mae mo zi bina insa zen blikip gwesibirida gwen. Zen diki zen ëalp gwe-gwen- dekam de zi bina in sam gwesibirida gwen hap. Hen zen bap zen zëre mae mo zi bina insa ëk san tëhebiridahal gwen, *

¹⁰ hen bap zen sowë ta gwibin. Zen diki enlala dam-dam enkam zen lowehe gwen, hëndep zep sa

tîngare zini nenbirida gwer, "Kristen zi de ëbabu gwenna, zen taïblibiridan tanganna." Kirekam de zen lowehe gwenkam, dekam nëno mae mo Alap onakore ëngaya gwen hap de tawa tabinni sa tangan sam neisik gwibir.

Mae hap de ol: Alap mo kwasang-kwasangna, zen tîngare zisi de ngaya tabin hip dena.

¹¹ Zen diki Kristen zi mo lowe henna kirekam. Sap Alap mes zëre mo kwasang-kwasangna nëbe mae hap goltreizimki- tîngare zi aususa dikim ngaya tabin hip denaye.

¹² Zep aumwa hap de yaklanak an zen angkam lwa zahe'an, Alap mo kwasang-kwasangna in, zen zen nëno mae mo enhonak syal gwe-gwenan. Nen dekam zebe Alap mo dwam gwibin sin ëliwehe gwe'an. Auhu-kama hole-hlena dekam zebe tapbla ul gwenan, hen enlala tatetekam hen dam-dam enkam dekam zebe lowehe gwenan.

¹³ Sap nen angkam Bian Yesus mo lwa halzan yaklana insae kara ë gwebla'an- men dekam sa nësa de ngaya tabin hip de Zini Kristus zëre mo sërkam de ngatan naban okamanak golati gwe ine zalake. Sap Yesus Zen hen nëno mae mo Alap Teipsïnni.

¹⁴ Zen nësa dikim tîngare karek-karek nakon hïl tï sonebin hip Zënaka zerguku- hen nësa dikim enho nakon ngan tasibin hip. Sap Zen man dwam gweka- Zën dikim nësa enho nakon bi gwibiridan hap hen li ta sonebin hip, nen dikim syal-syalkam dawem ensa syal gwe-gwibin hip.*

* **2:7 2:7** 1Ptr. 5:3 * **2:8 2:8** 1Ptr. 2:15 * **2:9 2:9** Orep tangan zini hen aha zisi karekkam jap nul sonenda gwek. Zi de talalha hap zëre mo bon yalsa sul sonen srëmkam, desa man dahyo gwek- pasarak de hwëna aha zi hip te-ala hap lirak tabin hip. Zëno bon de sërkam yawal gwenkam, dekam we wal walas zeban dahyo gwek- desa de kitak lirak tabin hip. Men desa kirekam lirak da gwibik, zen dekam zep hwëna zi bina in mo tana ïltikïnnik ëbabu gwe-gwek. Dekam hom beyakam ëheya-hya gwe-gwek. Sap heya gwen naka de etan balk tankam, desa man damera gwek. Tana ïltikïnnik de ëbabu gwe-gwen zini, desa sap de lek-lek ta gwibin, ahaksa tamera gwen. Pemerinta hom kire hap jalse neibirida gwek. (Ef. 6:5-8; 1Tim. 6:1-2) * **2:14 2:14** Kel. 19:5; Ul. 4:20; 7:6; 14:2; 1Ptr. 2:9

¹⁵ Zep Titus Bak, tingan in dekam tonbirida gwe, hen desan de ang tan hap titi ta gwibir, hen udobe naban jalse gwibirida gwe. Em in Alap mo nganak de syal gwe-gwen zi, zep bap zen aha maena emsa enlala gwe-gweblan, "Ba hap de desa salblan hap."*

3

Kristen zi de kirekam lowehe gwen hap de ol:

¹ Ere mo tawa ta gwibin zini em enlala sobirida gwen- zen deka pmerinta mo mam-mam naka blikip neisibirida gwek, hen zen deka zeno mae mo olsa i-san i-san nei gwibik. Zen diki hohle gwen nik zen lowehe gwen- mam zi nik de banakare syal dawem hap gubiridannak depye.*

² Zen bap zen aha zisi lamang ta gwibin. Hen bap zen aha zi niban edarak gwe-gwen. Zen diki sae-sae enkam zen lowehe gwen- tingare zisi de blikip gwesibirida gwenkam.

³ Sap orep nena hen enlala joblotopna, hen Alap mo dwam gwibin sin home ang ta gwek. Hwena totore tawa tabin sine ang ta gwek. Nesa hen mes kirekam-kirekam dwam-dwam enlala en hulek. Nebon mae dekam enlala jal-jal en lwa gweka, hen nenaka de husus gwibiridan enlala en. Nen dekam zebe aha zi niban hwewekam nenaka husus eibirida gwek.*

⁴⁻⁷ Hwena nesa de ngaya tabin hip de Zini Alap dekam zep nebe mae hap golzimki-

dekam de zere mo enlala kae-kaesa hen kwasang-kwasangsa tame gun hup denaye,

Tane zemka in kim zer sonekake.

Nen sap home ba dawem maena syal eibik- dekam de nesa ngaya tabin hipye.

Hwena zere mo kwasang-kwasang en nakon ki nesa ngaya tabirki.

Dekam zep nesa karek-karek nakon ngan tasibirki.

Nen de desa sowe henkam nere mae mo lowe hennak eisbin hip,

Zen zep zere mo Enhona dawem en tangankam nebe mae hap hle ta sonezimki.

Zen Dekon zebe etan de jaha gwibiridan hap dena eis gwibirin.

Hendep dekam zebe aha zi makan eliwehe gwenan.*

Zep eiwa Alap mamkam nesa kwasang gwibiridaka,

zep kitak nesa de ngaya tabin hip de Zini Yesus onakon kirekam syal gwibirki-

nen dikim zere mo nwenak edakastin hip dena insaye.

Zen in zep esa hendep de lowehe gwen hap dena hla kul-

men kirekame Alapsa enlala zon tasiblin naban blol ebla'anke.

Sap nen an zeno hanan tabin walas.

⁸ Insa Alap mo kwasang hap dena ale gul, zen eiwa tanganna. Ee zebedwam gwe'an- em de dekam kitak dawem enkam tawa ta gwibin hip. Dekam Alapsa de taibliblan wanya enlala zon tasik gweblan naban sa dawem ensa de syal gwe-gwibin hip ealp gwe tine gwer. Kirekam de lwankam, tingare zini anakan sa eenlala gwe-gwer, "In airis," hen zen dekam sa zeno mae mo lowehen dawemna in san ang tal.

⁹ Hwena Yahudi mo epba olak de kokung gul zahe gwen hap de ol keisa-keisana emki langa gulsuk gwen- hen sap orep de auyan-aza mo bosemse hap dena, hen Musa mo epba jalse gwen ol hap de eilman gwe-gwen naye. Kire nakon de eol tetek gwe-gwenna, zen waba hap.

¹⁰ Zi de eno jematnak denaka zere osan dep de hlil irin hip titi ta gwibinni, emki sap jalse gweblanna dan soblan. Zen de dekam sal srem gwenkam, emki tingare Kristen zisi

* 2:15 2:15 1Tim. 4:12 * 3:1 3:1 Rom. 13:1-7; 1Ptr. 2:13-14 * 3:3 3:3 Ef. 2:1-2; 5:8; Kol. 2:13

* 3:4-7 3:4-7 Yoh. 3:3-7; 1Ptr. 1:3 * 3:10 3:10 Mat. 18:15-17; Rom. 16:17

gubiridan- zen de zini in han zersiri gwen srëm hap.*

¹¹ Sap ena tawana: Kirekam de zini, zëno mae mo enlala dawemna mes hom gweka. Zëre mae mo karek gol gwenna, zen dekon zebe dam lasik gwibirin, "Zen mes eiwa de orana hli dak."

Aumwa hap de ol:

¹² Ëe kimë eno weinak dep Artema'a zer sone'ak, ahaksa Tikiku'u, zen dekam em nabakam abon onak dep Nikopolisk hatazan. Sap ëe mesë hi ngëp tamle benkam de zëwe gwën hap kalang gwëk.

¹³ Hwëna zi darena an zëbonë suratna ansa gol sone'an, ahana pemerinta mo jalse gwen olsa de klis gul gwen zini Zenas Bak, ahana Apolos. In kon de etan song ënnak, emki dawem enkam mas gwizimdin- tahalha srëmkam deka song ëka.

¹⁴ Zen diki nëno mae mo jematnak de zini, kirekam zen lowehe gwen- dawemsa de goltrei gwizimdinkimye. Nen kirekam nen nëre mae mo Kristen bose walya ban hwë-hwëkam nëre mae mo tahalhana sul sone gwizimdin. Totoresa bap nen lowehe gwen.

¹⁵ Men zen awë aban mae lowehe gwenan tingan dawem ensa ep nol soneblal. Ano mae mo dawem gol sonenna ansa hen tonbirida- kitak men zen asa Kristus mo bose hap kwasang neibirida gwenanye.

Dikire Bian mo kwasang-kwasangna kitak ebon mae onak lwa gwëk.

Paulus mo surat Pilemon Bak hap

1-2 Ano dang tininak de syal bosena Pilemon Bak, * hen eno golak men zen Kristen zini etagal gwe-gwenan, hen nère mae mo somola Afia, hen Arkipus Bak- men zen hen Alap mo nganak syal gwe-gwendake: Suratna an ebe mae hap.

Kristus hup de jal hap de bwinak gwèn zini Paulus onakon, hen nère mae mo osona Timotius onakon:

3 Dawem! Nère mae mo Bian Alap ne Bian Kristus Yesus ne sa kwasang-kwasang zemka mamkam ebe mae hap ol gwizimdi. Hen nen zère nik mo taha terenak esa lowehe gwer.

4 Pilemon Bak, èe, Paulus, Alapsa de gu soneblan nakon kimè emsa enlala gwe-gweblanan, dekam ebon onakonè dawemsa golbla tine gwenan,

5 sap èe ama anakan emsa sal gweblanan: Em eiwa-eiwakame Bian Yesusu taiblibla'ara, hen tingare Alap mo hlil irin wenya ema kwasang gwibirida gwenda.

6 Sap nen mese Biansa de taibliblan nakon aha-en èka, zen in zebè Alapsa ebe hap hen anakan abe ta gwenan, "Bian, tingare dawemna mensa Kristus hun de zeraha-en gwen nakon hla kul gwenan, dikire hen Pilemon Bak kitak tame gul gwek."

7 Oso Bak, sap em mese Alap mo hlil irin wenya kip kwasangna goltrei gwizimki, zen dekon zebè isrip-srina hen tatetekam de gwèn hap dena eis gwibik. Tingare Kristen zini, zen hen ebon onakon enho misrim-srina neis gwibi'in.

8 Zen in zep, sap nen mese apdekam Kristus hun èraha-en gweka, zep èe amaka emsa anakan titi ta'an, "A kirekam syal gwe."

9 Hwèna èe homè kirekam emsa gwèbla'an. Hwèna ama sap'nen emsa abe ta'an, "Asa de kwasang gweblankam, em wèhè ano dwam gwibin sin ang gwe'anika?" Sap èe an zi bogol, hen Yesus hup de jal habè jalom èk tihinak awe gwè gwe'an.

10 Zebè emsa Onesimus Bak hap denaka angkam gu sonebla'an. Zen mes bwinak awe de asa mas gwe-gweblankam gwèka- san de ano tane tangan. Zep bahem tol karek tan.

11 Menkam nen emaka bosa laka, "Waba Hap Bak" kam, sap zen dekam asang naban ebon babu gwe-gweka. Hwèna angkam esa en gwèblala, "Syal-syal tanganna." †

12 Zep ama angkam ano dang tininak de walasna ansa etan ebon osan dep zer sone'an.

13 Èe ama sap awe de zergwè gwen hap dwam gwèblak- zen de eno weinak asa mas gwe-gweblan hap, èe kimè nama èngaya gwen hap de ol dawem gol halada gwen jal hap bwinak awe gwè gwe'anke.

* **1:1-2 1:1-2** Pilemon Bak zen Kristen zi mo aha mamna- èna Kolose mo langnak dena. Zère mo èna, san ha Laodikia. Hen zèwe de Kristen zini zèno golak tagal gwe-gwek. Zèno te-alana mes yap beya gwèblaka, sap zen zisi bi gwibirida gwèka- dekam men kirekam te-alakam lup nul gwèkke. (Emki hen 1Tim. 6:1 mo otde alenak hlaun.) Paulus kim langna iwe amjanbirki, zen mes Pilemon mo golak gwè gwèka. Hwèna dekam Pilemon hon de babu gwen zini Onesimus man yap Paulus mo olsa sane gwe-gwèka. Zao kim lwa se'ak, Paulusu dekam zep Kristus hup de jal hap Romak de bwinak se dyaink. Hwèna Onesimus dekam hen Pilemonsa de babu gwèblan nakon heya gwèka. Nen home angkam tame u'in, "Onesimus banakan Paulusu etan zertoweka." Hwèna zen man eiwa zertoweka, hen bwinak man Paulusu mas gwe-gwèblaka. Suratna ansa Paulus Pilemon hap ale gulbluka- deban de Onesimu'u etan zèbon osan dep anakare ola ban zer sonen hap, "Bahem Onesimu'u karek tan, sap zen mes angkam Kristen gwèka, hen asa dawemkam mas gwe-gwèblaka." Sap dekam, babu gwen zi de heya gwenna, sèrkam karek da gwibik. † **1:11 1:11** Onesimus Bak mo bosena enlala naban. Enlalana "syal-syal tanganna." Hwèna nonol mes heya gwèka, zen in zep Paulus weha olkam bosa taka "Waba Hap Bak" kamyè.

14 Hwëna em de asa kirekam gublun srëmkam bëjënë. Diki dawemna- em de asa de kwasang gweblan nakon gublunkam bap, "Amki zergwë gwe." Hwëna menkam ëe emsa de sowë tan makanë zergwë gwëk- kimë emsa tawa ta srëm gwe'akye.

15 San ha Alap kirekam mes yap emsa dwam gwizimki, "Dikire nongka sya këk. Hwëna kim de etan gaïng ë'anaka, dekam molya sya këka."

16 Hwëna zen angkam emsa de babu gweblan en hap de zisi hom. Kirekam de gwën nakon zen mes tangan esek gwe seka. Sap zen angkam nëno nik mo dang tïnïnak de oso. Hwëna dawemkam eno tangan mo dena, sap zen ebon de babu gwen zi. Hwëna angkam Yesussu de taïbliblan nakon zen mes tangan gwëra- san de nëno nik mo oso tanganna kiye.

17 Zen in zep, em de asa enlala gweblankam, "Zen ano Kristen bose," ki Onesimu'u etan zerin- san de ënaka de zer irinni kiye.

18 Zen de orep banakare maekam emsa karek tanna, ahaksa eno kirekiresa de ahan gonna, zen hwëna ëe asa ep te-alana golblal.

19 Suratna an mo aumwa hap de alena an ëre mo tahakamë ep ale gulblu'an: † Èe an Paulus, ëe asa kitak te-alakam sul soner. Hwëna sap diki amaka emsa enlala sobla'an, "Diki em emaka ano dwam gwibin sin totoresa ang gwe'ara, sap ëe hëndep de gwën hap denakaë emsa tawa tak."

20 Zen in zep, Oso Bak, sap nen mese Kristus hun ëraha-en gwëka, ëe ama emsa ano ol san de ang gwen hap abe ta'an. Em dekam esa ano enhona ap mïsrïm-srï tablala.

21 Pilemon Bak, ëe kimë suratna ansa de ep ale gul soneblan hap enlala gwe'ak, ëe mesë hen dekam emsa anakan taïbliblak, "Zen molya ano abe tan en san zer inki. Hwëna

zen sa hen etan zëre mo enlalakam sërkam kwasang gweblala."

22 Hen ere mo gol teksonna ahana ap hohle ta gublu. Sap ëe ama Alapsa anakan blol gwebla'an, "Zen man tingare aya-wal oso-walya eno mae mo abena sal gwe'ara. Zep Zen sa etan bwina an kon ebon mae osan dep asa zerwet sola."

23 Epafras Bak, men debanë Kristus hup de jal hap bwïnak awe ë'an, zen dawem ensa ep gol soneblaka.

24 Hen kirekam- ano syal bose walya, Markus, Aristarkus, Demas, hen Lukas. Zen hen dawem ensa ep nol soneblak.

25 Dikire Bian Kristus Yesus onakore kwasang-kwasangna eno mae mo enhonak lwa gwëk.

† 1:19 1:19 Suratna an aha zi Paulus mo olsa ale gulku. Hwëna aumwa topnak de ola an, desa Paulus zën ale gulku.

Surat Ibrani*

Mae hap de ol: Alap mes zère mo Tanena zer sone zaka- nésa de dam tangankam tonbiridazan hap.

¹ Orep nëno mae mo auyan-aza hap, Alap etan-etankam zère mo ol ayang gul gwen zi hip ola gol gwizimki- dekam de titi ta gwibin hip hen jalse gwibirida gwen hap.

² Hwëna angkam okamana an mo aumwa hap de yaklanak an zen ki lwa zahe'an, Alap mes zère mo Tanena zer sone zaka- nésa de dam tangankam tonbiridazan hap. Alap ngli naban okama naban kitak Tane zem in mo taha san yang sosuku, hen Bi zem in mes ki anakan gubluka, "Èe asa kitak ebe hap golblal."

³ Nen Alap mo ngatan zi mo lang nakore ngatanna tingan Zëbon onakone dam ulsuk gwenan. Tane zem in hen Alap- men kirekam hen Bi zem Alap. Tane zem in mo ola sosen tanganna, zep zère mo olgun enkam tingare zère mo syal gwibinni insa irik gil gwenda. Zen de irik gin srëmkam maka sekwak gwe-gwenan. Zen kim nëno mae mo kareksa de ngan gulsuzimdin hip tilki, dekam zep ngatan zi mo lang san dep sewe seka- Teipsin Tangan Zini Alap mo dam taha nakon dikim nikirin hip. Zen dekon zep kitak angkam irik gi'ira.

* : 1:1 Ol tatakna an, angkam anakare dam gulsunnu hom, "Zen ale gulku." Men zen ale gulku zère mo bosena hom kira gulku. Orep ahakon man kil nil gwëk, "Paulus ale gulku." Hwëna angkam man enlala nei gwibirin, "An aha zi mes yap ale gulku." Sap zini men zen ale gulku, zëno srip gulsunnu srën tangan- Paulus Bak mo ol ale gun nukonye. Angkam ahakon man enlala nei gwibi'in, "San ha Apolos Bak ale gulku." (Kis. 18:24-28; 1Kor. 3:1-9) Ahaksa aha zi mes yap ale gulku- men zen hen Timotius Bak han song ë gwëkake. (Ibr. 13:23) Men zëbe mae hap suratna ansa ale gulzimki, zen Yahudi zini men zen ëKristen gwëkke. Suratna an mo bosena "Ibrani" kam nen gwibirin. "Ibrani," zen Yahudi zi ausu mo aha bosa, hen zi ausuna in Ibrani olkam don gwibirin. Hwëna men zen ale gulku, zen hom Ibrani olkam suratna ansa ale gulku. Zen hwëna Yunani olkam ale gulku. Mae hap hwëna suratna ansa "Ibrani" kam bosa nuk: Sap men zen ale gulku, Yahudi zi mo kirekam de Alapsa betek gwëblanna beyakam srip gulsuku. Zen mae hap ki srip gulsuzimki: Dekam de Kristen zi anakan dam gulsuk gwen hap, "Insa orep Yahudi zini tame gun srëmkam syal nei gwibik, hwëna angkam Yesus nëbe mae hap kitak sul sone gwizim'ira." Hen suratna an- dekam de nen Yesusu enlala gwe-gwëblan hap, "Zen eiwa teipsin tanganna." * 1:5 1:5 Mzm. 2:7; 2Sam. 7:14; 1Taw. 17:13 * 1:6 1:6 Mzm. 97:7

Mae hap de ol: Alap mo Tanena in, Zen kitak de Alap mo dam taha nakore zi nikon teipsin tanganna.

⁴ Tane zemka in zao drë neka, zère mo dam taha nakore zini dekon otde tangannak lowe he'an. Hen bosa teipsinni mensa zëbe hap golblaka, dekon zep Alap mo dam taha nakore zini in kitak blikip neisik gwëblanan. Sap zëno mae mo bosa-sena hom kire teipsin niye.

⁵ Sap men kirekam Yesusu gubluka, "Em in ano Tane," zère mo dam taha nakore zini desa hom kirekam gubiridaka. Sap Alap man Yesusu gubluka,

"Em in ano Tane,
Èe mesë namen damnak Ènaka
anakan kira tanan, 'Èe an eno
Bian.'"

Dekam zep etan Alap gubiridaka,

"Zen in eiwa ano Tane.

Tingare zini zep sa blikip neisik
gwëblal."*

⁶ Hen Alap kim Tane Tangan zem insa auhu-kama zi hip zertreizimki, Zen dekam zep zère mo dam taha nakore zini gubiridaka,

"Em kitak boklesa kom la gwëblak."*

⁷ Hwëna Alap kim zère mo dam taha nakore zi hip dena srip gulsuku, Zen anakan gubiridaka,

"Èe ère mo dam taha nakore zini asese habë li yul sonenda gwënan-

dekam de aha lang san ano syalsa
nabakam golada gwen hap.

Hen syauk hitin hibë li yul sonenda
gwenan-
dekam de zisi halen ta gwibin hip
ahaksa karek ta gwibin hip.”*
Zep Alap zëre mo dam taha nakore
zini in man Yesus onakon êlwala
he'an.

⁸ Hwëna Tane Tangan zemka Alap
man hwëna gu-gubluka,
“Em in hen Alap. Em hëndep dena-
ban esa irik gili.

Eno irik ginni sa soson gwer, sap Em
zisi dam-dam enkame klis gul
gwenda.

⁹ Em dam-damkam de gwën zi mo
syala desa ema sam gwesik
gwibirida.

Karekkam de gwën zi mo syala desa
ema husus gwe-gwibirida.

Zen in zebë ere mo Alapna Èe
eno bosena teip gulsubluk-
tingare ere mo wal bose wal
onakonye.

Zep sa tingare zini eno bosena isrip-
sri nei gwibir.”*

¹⁰ Zep Yesus eiwa teipsin tan-
ganna- Alap mo dam taha nakore zi
nikonye. Zep Desa en Alap anakan
gubluka,

“Em in hen Bian. Nonol lonesen
nakon zebe ere mo tahakam
okamana ansa moko gulku,
hen nglina ere mo tahakame yang
tasiki.

¹¹ Nglï naban okama naban sa jek-
jak nër.

Hwëna Ena hëndep denaban esa
gwë gwera.

Nglï naban okama naban pakean mo
kim sa kwang nër

¹² hen ohlong nër.

Zen dekam esa hiri son hap lak sola.
Hwëna Ena molye wet gwesik
gweka,

hëndep bogol gwen srëmkam esa
hëndep denaban gwë gw-
era.”*

¹³ Hen Alap hom zëre mo dam taha
nakore zini aha-en mae gubluka-
men kirekam zëre mo Tane Tan-
ganna Yesussu gublukaye,

“Em ano dam taha nakon nikiran-
dekon de hen teipsinkim irik gin
hip.

Ki asa hwëna ebe hap de jal zini
ere mo tana iltikinnik sisik
gulin.”*

¹⁴ Hwëna Alap zëre mo dam taha
nakore zini insa kirekam bëjen dam
taha nakon de teinikiran hip gubiri-
dan. Zen hwëna zëre mo syal ensa
de gol gwen hap, hen desa man
nësa de mas gwibirida gwen hap
gubirida gwenda- nen men zene
dekam de ëngaya gwen hap dena
ulin gwenanke.

2

*Mae hap de ol: Alap mensa nër
hom ëngaya gwen hap dena nöp
golzimki, desa bap nen asyas makan
enlala gwibin.*

¹ Zen in zep, Yesus onakore ola
insa nër hom dokwak uk, nen
dawem enkam nen i-san i-san gwe-
gwibin. Kire srëmkam ki sap de ora
san esa ëgwahal.

² Sap orep Musa Bak hap Alap
onakore titi tabin ola zëre mo dam
taha nakore zi ayang nul gweblak,
zen zep hwëna ahakorena kip ayang
gul gwizimki. Zen Alap zëre onakon
hom mwin-mwankam gulin gweka.
Zëre mo dam taha nakore zi nikon
gulin gweka. Sap kirekam, hwëna
zen hen eiwa de tangaranna. Hen
men zen desan ang ta srëm gwe-
gwek hen nol drak-drak nei gwibik,
desa ki Alap karek ta gwibirki.

³ Hwëna Yesus, Zen Alap mo dam
taha nakore zi nikon teipsinni. Zen
in zep, angkam de wenya nësa
dawemkam tangan sa karek tabiri-
nen de ëngaya gwen hap de zëre
mo ol ësenana ansa asyas makan
gweibinkimye. Sap Bian Yesus Zën
nonol gol haladaka, hen men zen
nonol ësane gwe-gwek, zen mes
nëbe mae hap eiwa nul gwizimk.

⁴ Alap Zëna hen mes zëno mae
mo ola insa eiwa de gulzimki- Zen

* 1:7 1:7 Mzm. 104:4 * 1:9 1:9 Mzm. 45:7-8
110:1

* 1:12 1:12 Mzm. 102:25-27 * 1:13 1:13 Mzm.

kim kirekam-kirekam owasna gol gwizimki, hen zère mo Enho nakore sosonna kim zère mo dwam gwibin sin zi hip ing ta sone gwizimkiye.

Mae hap de ol: Yesus kire hap zi tangankam hata zaka.

⁵ Hen Alap hom zère mo dam taha nakore zini dam tasibirki- zen de okama esena insa irik gin hipye, in zep denaka angkam lonbi'inye. Hwëna Zen diki Tane zik sa okama esena insa irik gili.

⁶ Hen zini nèbe mae hap dena Alap mo olak man lwak, aha zini kim anakan Alapsa gublukaye, "Bian, Em ba habe zi tanganna asa nwekam golëake gwenda?

Hen Adam Bak mo auyan-aza tane walya asa ba habe kwasang gwibirida gwenda?

Sap ëe an otde tangannak denakake, hwëna Em mese ano mae mo bosena esek gul sezimki.

⁷ Sap angkam an kimë okamanak awe lowe he'an, ano mae mo bosem-sena betekna- ere mo dam taha nakore zi nikonye. Hwëna Em mese abe mae hap teipsinkim de lowehen hap de bosena hamal gulzimki.

Dekam hwëna ëe asa ere mo dam taha kore wanya insa leipsibiridal,

⁸ hen tingare kirekam-kirekamna ëe asa bi eibir."*

Alap mo ola insa anakan lwak, "tingare kirekam-kirekam"sa de zini nen bi gwibin hip, enlalana aha-en mae molya lwa kinik. Zep zère mo dam taha nakore zini zao hen biti gwe'an- nen de lamkam bi gwibiridannak. Hwëna nëno mae mo kirekam de irik gin hip denak hom am angkam zau'un.

⁹ Diki Yesus en angkam kirekam bi gwibirida'ara. Zen kim menkam okamanak gwëka, dekam zëno bosena hen "betekna Alap mo dam taha nakore zi nikon"- nen an kiye. Hwëna Zen mes nèbe mae hap karekkam tilki. Zen in zep Alap

zëbe hap bose dawemna golblaka, hëndep angkam zep Zen kitak teipsibirida'ara. Alap eiwa man nësa sërkam kwasang gwibiridaka, zep Tane zemka zer soneka- Zen de nèbe mae hap okamanak awe tin hipye.

¹⁰ Alap Zën kitak bi gwibi'ira, hen zère mo sosonkam kitak jowek. Zen in zep Alap hap man tangan dakastilbli'an- Zen de walas beya gwen hap, hen walasna insa de Zën zère mo ngatannak golëlowehe gwen hapye. Hwëna Yesus Zen Zen-walasna insa de zon guludan hap de Zi niye. Zen zep Yesus hup dakastilblik- Zen de walasna in hap kareksa goltowen hap denaye. Zen zep Alap zère mo Yesus hup de dwam gwibir-blinna sul soneblaka- kim karek yala insa de goltowennak nwe enkam kara takaye.

¹¹ Zen in zep angkam nwe-mase gwe'an, Tane zem Yesus Zëna, hen Zen men desa karek-karek nakon aha-rok'nen ngan tasibirki, zëno mae mo Bianna aha-en. Zen in zep Yesus hom nësa saher gwibirida'ara- anakan de gubiridan hapye, "Zen ano oso wal."

¹² Sap Alap mo olak Yesus "oso wal" kam nësa gubiridaka- kim Alapsa hamal hap anakan gublukaye,

"Bian, ëre mo oso walya ban de golëyaing gwe zannak

Ëe asa eno bose dawemna zëno mae mo inik teip gulsuk gwer.

Ëe asa dekam Emsa tërya ban apdenak zisrip-sri gwe-gweblal."*

¹³ Yesus hen man Alap mo ëpba olak hamal hap guku,

"Ëe asa Bian ensa blol gweblal."

Zëwe hen man nèbe mae hap dena Alapsa hamal hap gubluka,

"Ëe ama angkam, walasna mensa Ena abe hap kap gulbluka, deban mae golëyaing gwe'an."*

¹⁴ Mensa "walas" kam gubiridaka, zen kala bare tim nibare wanya

* 2:8 2:8 Mzm. 8:5-7 * 2:12 2:12 Mzm. 22:23

* 2:13 2:13 Yes. 8:17-18

nësa ki gubiridaka. Zep Yesus zëre hap hen man tangan dakastik-kala bare tim niban de hen hata zankamye. Zen in zep tïn hip de tim niban golhata zaka- dekam de dowal mo kigî mo sosonsa juwe gwen hap denaka timbwas gulblun hap.

¹⁵ Hen Zen mae hap kirekam syal gwibirki: Dekam de gwiswe sonen hap, tingan men zen tïn hip ëairî gwenanye. Sap zini nen menkam nêre mae mo gwën holona men kiye dekam tïnsî ema airî gwibik. Hwëna angkam Zen mes nësa tïn hip de airînnî in kon gwiswe sonoka.

¹⁶ Zep man tangan dam gwesinîn: Yesus kim tilki, Zen Alap mo dam taha nakore zisi hom mas gwibiridaka. Zen hwëna Abraham mo auyan-tane walya nësa mas gwibiridaka.

¹⁷ Zen zep tangan zëbe hap dakastilblik- zi timkim de hatazan hap denaye, an kire tim niban oso wal zem nen lowe he'anye. Zen zep nêbe mae hap nwe-mase gwe'arasan de Alap mo golak de syal ta gwen zi mo teipsinnî, Zen de nësa Alap osan dep mas gwibirida gwen hap. Hwëna Zen orep de Alap mo golak de syal tan zi mo kim hom sapi kalkam nëno mae mo karek-karekna ngan gulsuku. Zen hwëna zëre mo kalkam ngan gulsuku. In zep Yesus zi timkim hata zaka, hen nen zebe anakan tame lak, "Zen eiwa taibliblan tanganna hen kwasang-kwasangna."

¹⁸ Sap Zëna hen nëno mae mo kim karekna goltowe gweka, hen man sap kareksa de gon hap de enlalana hata gweblaka. Zen in zep sosen srëm zini nëno mae mo lowe hensame gul gwe'ara- nen kime sap kareksa de gon hap ëalp gwesik gwenan. Zep nen kime abe la gwenan, Zen dekam zep enlala tatetena

nêbe mae hap zer gwizimnira.

3

Mae hap de ol: Alap mo Tanena in, Zen Musa Bak onakon teipsin tanganna.

¹ Zen in zep, aya-wal oso-wal, sap nësa mes Alap hlil inki- zëre onak de enho lalak enkam lowehe gwen hapye, zep nen dawem enkam Yesusu tame tan. Sap nen ema zëbe hap dena damnak anakan ëgu gwe'an, "Zen Alap zer sonoka, hen nêbe mae hap Zen mes nwe-mase gweka- Alap mo golak de syal tan zi mo Teipsin Tanganna."

² Sap Zen Alap zëre mo taibliblan tanganna, zen zep Alap syala in hap dam tasiki- men kirekam hen orep Musa Baksa taibliblakake, zen de Alap zëre mo nga yala Israelsa syal gwe-gweblan hap.

³⁻⁶ Zep teipsinnî nonol sap Alap Zën, zao Yesus, zao Musa. 4Hwëna men zen tangan kitak bi gwibi'ira, Zen Alap Zën. Zen Zen nga yala insa bi gwebla'ara, hen kama bi tanganna Zen. 5Musa Bak zen hwëna Bi Tangan Zini in hon de syal gwe-gwen zi. Zen hen taibliblan tanganna, zep dawemkam Alap zëre mo dwam gwibin sin zëre mo ngana insa syal gweblaka. Hen zëre mo syala kon ngein sin dep dena anakan goltrei gwizimki, "Abon onakore teipsin zini sa hata zala."* 3bZep Yesus, Zen Musa onakon teipsin tangaranna, 3a,6asap Zen bi tangan Zini in mo Walas tangan, hen Alap mes Desa Zen de hëndep denaban ngana insa kara ta gwen hap taibliblaka. 6bZep nen an eiwa Kristus mo nganen de airin srëmkam Zëbon en anakarekam ëblol gwe-gwenkamye, "Zen sa kitak nêbe mae hap syal gwe-gwibir-zimdi."*

* **3:3-6 3:5** Ul. 18:15-19 * **3:3-6 3:6b** Men zen suratna ansa syal gwibirki, zen "nga" hap awe "gol" kam ale gulku. Zen kim "golsa de syal gwibin" hip ale gulku, zëno enlalana sap Alap mo hlil irin zini Israelsa de syal gwibin hip. Hwëna Orya olkam, Israelsa bëjen golkam enlala gwibiridan, hen bëjen zisi gol makan taun, zep "ngasa de syal gweblan" kam li nul sonok.

Mae hap de ol: Bap nen Alapsa de taibliblanna baes tan.

⁷ Zen zep Alap mo Enhona nesa gubirida'ara,

"Namen de yaklanak Alap zere mo olsa em i-san i-san gwe-gwibin.

⁸ Bahem ere mae mo auyan-aza mo kim enol drak-drak gwe-gwen-

zen men kirekam sasa lang nakon Abon onakon de te so gwen hap easas gwe-gwekke.

Zen dekam zep anakarekam Asa nakasik gweblak, 'Alap wehe nesa karek tabi'inka?'

⁹ Eno mae mo auyan-azana sap mes hla nul gwek-

owas-owasna mensae empat-pulu tahunkam syal gwe-gwibir-zimkye.

Hwena zen nama dekam Asa kareksa de gulin halasen gwenkam nakasik gweblak.

¹⁰ Zen in zebë tangan hendep blalen gwibiridak,

zebë anakan gubiridak, 'Zen molya etan Abon osan dep lwanda halzak,

sap Asa de i-san i-san gweblanna mes tangan baes tak.'

¹¹ Zen in zebë desa jala ban anakan gu-gubiridak,

'Mensa langna zao de golëteinikirin hip gu-gubirida guk,

zen hwena toton molya zë yaing gwek.' **

¹² Zen in zep, aya-wal oso-wal, dawem! Bap nen Israel mo kim egwën. Em ema ahakore nik Ngaya Zini Alapsa hli lanank- dekam de ere mae mo enho karek lam tan san ang tan hap. Ki hwena dekam esa Zënaka de taibliblan nakon ebutehal gwer.

¹³ Zep emsa de ahanaka karek ora san dep yasik tan srëm hap, emki enaka yakla jamkam titi ta gwibin. Sap Alap mo olak men anakan lwak:

"Namen de yaklanak Alap zere mo olsa em i-san i-san gwe-gwibin."

"Namen de yakla" kam mensa guku, zëno enlalana, nen de yakla jamkam nënaka titi ta gwibin hip. Sap kire srëmkam, ki nère mae mo karekna in zen sa nëp dërek gwe-gwizim, hëndep zen sa nesa al tasibir. Zep esa hëndep enol drak-drak gwer, hëndep dekam esa Alapsa langa lasil.

¹⁴ Hwena nëne Alapsa de taibliblannak tatem ezauk gwe'ak, men kire enkam nonol lone sennak laibliblakke, nen dekam esa aumwa hap de yaklanak, mensa Kristus nëbe mae hap hamal gulzimki, desa kitak ulin.

¹⁵ Zep nen bap nen Alap mo ola insa eititi gwe-gwibin- men zen anakan lwakye,

"Namen de yaklanak Alap zere mo olsa em i-san i-san gwe-gwibin.

Bahem ere mae mo auyan-aza mo kim enol drak-drak gwe-gwen-

zen men kirekam Abon onakon de te so gwen hap easas gwe-gwekye."*

¹⁶ Zen kirekam banakare zi? Zen sap dwan zere mae mo ikim am Alap mo ola esane gwe-gwek! Zen hwena ba hap etan zere onakon de wet so gwen hap easas gwe-gwek? Zen men sap Musa Bak Mesir kon gwiswe soneka!

¹⁷ Hen zen banakare zisi Alap empat-pulu tahun enkam jal gwibirida gweka? Zen sap Israel mo auyan-azana- men zen karekna nulin halasen gwekke. Hëndep zep zere mae mo tok-tokna hli nulida song gwek- sasa lang san kim sek gwe song gwe'an zakye.

¹⁸ Hen zen banakare zisi Alap anakan gu-gubiridaka?-

"Mensa langna zao de golëteinikirin hip gu-gubirida guk,

zen hwena toton molya zë yaing gwek."*

Zen men zen Alapsa de taibliblan hap baes takke.

* 3:11 3:11 Mzm. 95:7-11 * 3:15 3:15 Mzm. 95:7-8 * 3:18 3:18 Mzm. 95:11

¹⁹ Zep angkam mes tangan dam gwesinin: Zen mae hap Alap mo golëteinikirin langnak yaïng gwe srëm gwek: Sap zen hom Zënaka daïblihlak.

4

¹ Zen in zep, sap Alap molya zëre mo ol gu-gunnu insa eititi gwibirki, zëre mo olsa de i-san i-san gwe-gwibin wenya, zen zen en sa zëre mo golëteinikirin langnak yaïng gwer. In zep nen ki ëngalap gwe-gwen- anakare hap, "Nëbon mae onakon bap zen aha maena zëwe hata srëm gwen."

² Sap Alap onakore ol dawemna nëbon mae onak mes hatakmen kirekam hen orep Israel hon hatakke. Hwëna zëbon mae waba tangan hap lwak, sap zen hom daïlibik.

³ Hwëna nen an zen angkam laïbli' in, nen mesë Bian mo hamal gun langna iwe de yaïng gwen hap dena ulink. Hwëna men zen daïlibir srëm gwek, desa man Alap gubiridaka,

"Èe mesë nol drak-drak wenya insa jala ban gu-gubiridak,
'Mensa langna zao de golëteinikirin hip gu-gubirida guk,
zen hwëna toton molya zë yaïng gwek.' "*"

Hwëna Alap Zën de zi niban golëteinikirin hip dena insa mes sap auhu-kamana an mo nonol lonesen nakon nëbe mae hap hamal gul guzimki.

⁴ Nen ema anakan dam ulsu'un, "Langna insa nëbe mae hap mes hamal gul guzimki," sap Alap mo olak man lwak,

"Yaklana tujuna, Alap dekam syala golzausuku, sap Zen mes dekam kitak sul soneka."*

⁵ Zep langna in angkam sul sonen nik lwa'an, sap hyanak Alap dekam zep Israel mo ayan-azana insa gubiridaka- men kirekamë gulk kon ale gulye, "Zen toton molya zë yaïng

gwek." Sap sul sone nik de lwan srëmkam, ki molya Alap kirekam gubiridananam.

⁶ Zep angkam de zini nëbe mae hap Alap Zën de golëteinikirin langnak de yaïng gwen hap dena nama lwazim'in. Hwëna men zen sap nonol ol dawemna insa ësane gwe-gwek, zen mae hap zë yaïng gwe srëm gwek: Sap zen man Alapsa de taïliblan hap baes tak.

⁷ Zen in zep tahunna kim beya tangankam altisik song gwek, dekam zep Alap aha yaklana dam tasiki- dekam de Zën de zi niban golëteinikirin langnak yaïng gwen hap denaye. Yaklana insa man ayatna inkam "namen de yakla" kam gubluka. Zen ayatna mensa Daud Bak anakan ale gulkuke,

"Namen de yaklanak Alap zëre mo olsa em i-san i-san gwe-gwibin.

Bahem auyan-aza uk mo kim ënol drak-drak gwe-gwen."*

⁸ Zi niban de golëteinikirin langna insa Alap enlala gwibi'ira, zen Yosua Bak men desan dep Israel mo ayan-azana golësek gwekake, desa hom enlala gwibirki. Daud Bak kim Alap mo ola insa ale gulku, dekam Israelk de zini orep mes langna zëwe yaïng gwezak. Sap zao de eiwa golëteinikirinkim, ki molya Alap etan aha yaklanak de aha langnak golëteinikirin hip gubiridananam.

⁹ Zep Alap zëre mo hlil irin zini nësa nama Zën de golëteinikirin hip gubirida gwe'ara- nen dikim nëre mae mo syalsa golzausun hupye, men kirekam hen Alap Zëna yaklana tujunak syala golzausukuke.

¹⁰ Sap mensa Alap golëteinikin'ira, zen zëre mae mo syala golzausunkum- men kirekam Zëna hen golzausukuye.

* 4:3 4:3 Mzm. 95:11; Ibr. 3:11 * 4:4 4:4 Kej. 2:2 * 4:7 4:7 Mzm. 95:7-8

*

11 Zen in zep, nen dawemkam äalp gwe-gwen- ekakim Alap han apdekam ërnink. Mana nëbon mae onakon aha mae nik zëwe hata srëm gwenanka- men kirekam orep Israel mo auyan-azana ëgwë gwekke. Sap zen man Alapsa de taïbliBlan hap baes tak.

12 Zep nen bap nen Alap mo ola in sa tim gun, "Zen asyas." Sap Alap mo ola, zen nëno mae mo enhonak man tangan sosen gwe-gwenan. Zen zep nwe-mase gwe-gwenan- san de ngayana. Hen Alap mo ola san de nëbok eihya-ngï eihya-ngï ben-benna kiye. Zen zep nëbon mae olk en san tïsik gwenan, hëndep dan gaïng nënnak hata gwenan. Dekam zep nëno mae mo enlalana hen hole-hlena enhonak anakan kles so gwenan, "An zen Alap mo dwam gwibinni. An Alap mo dwam gwibin srëmna."

13 Zep man tangan dam gwesinïn: Alap mo nwenak zëre mo yang tabin weny a nen toton banakan molye ëani-ning gwek. Sap zëbe hap tïngan talusun nik ërlwa'an. Zep lamkam nen kire Alap hap esa nëre mae mo lowe henna kïtak oltrëblal.

Mae hap de ol: Yesus Zen Zen nëbe mae hap Alap mo golak teipsin kim syal gwe'ara.

14 Zep Alap mo Tanena Yesus Zen mes nësa ngatan zi mo lang san dep ngeir gubiridaka- Alap zëre osan dep. Men kirekam orep Alap mo golak de syal tan zini Israelsa Alap

* **4:10 4:10** Syalsa de golzausun hup dena mensa ayat 9-10nak enlala gwibirki, zen tïnkim de auhu-kamanak de syalsa hli yun en hap denaka hom. Hwëna zëno enlalana, nen de nama okamanak lowe hennak de anakan eisbin hip, "Ano syala mes tap gwenan." Men kirekam Efesus 2:6nak lwa'an, nen Yesusu de taïbliBlan weny a nen angkam Alap han apdekame ngatan zi mo langnak ërnin'in. Zep nen auhu-kamanak awe home etan syalsa de gon hap ëdwam gwe'an-dekam de Bian mo nwenak ëdakastïn hipye. Sap nen mese ëdakastik- in kim laïbliBlakke. Zep nen angkam san de syal srëm kam de teinikirinni kiye. Kristen zini nëbe mae hap Yesus mes syala sul soneka- nen dikim Alap mo nwenak ëdakastïn hip denaye. Hwëna eiwakam de taïbliBlanna zen hen goltrënkam, sap nen Alap hap de syala isrip-sri habe ol gwenan. (Yak. 2:14-26) * **4:16 4:16** Ibr. 10:19-20 * **5:1 5:1** Suratna ansa kim ale gulku, dekam nama Musa mo tïti tabin ola syal nei gwibik- Yerusalemk de Alap mo golakye. Zep "dam dasik gwenan" kam suratnak awe ale gulku. Alap mo gola in sa tahun tuju-pulukam Roma mo jana nabare zini dri nuk, zep hëndep dekam Alap mo golak de syala nolzausuk- hëndep angkam. Zep men zen suratna ansa ale gulku, san ha tahun 60 maekam mes yap ale gulku.

hon dep zon nulida gwek, Yesus hen kirekam angkam nësa zon guluda gwe'ara. Zen Zen tangan angkam- Alap mo golak de nëno mae mo Teipsin niye. Zen in zep nen Desa en de taïbliBlan ennak tatem ëzauk gwen. Bap nen zabe gweblan.

15 Sap Zen man nëno mae mo lowe henna kïtak anakan hlau gwizimnira, "Zen an dekon sin gwe hana'ara. Zen wakin dekon sin gwe hana'ara." Zen zep nësa dawemkam kwasang gwibirida gwenda, sap zëre hon hen ki sap kareksa de gon hap de enlalana hata gweblaka- men kiye hen nen. Hwëna Zen hom mae karekna golka.

16 Hwëna nen mese angkam De-ban ërdokot gwer! Zep nen kime Alapsa abe la gwenan, nen dekame damkam nëre mae mo abena Alap hap yaïng il gweblanan- Yesus in zëwe angkam nëbe mae hap syal gwe-gwe'araye. Zep nen sap esa aïrin srëm kam Alap hon yaïng gwe-gwer- nen de ba maesa tahalha gwibinkimye. Dekam sa Alap nëbe mae hap zëre mo kwasang-kwasangna nabakam goltrei gwizimdi.*

5

1 Yahudi zini, Alap mo golak de teipsin hip zen zini aha-en dam dasik gwenan. * Zëno syala, zen zi bose zemka de Alap hon golëyaïng gwe-gwen hap- ba maesa de Alap hap gol gweblankam. Hen zëno

syala, bol-zaun tangan wenya, zen t̄ngare Yahudi zi mo karek-kareksa dikim tap gulsuk gwizimdin hip de sapi-kambingsi Alap hap tru tasik gweblan hap.

² Okamanak insa Alap mo golak de teipsin hip dam dasik gwibirin, zen hen ki zi tangan. Zen zep aha zisi sae-saekam golēlowehe gwendatame gun srēmcam kim karekna nol gwenanye. Sap zēna hen man zēnaka enlala gwe-gweblanda, "Aena hen sin-sinni." †

³ Zen in zep nonol zēre mo karek-karekna in hap sapi-kamingni tru tasik gwenda, ki zep hwēna aha zi mo karek-karek hap tru tasik gwenda.*

⁴ Hen zi bējen zēnaka dam tasin-Alap mo golak de teipsinkim syal gwen hap. Zen diki Alap Zēn dam tasik gwenda- men kirekam orep Harunsu dam tasikike.

⁵ Kristus hen kirekam. Zen Zēn hom Zēnaka teipsinkim drē neka, hwēna Alap ki dam tasiki- anakan kim gublukake,

"Em in ano Tane,

Ēe mesē namen damnak Ēnaka anakan kira tanan, 'Ēe an eno Bian.' "*
Bian.' "*
Bian.' "*
Bian.' "*

⁶ Hen aha ayatnak Alap man gubluka,

"Em an Zen esa hēndep denaban ēre mo golak teipsili-

orep de teipsin zini Melkisedek Bak mo kimye."*

⁷ Yesus kim okamanak awe nama gwē'anaka, Zen Alap de mas gweblan hap ol mam-mamkam go naban abe ta gweka. Zen man Alapsa anakan taibliblaka, "Zēno sosonna ki- Asa de tin nikon ngaya tan hap denaye." Hen Zen man Alapsa dawemkam betek gwe-gweblaka, in zep hēndep

Alap zēno abena dokwak gul gwe-blaka.

⁸ Zen sap Alap zēre mo Tane, hwēna Zen hen awe de gwēnkam Alap mo zēbe hap de dwam gwibir-blin san de sul sonen hap dena anakan tawa gweka, "Ēe hen asa karekna goltowe gwer-men kirekam Bian Asa dwam gwebla'araye."

⁹ Zen in zep tangan Yesus in Alap mo nwenak dakastilki- zēre mo ngatan zi mo langnak de gol tangannak de teipsin hipye. In zep hēndep nēbe mae hap ēngaya gwen hap de ausuna Zēbon onak hēndep denaban lwa'an- nen an zen Desa ang ē gweblananye.

¹⁰ Zep Yesusu Alap zēre mo gol tangannak de teipsin hip dam tasiki- in kim anakan gublukaye,

"Em an Zen esa hēndep denaban ēre mo golak teipsili-

orep de teipsin zini Melkisedek Bak mo kimye."*

Kristussu de ang gweblannak de ēzise gwen hap de ol:

¹¹ Yesus mo kirekam de Alap mo golak teipsin hip de ola nama beyana- desa de ebe mae hap golz- imdin hip denaye. Hwēna ebe mae hap sa gwa-gwa gwer- desa de srip gulsuzimdinkimye. Sap em in enlala tihisni.

¹² Diki angkam emaka aha zisi hen Alap mo olkam tawa la gwibi'in. Hwēna ena hen nama tawa tabin hibe ēdwam gwe-gwe'an, sap nonol lonesen nakon de tawa tabinni em desa home kitak tame u'in. Em an wal baizil makane nama lowe he'an, zebe momkam de taizibin en hap ēdwam gwe-gwe'an. Diki angkam tembane drak-draksa emaka olgwen gwibi'in.

† 5:2 5:2 "Tame gun srēmcam de kareksa gonna," zēno dam gulsunnu, zen Musa mo ahakore jalse gwen ol bete-teksa de gulumurun. Sap zēno t̄iti tabin ola iwe, jalse gwen ol bete-teksa man s̄erkam beya gwek, zep t̄ngare Yahudi zini bējen t̄ingan enlala gwibin. Zep ahakore ol jalse gwen bete-teksa insa tame gun srēmcam nulmun gwek. Eirim de kareksa gonna- men kiye, kahalo gwenna hen zisi de tanna, desa bējen tame gun srēmcam syal gwibin. * 5:3 5:3 Im. 9:7 * 5:5

5:5 Mzm. 2:7 * 5:6 5:6 Mzm. 110:4 * 5:10 5:10 Mzm. 110:4

¹³ Nama de momsa twen gwen zini, zen nama baizili, zep zen hom Alap mo nwenak dikim edakastin hip dena tame nu'in.

¹⁴ Tembane drak-drakna zen zise gwen zi hip dena. Sap kire zini zen mes zenaka holokam titi da gwibik- dekam de enho drak-drakkam lowehe gwen hap. Zep zen mes karek naban dawem naban de kles so gwen hap dena tame nuk.

6

¹ Zep Kristen zini nenaka de tawa ta gwibinkim bap nen tahan en san dena etan-etankam gollwa halasen gwen. Diki olk san dena kim nen nenaka tawa ta gwibin-Kristen gwennak dikim ezise gwen hap dena kim. Zep anakare ensa bap nen gollwa halasen gwen:

Waba hap de syalsa de baes gwibin hip dena- mensa Yahudi zini tim nul gwenan, "Ee dekon asa Alap mo nwenak dakastil."

Ahana, Alap ensa de taibli gweblan hap dena,

² hen zisi de baptis ta gwibin hip dena,*

tahasa de tehabirida inen hap dena, hen juwen nakon de tim ese naban luk tan hap dena,

hen Alap de karek gol gwen zisi hendep denaban karek tabin hip dena.

Zen in kitak nonol lonesen nakore tawa tabin.

³ Zep anik olk san dep dena insa emsa tawa tabik, sap nen ema Alapsa anakan laiblibla'an, "Zen sa tame gun hup de sosonna nebe mae hap golzimdi."

⁴ Dawem! Ema kawesin sin dep etan lwanda halank. Sap lwan

dahan wanya, desa banakan dep?-ngatan san dep de etan golélwán dahan naye. Sap zen menkam man Alap onakore dawemna hen Alap mo Enho mo syala neisbik,

⁵ hen zen man Alap mo ol mo derekna neisbik, hen sosonna men dekam esa Alap mo kama esenak lowehe gwer, desa hen man sap derekna neisbik.

⁶ Hwena kire nik de Kristussu hli da'ak, desa toton banakan molye ngatan san dep etan olélwanda halzak. Sap zen de kawesin sin dep lwanda hankam, zeno mae mo syala in sa nwe-mase gwer- san de Alap mo Tanena Yesussu de etan saherak dre nenna kiye. Sap zeno mae mo syala in, dekam san de Yesussu de anakan tik-tik tanna kiye, "Emki etan te-lidak sonnak tin- ano mae mo karek-karek esena ansa ekakim tingare zi mo nwenak ap ngan gulsuzim!"

⁷ Emki eenlala gwen: Nga syal gweblannak de o il ti gwenkam, dekam ngana iwe de obwaga tutulkum hatankam, ki Alap man nga syal gwe-gweblan zini in han apdekam zersyal gwe-gwe'ara, hen Zen sa ngana insa sam gwesibila.

⁸ Hwena ngana iwe de endang hatankam, ahaksa dokot te ngi-ngi, dekam Alap de kamana insa heip gun hup man golek de gwe'an. Hen nga syal gwe-gweblan zini in sa nga zem insa syaukkum ang tala.

⁹ Zep ano kwasang gwibirida gwen wanya, ee insa Biansa de hli tan hap dena ebe mae hap ale gulzim, hwena ee homë emsa anakan enlala gwibirida'an, "Zen sa eiwa hli dal." Sap ee emsa anakanë taiblibirida'an, "Em mese hendep de gwen hap dena ulink."

¹⁰ Sap Alap Zen totoresana hom zisi gol kininda gwenda. Zen molya

* **6:2 6:2** "Zisi de baptis ta gwibin hip dena," awe Yunani olkam hom "baptisan" kam ale gulku, hwena "baptisan-baptisan" kam ale gulku. Zep zeno dam gulsunnu aha-ere baptis tabinsi hom, hwena beyana. Baptis tabinsi de aibinni zen anakan: Kristen gwennak de zisi baptis ta gwibin hip dena, hen Yahudi zi mo weyakam de timsi ngan gulsun hup dena, hen Alap mo Enho de nesa hle tabiridan hap dena. Zep "baptis ta gwibin hip dena," desa bejen anakan enlala gwibin, "An nen de nere mae mo kareksa dikim ngan gulsun hup etan-etankam ebaptis gwen hap dena."

eno mae mo syal dohon-honna mensa zēbe hap ol gweblak eititi gwibirki. Hen em mensa Zēnaka enna ola gweblak, desa hen molya eititi gwibir-zimki- in kim Kristen bose wal omka kwasang eibirida gwekye. Hen em angkam namae kirekam lowehe gwe'an.*

11 Zep ēe ama tangan emsa dwam gwibirida'an: Diki em kwasang hap de syala insa ayang gul song gwen-eno mae mo lowe henna men kiye. Zen dekam esa ere mae mo enhonak anakan tame ul gwer, "Ēe eiwa asa Alap Zēn de nēsa golēteinikirin langnak yaing gwer."*

12 Hwēna kire srēmka esa ēasang-asang gwe-gwer. In zebē emsa dwam gwibirida'an: Emki sap zini men zen Alapsa de taibliblannak tatem ēzauk gwekke, desa enlala gwibirida gwen. Zep emki hen zēno mae mo kim enlala syal-syala ban tatem ēzauk gwen, sap zen mes zēwe yaing gwek-men zēwe dep Alap nēsa kitak gubirida gwekaye.

Mae hap de ol: Alap zēre mo gubiridan ola bējen wet gulsun.

13-15 Abraham Bak kirekam tatem zauk gweka, sap desa man Alap zēre mo bosesa de gubin niban anakan gu-gubluka,

"Ēe an Alap ama emsa gu-gublu'an,
Ēe asa tangan ebe hap dawemna gol gweblal.

Eno auyan-azana zep sa tangan hēndep ēbeya gwe song gwer."*

Zao zep Abraham ola insa de taiblibin niban holokam eissiki, hēndep ki zep gul inki- mensa gu-gublukaye. Zen mae hap Alapsa taibliblaka: Sap Alap man zēre mo ol gu-gunnu insa zēre mo bosesa de gubin niban soson gulku. Sap Alap Zēnaka de kwē tan hap de zini hom tangan, Zen zep zēre mo bosena gubirki.

16 Sap zini kim zēre mae mo ola soson nul gwenan, zen teipsin zi mo bose gubin niban anakan soson nul gwenan, "Dikire Zen asa hla tak- ēe de syal gwibin srēmka." Zen dekam zep aha zi ol gulsun-gulsun srēmka anakan daiblibirida gwenan, "Zen eiwa desa de syal gwibin hip kirekam gu-guku."

17 Zen zep Alap hen kirekam zēre mo olsa zēre mo bose gubin niban soson gulku- Abraham Baksa kim gu-gublukaye. Sap Zen man Abraham mo auyan-tane walya nen de anakan taibliblan hap dwam gweka, "Zēno ol gu-gunnu eiwa bējen wet gulsun. Zen hēndep eiwa sa kirekam nēbe mae hap syal gwibir-zimdi."

18 Zep Alap mes nēbe mae hap zao de tatem ēzaun hup dena dan-dan teisyazimki: Ahana Abrahamsa de ol gu-gublunna in zen. Ahana zēre mo bose gubin niban kim ola insa soson gulkuke. Zep Alap bējen zēre mo ol-gun darena insa wet sosun, hen Zen bējen boton gwen. Zen in zep, nen an zen Alapsa ēngaya gwen hap yaing ēbla kini'an, ol-gun darena insa de kyang-kyang sosun nuban esa ngalap gwen srēmka tatem ēzaul.

19 Zep zēwe en de tatem ēzaun hup dena in, zen buluk de jangkal makan zen nēbe mae hap lwaz-imdi, sap Alap bējen boton gwen. Zen zebe angkam airin srēmka ol gu sonenkam Alap zēre hon yaing gwe-gwe'an- zēre mo ngatan zi mo langnak de gol mwa tangan-nakye, men zēwe orep deyol glaing-gling lilikinni il nil sone gwekye. Sap menkam zini zao bējen yaing gwen. Dekam orana tayalsin nik lwa gweka- men kirekam hen Alap mo okamanak de gol mwanak hen deyol glaing-glingni lilikinnik il nil sone gwenanke.

20 Hwēna angkam desan dep de orana Yesus mes nēbe mae hap sal

* 6:10 6:10 Ibr. 10:32-34 * 6:11 6:11 2Ptr. 1:8,10 * 6:13-15 6:13-15 Kej. 22:16-17

tazimki. Zen zep nëbe mae hap nwe-mase gwe'ara- Alap mo golak de teipsin tanganna, Melkisedek Bak mo kim de teipsin hip. Hen Zen dekon sa hëndep denaban nësa mas gwibirida gwer.

7

Abraham ne Melkisedek neka de kles son hap de ol:

¹ Melkisedek in ëna Salemk teipsinkim irik gilki. Hen zen teipsin tangan Zini Alap hap de syalsa gol gweka- sapi-kambing maesa de hen tru tasik gweblankam. Abraham kim eijannak de yei-yëk gwen nakon lwahal zaka, Melkisedek dekam zep Abrahamsa ala tabla zaka, zao zep tahana tehabla ineka- Alap dikim dawemsa golblan hap. *

² Abraham dekam zep eijan nakon de kap ta halzan kire-kire hlikna zëbe hap kap tablaka. † Melkisedek mo bosena hen enlala naban. Zëno enlalana "Dam-dam enkam de irik gin zini." Hwëna zen hen ëna Salemk teipsinkim irik gilki, hen ëna in mo bosena enlalana "um-lae." Zep Melkisedek hen anakan nwe-mase gweka, "umlae hap de teipsinni."

³ Alap mo olak hom Melkisedek hap dena anakan ale nuk, "Zëno ane-biana zen," hen "Zen dekore zi ausu nakorena." Ki maka hen anakan dam nulsuk, "Zao jaha gwek," ahaksa, "Zao tilki." Zep zen man nwe-mase gwe'ara- san de Alap zëre mo Tanena kiye- nonol lone senna hom, hen aumwa topna hom. In zep Melkisedek anakan nwe-mase gwe'ara, "Zen Alap mo golak de hëndep denaban syal gwe-gwen zini."

⁴ Nen zebe anakan dam ulsu'un, "Melkisedek, zen eiwa teipsin tanganna," zep nëno mae mo auyanna

Abraham Bak eijannak de kap tan kire-kire dawem-dawem hlikna zëbe hap kap tablaka.

⁵ Hwëna Musa mo titi tabin olak hyanak anakan lwak,

"Lewi Bak mo ausu nakore zini men zen de Alap mo golak syal ta gwe'ak, zen en sa zëre mae mo iyena Israel onakon Alap hap de kire-kire hlikna nulin gwer."*

Sap eiwa, dekon de gulin gwen, hwëna Israel zi ausuna in hen apdekam Abraham mo auyan-aza nakorena.

⁶ Melkisedek Bak an, zen hwëna Lewi Bak mo auyan-aza nakore naka hom. Hwëna zen ki Abraham onakon kire-kire hlikna gul inki. Hen zen man Abraham hap tahana tehabla ineka. Nëno mae mo auyanna in sap eiwa teipsinni, sap Alap nonol desa en hamal hap gu-gubluka- dawemsa de golblan hapye.

⁷ Hwëna mes dam gwesinin: Men zen tahana tehabla inenna, zen teipsinni. Mensa tehabla inenna, zen betekna. Zep Melkisedek, zen Abraham onakon man teipsiki.

⁸ Lewi Bak mo ausu nakore zini in man juwe gwenan, hwëna zen Alap hap de kire-kire hlikna man nulin gwenan- Yahudi bose zem onakonye. Hwëna Melkisedek Bak, zen zëbon mae onakon teipsinni, sap Alap mo olak zëbe hap dena man nwe-mase gwe'an, "Zen hom tilki."

⁹ Hen Lewi mo ausu nakore zini in men zen angkam Yahudi onakon kire-kire hlikna nulin gwenan, zen hwëna man ënwe-mase gwe-gwe'an- san de Melkisedek Bak hap de hen kap tablanna kiye. Sap Abraham kim kap tablaka, Lewi mo ausu nakore zini in nama san de Abraham mo timnik de lowe henna kiye.

¹⁰ Sap Abrahamsa kim Melkisedek ala tablaka, dekam Lewi Baksa hom

* **7:1 7:1** In kim golëyei-yëk gweka, zen teipsin zisi empat enkam hëndep jana zi zeban zitamerasiki. (Kej. 14:17-24) † **7:2 7:2** Kire-kire hlikna insa Abraham kap tablaka desa "sepersepulu" kam nen gwibirin. Zep emaskam de moksa de 10 enkam kap tanna, zen hwëna Melkisedek hap aha-en zerblaka. 50kam de kap tan kire-kirena, desa 5 enkam kap tablaka. * **7:5 7:5** Bil. 18:21

jaha gwe'ak. Zen zep nwe-mase gwe'an, zen dekam san de Abraham mo siknik nama gwë'anika. Zen zep nwe-mase gwe'an, Lewi Bak san de ang gwenna- Abraham kim kire-kire hlikna Melkisedek hap kap tablakaye. Zep Lewi onakon, teipsinni Melkisedek Bak.

¹¹ Hwëna Musa Bak kim titi tabin ola in sa golzimki, zen anakan gubiridaka, "Lewi Bak mo ausu nakore zi en sa Alap mo golak syal ta gwer- dekam de Israel mo karek-kareksa ngan gulsuk gwizimdin hipye." Zen zep angkam zen en sapi-kambingsi Alap hap tru dasik gweblanan. Hwëna Lewi Bak mo ausu nakore zi enna in de eiwa syala in sa nul sone'anam, hen sap Lewi mo aza-tanena Harun Bak mo ausu nakore zi en, ki Alap molya lun Ahana dam tasinam- Zen de hwëna Melkisedek Bak mo weinak zi mo karek-kareksa ngan gulsuk gwizimdin hipye.* Lewi Bak mo ausu nakore zini in sap Musa mo titi tabin ola in sa syal nei gwibik, hwëna Alap mo nwenak zen hom sowehek.

¹²⁻¹⁴ Kirekam de lwankam, ki hwëna Alap mes Musa mo titi tabin ola in sa wet gulsuku. Sap Melkisedek mo weinak dep de Zini, Zen Kristus- nëno mae mo Teipsinni. Hen Zen Lewi Bak mo ausu nakon hom saltiki. Zen dwan Yehuda mo ausu nakore nakake. Zëno ausu nakore zini orep hom tangan mae sapi-kambingni Alap hap tru dasik gweblak. Hen Musa hom zi ausuna in hap dena orep mae anakan gubiridaka, "Zen sa hen Alap mo golak syal ta gwer." Zep Kristus kim Melkisedek Bak mo weinak dep dam tasiki, Alap hen dekam Musa mo titi tabin ola in sa wet gulsuku.

Mae hap de ol: Yesus Zen Melkisedek Bak mo kim sa hëndep denaban nësa mas gwibirida gwer.

* **7:11 7:11** Bil. 18:22-23; Mzm. 110:4; Ibr. 5:6
7:20-22 Mzm. 110:4

¹⁵ Zep eiwa, angkam mes tangane dam ulsul: Alap mes Musa mo titi tabin ola in sa wet gulsuku- in kim Kristus zer sonekake, Melkisedek Bak mo weinak de teipsin hip.

¹⁶ Desa zi hom dam dasik, sap Musa mo titi tabin ola kon Yehuda mo ausu nakon de saltin zini bëjen Alap mo golak syal gwe-gwen. Zen hwëna Alap Zën dam tasiki, sap Yesus hon sosonna ki- dekam de hëndep denaban tin nikon ngaya gwen hap denaye.

¹⁷ Zen zep zëbe hap dena Alap mo olak anakan lwak, "Em an Zen esa hëndep denaban ère mo golak teipsili- orep de teipsin zini Melkisedek Bak mo kimye."*

¹⁸ Zep angkam, Alap kim kirekam Yesusu dam tasiki, ëpba titi tabin ola in sa dekam zep tahan san gwei gubir kinika. Sap ëpba ola in, zen sosen naka hom- nësa de Alap osan dep zon guludan hapye.

¹⁹ Sap Musa mo titi tabin ola in bëjen nëno mae mo tingare karek-karekna ngan gulsun. Zen in zep nëbe mae hap Yesus ora dawemna sal tazimki- Desa en de blol gwe-gweblankam de Alap zëre onak yaing gwen hap denaye.

²⁰⁻²² Ora ësena in sa Alap syal gwe-blaka, zen zen- sosen tangan zi niye. Sap Alap kim Yesusu dam tasiki, Zen zëre mo bose gubin niban gu-gubluka- kim anakan gublukaye,

"Èe an eno Bian,
Èe ère mo bose gubin nibanë Emsa gu-gublu'an, hen Èe molyë ola ansa wet gulsuk:

Em an Zen esa hëndep denaban ère mo golak teipsili."*

Zen Yesus ensa kirekam gu-gubluka. Hwëna ëpba titi tabin ola kon in zen nama Alap mo golak syal ta gwenan, desa Alap hom kirekam gu-gubirida gweka. Zep nen angkam Yesus onakone anakan tame ul gwe'an, "Mensa angkam Alap zi niban ola

* **7:17 7:17** Mzm. 110:4; Ibr. 5:6 * **7:20-22**

ziaha-en gu'ura, zen eiwa tangan sa ki lwal, hen zen sosen tangan wenya zen.” Orep insa Musa Bak han aha-en ulki, zen sosen naka hom. Nen mae nakone desa tame ul gwe'an: Sap Alap Yesussu zère mo bose gubin niban gu-gubluka.

²³ Ahana ansa emki hen enlala gwibin: Men zen Alap mo golak syal ta gwek, zen man beya gwe song gwek, sap zen man juwe gwek.

²⁴ Hwëna Yesus an Zen angkam Alap mo golak teipsi'ira, Zen hëndep denaban sa teipsili. Zep zëno weinak dep etan ahana molya teipsiki.

²⁵ Zep ngaya gwen hap de sosonna, zen kitak hëndep denaban Zëbon lwa'an. Zep tingan men zen Alap osan dep Zëbon osan yaing gwe-gwenan, Zen desa sa ngaya tabiri. Sap Zen hëndep denaban zë gwë gwenda- dekon de nëno mae mo abesa Bian hap ayang gul gweblan hap.

²⁶ Zen in zep tangan Yesus sam gwesi'ira- Zen de nëbe mae hap Alap mo golak teipsinkim syal gwenkamye. Sap Zen lalak enna hen enho kles gwesin srëmna, hen karek maena hom golka. In zep zëbe hap dena angkam dakasti'in- nen makare karek gol gwen zi niban de golësiri gwen srëm hap denaye. Zen in zep hëndep Alap zëbe hap golblaka- Zen de teipsin tangankam ngatan zi mo lang nakon nësa irik gin hip denaye.

²⁷ Zep Yesus man tangan ahakore Alap mo golak de teipsin-teipsin wenya kwei-kwik gu'ura. Sap Zen hom dwam gweka- nonol zère en mo karek-karek hap de mwin- mwankam sapi-kambingsi Alap hap tru tasik gweblan hapye, kire hwëna etan aha zi mo karek-karek hap hen tru tasik gwizimdin hip. Hwëna Zen kim aha-rok'nen zère mo timni golguku, te-lidak sonnack de tan hap, Zen dekam zep tingare nëno mae

mo karek-karekna hëndep denaban ngan gulsuzimki.

²⁸ Zep titi tabin ola in kon kim zini dam dasik gwibirin, zen de Alap mo golak teipsinkim syal gwe- gwen hap, zen nen makare karek gol gwen naka hen dam dasik gwibirin. Hwëna titi tabin ola in mo tahan- nak, zao zep Alap zère mo bose gubin niban zère mo Tanena insa anakan dam tasiki,

“Em an Zen esa hëndep denaban ère mo golak teipsili.”

Sap Yesus Zen mes Alap mo zëbe hap de dwam gwibir-blinna kitak tangan sul soneka.

8

Mae hap de ol: Yesus Zen Zen tangan- Alap mo golak de nëno mae mo Teipsin tangan naye.

¹ Èe ansa emsa tawa tabi'in, bol- zaun tanganna an zen: Yesus Zen Zen tangan nëbe mae hap syal gwe'ara- Alap mo golak de teipsin tangankamye. Zen in zep ngatan zi mo langnak Alap zère mo dam taha nakon nikin'ira.

² Men zao angkam Zen nëbe mae hap syal gwe-gwe'ara, zen Alap zère en hap de tekson tangannak- mensa Alap Zëna syal gwibirkike. Zen Israel zi mo Alap hap de gol syal gwibir-blinnak hom syal gwe'ara.

³ Tingare Alap mo golak de syal tan zi mo teipsin-teipsinni, zen kitak kire-kiresa Alap hap nol gwe- blanan, hen sapi-kambingsi zëbe hap tru dasik gweblanan. * Zep nëno mae mo Alap mo golak de Teipsin Zini Yesus, zëno syala zen hen kirekam nwe-mase gwek.

⁴ Okamanak awe de Zen nama gwë'anam, Desa hwëna molya Alap mo golak de syal gwe-gwen hap dam dasi'inam. Sap Lewi Bak mo ausu nakore zini in, men kire enkam Musa mo titi tabin olak lwak, zen nama desa Alap hap nol gweblanan.

* **8:3 8:3** Insa “nol gweblanan”kam hen “tru dasik gweblanan”kam ayatnak awe ale gulku, desa de srip gulsunnu emki 5:1 mo otde alenak hlaun.

⁵ Hwëna zen insa syala okamanak nol gwenan, zen au-au makarena. Hwëna Kristus insa ngatan zi mo lang nakon syal gwe-gwe'ara, zen eiwa de tanganna zen. Zen in zep, orep kwatapna Sinaik kim Alap Musa hap zëre mo ngatan zi mo langnak de gol tanganna zertrëblaka, kirekam de hen okamanak syal gwibir-blin hap, Zen anakare ol tan-tanna golblaka,

“An kire enkamë kwatapnak awe ebe hap goltrëblanan, zen kire enkam em hëndep sul sonen.”*

⁶ Zep mensa au-au makarena Musa mo tan-tan san syal nei gwibirin, hwëna angkam eiwa de tangan wenyä in desa Yesus ngatan zi mo langnak nëbe mae hap syal gwe-gwibir-zim'ira. Zep Zen insa kirekam syal gwe-gwe'ara, zen man tangan kwei yuluda'ara- men zen Alap mo okamanak de golak syal ta gwenanye. Sap syala men desa Alap mo nonol ol ziaha-en gun nukon okamanak nol gwenan, zen sosen naka hom- zen de zisi Alap osan dep zon guluda gwen hapye. Hwëna angkam ansa Alap nëban mae ola ziaha-en gu'ura, zen sosen tangan wenyä zen. Zen in zep Yesus nësa angkam Alap osan dep zon guluda gwe'ara, sap Zen Zen ol ziaha-en gun ësenä insa nëbe mae hap syal gwibir-zimki- men kirekam Alap nësa gu-gubiridakaye.

⁷ Sap Alap mo Musa han de ol aha-en unni in de sosen gwenanam, ki molya etan zi niban de ol ziaha-en gun hup dwam gwenanam. Ki nonol ziaha-en gun enna in maka sowehek.

⁸ Hwëna Alap Zën nonol ziaha-en gunnu insa anakan dam gulsuku, “An sosen naka hom”- Zen kim anakan hamal hap gubiridakaye, “Ëe, Bian, ama emsa gubirida'an: Ansa enlala ei gwibik.

Israel ne Yehuda nik mo zi ausu nakore zi niban de etan olsa

ziaha-en gun hup de yaklanak sa hatal.

⁹ Eban mae de ol ziaha-en gun ësenä an, zen men kirekamë auyan-aza oban orep ziaha-en guk, kirekam hom-

Ëe kimë desa ëre mo sosonsa de goltrei gwizimdinkim Mesir kon gwiswe sonekye.

Hwëna zen ano ol ziaha-en gunnu in san hom ang tak.

Zen in zebë hëndep tahanna gweis-ibiridak.

¹⁰ Hwëna insa ngein sin etan ziaha-en gu'uk,

Ëe asa zëno mae mo enhonak titi tabin ol ësesa ale gulzim,

zen zep sa desan en aha-ere enlalakam ang ta gwer.

Zen dekam tangan sa anakan ënwe-mase gwe-gwer,

‘Ëe an zëno mae mo Alap, hen zen eiwa ano hlil irin wenyä.’

¹¹ Zen dekam molya zënaka anakan titi da gwibik, ‘Emki Biansa tame tan.’

Sap zen dekam zën sa kitak Asa tame dal-

sap bose nabare wenyä, sap bose srëm wenyä.

¹² Sap Ëe asa zëno mae mo karek-karekna tap gulsuzim. Dekam molyë etan zëno mae mo karekna enlala gwe-gwibik.”*

¹³ Zen in zep, Alap kim kirekam hamal hap gubiridaka, etan de zi niban olsa ziaha-en gun hup, zëno dam gulsunnu, Zen hen dekam nonol ziaha-en gunnu insa tahan san gwei gubir kinika. Kirekam de lwankam, ki nonol ziaha-en gunnu in mes ëpba gwer, hëndep angkam zen zalta dep dena.

9

Mae hap de ol: Ëpba ol ziaha-en gunnu, zëno syala kirekam lwak.

¹ Nonol ol ziaha-en gunnu in, zëno syala, desa kitak Musa Bak Swe ale gulzimki- kire enkam de Alapsa blikip gwesik gweblan hap

* 8:5 8:5 Kel. 25:40 * 8:12 8:12 Yer. 31:31-34

denaye. Zen zi mo tahakam de Alap hap de syal gwibir-blin tenda golak kirekam syal nei gwibik.

² Alap hap de tenda gola in teksonna dan-dan. Ngein sin de teksonna, desa man nen gwibik, "Alap hap dena." Zao zep Alap hap de pelitana nonne gwek- zëno ngatan hap de hli-hlina tuju enkam. Zao hen mejana ki nola gwek- men zao Alap hap de rutina non nebla ine gwekke.

³ Dekon tahan san de teksonna, zëno lilikinni deyol glaing-gling yawalsa zë il nil sone gwek. Teksonna desa man nen gwibik, "Alap zëre en tangan hap dena."

⁴ Zëwe emaskam de kalsna hen ki- men zëwe irase dawem nabare te kilī tru dasik gwek. Alap mo zi niban de ol ziaha-en gun petina hen zëwe nonne gwek. Zen tekam de syal gwibinni, hwëna emaskam zë ma-makan dabik- hëndep kitak. Petina in mo olk, zëwe emaskam de botola ki- men zëwe orep de tembanena mannana bitī dakke, tembanena mensa Alap Israel hap Mesir kon de sek gwe zannak owaskam gol gwizimkike. Harun Bak mo dutena hen zëwe- men zen owaskam mas gwekke. Kaso hlang darena, men zëwe Alap Musa Bak hap dare taha- tapkam de titī tabin ola insa ale gulbluka, zen hen zëwe nola gwek.

⁵ Petina insa dikim mat gulsun hup dena, zen emas enkam syal neibik. Hen zëwe emaskam de syal gwizimdin Alap mo dam taha nakore zi makare daresa zaun noso inek- sī ala er sosuzimdin nika. Zëno nik mo sī alana petina insa kim tahan nakon il-il soneka, sap zen man peti mat gulsunnu insa enlala nei gwibik, "Sapi-kambing kal de zëwe lwankam, zen dekam Alap nëno mae mo karek-karekna tap gulsuk gwizimnira, hen Alap nësa dekon golëlowehe gwe'ara." Hwëna desa de tingan srip gulsun hup, ki sa

tangan blal gwer.

⁶ Alap hap de tenda gola insa kim syal gwibinkim su nul sonek, dekam zep Alap hap de kire-kirena insa kang dazak. Zen dekam zep hen nonol teksonna iwe Alap mo golak de syal tan zini, sap bose bete-tek wenya, bitī gwe-gwezak- Musa mo titī tabin ola insa dikim syal gwe-gwibin hipye.

⁷ Hwëna tahan san de teksonnak, zëwe Alap mo golak de teipsin tangan en nik tīl gweka. Aha-ere tahunkam aha-rok'nen zë tīl gweka. Hwëna zen hen sapi-kambing kal srëmkam bëjen zao tīn. Kala in desa Alap hap goltrë gweblaka, nonol zëre mo kareksa dikim ngan gulsublun hap denaka goltrë gweblaka, zao hwëna tīngare Israel zi mo karek-kareksa dikim ngan gulsuzimdin hip denaka- tame gun srëmkam mensa syal nei gwibikke. *

⁸ Zen in zep dekam Alap mo Enhona anakan goltreizimki, "Tenda gola in de nama lwa gwe'ak, ki totore zini molya Alap zëre hon yaing gwe-gwek."

⁹ Zen zep angkam de wenya nëbe mae hap olk san de enlalana anakan lwazim'in: Kire-kiresa hen sapi-kambing maesa de Alap hap kap ta gweblanna, zen waba hap. Sap zen bëjen zini in mo enhona ngan tasin.

¹⁰ Sap kirekam de syala in, zen tim en hap dena. Enhonak hom hata gwek. Sap syala in dekam anakan nol gwek:

kire enkam de tembane tan hap dena,

kire enkam de otdebin hip dena, hen kire enkam de timsi ngan gulsun hup dena.

Hwëna desa Alap etan de zi niban olsa ziaha-en gun srëm ennak dep ki golzimki.

Mae hap de ol: Kristus Zen Alap mo zi niban de ol ziaha-en gun ësena insa de sul sonen hap hata zaka.

* **9:7 9:7** Alap mo golak de teipsin tangan zini in mo syal hap dena, emki Im 16nak hlaun. Tame gun srëmkam de karek gonna, zëno srip gulsunnu emki Ibr. 5:2 mo otde alenak hlaun.

¹¹ Zen zep Kristus hata zaka- Alap mo zi niban de ol ziaha-en gun esena insa dikim nēbe mae hap syal gwibir-zimdin hip. Hen Zen zēre mo syala in kon zep gwē'ara- nēbe mae hap de Alap mo golak de teipsinnī. Zen kim tīn nikon etan ngaya gweka, dekam zep ngatan zi mo langnak de Alap zēre hap de tenda golak tīl halka. Zēwe de Alap mo gola in, zen eiwa tangaran wanya zen. Zen zi mo syal gwibin nika hom.

¹² Kristus Zen aha-rok'nen tangan tīlki- Alap zēre en tangan hap de teksonna iweye. In kim tīlki, Zen sapi-kambing kalsa hom gol halka. Zen hwēna zēre mo kal en naban goltīlki. Zen dekam zep nēsa kitak hēndep denaban dowal mo kīgī mo irik gīn nikon gwiswe soneka- Alap mo hlīl irin zinik dikim nēsa golēbītī gwen hapye. Dekam etan hyanak molya ba maena kire hap goltīlki.

¹³ Men zen tītī tabin ola insa ngip nul gwenan, desa man enlala neibirida gwenan, "Zen Alap mo nwenak kun naban." Zep nonol ol ziaha-en gun hup de syala in san kim ang ta gwenan, dekam sapi-kambing kalkam blīs dībirida gwenan, ahaksa sapi tru ta seblan sonsa ho naban siri nul gwenan- dekam de blīs tībirida gwen hapye. Hwēna kirekam kim tim ennak blīs dībirida gwenan, dekam zep enlala neibirida gwenan, "Angkam mese Alap mo nwenak ngan lasibirin."*

¹⁴ Hwēna angkam karek gol gwen srēm Zini Kristus Zen mes Alap mo Enho mo ssonkam Zēnaka domba makan zerguku. Zep nen an Kristus zēre mo kalkam de blīs tībiridan wanya zen. Zep nen an zen tangan- dawemkam de ngan tasibin wenyaye! Sap nēsa tim en nakon hom ngan tasibirki. Hwēna enho naban hēndep nēsa ngan tasibirki. Zen in zep nen angkam Ngaya Zini Alapsa esa enho aha-erekam ang ē gweblal, sap Zen mes nēsa alal gulku- waba hap de syala konye.

¹⁵ Zen in zep Kristus angkam nēsa Alap osan dep zon guluda gwe'ara, sap Zen Zen Alap mo zi niban de ol ziaha-en gunnu insa nēbe mae hap syal gwibir-zimki. Zep Zen mae hap angkam syal gwe-gwe'ara: Alap mensa kwang guludaka, zen dikim hēndep de lowehe gwen hap denaka gul irin hip- mensa Alap Zēna gugubiridakake. Zen kitak mae hap ki lwa'an: Sap Kristus kim tīlki, Zen dekam nēsa kitak nēre mae mo ngip gul gwen nakon gwiswe soneka- nen kim sap nonol ol ziaha-en gun syala insa alp ei gwibikye.

¹⁶ Sap insa Kristus tīnkīm nēbe mae hap syal gwibir-zimki, zen san de zi de tīnkīm walas zikhip kirekiresa hli tan dazimdin makan. Zini kim kire hap walas zeban ola niaha-en gul gwenan, zēn de nama tīn srēmna walas zem in na-en bējen kire-kirena insa lop tan- bi zik de nama gwēnnakye.

¹⁷ Sap ol ziaha-en gunnu in, zen zēn de tīnnik de kirekam syal gwibin. Zēn de nama gwēnnak bējen.

¹⁸ Alap mo zi niban de ol ziaha-en gun darena in zep hen kirekam lwa'an, zen diki tīnkīm de kal wet sonnak de syal gwibin. Nonol ol ziaha-en gunnu, zen otweran blom tabir-blin mo kalsa. Hwēna angkam de wanya, zen Kristus mo kalkam dena.

¹⁹ Alap mo nonol zi niban de ol ziaha-en gun syala insa kim kon neisibir hanak, zen zep hen kirekam lwak. Dekam Musa Bak man Israelsa tagal gulsuku, zao zep tītī tabin ola insa kitak tonbiridaka. Ki zep sapi-kambing kalkam Alap mo tītī tabin ola bare bukuna insa blīs tībirki, hen Israelsa blīs tībiridaka. Zen ho naban kala ban siri gulku- dekam de blīs tībiridan hapye, Alap men kirekam gublukake. Daīngklīng ala makare naka domba ala kal-kalkam huleka, desa zep os gul ine gweka- dekam

* 9:13 9:13 Bil. 19 † 9:19 9:19 Daīngklīng ala makare naka, zen te bosena hisopkam ale nuk.

de blis tibiridan hapye. †

²⁰ Zen anakare ola ban blis tibirida gwe'anaka,

“Kala an zen Alap mo nēban mae de ol ziaha-en gunnu insa eiwa gu'un- nen dikim desan en ang ta gwen hap.”*

²¹ Ki zep hen kala inkam Alap hap de tenda gola insa blis tibirki, hen zēwe de kirekam-kirekamna men dekam Alap hap de syala nol gwek, desa kitak blis tiblān daka.

²² Sap ēpba titi tabin ola insa kim syal nei gwibik, dekam Alap mo golak de syal hap de kolho maena man hen blis dīblanda gwek- dekam de Alap mo nwenak ēngan gwehen hap. Sap kal de wet son srēmka, zi mo karek-karekna bējen ngan gulsuzimdin.

²³⁻²⁴ Zep Musa kitak de Alap hap de syal hap de kirekam-kirekamna insa kire hap blis tiblān daka, hwēna kire-kirena in sap okama ennak dep dena. Hwēna ngatan zi mo langnak de Alap mo golak de kire-kirena, desa bējen sapi-kambing kalkam blis tīblanda. Desa diki Alap zēre mo Domba Tane mo kalkam de blis tīblanda. Zep Kristus Zen zi mo Alap hap de gol syal gwibir-blinnak hom tilki- au-au makan men zen lwa gwekke. Zen hwēna ngatan zi mo langnak eiwa de tangan wenyak tilki. Zen nama zao gwē gwe'aradekon de nēsa Bian osan dep mas gwibirida gwen hap.

²⁵ Hwēna okamanak de Alap mo golak de teipsin zini, zen tahun jamkam aha-rok'nen til gwenda-teksonna mensa nen gwibirin, “Alap zēre en tangan hap dena.” Zen zēre mo kalsa hom gōtil gwenda. Zen otweran kalsa. Hwēna Kristus hup hom dakastilbli'an- etan-etankam de zēre mo timsi golgu gwen hapye, dekam de etan-etankam zēre mo kalsa Alap mo golak gōtil gwen hap.

²⁶ Kirekam de lwananam, ki nonol lonesen nakon maka Kristussu tahun jamkam te-lidak sonnak makan dain gwek. Zen hwēna

aha-rok'nen hata zaka- okamana an mo aumwa hap de yaklana men zen angkam lwa zahe'anke, dekam de domba makan de tan hap Zēnaka zergun hup, tīngare nēno mae mo karek-kareksa dikim ngan gulsuzimdin hip.

²⁷ Sap Alap mes tīngare zini nēsa anakan gubiridaka, “Zen aha-rok'nen sa juwe gwer, ki asa hwēna klis gul.”

²⁸ Kristus in zep aha-rok'nen tilki- dekam de zi trana nēno mae mo karek-kareksa wei yun hup. Hwēna Zen sa etan lwahal zala. Zen dekam zi mo karek-kareksa de wei yun hup molya hata zaka. Hwēna men zen nēs gweba'anke, desa dikim hēndep de lowehe gwen hap de lang san kwang guludahan hap sa hata zala.

10

¹ Zep Musa mo titi tabin ol hap de syala, zen san de au-auna men kiye. Hwēna zen dekam de enlala gwibin hip, “Eiwa de tangan weny sa hatal.” Dekam kim tahun jamkam otweranna Alap hap sap tru dasik gweblanan, hwēna dekam enho nakon hom ēngan gwehe gwenan.

² Titi tabin ola insa de syal gwibinkim de enho nakon ēngan gwe henanam, ki maka otweransa de tru tasik gweblanna insa nolzausuk. Dekam de anakan neibirinam, “Ee mes tanganē ēngan gwehek,” ki zēno mae mo kareksa de gonnak de enlala dowe hananna maka tap gwizimki.

³ Otweranna man ki sap tahun jamkam tru dasik gwek, hwēna dekam zēre mae mo kareksa de gonnak de enlala dowe hananna hom mae tap gwe-gwizimki. Sap kirekam insa syal neibir tine gwek, hwēna zēre mae mo enhonak dekam zep anakare enlalana hata gwizimki, “Ano karek-karekna nama Bian mo nwenak lwa'an.”

* 9:20 9:20 Kel. 24:6-8

4 Sap sapi-kambing kalkam toton bëjen zi mo karek-karekna ngan gulsuzimdin.

5 Zep Kristus kim okamanak hata zaka Zen anakan Alapsa gubluka, "Em home otweran tru tasik gweblansa dwam gwibi'ira, hwëna Em mese ano timsi hohle gulku.

6 Otweransa de ebe hap tru tasik gweblan hap Em home sam gwesik gwibirki-dekam de zi mo karek-kareksa ngan gulsuzimdin hipye.

7 Bian Alap, Èe in zebë Emsa gublu'an, 'Èe mesë angkam okamanak hatanan- eno dwam gwibinsi dikim sul sonen hapye, men kirekam ere mo olak abe hap dena lwakke.' **

8 Zep Kristus eiwa Musa mo titi tabin ola tahan san gwei gubir kinika- Alapsa kim anakan gublukaye,

"Em home otweran tru tasik gweblan hap dwam gwe'ara hen home sam gwesik gwibirki."

Hwëna otweran tru tasik gweblan hap dena in Musa mo olak kirekam am lwak.

9 Hwëna anakan etan mas gulbluka, "Èe mesë angkam okamanak hatanan- eno dwam gwibinsi dikim sul sonen hapye."

Kirekam de gublunna in, zen man nwe-mase gwek: Kristus Alap mo ëpba zi niban de ol ziaha-en gunnu insa tahan san gwei gubir kinika-dekam de Bian zëre mo dwam gwibin tangan wenyaka zaun gun hup.

10 Zep nëbe mae hap de Alap mo dwam gwibinni, zen a kirekam moye: Nen de aha-rok'nen hëndep nëre mae mo karek-karek nakon ëngan gwehen hap. Sap Kristus hen aha-rok'nen zëre mo timni domba

makan golguku, hen Zen molya etan kirekam gwëka.

11 Alap mo golak de syal ta gwen wenyä in kim nonol ol ziaha-en gunnu insa syal nei gwibirin, zen mwin-mwankam zi mo otweran kap gulhal zanna waba hap Alap hap de kalsnak tru dasik tine gwenan. Hwëna dekam hom zini anakan neis gwibirin, "Ano karek-karekna mes ngan gwe henan."

12 Hwëna Kristus Zen domba makan aha-rok'nen te-lidak sonnäk tilki- dekam de hëndep denaban nëno mae mo karek-kareksa ngan gulsuzimdin hipye. Kirekam kim nëbe mae hap de Alap mo golak de Teipsin Zini in syal gwibirsiki, Zëna dekam zep Alap mo dam taha nakon nikinki.

13 Zen angkam nama dekon eissi'ira- hëndep Alap de tingare zëno jal zisi zëno tana iltikinnik sisik gul irinnik dep.

14 Zep Zen kim domba makan aha-rok'nen tilki, Zen dekam tangan zep hëndep denaban karek-karek nakon nësa ngan tasibirki- tingan men desa Alap osan dep zon guluda'araye.

15 Alap zëre mo Enhona hen man eiwa gu'ura, Zen zep anakan guku,

16 "Ngein sin insa etan ola ziaha-en gu'uk,

Èe asa zëno mae mo enhonak titi tabin ol ësena ale gulzim.

Zen zep sa desan en aha-ere enlalakam ang ta gwer."

17 Zen dekam hen anakan mas gulku,

"Èe asa zëno mae mo karek-karekna tap gulsuzim.

Dekam molyë etan zëno mae mo karekna enlala gwe-gwibik."*

18 Zep nëno mae mo karek-karekna insa mes kitak Bian Alap hëndep denaban eititi gwibirki, zep nen angkam home ëdwam gwe-gwe'an-ba maesa de etan zëbe hap tru tasik gweblan hapye.

* 10:7 10:7 Mzm. 40:7-9 * 10:17 10:17 Yer. 31:33-34; Ibr. 8:10-12

Mae hap de ol: Nen Bian ensa dawemkam taïbliëlan.

¹⁹⁻²⁰ Zen in zep, aya-wal oso-wal, Yesus in kim domba makan te-lidak sonnak tilki, nen dekam zebe airin srëmkam Alap hap nère mae mo abena yaing il gweblanan- zère en tangan hap de teksonnake. Zep Yesus mes ora esena nèbe mae hap sal tazimki- hëndep dikim engaya gwen hap de ora naye. Sap in kim zère mo kala ban Alap zère en tangan hap de teksonnak goltiki, Zen dekam zep deyol glaing-glingkim de lilikinni in sa talusuku. Zep nen angkam Yesusu de ang gweblankam zebe Alap onak yaing gwegwenan, sap zëno timni zen san de nèbe mae hap de lilikinni kiye.*

²¹ Zep angkam nèbe mae hap Alap mo golak teipsinkim Yesus Zën gwë'ara.

²² Zen in zep, nen Alap hon yaing gwegwen, sap nen ema tingare enho naban Kristus en hon eyaing gwe kini gwe'an. Sap nesa mes Kristus zère mo kalkam blis tibiridaka, hen tim niban enho naban mes ho lalakkam nesa ngan tasibirki. Zep angkam nëno mae mo enho nakon anakare enlalana hom wet so gwenan, "Ano karek-karekna nama Bian mo nwenak lwa'an."

²³ Zep nen anakare enlala naban nen tatem ezauk gwen, "Alap zère mo nesa de gu-gubiridanna Zen sa hëndep kirekam nèbe mae hap golzimdi, sap Alap Zen taïbliëlan tanganna." Sap nen kirekame aha zi hon ekira gwegwenan, zen in zep nëna hen zewe en nen tatem ezaun.

²⁴ Zen in zep nen enlala naban lowehe gwen- ekakim nënaka titi la gwibik, nënaka de kwasang gwibirida gwen hap dena kim, hen dawemsa de tingare zi hip gol gwizimdin hip dena kim.

²⁵ Hen Kristen zi de tagal gwennak de ang gwen hap bahem baes ta gwen- men kirekam ahakon egwë gwenanye. Hwëna nen nen nënaka titi ta gwibin, hen kareksa de gon

hap nen nënaka jalse gwibirida gwen, sap Bian de hatan hap de yaklana angkam man tangan golek de gwe'an.

²⁶ Zen in zep, nen nënaka dawemkam titi ta gwibin. Sap nen mese eiwa de orana dam lasik. Hwëna kire nike eirim kareksa ol gwe'ak, dekam etan nara molya nëno mae mo karekna in sa ngan gulsuku.

²⁷ Hwëna kire nike kirekam egwë'ak, dekam aha-en tangan nèbe mae hap lwazim'in: Zen serkam de syauk bla sal-salak de etaïblin hap dena- men zewe sa Alap zère mo jal zini yal gul serake, desa de airin niban esëlan hap dena.

²⁸ Emki sap enlala gwen: Musa kim irik gilki, dekam ahanik de zère mo titi tabin ol san ang gwen hap baes gwenkam, desa man damera gwëk. Zi de dan ahaksa dan-ahan anakan ekira gwenkam, "Zini in eiwa mes kirekam karek gwëka," kirena man damera gwëk. Dekam kire zisi hom kwasang neibirida gwëk.

²⁹ Sap kirekam in sa orep neibirida gwëk, zen in zep men zen angkam Alap mo Tanena ansa tanakam nyauk gwebla'an, zèbe mae hap banakan sa lwazim? Sap zëno kala mes desa dikim ngan tasibin hip hlëwehek. Hwëna kire zini Yesus mo kala in sa asyas makan enlala nei gwibirin. Zep zen hen Alap mo zi niban de ol ziaha-en gun esena in san de ang tan hap man baes ta'an. Zep hen Alap mo Enhona man lamang da gwenan, hwëna Zen sap diki Dekon Alap mo kwasang-kwasangna tame nul gwenan.

³⁰ Zep kire zi hip, karek tangankam sa lwazim. Sap nen ema Alapsa tame la'an- men Zen anakan gukuye,

"Kareksa de syal gwegwibin wenyaz en Aen asa desa karek tabir. Eë asa zëno mae mo syal eini zèbe mae hap golzim."

* 10:19-20 10:19-20 Ibr. 4:16

Zao hen man mas gulku,
 “Èe asa ère mo hlil irin zisi klis
 gul.”*

³¹ Zep nen bap nen Alap mo Tanena tanakam zauk gweblan, sap nen de Ngaya Zini Alap zère mo jalsa goltowenkam, zen aïri gwibin tangan wenyanya zen.

³² Bahem èeititi gwe-gwen- em kim nonol Kristussu eirink hen zèno ngatanna hla kukke. Emsa dekam man aha zi sèrkam karek da gwibik, hwèna em zao ene ki tatem èzauk gwèk.

³³ Emsa dekam zi nwenak swrè da gwibik hen dangole gwibik. Hen ahasa kim kirekam neibirida gwèk, hwèna em ema desa aïrìn srèmkam mas eibirida gwèk.

³⁴ Emsa kim ahakon bwinak yal nulne gwèk, em hwèna ahakore wenyanya embwan hap gosae labirida gwèk. Kristus hup de jal hap kim eno mae mo kire-kirena kítak alal da gwèk, em hwèna ema èisrip-sri gwe-gwèk. Sap em ema dekam èenlala gwe-gwèk, “Èe asa ngein sin dawem tangan wenyanya goltower- hèndep de lwa gwen hap denaka.”

³⁵ Zen in zep, men kire enkame Yesussu de yaïng gwebla kinì gwen- nak tatem èzauk gwèk, zen kire enkam emki hèndep lowehe gwen. Ki dekam Alap onakon dawemna mam tangan naka esa ulin.

³⁶ Zep kire enkam em tatem èzauk gwen, sap zen dekam esa Alap mo ebe mae hap de dwam gwibir- zimdinni su kul sone gwer. Hèndep zep esa zère onakon ulin- men zep emsa gu-gubirida gukuye.

³⁷ Sap Alap mo olak man lwak,
 “Zini men Desae kara è gweblanan,
 Zen naba tangankam sa hata zala.
 Zen molya zère mo hatan hap de yaklana esek gulku.

³⁸ Zini men zen ano nwenak èdakastil gwenan,
 zen Asa de taïbliplan en nakon sa ki èngaya gwer.

Hwèna Asa de taïbliplan wenyanya men zen Asa hli da'ak,
 Èe hen asa desa tahansa gweisibirid- dal.”*

³⁹ Hwèna nen molye Biansa hli lak-juwen ora san de etan lwan dahan hapye. Sap nen an zen- tatetekam de Biansa taïbliplan wenyanya, hen hèndep de èngaya gwen hap de wenyanya.

11

Mae hap de ol: Men zen Alapsa orep dawemkam daïbliplan, nen hen zèno mae mo kim nen lowehe gwen.

¹ Alapsa de taïbliplan, zen anakan de enho nakon taïbliplan, “Mensa Alap asa gubluka, zen eiwa kirekam sa ki lwal.” Zen sap nwekam de hlaun srèmkam de kirekam taïbliplan.

² Sap orep de zini zen kirekam Alapsa daïbli gweblak, zen zep Alap anakan sam gwesibiridaka, “Zen ère mo nwenak èdakastil’in.”

³ Alapsa de taïbliplan zen dekame anakan tame ul gwenan, “Okamana an Alap ol-gun enkam yang gulsuku.” Zep men desae nwekam hla kul gwe'an, Zen nwekam de hlaul gwen kire-kire nakon hom yang gulsuku.*

⁴ Habel Bak zen Alap hap zère mo taïbliplansa goltrèblaka- in kim dombana tru ta seblakaye. Hwèna Kaen zen hom Habel mo kim Alapsa taïbliplan, zep zèno kim syal gwe srèm gwèka. Habel ensa zep anakan gubluka, “Zen ano nwenak man dakastil'ira.” Hen Zen zep zèno en mo syala in sa sam gwesibir- blik. Habel zen sap orep mes tilki, hwèna zèno Alapsa de taïbliplan in nèbe mae hap èrak makan nama lwazim'in.*

⁵ Hanok Bak zen hen kirekam Alapsa taïbliplan, zep tin srèmnak Alap ngatan zi mo lang san dep zer ine halka. Zep Alap mo olak zèbe hap dena anakan lwak,

* **10:30 10:30** Ul. 32:35-36 * **10:38 10:38** Hab. 2:3-4 * **11:3 11:3** Kej. 1:1; Mzm. 33:6; 33:9; Yoh. 1:3 * **11:4 11:4** Kej. 4:3-10

“Zen mumuk ennak aya gweka, sap desa Alap zer ine halka.”

Mae hap ki lwak: Sap zer inehan srëmnak Alap man desa sam gwesik gweblaka.*

⁶ Zen zep dam gwesinin: Zini bëjen Alap mo nwenak sam gwesin-Zënaka de taibliblan srëmkamye. Zep zini men zen Alap osan dep ëdwam gwe-gwe'an, zen diki nonol Alapsa zen anakan taibliblan, “Zen eiwa ki gwë'ara,” hen anakan zen taibliblan, “Ëyë Desa tîngare enho naban të gwebla'ak, Zen sa abe hap dawemsa gol gweblala.”

⁷ Nuh Bak hen Alapsa taibliblaka, zep bulu insa syal gwibirki- dekam de we wal walas zeban golëngaya gwen hapye. Hwëna kirekam de owasna hom sap menkam hla nuk. Hwëna Nuh Alapsa betek gweblaka, zep zëre mo ol en san ang gweka. Hwëna zëre mo Alapsa de taibliblanna in kon zep sap taibliblan srëm wenya kip anakan goltrei gwizimki, “Em in kareksae ol gwenan.” Zen taibliblanna in kon zep Alap mo nwenak dakastilki.*

⁸ Abraham Bak hen kirekam Alapsa taibliblaka, zep zëno ol san ang gweka. Alap dekam man gubluka,

“Emki ere mo langna insa hli yun. Dekam song gwe- langna men desaë ebe hap golbla'ak, zëwe dep.”

Abraham dekam man taibliblaka, zep totoresä tawa srëmkam song gweka.*

⁹ Kim hataka, langna men zao dep Alap gu-gubluka, dekon hen nama taibliblaka. Zen zep zëwe zi mo langnak tenda golak gwë nasen gweka. Isak ne Yakob ne zen hen kirekam ë gweka, sap Alap hen desa kirekam gu-guzimki- men kirekam Abrahamsa gu-gublukake.*

¹⁰ Abraham kirekam zë gwë nasen gweka, sap zen dekam ngein sin

dep dena kip anakan taibliblaka, “Ëe asa hëndep de ë sam-samnak hatal- men desa Alap Zëna syal gweblakaye.”

¹¹ Zen man hen Alapsa taibliblaka, zep hëndep walas gweka. Zen sap mes bogol gweka, hen we zem Sara hom walas gwe-gwek. Hwëna Abraham anakan Alapsa taibliblaka, “Mensa asa walas wë lan hap gu-guzimki, zen hëndep kirekam sa ki abe nikip syal gwibir-zimdi.”*

¹² Zëno timni man sap tîn makan lwabla'ak, hwëna zi ausuna Israel zen zëbon onakon ki beya gwe song gwek- men kirekam Alap hamal hap gu-gublukake,

“Ebon onakon sa zini beya gwe song gwer- san de nglinak de keisni kiye, ahaksa hi alpnak de hisglimni kiye.”*

¹³ Orep de zini in, zen sap man Alapsa daibli gweblak, hwëna Alap mo gu-gubiridanna insa de sowe henkam gul irin srëmnak juwe gwek. Zen langanak de basa kara gun makan kara nul gwek, hwëna zep en ki ëisrip-sri gwe-gwek- san de zao de lowe henna kiye. Zep anakan hen ëgu gwek, “Ëe an okamanak awe bohëkamë ki lowe he'an- san de aha zi mo langnak de lowe henna kiye.”*

¹⁴ Men zen kirekam ëgu gwe'an, zëno mae mo enlalana zep man lwa gwizim'ira, “Nen ema aha langsa lei gwibi'in- desa de hëndep denaban bi gwibin hip.”

¹⁵ Orep de auyan-azana in, langna mensa hli nuk, desa hom enlala nei gwibik. Sap kirekam de lwananam, dekam maka etan desan dep lwan dahak.

¹⁶ Hwëna zen dekam aha lang sam-samsa enlala nei gwibik- ngatan zi mo langnak de wenyaka. Zep Alap hom saher gwibirida

* 11:5 11:5 Kej. 5:21-24 * 11:7 11:7 Kej. 6:13-22 * 11:8 11:8 Kej. 12:1-5 * 11:9 11:9 Kej. 35:27 * 11:11 11:11 Kej. 18:11-14; 21:2 * 11:12 11:12 Kej. 15:5; 22:17; 32:12 * 11:13 11:13 Kej. 23:4; 1Taw. 29:15; Mzm. 39:13

gweka- zini in kim “ano mae mo Alap”kam nen gweblakye. Sap Zen mes eiwa zēbe mae hap ē sam-na in sa hamal tazimki.

17-18 Abraham hen zēre mo Alapsa de taibliblansa goltrēblaka, zep tane aha-ere zem Isaksa sap Alap hap zip sobla'anka. Alap man sap dekam zēno eisi anakan akasibir-bli'anka, “Zen san ha eiwa tangankam Asa taiblibla'ara?” Hwēna sap mes Alap Abrahamsa anakan gu-gubluka,

“Eno walasna an, Isak, zen zēbon onakon sa eno auyan-azana naitbir song gwer.”

Hwēna sap mes kirekam gu-gubluka, hwēna Abraham man hohle gwe'anka- tane aha-ere zem in sa de Alap hap zip soblan hapye.*

19 Sap zen man anakan taiblibla'anka, “Zen sa ano tanena tīn nikon etan ngaya tala.” Hwēna dekam kim Alap dombana in sa zertrēblaka, desa de hwēna zip son hap, zep dekam tane zem in man nwe-mase gweka- san de tīn nikon de etan ngaya gwenna kiye.

20 Isak hen Alapsa taibliblaka, zep walas dare zem Yakob ne Esau nikip tahana tehazim aneka-anakare hamal hap de ola banye, “Alap sa ngein sin kirekam ebe nikip dawemna gol gwizimdi.”*

21 Yakob hen Alapsa taibliblaka, zep tīn hīp kim golek de gwe'anka, tane zem Yusup mo walas dare hap tahana tehazim aneka. Ki zep hwēna zēre mo dute topnak de bik dankam lwa inen nakon Alap hap dawemna golblaka.*

22 Yusup hen Alapsa taibliblaka. Zep kim tīn hīp golek de gwe'anka, dekam zep zēre korena Israelsa de Mesir kon gwiswe sonen hap de aīsīli hli yulzimki. Hen anakan gu-

biridaka, “An kon de sek gwenkam ano danna bahem awe hli tandan.”*

23 Musa mo ane-biana, zen hen man Alapsa laibliblak. Zen zep Musasa dan-ahare benkam aning la gwek. Sap zen anakan dam lasik, “Walasna an dawem naka Alap ap zerzimki.” Zen zep anakan aīri srēm gwek, “Mesir mo teipsin nik sa nēsa karek sola.”*

24 Musa Bak hen Alapsa taibliblaka, zep mam gwennak anakan enlala gweka, “Asa bap zen anakan gu gweblan, ‘An Mesirk de teipsin zi mo wenam mo tane.’”*

25 Zen hom dekam auhu-kama ennak dep de dērekna anakan enlala gwibirki, “Ēe anik karek naka gol gwek- zēno dērek naka akakim eis gwibik.” Zen hwēna anakan enlala gweka, “Ēe sap asa Alap mo hlil irin zi niban apdekam karekna zigoltowe gwer.”

26 Zen hen ngein sin denaka anakan enlala gwe-gwibirki, “Alap sa Israelsa de ngaya tabin hip de Zini zer sonera. Zep ēe anik Zini in hap orasa sal tablak, hen sap asa zēno bose hap karekna goltowe gwer.” Musa hom dekam anakan enlala gweka, “Syala ansa anik baes gwibik- ēe akakim Mesir mo kire-kire dawem-dawemna ansa beyakam bi gweblandak.” Zen hwēna Alapsa anakan taibliblaka, “Zen sa ano syal eini lamkam abe hap golblala.”

27-28 Hen zen Alapsa taibliblaka, zep Israel mo zi ausu nakore zini gubiridaka- zen de domba kalkam zēre mae mo lilikinsī blis tīblandan hap, Alap mo dam taha nakore jal zi dikim zēno mae mo nonol zi walassa tameran srēm hapye. Yaklana desa “Paska”kam zep nen gwibik. * Mesirk de teipsin

* 11:17-18 11:18 Kej. 22:1-14; 21:12 * 11:20 11:20 Kej. 27:27-29; 27:39-40 * 11:21 11:21 Kej. 47:31-48:20 * 11:22 11:22 Kej. 50:24-25; Kel. 13:19 * 11:23 11:23 Kel. 1:22; 2:2 * 11:24 11:24 Kel. 2:10-12 * 11:27-28 11:27-28 “Paska” mo enlalana “gulumrun.” Zen kirekam yaklana in sa nen gweblak, sap domba kala in sa de zēno mae mo gol lilikinnik hlaunkum, dekam walas tameran hap de Alap mo dam taha nakore zini in man gulumun nura gwe'anka. (Kel. 12:21-51)

zini kim sap jal gweka, Musa hwëna Alapsa taïblihlaka, zep Israelsa airin srëmkam dekon golësek gweka. Zen dekam man tatem zauk gweka- san de hla ta gwen srëm Zini Alapsa de ngein sin kara ta gwenna kiye.

²⁹ Israel mo zi ausuna in hen Alapsa daïblihlak. Zen zep hi bosena Kal-kalasa tablan gwek- san de eik sasa san de sek gwenna kiye. Hwëna Mesir mo jana nabare zini kim sap hina in san nolëtro kinî'ak, zen zao zep kei-king gwek.*

³⁰ Zi ausuna in zen hen Alapsa daïblihlak, zep tuju yaklakam kim ë yala Yerikosa hatablan hap wale da gwek, hwëna dekam zep zëno mae mo kasokam de kol son yala in owaskam lik gweka.*

³¹ Rahab Bak sap Yerikok de kahaloson we. Zen hwëna dekam Alapsa taïblihlak, zep desa nul srëm gwek. Sap zen mes dekam Israel kore otek zi darena teisyaink. Hwëna zëre mo ë nakore zi trana in zen Alapsa de betek gweblan hap baes tak, desa tïngan en tangan zep damerasik.*

³² Sap kirekam de aïsili beyana, hwëna yaklana blalaka hom- desa de tïngan emsa aïsil gwibiridan hapye, ahakon in zen hen Alapsa zëno mae mo kim daïbli gweblakye, in ki hen Gideon, Barak, Simson, Yefta, Daud, Samuel, hen orep in zen Alap mo ola ayang nulzimmira gwekye.*

³³ Zen hen Alapsa daïbli gweblak, zep eijannak ahakon ëyeyëk gwenda gwek, hen dam-dam enkam zëre mae mo irik gin langnak de zini irik nilida gwek. Zep kire wenya, Alap mensa Israelsa gugubirida gweka, zen hen man nulin gwek. Zen zëre mae mo Alapsa de

taïblihlanna in dekam zep singa jal-jal mo mipna owas hap mat dasik gwibir-zimk,*

³⁴ hen syauk hitin yawala dekam tin disik gwek, hen nëbok ngi benben nakon ëlanga gwesik gwek. Zen sap man zënaka anakan neibirida gwek, "Ëe an soston naka hom," hwëna man ki ësoston gwegwek. Aha lang nakore zini kim sap napta gwibirzik, hwëna zëno mae mo soston de hlaunkum dekam zep heya-hya gwe-gwek.*

³⁵ We walya hen ahakon Alapsa daïbli gweblak. Zep zëno mae mo iyena kim sap juwe gwek, hwëna zëno mae mo Alapsa de yaïng gwebla kinin nakon zep etan ëngaya gwe-gwek.*

Hwëna ahakon zëno mae mo Alapsa de taïblihlansa srën noltrë gweblak. Sap desa kim Alap hap de jal hap bwinak sesek nulin gwek, zen hom tol wet so gwegwek. Sap desa man zë tangolebin niban nenbirida gwek, "Emki ere mae mo Alapsa lamang tan, dekam asa emsa uswe soner." Hwëna zen man kirekam dep baes tak, sap zen anakan ëenlala gwe-gwek, "Zen sap sa nësa damera gwer, hwëna Alap sa kire hap de dawemna lamkam nëbe mae hap golzimdi-Zen kim de juwen nakon nësa luwen tabi'inkaye." Zep ki hëndep Alap hap de jal hap karekkam damera gwek.

³⁶ Zep Alapsa de taïblihlak jal hap ahakorena lamang da gwibik, hen ben-ben kire-kirekam lek-lek da gwibik. Hen ahakon besi dokotkam de tahalebin nika bwinak sesek nulin gwek.*

³⁷ Ahakon kasokam tok hap niribirida gwek. Ahakon ngaya naka gergajikam blom da gwibik, hen ahakon nëbokkam blom da

* **11:29 11:29** Kel. 14:13-31 * **11:30 11:30** Yos. 6:12-21 * **11:31 11:31** Yos. 6:22-25; 2:1-21

* **11:32 11:32** Hak. 6:11-8:32; 4:6-5:31; 13:2-16:31; 11:1-12:7; 1Sam. 16:1-1Raj. 2:11; 1Sam. 1:1-25:1

* **11:33 11:33** Dan. 6:1-27 * **11:34 11:34** Dan. 3:23-27 * **11:35 11:35** 1Raj. 17:17-24; 2Raj. 4:18-37

* **11:36 11:36** 1Raj. 22:26-27; 2Taw. 18:25-26; Yer. 20:2; 37:15; 38:6

gwibik. Zen tahalha tol hap domba-kambing sop nakore tayalbin pakeansa alala da gwek. Tembane hap hen man tangan ëtahalha gwe-gwek, sap desa karekkam jap nul sonenda gwek.*

³⁸ Kire wenyä, zen hëndep de langnak de lowehen hap denaka enlala nei gwibik, zep zëbe mae hap hom dakastilzimk- auhu-kamanak de lowehe gwen hapye. Zen zep al ta nasen gwek- sap zi srëm lang san, hen kwatap-kwatap san, hen kaso-hul kaso-hul san, hen kama hul mae san sap ani-ning gwenda gwek.

³⁹ Zen kitak zëre mae mo Alapsa de taibliblansa kirekam noltrë gwe-blak, dekam zep tangan Alap sam gwesibiridaka. Hwëna zen hom mae okamanak awe noltowek- Alap mensa dawemsa de golzindin hip gu-gubirida gwekaye.

⁴⁰ Sap Alap mo dawem golzindin hip de kalangna in, zen zëbe mae en hap hom. Zen hwëna kitak nëban mae dep. Zep zen molya nonol zë-en Alap mo gu-gubiridanna insa kitak nulink- nen de zëwe hen yaing gwen srëmnakye. Nen kime zë hen yaing gwe'ak, zen diki dekam esa sërkam de dawem tangan wenyä insa apdenak ulin.

12

Hlu-hluk gwenkam de Yesus osan ëdam gwesikhan hap de ol:

¹ Zen in zep, Alapsa de taibliblan wenyä in zen orep juwe gwek, zen angkam nësa neisbirida gwe'an, hen nësa man kara tabin niban wale da gwibi'in- anakare enlala naban, "Nabakam yaing gwezak." Zen in zep, nen diki dohon-hon kire-kirena nen kitak tatansin- jahalha enkam eka hlu-hluk gwek, ngein sin dep dena insa dikim dokwak gun hupye. Nonol tangan nëre mae mo karek-karekna nen tatansin, sap zen zen nëno mae mo danna hëre gwenan. Sap enlala tatetekam de desan dep

* 11:37 11:37 2Taw. 24:21

hlu-hluk gwen hap de orana, Alap mes nëbe mae hap hamal tazimki.

² Hlu-hluk gwenkam diki Yesus en osan nen ëdam gwesikhan. Sap Kristen zini nëno mae mo taiblibin hip dena, Yesus mes ora makan sal ta guku, hen nëbe mae hap de ërak tanganna, Zen Yesus Zëna. Sap Zen mes zëre mo Alapsa de taibliblan nakon enlala tatete naban karekna goltoweka- te-lidak sonnak kim makan da inkke. Zen hom dekam anakan enlala gweka, "Te-lidak sonnak de tinni, zen saherak Asa nën ne'an." Sap Zen dekam ngein sin dep dena insa, isrip-sri gwibin tangan wenyä, kara gu'unka. In zep hëndep angkam Alap zëre mo dam taha nakon teipsinkim nikin'ira.

³ Emki Yesussu enlala gwe-gweblan- Zen kim nëbe mae hap karek yala insa enlala tatete naban goltowekake, karek gol gwen zini in kim sërkam karek dakke. Kirekam de Yesussu enlala gwe-gweblankam, ki em molye na-en ësin gwe hana gwek, hen enlalana molye ëdowe hana gwek.

⁴ Sap kareksa de gol gwen srëm hap de eijannak iwe, em home mae juwen hap ëalp gwesin'in.

Mae hap de ol: Bian man zëre mo walas tangan mo kim nësa oto tasik gwibirida.

⁵ Hen Bian Alap mo ola bahem ëeititi gwibin- men kim nëno mae mo enhosa de tatete tazimdin hip "ano walas" kam nësa gubiridakaye. Zen dekam anakan nësa gubiridaka, "Ano walas, bahem Asa salsik gwe-blan-

Ëe de emsa oto tasik gwibinnik.

Hen bahem enlalana ëdowe hana gwen-

Ëe de emsa jalse gwibirida gwen-nakye.

⁶ Sap mensaë kwasang gwibirida gwenan,

Ëe desa ama oto tasik gwibirin.

Hen mensaë anakan enlala gwibirida gwenan, 'Zen ano walas,' desa ama lek-lek ta gwibirin."*

⁷ Zep emsa de Bian oto tasibinni, zen zao en emki enlala tatetekam ëzauk gwen- anakare enlala naban, "Sap sa Bian kirekam asa oto tasili, sap okamanak de zini hen kirekam walas zemka oto dasik gwibirin."

⁸ Emsa de oto tasik gwen srëmkam, dekam de dam gulsun, "Ëe an zëno walassa hom." Sap walas tangan zemka Zen bëjen nwe enkam kara tabin.

⁹ Nen ema nère mae mo auhu-kamanak de biansa blikip eisibirida gwëk- zen kim nësa oto dasik gwibikye. Zen hen kirekam nen nère mae mo ngatan zi mo langnak de Biansa aha-ere enlalakam nësa de oto tasik gwibinnik blikip gwesik gweblan, sap zen dekam esa ëngaya gwer.

¹⁰ Nère mae mo auhu-kamanak de bianna, zen holokam hom nësa oto dasik gwibirin- zen kim sap zère mae mo enlalakam nësa kirekam neibirida gwenanye. Hwëna Alap Zen nësa de mas gwibiridan hap kirekam oto tasik gwibirida- dekam de zère onak enlala lalak nik lowehe gwen hap, Zëna men kire nik gwë gwendake.

¹¹ Hwëna eiwa, Bian mo nësa de oto tasibinni insa kim oltowe gwenan, desa enlala dowe hanankame eis gwibirin. Dekam nen home ëisrip-sri gwe-gwenan. Hwëna men nara dekam zère mo gwënsa Alap mo dwam gwibin sin li yul sonenkam, zen dekam sa anakan eis-biri, "Eiwa, ëe an Alap mo taha terenakë gwë gwe'an. Zën ki asa kirekam oto tasiki- ëe dikim damdam enkam gwë gwen hapye."

¹² Zen in zep, eno mae mo tahana in zen ësin-sin gwe-gwe'an em sason tabin, hen danna men zen ëyal-yal gwe-gwe'an emki tatete tabin.

¹³ Ere mae hap de orana damdam lasik. Dekam in zen zi lek

makarena ebon mae onak lowehe gwe'an, zen desan sa dawemkam sek gwer, hëndep ësozon gwe song gwer.*

Alapsa de hli tan srëm hap de ol:

¹⁴ Emki dawemkam ëalp gwe-gwen- dekam de tingare zi niban enlala sësekkam lowehe gwen hap. Hen enho lalak enkam de lowehe gwen hap emki ëalp gwe-gwen. Sap lalakkam de lowehe gwen srëmkam, em bëjen em Bian onak yaing gwen.

¹⁵ Dawem! Ebon mae onakon mana ahanik Alap mo kwasang-kwasang nakon wet sonanka. Ki hwëna zëbon onakon sa zi beyanak Alapsa de taibliblan srëm hap de enlala ing gwe hebiridala- san de hëp nabare hosa de golzimdin makan. Dekam hwëna beya nik sa Alap mo nwenak ëkun gwer.

¹⁶ Ebon mae onakon bap zen aha maena kahalonak zaran. Hen em bahem Esau Bak mo kim lowehe gwen, sap zen Alapsa eititi gwëblaka. Zen sap nonol walaskam gwëka, zep zen maka bi zik de tinkim zëno bi gwibin kire-kirena kitak bi gweblan daka. Hwëna zen aha-ere tembane piring en hap lirak gulku.

¹⁷ Zen kim sap hyanak bi zik de aumwa hap tahasa tehabla inen hap dwam gwëka, Alap dikim zëbe hap dawemsa golblan hap, hwëna bi zem in man gubluka, "Bëjënë." Zen sap go naban aberbe taka, hwëna zen de gul irin hip dena mes tap gwëk.

Mae hap de ol: Nonol ol ziaha-en gunnu, zen aïri gwibin hip dena. Zau dena, zen isrip-sri gwibin hip dena.

¹⁸ Nen an zen ëKristen gwëk, nen home Israel mo kim okamanak de kwatap tangannak yaing gwe'an- dekam de Alapsa golek de tan hapye. Zen orep kwatapna Sinaik yaing gwëk- Alap kim nonol ol ziaha-en gunnu insa golzimkiye. Zen dekam

* 12:6 12:6 Ayb. 5:17; Ams. 3:11-12 * 12:13 12:13 Ams. 4:25-27

syauk hitinsä zë kara nuk, hen man zë kaulsuk, hen asese yawal zë tailbiridaka. Zen dekam zep airin hip enlalana edowe hanak.

¹⁹ Nen home zëno mae mo kim sramin aukuna esane gwe'an- hen Alap mo ol auku yawalaye. Zen kim desa nasalzimk, zen dekam zep eabe gwek- ola insa de golzausun hupye.

²⁰ Sap zen jalse gwen ola insa man tangan serkam nairibi'ik. Sap zen anakan lwak,

“Men nara zi, sap otweran, kwatapna ansa towanblanna, desa em kasokam tok hap i tiblan.”*

²¹ In kim zen kirekam hla nuk, man tangan serkam dohon-hon gwizimk. Musa Bak zëre hap hen man tangan dohon-hon gweblak. Zen in zep anakan guku,

“Eë dekam ama airin hip yal-yal gwek.”*

²² Hwëna nen angkam kwatapna Sionk mese isrip-sri naban yaing gweser- Ngaya Zini Alap zëre mo enakye, mensa hen nen gweblananke “ngatan zi mo langnak de Yerusalem”kam. Dekon zëre mo dam taha nakore zini ribu-ribukam nësa isrip-sri naban dokwa-kwak nul gwenan.

²³ Em mese hen angkam Alap mo hlil irin zinik bitï gwer- men zëno mae mo bosem-sesa ngatan zi mo langnak ale dabir-zimkye. Alap zëre mo hlil irin zini insa man anakan enlala gwibirida gwenda, “Zen kitak ano walas.” Zep emsa hen mes angkam Alap lup gul iri- men Zen sa tingare zisi klis guluye. Hen zini men zen orep enlala dam-dam enkam lowehe gwek, zen angkam mes tangan Yesus mo kala kon engan gwehek, zep zëno mae mo angna angkam zëwe lowehe gwe'an. Em hen angkam mese zëbon mae bitï gwer.

²⁴ Em mese hen Kristus hon yaing gwer- men Zen nësa Alap osan

dep zon guluda gwe'araye. Sap Zen Zen zi niban de ol ziaha-en gun esena insa nëbe mae hap syal gwibir-zimki. Zep emsa hen angkam mes zëre mo kalkam blis tibiridala. Zëno kala Habel mo kal makan hom lwa'an. Sap Habel mo kala kim zannuk, zen zep Alap hap tantan makan anakan lwablak, “Zen Kaen taka.” Hwëna Yesus mo kala, zen dekon Alap nësa anakan enlala gwibirida'ara, “Zëno mae mo karek-karekna mesë ngan gulsuzimk.”

²⁵ Zen in zep, nen bap nen Alapsa hli tan, sap angkam Zën ngatan zi mo lang nakon nësa tonbirida gwe'ara. Sap Musa Bak kim auhukamana an kon Israel mo zi ausu hap Alap mo ola ayang gul gwizimki, men zen nasalbla srëm gwe-gwek, zen Alap mo jala kon hom mae easendak. Hwëna angkam nësa Alap Zën tangan ngatan zi mo lang nakon tonbirida gwe'ara. Zep nen de salblan srëmkam, nësa sa tangan karek tabiri.

²⁶ Alap in kim kwatapna Sinaik tonbiridaka, zëno ol auku yawal hap kamana an man ewak gwek. Hwëna angkam Alap mes nësa etan gugubiridaka,

“Angkam okamana an ensa molyë ewak guk. Hwëna ngli naban asa aha-rok'nen apdenak ewak sol.”*

²⁷ Insa “aha-rok'nen” de ewak son hap guku, zen man dam gwesi'in: Zen tingare okama yala ansa yang gulsuku sa ewak gulu, hëndep sa jek-jak gwer. Hwëna ewak gwen srëm hap dena aha-en, ngatan zi mo lang, zen en nama sa lwala.

²⁸ Zen in zep, sap nen Zëbon onakone ewak gwen srëm hap de lang sam-samna insa bi eibi'in, zen zep nen dawemna gol gweblan- men kirekam Zëna nësa dwam gwibirida gwendake. Zep nen enho zon tasiblin naban hen airin niban nen boklesa kom ta gweblan.

²⁹ Sap Alap mo ola zëre hap dena anakan lwak,

* 12:20 12:20 Kel. 19:12-13 * 12:21 12:21 Ul. 9:19; Kis. 7:32 * 12:26 12:26 Hag. 2:6-9

“Nëno mae mo Alapna, Zen syauk hitin yawal makarena kim sa nësa klis gul zula.”*

13

Bian mo nwenak de kirekam lowehe gwen hap de ol:

¹ Kristen bose omka de kwasang gwibirida gwenna bahem golzausuk gwen, sap zen san de hen ere mae mo iye tanganna kiye.

² Emki hen ere mae mo tame tabin srëm Kristen bose wal omka gola kon lup gulin gwen, sap orep ahakon hen ki tame tabin srëmkam Alap mo dam taha nakore zini lup nulin gwëk- zen kim zi tangan mo kim ëjowe gwe zakye. Zep kire zi mae mes ebon hatanan zala.*

³ Men zen hen bwinak lowehe gwe'an emki enlala gwibirida tine gwen- men ki hen en de zë lowe henna. Men desa Alapsa de tame tan srëm wenya karek da gwibirin, desa hen em kwasang gwibirida gwen- san de enaka de karek tabinni kiye.

⁴ Emki anakan ëenlala gwe-gwen: “We-zi dare de zënaka leisyanna, Zen mes Alap aha-en soka.” Zep we walya barena hen zini bare wenya, em kime enaka kap lak, em ema Alapsa hen en guk gwëblak, “Ëe an deban en asa ë gwer.” Zep ere mae mo Alapsa de gu-gublunna insa bahem ëkahalo gwenkam gulmun gwen. Men zen zëre mae mo holehle san ang ta gwenan hen kahalo sosen wenya, desa Alap molya karek tabir srëm gwëka.

⁵ Te-ala beya gwen hap de enlalana bap zen emsa bi gwibirida gwen. Emki anakan ëenlala gwe-gwen, “Mensa ap Alap gol gwizimnira, zen syake.” Sap Alap Zëna man emsa gu-gubirida'ara, “Ëe molyë emsa kwasap walas mo kim da tasibik.”*

⁶ Zen in zep Alapsa de taïblïblan naban nen ëgu gwen,

“Bian Zen Zen-asa de mas gwe-gwëblan hap de Zi niye.

Ëe ba hap de zi bosyansa airïbirida gwen hap?

Sap zi mo sosonna hom-asa de banakan mae gwëblan hap denaye.”*

⁷ Men zen nonol Alap mo olkam emsa tawa da gwëbik, emki desa enlala gwibirida gwen, “Zen kirekam lowehe gwëk, hen Alapsa de taïblïblannak de tatem ëzauk gwënnak kirekam juwëk.” Zep em hen zëno mae mo kim em tatem ëzauk gwen,

⁸ sap Kristus Yesus Zen hom wet gwesik gwënda- sap orep, angkam, hëndep denaban.

⁹ Totore tawa tabin ëse san bahem ang ta nasen gwen. Diki Alap mo kwasang-kwasang ennak em tatem ëzauk gwen, hen kwasang-kwasangna in dikire eno mae mo enhonak bol-zaun gwëk. Zi de emsa titi tabinni Alap hap de tweran blom ta gwëbinsi de twinbin hip, ahaksa tembane maesa de Alap hap ëlwa gwen hap, bahem desan ang ta gwen. Sap men zen desan ang ta gwenan, zëno mae mo lowe henna dekam hom mae dawem san dep wet gwesik gwenan.*

¹⁰ Okamanak men zen Alap mo golak syal ta gwenan, Alap hap de otweran tru tase gwëblanna zëna hen man ahakore hlikna dwenblanda gwenan. Hwëna nëbe mae hap de Alap mo ngatan zi mo langnak de kalsna- men zëwe Yesus nëbe mae hap de syala sul sonëka, dekon molya zini in ba maena nulin gwëk.

¹¹ Emki ëenlala gwen, Musa mo titi tabin ola insa kim zëre mae mo karek-kareksa dikim ngan gulsuzimdin hip syal nei gwibirin, dekam sapisa Alap mo gol ë nakore lilikin alpna zip noso gwëblanan. Hwëna kal en naka zep Alap mo golak

* 12:29 12:29 Ul. 4:24 * 13:2 13:2 Kej. 18:2-15; 19:1-14; Hak. 6:11-18; 13:3-22 * 13:5 13:5 Ul. 31:6-8; Yos. 1-5 * 13:6 13:6 Mzm. 118:6 * 13:9 13:9 Kol 2:23

de teipsin tangan zini in Alap zere en tangan hap de teksonnak goltil gwenda. Sapina in mo tokna e san dep nerhal gwenan- zao de langa tolak syauknuk ang tasin hip.*

¹² Zen in zep hen kirekam, Yesussu tan hap e nakon nerhak. Zen dekam Yesussu saherak nennek, hen Zen dekon zep zere mo kalkam zere mo hlil irin zini neno mae mo karek-kareksa aha-rok'nen ngan gulsuz-imki.

¹³ Zen in zep, nen hen Yesussu nen saher san dep zertron. Zep neno mae mo enlalana anakan zen lwa gwen, "Sap sa nesa hen Yesus hup de jal hap lamang da gwibir hen langa dasik gwibir."

¹⁴ Sap auhu-kamanak awe, neno mae mo dakal ena hom. Hwena nen ema nere mae hap de dakal esa esbla'an.

¹⁵ Nen angkam sapi-kambingsi home Alap hap tru lasikse gwebla'an. Hwena men desae angkam ol gwebla'an, zen in kime Yesus mo bosekam enho aha-erekam Alap mo bosena teip ulsuk gweblanan. Dekam neno mae mo ola man nwe-mase gwe-gwe'an- san de otwer-ansa de tru ta seblanna kiye. Zen in zep Alap ensa nen boltere ta tine gwen, hen Yesus de kitak teipsi-biridan hap de olsa nen gol halada gwen.

¹⁶ Hen aha zisi de mas gwibirida gwenna bahem eetititi gwe-gwen-hen kae-kaesa de goltrei gwizimdin niye. Sap zen desa hen Alap sam gwesik gwibirida- san de dombasa de tru tasik gweblanna kiye.

¹⁷ Men zen Kristen zini emsa nol neibirida gwenan, emki betek gwibirida gwen hen zeno mae mo ol san em ang ta gwen. Sap zeno mae mo syala, zen eno mae mo ang hap dena, hen zen man anakan tame nul gwenan, "Alap sa ere mo syal eisi de goltréblan hap asa gublula." Em de kirekam betek gwibirida gwenkam, zen dekam sa isrip-sri naban syal ta gwer. Hwena betek gwibirida gwen

srémkam, ki hwena enlala nik sa edowe hana gwer. Hwena zen de enlala dowe hanan naban syal ta gwe'ak, ki hwena waba hap sa ebon mae syal ta gwer.

¹⁸ Ee, ere mo syal bose walya ban, ano mae mo enho nakon anakare enlalana hom wet so gwenda, "Ee kareksa e ol gwenan." Zep abe mae hap emki Alapsa abe ta gwen, sap ee zeno syalsa e ol gwenan, hen zeno nwenak de tangan edakastin hibé edwam gwe-gwenan.

¹⁹ Ee in zebé emsa abe tabi'in: Abe hap emki hen Alapsa abe ta gwen- ee akakim etan nabakam ebon mae osan dep lwa halzak.

²⁰⁻²¹ Zep angkam, ee a kirekamé mo Alapsa ebe mae hap abe ta gwenan,

"Bian, Em in Zene zébe mae hap tahana deisu guzimki, hen Em in Zene Bian Yesussu tin nikon ngaya taka. Ee ama Emsa abe ta'an: Ano suratna ansa men zen dokwak nu'ik, Emki zébe mae hap sosonsa gol gwizimdin- zen dekakim ere mo dwam gwibin en san lowehe gwék. Hen Bian, Yesus onakore sosonna dikire zeno mae mo enhonak syal gwe tine gwék- zen dekakim ere mo nwenak étal gwesik. Sap Yesus Zen Zen- asa de domba makan zaho ta gwibin Zi niye. Sap Zen mes ere mo zi niban de ol ziaha-en gunnu héndep denaban sul soneka-te-lidak son nakon kim kala wet soblakke. Ee zep asa zeno bosena héndep denaban teip ulsuk gweblal. In eiwa."

²² Aya-wal oso-wal, ee ama emsa gubirida'an: Ano surat tihisni ansa bahem karatda gunnuk husus gwibin, sap zen emsa dikim dawem san dep titi tabin hip dena, hen ee blal tangankam homé ebe mae hap ale gulzimk.

²³ Ee ama emsa gu sonebirida'an- em de hen étawa gwen hap: Neno mae mo ayana Timotius Bak mes bwi nakon wet soka. Zen de nabakam abon onak hata zankam,

* 13:11 13:11 Im. 16:27

ki asa apdekam ebon mae osan dep song ëzal.

²⁴ Iwe de Kristen zini eno mae mo nol-nola kip ano mae mo dawem gol sonezimdinni em ayang ulzimken tingare iwe de Alap mo hlil irin zi hipye. Men zen aban mae Italia mo lang nakore wenya awe lowehe gwenan, zen hen dawem ensa ebe mae hap nol sonezimk.

²⁵ Dikire Bian mo kwasangkwasangna kitak ebon mae onak lwa gwek.

Yakobus mo surat

¹ Suratna an dua-blaskam de zi ausu nakore zini men zen sekwak gwen dakke, zēbe mae hap-

men zen angkam aha mo lang san lowehen da'anke.

Alap ne Bian Kristus Yesus nik mo nganak de syal gwe-gwen zini Yakobus onakon: *

Dawem!

Yesussu de taibliblannak de tatem ēzauk gwen hap de ol, hen enlala blal hap de Alapsa abe tan hap de ol:

² Aya-wal oso-wal, em de kareksa goltowe gwenna, zen dekam em anakan ēisrip-sri gwe-gwen, "In aīris. Zen dekam Bian Alap ano eini ap mam gulblu'ara."*

³ Sap em tawana: Em de kareksa goltowe gwenkam, em dekam esa Yesussu de taibliblannak ētatete gwe zaher.

⁴ Tatem de zēwe en zauk gwenkam, dekam eno eini sa Bian mo nwenak trēp gwer hēndep bil gwer. Dikire eno mae mo eini bil gwek. Zen dekam esa Kristussu de taibliblannak tangan tatem ēzaul, hēndep banakare karek maesa de goltowenkam molye ēēwak gwek.

⁵ Em de karek goltowennak enlala nik ētopse gwe-gwengkam, emki Alapsa abe ta gwen- Zen de enlala blalsa ebe mae hap zer gwizimdin hip. Zen dekam sa ebe mae hap zer gwizimdi. Sap Alap mo kae-kaena zen tīngare zini nēbe mae hap. Zen hom anakan jalse gwe-gwenda, "Em bap Asa abe tala."*

⁶ Hwēna zini men zen abe tanna, zen diki zen taibliblan. Zen bap zen anakan tītik gwen, "San ha molya ap zerblaka? San ha sa?" Sap zi de kirekam tītik gwenna, zen men kiye- asese de hosa men-san an-sankam ngēp-ngēp gulu seranna.*

⁷⁻⁸ Kire zini zen enlala dare syakna, hen zēno enlalana men-san an-sankam lwa gwenda. Kire zini bējen Bian onakon ba maena hlaun.

Mae hap de ol: Tahalha naban de lowehen nakon, hen tahalha srēm kam de lowehen nakon, emki isrip-sri naban lowehe gwen.

⁹ Aya-wal oso-wal, em de tahalha naban lowehe gwenna, isrip-sri naban em lowehe gwen, sap ngatan zi mo langnak eno mae mo bosena mes dawem gwek.*

¹⁰ Hen men zen tahalha srēm kam lowehe gwenan, isrip-sri naban em hen lowehe gwen, sap em mese anakan tame uk, "Ano kire-kire beyana an molya dakal hap ērlwa gwek, zep asa angkam Bian en hon babu gwe-gwer." Hen em mese anakan tame uk, "Ēe an te eisni men kiye." Zen nabakam de ēbulk gwehen. Zep em hen kirekam esa nabakam ēbulk gwehe gwer.*

¹¹ Yakla de sal-sal gwe zankam, dekam de eisni in ēboneng gwen, hen ēbulk gwehen, hēndep dekam sa nwe awesna hom gwer. Zen hen kirekam, em in zen tahalha srēm kam lowehe gwenanye: Em nama de syal tannak te eis mo kim esa ēbulk gwehe gwer.*

Mae hap de ol: Kareksa de gon hap de enlala de ebon hatankam, tatem em ēzauk gwen.

* **1:1 1:1** Yakobus men zen suratna ansa ale gulku, zen Yesus mo osona- men zen hen Yerusalemk de Kristen zini nol gwibiridakake. (Mrk. 6:3; Kis. 12:17; 15:13; 21:18; Gal. 1:19) Nonol in kim Yahudi mo langnak zini ēKristen gwek, dekam Yesussu de taibliblan srēm Yahudi zi karek da gwibik. In zep Yerusalem kon heya-hya gwenkam sekwak gwendak- aha zi mo lang san depye. (Kis. 11:19) Yakobus man gubiridaka, "Dua-blaskam de zi ausuna." Nonol Israel Bak mo ausu nakore zi ensa kirekam nenbirida gwek, hwēna angkam Alap mo zi niban de ol ziaha-en gun ēse nakon, Kristen zini nen hen zēwe bīti gwe'an, sap nēsa hen mes Alap hlil inki. (Mat. 19:28; Why. 7:4-8; 21:12)

* **1:2 1:2** Mat. 5:12; Rom. 5:3-5; 1Ptr. 1:6-7; 4:12-14 * **1:5 1:5** Ams. 2:1-5; Mat. 7:7 * **1:6 1:6** Mrk. 11:24 * **1:9 1:9** Yak. 2:5 * **1:10 1:10** Luk. 12:16-21; 1Ptr. 5:5 * **1:11 1:11** Yes. 40:6-8; 1Ptr. 1:24-25

12 Em de kareksa goltowe gwenak de tatem zauk gwenkam, em isrip-sri gwe-gwen. Sap Alap dekam hëndep de gwën hap denaka sa ebe hap golblala. Sap kiresa de golzimdin hip dena Alap mes ki anakan gu-gubiridaka, “Ëe asa golzim- men zen Asa enna nola gweblananye.”*

13 Zi de kareksa de gon hap dwam gwenna, zen bap zen anakan gun, “Kareksa de gon hap de enlalana an Alap onakorena.” Sap Alap onak kareksa de gon hap de enlalana hom. Hen Zen hom kire hap de enlalana zer gwizimnira.

14 Sap kareksa de gon hap de enlalana, zen ere mae mo hole-hle nakon hata gwenda. Hole-hlena in zen zep emsa sîl tibirhal gwenan hen da tabiridahal gwenan.

15 Ere mae mo hole-hle hen jaljal enlalana, zen men kiye- tetan danna. Desa de enhonak ik ginni, zëwe zep saltîl gwenan. Desa ema zë kara ul gwenan, hëndep eisi zep zë tē gwenan. Bîl gwenkam dekam zep kama san dep anhe gwenan. Zen hen kirekam zini, kareksa de gol gwenkam, dekam zep juwen ora san dep ang ta gwenan.

16 Zep ano dang tîninak de aya-wal oso-wal, nen bap nen nēnaka anakan boton ta gwibin, “Karek gon hap de enlalana an Bian ap zerblala.”

17 Diki tîngan men zen Bian onakon nēbe mae hap hata gwizimnin, zen diki dawemsa de gon hap de enlala naban tîngare hē'ho gwibin niban. Eiwa, yaklana, benna, keisni, zen kitak Bian mo yang tabinni. Hwēna Zēna hom ben mo kim wet gwesik gwenda. Zep Zen bējen enlala kareksa zerzimdin.

18 Sap Alap Zen mes ol dawemsa de golzimdinkim nēsa ngaya tabirki. Zen kirekam syal gwibirki, sap Zen man nēsa anakan dwam gwibiridaka, “Lamkam de ère mo irik

ginnik zaunkum, an zen sa ère mo walaskam lowehe gwer.”*

Nabakam de ëjal gwe-gwen srēm hap de ol, hen Alap mo olsa de i-san i-san gwe-gwibin hip de ol:

19 Ano dang tîninak de aya-wal oso-wal, emki ansa enlala gwe-gwibin: Tîngare zini, bahem nabakam ëjal ta gwen, hen bahem na-en ol nop-nopkam ëkira gwe-gwen. Diki nonol em holokam sane tabin.*

20 Sap Alap mo dwam gwibin niban bējen zi mo jala ban apde nēn.*

21 Zen in zep, nēre mae mo enlala hole-hlena hen jal-jala, men dekone Alap mo nwenak ëkun gwe-gwenan, desa kitak nen tak gun. Hwēna Alap men desa zēre mo ola nēno mae mo enhonak ik gilki, zen desan en nen enlala betekkam ang ta gwen. Sap zen zen sa ëngaya gwen hap de ora san nēsa dam tasik sone gwibir.

22 Bahem sap'nen Alap mo ola insa ësane gwe-gwen. Ki hwēna enaka esa anakan boton la gwibir, “Ëe mesē tangan Biansa hli-hli tasil.” Diki ola insa em i-san i-san gwe-gwibin.*

23 Sap zi de sap'nen sane gwewenna hwēna desan de ang gwen srēm kam, zen men kiye- zēre mo nwe-masesa de kakanak anakan hla tanna, “Otropna man.”

24 Zen sap kirekam mes zēnaka hla tala. Hwēna dekon de song gwenkam, zen dekam sa hëndep gulsun hup eititi gwera.

25 Hwēna Alap mes zēre mo olak kitak nēp sul sonezimki- nen dikim kawesin nikon ète so gwen hap denaye. Zep zini men zen Alap mo ola tîngare enho naban i-san i-san nei gwibirin, eititi gwibin srēm kam de desan en ang ta gwenkam, kire zi hip Alap dawemna sa gol gwizimdi.

26 Zep zi de zēnaka enlala gwe-blanna, “Ëe ama dawemkam Alap

* 1:12 1:12 2Tim. 4:8 * 1:18 1:18 1Ptr. 1:23; Yoh. 1:12-13; Why. 14:4; Rom. 8:19-23 * 1:19 1:19 Ams. 10:19; 17:27 * 1:20 1:20 Mat. 5:22 * 1:22 1:22 Mat. 7:26; Luk. 6:46; Rom. 2:13

mo ol san ang gwe-gwenan," hwëna zen de zëre mo mahalsa zerinik gwen srëmkam, zen zënaka boton tanda. Zen ki ëk enkam waba hap Alapsa ang gwebla'ara.

²⁷ Diki men desa Alap anakan enlala gwibirida gwe'ara, "An Abon de ang ta gwen wenyä zen," zen a kire wenyäka moye:

tahalha wenyäka de mas gwibirida gwen wenyä- sap walas kwasap, hen sap we sem.

Ahana hen, men zen zënaka zerinik gwenna- auhu-kamanak de karek de zëbon onak hlimirin srëm hap.

Zen diki kire wenyik Alap mo nwenak ësam gwesik gwenan.

2

Kristen bose omka de kwasang gwibirida gwen hap de ol:

¹ Aya-wal oso-wal, nen de ngatan Zini Bian Yesussu taïblïblankam, nen bëjen nen nënaka ahakore en naka nwekam golëake gwen- bose nabare wenyä ban bose srëm wenyä banye.*

² Zep anakarekam de lwa'anam: Zi dare de eno mae mo but srëm golak ang ë'anam- ahana pakean dawem naban hen cincin ala tan naban, hwëna aha zini tahalha tola, pakean kalk-kalk naban.

³ Nen de pakean dawem nabare zini insa gublunkam, "Bian, emki awe komal tum sam-samnak nikinzi," hwëna tahalha zini insa gublu'anam, "Em iwe zauk," ahaksa, "Em anak ano tana alp nakon nikin,"

⁴ dekam nen mese tangan ëkarek gwenan. Sap dekam nen auhu-kamanak de kirekam-kirekam enlala nabane ahakore en naka nwekam nënaka olëakenan.

⁵ Aya-wal oso-wal, emki ëenlala gwen: Auhu-kamanak mensa tahalha zikim nenbirida gwenan, hwëna Alap mes desa hlil inki- zen de sërkam Zënaka taïblïblan hap,

hen tahalha srëmkam dikim zëre mo irik ginnik lamkam lowehe gwen hap. Sap men zen Zënaka kwasang në gweblanan, zëbe mae hap dena mes ki kirekam gu-gubirida gweka.*

⁶ Hwëna nen de tahalha srëm zi ensa nwekam golëake gwenkam, dekam hwëna tahalha wenyä ema lamang la gwibirin. Hwëna te-ala beya wenyä men zëbon mae ëbon gwe-gwenan, nabakam de bayar gun srëmkam, zen in zen nësa jap nul sonenda gwenan, hëndep teipsin-teipsin zi sin dep il dïbirhal gwenan- zëwe de nësa klak tabin hipye.

⁷ Zen zen hen nëno mae mo Teipsin Zini Yesus mo bosena lamang nul gwenan.

⁸ Emki Alap mo ol ale gunnu ansa, bol-zaun tangan wenyä enlala gwe-gwibin- mensa hen nëno mae mo Teipsinni Yesus anakan nësa titi tabirkike,

"Zi bose omka em kwasang gwibirida gwen- san de enaka de kwasang gweblanna kiye."*

Zen in zep, nen esa ësam gwesil-desan de ang ta gwenkamye.

⁹ Hwëna nen de ahakore en naka nwekam golëake gwenkam, bose nabare wenyä ban bose srëm wenyä ban, dekam nen kareknake altil gwenan- kwasang hap de titi tabin ola insa de gulumurunkumye.

¹⁰ Bian man nësa dwam gwibirida'ara- nen de kitak zëre mo titi tabin sin sul sonenkam ang ta gwen hap. Zi de kitak zëno ol san ang gwe-gwenna, hwëna aha-en tol mae de gulmun sone kininna, dekam hwëna man dam gwesinin, "Zen hom kitak sul sonenda."

¹¹ Zep anakan lwa'an: Musa man jalse gwibiridaka,

"Bahem ëkahalo gwe-gwen,"

hen,

"Bahem enaka tamera gwen."*

Em de kahalo gwen srëmkam zi ensa tankam, dekam em home titi

* 2:1 2:1 1Tim. 5:21 * 2:5 2:5 Mat. 5:3; Mrk. 10:23-31; Luk. 12:33-34; 1Kor. 1:26-31 * 2:8 2:8 Mrk. 12:28-34; Mat. 22:36-40; Rom. 13:8-10 * 2:11 2:11 Kel. 20:13-14

tabin ola insa kitak sul sonenda. Zep hen kirekam, nen de ahakore en naka nwekam golëake gwenkam, nen hen home dekam Bian mo titi tabinsi su kul sone gwe'an.

¹² Emki ansa enlala gwibin: Nen kime Bian Yesus hun lamkam értowe'ak, Zen molya nësa ëpba titi tabin ol san de ang tan srëm hap karek tabirki. Ëpba titi tabin ola in menkam sërkam nësa tahale gwibik, hwëna Bian Yesus mes dekon nësa gwiswe soneka. Diki Bian de lwahal zankam Zen sa nëno mae mo syala hen ol toranna anakan klis gulzimdi, "Em ba habe kwasang hap de ano titi tabin ola in san ang gwe srëm gweka?"

¹³ Zep men zen zi bose zemka kwasang neibirida srëm gwe-gwenan, Bian Yesus hen kire zisi molya lamkam kwasang gwibiridaka. Hwëna men zen kwasang tola ban zi bose zik mo karekna eititi nei gwibir-zimnin, Bian sa desa hen kwasang gwibiridala, hen zëno mae mo karek-karekna sa tap gulsuzimdi.*

Alapsa de taibliblansa de goltrë gwen hap de ol:

¹⁴ Aya-wal oso-wal, zi de anakan gunnu, "Ëe mesë Alapsa taibliblak," hwëna zen de zëre mo Alapsa de taibliblansa insa goltrë gwen srëmkam, zen waba hap. Dekam bëjen zënaka ngaya tan.*

¹⁵ Emki ëenlala gwen: Wal bose uk de tahalha gwenna- pakeanna hom, hen tembanena hom.

¹⁶ Ebon mae onakore nik de ahanik gublu'anam, "Dawem ki en song gwe, hen dawem enkam gwë. Wake, wëhë tol pakeankam hen tembanekam emsa mas nëbla'ak?" Hwëna zën de hen mas gweblan srëmkam, zëno kirekam de ola in waba hap.*

¹⁷ Zep Alapsa de taibliblansa zen hen kirekam: Goltrë gwen

srëmkam, zen waba hap. Zen san de tokna.

¹⁸ Hwëna ano ola insa ahakon sa anakan nulsul, "Alap mes ki kirekam dwam gwibiridaka: Ahakon zëre mae mo Alapsa de taibliblansa de goltrë gwen hap de wenyä. Ahakon goltrë gwen srëmkam dep de wenyä." Kirekam de zini ëe asa anakan ding gulzim, "Ëe ki banakan asa emsa anakan tawa gwibiridal?- 'Zen eiwa man Alapsa daiblibla'an,' em de ba maesa syal gwibin srëmkamye. Hwëna ëe asa ëre mo Alapsa de taibliblansa zisi de mas gwibirida gwenkam hen dawemkam de gwë gwenkam goltrei gwizim.

¹⁹ Eiwa, em mese anakan laibliblak, 'Alap Zen aha-en.' Zen sap aïris tol. Hwëna kire enkam de taibliblankam hom sowe he'an. Dowal-dowala ki hen kire enkam daiblibli gweblanan- in kirekam hen em laiblibla'anye. Zen zep anakare hap ëtitikin gwe-gwenan, 'Asa sa Alap karek tabiri.'**

²⁰ Zep men zen kirekam ëkil gïl gwe'an, "Goltrë gwen srëmkam de Alapsa taibliblansa zen aïris," kirekam de zini zen enlala joblo-top tanganna. Goltrë gwen srëmkam de taibliblansa, zen waba tangan hap. An zebë ebe mae hap ansa mas gulzim'in:

²¹ Nëre mae mo auyanna Abrahamsa emki enlala gweblan- zen kim tane zem Isaksa Alap hap de sap ang tasik seblan hap holena blonsublu'ankake. Zen dekam Alap hap anakan goltrëblaka, "Ëe eiwa ama Emsa taiblibla'an." Zen in zep Alap sam gwesiblika.

²² Eiwa, Abraham hap de aïsili iwe man tangan dam gwe'i'in: Zëre mo taibliblansa insa kim kirekam Alap hap goltrëblaka, zen dekam tangan zep Alap mo nwenak sowehek.*

* **2:13 2:13** Mat. 5:7; 6:14-15; 18:21-35 * **2:14 2:14** Mat. 7:21 * **2:16 2:16** Mat. 25:41-45; 1Yoh. 3:17 * **2:19 2:19** Mat. 8:28-29; Mrk. 5:7 * **2:22 2:22** Ibr. 11:17-18; Kej. 22:1-14

23 Zen in zep hyanak zēbe hap dena Alap mo olak anakan ale nuk,

“Abraham zen Alapsa taïbli-blaka, dekam zep Alap anakan gubluka, ‘Em mese ěre mo nwenak dakastili.’”

Zen in zep Abrahamsa nen gweblak, “Alap mo dokot.”*

24 Zep angkam mes dam gwesin: Něsa de Alap sam gwesibiridan hap, diki nen esa něre mae mo Alapsa de taïbli-blanna insa oltrě gwer. Goltrě gwen srěmkam, bějen sam gwesin.

25 Rahab Bak hen kirekam gwěk. Zen sap nonol kahalo hap zěnaka golgu gwěk- te-alasa de dekon gulin gwen hap. Hwěna Israel kore otek zi darena kim apta zaka, zen teisyaink. Ki zep hwěna aha ora san sowěkam si so sonek. Zen insa kirekam syal gwibik, zen dekam zep zěnaka anakan goltrěk, “Ēe ama Alapsa taïbli-bla'an.” Zen zep hěndep Alap mo nwenak sam gwesik. *

26 Men kiye- timni. Ensasa srěmkam, zen tokna. Něno mae mo Alapsa de taïbli-blanna hen kirekam: Goltrě gwen srěmkam zen hen san de tokna kiye.

3

Mahalsa de zerinik gwen hap de ol:

1 Aya-wal oso-wal, em bahem beyakam Alap mo olsa de tawa ta gwibin hip ědwam gwe-gwen. Sap tawa ta gwibin hip de zini něsa Alap sa lamkam dawemkam karatda tabiri, “An san ha ano ola dawemkam tawa ta gwibirki?” Em de karekkam tawa ta gwibinkim, emsa sa sěrkam karek tabiri.

2 Sap nen kitak kareknake altil gwenan. Hwěna zini men zěno ěk tihě nakon ol karekna aha-en mae wet son srěmna, kire zini man zěre mo timni kitak golinik gwe'ara. Zen kire nik Alap mo nwenak ěoto gwesik gwenan.

3 Men kiye- kudasa de zersong gwenna. Zen besi tekna ěk tihěnak bu nulsuk gweblanan, dekon zep dabenkam baě da gwenan- dekam de zini in zěre mo dwam gwibin sin dep zersong gwen hapye. Ēk tihě en nakon de da tablankam, zen dekam de tingare timni insa zersong gwen.

4 Men kiye hen bul golsong gwen zini. Zen zěre mo hoskam de golsong gwen- zěre mo enlala gwibin sin. Bulu in sap yawala. Asesena hen sap yawala. Hosna in betekna, hwěna dekam diki bul yala insa golinik gwen.

5 Mahala hen kirekam: Zen sap betekna. Hwěna zen ki sěrkam gulin halasen gwenda. Emki ěenlala gwen: Men kiye hen, eik yawalak de syauk betekkam drawe henna, zen hwěna dekon de hěndep hitil song gwenkam yak gwe haladan.

6 Zen zep mahala hen syauk makan. Zen něno mae mo timnik lwa gwenda- san de jal ausu. Dekon zep jal-jala syauk makan yak gwe halada gwenan, hěndep timni zao zep kitak hweistil gwenan. Syauknu insa zen dowal mo kigi zě draul sone gwenda, dekam zep něno mae mo gwěnna kitak ang gulsuk gwenda.*

7 Kitak de otweran terya-tyana, hwěna zini ki desa mumuk da gwibirin- sap eiknik dena, gulk dena, sap muskum de il gwehal gwen tweran. Sap hinak de lowehe gwen wanya, desa ki mumuk da gwibirin.

8 Diki mumuk tan srěm hap dena aha-en: Zen mahal. Desa toton nara dep?- mumuk tan naye. Zen jal-jal tanganna- san de wanya jal-jala kiye.*

9 Sap nen mahalkame Bian Alap mo bosena teip ulsuk gweblanan. Hwěna mahala in hen dekame etan zi bosyanna lamang la gwibirin. Hwěna zi bosyanna in sap hen Alap am zěre mo nwe-masekam yang

* 2:23 2:23 Kej. 15:6; 2Taw. 20:7; Yes. 41:8 * 2:25 2:25 Rahab Bak in, zen Israel wesya hom. (Yos. 2:1-21; 6:17; 6:25; Ibr. 11:31) * 3:6 3:6 Mat. 12:36-37; Mrk. 7:15-23 * 3:8 3:8 Mzm. 140:4; Rom. 3:13

tasibirki.

¹⁰ Aya-wal oso-wal, bap zen kirekam lwa gwen: Mahala an, zen dekame Alapsa boltere la gwenan, hen nënaka dekame lamang la gwibirin.*

¹¹ San ha ki aha-ere ho-nwe nakon wet so gwenan- hikam hen ho tangankamye? Sap hom tanganke.

¹² Aya-wal oso-wal, san ha yerana ki walengkam të gwenan? San ha deiwana ki wangakam të gwenan? Zen homke. Hen hi nwenä bëjen ho tangankam wet son. Zen zep nëre mae mo mahala nen dawem enkam golëinik gwe-gwen.

Enlala blal hap de ol:

¹³ Ebon mae onakon de ahanik kıl ginni, "Alap mes abe hap enlala blala zerblaka." Hwëna ki eno enlala blala in wal bose wal ukip emki zertrei gwizimdin. Sap eiwakam de enlala blal zini, zen dawemsa noltrei gwizimnin, hen aha zisi enlala betekkam mas neibirida gwenan. Zen dekon zep anakan tame da gwibirin, "Eiwa, zëno enlalana blala."

¹⁴ Hwëna em de zi bose omka husus gwibirida gwenna, dekam bahem enaka anakan boltere tan, "Ano enlalana blala." Hen em de ere en mo timsi ngalap gwe-gwibinni, ki ebon onak Bian onakore enlala blala hom.

¹⁵ Em de kirekam lowehe gwenna, zep eno mae mo enlala blala in ngatan zi mo lang nakore naka hom. Zen okamana awe de enna, hen ere mo hole-hle nakorena, hen dowal-dowala korena.

¹⁶ Zini men zëbon zenaka de husus gwibiridan enlalana, hen zëna en naka de ngalap gweblan hap dena lwa gwenda, zëno enlalana men-san an-sankam sa lwa gweblala. Kire zini tingare kareksa sa hëndep gulin hana song gwera.

¹⁷ Hwëna Alap onakore enlala blala bare zini, zen kirekam bëjen. Kire zi mo enlalana lalakna,

hen umlae enna,

hen kwasang-kwasangna.

Alap onakore enlala blala bare zini zen hen aha zisi blikip gwesik gweblankam.

Kire zini man aha zi niban de enlalasa zisiri tan hap ësam gwesik gwenan,

hen zi bose zikhip dawemsa nol gwizimnin.

Alap onakore enlala blala bare zini zen bëjen ahakore en naka golëaken,

hen bëjen mahala dare syak gwen.

¹⁸ Zi de zi bosyansa umlae ora san dep dam tasik sone gwibinkim, dekam Alap sa hwëna hë'ho gwibin nika zëbe hap golblala, sap zini beya nik sa dekon Alap mo nwenak ëdakastil gwer.*

4

Auhu-kama naban de dokot ën srëm hap de ol:

¹ Em ba nakone wal bose wal oban ëdarak gwe-gwenan hen ëkeisa-keisa gwe-gwenan? Zen ere mae mo hole-hle enlala nakonke. Sap eno mae mo enhonak man kirekam-kirekam kareksa de gon hap de enlalana ëilman gwe-gwenan.*

² Em dekon zebe aha zi mo bi gwibin kire-kiresa dwam ei gwibirin, hwëna hom ep nol gwizimnin. Zebe enaka lail gibirida gwenan, hëndep zebe ëdarak gwe-gwenan. Hëndep dekon zebe enaka de tameran hap ëdwam gwe-gwenan.* Hwëna em mae habe ere mae mo dwam gwibin kire-kirena insa ulin srëm gwe-gwenan: Sap em home Alapsa kire hap abe la gwenan.

³ Em sap ema abe la gwenan, hwëna mae habe ulin srëm gwe-gwenan: Sap em karek enlala naban abe la gwenan. Ere mae mo hole-hle sane abe la gwenan, zep em bëjen em ba maesa Alap onakon gul irin.

* **3:10 3:10** Mat. 7:15-20; Ef. 4:29

* **3:18 3:18** Ams. 11:30; Mat. 5:9

* **4:1 4:1** Gal. 5:17

* **4:2**

4:2 1Yoh. 3:15

⁴ Zep em in men kiye- aha-ere we de zisi beyakam lop tanna. Zep em hen kirekam: Bëjen em aha-ere Alapsa ang gweblan. Em san mese ëeititi gwek? Auhu-kama naban de goldokot gwenna, dekam Alap mo jal zi hip em-am ënwe-mase gwe-gwenan. Kire zini bëjen etan Alap han zerdokot gwen.*

⁵ Em san mese Alap mo ola ansa eititi eibik?

“Zen mensa nëbe mae hap angna zer gwizimnira,
Zen desa anakan dwam gwe-gweblanda,

‘Zen ëre en hap dena.’ ”*

⁶ Hwëna Alap mo kwasang-kwasangna man tangan taman këni gwenan- men kirekam zëre mo olak lwakke,

“Alap man bolte-bolte zini husus gwibirida gwenda.

Enlala betek zini man kwasang gwibirida gwenda.”*

⁷ Zen in zep, Alap ensa em betek gwe-gweblan. Dowal mo kigisa ja-ja la gwek. Zen dekam sa ebon mae onakon heya gwe-gwera.*

⁸ Alapsa golek de lak. Zen dekam sa hen emsa golek de tabiri. Eno mae mo tahana men zen kareksa de gulin hana gwen hap ëjok-jok gwek, emki ngan tasibin. Hen enhona men zen kil-kil gweka, emki lalak tan. Hen bap zen dan nën.

⁹ Dawem enkam emki ëhalen-nwe go-ho naban hen enlala dowe hanan naban. Em home dawemkam ëhale'an. Zep eno mae mo bolamda hap de nga-ngola nwe go-ho hap emki li ta sone gwibin. Karek gon hap de isrip-srina desa enlala dowe hanan hap em wet tyasik gwibin-ekakim dawemkam Alap mo nwe-nak ëhalek.

¹⁰ Alap en hon emki enlala betekkam lowehe gwen. Zen dekam

sa altirën nikon emsa lup gul ine gwera.*

Ere mo Kristen bosesa de tonsublun srëm hap de ol:

¹¹ Aya-wal oso-wal, bahem enaka tonsubirida gwen. Men nara Kristen bose zemka tonsublunna, zen ki man kwasang hap de Bian mo titi tabin ola insa ngip guluda. Hen dekam man nwe-mase gwenan: Zen hen kwasang hap de ola insa anakan enlala bolte-bolte naban tonsubi'ira, “Ahakon sap sa desan ang tal. Èe molyë.”

¹² Diki titi tabin olsa de golzimdin hip de Zini aha-en, hen nëno mae mo karek-kareksa de hlaulzimdin hip Denaye. Zen Alap Zë-en. Zen diki zëno dena- zisi de anakan gublun hap dena, “Zini in karekna.” Zep em de zi bose omka anakan tonsublunna, “Zen karekna,” zen eno mae moka hom.*

Bola-bola gwen srëmkam de kalang gwen hap de ol:

¹³ Emki ano ola ansa ësane gwen: Biansa de eititi gweblankam bahem anakan ëkalang gwe-gwen, “Namen ahaksa ka'an ëe asa ëna desan song gwer. Zëwe holona aha-ere tahunkam asa gwër. Sap ba maesa de dekon lirak ta gwibinkim, te-alana mamkam asa gulin gwer.”

¹⁴ Hwëna ka'an eno gwënnak ba wëhë lwa'ak? Ena home tame gu'ura. Sap eno gwënnan in ogom makan. Nabakam esa aya gwera.*

¹⁵ Diki anakan de torankam emaka sam gwesiki, “Bian Alap mo dwam gwibin sin diki lwankam, ki asa ngaya gwer, hen kiresa asa zë syal gwibir.”*

¹⁶ Hwëna Alapsa de eititi gweblankam de kalang gwenna, dekam bolte-boltekame ton'ara, hen enakae tëp tasi'ira. Kirekam zen karek.

¹⁷ Hen kirekam, em de ora dawemsa anakan tame tanna, “An

* **4:4 4:4** Yer. 3:20; 1Yoh. 2:15 * **4:5 4:5** Kel. 20:3-5; 34:14; 1Kor. 6:19 * **4:6 4:6** Ams. 3:34; 1Ptr. 5:5-6 * **4:7 4:7** Ef. 6:11-18; 1Ptr. 5:8-9 * **4:10 4:10** Luk. 14:11; Plp. 2:5-11 * **4:12 4:12** Im. 19:18; 1Ptr. 2:1; Rom. 2:1; 14:4 * **4:14 4:14** Luk. 12:18-20; Ams. 27:1 * **4:15 4:15** Kis. 18:21

diki zen, Alap mo dwam gwibin niye,” hwëna em de aha ora san gwë hankam, dekam mese kareknak zannara.*

5

Te-ala beya zi hip de ol jalse gwen:

¹ Angkam te-ala beya wenyä emsäë gubirida'an: Asa sane lak. Em kareksa esa mamkam Bian onakon hla kul, zep gosa em hërhen naban tan.*

² Eno mae mo kire-kire beyana in man ëbatre'an, hen eno mae mo pakean dawem-dawemna in winim blom dabi'in.

³ Eno mae mo emas nakore hen perak nakore kire-kire beyana in zalta dep sa ëlwal. Hwëna kire-kire beyana in zen sa emsa Alap mo nwenak anakan dam dasik gwibir, “Zini an aïngkil tamna.” Zen zep sa hwëna Alap aumwa hap denak syauk blanak emsa yal gul sera. Sap em mese Yesus mo lwa halzan golek denak kire-kirena ere mae en hap tagal la guk gwëk.*

⁴ Men zen eno mae mo nganak syal ta gwëk, zëno mae mo te-alana ene olgwen gwëblak. Zep em ëngalap gwen. Sap zëno mae mo ësomo gwe-gwen ola mes hëndep angkam Soson Zini Bian Alap hon hatal.*

⁵ Zep em ëngalap gwen. Sap auhu-kamanak awe em mese tahalha srëmkam lowehe gwëk, hen ena en nakae oto lasik gwibik. Hen em mese sapi mo kim ena en naka laizi gwibik, hëndep mese ëhanapna gwëk. Angkam hwëna emsa de blom tabin hip de yaklanak mes golek de gwer!

⁶ Sap em mese karek gol gwen srëm zini karek la gwibik hen lam-era gwëk, hwëna zen man tol dekam ëgu gwëk, “Dikire nësa karek da gwibik.” Zep emki ëngalap gwen.

Yesussu de kire enlala tatete naban kara gwe-gwëblan hap de ol:

⁷ Zen in zep aya-wal oso-wal, sap esa angkam karekna oltowe gwer, hwëna dekon emki enlala tatete naban Bian Yesussu kara gwe-gwëblan. Emki sap ëenlala gwen: Nga syal gwe-gwëblan zini, zen holokam taran hap de yaklana kara në gwëblanan.*

⁸ Zep em hen kirekam em enlala tatete naban ëkara gwe-gwen, sap Bian Yesus mo lwa halzan hap denak angkam man tangan golek de gwe'an.

⁹ Aya-wal oso-wal, bahem enaka jakal gwibirida gwen. Ki em esa hen kareksa Alap onakon hla kul. Sap zi mo kareksa de klis gun hup de Zini in angkam lilikinnik zau'ura! *

¹⁰ Aya-wal oso-wal, emki sap enlala gwibiridan- zini men zen orep Alap mo ola ayang nulzimmira gwëkke. Dekam desa man karek da gwibik, sap ahakon man Alap mo ola insa husus nei gwibik. Hwëna man ki sap kirekam neibirida gwëk, zen dekam hwëna dawemkam Biansa de blol gwe-gwëblan naban tatetekam nyauk gwibik. Zep em hen zëno mae mo kim em lowehe gwen.

¹¹ Sap zen kirekam tatetekam nyauk gwibik, nen in zebe angkam desa enbirida gwe'an, “Zen hë'ho gwibinnik lowehe gwe'an.” Em mese ki hen Ayub hup de aïsili ësane gwe-gwëk- in kim karek yala insa goltowekaye. Hen em mese ëtawa gwëk: Bian aumwa hap zëbe hap dawemna mamkam golblaka, sap zen man dawemkam Biansa de blol gwëblan naban tatem zauku. Bian Zen eiwa sërkam de kwasang-kwasangna. Zen zep em hen Ayub mo kim em ëgwë gwen.*

Mae hap de ol: Olsa de soson gul gwen hap, bahem Alapsa ahaksa ngli

* 4:17 4:17 Luk 12:47; Rom 14:23b * 5:1 5:1 Luk. 6:24-25; Mzm. 37 * 5:3 5:3 Mat. 6:19-21; Luk. 12:15-21 * 5:4 5:4 Ul. 24:14-15 * 5:7 5:7 Luk. 21:19; Gal. 6:9 * 5:9 5:9 Mat. 7:1 * 5:11 5:11 Mat. 5:12; Ayb. 1:21-22; 2:10; 42:10-13; Mzm. 103:8

maesa anakan gublun, "Mese ki asa salblanda."

¹² Aya-wal oso-wal, ola an bol-zaun tanganna: Bian Alap mo bohesa de gollëwen hap bahem ere mo olsa de sosen gun hup anakan mae ëgu-guk gwen, "Nglï naban kama naban asa hla la." Auhukamana awe de aha banakare tol maesa de gubin niban hen bahem ëgu-guk gwen, "Zen mese ki asa hla tanda." Ki Alap sa hwëna emsa husus gwibiridala. Diki sosen gun srëmkam em anakare enkam ëgu gwen, "Ëe kië," ahaksa "Homë." *

Alapsa de banakare mae nakon gu sone gweblan hap de ol:

¹³ Zi de ebon mae onakon anakan ngalap gwenna, "Ëe an banakan asa gwër?"— dikire Alapsa gu sonebla tine gwëk. Isrip-sri naban de gwëna, zen dikire Alapsa tërya ban isrip-sri gwebla tine gwëk.*

¹⁴ Sang-sang naban de gwëna, zen dikire Kristen zi mo nol-nolaka gu sonebiridak— zen deka Bian Yesus mo bosekam zëbe hap Alapsa abe dak. Hen zen sa minyakkam Yesus mo bosekam dra dal. †

¹⁵ Hen zen kim Alapsa de taïblïblan naban abe da'ak, Bian dekam sa zi sang-sangna insa dawem tala. Zen de kareknak de zaran nakon sang-sangna insa hlaunnu, Bian dekam sa zëno karek-karekna insa tap gulsublula. ‡

¹⁶ Ëe in zebë emsa titi tabi'in: Ere mae mo karek-karekna emki Kristen bose wal obon ëkira-kla gwe-gwen, hen Alapsa de abe tankam enaka mas eibirida gwëk— ekakim sang-sang nakon ësale gwe-gwëk. Sap

zi de Alap mo nwenak dam-dam enkam gwëna, zëno ol gu sonenna sosen tanganna. Alap man kire zi mo ol gu sonenna dokwak gul gwenda.*

¹⁷ Elia nëban mae apdenak— zi tangän. Hwëna zen kim o de il tin srëm hap enlala zon tasïblin naban Alapsa abe taka, hëndep kirekam zep lwak. Ona dekam hëndep il ti srëm gwe-gwëka— tahunna danahan, ahana ngirïn ngam sonnak mes zauk.

¹⁸ Etan kim abe taka, dekam zep etan il tika. Kamanak de otanena dekam zep etan ësaltilidak.*

Aumwa hap de ol zïm-zïm:

¹⁹ Aya-wal oso-wal, emki ëenlala gwen: Ebon mae onakon de ahanik ora dam-dam nakon syal he'anam, hwëna ahanik de desa etan dam tasik sone'anam,

²⁰ zen dekam zëno angna mes tin hip de ora nakon tagal tasïblinda. Zi de kirekam kareksa de gol gwen zisi dam tasinni, hwëna Alap dekam sa zëno nik mo karek-karekna beyakam jek-jak gulzimdi.*

Zëwe en zausunun. Dawem kitak! Yakobus onakon.

* **5:12 5:12** Yesus man tawa tabirki, ngli naban kama naban de gu-guk gwizimdinni, zen man apde në'an— Alap mo bohesa de totoresä gu gwibin nibanye. (Mat. 5:33-37) Yahudi zini Alap mo bohesa de gollëwe gwen hap ngli naban kama naban nen guk gwizimk— zëre mae mo kalangsa dikim anakan sosen gun hupye, "Amki asa hla la— ëe de syal gwibin srëmkamye." Orya ol zini hwëna totore ol-gunsu de eiwa gun hup ki kirekam ëgu gwenan. Zen hen man kirekam karek gwe-gwenan, sap dekam hen san de Bian zëre mo bohesa de totoresä gubinni kiye. * **5:13 5:13** Kol. 3:16 † **5:14 5:14** Orep minyak zaitunkum dra da gwibik. Minyakna in, yera minyak makan, asena dawemna. (Mrk. 6:13) ‡ **5:15 5:15** Ayatna awe man dam gwesinïn: Totore sang-sangna hen ki— kareksa de gon srëmkamye. Hen ahakon eiwa zi mo karek-karek nakon. (Yoh. 9:2-3; Mrk. 16:18; Kis. 28:8; Yak. 1:6; 2Kor. 12:7-10) * **5:16 5:16** Ams. 28:13; 1Yoh. 1:9 * **5:18 5:18** 1Raj. 17:1; 18:1; 18:41-45; Luk. 4:25 * **5:20 5:20** Mat. 18:15; Gal. 6:1; 1Ptr. 4:8

Petrus mo surat

¹ Suratna an, Alap mo hlil irin wenya kip- Kristus hup de jal hap mensa Yahudi mo lang nakon noléalsa sonekke. Em in zen angkam zi mo lang san ein lowehen da'an- Pontus sun, Galatia san, Kapadokia san, Asia san, hen Bitinia san. Hwëna nëno mae mo eiwa de langna, zen diki ngatan zi mo lang.

Kristus Yesus mo dam tasin zini, Petrus onakon:

² Dawem! Bian Alap orep mes ngein sin dep dena tame gulku, zep emsa hlil inki. Hëndep zep zëre mo Enhona ebe mae hap hlë ta sonezimki- dekam de emsa lalak tasibin hipye. Em in zebe Alap mo dwam gwibin sin ang ta gwenan, sap emsa mes Yesus mo kalkam ngan tasibirki.

Diki Bian sa kwasang-kwasang zemka sërkam ebe mae hap gol gwizimdi. Hen nen zëre mo taha terenak esa lowehe gwer.

Mae hap de ol: Nen waba hap home Alap hon ëyaing gwe kini gwe'an.

³ Nen diki dawemsa nen Bian Yesus mo Bian Alap hap gol gweblan, sap Zen mes zëre mo kwasang-kwasangna mam tangankam nëbe mae hap goltreizimki. Hëndep zep nëbe mae hap lowe hensa dikim li yul sonen hap dena golzimki- dekam de etan de jaha gweblan mo kim ëliwehe gwen hap denaye. Nen in zebe Alap hon tïngare enho naban ëyaing gwe kini gwe'an- anakare enlala nabanye, "Zen sa nësa tin nikon ngaya tabiri, sap Zen ki Yesussu ngaya taka."*

⁴ Hen anakare enlala nabane ëyaing gwe kini gwe'an, "Alap insa dawemna zëre mo hlil irin walasna nëbe mae hap hamal gulzimki, nen esa desa ulin." Sap ngatan zi mo langnak de dawemna in, zen bëjen

tap gwen, bëjen batren, hen bëjen jek-jak gwen.

⁵ Em mese kirekam ëtäiblik, in zep Alap zëre mo sostonkam emsa tatete ta gwibirida- em dikim Kristussu de täibliblan nakon altil srëm gwe-gwen hapye. Aumwa hap de yakla yalak, Zen dekam tangan sa emsa ngaya tabiri, hen hëndep de dawemna insa golzimdi.*

⁶ Nen in zebe sërkam de isrip-sri naban lowehe gwenan. Hwëna eiwa, kirekam-kirekam karekna kime oltowe gwenan, dekam zep enlala dowe hananna nëbon mae onak hata gwenda. Hwëna nëno mae mo isrip-srina in dekam mae hom tap gwe-gwenan.

⁷ Karekna in mae hap nëbon mae jowe gwenan: Nëno mae mo ei nika dikim nëp lalak gulzimdin hip. Emasna, zen sap okamana awe en dep dena, hwëna desa ki syauknuk de tru tankam lalak da gwibirin. Alap hen kirekam syauknuk de ang gun makan nëno mae mo eini lalak gul gwizimnira- anakan dikim nësa golëtrën hap, "An eiwa tangankam Asa daiblibla'an." Hëndep aumwa hap denak, kim de Bian Yesus Zënaka tïngare zi hip zertreizim'inka, Zen dekam sa hen hëndep de lwa gwen hap de hamal gulzimdinni insa nëbe mae hap golzimdi. Bose dawemna Zen dekam sa hen tïngare ngatan zi mo langnak de wenyik mo nwenak nëbe mae hap golzimdi.*

⁸⁻⁹ Em sap home Yesussu nwekam hla lak, hwëna em ensae ola gwebla'an. Hen em sap home angkam hla la'an, hwëna em mes tangane laibliblak. Hen Zëbon onakon zebe anakan dam ulsuk gwenan, "Nen eiwa esa ëngaya gwer." Zen in zebe Alap onakore sërkam de isrip-sri naban lowehe gwenan, hëndep zebe nënaka anakan lengwanbirida gwenan, "Kareksa de goltowe gwen nakon ba habe nama

* **1:3 1:3** Yoh. 3:3-5; Tit. 3:4; 1Ptr. 1:23 * **1:5 1:5** Yoh. 10:28 * **1:7 1:7** 1Ptr. 5:8-10; Yak. 1:2-4; Ams. 17:3; Ibr. 12:3-11

isrip-sri naban lowehe gwenan?"

¹⁰ Alap mo ol ayang gul gwen zini men desa orep tame gun srëmkam ayang nulzimmira gwek, nen in desae hwëna angkam oltowe gwe'an! Zen mensa tame gun srëmkam hamal hap anakan ëgu-guk gwek, "Alap sa lamkam zëre mo kwasang-kwasang nakon nësa ngaya tabiri," zen man sap tangan dam gulsun hup dei gwibik.

¹¹ Kristus mo Enhona mensa Zën de hatazan hap de ola hamal hap ing gul sone gwizimki, zen sap man desa anakan de dam gulsun hup dei gwibik, "Nësa de ngaya tabin hip de Zini in bawalkam sa hata zala? Zen de teipsinkim irik gin srëmnak, Zen ba hap sa mamkam karekna goltowe gwera?"

¹² Alap dekam zep zëbe mae hap aha'en-aha'enkam ola anakan ing gul sone gwizimki, "Hamal hap de ola in, zen ebe mae hap hom. Zen ngein sin de zi hip dena." Hwëna zen mensa tol tame gun srëmkam ayang nul gwek, hwëna angkam zen mes ki nëbon mae jower. Zen in zep zini Alap mo Enho mo sostonkam ebon mae onak ëngaya gwen hap de ol dawemna nolhatazak. Zep Alap mes nësa ol dawemna inkam nër hom hleng sosubiridaka, hwëna Alap mo dam taha nakore zini, zen nama hom kitak tame nul gwe'an hen nama dei gwibi'in.*

Lalakkam de lowehe gwen hap de ol:

¹³ Zep Alap insa kirekam nësa ngaya tabi'ira, zen in zep salok-salokkam nen lowehe gwen, hen nënaka nen golëinik gwe-gwen. Dawem enkam nen Yesus onak anakare enlala naban ëyaing gwe kini gwen, "Zen kim de etan Zënaka nëbe mae hap zertreizim'inka, zen dekam tangan sa zëre mo kwasang-kwasangna nëbe mae hap golzimdi."

¹⁴ Nen an Bian mo walas, zep nen blikip gwesik gweblan. Nëre mae

mo ëpba hole-hle san bap nen ang ta gwen- men kirekame tame gun srëmnak lowehe gwekye.

¹⁵ Sap Alap men Zen nësa kwang guludaka, Zen lalak enna. Zep nen ki hen nëre mae mo enhona lalak ta gwibin.

¹⁶ Sap Alap man nësa gubiridaka, "Ëe an lalak enna, zen in zep emki hen ëre mo kim enho lalak enkam lowehe gwen."*

¹⁷ Nen Alapsa "Bian" kame en sone gweblanan, hwëna ansa emki enlala gwe-gwibin: Bian man kitak nësa nwekam golëake gwenda. Men nara karek gwenna, desa sa karek tabiri. Zep nen de nama okamanak awe lowehe gwennak, dekam nen ki Biansa de airi gweblan naban lalak enkam lowehe gwen, sap nen okamanak awe kolengkame lowehe gwe'an.

¹⁸ Sap nen mese tame uk: Nen menkam waba habe auyan-aza mo ëpba lowehen karek san ang ta gwek. Hwëna Alap ki zep tin zi mo ora nakon nësa alal gulhal zaka. Zen dekon okamanak de perak, ahaksa emas mae nakore te-alakam hom nësa lup gulhal zaka.

¹⁹ Hwëna Zen zëre mo Domba Tane mo kalkam nësa alal gulhal zaka. Zëno kala in, tingare okamanak awe de emas-perak mae naban apdenak hom. Zen sërkam de dawem tanganna. Hen nësa de ngaya tabin hip de Zini in lalak enna. Zëbon onak karek maena hom tangan.

²⁰ Alap sap orep mes nësa dikim ngaya tabin hip Domba Tanena insa dam tasiki- okamana ansa de yang gulsun srëmnak. Hwëna nër hom tangan nëp zertreizimki. Zep okamana an mo aumwa hap de yaklana an zen lwa zahe'an, nen lalak enkam nen lowehe gwen.

²¹ Sap Alap insa Yesussu tin nikon ngaya taka hen teipsinkim kim drë neka, nen dekon zebe Alapsa anakan laiblibla'an, "Zen eiwa sa

* 1:12 1:12 Ef. 3:10 * 1:16 1:16 Im. 11:44-45

nësa de ngaya tabin hip lwahal zala.”

²² Zep nen mese nère mae mo timni lalak enkam dikim lowehe gwen hap sosok labik- in kime Alap onakore ol dawem san ang takke. Nen in zebe nënaka dawemkam kwasang eibirida gwenan. In zebë emsa gubirida'an, “Nen tingare enho naban nënaka kwasang gwibirida gwen.”

²³ Sap in zen nëno mae mo enhonak sip gwek, zen zi mo olsa hom. Zen Alap zère mo ol. Nen in zebe etan de jaha gweblan makan ëliwehek. Zëno ola in bëjen hom gwen hen bëjen timbwas gwen. Zen hëndep denaban sa lwa gwer.

²⁴ Sap Alap mo olak man lwak, “Zini so mo kim nabakam juwe gwenan-
men kiye hen te eisni.

Zen namen de eis gwenna,
hwëna holo gwen srëmnak sa bulk gweher.

Zini nen hen kirekam: Namen de ëteipsinnë,
hwëna holo gwen srëmnak de altirën.

²⁵ Diki Alap mo ol, zen hëndep denaban sa lwa gwer.”*

Ola in ebon mae onak mes nolhatak.

2

¹ Zen in zep, anakan de lowe hensam emki baes tan:

zi bose omka de u sal-sal gweblan,

lwa tasin,

lamang tan,

hen dawemsa de gul irinnik de husus gweblan,

hen Alapsa de ëk enkam betek gweblan naye.

²⁻³ Nen wal baizil mo kim nen lowehe gwen. Wal baizili zen dawemkam an zik mo momna hole nei gwizimnin. Nen hen kirekam nen eiwakam de tawa tabinsi, lalak

en naka, hole gwe-gwibin. Sap men kirekam Alap mo olak zëbe hap dena lwak, nen mese angkam Biansa anakan tame lak,

“Bian Zen dawem tanganna-
san de tembane dërekna kiye.”*

Zep Alap mo Enho nakore eiwa de ol san de ang ta tine gwenkam, dekam sa nëno mae mo ëini dawemkam tatete gwe zaher, hëndep zep esa ëngaya gwer.

Mae hap de ol: Alap owas tangan hap nësa zère mo hlil irin zi hip li ta sonebirki.

⁴ Zep Bian Yesussu emki yaing gwebla kinë gwen, sap ëngaya gwen hap de ausuna, zen Zëbon en lwa'an. Zep Zen san de Alap mo golak de ngirën gol te yawala kiye. Auhu-kamanak de zini sap man gol tenya insa baes neibik, hwëna Alap mo nwenak man tangan sam gwesik, zep bolak ik gilki.*

⁵ Zep nen an hen san de gol gom tenya kiye. Nëno mae mo timni, diki zen jowen- san de Alap mo Enho hap de gol. Zen dekam esa ënwe-mase gwer- san de Alap mo golak de syal tan zini kiye. Sap nen ema nère mae mo timni sosok ul gwebla'an, zen zep Alap mo nwenak nwe-mase gwe-gwe'an- san de otweran ninsi de zëbe hap de kalsnak lone seblanna kiye. Sap nen Kristus Yesussu de yaing gwebla kinë gwenkame kirekam syal ta gwe'an, Zen dekam tangan zep nësa sam gwesibirida gwe'ara.*

⁶ Sap Alap mo olak man lwak, “Ëe mesë tenya ëre mo nwenak de dakastin tangan naka dam gulsuk-

Desa de Yerusalemk bolak ik gin hÿpye.

Men zen gol tenya insa daibli'iik, zen molya lamkam anakan ësa her gwek,

* **1:25 1:25** Yes. 40:6-8 * **2:2-3 2:2-3** Mzm. 34:9 * **2:4 2:4** Petrus mo ola mensa 'ngirën gol te'kam li nul sonek, zen 'kaso moko'kam ale gulku, sap zëwe de zini kasokam gola syal në gweblak. Orya ol zini hwëna tekam gola syal në gweblanan, zep 'gol te yawal'kam li nul sonek. (Mzm. 118:22; Mrk. 12:10-11; Kis. 4:11; 1Ptr. 2:7) * **2:5 2:5** Ef. 2:20-22; Rom. 12:1-2

‘Èe waba habè laiblibik.’ ” †
 7 Em in zen gol tenya insa laiblibik, zep eno mae mo nwenak man tangan sam gwesik. Hwëna taiblibin srëm wenyä, zëbe mae hap Alap mo ola anakan sa lwa gwizim,
 “Tenya mensa gol tauk gwen wenyä baes neibik,
 hwëna Bian Alap zep desa bolak ik gilkï.”*

8 “Zini beya nik sa tenya iwe de tana bol tang ta gwe zankam altil gwer.”*

Zen mae hap sa altil gwer: Sap zen man Alap mo ola hwa nulsuk gwenan- men kirekam Alap orep hamal hap kalang gwibiridakake.

9 Hwëna Alap mes nësa hlil inki. Zep nen an men kiye- Teipsin Zini Alap mo golak de syal ta gwen zini, hen Alap zëre en hap de zi. Nen an zëre mo bi gwibin zi ausu. Zep angkam nen mae en habe lowehe gwe'an: Dekam de anakan zëre mo bosesa mam gul gweblan hap, “Alap mes owas tangan hap nësa kwasang gwibiridaka, zep kawesin nikon zëre mo sërkam de ngatanak dep nësa kwang guludaka.”

10 Zep nëbe mae hap mes ki jowezimk- Alap mo olak men kirekam nëbe mae hap dena lwakke,
 “Menkam em Alap mo hlil irin zi ausunak home bitï gwëk,
 hwëna angkam mese bitï gwer.
 Menkam emsa hom kwasang gwibiridaka,
 hwëna angkam em in Alap mo kwasang gwibiridan wenyä zen tangan.”*

Mae hap de ol: Em Alap hon de babu gwen zi mo kim lowehe gwëk.

11 Ano dang tininak de wenyä, nen kolengkame okamanak awe lowe he'an, hwëna nëno mae mo eiwa de langna, zen diki ngatan zi mo lang. Zep nëno mae mo auhu-kama hole-hlena nen ki gwei gubir kinï

gwen. Sap tim nikore hole-hlena in man nëno mae mo enho mo dwam gwibin niban ilman në gwenan.*

12 Nen an dwan Alapsa de tame tan srëm zi mo ngirinnik em-am lowehe gwenan. Zen sap sa nësa anakan lamang da gwibir, “Zen in kareksa nol gwenan.” Hwëna nen dekam zëno mae mo nwenak dawem enkam nen lowehe gwen. Alap kim de zëbe mae hap dekam de tame gun hup de enlalana zezim'inka, zen dekam sa sahera ban Alap mo bosenä anakan teip nulsublul, “Alap Zen eiwa ki emsa golëlowehe gwenda.”*

13 Zen in zep, Bian Yesus mo bose de aha zi mo nwenak karek gwen srëm hap, emki okamana awe de pëmerinta mo teipsin-teipsin wenyäka blikip gwesibirida gwen. Nonol tangan, teipsin tangan zini,

14 hen zëno irgwa taha nakore wenyäka- men zen zëno bosekam irik nil gwenanke. Sap teipsin tangan zini, zen mae hap irgwa taha nakore zemka dam dasik gwibirin: Karek gol gwen zi hip dikim kareksa gol gwizimdin hip, hen dawem gol gwen zi hip dikim dawemsa gol gwizimdin hip.

15 Zep Alap man nësa dawem ensa de syal gwe-gwibin hip dwam gwibirida'ara- ekakim enlala joblotop zi mo ëksa mat lasik gwibirizimk, men zen nësa donsubirida gwenanke.

16 Sap nen menkam dowal mo kigi hone hen ëbabu gwe-gwëk, hwëna angkam Kristus mes nësa hil ti sonebirki. Hwëna anakan bahem ëenlala gwe-gwen, “Èe an hil ti sonen nikë gwë'an. Èe sap asa aningkim karekna gol gwer.” Diki angkam Alap en hon nen ëbabu gwe-gwen.

17 In zep,

tingare zisi blikip eisibirida gwëk.

† 2:6 2:6 Petrus ayatnak awe Yerusalem mo aha bosekam “Sion”kam ale gulku. (Yes. 28:16; Rom. 9:30-33) * 2:7 2:7 Mzm. 118:22-23 * 2:8 2:8 Yes. 8:14-15 * 2:10 2:10 Hos. 2:23; 1:6-10 * 2:11 2:11 Gal. 5:16-17 * 2:12 2:12 Mat. 5:16

Kristen bose omka kwasang eibirida gwek.

Alapsa aïri gweblak.

Hen pemerinta mo teipsin tangan zini blikip eisik gweblak.

¹⁸ Men zen zi mo tana iltikinnik ëbabu gwe-gwe'an, emki ere mae mo zi bina insa dawem enkam blikip gwesibirida gwen, hen zëno mae mo dwam gwibin sin emki ang ta gwen. Zep zi bina in de emsa saesaekam zergwë gwenna, ahaksa jaljalkam, em hwëna dawem enkam em zergwë gwen.

¹⁹ Karek gwen srëmnak de mam zini in emsa karek tanna, dekam ere mo enlala em anakan së ta sone gwen, "Ëe namaë Alap mo taha terenak gwë gwe'an." Hen dekam nama em enlala tatete naban zëwe syal gwe-gwen. Kirekam de gwë gwenkam, Alap sa emsa sam gwesik gweblala.

²⁰ Hwëna em de karek gwen-nak de emsa lek-lek tanna, dekam bahem anakan tim gun, "Ëe de enlala së ta sonenkam gwënkam, dekam Alap sa asa sam gwesiblila." Em dwan mes-am karek gwera! Alap molya kirenak emsa sam gwesiblika. Diki em de karek gwen srëmnak de emsa karek tankam maka emsa sam gwesibli'ara.

²¹ Alap Zen eiwa kirekam de kareksa de goltowe gwen hap nësa kwang guludaka, sap Kristus Zëna hen mes kareksa nëbe mae hap goltoweka. Zen dekam Zënaka ërak makan nëbe mae hap drë nezimkinen dikim tana wei san zertron hap,

²² Alap mo olak men kirekam zëbe hap dena lwakke,

"Zen hom karek gweka

hen zëno ëk nakon hom mae boton ola wet sok." †

²³ Desa kim lamang da'ak,

Zen hwëna hom lamang tabirki.

Hen kim karek da'ak, Zen hom dekam gubiridaka, "Ëe asa hen emsa karek tabir."

Zen hwëna Alap ensa anakare enlala naban yaing gwebla kinika, "Diki Zen sa abe hap dena dam-dam enkam klis gulu."

²⁴ Zen zëre mo timnik nëno mae mo karek-kareksa wei yulku- telidak sonnak kim makan da inkye,

nen dikim auhu-kama enlala karek nakon ëhil gwe hanan hap,

dekam de hwëna dam-dam enkam lowehe gwen hap.

Nen mese zëno wei-wei nakon ëdawem gwek.

²⁵ Nen menkam bi srëm domba zaho mo kime ora srëm san ëgwa ha'ak,

hwëna angkam nen mese nësa de zaho ta gwibin bi san dep lwanda halzal.

Angkam Zen nëno mae mo angna nëp kara ta gwibir-zim'ira.

3

We-zi dare de kirekam zënaka igwë gwen hap de ol:

¹ We walya zi wal omka emki blikip gwesibirida gwen- men kirekam hen babu gwen zini zëre mae mo zi bina blikip neisibirida gwenanke. Sap zi uk de Alap mo ol san ang gwe srëm gwenna, eno gwën dawemsa de kara gul gwen enkam zen maka hale'ara. Em sap esa titi ta srëm gwe-gwera.

² Sap zen de anakan emsa kara gul gwe'anka, "Zëno gwëna lalak enna, hen Alapsa man blikip gwesik gweblanan," zen dekam maka hale'ara.

³ Zep we walya, ere mae mo tim enna bahem weir gulsuk gwen- nol alasa de sam gulsunkum, emas maekam de enaka weir gulsunkum,

hen pakean dawem maesa de alala ta gwenkamye.

⁴ Diki enhosa em hen wër tasik gwen- enlala sae-saekam hen enlala betekkam de gwë gwenkam. Sap

† 2:22 2:22 Awe Petrus Yes 53:9sa mas gulku. Hen ayat 23-25nak, Yesaya mo pasal 53sa de enlala gwibin niban ale gulku.

Alap mo nwenak, zen zen- hēndep de nwe-awes naye.

⁵ Sap orep de we walya, Alapsa de yaing gwebla kinin wenya, zen kirekam enho zemka wēr dasik gwek. Zen zep zi wal zemka dawemkam blikip neisibirida gwek.

⁶ Orep Sara Bak zen kirekam gwē gwek. Zen zi zem Abraham Bak mo ol san ang gwe-gwek, hen desa “ano teipsin”kim gu gweblak. Em de zēno kim lowehe gwenkam, aīrīn srēm kam de dawem ensa syal gwe-gwibinkim, em hen dekam esa ēnwe-mase gwe-gwer- san de Sara mo wenam.*

⁷ Zini em hen kirekam we wal omka enlala blala ban olēlowehe gwek. We omka dawemkam em mas gwe-gwibin, sap zēno timni sosen tangan naka hom. Hen emki blikip gwesibirida gwen, sap zen hen sa Kristus mo kwasang-kwasang nakon ēngaya gwer. Zep zen hen Alap mo hanan tabinni- in ki hen em. Karekam de golēgwē gwenkam, ki hwēna Alap molya eno mae mo ol gu sonenna dokwak gul gweka.*

Kareksa de goltowe gwennak de kire enlala naban tatem ēzauk gwen hap de ol:

⁸ Aumwa hap ēe ama emsa gwibirida'an: Aha-ere enlalakam em lowehe gwen. Ebon mae onakon de ahanik enlala nik dowe hananna, emki hen zēno enlala dowe hanansa eisbin. Kristen bose omka em kwasang gwibirida gwen- ere mo iye tangansa de kwasang gwibirida gwen makan. Ensa em enaka lwabirida gwen. Deban enlala betekkam lowehe gwek.

⁹ Emsa de aha zi karek ta gwibinkim, em hwēna bahem karekna gol gwizimdin. Emsa de lamang ta gwibinkim, em hwēna bahem lamang ta gwibin. Em hwēna dawemsa em gol gwizimdin. Sap Alap Zen kiresa de goltowe gwen nakon de dawemsa golzimdin

hip nēsa kwang guludaka- lamkam dikim hwēna zēre mo walasna nēbe mae hap dawemsa golzimdin hip, men desa nēp hamal gulzimkike.

¹⁰ Sap Alap mo olak man lwak, “Zini men zen hēndep de gwēn hap ēdwam gwe-gwe'an,

hen Alap mo taha terenak de lowehe gwen hap, zen dikire mahal zemka nolēinik gwe-gwek.

Hen boton ola bap zen mip nakon wet so gwizimdin.

¹¹ Hen kareksa de gol gwenna zen baes tan, hwēna dawem ensa zen syal gwe-gwibin.

Zen diki tīngare zi niban dikim aha-ere enlalakam golēlowehe gwen hap de orasa zen tē gweblan.

¹² Sap Bian Zen enlala dam-dam zisi nwekam kara ta gwibirida, hen zēno mae mo ol gu sonenna man sal gwenda.

Hwēna men zen karekna nol gwenan, zēno mae mo ol gu sonenna hom dokwak gul gwenda.”*

¹³ Hwēna em de dawem ensa de syal gwe-gwibin hip ēsyal-syal gwe-gwenkam, dekam nara molya emsa karek tabirki.

¹⁴ Hwēna emsa de karek gwen srēm nak karek ta gwibinni, emki ēhē'ho gwe-gwen, sap Alap sa kire hap de dawemna lamkam ebe mae hap golzimdi. Dekam emki Alap mo ola ansa enlala gwe-gwibin- men zen anakan lwakke,

“Auhu-kama enlala zini mensa naīri gwibirin,

em bahem desa aīribin, hen bahem ēngalap gwe-gwen.”*

¹⁵ Hwēna dekam ere mae mo enhonak Bian Yesus mo bosesa em anakan teip gulsuk gweblan, “Sap sa asa karek da gwer, sap ano gwēna Zen Kristus Yesus kitak gwirensi'ira.” Hen enlalasa emki hohle ta guk gwen- dekam de Yesus

* 3:6 3:6 Kej. 18:12 * 3:7 3:7 Ef. 5:25; Kol. 3:19 * 3:12 3:12 Mzm. 34:13-17 * 3:14 3:14 Yes. 8:12-13; Mat. 5:10; 10:28; Luk. 12:4

hup denaka ding gul gwen hapye. Sap sa emsa anakan dakensibirida gwer, "Em ba habe Yesussu yaing gwebla kini gwe'ara?" Em hwëna dekam enlala sae-sae naban hen blikip gwesibiridan naban em ding gul gwizimdin.

¹⁶ Eno mae mo enhona dekam bap zen kles gwesin. Sap nësa de lamang ta gwibin zini in de anakan emsa kara tabinkim, "Zëno mae mo gwëna lalak enna," zen dekam sa anakan ësa her gwe-gwer, "Ëe ba habë Kristussu de ang gwe-gweblan weny a ansa lamang la gwibik?"

¹⁷ Sap dawem ensa de syal gwe-gwibinnik de emsa karek tabinni, zen aïris tangan. Alap mes ki emsa kire hap dam tasibirki. Hwëna ëkarek gwennak de emsa karek tabinni, zen dawem naka hom.

¹⁸ Sap Kristus Zëna hen kareksa de gon srëmnak karekna goltoweka- Zen kim nëno mae mo kareksa de wei yun hup tilkiye. Zen molya etan zi mo kareksa de wei yun hup Zënaka sosok taka. Hwëna Zen tingare karek gol gwen zini nëno mae mo weinak dep tilki- nësa dikim Alap osan dep golëlwanda halzan hap. Zep karek gon srëmnak de emsa karek tabinni dekam emki hen Yesussu anakan enlala gwe-gweblan, "Desa hen kirekam karek gon srëmnak karek dak."

Dekam zëno auhu-kama timni man karek nulblik, hwëna Alap mes zëre mo Enhokam ngaya taka.

¹⁹ Zëno angna dekam man sap juwen zi mo lang san ati gwe inekadekam de zëwe de bwinak de weny a kip Alap onakore ol dawemsa tonbiridan hap.

²⁰ Zen men zen orep Alap mo ol san ang ta srëm gwëkke, zëno mae

mo angna- Nuh Bak men kim bul yala in sa syal gwe-

gwibirikike. Dekam Alap man sap zen dikim ëhalen hap eissibirida gweka. Hwëna zen hom ëhalek. Hëndep buluk iwe zen da-en sesek gwesek, zen en zep ëngaya gwëk- beyana delapan enkam, ho namwana in kim bulu in sa golwale gwëkye. *

²¹ Zep nen angkam ho namwana in han hokam de baptis tabin nibane apde oso gwenan. Zi de baptis gwenkam, zen timnik de kuns a dikim ngan gulsun hup hom. Baptis gwen mo enlalana, zen dekam de Alaps a enho hohle tan nakon gugublun hap, "Ëe ama Bian Yesussu ang gwebla'an." Zen san de Yesu s mo buluk de sewe senna kiyemen kirekam orep de zini Nuh Bak mo buluk sesek gwe sekke. Zen nen dekone ëngaya gwe'an- men kirekam hen Yesu s Zëna tin nikon ngaya gwëkake.*

²² Zen dekam zep ngatan zi mo lang san dep sewe seka, hëndep angkam Alap zëre mo dam taha nakon teipsinkim nikin'ira. Alap zëre mo dam taha nakore zini hen tingare ahakore teipsin-teipsin weny a, zen kitak Zëbon onakon ot-danak lowe he'an.

4

Mae hap de ol: Ëpba lowe hens a em gwei gubir kini gwen, sap Yesu s nabakam sa lwahal zala.

¹ Kristus Zen hen kareksa goltowe gweka- tim niban kim nama okamanak awe gwë gwëkaye. Zep nen hen nen ki enlalasa hohle ta gwen- Kristus mo kim de hen okamanak awe kareksa goltowe gwen hap. Nësa de karek gwen srëmnak karek tanna, zen aïris tangan. Sap

* **3:20 3:20** Zini srën-srënkam Petrus mo alena 19-20nak awe dam nulsuk gwenan. San ha Alap man dekam ho namwanak de juwen weny a in hap golzimki?- Yesu s de ol dawemsa tonbiridan nakon de zen ëhalen hap denaye, hen zen dikim ëngaya gwen hap denaye. (Emki hen 1Ptr. 4:6nak baca gun.) Hwëna angkam de weny a nësa hom kirekam dep dwam gwibirida'ara. Zen diki okamanak de nama ngaya nik ëgwë gwen ennak nëbe mae hap gol gwizim'ira- dekam de ol dawem san ang tankam ëhalen hap denaye. (Ibr. 9:27) * **3:21 3:21** Rom. 6:1-11; Rom. 10:9-10

zen dekam kareksa de gon hap de hole-hlena nëbon mae onakon som gwe hana gwenan.

² Dekam nama de okamanak lowe hennak, nen molye nëre mae mo auhu-kama hole-hle san ang ta gwek. Hwëna Alap mo dwam gwibin en san esa ang ta gwer.

³ Nen dwan mes-am tangan ëholo gwek- nëre mae mo lowehen karek san de ang ta gwen naye, hen hole-hle san de ang ta gwenkam, men kirekam Alapsa de tame tan srëm wenya lowehe gwenanye. Nen dekam kirekam-kirekam karek ensae nëre mo dwam gwibin sin ulin halasen gwek. Nëno mae mo enlalana dekam ho mamak otdebin en hap dena, syan-syan en hap, hen swi en hap dena. Hen yang tasin dowaldowal ensae boklena kom labirida gwek.

⁴ Men zen angkam kirekam nama zëre mae mo hole-hle san totoresa ang ta nasen gwe'an, zen zep angkam nësa anakan denggwambirida gwe'an, "Zen ba hap angkam nëbon mae osan ang ta srëm gwegwe'an?" Zen zep nësa lamang da gwibirin.

⁵ Hwëna nëno mae mo Teipsinni Yesus, Zen mes tangan kitak de klis gulzun hap hohle gwera. Men zen totoresa lowehe gwek, sap ngaya wenya hen sap men zen juwenkam teingir gwe guk, Zen dekam sa zëno mae mo lowehen karekna in hap takensibiridala.

⁶ Zen in zep Yesus nonol juwen zi mo lang san dep ati gwe inekadekam de ho namwanak de juwen wenya in hap ol dawemsa tonbiridan hap. * Sap zen kim tim niban nama lowe he'ak, Alap man tangan karek tabirki. Zen kirekam tingare zini nëbe mae hap ërak makan kang gulku- anakan dikim nësa enlala sobiridan hap, "Ëe asa tingare zini ebe mae hap ere mae mo syal eini golzim." Hwëna Yesus zep zini in hap ol dawemna tonbirida onka-

dekam de zëbe mae hap hen ëngaya gwen hap de orasa kles tyasizimdin hip, desan de ang tankam dikim zen hen Alap onak hëndep denaban lowehe gwen hap.

⁷ Zep aumwa hap denak angkam mes golek de gwer. Zen in zep enlalasa nen hohle ta gwen, hen nënaka nen golëinik gwe-gwen-Biansa ekakim dawemkam en sone gweblak.

⁸ Zep bol-zaun tanganna, nënaka nen ki tingare enho naban kwasang gwibirida gwen. Sap nënaka de kwasang gwibirida gwenkam, zen dekame nëre mae mo karek-karekna beyakam jek-jak ul gwenan.*

⁹ Nen nëre mae mo gola kon zini zi walya aha-ere enlalakam lup gulin gwen. Bap nen enlala ennak anakan mae ëhusus gwe-gwen, "Ano golak dekam hir-hiri sa mam gwer."

¹⁰ Alap mo Enho nakore sosonna mensa Alap zëre mo kwasangkwasang nakon nënaka dikim tatete ta gwibin hip srën-srënkam nëp gol gwizimnira, desa dawem enkam nen gwirensik gwen- aha zi dekakim Alap mo kwasangkwasangna insa tame nul gwek.

¹¹ Zep a kirekam em gwirensik gwen:

Zen de ebe mae hap aha zisi de mas gwibirida gwen hap de sosonsa gol gwizimdkim, dekam Alap ensa em anakare enlala naban yaing gwebla kini gwen, "Zen diki Zen sa sosonna abe hap gol gweblala- ëe dikim syala ansa sul sonen hap denaye."

Ahaksa, Alap de ebe mae hap zëre mo Enho nakore hamal hap de olsa ayang gul gwizimdin hip denaka gol gwizimdkim, ahaksa Alap mo olkam de tawa ta gwibin hip denaka, em dekam anakare enlala naban em tonbirida gwen, "Ëe

* **4:6 4:6** Emki hen 1Ptr. 3:19-20nak baca gun, hen zao de otde ale naban. * **4:8 4:8** Yak. 5:19-20

zi mo olsa homë emsa ton-
birida'an. An hwëna Alap
zëre onakorena."

Dekam aha zi de emsa kirekam
kara ta gwibinkim, zen sa Alap
mo bosena teip nulsublunda gwer-
sap Kristus Yesus onakore kwasang-
kwasangna hen sosonna ebon mae
onak syal gwe-gwenan. Dikire
tingan Alapsa anakan tame dak,
"Alap Zë-en teipsinni hen sosonna-
hëndep denaban!" In eiwa.*

*Kristus mo bose hap de isrip-sri
naban kareksa goltowe gwen hap de
ol:*

¹² Ano dang tüninak de weny,
bahem anakan ëtengguan gwen,
"Ëe an ba habë sërkam de karekna
oltowe gwenan?" Zen kirekam sa
nëbon mae onak lwa gwer, zep esa
ëhusus gwe-gwer- san de syauk sal-
salak de ëzauk ane gwenna. Zen
kirekam Alap Zën ki nësa akasi-
birida gwe'ara.*

¹³ Sap nen Kristus mo kime hen
karekna oltowe gwenan, zep dekam
anakare hap nen ëisrip-sri gwe-
gwen, "Ëe an eiwa Kristus hun
de zeraha-en gwenna." Zen zep
esa lamkam sërkam ëisrip-sri gwer-
Yesus kim de zëre mo ngatan zi
mo lang nakore ngatan naban golati
gwe ine'an zakaye.

¹⁴ Emsa de Kristus mo bose hap
lamang ta gwibinni, dekam anakan
em ëisrip-sri gwe-gwen, "Alap mo
ngatan zi mo lang nakore sosonna
abon ki lwa'an." Sosonna in, zen
Alap zëre mo Enho nakorena.

¹⁵ Hwëna karek gonnak de emsa
karek tankam, anakare kareksa de
gonnak-
zisi de tan,
sowë gwen,
kareksa de gulin hala seran,
ahaksa aha zi mo syalak de enaka
zerngewen-
dekam emki ësa her gwe-gwen.

¹⁶ Hwëna Kristus hup de jal hap de
kareksa goltowe gwenkam, dekam

bahem ësa her gwe-gwen. Dekam
hwëna anakare hap em Alapsa isrip-
sri gwe-gweblan, "Ëe eiwa mesë
Kristus hun zeraha-en gwek."

¹⁷ Sap Alap mo tïngare zisi dikim
karek tabin hip de yaklanak angkam
mes zaul. Zen mes kon gwis-
bir hanaka- Yesusu de taïbliblan
wenya nësa de karek tabinkimye.
Nen nonol kareksae oltowe gwe'an.
Hwëna emki ëenlala gwe-gwen:
Nësa de kirekam angkam karek
ta gwibinkim, hwëna Alap on-
akore ol dawemna men zen i-san i-
san neibir srëm gwe-gwenan, desa
hwëna aumwa hap denak sërkam
tangan sa karek tabiri.

¹⁸ Sap Alap mo olak man lwak,
"Dam-dam enkam de gwën zi de
ëngaya gwen hap dena, zen
gwa-gwa tanganna.

Zep hwëna Alapsa de tame tan srëm
wenya hen kareksa de gulin
halasen gwen weny,
zen tangan toton banakan molya
ëngaya gwek."*

¹⁹ Zen in zep, nen de Alap mo
dwam gwibin sin kareksa goltowe
gwenkam, dekam dawemsa de syal
gwe-gwibinni bap nen golzausuk
gwen. Dekam Alap men Zen nësa
yang tabirki, Desa en nen anakare
enlala naban yaïng gwebla kïni
gwen, "Zen man zëre mo ol gu-
gunnu sul sone gwenda."

5

*Alap mo domba zahosa de
dawemkam kara ta gwibin hip de ol:*

¹ Men zene Kristen zisi nol
eibirida gwe'an, ëe, ere mae mo syal
bose, ama emsa enlala sobirida'an:
Kristus kim karek yala insa nëbe
mae hap goltoweka, ëe ama
aen nwekam kara ta'ak.
Hwëna zëno hyanak asa hen ki zep
Kristen zisi de nol gwibiridan
hap dam dasik.

Hen Kristus kim de nëbe mae hap
zëre mo ngatan zi mo langnak

* 4:11 4:11 Rom. 12:3-8; 1Kor. 12:4-11; 12:27-31

* 4:12 4:12 1Ptr. 1:6-7 * 4:18 4:18 Ams. 11:31

de ngatanna goltreizim'inka, nen apdekam esa desa hla kul. Zen in zebë emsa enlala sobirida'an: ² Alap mo domba zahona dawem enkam esa kara la gwibir-Zëna men kirekam nësa dwam gwibirida'arake. Anakan bap nen ëenlala gwe-gwen, "Ëe an einë syal gwe-gwe'an." Hen te-ala en hap bap nen syal ta gwen. Diki isrip-sri naban nen syal ta gwen.

³ Nen bap nen nëre mae mo domba zahona anakan gubirida gwen, "Ëe an eno mae mo teipsinni." Diki nënaka nen zëbe mae hap ërak makan kang gul gwen, "Alap mo domba zahona diki a kirekam mo lowehe gwenanye."

⁴ Sap nësa de zaho ta gwibin hip de Zi tangan in kim de lwa ha'an zaka, Zen sa hwëna nëbe mae hap ngatan nabare mire sigina kap tazim zira. Mire sigina in, zëno ngatanna hëndep denaban sa zil ane gwer.

Kristen zi de kirekam lowehe gwen hap de ol:

⁵ Domba zahokam de wenya, emki ere mae mo nol-nola blikip gwesibirida gwen. Hen enlala betekkam emki lowehe gwen- ëbabu gwe-gwen zini men kirekam lowehe gwenanke. Sap Alap mo olak man lwak, "Alap bolte-bolte zisi man husus gwibirida gwenda, hwëna enlala betek zisi man kwasang gwibirida gwenda."*

⁶⁻⁷ Zen in zep enlala betekkam nen ki anakare enlala naban lowehe gwen, "Ëe an Soson Zini Alap mo taha terenakë gwë gwe'an." Zep nëre mae mo ëngalap gwe-gwen enlalana kitak Zëbon en onak nen ëblol gwe-gwen, sap Zen man nësa kwasang naban kara ta gwibirida. Kirekame lowehe gwe'ak, ki Zen

sa lamkam nëbe mae hap bose dawemna golzim zira.

⁸ Nen ki nënaka dawem enkam golëinik gwe-gwen, deban janam-janamkam nen lowehe gwen. Sap nëno mae mo jal zini, dowal mo kigina, zen man tësen lwa jal-jal mo kim yil-yili ban til gi nësen gwe'aramae hap, "Ëe an narasaë tan?" *

⁹ Zep Kristussu de taibliblan ennak de tatem ëzauk gwenkam nen zereijan. Hen anakan nen ki ëenlala gwe-gwen, "Ano mae mo Kristen bose walya tingare langnak kirekam de kareknak hen tatem ëzauk gwe'an."

¹⁰ Sap nen awe karek goltowe gwen ennak molye holokam lowehe gwëk, sap kwasang-kwasang Zini Alap nabakam sa nësa mas gwibirida zala. Zen sa nësa soson tabiri, hen gol mokosa de etan eiyas tandan makan sa nësa tatete tabiri. Sap nen an zen- Alap zëre mo kwang guludan wenyaye, Kristus hun de zeraha-en gwen nakon dikim Alap zëre mo ngatannak hëndep denaban lowehe gwen hap.

¹¹ Diki soson tangan Zini Alap Zëen- hëndep denaban. In eiwa.

¹² Ëe surat tihisni ansa Silas Bak honë ebe mae hap gol sonezimk. † Zen ano syal bose, hen zen taibliblan tanganna. Aya wal oso wal, ëe mae habë ebe mae hap ale gulzimk: Eno mae mo enlalasa dikim tatete tazimdin hip, hen em dikim ëre onakon anakan ësane gwen hap, "Eiwa, banakare maesa de goltowen nakon, Alap mo kwasang-kwasangna kirekam nëbon mae nwe-mase gwe-gwenan. Zep emki zëno kwasang-kwasangnak tatem ëzaun."

¹³ Ë yala Babelk ‡ de Alap mo

* **5:5 5:5** Ams. 3:34 * **5:8 5:8** Insa "tësen lwa" kam Orya olkam li nul sonek, Petrus Yunani olkam "singa jal-jal" kam ale gulku. Orya olkam enlalana apdenak- tësen lwa nabanye. (Yak. 4:7) † **5:12 5:12** Petrus in sa "Silas hon" kam ale gulku, zëno dam gulsunnu dan-dan. Aha dam gulsunnu anakan, "Silas Bak mes surat tihisni ansa ano ol san ebe mae hap ale gulzimki." ‡ **5:13 5:13** Petrus kim suratna ansa ale gulzimki, Kristen zini dekam ë yala Roma mo bosena "Babel" kam nërlëwe gwëk. Sap Babelk de zini orep sërkam Yahudi zini jap nul sonenda gwëk- in kirekam hen dekam Roma Kristen zini jap nul sonenda gwëkke. (Why. 17-18)

hlil irin wal bose wal om dawem
ensa ebe mae hap nol sonezimk.
Ano dang tininak de walas zergwë
gwenna Markus hen dawem ensa ep
gol sonezimki.

¹⁴ Men kirekam Kristen zini
ëgwë gwenan, ansa de baca gulsun
hyanak emki kwasang naban enaka
tahasa golëtowaran.

Tingan men zene Kristus hun
ëraha-en gwe'an, nen zëre mo taha
terenak esa lowehe gwer.

Petrus mo surat ahana

¹ Suratna an kitak de Kristen zini ebe mae hap,

Simon onakon- mensa hen "Petrus" kum nen gweblananke. Asa Kristus Yesus Zën dam tasiki- zëre mo nganak de syal gwe-gwen hapye.

Dawem kitak! Yesus Zen Zen-nësa de ngaya tabin hip de Zini. Hen Zen nëno mae mo Alap. Zen Bizem Alap mo nwenak lalak enkam gwë gwëka, zen in zep hëndep nësa ngaya tabirki. Nëbe mae hap mensa Alap Kristus Yesussu dikim taibliblan hap dena golzimki, zen sërkam de hë'ho gwibin tanganna, hen nen desa apdenake urensi'in.

² Zep Alap han nëre mae mo Teipsinni Yesus hun Zen diki Zen sa sërkam de kwasang-kwasangna Zënaka de tame son wënya nëbe mae hap ol gwizimdi. Hen nen zëre nik mo taha terenak esa lowehe gwer.

³ Alap Zen mae hap nësa kwang guludaka: Zëre mo ngatannak hen hë'ho gwibinnik dikim hëndep denaban lowehe gwen hap. Zep Zënaka de tame tan wënya nëbe mae hap, Zen mes zëre mo sërkam de sosonna sowehen tangankam golzimki- nen dikim zëre mo nwenak de étal gwesinkim ëliwehe gwen hap de-naye.

⁴ Nen dikim kirekam ëliwehe gwen hap, Zen zep gu-gubiridan ola nëbe mae hap dohonse gulzimki- sërkam de hë'ho gwibin tanganna naka. Zep nen de desa kitak gwirensinkim, zen dekam sa Alap mo Enhona nëbe mae hap sosonna mam gul gwizimdi, hen nen dekam esa auhu-kamanak de holehle nakon ëhil gwe hana gwer. Sap zen zen syauk sun de ora san dep nësa da tabiridahal gwenan.

⁵ Zen in zep syal-syalkam emki ëalp gwe-gwen- dawemkam dikim Yesussu de taibliblannak étatete

gwen hap. Étatete gwen hap de syala, zen a kirekam moye:

Nonol tanganna dam-dam enkam em gwën.

Zao anakan de kles son hap denaka em tawa gwibin, "An dawemna. An karekna."

⁶ Zao enaka em zerinik gwe-gwen.

Zao kareksa de goltowen maenak tatem em zaun.

Hen Alap en hon em tal gwesin.

⁷ Hen ahana, Kristen bose omka em kwasang gwibirida gwen.

Zao hen ahana, kitak de zi bose omka em kwasang gwibirida gwen.

⁸ Kirekame lowehe gwe'ak, dekam Yesussu de taibliblannak esa étatete gwe zaher, zep hëndep molye kareknak altink. Hen aha zi mo nwenak dekam sa anakan wet sol, "Zini an eiwa mes tangan Yesussu tame dak, hen mes hli-hli dasik."

⁹ Hwëna kirekam men zen de ëgwë srëm gwe'ak, zen toton bëjen. Kirekam de zini nwena mes ëhwalen-hwalen gwëk, hëndep ahakon mes tangan ëhai gwëk. Sap kire zini, Yesus mensa nësa karek-karek nakon ngan tasibirki, zen hom desa enlala nei gwibirin.

¹⁰ Hwëna zen zep, aya-wal oso-wal, emki enlala syal-syala ban Yesussu de taibliblannak étatete gwen. Zen dekam esa ere mae mo enhonak anakan tame ul gwer, "Eiwa, asa mes Yesus kwang taka hen dam tasiki." Dekam em molye eiwa de ora nakon ësyauk nahla gwëk.

¹¹ Hen dekam nësa de ngaya tabin hip de Teipsin Zini Kristus Yesus sa ngatan zi mo lang nakon isripsri naban nësa lup gulin gwëra-zëre mo irik ginnik dikim hëndep denaban lowehe gwen hapye.

¹² Sap eiwa, em mese kitak insa tawa eibik, hen Alap onakore ol dawemnak tateme ëzau'un, hwëna ëe nama asa kirekam emsa enlala sobirida gwer.

¹³ Eë de nama tim niban okamanak awe emsa golëgwei inen

dannak, zen ano syal- kirekam de emsa enlala sobirida gwen hap de-naye.

¹⁴ Sap ëe tawana: Ëe nabakam asa sopna alsil- men kirekam Bian Yesus asa hamal hap gu-gublu halkaye.*

¹⁵ In zebë anakan alp gwe-gwe'an, "Ëe de ëre mo walassa hli yuludankam, zen bap zen Yesussu de taibliblan hap de ola ansa eititi gwibin."

Mae hap de ol: Alap onakore ol dawemna mensa ësane gwe-gwek, zen eiwa tanganna.

¹⁶ Ëe men kimë emsa anakan enbirida gwek, "Bian Yesus Zen zëre mo sosen yawala ban sa gollwal hal zala," zen zi mo yasik tabin ol enlala gwibinsi homë kirekam ayang ul gwizimk. Sap ëe ëre mae mo nwekamë Yesussu hla lak- in kim kwatapnak ngatan zi mo lang nakore ngatanna wale ta zakye.

¹⁷⁻¹⁸ In kim zë asa golëlowe he'anka, ëe dekam ëre mae mo ikimë ngatan zi mo lang nakore ola ësak- Teipsin Zini Alap kim Tane zem insa boltere ta'ankaye. Alap dekam anakan gu aneka,

"An ëre mo Tane- ëre mo dang tininak de tanganna. Ama tangan sam gwesik gweblanan."*

¹⁹ Zen in zep, mensa Alap mo ol ayang gul gwen zini Yesus hup dena hamal hap nen gubirida gwek, zen bëjen zalta dep lwa kinin. Zëno mae mo ola zen okama kawesinnik awe men kiye- lampu ngatanna. Zep desa enhonak em lone gwen- hëndep Yesus mo lwa halzan yaklanak de hatak. Zen yakla nwe de hata sezan makan sa lwahal zala. Zen dekam sa zëre mo tim nikore ngatankam eno mae mo enhona ngatan tabir-zim zira.

²⁰⁻²¹ Nonol tanganna emki ansa enlala gwe-gwibin: Zini mensa Alap mo hamal hap de ola ayang nul gwek, zen auhu-kama zi mo dwam

gwibin sin hom ayang nul gwizimk. Zen hwëna Alap mo Enho ing gwe hebirida gweka, zep ki ëton gwek. Zen in zep, mensa zen ale nul gwek, zini bëjen desa zëre en mo enlalakam totoresa dam gulsun. Zen diki Alap mo Enho de ing gwe heblankam de dam gulsun.*

2

Mae hap de ol: Yasik tabin hip de zini sa ebon mae bëti gwer, hwëna Alap sa karek tabiri.

¹ Orep Yahudi bong-bongna kim lowehe gwek, dekam yasik tabin hip de zini man hen zëre mae mo ngirin nikon ësaltil gwek. Zen zep anakan boton da gwibik, "Ëe an Alap mo olsa de ebe mae hap ayang gul gwizimdin hip de zi." Zep kirekam de zini sa hen angkam ebon mae onakon ësaltil gwer. Zen aningkim sa zëre mae mo tawa tabinni mas nul gwer, hëndep ahakon zëno mae mo ol san de ang tankam sa syauk sun dep de ora san ang ta gwer. Teipsin Zini Yesus Zen mes Zënaka zerguku- zini insa dikim sap ngaya tabin hip. Hwëna zen anakan sa ëgu gwer, "Kristus ensa de blol gweblanna hom sowe he'an. Diki syala ansa em mas gun." Hwëna Alap nabakam sa desa timbwas tabiri.*

² Sap eiwa kirekam, hwëna zini beyakam sa zëno mae mo hole-hle san dep de yasik tabin ola in san ang ta gwer. Zen zep sa hwëna ëKristen gwen srëm wenyä tïngare Kristen zini nësa anakan nenbirida gwer, "ëKristen gwenkam, dekam hwëna karekkam lowehe gwenan."

³ Yasik tabin hip de zini in teala hap de hole-hlena. Zen zep sa totore olkam emsa tawa da gwibir- em dikim te-alasa zer gwizimdin hip. Hwëna Alap zëbe mae hap de syauknu orep mes hamal tazimki. Zen de timbwas gun nukon molya

* **1:14 1:14** Yoh. 21:18-19; 2Kor. 5:1

* **1:17-18 1:17-18** Mat. 17:1-5; Mrk. 9:2-7; Luk. 9:28-35

* **1:20-21 1:20-21** 2Tim. 3:16; 1Ptr. 1:11

* **2:1 2:1** Ul. 13:1-5; Mat. 24:11; 24:24; Yud. 4

ëheya-hya gwek, sap nen toton bakanan dep?– Alap mo nwe nakon de ëani-ning gwen naye! *

⁴ Sap Alap zëre mo dam taha nakore zini, zen hen Alap mo jala hlaunkum. Zen kim ahakon orep tangan ëkarek gwek, Alap hom dekam desa kwasang gwibiridaka. Zen hwëna hëndep de juwen zi hip de bwi kawesinnik yal gul neka. Hëndep zen nama zë kama hul kawesinnik iwe lowehe gwe'an-hëndep aumwa hap de klis gun hup de yaklanak de hata'ak.

⁵ Hen orep de ëpba bongna Nuh kim golëgwë gweka, dekam de zini hen ki Alap mo jala hla nuk. Dekam Nuh sap Alap hon dikim ëtal gwesin hip de olkam tonbirida gweka, hwëna dekam de zini in hen hom Alapsa daïbliblak. Zep hëndep ho namwakam karek tabirki. Hwëna Alap Nuh zëna en naka we wal walas zem tuju enkam desa en zep ngaya tabirki.

⁶ Dekam etan ki hen kirekam lwak, ë yawal darena Sodomk hen Gomorak. Desa hwëna syaukkum timbwas soka, hëndep man tangan nahwasdek. Alap ë darena insa ol tan-tan makan tehaka- nësa dikim anakan gubiridan hap, “Zini men zen Asa baes në gweblanan, an kirekam sa hen zëbon mae onak jower.”

⁷ Dekam Alap Lot Bak ensa ngaya taka, sap zen zen en zëre mo nwe-nak dam-dam enkam gwë gweka. Zen kim zëwe de zini kahalo ennak de lowehe gwennak kara ta gwibirki, hen kirekam-kirekam karek gulin halasen gwennak, zëno enlalana man tangan dowebla hana gweka.

⁸ Lot Bak zëna enna enho dawemna. Hwëna zen mwin-mwankam karek gol gwen zi mo ngirinnik gwë gweka. Zep desa de nwekam kareksa de syal gwibinnik hlauluda gwenkam hen ikim de sane ta gwibinkim, zëno enhona man tangan dowebla hana gweka.

⁹ Zen in zep man tangan dam gwesinin: Alap mo sosonna ki-Zënaka de betek gweblan zisi de tin hip de karek nakon gwiswe sone gwen hap denaye. Zëno sosonna hen ki- karek gol gwen zisi de bwi kawesinnik yal gulne gwen hap denaye. Zen zao sa lowehe gwer-hëndep aumwa hap de klis gunnuk de hata'ak.

¹⁰ Nonol tangan men zen zëre mae mo auhu-kama tim nikore hole-hle san ang ta nasen gwenan, hen men zen Alapsa de betek gweblanna baes ta gwenan, zen desa sa kirekam gweibiridala.

Yasik tabin hip de zini in zëna-zënana hen bolte-boltena. Zep zen hom ngatan zi mo langnak de wenyaka de lamang tabin hip ëairi gwenan- sap Alap Zëna, Tane zem Yesus, hen zëre mo Enhona, hen sap zëre mo dam taha nakore zi maesa de lamang tabin niye.

¹¹ Hwëna sap diki Alap mo dam taha nakore zini in, zen zen- so-son tangan wenyaye. Hwëna nësa in zen yasik da gwibirin, zen so-son naka hom. Alap mo dam taha nakore zini in, zen sap ki zi mo karekna Alap hap noltrë gweblanan, hwëna zëbon mae onakon ol lamang ola hom mae wet so gwenan.

¹² Hwëna yasik tabin hip de zini in, mensa zëna tame nul srëm gwegwenan, zen desa man lamang nul gwenan. Zen enlala srëm tangannamen kiye, gwenya. Gwenya zen mae en hap ki lowehe gwenan: Zi de tahyo gwen hap hen tamera gwen hap. Yasik tabin hip de zini in hen kirekam. Zen timbwas tabin en hap ki lowehe gwenan.

¹³ Zëno mae mo yasik tabinni in, zen dekam hen zi dawem-dawem hap karekna nol gwizimnin. Zen in zep sa Alap sërkam de kareknak kang gulu. Zen in kwae naban! Zen man ësam gwesik gwenan- damnak de kirekam-kirekamsa gulin hala seranna. Hwëna karekna insa de

* 2:3 2:3 2Kor. 2:17; Ibr. 10:31

ber-ber gunkum, zen man Kristen zi dawem naban de apdekam tembane tan hap ësäm gwesik gwenan- aha zi mo nwenak dikim anakan ënwe-mase gwen hap, "Zen an hen zini dawemna."

¹⁴ Hwëna zen kahalo enlala naban ëkaratda gwenda gwenan. Zen hom kareksa de hole-hle gwe-gwibinni ëblalen gwe-gwenan. Ètatete gwen srëm wenya, desa man karek san dep wan-wan da gwibirin. Kirekam de zini mes hen te-alasa de zëre mo boton nakon gulin gwen hap de orana dam dasindak. Zen zep sa Alap heip gulu.

¹⁵ Yasik tabin hip de zini in mes ora dam-damna baes nëblak, zep hëndep gwa san dep ësyalhek- men kirekam hen Beyor Bak mo tanena Bileyam Bak syal hekake. Bileyam in hen man zëre mo tawa tabin karek nakon de te-alasa gulin gwen hap hole-hle gwe-gweka.

¹⁶ Hwëna zen in zep Alap damnak dei yul gubluka- zëre mo keledaina in kim oranak owas hap zi olkam jalse gweblakaye, dekam de zëre mo mamakkam de syala in sa baes gwibin hip.*

¹⁷ Yasik tabin hip de zini in, zen men kiye- dobe jop dan enna. Zi de ë nakon akenna tim gunkum, "Dobena ki." Hwëna hom tol. Zini in hen o il ti gwen srëmnak de okawen makan. Okawensa de hla tankam dekam de anakan syal-syal gwen, "Namen sa ona il tïla." Hwëna hom tol. Zini in hen kirekam: Èse hlaludan-nak dekam kil tibinkim, "Zini an dawem-dawemna." Hwëna Alap mes zëbe mae hap bwina sërkam de kawesin tangan naka hamal gul guzimki.

¹⁸ Yasik tabin hip de zini, zen hen anakan ëgwë gwenan: Zëre mae mo boton olkam zënaka bën-jana da gwibirin. Hen men zen sap ora gwa-gwasa de hli tan hap ëalp gwe-gwe'an, hwëna yasik tabin hip de

zini in zol makare naka eiyas da gwibir-zimnin- anakan de gubirida gwenkam, "Haen, nen de kirekam nëre mae mo hole-hle san ang ta gwenkam, Alap molya nësa husus gwibiridaka." Hëndep dekam zep etan auhu-kama hole-hle san hen kahalo san dep nolëlwandahal gwenan.

¹⁹ Zen anakan kil nil gwenan, "Nen mese Kristen zi mo kirekam de lowehen nakon ëhil gwe hanak. Nen tahalebin srëm nike lowehe gwenan." Hwëna auhu-kama hole-hlena mes tahalebik, sap zëre mae mo hole-hlena in zen sil tibirhal gwenan. Sap tingan men zen zëre mae mo hole-hle san ang ta gwenan, hwëna hole-hle enlalana in mes zëno mae mo enhona al tak.*

²⁰ Kwasang tol! Diki ngaya tabin hip de Zini Bian Yesussu de tame tankam nen eiwa ema auhu-kama hole-hle nakon ëhil gwe hana gwenan. Hwëna men zen Yesussu de tame tan nakon etan desan dep lwan dahal gwenan, ki zen banakan molya etan hulenna in kon wet so gwëk, hen zen mes tangan zëre mae hap de karekna mam nuk.*

²¹ Eiwa, kwasang tol! Zen ora dam-damsa de tawa gweblan srëmkam de tinni maka ësäm gwesik. Dekam Alap molya sërkam karek tabi'inam. Hwëna zen mes Alap hon dikim ëtal gwesin hip de orana tawa nëblak, hwëna man desan en de ang tan hap baes tak.

²² Zep men kirekam zini ëgu gwenan, zen zëbe mae hap dakastilzim'in- anakan mensa ëgu gwenanye, "Lwana u sang-sang hap de wëk gwenkam, zën sa etan twenblala."* Anakan hen ki ëgu gwenan, "Gwe zahona sap esa hokam ngan tasili, hwëna eitinak sa etan tal hera."

3

Mae hap de ol: Yesus sa etan zi mo tame gun srëmnak lwahal zala.

* 2:16 2:16 Bil. 22:1-35 * 2:19 2:19 Yoh. 8:34; Rom. 6:16-17 * 2:20 2:20 Mat. 12:43-45; Ibr. 6:4-6 * 2:22 2:22 Ams. 26:11

¹ Ano dang tininak de aya-wal oso-wal, suratna ansaë ebe mae hap ale gulzim'in, dekam mesë suratna ebe mae hap dan sozimnin. Sap ëe eno mae mo enlalasa dikim ëse ta gwizimdin hibë dwam gwe-gwe'an-enho kles gwesin srëmkam ekakim lowehe gwek.

² Zep men desa Alap mo ol ayang gul gwen zini orep nen gubirida gwek, hen men desa nësa de ngaya tabin hip de Teipsinnë Yesus nësa gubirida gweka, desa bahem eititi gwibin. Yesus mo dam tasibin zini, ëe mesë desa ebe mae hap ayang ul gwizimk, hen angkam ëe, Petrus, mesë enlala sobiridanna emsa dan sozimnin.

³ Nonol tanganna ansa emki enlala gwe-gwibin: Aumwa hap denak zi mo hole-hle enlalana sa tangan taman kinë gwera. Hen dekam emsa sa anakan swrë da gwibir,

⁴ "Em ema ëkil gi'in, 'Yesus sa etan lwahal zala.' Hwëna nonol men zen sap daïbliblak, zen mes nama de sap ësbla tine gwennak hëndep juwesik. Alap kim okamana ansa yang gulsuku hëndep angkam, kina ki banakan mae man wet gwesin!"*

⁵ Hwëna zen hom ola ansa de enlala gwibin hip ëdwam gwe-gwe'an: Nonol lone sennak Alap ngli naban okama naban am ol-gun enkam yang sosuku- hina kim kles son hap gubirki hen otde weyana kim aha-erenak de tagal gwesin hip gubirkiye. Okamana an dekam zep hatasek.*

⁶ Dekam zep hëndep weyakam orep de okamana insa timbwas gulku- ho namwa yala insa kim hatan hap gubirkiye.

⁷ Hen kirekam sa etan Alap angkam de okama naban ngli naban ol-gun enkam timbwas sola. Dekam hwëna syaukkum sa. Zen angkam kirekam de hen timbwas son hap lam so'ara- aumwa hap de

klis gun hup de yaklana iwe kim de hata'akye. Zen dekam sa hen syauknu inkam Zënaka de betek gweblan srëm wenya insa timbwas tabiri.

⁸ Hwëna aya-wal oso-wal, ansa bahem ëeititi gwibin: Bian Alap hom zi mo kim yakla naban ben naban aït gwibirida. Nëno mae mo aïtbinkim seribu tahunna, zen hwëna Bian hap san de aha-ere yaklana kiye. Bian mo aïtbinkim yaklana aha-en, hwëna nëbe mae hap holona seribu tahun.*

⁹ Bian hom zëre mo gugubiridansa de syal gwibin hip holo gwe'ara- men kirekam zini anakan tim nul gwenan, "Yesus ba hap hata srëm gwe'ara?" Hwëna Zen kwasang tol hap nësa eissibirida'ara- nen dikim sap nëre mae mo karek-karek nakon ëhalen hap. Zen hom aha mae nik de tin hip dwam gwe'ara. Zen hwëna kitak de ëhalenkam de ëngaya gwen hap sap dwam gwe'ara.*

¹⁰ Hwëna Bian Yesus mo lwa halzan hap de yaklana, zen sowë zi mo kim sa lwal. Dekam nglina auku mamkam de tadre gwen naban sa jek-jak nër. Hëndep dekam sa yakla nwena, keisni, hen benna ëhwasder- hëndep okamana hen zi mo syal gwibin kire-kirena kitak. Banakare maena molya lwak.*

¹¹ Zep kirekam insa lwa'an, nen de deban ëtimbwas gwen srëm hap, a kirekam nen ëliwehen: Dam-dam enkam nen lowehe gwen- Alap en hon de ëtal gwesinkim.

¹² Deban salok-salokkam nen anakare enlala naban lowehe gwen, "Diki namen de Yesus hata zankam aïris tangan." Aumwa hap de yaklanak nglina an sap sa hwasdera, hen keis maena sap sa sal-sal hap ëho gwer,

¹³ hwëna nen okama ëse naban ngli ëse nabane kara ei gwizim'in- men kirekam Alap hamal hap nësa

* 3:4 3:4 Mat. 24:48-51; 1Tim. 4:1; Yud. 18 * 3:5 3:5 Kej. 1:6-10 * 3:8 3:8 Mzm. 90:4 * 3:9 3:9 1Tim. 2:4 * 3:10 3:10 Mat. 24:29; 24:35; Luk. 12:39; 1Tes. 5:2; Why. 16:15

gu-gubirida gwekake. Zëwe dam-dam enkam de lowehe gwen en nik sa bitì gwer.*

¹⁴ Zen in zep, aya-wal oso-wal, sap nen ema kirekam ngein sin dep dena insa kara ei gwibi'in, zep nen dawem enkam äalp gwe-gwen- dekam de zëre mo nwenak enlala karek-karek srëmkam hen ëkun gwen srëmkam lowehe gwen hap. Kirekam de lowehe gwenkam, ki nen zëre mo taha terenak esa lowehe gwer.

¹⁵ Hen nen ki Bian Yesus mo lwa halzan hap de yakla hap anakan ënlala gwe-gwen, "Zen sap sa holo gwera, sap ahakon zen dekam sa hen ëngaya gwer." Alap mes nëno mae mo dang tininak de ayana Paulus hup enlala blala zerblaka, zen in zep hen kire hap dena*

¹⁶ tingare zëre mo suratnak nëbe mae hap ale gul gwizimki. Zëno suratnak hen ki- olk san de enlala nabare naye. Yesussu de taibliblannak de ëtatete gwen srëm wenyä hen tame gun srëm wenyä zep desa karekkam dam nulsuk gwenan. Zen hen Alap mo aha ol ale gunnu kirekam hen totoresa srip gulsunkum namblak nul gwenan, hëndep ahakon zep hëndep syauk sun dep de ora san lwan dahal gwenan.

¹⁷ Zep ano dang tininak de aya-wal oso-wal, ëe in zebë hamal hap suratkam emsa enlala sobiridal. Zen in zep salok-salokkam em lowehe gwen. Karek gol gwen zi mana emsa gwa san dep sil dïbirhal gwenank. Sap em mese Bian onak ëtal gwesik. Dekon ema hwëna altilink.

¹⁸ Diki nësa de ngaya tabin hip de Zini Bian Kristus Yesussu de tame tankam hen kwasang-kwasang zemka de tame gunkum em ëtatete gwe zahen.

Dikire zëno bosena angkam hen hëndep denaban teip nulsuk gwe-blak. In eiwa.

* **3:13 3:13** Yes. 65:17; 66:22; Why. 21:1-8; 21:27; 22:14-15
2Ptr. 3:9

* **3:15 3:15** Rom. 2:4; 1Tes. 5:4-11;

Yohanis mo surat

Mae hap de ol: Alap mo Tanena Zen eiwa zi tangankam hata zaka.

¹ In kim Alap okamana ansa yang gulsuku,

Zini in mes Alap han ë gweka.*

Zëno bosena “Alap onakore ëngaya gwen hap de Ol.”

Hwëna okamanak kim hata zaka,

ëe ama Desa sane la gwek,

hen ëre mae mo nwekam kara la gwek.

Ëe ama ëre mae mo tahakam hen olk la gwek.

Zebë hëndep dawemkam tangan tame lak.

² Nësa de hëndep denaban ngaya tabin hip de Zini in kim hata zaka,

ëe ama Desa ëre mae mo nwekam hla la gwek.

In zebë angkam ebe mae hap eiwa ulzim'in,

“In eiwa Zen tangan-

nësa de ngaya tabin hip de Zi niye,

Bian zëre han men Zen ë gwekake.

Bian Desa nër hom abe mae hap damnak zertreizimki.

³ Zëno bose tanganna Kristus Yesus.” Sap ëe insa ësane gwe-gwek hen hla kul gwek,

in kim asa golëlowehe gweka,

in zebë desa ebe mae hap eiwa ulzim'in-

Eirzi-Bia dekamim nësa aha-ere enlalakam

isrip-sri naban olëlowehe gweka.

⁴ Zen in zebë ebe mae hap ale gulzim'in-

aha-ere enlalakam de lowehe gwenkam dikim nëno mae mo

isrip-sri taman kinī gwen hap.

Ngatannak de lowehe gwen zi mo kim de lowehe gwen hap de ol:

⁵ Ëe ama emsa tawa labi'in- aena mensaë Kristus hon ësane gwe-gwekke: Alap Zen lalak enna. Zëno enhonak kawesinnī hom tangan.

⁶ Zep men zen anakan ëgu gwe'an, “Ëe an Alap hanë aha-ere enlalakam zergwë gwe'an,” hwëna zen de nama kawesinnik de lowehe gwen zi mo kim gwëna, ki zen boton tamna hen sap de ora san gwë ha'ara.

⁷ Hwëna nen de ngatannak de lowehen zi mo kim enho nakon ëlalak gwe zahe gwenkam, men kirekam ngatan zini Alap Zëna enho lalak en nik gwë gwenda, nen hen esa tangan aha-ere enlalakam isrip-sri naban lowehe gwer. Dekam hwëna nen de banakare karek mae-nak zarankam, Alap man nëno mae mo karekna insa Tane Zem Yesus mo kalkam nëp ngan gulsuk gwizimnira.

⁸ Zi de anakan zabenna, “Ano karekna hom,” zen hwëna zënaka anakan boton ta gwe'ara, “Ëe an zini dawemna.” Kirekam men zen ëgu gwenan, zëbon mae onak eiwa de enlalana hom tangan.

⁹ Hwëna nen de Alap hon anakan ëkira gwe-gwenkam, “Ëe mesë kirekam karek gwek,” dekam sa Alap nëno mae mo karekna insa nëp tap gulsuk gwizimdi, hen nëno mae mo kareksa de gon hap de enlala dowe hananna insa sa nëp hom ta gwizimdi. Alap zëre mo gu-gubiridanna Zen man tangan sul sone gwizimnira. Zep nen de nëre mae mo karek-kareksa zëre hon ëkira-kla gwe-gwenna, Zen bëjen nëp tap gulsuzim srëm gwen.*

¹⁰ Alap mo olak anakan lwak,

“Tingare zini kareksa nol gwenan.”*

Zep zi de anakan zabenna, “Ano karekna hom,” dekam hwëna man nwe-mase gwenan- san de Alapsa de anakan gublunna, “Alap Zen boton tamna.” Kire zinik Alap mo ola man jawe guk hana gwenan.

2

¹ Ano walas, ëe mae habë ebe mae hap ale gulzim'in: Em ekakim kareknak altil srëm gwek. Hwëna

* 1:1 1:1 Yoh. 1:1

* 1:9 1:9 Mzm. 32:5; Ams. 28:13; Yes. 1:18

* 1:10 1:10 Rom. 3:9-20

aha mae nik de kareknak zarankam, desa de mas gweblan hap de Zini ki. Zen Bian Alap mo alp nakon zau'ura. Zen enho kles gwesin srëm Zini Kristus Yesus.

² Zen Zen nëbe mae hap Zënaka zerguku- nëno mae mo karek-kareksa dikim ngan gulsuzimdin hipye. Hwëna nëno mae en moka hom. Zen hwëna kitak de okamanak de zini nëno mae mo kareksa dikim ngan gulsuzimdin hip tilki.

³ Nen de Alap mo ol san enlala tatete naban ang ta gwenkam, dekam man tangan dam gwesin, "Nen mese Alapsa tame lak."

⁴ Hwëna Alap mo ol san de ang gwe-gwen srëm nik de anakan gunnu, "Èe mesë Alapsa tame tak," zen man boton gwe'ara. Kire zirik eiwa de enlalana hom tangan.*

⁵ Hwëna nen de Alap mo ol san enlala tatete naban ang ta gwenkam, dekam zëre onakore kwasang-kwasangna sa nëno mae mo enhonak bil gwe-gwer. Zep nen Kristen zini a kire nakon esa nënaka dam lasik gwibir:

⁶ Men zen anakan gunnu, "Èe mesë Kristus hun zeraha-en gwek," zen dikire zëno kim kwasang naban gwë gwek.

Kristen bose zemka de kwasang gwibirida gwen hap de ol:

⁷ Ano dang tininak de wenyä, èe an ol èsesä homë ale gulzim'in. Hwëna men desäe orep èsane gwe-gwekke, desäe etan ebe mae hap anakan èse gulzim'in, "Kristen bose omka em kwasang gwibirida gwen."* Zep ola an angkam en home èsane gwe'an.

⁸ Yesus nonol nëbe mae hap de kwasang hap zëre mo timni èrak makan lonesimki- nen dikim hen kirekam nënaka kwasang gwibirida gwen hap. Zep kwasang hap de tawa ta gwibinni ansa bap nen blalen gwe-gwibin. Zen èse en nik zen nëbe mae hap lwa gwizimdin.

Sap dekam okama kawesinnik awe, nëno mae mo lowe henna man nwe-mase gwe-gwenan- san de Alap onakore ngatan de zilbir anenna kiye. Dekam kawesinni man jek-jak gwe-gwenan.

⁹ Zep zi de anakan gunkum, "Èe ngatannakë gwë'an," hwëna zen de Kristen bose zemka husus gwibirida gwenna, zen ki nama kawesinnik gwë'ara.

¹⁰ Diki men zen Kristen bose zemka kwasang neibirida gwenan, zen zen ngatannak lowehe gwe'an. Kire zi mo enhonak kawesinni hom. Zep zen molya ahasa ora srëm san dep titi da gwibik. Zëna hen molya desan sek gwek.

¹¹ Hwëna men zen Kristen bose zemka husus neibirida gwenan, zen nama kawesinnik lowehe gwe'an, hen kawesinni iwe èbute halasen gwe'an. Zen hom anakan tame nu'in, "Èe angkam ora srëm sanë sek gwe'an." Sap kawesinni in mes zëno mae mo nwena tahalebir-zimk.

Okamasa de ensa lwa gwibin srëm hap de ol:

¹² Kitak de èKristen gwen wenyä, em in zen ano walaskam de gubirida gwen wenyäye. An zebë ebe mae hap ale gulzim'in, sap Bian Alap mes eno mae mo karek-karekna Yesus mo syala kon tap gulsuzimki.

¹³ Em in zene nonol Yesussu laibliblak, em in zebe Kristen zi mo bi wal makan lowe he'an. In zebë ebe mae hap ale gulzim'in, sap em mese tame lak- men Zen Alap han nonol lonesen nakon è gwekaye.

Hen em ahakon in zene angkam laiblibla'an, em wal sei-siwirkim de gubirida gwen wenyä. In zebë hen ebe mae hap ale gulzim'in, sap em mese ètawa gwek- dowal mo kigisa de kirekam zauk gublu kini gwen naye.

* 2:4 2:4 Yoh. 14:15; 14:21-23 * 2:7 2:7 Yoh. 13:34

14 Zep tingare ano walaskam de gubirida gwen wenya, ëe mae habë ebe mae hap ale gulzim'in: Sap em kitak mese Bian Alapsa tame lak.

Bi walkam de gubirida gwen wenya, ëe mae habë ebe mae hap ale gulzim'in: Sap em mese Yesussu tame lak- men Zen Alap han nonol lonesen nakon ë gwekaye.

Wal sei-siwirkim de gubirida gwen wenya, ëe mae habë hen ebe mae hap ale gulzim'in: Sap em mese Alap onakore sosonna ulink. Em ema Alap mo ola urensik gwe'an. In zebe dowal mo kigisa yauk gublu kini gwe'an.

15 Zep auhu-kamana bahem etan enna lwa gwibin, hen okamanak de kire-kirena bahem enna lwabirida gwen. Men zen auhu-kamana ansa enna nola gwibirin, zen hom Biansa enna nola gweblanan.*

16 Sap kitak men desae okamanak enna ola gwibirin, an zen:

nëre mae mo tim nikore hole-hlena, nwekam de hlaunkum de hole-hlena,

hen bolte-bolte enlalana.

Zen kitak Bian onakore naka hom. Zen nëre mae mo auhu-kama tim nikon wet so gwenan.*

17 Auhu-kamana an sa jek-jak gwer. Hen auhu-kama hole-hlena, zen hen sa jek-jak gwer. Hwëna men zen Alap mo dwam gwibinni syal nei gwibirin, zen hëndep denaban sa lowehe gwer.

Kristus mo jal zi de hatazan hap de ol:

18 Ano walas, nen angkam aumwa hap denake lowe he'an. Zep men kirekam aumwa hap de yaklanak dep dena emsa tawa da gwibik,

zen kirekam angkam lwa'an. Zen anakan emsa tawa da gwibik, "Kristus mo jal zini sa hata zala." Zep jal zini insa de ngeirblizan hap de zini angkam mes yaing gwezal. Zep man tangan dam gwesin, "Nen angkam aumwa hap denake lowe he'an."*

19 Kristus mo jal zisi de ngeirblizan zini in nonola sap nëbon mae botonkam bitin gwe-gwezak, hwëna ki zep etan wet so gwe-gwek. Eiwakam de bitin gwenanam, ki nama maka nëbon mae lowe he'an. Hwëna in mae hap ki lwak: Nen dikim anakan tame tabin hip, "Zen eiwakam hom bitin gwek."*

20 Hwëna nen kire zisi ema tame la gwibirin. Sap nëbe mae hap Alap mes zëre mo Enhona hlë ta sonezimki. Zen in zebe eiwa de tawa tabinni dam ulsuk gwenan.

21 Èe kimë ebe mae hap de ale gulzimdin hip enlala gwe'ak, ëe homë emsa anakan enlala gwibiridak, "Zen hom eiwa dena tame nu'in." Hwëna ëe ama emsa enlala gwibiridak, "Zen man eiwa de tawa tabin niban botonkam denaban kles noso gwe'an."

22 A kire nakon esa Kristus mo jal zini insa de ngeirblizan zini insa dam lasik gwibir: Yesussu men zen anakan zersinni, "Zen nësa de ngaya tabin hip de Zisi hom"- zen zen. Kirekam de gunnu, zen man anakan de gun nuban apde në'an, "Bi Zem in hom Tane zemka zer soneka." Zep kire zini zen Eirzi-Biasa man teisyasi'ira.*

23 Hen Yesussu de anakan zersinni, "Zen Alap mo Tanesa hom," dekam man hen dam gwesinin, "Zini in hen Bian Alapsa hom tame ta'ara." Diki men zen anakan gunnu, "Yesus Zen eiwa Alap mo Tane," ki zen mes eiwa

* 2:15 2:15 Mat. 6:24; Yak. 4:4 * 2:16 2:16 Kej. 3:6; Mat. 4:3-10 * 2:18 2:18 Mat. 24:5; 24:24;

2Tes. 2:3; 1Yoh. 4:3; 2Yoh. 7 * 2:19 2:19 Yoh. 10:26-28; Kis. 20:30 * 2:22 2:22 Yohanis beyakam

suratnak awe Kristen zini nënaka de dam tasik gwibin hip dena ale gulku - hen yasik tabin hip de zisi de dam tasik gwibin hipye. Bol zaun tanganna, Yesussu de taibliblankam, hen taibliblanna insa de gwën nakon enlala tatete naban goltrë gwen hap. Nonol tanganna nënaka de kwasang gwibirida gwenkam de goltrën. (1Yoh. 2:3-6; 2:9-10; 2:22-23; 3:10; 3:14-15; 4:1-6; 4:13-16; 4:18; 4:20-5:5; 5:12)

* 2:23 2:23 Yoh. 14:6-7

Eirzi-Biasa tame soka.*

²⁴ Zen in zep, Kristus hup de ola men desa nonola kon emsa tawa da gwibik, emki desa dawem enkam enhonak gwirensik gwen. Zen diki dekam esa Eirzi-Bia han iaha-en gwer.

²⁵ Hen nen de kirekam ziaha-en gwenkam, dekam mese händep de lowehe gwen hap dena ulinkmen kirekam Yesus Zëna nësa gugubirida gwekaye.*

²⁶ An kitak mesë ep ale gulzimnin, sap zini man emsa ora srëm san dep titi da gwibirin.

²⁷ Hwëna Kristus mensa zëre mo Enhona nëbe mae hap hlë ta sonezimki, Zen nama eno mae mo enhonak lwa gwe'ara. Em in zebe aha zisi zen de emsa ol ësekam tawa ta gwibin hip leibirida srëm gwe-gwe'an. Sap Alap mo Enhona Zen eiwa denaka nësa tawa ta gwibirida- kitak mensa Yesus hun dikim zeraha-en gwen hap dena dwam ei gwibirinye. Zen bëjen boton gwen. Zep Yesus en han de zeraha-en gwennak em tatem ëzauk gwen- Alap mo Enhona men kirekam nësa titi ta gwibiridake.*

²⁸ Zen in zep, ano walas, zëre han de zeraha-en gwen ennak em lowehe gwen. Ki Zën de etan lwalhal zannak de zertowenkam, ahaere enlalakam esa ërtower. Ki nen molye zëno nwenak saher hap ëhuhuk gwehek.

²⁹ Sap nen tawana, "Alap Zen lalak en nik gwë gwenda." Zen in zep tangan dam gwesik gwenan: Men zen dam-dam enkam lowehe gwenan, zen Alap mo wei-wik gun walas.

3

Alap mo walas de kirekam lowehe gwen hap de ol:

¹ Emki ëenlala gwen: Bian Alap mes kwasangna nëbe mae hap sowehen tangankam golzimki, zep

händep nësa gubiridaka, "Em ano dang tini tabin walas." Eiwa, wehasa hom, nen eiwa zëno walas tangan!* Hwëna auhu-kama enlala zini molya nësa anakan tame da gwibik, "An Alap mo walas," sap zen hom Yesusu anakan tame dak, "Yesus Zen Alap mo Tane."

² Ano dang tininak de wanya, nen an angkam eiwa zen- "Alap mo walas" kam de gubiridan wenyaye. Hwëna Zen hom nëbe mae hap golzimki- dekam de anakan tame gun hup denaye, "Alap mo walasna nen kirekam esa ëliweher." Hwëna nen tawana: Yesus de etan lwalhal zankam, zëno kim esa ëliweher. Sap dekam damkam esa kara la gwer, zep zëno kim esa ëliweher.*

³ Zep nen men zene kirekam ëenlala gwe-gwe'an, "Ëe asa Lalak Zini Yesusu zertower," nen zebe nëre mae mo enhona lalak la gwibirin.

⁴ Zini men zen karekna nol gwenan, zen Alap mo olsa kim ja-ja nul gwenan. Sap kitak de karekna mensa zini syal nei gwibirin, zëno ausuna kitak Alap mo olsa dikim ja-ja gun hup dena.

⁵⁻⁶ Zep men zen Yesus hun zeraha-en gwenna, zen bëjen kareksa gol tine gwen. Sap nen tawana: Yesus Zen nëno mae mo karek-kareksa de ngan gulsuzimdin hip hata zaka. Sap Zëbon onak hom tangan- karek mae naye. Hwëna men zen karekna nol tine gwenan, zen Yesusu de tame tan srëm wanya hen taïbliblan srëm wanya.

⁷ Ano walas, men zen ora srëm san dep emsa titi da gwibirin, bahem salbirida gwen. Men zen dam-dam enkam ëzauk gwenan, zen diki zen Kristussu nërtro'an, sap Zëna dam-dam enkam zauk gwenda.

⁸ Hwëna men zen karekna nol tine gwenan, zen eiwa dowal mo kigi mo bi gwibiridan walas. Sap

* **2:25 2:25** Yoh. 3:15; 5:24; 6:40 * **2:27 2:27** Yoh. 14:26; 16:13-14 * **3:1 3:1** Yoh. 1:12-13; Rom. 8:14-17; Gal. 4:6-7; Ibr. 2:11-14; 12:5-10 * **3:2 3:2** 2Kor. 3:18; Plp. 3:21

dowal mo kīgina in zen nonol lone-sen nakon karek gonna kon gwesik hanaka, hēndep angkam nama gol tine gwenda. In zep Alap mo Tanena in hata zaka- zēno syal karekna insa dikim dri yulsublun hap.*

⁹ Zep Alap mo wei-wik gun walasna, nen bējen kareksa de gol gwen ennak lowehe tine gwen, sap Alap mo Enhona, Zen enho nakon nēsa golēgwē gwenda. Nen sap kie kareknak altil gwenan. Hwēna nen bējen zēwe en ēdohon gwe-gwen, sap nen an Alap mo sīpnī.*

¹⁰ Zep a kire nakon esa zisi tame la gwibir, "Zen Alap mo walas," ahaksa, "Zen dowal mo kīgī mo walas":

Men zen dam-dam enkam ēzauk gwenan, zen Alap mo walas. Hwēna men zen kirekam ēzauk srēm gwe-gwenan, zen Alap mo walassa hom.

Hen men zen Kristen bose zemka kwasang neibirida srēm gwe-gwenan, zen hen Alap mo walassa hom.

Kristen bose zemka de kwasang gwibirida gwen hap de ol:

¹¹ Em kime ēKristen gwek, dekam zep anakan emsa tawa da gwibik, "Kristen bose omka em kwasang gwibirida gwen."

¹² Nen bap nen Kaen Bak mo kim ēgwē gwen- men zen oso zemka zip sokaye. Zen in dowal mo kīgī mo bi gweblan walas. Zen mae hap zip soka: Sap oso zem in dam-dam enkam Alap mo nwenak gwē gweka. Hwēna zēna kareksa gol gweka. In zep husus gweblaka.*

¹³ Zep aya-wal oso-wal, bahem tenggwanbirida gwen- auhu-kama enlala zi de emsa husus gwibirida gwen naye.*

¹⁴ Sap menkam nen juwen ora sane sek gwe'ak, hwēna angkam mese ēngaya gwen hap de orana dam lasil. Nen zebe nēre mae

mo Kristen bose walya kwasang eibirida gwenan. Zen in zebe hen anakan nēnaka dam lasik gwibirin, "Nen angkam ēngaya gwen hap de ora sane sek gwe'an." Zep a kire nakon esa zisi tame la gwibir:

Kristen bose zemka men zen kwasang neibirida srēm gwe-gwe'an, zen nama tīn hīp de ora san sek gwe'an.

¹⁵ Hen Kristen bose zemka de husus gwibirida gwenna, zen nwe-masena apdenak- zi ta gwen zi nibanye. Kirekam de ēgwē gwen zini, zen hen nama tīn hīp de ora san sek gwe'an.*

¹⁶ Yesus kim nēsa dikim ngaya tabin hīp Zēnaka sosok taka, nen dekon zebe anakan dam ulsuk, "Kwasangna zen kirekam." Zen in zep nen hen diki kirekam nen nēnaka kwasang gwibirida gwen, hēndep nen hen nen nēre mae mo timni sosok gul gwen- aha zisi dikim ngaya ta gwibin hipye.*

¹⁷ Hwēna emki ēenlala gwen: Zi de tahalha srēm kam gwē'anam, zen de anakan tame gu'unam, "Ano Kristen bosena wakin tahalhakam gwē gwenda," hwēna zen de mas gweblan srēm kam, dekam man tangan dam gwesinīn, "Alap onakore kwasangna hom tangan zēbon on- akye."*

¹⁸ Ano walas, nen bap nen ēk enkam Kristen bosyansa waba hap kwasang gwibirida gwen. Hwēna nen diki eiwakam nen kwasang gwibirida gwen- dawemsa de goltrei gwizimdinkim.

¹⁹⁻²⁰ Nen de kwasangsa kirekam goltrei gwizimdinkim, zen dekam zebe nēnaka dam lasik gwibirin, "Nen an eiwa Bian Alap mo bi gwibiridan walas sake." Sap eiwa kirekam, hwēna nen kime Alapsa abe la gwenan, dekam zep hwēna tītik gwen enlalana enhonak anakan hata gwenda, "Ee ba hap de Alapsa

* 3:8 3:8 Yoh. 8:44 * 3:9 3:9 1Yoh. 5:18 * 3:12 3:12 Kej. 4:8 * 3:13 3:13 Yoh. 15:18-25

* 3:15 3:15 Mat. 5:22; Why. 21:8 * 3:16 3:16 Yoh. 10:17-18; 15:13 * 3:17 3:17 1Tim. 5:8; Yak. 2:15-16

goltil seblan hap?" Hwëna Alap Zen kitak zi mo enhona tame ta gwizimnira. Zep Zen man nëno mae mo enhonak de titik gwen enlalana insa nëp tame ta gwizimnira. Hwëna Zen hom kire hap nësa husus gwibirida gwenda. Zen in zebe Alapsa de abe ta gwenkam nëre mae mo enlalana anakan së la sone gwibirin, "Èe an zëre mo walas sake. Zep èe ba hap de titik gweblan hap?"

²¹ Ano dang tüninak de wenya, nen de Alapsa abe tan nakon titik gwen srëmna, ki sap esa banakare mae hap saher srëmkam abe la gwer.*

²² Sap dekam anakane dam ulsuk gwenan, "Èe ama zëre mo ol san hen dwam gwibin sin ang gwe-gwe'an." Kirekam de enho nakon titik gwen srëmkam abe tanna, dekam zebe ulin gwenan.

²³ An zen tangan zëre mo ola- nen de desan ang ta gwen hap denaye:

"Ano tanena Kristus Yesusu em taibliblan, hen enaka em kwasang gwibirida gwen."*

²⁴ Men zen kirekam Alap zëre mo ol san enlala tatete naban ang ta gwenan, zen mes zëre han nëraha-en gwek, hen Zen mes deban mae golëaha-en gweka. Hen nëbe mae hap mes zëre mo Enhona ing ta sonezimki, nen in zebe anakan dam ulsuk gwenan, "Eiwa, Zen mes tangan nëban mae golëaha-en gweka."*

4

Mae hap de ol: Nen zëre mo tawa tabin nikon esa yasik ta gwibin hip de zini dam lasik gwibir.

¹ Ano dang tüninak de wenya, bahem na-en taiblibirida gwen- zini men zen ebon mae onak anakan ègu gwe'an zalye, "Èe an Alap mo Enho nakore olsa de ebe mae hap ayang gul gwizimdin hip de zi." Sap yasik tabin hip de zini mes beyakam

yaing gwezak. Zep emki akasibirida gwen- dekam de anakan tame tabin hipye, "San ha zëno mae mo tawa tabinni Alap onakorena? San ha Zëbon onakore naka hom?"*

² Zi de damnak anakan tonbirida gwenna, "Kristus Yesus Zen eiwa zi tangankam hata zaka," zen dekam de dam tasin, "Zëbon eiwa mes Alap mo Enhona ing gwe heka."*

³ Hwëna zen de anakan gunkum, "Yesus zen zi tangankam hom hata zaka," kire zini zen Alap mo olsa hom ayang gul gwe'ara. Zen hwëna Kristus mo jal zi mo olsa ayang gul gwe'ara. Emsa mes anakan tawa da gwibik, "Kristus mo jal zini sa hata zala." Hwëna zëno enhona angkam man okamanak syal gwe-gwe'ara.

⁴ Ano walas, nen an hwëna Alap mo wei-wik gunnu, nen zebe yasik ta gwibin hip de zi mo tawa tabinni insa ja kul guk kinì gwenan. Sap Alap mo Enhona men Zen nësa ing gwe hebiridaka, Zen Zen- sosen Zi niye. Dowal mo kigi mo enhona in zen auhu-kama enlala zinik ing gwehe gwenda, zen sosen naka hom.*

⁵ Yasik ta gwibin hip de zini, zen hwëna auhu-kama enlala zi. Zep zëno mae mo ol toranna hen auhu-kama enlala en san. In zep ahakore auhu-kama enlala zini desa i-san i-san neibirida gwenan.

⁶ Nen an hwëna Alap mo bi gwibiridanna. Zep nëno mae mo ol toranna, zen Alap onakorena. Men zen Alapsa tame dak, zen en zep nësa nasalbirida gwenan. Alap mo walaskam de gubirida gwen srëm wenya, zen zep nësa nasalbirida srëm gwe-gwenan. Nen dekon zebe anakan kles oso gwenan, "An eiwa Alap mo Enho nakore naka ayang gul gwe'ara," ahaksa, "An yasik tabin hip de zi."

Alap mo kwasangnak de lowehe gwen hap de ol:

* 3:21 3:21 Ibr. 4:16 * 3:23 3:23 Im. 19:18; Mrk. 12:31; Yoh. 6:29; 13:34; 15:12; 15:17 * 3:24 3:24 Rom. 8:9 * 4:1 4:1 Ul. 13:1-5; Yer. 23:9-22 * 4:2 4:2 1Kor. 12:3 * 4:4 4:4 1Yoh. 5:4-5

7 Ano dang tininak de wenya, nen nēnaka kwasang gwibirida gwen, sap kwasangna zen Bian zēre onakon nēp hata gwiziminzal. Tingan men zen kwasang naban lowehe gwenan, zen Alap zēre mo wei-wik gun walas hen Zēnaka de tame tan wenya.

8 Men zen kwasang srēm kam lowehe gwenan, zen hom Alapsa tame da'an. Sap Alap Zen kwasang-kwasang enna.

9 Zen in zep Alap Tane aha-ere zemka nēsa dikim ngaya tabin hip zer soneka. In zebe anakan dam ulsuk gwenan, "Eiwa, Alap mo nēbe mae hap de kwasangna mam tanganna."*

10 Nen home orep Alapsa enna ola gweblak. Hwēna Zen en sēr kam nēsa kwasang gwibirida gweka, zep hēndep Tane aha-ere zemka nēbe mae hap de kwasang hap zergukunēno mae mo kareksa dikim ngan gulsuzimdin hipye.*

11 Ano dang tininak de wenya, Alap in kirekam nēsa kwasang gwibiridaka, zep nen hen kirekam nen nēnaka kwasang gwibirida gwen.

12 Zini nen hom tangane Alapsa nwekam hla la gwenan. Hwēna nen de nēnaka kwasang gwibirida gwenkam, dekam zep nwe-mase gwe-gwenan: Alap man nēsa golēaha-en gwe'ara, hen zēno kwasangna dekam zep nēno mae mo enhonak bīl gwe-gwenan.

13 Zen mes zēre mo Enhona nēbe mae hap zerzimki, nen in zebe anakan dam ulsuk gwenan, "Nen mese Deban ēraha-en gwek, hen Zen nēban mae golēaha-en gwe'ara."*

14 Ēe zēre hon de ang ta gwen wenya, ēe kiē ēre mae mo nwekam Yesusu hla la gwek. In zebē angkam anakan eiwa de gul gwizim'in, "Bian Zen eiwa mes Tane zemka zer soneka- okamanak de

zisi dikim ngaya tabin hipye."

15 Zep men zen anakan gu gwenna, "Yesus Zen eiwa Alap mo Tane," kire zini zen mes Alap han zeraha-en gweka, hen Alap mes deban zeraha-en gweka.

16 Zep angkam nen mese tangan Alap mo nēbe mae hap de kwasangna tame uk, hen nen angkam ema tangan kwasangna insa blol eibi'in. Eiwa, Alap Zen kwasang-kwasang enna. Zep men zen kwasang naban lowehe gwenan, Bian mes deban mae golēaha-en gweka, hen zen mes Bian han nēraha-en gwek.

17 Kirekam de zeraha-en gwenkam, zen dekam zep zēre mo kwasangna nēno mae mo enhonak saltīl gwenan, hēndep zen de bīl gwenkam dekam saher srēm kam esa aumwa hap de klis gunnuk Alapsa ērtower. Nen mae hap esa ēsa her gwe srēm gwer: Sap nen kim nēnaka kwasang eibirida gwenan, nen dekam Yesus mo kime okamanak lowehe gwenan.

18 Zep bap nen Alapsa anakan aīrī gweblan, "Zen sa nēsa karek tabiri." Zi mo enhonak, Alapsa de aīrīblan naban Alap onakore kwasangna in han bējen siri nēn. Alap onakore kwasang de nēno mae mo enhonak bīl gwenkam, zen dekam zep Alapsa de aīrīblan hap de enlalana jek-jak gwe-gwenda. Zep zi de nama Alapsa aīrī gweblanna, dekam man dam gwešīnīn, "Zēno enhonak de Alap onakore kwasangna hom bīl gwe'an."

19 Sap nonola Alap nēsa kwasang gwibiridaka. Nen in zebe hen angkam Zēbon onakore kwasang naban lowehe gwenan.

20 Zep zi de anakan gunnu, "Ēe ama Alapsa ensa lwa gweblanan," hwēna zen de Kristen bōse zemka husus gwibirida gwenna, zen boton tamna. Kristen bōse zemka de kwasang gweblan srēm kam, zēre

* 4:9 4:9 Yoh. 3:16 * 4:10 4:10 Rom. 5:8-10 * 4:13 4:13 Rom. 8:15-16; 2Kor. 1:21-22

mo nwekam de hla ta gwen naka, zen ki hwëna banakan de hla ta gwen srëm Zini Alap enna enna lwa gweblan hap?

²¹ Sap Bian mes nësa gubiridaka, “Zini men zen Asa enna nola gweblanan, zen diki Kristen bose zemka zen hen kwasang gwibirida gwen.”

5

Mae hap de ol: Nen dikim Yesussu taibliblan hap, Alap mes nëbe mae hap ola eiwa de gulzimki.

¹ Men zen Yesussu anakan daibli gweblanan, “Zen eiwa Alap mo Tane- nësa de ngaya tabin hip Dena,” kire zini zen Alap mo wei-wik gun walas. Kire zini hen Bi zem Alapsa man enna nola gweblanan, hen Alap mo wei-wik gun walas bose zemka man kwasang neibirida gwenan.

² Zep nen de Alapsa enna lwa gweblankam, hen zëno ol san de enlala tatete naban ang ta gwenkam, dekam mes dam gwesinin: Nen esa hen Bian mo tingare wei-wik gun walasna kwasang eibirida gwer.

³ Sap men zen Alapsa enna nola gweblanan, zen sa zëno ol san ang ta gwer. Hen zëno ol san de ang tanna hom nëbe mae hap dohonon gwizim'in.*

⁴ Nen an Bian mo wei-wik gun walas. Zen in zebe auhu-kama hole-hlena ja kul guk kinī gwenan. Hwëna desa de jaul guk kinī gwen hap de sosonna, zen diki Yesussu de taibliblan en nakone ulin gwenan.*

⁵ Men zen anakan daibli gwebla'an, “Zen eiwa Alap mo Tane,” zen zen auhu-kama hole-hlena insa ja nul guk kinī gwe'an. Kire srëm wenya bëjen.

⁶ Kristus Yesus Zen eiwa zi tangankam hata zaka. Te-lidak son

nakon in zep zëno tim nikon ho naban kala ban wet nosok. Zen ho en hom wet sok. Hwëna kala ban ho naban dang gulblun weina in kon wet nosok. Zep man tangan dam gwesinin: Zen eiwa zi tangankam hata zaka.* Alap mo Enhona hen kirekam nëno mae mo enhonak eiwa gul gwenda, “Zen eiwa zi tangankam hata zaka.” Hen Bian mo Enhona Zen Bëjen boton gwen.

⁷ Zep Bian Alap mes dekam de nëbe mae hap eiwa guzimdin hip dena dan-ahan goltreizimki.*

⁸ Ahana hona in zen hlëwe hezak. Ahana kala in zen wet sok.

Hen ahana Alap zëre mo Enho. Hwëna dan-ahare eiwa de gunnu in mo dam gulsunnu, zen aha-en. An zen: “Yesus Zen eiwa zi tangankam hata zaka.”

⁹ Zen zep hen anakan lwa'an: Dan-ahare zi de banakare maesa eiwa gunnu, emaka laiblibirida'an. An hwëna angkam Bian Alap Zën dan-aharena inkam eiwa de gu'ura- nen dikim hen anakan taibliblan hap, “Zen Zen eiwa- zëno Tane naye.”

¹⁰ Nen men zene Alap mo Tanena insa laibli gwebla'an, Alap man nëno mae mo enhonak kirekam hen eiwa de gul gwenda. Zen dekam zebe tangan anakan dam lasik gwenan, “An eiwa Zen tangan.” Alap Zën mes ki kirekam nëbe mae hap eiwa de gulzimki, zep zi de kirekam Tane zemka taibliblan srëmkam, zen ki Alapsa gu gwebla'ara, “Zen boton tamna.”

¹¹ Hwëna Alap sap mes anakan eiwa de gul gwizimki, “Ère mo Tane naban de zeraha-en gwen wenya kip, Èe mesë hëndep de ëngaya gwen hap dena golzimk.”

¹² Men zen Tane zemka taibliblankam nëraha-en gwe'an, zen mes hëndep

* 5:3 5:3 Yoh. 14:15; 14:23-24 * 5:4 5:4 Yoh. 16:33 * 5:6 5:6 Yoh. 19:34-35 * 5:7 5:7 Yohanis mo suratna ansa kim lun Latin olkam ale nul gwek, dekam zini man lun tangan awe mas gulku, “nëbe mae hap eiwa de gulzimdin hip dena ngatan zi mo langnak goltreizimki: Zen Bian Zëna, zëre mo ola, hen zëre mo Enhona. Hen dan-ahanna in, zen aha-en. 8 Hen okamanak de nëbe mae hap eiwa de gulzimdin hip dena dan-ahan goltreizimki...” Hwëna desa Yohanis hom ale gulku. Aha mas nuk.

de ëngaya gwen hap dena nulin. Hwëna men zen nëraha-en gwe srëm gwe'an, zen hom nul in'in.

Aumwa hap de ol zìm-zìm:

¹³ Em in zen kirekam laïblihlak, ëe in zebë kire hap denaka de ebe mae hap ale gulzindin hip dwam gwer- em dikim anakan ëtawa gwen hap, "Ëe mesë hëndep de ëngaya gwen hap dena insa ulink."*

¹⁴ Zep angkam mes tangan dam gwesik: Bian man nëno mae mo abena sal gwenda- nen de zëno dwam gwibin sin abe tankamye. Nen in zebe saher srëmkam Alapsa abe la gwenan.*

¹⁵ Hen Bian de nëno mae mo banakare mae hap de abesa sal gwenkam, dekam mes dam gwesinin, "Zen sa kiresa nëbe mae hap gol gwizimdi." In zebe kirekam ulin gwenan.

¹⁶ Zep em de ere mo Kristen bosesa anakan tol hla tanna, "Zen man ora dawem nakon syal he'ara," dekam Biansa em anakan abe tan, "Emki etan zini ansa ora dawem san dep dam tasik sonen." Dekam sa etan desa dam tasik sonera. Hwëna ahakorena sërkam tangan Kristussu de hli tankam syauk sun de ora san dep ësyalhe gwenan. Kirekam de zi hip ëe homë emsa gubirida'an- zëbe mae hap de kirekam Biansa abe tan hapye.

¹⁷ Tingare kirekam-kirekamna, zen sap eiwa kitak karek. Hwëna syauk sun dep de karekna hen ki. Hen syauk srëm san dep dena hen ki. Syauk srëm san dep de ëkarek gwen zi hip, em de Biansa abe ta gwenkam, Zen sa tap gulsuk gwizimdi.

¹⁸ Nen tawana, Alap mo wei-wik gun walasna nen bëjen kareksa gol tine gwen. Sap Alap zëre mo Tanena man nësa kara ta gwibirida, zep dowal mo kigï ba kon dep?- nësa golek de tabir tine gwen naye.*

¹⁹ Nëna tawana: Nen an eiwa Alap mo wei-wik gun walas. Hwëna tingare auhu-kama enlala wenyä, zen kitak dowal mo kigï mo irik ginnik lowehe gwe'an.

²⁰ Hen nëna tawana: Ngaya Zini Alap mo Tanena mes hata zaka, hen Zen mes Bi zemka dikim tame tan hap dena nëbe mae hap golz- imki. Nen kime Tane Zem in han taïbliblankam ëraha-en gwëk, zen dekam zebe hen Bi zëban ëraha-en gwëk. Kristus Yesus Zen hen eiwa Alap, hen Zen Zen- ëngaya gwen hap de ausu naye.

²¹ Zep ano dang tïnï tabin walas, yang tabin alap-alapsa aes eisibirida gwëk.

* 5:13 5:13 Yoh. 20:31 * 5:14 5:14 Yoh. 14:13; 16:23; 1Yoh. 3:21-23; Ibr. 4:16; 10:19-20 * 5:18 5:18 1Yoh. 3:9; 4:4; Yak. 4:7; 1Ptr. 5:8-9

Yohanis mo surat ahana

¹ Suratna an, ëre mo somol hap-mensa hen Alap ngaya gwen hap dam gulsukuke, hëndep walas zeban,

zi bogola abon onakon: *

Dawem! Ëe ama emsa kitak kwasang gwibirida gwenan, sap nen apdekam Alap onakore eiwa de ol sane ang ta gwenan. Hen tingan men zen eiwa de ol san ang ta gwenan, zen hen man emsa kwasang neibirida gwenan.

² Nen mae habe nënaka kwasang eibirida gwenan: Sap Alap mes eiwa de ola nëno mae mo enhonak ing gulsoneka, hen ola in molya nëbon mae onakon jek-jak gwék.

³ Bian Alap Tane Zem Kristus Yesus hun sa dawemna hen kwasang-kwasang zemka mamkam nëbe mae hap ol gwizimdi. Hen nen zëre nik mo taha terenak esa lowehe gwer. Zen kirekam sa nëbon mae lwa gwer- nen de nama kwasang-kwasang naban eiwa de ol san ang ta tine gwenkamye.

Eiwa de ol san de ang ta gwen hap de ol:

⁴ Ëe ama tangan sam gwesik eno ahakore walassa de anakan salbiri-dankam, “Zen eiwa de ol san ang ta gwe'an”- men kirekam Bian nësa gubiridakake.

⁵ Ano dang tìninak de wenyä, nen nënaka kitak kwasang gwibirida gwen. Kirekam de ep ale gulzimdinkim, ëe ol ëse san dep homë emsa titi tabi'in. Hwëna

men desae orep nëna ësane gwe-gwekke- desaë etan ebe mae hap ëse gulzim'in.*

⁶ Kwasangna in a dekam esa oltrei gwizim: Bian mo ol san de ang ta gwenkam. Hen mam tangan wenyä, mensa nonol lonesen nakon ena ësane gwe-gwek, zen a kirekam moye: “Em enaka kwasang gwibirida gwen.”

⁷ Sap yasik tabin hip de zini bira! Zen beya nik ë-ë san namjanbiridanda gwe'an. Zëno mae mo tawa tabinni, zen a kirekam moye, “Kristus Yesus Zen zi tangankam hom okamanak hata zaka.” Zep zi de kirekam emsa gubiridanna, zen emsa de yasik tabin hip de zi hen Kristus mo jal zi. Zëno mae mo teipsinni, zen sa hata zala. Hwëna zen in angkam zëno olsa ebe mae hap hamal hap ayang nul gwizim'in.

⁸ Em hwëna ora dawem sane ang ta gwe'an, zep dawem enkam enaka kara la gwibik. Sap Alap ngatan zi mo langnak dawemna mam naka nëbe mae hap lam gulzim'ira. Hwëna eme etan aha ora san ang ta'ak, ki em molye dawemna insa ulink.

⁹ Anakan mana emsa yasik dahirink, “Em in namae Kristus hup de tawa tabin ennak langanak lowe he'an. Desa baes eibik. Ëe mesë til kinin ora san hles yablak.” Hwëna kire zi mo enhonak Alap hom gwë gwenda. Diki men zen Kristus hup de tawa tabin ennak lowehe tine gwenan, zen diki kire zi niban Bian Alap Tane Zem Yesus hun enho nakon olëlowehe gwenda.

¹⁰ Zep zi de ebon mae onak srë de

* **1:1 1:1** Yohanis “somol”kam san ha somol tangan zikhip hom yap ki ale gulbiriki? San ha Kristen we hap ki “somol”kam ale gulbiriki? Ahaksa san ha diki gulk sun de ol blaorankam jemat hap “somol”kam ale gulku? Kirekam de dam gulsunkum, “walas” zem zen jematna iwe de zi. Mae hap mes yap kirekam gulk sun de blaorankam ale gulku: Kristen zi mo jal zi de anakan dam gulsun srëm hap, “Zen nara hap kirekam ale gulzimki?” Yohanis hen awe zëre mo bosena man golzabekamen kirekam hen zëre mo Ol Dawem ale gunnuk golzabe gwékake. (Yoh. 13:23; 19:26; 20:2) Yunani olkam Kristen zi mo nol-nola, “zi bogol”kam nenbirida gwék- men kirekam angkam “penetua”kam nenbirida gwenanke. * **1:5 1:5** Yoh. 13:34 † **1:7 1:7** Kristus mo jal zi mo teipsin zi hip de ola, emki hlaun: Mat. 24:5; 24:24; 2Tes. 2:3-4; 1Yoh. 2:18-23; 1Yoh. 4:1-6

ora san dep de tawa tabinsi golhata zanna, bahem gola kon zer irin, hen bahem mae anakan gublun, "Dawem."

¹¹ Sap em de kire zisi zer irinkim, em hen dekam mese jowenda- san de syal bose zem.

¹² Ano ola sap nama beyana- desa de ebe mae hap ale gul sonezimdin hipye. Hwëna ama enlala gwe'an, "Suratkam ba hap de." Diki dawemna amjanbinkim de emsa ëkkam tawa tabin hibë dwam gwe'an. Dekam nëno mae mo isrip- srina sa tangan taman kinil.

¹³ Eno we aya mo walasna- mensa hen Alap ëngaya gwen hap dam tasibirki, dawem ensa ebe mae hap nol sonezimk. ‡

‡ **1:13 1:13** Ayatnak awe "we aya" kam hen "walas zem" kam, san ha Yohanis etan gulk sun de ol blaorankam ale gulzimki? Kirekam de lwankam, zëno dam gulsunnu, zëwe de jemat hen jematna iwe de Kristen zi- men desa Yohanis zëna dekam golëgwë'ankake.

Yohanis mo surat dan-ahanna

¹ Ère mo dang tininak de walasna Gayus Bak hap,

zi bogola abon onakon:*

Dawem! Èe ama emsa kwasang gwe-gweblanan, sap nen apdekam Alap onakore eiwa de ol sane ang è gwenda.

² Ano dang tininak de walas, èe ama Biansa abe ta gwenan-em dikim dawemkam hen sangsang srèmkam gwè gwen hap, men kirekam hen eno enhona dawemkam hen tatetekam lwa gwe'arake.

³ Èe ama tangan sam gwesik- nër hom kim nère nik mo Kristen bose walya ebe hap dena asa anakan nenbla zakye, "Eno walasna Gayus Bak eiwa dawemkam tangan eiwa de olak tal gwesì'ira, hen desan en ang gwe-gwe'ara."

⁴ Ano isrip-sri gwibin tanganna zen in zen- ère mo walaskam denaka de kirekam salbirida gwen naye, "Zen nama Alap onakore eiwa de ol san ang ta gwe'an." †

Kristus mo nganak de syal ta gwen zisi de mas gwibirida gwen hap de ol:

⁵ Ano dang tininak de walas, èe ama eno syala sam gwesik gwibirin. Zini men zen Kristus mo ngana è-è san namjanblanda gwenan, ‡ eno ènak kim yaing gwe-gwenanzal, em ema desa dawemkam mas gwibirida gwenda hen lup gulin gwenda- sap eno tame tabin srèm zi mae naye.

⁶ Zep kim etan lwan dahal gwenanzal, zen man awe de aya-wal

oso-walya tagal gwennak ebe hap dena anakan donbirida gwenanzal, "Gayus zen dawemkam nèsa kwasang gwibirida gwenda." Em esa sam gwesili- etan de sek gwezan weny aansa de ora san dep mas gwibiridankamye. Sap dekam Alap mo bosesae teip gulsuk gwebla'ara.

⁷ Zini in Yesus hup de ol dawemsa de gol haladan hap sek gwe'an. Zep zen anakare enlala naban sek gwe'an, "Èe homè Yesusu de tame tan srèm zisi blol eibirida'an. Zen diki Yesusu de tame tan wenyik sa totoresa asa mas neibirida gwer."

⁸ Zep nèbe mae hap man tangan sam gwesì'in- kire zisi de lup gulin gwen naye. Sap dekam nen ema zèno mae mo syal dawemna iwe mas ta'an- Alap onakore eiwa de olsa de gol halada gwennakye.

⁹ Èe kiè sap suratna nonol tingare langna iwe de Kristen zini ebe mae hap ale gul sonezimk- em de kirekam Kristus mo nganak de syal ta gwen zisi lup gulin gwen hap denaye. Hwèna Diotrefes Bak zè-en de mam gwen hap dwam gwegwenda. Zen ano mae mo ol san bèjen ang gwen.

¹⁰ Zep aen de hata zankam dekam asa emsa damnak tonbiridazal-zèno karekna mensa abe mae hap gol gwizimniraye, asa de totore olkam tonsubirida gwenkam. Hwèna asa en hom ki karek ta gwibirida. Hwèna Kristus mo nganak de syal ta gwen zini men zen zèno ènak yaing gwe-gwenan, zen hom mae gol zem kon lup gulin gwenda. Hwèna men zen sap lup gul irin hip èhohle gwegwenan, desa hwèna man anakan jalse gwibirida gwenda, "Eme lup ul in'ik, èe asa emsa jematna an kon

* **1:1 1:1** Yohanis awe hen zère mo bosena man golzabeka- men kirekam zère mo Ol Dawem ale gunnuk golzabe gwekake. (Yoh. 13:23; 19:26; 20:2) Yunani olkam Kristen zi mo nol-nolkam de weny a, "zi bogol" kam nenbirida gwèk- men kirekam angkam "penetua" kam nenbirida gwenanke. Mae hap mes yap bose zemka golzabeka: Kristen zi mo jal zi de anakan dam gulsun srèm hap, "Suratna an zen ale gulku." † **1:4 1:4** "Walaskam dena" mensa Yohanis awe enlala gwibiridaka, zen tingare zini men zen zèbon onakon Yesusu daiblilakke. ‡ **1:5 1:5** Men zen Kristus mo nganak è-è san namjanbiridanda gwèk, zen ahakon Yohanis mes yap lup gul sone gwèka.

golëalsa soner.”

¹¹ Zep ano dang tîninak de walas, nen bap nen karek gol gwen zi mo lowehen san ang ë gwen. Diki dawemsa de gol gwen zi mo lowehen en san nen ang ë gwen. Men zen dawemna syal nei gwibirin, zen Alap mo bi gwibiridan wenya zen. Men zen karekna nol gwenan, zen hom Alapsa tame da'an.

¹² Emki dawemkam Demitrius Baksa zer irin. Zen hen mes eiwa de olak tal gwesiki, hen tîngare awe de Kristen bose wal om man tangan sam neisik gweblanan. Èe ère mo wal bose walya ban zebë emsa en sonebla'an, “Zini an dawemna.” Hen ena tawana: Ano mae mo ola zen eiwa dena. §

¹³ Ano ola sap nama beyana- ebe hap de ale gul soneblan hap denaye. Hwëna ëe ama enlala gwe'an, “Suratkam ba hap de.”

¹⁴ Sap nabakam asa emsa duweblazal. Zen dekam esa dawemkam lora.

¹⁵ Dawem! Em Alap mo taha terenake gwë gwenda. Awe de eno aya-wal oso-walya dawem emsa ep nol sonebla'an. Ano mae mo dawem gol sonenna ansa emki iwe de aya-wal oso-wal hap aha-en aha-enkam ayang gul gwizimdin.

§ 1:12 1:12 Yohannis suratna an Demitrius Bak hon mes yap gol soneka.

Yudas mo surat

¹ Suratna an tingare Alap mo hlil irin wenya ebe mae hap.

Em Bian Alap mo kwasang gwibiridan wenya,

hen Kristus Yesus man emsa kara ta gwibi'ira.

Kristus hon de babu gwen zini, Yakobus Bak mo osona Yudas onakon:*

² Dawem! Diki Alap Zën sa kae-kaena hen kwasang-kwasang zemka mamkam ebe mae hap gol gwizimdi. Hen nen zëno taha terenak esa lowehe gwer.

Mae hap de ol: Emsa de yasik tabin hip de zini mes ebon mae onak sowëkam bitï gwezal, hwëna Alap sa karek tabiri.

³ Ano dang tininak de aya-wal oso-wal, ëe sap dawemkamë akasik gwe'ak- sangankam de ebe mae hap ale gulzimdin hip. Hwëna dekon zebë sak: Emsa de yasik tabin hip de zini mes ebon mae onak bitï gwezak. Ëe ama sap menkam kalang gwëk-hëndep de lowehe gwen hap denaka de ebe mae hap ale gulzimdin hip, men desa Kristus nëbe mae hap syal gwibir-zimkike. Hwëna angkam nabakamë suratkam emsa titi tabi'in- dekam de nère mae mo Kristussu de taibliblan hap dena insa golluwe gwen hap. Sap Alap srën-srënkam hom ëngaya gwen hap de ola gol gwizimnira, hwëna Zen mes aha-en zëre mo hlil irin zini nëbe mae hap golzimki- nen dikim karek-karek nakon wet so gwen hap denaye.

⁴ Hwëna emsa de yasik tabin hip de zini in mes aningkim ebon mae onak bitï gwezak. Zëre mae mo karek-karek nakon, zep dam gwesik gwe'an: Zen Alapsa de tame tan srëmna. Zen man anakan titi da gwibirin, "Alap Zen kwasang-kwasang enna, zep Zen molya nësa

kahalo en hap karek tabirki." Zen ëk enkam man ëgu gwenan, "Ëe an Kristen zi," hwëna zëno mae mo tawa tabinni in, dekon zep nwe-mase gwe'an- san de nère mae mo Teipsin Zini Bian Yesussu de anakan gublunna kiye, "Zen aban apdenak." Zep Alap orep mes kire zini zëre mo ol ale gunnuk karek tabin hip gugubiridaka.

⁵ Em sap ansa orep mese ëtawa gwëk, hwëna ëe ama etan emsa enlala sobirida'an: Bian orep mes Israel mo auyan-azana Mesir kon gwiswe soneka. Hwëna men zen Zënaka daiblibla srëm gwëk, desa hwëna man timbwas tabirki.*

⁶ Alap zëre mo dam taha nakore zini hen kirekam gweibiridaka: Men zen zëre mae mo syala kon de wet so gwen hap ësonon gwëk, zep hëndep zëre mo lowehe gwenna hli nuk, Alap zep desa okama otdenak de bwi kawesinnik kang gul neka. Zen zëwe besi dokotkam de tahalebin nik lowehe gwenan. Alap mo klis gun hup de yakla yalak kim de hata'ak, Zen dekam sa desa sërkam karek tabir zira.

⁷ Ë yala Sodom hen Gomorak de zini, hen zëno golek de ë-ë san de zini, zen hen zëno mae mo kim ëkarek gwëk. Zen man ëkahalo sosen gwëk hen totore-totore swisa nulin halasen gwëk. Zep Alap in kim syaukkum timbwas gulku, Zen dekam tingare zi hip de ërak hap kang gulku- dekam de anakan tame gun hup, "An kirekam sa hen karek gol gwen zini tinsik gwen srëm syauknuk hëndep denaban lowehe gwer."*

⁸ Emsa de yasik tabin hip de zini in, zen hen kirekam zëre mae mo eisirkim de hlaun sun ang ta gwenan. Zen dekam zep zëre mae mo timni ëkahalo gwe-gwenkam kun da gwibirin. Zen hen teipsin tangan Zini Alapsa man enlala në gweblanan, "Zen sosen tangan naka

* **1:1 1:1** Mat. 13:55; Mrk. 6:3 * **1:5 1:5** Bil. 14:29-30 * **1:7 1:7** Kej. 19:1-24

hom." Hen ngatan zi mo langnak de teipsin-teipsin wenya man lamang da gwibirin.

⁹ Alap mo dam taha nakore zini Mikayel, zen sap wal bose wal zem onakon hen teipsinni, hwena sap kirekam zen hwena hom dowal mo kigisa lamang taka. Zen kim dowal mo kigi naban Musa mo tokna naman-man eblaka, mae hap, "Diki ee asa zerhal," dekam Mikayel Bak kim jalse gweblaka, zen hom zenaka boltere taka. Hwena zen man sap'nen gubluka, "Zen diki Bian Zen sa emsa karek tala."

¹⁰ Hwena yasik ta gwibin zini in, zena mensa tame nul srēm gwe-gwenan, desa man lamang nul gwenan. Zeno mae mo enlalana totore-totore hole-hle en- gwe mo kim. Zep desan de ang tankam, zep sa hēndep etimbwas gwer.

¹¹ Kwasang tol, kire zini zen engalap gwe-gwen, sap zen zen sa Alap mo sērkam de jala hla nul. Zen Kaen Bak mo gwēn karek san ang ta gwenan. Men kirekam hen Bileyam Bak te-ala en hap Israel mo auyan-azana kahalo san dep yasik tabirkike, zen hen zeno kim de lowehen hap mes esam gwesik. Yasik tabin hip de zini in hen Kora Bak han apdenak, sap zen Alap mo gubiridan nakon de wet so gwen hap golēilman gweka. Desa hen sa Alap timbwas tabiri- men kirekam hen Kora Baksa timbwas takake. *

¹² Kristen zini em kime apdekam tembane ta gwenan, dekam hwena yasik tabin hip de zini in man tangan eban mae de esiri gwenkam esam gwesik gwenan. Hwena dekam eno mae mo tagal gwenna in molya sam gwesik gwek, sap zen in enlala kwae naban. Zen saher srēm kam tembane ngalap-ngalap naban bitī gwe-gwenan. Zen zena en naka de taizi gwibin hip edwam gwe-gwe'an. Zen in boton

hap de o kawenna kiye. Nglinak de hla tankam, sap de o hap eh'ho gwen. Hwena asesena kim de tai'inika, dekam sa srēm san dep ata tala, zep hēndep bējen il tin. Zen san de tēn tamlenak de tē gwen srēm tenya kiye. Tamle gwennak sap de eini kip duwebin, hwena eini hom. Zen men kiye- san de te de sa naban hēndep zir gwenna. Zen toton bējen danna tēn.

¹³ Yasik tabin hip de zini in, zen hen men kiye- hi de sērkam ngēp- ngēp gwenna. Dekam desyana man alpnak yaing ta gwenanzal. Zini in hen kirekam: Totore kirekam-kirekamsa de gulin hala serankam saherak zēnaka kang nul gwenan. Zen hen, keisni men zen Alap mo irik gin nikon ēilman gwekke, zeno mae mo kim lowehe gwenan. Keisni in zep nglinak totoresa ora srēm san etē nasen gwenan. Hwena Alap mes zēbe mae hap bwina sērkam de kawesin tangan naka hamal gulzimki- zao de lamkam kang gulnen hap denaye. †

¹⁴ Orep de bongna Hanok Bak, Adam onakon de auyansa aītbinni, zen tujuna zen.* Zen man ngein sin dep denaka hamal hap gugubiridaka- nesa de yasik ta gwibin zisi de Alap karek tabin hip denaka. Zep anakan hamal hap gugubiridaka,

"Bira, Bian man zere mo dam taha nakore zi niban golēyaing gwen hap golek de gwe'an zala. Zen beya en tangankam golēyaing gwe'an zalaribu-ribukam,

¹⁵ dekam de tūngare zisi klis gun hup. Alap Zēnaka de tame tan srēm wenya, desa sa karek tabiri. Sap zen kirekam-kirekamsa Alap mo dwam gwibin srēm san nol gwenan, hen man donsuk gweblanan."

¹⁶ Kirekam de yasik ta gwibin zini in, zen man etonsuk tine gwe-

* **1:11 1:11** Kain: Kej. 4:3-8. Bileyam: Bil. 22:1-24:13; 25:1-3; 31:16. Kora: Bil. 16:1-35. † **1:13 1:13** Keisni sap bējen ēilman gwen. Hwena Yudas mo olak awe kirekam. Enlalana diki ke'i de kara ta gwibin hip de Alap mo dam taha nakore zi. Zen ahakon dowal mo kigi mo yasik tabin sin ang tak, dekon zep ēilman gwek. * **1:14 1:14** Kej. 5:18-24

nan, hen aha zi en mo kareksa donbirisen gwenan. Hwëna zëna ki zëre mae mo hole-hle san ang ta gwenan. Zen hen zëre en mo boresa boltere nul gwenan, hen aha zisi botonkam anakan bën-jana da gwibirin, “Em in aïris”- dekam de beyakam zëbon mae osan de ang tan hap ësyal-syal gwen hap.

Tatetekam de lowehe gwen hap de ol:

¹⁷ Hwëna ano dang tininak de wenya, hamal hap de ola mensa Yesus mo dam tasibin zini ebe mae hap ayang nul gwizimk, desa bahem tangan eititi gwibin.

¹⁸ Zen ol tan-tanna an desa ebe mae hap nol gwizimk:

“Aumwa hap denak, dekam zini sa Kristen zisi swrë da gwibir. Zen zëre mae mo auhu-kama hole-hle en san sa ang ta gwer- Alap mo dwam gwibin srëm san.” †

¹⁹ Zen in zep hëndep kire zi mo syala kon ema ëhliwe gwenan. Zëno mae mo enlalana auhu-kamana awe en dep dena. Sap zëbon mae onak Alap mo Enhona hom.

²⁰ Hwëna ano dang tininak de wenya, ebe mae hap men kire enkam Alap taïblibin hip de ola golzimki, em zao en ëtal gwesik, hen zao en ëtatete gwek. Hen Alapsa em gu sonebla tine gwen— zëre mo Enho nakore sosonkam.

²¹ Alap mo kwasang-kwasang ennak lowehe gwek. Dekon bahem wet so gwe-gwen. Anakare enlala naban em Bian Yesusu ës gweblan, “Zen aumwa hap denak sa nësa kwasang gwibiridala, hen hëndep de lowehen hap dena dekam sa nëbe mae hap golzimdi.”

²² Men zen Kristussu de taïbliblannak ëtatete gwe srëm gwe'an, desa emki enlala kwasang-kwasang naban ëtatete gwen hap titi ta gwibin.

²³ Men zen syauk sun dep de ora san ang ta'an, emki ora dawem

san dep alal gul gwen. Hen emki kwasangsa tingare zi hip goltrei gwizimdin, hwëna deban hen emki anakan ëaïri gwen, “Zëno mae mo kwaena bap zen abon mae onak hlimirin.” Sap zëno mae mo auhu-kama en hap de hole-hlena in, zen san de kwaena kiye.

²⁴⁻²⁵ Nësa de ngaya tabin hip de Zini Alap, Zen sosonna, hen Zen man zëre mo taha terenak nësa kara ta gwibirida. Zen molya syauk sun de ora san dep nësa kara ta sonebirki. Hëndep aumwa hap denak Zen sa nësa zëre mo ngatannak dep kwang guluda hala. Nen dekam enho kles gwesin srëmkam esa isrip-sri tangan naban zëwe lowehe gwer. Zep nëno mae mo Teipsin Zini Kristus Yesus onakon dikire Alapsa boltere da gwek hen zëno bosena teip nulsublunda gwek. Sap tingare dawemna hen sosonna zen Zëbon en lwa'an- sap nonol lonesen nakon, angkam, hen hëndep denaban. In eiwa tangan.

† **1:18 1:18** Yudas mo alena awe, Kristen zisi de swrë ta gwibin hip dena, aha dam gulsunnu anakan, “Aumwa hap denak, dekam zini sa Alapsa swrë da gwer.” (2Ptr. 2:18-20; 3:3-4; 1Yoh. 2:16-17; Ef. 4:17-19; 1Kor. 2:14)

Hamal hap de ola mensa Yesus Yohanis hip golblakake

¹ Ola an mae hap dena: Alap mo ngein sin de kalang goltreiz-imdin hip- mensa Kristus Yesus hup goltrëblakake, dekam de Kristussu de betek gweblan zi hip anakan tan-tan gulzimdin hip, "A kirekam sa nabakam jower." Dekam zep Yesus zëre mo dam taha nakore zisi abon osan dep zer soneka- zen de abe hap ayang gulblun hap. Ano bosen a Yohanis. Ëe an hen ahana-Kristussu de betek gweblanna.

² Ëe men desaë Alap onak kitak kara guk, ëe dekam zebë bukunak awe ale guk. In zebë emsa damnak anakan tonbirida gwe'an, "An eiwa Alap mo ola- mensa Kristus Yesus hamal hap nëbe mae hap golzimkike."

³ Zini men zen de hamal hap de ola ansa aha hap baca nul gwizim'ik, hen men zen ësane gwenkam i-san i-san nei gwibi'ik, zen hë'ho gwibin nika sa Alap onakon hla nul. Sap molya holo gwek dekam sa ki lwal.

Yohanis mo nonol lonesen ol:

⁴⁻⁵ Aya-wal oso-wal men zen Asia mo langnak de tuju enkam de jemataknak lowehen da'anke, ëe an Yohanis ama ebe mae hap ale gulzim'in:

Alap in Zen gwë'ara, Zen orep mes gwëka, hen zëno gwënna molya topse gweblak. Enho zem, Zen tuju nwe-masekam zinik syal gwendenda.* Alap Zëna, Enho zem, hen Kristus Yesus mae sa kwasangkwasangna ebe mae hap mamkam nol gwizim. Hen nen zëno mae mo taha terenak esa lowehe gwer.

* **1:4-5 1:4-5** Yohanis awe anakare enkam ale gulku "tujukam de enho" kam. Dam gulsunnu san ha, "tuju enkam de jematsa de kara ta gwibin hip de dam taha nakore zi." (Why. 1:16; 1:20) Ahaksa aha dam gulsunnu, "Alap mo Enhona- men zen tuju nwe-masekam zinik syal gwenda gwendake." (Yes. 11:2) Nomor tujuna, zen hen bukunak awe gulku sun de ol blaoran makan ale gul gweka. Tuju mo enlalana, "sowehen tangan."

Sap Yesus Zen Zen- Alap hap denaka de tatetekam golluwe gwen hap de Zi niye,

hen tïn nikon de nonol ngaya gwen Zini.

Zen hen Zen- teipsin tanganna, auhu-kamanak de teipsin-teipsin nikonnye.

Zen nësa kwasang gwibiridaka, zep tilki.

Nëno mae mo karek-karekna dekam zep

zëre mo kalkam ngan gulsukute-lidak son nakon kim wet soblakke.

⁶ Zen dekam zep nësa Bi zem Alap onak dikim lowehe gwen hap siri gulsuk-

dekam de Alap mo golak de syal ta gwen zi mo kim hëndep denaban zëno bosesa teip gulsuk gweblan hap.

Kristus Yesus Zen Zen- teipsin tangan Zi niye.

Tingare sosonna zen Zëbon sa hëndep denaban lwa gwer. In eiwa!

⁷ Bira! Angkam man hata'ara! Ëe, Yohanis, mesë but de zerati gwe zannak hla ta guk. Kitak de zi de etan ëngaya gwenkam zen kirekam sa hen hla da gul, sap men zen hen dang nulblik. Tingare auhu-kamanak de zini gosa sa dablal. In eiwa kirekam tangan sa ki lwal! In eiwa tangan!

⁸ Alap man nësa gubirida'ara: "In eiwa kirekam sa lwal, sap Ëe an nonol lonesen nakore Zi, hen aumwa topnak de Zi.

Ëe orep mesë gwëk, hëndep angkam gwë'an.

Ano gwënna molya topse gwëk. Kitak de sosonna zen Abon onak."

Yohanis kim Yesus hup dena esirkim hlaukuke:

⁹ Ëe an Yohanis. Nen Kristus hon de ang ta gwen wenyä apdekam kareksae oltowe gwenan. Sap sa nësa kire hap karek da gwibir, sap nen anakare enlala nabane lowehe gwenan, “Nen mese Kristus mo irik ginnik bitü gwëk, zep ki nësa neibirida gwe'an.” Asa zep hëndep lang tekna Patmos san dep hiri dak, sap ëe ama Alap onakore Yesus hup de ol dawemsa gol halada gwëk.

¹⁰ Nër hom de Hari Minggukam,† asa dekam Alap mo Enhona bi gwe-blaka. Dekam zebë ëre mo tahan san sramin aiku makare ol yawalsa sak- anakan kim asa gublukaye,

¹¹ “In desa kara gu'ura emki bukunak ale gun. Bukuna desa tujukam de jemat hap gol sonezim- men zen Asia mo langnak de tujukam de ë-ënak lowehe song gwe'anke. Ë bosome-sena: Efesus, Smirna, Pergamus, Tiatira, Sardis, Piladelpia, hen Laodikia.”

¹² Ki zebë tahan san mae hap lero gwëk- “An nara asa tonbla'ara?” Dekam zebë tuju enkam de lampuna hlauludak- emas nakon de syal gwëblandan naka.

¹³ Tujukam de lampuna in mo ngirinnik, zao zebë Zini hla tak- Zi Tangan makan, ‡ baju blal ala son naban hëndep tana tahannak nyausubluk. Hen emas nakon de syal gwibin bitü yawalsa dauku, hëndep bik dannak hatak.

¹⁴ Nol alana ngap-ngapna- men kiye, but ngap-ngapna. Nwena syauk makan nihitilbli'ak.

¹⁵ Tanana man nalilingtilbli'ak- men kiye, tembaga ëse ang gunnu. Hen zëno ol-gun aukuna men kiye- ho li yawal zannun aukuna.

¹⁶ Dam tahakam tuju enkam keisni teirensi'inka. Zëno mahala san de nëbok eihya-ngi eihya-ngi benbenna kiye. Nwe-masena man

ngatan gweblaka- men kiye, yakla nwe ngatanna kim bolak zauk gwenda.

¹⁷ Ëe kimë hla tak, ki zebë zëno nwenak zi tok makan zanzak. Hwëna ki zep zë dam tahakam asa towanbla ineka- anakare ola ban,

“Bahem airin. Ëe an nonol lonesen nakore Zi, hen aumwa topnak de Zi.

¹⁸ Ëe an Zen- ngaya gwen hap de Ausuna. Ëe mesë sap tik. Hwëna emki Asa hla tan: Ëe asa hëndep denaban gwë gwer. Tingare sosonna Abon- dekam de zisi gubirida gwen hap denaye, ‘Angkam mes zaunun- em dikim tin hip dena.’ Hen kuncina Abon onak lwa'ara- dekam de juwen zi mo langsa gulhlu irin hip denaye.

¹⁹ “In desa ki kara gu'ura, emki bukunak ale gun. Sap in angkam dep dena, hen ngein sin dep dena.

²⁰ Tujukam de keisni hen tujukam de lampuna insa hlauludala, zen gulk sun de ol blaoran makan. Tujukam de lampu emasna in, zen Asia mo langnak de jemat-jemat. Tujukam de keisni insa ano dam tahanak hlauludala, dam gulsunnu, Alap mo dam taha nakore zi- tujukam de Asia mo langnak de jematsa de kara ta gwibin hip dena.”

2

Ëna Efesusk de Kristen zi hip de surat:

¹ Yesus ki zep asa gubluka, “Ola ansa emki ale gul sonen:

Efesusk de jematsa de kara gul gwen hap de Alap mo dam taha nakore zi hip,

Yesus onakon:

Ëe an tujukam de keis nibare Zi. Dam tahakamë teirensik gwe'an.

† **1:10 1:10** “Hari Minggu” desa Yohanis “Bian mo yakla”kam ale gulku. Orep de ëKristen gwen zini Hari Minggusa man nen gwibik, “Bian mo yakla”kam. Zen mae hap kirekam Minggusa nen gwibik: Sap Yesus Zen Minggukam tin nikon ngaya gwëka. ‡ **1:13 1:13** Insa “Zi Tangan makan”kam ale gulku, Yohanis man enlala gwëka- men dekam Daniel Bak hamal hap Kristussu ngatan zi mo langnak hla taka. (Dan. 7:13-14) Zao man anakan hla taka, “San de zi tangan.”

Hen Ëe an tujukam de lampu emas nabare Zi.

² Ëe eno mae mo syal gwibinni kitak tawana. Em abe hap de syala dohon-hon tangan nakae ol gwek, hen dawemkame tatem ëzauk gwek. Hen Ëe tawana: Em karek gol gwen zi niban home olësiri gwe-gwek. Hen men zen zënaka nenbirida gwek, 'Ëe an Yesus mo zer sonen zi,' hwëna em mese sap desa aka-sibirida gwek, hëndep dekam zebe ahakorena anakan tame la gwibik, 'An nësa de yasik tabin hip de zi.'

³ Emsa mes ano bose hap karek da gwibik, hwëna em ema ëenlala gwe-gwek, 'Sap sa ki asa zëbe hap de jal hap neibirida gwer, hwëna ëe molyë kim baes ëblak.'

⁴ Sap eiwa, kirekame lowehe gwek, hwëna angkam em a dekone mo ësyalhe kin'an: Orep eno mae mo kwasang-kwasangna mamna. Hwëna angkam mes betek gwer.

⁵ In zep em ere mae mo karek-karek nakon ëhalen. Sap em mese ere mae mo nonol lowe-hen dawem nakon ëlanga gwesil. Men kirekame nonol lowehe gwek, kirekam em etan lowehen. Dekon de ëhalen srëmkam, ki dekam asa eno mae mo jemat hap de lampuna insa gulsul. Dekam kawesinnik esa etan lowehe gwer.

⁶ Hwëna aha-en ki dawemna ebon mae onak lwa'an: Men kirekam Nikolaus Bak yasik tabin hip de zini gwëka, kirekam de lowe henna em ema hwa kulsuk gwenan- Aena men kirekamë hen hwaulsuk gwenanke.

⁷ Em dwan i nibanke!

Zep mensa Alap mo Enhona ebe mae hap ayang gulzim'ira, zen desa em ësal gwen.

Men zen de tatem ëzau'uk, Ëe asa zëbe mae hap golzim- dekam de hëndep de gwën hap de tetan dansa twinbin hip, Alap mo nganak denaka."

Ëna Smirnak de Kristen zi hip de surat:

⁸ Yesus ki zep asa gubluka, "Ola ansa emki ale gul sonen:

Smirnak de jematsa de kara gul gwen hap de Alap mo dam taha nakore zi hip,

Yesus onakon:

Ëe an nonol lonesen nakore Zi, hen aumwa topnak de Zi.

Ëe mesë sap tik, hwëna ama etan ngaya gwek.

⁹ Ëe tawana: Em tahalha zi, hen kareksa de goltowe gwen zi. Hwëna eiwa dena, eno mae mo ngatan zi mo langnak de kire-kirena beya tanganna. Ëe tawana: Yahudi zini man emsa lamang da gwibirin. Zen sap man zënaka nenbirida gwenan, 'Ëe an Alap mo hlil irin wenya,' hwëna zen mes angkam dowal mo kigï onak bitï gwek.

¹⁰ Bahem ëairin. Ëe ama emsa gubirida'an: Emsa sa ahakon dowal mo kigina bwinak yal gul nera- emsa dikim akasibiridan hap. Yaklana dare taha-tap enkam esa jalom ëk tihinak karekkam loweher. Hwëna tatem em anakare enlala naban ëzaun, 'Sap sa asa dameral.' Ki dekam asa ebe mae hap hëndep dikim lowehe gwen hap de mire sigina lop tazim.

¹¹ Em dwan i nibanke!

Zep mensa Alap mo Enhona ebe mae hap ayang gulzim'ira, zen desa em ësal gwen.

Tatem men zen de ëzau'uk, zen molya noltowek-

mensa nen gwibirin, 'Hëndep de tin hip dena.' ""*

Ëna Pergamus de Kristen zi hip de surat:

¹² Yesus ki zep asa gubluka, "Ola ansa emki ale gul sonen:

Pergamus de jematsa de kara gul gwen hap de Alap mo dam taha nakore zi hip,

Yesus onakon:

Ëe an mahal ben-ben nabare Zi- nëbok eiha-ngï eiha-ngï ben-ben makan.

* **2:11 2:11** "Hëndep de Tinni," zëno dam gulsunnu, emki Why 20:14nak hlaun.

13 Ëe tawana: Em in dowal mo kigi mo enake lowehe gwenan— men zao teipsinkim irik gil gwendake. Sap eiwa kirekam, hwena karek yala in kim ebon mae onak hatak, em namae dawemkam ano bosena urensik gwek. Em dekam home Asa de taibliblanna baes tak. Hen in kim sap Antipas Baksa eno mae mo ngirinnik abe hap de jal hap dak, em dekam home Asa anakan azabeblak, 'Ëe Zëbon de ang ta gwen zisi hom.' Hwena em hen Antipas Bak mo kime Abon onak tatem ezauk gwek.

14 Hwena ano husus gwibinni hen ki— ebon mae onakye. Sap ahakon hen ema Bileyam Bak Swe mo tawa tabin sin ang ta gwenan. Sap zen orep tangan Balak Baksa tawa taka, 'A kirekam em Israel Bak mo ausu nakore zi hip zol makan eiyas ta guzimdin,' hendep dekam zep zë ekyan hezak. Zen dekon zep yang tabin boton alap hap de tembananak ang ta gwek, hen kahalo-kahalo san ang ta gwek.

15 Hen ebon mae onakon zini ahakon kirekam hen Nikolaus Bak mo yasik tabinni nurensik gwenan.

16 Zen in zep, em ehale. Sap em de ehale srëmkam, ki Ëe asa emsa, hendep in zen emsa yasik da gwibirin, depan mae golëeijazal-ëre mo nëbok makare mahal benbenkam.

17 Em dwan i nibanke!

Zep mensa Alap mo Enhona ebe mae hap ayang gulzim'ira, zen desa em esal gwen.

Men zen de tatem ezau'uk, Ëe asa zëbe mae hap golzim— dekam de orep de tembane aning gunsu twen gweblan hap, mensa orep Israel mo

ausu nakore zi hip Alap gol gwizimkike, zen kim nama sasa lang san sek gwe song gwe'akke.† Hen zëbe mae hap Ëe asa kaso ngap-ngapsa kae gweblazim. Ëe asa etan desa aha bosekam bosemse tabir, hen ëse boresa asa kasona iwe ale tabir-zim. Bosem-sena in aha molya tame nuk, hwena men zen en de deirensi'ik, zëna enna sa anakan tame nul gwer, 'Yesus kirekam asa bose taka.' "

Ëna Tiatirak de Kristen zi hip de surat:

18 Yesus ki zep asa gubluka, "Ola ansa emki ale gul sonen:

Tiatirak de jematsa de kara gul gwen hap de Alap mo dam taha nakore zi hip,

Alap mo Tanena, Abon onakon:
Ëe an men zëno nwe nik syauk mo kim nihitil gweblananke,
hen men zëno tana nik tembaga ëse ang gun makan nalilingtil gweblananke.

19 Kitak em insa syal ei gwibirin, Ëe tawana. Ëe tawana: Em ema enaka kwasang eibirida gwenan. Em Asa de taibliblan nabane lowehe gwenan, hen abe hap de syala ema dawemkam ol gwenan, hen tateme ezauk gwenan. Ëe tawana eno mae mo syala angkam man nonol syala kon esek gwe se'an.

20 Hwena ebon mae onak an zen en husus gwe-gwe'an: Em ba habe wanya insa, Izebel Baksa, kara ul gwenan? In zen botonkam anakan gubirida gwenan, 'Ëe an Alap mo olsa de ebe mae hap ayang gul gwizimdin hip de we.' Hwena zëno kirekam de yasik tabinni in kon zep Abon de ang ta gwen wanya beya nik zëbon osan ang ta gwek—

† 2:17 2:17 Israel mo ausu nakore zini kim sasa lang san sek gwe song gwek, dekam man mamkam ëusak gwe-gwek. Alap dekam zep tembane bosena "manna"sa jowen ta gwibir-zimki. Ki zep Alap dekam de mannana insa botolak mat tan hap Musasa gubluka— hen botola insa de Alap mo petinang ing gun hup. Hwena Alap mo petina in hendep botola in han orep mes jek-jak nëk, hen Alap mo ëpba olak hom anakan ale nuk, "Kirekam jek-jak nëk." Yahudi mo aha tawa tabin nikon, zao man hyanak ale nuk, "Alap mo olsa de ayang gun hup de zini Yermia peti naban botola in han kama hulak aning soka— kim Babelk de zi de Alap mo golsa dri yun hup denak golek de gwe'akke." In zep auyan-tane wal zem ëkil gil gwek, "Nësa de गया tabin hip de Zi de hata zankam, dekam sa etan tembanena insa nëbe mae hap gol gwizimdi."

ëkahalo gwe-gwenkam, hen yang tabin alap hap de tembanesa de twen gweblankamye.

²¹ Ëe mesë sap Izebel Baksa de karek gun hup de yaklana esek gul gwek- dekam de zëre mo swi sosen nakon halen hap. Hwëna zen man halen hap baes gwe-gwek.

²² Tumna men zëwe karekna gol gwenan, Ëe asa zëwe etan hiri gulser- zao de sang-sang kareksa gollwa gwen hap. Hen men zen kahalo nei gwibik, kirekam asa gweibiridal. Zen hen karekna mam naka sa noltower- zen de karekna in kon ëhalen srëmkamye.

²³ Hen zëbon de ang ta gwen wenya ahakon asa juwen tabir- dekam deka tïngare jemat-jemat Asa tame dak, 'Eiwa, Zen zi mo enlalana hen enho naban man tame ta gwizimmira.' Zep Ëe asa ere mae mo karek gon jam enkam emsa karek ta gwibir.

²⁴ Hwëna Tiatirak de wenya, em ahakon home yasik tabin hip de wenya in mo tawa tabin sin ang tak. Mensa zëbon de ang ta gwen wenya nen gwibirin, 'Dowal mo kigi mo enlala aning tanna', desa de tawa gweblan hap em ahakon home ang tak. Em ema zi enlala karek- karekna insa nol sang-sang eibirida gwenan, zep ëe homë ebe mae hap aha syala wei yul sonezim'in.

²⁵ Hwëna em in kirekame angkam Asa laïbli gwebla'an, kire ennak tatem ëzauk gwek- hëndep ano lwa- hal zannak de zau'uk. Bahem Asa de taïbliblanna insa baes gwibin.

²⁶ Men zen de ano dwam gwibin en san lowehe gwe'ak, hen tatem ëzau'uk, hëndep aumwa hap denak de hata'ak, zëbe mae hap Ëe asa ëre mo sosonsa golzim- dekam de tïngare zi aususa irik gin hip de- naka.

²⁷ Emki ëenlala gwen- men kirekam Mazmuruk Daud Bak abe

hap dena ale gulkuke, abe hap de Bian sosonsa golblan hap dena. Zen anakarekam ale gulku,

'Em esa tatete tangankam irik gili. Zini men zen de ësonon gwe'ak, desa esa timbwas tabiri- men kiye, besi tekkam de botolsa lwa tabinni.'*

Hwëna sosonna in desa asa hen ebe mae hap golzim- men zen de tatem ëzau'ukye.

²⁸ Ëe hen asa hleng gwen hap de keisni ebe mae hap zerzim. ‡

²⁹ Em dwan i nibanke!
Zep mensa Alap mo Enhona ebe mae hap ayang gulzim'ira, zen desa em ësal gwen."

3

Ëna Sardisk de Kristen zi hip de surat:

¹ Yesus ki zep asa gubluka, "Ola ansa emki ale gul sonen:

Sardisk de jematsa de kara gul gwen hap de Alap mo dam taha nakore zi hip,

Yesus onakon:

Ëe an Alap mo Enho nabare Zini Zen- men zen tuju nwe- masekam zinik syal gwe- gwendake,*

hen Ëe an tujukam de keis nibare Zini.

Ëe tawana insa em syal ei gwibi'in. Zini man emsa kil di gwibi'in, 'Zen ngayana,' hwëna em in tok-tokna.

² Zen in zep, em ni truwen nakon luk tan, hen eno mae mo syala in zen tïnsin hip alp gwesi'in, emki etan bubung gun. Sap Ëe tawana: Em insa syal ei gwibi'in, aha-en mae home su kul sone'an- ano Bian mo nwenakye.

³ In zep emki enlala gwe-gwibin- men desa orep emsa tawa da gwibikke, hen men desae ësane gwe-gwekke. Zen kirekam em etan syal tan, deban ëhalek. Sap

* **2:27 2:27** Mzm. 2:8-9 ‡ **2:28 2:28** Hleng gwen hap de keis hip de ola, emki Why. 22:6nakhlaun.

* **3:1 3:1** Alap mo Enho de tuju nwe-masekam zinik syal gwendan hap de ola, emki 1:4 mo otde alenak hlaun.

em de salok-salokkam lowehe gwen srëmkam, Ëe ebon mae onak sowë zi mo kim asa hatazal. Ki em molye hamal hap anakan ëtawa gwe guk, 'Yaklana dekam sa hata zala.'

⁴ Hwëna eno mae mo ngirënnik nama hen- salok-salokkam de lowehe gwen wenyaye, men zëno mae mo pakean ëjok-jok gwe srëm gwe'an. Ëe asa desa pakean ngap-ngap alala tan naban golëlowehe gwer, sap zen mes kirenak dep ëdakastik.

⁵ Men zen de tatem ëzau'uk, zëbe mae hap pakean ngap-ngapsa asa alala tazim. Hen zëno mae mo bosem-sena Ëe molyë hëndep de ëngaya gwen hap de wenyik mo bosemse nabare buku nakon ngan gulsuzimk. Bian hon hen zëre mo dam taha nakore wenyak Ëe asa anakan kira tabir, 'An zen- ano bi gwibiridan wenyaye.'

⁶ Em dwan i nibanke!
Zep mensa Alap mo Enhona ebe mae hap ayang gulzim'ira, zen desa em ësal gwen."

Ëna Piladelpiak de Kristen zi hip de surat:

⁷ Yesus ki zep asa gubluka, "Ola ansa emki ale gul sonen:

Piladelpiak de jematsa de kara gul gwen hap de Alap mo dam taha nakore zi hip,

Yesus onakon:
Ëe an lalak enna hen taibliblan tanganna.

Teipsin zini Daud Bak mo kunci bi gweblanna Ëyë zirensi'in.

Ëyë dekam lilikinsä talusu'uk, nara zi molya etan gulhlu inki.

Hen Ëyë gulhlu in'ik, nara molya talusuku.

⁸ Ëe tawana insa em syal ei gwibi'in. Hen Ëe tawana: Em tatete tangan naka hom. Hwëna em mese ano tawa tabin sin ang ta gwek, hen home ano bosena anakan azabe gwibik, 'Ëe Zëbon de ang ta gwen

zisi hom.' In zep ebe mae hap mesë lilikinni talusuzimk. Desa toton nara dep?- etan gulhlu irin niye.

⁹ An kirekam sa ebe mae hap lwazim: Zini men zen emsa hit di gwibirin, Ëe asa desa tik-tik tabir-ebon mae onak de yaing gwezan hap. Zen dekam sa bokle kom son nakon anakan ëkira gwer, 'Eiwa, Alap man emsa kwasang gwibirida gwenda.' Zen man zënaka tim di gwibirin, 'Ëe an Yahudi zi tangan,' hwëna zen dowal mo kigi mo walas.

¹⁰ Sap em mese ano ol hli yulz- imdin sin ang ta gwek- dekam de kareksa de goltowen nakon asa zabeblan srëm hap denaye. Zep Ëna hen asa emsa golëzauk soner- karek yawala in kim de tingare okamanak hata'akye. In tingare auhu-kama zisi dikim akasibiridan hap sa ki lwal.

¹¹ Ëe nabakam asa hatazal. Men desa ki ulin gwek, dawem enkam olinik gwek. Aha zi mana hwëna ebe mae hap de mire sigisa kap da innink.

¹² Men zen de tatem ëzau'uk, Ëe asa desa Alap mo gol ësenak gol te makan eiyas gil. Zen zao sa hëndep denaban lowehe gwer. Hen Ëe asa ëre mo bose ësesa zëno mae mo timnik ale tabir-zim, hen ëre mo Bian Alap mo bosesa, hen Alap mo ë bosesa. Zen in zen- Yerusalem ëse, men zen sa ngatan zi mo lang nakon ati gwe zala, Alap zëre onakon.

¹³ Em dwan i nibanke!
Zep mensa Alap mo Enhona ebe mae hap ayang gulzim'ira, zen desa em ësal gwen."

Laodikiak de Kristen zi hip de surat:

¹⁴ Yesus ki zep asa gubluka, "Ola ansa emki ale gul sonen:

Laodikiak de jematsa de kara gul gwen hap de Alap mo dam taha nakore zi hip,

Yesus onakon:
Ano aha bosena 'Eiwa de Zi.' †

† **3:14 3:14** "Eiwa de Zi," Yohanis man Yesus mo aha bosena ale gulku "Amin"kim. Amin mo aha enlalana "In eiwa," ahaksa, "Kirekam de hëndep lwak."

Ëe an Zen- eiwakam hen tatetekam de Alap hap denaka golluwe gwen hap de Zi niye.

Ëe an Zen- kitak ausuna, Alap mo yang tabin nikon.

¹⁵⁻¹⁶ Ëe tawana em in desa syal ei gwibi'in. Zen in zebë emsa ulop gwibirida'an- san de tembane kareksa de ulop gwibin makanye. Sap em asa de kwasang gweblanna mese ëblalen gwëk, hwëna home tangan asa baes ëbla'an. Zep em an men kiye- tembanena sal-salaka hom hen bot-bot naka hom. Zen in zep Ëe asa emsa kitak wëk gwibiri-dal.

¹⁷ Em ema ëkil gïl gwenan, 'Ëe an kire-kire beyana. Basa dep?- tahalha gwibinni.' Hwëna em home ere mae mo enhona tame la'an. Em in enho nakon tahalha tangan nike lowehe gwe'an- kwasap walas mo kim. Em in irkane lowe he'an hen nwe ðiminni.

¹⁸ Zen in zebë emsa tütï tabi'in: Em Abon onak te-alakam hëndep de emas lalaksa kablak- dekam de ano nwenak ëtahalha gwen srëm hapye. Emki hen Abon onak pakean ngap-ngapsa kap laink- desa de alala tan hap, sap angkam em irkane sahëra ban lowe he'an. Hen nwe hap de obatsa emki Abon onak kap ta irin-ekakim nweasa ëkara gwëk.

¹⁹ Zini mensaë kwasang gwibirida gwenan, zen desaë jalse gwibirida gwenan hen lek-lek ta gwibirin-dekam de zen dawemkam ëhalen hap. Zen in zep, em tïngare enho naban ëhalen.

²⁰ Ëe bira! Ëe eno mae mo enhonak de lïlikinnikë zauk gwe'anzal, hen ama ga'ga so gwenan. Men zen de ano ola sa'anka, hen lïlikinni in sa ap talusublu'anka, zëbon asa tïl, hen zini in han asa zergwë gwer. Hen Ëe deban asa ënaka itwen gwer.

²¹ Men zen de tatem ëzau'uk, Ëe asa desa gubiridal- ëre mo nikin gwennak de ëre mae han teipsinkim teinikirin hip, dekam de apdekam irik gin hip. Aena hen tatemë zauk gwëk. Zen in zebë angkam ëre

mo Bian naban apdekam teipsinkim inikin gwe'an.

²² Em dwan i nibanke!

Zep mensa Alap mo Enhona ebe mae hap ayang gulzim'ira, zen desa em ësal gwen."

4

Yohanis kim ngatan zi mo langnak hlauludakake- Alap mo bosesa de teip gulsuk gweblannak:

¹ Ëe Yohanis ki zebë etan dekon kara gwëk, hwëna ngatan zi mo langnak de lïlikinsi zebë kon akesek. Man dalusuhuk. Hwëna ki zebë hen ola salsek- men kirekam nonol asa tonbla'ankake, sramin auku makare olsa. Zen man asa gubluka,

"Haen, an san emki sewe sezan. Ëe asa ebe hap goltrëblal- in zen ki ngein sin jowe'akye."

² Dekam zep ki hëndep Alap mo Enhona asa bi gweblaka, hëndep dekam zebë eiwa de makan ngatan zi mo langnak hatak. Zao zebë teipsin tangan zi hip de komal tumna akesek, hen Teipsin Tangan Zini Alap Zëna zëwe nikin'inka.

³ Zëno nwe-masena man angtan-angtan gwebla'anka- kal-kalkam hen te-ala ësesekam, kaso lilingtin makan. Hen boge alp te-ala ësesë makare nik komal tumna in san wal-wale gwe-gwe'ak.

⁴ Hwëna Alap mo komal tumna in sa man 24 enkam de ahakore komal tumkam wale nosok. Zëwe zini teipsin-teipsin nik hen teinikin'ik-24 enkam. Zen pakean ngap-ngapsa alala dak, hen emaskam de mire sigi alala tan naban zë teinikin'ik.

⁵ Hwëna Alap mo komal tumna in kon nglina man ang tasik kinï gwe'anka, hëndep dekon zep nglina mam enkam ngam ta gwe'anka, hëndep aukuna man alal tahal gwe'anka. Hen zëno dang gwën nakon seip makare syauk ngatanna tuju enkam ëhitilsik kinï gwe'ak. Desa de dam gulsunnu, zen Alap mo Enhona- men Zen tujukam de nwe-masekam zinik syal gwenda-gwendake.

6 Hen Alap mo komal tum dang gwën san ki zebë hen hi yawal makarena hlauk, hwëna zen kaca lalak makarena. Hen tumna in mo alp-alp san, ngatan zi mo langnak de otweran makare zini dan-nër dan-nërkam zë lowehe gwenan. Zëno mae mo timni dang san hen tahan san nwe en naban.

7 Otweran nwe-masena in ahana men kiye- singana. Ahana zëno nwe-masena men kiye- sapi zirya. Hen ahana men kiye- zini. Hen ahana zen men kiye- mawana heir de ihe zanna.

8 Dan-nër dan-nërkam de otweran makare zini in, zëno mae mo sï alana enam-enamkam. Hen zëno mae mo timni nwe enkam ësowehek- sap sï ala iltikïn mae san. Zen yaklam hen kam tër tanna hom ëzausuk gwenan. Zen a kirekam mo da tine gwenan:

“Bian Alap, Teipsïn Zini,
Zen lalakna, Zen lalakna, Zen lalak
tanganna.

Zen orep mes gwëka,
hëndep nama gwë'ara,
hen zëno gwënna molya topse gwe-
blak.”

9 Dan-nër dan-nërkam de otweran makare zini, zen kirekam zëno bosesa de teip gulsublun hap de terya da tine gwenan- blikip gwesik gweblan hap hen dawemsa de gol gweblan hap, Zëna in Zen komal tum dawemna in kon hëndep denaban irik gï'irake. Hen in kim otweran makare zini in kirekam terya da gwenan,

10 24 kam de teipsïn-teipsïn wenya in dekam zep nol ik gin niban boklana kom da gweblananzal- hëndep de gwën Teipsïn Zini zëre mo nwe-nak. Zen dekam zëre mae mo mire sigina talwesin nika kang da gwenanzal- dekam de Bian mo nwe-nak ëbetek gwen hap. Hen dekam zëno bosesa anakan teip nulsuk gweblanan,

11 “Are Bian, ano mae mo Alap,

* 5:5 5:5 “Yehuda,” zen Israel mo aha zi ausu. Raja Daud zen dekon saltikï, hëndep Yesus hen dekorena.

Em en airis- tërkam de Emsa ta gweblan hapye.

Dikire tingare sosonna Ebon lwa gwek.

Dikire ere mo bosena teip nulsublunda gwek.

Sap tingare kire-kirena Eme yang tabirki,

hen eno enlala gwibinkim ki tingan ëjowenda gwek hen ëngaya gwe-gwek.”

5

Yohanis kim buku lak gun nuban Alap mo domba tane naban akekake:

1 Alap mo dam tahanak, ki zebë buku lak gulsunnu hlauk. Bukuna in alekam mes eihya-san eihya-sankam sowehek, hen hulen nik lwa'ak. Dokot buknu tuju enkam.

2 Hwëna ki zebë hla tak- Alap mo dam taha nakore jana nabare zi sosonna, ol mamkam kim taken gwe'anka,

“Nara en airis?- zen de tujukam de dokot buknu ansa hil ti sonebirzin hap, hen zen de bukuna ansa kwala-kla gun hupye.”

3 Hwëna aha-en mae hom tangan nadakastik- zen de bukuna insa kwala-kla gun hup, hen zao de alena insa de baca gun hup- sap ngatan zi mo langnak de wenya, sap auhukamanak de wenya, hen juwen zi mo langnak de wenya.

4 Eë dekam zebë yusyustin niban gona gwë'ak- mae hap, “Hare zini aha-en mae homke!- zen de bukuna insa kwala-kla gun hup, hen zëwe de ales a baca gun hup denaye.”

5 Hwëna in zen teipsïn-teipsïn wenya 24 enkam lowe he'ak, zen zep ahanik asa gubluka,

“Bahem gona gwën. Singana insa emki hla tan. Zen Yehuda mo auyanaza nakorena, * teipsïn zini Daud Bak mo Auyan-tane. Zen mes zëre mo jal zini holenak zaubirida ineka. Zen Zen sa tujukam de dokot topna

insa hīl tī sonebiri, hen bukuna insa Zen sa kwala-kla gulu.”

⁶ Hwēna Domba Tanesa zebē hla tak, Alap mo komal tum golek denak zau'unka. Dan-nēr dan-nērkam de otweran makare zini in zē ngīrīn da'ak, hen tīngare 24kam de teipsīn-teipsīn wenya in. Domba tanena in hla tankam san de Alap hap de zīp soblanna. Zen wei-wei naban zē zau'unka. Zēno nola kore hlihlina tuju enkam. Nwena hen tuju enkam. Tujukam de nwena insa de dam tasibinni, Alap mo Enho mo tujukam de nwe-mase- mensa Alap tīngare okamasa de amjan gwibin hip dam tasibirkike.

⁷ Hēndep ki zep Domba Tanena in song gwe zaka, ki zep hēndep bukuna insa Alap zēre mo dam tahanak gul inki.

⁸ Domba tanena in kim gul in'inka, dekam zep dan-nēr dan-nērkam de otweranna in, hen 24kam de teipsīn-teipsīn wenya in boklena kom da gwebla'anzak. Zen kītak gitar makare naka deirensī'ik, hen emaskam de pancisa deirensīk. Emaskam de pancina in, zen men zao Alap hap irase dawem nabare te kilī ang nulsuk gweblananke. Irase dawem nabare te kilī in mo dam gulsunnu, Alap mo irik ginnik de bitī gwen wenyik mo ol gu sone gweblan.

⁹ Zen dekam zep tēr ēsena da'ak: “Em aīris- bukuna ansa de gon hap, hen dokot topna insa de hīl tī sonebin hip.

Sap Emsa mes dak,
hen eno kalkam ema zini ngan tasi-
birki-
desa de Alap onak dep kap gulhan
hap,

sap tīngare zi ausu nakore zi,
sap tīngare men-kore men-kore ol
ton gwibin zi,

hen tīngare irik gīn lang nakore zi,
hen kirekam-kirekam sop zi ausu.

¹⁰ Em mese desa tīngan Alap mo irik
ginnik dep golēbitī gweka.

Hēndep zen sa loweher-

san de Alap mo golak de syal ta gwen
zini kiye.

Zen hen sa tīngare okamana irik nīl
gwer.”

¹¹ Ki zebē etan dekon kara gwek,
hen Alap mo dam taha nakore zi
beyam-bya mo olsaē sak. Zēno mae
mo beyana banakan dep?- aītbinni,
hēndep ratusan jutanak man yap
tamank. Zen man Alap mo komal
tumna insa wale nososuk- hēndep
dan-nēr dan-nērkam de otweranna
hen teipsīn-teipsīn wenya in han.

¹² Zen tērya ol mamkam da'ak:
“Domba Tanena men desa Alap hap
zīp nosoblakke,
Zen aīris- tīngare langsa de bi
gwibin hipye.

Dikire tīngare sosonna hen enlala
blala Zēbon lwa gwek.

Dikire kītak betek nē gweblak hen
boklena kom da gweblak.

Dikire kītak zēno bosena teip nulsuk
gweblak

hen boltere nul gweblak.”

¹³ Ki zebē etan salbiridak- tīngare
zini hen tīngare otweranna-
sap nglīnak dena,
okamanak dena,
hi mwanak dena,
hen juwen zi mo langnak dena,
hēndep kītak tangan.

Zen tērya anakan da'ak:

“Teipsīn Tangan Zini Alap hen
Domba Tane zem in han
dikire tīngan zēno nik mo bosena
boltere noso gwizimk,
hen blikip neisik gwizimk.

Dikire tīngan teip nososuk gwek,
hen dikire tīngare sosonna Zēbon
nebon hēndep denaban lwa
gwek!”

¹⁴ Dan-nēr dan-nērkam de otweran
nwe-mase makare zini in ki zep
ding nulzimk, “In eiwa!” 24kam de
teipsīn-teipsīn wenya in dekam zep
boklena kom dak, hen Eirzi-Bia mo
bosena teip nulsuzim'ik.

6

*Domba Tanena kim dokot buk top-
topna hīl tī sonebirkike:*

1 Ki zebë hwëna Domba Tanena insa hla tak- Zen kim nonol dokot topna buku lak gulsunnu in kon hîl gîl soneka. Ki zebë hen ola sak dan- nër dan-nërkam de otweranna in kim ahanik gu aneka, "Haen!" Zëno ol aukuna in men kiye- ngli glung aukuna.

2 Ki zebë hwëna hla tak- kuda ngap-ngapna kim te sokin zi'anka. Zini men zen zersong gwe'an zaka janasa gwirenka. Gwërbonna hen man ala nosoblak, sap Alap mes zëbe hap golblaka- zen de eijannak yei-yëk gwen hap denaye. In zep eijannak dep ati gwe ine zaka.

3 Ki zep etan Domba Tanena in aha dokot topna hîl gîl soneka. Dekam zebë etan sak- aha otweran nwe-mase makare zini in kim gu aneka, "Haen!"

4 Aha kudana hen dekam zep etan te sokin zika. Kudana in zëno alana kal-kala. Zini in zen zersong gwe'an zaka zëbe hap hen man Alap sosonsa golblaka- dekam de auhu-kama nakon umlaesa gulsun hup denaka, zi dikim zënaka tamera gwen hap. Zëbe hap zep nëbokna sërkam de blal tangan naka nolblak.

5 Domba Tanena in ki zep etan dokot topna dan-ahanna hîl gîl soneka. Dekam zebë hen otweran nwe-mase makare zini insa ahanaka salblak- kim gu aneka, "Haen!" Dekam zebë hen etan kuda kakakna hla tak- kim te sokin zi'anka. Zini men zen zersong gwe'an zaka zen kire-kire dohonsa dikim timbang gul gwensa gwirenka.

6 Etan ki zebë ola sak- dan-nër dan-nërkam de otweran ngirinnik iwe, san de zi tangan mo ol. Zen man mamkam kuda tahannak de zini insa anakan takenblaka:

"Beras mo hargana emki gulk'nen tan: Beras dawemna angkam, aha- ere litera, aha-ere yakla blalkam de syal gwenkam de zen. Beras karekna, dan-ahare litera, zen

hen aha-ere yakla blalkam de syal gwenkam de zen. * Hen minyak goreng naban ho mamak naban, zen hen sa sërkam hargana gulk'nen nër, hëndep dekam zini bakam dep?- lop ta gwen naye."

7 Ki zep hwëna etan Domba Tanena in dokot topna dan-nër dan- nëra hîl gîl soneka. Dekam zebë etan sak- otweran dan-nër dan-nëra in kim ahanik gu aneka, "Haen!"

8 Hwëna ki zebë etan hla tak- aha kudana kim te sokin zika. Zen hwëna mes tangan sang-sang hap sopna lengse gweka. Zini men zen zersong gwe'an zaka bosena "zi tamera gwen hap de Zini." Lun kon hen ahanik ang gweblan da'anka. Zëno bosena "juwen zi mo langnak de Teipsinni." Alap dekam zep zëbe nikip golzimki- zen dikim okamanak de zisi aha hlik en naka lamera song gwen hap. Zini dan-nër dan-nërkam de aïtbir song gwenkam, ahanik de tin, dan-ahan de lowehen- kirekam de aïtbir song gwenkam.

Ahakon eijankam de juwen,
ahakon tembane srëm hap de juwen,
ahakon sang-sang yawala kon de juwen,
hen ahakon otweran jal-jal de gwidre gwen nakon de juwe gwen.

9 Zen kim has eisiki, dekam zep Domba Tanena in dokot buknu aha-ere taha-tapna hîl gîl soneka. Dekam zebë zini hlauludak, Alap hap irase dawem nabare te kil tru tasik gweblan hap de meja iltikinnik ëzau'uk. † Zen men desa Yesus hup de ol gol halada gwen jal hap damera gwekke- zëno mae mo angna.

10 Zen ol mamkam ëgu ine gwe'ak, "Are Bian, teipsin tangan Zini, Em- en tangan lalakna, hen taïbliëblanna Em-en. Auhu-kamanak de zisi de

* **6:6 6:6** "Beras dawemna" desa Yohanis "gandum dan nakore tepung" kam ale gulku. Hen "beras karekna" desa "jelai dan nakore tepung" kam ale gulku. Tepungna, zen zëno langnak de mwin-mwankam de tembanena zen- men kiye, dojena hen berasna, awe de zi hip dena. † **6:9 6:9** Irase dawem nabare te kil mo gulk sun de enlalana, emki Why. 5:8nak hlaun.

heip gun hup dena, etan holona banaka'en? Sap zen zen asa damera gwek."

¹¹ In zen ki egu gwe'ak, zēbe mae hap pakean ngap-ngapsa alala dazimk. Hen man nenbiridak,

"Emki engka en ēeissin. Kim de Kristen wal bose wal omka tamerankam su nul sone'ak, zen dekam sa ki lwal. Men kirekam emsa damera gwek, kirekam sa hen desa tamerankam su nul soner- men kirekam beyana Bian Alap dam gul-sun dakake."

¹² Hwēna ki zebē etan Domba Tanena insa hla tak- kim dokot buknu enamna hīl gīl soneka. Dekam zep sērkam de jīngīl yawala taīlki, hēndep yakla nwena man kakak gweka- kaen glaīng-glēng kakak makan. Hen benna man kal-kal gwek- san de kala kiye.

¹³ Keisni dekam zep ngli nakon kama san dep lanna hlaka- san de asese yawal de taīnkim de tetan dan lanna hlanna kiye.

¹⁴ Nglina man esek gweka, hēndep man jek-jak gweka. Hen tīngare kwatap-kwatapna hen kama-tek kama-tekna man langa san dep ēese-sek gwek.

¹⁵ Dekam zep tīngare zini ēaning gwek- kaso-hul kaso-hulak hen kwatap-kwatapnak de kaso kles-kles san.

In zen ani-ning gwek, zen sap auhukamanak de teipsin-teipsinni, hen nol-nolkam dena, sap jana nabare nik mo mam-mamna, hen kire-kire beya wenya, hen sap soson nabare wenya, hen sap zi mo tana iltikinnik de lowehen wenya, hen kirenak de lowehen srēm wenya.

¹⁶ Kwatap-kwatapna hen kaso-hul kaso-hula insa man nahērhebirida gwe'ak, "Asa em kei-king gun! Asa em ani-ning gun- Teipsin Zini Alap ne Domba Tane nik mo jal hīl inni an kon! *

¹⁷ Sap angkam Alap mo yakla yawalak mes zaul- dekam de zēre nik mo jalsa hīl in hip denakye. Hen nara zi molya zēno nik mo nwenak tatem zauku?!"

7

Alap mo capkam kim 144 ribukam Israel mo zi ausu nakore zini mirenak al dasibikke:

¹ Ki zebē hwēna Alap mo dam taha nakore zini dan-nēr dan-nērkam hlauludak. Ahana okama yakla hata sezan topnak zau'unka, hen ahana yakla nikin anen topnak zau'unka. Aha darena hen eiha-lip eiha-lip top-top san yaun daka. Zēno mae mo syala, zen asese de zēno mae mo irik gin nikon taīn srēm hap- sap eik sin, hi san, ahaksa te-te syan.

² Hen Alap mes dekam zēbe mae hap sosonna golzimki- dekam de kama naban hi naban karek son hap dena. Hwēna ki zebē Alap mo dam taha nakore zini ahana hla tak- yakla hatase gwezan nakon kim hatase zaka. Zen Ngaya Zini Alap onakore capsa golhatase zaka. Ki zep ol mamkam takenbirida zaka-dan-nēr dan-nērkam de wenya insa,

³ "Na-en bahem kama naban hi naban timbwas son, hen tenya. Anik nonol Alapsa de betek gweblan zisi mirenak capkam al tasibik. Zen mana hen ētimbwas gwenank."

⁴ Dekam zep asa nenblak,

"Zini 144 ribu enkam sa mirenak al dasibir- Alap mo capkamye. Zen kitak dua-blas enkam de Israel mo auyan-aza nakorena.

⁵⁻⁸ Aha-ere auyan-aza nakore zini, 12-ribu 12-ribu enkam sa capkam al dasibir. Israel mo auyan-aza mo bosem-sena, a zēno mae mo ausu nakore naka moye: Yehuda, Ruben, Gat, Asyer, Naftali, Man-asye, Simeon, Lewi, Isakar, Zebulon, Yusup, hen Benyamin."

Yohanis kim sērkam de zi trana hlauludakake:

* 6:16 6:16 Hos. 10:8; Luk. 23:30

9 Hyanak ki zebë etan kara gwek. Ëe sêrkam de zi tra beyam-byasaë hlauludak. Aha-erenak tagal gwesik. Zëno mae mo beyana aïtbinkim toton nara dep?- sul sonenna. Zen Alap ne Domba Tane nik mo dang nakon pakean ngap-ngap alala tan naban ëzau'uk, hen tahakam kawang ala maum hasesa isrip-sri hap deirensi'ik. Zen tingare irik gin nikorena, tingare zi ausu nakorena, tingare sop zi ausu nakorena, hen tingare ol ton gwibin zi ausu nakorena.

10 Zen man ol mam-mamkam anakan ëtaken gwe'ak, "Nëre mae mo Bian Alap Zen teipsin tangannak nikin'ira. Nëno mae mo ëngaya gwenna an, zen Zëbon en onakon hen Domba Tanena in onakon."

11 Tingare Alap mo dam taha nakore zini zen ëzaunkum man Alap mo komal tumna insa dot nososuk. 24kam de teipsin-teipsinni in hen dan-nër dan-nërkam de otweran nwe-mase makare zini in hen zëno mae mo ngirinnik lowe he'ak. Zen dekam zep kitak nol ik gin niban boklena kom dak, hen anakan Alapsa boltere da'ak,

12 "In eiwa! Dikire Alap en hon kitak lwa gwek-

dawemna, ngatanna, enlala blala, hë'ho gwibinni, bose dawemna, hen tingare sosonna, hëndep denaban. In eiwa tangan."

13 Ki zep 24kam de teipsin-teipsin wenya in kon ahanik asa tak-ensiblika,

"Pakean ngap-ngap alala tan wenya an, banakare wenya? Hen enda kon yaing gwezak?"

14 Ki zebë ding gulbluk, "Bian, ëe tawa naka hom. Diki tawana em."

Ki zep hwëna asa ding gulbluka, "Zen an men zen sêrkam de karekna insa nyaubikke-

in kim Yesus hup de jal hap zini karek da gwibikke.

Zen mes zëre mae mo pakeanna ngan dasibik-

Domba Tanena in mo kalkam.

Zen dekam zep zëno mae mo pakeanna ëngap-ngap gwek.

15 Zen in zep Alap mo komal tum alp nakon

lowehe gwenan,

hen Zëno bosena mam nul tine gwenan-

yaklam denaban kam denaban.

Desa Zën sa golëlowehe gwera,

zep zen karekna molya etan noltowek.

16 Zen dekam molya etan usak naban ho-hole naban neiszimk.

Yakla sal-sala hen molya etan nësblak.

17 Sap Domba Tanena in Zen Alap mo alp nakon

gwë'ara,

Zen Zen sa domba zaho ta gwibin zi makan

zaho ta gwibiri.

Zen Zen sa zëbe mae hap hëndep de ëngaya gwen hap de aïli hona zertreizimdi.

Hen Alap sa zëno mae mo nwe go-hona ngan tasibir-zimdi."

8

Domba Tanena in kim aumwa hap de dokot buknu hil gil sonekake:

1 Ki zep Domba Tanena in dokot buknu tujuna hil gil soneka. Ngatan zi mo langna dekam zep ol maena hom gweka- san ha holona stenga jam enkam.

2 Kim nama balk enkam lowe he'ak, ki zebë hwëna Alap mo dam taha nakore zini tuju enkam hlauludak. Zen men zen Alap mo dang nakon ëzauk gwenanke. * Zëbe mae hap sraminsi kap dazimk.

* **8:2 8:2** Tujukam de dam taha nakore zini in, san ha mensa keis mo kim hlauludakake?- pasal 1 ayat 16nak hen 20nak. Aha dam gulsunnu, tujukam de Alap mo dam taha nakore zini mensa Yahudi mo auyan-azana anakan nenbirida gwek, "Tuju enkam Alap mo dang gwën nakon ëzauk gwenan." Ahana Mikayel Bak (Dan. 10:13; 10:21), hen ahana Gabriel Bak (Luk. 1:19; Dan. 9:20-21).

³ Ki zep hwëna Alap mo dam taha nakore zini ahana hata'an zaka. Zen emaskam de meja alpnak zau'un zaka- men zëwe Alap hap irase dawem nabare te kilî tru dasik gweblananke. † Zen panci ema'a gwirensi'inka. Zao zep hen te kilî beya tangankam kap dablak. Desa zep pancinak iwe siri gulsuku-tîngare zini men zen Alapsa betek nê gweblanan, zëno mae mo ol gu sonen naban. Desa zep mejana in kore syauk nuban siri gulku.

⁴ Dekam zep zëno tahanak de panci nakon irase dawem nabare butna Alap osan dep sewesek-hëndep zi mo ol gu sonen naban.

⁵ Zen kim hya gwesik, dekam zep etan pancinak iwe meja nakore syauknu bwang ta seka, desa zep auhu-kama san dep hiri gul ineka. Nglîna dekam zep sêrkam tadre tineka- hëndep nglî ang naban. Hen jîngîl yala dekam zep gwëka.

Tuju enkam de Alap mo dam taha nakore zini kim sramin gublun danna êkon gwesik hanakke:

⁶ In kim kirekam okamanak lwa'ak, tuju enkam de Alap mo dam taha nakore zini in zen sraminni deirensi'ik, dekam zep êhohle gwe'ak- sraminni insa de gublunda inen hap.

⁷ Nonol zen gubir aneka, dekam zep hëndep es kwa-kwakna o makan il tika, hwëna zen hen kala ban syauk nuban de siri nënna- san de dîng-dîngkam de il tin ona kiye. Okamana dekam zep eihya nakon‡ hwei-swis gwëk, hëndep dekore tenya hen dekore tîngare so naban.

⁸ Hen aha zini kim gubir aneka, hwëna êe dekam zebë kwatap yawal makare naka hla tak, hwëna syauk mo kim hî-hîti'inka. Desa zep hi san hiri da inek. Hina dekam zep eihya nakon § kal hap jowek.

⁹ Men dekon kal hap jowek, dekore tîngare kirekam-kirekam

otweranna man hëndep kitak juwesik, hen dekore kapal-kapala man kitak êtimbwaw gwëk.

¹⁰ Dan-ahan zini kim sramin zemka gubir aneka, keis yawala dekam zep hëndep nglî nakon ho-nwe ho-nwenak dep zan zaka. Zen seip yawal makan hî-hîti'inka. Dekam zep okamanak de weyana eihya nakon * êkarek gwëk.

¹¹ Keisni in mo bosena "Etekna." Dekam zep hona eihya nakon êetek gwëk. Zini dekam zep beyakam juwek- ho etekna insa de ote gwibin nikon.

¹² Dan-nêr dan-nêr zini kim gubir aneka, hëndep dekam zep yaklana, benna, hen keisni êkarek gwëk. Dekam yakla nwena ahare yaklana dua-blas jam enkam hom zil gwe'anka, hwëna delapan jam enkam zil gwe'anka, dekam zep etan okamana kawesik gwe'ak. Benna, keisni, hen kirekam. Zen hen dekam dua-blas jamkam bêjen êngatan gwen, hwëna delapan jam enkam. Zen kim êngatan gwe srêm gwe-gwëk, dekam sêrkam tangan kawesik gwëk.

¹³ Zao ki zebë etan kara gwëk, dekam zebë mawana heiri sal-blak. Zen gulk tangan en san ihe nasen'an haka, hen man taken nasen gwe'anka,

"Auhu-kamanak de zini, kareksa sa hla nul,

kareksa sa hla nul, kareksa sa hla nul!

Etan ahakore dan-ahare nik de gublun dankam, banakan wêhê êgwê'ak?"

9

Aha-ere taha-tap zini kim sramin zemka gubir anakake:

¹ Hen etan dekam zep aha-ere taha-tap zini gubir aneka. Êe dekam zebë hëndep keisni hla tak- nglî nakon kim kama san dep zan zaka.

† 8:3 8:3 Irase dawem nabare te kil mo gulk sun de enlalana, emki Why. 5:8nak hlaun. ‡ 8:7

8:7 Eihya nakon awe, enlalana satu pertiga. § 8:8 8:8 Eihya nakon awe, enlalana satu pertiga.

* 8:10 8:10 Eihya nakon awe, enlalana satu pertiga.

Dekam zep keisni in hap juwen zi mo bwi kawesinnik dep de kuncina nërblak.*

² Keisni in zep kuncina inkam talusuku- kama hulak de bwi kawesin yala insa. Butna dekam zep kon mam enkam te sok- san de wanga trun syauk butna kiye. Butna in hap zep ngli naban yakla naban ka neisik.

³ Butna in kon zep hwëna lerangna okama san dep tuwehek. Zëbe mae hap Alap sosonsa golzimki- men kirekam dare ëk hap hen golzimkike, dekam de zisi hit ti gwibin hip.

⁴ Zen hom gubiridaka- sona, tenya, hen obwagasa de karek ta gwibin hip. Zen diki zi ensa de karek ta gwibin hip gubiridaka- mensa mirenak Alap onakore capkam al dasibir srëm gwেকে.

⁵ Hwëna tamerankam dep hom gubiridaka. Zen diki sap'nen de karek ta gwibin hip- holona benna aha-ere taha-tap enkam. Sosonna man hen golzimki- sërkam tangan de karek ta gwibin hip denaka. Zëno mae mo hit tinna men kiye- hen dare ëk mo hit tinna.

⁶ Aha-ere taha-tapkam de benna inkam sap sa zini juwen hap ëdwam gwe-gwer, hwëna molya kim juwek. Zen sap sa tin hip ëdwam gwe-gwer, hwëna zëbon mae onakon tin hip dena nama langa tangannak.

⁷ Lerangna in mo nwe-masena, san de kudasa de eijan hap wër tyasibinni kiye. Zëno mae mo nolak, san de emaskam de mire sigisa de alala tanna kiye. Hen zëno mae mo nwe-masena, san de zi nwe-masena kiye.

⁸ Zëno mae mo nol alana, san de kwalbasa nol alana kiye. Zëno mae mo ëk danna, singa ëk sil makan.

⁹ Zëno mae mo bik danna drak-drakna- san de eijan hap de besikam de bitisa ala gunnu kiye. Zëno mae mo si ala aukuna men kiye-kereta kuda beyam-bya de eijannak dep hlu-hluk gwenna.

¹⁰ Zëno mae mo abala dare syakna- men kiye, dare ëkna. Zëno mae mo sosonna zen zëwe- zisi dikim karek ta gwibin hip denaye, holona benna aha-ere taha-tap enkam de karek ta gwibin hip.

¹¹ Zëno mae mo teipsinni hen ki. Zen zen- hëndep de golëjuwen hap de zi niye. Zëno bosena Ibrani olkam "Abadon," Yunani olkam "Apolion." Bose darena in mo enlalana, "zisi de golëliwe gwen hap de Zini."

¹² Dan-ahare karek tabin hip dena insa heiri kira tabirki, † nonol weny mes tap gwenan. Zëno hyanak etan dan-dan sa naptazal.

Alap mo dam taha nakore zini enamna kim sramin zemka gubir anekake:

¹³ Alap mo dam taha nakore zini enamna in ki zep sramin zemka gubir aneka. Dekam zebë ola sak-irase dawem nabare te kilsä de tru tasik gweblan hap de mejana in kon kim te sok. Mejana in zen Alap mo dang nakon nola gwenan- emaskam de syal gwizimdinni, hen dan-nër dan-nërkam de top-top naban. Dan-nër dan-nërkam de top-topna in man gulk sun ëteipsiksek.

¹⁴ Ola in zen kals nakon te sok, zen enamna in zen gubir aneka, desa anakan nenblak, "Empat enkam de dowal yawal-yawala ‡ mensa weyana Efrat mo ananak dahalebik, emki hül ti sonebin."

¹⁵ Dekam zep hül ti sonebirki. Alap yaklana insa orep mes hamal takadekam de hül ti sonebin hip denaye,

* **9:1 9:1** Yohanis man anakan ale gulku, "Keisni in hap nërblak." Zen kim gwë gweka, dekam zini kei'i man enlala nëblanda gwék, "Zen san de zini kiye." Ahaksa zini in zen kuncina zerka, san ha zen diki keisni insa de kara ta gwen hap de Alap mo dam taha nakore zi. † **9:12 9:12** Heiri kim nonol takenbiridaka, zen Why. 8:13nak. ‡ **9:14 9:14** Empatkam de dowal yawala in hap, Yohanis "malaikat-malaikat" kam ale gulku. Hwëna malaikatna an man yap orep Alap onakon ësonon gwék-dowal mo kigi onak de bitä gwen hap. In zep tahalebin nik lowe he'ak. Zep "dowal" kam Orya olkam awe li nul sonek.

zen dikim yaklana dekam en okamanak de zisi eihya hlik naka § golëeijankam tamerasin hip.

¹⁶ Anakan hen ama sak, “Kudakam de eijan hap de zi mo beyana, dua-ratus juta enkam.”

¹⁷ Hen nwe lirisin nënna inkam ëe ama kuda beyam-byana insa hlauludak- hen in zen zëno mae mo tahannak teinikin'ikye. In zen zë teinikin'ik, zen besikam de bajusa alala dak. Ahakon sërkam de kal-kal tangan naka- san de syauk hitinni kiye. Ahakon nglï kailim angantan-angtan makare naka- men kiye, kaso lilingtinni. Hen ahakon yong-yong angantan-angtan naka. Kudana in mo nola, san de singa nola kiye. Hen mip nakon hi nwe mo kim ëbwak ta gwe'ak- syauknu, butna, hen irase karekna.

¹⁸ Sap kudana in zen mip nakon ëbwak ta gwe'ak, zen zep okamanak sang-sang yala hatak, hëndep okamanak de zini eihya hlikna * dekam zep juwesik. Ahakon syauknu in hap juwek, ahakon butna in hap, hen ahakon ase karekna in hap juwek.

¹⁹ Kuda beyam-byana in mo sosonna, zen mipnak hen abalak. Zëno mae mo abala, san de wanya mo nola kiye. Abala in zen dekam zini hit di gwibik.

²⁰ Hwëna zi mosrona men zen sang-sang yala in kon juwe srëm gwëk, zen hom kim tapbla nuk-yang tabin dowal-dowalsa de betek gwibirida gwenna. Zen nama boklana kom dabirida gwëk- sap emas nakon de yang tasin dowal, perakkam dena, tembagakam dena, kaso nakorena, hen tenya korena. Dowal-dowala in sap nwe kara gwen srëmna, hen ol san srëmna, hen ëtë nasen gwen srëmna.

²¹ Hwëna zini in dekam hom mae zëre mae mo karek-karek nakon ëhalek- sap zisi de tamera gwenna, meiyersa de golzauk gwenna, ëkahalo gwe-gwenna, hen

sowëna.

10

Yohanis kim Alap mo dam taha nakore zinik buku betekna gul inkike.

¹ Èe ki zebë Alap mo dam taha nakore zi sosonna ahanaka hla tak-ngatan zi mo lang nakon kim ati gwe'an zaka. Zen but zërati gwezak, hen boge alpna nolak lak gwe heblak. Nwe-masena hen yakla mo kim ngatan gweblaka. Zëno tanana hëndep ik danna men kiye- syauk hitinni.

² Tahakam buku lak gun beteksa gwirensiki, hwëna zen hil sonen nik lwa'ak. Dam tanana hinak zauk ineka. Irgwa tanakam kamanak zauk ineka.

³ Ki zep ol mamkam takenkasinga mo zairin makan. In kim ki Alap mo dam taha nakore zini in takenka, dekam zep ngatan zi mo lang nakon ola mamkam wet soksan de nglï glungna kiye, tuju enkam de tadrenna.

⁴ In kim tujukam de nglï glung makare ola in zausuk, ëe dekam zebë sap ale gun hup enlala gwe'ak. Hwëna anakanë ngatan zi mo lang nakore olsa ahanaka sak,

“Emki tujukam de nglï glung makare ola insa ere en hap aning gun. Bahem ale gun.”

⁵ Dekam zep Alap mo dam taha nakore zini men zen hinak zauku hen kamanak, zen ki zep dam tahana nglï san dep teisya ineka,

⁶ dekam zep ngaya zini Alap mo bosekam gu ineka,

“Alap men Zen kitak yang tabirki, sap nglina, okamana, hina, hen zëwe de kirekam-kirekamna, ëe zëno bosekamë emsa gugubirida'an: Zen molya etan yakla yala insa esek gulku.

⁷ Hwëna Alap mo dam taha nakore zini tujuna in kim de sramin zemka gubir ane'anaka, Zen dekam sa zëre mo kalang gwe gunnu syal gwibiri- mensa orep zëre mo ol

§ 9:15 9:15 “Eihya hlik naka” awe, enlalana satu pertiga. * 9:18 9:18 “Eihya hlikna” awe, enlalana satu pertiga.

ayang gul gwen zi en hap goltrei gwizimkike.”

⁸ Dekam zebë ngatan zi mo lang nakore ola insa etan sak, anakan kim asa tonbla'anka,

“Em buku kwala so gunnu insa de gon hap song gwen- in zen zini in mo tahanak lwa'anke, men zen anakan zau'ura, aha tanakam hinak, aha tanakam kamanak.”

⁹ Ëe dekam zebë hëndep zëbon osan dep song gwëk, hëndep abe tak- zen dikim buku betekna insa abe hap golblan hap. Ki zep asa gubluka,

“Emki gul irin, hëndep twinbir. Mip ennak sap dërek naka esa eisbiri- men kiye, sobwal hona. Hwëna ungala mwanak sa husus gwer.”

¹⁰ Ëe ki zebë zëno tahanak gulink, hëndep twinbik. Mipnak sobwal ho dërek makare nakaë eisbik, hwëna kimë ala gwibik, dekam zebë husus gwibik.

¹¹ Zao zep hen asa nenblak,

“Bukuna insa twinbiri, zëwe de ola insa em etan gol haladan. Sap zen ngein sin de kirekam jowen hap dena- tîngare zi dikim ëtawa gwen hap, sap men-kore men-kore zi ausu, sap kirekam-kirekam sop zi ausu, hen tîngare ol ton gwibin zi ausu, hëndep sap teipsin-teipsin wenya.”

11

Zi dare de apta zan hap de ol:

¹ Ki zep meter blala abe hap nolblak. Zëno blala san de dutena kiye. Ki zep Alap asa gubluka,

“Em ano gol san song gwen hen ngirîn tekson en naka metera inkam akasibli, hen zëwe de kalsna. Hen zini men zen ano bosesa dekon teip gulsublun hap zëwe lowe he'an emki aïtbin.

² Hwëna alp san de teksonna bahem akasibin. Sap desan dena mesë Yahudi srëm zi hip golzimk.

Zen sa Yerusalemsa, ë lalakna ansa, tanakam nyauk gweblal- holona benna 42 enkam.

³ Ëe asa zi daresa teisya soner. Zen kaen glaing-glingsi sa da koso gwera- dekam de goltreizimdin hip, ‘Ëe ama emsa gosa labirida gwe'an.’ Zen Ëre mo olsa sa 42kam de benna inkam ayang ul gwizimdi.” *

⁴ Zi darena in, gulk sun de olkam de guzimdinni, zen tenya zaitun dare, ahaksa lampu dare. Zi darena in Teipsin Tangan Zini Alap mo dang gwën nakon yauk gwenda. †

⁵ Alap sa sosonna zi darena in hap golzimdi. Dekam zi mae de karek son hap alp gwizimdinni, dekam sa zëno nik mo ëk tihî nakon syauknu wet noso gwizim. Zen dekam sa zëre nik mo jal zini insa tru kulsuk gwera.

⁶ Zëno nik mo sosonna hen ki- o dikim il ti gwen srëm hap dena. Zen diki zëre nik mo abe ën enkam de etan il ti gwen. Alap mes kirekam zëbe nikip sosonna golzimki- holona in kim zëre mo ola ayang ul gwe'anka, dekam en dep. Hen zëno nik mo sosonna hen ki- tîngare weyasa dikim kal hap li kul sone gwen hap denaye. Hen okamasa de banakare maekam heip ul gwen hap de zëno nik mo sosonna hen ki- beyana men kirekam zëna dwam eibi'inkaye, kire enkam de heip gun hup.

⁷ Kim de Alap mo olsa de ayang ul gwenna 42kam de benna inkam su kul sone'anka, ki sa hwëna otweran nwe-mase makare dowal yala juwen zi mo lang nakon wet so zala. Zen hëndep dekam sa ziejia zala, hëndep sa zili. ‡

⁸ Zëno nik mo tokna molya n- en nyehanuk, hwëna isrip-sri hap sa ora bolak kamanak nyehal- ë yala in zao zëre nik mo Bianna te-lidak sonnakk makan da inkke. Ëna in, zëno gulk sun de ol blaorankam de

* **11:3 11:3** “42 benna” awe, Yohanis man ale gulku 1.260 yaklakam. † **11:4 11:4** Zaitun te dare hen lampu dare hap de ola, emki Zakharia 4:1-14nak hlaun. Zi darena in, zëno nik mo sosonna ayat 5-6nak awe men kiye hen- Musa ne Elia nik mo sosonna. ‡ **11:7 11:7** Otweran dowal hap de ola, emki pasal 13nak hlaun.

bosena "Sodom," ahaksa "Mesir."

⁹ Dekam tîngare zini sa zëno nik mo tokna karatda noso gwer- yaklana dan-ahan, ahana ngîrîn ngam sonnak. Tîngare zini, sap tîngare zi ausu nakon, hen tîngare îrik gîn lang nakon, hen tîngare ol ton gwibin zi nikon, zen sa kama hulak de zehanun hap ëjalse gwer.

¹⁰ Tîngare auhu-kama zini sa tanggan ëisrip-sri gwer- zi darena in mo tok naka de akenkamyë. Zen zep sa isrip-sri hap gol-gol san twen nasen gwer. Zen mae hap sa ëisrip-sri gwe-gwer, "Ol ayang gul gwen zi darena men zen karekna beyakam nèbe mae hap ol gwizimki, zen mes lîlki."

¹¹ Yaklana kim de dan-ahan nè'ak, ahana ngîrîn ngam sonnak, dekam sa ensasana etan ngaya ën hap dena Alap onakon ing gwe hezim zira. Zen dekam sa etan ngaya ëra, hëndep yaulu. Tîngan men zen de kara noso'ak sërkam tangan sa ëairîl.

¹² Dekam sa zi darena in ola asal sera- ngatan zi mo lang nakon de takenzim ane hanna, "Haen, em se këzan." Zen dekam sa hëndep zëre nik mo jal zi mo nwenak but de teisyä ine hankam se kë sera-ngatan zi mo lang san depye.

¹³ Zen hëndep dekam sa jîngîl yawala karekkam gwëra. Dekam sa ë yala in eiha nakon § timbwas gwera, hen zini tuju ribu enkam sa juwer- jîngîli in konye. Tîngare ahakore zini dekam sa dawemkam ëairîl. Zen dekam sa nglinak de Zini Alap mo bosena teip nulsublul.

¹⁴ Dan-ahare karek tabin hip dena insa heiri kira tabirki, * dan-dan mes tap nënan. Hwëna emki ëkara gwen, aumwa hap de karekna sa nabakam ang gwe kinzil.

Alap mo dam taha nakore zini tujuna kim sramin zemka gubir anekake:

¹⁵ Alap mo dam taha nakore zini tujuna, zen kim sramin zemka gubir aneka, dekam zep ngatan zi mo lang nakon ol mam-mamkam anakan ëton'ak,

"Kitak okamasa de îrik gîn hip dena angkam Eirzi-Bia mo tahanak lwa'an.

Bi zem mes Tane zikhip golblanda-mensa Israelsa de ngaya tabin hip dam tasîkîke,

Zen de hëndep denaban îrik gîn hip."

¹⁶ Dekam zep 24kam de teipsîn-teipsîn wenya in zen Alap mo dang gwën nakon teinikin gwenan ëik gwe hezak, hen Alap hap dawemna anakare ola ban nolbla'ak,

¹⁷ "Bian Alap Soson Zini,

Em in Zen orep gwëka

hëndep angkam namae gwe'ara:

Ëe ama ebe hap dawemsa olbla'an, sap Em angkam ere mo sërkam de sosonkam ema îrik gînkim kon gwesibir hana'ara.

¹⁸ Tîngan men zen Emsa tame da srëm gwëk,

zen man Emsa u sal-sal nè gweblak. Hwëna angkam desa de karek tabin hip denak mes zaunun.

Hen angkam mes zaunun-

Em dikim juwen wenyaka klis gun hup denakye.

Hen Em dikim dawemsa golzimdin hip de yaklanak mes zaunun-

men zen ere mo ola ayang nul gwëk, hen men zen Emsa betek nè gweblak,

sap bose nabare wenya,

hen sap bose srëm wenya.

Hen zisi dikim timbwas gun hup denak

angkam mes zaunun-

men zen okamana ansa karek nul gwëkye."

¹⁹ Dekam zep ngatan zi mo langnak de Alap mo gola dalusuhuk. Dekam zep hen gol mwana in kon petina teipsî'ik- Alap mo zi niban de ol aha-en gun nubare petina,

§ 11:13 11:13 "Eihya nakon" awe, Yohanis man ale gulku "sepersepulu" kam. * 11:14 11:14 Heiri in hap dena, Why. 8:13nak, hen 9:12nak.

mensa Musa Bak hap goltrëblakake. Dekam zep nglï angna zausun srëmkam ayang-ayang gwe song gweka, hen nglina sërkam tadre tineka, hen es kwa-kwakna dekam zep o makan il tika, hen jingil yala dekam zep mam enkam gwëka.

12

Yohanis kim wenya ban jalom yala ban akekake:

¹ Dekam zep nglinak owas yawala jowek, nen dikim zë Alap mo kalangsa tame gun hup. Èe wesyaë hlauk, yakla nwesa bajusa de ala son makan ala sok. Zen bennak zauk ane'ak, hen nolak mire sigisa ala guk- dua-blas enkam de keis nibare naka.

² Wenya in u nuban mes tanggan trï-trï gwesik. Zen man eisbir ane'ak, zep sang-sang hap hërhe gwe'ak.

³ Dekam zep hen aha owasna etan nglinak jowek. Zen jalom makare dowal kal-kal yawal zë joweka- bun tangan nik. Zëno nola tuju enkam, hen nola kore hli-hlina dare taha-tap enkam. Zëno mire sigina hen nol jam en. Zëno kal-kala, san de syauknu kiye.

⁴ Jalomna in abala kim zep nglinak de keisni aha hlikna * kama san dep talal soneka. Dekam zep wenya in mo dang gwën nakon zau'un zaka- in zen eisbir ane'akke. Zen man eissibi'inika- walasna insa de jaha gwennak ala gweblan hap.

⁵ Wenya in zi walassa zep jaha gwëk- Zen de tingare zi aususa tatete tangankam irik gin hip. Hwëna Walasna insa ki zep Alap mo dam taha nakore zi Alap osan dep al dabik- zëre mo komal tumnak dep.

⁶ Wenya in dekam zep zi srëm lang san dep heya gwëk- langna mensa Alap zëbe hap hamal gulbirkike. Zëwe sa Alap mo dam taha nakore zini kara nul gwer- holona benna 42 enkam. †

⁷ Ngatan zi mo langnak dekam zep ëeijak. Alap mo dam taha nakore zi mo teipsinni Mikayel Bak jalomna in han hen zëno taha trï so gweblan zi niban golëeijaka.

⁸ Hwëna jalomna in zep golësin gwe hanaka, dekam zep desa zëre mo taha trï so gweblan zini in han ngatan zi mo lang nakon hëndep golëalsa soneka.

⁹ Jalom yawala insa ki zep hëndep okama san dep hiri da inek. Zen in zen- ëpba wanyana, men zen Adam ne Hawa neka orep boton sokaye, hen men zen tingare okamanak de zi mo enlalana karek san dep li ta sone gwizimniraye. Zëno bosena "Dowal mo Kigi." Aha bosena hen "Zi Golliwe Bak." Desa mes auhukama san dep hiri da inek- hëndep zëre mo taha trï so gweblan wenya ban.

¹⁰ Ki zebë hwëna sak- ngatan zi mo lang nakore ola mam enkam kim ëgu anek,

"Hë'ho! Angkam mes zaunun- Alap dikim zëre mo hlil irin wenyaka ngaya tabin hip denakye.

Alap mes angkam zëre mo sosonna goltreizimdi- dekam de teipsinkim irik gin hip denaye.

Hen mes anakan goltreizimdi, 'Ère mo Tanena an, Mensa Israelsa de ngaya tabin hip gugubirida gwëkke, Zen sa ki teipsili.'

Sap men zen nëno mae mo aya-wal oso-walya

Alap mo nwenak yaklam denaban kam denaban lamang ta gwibirki,

desa mes auhukama san dep nëralsa sonenan.

¹¹ Sap nëno mae mo aya-wal oso-walya

mes dowal mo kigisa Domba Tanena in mo kalkam alo da sonek-

* 12:4 12:4 "Aha hlikna" awe, enlalana "satu pertiga." † 12:6 12:6 "Benna 42 enkam," Yohanis man "yaklana 1.260kam" ale gulku.

hen Alap onakore ol dawemkam.
Sap zen ol dawemna insa tatem
nyaubik,

hen juwen hap hom zënaka nolëinik
gwe-gwek.

¹² In zep tîngare ngatan zi mo lang-
nak de wenya,
em ëisrip-sri gwen.

Hwëna okamanak de wenya hen
hinak de wenya,

em ëngalap gwen,
sap dowal mo kigîna mes ebon mae
osan dep ati gwe ine zala.

Zen angkam man sërkam jal
gwe'ara,

sap zen mes anakan tawa gwer,
'Hare, aumwa hap dena angkam
langanak homke.' "

¹³ Hwëna jalomna in kim tame
gulku, "O hare, asa mes-am auhu-
kamanak dep hiri dak," dekam zep
wenya in zen zi walasna jaha gwek,
desa lun kon goltroka.

¹⁴ Hwëna wenya in hap mawana
heir mo si ala yawalsa desyabik-
dekam de ihen hap, zëbe en hap de
lang hamal gulbin sin dep. Zëwe
sa Alap mo dam taha nakore zini
kara nul gwer, hen jalomna insa sa
langa dasik gwer- holona benna 42
enkam. ‡

¹⁵ Hwëna wenya in desan dep
heya gwek, jalomna in ëk nakon
zep weyasa ho namwa yawal makan
wëk gwibirki- zen de sap dong gun
hup.

¹⁶ Hwëna langna iwe de kamana
man wenya insa mas gwibik. Zen
zep ho namwana insa ala gwibik. §

¹⁷ Dekam tangan zep jalomna in
wenya insa sërkam jal gwibirki,
dekam zep song gweka- wenya in
mo auyan-tane walsya de golëeijan
hap. Zen men zen Alap onakore ol
dawemna tatem nolzauk gwenanke,
Yesussu de zabeblan srëmkam, desa
de golëeijan hap song gweka.

¹⁸ Jalom yala in hi alpnak zep
zau'un zaka.

13

*Yohanis kim hi mwa nakore
otweran nwe-mase makare dowala
hla takake:*

¹ Ki zebë hwëna otweran dowal
yala hla tak- hi mwa nakon kim hata
se'an zaka. Zëno nola tuju enkam,
hen nolak de hlina dare taha-tap
enkam. Tîngare zëno hli-hlina mire
sigi en naban, hen zëno tîngare
mirena Alapsa de lamang tan ale en
naban.*

² Otweran dowala insa hla tak, san
de tutul jal-jala kiye. Zëno tana bol
ongkola blal-blala- san de beruang
tana bol onggola kiye. Utrum danna
san de singa utrum danna kiye. Ki
zep zë hwëna jalom yala in sosen
zemka zëbe hap golblaka- zen de
zëno bose hap kitak teipsinkim irik
gin hip.

³ Otweran dowala in mo aha no-
lak, san de tin hip de nëbok wei
yawala kiye. Hwëna weina in mes
at gwesik. Zen in zep tîngare oka-
manak de zini desa ang në gweblak,
sap man denggwan gweblak.*

⁴ Dekam zep jalom yala in hap
boklena kom da gweblak- men zen
zëre mo irik ginni otweran dowala
in hap golgublukaye. Hen otwer-
anna in mo bosena anakan teip nul-
suk gweblak, "Ahana hom tangan
otweran dowala an han de apde
ënna. Desa toton nara dep?- zerei-
jan naye."

⁵ Alap man otweran yala in
hap golblaka- dekam de zen 42
ben enkam irik gin hip. Alap
Zëna dekam nwe enkam zë kara
ta gweka- kim dowala in zënaka
boltere ta gweka, hen Alap Zënaka
kim lamang ta gwekaye.

⁶ Zen dekam Alapsa sërkam
lamang ta gweka. Hen zëno gwë
gwenna man lamang gul gweka.

‡ 12:14 12:14 "Benna 42"na awe, desa Yohanis man ale gulku "tahunna dan-ahan, ahana ngirîn ngam sonnak." § 12:16 12:16 Yohanis zi makan okamana ansa kara gulku. Zep anakan awe ale gulku, "Okamana ëksa nga sok, desan zep ho namwana insa ala gwibik." * 13:1 13:1 Why. 11:7; 17:7-9 * 13:3 13:3 Why. 17:9-13

Hen tingan men zen ngatan zi mo langnak lowehe gwenan, desa hen man kitak laman ta gwibirki.

⁷ Otweran dowala in dekam zep Alap zere mo irik gin wenyaka golëeija gweka, hëndep timbwas ta gwibirki. Hwëna Alap dekam nwe enkam zë kara ta gweka. Zen zao nwe enkam ki kara ta gweka-kim kitak bi gwibirki, sap tingare zi ausuna, tingare irik gin langna, tingare ol ton gwibin wenyä, hen tingare sop zi ausuna.

⁸ Tingare auhu-kamanak de zini sa otweranna insa betek në gweblal. Diki ahakon men zëno mae mo bosem-sesa Domba Tanena in mo bukunak ale dabir-zimk, zen molya. Sap zëno mae mo bosem-sena orep mes hëndep de ëngaya gwen hap de wenyik mo bosemse nabare bukunak ale dabir-zimk-auhu-kamana ansa de yang gulsun srëmnak. Hwëna dekam zep Domba Tanena in zëno mae mo kareksa de ngan gulsuzimdin hip tilki.

⁹ Zen in zep, eme i niban lowe he'anam, emki ësane gwen!

¹⁰ Kristus hup de jal hap de emsa bwina yal gulnen hap de wenyä,

emsa sa ki yal nulne gwer.

Nëbokkam de tameran hap de wenyä,

emsa hen nëbokkam sa damera gwer.

Zen in zep, Alap mo hlil irin wenyä, em Yesussu de taïbliblannak tatem ëzauk.

Yohanis kim kama mwa nakore otweran dowala hla takake:

¹¹ Ki zebë etan aha otweran dowala hla tak- okama mwa nakon kim wet so'an zaka. Zëno nola kore hlina dan-dan- san de domba mo nolak de hlina kiye. Hwëna zëno zairinni, jalom yala in mo zairin niban apdenak.

¹² Hi mwa nakore dowala in zere mo sosen yawala kitak zep bohë gulbluka- kama mwa nakon de wet son dowala in hap. Dekam zep

zen zere mo nwenak okamanak de zini kitak tik-tik ta gwibirki- dekam de hi mwa nakore dowala in hap boklesa kom ta gweblan hap. Hi mwa nakore otweran dowala in, zen in men zëno nolak de nëbok wei yala at gwesiblikke.

¹³ Okama mwa nakon de wet son dowala in, zen hen owas-owasna tingare zi mo nwenak mamkam syal gwe-gwibirki. Zen hen syauksu gubirki- ngli nakon de kamanak dep ati gwezan hap.

¹⁴ Sap zen owas-owasna insa hi mwa nakore dowala in mo bose hap syal gwe-gwibirki, dekam zep auhu-kamanak de zisi anakare ola ban yasik ta gwibirki, "An Zen tangan- nëno mae mo Alap naye." Zëbe nikip de yaklana hom tap gwe'anka, zep Alap nwe enkam kara so'anka. Okama mwa nakon de dowala in hen man yang tasin dowalsa de syal gweblan hap gubiridaka- nonol otweran dowala in mo nwe-masekam, dekam de nëbok wei nakon de dawem gwen zini insa blikip gwesiblin hap.

¹⁵ Kim yang tasin dowala insa syal neisiblik, ki zep okama mwa nakore dowala in gulbluka, "Em ensasa gwen." Dekam zep hëndep ensasa gweka, hëndep ola ton'anka. Yang tasin dowala in dekam zep hen tameran hap gubiridaka- men zen zënaka de blikip gwesiblin hap baes ta'akke. Dekam hen Alap nama nwe enkam kara tabi'inka- dan-ahare dowala in saye.

¹⁶ Kama mwa nakore dowala in hen tingare zisi tik-tik ta gwibirki- nomorsa de zere mae mo dam tahanak ahaksa mirenak makan tabir-zimdin hip. Zen tingare zisi tik-tik ta gwibirki- sap mamna, betekna, kire-kire beya wenyä, hen tahalha wenyä, sap zi mo tana iltikinnik lowehe gwen wenyä, hen sap kirenak de lowehen srëm wenyä.

¹⁷ Dekam, nomorkam de ale tabiri-dan srëm wenyä, zen bëjen kire-kiresa tokonak gon, hen ba maena bëjen pasarak lirak gun. Nomor-

nomora in, zen gulk sun de ol blaoran makan. Zëno dam gulsunnu, hi mwa nakon de wet son dowal yala in mo bose, ahaksa zëno bose hap de nomor.

¹⁸ Zen in zep, enlala blal wenya, zen en sa dowala in hap de nomora in sa dam nulsuk gwer. Sap nomora in mo dam gulsunnu, zi mo bose. Nomora in, zen 666.

14

Alap mo Domba Tane hap de ol, hen zëno bi gwibiridan wenya kip dena:

¹ Kimë zë nama kara gwe'ak, ki zebë hwëna Domba Tanena hla tak. Zen Yerusalemk de kwatapna Sionk zauk ane'anka, hen zi beyam-byana 144 ribu enkam zë golëzau'unka. Zëno mae mo mirenak mes Eirzi-Bia yawal mo bosena ale dabir-zimk.

² Ki zebë hwëna nglï san aukuna salsek- san de ho li yawal mo aukuna kiye, ahaksa san de nglï de mamkam tadren aukuna kiye. Hen san de zi beyam-bya mo jublandan gitar aukuna kiye.

³ Zi trana in Teipsin Zini Alap mo nwenak tër ësesa da'ak. Dan-ner dan-nerkam de otweranna hen 24kam de teipsin-teipsin zini in hen man ësane gwe'ak. Zëno mae mo terya in aha zi hom tawa nëblak hen bëjen tan. Diki 144 ribukam de zini mensa auhu-kama nakon Domba Tanena in ngan tasibirkike, zen en tawa nëblak, hen zen en de ta gwen hap dena.

⁴⁻⁵ Zi trana in, zen lalak enna, sap zen hom boton alap-alapsa ang neibirida gwek hen hom ëkahalo gwe-gwek. Zep zen Alap mo nwenak san de zi nungglina kiye. Zëno mae mo mip nakon boton ola hom tangan wet sok. Zen enho kles gwesin srëmna. Insa kirekam ëlalak gwek, in zep Eirzi-Bia yawal hon zëno mae mo bosem-sena sërkam ëdawem gwek- tïngare ahakore wenya konye. Zen zep Domba

Tanena in sa ang në gweblanan- men desan ki të gwendaye. Sap zen zen- zëre mo kalkam de ngan tasibin wenyaye.

Alap mo dam taha nakore dan-ahare zini kim hlauludakake:

⁶ Ki zebë hwëna etan ahana Alap mo dam taha nakore zini hla tak. Zen man gulk tangan san ihe nasen'an haka. Zen Alap onakore ol dawemsa gol ha'an zaka, hen ol dawemna in hëndep denaban sa lwa gwer. Ola in tïngare okamanak de zi ausu hap dena- sap tïngare sop nwe-mase zi ausu, hen tïngare kirekam-kirekam ol ton gwibin zi, hen sap tïngare irik gin langnak de zi hip dena.

⁷ Zen ol mamkam gu ane gwe'anka,

“Alapsa em aïriblan, hen zëno bose ensa em teip gulsuk gweblan, sap angkam mes zaununm- Zen dikim zisi klis gun hup denakye. Boklena kom la gweblak- men Zen nglïna, kamana, hina, hen ho nwena kitak yang tabirkiye.”

⁸ Etan ki zep hwëna ahanik Alap mo dam taha nakore zini zertro kïnzika. Zen man anakan isrip-sri gwe ine nasen gwe'anka,

“Ë yala Babel mes timbwas gwera! Mes timbwas gwera- men zen tïngare zi aususa kahalo soston enkam dikim lowehe gwen hap mamak ta gwibirkike, san de ho mamaksa de otdebinni kiye. Zen zep Alap ë yala in sa kareknak drënera.”

*

⁹⁻¹⁰ Etan ahanik zertro kïnzika, ki zep ol mamkam gu ane zaka,

“Zini men zen de otweran dowal yala in sa blikip neisibli'ak, hen zëno nwe-masekam de yang tasin dowala in sa, desa hen sa Alap kirekam de kareknak kang gulu. Hen kirekam, men zen dowal yala in hap de nomorsa zëre mae mo mirenak ahaksa tahanak ale dabi'ik, desa hen sa kirekam de kareknak kang

* **14:8 14:8** Ë yala “Babel ”kam, Yohanis ë yala Roma mo bolesa gol ëweka. Emki 1Ptr. 5:13nak baca gun, hen zao de otde ale naban.

gulu. Zen kitak sa Alap onakore h p nabare zitan hona notdebir, h ndep Alap mo jalak sa lowehe gwer-s rkam de syauk bla sal-salak. † Zao sa Domba Tanena in Alap mo dam taha nakore zi niban zikara ta gwibiri.

11 Syauknu in zen de karek ta gwibi'ik, z no butna h ndep denaban sa sewese gwer. Ni tanna banakan dep, sap zen kam denaban gw ram denaban zausun sr mkam sa Alap mo jalak lowehe tine gwer. Sap zen otweran dowal yala hen z no nwe-masekam de yang tas n dowala in han blikip neis k gwizimk, hen z be hap de nomorsa z re mae hon ma-makan dabik."

12 Zen in zep, Alap mo irik g nnik de bit  gwen weny , em tatem  zauk. Alap mo ol san de ang ta gwennak hen Yesussu de taibliblannak, z we en em tatem  zaun.

13 Ki zeb  hw na ngatan zi mo lang nakore ola etan salsek- ahanik kim anakan gu aneka,

"Ansa emki ale gun: Angkam man kon gwes k hana'an, hen h ndep kirekam sa lwa zahe gwer. Tingan men zen Bian Yesus onak de tatem  zaunnuk juwe gwe'ak, zen h 'ho gwibinnik sa lowehe gwer."

Ki zep hw na Alap mo Enhona ding gulbluka,

"In eiwa! Zen sa z re mae mo syal dohon-honna nolzausul. Zen hw na h 'ho gwibinnik sa lowehe gwer, sap z no mae mo syala kore eini awe sa mamkam nulin gwer."

Yohanis kim okamanak de Alap mo nganak de ei nika tarannak kara tabirkike:

14 Ki zeb  etan hlauk- but ngapngapna kim wet so k nzik. But tahanna iwe zen nikin ane'ankasan de Zi Tanganna kiye. ‡ Nolak emaskam de mire sigisa ala gulku. Tahakam n bok gwa benbensa gwirenka.

15 Ki zep hw na ahanik Alap mo dam taha nakore zini ngatan zi mo langnak de Alap mo gola kon te so zaka, ki zep but tahannak de Zini insa takenblaka,

"N bokna inkam emki okamanak de gandum dansa taran, sap mes bil gwera hen taran hap denak mes zaul."

16 Ki zep butnak de Zini n bokna inkam okamanak de eini tanka.

17 Ki zep hw na ahanik Alap mo dam taha nakore zini te sok n zikangatan zi mo langnak de Alap mo gola kon. Zen hen n bok gwa benbensa gwirensi'inka.

18 Ki zep hw na etan ahanik Alap mo gol homannak de kals alp nakon te sok n zika- men zen kalsnak de syauk blana kara ta gwendake. § Zen ki zep ol mamkam n bok gwiredan zini insa takenblaka,

"Okamanak de angguru mes bil gwera. Emki taran."

19 Dekam zep n bokna inkam okamanak de anggur danna tim nikon blom tan daka, ki zep kaso hul gunnuk yal ta seka- zao de tanakam de zaublun dankam na tan hap. Alap orep mes kaso hul gunnu insa hamal gulku- men zen z re mo jalak lowe he'akke, desa de z  karek tabin hip.

† 14:9-10 14:9-10 "S rkam de syauk bla sal-sala" in, desa "belerang" kam Amber olkam li nul sone gwenan. Belerangna zen lau-lau kire-kire, yong-yongna, hen desa de syauknuk tul sonenkam, nabakam hitil gwenan hen sal-sal gwe-gwenan. Z no asena karek tanganna. ‡ 14:14 14:14 Yesu Z naka Ibrani olkam "anak manusia" kam gu gweblaka. Desa Orya olkam "Zi Tangan" kam li nul sone gwenan, sap Ibrani olkam "walas" kam de enlalana z we hom. Yesus kirekam Z naka gu gweblaka, sap Zen man enlala gweka- men dekam Daniel Bak hamal hap Z naka ngatan zi mo langnak hla takake. Daniel man anakan (Dan. 7:13-14) ale gulbluka, " e ama ngatan zi mo langnak zisi hla tak- san de zi tanganna kiye." Ahaksa, san de "anak manusia" na kiye. Zep hen kirekam, zini mensa Yohanis but tahannak hla taka, san ha totore zi tangan? San ha Yesus Z naka mes yap? § 14:18 14:18 Kalsnak de syauksu de kara ta gwen hap de dam taha nakore zini in hap de ola hen ki- Why. 8:3-5nak.

20 Anggur danna in ë yala in mo alpnak tanakam de zaublun dankam na dak, dekam zep kon zi kala ho mo kim tinek- langana 300 kilometer enkam. Olk san dep de akabinkim, tatekna dua meterak man golek de gwek.

15

Yohanis kim Alap de aumwa hap okamasa timbwas gunnuk hlaukuke:

¹ Ki zebë hwëna etan sërkam de owasna ngatan zi mo langnak hlauk, hëndep ama tenggwanbi'ik. Ëe Alap mo dam taha nakore zisië tuju enkam hlauludak. Alap mo golak ëzau'uk. Zen Alap mo aumwa hap de timbwas gunsu okama san dep kap nul ha'anzak. Aumwa hap de timbwas gunnu in mo hyanak, zen dekam sa Alap mo zi hip de jala zausul.

² Ki zebë hwëna hi yawal makare naka hlauk. Zëno nwe-masena san de syauk nuban de siri nën kacana kiye. Hi alpnak iwe zini man ëzau'uk. Zen men zen hi mwa nakore otweran dowala insa * hen zëno nwe-masekam de yang tasin dowala ban betek neizim srëm gwekke, hen otweran dowala in mo bose hap de nomora insa hwa nulsukke. Zen gitar makare naka deirensi'ik- mensa Alap kap tazimkike.

³ Zen man Alapsa de isrip-sri gweblan hap de tërsya da'ak- men kirekam hen Israel mo auyan-azana dakke, in kim Musa Bak gwiswe sonekake. Tërya in hen Alap mo Domba Tane hap man dakasti'ira. Zen a kirekam mo da'akye:

“Bian Alap Soson Zini,
eno syal gwibinni dawem enna hen mam tanganna.*

Em tïngare zi ausu mo Teipsinni.
Eno enhona dam-dam enna,
hen Em taïbli'iblan tanganna.*

⁴ Bian, Emsa nara dep?- aïri'iblan srëm naye.*

Hen nara dep?-

eno bosesa de teip gulsublun srëm naye.

Sap Em en tangan lalakna.

Tïngare zi ausuna dawemsa de ebe hap gol gweblan hap sa yaïng gwe-gwezal.

Sap angkam mes dam gwesinïn:

Eno zisi de syal gwibinni dam-dam en tangankam.”*

⁵ Zen kim hya gwesik, ki zebë hwëna akeseke: Ngatan zi mo langnak de Alap mo gola talusun nik lwa'an haka- men dekon tangan Alap Zëna irik gil gwenan halake. Gol mwanak iwe hen deyolkam de gola ama zë hlausek- men kire naka hen orep Alap Musa Bak hap goltrëblakake.

⁶ Tujukam de Alap mo dam taha nakore zini in dekon zep tujukam de aumwa hap de timbwas gun nuban nolëte so gwezak. Zëno mae mo pakeanna ngap-ngapna hen angtan-angtanna. Zëno mae mo emaskam de bitina dak-dakna, hëndep bik dannak hatak.

⁷ Dekam zep dan-nër dan-nërkam de otweran makare zini in ahanik emaskam de pancina zëbe mae hap kap tazimki. Pancina in mes Alap mo jalkam ëbeya gwek- hëndep de gwën Zini Alap mo jalkam.

⁸ Alap man dekam zëre mo ngatanna hen sosonna sërkam goltreizim'inka, zen in zep dekam zëno gola in butna sërkam taïl gi'inka. Zep dekam zini toton banakan dep?- gola iwe de tinni, tujukam de timbwas gun hup dena insa de okama san dep hlei yulsuk irin srëmnakye.

16

Yohanis kim hamal hap hlaukuke- tujukam de Alap mo aumwa hap de timbwas gunnu insa:

¹ Ki zep Alap zëre mo gol mwa nakon ol mamkam gubiridaka:

* 15:2 15:2 Why. 13:1-8 * 15:3 15:3 Kel. 15:1; Mzm. 111:2 * 15:3 15:3 Mzm. 145:17 * 15:4 15:4 Yer. 10:7 * 15:4 15:4 Mzm. 86:9-10; Yer. 10:7

“Tujukam de Abon onakore jala bare panci hona insa em okama san dep hlë-hle tasik irin.”

² Nonol zini ki zep hëndep gwë halka, ki zep hëndep panci ho zemka okama san hlei yulsuk inki. Dekam zep tingare zini men zen otweran dowal yala in mo nomora mirenak ma-makan dabik ëkwæ-kwæ gwëk, hen men zen yang tasin dowal zem insa betek në gwëblakke.

³ Zao de zini ki zep hen panci ho zemka hinak hlei yulsuk inki. Hina dekam zep kal kakak hap jowek- san de zi tok mo kala kiye. Dekam zep hinak de kirekam-kirekam otweranna kitak juwesik.

⁴ Zao de zini ki zep hen panci ho zemka weya-weya san hen honwe honwe san hlei-hli guludaka. Tingare weyana dekam zep kal hap ëjowendak.

⁵ Ëe dekam zebë Alap mo dam taha nakore zisi ahanaka salblakmen zen tingare weyana irik gili dakake, zen kim gu aneka,

“Hare eiwa, Alap Em in Zenkenho dam-dam Zi niye. Em angkam gwë'ara hen orep mes gwëka. Karekna ansa tak gulzim innira man tangan dakastilin.

⁶ Zen mes ere mo hlil irin wenyik mo kala hen ere mo olsa de ayang gul gwizimdin hip de zi mo kala hlei-hli nul gwëk, zep angkam Em kalsa de otde gwibin hibe gubiridanda. Kirekam man tangan zëbe mae hap dakastilzimmnin.”

⁷ Ki zep hwëna zi beyam-byana men mo ola Alap mo golak de te kil tru tasik gwëblan meja iltikin nikon anakan wet sok,*

“Bian Alap Soson Tangan Zini, eno auhu-kama zisi de karek tabinni airis tangan, hen man tangan dakastilin!”

⁸ Hwëna ki zep dan-nër dan-nër zini panci ho zemka yakla nwenak hlei yul guku. Yakla nwen dekam zep sèrkam tangan sal-sal gwëka-

zëno sal-sala in hap dikim zi sop nik ëtaiblin-taiblin gwen hap.

⁹ Dekam zep hëndep zini yakla sal-sal hap sopna ëtaiblin-taiblin gwëk. Zen dekam zep hen Alap mo bosena lamang nul gwëk, sap Zen Zen karek-karekna insa lup gul sonezimki. Zen man ki sap karekna insa noltowe gwëk, hwëna hom kim zëre mae mo karek-karek nakon ëhale gwë'ak, hwëna zen dekam hen bëjen Alap mo bosena anakan teip gulsublun “Alap, Em eiwa teipsin tanganna.”

¹⁰ Hwëna aha-ere taha-tap zini in ki zep panci ho zemka otweran dowala in mo irik gin ë yalak hiri gul inki. Dekam zep tingare otweran dowala in mo irik ginni kawesik. Zëno irik gin zini dekam zep airin hip en sunu ëjak-jak gwëk,

¹¹ hen dekam zep etan ngatan zi mo langnak de Teipsin Zini Alapsa lamang da gwë'ak, sap kawesinni inkam zëno mae mo kwæ-kwæna sèrkam ësang-sang gwëk. Hwëna zen dekam hen hom tapbla nuk-zëre mae mo kirekam-kirekam jal-jal gulin hala seran naye.

¹² Zao de zini ki zep hen panci ho zemka weya yawala Efrat mo ananak hlei yul guku. Weyana in dekam zep sasa gwëk. Zen mae hap ki lwak: Eijannak dikim yakla hata sezan nakon teipsin-teipsin nik yaing gwezan hap.

¹³ Hwëna dekam zebë dan-ahare dowal karekna hlauludak. Zëno mae mo nwe-masena san de blina kiye. Ahana jalom yala in mo ëk mwa nakon wet so zaka, ahana hi mwa nakore otweran dowal yala in mo ëk mwa nakon wet soka, hen ahana okama mwa nakore dowala in mo ëk mwa nakon wet soka- in zen boton gwëkake, “Ëe an Alap mo olsaë ayang gul gwizim'in.”

¹⁴ Bli makare dowal-dowala in mae hap dena: Zen de owas-owassa syal gwë-gwibin hip. Zen sa tingare langnak de teipsin-teipsin zi nik dep tagal gulsundan hap sek gwenda

* 16:7 16:7 Why. 6:9-11; 8:3-5

gwer- dekam de Alap mo yakla yawalak Alap zère han zereijan hap.

¹⁵ Emki èenlala gwen Yesus mensa hamal hap anakan gu-gubirida gwekake,

“Èe sowë zi mo kim asa hatazal! Em in zen salok-salokkam asa kara è gwebla'an, em hë'ho gwibinnike lowehe gwe'an. Hen kirekam- em in zen Asa de hut tu ane gun hup dawemkam kara è gwebla'an. Ere mae mo pakeanna dawem enkam kara la gwibik. Ki hwëna mumuk ennak de Asa hut so gublunkam, ki irkan esa sahera ban èzaul.”*

¹⁶ Bli makare dan-ahare dowala in dekam zep okamanak de teipsin-teipsin wenyaka eijan hap tagal nulsuk- lang bosena Ibrani olkam “Harmagedonk.”

¹⁷ Zao ki zep Alap mo dam taha nakore zini tujuna panci ho zemka okamanak de asesanak hlei-hli gulu daka. Dekam zebë etan Alap zère mo ola sak- ol mamkam kim gu aneka,

“Ano jala angkam mes tap gwe henan.”

¹⁸ Dekam zep nglï angna zausun srëmkam ang ta tineka, hen nglïna sërkam tangan tadre tineka, hen sërkam de jingil yala dekam zep gwëka. Nonol zi yang tasin nikon, hom mae kirekam de jingili gwëka. Jingili in karek tangankam dena.

¹⁹ È yala Babel † dekam zep hlang-hlang gwenkam hëndep dan-ahan nek, hen okamanak de tingare langnak de è-ëna kitak zep ètimbwas gwek. Sap tingare è-ënak de zini mes è yala Babelk de zi mo kim karekna nulin halasen gwek. Zëno mae mo karekna man tangan taman kinik, in zep Alap kirekam zère mo jala bare wiklom hona in sa de otdebin hip golzimki.

²⁰ Jingili in hap zep tingare hinak de kama-tek kama-tekna langa san

dep èese-sek gwek, hen tingare kwatapna hen man èjek-jak gwëka.

²¹ Dekam zep es kwak yawal-yawala o makan il tika- zisi dikim karek tabin hip. Aha-ere kwakna zëno dohonna lima-pulu kilogram enkam. Zini dekam zep Alapsa lamang dakinsa es nabare ona sërkam il tikake.

17

Gulk sun de ol blaoranna an, kahalo sosen we yawal hap dena:

¹ Zen kim hya gwesik, ki zep ahanik in zen tujukam de Alap mo jala bare panci hona okamanak hlei-hli dasibirink abon onak hata zaka. Ki zep zë asa gublu zaka,

“Haen. Èe asa kahalo sosen we yawalsa ebe hap goltrëblal- men desa sa Alap sërkam karek guluke.” Hwëna eiwakam de kahalo sosen wesya hom enlala gwibirki. Hwëna è yawala Babelsa ki enlala gweblaka- in zen weya yawal alpnak lwa'arake.

² Auhu-kamanak de teipsin-teipsin weny man zëno mae mo lowehen san ang ta gwek- boton yang tasin alap-alap osan dep de ang ta nasen gwenkam. Zep zen Alap mo nwenak man lowehék- san de kahalo sosen we walya kiye. Bëjen aha-ere zi niban èn. Okamanak de zini dekam zep desan ang ta gwek, hëndep zep èmamak gwe-gwek- san de ho mamaksa de otdebinni kiye.

³ Ki zep hëndep Alap mo Enhona asa bi gweblaka, dekam zep hëndep Alap mo dam taha nakore zini in asa zi srëm lang san dep zersong gwëka. Zao zebë weny hlauk. Otweran dowal tahan dannak nikin ane'ak. Otweranna in, zëno sopna, ok eis kal-kal makarena, hen zëno timni Alapsa de lamang tan bosemse alekam mes sowehek. Otweranna in mo nola tuju enkam, hen nolak de hli-hlina dare taha-tap enkam. *

* **16:15 16:15** Salok-salokkam de lowehe gwen hap dena, emki Luk. 12:35-48nak hlaun. Pakean dawem mo dam gulsunnu, emki Why. 19:8nak hlaun. † **16:19 16:19** È yala “Babel” kam, Yohanis è yala Roma mo bosesa gollëwëka. (1Ptr. 5:13; Why. 14:8-11) * **17:3 17:3** Kirekam de dowal hap de ola emki Why. 13:1-8nak hlaun.

4 Wenya in bajuna hen ok eis kal-kal makare naka ala sok- sam dan kil makare naban de siri nen naka. Hen zen mes serkam wer gwek- emaskam, kirekam-kirekam kaso lilingtin niban hen sasyan naban. Tahakam anggur ho nabare sondosa zirensik- emaskam de syal gwibin nika. Hwena zen anggur ho tangansa hom. Hwena zeno dam gulsunnu, zere mo kirekam-kirekam karek hen zere mo kahalo-kahalo nakore karek.

5 Mirenak de alena hen kikanakare gulk sun de ol blaoran naban, "Ee an Babel Bak, tingare swi sosen hen kahalo sosen wenyik mo ane."

6 Ee dekam zebë tame guk, "Zen ansa anggur hona otde gwenan, zen anggur ho tangansa hom. Zen zi kalsa otde gwenan. Kala in Alap mo irik ginnik de bitu gwen wenyik mo kal- mensa Yesus hon de tatem ezauk gwennak damera gwেকে. Wenya in zep gwë gwenan- san de ho mamaksa de otde gwenna kiye."

Kimë zë wenya insa kara gu'uk, ama zë serkam tenggwanbi'ik.

7 Hwena Alap mo dam taha nakore zini in ki zep asa gubluka,

"Em basae tenggwanbi'ira! Zen in gulk sun de ol blaoran makan. Hwena ee anik dawemkam ebe hap srip gulsubluk- nol beya nabare otweran dowal yala in hap denaka, hen wenya in zen zëbon nikin ane'anke, zëbe hap denaka.

8 Otweran dowala in orep man sap okamanak ngaya gweka, hwena angkam hom. Zen nabakam sa etan juwen zi mo lang nakon sewese zala. Okamanak de zini hla tankam sa denggwanblal, sap zen jek-jak gwen nakon sa etan jowe zala. Hwena Alap mo Domba Tane sa nabakam etan hëndep denaban timbwas tala. Tingare zini molya dowala insa denggwanblak. Hwena

diki auhu-kamana ansa de yang gulsun srëmnak men zëno mae mo bosem-sesa ale dabir-zim srëm gwék hëndep de engaya gwen hap de wenyik mo bosemse nabare bukunak, zen zen en sa denggwanblal.

9 "Enlala blal wenya, zen en sa otweran dowala in hap dena dam nulsuk gwer: Tujukam de nola, zëno dam gulsunnu, zen tujukam de kwatap bete-tek, men zëwe wenya in nikin gwenanke. † Tujukam de nola in hen, zëno aha dam gulsunnu, tujukam de teipsin-teipsinni.

10 Teipsin-teipsin wenya in, aha-ere taha-tap enkam mes juwe gwék. Ahana nama irik gi'ira, hen ahana nama hom hata'ara. Zen kim de hata'an zaka, zen hen molya holokam irik gilki, ki sa hen tili.

11 Hen otweran dowala in zen de juwen zi mo lang nakon etan ngaya gwen hap sewe se'an zaka, zen kim orep gwëka, zen tujukam de teipsin wenya men zen lowehe gwék, dekam hen man teipsinkim gwëka. Zen zëno mae mo ahana. Zen kim de etan jowe'an zaka, zen sa etan dekam teipsinkim irik gili. Zep sa tim dir, 'An teipsinni delapanna.' Hwena zen hen molya holo gweka, ki sa hen timbwas gwera.

12 Nola kore hli-hlina insa dare taha-tapakam hlaludala, zen hen dare taha-tapakam de teipsin-teipsinni. Zen angkam nama hom irik ni'in, hwena zen otweran dowala in mo alp nakon sa srënsrënkam de langnak irik nilidal. Hwena zen hen holokam molya irik nilidak. ‡

13 Dare taha-tapakam de teipsin-teipsin wenya in, zen sa enlalana aha-en dal, hëndep zep sa zëre mae mo irik ginni otweran dowala in hap tapbla nulblir.

14 Otweran dowala in sa Alap

† 17:9 17:9 Otweran dowala insa de dam tasinni, zen etan e yala Roma, sap Romasa zen tujukam de kwatap tahannak gola daublu anek. ‡ 17:12 17:12 Yohanis man awe ale gulku, "Zen aha-ere jam enkam sa irik nil." Zëno gulk sun de enlalana, "Zen molya holokam irik nik."

mo Domba Tanena in han zereijala. Hwëna Domba Tanena in zëre hon de ang ta gwen wenya ban sa zitimbwas tabiri. Sap Domba Tanena in Zen- Teipsin Zini Bian. Hen Zen tingare teipsin zi mo Teipsinni. Men zen Desa ang nëbla'an, zen Zëna mensa hlil inkike hen kwang guludakake, hen men zen Zëbon onak tatem ëzaukke."

¹⁵ Ki zep etan Alap mo dam taha nakore zini in asa ë yala Babel hap denaka gubluka,

"Weya yawala insa kahalo soson wenya in mo alp san hlaulu,* zen hen weya tangansa hom. Zëno dam gulsunnu, zen tingare zi ausu, tingare kirekam-kirekam sop nwe-mase zi ausu, hen tingare kirekam-kirekam ol ton gwibin zi ausu.

¹⁶ Hwëna otweran dowala in hen nola kore hli dare taha-tap zem in han sa lamkam kahalo soson wenya insa jal neibir, hëndep zen sa zëno kire-kirena alal dabir hen sa irkare nul. Zen sa hëndep zëno ninni dwinbir, hëndep tokna syauknuk sa ang nulsul.

¹⁷ Zen Alap Zën sa kirekam de enlalana ing ta sonezimdi- zëre mo dwam gwibin sin dikim syal gwibin hip. Zen in zep sa dare taha-tapakam de teipsin-teipsin wenya in zëre mae mo irik ginni otweran dowala in hap tapbla nulblir. Zen dekam otweran dowala insa sa betek nëblal, hëndep mensa Alap kirekam de syal gwibin hip hamal hap gubiridaka mes ki su nulsonek.

¹⁸ "Hen kahalo soson wenya insa hlaulu, desa de dam gulsunnu, zen ë yawala in zen langna beyakam irik gi'inke." §

18

Yohanis kim hamal hap hlaulukuke- ë yala Babel de timbwas gwen hap dena:

¹ Ki zebë hwëna etan Alap mo dam taha nakore zini hla ta guk-

ngatan zi mo lang nakon kim ati gwe'an zaka. Zëno sosonna mam tanganna, hen zëno timni ngatan tanganna. Dekon okamana hëndep man tangan ngatan gwek.

² Ol mamkam zep isrip-sri naban gu ane zaka,

"Ë yala Babel mes timbwas gwera. Zen mes timbwas gwera-men zen bolte-bolte gwe-gwekaye! Angkam kirekam-kirekam dowal-dowal karek-karek en zë lowe he'an- hen kirekam-kirekam mawa karek-karek naban, zini mensa hwa dasik gwibirinke.

³ In airis, sap tingare zi ausuna mes ë yala in mo lowehen karek san ang ta gwek, in zep ho maksa de otdeblanda gwen makan emamak gwe-gwek. Zen zëre mae mo boton yang tasibin alap-alapsa de ang gwibirida gwen hap wanwan da gwibik. Zep tingare zi ausuna mes Alap mo nwenak ëkun gwek- san de kahalo soson we walya ban de swi ëna kiye. Okamanak de teipsin-teipsin zini, hen kire-kiresa de lirak ta gwibin hip de zini man ë yala iwe kire-kirena lirak da gwibik. Zep ë yala in mo sërkam de hole-hle nakon, zëno mae mo te-alana ëbeya gwe-gwek. Zep zen ë yala in mo lowehen karek san ang ta gwek."

⁴ Ki zebë etan ngatan zi mo lang nakore ola salsek kim anakan gu aneka,

"Haen, ëre mo bi gwibin wenya, em dekam ëna in kon wet so gwek! Zëno mae mo karek-karekna in mana ebon mae onak hliminnink, hen kareksa ema apdekam deban mae hla kulink!

⁵ Sap ëna in mo karek-karekna man tangan bwang gwenkam nglinak de hatan hap alp gwe'an, hen Ëë ama zëno mae mo kirekam-kirekam jal-jala aïtbir-zim'in.

⁶ Men kirekam ëna iwe de zini ëre mo wasalna karek da gwibik, dikire desa hen kirekam karek dabik, hwëna zëbe mae hap etan sërkam

* 17:15 17:15 Why. 17:1; 16:19 § 17:18 17:18 Yohanis kim ansa ale gulku, Roma dekam langna beyakam irik gik.

mas ulzimk. Zen hëp nabare wik-lom hosa aha zi hip nol gwizimk, zep dikire zëna hen kiresa sërkam tangan notdebik.

⁷ Zen man menkam ëbolte-bolte gwe-gwek, zep angkam zëno mae mo enlalana dikire dowe hana gwek. Zen menkam tahalha srëmkam lowehe gwek, zep angkam zen dikire ngalap naban lowehe gwek. Zen man zënaka nenbirida gwek, 'Ëe an tingan teipsin-teipsin enna. Ëe molyë ëtahalha gwek, hen ëe molyë we sem mo kim gona tak.'

⁸ Zen in zep, sap zen kirekam ëbolte-bolte gwe-gwek, zen zep sa aha-ere yaklakam Abon onakore hëpna hla nul- enlala dowe hanan hap dena, usak yala ban de lowehen hap dena, hen juwen hap dena. Zen sa syauknuk ëhweistil, sap Ëe an Bian Alap Soson Zi nikë kirekam karek tabi'in!"

⁹⁻¹⁰ Kim ë yala Babel hweistii'inka, auhu-kamanak de teipsin-teipsin wenya men zen ëna iwe kire-kirena lirak da gwibik, hen zëwe de zi mo lowehen san ang ta gwek, zen langa nakon butna sewennak kara nuk. Sal-sal aïrïn hïp hom zë ëgolek de gwek. Zen zep bunnunawabik hen anakan sei gona ta'ak, "Ali tol! Kwasang! Ëna in menkam teipsinni hen tatete tanganna, hwëna aha-ere jamkam mes tol hwei-swis gwenda!"

¹¹ Auhu-kamanak de kire-kire lirak ta gwibin zini hen ë yala insa gosa dablak. Sap aha ëna kirena hom- zao de etan kire-kiresa lirak ta gwibin hip denaye.

¹² Sap menkam kire-kirena insa bulkum lirak ta gwibin hip kap dahal gwezak-

emas nakore kire-kirena, perakkam dena,

kaso lilingtinni, sasyan dawemna, hen kaen ngap-ngap dawem-dawemna,

ok eis makare kal-kala, hen sam dan kil makarena, hen ahakon sin-sin tangan wenyaka.

Tenya kore kire-kire syal gwibinni hen ki lop dahal gwezak- sap te irase dawem nabare tenya korena, hen sap sërkam de nwe awes tenya korena.

Ahakore kire-kirena zen srin makare ngap-ngap naka, hen tembaga nakorena, hen besi nakorena.

Hen ahakon kaso nwe-aweskam de syal gweblan dankam dena.

¹³ Tembanena hen menkam zëwe lirak da gwibik-

sap minyak, tepung dawem, hen gandum dan, sap kayu manis, hen tembanesa de dërek gun hup de kire-kirena.

Anggur hona hen ki.

Irase dawem nabare kire-kirena hen ki lirak da gwibik-

sap tim hip dena, hen ang gun hup dena.

Zen hen menkam otweran zahona man zë lirak da gwibik-

sap sapi hen domba.

Zen hen kudana lup nulhal gwezak- hëndep ahakon kereta zeban.

Hen zini man hen dahyohal gwezak- te-ala hap de zë lirak tabin hip, dekam de zëbon mae tana iltikinnik ëbabu gwe-gwen hap.

Hwëna angkam banak molya kirekam lirak da gwibik, sap ë yala in mes timbwas gwerä.

¹⁴ Kire-kire lirak ta gwibin hip de zini in ki zep ëna insa enlwan hap nenblak,

"Sërkam de dawem kire-kirena mensa sap zini bi gweblandan hap dëblanda gwenan, zen mes tol ebon mae onakon ëjek-jak gwenda. Ali tol! Eno mae mo te-ala mamkam de lop tan kire-kirena mes tol zalta dep ëhwei-swis gwenda. Em molye etan hla landak."

¹⁵ Zep kire-kire lirak ta gwibin zini men zen te-alana ëbeya gwe-gwek ëna iwe de lirak ta gwibinkim, zen langa en nakon ëzauk- syauk sal-sal aïrïn hïp. Zen man anakan gosa dabik,

16 “Ali tol! Ë yala in, kwasang tol! Zëwe de zini menkam kaen dawem-dawem ensa alala da gwëk-dawemkam de ngap-ngap naka, hen ok eis makare kal-kalaka, hen sam dan kil makare naka. Zëno mae mo wër gwen hap de kire-kirena menkam dawem-dawem tanganna- sap emaskam dena, sap kaso lilingtinnî hen sasyan dawem-dawem maena.

17 Hwëna aha-ere jamkam kire-kirena in mes tol ëhwei-swis gwenda.”

Bul bina, hen golësek gwe-gwen hap de wenya, hen zëwe de syal ta gwen wenya, hen kitak men zen buluk ang ta gwëk, zen hen kirekam langa en nakon ëzauk.

18 Kim syauk butna insa sewe sennak hla nuk, zen hen ë yala insa gosa dabla'ak- mae hap, “Okamanak ahana hom- kirekam de ë yawalaye.”

19 Zen dekam zep bunnunawabik- anakare sei go naban,

“Ali tol! Ë yala in, kwasang tol! Zëwe de zini te-alana sërkam de beya tanganna. Ëe zebë kire-kirena desan dep kap lahal gwëk- lirak ta gwibin hipye. Ëe hen dekam zebë te-alana ëbeya gwëk. Hwëna zen mes tol aha-ere jamkam hwei-swis gwenda.”

20 Hwëna Alap mo dam taha nakore zini in * kim kirekam hlauku, dekam zep tangan anakan isrip-sri gwëka,

“Ngatan zi mo langnak de wenya, em ëisrip-sri gwen, sap Alap mes ë yala insa timbwas tanda! Alap mo irik ginnik de bitî gwen wenya, hen em in zen zëre mo ola ol halada gwëk hen ayang ulida gwëkke, em kitak ëisrip-sri gwen! Sap ëna iwe de zini man emsa karek da gwibik, zen in zep hwëna Alap desa heip guluda.”

21 Ki zep hwëna ahanik Alap mo dam taha nakore zini soson tangan nik kaso yawala gul ineka- sërkam

de dohon-hon tangaran naka. Ki zep hinak tak gul ineka. Zen man hen anakan gu aneka,

“Ë yala Babelsa an kirekam sa Alap zer anera, hëndep karekkam sa tak ta inera, hëndep sa jek-jak tala.

22 Zëwe molya etan gitar maena nyublandak,

hen sulingni molya nenblandak.

Sramin aukuna hen molya etan zëwe ësane gwëk.

Sap men zen kire-kire dawemna syal nëblanda gwëk molya zë etan lowehék.

Hen gandum dan maesa de ils ti gwibin aukuna molya zë etan ësane gwëk.

23 Lampu ngatanna hen molya zë etan kara dak.

We-zi daresa de oto sonnak de isrip-sri ola molya zë etan ësane gwëk.

Zëwe de kire-kire lirak ta gwibin zini man tangan sap okamanak ëteipsik gwëk,

hwëna zëno mae mo meiyerak de hlaun zini hen man boton owas-owassa syal nei gwibik, hëndep zep okamanak de zini kitak gwi nulsukink.

24 Sap zen Alap mo olsa de ayang gun hup de zisi hen Alap mo hlil irin wenyaka tingare lang san dameranda gwëk, zep sa Alap ëna iwe de zi hip zëno mae mo kala ngëro gulzimdi.”

19

1 Zen kim hya gwesik, ki zebë hwëna ngatan zi mo lang nakore zi beyam-bya de ol mamkam ëtakeran ola anakan sak,

“Haleluya!* Nëre mae mo Alapsa nen boltere tan,

sap ëngaya gwen hap dena hen sosonna kitak Zëbon onak.

Zen en teipsinnî.

2 Sap zëno zisi de klis gunnu damdam en tangankam.

* 18:20 18:20 Why. 18:1-2 * 19:1 19:1 “Haleluya” zen Ibrani mo ol. Zëno enlalana, “Alapsa nen boltere tan.”

Bëjen mae tautek gun.
Zen mes ë yala Babelsa hëp tyaka,
sap zëwe de zini tîngare zisi yang
tasîn alap-alapsa dikim ang
gwibirida gwen hap yasik da
gwibik.

Zep zini Alap mo nwenak kahalo
soston we wal mo kim ënwe-
mase gwe-gwek.

Zen hen Alap hon de syal ta gwen
zisi damera gwek.

Zen in zep Alap zëno mae mo kala
zëbe mae hap ngëro gulzimmira."

³ Etan ki zep mamkam ëgu anek,
"Haleluya! Alapsa nen boltere tan,
sap syauknu men zep ëna in hwei-
swis gwe'ara,
zëno butna sa hëndep denaban
sewese gwer."

⁴ Alap mo alpna de 24kam de
teipsîn-teipsîn wenya hen dan-nër
dan-nërkam de otweran makare
zini in, zen dekam zep ëik gwe
hezak- Alap hap de anakan
dawemsa golblan hap, "In eiwa
tangan. Haleluya!"

*Yohanis kim hamal hap Alap mo
Domba Tane de irik gin hip de tem-
bane yawalak hlaludakake:*

⁵ Ki zep Alap mo komal tum alpna
in kon ola wet sok,
"Tîngare Alapsa de betek gweblan
wenya,
nen boltere tan-
tîngan men zene Alapsa blikip eisik
gweblananke,
sap mam-mam wenya hen bete-tek
wenya."

⁶ Dekam zebë hwëna ola sak-
san de sërkam de zi tra de ëtaken
gwenna. Ol aukuna in san de hi
de mamkam ngëp gwenna, ahaksa
san de ngli de mamkam tadre song
gwenna kiye. Zen man ëtaken
gwe'ak,

"Haleluya! Alapsa nen boltere tan,
sap nëno mae mo Bian Alap Soson
Zini
Zën angkam kitak nësa irik gi'ira!

⁷ Nen terya ban isrip-sri gweblan.

Nen boltere tan, sap Zen en
teipsinni.

Sap Alap mo Domba Tane hap de
we oto gulblun yaklanak mes zau-
nun,

hen we golgublun zem in
mes zëwe dep zënaka weir gulsu-
nun.

⁸ Alap mes we zem in hap deyol
dawemna
sërkam de ngap-ngap angtan-
angtan naka teisyabirki-
dekam de zënaka weir gulsun
hupye."

Gulk sun de ola awe, Domba Tane
mo wenya, zen tîngare Alapsa de
betek gweblan zi. Hen deyol dawem
zem, zëno enlalana, dawemna
mensa Alapsa de betek gweblan zini
syal nei gwibirinke.

⁹ Ki zep Alap mo dam taha nakore
zini men† etan asa gubluka,

"Ansa ale gul: Zini men desa Alap
dam tasibirki, zen de Domba Tane
hap de we oto gulblun tembane
yawalak ang tan hap, zen hë'ho
gwibin tangan naka sa hla nul."
Dekam zep etan abe hap ola mas
gubluka,

"Ola an eiwa de tanganna, Alap
zëre onakorena."

¹⁰ Èe ki zebë Alap mo dam taha
nakore zini in mo nwenak ik gwe
hezak- dekam de desa boltere tan
hap. Hwëna ki zep asa gubluka,

"Asa bahem boltere tan. Alap
ensa em boltere tan. Sap ëe hen
Zëbon de babu gwen zi, eban ap-
denak. Hen aya-wal oso-wal om
men zen Yesus hup de ol dawemna
nolluwe gwenan, deban mae hen
apdenak. Sap tîngan men zen
Yesus hup de ol dawemna nolluwe
gwenan, zen kitak Alap mo Enho
naban."

*Yohanis kim hamal hap Yesus de
teipsin zi mo kim kuda tahan nakon
golëeijahal zannak hlaludakake:*

¹¹ Ki zebë hwëna kara gwek-
ngatan zi mo langna mes dalusu-
nun. Zao zebë kuda ngap-ngapna

† 19:9 19:9 Alap mo dam taha nakore zini in, men zen nonol Why. 17nak tonblakake.

hla tak. Men zen kuda tahannak nikin ane'anka, bosena "eiwakam hen tatetekam de Alap hap denaka golluwe gwen hap de Zi." Zen mae hap ki kirekam bose dak: Sap zëno zisi de klis gunnu hen golejanna dam-dam enkam- Alap mo dwam gwibin en san.

¹² Zëno nwena syauk hî-hitînnî kiye. Hen nolak de mire sigina beyam-byana. Hen mirenak alena man. Zen zëre mo aha bose, hwëna bosena in aha zi bëjen tame gun. Zen diki Zë-en tame gu'ura.

¹³ Baju blal zem, kal bles-bles nabare naka ala soka. Zini in mo aha bosena "Alap mo ola bare Zini."

¹⁴ Ngatan zi mo langnak de jana nabare wenyâ man ang nê sebla halzak. Zen hen kuda ngap-ngapnak teinikin halzak. Zëno mae mo pakeanna hen ngap-ngap tanganna.

¹⁵ Zëno mahala nêbok ben-ben makare nik te so gwebla'anka. Zen dekam sa tîngare zi ausuna karek tabiri. Zen Zen sa tîngare zi aususa tatete tangankam irik gîli. Hwëna men zen Teipsîn Zini Alap mo jalak lowehe gwenan, desa sa timbwas tabiri- men kiye, anggur dansa de tanakam de zaublun dankam na tanna.

¹⁶ Zëno bajunak, ik dan jam en, a kirekam mo zë zëre mo aha bosena ale nuk, "Teipsîn Zini Bian, tîngare teipsîn zi mo Teipsînnî."

¹⁷ Hwëna ki zebë Alap mo dam taha nakore zini ahana hla tak-yakla nwe tahannak de zauk anenak. Ol mamkam zep kon takenka,

"Tîngare mawana em in zen gulk sun ëihe nasen'anke, haen! Em tagam gwezan- tembane yawala ansa Alap ebe mae hap tehazim'irake, zëwe de ang tan hap!

¹⁸ Tîngare mawana, haen! Teipsîn-teipsîn wenyik mo tok-tok naka eka olgwenblandak- hen jana nabare zi mo tok-tok naka, sap mam-mam wenyâ hen bete-tek wenyâ, hen sap kuda tahan nakon de ëeija gwen wenyâ, hêndep kuda

tok-tok zeban. Haen, tîngare lang nakore zi tok-toksa eka olgwenblandak- sap zi mo tana îltikînnîk de teinikirin zi mo tokna, sap zisi de bi gwibiridan zi mo tokna, sap bose nabare zi mo, sap bose srêm zi mo tok-tok naka."

¹⁹ Ki zebë hwëna etan otweran dowal yala insa hla tak.* Auhukamanak de teipsîn-teipsîn wenyâ mes desa eijannak de mas gweblan hap tagam neisîblik- hêndep zëre mae mo jana nabare zi niban. Zen dekam zep kuda ngap-ngap tahanak de nikirin Teipsîn Zini in han nêreijak.

²⁰ Zen zep hwëna zëre mo jana nabare zi niban otweran dowal darena insa zibalk soka. Nonol hi mwa nakore otweran dowal yala insa zibalk taka. Etan domba mo nola kore hli nabare dowala* insa zibalk taka- men zen boton gwekake, "Ëe an Alap mo olsa de ayang gul gwen hap de zi." Zen in men zen owas-owasna syal gwegwibirkike- otweran dowala in osan dep dikim yasik ta gwibin hip. Men zen ang nê gweblak, zen men zen otweran dowala in mo bose hap de nomora timnik makan dabiridak, hen men zen otweran dowala in mo nwe-masekam de yang tasîn dowala insa boklena kom da gweblakke. Hêndep dowal darena insa ki zep ngaya naka sêrkam de syauk bla hî-hitî sal-salak hiri nososek.

²¹ Kuda tahannak de nikirin Zini in dekam zep zëno nik mo jana nabare zini zëre mo nêbok ben-ben makare mahalkam tamerasîki. Mawana dekam zep zëno mae mo tok-tokna dwenblan dazak, hêndep man tangan sêrkam ëitri gwek.

20

Yohanis kim hamal hap dowal mo kîgîna tahalen naka hla takake:

¹ Ki zebë etan Alap mo dam taha nakore zini ahana hla ta guk-ngatan zi mo lang nakon de ati gwe zannak. Tahakam juwen zi mo

* 19:19 19:19 Why. 13:1-10 * 19:20 19:20 Why. 13:11-17; 14:9-11; 16:2

bwi kawesinnik dep de kunci naban besikam de dokot hak dohon-hon naban ein ha'an zaka.

² Zen zep jalom yala insa * balk taka- orep de wanya yala in saye, mensa nen gweblanan "dowal mo kigi" kam ahaksa, "Zi Golluwe Bak" kam. Desa zep besikam de dokot hakna inkam tahaleka. Zen tahalen nik sa gwë gwera- holona seribu tahun enkam.

³ Ki zep hëndep juwen zi mo kama hulak de bwi kawesinnik dep tak ta ineka. Zëna dekam zep lilikinni insa kuncina inkam solhlasik inki. Mae hap kirekam gwëblaka: Zen de etan zi aususa yasik ta gwibin srëm hap, seribu tahunna in de tap gwesin srëmnak. Hwëna zëno hyanak, dekam sa etan hil di soner, hwëna dekam molya etan okamanak holo gweka.

⁴ Ki zebë hwëna teipsin-teipsin zi mo teinikin gwen komal tumna hla tandak. Hen zini men zen zë teinikin'ik, zen men desa Yesussu de ang gweblan jal hap hen Alap mo ol jal hap damera gwekke. Zep zen hom otweran dowala in hap boklena kom da gweblak, hen otweran dowala in mo yang tasin dowala in hap hom kom da gweblak. Zen hen man baes tak-zëbe hap de nomorsa de mirenak ahaksa tahanak makan gunnu. Kire jal hap zep hëndep ahakon nola blom dasibir-zimk. Hwëna zen zep etan de ëngaya gwenkam teipsinkim teinikink, sap Alap man zëbe mae hap golzimki- zen de seribu tahunna inkam Kristus mae han apdenak irik gin hip.

⁵ Zen zen sa ënonol gwer- tin nikon de ëngaya gwenkamye. Hwëna ahakore juwen wenya, zen seribu tahunna in mo hyanak sa ëngaya gwer.

⁶ Zini in zen de nonol ëngaya gwe'ak, zen hë'ho gwibin tangan naka sa hla nul gwer, hëndep zep sa Alap mo dang gwën nakon ëgwë

gwer. Alap de aumwa hap zisi klis gunkum zen molya noltowek-mensa nen gwibirin, "Hëndep de tin hip dena." Hwëna zen Alap ne Kristus nebon sa lowehe gwer- Alap mo golak de syal ta gwen zi mo kim. Zen Kristus mae han sa apdenak irik nil gwer- holona seribu tahun enkam.

Dowal mo kigisa de aumwa hap balk tan hap de ol:

⁷ Seribu tahunna in kim de taman'ak, etan dekam sa dowal mo kigina insa bwi nakon hil di soner.

⁸ Zen dekam sa etan tingare lang san tingare zi ausuna yasik tabir song gwera- sap yakla hata sezan san dena, nikin anen san dena, hëndep eiha-lip eiha-lip san dena. Zi ausuna insa man Alap mo hamal hap de olak ol gulk sun de blaorankam bose nuk "Gog ne Magog ne."* Zen desa sa eijan hap tagal gulsulu, hen zëno mae mo beyana san de hinak de hisglimni kiye. Aitbinkim bëjen sul sonen.

⁹ Jana zini in sa tingare lang nakon sek gwe song gwezal- Alap mo irik gin wenyik mo ë yalsa de hatablazan hap, Alap mo dang tini tan ë yawala insa. Hwëna syauknu dekam sa ngli nakon ati gwe zala-zao de ehwei-swis gwen hap.

¹⁰ Hwëna dowal mo kigi, in zen yasik ta gwibirki, desa sa Alap mo dam taha nakore wenyik sërkam de syauk bla hi-hitin sal-salak hiri daser- men zao nonol dowal darena insa hiri noso sekke. Zen zao sa hëndep denaban sërkam de sangsang karek tangannak nolëlowehe gwer.

Yohanis kim hamal hap aumwa hap de zisi klis gunnuk hlaukuke:

¹¹ Zen kim hya gwesik, dekam zebë Teipsin Tangan Zini Alap mo komal tumna akek. Zen yawal tanganna hen sërkam de ngap-ngap tanganna. Zëna zëwe nikin'inika. Ngli naban okama naban hëndep

* **20:2 20:2** Why. 12:1-9 * **20:8 20:8** "Gog ne Magog" nikip de ola, emki hlaun Yehezkiel 38-39nak.

dekam zep jek-jak nêk- san de but de yakla sal-sal hap jek-jak gwen makan.

¹² Ki zebë hwëna juwenkam men zen teingir gwe guk desa hlauludak-sap bose nabare wenyä hen bose srëm wenyä. Zen Alap mo dang gwën nakon ëzau'uk. Alap mo dam taha nakore zini dekam zep bukuna kwala-kla dabik- men zëwë zi mo auhu-kamanak de syal gwibinni ale nul gwëkke. Aha bukuna hen man kwala nosok, zen hëndep de ëngaya gwen hap de wenyik mo bosemse nabare bukusa.* Alap ki zep klis gu'unka. Men kire enkam zëre mae mo syal gwibinni bukunak iwe lwak, kire enkam zep klis gulku.

¹³ Hi yala dekam zep hen, men zen zëwë ëkei-king gwëk, desa etan tapblap-bla guk. Juwen zi mo langna dekam zep hen zëwë de lam tabin zini tapblap-bla guk. Desa hen Alap man klis gulku- men kirekam zëre mae mo syal gwibinni hen bukunak iwe lwakke.

¹⁴ Juwen zi mo langna dekam zep sërkam de syauk bla hi-hitìn sal-salak hiri da inek, sap zao molya etan zini bitì gwëk. Syauk blana in, desa hen man nen gweblanan, "Hëndep de tìn hip dena."

¹⁵ Zini men zëno mae mo bosem-sesa ale dabir-zim srëm gwëk hëndep de ëngaya gwen hap de wenyik mo bosemse nabare bukunak, desa hen man syauk blana iwe yal nulsek.

21

Yohanis kim okama ëse naban ngli ëse naban hamal hap akekake:

¹ Dekam zebë hwëna okama ëse naban ngli ëse naban akek. Sap okama ëpba naban ngli ëpba naban mes jek-jak nêk- hëndep hi mae naban.

² Ki zebë hwëna ë lalak yawala insa hla tak- kim ngatan zi mo lang nakon ati gwe ine'an zaka, Alap zëre onakon. Zen Yerusalem ëse. Desa

Alap Zën hamal taka- zao de Zën zi niban golëlowehe gwen hap. Zep dawemkam wër tyasiki- san de we ësesa de weir gulsunnu kiye.

³ Ki zebë hwëna ola sak- Alap mo komal tum alpna in kon kim mam enkam ëgu anek,

"Alap angkam apdekam zi niban golëlowe he'ara.

Zën sa tìngare zi ausuna bi gwibiri-dala,

hen kitak sa betek në gweblal.

Zën sa golëlowehe gwera.

⁴ Zen sa zëno mae mo nwe go-hona ngan tasibir-zimdi.

Dekam molya etan juwenna hla nuk.

Go naban enlwan naban hen sang-sangna dekam etan hom-zëbon mae onakye.

Sap ëpba lowe henna in mes jek-jak gwëk."

⁵ Hwëna Alap ki zep gu aneka,

"Aenë angkam kitak ëse gu'un."

Ki zep hen asa gubluka,

"Ola ansa ale gul, sap an eiwa de tanganna.

Taiblibin hip man tangan dakasti'in."

⁶ Etan ki zep gu aneka,

"Angkam mes sowe henan!

Ëe an nonol lonesen nakore Zi,

hen aumwa topnak de Zi.

Auhu-kama yang gulsun srëmnakë gwëk,

hen okama hom gwennak Ëe nama asa gwë gwer.

Men zen de ëho-hole gwe'ak, Ëe asa zëbe mae hap golzim-

dekam de hëndep de gwën hap de aili ho nakore hosa totoresa otdebin hip.

⁷ Men zen de Abon onak tatem ëzau'uk,

zen dawemna insa sa hla nul.

Ëe asa desa golëlowehe gwer,

hen zen ano walaskam sa lowehe gwer.

⁸ Hwëna enlala karek-karek zini, desa sërkam de syauk bla hi-hitìn sal-salak sa yal nulser-

* 20:12 20:12 Why. 3:5; 13:8

mensa nen gwibirinke,
 'Hëndep de tin hip dena.'
 Karek gol gwen zini, zen a kirekam
 de zisi moye:
 Tatetekam de zaun srëm wenya,
 zini men zen ëk enkam ëKristen
 gwek,
 enlala hole-hle zini,
 zi tan zini,
 kahalo sosen wenya,
 meiyerak de hlaul gwen zini,
 yang tabin dowalsa de betek
 gwibirida gwen wenya,
 hen boton tam zini.
 Zen kitak syauk bla san de yal
 gulsen hap dena- mensa nen
 gwibirinke, 'Hëndep de tin
 hip dena.' "

*Yohanis kim Yerusalem ësesa
 hamal hap hla takake:*

⁹ Dekam zep ahanik in zen tu-
 jukam de aumwa hap de jala bare
 panci hona okamanak hlei nulsukin
 gwe'ak abon onak hata zaka. Ki zep
 zë asa gublu zaka,

"Haen. Anik Alap mo Domba
 Tanena in hap de we golgublunna
 insa ep goltrëblak."

Hwëna eiwakam de wesya hom en-
 lala gwibirki. Zen hwëna Yerusalem
 ësesa ki enlala gweblaka.

¹⁰ Zao zep Alap mo Enhona asa etan
 bi gweblaka, ki zep hëndep Alap
 mo dam taha nakore zini in kwatap
 yawal san dep asa zersong gweka.
 Dekon zep ë lalakna Yerusalem
 ësesa abe hap zertrëblaka. Ëna in
 dekam Alap zëre onakon ati gwe
 ine'an zaka.

¹¹ Ëna in ngatan tanganna hen
 angtan-angtanna, sap Alap Zëna Zen
 zëwe gwë gwenda. In zep kirekam
 tangan ngatan gweka. Zëno angtan-
 angtan gwenna, menkam te-ala
 ësesena, menkam kaca ngap-
 ngap makan- san de kaso lilingtin
 dawemna kiye.

¹²⁻¹³ Ëna in zëno alp-alp san de
 kola gulk en tanganna. Lilikinni
 dua-blas enkam. Yakla hata sezan
 san dan-ahan, yakla nikin anen san
 dekam hen dan-ahan, eihya-lip san
 dan-ahan, hen eihya lip san dan-
 ahan. Alap mo dam taha nakore
 zini aha-en aha-enkam dua-blaskam
 de lilikinni insa kara da gwibirin.
 Lilikinni in Israel mo dua-blaskam
 de zi ausu mo bosemse naban.

¹⁴ Ëna in mo kasokam de mokona
 dua-blas enkam. Zëwe mes Alap
 mo Domba Tane mo dua-blaskam de
 dam tasibin zi mo bosem-sena aha-
 en aha-enkam ale dabir-zim nirak.

¹⁵ Alap mo dam taha nakore zini
 in debanë aïsïl ë'ak, zëno emas
 nakore metera ki- ëna insa dikim
 ukur tan hap dena, sap lilikin-
 lilikinni hen kasokam de kol kong ta
 zahenna insa.

¹⁶ Ëna in, zëno lwanna persegi em-
 patkam. Alap mo dam taha nakore
 zini in dekam zep metera inkam
 akasiblika. Ëna in mo blala eihya
 san dep 2400 kilometer enkam.* Ei-
 hya san dep hen ki en, hen eihya-lip
 eihya-lip san hen kire enkam. Zëno
 gulk sun de blala hen kirekam- 2400
 kilometer enkam.

¹⁷ Ki zep hwëna Alap mo dam
 taha nakore zini in kasokam de kol
 kong ta zahenna insa meter tankam
 akasiblika. Zëno gulk enna 66 me-
 ter enkam zep lwak. † Metera
 in dekam meter taka, zen apdenak
 blala- mensa hen auhu-kama zini ba
 maesa dikim akasibin hip nurensik
 gwenanke.

¹⁸ Kol hap de kaso kong ta za-
 henna in, zen te-ala ësesekam de
 kaso lilingtin nikon de syal gweblan
 danna. Hwëna ëna in zen emas
 tangankam syal nëblak- lalak tan-
 ganna, san de kacana kiye.

¹⁹ Hwëna ëna iwe de kaso
 mokona, zen mes kirekam-kirekam
 kaso lilingtinkim nwe-awes da
 zahek. Hen dua-blas enkam de

* **21:16 21:16** "2400 kilometa," Yohanis man ale gulku "dua-blas ribu stadia" kam. Nomor-nomora buku Wahyunak zen gulk sun de enlala naban. ¹² mo enlalana, Israel mo zi aususa de enlala gwibiridan, ahaksa Yesus mo dam tasibin zini. † **21:17 21:17** "66 metera," desa Yohanis man ale gulku "144 ribu pekus" kum.

kaso mokona in, zen hen kaso lilingtinkim syal neblandak. Nonol kasona, zen te-ala esesena. Zao dena ngli kailim kakakna. Zao de wenya te-ala esese ngap-ngapna. Zao de wenya te-ala esese naban yong-yong naban de siri nenna.

²⁰ Zao de mokona, kaso lilingtin kal-kala ban kakak naban. Zao dena, kal-kala ban ngap-ngap naban. Zao dena, yong-yongna- san de kacana kiye. Zao de wenya, ngli kailim kakak naban te-ala esese naban. Zao dena, yong-yong tanganna. Etan zao dena, te-ala esese naban ngap-ngap naban. Zao dena, zen kal-kala ban yong-yong naban de siri nenna. Aumwa hap dena, zen sam dan kil makarena.

²¹ Dua-blaskam de lilikinni in kitak kaso ngap-ngapkam de syal gweblan danna- san de sasyan ngap-ngapna kiye, kirekam de kaso nakon. Aha-ere lilikinni zen aha-ere kaso yawala kon de syal gwiz-imdinni. Ena iwe de ora-orana zen emas tangan nakon de syal gweblan danna. Zeno lalakna men kiye- kaca lalak tanganna.

²² Ee homö ena iwe Alap mo gola hla tak. Soson Zini Bian Alap Zena, Domba Tane zeban Zen Zen nwe-mase e gwe'ara- san de zewe de gola kiye. Sap zewe de zini Zebon nebon en sa lowehe gwer.

²³ Ena iwe yakla naban ben naban ba hap de zin hip? Sap zewe Alap Zen Domba Tane zem in han serkam ngatan e gwenda.

²⁴ Tingare langnak de zini sa ena in mo ngatannak lowehe gwer. Hen teipsin-teipsin wenya sa zere mae mo irik ginnik de kire-kire dawemna ena iwe dep kap dahal gwezal.

²⁵ Ena iwe de lilikin-lilikinni molya nasohlasik gwek. Talusun en nik sa elwa gwera, sap zewe kawesinni hom.

²⁶ Tingare lang nakore kire-kire dawemna hen he'ho gwibin hip dena sa kap dahal gwezal.

²⁷ Hwena enlala karek-karek zini,

hen men zen kirekam-kirekam karekna nurensik gwenan, hen boton tam wenya, zen molya tangan ena iwe biti gwek. Diki men zeno mae mo bosem-sesa ale dabir-zimk Domba Tane mo engaya gwen hap de zi mo bosemse nabare bukunak, zen zen en sa biti gwer.

22

¹ Ki zep hen Alap mo dam taha nakore zini in ena iwe de weyana ap goltreblaka. Zen hendep de egwen hap de weyasa. Weyana in lalak tanganna- men kiye, kaca lalakna. Zen Alap zere mo komal tum nakon tine gwenan- men zewe Zena Domba Tane zem in han inikin gwendake.

² Weyana in dekon tine gwenan ena iwe de ora ngirinnik. Hen ho alpnak iwe engaya gwen hap de tenya hen ki eiha-alp eiha-alp san ezauk sone gwenan. Zen ben jamkam eini ete gwenan. Zeno ala nakon sa tingare zi ausuna sang-sang nakon edawem gwe-gwer.

³ Alap mo husus gwibinni bejen ena iwe etan jowen, sap Zen dekon sa Zena Domba Tane zem in han zeririk gil gwera. Zewe de zini Alap en hon sa lowehe gwer.

⁴ Zen sa Alap mo nwe-masena kara da gweblal, hen Alap sa zere mo bosena zeno mae mo mirenak ale tabir-zimdi.

⁵ Zen molya yakla ngatan naban lampu ngatan naban dwam neiz- imk, sap zewe Bian Alap Zen sa yakla mo kim ngatan gwe-gwera. Zewe de lowehen wenya dekam teipsin zi mo kim sa tingare langna hendep denaban irik nil gwer.

An aumwa hap de ol zim-zim:

⁶ Hwena ki zep Alap mo dam taha nakore zini in asa gubluka,

"Kitak mensa namen sane gwenda, zen eiwa dena hen taiblibin tanganna. Zini men zen Bian Alap mo ola aha zi hip ayang nulzimmira gwenan, zen Bian Zena desa enho nakon gollelowehe

gwenda. Zen zep namen asa zer sonera- dekam de kitak Zënaka de betek gweblan wenyä ebe mae hap hamal hap anakan goltreiz- indin hip, 'A kirekam sa nabakam jower.' "

⁷ Yesus hen dekam zep gu aneka, "Emki äsan: Ëe asa nabakam hatazal. Men zen de bukuna an mo hamal hap de ol tan-tan san ang ta'ak, hë'ho gwibinni zëbon mae onak lwa'an."

⁸ Ëe an Yohanis mesë kitak ansa ëre mo nwekam hlauk hen ikim sane gwëk. Kim hya gwesik, ki zebë Alap mo dam taha nakore zini in mo nwenak ik gwe hezak- in zen kitak abe hap goltrëblaka, dekam de desa boltere tan hap.

⁹ Hwëna ki zep asa gubluka, "Bahem! Asa bahem boltere tan. Sap ëe hen Zëbon de babu gwen zini in ki hen em, hen in ki hen wal bose wal om, in zen Yesus hup de ol dawemna ayang nulzimnira gwenanke. Ëe hen deban mae apdenak- tingan men zen bukuna an mo ol san ang ta gwenanke. Diki Alap Zëna en naka em boltere tan."

¹⁰ Ki zep etan asa gubluka, "Bukuna an mo hamal hap de ola bahem aning gun, sap angkam mes kirekam de kitak jowen hap denak golek de gwër.

¹¹ Zi jal-jala dikire jal-jal enkam lowehe gwëk.

Men zen enlala karek-karek naban lowehe gwenan, dikire zëre mae mo timsi karek nul gwëk.

Men zen Alap mo dwam gwibin sin ang ta gwenan, dikire desan en ang ta gwëk.

Hen enho lalakkam de lowehe gwen wenyä, dikire kire enkam lowehe gwëk."

¹² Yesus ki zep etan gu aneka, "Emki sap ëenlala gwen: Molya holo gwëk Ëe ki asa hatazal.

Dekam asa tingare zi hip golzimzir- men kire enkam zëre mae mo syala lwazimkye.

¹³ Ëe an nonol lonesen nakore Zi hen aumwa topnak de Zi.

Okama yang gulsun srëmnakë gwëk,

hen okama hom gwennak Ëe nama asa gwër.

¹⁴ "Zini men zen zëre mae mo pakeanna ano kalkam ngan dasibik hë'ho gwibinni zëbon mae onak lwa'an.

Sap zëbe mae hap Ëe asa golzim- dekam de ëna awe bitï gwen hap denaye,

hen ëngaya gwen hap de tetan dansa de twenblanda gwen hap denaye.

¹⁵ Hwëna anakarekam de zini molya awe bitï gwezak:

Enlala kawesin zini,

meiyer hlauk gwen zini,

kahalo soson zini,

zi ta gwen zini,

yang tabin dowalsa de betek gwibirida gwen zini,

hen boton tam zini.

Kirekam de zi hip hen mes srën ëna hamal dazimk.

¹⁶ "Ëe an Yesus. Ëe mesë ëre mo dam taha nakore zini insa Yohanis hip zer soneblak- zen de hamal hap de ol tan-tanna ansa Yohanis hon tingare Kristen zini ebe mae hap golzimdin hip. Ëe an Daud Bak mo ausu nakon de saltin Zini- mensa nen guk gweblakke. Ëe an Zen- hleng gwen hap de zil gwen keis niye." *

¹⁷ Alap mo Enhona man gu'ura, "Alap mo Domba Tanena in dikire nabakam hatak!"

Tingan men zen ansa ësane gwenan, dikire hen anakan ëguk, "In eiwa, dikire nabakam hatak!" Domba Tanena in sa deban mae

* **22:16 22:16** Israelsa de ngayä tabin hip de Zini, desa hen man enlala në gweblak, "Zen keis makan sa zil ine zala." (Bil. 24:17)

golëlowehe gwera- san de we wal zeban de golgwë gwenna kiye.

Sap Yesus Zën gubirida'ara,
 “Men zen ëho-hole gwe'an, emki
 Abon onak yaing gwezan.
 Sap esa totoresa ëngaya gwen hap
 de hona ansa ulin-
 ba maesa de syal gwibin srëmkam!”

¹⁸ Ëe, Yohanis, ëe ama jalse gwen ola ansa ebe mae hap golzim'in-tingan men zen bukuna awe de hamal hap de aïsili ansa ësane gwe-gwenanke: Men nara zëre mo en-lalakam aïsili an kon mas-mas nu'ik, Alap sa zëbe mae hap karekna mas gulzimdi- men kirekam okamanak de zisi de heip gun hup de ola bukuna awe lwakke.

¹⁹ Hen kirekam- men nara bukuna an kore aïsili jek-jak gunnu. Kire zini molya ëngaya gwen hap de tenya in mo danna dwinbik, hen molya ë lalakna iwe bitï gwëk- men kirekam bukuna awe srip gulsukye.

²⁰ Dekam zep Yesus, men zen tingare bukuna de ola ansa nëbe mae hap golzim'ira, etan gu aneka,

“Eiwa tangan, Ëe nabakam asa hatazal!”

Ëe ki zebë ding gulbluk, “In aïris, Bian Yesus! Emki nabakam hatazan!”

²¹ Aya-wal oso-wal, dikire Bian Yesus mo kwasang-kwasangna tingan ebon mae onak lwa gwëk.